



Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.2.1.3/1





Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.2.1.3/1




Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.2.1.3/1




Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.2.1.3/1

Ald. 2/1.



Ex Libris Joannis Nencini
1874



EPISTOLAE
D. HIERONYMI, STRIDONIENSIS,

ET LIBRI CONTRA HAERETICOS,
ex antiquissimis exemplaribus, nunc primum, opera, ac
studio Mariani Victorii Reatini emendati, eiusdemq.
argumentis, & scholiis illustrati.

Adiecta est operis initio Vita D. Hieronymi, olim falso
ab Erasmo, aliisque relata, quam idem MARIANVS
ex eius scriptis collectam primus edidit.

Paginarum lateribus testimonia Sacrae scripturae, a D.
Hier. citata, quae in Erasmi editione deerant,
ab eodem MARIANO apposita.

Index locupletissimus, nouo quodam modo, ueluti summa
quaedam operis, ordinate contextus, ab eodem
MARIANO compositus.

Loca Sacrae scripturae, a D. Hieronymo explicata.



ROMAE, M D L X V I,
Apud Paulum Manutium, Aldi F.
IN AEDIBVS POPVLI ROMANI.

+



PIO QVARTO PONTIFICI

M A X I M O

Marianus Victorius Reatinus.



QVOT quantane sint Beatissi-
me Pater, ac semper fuerint ad-
uersus catholicā Ecclesiam hæ-
reticorum commenta; & qui-
bus artibus, uasritiisq. eā de-
struere conati illi sint, explicari non potest.
ex his autem nulla magis noxia impetiti-
umquam fuit, quā cum sub domesticorum,
& orthodoxorum nomine illi in eam irrue-
runt, quippe cum nulla maior pestis, ut uul-
gato prouerbio dicitur, sit, quam familiaris
inimicus. Huius generis Erasmus Rhotero-
damus fuit, qui catholici hominis partes
professus, antidoti nomine uenenum fudit:
& altera manu panem ostendens, altera lapi-
dem iecit. Licuit autem ei tanto magis hoc
facere, quod nec eloquentia satis suo propo-
sito accommoda, nec doctrina mundo saltem
si non eruditis conspicua, illi defuit: præser-
tim cum catholicis fidei nostræ proceribus
tamquam interpres, & emendator sese, an-
ser inter olores, immiscuit. Quæ res eum &
celebratissimum, & multi nominis hominē
reddidit. Hæreses eius multis in locis a no-

* 2

bis

bis detectas, etiā alii ante nos agnouerunt, adeoq. oppugnaverunt, ut iam e catholico- rum albo eiectus exulet. Quantum au- tem in restituendo ueteres Ecclesiæ patres peccauerit; quantumq. circa eorum sensus aberrauerit; & quam mendax in historiis, ac rebus aliis recensendis fuerit; primi, ut credimus, nos in præsentiarum ostendimus. Ex his enim tribus D. Hieronymi tomis, quæ pars eius operum præstantissima est, quos modo correctos edimus, luce clarius uniuer- so orbi patebit imperitia pariter & incuria eius, una cum impietate quadā, & odio ad- uersus Ecclesiam copulata; adeoq. patebit, ut ex hoc uno opere, quid in ceteris ille fe- cerit, cognoscere omnes facile deinde pos- sint: præsertim cum iam, ut sibi uidebatur, doctus, & ætate matura in eo laborauerit, omneq. ingenii acumen, & sedulitatis ope- ram, ut ipse se iactat, & in emendando, & interpretando adhibuerit. Restituimus e- nim in hoc opere loca, ut ex ipsis iunctis no- stris scholiis apparebit, plus minus mille, & quingenta, quæ partim sua manu maculauit, partim tempore corrupta, ex rerum imperi- tia restituere ipse nō potuit. Ex scholiis autē eius tot errores, & ignorantias confutau- mus, ut adhuc etiam mirari non desinamus, unde cum tanta imperitia tantum illi usque
adeo

adeo fuerit nomen: Adiuti autē sumus hac
in re exemplaribus manuscriptis uiginti,
& antea impressis aliquot, quæ Florentiæ,
Brixiaq. monachi Cassinenses, & Neapoli
Bononiaq. Dominicani inuicem multo la-
bore cū Erasmanis codicibus contulerunt.
nec defuerunt etiam ii, qui in locupletissi-
ma Sanctitatis tuæ Vaticana bibliotheca as-
seruantur. Variis autem tot exemplarium
lectionibus adhibentes deinde iudicium, nō
passim omnia, sed ea tantum nos selegi-
mus, quæ uel ex ipsa sententia, & dicendi or-
dine, uel ex cognitione rerum ita esse legen-
da, clare nobis apparuit. Et ne temere mu-
tatam lectionē prætereundum quis posset, mu-
tationis in Scholiis rationem reddidimus.
Qui enim ex solis ueteribus exemplaribus
loca emendant, uariantibus illis, quod in
manuscriptis consuetum est, sæpe, ut Eras-
mo euenit, illuduntur. Adhibuimus præte-
rea in restituendis locis Illustrissimi Cardi-
nalis Gulielmi Sirleti iudicium, cui Erasmi
uafrities, & imperitia, præsertim litterarū
Græcarum, iam diu compertissimæ erant,
ex locis, quæ in Testamento nouo Erasmus
uitiasse, longo labore ipse deprehēdit; sicut
opus, cum inuulgatum fuerit, omnibus ostē-
det. Explicauimus & loca omnia, quæ ali-
qua ratione difficilia erant, præsertim histo-
riarum,

riarū, quibus D. Hieronymus, uti undecumq.
eruditissimus, refertus est. idq. fecimus, tum
quia necessarium nobis uisum est opus, tum
ne plus in Erasmiāna quam nostra editione,
aliquid, quod utile uideretur, reperiri pos-
set. Et ne aliquid in opere desideraretur, te-
stimonia omnia, quæ a D. Hieronymo citan-
tur, præsertim ex testamento ueteri, quæ se-
cundū LXX. sua editione nondū recepta, ab
eo adhibentur, multo labore cōquisita, late-
ri apposui. Argumēta singulis epistolis,
librisque, Erasmiānis uti inutilibus, ac falsis
reiectis, præfiximus: & Indicē nouo quodā
modo, ueluti summam quandam operis, re-
rum temporumq. ordine seruato, contextū,
calci appinximus. Vitam D. Hieronymi falso
antea ab Erasmo, aliisq. relata, & maiori
ex parte ignorata, ex eius scriptis fide-
liter collectā primi edidimus. Opus certe no-
bis fuit temporis, & laboris multi: sed ingēs
Ecclesiæ utilitas, quam ex eo proditurā con-
siderabamus, deficientes sæpe recreauit ui-
res, & animum rerū magnitudine fatigatū,
& operis pondere depressum subleuauit. Vi-
debam enim hinc infelices homines, qui tali-
bus Germaniæ præceptoribus gloriātur, qui
ne hoc prætextu ab Ecclesia desciscūt, & Ro-
manam, cui tu felicissime, & non minus re-
quā nomine PIVS nunc præfides, auersantur,
cognituros

cognituros tandem, quanta sit eorum, quos
ipsi sequuntur, imperitia simul & socordia;
& ex hac cognitione secum melius de salute
sua postea deliberaturos: præsertim cum ex
tali uiro, qualis D. Hieronymus fuit, disce-
re quæ ipsi credere, aut reiicere debeant,
uti nos locis suis, Erasmi hæresibus confu-
tatis, admonuimus, possint. Mouit etiam
nos ad hoc opus peragendum multum, quod
cum Apostolica hæc sedes, a qua, uti a cete-
rarum matre, fidei doctrina omnis emanat,
indicem librorum qui legi, aut reiici de-
beant, edidisset, & uirus ab alimento secre-
uisset; consentaneum uidebatur, ut aliqua
ratione ostēderet, se id iure fecisse; & libros
non ob liuorem, aut commodum aliquod
proprium, ut criminantur hæretici, reiecisse,
sed quod erroribus, mendis, & doctri-
nis falsis repleti, & maculati illi essent; pro-
ptereaq. alimentorum loco uenenum fide-
les inde acciperent. Additur huic rationi al-
tera ab ea dependens, quæ nos permouit, ni-
hilo minor: quod necessarium nobis uideba-
tur eorum os obstruere, qui Romanam Ec-
clesiam aptam quidē esse ad demoliedos, nō
autem ad restituendos dicerent libros. Vo-
luimus enim facto ipso ostēdere, hanc solam
Ecclesiam uere esse, quæ ex Christi oratio-
ne illudi non possit; & a qua ceteræ illusæ ue-

ritatem edoceri, & confirmari in fide debeant: & quod, si Erasmi lectione fidelibus interdixit, iure optimo interdixit; nec etiā minus in restituendis Sanctorū Patrum illa polleat libris, quā ipsi hæretici in ipsis corrūpendis, aut a uero sensu extorquēdis ualuerint. Huic autem nec essitati optime Sanctitas tua P I E Q V A R T E prospexit, Romam Paulum Manutium Aldi filium aduocādo, ut suis præclarissimis typis, toti orbi iam diu ex patris memoria celeberrimis, & sua doctrina, ac sedulitate etiam illustratis, Sanctorum ueterum libros correctos excuderet, ac peruulgaret. magnoq. cum iudicio addidit ad hanc rem, præter alios ornatissimos procures, M. Antonii Amulii, amplissimi Cardinalis, patriæ meæ Episcopi, uiri omni laude cumulati, uigilantiam pariter, & protectionem. ita enim is ad hoc opus sustentandum, promouendumq. intentus, & assiduus est, ut desiderari in eo non possit amplius. Suscipe igitur Beatissime Pater hoc tam sanctum, atque utile opus, quod tuo nomini dicatum in uulgus prodit: & D. Hieronymum, extra omnem ingenii aleam positum, qui in hac urbe nutritus, edoctus, & baptizatus fuit, quiq. presbyter sub Damaso magnum huius Ecclesiæ onus pertulit, ueluti e sua Bethlehem pristinis elutum maculis,

lis, nitidum uegetumq. Romam redeuntem
hilari fronte amplectere, indeq. ita emacu-
latum in cunctas ecclesiarum oras emitte:
uniuersoq. mundo ostende, quanti præ san-
ctitate, & doctrina tu facias uirum, qui tan-
ti Romanam ipse uiuens semper fecit Eccle-
siam. Vnus est enim ex quattuor, quos hæc
Sedes ueluti Christianorum magistros, do-
ctoresq. ab omnibus legendos, audiendosq.
proposuit. Et cum tanta pro utilitate Eccle-
siæ feceris, ac quotidie facias, ut desidera-
ri maiora non possint, in restituendis etiam
ceteris, tam huius, quam aliorum Sancto-
rum patrum scriptis, omnē operam impen-
de. ex hac enim una re maius, quam ex ce-
teris aliis, & Christianis emolumentum, &
Sanctitati tuæ non minor quam ex omnibus
aliis præclare gestis honor nascetur. Quid-
quid autem utilitatis ex hoc opere in Eccle-
sia exurget, quod quidem erit plurimum,
Ioan. Morono, amplissimo & absolutissimo
Cardinali, magna ex parte omnes adscribāt:
qui uir ex prudentia, religione, aliisq. rebus
præclare gestis innumeris tibi notissimus,
quanti sit faciendus, ex una tantum Triden-
tini Concilii absolute totus iam, puto,
orbis agnouit. is enim primū per monachos
suæ protectioni commendatos conferri Hie-
ronymi exemplaria cum Erasmiānis uoluit,
collata

collata, deinde mihi examinanda tradidit:
& ut perducere ad finem opus possem, omni
cōmoditate in domo sua, ubi multis abhinc
annis honorifice diuersor, fouit, & iuuat.
Christus Saluator mundi, ad totius Ecclesiæ
utilitatem, incolumem te, ac felicem diu
nobis sustentet, ac seruet.

VITA DIVI HIERONYMI
STRIDONIENSIS,

falso antea ab Erasmo relata, nunc per
Marianum Victorium Reatinum ex
eius scriptis uere edita, &
amplissimo Cardinali
Carolo Borromeo
dicata.



HIERONYMVS, quod nomen sacram le-
gem significat, Stridonis opido natus est,
quod a Gothis euersum Dalmatiae quon- *Ex catalogo*
dam Pannoniaeque confinium fuit. Strignā
id uulgus nunc uocat. intra Petram pilo-
sam, Portulam, & Primontem positum.
Natus est autem non, ut alii ante nos falso scripserunt,
xxv, aut xxxi. hoc est ultimo Constantini Magni anno,
sed sub Constantio filio, qui patri succedens annis xxiiii,
ut Orosius auctor est, imperium tenuit. Verum autē hoc
esse, ex ipsomet Hieronymo clare apparet, scribente, se,
dum Iuliani Imperatoris exitus renunciatus est, puerum
fuisse, adeoque puerum, ut grammaticae tunc operam da-
ret. Iulianus autem, qui Constantio successit, xxvi an-
no post mortem Constantini Magni occisus est: siquidem
duobus non integris is imperauit annis, & ante eum Con-
stantius uiginti quattuor. Ipsius autem Hieronymi uerba
sunt haec: Dum adhuc essem puer, & in grammaticae ludo *In commen.*
exercerem, omnesque urbes uictimarum sanguine pollueren- *Abacuk, c. 3.*
tur, ac subito in ipso persecutionis ardore Iuliani nuncia-
tus esset interitus, eleganter unus de ethnicis, Quo modo,
inquit, Christiani dicunt Deum suum esse patientem, &
εὐεξικακον. nihil iracundius, nihil hoc furore praesentius:
ne modico quidem spatio indignationem suam perferre po-
tuit.

Vita

- Epist. 113. hoc est in pro-
æt. Iob.* tuit: Parentes eius ambo, ut ipse scribit, Christiani fue-
runt. Patri nomen Eusebius, quod a pietate Græce trahi-
tur, fuit: matri quodnam esset, non proditur. Matris ta-
men soror, hoc est Hieronymi matertera, Callorina dicta
est, cum qua discidium nescio quid intercessit; quã tamen hu-
manissimis litteris semel & iterum ad pacem & concordiam,
Ex catalogo. ut ex eius epistola xxxvi. constat, inuitavit. Habuit iti-
dem sororem, quæ castitatis propositum post lapsum, in
patria, Iuliano diacono adhortante, suscepit: in quo illam
permanere, cum ipse in eremo esset, per eiusdem Iuliani
*Epist. 37. Iu-
liano.* litteras didicit: timens autem, ne ab eo caderet, Chroma-
tium, Iouinum, & Eusebium, ut eam tam suis, quam
Epist. 43 Valeriani episcopi litteris ad perseverantiam hortarentur,
precatus est: præsertim cum in Stridone patria, quæ a Lu-
picino pastore malo regeretur, Deus uenter esset, in diem
uiueretur, & sanctior ille haberetur, qui esset ditior. Fra-
ter natu minor, qui post eius in Syriam accessum natus est,
Paulinianus dictus est, qui adolescens cum eo in secundo ab
*Lib. 3. contra
Ruffinum.* urbe discessu Hierosolymam petiit. Diuites autem eius fuisse
parentes, & amplo patrimonio honestatos, ex eo con-
*Lib. 1. contra
Ruffinum.* stat, quod seruorum familiam illos habuisse, ipsemet scri-
bit his uerbis: Memini me puerum cursitasse per cellulas
seruulorum, diem feriatum duxisse lusibus, & ad Orbilium
scruientem de auxilii sinu tractum esse captiuum. Ab his igitur
diligenter ab incunabulis institutus, una cum lacte Chri-
stum imbibit, & inter nutricum sinus Christianæ pietatis
rudimenta suscepit. nec defuit illi præceptor, quem Orbi-
lium ab altero Beneuentano grammatico acri, atque pla-
goso cognominat, qui illum fidem pariter, litterasque doceret.
Collactaneus eius, & adolescentiæ tam studii, quã itineris
comes, Bonosus fuit. ambo enim pariter a tenera infantia
*Epist. 41.
Ruffino.* ad florentem usque adoleuerunt ætatem. iidem eos nutricum si-
nus, iidem amplexus baiulorum fouerunt. Bonis igitur litte-
ris, quibus tenera adhuc ætas illa capax erat, sanctisque im-
butus moribus, Romam ueluti ad primam tunc religionem tum
doctrinam urbem erudiendus puer missus est. missum autem
diximus

Diui Hieronymi.

diximus, quod eo secum commigrasse parentes, soror, mulier innupta, relicta in patria, & prædia, censusq. in ea retenti, credi non permittant: præsertim cum Gothorum armis destructa Stridon adhuc non esset. longe enim postea Gothorum impetus Europæ oras aggressi, & depopulati sunt, hoc est Valentis, Theodosii, Arcadii, Honoriiq. temporibus. In hanc sententiam ipse ad Eustochium scribens ait: Cum ante annos plurimos, domo, parentibus, sorore, cognatis, &, quod his difficilius est, consuetudine laudioris cibi propter cælorum me regna castrassem, & Hierosolymam militaturus pergerē, bibliotheca, quam mihi Romæ summo studio, ac labore confeceram, carere non poteram. Didicit autem Romæ non solum Latinas, sed Græcas pariter litteras, optime Quintiliani sententiam recolēs, qua iungendas eas inuicem præcipit, ut, quod in Græcis duriusculum, ac ueluti barbarum est, Latinæ linguæ amœnitate, ac dulcore temperetur. Præceptorem in grammatica Donatum habuit, eum ipsum, qui in Virgilium, & Terentium commentarios edidit. de qua re super Ecclesiasten meminit, & lib. primo Apologiæ aduersus Ruffinum, ita scribit: Puto, quod puer legeris Aspri in Virgilium, & Salustium commentarios, Volcatii in orationes Ciceronis, Victorini in dialogos eius, & in Terentii comœdias præceptoris mei Donati, æque in Virgilium, & aliorum in alios Victorinus autem quod præceptor eius in rhetorica, quod proditur, fuerit, falsum est; quippe cum id Hieronymus, qui de eo sæpe meminit, numquam asserat; & cum Donatum semper præceptorē suum appelleret, Victorinum, quem ei semper adiungit, ne semel quidem aut magistrum, aut amicum suum uocet. docuit enim Romæ sub Constantio Principe rhetoricam Victorinus, ut idē in catalogo scribit, quo tempore Hieronymus aut natus non erat, aut infans ita admodum erat, ut nec Romam quidem aduenerit Victorino uiuente. scribens de eo in appendice Eusebii de temporibus, Victorinus, inquit, rhetor, & Donatus, præceptor meus, Romæ insignes habentur: e quibus Victorinus

Vita

Victorinus etiam statuum in foro Traiani meruit. Quod si eius præceptor Victorinus quoque fuisset, præceptores mei dixisset, non præceptor meus: quod ipsum etiam fecisset in altero, quod modo ex libro contra Rufinum citauimus, testimonio. In præmio epistolæ ad Galatas ita quoque de Victorino scribit. Non quia ignorem C. Marium Victorinum, qui Romæ pueros rhetoricam docuit, edidisse commentaria in Apostolum, sed quod occupatus ille eruditione sæcularium litterarum, scripturas sanctas ignorauerit, & nemo possit, quamuis eloquens, de eo bene disputare, quod nesciat. Et rursus in præmio decimi tertii commentariorum libri super Ezechielem. Illud rhetoris Victorini breuiter admoneo, ut obscuritatem uoluminum ex tribus rebus fieri scias, uel rei magnitudine, uel doctoris imperitia, uel audientis duritia. nec refert quod alicubi, Victorinus noster, dicat: hoc enim de Hilario, Lactantio, Tertulliano, & aliis Latinis scriptoribus, ut suos eos appellet, facere solet. Manens autem Romæ non solû litteris operam dabat, sed Christianam pietatem una cum litteris imbibebat: & tempus quod studiis supererat, religioni, & quod religioni residuum erat, studiis impendebat: quamobrem alicubi de se ita scribit. Dum essem Romæ puer, & liberalibus studiis eruditer, solebam cum ceteris eiusdem ætatis & propositi, diebus Dominicis sepulcra apostolorum & martyrum circuire, crebroq. criptas ingredi, quæ in terrarum profunda defossæ ex utraque parte ingredientium per parietes haberent corpora sepulcorum, & ita obscura sunt omnia, ut propemodum illud propheticum compleatur: Descendant ad infernum uiuētes: & raro desuper lumen admissum horrorem temperat tenebrarum; ut non tam fenestram quā foramen admissi luminis putes: rursusq. pedetentim acceditur, & cæca nocte circumdatis illud Virgilianum proponitur: Horror ubique animos, simul ipsa silentia terrent. Didicit autem Romæ non solum

*In Apologia
ad Pāmachiū
pro libris ad-
uersus Iouinia-
num.
c. 40. super Eze-
chielem.*

*Epi. 51. De-
monium.*

Latinas ac Græcas pariter litteras, sed nullum doctrinæ genus intactum reliquit. Porphyrii Isagogas legit, Alexandri commen-

Diui Hieronymi.

commentarios uertit, Platonem, Aristotelem, demum philosophos omnes, omnesq. poetas percurrit, quod ex eius operibus omni doctrinarum genere refertis compertissimum est. in Latino autem ab ipsis incunabulis inter grammaticos, rhetores, & philosophos detritus fuit. *Epist. 113. in prefatione*

Rhetoricam autem ita didicit, ut adhuc adolescentulus *106. c. 2. in commentariis ad Galatas.*

Aliquotiens cum adolescentulus Romæ cōtrouersias declamare, & ad uera certamina fictis militibus exercerer, currebam ad tribunalia iudicū, & disertissimos oratorū tanta inter se uidebā acerbitate contendere, ut omissis sæpe negotiis in perpetuas cōtumelias uerterentur, & ioculari se inuicē dente morderent. Libro quoque primo contra Pelagianos se in controuersis puerum lusisse testatur. studiorum autem

sodales, qui scribantur, hos præcipue habuit, Pammachiū Romanum nobilem, ac honesto genere natum, qui postea Paulinæ uir, hoc est Paulæ gener, fuit: Bonosum, qui cum eo Stridone primum didicit, mox Gallias cum eodem accessit: & Heliodorum, qui eum in eremum Syriæ comitatus est. Hoc tempore, quo studiis adolescens uacabat, antequam baptismum scilicet, ut ego ex eius colligo dictis, suscepit, se lapsum esse ipsemet his uerbis testatur. Scitis ipsi lubricum adolescentiæ iter, in quo & ego lapsus sum, & uos non sine timore transitis. & ad Heliodorum. Et hoc ego non intergris rate uel mercibus, nec quasi ignarus fluctuum præmoneo, sed quasi nuper naufragio eiectus in litus, timida nauigaturis uoce denuncio: in illo æstu charybdis luxuriæ salute uorat: ibi ore uirgineo ad pudicitæ perpetranda naufragia, scylla ceu renidens, libido blanditur: quapropter ad Pammachium Apologiam pro suis aduersus Iovinianum libris scribens, sibi primam, quæ est a prima natiuitate, uirginitatem clare adimens, secundam quæ a secunda, id est a baptismo est, tacite his uerbis uindicat. Virginitatem autem in cælum fero, non quia habeam, sed quia magis mirer quod non habeo. Ingenua & uerecunda confessio est, quo ipse careas, id in aliis prædicare. numquid

Ex proœmio sive per Abdiam.

Epist. 43 Chromatio.

Epist. 1

Epist. 22.

Epist. 57.
& 58.Epist. 41.
Lib. 2. contra
Iovinianum.

quid quia gravi corpore terræ hæreo, auium non miror uolatus? nec columbam prædico, quod Radit iter liquidum, celeres neque cōmouet alas? Nullus se decipiat, nemo blando adulate se præcipitet. Prima est uirginitas a prima natiuitate, secunda uirginitas a secunda natiuitate. Et in hunc sensum ad Eustochium scribens dicit: Virginitatem non tantum efferimus, sed seruamus. Ex his apparet illum Christo Romæ iam adolescentem renatum, ut hoc uno nomine sola Roma tam sanctissimum ac præclarissimum uirū asserere sibi iure possit: quippe cum Christianus, ex eo quod renascitur, non ex eo quod nascitur, censeretur debeat. Romæ autem baptizatum fuisse, luculenter in duabus ad Damalum epistolis ipsemet testatur, asserens se in Romana urbe Christi uestem suscepisse, indeq. cibum animæ postulare, unde Christi uestimenta suscepit. Sæcularibus igitur litteris ad plenum eruditus, & Christo in fide renatus, ad theologiam, & grauiora studia adiiciens animum, instar eorum philosophorum, Pythagoram dico, Platonem, & Apollonium Tyaneum, qui discendi gratia uarias regiones lustrarunt, Gallias primum comite Bonoso contendit, ut Romani studii grauitatem Gallico cothurno sustolleret, & ex omnibus doctis uiris, quibus tunc Gallia abundabat, cunctisq. bibliothecis, thesaurum sibi scientiæ compararet. meminit de hac re ipse in epistola ad Ruffinum dum Bonosum scilicet laudat his uerbis: Vt ego & ille pariter a tenera infantia ad florentem Iouinianum. usque adoleuerimus ætatem, ut iidem nos nutricum sinus, iidem amplexus fouerint baiulorum, & cum post Romana studia ad Rheni semibarbaras ripas eodem cibo, pari frueremur hospitio. Adolescentem autem eum tunc fuisse alibi in hunc modum narrat. Quid loquar de ceteris nationibus, cum ipse adolescentulus in Gallia uiderim Scotos, gentem Britannicam, humanis uesci carnibus? Treueris autem, ubi magnus ille Athanasius exulauerat, per aliquod tempus mansisse ex eo apparet, quod prolixum ualde S. Hilarii librum de Synodis se propria manu Treueris

Diui Hieronymi.

Treueris descripsisse ad Florentium testatur, & ut ad se
in eremum, ubi tunc hoc postulans degebat, remittatur, *Epist. 6*
obsecrat. unde in proœmio secundi libri commentariorum
in epistolam ad Galatas, ait Galatas, ueluti qui a Gallis ue
nerint, excepto sermone Græco, quo omnis oriens tunc
utebatur, propriam habuisse linguā, eandem scilicet quam
in Gallia Treuerenses haberent. Iultraffe eum & alias Gal
liæ oras ex eo apparet, quod locorum situs, ac opidorum
Galliæ nomina optime calleat: quapropter Barbarorū in
eam prouinciam irruptionem alicubi recensens, ita scribit.
Quidquid inter alpes & Pirenæum est, quod Oceano &
Rhenō includitur, Quadus Vuandalus, Sarmata, Halani, *Epist. 11*
Gipedes, Heruli, Saxones, Burgundiones, Alemanni, & *Ageruchie.*
o lugenda Res. hostes Pannonii ualtarunt. Etenim Assur
uenit cum illis. Maguntiacum nobilis quondam ciuitas ca
pra, atque subuersa est, & in ecclesia multa hominum mil
lia trucidata. Vangiones longa obsidione deleti. Remorū
urbis præpotens, Ambiani, Attrebatæ, extremiq. homi
nium Morini, Tornacus, Nemetē, Argentoratus, transla
ti in Germaniam. Aquitaniæ, nouemq. populorū Lugdu
nenfis, & Narbonensis prouinciæ, præter paucas urbes po
pulata sunt cuncta: quas & ipsas foris gladius, intus ualtat
fames. Non possum absque lacrymis Tolosæ facere men
tionem, quæ ut hucusque non rueret, sancti Episcopi Exu
perii merita præstiterunt. Hedibiæ, quæ de ultimis Gallia
rum finibus una cum Algasia missio Apodemio, a Hierony
mo Bethlehem sedente quæstiones aliquot mouerat, ille
rescribens, rursus Galliarum, ubi ipse adolescens mansit,
faciens mentionem, ita ait. Maiores tui Paterius atque
Delphidius, quorum alter antequam ego nascerer rhetori
cam Romæ docuit, alter me iam adolescentulo omnes Gal *Epist. 130*
lias prosa, uersuque, suo illustrauit ingenio, me dormien
tes & taciti iure reprehendunt, quod audeam ad stirpē gene
ris sui quippiam mustitare. Transiuit in hoc ad Gallias itine
re per Concordiam Mirandulæ uicinum opidum, ubi cum
Paulo sene, ad quem scribit epistolam uicesimam primam

* * numero,

Vita

numero, uitam Pauli Eremitæ interea illi mittens, amicitiam contraxit: ab eoq. quo modo Cyprianus Tertullianū magistrum suum uocaret, didicit: sicut ipse testatur in catalogo, ubi de Tertulliano historiam texit. Reuersus autē e Gallia & non minus moribus quam litteris locuples, utramque, ut par est credere, reuisit patriam, tam scilicet eam, in qua natus, quam illam in qua renatus fuerat. Verum cum miro Christo seruiendi teneretur ardore, & nihil aliud animo secum quotidie uersaret, quam ut omnem uitam suam illi dicaret, monachi, ac solitarii professionem arripere placuit, quod sic magis expeditus, ac tutus ad cælum pergere posset. restabat dubium de loco, quo id perageret: ueniebat illi in mentem patria, in qua natus, ueniebat Roma in qua renatus, & edoctus fuerat: neutra tamen illi placuit: patria quod a cognatis, & propinquis periculum semper sibi, si sic ageret, imminere prospiceret, præsertim cum rusticitatis esset uernacula, & in ea uenter pro Deo haberetur, & sanctior ille teneretur qui ditior esset: & quod erat deterius, a Lupicino pessimo sacerdote illa tunc regeretur: Roma, quia quamuis sancta esset Ecclesia, & trophæis Apostolorum ac martyrum decorata, & uera Christi in ea confessio reperiretur, alienum tamen a monachi, ac solitarii proposito erat, in tanta ciuium ac peregrinorum frequentia uersari, & procul, ut ipse ait, a quiete, uideri, & uidere, salutari, & salutare, laudare, & detrahare, & inter linguas rodentium ministrorum, postes ingredi deauratos. Stetit tandem sententia, ut longinquæ peterentur regiones, & illæ quæ tum locorum sanctitate, tum habitantium monachorum uicinitate, ad seruendum Deo magis commodæ, & oportunæ essent. Domi-
Epist. 43 igitur ordinatis rebus, & locupletissima bibliotheca, quæ
Epist. 17. sibi summo studio, ac labore Romæ confecerat, una cum
Epist. 18. uiatico tantæ peregrinationi necessario assumptis, a patria, relictis, ut ipse testatur, ibi utroque parente, sorore, & cognatis, Hierosolymam militaturus accessit. comes itin-
Epist. 22. Eustochio. ris ac propositi eius Heliodorus præcipuus fuit, qui etiam aliquandiu

Diui Hieronymi.

aliquandiu cum eo in eremo uixit : uerum mutato proposito , ad patriam tandem , ueluti sorori uiduæ , ac nepoti ex ea paruulo , Nepotiano nomine , dispositis rebus domesticis , prospecturus , rediit . fugatum suis sceleribus Heliodorum alicubi præ humilitate uir sanctus testatur , uerum rem ipsam in secunda quam ad eum scribit epistola his uerbis detegit . Alius forsitan scriberet , quod ob salutē illius , Nepotiani scilicet , orientem , eremumq. dimiseris , & me , carissimum sodalem tuum , redeundi spe lactaueris ut primum , si fieri possit , sororem cum paruulo uiduam , deinde si consilium illa respueret , saltem nepotem dulcissimum conseruares . Reliqui itineris eius comites fuerunt , Ruffinus Aquileiensis , Innocentiū , Euagrius , & Hylas sancti Melanii famulus . Verum Ruffinus relicto Hieronymo in Aegyptum ad Nitriæ , aliorumq. locorum monasteria uisenda accessit , eo scilicet tempore quo a Hieronymi latere Heliodorus nondum discesserat . Innocentiū autem & Hylas paulo post quam in Syriæ eremum secessit , mortui sunt . solus Euagrius qui eum in uasta solitudine degentem interdum ex Antiochia inuiseret , ac recrearet , ex comitibus illi remansit . Bonosus cum quo educatus , & a pueritia honestis sæculi artibus eruditus , quiue in Galliarum peregrinatione socius illi fuerat , ipse etiam solitudinem petiit , non tamen ante Hieronymum , ut scribitur , sed eo tempore quo Hieronymus in eremo Syriæ degebat : sicut per Chromatii , Iouini & Eusebii litteras Hieronymus in Syria iam manens rescituit : quas litteras Euagrius ad eū transmissit . secessit autem Bonosus in insulam quandam , Dalmatiæ , existimo , pelago circumsonante naufragam , cui asperæ cautes , & nuda saxa , ac ipsa solitudo terrori essent . et cum iuuenis esset apprimē diues ac nobilis , contempta matre , sororibus , & carissimo sibi germano , cū uno tantum Onesimo in ea orationibus , ac ieiuniis uacans manebat . Piscis filium ea ex causa Chromatius , qui Aquileiensis postea fuit Episcopus , illum uocabat , Niceas subdiaconus Aquileiæ , non itineris Hieronymi comes , sed iam

†† 2 in

in eremo manentis recens fuit amicus. Non petiit autem statim Syriæ solitudinem Hieronymus, sed postquam aliquandiu in sanctis Hierosolymæ locis mansit, in Thraciâ, Pontum, Bithyniam, Galatiam, Cappodociam, & Ciliciam, & discendi, & uisendarum regionum causa accessit, sicut ipse ad Ruffinū scribēs testatur his uerbis. Postquā meo latere subito turbo conuulsit, postquā glutino caritatis hærentē impia distraxit auulsio: Tunc mihi cæruleus supra caput astitit imber: Tunc maria undique, & undiq. cælū. tandem in incerto peregrinationis erranti, cum me Thracia, Pontus, atque Bithynia, totumq. Galatiæ, & Cappadociæ iter, & feruido Cilicum terra fregisset æstu, Syria mihi, uelut fidissimus naufrago portus, occurrit. Et in proœmio secundi libri commentariorum ad Galatas: Scit, inquit, mecum qui uidit Anchiram metropolim Galatiæ ciuitatem: quod nunc usque schismatibus dilacerata sit, quod dogmatum uarietatibus constuprata. Mansisse autem aliquandiu eum in Cilicia, præsertim in Tarso, Pauli Apostoli amore, non solum ex iis uerbis ego affirmare audeo, uerum etiam, multo magis quod Cilicum linguæ proprietates, quibus Paulus in epistolis suis usus sit, optime nouisse, & quænam illæ sint, fideliter in epistola ad Algasiā, quæstione decima retulisse eum uideo. Mansit non nihil temporis etiam Antiochiæ, antequam uastam illam solitudinem ingrederetur, ut ex epistola sexta, quā ad Florentium scribit, late patet: & diu antea de ea ingredienda deliberauit, & cum Theodosio, & ceteris Anachoretis in eam iam degentibus uotum suum ingrediendi, locum antea inuisens, communicauit, ut ex epistola 38. apparet. Posita est autem hæc solitudo in Chalcide Syriæ, hoc est ubi Syri ab Agarenis barbaris determinantur, in qua præter sparsos hinc inde monachorum greges, nemo exceptis feris, serpentibus & scorpionibus incolebat, horridū profecto etiā monachis, & qui solitudinem tantum quærent, habitaculum. attulit secum in eam, insignem illam bibliothecam, quam summo studio, impendioq. Romæ sibi parauerat, & quam

In proœmio suo
per Aeliam.

Diui Hieronymi.

& quam inde Hierosolymam asportari fecerat. & hoc ne orationi deesset lectio, quando lectio orationem iuuat, & oratio lectionem sustentat: orantes enim cum Deo loquimur, sicut legentes Deus alloquitur: & quemadmodum orando, quod nobis opus est, postulamus, ita legendo quid a nobis faciendum sit, intelligimus: fatetur ipse dilucide in proœmio super Abdiam, se dum puer esset & solitudinem cum Heliodoro ingredi uellet, cōmentaria quædam in eum prophetam scripsisse: & ex eadem solitudine ad Florentium scribens ita ait. Et quoniam largiente Domino, multis sacræ bibliothecæ codicibus abundamus, impera uicissim, & quodcumque uis, mittam: nec putes mihi graue esse, si iubeas. habeo alumnos, qui antiquariæ arti seruiunt. Neque uero beneficiū pro eo quod polliceor, postulo. Heliodorus frater mihi indicauit, te multa de scripturis querere, nec sic inuenire. aut si omnia habet, incipit sibi plus caritas uindicare, plus petere. Transtulit in ea Lib. 2. contra Ruffinum. In proœmio super Danielem, Quintiliani, & Tullii lectionem, & flores rhetoricos adolescentulum discere cœpisse affirmat, ea in eremo discere Epist. 4. ad Rusticum. cœpit: quod ne alicui falsum ac commenticium uideatur, ipsius hac de re testimonium audiamus. Dum essem iuuenis, & solitudinis me deserta uallarent, incentiua uitiorū ardoremq. naturæ ferre non poteram: quem cum crebris ieiuniis frangerem, mens tamen cogitationibus æstuabat. ad quam edomandam. cuidam fratri, qui ex Hebræis crediderat, me in disciplinā dedi: ut post Quintiliani acumina, Ciceronis fluuios, grauitatemq. Frontonis, & lenitatem Plinii, alphabetum discerem, & stridentia, anhelantiaq. uerba meditarer. Quid ibi laboris insumpserim, quid sustinuerim difficultatis: quoties desperauerim, quotiesque cessauerim, & contentione discendi rursus incœperim, testis est conscientia tam mea qui passus sum, quam eorum qui mecum duxerunt uitam. & gratias ago Domino, quod

Epist. I.

*Epist. 41.
Ruffino.*

*Epi. 22. Eu-
stochio.*

de amaro semine litterarum dulces fructus carpo. Ingres-
sum in eremum tam præclare spei adolescentem humani ge-
neris hostis, qui eum multis ex causis reformidare iam coe-
perat, & a quo sibi magnum imminere exitium prælagie-
bat, uariis ac diuersis tentationibus eum, ut a tam sancto
rem oueret proposito, aggredi cæpit: nullumq. tentationis,
ac moliminis genus, quo eum non impeteret, ac quassa-
ret, omisit. abstulit enim ei imprimis sodales, & amicos
omnes, quos secum in eam solitudinem duxerat. Nam He-
liodorum, quem unice ille amabat, & qui tanti itineris so-
cius sibi fuerat, melioris cuiusdam boni prætextu, in patriam
reuocarat. conatus est eum multis precibus, ac lacrymis
uir sanctus retinere. sed neque preces ei profuere, nec plan-
ctus. absentem iam, ut ille se rediturum pollicitus erat,
per eloquentissimam epistolam, quam pluribus etiam la-
crymis interluit, rursus reuocare têtavit: uerum in hoc quo-
que nihil profecit. Præripuit etiam ei Innocentium partem
animæ illius: hunc enim repentinus febrium ardor abstra-
xit. & paulo postea, nondum uulneris cicatrice obducta,
rapuit ei etiam Hylam, Sancti Melanii famulum: qui ipse
quoque in ea solitudine obiit. Ipsum uero tenerum aliqui
ac delicate ab infantia nutritum adolescentem, paulo mi-
nus, quam olim fecerit in Iob, uariis, ac diuersis infirmi-
tatibus, & ægritudinibus ita torfit, ut nullum fuerit mor-
borum genus, quo se ille distentum, ac quassatum fuisse
non asserat. Sed præter ceteros morbos, ardentissima fe-
bris, qua se in media quadragesima arreptum alicubi ipse
testatur, eo tempore illum inuasit. ualida autem ac lethali
adeo fuit, & ita infelicia, ieiuniisq. aliqui exhausta ado-
lescentis membra depasta est, ut parum abfuerit, quin mor-
ti illum tradiderit: nam exequiæ ueluti iam morienti para-
ri cœperunt, & toto frigescente iam corpore, ad tribunal
Christi raptus, quod Ciceronis lectioni uacaret, grauiter
uapulauit. At non solum uariis corporis, ac membrorum
morbis, seruis Dei aliqui insensissimus hostis Diabolus
eum appetiit, sed, quod in Iob facere prohibitus fuit, di-
cente

Diui Hieronymi.

ente Domino, Animam illius serua: ita animam eius car-
nis, ac uenerarum rerum cogitationibus, facto imperu,
aggredi, ac diuexare coepit, ut in media eremo, ubi feræ
tantum, & scorpiones, præruptæ dumtaxat cautes, & plan-
ta-ũ diuersa solummodo uidebantur genera, sibi inter cho-
ro: puellarum interesse uideretur. Quid in talibus tentatio-
nibus fortis & in Christo roboratus adolescens egerit: quã
streue pugnaverit: quibus ieiuniis, & uerberibus rebellan-
tem carnem afflixerit: quibus lacrymis, & orationibus Ie-
sum saluatorem mundi, ut se a tantis hostis impetitionibus
erueret, instanter precatus sit; ab ipsomet, qui talia passus
est, audiamus. O quoties ego ipse in eremo constitutus, & *Epist. 22. ad*
in illa uasta solitudine, quæ exusta solis ardoribus, horridũ *Eustochium.*
monachis præstat habitaculum, putabam me Romanis in-
teresse deliciis. sedebam solus, quia amaritudine repletus
eram. horrebant sacco membra deformia, & squalida cu-
tis situm Aethiopicae carnis obduxerat. quotidie lacrymæ,
quotidie gemitus: & si quando repugnantem somnus im-
minens oppressisset, nuda humo uix ossa hærentia collide-
bam. De cibis uero & potu taceo: cum etiam languentes
monachi aqua frigida utantur; ut, coctum aliquid accepisse,
luxuria sit. Ille igitur ego, qui ob Gehennæ metum ta-
li me carcere ipse damnaueram, scorpionum tantum socius
& ferarum, sæpe choris intereram puellarum. pallebant
ora ieiuniis, & mens desideriiis æstua bat in frigido corpore;
& ante hominem sua iam carne præmortuum, sola libidi-
num incendia bulliebant. itaque, omni auxilio destitutus,
ad Iesu iacebam pedes, rigabam lacrymis, crine tergebam,
& repugnantem carnem hebdomadarum inedia subiugabam.
Non erubesco confiteri infelicitatis meæ miseriam: quin
potius plango me nõ esse quod fuerim. memini me claman-
tem diem crebro iunxisse cum nocte, nec prius a pectoris
cessasse uerberibus, quam rediret, Domino increpante,
tranquillitas. ipsam quoque cellulam meam, quasi cogita-
tionum mearum consciam, pertimescebam, & mihimet ira-
tus, & rigidus, solus deserta penetraui. sicubi concaua
uallium,

mallium, aspera montium, rupium prærupta cernebam,
 ibi mea orationis locus: ibi illud miserrimæ carnis ergastu-
 lum; & ut mihi testis est Dominus, post multas lacrymas,
 post cælo inhærentes oculos, nonnumquam uidebar mihi
 interesse agminibus angelorum; & lætus, gaudensq. can-
 bam: Post te in odorem unguentorum tuorum curremus.
 Videns autem Diabolus, se nullo molimine adulescentis
 animū dimouere ab arrepto proposito posse, nihilq. se aut
 morbis, aut carnis tentationibus profecisse, ad secretiores
 artes, quibus fortiores fidelium animos quateret, ac decipe-
 re solet, & ad malitiæ cōmenta postremo confugit: ut quæ
 aperta fronte ueluti manifestus hostis superare non posset,
 occulte tamquam amicus insidians labefactaret, ac caperet.
 incitauit enim aduersus eum Campenses, & Tarsenses Aria-
 nos hæreticos, qui fidem eius impeterent, & uel uno uel al-
 tero modo uinctum iuuenem ad se pertraherent. Videbant
 enim eum adulescentem esse maximæ spei, & qui doctrina
 & sanctitate Græcos omnes, qui eas, & remotiores inco-
 lebant oras, iam uinceret. instant igitur apud eum, an tres,
 uel unam potius confiteatur hypostasim. cautus ille, & ad
 insidias dæmonum exercitatus, se unam, si hypostasis no-
 mine Vñiam, si uero personam intelligant, tres confiteri hy-
 postases asseuerat: ueluti qui optime norit tres in una Di-
 uina natura esse personas. Non contenti illi iuuenis sensum
 audisse, ipsum hypostasis nomen efflagitant, ut simpliciter
 unam ne, an tres hypostases in Diuina credat esse natura,
 respondeat. Antiochena quoque Ecclesia, quæ in tres tunc
 partes diuisa, atque discerpta erat, rapere ad se illum opi-
 do festinat, unaquæque scilicet pro se pars: Meletius, in-
 quam, Paulinus, atque Vitalis. Hi enim tres, suarum sci-
 licet factionum, Episcopi tunc erant. ille qui eo accefferat
 fundatus in ea Petra, aduersus quam portas inferi nō præ-
 ualiturus Christus promiserat, ut qui Romæ fidem, baptis-
 mumq. susceperat, se id credere, quod Romana credit Ec-
 clesia, constanter asseuerat, & in ea uelle se mori, in qua na-
 tus sit, fide cunctis responderet: quando optime norit non
 posse

Epist. 57. et
 58. Damaso.

Diui Hieronymi.

posse quem extra hanc arcam, diluuiο regnante, salutem
consequi: & profanum esse qui agnum in hac domo non
comedit. Respondent illi omnes, se cum Romana senti-
re Ecclesia; idq; altute faciunt, ut eruditissimum iuue-
nem, hac uoce allectum, ad se pertrahant. Verum uidens
ille in diuersis dogmatibus, ac fidei factionibus, esse non
posse, ut omnes id ipsum, quod Romana Ecclesia crederet,
crederent, latentes suspicatus dolos, Romā ad Damasum,
qui Valentis & Valentini Imperatorum tempore, tunc
scilicet Romanam regebat Ecclesiam, semel & iterum scri-
bit, obsecrās, & multis cum precibus obtestans, ut, quid-
nam credere, & cui in Antiochia ex tribus illis Episcopis
communicare debeat, sibi nunciare dignetur. Et ut litte-
ræ ad eum in Eremum peruenire possent, Euagrio presby-
tero, utrique eorum noto, & Antiochiæ degenti, illæ di-
rigantur, rogat: admonens interea in hac hypostasis uoce
uenenum latere: tamen se, quidquid ille iusserit, creditu-
rum. Tandiu autem illum hæretici diuexarunt, & ea de il-
lo in uulgus mendacia sparserunt, ut uirgines, in monte
Hermon degentes, ad quas ex eremo scribit epistolam il-
lam, cuius initium est: Chartæ exiguitas indicium solitudi-
nis est: ab eo cœperint abhorrere, & aliqui sub catholico-
rum nomine, cū tamen hæretici essent, illum acriter adeo
persecuti sint, & omni inhumanitatis genere ita affecerint,
ut ex eremo tandem eiecerint. explicat hæc omnia ipse-
met in epistola ad Marcum Celebensē, ubi inter cetera
ait. Versu cogor clamare uulgato. Quod genus hoc homi-
num, quæue hunc tam barbara morem Permittit patria?
hospitio prohibemur arenæ. Bella cient, primaq; uetant
consistere terra. Quæ iccirco de gentili poeta sumpsimus;
ut qui Christi pacem non seruat, pacem saltem discat ab
ethnico. Hæreticus uocor Homousion prædicans Trinita-
tem: Sabellianæ impietatis arguor, tres subsistentes, ue-
ras, integras, perfectasq; personas indefessa uoce pronun-
tians. si ab Arianis, merito: si ab orthodoxis, qui hu-
iusmodi arguunt fidem, orthodoxi esse desierunt: aut, si
eis

Epist. 57 &

58.

Epist. 39

Epist. 77

Vita

eis placet, hæreticum me cum occidente, hæreticum cum Aegypto, idest cum Damaso, Petroq. condemnent. & infra. Quotidie exposcor fidē, quasi sine fide renatus sim. confiteor, ut uolunt; nō placet. Subscribo, non credunt. unum tantum placet, ut hinc recedam. iam iam cedo, abrupērunt partem a me animæ meæ, carissimos fratres. ecce discedere cupiunt, immo discedunt; melius esse dicentes, inter feras habitare, quam cum talibus Christianis. Et ego ipse, nisi me & corporis imbecillitas, & hiemis retineret asperitas, iam modo fugerem. Verumtamen dum uernum tempus adueniat, obsecro, ut paucis mihi mensibus eremi concedatur hospitium: aut, si hoc tardum uidetur, abscedo. Domini est terra, & plenitudo eius. Ascendant soli cælum: propter illos tantū Christus mortuus sit, habeant, possideant, glorientur. Mansit autem in ea solitudine quadriennio, ut scribitur, incredibili abstinentia uī tam excrucians, & absque aliqua requie omne tempus modo studiis, modo orationibus impēdens: nunc ab aliis monachis, & Anachoretis inuisus, nunc alios ipse inuisens; tantasq. in ea spiritus dulcedines expertus est, & cælestis patriæ beatitudines prægustauit: iisq. splendoribus Deus, ut ait propheta, illius animam impleuit, ut inde discessisse sæpe pænituerit, & ueluti cælestis Hierusalem, illius semper animo memoriam retinuerit. Ego quidem Romæ non eram, inquit Pammachio, & tunc me tenebat eremus, atque utinam pertinuisset, quando socero tuo uiuente Toxotio, sæculo Paula, & Eustochium seruiēbant. Egressus ab eremo, uel uerius hæreticorū persecutionibus inde eiectus, Antiochiā, Hierosolymamq. repetiit, iuuenis iam, & adolescentiæ annos superans. iuerit ne hoc tempore in Græciā, & Athenas petierit, an potius, quod uerius reor, tunc cum in Cilicia esset, id egerit; commode enim e Cilicia in Atticam nauigatur; incertum: nam Athenis eum In commenta- fuisse, hæc eius uerba, ut credamus, nos cogunt: In ar- ryls Zacharia, ce Atheniensium iuxta simulacrum Minervæ, uidi sphæ- e. 12 ram æneam grauissimi ponderis, quam ego pro imbecilli- tate

Diui Hieronymi.

tate corpusculi mouere uix potui . cum quærerẽ quidnam
sibi uellet , responsum est ab urbis eius cultoribus , athle-
tarum in massa fortitudinem cõprobari : nec prius ad Ago-
nem quemquam descendere , quam ex leuatione ponder-
is sciatur , quis cui debeat comparari . Antiochiæ autem
degens , Apollinarium Laodicenum , qui postremo ex Ec-
clesia egressus est , audiuit , & coluit , sicut ipse ad Pamma-
chium & Oceanũ scribens , testatur his uerbis : Dum es-
sem iuuenis , miro discendi ferebar ardore , nec iuxta quo-
rundam præsumptionem , ipse me docui . Apollinarium
Laodicenu audiui Antiochiæ frequenter , & colui , & cum
me in sanctis scripturis erudiret , numquam illius conten-
tiosum super sensu dogma suscepi . Adhæsit autem Antio-
chiæ ex tribus illis , qui tunc eam diuexabant Episcopis .
Paulino , quod ita a Damaso , ad quem de ea re scripserat ,
iussus fuerat . Manens tamen Antiochiæ , monachi , ac so-
litarii hominis professionem propterea non omisit . Nam
et si sæpe quidem loca uel discendi causa , uel ut magis lit-
teris & orationi in quiete & silentio uacaret , mutauit , ip-
sum tamen monachi animum numquã mutauit . Verum
hoc fuisse experimẽto Paulinus , qui eum presbyterum An-
tiochiæ ordinauit , didicit : didicit & longe post Epipha-
nius Salaminæ Cypri Episcopus , qui eum ad animarum
curam , & publice sacramenta ministrandi munus uocauit .
Nam primus illum ordinare non potuit , nisi in monachi
professione se eum relicturum prius polliceretur . alter ue-
ro nullo modo ut publice sacrificaret , & animarum curæ
intenderet , obtinere potuit . Se enim non ad huiusmodi
munus , sed ut in agris , & solitudinibus uitam traduceret ,
ibiq. adolescentiæ peccata defleret , uocatũ potius esse asse-
rebat . Vtramq. autem hanc rem ueram esse , a nemine me-
lius quam ab ipsomet , iuncto Epiphaniĩ testimonio , di-
scere possumus . ait enim scribens ad Pammachium aduer-
sus errores Ioannis Hierosolymitani de ordinatione sua his
uerbis . Fac a te ordinatum , scilicet Paulinianum fratrem
meum , (alloquitur autẽ his uerbis ipsum Ioannem ,) idem

Epist. 64

Epist. 61

ab

ab eo audies, quod a me misello homine Sanctæ memo-
riæ Episcopus Paulinus audiuit. Num rogavi te, ut ordina-
rer? Si sic presbyterium tribuis, ut monachum nobis non
auferas, tu uideris de iudicio tuo. sin autem sub nomine
presbyteri tollis mihi, propter quod sæculum dereliqui,
ego habeo, quod semper habui: nullum dispendium in or-
dinatione passus es. & paulo superius. Si de me & presby-
tero Vincentio: satis multo dormisti tempore, qui post
annos tredecim, nunc excitatus hæc loqueris. ob id enim
& ego Antiochiam, & ille Constantinopolim urbes cele-
berrimas deseruimus, non ut te in populis prædicantē lau-
daremus, sed ut in agris, & in solitudinibus adolescentiæ
peccata deslentes, Christi in nos misericordiam deflectere-
mus. Epiphanius uero Ioanni Hierosolymitano in eandem
sententiam ita testatur. Cum enim uidissem, quia multitu-
do sanctorum fratrum in monasterio consisteret, & sancti
presbyteri Hieronymus & Vincētius propter uerecundiam
& humilitatem nollent debita nomini suo exercere sacrifi-
cia; & laborare in hac parte ministerii, quæ Christianorum
præcipua salus est: inuenire autem, & comprehendere ser-
uum Dei non posses, qui te, eo quod graue onus sacerdo-
tii nollet suscipere, sæpe fugiebat: & cetera. Ordinatus au-
tem presbyter a Paulino iam tunc x x x. annorum uir,
commentarios, quos iam puer, egressus a studiis rheto-
rum, in Abdiam inceperat, perfecit, & Pammachio studio-
rum socio dicauit. Non tamen semper Antiochiæ mansit,
sed partim etiam Hierosolymæ, in agris tamen, & solitu-
dinibus, usque quo Romā ad Damasum accessit, uiuens.
immo tunc Bethlehem ab eo electa, & habitari cœpta est.
Verum autem hoc esse, satis ex eo constat, quod mortuo
Damaso Hierosolymam rediens, illo scilicet tempore quo
Paula, & Melania eo adnauigarunt, tunc uidelicet, cum
Bethlehem ab eo ad habitandum electam ceteri aiunt, ita
ipse de Bethlehem scribat. Intraui Hierosolymam: ui-
di multa miracula, & quæ prius ad me fama pertulerat, ocu-
lorum iudicio comprobaui: inde contendi Aegyptum, lu-
st-raui

Lib. 3. contra
Ruffinum.

Diui Hieronymi.

stravi monasteria Nitrix, & inter sanctorum choros aspi-
des latere perspexi. Protinus concito gradu Bethlehē meā
reuersus sum; ubi adorauī præsepe, & incunabula saluato-
ris. Suam autem Bethlehem non appellasset, nec se concito
gradu ad eam reuertisse, sed accessisse potius dixisset, nisi
prius quoque, hoc scilicet, de quo nunc tractamus, tempo-
re, sedem illam tenuisset. Hoc tempore, quod inter reces-
sum ab eremo, & ad urbē Romam accessum præterfuit,
Cōstantinopolim quoque ad audiendum Gregoriū Nazan-
zenū, cuius doctrinæ, & sanctitatis celebris tunc erat fama,
Hieronymus contendit. translatus enim in eam Ecclesiam *Hist. trip. li. 9.*
cōponendæ seditionis causa Gregorius fuerat, ut urbē ab *c. 8. 9. 10*
Arianis infestam liberaret, sub Theodosio seniore Augu-
sto, antequam primum in ea Concilium celebraretur, hoc
est circa primos Damasi Papæ annos. Hoc autem uerum
esse constat ex eo, quod Hieronymus se Constantinopoli
fuisse eo tempore, quo Gregorius ibi Episcopalem sedem *In commenta-*
tenebat, ipsemet asserit: & ab urbe Roma post Damasi *rys Esaiæ. c. 6*
mortem eundem recessisse, ex epistola, quam in ipso reces- *Epi. 99. Afella.*
su Afellæ scribit, satis liquet, dum ait. Beatæ memoriæ
Damasus meus sermo erat. Tenuit Constantinopolitanam
Ecclesiam Nazanzenus annis aliquot, tanta cum sui nomi-
nis laude, & Orthodoxæ fidei augumento, ut suo tempo-
re in ciuitate uix unus Arianus reperiretur: adeo & doctri-
næ magnitudine, & sanctitatis celebritate pacauerat omnia.
Eius tempore celebratum fuit ibi Constantinopolitanum
primum aduersus Macedonium Concilium, quod factum
est anno Domini CCC L X I I I: ipseque in symbolo, rogatus
a patribus, apposuit ea uerba, quæ sunt de Spiritu sancto.
Cum autem Ecclesiam omnem composuisset, ac confor-
masset, & suscitari aduersus se rursus factionem uideret,
capta occasione, quod absque Synodi decreto primam se-
dem reliquerit, & Constantinopolitanam arripuerit, furo-
ri hominum cedere melius ratus, expulso Maximo Cyni-
co, quem Ariani elegerant, Nectarium successorem, sanctis-
simum, & eruditissimum uirum, uotis omnium concurrē-
tibus

Epist. eius ad Nyssenum. tibus sibi suffecit, & ut quieti, & otio in senectute uacare sibi liceret, in Nazanzena quoque Ecclesia Eulalium Pastorem posuit. Quod autem Hieronymus Constantinopoli fuerit, ipsemet, qui se Gregorium Nazanzenum præceptorem habuisse semper gloriatur, pluribus in locis discrete testatur. Gregorius, ait in catalogo, primum Salsimorum deinde Nazanzenus Episcopus, uir eloquentissimus, præceptor meus, a quo scripturas explanante didici. Et in *Epist. 2* epistola ad Nepotianum: Præceptor quondam meus Gregorius Nazanzenus, rogatus a me ut exponeret, quid sibi uellet in Luca Sabbatū δευτερόπρωτον, eleganter lussit. Docebo te, inquit, super hac re in Ecclesia, in qua mihi omni populo acclamante, cogaris inuitus scire quod nescis; aut certe si solus tacueris, solus ab omnibus stultitiæ condemnaberis. Item in commentariis Esaia, sextum eius prophetae caput exponens, De hac, inquit, uisione ante annos circiter triginta, cum essem Constantinopoli; & apud uirum eloquentissimum Gregorium Nazanzenum, tunc eiusdem urbis episcopum, sanctarum scripturarum studiis erudirer, scio me breuem dictasse, subitumq. tractatum, ut experimentum caperem ingenioli mei, & amicis iubentibus obedirem. ad illum itaque libellum mitto lectorem. Et exponens illud Apostoli ad Ephesios, Sacramentum *Eph. 5* hoc magnum est, ita ait: Gregorius Nazanzenus, uir ualde eloquens, & in scripturis apprime eruditus, cum de hoc mecum tractaret loco, solebat dicere. Vide quantum istius capituli sacramentum sit, ut Apostolus in Christo illud, & Ecclesia interpretans, non se ita asserat, ut testimonii postulabat dignitas, expressisse, sed quodam modo dixerit. Sibi quoque & Nazanzeno Nyssenum quædam opera sua legisse, in catalogo scribit. alibi quoque Gregorium præceptorem appellat suum, & ubique se a tali uiro eruditum gloriatur. magna enim non minus de uitæ sanctitate, quam de doctrinæ sublimitate Gregorii erat fama: adeoque in Ecclesiasticis litteris excellebat, ut solus ex omnibus tam Græcis quàm Latinis scriptoribus Theologi meruerit nomē.

Imperii

Diui Hieronymi.

Imperii habenas Theodosius adhuc moderabatur, & Apostolicam sedem Romæ Damasus gubernabat, ipseque Hieronymus iam presbyter annos triginta exegerat: cum ob dissensiones tum Antiochenæ Ecclesiæ, tum alias, Imperiales litteræ omnes totius occidentis, orientisque Episcopos, Romam pro quæstionum solutione uocarunt. Accesserunt inter alios eo Paulinus Antiochiæ, a quo Hieronymus ordinatus fuerat presbyter, & Epiphanius Salaminæ, seu Constantiæ Cypri, Episcopi; ambo uiro sancto amici, & arcto spiritus uinculo copulati. Visum est Græcis Episcopis Latinum, & magni nominis iuuenem secum ducere; præsertim cum Damasus multis ex causis notus, & de Antiochenis dissidiis apprimè instructus, & eruditus esset: & forte ipsemet Damasus accersuit, ac litteræ Imperiales illum eo cogerunt: quando inuitum, ac renitentem accessisse ipsemet testari uidetur. Verba, quibus hæc omnia ille explicet, hæc sunt. Cumque orientis & occidentis Episcopos ob quædam Ecclesiarum dissensiones Romam Imperiales litteræ contraxissent, uidit admirabiles uiros, Christi que Pontifices, Paulinum Antiochenæ urbis Episcopum, & Epiphanium Salaminæ Cypri, quæ nunc Constantia dicitur, quorum Epiphanium etiam hospitem habuit: Paulinum in aliena manentem domo, quasi proprium humanitate possedit: quorum accensa uirtutibus, per momenta patriam deferere cogitabat. & alibi. Denique cum & me Romam cum sanctis Pontificibus, Paulino, & Epiphanio, Ecclesiastica traxisset necessitas; quorum alter Antiochenam Syriæ, alter Salaminam Cypri rexit Ecclesiam, & uerecunde nobilium feminarum oculos declinarem; ita egit secundum Apostolum importune, opportune, ut pudorem meum sua superaret industria. & quia alicuius tunc nominis esse existimabar super studio scripturarum, numquam conuenit, quin de scripturis aliquid interrogaret. Romam igitur ingressus D. Hieronymus cœpit reuiscere loca, in quibus a pueritia nutritus, edoctus, & baptizatus fuerat: reuiscere templa Apostolorum ac Martyrum, ad quæ diebus Dominicis

Epist. 27. in epistaphio Paula.

Epist. 16. in epistaphio Marcelle.

nicis accedere, cum a grāmaticæ ludo uacaret; & quorum cryptas ad uenerandas sanctorum reliquias ingredi puer solebat. inuenit hic Pammachium, suum olim condiscipulū, inuenit alios tūm ueteres ex facie, tum ex sola sanctitatis, & doctrinæ fama postea sibi factos amicos. Damaso autem quam dilectus fuerit, incredibile est dictū. Nouerat enim iuuenem iam tunc in eremo degentem, ex litteris, et tractatibus, quos sæpe ad eum miserat: nouerat & egressum ab eremo, Antiochiæ primum, mox Bethlehem manentem, ut qui ei munera sæpe mittere, & qui ab eo epistolas, & quæstionum solutiones recipere solebat. nouerat ex ingenti fama, quæ de eius uitæ probitate, & mira abstinentia ferebatur. cōcurritur ex urbe ad eum undiq. & uterque sexus in promerendo uiro secum acriter certat. Non matronæ castæ illum dimittere, nō ciuis, non presbyteri possunt. aliis sanctitas, aliis doctrina, aliis comitas, & urbanitas placet. ille quod Romæ iam uiderit puerū tunc optimæ spei, animo repetit: ille quod austeram in eremo ab eo exactam uitā audierit, attente uultus contemplatur, & ora. commendat in eo aliquis presbyterii dignitatem, aliquis orationis prædicat puritatem. hic in eo linguarum scientiam, alter sacrarum litterarum admiratur cognitionem. pariter suspiciunt, pariter prædicant, & extollunt omnes. & breuiter solus Hieron. inuenitur, in quo omnium oculi, omniū defigantur obtutus; & in quo uno totius cleri, populiq. uota suspirent. Damasus, cui Hieronymi etiā causa Paulinus, Epiphaniusq. grati fuerunt, uidens sibi, ueluti alterum Paulum Petro, adiutorem in urbem uenisse, remissis ad sedes proprias Episcopis, & Paulino in Episcopatu Antiocheno confirmato, Hieronymum, ut sibi in ecclesiasticis causis inferuaret, & partem Pontificii oneris sustineret, secum retinet. res fidei, & omnes quæstiones religionis, ei, uti unde quaque doctissimo, & maxime orthodoxo, mandat: hoc est ut totius orbis consultationibus, præsertim synodalibus, quæ ad Romam, uelut ad matrem ecclesiarum omnium, & Apostolicam Sedem quotidie deferuntur,

Diui Hieronymi.

runtur, respondeat: & quid credere, uel nō credere reuer-
tentes ab hæresi debeant, normā, formulamq. præfigat. te
statut hoc ipse ad Ageruchiā, ubi Monogamiā laudat, his *Epist. 11*
uerbis. Ante annos plurimos cum in chartis ecclesiasticis
iuuare Damasum, Romanæ urbis Episcopum, & orientis,
atque occidentis Synodis consultationibus responderē,
uidi duo inter se paria uilissimorum e plebe hominum cō-
parata. Testatur etiam Rufinus, qui confessionē, qua re- *Rufinus*
conciliarentur Apollinariæ, ab eo, cum Damaso inserui- *Apologie*
ret, compositam fuisse scribit: cui respondens Hierony- *pro Origene.*
mus ita ait. Et superfluum puto apertas ineptias confuta- *Li. 2. contra*
re, cum mihi mea ingeratur fabella, a Synodo uidelicet, & *Ruffinum.*
sub nomine cuiusdam amici Damasi ego petar, cui ille ec-
clesiasticas epistolas dictandas tradidit, & Apollinariorum
uersutæ describantur, quod Athanasii librum, ubi Domi-
nicus homo scriptus est, ad legendum acceptum ita corru-
perint, ut in litura id quod ralerint rursus scriberent, ut
scilicet non ab illis falsatum, sed a me additum putaretur.
Manens Romæ Hieronymus, & ecclesiasticis undiq. ad
Apostolicam Sedem concurrentibus inseruiens necessitati-
bus, non propterea arctam suam uiuendi, & in precibus
quotidie coram Deo assistendi omittit consuetudinē. Ma- *Epist. 16*
tronarū oculos uerecunde declinat: exemplo omnes, uer-
bo eos qui ad illum audiendum concurrunt, instruit. Et
quia presbyteri munere insignitus erat, ne tam diuinum si-
bi commissum talentum occulat incruentum Christi sacrifi-
cium, quod in cruce peractū fuit, Deo pro salute omnium
offert. Nouit hoc Roma, quæ diu sacrificii seruauit casu-
lam, & adhuc eius calicem seruat, & in memoriam tanti ui-
ri populo reuerēter ostentat. Nouerat hoc ipsum Nepotia-
nus presbyter, Heliodori Episcopi, qui quondam Hiero-
nymum in eremum comitatus fuerat, nepos, quod scili-
cet offerendis Deo sacrificiis ille uacaret, propterea q. dum
moreretur talem uestem Miliarum sacrificii aptam, Hie-
ronymo in hæc uerba, ut testis est huius rei ipse Hierony-
mus, reliquit. Hanc tunicam, qua utebar in ministerio

*** Christi

Vita

Epist. 3. in epi Christi; mitte dilectissimo mihi, ætate patri, fratri colle-
ephio Nepotiano gio, & quidquid a te nepoti debetur affectus, in illum trās-
ni fer, quem mecum pariter diligebas. Et si ipse Nepotianum

Ibidem presbyterum laudat, quod sollicitus esset si piteret altare,
 si parietes absque fuligine, si pauimenta terfa, si ianitor cre-
 ber in porta; & quod in omnes cærimonias pia sollicitudo
 disposita esset; item quod non minus, non maius negligere-
 ret officium, & quod semper in ecclesia uersaretur: & rur-
 sus quod basilicas ecclesiæ, & martyrum conciliabula diuer-

Ibidem sis floribus, & arborum comis, uitiumq. pampinis adum-
 brarit; ut quidquid placeret in ecclesia tam dispositione,
 quam uisu, illius labore, ac studio compositum esset: et si
 contra Pelagianos scribens, ait non displicere, immo pla-

*Lib. primo con-
 tra Pelag.*

tere Deo, quod Episcopus, presbyter, diaconus, & reli-
 quus ordo ecclesiasticus in administratione sacrificiorū cum
 candida procedant ueste: quid putandum est presbyterum
 procurasse Hieronymum, uirum sanctissimum, & qui in uin-
 dicando Dei honore, & Ecclesiæ pulchritudine asserenda
 nemini cederet? non tantum hæc omnia Romæ manens
 procurauit, & cuncta ecclesiæ munia ut honeste, ac sancte
 peragerentur effecit: sed quidquid etiam boni uel Antio-
 chiæ, a qua Petrus Apostolorum princeps Romam uenerat,
 uel Hierosolymæ, ubi Ecclesiam quoque idem funda-
 uit, & Iacobo gubernandam postea reliquit, esset, ut Ro-
 mæ quoque, ubi Petri sedes manet, obseruaretur, procu-

*Gregor. Ioan.
 Syracusano.*

Epist. 62

Li. 2. contra

Ruffinum.

Epist. 123.

Damaso.

rauit: eo instante Alleluia, ut testatur D. Gregorius, secun-
 dum Hierosolymitanæ ecclesiæ consuetudinem, & secun-
 dum Antiochiæ usum, in fine omnium psalmorum, Glo-
 riæ patri, Romæ cantari cæptum est. eo emendante Roma
 legendos, canendosq. in Ecclesia lxx interpretum psal-
 mos suscepit. Ipse testamentum nouum, quod Romana
 postea semper legit Ecclesia, Damaso rogante e Græco tunc
 primum correxit. Ipse Martyrum fines, qui in ecclesiis re-
 citantur, primus, ut Cassiodorus, Isuardus, Adoq. testan-
 tur, in unum sub breuitate collegit. omitto alia quæ postea
 ad decorem, & utilitatem uniuersalis Ecclesiæ fecit, ut sa-

crorum

Diui Hieronymi.

erorum librorum ex Hebræo, qui nunc uulgati, & recepti
feruntur, uersiones, & eorum interpretationes, & quæ con-
tra hæreticos diuersis elaborauit temporibus. Manentis
Romæ uiri sanctitatem nunc tantum discutimus, & iuue-
nis solummodo examinamus labores: reliqua suis locis di-
centur. In tanta negotiorum Ecclesiæ, undiq. ad Aposto-
licam sedem delatorum occupatione, & aduentantium ad
se quotidie passim e populo matronarum, uiro-
rumq. pariter multitudine, studia nihilominus, quibus ab incunabu-
lis usque totus semper fuit addictus, nihil propterea omisit.
quod auferebat illi dies, nox restituebat, & uigiliæ damna
somnia diminutio resarciebat. Legit Romæ manens Blæfil-
læ Paulæ filix Salomonis Ecclesiasten, ut eam ad contem-
ptum mundi prouocaret, & omne quod in mundo cerne-
ret, putaret esse pro nihilo. & commentaria in eundem scri-
bere inchoauit. Fabiolæ quærenti de tanta, quæ in libro
Numerorum est, nominum congerie, & de tam aperta Ba-
laam prophetia, cuncta interpretatus, & opus de quadra-
ginta duabus mansionibus Israel se scripturū pollicitus est.
Scripsit itidem Romæ manens cōtra Heluidium hæreticum:
& ut testatur Ruffinus, ad Eustochium de conseruanda uir-
ginitate libellum, hoc est epistolam 22. Et librum Didymi
de Spiritu sancto ad preces Damasi transferre cœpit. Pau-
lam item de obitu Blæfillæ filix consolatus est, ut ipse in
epitaphio Paulæ testatur. Marcellæ exposuit decem Dei
apud Hebræos nomina: item quid significet Alleluia,
Amen, Marantha, & Diapsalma: & Psalmum centesi-
mum uicesimum sextum interpretatus est. Paulæ He-
braicum exposuit Alphabetum: Damaso Papæ quid esset
Osanna: quid prodigi filii Parabola significaret: & in-
terpretationem Origenis in Cantica canticorum e Græco
ab eo rogatus uertit. Expositionē autē de sexto Esaie capi-
te, ac Seraphim, quæ reperitur epistola 142. Damaso dica-
ta, scripta Cōstantinopoli fuit, rogantibus amicis, tunc cū
Gregoriū Nazanzenū audiret, ut ipse super sexto Esaie te-
statur capite. Dum Romæ uersatur Hieronymus, quod per

Epist. 116.

Paulæ & Eustochio.

Ad Galatas

cap. 1

Ruff. libr. 2.

in uelutinarum.

Ex proæmio li-

bri Didymi &

2. lib. in. Ruff.

fini.

Epi. 136. 137

138. 141.

*** 2 triennium

Vita

triennium fere fuit, Paulinianum adolescentē tunc fratrem,
Epist. 155 qui post eius in Syriā secessum natus fuerat, in urbem ad-
Epi. 145. 156 uocat: idq. facit, ut eum melioribus litteris, & sanctiori-
Ruffinus in bus pariter moribus imbuat. conuertit præter ea quæ dixi
præfat. de mus, Romæ manens Hieronymus multos, qui uitiiis &
cap. xlv sceleribus uincti tenebantur: & matronas plurimas ad san-
Epist. 25. de ctioris uitæ duxit propositum. inter quas Marcella, Mela-
obitu Blæsillæ. nia, Afella, Albina, Marcellina, Felicitasq. celebrantur;
Epi. 99. Afellæ. sed ceteris præstantior Paula, Eustochii, & Blæsillæ mater.
nam Paula propositum implere desiderans, uestem muta-
uit, & monasterium ingredi pollicita est: quod adimpleuit
Hierosolymam una cum Melania sub Hieronymi ab. urbe
discessum proficiscendo. Cum tot hæc ac tanta uir sanctus
Romæ perageret, & omnium ore dignus summo Pontifica-
tu acclamaretur, clerici, o mortalium uita semper incerta,
in quorum uitia ille sæpe inuectus fuerat, & laici, quos
sæpe reprehenderat, & quod durius illis uidebatur, exem-
plo sanctioris uitæ & offuscabat quotidie, & uiliiores redde-
bat, Hieronymi famæ detrahare cœperunt, capta occasio-
ne, quod nobiles ac diuites matronas lucri, & amoris inho-
nesti causa, sanctioris uitæ prætextu deceperat, & Hieroso-
lymam explendæ libidinis gratia ducebat. Subornatus est,
quo facilius res crederetur, quispiam rumigerulus, qui se
nescio quid inhonesti de sancto cum Paula uel uidisse, uel
audisse assereret: eoq. factum processit, ut uilis ille homin-
cio captus, quæstionibus super ea re examinandus subiice-
retur. negauit ille quod prius dixerat, & insontem clama-
uit in tormentis, quem antea tamquam scelestum infama-
uerat. Moritur interea Damasus. Hieronymus occasione
regrediendi Hierosolymam cum ex Pontificis morte, tum
ex impia hominum persecutione commode nactus, relicta
Roma, magna sanctorum comitante caterua, nauē in Ro-
mano portu conscendit, & per Siciliæ, & Italiæ fauces,
Peloponnesi promontoria, & Cyprum nauigans, adole-
scentem fratrem secum ducens Antiochiæ appellens, Hie-
rosolymam, & suam lætus reuertitur Bethlechem. exprimit
hæc

Diui Hieronymi.

hæc omnia ipsemet late Asellæ, epistola nonagesima nona, & etiam in Apologia contra Ruffinum. nos ex epistola illa pauca, ex Apologia, quæ prodat, cuncta ponemus. locum, qui plura desiderat, cōsulat. Ego, inquit, probrosus, ego uersipellis, & lubricus, ego mendax, & Satanæ arte decipiens? Quid est tutius, hæc uel credidisse, uel finxisse de infontibus, an etiam de noxiis credere noluisse? osculabantur mihi manus quidā, & ore uipereo detrahebant: & dolabant labiis, corde gaudebāt. Videbat Dominus, & substabat illos, & miserum me seruum suū futuro cum eis iudicio reseruabat. alius incessum meum calumniabatur, & risum: & ille uultui detrahebat: hic in simplicitate aliud suspicabatur. Pene certe triennium cum eis uixi. multa me uirginum crebro turba circumdedit. Diuinis libros, ut potui, nonnullis sæpe differui: lectio assiduitatem, assiduitas familiaritatē, familiaritas fiduciam fecerat. dicant quid umquam in me aliter fenserint, quam Christianum decebat? pecuniam cuiusquam accepi? munera uel parua, uel magna nō spreui? in manu mea æs alicuius insonuit? obliquus sermo, oculus petulans fuit? nihil mihi aliud obiicitur, nisi sexus meus: & hoc numquam obiicitur, nisi cum Hierosolymam Paula, & Melania proficiscuntur. isti crediderunt mentienti, cur non credunt neganti? idem est homo, qui fuerat: fatetur infontem, qui dudum noxium loquebatur: & certe ueritatem magis exprimunt tormenta quam risus: nisi quod facilius creditur, quod aut fictum libenter auditur, aut non fictum, ut fingatur, impellitur. antequam domum sanctæ Paulæ nossē, totius in me urbis studia consonabant. omnium pene iudicio dignus summo sacerdotio decernebar. Beatæ memoriæ Damasus meus sermo erat. dicebar sanctus, dicebar humilis, & disertus. numquid domū alicuius lasciuioris ingressus sum? numquid me uestes sericæ, nitentes gemmæ, picta facies, auri rapuit ambitio? nulla fuit alia Romæ matronarum, quæ meam posset edomare mentem, nisi lugens, atque ieiunans, squa lens sordibus, fletibus pene cæcata: quam continuis noctibus

✠ ✠ ✠ 3 bus

Vita

bus misericordiam Domini deprecantem, sol sæpe deprehendit. cuius canticum psalmi, sermo euangelium, delicia continentia, uita ieiunum. Nulla me potuit alia delectare, nisi illa; quam manducantem numquam uidi. sed postquam eam pro suo merito castitatis uenerari, colere, suspicere cœpi: omnes me illico deseruere uirtutes. O inuidia primum mordax tui. O Satanę calliditas semper sancta persequens. Nullæ aliæ Romanæ urbi fabulam præbuerunt nisi Paula & Melania, quæ contemptis facultatibus, pignoribus desertis, crucem Domini, quasi quoddam pietatis leuauere uexillum. Si balneas peterent, unguenta eligerent, diuitias, & uiduitatem haberent materiem luxuriæ, & libertatis, dominæ uocarentur, & sanctæ. nunc in sacco & cinere formosæ uolunt uideri, & in gehennam ignis cum ieiuniis, & pedore descendere. uidelicet non licet eis applaudente populo perire cum turbis. Si gentiles hanc uitam carperent, si Iudæi, haberent solatium nō placendi eis, quibus displicet Christus. nunc uero, pro nefas, homines Christiani, prætermittit domorum suarum cura, & proprii oculi trabe neglecta, in alieno oculo festucā quærunt. lacerant sanctum propositum, & remedium pœnæ suæ arbitrantur, si nemo sit sanctus: si omnibus detrahatur: si turba sit pereuntium, si multitudo peccantium. Tibi placet lauare quotidie: alius has mundities sordes putat. Tu attragenem ructas, & de comeso acipensere gloriaris: ego faba uentrem impleo. Te delectant cachinnātium greges, me Paula, Melaniaq. plangentes. Tu aliena desideras, illæ contemnunt sua. Te delibuta melle uina delectant: illę potant aquam frigidam suauiore. & infra. Hæc mi domina Asella, cum iam cōscenderē, raptim flens, dolensq. conscripsi: & gratias ago Deo meo, quod dignus sim, quem mundus oderit. Ora autem ut de Babylone Hierosolymam regrediar, ne mihi dominetur Nabuchodonosor, sed Iesus filius Iosedek. ueniat Ezdras, qui interpretatur adiutor, & reducat me in patriam meam. Stultus ego, qui uolebam cantare canticum Domini in terra

aliena

Diui Hieronymi.

aliena; & deserto monte Sina, Aegypti auxilium flagita-
bam. Non recordabar Euangelii, quia qui de Hierusalem
egreditur, statim incidit in latrones, spoliatur, uulneratur,
occiditur. Sed licet sacerdos despiciat, atque leuites, Sa-
maritanus ille misericors est. Nauigauit autem Hierosoly-
mam Paula cum Eustochio filia & multis uirginibus Roma *Epist. 27.*
no in portu nauem conscendens, post ipsius Hieronymi di-
scessum, quippe cum ab urbe discedens ipse, & nauē iam
ingrediens Asellæ Romæ degenti mandat, ut Paulam, & *Epist. 99. in si-*
Eustochium, uelit nolit mundus, suas saluet. Ipse autem *ne.*
stantibus Etesis Augusto abiit mense, & media hyeme a
Paulino Antiocheno Episcopo, qui antea una cum Epi-
phanio, uiuente iam Damaso, regressus Antiochiam fue-
rat, comitatus, Hierosolymam, & Bethlehem rediit. O-
mnem autem eius nauigationem, quod discessum eius ab
urbe cauillaretur Ruffinus, ipsemet ei respondens, qualis *Lib. 3. Apolo-*
fuerit, his uerbis refert. Vis nosse profectionis meæ de ur- *gia contra Ruf-*
be ordinem? narrabo breuiter. Mense Augusto, stantibus *finem.*
Etesis, cum Sancto Vincentio presbytero, & adolescente
fratre, & aliis monachis, qui nunc Hierosolymæ commo-
rantur, nauim in Romano portu securus ascendi, maxima
me sanctorum frequentia prosequente. Veni Rhegium: in
Scyllæo litore paululum steti: ubi ueteres didici fabulas, &
præcipitem fallacis Vlyssis cursum, & Sirenarum cantica,
& infatigabilem charybdis uoraginem. Cumq. mihi accollæ
illius loci multa narrarent, darentq. consilium ut non ad
Protei columnas, sed ad Ionæ portum nauigarem: illum
enim fugientium, & turbatorum, hunc securi hominis ef-
se cursum: malui per Maleas, & Cycladas Cyprum perge-
re. ubi susceptus a uenerabili Episcopo Epiphanio, cuius
tu testimonio gloriaris, ueni Antiochiam, ubi frui sum
communione Pontificis, confessorisq. Paulini: & dedu-
ctus ab eo media hieme, & frigore grauissimo, intraui Hie-
rosolymam. uidi multa miracula, & quæ prius ad me fa-
ma pertulerat, oculorum iudicio comprobauit. Inde con-
tendi Aegyptum, lustraui monasteria Nitriæ, & inter
sanctorum

*** 4

Vita

sanctorum chōros aspides latere perspexi . protinus concito gradu Bethlehem meam regressus sum, ubi adoravi prae-sepe, & incunabula Saluatoris. Vidi quoque famosissimum lacum : nec me inerti tradidi otio, sed multa didici, quae ante nesciebam . Quid autem de me Romae iudicatum sit, & quid postea scriptum, nolo taceas, praesertim cum habeas testimonia scripturarum : & ego non uerbis tuis, quae simulare potes, sed scriptis ecclesiasticis arguendus sim .

Vide quantum te timeam . Si uel paruam schedulam contra me Romani Episcopi, aut alterius ecclesiae protuleris, omnia, quae in te scripta sunt, mea crimina confitebor. Numquid & ego non possem profectionem tuam discutere? cuius aetatis fueris, unde, quo tempore nauigaris, ubi uiueris? quibus interfueris? sed absit, ut, quod in te reprehendo, faciam; & in ecclesiastica disputatione, anilium iurgiorum deliramenta compingam . Nauigans igitur D. Hieronymus non Protei columnas, hoc est Aegyptum, & altum petiit mare, sed ad Ioppen Ionae portum intra Maleas, & Cycladas insulas, contendens, Antiochia tandem appulit. moratus est autem Antiochia aliquandiu, & Paulini communione propterea usus est: quod Paulinus, quam-

*Theodor. lib. 3
cap. 5*

*Hist. trip. lib. 6
cap. 19*

*Hist. trip. lib. 5
cap. 47*

*Theodor. lib. 5
cap. 23*

uis ex Eustathiana factione post Meletium Luciferi Caralini opera assumptus fuisset: pro uero tamen Episcopo a Romana Ecclesia tenebatur, & iam in sede a Damaso confirmatus erat. Meletium autem, quamuis catholicus, ac sanctus ipse etiam esset, & in magno apud orientales omnes nomine, propterea Apostolica sedes confirmare noluit, quod ab Arianis ex Armenia assumptus in eo. Episcopatu positus erat. Durauit haec discordia, Theodoro teste, annis decem & septem, non tantum ipsis uiuentibus, sed in successoribus etiam eorum, Flauiano Meletii, & Euagrio Paulini; fauentibus Meletio, & Flauiano orientalibus omnibus, Paulino uero & Euagrio occidentalibus, &, quod amplius est, Romana Ecclesia. Anastasi tantum, qui Syricio successit, tempore composita contentio fuit. Imperiali enim in illis ius antea opprimebatur. Omitto Apollinarium,

Diui Hieronymi.

rium, & eius successorem Vitalem, hæreticos, ac etiã Eu-
zoiium Arianæ factionis hominem, qui Antiochiæ eccle-
sias omnes ita occupabat, ut Meletius aliquandiu extra ur- *Hist. trip. lib. 6*
bem, & Paulinus in una tantum urbis ecclesia solemnia ce. 23
lebraret. Theodoretus Sabellianæ hæresis accusatum a Fla *Theodor. lib. 3*
uiano Paulinum asserit: uerum falsam fuisse accusationem, *cap. 3*
cum ex amicitia, quam tam arcte cum D. Hieronymo. a-
cerrimo omnium hæreticorum hoste, Paulinus habebat,
tum ex communione Romanæ Ecclesiæ, in qua ille mor-
tuus est, certissimum habeo. Accusatus est ipse etiam Hie-
ronymus huius erroris, & tamen, si quis umquam alias, *Epist. 77*
falso: quapropter ea de re Marco Celedensi conquerens,
ait. Hæreticus uocor Homousion prædicans Trinitatem:
Sabellianæ impietatis arguor, tres subsistentes, ueras, in-
tegras, perfectasq. personas indefessa uoce pronuncians.
si ab Arianis, merito: si ab orthodoxis; qui huiusmodi
arguunt fidem, orthodoxi esse desierunt. aut si eis placet,
hæreticum me cum occidente, hæreticum cum Aegypto,
hoc est cum Damaso, Petroq. condemnent. Sed quid aio
de Paulino, atque Hieronymo? nonne ipse etiam Mele-
tius, qui omnium Græcorum præconiis celebratur, & quæ
Basilii, & Nazanzenus, duo orientis lumina, tantopere
in cælum ferunt, ueluti Sabellianus, ut idem scribit Theo-
doretus, ab Arianis & accusatus, & ex Antiochena sede
hoc nomine deiectus fuit? Arianorum calumnia hæc erat,
qui ut se ab hæresis infamia extricarent, uiros sanctos, qui *Hist. trip. li. 5.*
eis acriter resisteabant, hæresis macula respergebant. adeo *c. 48.*
enim Arianis insensus Paulinus fuit, ut D. Hieronymus *Epi. 61. contra*
scribat, Arianorum & Eunomianorum tempore Athana- *errores Ioan.*
sium, & Paulinum, solos in oriente mansisse catholicos. *Hierosolymita*
Aduenit autem eo non multo postea, ut existimo, Paula *ni.*
cum Eulochio filia, & Melania Marcellini Cōsulis nepte, *Epist. 27. epita*
multis comitata uirginibus; & Hieronymi nauigationem *phium Paulæ.*
secuta, post Cyprum Antiochiæ ipsa etiam appulit: dein- *et epi. 99.*
de sancta Palæstinæ terra, quemadmodum late eius iter in *Ruffinus lib. 2*
epitaphio prosequitur D. Hieronymus, lustrata, Bethle- *in uelutiarum*
hem,

Epist. 27 hem, ibi perpetuo Christi militiæ inseruitura, contendit.
Ex proæmio su mansit autem ibi per triennium satis angusto hospitio, *per epist. ad Ti*
tum. quousque latius extruxerit monasterium, ubi ipsa cum uir-
Epist. ad Ctesi- ginibus maneret, & aliud ubi Hieronymus, & uiri dege-
phontem cōtra rent, & diuersorium pro hospitibus ad ea loca pietatis, &
Pelagianos. religionis causa aduenientibus. Diues enim erat Paula, &
Epist. 101. ad Nicopolis in Adriaco littore posita, ad eius, ueluti quæ ab
Pammachium Agamemnone descendebat, possessionem maxime perti-
de optimo gene nebat. De Melania, quid egerit postea, uir sanctus nusquā
re interpretādi meminit. adhæsit enim illa Rufino & Euagrio Pontico, ac
 Hieronymi uitæ detrahere cœpit: in eius nomen propter-
 ea ille interdum inuehitur, & a tenebris perfidiæ dictā asse-
 rit: & dum de obrectatoribus suis meminit, Hæc non est,
 inquit, illius culpa, cuius sub persona alius agit tragœdiā,
 sed Rufini, & Melaniæ magistrorum eius: qui illum ma-
 gna mercede nihil scire docuerunt. Rufinus libro 2. inue-
 tiuarum aduersus Hieronymum, quod austerioris illa es-
 set, seueriorisq. disciplinæ, propterea q. illi Hieronymi uita
 non placeret, recessisse eam comminiscitur. laudatam an-
 tea a uiro sancto, ac Theclæ nomine appellatam, adiungit,
 sed post discessum e suis erasam libris. quod falsum est. re-
 gressa est enim illa Romam, Paula, Eustochioq. relictis, &
 quod amplius est, sanctioris uitæ proposito abiecto: & in-
 star uxoris Loth, cum aratri Christi stiuam teneret, retro
 respexit: conuersaq. est in statuam illius salis, de quo scri-
 ptum est: quod si sal euauerit, in quo salietur? ad nihi-
 lum ualet ultra, nisi ut mittatur foras, & conculcetur ab
 hominibus. Bethlehem autem D. Hieronymus sedem si-
 bi pietatis primum, & deuotionis intuitu elegit; quod in
 ea Saluator noster Christus natus, a pastoribus uisus, &
 adoratus esset a Magis: deinde quod amœnus & solitariae
 uitæ ex nemoribus illi adiacentibus commodus esset locus.
 Posita est autem Bethlehem in meridiana plaga, & tribui
 Iuda annumerata, sub Episcopatu Hierosolymitano, sex,
 ut testatur Seuerus Sulpicius, qui oram inuisit, & sex men-
 sibus ibi cum sanctissimo uiro degit, milliariis a Hierosoly-
 ma

Diui Hieronymi.

ma distans, & sexdecim ab Alexandria mansionibus. Cellula, in qua Hieronymus mansit, posita erat, ut ipsemet in libro de nominibus Hebraicis testatur, in diuerticulo, quod ibatur ad tumulum Archelai Regis. Super ipsum autem specum unde salus mundo emerfit, ecclesia constructa erat, & super ipsum prae-sepe, in quo agnus Dei reclinatus est, erectum altare: ut Christus in sacrificio ad placandam eius iram, ibi Deo offerretur, unde ille pro salute hominum primum mundo illuxit. construxit ibi postea Paula monasteria quattuor, & diuersas pro diuersis peregrinis iuxta uiam posuit mansiones. Monasterium unum uiri incolebant, reliqua tria uirgines, ut quae in tres turmas diuisae essent: licet in opere, & cibo seiunctae, psalmodiis tamen, & orationibus iungebantur. erant haec monasteria ad ecclesiae super specum ipsum constructae latus, ad eamque die tantum Dominico uirgines, unumquodque agmen propriam matrem sequens, accedebant. a uiris autem adeo separatae uiuebant, ut ne spadonibus quidem ad eas siceret accedere: & praeparium altitudine nullus furtiuus ad eas aditus erat. Quae fuerit earum uita, late Hieronymus in epitaphio Paulae persequitur. locum, si quis plura desiderat, adeat. Ipse autem Hieronymus, qui usque ab adolescentia monachi egerat uitam, die noctuque studiis, nunc legendo, nunc scribendo, uacabat, & cum aliis fratribus in monasterio labore desudabat. uiuebat in paupertate, & ut Rufinus ipse testatur, pecunias nec habebat, nec habere uolebat; sed habens uictum, & uestitum his contentus erat, in cellula latebat, & sacerdotium non ambibat, nec humilitate damnata episcopatum auro redimere festinabat. esset tantum, non etiam apparere cupiebat, & interno dumtaxat homine, non etiam externo proficere satagebat. Haereticos adeo persequabatur, ut coram eo haereses, ueluti coram sole nebulae, euanescerent. nouerunt hoc Mileuitani concilii patres, qui ad Innocentium primum scribentes, Hieron. uti istrenuum haereticorum impugnatorem praedicant. Sanctam igitur rursum inchoas uitam, & ueluti nouus quidam miles ad certamina, laboresque.

*Epist. 61. contra
errores Ioan.*

*Hierosolymita
ni.*

Epist. 48.

*Epist. 27. in
epita. Paula.*

Epist. 48

Epist. 112.

Augustino.

Seuerus Sulpicius.

Lib. 1. contra

Ruff.

Vita

laboresq. resurgens, nihil omittit eorum, quæ ad æternam salutem consequendam uel utile, uel necessarium esse retur. corpus ieiuniis macerat, mentem studiis, spiritum pascit oratione. ubi oratio deficit, lectio, ubi lectio, oratio incipit. somnus non ad delicias, sed ad naturæ capitur necessitatem: in duro, non in mollibus cubat; & uili pallio, non pretioso, ac nitido tegitur indumento. ex ore nihil nisi sanctum, nisi castum procedit. quodcumque ex eo audieris, Christi sermo est: & in ipso quoque silentio Deum loquitur: humilitatem non minus re quam habitu, & professio-
Lib. 2. contra ne præstat: hospites benigne excipit, omnesq. præter hæ-
Ruffinum. reticos, illisq. pedes etiā lauat. uigilat cor eius dum dormit, & cum ambulante Christus ambulat, cum sedente sedet. sed præter omnem tam animi, quā corporis sanctitatē, puritatemq. quibus ueluti præclara lux quædam mundo irradiat, studiis nunc aliquid uertendo, nunc commentando incumbit, præcipue autem aduersus hæreticos elaborando.
Epist. 116 Primo quinquennio quo ex urbe Roma discedens Bethle- hem repetiit, Ecclesiasten ex Hebræo transfulit; & præcla- rissima illius ingenii monumenta, libros aduersus Iouinia- num, exarauit. Canis iam caput eius spargebatur, ipseque nihil propterea ex studiorum assiduitate remittens, cum Didymi Alexandrini, qui olim Athanasio carus, & Ma- gno Antonio amicus fuerat, fama usquequaque celebris ob doctrinæ magnitudinem efferretur, essetq. illa tanto alio- rum doctorum fama celebrior, quanto hominis cæcitas, quæ a parua illum ætate ceperat, singularem eam magis red- debat, rursus Alexandriam, ut eum uideret, & dubiorum quæ in scripturis habebat, ab eo solutiones audiret, perre- xit. magnam cum eo amicitiam inde contraxit, tale que,
Ex catalogo. ut ille Didymi de Spiritu sancto librum transferret, in Di- dymus expositionem in Osee prophetam illi dicauerit, e ius- demq. rogatu commentariorum in Zachariam libros quin- que dictauerit. meminit huius rei ipsemet Hieronymus in
Epist. 65 epistola ad Pammachium & Oceanum, ita scribens. Iam canis spargebatur caput, & magistrum potius quam disci- pulum

Diui Hieronymi.

pulum decebat: perrexi tamen Alexandriam, audiui Didymum. in multis ei gratias ago: quod nesciui, didici: quod sciebam, illo docente non perdi. & rursus in procemio ad Ephesios. Non quo ab adolescentia aut legere unquam, aut doctos viros ea, quæ nesciebam, interrogare cessauerim: & metemet ipsum tantum, ut plerique, habuerim magistrum. denique nuper ob hanc uel maxime causam Alexandriam perrexi, ut uiderem Didymum, & ab eo in scripturis omnibus, quæ habebam dubia, sciscitarer. Et in procemio super Osee prophetam ad Pammachium. Ante annos circiter uigintiduos, cum rogatu sanctæ & uenerabilis focrus, immo matris tuæ Paulæ, (illud enim nomē carnis, hoc spiritus est,) quæ monasteriorū, & scripturarum semper amore flagrauit, essem Alexandriæ, uidi Didymū, & eum frequenter audiui, uirū sui temporis eruditissimum: rogauiq. eum, ut quod Origenes non fecerat, ipse compleret, & scriberet in Osee commentarios, qui tres libros, me petente, dictauit, quinque quoque alios in Zachariā. & in tertio contra Rufinum libro. Extat liber Didymi ad te, quo sciscitanti tibi, respondit, non eos multa peccasse, & ideo corporum carceres tantum eis tetigisse sufficere. Magister meus, & tuus, eo tempore, quo tu ab eo ista quærebas, tres explanationum in Osee prophetam libros ad me, me rogante, dictauit: ex quo apparet, quid me, quid te docuerit. Peritissimus in scripturis Didymus fuit, itaque, ut quemadmodum librorum multitudinem Origeni, eloquentiā Ciceroni, Aristoteli argumenta, prout *Epist. 51. ad* Platonem, & Aristarcho eruditionem Hieronymus *Domnionem.* tribuit, ita scientiam scripturarum Didymo concedat. non immerito igitur se Gregorium Nazanzenum, & Didymum in scripturis sanctis catechistas habuisse cum Domnionem gloriatur. Quandiu autem Alexandriæ apud Didymum uixerit D. Hieronymus, ipse non prodit: Rufinus, si tamen ei credi potest, per mensem tantum cum ibi mansisse scribit. *Epi. 65. Pammachio et Osee.* Reuersus ab Alexandria, rursusq. Hierosolymam, & Bethlehem suam repetens, magno labore, & impendio uo. Barrabanum,

Vita

Barrabanum, seu uerius Barhanina, Hebræum præcepto rem noctu audit. timebat enim ille Iudæos, propterea q. in-
tar Nicodemi qui in tenebris Christū adiit, clam, ne factū a Iudæis resciretur, hoc est nocte tantū Bethlehem ueniens Hieronymū edocebat: magno enim pretio eū, ut illuc ad docendum accederet, cōducebat. meminit huius præcepto-
ris multis in locis, sicut de Huillo Origenes, præsertim in epistola ad Pamachiū, & Oceanū, & ubi Ruffino respō-
det, qui nō minus inepte, quā impie uiro sancto obiciebat, quod Barrabā dimissō Christo sequeretur, & Iudaicis incū-
beret lectionibus: pulchre sibi ex euāgelio lusum accepisse existimans, si cū Iudæorū populo clamaret, non hunc, sed Barrabā: uir ipse qui ueluti inter olores anser obstreperet, & semet sanctorū, doctorumq. hominum numero auderet immiscere. Cum, ut respōdens ei Hieronymus ait, ab eo Hebræā linguam discere nō poterat: quia adeo tenacis erat ingenii, ut unā sine alterius amissione discere non posset: suam enim, hoc est Latinā, oblitus erat, dum peregrinam Grecorum sectatus est: finxit, ut malignitatē hominis no-
scas, hæc garriens cornicula Hieronymi etiā nomine epistolam, in qua illum pænitiā agere diceretur, quod huius uacauerit studio, cum in eo nil nisi falsum, uanumq. reperi-
retur: & ubique per cereales, & anabasis suos sparsam disseminauit: tantum sibi apud omnes uindicta impudentia, & eousque hominū liuor procedit. Et undenam apud nos ex Hieronymi studiis maior quam ex Hebraicæ linguæ cognitione utilitas emanauit? unde emolumentum maius profluxit? Eius enim tantū interpretatio ab Ecclesia iam-
diu recepta in usū nunc est, eius uersio legitur, & citatur. Septuaginta enim, exceptis Psalmis, qui ipsi etiam sicut a Hieronymo emēdati sunt, leguntur, nullum amplius apud Latinos locum tenent. An non Abraham in omni Chal-
dæorum, & Moyses Aegyptiorum sapientia docti fuerunt; & Christiano homini non licet in utilitatem Ecclesiæ, argu-
tarum apum instar, undique quæ bona ac recta sunt, col-
ligere, & comportare? Nihil propterea hoc studium omit-
tens

Diui Hieronymi.

tens D. Hieron. circuit etiam posthæc cum eruditissimis
Hebræorum, omnem Palæstinæ terram, ut cuncta illius lo-
ca, situs, ac regiones, de quibus scriptura meminit, pro-
priis collustraret oculis, & quod absens audierat, præsens
uideret. Et cum Paralipomenon librum translaturus esset,
propter immensam congeriem nominum, quæ in eo con-
tinetur, ex Tyberiadē eruditissimum quendam Hebræum
legis doctorem, qui ceteris Iudæis admirationi erat, con-
duxit, & cum eo a principio usque ad finem cuncta, quæ in
eō libro scripta sunt, examinavit: sicut ipse ad Domnio- *Epist. 108. ad*
nem, & Rogatianum testatur. Non multo post quam re- *Domnionem,*
uersus ex Alexandria fuit, ut ipse in proœmio eorum libro- *& Rogatiano.*
rum testatur, commentarios in epistolam ad Ephesios scri-
psit. adiunxit deinde eos qui sunt ad Philemonē, mox qui
ad Galatas, postremo qui ad Titum, ut ex eius præfatio-
nibus commentariis adpositis constat. omnes autem Pau-
læ, & Eustochio iam in Bethlehem degentibus dicauit: cō-
mentarios uero, qui sunt super Matthæi euangelium, ad
preces Eusebii presbyteri, Cremonensis, intimi sibi ami-
ci, tunc Romam proficiscentis, tumultuarie conscripsit: si-
cut aliquanto postea, qui sunt in septem prophetas, Mi-
cheā, Nahum, Abacuk, Sophoniā, Aggeum, Zachariā,
atque Malachiam. in ceteros enim quinque minores scri-
psit multo deinde, hoc est mortua iam Paula, post uiginti
duos circiter annos, ex quo ab Alexandria, & Didymo re-
uersus fuerat: sicut in Abdiam tricesimo suæ ætatis anno &
in quattuor maiores multo post, hoc est in postrema fe-
re senectute. Verum quia hanc rem plene ipse disserit, eum
suis uerbis ad Pammachium scribentem audiamus. Præpo-
stero ordine, atque confuso duodecim prophetarum opus
& cœpinus, & Christo adiuuante cōplebimus. Non enim
a primo usque ad nouissimum iuxta ordinem, quo legun-
tur, sed ut potuimus, & ut rogati sumus, ita eos dis-
seruimus. Nahum, Micheam, Sophoniam, & Aggeum
primo *φιλοπονητάς* Paulæ, eiusq. filix Eustochio *προ-*
εργόνισα. Secundo in Abacuk duos libros Chromatio
Aquileienti

*Ex proœmio su-
per Osee.
Ex proœmio in
Abdiam.
Ex proœmijs
maxime in
Ezechielem.*

Aquileiensi Episcopo delegavi. Tercio post longi temporis silentium Abdiam & Ionam tibi imperanti disleri. Præsenti anno qui sexti consulatus Arcadii Augusti, & Anicii Probi fastis nomen imposuit, Exuperio, Tolosana Ecclesiarum Pontifici, Zachariam, & eiusdem urbis Minerio & Alexandro monachis, Malachiam prophetam interpretatus sum. statimque recurrens ad principium uoluminis Osee, & Joel, & Amos tibi negare non potui. Interea Rufinus librum Origenis *πεὶ ἀρχῶν*, multis enormibus refertum erroribus transfert, & ut illum mundo legendum obtrudat, Hieronymum, quod Origenem ipse etiam transtulerit, ac laudauerit, ad cælum effert. intercesserat inter eos antea nescio quid dissidii, sed reconciliati inuicem fuerant: Verum gratia male sacra non coit. incipit eam ob causam cicatrix uix obducta recrudescere, dum Hieronymus ab amicis Pâmachio & Marcellino ex urbe monetur, se ex obliquis Rufini laudibus Origenistam credi, & pro uero ita teneri, nisi suspensiones hominum purget. Verum nondum ad pugnas, & contentiones uerborum uentum erat, ut ab epistola sexagesima sexta discere quis potest. Crescebat hoc eodem tempore in Bethlehem monasterium, quod a Paula exædificabatur. uerum licet pro uiris, & uirginibus ibi degentibus satis capax extructum habitaculum esset; & pro peregrinis mansiones aliquæ circa uiam erectæ: tantus tamen undiq. ad ea loca pietatis causa hominum concursus erat, præsertim monachorum, ut diuersorium magis amplum Hieronymus ædificare cogitauerit. mittit propterea Paulinianum sibi germanum in patriam, iam a Gothis uastatam; ut semirutas uillulas, quæ barbarorum effugerant manus, & parentum communium uenderet census. obierant enim tunc Hieronymi, Paulinianiq. parentes. degerebat hoc tempore Romæ Rufinus, eamq. tunc Syricus, de cuius testimonio deinde sub Anastasio, qui eum de Origenis uersione damnauit, gloriabatur, gubernabat. ex ea Aquileiam, & patriam reuersus postea est, Pauliniano adhuc in Dalmatia, & uicinis oris manente. meminit huius

Ex præfat. Ruf. sui in li. περὶ ἀρχῶν.

Epist. 66

Epist. 66. Ruf. fino.

rci

Diui Hieronymi.

rei in epistola ad Pammachium, & in altera, quæ ad ipsum
Ruffinum est, his uerbis Hieronymus. Nos in ista prouin-
cia ædificato monasterio, & diuersorio propter extructo, *Epist. 26*
ne forte & modo Ioseph cum Maria in Bethlehem ueniens *Pammachio de*
non inueniat hospitium, tantis de toto orbe confluentibus *obitu Pauline*
turbis obruimur monachorum, ut nec coeptum opus dese-
rere, nec supra uires ferre ualeamus. unde, quia pene no-
bis illud de euangelio contigit, ut futuræ turris non ante
computaremus expensas, compulsi sumus fratrem Paulinia-
num ad patriam mittere, ut semirutas uillulas, quæ barba-
rorum effugerunt manus, & parentum communium cen-
sus uenderet, ne coeptum sanctorum ministerium deserentes,
risum maledicis, & æmulis præbeamus. & ad Ruffi-
num. Frater meus Paulinianus necdū de patria reuersus est, *Epist. 66.*
& puto quod eum Aquileiæ apud sanctū papam Chroma-
tium uideris. Sanctum quoque presbyterum Ruffinum ob
quandam causam per Romam Mediolanum misimus: &
orauimus, ut nostro animo, & obsequio uos uideret. *Ruffino.*
Gothi autem aliquot annis ante Romam captam, hoc est
Valentis tempore, ut Orosius testis est, primum Thraciā, *Orosius lib. 7*
exinde, ut alii, Pannoniam, Dalmatiamq. uastarunt. quo c. 19.
tempore Stridon quoque destructa fuit. Reuersus Palæsti-
nam Paulinianus, et iam xxx annorum uir factus, ab Epi Ioannem
phanio Cypri, inuitus tento scilicet ore ne reclamaret, pri-
mum diaconus, deinde presbyter in monasterio quodam
Eleutheropolitani territorii ordinatus est. arripuit ex hac
causa inimicitarum ansam Ioannes Hierosolymitanus epi-
scopus aduersus Epiphanium, Hierosolymitanus episcopus
aduersus Epiphanium, Hieronymumque, & monachos
secum degentes: qui se uti Origenistam ab eis corripere,
& profligari uideret. asserit enim, in sua diœcesi Paulinia-
num, se inscio, ordinari non debuisse, præsertim cum æta-
tis sacerdotio aptus ille non esset. replicant illi, ad Eleuthe-
ropolitanam, non Hierosolymitanam diœcesim monaste-
rium illud, ubi ordinatio facta est, pertinere, & Paulinia-
num, cum iam xxx annorum sit, presbyteratui aptū esse,

† † * * nec

nec plures habuisse annos ipsum Ioanneni, cum Episcopus creatus est. contentio eoulque processit, ut Ioannes excommunicauerit omnes, qui Paulinianum pro presbytero haberent, ita ut ipse etiam Hieronymus aliquandiu specum Domini tantum uidere, non etiam ingredi, propter Ecclesiam super eum constructam, cum monachis posset: posita enim sub Episcopatu Hierosolymitano Bethlehem

Epist. 61. contra Ioannem. est. De hac autem re ipse his uerbis conqueritur. Ego mihi, dum in solitudine delitescio, a tanto Pontifice repente truncatus, presbyteri nomen amisi. Et infra. An nō tu potius scindis Ecclesiam, qui praecepisti Bethlehem presbyteris tuis, ne competentibus nostris in Pascha baptismum traderent, quos nos Diospolim ad confessorem & Episcopum misimus Dionysium baptizandos? Ecclesiam scindere dicimur, qui e tra cellulas nostras, locum Ecclesiae non habemus? An non tu scindis Ecclesiam, qui mandas clericis tuis, ut si quis Paulinianū ab Epiphanio episcopo consecratum presbyterum dixerit, Ecclesiam prohibeatur intrare? ex quo tempore usque in praesentem diem uidemus tantum specum Domini, & haereticis intrantibus procul positi suspiramus. Nos ne sumus, qui Ecclesiam scindimus, an ille, qui uiuis habitaculum, mortuis sepulcrum negat, qui fratrum exilia postulat? Non contentus hac excommunicatione Ioannes, ab Imperatore etiam obtinuit, ut Hieronymus una cum monachis in exilium mitteretur, uerum re melius perpenſa effectum suum rescriptū sortitū non est. Nuper nobis, inquit, postulauit & impetrauit exilium, atque utinam implere potuisset, ut sicut illi uoluntas impetratur pro opere, ita nos non solum uoluntate, sed & effectū coronam haberemus exilii. Archelaus Comes sequeſter Pacis inter eos prius fuerat, & Theophilus Alexandriae episcopus eandem, nondum erroribus Ioannis cognitis, per Isidorum presbyterum procurauit. uerum cum Diuus Hieronymus hominis detexisset errores, quod scilicet Originista esset, & octo, quas interim improbando recenset, haereses, praedicaret, & Pauliniani praeſextu, eos persequeretur,

Diui Hieronymi.

queretur, ipseque interea Ioannes, ut se expurgaret; uocatus, accedere noluisse, finis controuersiae positus est. Origenes enim quem Ioannes sequebatur, ab Alexandrina tunc primum Ecclesia sub Theophilo episcopo, Epiphanio, Hieronymoque instantibus, in oriente damnatus est, quam condemnationem occidens postea Romaque firmavit. Romae Syricus papa adhuc Apostolicam regebat Ecclesiam cum Rufinus libros *ὑπὲρ ἀρχαίων*, Origenis a se uersos in ea disseminat, ac multos eorum decipit lectione. Heretici, quod amplius est, simplicitati sancti uiri illudentes communionis litteras discessuri ex urbe impetrant. negauerant enim se Origenis sequi errores. Detegit errores eorum Marcella, & examinatis testibus, illos adeo conuincit, ut cum uocati comparere noluerint, ab Anastasio, qui Syricio successit, condemnati sint. Hoc tempore inimicitiae, quae olim erant ex causa fidei cum Rufino, & sopitae non extinctae fuerant, in apertas contumelias eruperunt. Dum enim ille Hieronymum secum in haereseos suspicionem, ueluti Origenista esset, trahere suis praconis conatur, & uir sanctus se ab huiusmodi infamia extricare cunctis uiribus querit, necesse fuit aperte in hostem procedere, & amicitiam ab adolescentia cum Rufino contractam, religionis causa penitus scindere. Quis enim aequo animo se haereticum appellari patiatur, & perpetuo permansura infamia notari? praesertim cum huiusmodi labes uix umquam eluatur, & nisi infinitis propemodum contra scriptis, testificationibus, ac rebus etiam gestis contrarium postea manifeste appareat, numquam tollatur. Insurgit propterea acriter in Rufinum uir sanctus, & cunctis uiribus insidiantem sibi proterit hostem: & non tantum in refellendis falso uitae obiectis criminationibus, quam in abigenda a se haereseos infamia occupatur: tantaque indignatione huius materiam defensionis suscepit, ut stylum, iam ob omissa a multis annis gentilium litterarum studia languentem, & propter Hebraicae linguae barbariem quandam uitiatum, quasi tunc a rhetorum schola egressus esset, ita ornate, acuteque exacerit, ut Rufinus

✠ ✠ ✠ ✠ I

postea

Epist. 82. postea ne inter doctos quidem haberi cœperit. Regebat
Marcellino. hoc tempore Romanam Ecclesiam Anastasius papa, eiq.
 Ruffinus libellum, cui postea Hieronymus respondit, dica-
 uit: & in Africa docebat Aurelius Augustinus, & Hyppo-
 nensem gubernans Ecclesiam suæ doctrinæ, ac sanctitatis
 documenta ubique spargebat. Audiens iam celebrem Hie-
 ronymi tum senis per totum terrarum orbem diffusam fa-
 mam, (ad eum enim ueluti ad oraculum quoddam undi-
 que concurrebatur,) & se Hieronymi comparatione tam-
 quam nouum quendam in Ecclesiasticis studiis militem esse
 cognoscens, contrahendæ amicitiae causa ad eum scribere
 incipit; interrogans ab eo quædam; & expositionem eius
 de Pauli simulatione modestè uellicans. in scribendo, rescri-
 bendoq. pro talibus rebus, multū conteritur tempus: dum
 litteræ sero ad Hieronymū ad quē mittuntur perueniunt.
 Certatum est aliquandiu pro hac re inter eos, præsertim
 dum expositionem suam, quod Paulus simulauerit, Hie-
 ronymus defendere; & Augustinus dum mendacium omne a
 scripturis sacris tollit, alio modo solui posse difficultatem
 contendit: uidelicet ut Paulus seruando tunc modo quo-
 dam non necessario legalia minime errauerit, proptereaq.
 recte Petrum, qui ad ea gentiles exemplo suo adigeret, re-
 prehendere potuerit. Putatum est a principio inter eos ma-
 gnas exoriturus fore discordias, dum Hieronymus, a iuue-
 ne tunc primum exoriente uidens se notari, excanduit: ue-
 rum Christi caritas, qua inter eos certabatur, omnem dis-
 cordiam ademit, tantumq. postea Augustinus Hieronymo
Epist. 86 detulit, ut scripta sua discutienda illi miserit, libros dicaue-
Epist. 94 rit, & quæstiones aliquot, præsertim quæ sunt de origine
 animæ, ab eo petierit; & quia propter locorum distantia,
 & animarum curam proficisci ad discendum in Bethlehem
 non poterat, misit ad eum qui sua uice quærerent & disce-
Epist. 94 rent a Hieronymo multa, Paulum Orosium, Alipium, &
Epist. 86 Profuturum quendam presbyterum, qui tamen Profutu-
 rus morte præuentus eo peruenire nō potuit. misit per Cy-
 prianum diaconum & alios epistolas multas; uehemēterq.
 dolebat,

Diui Hieronymi.

dolebat, se eo ad discendum proficisci non posse. multum enim, ut par erat, deferebat Hieronymo, & in uiro non minus omnis generis cumulate positam doctrinam, quam uitæ sanctitatem admirabatur: sicut ipse ad eum scribens his uerbis testatur. Tantæ autem mihi in litteris tuis, quæ in manus nostras peruenire potuerunt, apparent res, ut nihil studiorum meorum mallem, si possem, quam inhaerere lateri tuo. quod ego quia non possum, aliquem nostrorum in Domino filiorum erudiendum nobis ad te mittere cogito, si etiam de hac re tua rescripta meruero. nam neque in me tantum scientiæ diuinarum scripturarum est, aut esse iam poterit, quantum inesse tibi uideo. Quod autem Paulus Orosius in Bethlehem cum Hieronymo fuerit, ipsemet in septimo historiæ suæ libro prodit his uerbis. Ego quoque ipse uirum quendam Narbonensem illustris sub Theodosio militiæ etiam religiosum, prudentemq. & grauem apud Bethlehem opidum Palæstinæ, beatissimo Hieronymo presbytero referente, audiui, se familiarissimum Atthaulpho apud Narbonam fuisse. At non solum Augustinus, sed totus terrarum orbis senem uenerabatur. Seuerus Sulpicius propterea illum inuisit, & sex mensibus cum eo mansit, mansissetq. ut ipse ait, perpetuo, si potuisset. doctissim in omni uerse scientia, & acerrimum hæreticorum prædicat hostem, & quod omne tempus in studiis cõsumeret interea asserens. Aedibia & Algasia ex ultimis Galliarum finibus Apodemium pro mirarum quæstionum solutione ad eum misit. miserunt ex Germania Sunia & Fretella ut uarietatem psalterii ab eo audirent. Mittebant ex urbe Pâmachius, Oceanus, & alii: ut uel contra hæreticos responderet, uel dubia aliqua a se mota dissolueret. Mittebant & ex reliquis, tantusq. undique ad eum quæstionum ac litterarum concursus erat, ut scribens Paulino hoc ipsum ipse illis uerbis testatur: Et ut sanctæ mentis simplicitate fatear, uno ad occidentem nauigandi tempore, tantæ a me simul epistolæ flagitantur, ut si cuncta ad singulos uelim scribere, occurrere nequeam. ob res Paulæ & Eulochii. Firinum presbyterum

Epi. 113.

Epist. 150.

*151
Epist. 153*

Epist. 153

Epist. 94

*** 3 Rauennam

Rauennam, Africam, Siciliamq. his temporibus Hieronymus misit, qui ad eum reuersus sospitem esse Augustinum renunciauit. Moritur interea Paula, antequam scilicet Roma a Gothis sub Innocentio, Duce Alarico, caperetur, hoc est Honorio Augusto sexies & Arestino Cōsulibus, sub finem scilicet Anastasii Pontificatus, anno scilicet Domini quadringentesimo septimo: Affidet ægrotanti Hieronymus: & in longa eius infirmitate sedulo inseruit. Succedit Anastasio Innocentius primus, cuius octauo anno, cum is Rauennæ ut auctor est Orosius, moraretur, Roma capta fuit, his octo, qui a fine Anastasii ad Romam captā præterfluxerunt, annis, in Esaiam & Hieremiam D. Hieronymus scripsit: patet enim ex præfationibus affixis obiisse iam Paulam: nam quod capta tunc fuisset Roma, anno scilicet Domini quadringentesimo duodecimo, in procemio Ezechielis ipsemet clare his uerbis ad Eustochium scribens meminit. Postquam uero clarissimum terrarum omnium lumen extinctum est, immo Romani Imperii truncatū caput, &, ut uerius dicam, in una urbe totus orbis interiit, obmutui, & humiliatus sum, & filii de bonis, & dolor meus renouatus est. & ad Marcellinum: Ezechielis uolui-
Epist. 82 men olim aggredi uolui & sponsonem creberrimā studiosis lectoribus reddere, sed in ipso dictandi exordio ita animus meus occidentalium prouinciarum & maxime urbis Romæ uastatione confusus est, ut iuxta uulgare prouerbiū, proprium quoque ignorarem uocabulum. De urbis Romæ uastatione meminit etiam in epitaphio Marcellæ, cui &
Epist. 16 Pammachio Danielis commentarios dicauit, qui etiam ipsi ante captam Romam conscripti sunt; post mortem similiter, ut reor, Paulæ; sicut epitaphium Marcellæ post illius ruinam. Nobiles multi, & utriusque sexus homines post euersam Romam Hierosolymam pergebant, quos Hieronymus ea qua poterat humanitate gratanter excipiebat, unde in procemio commentariorum tertii libri Ezechielis ita ipse ad Eustochium scribit. Quis crederet, ut totius orbis extructa uictoriis Roma corrueret, ut ipsa suis populis, &
 mate^r

Diui Hieronymi.

mater fieret; & sepulcrum; ut tota orientis, Aegypti,
Africæ littora olim dominatricis urbis, seruorum, & an-
cillarum numero complerentur? ut quotidie S. Bethlehem
nobiles quondam utriusque sexus, atque omnibus diuitiis
affluentes susciperet mendicantes? quibus quoniam opes
ferre non possumus, condolemus; & lacrymas lacrymis
iungimus, occupatiq. sancti operis sarcina, dum sine gemitu
confluentes uidere non patimur, explanationes in Eze-
chielem, & pene omne studium omisimus. laudans in epi-
taphio Marcellæ Anastasium Papam Hieronymus ait. In-
dignam fuisse Romam, qui eum diu haberet, ne sub tali
Pontifice illa uel caperetur, uel eius precibus placatus De-
us faceret, ne caperetur. Senuerat iam Hieron. & in pro-
phetarum interpretationibus occupatus studium quotidie
ponebat, cum statim ex urbe Hierosolymam Fabiola in spe
rata aduenit, ut in sanctis locis Christo seruiret. affert secu-
ingentem, quo Hieronymum, Eustochium, & uirgines
recreet, lætitiā femina, quæ tamen paruo durauit tem-
pore. dum enim loca sancta inuiseret, statim nuncius affer-
tur, Hunnorum insuīta examina cuncta sibi obuia ubiq. ua-
stantium Hierosolymam petere. Inueteratum sanctorum
locorum desiderium Hieronymum, ut in fixis maneret, cū
uirginibus sedibus, tenuit; quamuis paratam ad fugam clas-
sem teneret, Fabiola, ut quæ ad iter expedita esset, quip-
pe quæ sedes iam nullas posuerat, ac tota esset in sarcinis,
Romam rediit. Conscripsit ei postea librum de quadragin-
ta duabus mansionibus, sicuti uiuenti pollicitus fuerat, &
memoriæ mortuæ reddit, sicuti uiuenti opus, quod est de
sacerdotalibus uestibus, in procinctu, cum nauigaturus iā
esset, præstitit. Quod autem post Romam captam barba-
rorum illuies orientis loca, præsertim Syriæ cum Antio-
chiæ obsidione percurrerit, atque ualtauerit, ipsemet Hie-
ron. scribens Marcellino & Anapsychiæ aperte testatur. in
qua epistola Fabiolæ etiam mentionem facit, asserens,
quod duos super Ezechielem commentariorum libros
ei miserat, & quod ab ea exemplaria mutuari si uellet,
posset.

*Epist. 30. Fa-
biolæ epit.*

*Epist. 127
Epist. 128*

Epist. 82

†††† 4

posset. Exponebat præter cōmentariorum tam exactos labores Bethlehem manens Hieronymus in cōuentu fratrum sacros Bibliorum libros, a l x x uersos: de qua re ipse his
Li. 2. contra uerbis meminit. Ego ne contra l x x interpretes aliquid
Ruffinum. sum locutus, quos ante annos plurimos diligētissime emē
Ruff. libr. 2. datos meæ linguæ studiosis dedi, quos quotidie in conuen
in. eclinarum. tu fratrum edislero, quorum psalmos iugi meditatione decanto? Ruffinus grammaticum usum officio & ante non multos annos nobiliū puerōs sibi ad discendum Christi timorem commissos humanioribus poetarum & historiarum litteris docuisse criminatur. quasi crimen, & non potius immēsa sit laus una cum Christianæ religionis rudimentis litteras quoque quæ illi ætati necessariæ sunt, pueris tradere, & paruulis tamquam paruulum fieri; ut eos quis lucrifaciat. uide quo hominis liuor procedat, ut quod laudis loco sit, opprobrio detur. Certe ipse in præmio terti ad Galatas libri, Paulæ & Eustochio testatur, quindecim & amplius tunc fuisse annos, ex quo gentiliū libros non legerit. Præter studiorum & orationis occupationem, necessē illi erat, quotidie aduenientes ad ea loca Christianos excipere, & ea qua poterat humanitate recreare. Qui quidem concursus tantus erat, ut studiis uix esset relictus locus. De qua re ita ipse Eustochio testatur. Fateor me explanationes in Ezechiel multo ante tempore promississe, & occupatione de toto huc orbe uenientium implere non posse, dum nulla hora, nullumq. momentum est, in quo nō fratrum occurramus turbis, & monasterii solitudinem hospitum frequentia commutemus, in tantum ut aut claudendum sit nobis ostium, aut scripturarum, per quas aperienda sunt fores, studia relinquenda. Itaque lucratiuis, immo furtiuis nocturnis horis, quæ hieme propinquante longiores esse cœperunt, ad lucernulam, qualiacumque hæc sunt, dictare conamur. Ad Lucinium quoque scribens, quod præ frequentia, & peregrinorum turbis relegere quæ scripserat non potuerit, asserit. recipiebat enim uenientes omnes ad ea loca cum tanta caritate, ut pedes etiam se illis
solitum

In præm. 7
libri super
Ezechielē.

Epist. 28.

Diui Hieronymi.

solitum esse lauare his uerbis testetur. Nobis in monasterio hospitalitas cordi est, omnesq. ad nos uenientes læta

Lib. 3. contra

Ruff.

humanitatis fronte suscipimus: ueremur enim me Maria cum Ioseph locum non inueniat in diuersorio, ne nobis Iesus dicat exclusus, hospes eram, & non suscepistis me. solos hæreticos non recipimus, quos uos solos recipitis. propositum nobis quippe est pedes lauare uenientium, non merita discutere. Ad decrepitam propemodum, & ultimam iam uenerat ætatem, sicut ipse ad Augustinum his uerbis testatur. Me autem ætatis ultimæ, & pene decrepitum, ac monasterii, & ruris secreta sectantem, paruipendunt. Nec tamen propterea a studiis quicquã operæ remittebat, & non minus ad orandum alacris, quam ad legendum promptus surgebat. Mirum erat, in corpore ieiuniis & ætate consumpto tantum spiritus, tantum uigere fortitudinis. quod corpori deerat, supplebat animus, & sacrarum rerum meditatione mentem quotidie recreabat. uideres hominem a corporeis uinculis absolutum, ueluti auem quandam a nexibus expeditam, nihil aliud nisi cælum spectare, ac petere, & quanto magis morti appropinquare, tanto plus in eo spiritus excitabatur: ita ut mortem, demigrationem quandam a terrenis ad cælestia, a caducis ad æterna, non naturæ dissolutionē in eo crederes. sapientia quæ ætate in omnibus crescit, in eo, quem semper commitata fuerat, absolutissima tūc erat. animi fortitudo, quæ iuuenem mirabiliter possederat, morti uicinum omni ex parte circumdabat. Christianæ religionis zelus, in eo aliqui perpetuus, prope mortem maior surgebat. languebāt quidem membra, sed animus uigebat, & in corpore iam iam casuro, mens semper cælestia cogitans excitabatur; nec illi, ut ceteris euenire solet, una cum senectute animus frigescibat, sed citò tamquam corporeum onus depositurus, alacrior ad finem tendebat. sciebat se cursum suum bene peregissee, fidem seruasse, & in omnibus, ut strenuum militem, sub Christo duce fecisse stipendia: propterea ad coronam illi repositam, lætus gaudensq. properabat; & ue-

Epist. 86

luti

luti imbris multis, ac procellis exagitatus oppressusque
 uiator, æternū quietis, quo se reciperet, tectum optabat,
 & post bellorum turbines, & uarias mundi pelagi iactatio-
 nes, quietum cælorū portum ingredi, & amœnum ortum
 incolere desiderabat, & quo magis se illi appropinquare cer-
 nebat, eo lætior incēdebat. repetebat animo seruis suis a
 Domino repromissa, quæ nec oculus uiderit, nec auris au-
 diuerit, nec in cor hominis ascēderint; & uberrima pascua
 una cum amœnissimis riuus Christi ouibus per Ezechielem
 præmonstrata mente tenebat; & cū longū peregrinationis
 suæ tempus cōsideraret, cum propheta Dauid clamabat,
 hei mihi qui in incolatus meus prolōgatus est, habitauit cum
 habitantibus cedar, idest tenebras, multū incola fuit anima
 mea: & rursum quā dilecta tabernacula tua domine uirtu-
 tum, concupiscit & deficit anima mea in atria Domini; &
 quēadmodū desiderat ceruus ad fontē aquarū, ita desiderat
 anima mea ad te Deus, sitiuit in te anima mea ad Deū fon-
 tē uiuū, quando ueniā, & apparebo ante faciem Dei. Dum
 his cogitationibus uir sanctus exæstuat, & se ad amplexus
 præparat sponsi, in leuē incidit febriculam, quæ illum iam
 in carne sua præmortuum dum diuexaret, reputabat animo
 mundi quas pertrāsierat miseras omnes, quibus tempestati-
 bus iactatus, quibus persecutionibus exagitatus fuerit; quo
 modo in hac uita nihil certum nihil beatū inueniretur. Or-
 bis dominam concidisse Romam uidebat; urbes potentissi-
 mas redactas in cinerē cōsiderabat, & barbarorum incur-
 sionibus cuncta uastata. Quid non exire ex his miseriis, &
 in amplexus sponsi uolare ille cuperet? quid non corporis
 abiecto carcere expeditū in cælum tendere? appropinquan-
 tem cernebat sponsum, & innumeris angelorum agmini-
 bus, & sanctorum choris ad se iam iam tendere conspicie-
 bat. eo ille mentē, eo tendebat oculos: & ueluti iam solu-
 tus a carnis uinculis, ibi sibi esse uidebatur, ubi uenientem
 ad se Christum conspiciabatur. Mortem propterea ueluti
 sororem carissimam, ut sibi ea, quæ uidebat, concederet,
 precabatur. aderant iuxta eum monachi, & Christo dica-

Diui Hieronymi.

æ uirgines, & ex uariis sanctorum locorum undique qui
ad talis uiri exitum cōfluxerant homines: quos omnes ille
læto, ac alacri uultu conspiciebat: & ut Deo omni inserui
rent nixu, exhortabatur. aderat Eusebius, & ceteri presby
teri qui secum Christo militauerant: & abeuntē a se com
munem patrem omnes lamentabantur. Solabatur ille cun
ctos, & ad humilitatem, patientiam, caritatem, ceterasq.
hortabatur uirtutes, & ne sibi cælestem inuiderent patriam
precabatur: quando se nihil aliud optasse semper aiebat,
quam ad eum diem peruenire, unde illi ad cælestem beati
tudinem daretur aditus. His & huiusmodi uerbis sanctos
omnes qui aderant postquam est adhortatus, & uirgines, ut
in proposito castitatis manentes Christo seruirent, anima
uit, uersus ad sponsum, quem sibi iam adesse uidebat, illi
spiritum suum commendans obdormiuit in Domino die ul
timo septembris mensis sub Honorio, & Theodosio iunio
re, multis clarus miraculis: uir cui nec Græci, nec Latini,
quem comparent, habeant aliquem. In eum enim doctri
næ omnes & uirtutes ita cumulate se contulerunt, ut post
eum, quem in aliqua re gentibus inuideat, Ecclesia nemi
nem inueniat. Nam etsi multos in Ecclesia præstâtissimos,
ac doctissimos habuerimus uiros, neminē tamen, qui tot,
ac tanta in omni doctrinarū genere sciuerit, & qui tot lin
guarum habuerit cognitionem, inuenimus. Quod si in ali
qua re ipse ab aliquo uincatur, semper tamen ei supersunt
alia, in quibus tandem illi præstans Hieronymus uictor ab
scedat. Augustinus fatetur in se nec esse, nec esse umquam
posse tantum scientiæ diuinarum scripturarum, quantum
in Hieronymo esse uidebat. & contra Iulianum scribens,
Sanctus, inquit, Hieronymus presbyter Græco & Latino,
insuper & Hebræo eruditus eloquio, ex occidentali ad orien
talem transiens Ecclesiam, in locis sanctis, atque in litte
ris sacris usque ad decrepitam uixit ætatem. Hic omnes,
uel pene omnes, qui ante illum ex utraque parte orbis de
doctrina ecclesiastica scripserant, legit, & libro xviii. de ci
uitate Dei, Non defuit, ait temporibus nostris Presbyter
Hierony-

*Epist. 113
Lib. 1. contra
Iulianum.*

Lib. 18. c. 43

Dist. I 5. c. san-
cta Rom. ec-
clesia.

Hieronymus, homo doctissimus, & trium linguarum per-
tius, qui non ex Græco, sed ex Hebræo in Latinū eloquium
scripturas conuertit. Gelasius Papa, ut omittam Dama-
sum, qui tantum illi tribuit, & Diuum Gregorium, qui ho-
norifice de eo meminit, ita de Beato Hieronymo scribit:
Item Ruffinus, uir religiosus, plurimos ecclesiastici operis
edidit libros: nonnullas etiam scripturas interpretatus est.
Sed quoniam Beatus Hieronymus in aliquibus eum de arbi-
trii libertate notauit, illa sentimus, quæ Beatum Hierony-
mum prædictum sentire cognoscimus, & non solum de Ruf-
fino, sed etiam de uniuersis, quos uir sapius memoratus ze-
lo Dei, & fidei religione reprehendit. Item Origenis non-
nulla opuscula; quæ uir beatus Hieronymus non repudiat,
legenda suscipimus. & paulo superius. Vitas patrum Anto-
nii, Pauli, Hilarionis, & omnium Eremitarum, quas ta-
men uir beatissimus scripsit Hieronymus, cum omni ho-
nore suscipimus. Quot autem uixerit annos, & quibus cō-
sulibus obierit, mihi incertum. Vnum tantum constat, ad
decrepitam usque, ut tradit Augustinus, eum uixisse æta-
tem. Prosper, quem Paulus Diaconus, & alii multi secuti
postea sunt, uixisse eum annis uno & nonaginta testatur:
obiisseq. anno Domini ccccxxxi. natum hac ratio-
ne sub Constantini Magni imperio anno xxix. alii deinde
addiderunt, Sigibertus, Beda, & uulgatum Ecclesiæ Mar-
tyrologium, uixisse eum annis septem amplius aiunt, hoc
est octo & nonaginta. Nec desunt, qui centesimum eum
præterisse scribant annum. Incerta tot scriptorum senten-
tia, incertam nobis etiā Hieronymi ætatem reddunt; præ-
sertim cum Beda sub Arcadio eum obiisse testetur, & Pro-
sper anno Domini quadringentesimo uicesimo secundo, hoc
est sub Honorio & Theodotio iuniore. Quæ utraque sen-
tentia in illud recidit, ut Constantini Magni tempore na-
tum Hieronymum dicamus, anno scilicet eius uel xv, uel
xxix. Verum cum eum non sub Constantino, sed Con-
stantio filio natum, propterea quod Iuliani tempore puer
esset, & grammaticæ operam daret, ipsius Hieronymi testi-
monio

Diui Hieronymi.

monio initio probauerimus : superest, ut fundamentum, quo innituntur, totum corruat : & aliquid tot annorum ex eius uita detrahendum sit : quādo eum sub Honorio & Theodosio obiisse pro compertissimo habeo, hoc est aliquot annis ante mortem Diui Augustini, qui obiit anno Domini cccxxx, hoc est sub Theodosio iuniore, & Valentiniano tertio. Et ut scias mendacium sibi numquam constare, natalem Hieronymi diem quidam in xv, alii in xxii, uel xxv, plurimi in xxxi. Constantini Magni annum, ex uitæ longitudine reiciunt. Sigibertus, qui xcvi annos eum uixisse asserit, corpus laboribus ita confectum Hieronymum habuisse scribit, ut, nisi fine manibus apprehenso, qui ad hoc ei de trabe pendebat, surgere de lecto non potuisset testetur. Marcellinus comes, uir fidei & auctoritatis magnæ, per D. Augustini, quē & ego sequor, uestigia cautius incedens, nec quo anno mortuus, nec quot ille uixerit, definit, annis. admodum tantum senem decessisse asseuerat, hoc est, ut ait Augustinus, in decrepita ætate, peracta scilicet senectute. In hunc sensum scribens Hieron. ad Augustinum, se pene decrepitem asseuerat : ad quam decrepitate peruenisse tantum illum Augustinus significat, cum ait, usque ad decrepitā uixit ætatem. alioqui, si ualde decrepitem eum intelligere uelis, necesse esset, ut uel post Augustinum decessisset, uel anno saltem xv. Constantini Magni natus esset. quod utrumque falsum est. utcumque, constat certe ex eius scriptis, post Romam captam ab Halarico, quod fuit anno Domini cccxii, aliquot eum uixisse annos : siquidem non solum ruinam illam fugientes Romanos, se in Berthelem sæpe excepisse narrat ; uerum etiam aliqua postea eum scripsisse apparet, ut commentaria in Ezechielem, Epitaphium Fabiolæ, similiter & Marcellæ. Augustinus libros suos de anima illi dicans, post Romam captam misit : sed tabellarius, ut ipse testatur, mortuum illum inuenit. Utebatur uir beatissimus in senectute breui quodam pileo, quo frigescent iam corpus confoueret : de qua re ipse Paulino, qui sibi illum donauerat, scri- *Epist. 153*
bens,

bens, ita ait. Pileolum, textura breue, caritate latissimū,
senili capiti consouendo, libenter accepi, & munere, & mu-
neris auctore lætatus. Humatus post mortem in Bethlehē
fuit, exequiis illi ex Christiana religione, ut Antoniū Pau-
lo fecisse ipse refert, rite antea celebratis. Translatus inde
postea Romam est una cum Christi saluatoris nostri præse-
pio, septimo Idus Maii, eo scilicet die, quo præceptoris
sui Gregorii Nazanzeni festum agitur. reiectus deinde est
dies in Vigiliam ascensionis a Pio secundo Pontifice maxi-
mo, ut festiuius, ac frequentius ageretur; plenaria sepul-
crum eius illo die aduentibus, criminum indulgentia con-
donata. Iacet autem beatissimus uir, omni præconio ma-
ior, & quem cuncta suspirent sæcula, super Exquilias, pro-
prio sibi iuxta præsepe Domini erecto altari, ubi sacra ad-
huc eius seruatur tunica, in Ecclesia S. Marię Maioris: quā-
tū, amplissime Cardinalis Carole Borromee, non minus
pietate, & religione, quam caritate conspicuus, & in tan-
ta rerum affluentia, ac imperii potestate, rarum apud o-
mnes exemplum, cum immensa tua laude, & populi utili-
tate regis, atque gubernas.

FINIS.

Diui Hieronymi.

CATALOGVS

Forum, quæ in his tribus D. Hieronymi
tomis continentur.

TOMVS PRIMVS.

A D Heliodorum, de laude uitæ solitariae. Epist. 1	pag. 1
Ad Nepotianum de uita clericorum, & sacerdotum. Epist. 2	pag. 10
Ad Heliodorum Epitaphium Nepotiani. Epi. 3	pag. 24
Hieronymus Rustico monacho uiuendi formam prescribit. Epist. 4	pag. 39
Ad Florentium. Epist. 5	pag. 53
Ad Florentium. Epist. 6	pag. 54
Ad Lætiam de institutione filiae. Epist. 7	pag. 56
Ad Demetriadem, de seruanda uirginitate. Epi. 8	pag. 67
Ad Saluinam de seruanda uiduitate. Epist. 9	pag. 88
Ad Furiam de uiduitate seruanda. Epist. 10	pag. 99
Ad Ageruchiam uiduā, de monogamia. Epi. 11	pag. 111
Ad Gaudentium, de Pacatulæ infantulæ educatione. Epist. 12	pag. 126
Ad Paulinū, de institutione monachi. Epi. 13	pag. 131
Ad Celantiam matronam de ratione pie uiuendi, forte Paulini Nolani Episcopi. Epist. 14	pag. 140
Ad Marcellam, de laudibus Asellæ. Epist. 15	pag. 159
Ad Principiam uirginem Marcellæ uiduæ epitaphium. Epist. 16	pag. 162
Paula & Eustochium Marcellæ, ut commigret Bethlehem. Epist. 17	pag. 171
	Hiero-

Hieronymus Marcellam inuitat ad rus Bethle- miticum. Epist. 18.	p. 181
Ad Eustochium de acceptis ab ea munusculis. Epist. 19.	p. 184
Ad Marcellam de acceptis munusculis. Epi. 20.	p. 186
Ad Paulum Concordiensem. Epist. 21.	p. 187
Ad Eustochium de custodia uirginitatis. Epi. 22.	p. 189
Ad Marcellam, de ægrotatione Blæfillæ. Ep. 23.	p. 224
Ad Marcellam, de exitu Leæ. Epist. 24.	p. 227
Ad Paulam, super obitu Blæfillæ filiæ. Epist. 25.	p. 229
Ad Pammachium consolatio super obitu Paulinæ uxoris. Epist. 26.	p. 239
Ad Eustochium uirginem epitaphium Paulæ ma- tri. Epist. 27.	p. 249
Ad Lucinium. Epist. 28.	p. 281
Ad Theodorā, epitaphium Lucinii Bæfici. Epi. 29.	p. 286
Ad Oceanum epitaphium Fabiolæ. Epist. 30.	p. 290
Ad Theophilum, episcopum Alexandrinum. Epist. 31.	p. 299
Ad Abigaum. Epist. 32.	p. 302
Ad Castitium. Epist. 33.	p. 303
Ad Iulianum consolatio. Epist. 34.	p. 305
Ad Exuperantium hortatoria. Epist. 35.	p. 312
Ad Castorinam Materteram. Epist. 36.	p. 315
Ad Iulianum Diaconum. Epist. 37.	p. 316
Ad Theodosium, & alios Anachoretas. Epi. 38.	p. 317
Ad uirgines Hermonenses. Epist. 39.	p. 318
Ad Augustinum. Epist. 40.	p. 320
Ad Rufinum. Epist. 41.	p. 321
Ad Niceam, hypodiaconum Aquileiæ. Epi. 42.	p. 325
Ad Chromatium, Iouinum, & Eusebiū. Epi. 43.	p. 326
Ad Chrysogonum, monachū Aquileiæ. Epi. 44.	p. 329
Ad Antonium de modestia. Epist. 45.	p. 330
Ad Rusticum. Epist. 46.	p. 331
De uitando suspecto contubernio. Epist. 47.	p. 341
Ad Sabinianum Diaconū, increpatoria. Epi. 48.	p. 350
Ad	

Catalogus.

Ad Innocentium de muliere septies ista. Epist. 49.	pag. 360
Vita Pauli Eremitæ.	pag. 365
Vita Sancti Illarionis.	pag. 374
Vita Malchi captivi monachi.	pag. 399
Liber de Viris illustribus.	pag. 407

TOMVS SECVNDVS.

Aduersus Eluidium, de perpetua uirginitate bea- tæ Mariæ.	pag. 451
Aduersus Iouinianum Liber primus.	pag. 474
Aduersus Iouinianum Liber secundus	pag. 553
Hieron. pro libris aduersus Iouinianum Apolo- gia ad Pammachium. Epist. 50	pag. 611
Ad Domnionem Apologeticon. Epist. 51	pag. 633
Ad Pammachium, pro libris suis aduersus Ioui- nium. Epist. 52	pag. 638
Aduersus Vigilantium, ad Riparium presbyte- rum. Epist. 53	pag. 640
Aduersus Vigilantium.	pag. 644
Ad Marcellam, aduersus Montanum. Epist. 54.	pag. 657
Ripario. Epist. 55	pag. 660
Apronio. Epist. 56	pag. 661
Damaso. Epi. 57	pag. 662
Damaso. Epist. 58	pag. 665
Orthodoxi & Luciferiani dialogus.	pag. 667
Ad Auitum quid cauendum in libris <i>ἐν ἀρχαῖς</i> . Epist. 59	pag. 691
Epiphanius Ioanni episcopo Hierosolymorum. Epist. 60	pag. 709
Ad Pammachium, aduersus errores Ioan. Hie- rosol. Epi. 61	pag. 721
Aduersus Ioan. Hierosol. ad Theophilū. Epi. 62.	pag. 765
Præfatio Ruffini in libros <i>πρὸ ἀρχαῶν</i> Origenis Epist. 63.	pag. 774
Pammachius & Oceanus Hieronymo. Epist. 64.	pag. 766
✱	Pamma-

Catalogus.

Pammachio & Oceano. Epist. 65	pag. 777
Ruffino. Epist. 66	pag. 788
Ad Pammachium & Marcellinum Apologia Hieronymi aduersus Ruffinum.	pag. 789
Apologia Hieronymi aduersus Ruffinum Liber secundus.	pag. 820
Apologia Hieronymi aduersus Ruffinum Liber tertius.	pag. 856
Aduersus Pelagium ad Ctesiphontem.	pag. 897
In dialogos aduersus Pelagianos proœmium.	pag. 912
Dialogorum Hieronymi aduersus Pelagium liber primus.	pag. 193
Dialogorum Liber secundus.	pag. 955
Dialogorum Liber tertius.	pag. 125
Theophilus Epiphania. Epist. 67	pag. 1044
Hieronymus Theophilo. Epist. 68	pag. 1045
Theophilus Hieronymo. Epist. 69.	pag. 1046
Hieronymus Theophilo. Epist. 70	pag. 1047
Hieronymus Theophilo. Epist. 71	pag. 1048
Theophilus Hieronymo. Epist. 72.	pag. 1049
Epiphanius Hieronymo. Epi. 73	pag. 1050
Hieronymus Marcellæ. Epist. 74	pag. 1051
Aduersus Vigilantium. Epist. 75	pag. 1052
Tranquillino. Epist. 76	pag. 1056
Hieron. Marco presbytero Celedensi. Epist. 77.	pag. 1057
Pammachio & Marcellæ. Epist. 78	pag. 1059
Alipio & Augustino. Epist. 79	pag. 1062
Hieron. Augustino. Epist. 80	pag. 1063
Hieron. Augustino. Epist. 81	pag. 1064
Marcellino & Anapsychiæ. Epist. 82	pag. 1064
Oceano. Epist. 83	pag. 1067
Magno oratori Romano. Epist. 84	pag. 1080
Euagrio. Epist. 85	pag. 1085
Augustinus Hieronymo. Epist. 86	pag. 1088
Augustinus Hieronymo. Epist. 87	pag. 1091
Augustinus Hieronymo. Epist. 88	pag. 1097
	Hiero-

Catalogus.

Hieronymus Augustino. Epist. 89	pag. 1101
Augustinus Hieronymo. Epist. 90	pag. 1119
Hieronymus Augustino. Epist. 91	pag. 1120
Hieronymus Augustino. Epist. 92	pag. 1122
Augustinus Hieronymo. Epist. 93	pag. 1125
Hieronymus Augustino. Epist. 94	pag. 1132
Augustinus Præsidio. Epist. 95	pag. 1134
Hieron. Augustino. Epist. 96	pag. 1134
Augustinus Hieronymo. Epist. 97	pag. 1135
Hieronymus Augustino. Epist. 98	pag. 1153
Hieron. Asellæ. Epist. 99	pag. 1159
Bonaso. Epist. 100	pag. 1162
Ad Pam machium de optimo genere interpre- tandi. Epist. 101	pag. 1164
Marcellæ. Epist. 102	pag. 1177

TOMVS TERTIVS.

Hieron. Paulino. Epist. 103	pag. 3
In Pentatheuchum Moyfi præfatio. Epist. 104.	pag. 15
In Iosue præfatio. Epist. 105.	pag. 17
In librum Regum præfatio. 106	pag. 19
In librum Paralip. præfatio. 107	pag. 25
Ad Domnionem, & Rogatianum in librum Pa- ralip. præfatio. 108	pag. 27
In Esdram & Neemiam præfatio. 109	pag. 1
Ad Chromatium, & Heliodorum, in Tobiam præfatio. 110	pag. 29
In Iudith præfatio. 111	pag. 30
In librum Hester præfatio. 112	pag. 31
In Librum Iob præfatio. 113	pag. 32
Alia præfatio. 114	pag. 34
In Prouerbia, Ecclesiasten, & Canticum canti- corum Salomonis præfatio. 115	pag. 35
Ad Paulam, & Eustochium, in librum Ecclesia- sten præfatio. 116	pag. 37

Catalogus.

In translationem Esaie præfatio.	117	pag.	38
In Hieremiam præfatio.	118	pag.	39
In Ezechielem præfatio.	119	pag.	40
In Danielelem præfatio.	120	pag.	41
Ad Paulam, & Eustochium, in duodecim prophetas, præfatio.	121	pag.	44
In Iohalem præfatio.	122	pag.	44
In quattuor Euangelia ad Damasum præfatio.	123	p.	46
Hier. Damasus, Romanus Episcopus. Epist.	124	pag.	49
Damaso. Epist.	125	pag.	50
Euagrio. Epist.	126	pag.	61
Fabiola. Epist.	127	pag.	67
De quadraginta duabus mansionibus.		pag.	68
Ad Fabiolam de uestitu sacerdotum. Epist.	128	pag.	96
Dardano. Epist.	129	pag.	113
Marcellæ. Epist.	130	pag.	122
Ruffino. Epist.	131	pag.	128
Vitali. Epist.	132	pag.	133
Marcellæ. Epist.	133	pag.	136
Sophronio. Epi.	134	pag.	138
Sunæ, & Fretellæ. Epist.	135	pag.	140
Marcellæ. Epist.	136	pag.	174
Marcellæ. Epist.	138	pag.	175
Ad Cyprianum explanatio psalmi octogesimo-noni. Epist.	139	pag.	179
Ad Principiam uirginæ explanatio psalmi quadragessimiquarti. Epist.	140	pag.	195
Ad Marcellam psalmi 126. expositio. Epist.	141	pag.	214
Damaso. Epist.	142	pag.	218
Ad Damasum Papam. Epist.	143	pag.	231
Damasus Hieronymo. Epist.	144	pag.	235
Hieronymus Damaso. Epist.	145	pag.	236
Hier. Damaso. Epist.	146	pag.	240
Amando. Epist.	147	pag.	259
Marcellæ. Epist.	148	pag.	265
		Ad	

Catalogus . . .

Ad Marcellam , de blasphemiain Spiritum san-	
ctum . Epist. 149	pag. 268
Hedibæ . Epist. 150	pag. 270
Algasæ . Epist. 151	pag. 302
Hieronymi in homilias cantici canticorum Ori-	
genis , ad Damasum præfatio .	pag. 341
Origenis homiliæ duæ in Cantica canticorum	
interprete D. Hieronymo .	pag. 342
Secunda homilia	pag. 355
Minerio & Alexandro , Epist. 152	pag. 370
Paulino . Epist. 153	pag. 387
Desiderio . Epist. 154	pag. 390
Ad Paulam Vrbicam . Epist. 155	pag. 391
In traditiones seu quæstiones Hebraicas libro -	
rum Geneleos procœmium .	pag. 395
Quæstiones , siue traditiones Hebraicæ in Ge-	
nesim .	pag. 395
In libros Regum .	pag. 456
In librum Paralipomenon primum .	pag. 500
In librum secundum Paralipomenon .	pag. 525
In Loca Hebraica , procœmium .	pag. 541
De Actis Apostolorum .	pag. 598
In librum nominum Hebraicorum præfatio ,	pag. 607
Interpretatio nominum de Genesi iuxta nume-	
rum litterarum .	pag. 609
De Exodo .	pag. 617
De Numeris .	pag. 620
De Deuteronomio .	pag. 625
In librum Iesu Naue .	pag. 627
De libro Iudicum .	pag. 634
Canticum Deborah .	pag. 635
In Ruth .	pag. 636
De primo libro Regum .	pag. 638
De secundo libro Regum .	pag. 641
De tertio libro Regum .	pag. 644
De libris Regum .	pag. 647
	De


Catalogus.

De psalterio.	pag. 648
De Esaia.	pag. 649
De Osee.	pag. 649
De Amos.	pag. 650
De Michea.	pag. 650
De Iohela & Abdia.	pag. 650
De Iona & Naum.	pag. 650
De Habacuck & Sophonia.	pag. 650
De Aggeo.	pag. 650
De Zacharia & Malachia.	pag. 650
De Hieremia.	pag. 650
De Daniele.	pag. 652
De Ezechiele.	pag. 653
De Iob.	pag. 655
De Euangelio Matthæi.	pag. 656
De Marco.	pag. 658
De Luca.	pag. 659
De Ioanne.	pag. 660
De Actis Apostolorum.	pag. 661
De epistola Iacobi Apostoli.	pag. 666
De prima epi. Petri Apostoli.	pag. 666
De secunda Petri.	pag. 666
De prima epi. Ioannis.	pag. 666
De tertia epi. Ioannis.	pag. 666
De epi. Iudæ,	pag. 666
De epistola Pauli ad Romanos.	pag. 667
Ad Corinthios prima.	pag. 668
Ad Corinthios secunda.	pag. 668
Ad Galatas.	pag. 668
Ad Ephesios.	pag. 669
Ad Philippenfes.	pag. 669
Ad Coloffenses.	pag. 669
Ad Thessalonicenses.	pag. 669
Ad Hebræos,	pag. 669
De Timotheo, I	pag. 670
De Timotheo, II	pag. 670
De	De

Catalogus.

De Tito.	pag. 671
De Philemone.	pag. 671
De Apocalypsi Ioannis Apostoli.	pag. 671
De epistola Barnabæ.	pag. 672
Eruditissima scholia, Mariani Victorii Reatini, in omnes D. Hieronymi epistolas.	
Index locupletissimus.	
Loca sacræ scripturæ, a S. Hieronymo his tribus epistolarum tomis explicata.	

F I N I S.



EPISTOLAE
D. EVSEBII HIERONYMI
STRIDONIENSIS,

ex multis antiquissimis libris in pristinam
integritatem restitutæ.

ARGVMENTVM.

HELIODORVS, intimus D. Hieronymi amicus, una cum
eo in vastam solitudinem, quæ Syros ab Agærenis diuidit, ac-
cessit. conatus est eum uir sanctus uti propositi socium retinere:
uerum cum non potuerit, absentem per hanc epistolâ reuocare
contendit. Scripsit autem eam etate tunc adolescens, immo pene
puer, calentibus adhuc rhetorum studiis, plenam lacrymis, que
rimoniisq. ut quæ deserti sodalis monstraret affectum; eamq.
scholasticis quibusdam floribus, oratoria arte ludendo, mirifice
ac luculenter ornauit. Exhortatoriam epistolam ipse alibi uo-
cat, quod in exhortatorio uersetur genere: Heliodorum enim ad
solitariam uitam multis hortatur: et quæ in contrarium adduci
poterant argumenta, non minus oratione fecunda, quam felici
ingenio late, copioseq. refellit.

AD HELIODORVM,
de laude uitæ solitariæ.
EPISTOLA PRIMA.

QVANTO amore & studio contenderim, ut pari-
ter in eremo moraremur, conscium mutæ carita-
tis pectus agnoscit. quibus lamentis, quo dolore,
quo gemitu te abeuntem prosecutus sim, istæ quoque
litteræ testes sunt: quas lacrymis cernis interlitas. ue-
rum tu, quasi paruulus delicatus, contemptum rogan-
tis per blandimenta fouisti: & ego incautus, quid tunc
agerem, nesciebam. tacerem? sed, quod ardentè uole-
bam, moderate dissimulare non poteram. impensius ob-
A secre-

secrarem ? sed audire nolebas : quia similiter non amabas .
 Quod unum potuit , spreta caritas fecit . quem præsentem
 retinere non ualuit , quærit absentem . Quoniam igitur &
 tu ipse abiens postularas , ut , postea quam ad desertum mi-
 grasssem, inuitatoria ad te scripta transmitterem ; & ego me
 facturum promiseram : inuito : iam propera . Nolo pristi-
 narum necessitudinum recorderis . nudos amat eremus .
 Nolo te antiquæ peregrinationis terreat difficultas . qui in
 Christum credis , & eius crede sermonibus . Quærite pri-

Luc. 12 mum regnum Dei, & hæc omnia apponentur uobis . Non
Matth. 10 pera tibi sumenda , non uirga est . Affatim diues est , qui
 cum Christo pauper est . Sed quid ago ? rursus improvidus
 obsecro ? abeant preces ; blandimenta discedant . debet
 amor læsus irasci . qui rogantem contempseras , forsitan au-
 dies obiurgantem . Quid facis in paterna domo delicate
 miles ? ubi uallum ? ubi fossa ? ubi hiems acta sub pellibus ?

Apoc. 1 Ecce de cælo tuba canit : ecce cū nubibus , debellaturus or-
 bem, imperator armatus egreditur : ecce bis acutus gladius,
 ex regis ore procedens, obuia quæque metit : & tu mihi de
 cubiculo ad aciem, tu de umbra egrederis ad solē ? Corpus
 assuetum tunicis lorice onus non fert . caput opertū linteō
Matth. 12 galeam recusat . mollem otio manū durus exasperat capu-
 lus . Audi edictū regis tui . Qui non est mecum , contra me
 est : & qui mecum non colligit , spargit . Recordare tirocinii
 tui diē, quo Christo in baptismo consepultus, in sacramen-
 ti uerba iurasti, pro nomine eius nō te patri parciturum es-
 se , non matri : Ecce aduersarius in pectore tuo , Christum
 conatur occidere . ecce donatiuū , quod militaturus accepe-
 ras, hostilia castra suspirant . Licet paruulus ex collo pēdeat
 nepos : licet, sparso crine, & scissis uestibus, ubera, quibus
 te nutrierat, mater ostēdat : licet in limine pater iaceat : per
 calcatū perge patrem : siccis oculis ad uexillū crucis euola .
 Solū pietatis genus est, in hac re esse crudelē . Veniet, ueniet
 postea dies ille, quo uictor reuertaris in patriā ; quo per Hie-
 rosolymam cælestem uir fortis coronatus incedas . tunc mu-
 nicipatum cum Paulo capies . tunc & parentibus tuis, eius-
 dem

dem ciuitatis ius petes. tūc & pro me rogabis, qui te, ut uin-
ceres, incitauit. Nec uero nescio, qua te dicas nunc compe-
de præpediri. Non est nobis ferreū pectus, nec dura præcor-
dia. nō ex silice natos Hyrcanæ nutrire tigres. et nos per
ista transiuimus. Nunc tibi blandis uidua soror hæret lacer-
tis: nunc illi, cū quibus adoleuisti, uernulæ aiunt: Cui nos
seruituros relinquis? nūne & gerula quondam, iam anus,
& nutricius, secundus post naturalem pietatem pater, cla-
mitat: Morituros expecta paulisper, & sepeli. Forsitan &
laxis uberum pellibus mater, arata rugis fronte, antiquum
referens mammæ lallare, congeminet. Dicant, si uolunt,
& grammatici: In te omnis domus inclinata recumbit. Fa-
cile rumpit hæc uinacula amor Dei, & gehennæ timor. At
contra scriptura præcipit, parentibus obsequendum. Sed *Exod. 10*
quicumque eos supra Christum amat, perdit animam suā.
Gladium tenet hostis, ut me perimat: & ego de matris la-
crymis cogitabo? Propter patrem militiam Christi deferā,
cui sepulturam Christi causa non debeo, quam etiā omni-
bus eius causa debeo? Domino passuro timide Petrus con-
sulens scandalum fuit. Paulus retinentibus se fratribus, ne *Matth. 16*
Hierosolymam pergeret, respondit: Quid facitis ploran-
tes, & conturbantes cor meum? ego enim non solum liga-
ri, sed & mori in Hierusalem paratus sum pro nomine do-
mini Iesu Christi. Aries iste pietatis, quo fides quatitur,
euangelii retūdendus est muro. Mater mea, & fratres mei *Matth. 12*
hi sunt, quicumque faciunt uoluntatem patris mei, qui in
cælis est. si credunt in Christum, faueant mihi pro eius no-
mine pugnatura: si nō credunt, mortui sepeliant mortuos *Matth. 8*
suos. Sed hoc ais in martyrio. Erras frater, erras, si pu-
tas umquam Christianum persecutionem non pati. tunc
maxime oppugnaris, si te oppugnari nescis. Aduersarius *1. Pet. 5*
noster, tamquam leo rugiens, aliquem deuorare quærens
circumit: & tu pacem putas? Sedet in insidiis cum diuiti-
bus, ut in occultis interficiat innocentem: oculi eius in pau-
perem respiciunt: insidiatur in occulto, sicut leo in spe-
lunca sua; insidiatur, ut rapiat pauperem: & tu, frondosæ

A 2 arboris

arboris testus umbraculo, molles somnos, futurus præda, carpis? inde me persequitur luxuria: inde auaritia conatur irrumperere: inde uenter meus uult mihi Deus esse pro Christo: compellit libido, ut habitantem in me Spiritum sanctum fugem, ut templum eius uiolem: persequitur, inquam, me hostis, cui nomina mille, mille nocendi artes: & ego infelix uictorem me putabo, dum capior? Nolo, frater carissime, examinato pondere delictorum, minora credas idololatriæ crimine esse, quæ diximus: immo Apostoli disce sententiã, qui ait: Hoc enim scitote intelligentes, quia omnis fornicator, aut immundus, aut auarus, aut fraudator, quod est idolorum seruitus, non habet hereditatē in regno Christi, & Dei. Et quamquã generaliter aduersum Deũ sapiat, quidquid diaboli est, &, quod diaboli est, idololatria sit, cui omnia idola mancipantur: tamen & in alio loco

Col. 3 speciatim, nominatimq. determinat, dicens: Mortificate membra uestra, quæ sunt super terram, deponentes fornicationem, immunditiam, & concupiscentiam malam, & auaritiam, quæ sunt idolorum seruitus, propter quæ uenit ira Dei in filios diffidentie. Non est tantum in eo seruitus idoli, si quis duobus digitulis thura in bustum aræ iaciat, aut haustum pateræ poculo fundat merum. Neget auaritiam esse idololatriam, qui potest triginta argenteis Domini uenditum, appellare iustitiam. Neget sacrilegium in libidine, sed is, qui membra Christi, & hostiam uiuam, placentem Deo, cum publicarum libidinum uictimis, nefaria colluione uiolauit. Nō fateatur fraudem idololatriã

Act. 5 esse, sed similis eorum, qui in Actus Apostolorum ex patrimonio suo partē pretii reseruantes, præsentī perire uindicta. Animaduerte frater: non tibi licet de tuis quidquam

Luc. 14 habere rebus. Omnis, inquit Dominus, qui non renunciauerit cunctis, quæ possidet, non potest meus esse discipulus. Cur timido animo Christianus es? Respice Petro

Matth. 4 relictum rete: respice surgentem de teloneo publicanũ statim apostolum. Filius hominis nō habet, ubi caput reclinet: & tu amplas porticus, & ingentia tectorum spatia metiris?

metiris? Hereditatem expectans sæculi, coheres Christi esse non poteris. Interpretare uocabulum monachi, hoc est nomen tuum. quid facis in turba, qui solus es? Et hoc ego, non integris rate uel mercibus, nec quasi ignarus fluctuum præmoneo, sed quasi nuper naufragio eiectus in litus doctus nauta timida nauigaturis uoce denuncio. In illo æstu Charibdis luxuriæ, salutem uorat. ibi ore uirgineo, ad pudicitie perpetranda naufragia, Scylla ceu renidens, libido blanditur. Hic barbarum litus, hic diabolus pirata, cum sociis portat uincula capiendis. Nolite credere, nolite esse securi. licet in modum stagni fuscum æquor arrideat: licet uix summa iacentis elementi spiritu terga crispentur: magnos hic campus montes habet: intus inclusum est periculum, intus est hostis. expedites rudentes, uela suspendite. crux antennæ figatur in frontibus: tranquillitas ista tempestas est. Sed forsitan dicturus es: Quid ergo? quicumque in ciuitate sunt, Christiani non sunt? Non est tibi eadem causa, quæ ceteris. Dominum ausculta dicentem: Si uis perfectus esse, *Matth. 19* uade, uende omnia tua, & da pauperibus, & ueni sequere me. Tu autem perfectum te fore pollicitus es. nam cum, derelicta militia, te castrasti propter regna cælorum; quid aliud quam perfectam secutus es uitam? Perfectus autem seruus Christi nihil præter Christum habet: aut, si quid præter Christum habet, perfectus non est. & si perfectus non est, cum se perfectum fore Deo pollicitus sit, ante Deum mentitus est. os autem, quod mentitur, occidit animam. Igitur, ut concludam; si perfectus es, cur bona paternæ desideras? Dominum fefellisti, si perfectus non es. Diuinis euangelium uocibus contonat: Non potestis duobus dominis seruire: & audet quisquam mendacem Christum facere, mammonæ & Domino seruiendo? uociferatur ille sæpe: Si quis uult post me uenire, abneget semetipsum, & tollat crucem suam, & sequatur me. Et ego onustus auro arbitror me Christum sequi? Qui dicit se in Christum credere, debet, quo modo ille ambulauit, & ipse ambulare. Quod si nihil habes; ut te responsurum scio: cur, tam

bene paratus ad bella, non militas? Nisi forte in patria tua
 te arbitraris hoc facere, cū in sua Dominus signa non fece-
 rit. & cur id? cū auctoritate sume rationē. Nemo prophe-
 ta in patria sua honorem habet. Non quæro, inquires, hono-
 rem: sufficit mihi cōscientia mea. Neque Dominus quære-
 bat, quippe qui, ne a turbis rex constitueretur, aufugit. Sed
 ubi honor non est, ibi contemptus est: ubi contemptus, ibi
 frequens iniuria: ubi autē iniuria, ibi & indignatio: ubi in-
 dignatio, ibi quies nulla: ubi quies nō est, ibi mens a pro-
 posito sæpe deducitur: ubi autē per inquietudinē aliquid au-
 fertur ex studio, minus fit ab eo, quod tollitur: & ubi mi-
 nus est, perfectum non potest dici. Ex hac supputatione,
 illa summa nascitur, monachum perfectum in patria sua es-
 se non posse. Perfectum autem esse nolle, delinquere est.
 Sed, de hoc gradu pulsus, prouocabis ad clericos. An de
 his aliquid audeam dicere, qui certe in suis urbibus com-
 morantur? Absit ut de his quidquam sinistrum loquar, qui
 apostolico gradui succedentes, Christi corpus sacro ore con-
 ficiunt, per quos & nos Christiani sumus: qui clauēs regni
 cælorum habentes, quodam modo ante iudicii diem iudi-
 cant: qui sponsam Domini sobria castitate cōseruant. Sed
 alia, ut ante perstrinxi, monachorum est causa, alia cleri-
 corum. Clerici pascunt oues: ego pascor. illi de altario ui-
 uunt: mihi, quasi infructuose arbori, securis ponitur ad
 radicem, si munus ad altare non defero. Nec possum ob-
 tendere paupertatem, cum in euangelio anum uiduam,
 duo, quæ sola sibi supererant, æra mittentem in gazophy-
 lacium, laudauerit Dominus. Mihi ante presbyterum se-
 dere non licet: illi, si peccauero, licet tradere me Satanæ
 in interitum carnis, ut spiritus saluus sit in die Domini Ie-
 su. Et in ueteri quidem lege, quicumque sacerdotibus nō
 obtemperasset; aut, extra castra positus, lapidabatur a po-
 pulo; aut, gladio ceruice subiecta, contemptum expiabat
 cruore. nunc uero inobediens, spirituali mucrone trunca-
 tur; aut, eiectus de ecclesia rabido dæmonum ore discer-
 pitur. Quod si te quoque, ad eundem ordinem, pia fra-
 trum

trum blandimenta sollicitant : gaudebo de ascensu, timebo
de lapsu. Qui episcopatum desiderat, bonum opus desi- *1. Tim. 3*
derat. Scimus ista : sed iunge, quod sequitur : Oportet au-
tem huiusmodi irreprehensibilem esse, unius uxoris uirum,
sobrium, pudicum, prudentem, ornatum, hospitalem,
docibilem, non uinolentum, non percussorem, sed mode-
stum. Et ceteris, quæ de eo sequuntur, explicitis ; non mi-
nore in tertio gradu adhibuit diligentiam, dicens : Dia-
conos similiter pudicos, non bilingues, non multo uino
deditos, non turpilucros, habentes mysterium fidei in con-
scientia pura. Et hi autem probentur primum ; & sic mini-
strent, nullum crimen habentes. Væ illi homini, qui, ue-
stem non habens nuptialem, ingreditur ad cenam. nihil *Matth. 22*
superest, nisi ut statim audiat : Amice, quo modo huc in-
trasti ? Et, illo obmutescente, dicatur ministris : Tollite il-
lum, ligatis manibus, & pedibus, & mittite eum in tene-
bras exteriores, ubi erit fletus, & stridor dentium. Væ il-
li, qui, acceptum talentum in sudario ligans, ceteris lucra *Matth. 25*
facientibus, id tantum, quod acceperat, seruauit. Illico
indignantis domini responsione, ac clamore ferietur : Ser-
ue nequam, quare non dedisti pecuniam meam ad mensam ?
& ego ueniens cum usuris exegissem eam. Id est, deposuisti
ad altare, quod ferre non poteras. dum enim tu ignauus
negotiator denarium tenes, alterius locum, qui pecuniam
duplicare poterat, occupasti. Quamobrem sicuti, qui be-
ne ministrat, bonum gradum sibi acquirit : ita, qui indigne
ad calicem Domini accedit, reus erit Dominici corporis,
& sanguinis. Non omnes episcopi, episcopi sunt. Atten-
dis Petrum : sed & Iudam considera. Stephanum suspicis :
sed et Nicolaum respice ; quem Dominus in Apocalypsi sua *Apoc. 2*
damnat sententia : qui tam turpia & nefanda commentus
est, ut Nicolaitarum hæresis ex illa radice nascatur. Probet
se unusquisque, & sic accedat. Non facit ecclesiastica digni-
tas Christianum. Cornelius centurio, adhuc ethnicus, do *Act. 10*
no sancti spiritus mundatur. Presbyteros Daniel puer iudi *Deut. 13*
cat. Amos ruborum mora distringens, repente propheta *Amos 1*

Reg. 16 effectus est. David pastor eligitur in regem. Minimum di-
Ioan. 19 scipulum Iesus amat plurimum. Inferius frater accumbe;
Luc. 14 ut, minore adueniente, sursum iubearis ascendere. Super
Isa. 66 quem Dominus requiescit, nisi super humilem, & quie-
 tum, & tremementem uerba sua? Cui plus creditur, plus ab
Sap. 6 eo exigitur. Potentes potenter tormenta patientur. Nec
 sibi quisquam de corporis tantum mundi castitate supplau-
Matth. 12 dat; cum omne uerbum otiosum quodcumque locuti fue-
 rint homines, reddituri sint de eo rationē in die iudicii; cū
 etiam conuicium in fratrem, homicidii sit reatus. Non est
 facile, stare loco Pauli, tenere gradum Petri, iam cum Chri-
Apoc. 2 sto regnantium: ne forte ueniat angelus, qui scindat uelū
Luc. 14 templi tui, qui candelabrum tuum de loco moueat. Aedifi-
Matth. 5 caturus turrim, futuri operis sumptus supputa. Infatuatū
 sal ad nihil est utile, nisi ut proiciatur foras, & a porcis con-
 culcetur. Monachus, si ceciderit, rogabit pro eo sacerdos:
 pro sacerdotis lapsu quis rogaturus est? Sed quoniam e sco-
 pulosis locis enauigauit oratio; & inter canas spumeis flu-
 ctibus cautes fragilis in altum cymba processit; pandenda
 uela sunt uentis; &, quæstionum scopulis transuadatis, læ-
 tantium more nautarum, epilogi celeuma cantandum est.
 O desertū, Christi floribus uernans. o solitudo, in qua illi
 nascuntur lapides, de quibus in Apocalypsi ciuitas magni
 regis extruitur. o eremus familiaris Deo gaudens. Quid
 agis frater in sæculo, qui maior es mundo? quamdiū te te-
 ctorum umbræ premūt? quamdiū fumosarum urbium car-
 cer includit? Crede mihi, nescio quid plus lucis aspicio. Li-
 bet, sarcina corporis abiecta, ad purum ætheris euolare ful-
Matth. 5 gorem. Paupertatem times? sed beatos Christus pauperes
 appellat. Labore terreris? at nemo athleta sine sudore co-
 ronatur. De cibo cogitas? sed fides famem non timet. Su-
 per nudam metuis humum exesa ieiuniis membra collide-
 re? sed Dominus tecum iacet. Squalidi capitis horret in-
 culta cæsaries? sed caput tuum Christus est. Infinita eremi-
 uastitas te terret? sed tu paradysum mēte deambula. Quo-
 tiescumque illuc cogitatione conscenderis, toties in eremo
 non

non eris. Scabra sine balneis attrahitur cutis: sed qui in Christo semel lotus est, non illi necesse est iterum lauare. Et breuiter, ad cuncta audias Apostolum respondentem: Non sunt, inquit, condignæ passionēs huius seculi ad su- *Rom. 8* peruenturam gloriam, quæ reuelabitur in nobis. Delicatus es frater, si & hic uis gaudere cum seculo, & postea regnare cum Christo. Veniet, ueniet illa dies, qua corruptiuum hoc, & mortale, incorruptionem induat, & immortalitatem. Beatus seruus, quem Dominus inuenerit uigi- *Luc. 12* lantem. tunc ad uocem tubæ pauebit terra cum populis, & tu gaudebis. Iudicaturus Domino, lugubre mundus immugiet: tribus ad tribu pectora ferient: potentissimi quondam reges, nudo latere palpitabunt: exhibebitur cum prole sua uere tunc ignitus Iupiter: adducetur & cum suis stultus Plato discipulis: Aristotelis argumenta non proderunt. tunc tu rusticanus & pauper exultabis, & ridebis, & dices: Ecce crucifixus Deus meus: ecce iudex, qui obuolutus pannis in præsepio uaguit. hic est ille operarii & quæstuarie filius: hic, qui matris gestatus sinu, hominem Deus fugit in Aegyptum: hic uestitus coccino: hic sentibus coronatus: hic Magus dæmonium habens, & Samarites. Cerne manus Iudæ, quas fixeras: cerne latus Romane, quod foderas. uidete corpus an idem sit, quod dicebatis clam nocte sustulisse discipulos. Dilectio tua me compulit, ut hæc tibi frater dicerem; ut iis tum interesse contingat, pro quibus nunc labor durus est.

ARGV-

ARGVMENTVM.

NEPOTIANVS, Heliodori ex sorore nepos, iuuenis adhuc ætate, uerum senili animo, petierat per litteras a D. Hieronymo, ut illi uiuendi formam, quæ a clericis, uel monachis seruari debet, præscriberet. facit hoc uir sanctus præsentis epistola; in qua παρρητικῶς multa ad eorum uitam pertinentia luculenter exponit.

HIERONYMVS AD NEPOTIANVM,

de uita clericorum, & sacerdotum.

EPISTOLA II.

ETIS a me, Nepotiane carissime, litteris transmarinis, & crebro petis, ut tibi breui uolumine digeram præcepta uiuendi, & qua ratione is, qui, sæculi militia derelicta, uel monachus cœperit esse, uel clericus, rectum Christi tramitem teneat, ne ad diuersa uitiorum diuerticula rapiatur. Dum essem adolescens, immo pene puer, & primos impetus lasciuiæ ætatis eremi durtia refrenarem, scripsi ad auunculum tuum, sanctum Heliodorum, exhortatoriam epistolam, plenam lacrymis, que rimoniisq. & quæ deserti sodalis monstraret affectum. sed in illo opere pro ætate tunc lusimus; &, calentibus adhuc rhetorum studiis, atque doctrinis, quædam scholastico flore depinximus. nunc, iam cano capite, & arata rugis fronte, & instar bouum pendentibus a mento palearibus, Frigidus obstitit circum præcordia sanguis. Vnde & in alio loco idem poeta canit: Omnia fert ætas, animum quoque. Et post modicum: Nunc oblita mihi tot carmina, uox quoque Mœrim iam fugit ipsa. Quod ne de gentili tantum literatura proferre uideamur, diuinorum uoluminum sacramenta cognosce. David annos natus septuaginta, bellicosus

sus quondam uir , senectute frigescente , non poterat cale-
 fieri . quæritur itaque puella de uniuersis finibus Israel Abi 3. Reg. 1
 sag Sunamitis, quæ cum rege dormiret, & senile corpus ca-
 lesaceret . Nonne tibi uidetur , si occidentem sequaris litte-
 ram , uel figmentum esse de mimo , uel Atellanarum ludi-
 cra ? Frigidus senex obuoluitur uestimentis, & nisi comple-
 xu adolescentulæ non tepescit . uiuebat adhuc Bethsabee :
 supererat Abygail, & reliquæ uxores eius, & concubinæ , 1. Par. 3
 quas scriptura commemorat . omnes quasi frigidæ repu-
 diantur , & in unius tantū grandæuius calescit amplexibus .
 Abraham multo Dauid senior fuit , & tamen, uiuente Sa- Gen. 23. 25.
 ra , aliam non quæsiuit uxorem . Isaac duplices Dauid an-
 nos habuit, & cum Rebecca iam uetula numquam friguit. Gen. 35
 Taceo de prioribus ante diluuiū uiris, qui post annos nō-
 gentos , non dico senilibus, sed pene iam cariosis artubus,
 nequaquam puellares quæsiere amplexus . Certe Moyse,
 dux Israelitici populi , centum & uiginti annos habebat, &
 Sephoram non mutauit . Quæ est igitur ista Sunamitis, Deut. 24
 uxor & uirgo , tam feruens , ut frigidum calesceret , tam
 sancta , ut calentem ad libidinem non prouocaret ? Expo-
 nat sapientissimus Salomon patris sui delicias : & pacificus
 bellatoris uiri narret amplexus . Posside sapientiam, possi-
 de intelligentiam . Ne obliuiscaris , & ne declinaueris a uer-
 bis oris mei . neque derelinquas illam , & apprehendet te :
 ama illam , & seruabit te . Principium sapientiæ , posside Prou. 4
 sapientiam ; & in omni possessione tua , posside intelligen-
 tiam : circumda illam , & exaltabit te : honora illam , &
 amplexabitur te : ut det capiti tuo coronā gratiarum . Co-
 rona quoque deliciarū proteget te : omnes pene uirtutes
 corporis mutantur in senibus , & crescentē sola sapientia ,
 decrescunt cetera , ieiunia , uigiliæ , & eleemosynæ , cha-
 meunæ , huc illucq. discursus , peregrinorum susceptio ,
 defensio pauperum , instantia orationum , perseuerantia ,
 uisitatio languentium , labor manuum , unde præbeantur
 eleemosynæ . Et , ne sermonem longius protraham , cun-
 cta , quæ per corpus exercentur , fracto corpore minora
 fiunt .

funt. Nec hoc dico, quod in iuuenibus & adhuc solidioris ætatis, his dumtaxat, qui labore & ardentissimo studio, uitæ quoque sanctimonia, & orationis ad dominum Iesum frequentia, scientiam consecuti sunt, frigeat sapientia, quæ in plerisque senibus ætate marcescit; sed quod adolescentia multa corporis bella sustineat; & inter incentiua uitiorum, & carnis titillationes, quasi ignis in lignis uiridibus, suffocetur, ut suum non possit explicare fulgorem. Senectus uero rursus eorum, qui adolescentiam suam honestis artibus instruxerunt, & in lege Domini meditati sunt die ac nocte, ætate fit doctior, usu tritior, processu temporis sapientior, & ueterum studiorum dulcissimos fructus merit. unde & sapiens ille uir Græciæ Themistocles, cum, expletis centum & septem annis, se mori cerneret, dixisse fertur, se dolere, quod tunc egrederetur e uita, quando sapere cœpisset. Plato octogesimo primo anno scribens mortuus est: et Isocrates nonaginta & nouem annos in docendi scribendiq. labore compleuit. Taceo ceteros philosophos, Pythagoram, Democritum, Xenocratem, Zenonē, Cleanthem; qui, iam ætate longæua, in sapientiæ studiis floruerunt. Ad poetas uenio, Homerum, Hesiodum, Simonidem, Stesichorū: qui grandes nati cygneum nescio quid, & solito dulcius, uicina morte, cecinerunt. Sophocles, cum propter nimiam senectutem, & rei familiaris negligentiam a filiis accusaretur amentię, Oedipi fabulam, quā nuper scripserat, recitauit iudicibus: & tantum sapientiæ in ætate iam fracta specimen dedit, ut seueritatem tribunalium in theatri fauorem uerteret. nec mirum; cum etiam Cato Censorius, Romani generis disertissimus, iam & senex, Græcas litteras discere nec erubuerit, nec desperauerit. Certe Homerus refert, quod de lingua Nestoris, iam uetuli, & pene decrepiti, dulcior melle oratio fluxerit. Sed & ipsius nominis Abisag sacramentum, sapientiam senum indicat ampliorem. interpretatur enim, pater meus superfluous, uel patris mei rugitus. uerbum superflui ambiguum est, sed in præsentī loco uirtutem sonat; quod amplior

prior sit in senibus, & redundans ac larga sapientia. in alio autem loco superfluus, quasi non necessarius ponitur. Abisag autem, idest, rugitus proprie nuncupatur; quod, ut maris fluctus, resonat, &, ut ita dicam, de pelago ueniens fremitus auditur. ex quo ostenditur, abundatissimū & ultra humanam uocem diuini sermonis in senibus tonitruum commorari. Porro Sunamitis in lingua nostra, coccinea, dicitur: ut significet calere sapientiam, & diuina lectione feruere. quod licet Dominici sanguinis indicet sacramentum, tamen & feruorem ostendit sapientie. unde & obstetrix illa in Genesi coccinum ligat in manu Phares, qui ab eo, quod parietem diuiserat, duos ante populos separantem, diuiforis, idest Phares, sortitus est nomen. et Rahab meretrix, in typo Ecclesie reticulam mysterium sanguinis continentem, ut, Hiericho pereunte, domus eius saluaretur, appendit in fenestra. unde & in alio loco de uiris sanctis scriptura commemorat: Hi sunt, qui uenerunt de calore domus patris Rechab. Dominus noster in euangelio, Ignem, inquit, ueni mittere in terram, & quam uolo ut ardeat. Qui in discipulorum corda succensus, coegbat eos dicere: Nonne cor nostrum ardens erat in nobis, dum loqueretur in uia, & aperiret nobis scripturas? Quorsum hæc tam longo repetita principio? Ne a me quæras pueriles declamationes, sententiarum flosculos, uerborū lenocinia, & per fines capitulorum singulorum acuta quædam, breuiterq. conclusa, quæ plausus & clamores excitent audientium. Amplexetur me modo sapientia; & Abisag nostra, quæ numquam senescit, in meo requiescat sinu. Impolluta est, uirginitatisq. perpetuæ, & quæ in similitudinem Mariæ, cum quotidie generet, semperq. parturiat, incorrupta est. Hinc reor dixisse Apostolum: Spiritu feruentes. Et in euangelio Dominum prædicasse, quod in fine mundi, quando, iuxta prophetam Zachariam, stultus pastor esse cœperit, sapientia decrescente, refrigescet caritas multorum. Audi igitur, ut beatus Cyprianus ait, nō diserta, sed fortia: audi fratrem collegio, patrem senio, qui

te ab

Gen. 38

Ios. 2

1. Par. 2

Luc. 12. 24

Rom. 12

Matth. 24

Zach. 11

te ab incunabulis fidei usque ad perfectam ducat ætatem ; & per singulos gradus uiuendi præcepta constituens , in te ceteros erudiat . Scio quidem , ab auunculo tuo , beato Heliodoro , qui nunc pontifex Christi est , te & didicisse , quæ sancta sunt , & quotidie discere ; normamq. uitæ eius , exemplum habere uirtutum . sed & nostra , qualiacumque sunt , suscipe ; & libellum hunc libello illius copulato ; ut , cum ille te monachum erudierit , hic clericum doceat esse perfectum . Igitur clericus , qui Christi seruit Ecclesiæ , interpretetur primo uocabulum suum , & , nominis definitione prolata , nitatur esse quod dicitur . si enim κληρος Græce ; fors Latine appellatur : propterea uocantur clerici , uel quia de sorte sunt Domini , uel quia ipse Dominus fors , id est pars , clericorum est . Qui autem uel ipse pars Domini est , uel Dominum partem habet , talem se exhibere debet ; ut & ipse possideat Dominum , & possideatur a Domino .

Psal. 15 Qui Dominum possidet , & cum propheta dicit : Pars mea Dominus : nihil extra Dominum habere potest . quod si quippiam aliud habuerit præter Dominum , pars eius non erit Dominus . uerbi gratia : si aurum , si argentum , si possessiones , si uariam supellectilem ; cum istis partibus , Dominus pars eius fieri non dignabitur . Si autem ego pars Domini sum , & funiculus hereditatis eius ; nec accipio partem inter ceteras tribus , sed , quasi leuita , & sacerdos , uiuo de decimis ; & altari seruiens , altaris oblatione sustentor : habens uictum , & uestitum , his contentus ero ; & nudam crucem nudus sequar . Obsecro itaque te , & repetens , iterumq. iterumq. monebo ; ne officium clericatus genus antiquæ militiæ putes , id est , ne lucra sæculi in Christi quaras militia ; ne plus habeas , quam quando clericus esse cœpisti ; & dicatur tibi : Cleri eorum non proderunt eis . Nonnulli enim sunt ditiores monachi , quam fuerant sæculares ; & clerici , qui possideant opes sub Christo paupere , quas sub locuplete & fallace diabolo non habuerant ; ut suspiret eos Ecclesia diuites , quos mundus tenuit ante mendicos . Mensulam tuam pauperes , & peregrini , & cum illis Christus conui-

conuiuia nouerit. Negotiatorem clericū, & ex inope diuitē,
ex ignobili gloriosum, quasi quandā pestem, fuge. Corrum ^{1. Cor. 15}
punt mores bonos confabulationes pessimæ. Tu aurū con
temnis, alius diligit: tu calcas opes, ille sectatur: tibi cordi
silentium, mansuetudo, secretum; illi uerbositas, attrita
frons; cui nundinæ, fora placent, & plateæ, ac medicorū
tabernæ. In tanta morum discordia, quæ potest esse con
cordia? Hospitiolum tuum aut raro, aut numquam mu
lierum pedes terant. Omnes puellas, & uirgines Christi aut
æqualiter ignora, aut æqualiter dilige. Ne sub eodem testō
mansites: nec in præterita castitate confidas. nec sanctior
David, nec Sansone fortior, nec Salomone potes esse sa
pientior. Memento semper, quod paradisi colonum de ^{Gen. 3}
possessione sua mulier eiecerit. Aegrotanti tibi quilibet san
ctus frater assistat, & germana, uel mater, aut probatæ
quælibet apud omnes fidei. quod si huiusmodi non fue
rint consanguinitatis castimoniarq. personæ; multas anus
nutrit ecclesia, quæ & officium præbeant, & beneficium ac
cipiant ministrando, ut infirmitas quoque tua fructum ha
beat elemosynæ. Scio quosdā conualuisse corpore, &
animo ægrotare cœpisse. Periculose tibi ministrat, cuius
uultum frequenter attendis. Si, propter officium clerica
tus, aut uidua uisitatur, aut uirgo; numquam domum so
lus introeas. Tales habeto socios, quorum contubernio
non infameris. Si lector, si acolythus, si psalter te sequitur:
non ornentur ueste, sed moribus; nec calamistro crispent
comas, sed pudicitiam habitu polliceantur. Solus cum so
la, secreto, & absque arbitro, uel teste, non sedeas. Si fa
miliarius est aliquid loquendum: habet nutricem maiorem
domus, uirginem, uiduam; uel maritam: non est tam
inhumana, ut nullum præter te habeat, cui se audeat cre
dere. Caueto omnes suspiciones; &, quidquid probabili
ter fingi potest, ne fingatur, ante deuota. Crebra munuscu
la, & sudariola, & fasciolas, & uestes ori applicitas, & obla
tos ac degustatos cibos, blandasq. & dulces litterulas san
ctus amor non habet. Mel meum, lumen meum, meum
deside-

desiderium, omnes delicias, & lepores, & risu dignas urbanitates, & ceteras ineptias amatorum, in comœdijs erubescimus, in sæculi hominibus detestamur: quanto magis in monachis, & in clericis, quorum & sacerdotium proposito, & propositum ornatu sacerdotio? Nec hoc dico, quod aut in te, aut in sanctis uiris ista formidem; sed quod in omni proposito, in omni gradu, & sexu & boni & mali reperiantur; malorumque condemnatio, laus bonorum sit. Pudet dicere: sacerdotes idolorum, mimi, & aurigæ, & scorta hereditates capiunt: solis clericis, & monachis hoc lege prohibetur, & prohibetur non a persecutoribus, sed a principibus Christianis. Nec de lege conqueror, sed doleo, cur meruerimus hanc legem. Cauterium bonum est: sed quo mihi uulnus, ut indigeam cauterio? Prouida seueraque legis cautio: & tamen nec sic refrenatur auaritia. Per fidei commissâ legibus illudimus; & quasi maiora sint imperatorum scita, quam Christi, leges timemus, euangelia contemnimus. Sit heres, sed mater filiorum, idest, gregis sui, Ecclesia, quæ illos genuit, nutrit, & paut. quid nos inserimus inter matrem, & liberos? Gloria episcopi est, pauperum inopiâ prouidere. Ignominia sacerdotis est, propriis studere diuitiis. Natus in paupere domo, & in tugurio rusticano, qui uix milio & cibario pane rugientem saturare uentrem poteram, nunc simillam, & mella fastidio. Novi & genera, & nomina piscium: in quo litore concha lecta sit, calleo. saporibus auium discerno prouincias; & ciborum meritas, ac nouissime damna ipsa delectant. Audio præterea in senes, & anus absque liberis, quorundam turpe seruitium. ipsi apponunt matulam; obsident lectum; purulentiam stomachi, & phlegmata pulmonis manu propria suscipiunt: pauent ad introitum medici: tremantibusque labiis, an commodius habeant, sciscitantur: & si paululum senex uegetior fuerit, periclitantur: simulataque letitia, mens intrinsecus auara torquetur: timent enim, ne perdant ministerium, & uiuacem senem, Mathusalem annis comparant. O quanta apud Deum merces

merces, si in præsentī pretium non sperarent. Quantis sudoribus hereditas cassa expetitur? Minori labore margaritum Christi emi poterat. Diuinas scripturas sæpius lege; immo numquam de manibus tuis sacra lectio deponatur. Disce, quod doceas: obtine eum, qui secundum doctrinā *Tit. 1* est, fidelem sermonem; ut possis exhortari in doctrina sana, & contradicentes reuincere. Permane in his, quæ didicisti, & credita sunt tibi; sciens, a quo didiceris, paratus *2. Tim. 3* semper ad satisfactionem; omni poscenti te rationem, de ea, quæ in te est, spe. Non confundant opera tua sermonem tuum: ne, cum in ecclesia loqueris, tacitus quilibet respondeat, cur ergo hæc, quæ dicis, ipse non facis? Delicatus magister est, qui pleno uentre de ieiuniis disputat. Accusare auaritiam & latro potest: sacerdotis Christi os, mens, manusq. concordent. Esto subiectus pontifici tuo, & quasi animæ parentem suscipe. Amare filiorum, timere seniorum est. Si pater sum, inquit; ubi est honor meus? *Malac. 1* si dominus ego sum; ubi est timor meus? Plura tibi in eodem uiro obseruanda sunt nomina, monachus, pontifex, auunculus, qui te iam in omnibus, quæ sancta sunt, docuit. Illud etiam dico; quod episcopi sacerdotes se esse noverint, non dominos: honorent clericos, quasi clericos; ut & ipsis a clericis, quasi episcopis, honor deferatur. Scitum illud est oratoris Domitii: Cur ego te, inquit, habeam ut principem; cum tu me nō habeas ut senatorem? Quod Aaron & filios eius, hoc episcopum & presbyteros esse noverimus: Vnus dominus, unum templum, unū sit etiam ministerium. Recordemur semper, quid apostolus Petrus præcipiat sacerdotibus: Pascite eum, qui in uobis est, gregem Domini, prouidentes non coacte, sed spontanee secundum Deum; neque turpis lucri gratia, sed uoluntarie; neque ut dominantes in clerum, sed forma facti gregis ex animo: ut, cum apparuerit princeps pastorum, percipiat immarcessibilem gloriæ coronam. Pessimæ consuetudinis est in quibusdam ecclesiis, tacere presbyteros, & præsentibus episcopis non loqui; quasi aut inuideant, aut non

B dignen-

1. Cor. 14

dignentur audire. Et si alii, inquit apostolus Paulus, fuerit reuelatum sedenti; prior taceat. potestis enim per singulos prophetare, ut omnes discant, & omnes consolentur: & spiritus prophetarum prophetis subiectus est. non enim dissensionis Deus, sed pacis. Gloria patris est filius sapiens. Gaudeat episcopus iudicio suo, cum tales Christo elegerit sacerdotes. Docente te in ecclesia, non clamor populi, sed gemitus suscitetur. lacrymæ auditorum, laudes tuæ sint. sermo presbyteri, scripturarum lectione conditus sit. Nolo te declamatorem esse, & rabulam, garrulumque sine ratione, sed mysteriorum peritum, & sacramentorum Dei tui eruditissimum. Verba uoluere, & celeritate dicendi apud imperitum uulgus admirationem sui facere, indoctorum hominum est. Attrita frons interpretatur sæpe, quod nescit; & cum aliis persuasit, sibi quoque usurpat scientiam. Præceptor quondam meus Gregorius Nazian-

Luc. 6

zenus, rogatus a me ut exponeret, quid sibi uellet in Luca, sabbatum *δευτέρω πρωτον*, eleganter luit: Docebo te, inquit, super hac re in ecclesia: in qua, mihi omni populo acclamante, coheris inuitus scire quod nescis: aut certe, si solus tacueris, solus ab omnibus stultitiæ condemnaberis. Nihil tam facile, quam uilem plebeculam, & indoctam concionem linguæ uolubilitate decipere; quæ, quidquid non intelligit, plus miratur. M. Tullius, in quem pulcherrimum illud elogium est: Demosthenes tibi præripuit, ne esses primus orator; tu illi, ne solus: in oratione pro Q. Gallio, quid de fauore uulgi, & de imperitis concionatoribus loquatur, attende: ne his fraudibus ludaris. loquor enim, quæ sum ipse nuper expertus. Vnus quidam poeta, nominatus homo, perlitteratus, cuius sunt illa colloquia poetarum, ac philosophorum, cum facit Euripidem & Menandrum inter se, & alio loco Socratem atque Epicurum differentes, quorum ætates non annis, sed sæculis scimus esse disiunctas, quantos is plausus, & clamores mouet? multos enim condiscipulos habet in theatro, qui simul litteras non didicerant. Vestes pullas æque deuota, ut
candi-

candidas : Ornatus , ut sordes , pari modo fugiendæ sunt : quia alterum delicias , alterum gloriam redolet . Non absque amictu lineo incedere ; sed pretium uestium linearum non habere , laudabile est . alioquin ridiculum , & plenum dedecoris est , referto marsupio , quod sudariū orariumq. non habeas , gloriari . Sunt , qui pauperibus paulum tribuunt , ut amplius accipiant , & sub prætextu eleemosynæ quærent diuitias : quæ magis uenatio appellanda est , quàm eleemosynæ genus . Sic bestiæ , sic aues , sic capiuntur & piscēs . Modica in hamo esca ponitur , ut matronarum in eo sacculi protrahantur . Sciat episcopus , cui commissa est ecclesia , quem dispensationi pauperū curæq. præficiat . Melius est non habere , quod tribuam ; quam impudenter petere , quod recōdam . Sed & genus arrogantiae est , clementiorem te uelle uideri , quam pontifex Christi est . Non omnia possumus omnes . Alius in ecclesia oculus est , alius lingua , alius manus , alius pes , auris , uenter : & cetera . Lege Pauli epistolam ad Corinthios ; quo modo diuersa membra unum corpus efficiunt . Nec rusticus tamen & simplex frater ideo se sanctum putet , si nihil nouerit : nec peritius , & eloquens , lingua æstimet sanctitatem . Multoq. melius est e duobus imperfectis , rusticitatem sanctam habere , quam eloquentiam peccatricem . Multi ædificant parietes , & columnas ecclesiæ subtruunt : marmora nitent : auro splendent laquearia : gemmis altare distinguitur : & ministrorum Christi nulla electio est . Neque uero mihi aliquis opponat diues in Iudæa templum , mensam , lucernas , thuribula , patellas , scyphos , mortariola , & cetera ex auro fabrefacta . tunc hæc probabantur a Domino , quando sacerdotes hostias immolabant ; & sanguis pecudum , erat redemptio peccatorum . quamquam hæc omnia præcesserint in figura : Scripta sunt autē propter nos , in quos fines sæculorum deuenerunt . Nunc uero , cum paupertatem domus suæ pauper Dominus dedicarit , cogitemus crucem eius , & diuitias lutum putabimus . Quid miramur , quod Christus uocat iniquum mammona ? quid suspicimus , &

1. Cor. 12

1. Cor. 10

Luc. 16

B 2 ama-

- Act. 3** amamus, quod Petrus se non habere, gloriose testatur? alioquin, si tantum litteram sequimur, & in auro atque diuitiis simplex nos delectat historia, cum auro obseruemus & cetera. Ducant pontifices Christi uxores uirgines: Quamuis bonæ mentis sit, qui cicatricem habuerit, & deformis est; priuetur sacerdotio; lepra corporis, animæ uitiis præferatur: Crescamus, & multiplicemur, & repleamus terram; nec immolemus agnum, nec mysticum pascha celebremus: quia hæc absque templo fieri, lege prohibentur. Figamus septimo mense tabernaculum, & sollemnne ieiunium buccina concrepemus. Quod si hæc omnia
- Rom. 7** spiritualibus spiritualia comparantes, scientesq. cum Paul
- Psal. 118** lo, quod lex spiritualis est, & David uerba cantantes: Reuelo oculos meos, & considerabo mirabilia de lege tua: sic intelligimus, ut Dominus quoque noster intellexit, &
- Marc. 2** interpretatus est sabbatum: aut aurum repudiemus cum
- Matth. 12** ceteris superstitionibus Iudæorum: aut, si aurum placet, placeant & Iudæi; quos cum auro aut probare nobis necesse est, aut damnare. Cōiuiua tibi uitanda sunt sæcularium, & maxime eorum, qui honoribus tument. Turpe est, ante fores sacerdotis Christi crucifixi, & pauperis, & qui cibo quoque uestebatur alieno, lictores consulum, & milites excubare, iudicemq. provincie melius apud te prandere, quam in palatio. Quod si obtenderis, te facere hæc, ut roges pro miseris atque subiectis: iudex sæculi plus deferret de rico continenti, quam diuiti; & magis sanctitatem tuam uenerabitur, quam opes: aut, si talis est, qui non audiat clericos pro quibuslibet tribulatis nisi inter phylas: libenter carebo huiusmodi beneficio, & Christum rogabo pro iudice; qui magis, & citius subuenire potest, quam iudex.
- Psal. 117** melius enim est confidere in Domino, quam confidere in homine: melius est sperare in Domino, quam sperare in principibus. Numquam uinum redoleas, ne audias illud philosophi: Hoc non est osculum porrigere, sed uinū propinare. Vinolentos sacerdotes & Apostolus damnat, & ue
- Tit. 2** tus lex prohibet: Qui altario deseruiunt, uinum & ficeram
- Lewit. 10** non

non bibant . Sicera Hebræo sermone omnis potio nuncu-
 patur , quæ inebriare potest , siue illa quæ frumento con-
 ficitur , siue pomorum succo , aut cum fani decoquantur in
 dulcem & barbaram potionem , aut palmarum fructus ex-
 primuntur in liquorem , coctisq. frugibus aqua pinguior co-
 loratur . Quidquid inebriat , & statum mentis euertit , fu-
 ge similiter ut uinū . Nec hoc dico , quod Dei a nobis crea-
 tura damnetur : siquidem & Dominus uini potator est ap-
 pellatus ; & Timotheo , dolenti stomachum , modica uini
 sorbitio relaxata est : sed modū pro ætatis , & ualitudinis ,
 & corporū qualitate exigimus in potando . quod si absque
 uino ardeo adolescentia , & inflammor calore sanguinis ,
 & succulento ualidoq. sum corpore : libenter carebo pocu-
 lo , in quo suspitio ueneni est . Pulchre dicitur apud Græ-
 cos , & nescio an apud nos æque resonet : Pinguis uenter
 non gignit mentem tenuem . Tantum tibi ieiuniorum mo-
 dum impone , quantum ferre potes . sint tibi pura , casta ,
 simplicia , moderata , & non superstitiosa ieiunia . Quid
 prodest , oleo non uesci , & moletias quasdam difficulta-
 tesq. ciborum quærere , carycas , piper , nuces , palmarum
 fructus , similam , mel , pistacia ? Tota hortorum cultura
 uexatur , ut cibario non uescamur pane ; & , dum delicias
 sectamur , a regno celorum retrahimur . Audio præterea
 quosdam , contra rerum hominumq. naturam , aquā non
 bibere , nec uesci pane , sed sorbitiunculas delicatas , & con-
 trita olera , baccarumq. succum non calice sorbere , sed con-
 cha . Pro pudor , non erubescimus istiusmodi ineptiis , nec
 tædet superstitionis ? Insuper etiam famam abstinentiæ in
 deliciis quærimus . Fortissimum ieiunium est , aqua & pa-
 nis : sed quia gloriam non habet , & omnes pane & aqua ui-
 uimus ; quasi publicum & commune ieiunium nō putatur .
 Caue , ne hominum rumusculos aucupetis ; ne offensam
 Dei , populorum laude commutes . Si adhuc , inquit Apo-
 stolus , hominibus placerem , Christi seruus non essem .
 Desit placere hominibus , & seruus factus est Christi : Per
 bonam famam & malam , a dextris & a sinistris , Christi

Deut. 14

Matth. 11

1.Tim. 5

Gal. 1

2.Cor. 6

B 3 miles

miles graditur, nec laude extollitur, nec uituperatione frangitur; non diuitiis tumet, non contrahitur paupertate; & *Psal.* 103 laeta contemnit, & tristitia. per diem sol non urit eum, neque luna per noctem. Nolo te orare in angulis platearum; *Matth.* 24 ne rectum iter precum tuarum frangat aura popularis. Nolo te dilatare fimbrias, & ostentui habere phylacteria, & conscientia repugnante, pharisaica ambitione circumdari. Quanto melius erat, hæc non in corpore, sed in corde gestare; & Deum habere fautorem, non aspectus hominū? Inde pendet euangelium, inde lex & prophetæ, siue sacra & apostolica doctrina. melius est enim, hæc omnia in mente portare, quam in corpore. Fidelis mecum lector intelligis, quid taceam, & quid magis tacendo loquar. Tot te regulæ, quot species gloriarum, percurrant. Vis scire, quales Dominus quærat ornatus? Habeto prudentiam, iustitiam, temperantiam, fortitudinem. his cæli plagis includere: hæc te quadriga, uelut aurigam Christi, ad metam concita ferat. nihil hoc monili pretiosius, nihil hac gemmarū uarietate distinctius. Ex omni parte decoraris, cingeris, atque protegeris: & ornamento tibi sunt, & tutamini: gemmæ uertuntur in scuta. Caue quoque, ne aut linguam, aut aures habeas prurientes, idest, ne aut ipse aliis detrahas, *Psal.* 49 aut alios audias detrahentes. Sedens, inquit, aduersus fratrem tuum loquebaris, & aduersus filium matris tuæ ponebas scandalum: hæc fecisti, & tacui. Existimasti inique, quod ero tui similis: arguam te, & statuam contra faciem tuam. Parce a detractioe linguæ: custodi sermones tuos: & scito, quia per cuncta, quæ de aliis loqueris, tua cōscientia iudicaris; & in his ipse deprehenderis, quæ in aliis arguebas. Neque uero illa iusta est excusatio: Referentibus aliis iniuriam facere non possum. Nemo inuito auditori libenter refert. Sagitta in lapidem numquam figitur, interdum resiliens percutit dirigentem. Discat detractor, dum te uidet non libenter audire, non facile detrahere. Cum detractoribus, ait Salomon, ne miscearis: quoniam repente ueniet perditio eorum; & ruinam utriusque quis nouit? tam

tam uidelicet eius, qui detrahit, quam illius, qui accom-
modat aurem detrahenti. Officii ergo tui est, uisitare lan-
guentes, nosse domos matronarum, ac liberos earum, &
nobilium uirorum custodire secreta. officii tui est, non solū
oculos castos seruare, sed & linguam. Numquā de formis
mulierum disputes; nec, quid agatur in alia, domus alia
per te nouerit. Hippocrates adiurat discipulos antequam
doceat, & in uerba sua iurare compellit; extorquet sacra-
mento silentium; sermonem, incesum, habitū, moresq.
præscribit: quanto magis nos, quibus animarum cura cō-
missa est, omnium Christianorum domos debemus ama-
re, quasi proprias? Cōsolatores potius nos in mæroribus
suis, quam conuiuas in prosperis, nouerint. Facile con-
temnitur clericus, qui sepe uocatus ad prandium, non re-
cusat. Numquam petentes, raro accipiamus rogati. Bea- A.7.20
tius enim est, magis dare, quā accipere: nescio enim quo
modo etiam ipse, qui deprecatur ut tribuat, cum accepe-
ris, uiliorem te iudicat; & mirum in modum, si eum ro-
gantem contempseris, plus te posterus ueneratur. Prædi-
cator continentie, nuptias ne conciliet. Qui apostolum
legit, dicentem: Superest, ut, qui habent uxores, sic sint, 1.Cor.7
quasi non habeant: cur uirginem cogit ut nubar? Qui de 1.Tim.3
monogamia sacerdos est, quare uiduam hortatur ut digi-
ma sit? Procuratores & dispensatores domorū alienarum,
atque uillarū, quo modo possunt esse clerici, qui proprias
iubentur contemnere facultates? Amico quippiam rapere,
furtum est: Ecclesiam fraudare, sacrilegium est: accepisse
quod pauperibus erogandum sit, & esurientibus plurimis,
uel cautum esse uelle, uel timidum, aut, quod apertissimū
sceleris est, aliquid inde subtrahere, omnium prædonum
crudelitatem superat. Ego fame torqueor; & tu iudicas
quantum uentri meo satis sit. aut diuide statim, quod acce-
peris; aut, si timidus dispensator es, dimitte largitorem, ut
sua ipse distribuatur. Nolo, sub occasione mea sacculus tuus
plenus sit. nemo mea melius me seruare potest. Optimus
dispensator est, qui sibi nihil reſeruat. Coegisti me, Ne-

B 4. potia-

potiane carissime, lapidato iam uirginitatis libello, quem sanctæ Eustochio Romæ scripseram, post annos decem rursum Bethlehem ora referare, & confodiendum me linguis omnium prode. aut enim nihil scribendum fuit, ne hominum iudicium subiremus, quod tu facere prohibuisti; aut scribentes nosse, cunctorum aduersum nos maledicorum tela esse torquenda. quos obsecro, ut quiescant, & desinant maledicere. non enim ut aduersariis, sed ut amicis scripsimus: nec inuesti sumus in eos, qui peccant; sed, ne peccent, monuimus: neque in illos tantum, sed & in nos ipsos seueri iudices fuimus: uolentesq. festucam de oculo alterius tollere, nostram primū trabem eiecimus. nullum læsi: nullius nomen mea scriptura designatum est. neminem specialiter meus sermo pulsauit. generalis de uitiis disputatio est. qui mihi irasci uoluerit, prius ipse de se, quod talis sit, confitebitur.

ARGVMENTVM.

NEPOTIANVS presbyter, ad quem precedens extat epistola, diem suum adhuc iuuenis extremum obierat. D. Hieronymus super eius morte consolatur nunc Heliodorum auunculum Episcopum, ostendens mortem non esse timendam, ueluti quæ a Christo occisa sit: multosq. infidelium ueterum, qui fortiter eam in suis tolerarunt, primum recensens, ad laudes mortui deinde descendit: quibus expletis, humanam miseriam, imperatorum, aliorumq. procerum exemplo, ante oculos illi dōctē, ac ingeniose ponit.

HIERONYMI AD HELIODORVM

Epitaphium Nepotiani.

EPISTOLA III.

GRANDES materias ingenia parua nō sustinent; & in ipso conatu ultra uires ausa, succumbunt: quantoq. maius fuerit, quod dicendum est; tanto magis obruitur, qui magnitudinē rerum uerbis non potest explicare. Nepotianus meus, tuus, noster, immo Christi, & quia

quia Christi, iccirco plus noster, reliquit senes, & desiderii sui iaculo uulneratos, & intolerabili dolore confectos. Quem heredem putauimus, finus tenemus. Cui iam meum sudabit ingenium? cui litterulæ placere gestiēt? Vbi est ille ἐρῳδιώντης noster, & cygneo canore uox dulcior? Stupet animus, manus tremit, caligant oculi, lingua balbutit. Quidquid dixerō; quia ille non audit, mutum uidetur. Stylus ipse quasi sentiens, & cera subtristior, uel rubigine, uel situ obducitur. Quotiescumque nitor in uerba prorumpere, & super tumulum eius, epitaphii huius flores spargere; toties lacrymis implentur oculi, & renouato dolore, totus in funere sum. Moris quondam fuit, ut super cadauera parentum defunctorum in concione pro rostris laudes liberi dicerent, & instar lugubrium carminum, ad fletus & gemitus audientium pectora concitarent. En rerum in nobis ordo mutatus est, & in calamitatē nostram perdidit sua iura natura. Quod exhibere senibus iuuenis debuit, hoc iuueni exhibemus senes. Quid igitur faciam? Iungam tecum lacrymas? Sed Apostolus prohibet, Christi-
1. Theff. 4
 tianorum mortuos, dormientes uocans. Et Dominus in Euangelio, Non est, inquit, mortua puella, sed dormit. Matth. 9
 Lazarus quoque, quia dormierat, suscitatus est. Læter & Ioan. 11
 gaudeam, quia raptus est, ne malitia mentem eius mutaret, quia placuerat Deo anima illius? Sed inuito & repu-
Sap. 4
 gnanti per genas lacrymæ fluunt; & inter præcepta uirtutum, resurrectionisq. spem, credulam mentem desiderii frangit affectus. O mors, quæ fratres diuidis, & amore sociatos crudelis ac dura dissocias. Adduxit urentem uentum Osee 13
 Dominus de deserto ascendentem, qui siccauit uenas tuas, & desolauit fontem tuum. Deuorasti quidem Ionam, sed & in utero tuo uiuus fuit. Portasti quasi mortuum, ut tempestas mundi conquiesceret; & Niniue nostra illius præconio saluaretur. Ille ille te uicit: ille te iugulauit. Fugitiuus propheta, qui reliquit domum suam, dimisit hereditatem suam, dedit dilectam animam suam in manibus querentium eum. Qui per Osee quondam tibi rigidus minabatur: Ero Osee 13
mors

mors tua o mors : ero morsus tuus inferne . Illius morte , tu mortua es : illius morte , nos uiuimus . Deuorasti , & deuorata es . Dumq. assumpti corporis sollicitaris illecebra , & audis faucibus prædâ putas ; interiora tua adunco dente cõfossa sunt . Gratias tibi Christe saluator tua agimus creatura , quod tam potentem aduersarium nostrum , dum occideris , occidisti . Quid ante miserius homine , qui æternæ mortis terrore prostratus , uiuendi sensum ad hoc tantum acce-

Rom. 5 perat , ut periret ? regnauit enim mors ab Adam usque ad Moysen , etiam super eos , qui non peccauerunt , in similitudinem præuaricationis Adæ . Si Abraham , Isaac , & Iacob in inferno , quis in cælorum regno ? si amici tui sub pœna offendentis Adam , & qui non peccauerant , alienis peccatis tenebantur obnoxii : quid de his credendum est , qui dixerunt in cordibus suis , non est Deus ? qui corrupti , &

Psal. 13 abominabiles facti sunt in uoluntatibus suis ? qui declinauerunt , simul inutiles facti sunt ; non est qui faciat bonum , nõ est usque ad unum ? Quod si Lazarus uidetur in sinu Abrahamæ , locoq. refrigerii : quid simile infernus & regna cælorum ? Ante Christum Abraham apud inferos : post Christum latro in paradiso . Et iccirco in resurrectione eius , multa dormientium corpora surrexerunt , uisq. sunt in cælesti Hieru-

Eph. 5 salem . Tuncq. impletum est illud elogium : Surge qui dormis , & eleuare : & illuminabit te Christus . Ioannes Bapti-

Matth. 3 sta in eremo personat : Pœnitentiam agite : appropinquabit enim regnum cælorum . a diebus enim Ioannis Baptiste

Matth. 11 regnum cælorum uini patitur , & uiolenti diripiunt illud .

Gen. 3 Flammea illa romphæa , custos paradisi , & præsentia foribus Cherubim , Christi resincta & referata sunt sanguine . Nec mirum hoc nobis in resurrectione promitti , cum omnes , qui in carne , non secundum carnem uiuimus , municipatum habeamus in cælo , & hic adhuc positis dicatur in terra : Regnum Dei intra uos est . Adde , quod ante resurrectionem Christi notus tantum in Indæa erat Deus ; in Israel magnum nomen eius : et ipsi , qui nouerant eum , tamen ad inferos trahebantur . Vbi tunc totius orbis homines , ab

India

India usque ad Britanniam, a rigida septentrionis plaga usque ad feruores Atlantici oceani tam innumerabiles populi, & tantarum gentium multitudines: Quam uariæ linguæ, habitu tam uestis, & armis: piscium ritu, ac locustarum, & uelut muscæ & culices conterebantur: absque notitia enim sui creatoris, omnis homo pecus est: nunc uero passionem Christi, & resurrectionem eius, cunctarum gentium & uoces, & litteræ sonant. Taceo de Hebræis, Græcis, & Latinis: quas nationes fidei suæ in crucis titulo Dominus dedicauit. Immortalem animam, & post dissolutionem corporis subsistentem; quod Pythagoras sonniauit, Democritus non credidit, in consolationem damnationis suæ Socrates disputauit in carcere; Indus, Persa, Gothus, Aegyptius philosophantur. Bessorum feritas, & pellicorum turba populorum, qui mortuorum quondam inferiis homines immolabant, stridorem suum in dulce crucis fregerunt melos, & totius mundi una uox Christus est. Quid agimus anima? quo nos uertimus? quid primam assumimus? quid tacemus? exciderunt ne tibi præcepta rethorum? & occupata luctu, oppressa lacrymis, præpedita singultibus, dicendi ordinem non tenes? ubi illud ab infantia studium litterarum, & Anaxagoræ, ac Telamonis semper laudata sententia? Sciebam me genuisse mortalem. Legimus Crantorem; cuius uolumen, ad confouendum dolorem suum, secutus est Cicero: Platonis, Diogenis, Clitomachi, Carneadis, Posidonii ad sedandos luctus opuscula percurrimus, qui diuersis ætatibus diuersorum luctum uel libris, uel epistolis minuere sunt conati: ut, etiam si nostrum aret ingenium, de illorum posset fontibus irrigari. Proponunt innumerabiles uiros, & maxime Periclem, & Xenophontem Socraticum: quorum alter, amissis duobus filiis, coronatus in concione differuit: alter, cum sacrificans filium in bello audisset occisum, deposuisse coronam dicitur, & eandem capiti reposuisse, postquam fortiter in acie dimicantem reperit concidisse. Quid memorem Romanos duces, quorum uirtutibus, quasi quibusdam stellis, Latine

micant

micant historiæ. Pulvillus Capitolium dedicans, mortuū,
ut nunciabatur, subito filium se iussit absente sepeliri. L.
Paulus septem diebus inter duorū exequias filiorum trium-
phans urbem ingressus est. Prætermitto Maximos, Caro-
nes, Gallos, Pisones, Brutos, Scæuolas, Metellos, Scäu-
ros, Marios, Crassos, Marcellos, atque Aufidios; quo-
rum non minor in luctu, quam in bellis, uirtus fuit, & quo-
rum orbitates in Consolationis libro Tullius explicauit: ne
uidear potius aliena, quam nostra, quæsisse. Quamquam
& hæc in sugillationem nostri breuiter dicta sint; si nō præ-
stet fides, quod exhibuit infidelitas. Igitur ad nostra uenia-

- Gen.* 37 mus. Non plangam cum Iacob & Dauid filios in lege mo-
2. Reg. 13. 18 rientes; sed cum Christo in euangelio recipiam resurgētes.
Psal. 29 Iudæorum luctus, Christianorum gaudium est. Ad uespe-
Rom. 13 ram demorabitur fletus, & ad matutinū lætitia. Nox præ-
Deut. 34 cessit, dies autem appropinquauit. unde & Moyses mo-
Ios. 24 riens plangitur, Iesus absque funere & lacrymis in monte
sepelitur. Quidquid de scripturis super lamentatione dici
potest, in eo libro, quo Paulam Romæ consolati sumus,
breuiter explicauimus. nunc nobis per aliam semitam ad
eundem locum perueniendum est; ne uideamur præterita,
& abolita quondam calcare uestigia. Scimus quidem, Ne-
potianum nostrum esse cum Christo, & sanctorū mixtum
choris, quod hic nobiscum eminus rimabatur in terris, &
æstimatione quærebat, ibi uidentem cōminus dicere: Si-
Psal. 47 cut audiuius, sic & uidimus, in ciuitate Domini uirtutū,
in ciuitate Dei nostri: sed desiderium absentix eius ferre nō
possumus, non illius, sed nostram uicem dolentes. Quan-
to ille felicior; tanto amplius nos in dolore, quod tali ca-
Ioan. 11 remus bono. Flebant & sorores Lazarum, quem resur-
cturum nouerant. et ut ueros hominis exprimeret affectus;
Philip. 1 ipse saluator plorauit, quem resuscitaturus erat. Apostolus
quoque eius, qui dixit: Cupio dissolui, & esse cum Chri-
Philip. 2 sto: Et alibi: Mihi uiuere Christus est, & mori lucrum:
gratias agit, quod Epaphroditus de mortis sibi uicinia red-
ditus sit; ne haberet tristitiam super tristitiam, non incre-
dulitatis

dulcatis meto, sed desiderio caritatis. Quanto magis tu, & auunculus, & episcopus; hoc est, & in carne, & in spiritu pater, doles abesse viscera tua, & quasi a te diuulsa suspiras? Sed obsecro, ut modum adhibeas in dolore, memor illius sententiæ: Ne quid nimis: obligatoq. parumper uulnere, audias laudes eius, cuius semper uirtute lætatus es. Nec doleas, quod talem amiseris; sed gaudeas, quod talem habueris. Et sicut hi, qui in breui tabella terrarum fixi pingunt; ita in paruo isto uolumine cernas adumbrata, non expressa signa uirtutum; suscipiasq. a nobis non uires, sed uoluntatem. Præcepta sunt rhetorum, ut maiores eius, qui laudandus est, & eorum gesta altius repetantur, sicq. ad ipsum per gradus sermo perueniat: quo uidelicet auitis paternisq. uirtutibus illustrior fiat, & aut non degenerasse a bonis, aut mediocres ipse ornasse uideatur. Ego carnis bona, quæ semper & ipse contempsit, in animæ laudibus nõ requiram: nec me iactabo de genere, id est, de alienis bonis; cum Abraham, & Isaac, sancti uiri, Ismaelem, & Esau peccatores genuerint; & e regione, Iepte, in catalogo iustorum Apostoli uoce numeratus, de meretrice sit natus. *Hebr. 11.* Anima, inquit, quæ peccauerit, ipsa morietur. Ergo, quæ *Exech. 18* non peccauerit, ipsa uiuet. Nec uirtutes, nec uitia parentum liberis imputantur. ab eo tempore censetur, ex quo in Christo renascimur. Paulus, persecutor Ecclesiæ, & manelupus rapax, Benjamin, ad uesperam diuidit escā, *Gen. 49* Ana nix ouis submittens caput. Igitur & Nepotianus noster, *Act. 9* quasi infantulus uagiens, & rudis puer, subito nobis quasi de Iordane nascatur. Alius forsitan scriberet, quod ob salutem illius orientem eremumq. dimiseris; & me carissimum sodalem tuum redeundi spe lactaueris; ut primum, si fieri posset, sororem cum paruulo uiduam, deinde, si consilium illa respueret, saltem nepotem dulcissimum conseruares. hic est enim ille, de quo tibi quondam uaticinatus sum: Licet paruulus ex collo pendeat nepos. Referret, inquam, alius, quod in palatii militia, sub chlamyde, & candenti lino corpus eius cilicio tritum sit; quod stans ante sæculi potesta-

potestates, lurida ieiuniis ora portauerit; quod adhuc sub alterius indumentis alteri militauerit; & ad hoc habuerit cingulum, ut uiduis, pupillis, orphanis, oppressis, miserisq. subueniret. Mihi non placent dilationes istæ imperfe-
Aff. 10 *Et* seruitutis Dei: & centurionem Cornelium, ut lego iustum, statim audio baptizatum. Verumtamen uelut incunabula quædam nascentis fidei comprobemus; ut qui sub alienis signis deuotus miles fuit, donandus laurea sit, postquam suo regi cœperit militare. Baltheo posito, habituq. mutato, quidquid castrensis peculii fuit, in pauperes erogauit. legerat enim: Qui uult perfectus esse, uendat omnia, quæ habet, & det pauperibus, & sequatur me. Et iterum: Non potestis duobus dominis seruire, Deo, & mammonæ. Excepta uili tunica, & operimento pari, quo, tecto tantum corpore, frigus excluderet, nihil sibi amplius reseruauit. Cultus ipse, provinciæ morem sequens, nec munditiis, nec fordibus notabilis erat. cumq. arderet quotidie, aut ad Aegypti monasteria pergere, aut Mesopotamiæ inuisere choros, uel certe insularum Dalmatiæ, quæ Altino tantum freto distant, solitudines occupare; auunculum pontificem deferere non audebat, tot in illo cernens exempla uirtutum, domiq. habens unde disceret. in uno, atque eodẽ & imitabatur monachum, & episcopum uenerabatur. nec, ut in plerisque accidere solet, assiduitas familiaritatem, familiaritas contemptum illius fecerat: sed ita eum colebat, quasi parentem; ita admirabatur, quasi quotidie nouum cerneret. Quid multa? fit clericus, & per solitos gradus presbyter ordinatur. Iesu bone, qui gemitus, qui euilatus, quæ cibi interdictio, quæ fuga oculorum omnium. Tum primum, & solum auunculo iratus est. Querebatur se ferre non posse, & iuuenilem ætatem incongruam sacerdotio causabatur. sed quanto magis repugnabat, tanto magis in se studia omnium concitabat: & merebatur negando, quod esse nolebat: eoq. dignior erat, quo se clama-
Matth. 19. 6. bat indignum. Vidimus Timotheum nostri temporis, & canos in sapientia, electumq. a Moyse presbyterum, quem ipse

ipse sciret esse presbyterum . Igitur clericatum non honorem intelligens , sed onus , primam curam habuit , ut humilitate superaret inuidiam : deinde , ut nullam obsceni in se rumoris fabulam daret ; ut qui mordebantur ad ætatē eius , stuperent ad continentiam ; subuenire pauperibus , uisitare languentes , prouocare hospitio , lenire blanditiis , gaudere cum gaudentibus , flere cum flentibus . Cæcorum baculus , esurientium cibus , spes miserorum , solamen lugentium fuit . Ita in singulis uirtutibus eminebat , quasi ceteras non haberet . Inter presbyteros , & cœquales , primus in opere , extremus in ordine . quidquid boni fecerat , ad auunculum referebat . si quid forte aliter euenerat , quam putarat ; illum nescire , se errasse dicebat . In publico episcopum , domi patrem nouerat : grauitatem morum hilaritate frontis temperabat . gaudium in risu , non cachinnum , intelligeres . Virgines , & uiduas Christi honorare ut matres , hortari ut forores , cum omni castitate . Iam uero , postquam domum se contulerat , & , relicto foris clerico , duritiæ se tradiderat monachorum ; creber in orationibus , uigilans in precando . Lacrymas Deo , non hominibus , offerebat : ieiunia , in aurigæ modum , pro lassitudine , & uiribus corporis , attemperabat . Mensæ auunculi intererat ; & sic apposita quæque libabat , ut & superstitionem fugeret , & continentiam seruaret . Sermo eius per omne conuiuium de scripturis aliquid proponere , libenter audire , respondere uerecunde , recta suscipere , praua non acriter confutare , disputantem contra se magis docere , quam uincere : & ingenuo pudore , qui ornabat ætatem , quid cuius esset , simpliciter confiteri . atque in hunc modum , eruditionis gloriam declinando , eruditissimus habebatur . illud , aiebat , Tertulliani , istud Cypriani , hoc Lactantii , illud Hilarii est . sic Minucius Felix , ita Victorinus , in hunc modum est locutus Arnobius . me quoque , quia pro sodalitate auunculi diligebat , interdum proferebat in medium . lectioneq. assidua , & meditatione diuturna , pectus suum bibliothecam fecerat Christi . quoties ille transmarinis epistolis deprecatus est , ut aliquid ad
se

Luc. 11. 18 se scriberem? quoties nocturnum de euangelio petitorum, & interpellatricē duri iudicis mihi uiduam exhibuit? cumq. ego silentio magis, quam litteris, denegarem; & pudore reticentis, pudorem suffunderem postulantis: auunculum mihi opposuit precatorem; qui & liberius pro alio peteret; & pro reuerentia sacerdotii facilius impetraret. Feci ergo, quod uoluit; & breui libello amicitias nostras æternæ memoriæ consecraui. quo suscepto, Cræsi opes, & Darii diuitias se uicisse iactabat. illum oculis, illum manibus, illum sinu, illum ore tenebat. cumq. in stratu frequenter euolueret; super pectus soporati, dulcis pagina decidebat. si uero peregrinorum, si amicorum quispiam uenerat; lætatur nostro super se testimonio: & quidquid minus in opusculo erat, distinctione moderata, & pronuntiationis uarietate pensabat; ut in recitando illo, ipse uel placere quotidie, uel displicere uideretur. Vnde hic feruor, nisi ex amore Dei? unde legis Christi indefessa meditatio, nisi ex desiderio eius, qui legem dedit? Alii nummū addant nummo, & in marsupium suffocantes: matronarum opes uenentur obsequiis: sint ditiores monachi, quam fuerant sæculares: possideant opes sub Christo paupere, quas sub locuplete diabolo non habuerant; & suspiret eos Ecclesia diuites, quos tenuit mundus ante médicos. Nepotianus noster, aurum calcans, schedulas confectatur: & sicut sui in carne cōtempitor est, & paupertate incedit ornatio; ita totum animæ inuestigat ornatum. Ad comparisonem quidem superiorum modica sunt, quæ dicturi sumus: sed & in paruis idem animus ostenditur. Vt enim creatorem non in cælo tantum miramur, & terra, sole, & oceano, elephantis, camelis, equis, bubus, pardis, ursis, leonibus, sed & in minutis quoque animalibus, formica, culice, muscis, uermiculis, & istiusmodi genere, quorum magis scimus corpora, quam nomina; eandemq. in cunctis ueneramur solertiam: ita mens Christo dedita, æque & in maioribus, & in minoribus intenta est, sciens etiam pro otioso uerbo reddendam esse rationem. Erat ergo sollicitus, si niteret altare, si parietes



tes absque fuligine, si pauimenta tersa, si ianitor creber in porta, uela semper in ostiis, si sacrarium mundum, si uasa luculenta, & in omnes caerimonias pia sollicitudo disposita, non minus, non minus negligebat officium. ubicumque cum quæreret, in ecclesia inuenires. Nobilem uirum, Q. Fabium, miratur antiquitas: qui etiam Romanæ scriptor historix est; sed magis ex pictura, quam ex litteris, nomen inuenit: & Beselehel nostrum, plenum sapientia & spiritu Dei, scriptura testatur. Hiram quoque, filium mulieris Tyriæ, quod alter tabernaculi, alter templi suppellectilem fabricati sint. quo modo enim lætæ segetes, & uberes agri interdum culmis, aristisq. luxuriant: ita præclara ingenia, & mens plena uirtutibus in uariarum artium redundat elegantiam. unde & apud Græcos philosophus ille laudatur, qui omne, quo uteretur, usque ad pallium, & anulum, manu sua factum gloriatus est. Hoc idem possumus & de isto dicere; qui basilicas ecclesiæ, & martyrum conciliabula diuersis floribus, & arborum comis, uitiumq. pampinis adumbrarit; ut, quidquid placebat in ecclesia, tam dispositione, quam uisu, presbyteri laborem, & studium testaretur. Maeste uirtute: cuius talia principia, qualis finis erit? O miserabilis humana condicio, & sine Christo uanum omne, quod uiuimus. Quid te subtrahis? quid tergiversaris oratio? quasi enim mortem illius differre possimus, & uitam facere longiorem, sic timemus ad ultimum peruenire. Omnis caro fenum, & omnis gloria eius quasi flos feni. Vbi nunc decora illa facies, ubi totius corporis dignitas, qua, ut luti pulchro indumento, pulchritudo animæ uestiebatur? Marcescebat, pro dolor, flante austro lilium; & purpura uiolæ, in pallorem sensim migrabat. cumq. febribus ætueret, & uenarum fontes hauriret calor; lassò anhelitu tristem auunculum consolabatur. lætus erat uultus, & uniuersis circa plorantibus, solus ipse ridebat. proicere pallium, manus extendere, uidere quod alii non uidebant, & quasi in occursum se erigens, salutare uenientes. intelligeres illum non emori, sed emigrare; & mutare amicos, non

C

relin-

relinquere. Voluuntur per ora lacrymæ; &, obfirmato animo, non queo dolorem dissimulare, quem patior. Quis crederet in tali illum tempore nostræ necessitudinis recordari, &, luctante anima, studiorum scire dulcedinem? Apprehensa auunculi manu, Hanc, inquit, tunicam, qua utebar in ministerio Christi, mitte dilectissimo mihi, ætate patri, fratri collegio: & quidquid a te nepoti debebatur affectus, in illum transfer, quem mecum pariter diligebas. Atque in talia uerba defecit, auunculi manum mei recordatione contrectans. Scio, quod nolueris amorem in te ciuium sic probare, & affectum patriæ magis quæsisse in prosperis. sed huiusmodi officium in bonis iucundius est, in malis gratius. Tota hunc ciuitas, tota planxit Italia. corpus terra suscepit: anima Christo reddita est. Tu nepotem quærebas, Ecclesia sacerdotē. Præcessit te successor tuus. Quod tu eras, ille post te iudicio omnium merebatur. Atque ita ex una domo duplex pontificatus egressa est dignitas; dum in altero gratulatio est, quod tenuerit; in altero mæror, quod raptus sit, ne teneret. Platonis sententia est, omnem sapientium uitam, meditationem esse mortis. Laudant hoc philosophi, & in cælum usque ferunt. Sed multo fortius Apostolus: Quotidie, inquit, morior per gloriam uestram. Aliud est enim conari, aliud agere; aliud uiuere moriturum, aliud mori uicturum. Ille moriturus est ex gloria, iste moritur semper ad gloriam. Debemus igitur & nos animo præmeditari, quod aliquando futuri sumus, & quod, uelimus nolimus, abesse longius non potest. nam, si non gentos uitæ excederemus annos, ut ante diluuium uiuebat humanum

1. Cor. 15 Gen. 5 genus; & Mathusalem nobis tempora donarentur: tamen nihil esset præterita longitudo, quæ esse desisset. etenim inter eum, qui decem uixit annos, & eum, qui mille, postquam idem uitæ finis aduenerit, & irrefragabilis mortis necessitas; transactum omne tantundem est; nisi quod senex magis onustus peccatorum fasce proficiscitur. Optima quæque dies miseris mortalibus æui, Prima fugit: subeunt morbi, tristisq. senectus, Et labor, & duræ rapit inclementia

tia mortis. Næuius poeta, Pati, inquit, necesse est multa mortalem mala. Vnde & Niobem, quia multum fleuerit, in lapidem, & diuerſas beſtias cōmuratam finxit antiquitas. Et Heſiodus, natales hominum plangens, gaudet in funere. Prudenterq. Ennius, Plebes, ait, in hoc regi anteaſtat loco: licet. Lacrymare plebi, regi honeſte non licet. Vt regi, ſic episcopo, immo minus episcopo, quam regi. ille enim no lentibus præeſt, hic uolentibus: ille terrore ſubiicit, hic ſer uitudi donatur: ille corpora cuſtodit ad mortē, hic animas ſeruat ad uitam. in te oculi omnium diriguntur: domus tua, & conuerſatio, quaſi in ſpecula conſtituta, magiſtra eſt publicæ diſciplinæ. quidquid feceris, id ſibi omnes facien dum putant. Caue, ne committas, quod aut, qui reprehende re uolunt, digne laceraſſe uideantur; aut, qui imitari, co gantur delinquere. Vince, quantum potes, immo plus, quam potes molliſſimam animi tui: & ubertim fluentes lacry mas reprime: ne grandis pietas in nepotem apud incredulaſ mentes deſperatio putetur in Deum. Deſiderandus eſt tibi quaſi abſens, non quaſi mortuus: ut illum expectare, non amiſſiſſe, uidearis. Verum quid ago, medens dolori, quem iam reor & tempore, & ratione ſedatum, ac non po tius replico tibi uicinas regum miſerias, & noſtri temporis calamitates; ut non tam plangendus ſit, qui hac luce carue rit, quam gratulandum ei, qui de tantis malis euaserit? Conſtantius, Arianæ fautor hæreſeos, dum contra inimi cum paratur, & concitus fertur ad pugnam, in Mopſi ui culo moriens, magno dolore hoſti reliquit imperium. Iu lianus, proditor animæ ſuæ, & Chriſtiani iugulator exerci tus, Chriſtum ſenſit in Media, quem primum in Gallia de negarat; dumq. Romanos propagare uult fines, perdidit propagatos. Iouinianus, guſtatis tantum imperialibus bo nis, fetore prunarum ſuffocatus interiit; oſtendens omni bus, quid ſit humana potentia. Valentinianus, uaſtato geni tali ſolo, & inultam patriam derelinquens, uomitu ſangui nis extinctus eſt. Huius germanus Valens, Gothico bello uiſtus in Thracia, eundem locum & mortis habuit, & ſepul

cri. Gratianus ab exercitu suo proditus, & ab obuiis urbibus non receptus, ludibrio hosti fuit; cruentatæq. manus uestigia parietes tui Lugdune testantur. Adolescens Valentinianus, & pene puer, post fugam, post exilia, post recuperatum multo sanguine imperium, haud procul ab urbe fraternæ mortis conscia, necatus est; & cadaver exanime suspendio infamatum. Quid loquar de Procopio, Maximo, Eugenio; qui utique, dum rerum potirentur, terrori gentibus erant? omnes capti steterunt ante ora victorū, & quod potentissimis quōdam miserrimū est, prius ignominia seruiutis, quā hostili mucrone cōfossi sunt. Dicat aliquis: Regū talis cōdicio est; feriuntq. summos fulgura montes. Ad priuatas ueniā dignitates; nec de his loquar, qui biennium excidunt: atque, ut ceteros prætermittam, sufficit nobis triumphus consularium diuersos exitus scribere. Abundantius egens Pityunte exulat. Ruffini caput pilo Constantinopolim gestatum est; & abscissa manus dextera, ad dedecus insatiabilis auaritiæ ostiatim stipem mendicauit. Timasius, præcipitatus repente de altissimo dignitatis gradu, euasisse se putat, quod Assæ uiuit inglorius. Non calamitates miserrorum, sed fragilem humanæ condicionis narro statum. Horret animus temporum nostrorum ruinas persequi. Vixinti, & eo amplius anni sunt, quod inter Constantinopolim, & alpes Iulias quotidie Romanus sanguis effunditur. Scythiam, Thraciam, Macedoniam, Dardaniam, Daciam, Thessalonicam, Achaïam, Epiros, Dalmatiam, cunctasq. Pannonias Gothus, Sarmata, Quadus, Alanus, Hunni, Vuandali, Marcomanni uastant, trahunt, rapiunt. Quot matronæ, quot uirgines Dei, & ingenua nobiliaq. corpora his belluis fuisse ludibrio? Capti episcopi, interfecti presbyteri, et diuersorū officia clericorum; subuersæ ecclesiæ, ad altaria Christi stabulati equi, martyrum effossæ reliquæ. ubique luctus, ubique gemitus, & plurima mortis imago. Romanus orbis ruit; & tamen ceruix nostra erecta non flectitur. Quid putas nunc animi habere Corinthios, Athenienses, Lacedæmonios, Arcadas, cunctamq.

Græ-

Græciam, quibus imperant barbari? Et certe paucas urbes nominavi, in quibus olim fuerere regna non modica. Immanis ab his malis uidebatur oriens, & tantum nunciis consternatus. ecce tibi anno præterito ex ultimis Caucasii rupibus immissi in nos non iam Arabiæ, sed septemtrionis lupi, tantas breui provincias percurrerunt. quot monasteria capta? quantæ fluuiorum aquæ humano cruore mutatæ sunt? obsessa Antiochia, & urbes reliquæ, quas Halis, Cydnus, Orontes, Euphratesq. præterfluunt: tracti greges captiuorum: Arabia, Phœnice, Palæstina, Aegyptus timore captivæ. Non, mihi si linguæ centum sint, oraq. centum, Ferrea uox, Omnia pœnarum percurrere nomina possim. neque enim historiæ proposui scribere, sed nostras breuiter flere miseras. Alioquin ad hæc merito explicanda & Thucydides, & Sallustius muti sint. Felix Nepotianus, qui hæc non uidet; felix, qui hæc non audit. nos miseri, qui aut patimur, aut patientes fratres nostros tanta perspicimus: & tamen uiuere uolumus, eosque, qui his carent, flendos potius, quam beatos, putamus. Olim offensum sentimus, nec placamus Deum. Nostris peccatis barbari sortes sunt. nostris uitiis Romanus superatur exercitus; & quasi nō hæc sufficerent cladibus, plus pene bella ciuilia, quam hostilis mucro consumpsit. Miseri Israelitæ, ad quorum comparisonem Nabuchodonosor seruus Dei dicitur. Infelices nos, qui tantum displicemus Deo, ut per rabiem barbarorum, illius in nos ira defæuiat. Ezechias egit penitentiam, & centum octoginta quinque millia Assyriorum ab uno angelo una nocte deleta sunt. Iosaphat laudes Domini cōcinebat, & Dominus pro laudante superabat. Moyses contra Amalech non gladio, sed oratione pugnauit. Si erigi uolumus, prosternamur. Pro pudor, & ilolida usque ad incredulitatem mens: Romanus exercitus, uictor orbis, & dominus, ab his uincitur, hos pauet, horum terretur aspectu, qui ingredi non ualent; qui si terram tetigerint, se mortuos arbitrantur. Et non intelligimus prophetarum uoces: Fugient: mille uno persequente? Nec amputamus causas morbi, ut

Hier. 29

Esa. 37

2. Para. 17

Exod. 17

Esa. 30

C 3 morbus

morbus pariter auferatur; statimq. cernamus sagittas pilis, tiaras galeis, caballos equis cedere. Excessimus consolandi modum; & dum unius mortem flere prohibemus, totius orbis mortuos planximus. Xerxes ille, rex potentissimus, qui subuertit montes, maria constrauit, cum de sublimi loco infinitam hominum multitudinem, & innumera bilem uidisset exercitum, fletse dicitur, quod post centum annos nullus eorum, quos tunc cernebat, superiturus esset. O si possemus in talem ascendere speculam, de qua uersam terram sub nostris pedibus cerneremus: iam tibi ostenderem totius orbis ruinas, gentes gentibus, & regnis regna collisa; alios torqueri, alios necari; alios absorberi fluctibus, alios ad seruitutem trahi; hic nuptias, ibi planctum; illos nasci, istos mori; alios affluere deliciis, alios mendicare; & non Xerxis tantum exercitum, sed totius mundi homines, qui nunc uiuunt, in breui spatio defuturos. Vincitur sermo rei magnitudine; & minus est omne, quod dicimus. redeamus igitur ad nos; & quasi e celo descendentes, paulisper nostra uideamus. Sentis ne, obsecro te, quando infans, quando puer, quando iuuenis, quando robustæ ætatis, quando senex factus sis? quotidie morimur; quotidie commutamur; & tamen æternos nos esse credimus. hoc ipsum, quod dicto, quod scribitur, quod relego, quod emendo, de uita mea tollitur. quot puncta notarii, tot meorum damna sunt temporum. Scribimus, atque rescribimus: transeunt maria epistolæ; & scindente sulcum cairna, per singulos fluctus ætatis nostræ momenta minuantur. solum habemus luci, quod Christi nobis amore sociamur. Caritas patiens est, benigna est: caritas non zelatur, non agit perperam, non inflatur, omnia sustinet, omnia credit, omnia sperat, omnia patitur. caritas nunquam excidit. hæc semper uiuit in pectore: ob hanc Nepotianus noster absens præsens est, & per tanta terrarum spatia diuisos utraque complectitur manu. Habemus mutæ obsidem caritatis. iungamur spiritu: stringamur affectu; & fortitudinem mentis, quam beatus Papa Chromatius ostendit

1. Cor. 13

ostendit in dormitione germani, nos imitemur in filio . illū
nostra pagella decantet ; illum nostræ litteræ sonent . quem
corpore non ualemus , recordatione teneamus ; & , cum
quo loqui non possumus , de eo loqui numquam desina-
mus .

ARGVMENTVM .

RVSTICVS , natione Gallus , professione monachus erat .
hunc D. Hieronymus docet , quo modo uitam monacho dignam
instituere debeat , & quanto tutius sit in monasterio cum alijs ,
quam in solitudine , illam traducere . Ex hac autem epistola lu-
ce clarius omnes discere possunt , cœnobitarum uitam , & profes-
sionem , vetustissimo , sacroq. instituto , non diabolico inuento ,
sicut blasphemant heretici , in Ecclesiam , qualis hodie est , in-
troducendam .

HIERONIMVS RVSTICO MONACHO
uiuendi formam præscribit .

EPISTOLA IIII .

NIHIL Christiano felicius , cui promittitur regnum
N cœlorum : nihil laboriosius , qui quotidie de uita
periclitatur : nihil fortius , qui uincit diabolum : ni-
hil imbecillius , qui a carne superatur . utriusque rei exem-
pla sunt plurima . Latro credit in cruce , & statim meretur
audire : Amen dico tibi ; hodie mecum eris in paradiso . *Iu Luc. 23.*
das de apostolatus fastigio in proditionis tartarum labitur , *Ioan. 13*
& nec familiaritate conuiuii , nec intinctione bucellæ , nec *Luc. 22*
osculi gratia frangitur ; ne quasi hominem tradat , quem fi-
lium Dei nouerat . Quid Samaritana uilius ? non solum ipsa *Ioan. 4*
credidit , & post sex uiros unū inuenit Dominū , Messiamq.
cognouit ad fontem , quem in templo Iudæorum populus
ignorabat : sed & auctor fit salutis multorum ; & apostolis
ementibus cibos , esurientem reficit , lassumq. sustentat .

C 4 Quid

3. Reg. 11 Quid Salomone sapientius? attramen infatuatur amoribus
 Leuit. 2 mulierum. Bonum est sal, nullumq. sacrificiū absque huius
 Col. 4 aspersione suscipitur. unde & Apostolus præcipit: Sermo
 uester semper in gratia sale sit conditus. Quod si infatua-
 Marc. 9 tur, foras prolicitur: in tantumq. perdit nominis dignita-
 tem, ut ne in sterquilinum quidem utile sit, quo solent cre-
 dentium arua condiri, sterile animarum solum pinguescere.
 Hæc dicimus, ut prima te, fili Rustice, fronte doceamus,
 magna cepisse, & excelsa sectari; & adolescentiæ, immo
 pubertatis incentiua calcantem, perfectæ quidem ætatis gra-
 dum scandere, sed lubricum iter esse, per quod ingrederis;
 nec tantum sequi gloriæ post uictoriam, quantum ignomi-
 niæ post ruinam. Non mihi nunc per uirtutum præta ducen-
 dus est riuulus: nec laborandum, ut ostendam tibi uariorū
 pulchritudinem florum; quid in se lilia habeant puritatis;
 quid rosa uerecundiæ possideat; quid uiole purpura promit-
 tat in regno; quid rutilantium spondeat pictura gemmarū.
 Luc. 9 iam enim, propitio Deo, stitum tenes. iam tectum, atque
 Act. 10 solarium cum Petro Apostolo conscendisti: qui esuriens in
 Iudæis, Cornelii saturatur fide; & famem incredulitatis eo-
 rum, gentium conuersione restinguit; atque in uase euan-
 geliorum quadrangulo, quod de celo descendit ad terram,
 docetur & discit omnes homines posse saluari. rursumq.
 quod uiderat, in specie candidissimi lintheaminis in superna
 transfertur; & credentium turbam de terris ad cælum rapit;
 Mat. 5 ut pollicitatio Domini compleatur: Beati mundo corde;
 quoniam ipsi Deum uidebunt. Totum, quod apprehensa
 manu insinuare tibi cupio, quod quasi doctus nauta post
 multa naufragia rudem conor instruere uictorem, illud est,
 ut, in quo litore pudicitie pirata sit, noueris, ubi Charyb-
 dis & radix omnium malorum auaritia, ubi Scyllæi obtre-
 Gal. 5 ditatorum canes, de quibus Apostolus loquitur: Ne mor-
 dentes inuicem mutuo consumamini: quo modo, in me-
 dia tranquillitate securi, Lybicis interdum uitiorum Syrti-
 bus obruamur; quid uenenatorum animantium desertum
 huius sæculi nutriet. Nauigantes Rubrum mare, in quo
 optandum

optandum nobis est , ut uerus Pharaon cum suo mergatur exercitu , multis difficultatibus ac periculis ad urbem maximam perueniant . utroque in litore gentes uagæ , immo belluæ habitant ferocissimæ . semper solliciti , semper armati totius anni uehunt cibaria . latentibus saxis , uadisq. durissimis plena sunt omnia ; ita ut speculator doctus in summa mali arbore sedeat ; & inde regendæ & circumflectendæ nauis dictata prædicet . Felix cursus est , si post sex menses supradictæ urbis portum teneant , a quo se incipit aperire oceanus : per quem uix anno perpetuo ad Indiam peruenitur , & ad Gangem fluiuium , quem Phison sancta scriptura *Gen. 2.* commemorat , qui circumit totam terram Euidah , & multa genera pigmentorum de paradisi dicitur fonte deuenire . ubi nascitur carbunculus , & smaragdus , & margarita candentia , & uniones , quibus nobilium seminarum ardet ambitio ; montesq. aurei , quos adire , propter gryphas , & dracones , & immanis corporum monstra , hominibus impossibile est : ut ostendatur nobis , quales custodes habeat auaritia . Quorsum ista ? Perspicuum est , si negotiatores sæculi tanta sustinent . ut ad incertas periturasq. diuitias perueniant , & feruent cum animæ discrimine , quæ multis periculis quæsierunt : quid Christi negotiatori faciendum est , qui , uenditis omnibus , quærit pretiosissimum *Matth. 13* margaritum ? qui totis substantiæ suæ opibus erit agrum , in quo reperiat thesaurum , quem nec fur effodere , nec latro possit auferre ? Scio me offensurum esse quamplurimos ; qui generalem de uitis disputationem in suam referunt contumeliam ; & , dum mihi irascuntur , suam indicant conscientiam ; multoq. peius de se , quam de me , iudicant . ego enim neminem nominabo : nec , ueteris comœdæ licentia , certas personas eligam , atque perstringam . Prudentis uiri est , ac prudentium seminarum , dissimulare , immo commendare , quod in se intelligant , & indignari sibi magis , quàm mihi , nec in monitorem maledicta congerere : qui etsi uide teneatur criminibus , certe in eo melior est , quod sua ei mala non placent . Audio religiosam te habere matrem , mul-

torum

torum annorum uiduam; quæ aluit, quæ erudiuit infantem; ac post studia Galliarum, quæ uel florentissima sunt, misit Romam, non parcens sumptibus, & absentiam filii spe sustinens futurorum; ut ubertatem Gallici nitoremque sermonis grauitas Romana condiret; nec calcaribus in te, sed frenis, uteretur: quod & in disertissimis uiris Græciæ legimus; qui Asianum tumorem Attico siccabant sale, & luxuriantes flagellis uineas falcibus reprimebant; ut eloquentiæ torcularia non uerborum pampinis, sed sensuum quasi uuarum expressionibus redundarent. hanc tu suspice, ut parentem; ama, ut nutricem; uenerare, ut sanctam. Nec aliorum imiteris exemplum; qui relinquunt suas, & alienas appetunt: quorum dedecus in propatulo est, sub nominibus pietatis, quærentium suspecta consortia. Noui ego quasdam, iam maturioris ætatis, libertini generis adolescētibz delectari, & filios quærere spirituales, paulatimque pudore superato, ficta matrū nomina erūpere in licentiā maritalē. Aliæ sorores uirgines deserunt, & externis uiduis copulātur. Sunt, quæ oderunt suos, & non suorū palpantur affectu: quarū impatientia, index animi, nullā recipit excusatio nem: & casta pudicitæ uelamenta, quasi araneorum fila dirumpit. Videas nonnullos accinctis renibus, pulla tunica, barba prolixa, a mulieribus non posse discedere; sub eodē manere recto; simul inire conuiuia, ancillas iuuenes habere in ministerio, &, præter uocabulum nuptiarum, omnia esse matrimonii. Nec hæc culpa est Christiani nominis, si simulator religionis in uitio sit: quinimmo cōfusio gentiliū, cum ea uident ecclesiis displicere, quæ omnibus bonis non placent. Tu uero, si monachus esse uis, non uideri, habeto curam, non rei familiaris, cui renunciando, hoc esse cœpisti, sed animæ tuæ. Sordidæ uestes, candidæ mentis indicia sint: uilis tunica contemptum sæculi probet, ita dumtaxat, ne animus tumeat, ne habitus sermoque dissentiant. Balnearum fomenta non quærat, qui calorem corporis iuniorum cupit frigore extinguere. quæ & ipsa moderata sint; ne nimia debilitent stomachū; &, maiorem refectio-
nem

nem poscentia, erumpant in cruditatem; quæ parens libidinum est. Modicus, ac temperatus cibus & carni, & animæ utilis est. Matrem ita uide, ne per illam alias uidere cogaris; quarum uultus cordi tuo hæreant, & tacitum uiuat sub pectore uulnus. Ancillas, quæ illi in obsequio sunt, tibi scias esse in insidiis: quia, quanto uilior earum condicio, tanto facilius est ruina. Et Ioannes Baptista sanctam matrem habuit, pontificisq. filius erat: & tamen nec matris affectu, nec patris opibus uincebatur, ut in domo parentum cum periculo uiueret castitatis. Viuebat in eremo; & oculis desiderantibus Christum, nihil aliud dignabatur aspicere. uestis aspera, zona pellicea, cibus locustæ, melq. siluestre, omnia uirtuti & continentie præparata. Filii propheta-
Luc. 1
Matth. 3
Marc. 1
4. Reg. 6

rum, quos monachos in Veteri testamento legimus, ædificabant sibi casulas propter fluentia Iordanis, & turbis urbium derelictis, polenta & herbis agrestibus uicabant. Quamdiu in patria tua es; habeto cellulam pro paratiō; uaria scripturarum poma decerpe; his utere deliciis; harum fruiere complexu. Si scandalizat te oculus, pes, manus; proice ea. Nulli parcas, ut soli parcas animæ. Qui uiderit, inquit Dominus, mulierem ad concupiscendum eam, iam mæchatus est eam in corde suo. Qui is gloriabitur, castum se habere cor? Astra non sunt munda in conspectu Domini: quāto magis homines, quorum uita tentatio est? Væ nobis, qui, quoties concupiscimus, toties fornicamur. Inebriatus est, inquit, gladius meus in cælo; multo amplius in terra, quæ spinas & tribulos generat. Vas electionis, in cuius ore Christus resonabat, macerat corpus suum, & subiicit seruituti, & tamen cernit naturalem carnis ardorem suæ repugnare sententiæ, ut, quod non uult, hoc agere compellatur; & quasi uim patiens, uociferatur, & dicit: Miser ego homo, quis me liberabit de corpore mortis huius? Et tu te arbitraris absque lapsu, & uulnere posse transire, nisi omni custodia seruaueris cor tuum, & cum saluatore dixeris: Mater mea, & fratres mei hi sunt, qui faciunt uoluntatem patris mei? Crudelitas ista, pietas est. Immo
Matth. 5
Iob 25
Esa. 34
1. Cor. 9
Rom. 7
Prou. 4
Luc. 8
quid

quid tam pium, quam sanctæ matri sanctum filium custodi
 re? Optat & illa te uiuere, & non uidere ad tempus, ut
1. Reg. 1 semper cum Christo uideat. Anna Samuelem non sibi, sed
Hier. 35 tabernaculo genuit. Filii Ionadab, qui uinum, & siceram
 non bibebant, qui habitabant in tentoriis, &, quas nox
Psal. 77 compulerat, sedes habebant, scribuntur in psalmo, quod
 primi captiuitatem sustinuerint, qui ab exercitu Chaldæo-
 rum, uastante Iudæam, urbes introire compulsi sunt. Vi-
 derint, quid alii sentiant. unusquisque enim suo sensu du-
 citur. mihi opidum carcer, & solitudo paradisu est. Quid
 desideramus urbium frequentiam, qui de singularitate cen-
 semur? *Exod. 2. 3* Moyses, ut præficeret populo Iudæorum, quadra-
 ginta annis eruditur in eremo: pastor ouium, hominum fa-
Luc. 5 ctus est pastor Apostoli de piscatione lacus ad Genesareth,
 ad piscationem hominum transierunt. Qui tunc habentes
Matth. 4 patrem, rete, nauiculam, secuti Dominum protinus om-
 nia reliquerunt, portantes quotidie crucem suam, & ne
Matth. 10 uirgam quidem in manu habentes. Hæc dico, ut, etiam si
 clericatus te titillat desiderium, discas quod possis docere,
 & rationabilem hostiam offeras Christo; ne miles ante,
 quam tiro, ne prius magister sis, quam discipulus. Non est
 humilitatis meæ, neque mensuræ, iudicare de clericis, &
 de ministris ecclesiarum finistrum quippiam dicere. habe-
 ant illi ordinem, & gradum suum: quem si tenueris, quo
 modo tibi in eo uiuendum sit, editus ad Nepotianum liber
 docere te poterit. Nunc monachi incunabula, moresq.
 discutimus, & eius monachi, qui, liberalibus studiis eru-
 ditus in adolescentia, iugum Christi collo suo imposuit. Pri-
 mumq. tractandum est, utrum solus, an cum aliis in mona-
 sterio uiuere debeas. Mihi quidem placet, ut habeas san-
 ctorum contubernium: nec ipse te doceas, & absque docto-
 re ingrediaris uiam, quam numquam ingressus es; statimq.
 tibi in partem alteram declinandum sit, & errori pateas;
 plusq. aut minus ambules, quam necesse est: ne aut currens
 lassieris; aut, moram faciens, obdormias. In solitudine si-
 to subrepat superbia: et, si parumper ieiunauerit, homi-
 nemq.

nemq. non uiderit, putat se alicuius esse momenti: obli-
tusq. sui, unde, & quo uenerit, intus corde, lingua foris
uagatur. Iudicat contra Apostoli uoluntatem alienos ser- *Rom. 14*
uos: quo gula uoluerit, porrigit manum: dormit, quan-
tum uoluerit: nullum ueretur: facit quod uoluerit: omnes
inferiores se putat: crebriusq. in urbibus, quam in cellula,
est: & inter fratres simulat uerecundiam, qui platearum tur-
bis colliditur. Quid igitur? solitariam uitam reprehendi-
mus? Minime, quippe quam sæpe laudauimus: sed de lu-
do monasteriorum, huiuscemodi uolumus egredi milites,
quos eremi dura rudimenta non terreant; qui specimē con-
uersationis suæ multo tempore dederint; qui omnium fue-
rint minimi, ut primi omnium fierent; quos nec esuries a-
liquando, nec saturitas superauit; qui paupertate lætantur;
quorum habitus, sermo, uultus, incessus, doctrina uirtu-
tum est; qui nesciunt, secundum quosdam ineptos homi-
nes, dæmonum pugnantium contra se portenta confinge-
re; ut apud imperitos & uulgi homines miraculum sui fa-
ciant, & exinde lucra sectentur. Vidimus nuper, & plan-
ximus, Cræsi opes unius morte deprehensas, urbisq. sti-
pes, quasi in usus pauperum, congregatas, stirpi & poste-
ris derelictas. Tunc ferrum, quod latebat in profundo, su- *4. Reg. 6*
pernatuuit aquæ; & inter palmarum arbores, myrrhæ ama- *Exod. 15*
ritudo monstrata est. Nec mirum: talem & socium, & ma-
gistrum habuit: qui egentium famem suas fecit esse diuitias
& miseris derelicta in suam reseruauit miseriam. quorum
clamor tandem peruenit ad cælum, & patientissimas Dei
uicit aures; ut missus angelus pessimus, Nabal Carmelo *1. Reg. 25*
diceret: Stulte, hac nocte auferent animam tuam a te: quæ *Luc. 12*
autē præparasti, cuius erunt? Volo ergo te, & propter cau-
sas, quas supra exposui, non habitare cum matre; & præci-
pue, ne aut offerentē delicatos cibos, renuendo contristes;
aut, si acceperis, oleū igni adiicias, & inter frequentia puel-
larum per diem uideas, quod nocte cogites. Numquā de
manu & oculis tuis recedat liber: discatur psalterium ad
uerbum; oratio sine intermissione, uigil sensus sit, nec ua-
nis

nis cogitationibus patens. Corpus pariter & animus tendatur ad Dominum. Iram uince patientia. Ama scientiam scripturarum; & carnis uitia non amabis. Nec uacet mens tua uariis perturbationibus: quæ si pectori insederint, dominabuntur tui, & te deducunt ad delictum maximum. Facito

Psal. 18

aliquid operis; ut te semper diabolus inueniat occupatum.

1. Cor. 4

Si apostoli, habentes potestatem de euangelio uiuere, laborabant manibus suis, ne quem grauarent; & aliis tribuebant refrigeria, quorum pro spiritualibus debebant metere carnalia: cur tu in usus tuos cessura non prepares? uel fiscellam texe iunco, uel canistrum lentis plecte uiminibus: sarriatur humus: areolæ æquo limite diuidantur: in quibus cum olerum iacta fuerint semina, uel plantæ per ordinem positæ, aquæ ducantur irriguæ; ut pulcherrimorum uersuum spectator assistas. Ecce supercilio cliuosi tramitis undam

Elicit: illa cadens raucum per læuia murmur Saxa ciet, scatebrisq. arentia temperat arua. Inferantur infructuosæ arbores uel gemmis, uel surculis: ut paruo post tempore laboris tui dulcia poma decerpas. Apum fabricare aluearia, ad quas te mittunt Solomonis proueria; & monasteriorum ordinem, ac regiam disciplinam, in paruis discere corporibus. Texantur & lina capiendis piscibus: scribantur libri: ut & manus operetur cibum, & animus lectione saturetur.

Ecl. 11

In desideriis est omnis otiosus. Aegyptiorum monasteria hunc morem tenent, ut nullum absque operis labore suscipiant, non tam propter uictus necessitatem, quam propter animæ salute. Ne uagetur perniciosis cogitationibus mens, & instar fornicantis Hierusalē, omni transeunti diuaricet pedes suos. Dum essem iuuenis, & solitudinis me deserta uallarent; incentiua uitiorum, ardoremq. naturæ ferre non poteram: quem cum crebris ieiuniis frangerem, mens tamen cogitationibus æstuabat. ad quam edomandam, cuidam fratri, qui ex Hebræis crediderat, me in disciplinam dedi; ut post Quinctiliani acumina, Ciceronis fluuios, grauitatemq. Frontonis, & lenitatem Plinii, alphabetum discerem, & stridentia anhelantiaq. uerba meditarer. Quid

Exech. 16

ibi

ibi laboris insumpserim, quid sustinuerim difficultatis, quoties desperauerim, quotiesq. cessauerim, & contentione discendi rursus inceperim; testis est conscientia tam mea, qui passus sum, quam eorum, qui mecum duxerunt uitam. & gratias ago Domino, quod de amaro semine litterarum dulces fructus carpo. Dicam & aliud, quod in Aegypto uiderim. Græcus adolescens erat in cœnobio, qui nulla abstinentia, nulla operis magnitudine, flammam poterat carnis extinguere. hunc periclitantem pater monasterii hac arte seruauit. Imperat cuidam uiro graui, ut iurgiis atque contumeliis infestaretur hominem, & post irrogatam iniuriam, primus ueniret ad querimoniam. Vocati testes pro eo loquebantur, qui contumeliam fecerat. flere ille contra mendacium: nullus alius credere ueritati: solus pater defensionem suam callide opponere; ne abundantiori tristitia absorberetur frater. quid multa? ita annus ductus est: quo expleto, interrogatus adolescens super cogitationibus pristinis, an adhuc molestiæ aliquid sustineret, Papæ, inquit: uiuere mihi non licet, & fornicari libeat? Hic si solus fuisset, quo adiutore superasset? Philosophi sæculi solent amorem ueterem amore nouo, quasi clauum clauo, expellere. quod & Asuero regi septem principes fecere Persarum, ut Vasthi reginæ desiderium aliarum puellarum amore compescerent. illi uitium uitio, peccatumq. peccato medicantur: nos amore uirtutum uitia superemus. Declina, ait, a malo, & fac bonum: quære pacem, & persequere eam. Nisi oderimus malum, bonum amare non possumus. quin potius faciendum est bonum, ut declinemus a malo. Pax quærenda, ut bella fugiamus. nec sufficit eam quærere, nisi inuentam fugientemq. omni studio persequamur, quæ exuperat omnem sensum, in qua habitatio Dei est, dicente propheta: Et factus est in pace locus eius. Pulchreq. persecutio pacis dicitur, iuxta illud Apostoli: Hospitalitatem persequentes, ut non leui uisitatoq. sermone, & ut ita loquar, summis labiis hospites inuitemus, sed toto mentis ardore teneamus, quasi offerentes se cum lucro nostro,

atque

Hest. 1.2

Psal. 30

Philip. 4

Psal. 65

Rom. 12

atque cōpendio . Nulla ars absque magistro discitur . Etiam muta animalia , & ferarum greges , ductores sequuntur suos . In apibus principes sunt . Grues unam sequuntur ordine literato . imperator unus , iudex unus prouinciæ . Roma , ut condita est , duos fratres simul habere reges non potuit ,

Gen. 25 & parricidio dedicatur . In Rebecca utero Esau , & Iacob bella gesserunt . Singuli ecclesiarum episcopi , singuli archipresbyteri , singuli archidiaconi , et omnis ordo ecclesiasticus suis rectoribus nititur . In naui unus gubernator : in domo unus dominus : in quāuis grandi exercitu , unius signū expectatur . Et , ne plura replicādo fastidium legenti faciā ; per hæc omnia ad illud tendit oratio , ut doceam te non tuo arbitrio dimittendum , sed uiuere debere in monasterio sub unius disciplina patris , consortioq. multorum ; ut ab alio discas humilitatem , ab alio patientiam ; hic te silentium , ille doceat mansuetudinem ; non facias quod uis ; comedas , quod iuberis ; uestiire , quod acceperis ; operis tui pensum persoluas ; subiiciaris cui non uis ; lassius ad stratum uenias , ambulansq. dormites , & , necdum expleto somno , surgere compellaris . Dicas psalmum in ordine tuo , in quo non dulcedo uocis , sed mentis affectus queritur , dicente Apostolo :

1. Cor. 14 Psallam spiritu , psallam & mente : Et , Cantantes

Eph. 5 in cordibus uestris Domino . Legerat enim esse præceptū ,

Psal. 46 Psallite sapienter . Seruias fratribus , hospitum laues pedes : passus iniuriam taceas : præpositum monasterii timeas ut dominum , diligas ut parentē . Credas tibi salutare , quidquid ille præceperit ; nec de maiorum sententia iudices , cuius officii est obedire , & implere quæ iussa sunt , dicente

Deut. 6 Moyse : Audi Israel , & tace . Tantus negotiis occupatus , nullis uacabis cogitationibus ; & , dum ab alio transis ad aliud , opusq. succedit operi , illud solum mente tenebis , quod agere compelleris . Vidi ego quosdam , qui , postquam renunciauere sæculo , uestimentis dūtaxat , & uocis professione , non rebus , nihil de pristina conuersatione mutarunt . res familiaris magis aucta , quam imminuta . eadem ministeria seruulorum , idem apparatus conuiuii . in uitro , & patella

patella fictili aurū comeditur : & inter turbas & examina ministrorum , nomen sibi vindicant solitarii . qui uero pauperes sunt , & tenui substantiola , uidenturq. sibi scioli ; pomparum ferculis similes procedunt in publicum , ut caninam exercoant faciundiam . Alii , sublati in altum humeris , & intra se nescio quid cornicantes , stupentibusq. in terram oculis , tumentia uerba trutinantur ; ut , si præconem addideris , putes incedere præfecturam . Sunt , qui humore cellarum , immoderatisq. ieiuniis , tædio solitudinis , ac nimia lectione , dum diebus ac noctibus auribus suis personant , uertuntur in melancholiam , & Hippocratis magis fomentis , quam nostris monitis , indigent . Plerique artibus , & negotiationibus pristinis carere non possunt ; mutatisq. nominibus institutorum , eadem exercent commercia , non uictum & uestitum , quod Apostolus præcipit , sed maiora , 1. Tim. 6 quam sæculi homines , emolumenta sectantes : & prius quidem ab ædilibus , quos ἀγοράνομοι Græci appellant , uendentium coerceretur rabies , nec erat impune peccatum : nunc autem sub religionis titulo exercentur iniusta compendia ; & honor nominis Christiani , fraudem magis facit , quā patitur . quodq. pudet dicere , sed necesse est ; ut saltem sic ad nostrum erubescamus dedectis ; publice extendentes manus , pannis aurum tegimus ; & contra omnium opinionē , plenis sacculis morimur diuites , qui quasi pauperes uiuimus . Tibi , cum in monasterio fueris , hæc facere non licebit ; & , inolescente paulatim consuetudine , quod primum cogebaris , uelle incipies ; & delectabit te labor tuus ; oblitusq. præteritorum , semper priora sectaberis , nequaquam considerans , quid alii mali faciant , sed quid boni tu facere debeas . Neque uero peccantium ducaris multitudine ; & te pereuntium turba sollicitet ; ut tacitus cogites : Quid ? ergo omnes peribunt , qui in urbibus habitant ? ecce illi fruuntur suis rebus , ministrant ecclesiis ; adeunt balneas ; unguenta non spernunt ; & tamen in omnium ore uersantur . Ad quod & ante respondi , & nunc breuiter respondeo ; me in præsentī opusculo non de clericis disputare , sed monachum

D chum

chum instituire, Sancti sunt clerici, & omnium uita laudabilis. Ita ergo age, & uiue in monasterio, ut clericus esse merearis: ut adolescentiam tuam nulla sorde commacules; ut ad altare Christi, quasi de thalamo uirgo, procedas, & habes deforis bonum testimonium; feminæq. nomen tuum nouerint, & uultum tuum nesciant. Cum ad perfectam ætatem ueneris; si tamen uita comes fuerit, & te uel populus, uel pontifex ciuitatis in clerum elegerit: agito, quæ clerici sunt; & inter ipsos sectare meliores: quia in omni cōdictione, & gradu optimis mixta sunt pessima. Ne ad scribendū cito prosilias, & leui ducaris insania. multo tempore disce, quod doceas. Ne credas laudatoribus tuis; immo irrisoribus aurem ne libenter accommodes: qui, cum te adulationibus fouerint, & quodam modo impotem mentis effecerint; si subito respexeris, aut ciconiarum deprehendēs post te colla curuari, aut manu auriculas agitari asini, aut æstuantem canis protendi linguam. Nulli detrahas; nec in eo te sanctum putes, si ceteros laceres. Accusamus sæpe, quod facimus; & contra nosmet ipsos disertī, in nostra uitia inuehimur, muti de eloquentibus iudicantes. Testudineo Grunnius incedebat ad loquendum gradu; & per interualla quædam uix pauca uerba carpebat; ut eum putares singultire, non proloqui. & tamen cum, mensa posita, librorum exposuisset struem, adducto supercilio, contractisq. naribus, ac fronte rugata, duobus digitulis cōcrepabat, hoc signo ad audiendum discipulos prouocans. tum nugas meras fundere, & aduersum singulos declamare. Creticum diceres esse Longinum, censoremq. Romanæ facundię. notare quem uellet, & de senatu doctorum excludere. hic bene nummatu, plus placebat in prandis. Nec mirum, si, qui multos inescare solitus erat, facto cuneo circumstrepentium garrulorum procedebat in publicum, intus Nero, foris Cato; totus ambiguus; ut ex contrariis diuersisq. naturis unum mōstrum nouamq. bestiam diceres esse compactam, iuxta illud poeticum: Prima leo, postrema draco, media ipsa Chimæra. Numquam ergo tales uideas; nec huiusmodi homini-

minibus appliceris ; nec declines cor tuum in uerba malitiæ , *Psal. 49*
 & audias : Sedens aduersus fratrem tuum loquebaris , & ad- *Psal. 56*
 uersus filium matris tuæ ponebas scandalum . Et iterum :
 Filii hominum , dentes eorum arma , & sagittæ . Et alibi :
 Moliti sunt sermones eius super oleum , & ipsi sunt iacula . *Psal. 54*
 Et apertius in Ecclesiaste : Sicut mordet serpens in silentio , *Eccl. 10*
 sic , qui fratri suo occulte detrahit . Sed dices : ipse non detra-
 ho ; aliis loquentibus , quid facere possum ? Ad excusandas
 excusationes in peccatis ista prætendimus . Christus arte nõ
 illuditur . nequaquam mea , sed Apostoli sententia est : No- *Gal. 6*
 lite errare : Deus nõ irridetur . Ille in corde , nos uidemus in
 facie . Solomon loquitur in prouerbiiis : Ventus aquilo dis- *Prou. 25*
 sipat nubes , & uultus tristis linguas detrahentium . Sicut
 enim sagitta , si mittatur contra duram materiam , nonnum-
 quam in mittentem reuertitur , & uulnerat uulneratorem , il-
 ludq. completur : Facti sunt mihi in arcum prauum : Et ali- *Ose. 7*
 bi : Qui mittit in altum lapidem , recidet in caput eius : ita *Eccl. 27*
 detractor , cum tristem faciem uiderit audientis , inimo ne au-
 dientis quidem , sed obturantis aures suas , ne audiat iudici-
 um sanguinis , illico conticescit , pallet uultus , hærent la-
 bia , salua siccatur . unde idem uir sapiens , Cum detractori *Prou. 24*
 bus , inquit , ne miscearis : quoniam repente ueniet perdi-
 tio eorum , & ruinam utriusque quis nouit ? tam scilicet eius ,
 qui loquitur , quam illius , qui audit loquentem . Veritas
 angulos non amat , nec querit susurriones . Timotheo dici-
 tur : Aduersum presbyterum accusationem cito ne recepe- *1. Tim. 5*
 ris . Peccantem autem coram omnibus argue ; ut & ceteri
 metum habeant . Non est facile de prouecta ætate creden-
 dum , quam & uita præterita defendit , & honorat uocabu-
 lum dignitatis ; uerum , quia homines sumus ; & interdum
 contra annorum maturitatem , puerorum uitiiis labimur : si
 me uis corrigere delinquentem , aperte increpa , tantum ne
 occulte mordeas . Corripiet me iustus in misericordia , & *Psal. 140*
 increpabit . Oleum autem peccatoris non impinguet caput
 meum . Quem enim diligit Dominus , corripit ; castigat au *Hebr. 12*
 tem omnem filium , quem recipit . Et per Esaiam clamat

D 2 Dominus :

- Esa. 3** Dominus : Populus meus, qui beatos uos dicunt, seducit uos, & semitas pedum uestrorum supplantant. quid enim mihi prodest, si aliis mala referas mea? si, me nesciente, peccatis meis, immo detractionibus tuis alium uulneres; & cum certum omnibus narres, sic singulis loquaris, quasi nulli dixeris alteri? hoc est, non me emendare, sed uitio tuo
- Matth. 18** satisfacere. Præcipit Dominus, peccantes in os argui debere secreto, uel adhibito teste, & si audire noluerint, referri ad Ecclesiam, habendosq. in malo pertinaces, sicut ethnicos, & publicanos. Hæc expressius loquor, ut adolescentem meum & linguæ, & aurium prurigne liberem; ut renatum in Christo, sine ruga & macula, quasi pudicam uirginem, exhibeam, castam tam mente, quam corpore: ne solo nomine gloriatur, & absque oleo bonorum operum,
- 2. Cor. 11** extincta lampade, excludatur a sponso. Habes istuc sanctum, doctissimumq. pontificem Proculum; qui uiua & præsentis uoce nostras schedulas superet, quotidianisq. tractatibus iter tuum dirigat; nec patiat te, in partem alteram
- Num. 20** declinando, uiam relinquere regiam, per quam Israel ad terram repromissionis properans, se transiturum esse promittit. Atque utinam exaudiat uox Ecclesiæ implorantis: Domine, pacem tuam da nobis. omnia enim dedisti nobis. Utinam, quod renunciamus sæculo, uoluntas sit, non necessitas; & paupertas habeat expetita gloriam, non illata cruciatum. Ceterum iuxta miseras huius temporis, et ubique gladios sæuietes, satis diues est, qui pane non indiget. Nimium potens est, qui seruire non cogitur. Sanctus Exuperius, Tolosæ episcopus, uiduæ Sareptensis imitator, esuriens pascit alios; & ore pallente ieiuniis, fame torquetur aliena: omnemq. substantiam Christi uisceribus erogauit. Nihil illo ditius, qui corpus Domini canistro uimineo, sanguinem portat in uitro; qui auaritiam eiecit e templo; qui absque funiculo, & increpatione, cathedras uendentium columbas, idest dona sancti spiritus, mensasq. subuertit mamonæ, & numulariorum æra disperfit; ut domus Dei, domus uocetur orationis, & non latronum spelunca. Huius

tu e

tu è uicino sectare uestigia, & ceterorum, qui uirtutum illius similes sunt, quos sacerdotium & humiliores facit, & pauperes: aut, si perfecta desideras, exi cum Abraham de *Gen. 12* patria, & cognatione tua, & perge, quo nescis. Si habes substantiam, uende, & da pauperibus: si non habes, grandi onere liberatus es: nudum Christum nudus sequere. durum, grande, difficile; sed magna sunt præmia.

ARGVMENTVM.

LAVDAT Florentium Hierosolymæ degentem, quod multorum pauperum necessitatibus subuenerit: & quia huic epistola alteram, quæ erat ad Ruffinum, reddendam iunxerat, Ruffini etiam laudes admiscet.

HIERONYMVS AD FLORENTIVM.

EPISTOLA V.

VANTVS beatitudinis tuæ rumor diuersa popu-
 Q lorum ora compleuerit, hinc poteris æstimare, quod ego te ante incipio amare, quam nosse. Ut enim ait Apostolus, quorundam hominum peccata manifesta sunt, præcedentia ad iudicium: ita e contrario tuæ dilectionis fama dispergitur, ut non tam laudandus sit ille, qui te amat, quam scelus putetur facere ille, qui non amat. Prætermitto innumerabiles, in quibus Christum sustentasti, paupisti, uestisti, uisitasti. Heliodori fratris a te adiuta necessitas, mutorum etiam potest ora laxare. quibus gratiis, quo ille præconio peregrinationis incommoda a te fota referebat? ita ut ego ille tardissimus, quem intolerabilis languor uexat, pennatis, ut aiunt, pedibus, certe caritate & uoto te salutauerim, & etiam complexus sim. Gratulor itaque tibi; & nascentem amicitiam ut Dominus confedere rare dignetur, precor. Et, quia frater Ruffinus, qui cum sancta Melania ab Aegypto Hierosolymam uenisse narratur,

D 3 individua

individa mihi germanitatis caritate connexus est: quæso, ut epistolam meam, huic epistolæ tuæ copulatam, ei redde re non graueris. Noli nos eius æstimare uirtutibus. in illo conspicias expressa sanctitatis uestigia: & ego cinis, & uilissi ma pars luti, & iam fauilla, dum uertor, satis habeo, si splendorem morum illius imbecillitas oculorum meorum ferre sustineat. Ille modo se lauit, & mundus est, & tam quam nix dealbatus: ego, cunctis peccatorum sordibus inquinatus, diebus ac noctibus opperor cum tremore redde re nonissimum quadrantem. sed tamen, quia Dominus soluit compeditos; & super humilem et tementem uerba sua, requiescit, forsitan & mihi, in sepulcro scelerum iacenti, dicat: Hieronymus, ueni foras. Sanctus presbyter Eua grius plurimum te salutat: & Martinianum fratrem iuncto salutamus obsequio: quem ego uidere desiderans, catena languoris innector.

Psal. 50

Matth. 5

Psal. 145

Esa. 66

ARGUMENTVM.

SCRIBIT ad eundem Florentium, eius litteris respon dens; petitq. ab eo libros quosdam, offerens ipse interea, quas habebat, de sua bibliotheca.

HIERONYMVS AD FLORENTIVM.

EPISTOLA VI.

I Nea mihi parte eremi commoranti, quæ iuxta Syriam Saracenis iungitur, dilectionis tuæ scripta per lata sunt. quibus lectis, ita redaccensus est animus Hierosolimam proficiscendi, ut pene nocuerit proposito, quod profuerat caritati. Nunc igitur, quo modo ualeo, pro me tibi litteras repræsentor: etsi corpore absens, amore ta men & spiritu uenio, impendio exposcens, ne nascentes amicitias, quæ Christi glutino cohæserunt, aut temporis, aut locorum magnitudo diuellat, quin potius fœderemus eas

cas reciprocis epistolis. illæ inter nos currant, illæ sibi ob-
 uient, illæ nobiscum loquantur. Non multum perditura
 erit caritas, si tali secum sermone fabuletur. Ruffinus au-
 tem frater, ut scribis, necdum uenit; & si uenerit, non
 multum proderit desiderio meo, cum eum iam uisurus non
 sim. ita enim & ille longo intervallo separatus est, ut huc
 nō possit excurrere: & ego arreptæ solitudinis terminis ar-
 ceor, ut coeperit iam mihi non licere, quod uolui. Ob hoc
 & ego obsecro, & tu ut petas; plurimum quaeso, ut tibi
 beati Rhetii, Augustudunensis episcopi, commentarios
 ad describendum largiatur, in quibus Canticum canticorū
 sublimiori sensu ille differuit. Scripsit mihi & quidam de pa-
 tria supradicti fratris Ruffini, Paulus senex, Tertulliani su-
 um codicem apud eum esse, quem uehementer reposcit.
 & ex hoc, quaeso, ut eos libros, quos me non habere bre-
 uis subditus edocebit, librarii manu in charta scribi iubeas.
 Interpretationem quoque psalmorum Dauidicorū, & pro-
 lixum ualde librum de synodis sancti Hilarii, quem ei apud
 Treuiros manu mea ipse descripseram, æque ut mihi trans-
 feras peto. Nosti hoc esse Christianæ animæ pabulum, si in
 lege Domini meditetur die ac nocte. Ceteros hōspitio reci *Psalm.*
 pis, solatio foues, sumptibus iuuas. Mihi, si rogata præsti-
 teris, cuncta largitus es. Et quoniam, largiente Domino,
 multis sacræ bibliothecæ codicibus abundamus; impera ui-
 cissim; & quodcumque uis, mittam. nec putes mihi gra-
 ue esse, si iubeas. habeo alumnos, qui antiquariæ arti ser-
 uiunt. Neque uero beneficium pro eo, quod polliceor, pos-
 tulo. Heliodorus frater mihi indicauit, te multa de scriptu-
 ris quaerere, nec sic inuenire. aut, si omnia habes, incipit
 sibi plus caritas uindicare, plus petere. Magistrum autem
 pueri tui, de quo dignatus es scribere; quem plagiatorem
 eius esse, non dubium est; sæpe Euagrius presbyter, dum
 adhuc Antiochiæ essem, me præsentem corripuit. cui ille re-
 spondit: Ego nihil timeo. Dicit se a Domino suo fuisse di-
 missum: & si uobis placet, ecce hic est, transmittite quo-
 uultis: in hoc arbitror me non peccare, si hominem uagum

D 4 nos

non sinam longius fugere. Quapropter, quia ego, in hac solitudine constitutus, non possum agere quod iussisti; rogaui carissimum mihi Euagrium, ut tam tui, quam mei causa instanter negotium prosequatur.

ARGVMENTVM.

PAVLA uetula genuerat Toxotium, & Eustochium. Toxotius Letam duxit uxorem: ex eoq. coniugio orta est Paula puella. hanc Paula auia uirginitati destinarat. Docet nunc D. Hieronymus Letam uiduam, quo modo instituere filiam debeat: rogansq. ut propere in Bethlehem ad auiam Paulam, & Eustochium amitam illam mittat: se nutricium, & magistrum parula futurum pollicetur.

HIERONYMVS AD LAETAM
de institutione filiae.

EPISTOLA VII.

2. Cor. 7

POSTOLVS Paulus, scribens ad Corinthios,
A & rudem Christi Ecclesiam sacris instruens disciplinis, inter cetera mandata hoc quoque proposuit, dicens: Si qua mulier habet uirum infidelem, & hic consentit habitare cum ea, non dimittat uirum. Sanctificatus est enim uir infidelis per mulierem fidelem: & sanctificata est mulier infidelis per uirum fidelem. alioqui filii uestri immundi essent, nunc autem mundi sunt. Si cui forte hactenus uidebantur nimium disciplinae uincula laxata, & praecipua indulgentia praceptoris; consideret domum patris tui, clarissimi quidem & eruditissimi uiri, sed adhuc ambulantis in tenebris: & intelliget consilium Apostoli illuc profecisse, ut radices amaritudinis dulcedo fructuum compensaret; & uiles uirgulae balsama pretiosa sudarent. Tu es nata de impari matrimonio; & de te, & Toxotio meo Paula generata est. Quis hoc crederet, ut Albini pontificis neptis de repromissione
martyris

martyris nasceretur? ut, presente & gaudente auo, paru-
læ adhuc lingua balbutiens, Christi Alleluia resonaret? ut
uirginem Christi in suo gremio nutrirer senex? Et bene, fe-
liciterq. expectauimus. Sancta & fidelis domus uirum san-
ctificat infidelem. Iam candidatus est fidei, quem filiorum
& nepotum credens turba circumdat. Ego puto, etiã ipsum
Iouem, si habuisset talem cognationem, potuisse in Chri-
stum credere. Despuat, licet, & irrideat epistolam meam,
& me uel stultum, uel insanum clamitet: hoc & gener eius
faciebat ante quam crederet. Fiunt, non nascuntur Chri-
stiani. Auratum squalet Capitolium. fuligine, & aranearũ
telis omnia Romæ templa cooperta sunt. mouetur urbs
sedibus suis: & inundans populus ante delubra semiruta,
currit ad martyrum tumulos. si non extorquet fidem pru-
dentia, extorqueat saltem uerecundia. Hoc, Læta, religio
sissima in Christo filia, dictum sit, ut non desperes parentis
salutem, & eadem fide, qua meruisti filiã, & patrẽ recipias,
totiusq. domus beatitudine perfruaris, sciẽs illud a Domino
repromissum: Quæ apud homines impossibilia, apud Deũ *Matth. 19*
possibilia sunt. Numquã est sera conuersio. Latro de cruce *Luo. 23*
trãsiit in paradysum; Nabuchodonosor, rex Babylonis, post *Dan. 4*
efferationẽ corporis, & cordis, & belluarũ in eremo conui-
ctum, mentem recepit humanam. Et, ut omittam uetera;
ne apud incredulos nimis fabulosa uideantur; ante paucos
annos propinquus uester Gracchus, nobilitatem patriciam
sonans nomine, cum præfecturam gereret urbanam, non-
ne specum Mithræ, & omnia portentuosã simulacra, quĩ-
bus Corax, Niphus, Miles, Leo, Perseus, Helios, Bromius
pater initiantur, subuertit, fregit, exussit, & his quasi ob-
sidibus ante præmissis, impetrauit baptismum Christi? So-
litudinem patitur & in urbe gentilitas. dñi quondam natio-
num cum bubonibus & noctuis in solis culminibus remãse-
runt, uexilla militum, crucis insignia sunt. Regum purpu-
ras, & ardentes diadematum gemmas, patibuli salutaris pi-
ctura condecorat. Iam & Aegyptius Seraphis Christianus
factus est. Marnas Gazæ luget inclusus, & euerfionem tem-
pli

pli iugiter pertrémiscit. De India, Perside, Aethiopia monachorum quotidie turmas suscipimus. Deposuit pharetras Armenius. Hunni discunt psalterium: Scythiae frigora feruent calore fidei: Getarum rutilus & flauus exercitus, ecclesiarum circumfert tentoria; & ideo forsitan contra nos aequa pugnant acie, quia pari religione confidunt. Pene lapsus sum ad aliam materiam; &, currente rota, dum urceum facere cogito, amphoram finxit manus. propositum enim mihi erat, sanctae Marcellae & tuis precibus inuitatum, ad matrem, id est, ad te sermonem dirigere, & docere, quo modo instituere Paulam nostram debeas; quae prius Christo consecrata est, quam genita; quam ante uotis, quam utero, concepisti. Vidimus aliquid temporibus nostris de prophetalibus libris. Anna sterilitatem alui, fecunditate mutauit. tu lucuosam fecunditatem, uitalibus libris commutasti. Fidens *Exod. 13* loquor, accepturam te filios, quae primum fetum Domino reddidisti. Ista sunt primogenita, quae offeruntur in lege. *Iud. 13* Sic natus est Samuel: sic ortus Sampson est: sic Ioannes Baptista *Luc. 1* ad introitum Mariae exultauit, & luse. Audiebat enim uerba Domini, per os uirginis pertonantis: & de utero matris in occursum eius gettebat erumpere. Igitur, quae de re promissione nata est, dignam habeat ortu suo institutionem parentum. Samuel nutritur in templo, Ioannes in solitudine praeparatur. ille sacro crine uenerabilis est, uinum & ficeram non bibit: adhuc paruulus cum Domino fermocinatur. hic fugit urbes; zona pellicea cingitur; locustis alitur, ac melle siluestri; &, in typum penitentiae praedicandae, tortuosissimi animalis uestitur exuiis. Sic erudienda est anima, quae futura est templum Dei. Nihil aliud discat audire, nihil loqui, nisi quod ad timorem Dei pertinet. Turpia uerba non intelligat, cantica mundi ignoret. adhuc tenera lingua psalmis dulcibus imbuatur. Procul sit aetas lasciuia puerorum: ipse puellae, & pedisequae a saecularibus confortis arceantur; ne, quod male didicerint, peius doceant. Fiant ei litterae uel buxae, uel eburnae, & suis nominibus appellentur. Indat in eis; ut & lusus ipse eruditio sit. & non solum

solum ordinem teneat litterarum, ut memoria nomini-
um in canticum transeat; sed & ipse inter se crebro ordo turbe-
tur, & mediis ultima, primis media misceantur; ut eas non
sono tantum, sed & visu nouerit. Cum uero creperit tre-
menti manu stylum in cera ducere; uel alterius superposita
manu teneri regantur articuli; uel in tabula sculpantur ele-
menta; ut per eosdem sulcos inclusa marginibus trahantur
uestigia, ut foras non queant enagari. Syllabas iungat ad pre-
mium, & quibus illa ætas deliniri potest, munusculis inui-
tetur. Habeat & in discendo socias, quibus inuideat, qua-
rum laudibus mordeatur. Non obiurganda est, si tardior sit:
sed laudibus excitandum est ingenium; ut & uicisse gaudeat,
& uicta doleat. Cauendum in primis, ne oderit studia: ne ama-
ritudo eorum, præcepta in infantia, ultra rudes annos tran-
seat. Ipsa nomina, per quæ consuecit paulatim uerba cõte-
xere, non sint fortuita, sed certa, & coaceruata de industria,
prophetarum uidelicet, atque apostolorum; & omnis ab
Adam patriarcharum series, de Matthæo Lucaque descendat; *Matth. 3*
ut, dum aliud agit, futuræ memoriæ præparetur. Magister *Luc. 3*
probæ ætatis, & uitæ, atque eruditionis est eligendus: nec,
puto, erubescet uir doctus id facere in propinqua, uel nobi-
li uirgine, quod Aristoteles fecit in Philippi filio, ut ipse li-
brariorum uilitate initia traderet litterarum. Non sunt con-
temnenda quasi parua, sine quibus magna constare non pos-
sunt. Ipse elementorum sonus, & prima institutio præ-
ceptorum aliter de erudito, aliter de rustico ore profertur.
unde & tibi est prouidendum, ne ineptis blanditiis femina-
rum, dimidiata dicere uerba filia consuecat, & in auro atque
purpura ludere: quorum alterum linguæ, alterum moribus
officit: ne discat in tenero, quod ei postea dediscendum
est. Gracchorum eloquentiæ multum ab infantia sermo ma-
tris contulisse scribitur. Hortensii oratio inter paternos si-
nus coaluit. Difficulus eraditur, quod rudes animi perbi-
berunt. Ianarum conchylia quis in pristinum candorem
reuocet? Recens testa diu & saporem retinet, & odorem,
quo primum imbuta est. Græca narrat historia, Alexan-
drum,

drum, potentissimum regem, orbisq. dominorem, & in moribus, & in incessu, Leonidis pædagogus sui non potuisset carere uitis, quibus adhuc paruulus fuerat infectus. Procliuis est enim malorum æmulatio; & quorū uirtutes assequi nequeas, cito imitaris uitia. Nutrix ipsa non sit temulenta, non lasciuia, non garrula: habeat modestam regulam, nutricium grauem. cum auum uiderit, in petus eius transiliat; de collo pendeat; nolenti, Alleluia, decantet. Rapiat eam auia: patrem risibus agnoscat: sit omnibus amabilis: & uniuersa propinquitas rosam ex se natam gaudeat. Discat statim, quam habeat & alteram auiam, quam amitam; cui imperatori, cui exercitui tiruncula nutriatur: illas desideret, ad illas tibi minetur abscessum. Ipse habitus & uestitus doceat eam, cui promissa sit. Caue, ne aures eius perfores: ne cerussa & purpurisso consecrata Christo ora depingas: nec collum auro & margaritis premas: nec caput gemmis oneres; nec capillum irrufes, & ei aliquid de gehennæ ignibus auspiceris. ha
Matth. 13 beat alias margaritas, quibus postea uenditis, emptura est pretiosissimum margaritum. Prætextata, nobilissima quondam femina, iubente uiro Hymettio, qui patruus Eustochii uirginis fuit, habitum eius cultumq. mutauit; & neglectum crinem mundano more texuit sibi, uincere cupiens & uirginis propositum, & matris desiderium: & ecce tibi eadem nocte cernit in somnis uenisse ad se angelum, terribili uoce minitantem poenas, & hæc uerba frangentem: Tu ne ausa es uiri imperiū præferre Christo? tu caput uirginis Dei, tuis sacrilegis attrectare manibus? quæ iam nunc are-scent; ut sentias excruciatam quid feceris; & finito mense quinto, ad inferna duceris. sin autem perseveraueris in scelere; & marito simul orbaberis, & filiis. Omnia per ordinem expleta sunt; & seram miseræ penitentiam uelox signauit interitus. Sic ulciscitur Christus uiolatores templi sui, sic gemmas & pretiosissima ornamenta defendit. Et hoc retuli, non quod insultare uelim calamitatibus infeliciū; sed ut moneam, cum quanto metu, & cautione ser-
uare

uare debeas; quod Deo spondidisti. Heli sacerdos offendit *1. Reg. 2*
 Deum ob uitia liberorum. Episcopus fieri non potest, qui *1. Tim. 3*
 filios habuerit luxuriosos; non subditos. At e contrario de
 muliere scribitur, quod salua fiet per filiorum generatio- *1. Tim. 2*
 nem, si permanserit in fide, & caritate, & sanctificatione
 cum pudicitia. Si perfecta ætas, & sui iuris, imputatur pa-
 rentibus: quanto magis lactens, & fragilis, quæ, iuxta sen-
 tentiam Domini, ignorat dextram, & sinistram, idest, bo- *Ioan. 4*
 ni, & mali differentiam? Si sollicita prouides, ne filia per-
 gatiatur a uipera: cur non eadem cura prouideas, ne feriat-
 ur a malleo uniuersæ terræ? ne bibat de aureo calice Baby *Hier. 50. 51*
 lonis? ne egrediatur cum Dina, & uelit uidere filias regio- *Gen. 34*
 nis alienæ? ne ludat pedibus, ne trahat tunicas? Venena non
 dantur, nisi melle circūlita: & uitia non decipiunt, nisi sub
 specie umbraque uirtutum. Et quo modo, inquires, peccata *Exech. 18*
 patrium filiis non redduntur, nec filiorum parentibus,
 sed anima, quæ peccauerit, ipsa morietur? Hoc de iis di-
 citur, qui possunt sapere, de quibus in euangelio scriptum
 est: Aetatem habet, loquatur pro se. qui autem paruulus *Ioan. 19*
 est, & sapit ut paruulus, donec ad annos sapientiæ ueniat,
 & Pythagoræ littera Y eum perducatur ad biuium; tam bo-
 na eius, quam mala, parentibus imputantur. Nisi forte exi-
 stimas, Christianorum filios, si baptisma non receperint,
 ipsos tantum reos esse peccati, & non etiam scelus referri
 ad eos, qui dare noluerint, maxime eo tempore, quo con-
 tradicere non poterant qui accepturi erant: sicut e regione
 salus infantum, maiorum lucrum est. Offerre, necne, fi-
 liam, potestatis tuæ fuit: quamquam alia sit tua condicio,
 quæ prius eam uouisti, quam conciperes: ut autem obla-
 tam non negligas, ad periculum tuum pertinet. Qui clau-
 dam, & mutilam, & qualibet sorde maculatam obtulerit *Leuit. 21*
 hostiam, sacrilegii reus est: quanto magis, qui partem cor-
 poris sui, & illibate animæ puritatem regis amplexibus pa-
 rat, si negligens fuerit, punietur? Postquam grandiuscula
 esse cœperit, & in exemplum sponsi sui crescere sapientia; *Luc. 2*
 ætate, & gratia apud Deum, & homines; pergat ad templū

ueri

- ueri patris cum parentibus suis; sed cum illis non egredia-
tur e templo. Querant eam in itinere sæculi inter turbas &
frequentiam propinquorum, & nusquam alibi reperiant,
nisi in adyto scripturarum, prophetas & apostolos de spi-
ritualibus nuptiis sciscitantem. Imitetur Mariam, quam
Gabriel solam in cubiculo suo reperit: & ideo forsitan timo-
re perterrita est, quia uirum, quem non solebat, aspexit.
- Psal. 44* Aemuletur eam, de qua dicitur: Omnis gloria eius filiæ re-
gis ab intus. Loquatur & ipsa electo, caritatis iaculo uulne-
rata: Introduxit me rex in cubiculum suum. Numquam
exeat foras; ne inueniant eam, qui circumeunt ciuitatem;
ne percutiant, & uulnerent, & auferant theristrum pudici-
tiæ, & nudam in sanguine derelinquant: quin potius, cum
- Cant. 6. & 5* aliquis ostium eius pulsauerit, dicat: Ego murus, & ube-
ra mea turre: laui pedes meos, non possum inquinare eos.
Non uescatur in publico, idest, in parentum conuiuio; ne
uideat cibos, quos desideret. Et licet quidam putent maio-
ris esse uirtutis, præsentem contemnere uoluptatem: ta-
men ego arbitror securioris continentie esse, nescire quod
quæras. Legi quoddam in scholis puer: Aegre reprehendas,
quod finis consuescere. Discat iam nunc & uinum non
- Eph. 5* bibere, in quo est luxuria. Ante annos robustæ ætatis, pe-
riculosa est teneris grauis abstinencia: usque ad id tempus,
si necessitas postulauerit, & balneas adeat, & uino utatur
- 1. Tim. 5* modico propter stomachum, & carnum edulio sustentetur,
ne prius deficiant pedes, quam currere incipiant. Et hoc
dico iuxta indulgentiam, non iuxta imperium, timens
debilitatem, non docens luxuriam. alioquin, quod Iudaica
- Leuit. 11* superstitio ex parte facit in reiectione quorundam anima-
lium, atque escarum, quod & Indorum Brachmani, & Ae-
gyptiorum Gymnosophistæ in polenta, & orizæ, & po-
morum solo obseruant cibo, cur uirgo Christi non faciat in
toto? Si tanti uitium, quare non maioris sit pretij margari-
tum? Quæ nata est ex promissione, sic uiuat, ut illi uixe-
runt, qui de repromissione generati sunt. æqua gratia æ-
quum habeat & laborem. Surda sit ad organa. tibia, lyra,
cithara,

cithara, cur facta sint, nesciat. Reddat tibi pensum quoti-
die, de scripturarum floribus carptum. Ediscat Græcorum
uersuum numerum. Sequatur statim & Latina eruditio:
quæ si non ab initio os tenerum composuerit; in peregri-
num sonum lingua corrumpitur; & externis uitiis sermo pa-
trius sordidatur. Te habeat magistram; te rudis miretur in
fantia. Nihil in te & in patre suo uideat, quod si fecerit, pec-
cet. Mementote uos parentes uirginis, magis eam exem-
plis doceri posse, quam uoce. Cito flores pereunt: cito
uiolas, & lilium, & crocum pestilens aura corrumpit. Nus-
quam absque te procedat in publicum, basilicas martyrum,
& ecclesias sine matre non adeat. Nullus ei iuuenis, nullus
cincinnatus arrideat. Vigiliarum dies, & sollemnes perno-
ctationes sic uirguncula nostra celebret, ut ne transuersum
quidem unguem a matre discedat. Nolo, de ancillis suis
aliquam plus diligat, cuius crebro auribus insusurret, quid
quid uni loquitur, hoc omnes sciant. Placeat ei comes, non
compta, neque formosa, atque lasciuia, quæ liquido gut-
ture carmen dulce moduletur, sed grauis, pallens, sordi-
data, subtristis. Præponatur ei probæ fidei, ac morum
& pudicitæ uirgo ueterana, quæ illam doceat, & assuescat
exemplo ad orationes & psalmos nocte consurgere, mane
hymnos canere, tertia, sexta, nona hora stare in acie quasi
bellatricem Christi, accensaq. lucerna reddere sacrificium
uespertinum. sic dies transeat, sic nox inueniat laborantem.
orationi lectio, lectioni succedat oratio. breue uidebitur
tempus, quod tantis operum uarietatibus occupatur.
Discat & lanam facere, tenere colum, ponere in gremio ca-
lathum, rotare fustum, stamina pollice ducere. Spernat bom-
bycum telas, Serum uellera, & aurum in fila lentescens. ta-
lia uestimenta paret, quibus pellatur frigus, non quibus ue-
stita corpora nudentur. Cibus eius olusculum sit, & simi-
la, raroq. pisciculi. Et, ne gulæ præcepta longius traham;
de quibus in alio loco plenius sum locutus; sic comedat, ut
semper esuriat; ut statim post cibum possit legere, orare,
& psallere. Displicent mihi, in teneris maxime ætatibus,
longa

longa & immoderata ieiunia, in quibus iunguntur hebdomades, oleum in cibo, ac poma uetantur. Experimento didici, asellum in uia, cum lassus fuerit, diuerticula quære. Faciant hoc cultores Isis, & Cybeles, qui gulosa abstinentia Phasides aues, ac fumantes turtures uorant, ne scilicet cerealia dona contaminent. Hoc in perpetuo ieiunio sit præceptum, ut longo itineri uires perperes superent; ne in prima mansione currentes, in mediis corruamus. Ceterum, ut ante scripsi, in quadragesima continentiae uelapandenda sunt, & tota aurigæ retinacula equis laxanda properantibus. quamquam alia sit condicio sæcularium, alia uirginum, & monachorum. Sæcularis homo in quadragesima uentris ingluuiem decoquit; & in cochlearum morem succo uicitans suo, futuris dapibus ac saginæ aqualiculum parat. Virgo, & monachus sic in quadragesima suos dimittant equos, ut sibi meminerint semper esse currendum. finitus labor maior, infinitus moderatior est. ibi enim respiramus, hic perpetuo incedimus. Si quando ad suburbana pergis, domi filiam non relinquis: nesciat sine te, nec possit uiuere: & cum sola fuerit, pertimescat. Non habeat colloquia sæcularium, & malarum uirginum contubernia. Non intersit nuptiis seruulorum, neque familiaris perstreptentis lusibus misceatur. Scio præcepisse quosdam, ne uirgo Christi cum eunuchis lauet, nec cum maritatis feminis; quia alii non deponant animos uirorum, alia timentibus uteris præferant foeditatem. mihi omnino in adulta uirgine lauacra displicent: quæ se ipsam debet erubescere, & nudam uidere non posse. si enim uigiliis, & ieiuniis macerat copus suum, & in seruitutem redigit; si flammam libidinis, & incerta feruentis ætatis extinguere cupit continentis frigore; si appetitis sordibus turpare fellinat naturalem pulchritudinem: cur e contrario balnearum fomentis sopitos ignes suscitatur? Pro gemmis, & serico diuinis codices amet; in quibus non auri, & pellis Babylonice uermiculata pictura, sed ad fidem placeat emendata, & erudita distinctio. Discat primo psalterium, his se canticis auo
cet

cet, & in prouerbiis Salomonis erudiatur ad uitam. In Ec-
clesiaſte conſueſcat, quæ mundi ſunt, calcare. In Iob uirtu-
tis & patientiæ exempla ſectetur. Ad Euangelia tranſeat,
numquam ea poſitura de manibus. Apoſtolorum Acta &
Epiſtolas tota cordis imbibat uolūtate. Cumq. peſtoris ſui
cellarium his opibus locupletauerit, mandet memoriæ Pro-
phetas, Heptateuchum, & Regum & Paralipomenon li-
bros, Eſdræ quoque & Heſter uolumina. Ad ultimum, ſi-
ne periculo diſcat Canticum canticorum; ne, ſi in exordio
legerit, ſub carnalibus uerbis ſpiritualium nuptiarum epi-
thalamium non intelligens, uulneretur. Caueat omnia a-
pocrypha, &, ſi quando ea non ad dogmatum ueritatem,
ſed ad ſignorum reuerentiam legere uoluerit; ſciat non eo-
rum eſſe, quorum titulis prænotantur, multaq. his admi-
xta uicioſa, & grandis eſſe prudentiæ, aurum in luto quære-
re. Cypriani opuscula ſemper in manu teneat. Athanaſii
epiſtolas, & Hilarii libros inoffenſo decurrat pede. illorum
tractatibus, illorum delectetur ingeniis, in quorum libris
pietas fidei non uacillet: ceteros ſic legat, ut magis iudicet,
quam ſequatur. Reſpondebis: Quo modo hæc omnia
mulier ſæcularis, in tanta frequentia hominum, Romæ cu-
ſtodire poterit? Noli ergo ſubire onus, quod ferre non po-
tes; ſed, poſtquam ablaſtaueris eam cum Iſaac, & uestie-
ris cum Samuele, mitte aux, & amitæ. Redde pretioſiſſi-
mam gemmam cubiculo Mariæ, & cunis Ieſu uagientis im-
pone. Nutriatur in monaſterio; ſit inter uirginum choros:
iurare non diſcat; mentiri ſacrilegium putet: neſciat ſæcu-
lum; uiuat angelice: ſit in carne ſine carne; omne hominū
genus ſui ſimile putet. Et, ut cetera taceā; certe te liberet
ſeruādi difficultate, & cuſtodix periculo. Melius tibi eſt de-
ſiderare abſentē, quam pauere ad ſingula, quid loquatur,
cū quo loquatur, cui annuat, quem libenter aſpiciat. Trade
Euſtochio paruulā, cuius nunc & ipſe uagitus pro te oratio
eſt. trade comitē ſanctitatis, futura heredem. illam uideat;
illam amet; illam primis miretur ab annis, cuius & ſermo,
& inceſſus, & habitus doctrina uirtutum eſt. Sit in gremio
E aux;

Gen. 28

1. Reg. 2

auix; quæ repetat in nepte, quidquid præmisit in filia; quæ longo usu didicit nutrire, seruare, docere uirgines; in cuius coronam centenarii quotidie numeri castitas textitur. Felix uirgo, felix Paula Toxotii, quæ per auix, amitæq. uirtutes nobilior est sanctitate, quam genere. O si tibi contingeret uidere socrum, & cognatam tuam, & in paruis corpusculis ingentes animos intueri: pro insita tibi pudicitia nō ambigerem, quin præcederes filiam, & primam Dei sententiā secunda euangelii lege mutares: nec tu parui penderes aliorum desideria liberorum, sed te ipsam magis offerres Deo.

Zeels. 3 Sed quia tempus est amplexandi, & tempus longe fieri a
1. Cor. 7 complexibus; & uxor non habet potestatem corporis sui; & unusquisque, in qua uocatione uocatus est, in ea permaneat in Domino; & qui sub iugo est, ita debet currere, ne in luto comitem derelinquat: totum redde in sobole, quod
1. Reg. 1 in te interim distulisti. Anna filium, quem Deo uouerat, postquam obtulit in tabernaculo, numquam recepit, inde cens arbitrata, ut futurus propheta in eius domo cresceret, quæ adhuc alios filios habere cupiebat. Denique, postquā concepit, & peperit, non est ausa ad templum accedere, & uacua apparere coram Domino, nisi prius redderet, quod debebat: taliq. immolato sacrificio, reuersa domum, quinque liberos sibi genuit, quia primogenitum Deo pepererat. Miraris felicitatem sanctæ mulieris? imitare fidem. ipse, si Paulam miseris, & magistrum me, & nutricium spondeo. gestabo humeris, balbutientia senex uerba formabo, multo gloriosior mundi philosopho, qui non regem Macedonum, Babylonio periturum ueneno, sed ancillam & sponsam Christi erudiam, regnis cælestibus offerendam.

ARCV.

ARGVMENTVM.

HIERONYMVS, a Iuliana matre, & Proba ania rogatus, Demetriadem uirginem docet, quo modo uiuere, & uirginitatem custodire debeat.

AD DEMETRIADEM,
de seruanda uirginitate.

EPISTOLA VIII.

I NTER omnes materias, quas ab adolescentia usque ad hanc ætatem, uel mea, uel notariorum scripti manu, nihil præsentī opere difficilius. scripturus enim ad Demetriadem, uirginem Christi, quæ & nobilitate, & diuitiis prima est in orbe Romano, si cuncta uirtutibus eius congrua dixerō, adulari putabor: si quædam subtraxero, ne incredibilia uideantur, damnum laudibus eius mea faciet uerecundia. quid igitur faciam? quod implere non possum, negare non audeo: tanta est auxilii eius, & matris, insignium feminarum, in iubendo auctoritas, in petendo fides, in extorquendo perseverantia. neque enim ut nouum & præcipuum quiddam a me flagitant, cuius ingenium in huiusmodi materiis sæpe detritum est; sed ne uocis meæ pro uirili parte desit testimonium in eius uirtutibus explicandis, cuius, ut inclyti oratoris utar sententia, spes magis laudanda, quam res, est. quamquam puellares annos fidei ardore superarit; & inde cœperit, ubi aliis defuisse, perfectæ consummatæq; uirtutis est. Sit procul obtreptatio. faceat inuidia. nullum in ambitione sit crimen. ignoti ad ignotam scribimus, dumtaxat iuxta faciem corporalem, alioquin interior homo pulchre sibi cognitus est, illa notitia, qua & Paulus apostolus Colossenses, multosq; credentium nouerat, quos ante non uiderat. Quantum sit apud me meritum, immo miraculum uirginis nostræ, hinc

E 2 potest

æstimari, quod occupatus in explanatione templi Ezechie
 lis, quod opus in omnibus scripturis sanctis uel difficillimū
 est, & in ea parte delubri, in qua sancta sanctorum, & thy
 miamatis altare describitur, malui parumper hoc uti diuer
 ticulo, ut de altari transirem ad altare, & hostiam uiuam,
 placentem Deo, ac sine ulla macula, æternæ pudicitie con
 secrarem. Scio, quod ad imprecationem pontificis, flam
 meum uirginale, sanctū operuerit caput: & illud Apосто
 licæ uocis insigne celebratum sit: Volo autem uos omnes
 2. Cor. 12 uirginem castam exhibere Christo. Quando astitit regina a
 Psal. 44 dextris eius, in uestitu deaurato, circumdata uarietate. Qua
 Gen. 37 ueste polymita, & multarum uirtutum diuersitate contexta,
 Cant. 1 indutus fuit & Ioseph, & regum quondam utebantur filie.
 Psal. 44 Vnde & ipsa sponsa lætatur, ac dicit: Introduxit me rex in
 cubiculum suum. Sodaliumq. respondet chorus: Omnis glo
 ria filie regis intrinsecus. Sed & nostra oratio dabit aliquid
 emolumenti. Equorum cursus fauore perniciosior fit. pug
 ilum fortitudo clamoribus incitatur: paratas ad prælium
 acies, strictosq. mucrones, sermo imperatoris accendit. Igi
 tur & in opere præsentis auiæ quidē, materq. plantauerunt:
 sed & nos rigabimus; & Dominus incrementū dabit. Rhe
 torum disciplina est, ab auis, & atauis, & omni retro nobi
 litate ornare, quem laudes: ut ramorum sterilitatem radix
 fecunda compenset; &, quod in fructu non teneas, mire
 ris in trunco. Scilicet nunc mihi Proborum, & Olybriorū
 clara repetenda sunt nomina, & illustres Anicii sanguinis ge
 nus; in quo aut nullus, aut rarus est, qui non meruerit con
 sultatum. aut proferendus Olybrius uirginis nostræ pater;
 quem, immatura morte subtractum, Roma congenuit.
 Vereor plura dicere; ne sanctæ matris uulnus exasperem;
 & uirtutum eius recordatio, fiat doloris instauratio. Pius
 filius, uir amabilis, clemens dominus, ciuis affabilis, con
 sul quidem in pueritia, sed morū bonitate senator illustrior.
 Felix morte sua, qui non uidit patriam corruentem: im
 mo felicior sobole, qui Demetriadis proauæ nobilitatem
 insigniorem reddidit, Demetriadis filie perpetua castitate.
 Verum

Verum quid ago? oblitus propofiti, dum admiror iuuenē,
 laudauī aliquid bonorū ſæcularium; cū in eo mihi uirgo ma-
 gis noſtra laudanda ſit, quod hæc uniuerſa contempſerit;
 quod ſe non nobilē, non diuitiis præpollentē, ſed hominem
 cogitarit. Incredibilis animi fortitudo, inter gemmas & ſe-
 ricum, inter eunuchorum & puellarum cateruas, & adula-
 tionem ac miniſteria familiæ perſtrepētis, & exquisitas epu-
 las, quas amplæ domus præbebat abundantia, appetiſſe
 eam ieiuniorum laborem, aſperitatem uestium, uictus con-
 tinentiam. legerat enim Domini uerba dicentis: Qui mol
 libus uestiuntur, in domibus regum ſunt. Stupebat ad con-
 uerſationem Helix, & Ioannis Baptiſtæ: quorum uterque
 zona pellicea aſtrinxit & mortificauit lumbos ſuos: alter
 ueniſſe narratur in ſpiritu, & uirtute Helix, præcurſor Do-
 mini, in utero prophetans parentis, & ante diem iudicii iu-
 dicis uoce laudatus. Annæ filiæ Phauelis mirabatur ardo-
 rem, quæ orationibus atque ieiuniis uſque ad ultimam ſe-
 nectutem in templo Domino ſeruiebat. Quattuor uirginū
 filiarum Philippi deſiderabat chorum; & unam ſe illarum
 eſſe cupiebat, quæ pudicitia uirginali, prophetiæ gratiam
 conſecutæ ſunt. His, & huiuſcemodi cogitationibus paſce-
 bat animum, nihil ita metuens, quam auiam, matremq.
 offendere. quarum cum incitaretur exemplo, uoluntate,
 & ſtudiis terrebat; non quo diſpliceret eis ſanctum pro-
 poſitum; ſed quod, pro rei magnitudine, optare id, & ap-
 petere non auderent. Actiuaſſe Chriſti tiruncula: oderat
 ornatum ſuum: & cum Heſter loquebatur ad Dominum: Heſt. 2. 19
 Tu noſti, quod oderim inſigne capitis mei; hoc eſt, diade-
 ma, quo utebatur quaſi regina; & tantæ ducam immundi-
 tiæ, uelut pannum menſtruatæ. Aiunt ſanctæ & nobiles
 femine, quæ eam uiderunt, quæ norunt, quas de litore
 Galliarum ad habitationem ſanctorum locorum, hoſtium
 per Africam compulſit ſæua tempeſtas, noſtibus & ſecreto,
 conſciis tantum uirginibus Dei, quæ in matris, & auix
 comitatu erant, numquam eam lintheaminum, num-
 quam plumarum uſam mollitiæ, ſed cilicium in nuda

¶ 3 humo

humo habuisse pro stratu; iugibus faciem rigasse lacrymis; saluatoris mente genibus aduolutam; ut suum reciperet propositum; ut impleret desiderium; ut auix animum matrisq. molliret. Quid ultra differo? cum iam nuptiarum appropinquaret dies, & futuro matrimonio thalamus pararetur; secreto, & absque arbitris, noctemq. habens pro solatio, talibus se fertur armasse consiliis: Quid agis Demetrias? cur pudicitiam tanto pauore defendis? libertate opus est, & audacia. quæ sic in pace metuis, quid faceres in martyrio perpetiundo? quæ tuorum uultum ferre non potes, quo modo sustineres tribunalia persecutorum? si te uirorum exempla non prouocant; hortetur, faciatq. securam beata martyr Agnes; quæ & ætatem uicit, & tyrannum; & titulum castitatis, martyrio consecrauit. Nescis misera, nescis, cui uirginitatem tuam debeas. Dudum inter barbaras tremuisti manus; auix, matrisq. sinu, & palli tegebaris. uidisti te captiuam, & pudicitiam tuam non tue potestatis: horruisti truces hostium uultus: raptas uirgines Dei, gemitu tacito conspexisti. urbs tua, quondam orbis caput, Romani populi sepulcrum est; & tu in Libyco litoris exulem uirum exul ipsa accipies? quam habitura pronubam? quo deducenda comitatu? Stridor Punicæ linguæ procacia tibi Fescennina cantabit. Rumpe moras omnes.

1. Ioan. 4

Eph. 6

Perfecta Dei dilectio foras mittit timorem. Assume scutum fidei, lorica iustitiæ, galeam salutis: procede ad prælium. Habet & pudicitia seruata martyrium suum. Quid metuis auiam? quid formidas parentem? forsitan & ipse uelint, quod te uelle non credunt. His, & aliis compluribus inflammata stimulis, omnem corporis cultum, & habitum sæcularem, quasi propositi sui impedimenta. proiecit. Pretiosa monilia, & graues sensibus uniones, ardentesq. gemmæ, redduntur seriniis: uili tunica induitur, uiliori tegitur pallio: & insperata auix genibus repente prouoluitur; fle tu tantum, & planctibus, quæ esset, ostendit. Obstupuit sancta & grauis femina, alienum habitum in nepte conspiciens. mater gaudio stabat attonita. utraque uerum non credere

credere, quod uerum esse cupiebat. hæsit uox faucibus; & inter ruborem, & pallorem, metumque, atque lætitiā, cogitationes uariæ nutabant. Succumbendum est huic loco; neque narrare aggrediar, quod dicendo minus faciam. Ad explicandam incredibilis gaudii magnitudinem & Tulliani fluuius siccaretur ingenii; & contortæ Demosthenis, uibratæq. sententiæ, tardius, languidiussq. ferrentur. Quidquid potest cogitare animus, quidquid sermo potest explicare, illo in tempore factum est. Certatim in oscula neptis, & filix mater, & ania ruunt. ubertim flere præ gaudio, iacentem manu attollere, amplexariq. trepidantem: agnoscere in illius proposito mentem suam, & gratulari, quod nobilem familiam uirgo uirginitate sua nobiliorem faceret: inuenisse eam, quod præstaret generi, quod Romanæ urbis cineres mitigaret. Iesu bone, quid illud in tota domo exultationis fuit? Quasi ex radice secunda multæ simul uirgines pullularunt: exemplumq. patronæ, & dominæ secuta est clientum turba, atque famularum. Per omnes domos ferebat uirginitatis professio: quarum cum impar esset in carne condicio, unum erat præmium castitatis. parum loquor. Cunctæ per Africam ecclesiæ quodam exultauere tripudio. non solum ad urbes, opida, uiculosq. sed ad ipsa quoque magalia celebris fama penetrauit. omnes inter Africam, Italiamq. insulæ hoc rumore repletæ sunt, & inoffenso pede longius gaudia cucurrere. Tunc lugubres uestes Italiæ mutauit; & semiruta urbis Romæ mœnia, pristinum ex parte recepere fulgorem, propitium sibi existimantes Deum in alumnæ conuersione perfecta. Putares extinctam Gothorum manum, & colluiem persugarum atque seruatorum Domini desuper intonantis fulmine cœcidisse. Nō sic post Trebiam, Trasymenum, & Cannas, in quibus locis Romanorum exercituum cæsa sunt millia, Marcelli primum apud Nolam prælio se populus Romanus erexit. minori prius gaudio strata Gallorum agmina, auro redempta nobilitas, & seminarium Romani generis in arce cognouit. Penetrauit hic rumor orientis litora; & in mediterraneis quoque

urbibus Christianæ gloriæ triumphus auditus est. Quæ uirginum Christi non huius se societate iactauit? quæ mater non tuum, Iuliana, beatum clamauit uterum? Incerta apud infideles sint præmia futurorum. plus interim recepiſti uirgo, quam obtuliſti. Quam ſponſam hominis una tantum prouincia nouerat, uirginem Christi totus orbis audiuit. Solent miſeri parentes, & non plenæ fidei Chriſtiani, deformes, & aliquo membro debiles filias, quia dignos generos non inueniunt, uirginitati tradere. Tanti, ut dicitur, uitrum, quanti margaritum? Certe, qui religioſiores ſibi uidentur, paruo ſumptu, & qui uix ad alimenta ſufficiat, uirginibus dato, omnem cenſum in utroque ſexu ſæcularibus liberis largiuntur. quod nuper in hac urbe diues quidam fecit preſbyter; ut duas filias in propoſito uirginali inopes relinqueret; & aliorum ad omnem copiam filiorum luxuriæ, atque deliciis prouideret. fecerunt hoc multæ, pro dolor, noſtri propoſiti feminæ: atque utinam rarum eſſet exemplum: quod quanto crebrius eſt, tanto iſtæ feliciores, quæ ne plurimarum quidem exempla ſecutæ ſunt. Fertur, & omnium Chriſtianorum laude celebratur, quidquid fuerat nuptiis præparatum, a ſancta Chriſti Sinoride uirgini traditum, ne ſponſo fieret iniuria; immo ut dotata priſtinis opibus ueniret ad ſponſum; &, quod in rebus mundi perituum erat, domesticorum Dei ſuſtenteret inopiam. Quis hoc credat? Proba illa, omnium dignitatum, & cunctæ nobilitatis in orbe Romano nomen illuſtrius, cuius ſanctitas, & in uniuerſos effuſa bonitas etiam apud barbaros nenerabilis fuit, quam trium liberorum, Prohini, Olybrii, & Probi, non fatigarunt ordinarii conſulatus; & cum, incenſis direptiſq. domibus, in urbe captiuitas ſit, nunc habitas uenundare dicitur poſſeſſiones, & facere ſibi amicos de iniquo mæmmona, qui ſe recipiant in æterna tabernacula; ut erubeſcant omnis eccleſiaſtici miniſterii gradus, & caſſa nomina monachorum emere prædia, tanta nobilitate uendente. Vix barbarorum eſſugerat manus; & auulſas de complexu ſuo uirgines fleuerat; cum ſubito intolerabili, quod numquam

Enc. 16

numquam timuerat, amantissimi filii orbitate percutitur;
 & quasi futura uirginis Christi auia, spe futurorum morti-
 ferum uulnus excepit; probans in se uerum esse, quod in ly-
 rico carmine super iusti præconio dicitur: Si fractus illaba-
 tur orbis, Impavidum ferient ruinae. Legimus in uolumi-
 ne Iob: Adhuc isto loquente, uenit alius nūcius. Et in eo- **Iob 1.7**
 dem: Tentatio, siue, ut melius habetur in Hebræo, mili-
 tia, est uita hominis super terrā. Ad hoc enim laboramus,
 & in sæculi huius periclitamur militia, ut in futuro sæculo
 coronemur. Nec mirum hoc de hominibus credere, cum
 Dominus ipse tentatus sit. Et de Abraham scriptura testa- **Matth. 4**
 tur, quod Deus tentauerit eum. Quam ob causam & Apo- **Gen. 22**
 stolus loquitur: Gaudentes in tribulatione, scientes, quod **Rom. 5**
 tribulatio patientiam operatur, patientia probationem,
 probatio spem, spes autem non confundit. Et in alio lo-
 co: Quis nos separabit a caritate Christi? tribulatio, an **Rom. 8**
 angustia? an persecutio? an fames? an nuditas? an pe-
 riculum? an gladius? sicut scriptum est: Quia propter
 te mortificamur tota die, æstimati sumus, ut oues occi-
 sionis. Et Esaias huiuscemodi homines cohortatur, di- **Esa. 28**
 cens: Qui ablactati estis a lacte, qui auulsi ab ubere, tribu-
 lationem super tribulationem expectate, spem super spē.
 Non sunt condignæ passionēs huius temporis ad futuram **Rom. 8**
 gloriam, quæ reuelabitur in nobis. Cur ista replicaue-
 rim, sequens sermo monstrabit. Quæ de medio mari fu-
 mantem uiderat patriam, & fragili cymbæ salutem suam
 suorumq. commiserat, crudeliora inuenit Africæ litora.
 Excipitur enim ab eo, quem nescias, utrū auarior, an cru-
 delior fuerit: cui nihil dulce præter uinum, & pretium: &
 qui, sub occasione partium clementissimi principis, seui-
 simus omnium exitit tyrannorum; & ut aliquid loquar de
 fabulis poëtarum, quasi Orcus in tartaro, non tricipitem,
 sed multorū capitum habuit Cerberū, qui cuncta traheret,
 ac laceraret. Hic matrū gremiis abducere pactas; negotiato-
 ribus & auidissimis mortalium Syris, nobilium puellarum
 nuptias uendere; non pupillarum, non uiduarum, non
 uirginum

uirginum Christi inopiæ parcere; magisq. manus rogan-
tium spectare, quam uultus. Hanc feram Charybdim,
Scyllamq. succinctam multis canibus fugiens, barbaros ma-
trona sustinuit; qui nec naufragiis parcerent, nec captiuita-
tibus flecterentur. Imitare crudelis saltem hostem Rōmani
imperii. Brennus nostri temporis, tantum quod inuene-
rat tulit: tu quæris, quod non inuenis. Et mirantur æmu-
li (uirtus enim semper inuidiæ patet) cur tantarum secum
pudicitiam tacita proscriptioe mercata sit; cum & ille par-
tem dignatus sit accipere, qui totum potuit auferre; & hæc
quasi comiti negare non ausa sit, quæ se intelligebat sub no-
minæ priuatiæ dignitatis tyranno seruientem? Sentio me ini-
micorum patere moribus, quod adulari uidear clarissimæ
& nobilissimæ femine: qui accusare non poterunt, si me
scient hucusque tacuisse. Neque enim laudaui in ea um-
quam antiquitatem generis, diuitiarum & potentie magni-
tudinem, uiro uiuente, uel mortuo: quæ alii forsitan mer-
cenaria oratione laudauerint. mihi propositum est stylo ec-
clesiastico laudare auiam uirginis meæ, & gratias agere, quod
uoluntatem eius sua adiuuerit uoluntate. alioquin cellula
monasterii, uilis cibus, uestisq. contempta, & ætas uicina
iam morti, breuisq. temporis uiaticum, carent omni assen-
tationis infamia. Denique in reliquis partibus omnis mihi
sermo ad uirginem dirigetur, & uirginem nobilem, & nobi-
lem non minus sanctitate, quam genere: cuius quanto sub-
limior ascensus est, tanto lapsus periculosior. Vnum illud
tibi nata Deo, præq. omnibus unum Prædicam, & repe-
tens, iterumq. iterumq. monebo; ut animum tuum sa-
cræ lectionis amore occupes; nec in bona terra pectoris tui,
Matth. 13 sementem lolii auenarumq. suscipias: ne, dormiente patre-
familias, qui est *ys*, idest, animus Deo semper adhærens,
inimicus homo zizania superfeminet: sed semper loquaris:
Cant. 3 In noctibus quæsiui quem diligit anima mea, ubi pascis, ubi
Psalm. 61 cubas in meridie? Et: Adhæsit post te anima mea: me su-
Hier. 17 scepit dextera tua. Illudq. Hieremiæ: Non laboraui sequēs
te: neque enim est dolor in Iacob, nec labor in Israel.
Quando

Quando eras in sæculo , ea , quæ erant sæculi , diligebas , polire faciem purpurisso , & cerussa hora depingere , ornare crinem , & alienis capillis turratum uerticem struere . ut taceam de inaurium pretiis , candore margaritarum , rubri maris profunda testantium , sinaragdorū uirore , cerauniorum flammis , hiacynthorum pelago , ad quæ ardent , & insaniant studia matronarum . nunc autem , quia sæculum reliquisti , & secundo post baptismum gradu , inisti pactum cum aduersario tuo , dicens ei : Renuncio tibi , diabole , & sæculo tuo , & pompæ tuæ , & opibus tuis : serua fœdus , quod pepigisti ; & esto consentiens , pactumq. custodiens *Matth. 5* cum aduersario tuo , dum es in uia huius sæculi ; ne forte tradat te iudici , & te de suo aliquid usurpasse conuincat : tradarisq. ministro , qui ipse est & inimicus , & uindex ; & mittaris in carcerem , & in tenebras exteriores , quæ quanto a Christo uero lumine separantur , tanto nos maiori horrore circumdant ; & non inde exeas , nisi soluas nouissimum quædrantem , idest , minimum quodque delictum : quia & protioso uerbo reddituri sumus rationem in die iudicii . Hæc dicta sint non in fausto contra te uaticinio , sed pauidi cautiq. monitoris officio , ea quoque in te , quæ tuta sunt , formidantis . Si spiritus , inquit , potestatem habentis ascenderit *Eccl. 10* super te , locum tuum ne dimiseris . Quasi in procinctu , & in acie stamus semper ad pugnam . uult nos loco mouere hostis , & de gradu decedere ; sed solidanda uestigia sunt , & dicendum : Statuit supra petram pedes meos , & petra refugium leporibus . Pro quo multi Herinaceos legunt . Herinaceus animal paruum , & fugax , & spinarum sentibus prægrauatum . Sed ideo Iesus spinis coronatus est , & nostra delicta portauit , & pro nobis doluit , ut de sentibus & tribulationibus seminarum , ad quas dicitur : In anxietatibus , & doloribus paries mulier , & ad uirum conuersio tua , & ipse tui dominabitur : rosa uirginitatis , & lilia castitatis nascerentur . Vnde & sponsus pascitur inter lilia , & inter eos , qui uestrimenta sua non coinquinauerunt : uirgines enim permanferunt , audieruntq. præceptum . Candida fiat semper uestimenta *Apoc. 14 Eccl. 9*

- menta tua, &, quasi auctor uirginitatis, & princeps, loquitur confidenter: Ego flos campi, & lilium conuallium. Terra igitur leporum est, qui in persecutionibus fugiunt de ciuitate in ciuitatem. Nec timent illud propheticum: Perit fuga a me. Montes autem excelsi ceruis, quorum colubri
Cant. 2 cibis sunt: quos educit puer paruulus de foramine, quando
Psal. 141 pardus, & hædus requiescunt simul: & bos, & leo comedunt paleas; ut nequaquam bos discat feritatem, sed leo doceatur mansuetudinem. Reuertamur ad propositum testimonium. Si spiritus potestatem habentis ascenderit super te, locum tuum ne dimiseris. Post quod sequitur: Quia curatio quiescere facit peccata maxima. Qui uersiculus hunc habet sensum: Si in cogitationes tuas coluber ascenderit, omni custodia serua cor tuum. Et cum David canito: Ab
Psal. 18 occultis meis munda me Domine: & ab alienis parce seruo tuo: & ad peccatum maximum, quod opere perpetratur, nequaquam peruenies, sed incentiua uitiorum statim in
Psal. 136 mente iugulabis, & paruulos Babylonis allides ad petram: in qua serpentis uestigia non reperiuntur: cauteq. Domino
Psal. 18 promittes: Si mei non fuerint dominati; tunc immaculatus ero, & emundabor a delicto maximo. Hoc est, quod a
Exod. 40 libi scriptura testatur: Peccata patrum reddam in filios, in tertiam & quartam generationem; ut cogitationes nostras, mentisq. decretum non statim puniat, sed reddat in posteris, idest, in malis operibus, & in delictorum perseverantia: quoniam per Amos loquitur: super tribus & quattuor
Amos 1. & 2. impietatibus illius, & illius ciuitatis, nonne auerfabor eam? Hæc cursim, quasi de prato pulcherrimo sanctarum scripturarum, paruos flores carpisse sufficiat pro commonitione tui; ut & claudas cubiculum pectoris; & crebro signaculo crucis munias frontem tuā; ne exterminator Aegypti in te
Exod. 12 locū reperiatur, sed primogenita, quæ apud Aegyptios pereunt,
Psal. 56 in tua mente saluentur; & dicas cum propheta: Paratū cor meū Deus, paratum cor meū: cantabo & psallam. Exurge gloria mea, exurge psalteriū, & cithara. Quam assumere iubetur & Tyrus, multis peccatorū confossa uulneribus: ut agat
Isa. 23 penitentiam,

pœnitentiã, & maculas pristinæ foeditatis cum Petro amaris lacrymis abluat. Verum nos ignoremus pœnitentiam, ne facile peccemus. Illa quasi secunda post naufragium miseris tabula sit: in uirgine integra seruetur nauis. Aliud est, quærere, quod perdideris: aliud, possidere, quod numquam amiseris. Vnde & Apostolus castigabat corpus suum, & 1. Cor. 9 in seruitutem redigebat; ne aliis prædicans, ipse reprobis inueniretur: corporisq. ex persona generis humani inflammatus ardoribus, loquebatur: Miser ego homo, quis me Rom. 7 liberabit de corpore mortis huius? Et iterum: Scio quia non habitat in me, hoc est in carne mea bonũ: uelle enim adiacet mihi; ut faciam autem bonum, nequaquam inuenio. neque enim, quod uolo bonum, sed, quod nolo malum, hoc facio. Et denuo: Quĩ in carne sunt, Deo place- Rom. 8 re non possunt. Vos autem non estis in carne, sed in spiritu: si tamen spiritus Dei habitat in uobis. Post cogitationũ diligentissimam cautionem, ieiuniorum tibi arma sumenda sunt, & canendum cum Dauid: Humiliaui in ieiunio animã Psal. 34 meam. Et, Cinerem tamquam panem manducaui. Et, Cũ Psal. 108 molesti erant mihi, induebar cilicio. Eua per cibum eiecta Gen. 3 est de paradiso. Helias quadraginta dierum exercitatus ieiunio, igneo curru rapitur in cælum. Moyses quadraginta die 4. Reg. 2 bus ac noctibus familiaritate & sermone Dei pascitur, in se Exod. 24 uerissimum probans quod dicitur: Non in solo pane uiuit Deut. 8 homo, sed in omni uerbo, quod procedit de ore Dei. Saluator generis humani, qui uirtutum & conuersationis suæ nobis reliquit exemplum, post baptismum statim assumitur a spiritu, ut pugnet contra diabolum, & oppressum, at que contritum tradat discipulis conculcandum. unde & Apostolus loquitur: Deus autem conteret satanam sub pedibus uestris uelociter. Et tamen hostis antiquus, post quadraginta dierum ieiunium, per cibum molitur insidias, & dicit: Si filius Dei es, dic ut lapides isti panes fiant. In lege, Lcuit. 16 mense septimo post clangorem tubarum decimo die mensis, totius gentis Hebrææ ieiunium est, & exterminatur illa anima de populo suo, quæ saturitatem prætulit continentię.

Iob. 38 nentia. In Iob scriptum est de dracone: Virtus eius in lum-
 bis eius, & fortitudo illius super umbilicum uentris eius.
Iac. 3 Aduersum iuvenes, & puellas ætatis ardore hostis noster
 abutitur, & inflammat rotam natiuitatis nostræ, & implet
Osee 7 illud Osee: Omnes adulterantes, quasi clibanus corda eo-
 rum, quæ Dei misericordia, & ieiuniorum frigore restin-
 guuntur. Hæc sunt ignita diaboli iacula, quæ simul & uul-
Dan. 1 & 3 nerant, & inflammant, & a rege Babylonio tribus pueris
 præparantur, qui succendit fornacem quadraginta nouem
Dent. 16 cubitorum, habens & ipse septem hebdomadas ad perdi-
 tionem, quas Dominus obseruari iusserat ad salutem. Sed
 quo modo ibi quartus, speciem habens quasi filii hominis,
 imensos mitigauit ardores; & inter camini æstuantis in-
 cendium, docuit flammæ calorem amittere, & aliud ocu-
 lis comminari, aliud præbere tactui: sic & in animo uirgini-
1. Cor. 7 li, rore cælesti & ieiuniorum frigore calor puellaris extingui-
 tur; & in humano corpore, angelorum impetratur conuer-
 satio. quam ob rem & uas electionis de uirginibus se dicit
 Domini non habere præceptum: quia contra naturam, im-
 mo ultra naturam est, non exercere quod nata sis; interfi-
 cere in te radicem tuam, & sola uirginitatis poma decerpe-
 re; nescire thorum, omnem uiro-
 rum horrere contactum,
 & in corpore uiuere sine corpore. Neque uero immoderata
 tibi imperamus ieiunia, & enormem ciborum abstinentiã,
 quibus statim corpora delicata franguntur, & ante agrota-
 re incipiunt, quam sanctæ conuersationis iacere fundamen-
 ta. Philosophorum quoque sententia est, *μεσότητας ἀντι-
 τὰς ὑπερβολὰς κακίας εἶναι*: quod Latinus ita potest ser-
 mo resonare; moderatas esse uirtutes; excedentes modum
 atque mensuram, inter uitia deputari. Vnde & unus de se-
 ptem sapientibus, *μηδὲν ἄγαν*, idest, ne quid, ait, nimis.
 quod tam celebre factum est, ut comico quoque uersu ex-
 pressum sit. Sic debes ieiunare, ut non palpites, & respira-
 re uix possis, & comitū tuarum uel porteris, uel traharis ma-
 nibus, sed ut, fracto corporis appetitu, nec in lectione, nec
 in psalmis, nec in uigiliis solito quid minus facias. Ieiunium
 non

non perfecta uirtus, sed ceterarum uirtutum fundamentum est, & sanctificatio, atque pudicitia: sine qua nemo uidebit Deum. gradus præbet ad summa scādentibus; nec tamen, si sola fuerit, uirginem poterit coronare. Legamus euange-
 Matth. 25
 lium sapientium & stultarum uirginum: quarum aliæ cubi-
 culum sponsi ingrediuntur; aliæ, bonorum operum oleum
 non habentes, extinctis lampadibus excluduntur. Latus est
 super ieiuniis campus: in quo & nos sæpe cucurrimus, &
 multorum proprii habentur libri; ad quorum te mittimus
 lectionem; ut discas, quid boni habeat continentia, & quid
 e contrario mali saturitas. Imitare sponsum tuum. Esto
 auix matriq. subiecta. nullum uirorum, & maxime iuuenū,
 nisi cum illis, uideas. nullum scias, quem illæ nesciant. Sæ-
 cularis quoque sententia est: Eadem uelle, & eadem nolle,
 ea demum firma amicitia est. Vt appeteres uirginitatem, ut
 Christi præcepta cognosceres, ut scires quid tibi expediret,
 quid eligere deberes, illarum te exempla docuerunt, sancta
 domi intruxit conuersatio. Non igitur solum putes tuum
 esse, quod tuum est, sed earum, quæ suam in te expressere
 pudicitiam, & honorabilium nuptiarum, cubilisq. imma-
 culati pretiosissimum germinauere te florem: qui perfectos
 afferet fructus, si humiliaueris te sub potenti manu Dei, &
 scriptū semper memineris: Superbis Deus resistit, humili-
 Iac. 4
 bus autem dat gratiā. Vbi autem gratia, non operum retri-
 butio, sed donantis est largitas, ut impleatur dictum Apo-
 stoli: Non est uolentis, neque currentis, sed Dei miseren-
 Rom. 9
 tis. Et tamen, uelle, & nolle, nostrum est: ipsumq. quod
 nostrum est, sine Dei miseratione nostrum non est. Eunū-
 chorū quoque tibi, & puellarum, ac seruulorum mores
 magis elegantur, quam uultuum elegantia; quia in omni se-
 xu & ætate & truncatorum corporum uiolenta pudicitia,
 animi considerandi sunt: qui amputari, nisi Christi timore,
 non possunt. Scurrilitas, atque lasciuiā te præsentē non ha-
 beant locum. Numquam uerbum in honestum audias: aut,
 si audieris, non inesceris. Perditæ mentis homines, uno fre-
 quenter leuiq. sermone tentant claustra pudicitæ. Ridere,
 &

& rideri, secularibus derelinque. grauitas tuam personam decet. Catonem quoque, illum dico Censorium, & uestræ quondam urbis principem, qui extrema ætate Græcas litteras nec erubuit censor, nec desperauit senex discere. Et M. Crassum semel in uita scribit risisse Lucilius. Fuerit illa affectata seueritas, & gloriam quærens, auramq. popularem: nos affectus, & perturbationes, quamdiu in tabernaculo corporis huius habitamus, & fragili carne circumdamur, moderari, & regere possumus, amputare non possumus: unde & Psalmista dicit: Irascimini, & nolite peccare.

Psal. 4 Quod Apostolus edisserens, Sol, inquit, non occidat super iracundiam uestram: quia & irasci, hominis est: & finem iracundiæ imponere, Christiani. Superfluum reor, te

Eph. 4 monere contra auaritiam; cum generis tui sit, & habere, & calcare diuitias; & Apostolus doceat auaritiam esse idolorum cultum, Dominusq. respondeat sciscitanti: Magister

Eph. 5 bone, quid boni faciens, uitam æternam possidebo? Si uis esse perfectus, uade, uende omnia, quæ habes, & da pauperibus, & habebis thesaurum in cælis, & ueni sequere me. Apostolici fastigii est, perfectæq. uirtutis, uendere omnia, & pauperibus distribuere, & sic leuem, atque expeditum cum Christo ad cælestia subuolare. Nobis, immo tibi, diligens credita est dispensatio: quamquam in hoc omni ætati omniq. personæ libertas arbitrii relicta sit. Si uis, inquit, esse perfectus. Non cogo, non impero; sed propono palmam, ostendo præmia: tuum est eligere, si uolueris in agone, atque certamine coronari. Et consideremus, quam sapienter sapientia sit locuta: Vende, quæ habes. Cui ista præcipiuntur? nempe illi, cui dictum est: Si uis esse perfectus. Non partem bonorum tuorum uende, sed omnia. Cumq. uendideris, quid sequitur? Et da pauperibus. Non diuitibus, non propinquis, non ad luxuriam, sed ad necessitatem. Siue ille sacerdos sit, siue cognatus, & affinis, nihil in illo aliud consideres, quam paupertatem. Laudent te esurientium uiscera, non ructantium opulenta conuiuia. In

Act. 4 Actis Apostolorum, quando Domini nostri adhuc calebat cruor,

cruior, & feruebat recens in credentibus fides, uendebant omnes possessiones suas, & pretia earum ad Apostolorum deferre pedes, ut ostenderent pecunias esse calcandas; dabaturq. singulis, prout cuique opus erat. Ananias, & Saphyra, dispensatores timidi, immo corde duplici, & ideo *Act. 5* condemnati, quia post uotum obtulerunt quasi sua, & non eius, cui semel ea uouerant; partemq. sibi iam alienæ substantiæ reseruauerunt, meruentes famem, quam uera fides non timet, præsentem meruere uindictam, non crudelitatem sententiæ, sed correptionis exemplo. Denique & Apostolus Petrus nequaquam imprecatur eis mortem, ut stultus Porphyrius calumniatur, sed Dei iudicium prophetico spiritu annunciat, ut pœna duorum hominum sit doctrina multorum ex eo tempore; quo uirginitati perpetuæ consecrata es, tua non tua sunt; immo uere tua, quia Christi esse cœperunt, quæ, aui uiuente, uel matre, ipsarum arbitrio dispensanda sunt. Sin autem obierint, & somno sanctorum requieverint: scio enim & hoc illas optare, ut te habeant superflitem, cum ætas maturior fuerit, & uoluntas grauior, firmiorq. sententia: facies quod tibi uisum fuerit, immo quod Dominus imperat, scitura nihil te habituram, nisi quod in bonis operibus erogaueris. Alii ædificent ecclesias; uestiant parietes marmorum crustis; columnarum moles aduehant; earumq. deaurent capita, pretiosum ornatum non sentientia; ebore, argentoq. ualuas, & gemmis aurata distinguant altaria. non reprehendo, non abnuo. unusquisque in sensu suo abundet. meliusq. est hoc facere, quam repositis opibus incubare. sed tibi aliud propositum est. Christum uestire in pauperibus, uisitare in languentibus, parcere in enutrientibus, suscipere in his, qui tecto indigent, & maxime in domesticis fidei; uirginum alere monasteria; seruorum Dei, & pauperum spiritu, habere curam; qui diebus & noctibus scruiunt Domino tuo; qui in terra positi, imitantur angelorum conuersationem, & nihil aliud loquuntur, nisi quod ad laudes Dei pertinet; habentesq. uictum, & uestitum, his gaudent diuitiis, qui plus habe-

F re

re nolunt, si tamen seruant propositum. alioqui, si amplius desiderant, his quoque, quæ necessaria sunt, probantur indigni. Hæc ad uirginem diuitem, & uirginem nobilem sum locutus: nunc tantum ad uirginem loquar, idest, non ea, quæ extra te, sed in te sunt, tantum considerans. Præter psalmorum, & orationis ordinem, quod tibi hora tertia, sexta, nona, ad uesperum, media nocte, & mane semper est exercendum; statue quot horis sanctam scripturam ediscere debeas, quanto tempore legere, non ad laborem, sed ad delectationem, & instructionem animæ. Cumq. hæc finieris spatia, & frequenter te ad figenda genua sollicitudo animæ suscitauerit; habeto lanam semper in manibus; uel staminis pollice fila deducito; uel ad torquenda subregmina in alueolis fusa uertantur; aliarumq. neta aut in globum collige, aut texenda compone. quæ texta sunt, inspice: quæ errata, reprehende: quæ facienda, constitue. Si tantis operû uarietatibus fueris occupata; numquam dies tibi longi erunt, sed, quamuis æstiuis tendantur solibus, breues uidebuntur, in quibus aliquid operis prætermisum non est. Hæc obseruans & te ipsam saluabis, & alias; & eris magistra sanctæ conuersationis; multarumq. castitatem lucrum tuum facies, scriptura dicente: In desideriis est omnis anima otiosi. Nec ideo tibi ab opere cessandum est, quia, Deo propitio, nulla re indiges: sed ideo cum omnibus laborandû est, ut per occasionem operis nihil aliud cogites, nisi quod ad Domini pertinet seruitutem. Simpliciter loquar. Quamuis omnem censum tuum in pauperes distribuas, nihil apud Christum erit pretiosius, nisi quod manibus tuis ipsa conferis, uel in usus proprios, uel in exemplum uirginum ceterarum, uel quod auiæ matriq. offeras, maiora ab eis in refectionem pauperum pretia receptura. Pene præterit, quod uel præcipuum est. Dum esses paruula, & sanctæ ac beatæ memoriæ Anastasius episcopus Romanam regeret Ecclesiâ, de orientis partibus hæreticorum sæua tempestas simplicitatem fidei, quæ Apostoli uoce laudata est, polluere, & labe factare conata est. sed uir ditissimæ paupertatis, & apostolicæ

ex solitudinis , statim noxium perculit caput , & sibilanti
 hydræ ora compescuit . Et quia uereor , inima rumore co-
 gnoui , in quibusdam adhuc uiuere , & pullulare uenenata
 plantaria ; illud te pio caritatis affectu præmonendam puto ,
 ut sancti Innocentii , qui apostolicæ cathedræ , & supradi-
 cti uiri successor & filius est , teneas fidem ; nec peregrinam ,
 quamuis tibi prudens callidaq. uidearis , doctrinam recipi-
 as . Solent enim huiusmodi per angulos mustitare , & qua
 si iustitiam Dei quærere : Cur illa anima in illa est nata pro-
 uincia ? quid causæ extitit , ut alii de Christianis nascantur
 parentibus , alii inter feras & sæuissimas nationes , ubi nul-
 la Dei notitia est ? Cumq. hoc quasi scorpionis ictu simpli-
 ces quosque percusserint ; & fistulato uulnere locum sibi fe-
 cerint ; uenena diffundunt . Putasne frustra infans paruulus ,
 & qui uix matrem risu , & uultus hilaritate cognoscat , qui
 nec boni aliquid fecit , nec mali , dæmone corripitur , mor-
 bo opprimitur regio , & ea sustinet , quæ uidemus impios
 homines non sustinere , & sustinere Deo seruientes ? Si au-
 tem iudicia sunt , inquit , Domini uera , iustificata in se- *Psal. 18*
 met ipsis , & nihil apud Deum iniustum est : ipsa ratione cõ-
 pellimur , ut credamus animas fuisse in cælestibus , & pro-
 pter quædam antiqua peccata damnatas in corporibus hu-
 manis , & , ut ita loquamur , sepultas , nosq. in ualle lacry-
 marum pœnas luere ueterum peccatorum . unde & prophe-
 ta dicit : Priusquam humiliarer , ego peccaui . Et : Educ de *Psal. 118*
 carcere animam meam . Et : Iste peccauit , ut cæcus ex ute- *Psal. 141*
 ro nasceretur , an parentes eius ? & cetera his similia . Hæc *Ioan. 9*
 impia , & scelerata doctrina olim in Aegypto , & orientis
 partibus uersabatur , & nunc abscondite , quasi in foveis ui-
 perarū , apud plerosque uersatur ; illarumq. partium polluit
 puritatem ; & , quasi hereditario malo , serpit in paucis , ut
 perueniat ad plurimos : quam , certus sum , quod , si audie-
 ris , non recipias . habes enim apud Deum magistras , qua-
 rum fides norma doctrinæ est . Intelligis , quid loquar . da-
 bit enim tibi Deus in omnibus intellectum . nec statim ad-
 uersum sæuissimam hæresim , & multo his nequiora , quæ

F 2 dixi,

Psal. 56

Eph. 4
2. Tim. 3

dixi, responſionem hominis flagitabis: ne non tam prohibuiſſe uidear, quam commonuiſſe: cum præſentis operis ſit inſtruere uirginem, non hæreticis reſpondere. ceterum omnes fraudulentias eorum, & cuniculos, quibus nituntur ſubuertere ueritatem, in alio opere, Deo adiuuante, ſubuertimus; quod, ſi uolueris, prompte libenterq. mittemus. ultroneas enim, aiunt, putere merces: & pretia facilitate decreſcunt; quæ ſemper in raritate maiora ſunt. Solet inter pleroſque eſſe certamen, utrũ ſolitaria, an cum multis uita melior ſit. quarum prior præfertur quidem ſecundæ: ſed, ſi in uiris periculofa eſt, ne abſtracti ab hominum frequentia, ſordidis & impiis cogitationibus pateant; & pleni arrogantix, & ſupercilii, cunctos deſpiciant; armentq. linguas ſuas, uel clericis, uel aliis monachis detrahendo, de quibus rectiſſime dicitur: Filii hominum, dentes eorum arma, & ſagittæ: & lingua eorum gladius acutus: quanto magis in feminis, quarum mutabilis fluctuansq. ſententia, ſi ſuo arbitrio relinquatur, cito ad deteriora delabitur? Noui ego in utroque ſexu, per nimiam abſtinentiam, cerebri ſanitatẽ quibusdam fuiſſe uexatam, præcipueq. in his, qui in humectis & frigidis habitauere cellulis, ita ut neſcirent quid agerent, quoue ſe uerterent, quid loqui, quid tacere deberent. Certe, ſi rudes ſæcularium litterarum, de tractatibus hominum diſertorum quippiam legerint, uerboſitatem ſolam diſcunt, abſque notitia ſcripturarum; &, iuxta uetus elogium, cum loqui neſciant, tacere non poſſunt: docentq. ſcripturas, quas non intelligunt; & cum aliis perſuaſerint, eruditorum ſibi aſſumunt ſupercilium, prius imperitorum magiſtri, quam doctorum diſcipuli. Bonum eſt igitur obedire maioribus, parere perfectis; &, poſt regulas ſcripturarum, uitæ ſuæ tramitem ab aliis diſcere; nec præceptore uti peſſimo, ſcilicet præſumptione ſua. De talibus ſeminis & Apoſtolus loquitur: Quæ circumferuntur omni uento doctrinæ, ſemper diſcentes, & numquam ad ſcientiam ueritatis peruenientes. Matronarum, maritis ac ſæculo ſeruientium, tibi conſortia declinentur; ne ſolicitetur animus

animus ; & audias , quid uel maritus uxori , uel uxor locuta sit uiro . Venenatæ sunt huiusmodi confabulationes . *su- 1. Cor. 19*
per quarum damnatione , sæcularem uersum assumens Apostolus , fecit ecclesiasticum : Corruptunt mores bonos confabulationes malæ . Cuius iambici metrum , dum uerbum seruat ex uerbo , nequaquam expressit Latina translatio . Graues feminæ , & maxime uiduæ , ac uirgines , tibi comites eligantur ; quarum probata est conuersatio , sermo moderatus , sancta uerecundia . Fuge lasciuiam puellarum , quæ ornant capita , crines a fronte demittunt , cutem poliunt , utuntur pigmentis , adstrictas habent manicas , uestimenta sine ruga , soccosq. crispantes ; ut sub nomine uirginali uendibilis pereant . mores enim , & studia dominarum plerumque ex ancillarum , & comitum moribus iudicantur . illa tibi sit pulchra , illa amabilis , illa habenda inter socias , quæ se nescit esse pulchram , quæ negligit formæ bonum ; & procedens ad publicum , non pectus & colla denudat , nec pallio reuoluto ceruicem aperit ; sed quæ celat faciem , & uix uno oculo , qui uix necessarius est , patente , ingreditur . Dubito an loquor : sed , uelim nolim , quia crebro fit , dicendum est : non quo hæc in te timere debeam ; quæ ista forsitan nescias , nec umquam audieris ; sed quo , per occasionem tui , ceteræ præmonendæ sint . Cincinnatulos pueros , & calamistratos , & peregrini muris olentes pelliculas , de quibus illud Arbitri est : Non bene olet , qui bene semper olet : quasi quasdam pestes & uenena pudicitæ uirgo deuinet : ut taceam de ceteris , quorum importuna uisitatio & se infamat , & alias : ut , etiam si nihil mali perpetretur , tamen hoc sit uel maximum malum , frustra patere maledictis & morsibus ethnicorum . Nec hoc de omnibus dicimus , sed de iis , quos Ecclesia ipsa reprehendit , quos interdum abiicit , in quos nonnumquam episcoporum & presbyterorum censura defæuit : ut prope periculosius sit lasciuis puellis , ad loca religionis , quam ad publicum , procedere . Quæ uiuunt in monasterio , & quarum simul magnus est numerus , numquam solæ , numquam sine matre procedant . De

F 3 agmine

agmine columbarum crebro accipiter unam separat, quam statim inuadat, & laceret, cuius carnibus & cruore saturretur. Morbidæ oues suum relinquunt gregem, & luporum faucibus deuorantur. Scio ego sanctas uirgines, quæ diebus festis, propter frequentiam populorum, pedem domi cohiberit, nec tunc egrediuntur, quando maior est adhibenda custodia, & publicum penitus deuitandum. Ante annos circiter triginta de uirginitate seruanda edidi librum; in quo necesse fuit mihi ire contra uitia, & propter instructionem uirginis, quam monebam, diaboli insidias patefacere. qui sermo offendit plurimos, dum unusquisque in se intelligens quod dicebatur, non quasi monitorem libenter audiuit, sed quasi criminatorem sui operis auersatus est. Veruntamen quid profuit armasse exercitum reclamantium, & uulnus conscientiae dolore monstrasse? liber manet, homines præterierunt. Scripsi ad plerasque uirgines, ac uiduas *παρακατα*: & quidquid dici poterat, in illis opusculis defloratum est: ut aut superfluo eadem a nobis repetatur; aut nunc prætermissa, plurimum noceant. Certe & beatus Cyprianus egregium de uirginitate uolumen edidit, & multi alii, tam Latino sermone, quam Græco. omniumq. gentium litteris, atque linguis, præcipue in ecclesiis Agnes uita laudata est. Sed hoc ad eas pertineat, quæ necdum elegerunt uirginitatem, & exhortatione indigent; ut sciant quale sit, quod eligere debeant. nobis electa seruanda sunt, & quasi inter scorpiones & colubros incedendum; ut, accinctis lumbis, calciatis pedibus, & apprehensis manu baculis, iter *Exod. 12* per insidias huius sæculi, & inter uenena faciamus; ut possimus ad dulces Iordanis peruenire aquas, & terram repropromissionis intrare, & ad domum Dei ascendere, ac dicere *Psal. 25* cum propheta: Domine, dilexi decorem domus tuæ, & locum habitationis gloriæ tuæ. Et illud: Vnam petii a Domino, hanc requiram, ut inhabitem in domo Domini, omnibus diebus uitæ meæ. Felix illa cōscientia, & beata uirginitas, in cuius corde, præter amorem Christi, qui est sapientia, castitas, patientia, atque iustitia, ceteræq. uirtutes, nullus

lus alius uersatur amor , nec ad recordationem hominis aliquando suspirat ; nec uidere desiderat , quem cum uiderit , nolit dimittere . Sanctum uirginum propositum , & celestis angelorumq. familie gloriam , quarundam non bene se agentium nomen infamat . Quibus aperte dicendum est , ut aut nubant , si se non possunt continere ; aut contineant , si nolunt nubere . Digna res risu , immo planctu : incedentibus dominis , ancilla uirgo procedit ornatior ; ut pro nimia consuetudine , quam incomptam uideris , dominam suspiceris . nonnullæ separata , & absque arbitris quærunthospitia , ut uiuant licentius , utantur balneis , faciantq. quod uolunt , & deuitent conscientias plurimarum . Hæc uidemus , & patimur ; & , si aureus nuntius affulserit , inter bona opera deputamus . Finem iungo principio : nec semel monuisse contentus sumi : Ama scripturas sanctas , & amabit te sapientia : dilige eam , & seruabit te : honora illam , & amplexabitur te . Hæc monilia in pectore , & in auribus tuis hæreant . nihil aliud nouerit lingua , nisi Christum : nihil possit sonare , nisi quod sanctum est . aux tux tibi semper , ac matris in ore dulcedo uersetur : quarum imitatio , forma uirtutis est .

ARGVMENTVM.

SALVINA, mulier nobilissima, Gildonis, qui Africam tenuit, filia, cum adhuc iuencula esset, Nebridium maritum amisit. erat autem Nebridius ex sorore Auguste natus, contubernalis, & condiscipulus Augustorum. consolatur eam D. Hieronymus: & post mortui uiri laudes, quo modo superstites ex eo paruulos, Nebridium, & sororem regere, qualemq. ipsa uitam traducere debeat, docet, & a secundis nuptiis debortatur.

HIERONYMVS AD SALVINAM,
de seruanda uiduitate.

EPISTOLA IX.

Matth. II. V EREOR, ne officium putetur ambitio; & quod illius exemplo facimus, qui ait; Discite a me, quia mitis sum, & humilis corde; gloriæ facere appetitione dicamur; & non uiduam alloqui, & in angustia constitutam, sed aulæ nos insinuare regali; & sub occasione sermonis, amicitias potentium quærere. quod liquido non
Leuit. II putabit, qui scierit esse præceptum: Personam pauperis nō accipies in iudicio; ne, sub prætextu misericordiæ, quod iniustum est, iudicemus. Vnusquisque enim non hominum, sed rerum pondere iudicandus est. Nec diuiti obsunt opes, si eis bene utatur: nec pauperem egestas commendabilior facit, si inter sordes & inopiam peccata non caueat. utriusque nobis rei testimonium & Abraham patriarcha, & quotidiana exempla suppeditant: quorum alter in summis diuitiis amicus Dei fuit; alii quotidie, in sceleribus deprehensi, penas legibus soluunt. Alloquimur igitur diuitem pauperem, nescientem ipsa, quæ possidet. neque enim marsupium eius discutimus, sed animæ puritatem. Loquimur ad eam, cuius faciem ignoramus, & uirtutes nouimus; quam nobis fama commendat; cuius uenerabiliorem pudicitiam adolescentia facit; quæ mortem iuuenis mariti
sic

sic fleuit, ut exemplum coniugii dederit; sic tulit, ut
 eum profectum crederet, non amissum. Orbitatis ma-
 gnitudo, religionis occasio fuit. Nebridium suum sic quæ-
 rit absentem, ut in Christo præsentem nouerit. Cur ergo
 ad eam scribimus, quam ignoramus? Triplex nimirum cau-
 sa est: prima, quia pro officio sacerdotii, omnes Christia-
 nos filiorum loco diligimus, & profectus eorum nostra est
 gloria: altera, quia pater defuncti intima mihi necessitudine
 copulatus fuit: extrema, quæ & ualidior, quod filio meo
 Auito roganti negare nihil potui: qui crebris litteris inter-
 pellatricem duri iudicis uiduam superans, & multorum *Luc. 18*
 mihi, ad quos ante super eadem materia scripseram, exem-
 pla proponens, ita suffudit pudorem negantis, ut plus cõ-
 siderarem quid ille cuperet, quam quid me facere conueni-
 ret. Alius forsitan laudet Nebridium, quod de sorore ge-
 neratus Augustæ, & in materteræ nutritus sinu, inuictissi-
 mo principi ita carus fuit, ut ei coniugem nobilissimam
 quæreret; & bellis ciuilibus Africam dissidentem hac uelut
 oblide sibi fidam redderet. Mihi a principio statim illud est
 prædicandum, quod, quasi uicinæ mortis præsciis, inter
 fulgorem palatii, & honorum culmina, quæ ætatem anteci-
 bant, sic uixit, ut se ad Christum crederet profecturum.
 Sacra narrat historia, Cornelium, centurionem cohort- *Act. 10*
 tis Italicæ, intantum acceptum Deo, ut angelum ad eum
 mitteret; & omne mysterium, quo Petrus de circumcisio-
 nis angustiiis transferebatur ad præputii latitudinem, ad il-
 lius merita pertinere doceret, qui primus ab Apostolo ba-
 ptizatus, salutem gentium dedicauit. scriptum namque est
 de eo: Erat uir quidam in Cæsarea, nomine Cornelius,
 centurio cohortis, quæ dicitur Italica, religiosus, & timēs
 Deum cum omni domo sua, faciens eleemosynas multas
 plebi, & orans Deum semper. quidquid de illo dicitur,
 hoc, nomine commutato, in Nebridio meo uindico. Sic
 religiosus fuit, & amator pudicitæ, ut uirgo sortiretur uxo-
 rem; sic timens Deum cum omni domo sua, ut oblitus di-
 gnitatis omne consortium cum monachis haberet, & cleri-
 cis

- cis; tantasq. eleemosynas faceret in populis, ut fores eius pauperum ac debiliū obsiderent examina; certe sic semper orans Deum, ut illi, quod optimum esset, eueniret.
- Sap. 4** Raptus est, ne malitia mutaret mentem eius; quia placita erat anima illius Deo. unde & ego possum super eo uere ab
- Act. 10** uti Apostoli uoce, dicentis: In ueritate cognoui, quoniam non est personarum acceptor Deus: sed in omni proposito qui timet Deum, & operatur iustitiam, acceptus est illi. Nihil nocuit militanti paludamentum, & baltheus, & apparitorū cateral: quia sub habitu alterius alteri militabat. sicut e contrario aliis nihil prodest uile palliolum, furua tunica, corporis illuies, & simulata paupertas, si nominis dignitatem operibus destruant. Legimus & in euangelio de
- Matth. 8** alio centurione Domini testimonium: Nec in Israel tantam fidem inueni. Et ut ad superiora redeamus, Ioseph, qui in egestate & in diuitiis dedit experimenta uirtutum, qui & seruus, & dominus docuit animæ libertatem, non-
- Gen. 41** ne, post Pharaonem regis ornatus insignibus, sic Deo carus fuit, ut super omnes patriarchas duarum tribuum pa-
- Dan. 1. 2** ter fieret? Daniel, & tres pueri sic præerant Babylonæ opibus, & sic erant inter principes ciuitatis, ut, habitu Nabu-
- Hest. 8. 13** chodonosor, Deo mente seruirent. Mardocheus & Hester inter purpuram, sericum, & gemmas, superbiam humilitate uicerunt; tantiq. fuere meriti, ut captiui uictoribus imperarent. Hæc illuc tendit oratio, ut ostendam, iuuenem meum coniunctionem sanguinis regalis, & affluentiam diuitiarum, atque insignia potestatis, materiam habuisse
- Eccl. 7** uirtutum, dicente Ecclesiaste: Sicut protegit sapientia, sic protegit & pecunia. Nec itatim illud huic testimonio putemus aduersum: Amen dico uobis, difficile dines intrabit in regnum celorum. Et rursus dico uobis: Facilius est camelum per foramen acus transire, quam diuitem intrare in regnum celorum. Alioquin Zachæus publicanus, quem distissimum commemorat scriptura, contra hanc sententiam saluatus uidebitur. Sed quo modo, quod apud homines impossibile est, apud Deum possibile fiat, Apostoli consilium

filium docet scribentis ad Timotheum : Diuitibus huius sæ- 1.Tim.6
 culi præcipe non superbe sapere, nec sperare in incerto diui-
 tiarum futurum, sed in Deo uiuo, qui præstat nobis omnia
 abundanter ad fruendum. Benefaciant; sint diuites in ope-
 ribus bonis; facile tribuant; communicent; thesaurizent
 sibi bonum fundamentum in futurum, ut apprehendant ue-
 ram uitam. Didicimus, quo modo camelus introire possit
 per foramen acus; quo modo animal tortuosum, deposito
 pondere sarcinarum, assumat sibi pennas columbæ, & re- Psal.54
 quiescat in ramis arboris, quæ de sinapis semine succreuit. Matth.13
 Legimus in Esaia, camelos Madian, & Ephæ, & Saba, au- Esa. 60
 rum & thus ad urbem Domini deportantes, in typo horum
 camelorum. Israhelitarum negotiatores, stacten, & thymia-
 ma, & resinam, quæ nascitur in Galaad, & eutem uulne- Hier.8
 ribus obducit, Aegyptiis deferunt; tantæq. felicitatis sunt,
 ut emant & uendant Ioseph, & mercimonium eorum mun- Gen.37
 di salus sit. Docet & Aesopi fabula, plenum muris uen-
 trem per angustum foramen egredi non ualere. Ergo Ne-
 bridius meus quotidie illud reuoluens: Qui uolunt diuites 1.Tim.6
 fieri, incidunt in tentationem & laqueum diaboli, & desi-
 deria multa: Quidquid & imperatoris largitio, & honoris
 insulæ dederant, in usus pauperum conferebat. Nouerat
 enim, a Domino esse præceptum: Si uis perfectus esse, ua- Matth.19
 de, uende omnia, quæ habes, & da pauperibus, & ueni
 sequere me. Et quia hanc sententiam implere non poterat,
 habens uxorem, & paruulos liberos, & multam familiam, Luc.16
 faciebat sibi amicos de iniquo māmōna, qui se reciperent
 in æterna tabernacula. Nec semel abiiciebat sarcinā, quod
 fecerunt apostoli, patrem, rete, nauiculam relinquentes; Luc.9
 sed ex æqualitate, aliorum inopiæ suam abundantiam com- 2.Cor.8
 municabat; ut postea illorum diuitiæ huius indigentiam
 sustentarent. Scit ipsa, cui libellus hic scribitur, me non no-
 ta, sed audita narrare, nec ex aliquo in me beneficio, scri-
 ptorum more Græcorum, gratiam lingua reddere. procul
 a Christianis ista suspicio. Habentes uictum, & uestitum, 1.Tim.6
 his contenti sumus. Vbi uile olusculum, & cibarius panis,
 & cibis

& cibus potusq. moderatus, ibi diuitiæ superuacuae, ibi nulla adulatio, quæ uel præcipue fructum respicit. Ex quo colligitur, fidele esse testimonium, quod causas non habet mentiendi. Ac ne quis putet me solas in Nebridio prædicare eleemosynas; quamquam & has exercuisse sit magnum, de quibus dicitur: Sicut aqua extinguit ignem, ita eleemosyna extinguit peccatum: ad ceteras uirtutes eius ueniam, quas singulas in paucis hominibusprehendimus. Quis fornacem regis Babylonii sine adustione ingressus est? Cuius adolescentis Aegyptia domina pallium non tenuit? Quæ uxor Eunuchi nullos creat liberos, uoluptate transacta? Quem hominum disputatio illa non terreat? Video aliam legem in membris meis, repugnantem legi mentis meæ, & captiuum me ducentem in lege peccati, quæ est in membris meis. Mirum dictum est: nutritus in palatio, contubernalis & condiscipulus Augustorum, quorum mensæ ministrator orbis, & terræ ac maria seruiunt, inter rerum omnium abundantiam, in primo ætatis flore tantæ uerecundiæ fuit, ut uirginalem pudorem uinceret, & ne leuem quidem obsceni rumoris in se fabulam daret. Deinde purpuratorum propinquus, socius, consobrinus, iisdem cum ambobus studiis eruditus, (quæ res etiam externorum mentes sibi conciliat) non est inflatus superbia, nec ceteros homines adducta fronte contempsit: sed cunctis amabilis, ipsos principes amabat ut fratres, uenerabatur ut dominos; & in illorum salute suam salutem positam fatebatur. Ministros autem eorum, & uniuersum ordinem palatii, quo regalis frequentatur ambitio, sic sibi caritate sociarat, ut, qui merito inferiores erant, officiis se pares arbitrarentur. Difficile factum est, gloriam uirtute superare; & ab iis diligi, quos præcedas. Quæ uidua non huius auxilio sustentata est? quis pupillus non in eo reperit patrem? totius orientis episcopi ad hunc miserorum preces, & laborantium desideria conferebant, quidquid ab imperatore poscebat, eleemosyna in pauperes pretium captiuorum, misericordia in afflictos erat. unde & ipsi principes libenter præstabant, quod sciebant

bant non uni, sed pluribus indulgeri. Quid ultra differimus? Omnis caro fenum, & omnis gloria eius quasi flos *Esa. 40* feni. Reuerfa est terra in terram suam: dormiuit in Domino, & appositus est ad patres suos, plenus dierum ac luminis, & nutritus in senectute bona. Cani enim hominis sunt *Sap. 4* sapientia eius. In breui ætate tempora multa compleuit.

Tenemus pro eo dulcissimos liberos. uxor heres pudicitie pretium est. Nebridius pugio patrem quærentibus exhibet. Sic oculos, sic ille manus, sic ora ferebat. Scintilla uigoris paterni lucet in filio: & similitudo morū per speculum carnis erumpens, ingentes animos angusto in pectore uersat. Iungitur ei germana, rosarum & liliorum calathus, eboris ostriq. commercium. sic refert ore patrem, ut ad uenustatem propensior sit: sic matrem mixta similitudine pingit, ut in uno corpore utrūque agnoscas: ita suavis est, & mellitula, ut honor sit omnium propinquorum. hanc tenere non dedignatur Augustus: hanc fouere in sinu regina lætatur. certatim ad se omnes rapiunt. pendet ex collo, hæret in brachiis singulorum, garrula, atque balbutiens, linguæ offensione fit dulcior. Habes igitur Saluina, quos nutrias, in quibus uirum absentem tenere te credas. Ecce hereditas Domini, filii merces fructus uentris. pro uno homine duos filios recepisti: auctus est numerus caritatis. *Psal. 126*

Quidquid debebas marito, redde filiis. amore præsentium absentis desiderium tempera. Non est parui apud Deum meriti, bene filios educare. Audi Apostolum commonentem: *1. Tim. 5* Vidua eligatur non minus annorum sexaginta, quæ fuerit unius uiri uxor, in bonis operibus habens testimonium, si filios educauit, si hospitalis fuit, si sanctorum pedes lauit, si afflictis abundanter præbuit, si omne opus bonum subsecuta est. Didicisti catalogum uirtutum tuarum, quid debeas nomini tuo, quibus meritis secundum pudicitie gradum possideas. Nec te moueat, quod sexagenaria eligatur uidua, & putes adolescentulas ab Apostolo reprobari. Et te crede eligi ab eo, qui discipulo dixerat: Nemo adolescentiam tuam contemnat, non continentiam, sed ætatem. *1. Tim. 4*

Alioquin

- Alioquin omnes, quæ ante sexaginta annos uiuatae sunt, hac lege accipient maritos. Sed quia rudem Christi instituebat Ecclesiam, & omni ordini prouidebat, præcipueq. pau-
- Gal.2** peribus, quorum ei cura cum Barnaba fuerat demandata; illas uult Ecclesiæ opibus sustentari, quæ propriis manibus non queunt laborare: quæ uere uiduæ sunt, quas & ætas
- 1.Reg.2** probat, & uita. Heli sacerdos offendit Deum ob uitia liberorum. ergo e contrario placatur Deus uirtutibus eorum, si permanerint in fide, & caritate, & sanctitate cum pudicitia. O Timothee: te ipsam castam custodi. Absit, ut sinistrum quippiam mihi de te suspicari liceat: sed, ex abundantia lubricam ætatem monuisse, pietatis est. quæ dictu-
- 1.Tim.5** rus sum, non tibi, sed puellaribus annis dicta intellige. Vi-
- 2. Cor.13** dua, quæ in deliciis est, uiuens mortua est. Hoc uas electionis loquitur; & de illo profertur thesauro, quî confidenter aiebat: An experimentum queritis eius, qui in me loquitur Christus? Hoc ille pronunciat, qui libere sub persona sua fragilitatem humani corporis fatebatur. non enim,
- Rom.7** quod uolo bonum, hoc operor, sed, quod nolo, malum.
- 1. Cor.9** Et propterea castigo & redigo in seruitutem corpus meum; ne, aliis prædicans, ipse reprobis inueniar. Si ille timet, quis nostrum potest esse securus? Si David amicus Domini, & Salomon amabilis eius, uicti sunt quasi homines, ut & ruinæ nobis ad cautionem, & pænitudinis ad salutem exempla præberent: quis in lubrica nia lapsum non metuat? Procul sint a conuiuiis tuis Phasides aues, crassi turtures, attagen Ionicus, & omnes aues, quibus amplissima patrimonia auolant. Nec ideo te carnibus uesci non putes, si suum, leporum, atque ceruorum, & quadrupedum animantium esculentias reprobes. non enim hæc pedum numero, sed
- 1.Tim.4** suauitate gustus indicantur. Scimus ab Apollolo dictum: Omnis creatura Dei bona est; & nihil reiiciendum, quod cum gratiarum actione percipitur. Sed idem loquitur: Bonum est uinum non bibere, & carnem non manducare. Et
- Rom.14** in alio loco: Nolite inebriari uino, in quo est luxuria. Omnis creatura Dei bona est. Audiant hæc mulieres, quæ sollicitæ

licite sunt, quo modo placeant uiris. Comedant carnes, quæ carni seruiunt, quarum feruor despumat in coitum, quæ maritis alligatæ, generationi ac liberis dant operam. Quarum uteri portant fetus, earum & intestina carnibus impleantur. Tu uero, quæ in tumultu mariti sepelisti omnes pariter uoluptates; quæ litam purpurisso & cerussa faciem, super feretrum eius lacrymis diluisti; quæ pullam tunicam, nigrosq. calceolos, candidæ uestis & aurati socci depositione, sumpisti; nihil habes necesse aliud, nisi perseverare in ieiunio. Pallor, & sordes gemmæ tuæ sint: plumarum molities iuuenilia membra non foueat: balnearum calor nouum adolescentulæ sanguinem nō incendat. Audi, quid ex persona uiduæ continentis ethnicus poeta decantet: Ille meos, primus qui me sibi iunxit, amores Abstulit, ille habeat secum, seruetq. sepulcro. Si tanti uilissimum uitrum, quanti pretiosissimum margaritum? Si sic communi lege naturæ damnat omnes gentilis uidua uoluptates: quid expectandum est a uidua Christiana, quæ pudicitiam suam non solum ei debet, qui defunctus est, sed & ei, cum quo regnatura est? Quæso te, ne generalia monita, & conueniens puellari sermo personæ suspicionem tibi iniuriæ moueant, & arbitreris me obiurgantis animo scribere, non timentis; cuius uotum est, te nescire quæ metuo. Tenera res in feminis fama pudicitiae est; quasi flos pulcherrimus cito ad leuē marcessit auram, leuiq. flatu corrumpitur, maxime ubi & ætas consentit ad uitium, & maritalis deest auctoritas, cuius umbra tutamen uxoris est. Quid facit uidua inter familiarum multitudinem? inter ministrorum greges? quos nolo contemnat ut famulos, sed ut uiros erubescat. certe, si ambitiosa domus hæc officia flagitat, præficiat his senem honestis moribus, cuius honor dominæ dignitas sit. Scio multas, clausis ad publicum foribus, non caruisse infamia seruulorum, quos suspectos faciebat aut cultus immoderatus, aut crassi corporis nitor, aut ætas apta libidini, aut, ex conscientia amoris occulti, securus animi tumor: qui etiam bene dissimulatus, frequenter erumpit in publicum, & conseruos

- seruos quasi seruos despicit. Hoc ex abundantia dictum sit; ut omni diligentia custodias cor tuum; & caueas, quidquid de te fingi potest. Non ambulet iuxta te calamitatus procurator, non histrio fractus in feminam, non cantoris diabolici uenenata dulcedo, non iuuenis cultus, & nitidus. Nihil artium scenicarum, nihil tibi in obsequiis molle iungatur. Habeto tecum uiduarum & uirginum choros, habeto tui sexus solatia. Ex ancillarum quoque moribus dominæ iudicantur. Certe, cum tecum sancta sit mater, & lateri tuo amita hæreat uirgo perpetua, non debes periculose externorum consortia quærere, de tuorum societate secura. Semper in manibus tuis sit diuina lectio, & tam crebræ orationes, ut omnes cogitationum sagittæ, quibus adolescentia percuti solet, huiusmodi clypeo repellantur. Difficile est, quin potius impossibile, perturbationum initiis carere quempiam, quas significantius Græci *πρωταβείας* uocant: nos, ut uerbum uertamus e uerbo, antepassiones possumus dicere; eo quod incentiua uitiorum, omnium timent animos; & quasi in meditullio nostrum iudicium sit, uel abiicere cogitata, uel recipere. unde & naturæ Dominus in euangelio loquebatur: De corde exeunt cogitationes malæ, homicidia, adulteria, fornicationes, furta, falsa testimonia, blasphemiae. Ex quo perspicuum est, iuxta alterius libri testimonium, procluius esse cor hominis a
- Gen. 8* pueritia ad malum, & inter opera carnis, & spiritus, quæ *Gal. 5* Apostolus enumerat, mediam animam fluctuare, nunc hæc, nunc illa cupientem. Nam uitis nemo sine nascitur: Optimus ille est, qui minimis urgetur: uelut si egregio inspersos reprehendas corpore nauos. Hoc est, quod aliis uerbis propheta significat: Turbatus sum, & non sum locutus.
- Psal. 76* Et in eodem uolumine: Irascimini, & nolite peccare. Et illud Architzæ Tarentini ad uillicum negligentem: Iam te uerberibus enecassem, nisi iratus essem. Ira enim uiri iustitiam Dei non operatur. Quod de una perturbatione dictum est, referamus ad ceteras. Sicut, irasci, hominis est; & iram non perficere, Christiani: sic omnis caro concupiscit quidem

quidem ea, quæ carnis sunt, & quibusdam illecebris ad mortiferas animam uoluptates trahit; sed nostrum est, uoluptatis ardorem maiore Christi amore restinguere, & lasciuens iumentum frenis inedix subiugare; ut non libidinem, sed cibos quærat, ac desideret, & sessorem Spiritum sanctum moderato atque composito portet incessu. Quorsum ista? Ut hominem esse te noueris, & passionibus humanis, nisi caueris, subiaccere. De eodem cuncti facti sumus luto, iisdem compacti exordiis. In serico & in pannis eadem libido dominatur; nec regum purpuras timet, nec mendicantium spernit squalorem. Multoq. melius est, sto machum te dolere, quam mentem; imperare corpori, quam seruire; gressu uacillare, quam pudicitia. Nec statim nobis pœnitentiæ subsidia blandiantur, quæ sunt infelicitum remedia. Cauendum est uulnus, quod dolore curatur. Aliud est, integra naue & saluis mercibus portum salutis intrare; aliud, nudum hæere tabulæ, & crebris fluctuum recursibus ad asperrima saxa collidi. Nesciat uidua digamix indulgentiam, nec nouerit illud Apostoli, Melius est nubere, quam uri. Tolle, quod peius est, uri; & per se bonum non erit, nubere. Procul sint hæreticorum calumniæ. Scimus honorabiles nuptias, & cubile immaculatum. Etiam de paradiso expulsus Adam unam uxorem habuit. Primus Lamech maledictus, & sanguinarius, & de Cain stirpe descendens, unam costam diuisit in duas, & plantarium digamix protinus diluuii pœna subuertit. Vnde illud Apostoli quod fornicationis metu indulgere compellitur, scribens ad Timotheum: Volo adolescentulas nubere, filios procreare, matres familias esse; nullam occasionem dare aduersario maledicti causa. Cur indulserit, statim subiecit: Iam enim quædam declinauerunt post satanam. Ex quo intelligimus, illum non stantibus coronam, sed iacentibus manum porrigere. Vide, qualia sint secunda matrimonia, quæ lupanaribus præferuntur, quia declinauerunt quædam post satanam. Ideo adolescentula uidua, quæ se non potest continere, uel non uult, maritum potius accipiat, quam diabolum.

1. Cor. 7.

Hebr. 13

Gen. 3

Gen. 4

1. Tim. 5

G bolum.

98 Hieron. ad Saluinam de uiduit. seruanda.

bolum. Pulchra nimirum, & appetenda res, quæ satanæ
Exe. 16. & 23 comparatione suscipitur. Fornicata est quondam & Hieru-
 salem, & diuicauit pedes suos omni transeunti. In Aegy-
 pto primum deuirginata est, & ibi fractæ sunt mammæ
 eius. Cumq. ad deserta uenisset, & morarum Moyfi ducto-
 ris impatiens, quasi æstro libidinis furibunda dixisset: Isti
Exod. 32 sunt dii tui Israel, qui te eduxerunt de terra Aegypti: acce-
Exech. 20 pit præcepta non bona, & iustificationes pessimas, in qui-
 bus non uiueret, sed puniretur. Quid ergo mirum, si & la-
 sciuiuentibus uiduis, de quibus in alio loco Apostolus dixe-
1. Tim. 5 rat: Cum luxuriatæ fuerint, in Christo nubere uolunt, ha-
 bentes damnationem, quia primam fidem irritam fecerunt:
 concessit digamiæ præcepta non bona, & iustificationes
 pessimas; ita secundum indulgens maritum, ut & tertium,
 si liberet, etiam uicesimum: ut scirent sibi non tam uiros
 dados, quam adulteros amputatos? Hæc, filia in Christo
 carissima, inculco, & crebrius repeto; ut posteriorū oblita,
 in priora te extendas, habens tui ordinis, quas sequaris,
Iudith 9 Iudith de Hebræa historia, & Annam filiam Phanuelis de
Luc. 2 euangelii claritate, quæ diebus & noctibus uersabantur in
 templo, & orationibus, atque ieiuniis thesaurum pudicitiae
 conseruabant. unde & altera in typo Ecclesiæ, diabolus ca-
 pite truncauit: altera saluatorem mundi prima suscepit, sa-
 cramentorum conscia futurorum. Illud in calce sermonis
 quæso, ut breuitatem libelli non de inopia eloqui, uel de
 materię sterilitate, sed de pudoris magnitudine existimes ac-
 cidisse; dum uereor me ignotis diu ingerere auribus, & oc-
 cultum legentium iudicium pertimesco.

ARGV-

FVRIA, ex Leto consulari, & patricio, Camillorum generis, patre, & Titiana matre nata, Probi præterea consulis natus, uirum amiserat. hortatur eam D. Hieronymus, ut in uiduitate perstet, & ad secundas nuptias non transeat: uerum, quia florenti adhuc erat ætate, quo modo pudicitiam una cum fama tueri debeat, late, ac eleganter docet.

HIERONYMVS AD FVRIAM,
de uiduitate seruanda.

EPISTOLA X.

BSECRAS litteris, & suppliciter deprecaris;
O ut tibi rescribam, immo scribam, quo modo uiuere debeas, & uiduitatis coronam illæso pudicitiae nomine conseruare. Gaudet animus, exultant uiscera, gestit affectus, hoc te cupere esse post uirum, quod sanctæ memoriæ mater tua Titiana multo tempore fuit sub marito. Exaudiri sunt preces, & orationes eius. impetrauit in unica filia, quod uiuens ipsa possederat. Habes præterea generis tui grande priuilegium, quod exinde a Camillo uel nulla, uel rara uestræ familiæ scribitur secundos nosse concubitus: ut non tam laudanda sis, si uidua perseveres, quam execranda, si id Christiana non serues, quod per tanta sæcula gentiles feminae custodierunt. Taceo de Paula, & Eulstiochio, stirpis uestræ floribus: ne per occasionem exhortationis tuæ illas laudare uidear. Blæfillamq. prætereo, quæ maritum suum, tuum secuta germanum, in breui uitæ spatio tempora uirtutū multa compleuit. Atque utinam præconia feminarū imitarentur uiri; & rugosa senectus redderet, quod sponte offert adolescentia. Sciens & uidens in flammam mitto manum, adducentur supercilia, extendetur brachium. Iratusq. Chremes tumido desæuiet ore. Confurgent proceres, & aduersus epistolam meam

G 2 turba

- turba patricia denotabit, me Magum, me seductorem claustrum, & in terras ultimas deportandum. Addant, si uolunt, & Samaritem; ut Domini mei titulum recognoscant. Certe filiam a parente non diuido, nec dico illud de euangelio: Sine ut mortui sepeliant mortuos suos. Viuit enim, quicumque credit in Christum. Et, qui in illum credit, debet utique, quo modo ille ambulauit, & ipse ambulare. Facessat inuidia, quam nomini Christiano maledicorum semper genuinus infigit: ut, dum probra metuunt, ad uirtutes non prouocentur. Exceptis epistolis, ignoramus alterutrum. Solaque causa pietatis est, ubi nulla carnis notitia est. Honora patrem tuum, sed si te a uero patre non separat. Tandiu scito sanguinis copulam, quamdiu ille suum nouerit creatorem. alioquin Dauid protinus tibi canit: Audi filia, & uide, & inclina aurem tuam, & obliuiscere populum tuum, & domum patris tui: & concupiscet rex decorem tuum, quoniam ipse est dominus Deus tuus. Grande premium parentis obliti: Concupiscet rex decorem tuum. quia audisti, quia uidisti, quia inclinasti aurem tuam, & populi tui, domusque patris tui oblita es; ideo concupiscet rex decorem tuum, & dicet tibi. Tota pulchra es amica mea, & macula non est in te. Quid pulchrius anima, quae Dei filia appellatur, & nullos extrinsecus quaerit ornatus? Credit in Christum, & hac ambitione pergit ad sponsum, eundem habens dominum, quem & uirum. Quid angustiarum habeant nuptiae, didicisti in ipsis nuptiis: & quasi coturnicum carnibus usque ad nauseam saturata es: amarissimam cholerae tunc sensere fauces. Egestisti acescentes & morbosos cibos: releuasti aestuantem stomachum. quid uis rursus ingerere, quod tibi noxium fuit? Canis reuertens ad uomitum, & sus lota ad uolutabrum luti. bruta quoque animalia, & uagae aues in easdem pedicas retiaque non incidunt. An ueteris, ne proles Furiana deficiat, & ex te parens tuus non habeat pusionem, qui reptet in pectore, & ceruicem eius stercore linat? Quippe non omnes habent filios, qui habere matrimonia? & quibus nati sunt liberi, suo generi responderunt?

responderunt? Exhibuit Ciceronis filius patrem in eloquentia? Cornelia uestra, pudicitie simul & fecunditatis exemplar, Gracchos se genuisse lætata est? Ridiculum est, sperare pro certo, quod multos & non habere uideas, &, cum habuerint, perdidisse. Cui dimittes tantas diuitias? Christo, qui mori non potest. Quem habebis heredem? Ipsum, quem & dominum. Contristabitur pater, sed lætabitur Christus: lugebit familia, sed angeli gratulabuntur. Faciat pater, quod uult, de substantia sua: non es eius, cui nata es, sed cui renata, & qui te grandi pretio redemit sanguine suo. Caue nutrices & gerulas, & istiusmodi uenenata animalia, quæ de corio tuo saturari uentrem suum cupiunt. non suaderit, quod tibi, sed quod sibi profit. Et sæpe illud obgannunt: Sola ne perpetua mærens carpere iuuenta? Nec dulces natos, Veneris nec præmia noris? Vbi pudicitie sanctitas, ibi frugalitas est: ubi frugalitas ibi damna seruulorum: quidquid non tulerint, sibi ablatum putant: nec considerant, de quanto, sed quantum accipiant. Vbicumque uiderint Christianum, statim illud detriuo, *ὁ γραιὸς ἐπιδέρης*, uocant impostorem, detrahunt: hi rumores turpissimos ferunt: &, quod ab ipsis egressum est, id ab aliis audisse se simulant, uidem auctores, & exaggeratores. Exit fama de mendacio: quæ cum ad matronas peruenierit, & earum linguis fuerit uentilata, provincias penetrat. Videas plerasque rabido ore scire, tinta facie, uiperinis orbibus, dentibus pumicatis carpere Christianos: Hic aliqua, cui circa humeros hiacynthina læna est, Racidulum quiddam balba de narē locuta, Perstre pit, ac tenero supplantat uerba palato. Omnis consonat chorus, & latrant uniuersa subfellia. Iunguntur nostri ordinis, qui & roduntur, & rodunt, aduersus nos loquaces, pro se muti: quasi & ipsi aliud sint, quam monachi; & non, quid quid in monachos dicitur, redundet in clericos, qui patres sunt monachorum. Detrimentum pecoris, pastoris ignominia est. sicut e regione, illius monachi uita laudanda est, qui uenerationi habet sacerdotes Christi, & non detrahie

G 3 gradui,

gradui, per quem factus est Christianus. Hæc locutus sum in Christo filia, non dubitans de proposito tuo: numquam enim exhortatorias litteras postulares, si ambigeres de bono monogamiæ: sed ut nequitiam seruulorum, qui te uenalem portant, & insidias affinium, ac pium parentis errorem intelligeres: cui ut amorem in te tribuam, amoris scientiam non concedo, dicens aliquid cum Apostolo:

Rom. 10 Confiteor, zelum Dei habent, sed non secundum scientiam. Imitare potius (crebro enim id ipsum repetam) sanctam matrem tuam: cuius ego quoties recordor, uenit in mentem ardor eius in Christum, pallor ex ieiuniis, elemosynæ in pauperes, obsequium in seruos Dei, humilitas uestium & cordis, atque in cunctis sermo moderatus. Pater tuus, quem honoris causa nomino, non quia consularis, & patricius, sed quia Christianus est, impleat nomen suum, lætetur filiam genuisse Christo, non sæculo: quin potius doleat, quod & uirginitatem frustra amiseris, & fructus perdidideris nuptiarum. Vbi est maritus, quem tibi dedit? Etiam si amabilis, etiam si bonus fuisset; mors rapuisset omnia; & copulam carnis soluiisset interitus. Arripe, quæso, occasionem, & fac de necessitate uirtutem. Non queruntur in Christianis initia, sed finis. Paulus male cœpit, sed bene finiuit. Iudæ laudantur exordia, sed finis proditione damnatur. Lege Ezechielem: Iustitia iusti non liberabit eum, in quacumque die peccauerit. et impietas impii non nocebit ei, in quacumque die conuersus fuerit ab impietate sua. Ista est scala Iacob: per quâ angeli ascendunt, & descendunt: cui Dominus innititur, lapsis porrigens manû, & fessos ascendentiû gradus sui contemplatione sustentans. Sed sicut non uult mortem peccatoris tantum, quantum ut conuertatur, & uiuat: ita tepidos odit, & cito ei nauseam faciunt. Cui plus dimittitur, plus diligit. Meretrix illa in enagelio baptizata, lacrymis suis, & crine, quo multos ante deceperat, pedes Domini tergens, saluata est; non habuit crispantes mitras, nec stridentes calceolos, nec orbes stibio fuliginatos; quanto fœdior, tanto pulchrior. Quid facit in

Exech. 18 facie

Gen. 28

Luc. 7

facie Christianæ purpurissus, & cerussa? quorum alterum ruborem genarum, labiorumq. mentitur; alterum candorem oris, & colli, ignis iuuenum, fomenta libidinum, impudicæ mentis indicia. Quo modo flere potest pro peccatis suis, quæ lacrymis cutem nudat, & sulcos ducit in facie? ornatus iste non Domini est, uelamen istud antichristi est. Qua fiducia erigit ad cælum uultus, quos conditor non agnoscit? Frustra obtenditur adolescentia, & ætas puellaris asseritur. Vidua, quæ marito placere desinit, & iuxta Apostolorum uere uidua est, nihil habet necessarium, nisi perseuerantiam. Meminit pristinæ noliuptatis: scit quid amiserit, quo delectata sit. Ardentes diaboli sagittæ, ieiuniorum & uigiliarum rigore restinguendæ sunt. Aut loquendum nobis est, ut uestiti sumus: aut uestiendum, ut loquimur. quid aliud pollicemur, & aliud ostendimus? lingua personat castitatem, & totum corpus præfert impudicitiam. Hoc quantum ad habitum pertinet, & ornatum. Ceterum uidua, quæ in deliciis est, (non est meum, sed Apostoli) uiuens mortua est. Quid sibi uult hoc, quod ait, Viuens mortua est? Viuere quidem uidetur ignorantibus, & non esse peccato mortua: sed Christo, quem secreto non saluunt, mortua est. Anima enim, quæ peccauerit, ipsa morietur. Quorundam hominum peccata manifesta sunt, præcedentia ad iudicium, quosdam autem & subsequuntur. Si militer & facta bona manifesta sunt: &, quæ aliter se habent, abscondi non possunt. Quod dicit, istiusmodi est. quidam tam libere & palam peccant, ut, postquæ eos uideris, statim intelligas peccatores. alios autem, qui callide occultant uitia sua, ex sequenti conuersatione cognoscimus. Similiter & bona apud aliquos in propatulo sunt, in aliis longo usu discimus. Quid ergo necesse est nos iactare pudicitiam, quæ sine comitibus & appendiciis suis, continentia, & paritate, fidem sui facere non potest? Apostolus macerat corpus suum, & animæ subiicit imperio, ne, quod aliis præcipit, ipse non seruet: & adolescentula, seruente cibus corpore, de castitate secura est? Neque uero hæc dicens condemno

1.Tim.5

Exech.18

1.Tim.5

1.Cor.9

G 4 cibos

- 1. Tim. 4** cibos, quos Deus creauit ad utendum cum gratiarum actione; sed iuuenibus & puellis incentiua aufero uoluptatum. Non Aetnæi ignes, non Vulcania tellus, non Veseuus, & Olympus tantis ardoribus æstuant, ut iuueniles medullæ uino plenæ, & dapibus inflammatae. Auaritia calcatur a plerisque, & cum marsupio deponitur. Maledicam linguam indictum emendat silentium. Cultus corporis & habitus uestium, unius hora spatio commutatur. Omnia alia peccata extrinsecus sunt: &, quod foris est, facile abiicitur. Sola libido insita a Deo ob liberorum procreationem, si fines suos egressa fuerit, redundat in uitium, & quadam lege naturæ in coitum gestit erumpere. Grandis igitur uirtutis est, & sollicitæ diligentiae, superare quod nata sis, in carne non carnaliter uiuere, tecum pugnare quoti die, & inclusum hostem Argi, ut fabulæ ferunt, centum oculis obseruare. Hoc est, quod Apostolus uerbis aliis lo-
- 1. Cor. 6** quebatur: Omne peccatum, quod fecerit homo, extra corpus est: qui autem fornicatur, in corpus suum peccat. Aiunt medici, & qui humanorum corporum scripsere naturas, præcipueq. Galenus in libris, quorum titulus *περὶ ὑγιεινῶν*, puerorum, & iuuenum, ac perfectæ ætatis uiro-
rum, mulierumq. corpora insito calore feruere, & noxios illis esse cibos ætatibus, qui calorem augeant; sanitatiq. conducere, frigida quæque in esu & potu sumere: sicut e contrario senibus, qui pituita laborant, & frigore, calidos
- Luc. 21** cibos, & uetera uina prodesse: unde & saluator, Attendite, inquit, uobis, ne forte grauentur corda uestra in crapula, & ebrietate, & curis huius uitæ. Et Apostolus: Nolite inebriari uino, in quo est luxuria. Nec mirum hoc figulum sensisse de uasculo, quod ipse fabricatus est; cum etiam comicus, cuius finis est, humanos mores nosse, atque describere, dixerit: Sine Cerere, & Libero friget Venus. Primum igitur, si tamen stomachi firmitas patitur, donec puellares an-
nos transeas, aquam in potu sume, quæ natura frigidissima est; aut, si hoc imbecillitas prohibet, audi cum Timotheo: Vino modico utere propter stomachum, & frequentes tuas infirmitates.

infirmities. Deinde in ipsis cibis calida quæque deuita. nō solum de carnibus loquor, super quibus uas electionis profert sententiam: Bonum est non manducare carnem, & non bibere uinum: sed etiam in ipsis leguminibus, inflātia quæque & grauiā declinanda sunt: nihilq. ita scias conducere Christianis adolescentibus, ut esum olerum. Vnde & in alio loco, Qui infirmus est, ait; olera manduces, ardorq. corporum frigidioribus epulis temperandus est. Si autem tres pueri & Daniel leguminibus uescebantur, pueri erant, nec dum ad fartaginem uenerant, in qua rex Babylonius senes iudices fraxit. Nobis non corporis cultus, qui in illis, excepto priuilegio gratiæ Dei, ex huiuscemodi cibis enituerat, sed animæ uigor quæritur, quæ carnis infirmitate fit fortior. Inde est, quod nonnulli uitam pudicā appetentium, in medio itinere corruunt, dum solam abstinentiam carniū putant; & leguminibus onerant stomachum, quæ modera te parceq. sumpta innoxia sunt. Et, ut, quod sentio, loquar, nihil sic inflammat corpora; & titillat membra genitalia, sicut indigestus cibus, ructusq. conuulsus. Malo apud te, filia, uerecundia parumper, quam causa, periclitari. Quidquid facit seminarium uoluptatum, uenenum puta. Parcus cibus, & uenter semper esuriens triduanis ieiuniis præfertur. Et multo melius est quotidie parum, quam raro satis sumere. Pluuia illa optima est, quæ sensim descendit in terram. Subitus & nimius imber in præceps, arua subuertit. Quando comedis, cogita quod statim tibi orandum, illico & legendum sit. De scripturis sanctis habeto fixum uersum numerum: istud pensum Domino tuo redde. Nec ante quieti membra concedas, quam calathum pectoris tui hoc subtegmīne impleueris. Post scripturas sanctas, doctorum hominum tractatus lege, eorum dumtaxat, quorum fides nota est. Non necesse habes aurum in luto quære re; multis margaritis unam redāne margaritam. Sta, iuxta Hieremiam, in uitis pluribus; ut ad illam uiam, quæ ad patrem ducit, peruenias. Amorem monilium, atque gemmarum, sericarumq. uestium transfer ad scientiam scripturæ

rum.

Exod. 29 rum. Ingredere terram repromissionis, lacte & melle manantem: comede simlam, & oleum: uestire cum Ioseph uariis indumentis: perforentur aures tuæ cum Hierusalem sermone Dei, ut pretiosa ex illis nouarum segetum grana dependeant. Habes sanctum Exuperium, probatæ ætatis, & fidei, qui te monitis suis frequenter instituat. Fac tibi amicos de iniquo mammona, qui te recipiant in æterna tabernacula. Illis tribue diuitias tuas, qui non Phasides aues, sed cibarium panem comedant, qui famem expellat, non qui augeat luxuriam. Intellige super egenum, & pauperem.
 Luc. 6 Omni petenti te, da, sed maxime domesticis fidei: nudum uesti, esurientem ciba, ægrotantem uisita. Quotiescumque manum extendis, Christum cogita. Caue ne, mendicante domino Deo tuo, alienas diuitias augeas. Iuuenum fuge consortia. Comatulos, comptos, atque lasciuos, domus tuæ tecta non uideant. Cantor pellatur, ut noxius. Fidicinas, & psaltias, & istiusmodi chorum diaboli, quasi mortifera Sirenarum carmina, proturba ex ædibus tuis. Noli in publicum subinde procedere, & spadonum exercitu præeunte, uiduarum circumferri libertate. Pessimæ consuetudinis est, cum fragilis sexus & imbecilla ætas suo arbitrio abutitur; & putat licere, quod libet. Omnia quidem licent, sed non omnia expediunt. Nec procurator calamistratis, nec formosus collactaneus, nec candidulus, & rubicundus assecla adhæreat lateri tuo. Interdum animus dominarum ex ancillarum habitu iudicatur. Sanctarum uirginum, & uiduarum societatem appete. Et, si sermocinandi cum uiris incubuerit necessitas, arbitros ne deuites: tantaque fabulandi fiducia sit, ut, intrante alio, nec paueas, nec erubescas. Speculum mentis est facies: & taciti oculi, cordis fatentur arcana. Vidimus nuper ignominiosum quendam per totum orientem uolitasse rumorem. Et ætas, & cultus, & habitus, & incessus, & indiscreta societas, exquisitæ epulæ, regius apparatus, Neronis & Sardanapali nuptias loquebatur. Aliorum uulnus, nostra sit cautio. Pestilente flagellato, stultus sapientior erit. Sanctus amor impatientiam
 non

non habet. Falsus rumor cito opprimitur; & uita posterior
iudicat de priore. Fieri quidem non potest, ut absque morfu
hominum; uitæ huius curricula quis pertranseat: malo-
rumq. solatium est, bonos carpere, dum peccantium mul-
titudine putant culpam minui peccatorum. Sed tamen cito
ignis stipulæ conquiescit: & exundans flamma, deficienti-
bus nutrimentis, paulatim emoritur. Si anno præterito fa-
ma mentita est, aut certe si uerum dixit: cesset uitium, ces-
sabit & rumor. Hæc dico, non quod de te sinistrum quid
metuam, sed quod pietatis affectu, etiam quæ tuta sunt,
pertimescam. O si uideris sororem tuam, & illud sacri oris
eloquium coram audire contingeret: cerneres in paruo cor-
pusculo ingentes animos: audires, totam ueteris & noui te-
stamenti suppellectilem ex illius corde feruere. Ieiunia pro
ludo habet, orationem pro deliciis. Tenet tympanum in *Exod. 15*
exemplum Mariæ; & Pharaone submerso, uirginum cho-
ro præcinit: Cantemus Domino: gloriose enim magnifica-
tus est, equum & ascensorem deiecit in mare. Has docet
psaltrias Christo, has fidicinas erudit saluatori. Sic dies, sic
nox ducitur: & oleo ad lampades præparato, sponsi expe-
ctatur aduentus. Imitare ergo & tu consanguineam tuam.
Habeat Roma, quod angustior urbe Romana possidet
Bethlehem. Habes opes: facile tibi est indigentibus uictus
subsidia ministrare. Quod luxuriæ parabatur, uirtus infu-
mat: nullam, nuptias contemptura, timeat egestatem.
Redinie uirgines, quas in cubiculum regis inducas. Suscipe
uiduas, quas inter uirginum lilia, & martyrum rosas, qua-
si quasdam uiolas, misceas: pro corona spinea, in qua Chri-
stus mundi delicta portauit, talia ferta compone. Lætetur,
& adiunetur nobilissimus pater tuus: discat a filia, quod di-
dicerat ab uxore. Iam incanuit caput, tremunt genua, den-
tes cadunt: & fronte ob senium rugis arata, uicina est mors
in foribus; designatur rogo prope. Velimus, nolumus, se-
nescimus. Paret sibi uaticum, quod longo itineri necessa-
rium est. Secum portet, quod inuitus dimissurus est; im-
mo præmittat in cælum. quod si negauerit, terra sumpta-
ra est

1. Tim. 5 ra est. Solent adolescentulæ uiduæ, quarum nonnullæ abierunt retro post Satanam, cum luxuriatæ fuerint, in Christo nubentes dicere: Patrimonium meum quotidie perit: maiorum hereditas dissipatur: seruus contumeliose locutus est: imperium ancilla neglexit. quis procedet ad publicum? quis respondebit pro agrorum tributis? paruulos meos quis erudiet, & uernulas quis educabit? Et hanc, pro nefas, causam opponunt matrimonii, quæ uel sola debuit nuptias impedire. Superducit mater filius, non nutricium, sed hostem; non parentem, sed tyrannum. Inflammata libidine, obliuiscitur uteri sui: & inter paruulos, suas miserrimas nescientes, lugens dudum, nona nupta componitur. Quid obtendis patrimonium? quid superbiam seruulorum? confitere turpitudinem. nulla iccirco maritum ducit, ut cum marito non dormiat. aut, si certe libido non stimulat, quæ tanta insania est, in morem scortorum prostituere castitatē, ut augeantur diuitiæ; & propter rem uilem, atque perituram, pudicitia, quæ pretiosa, & æterna est, polluat? Si habes liberos, nuptias quid requiris? si non habes, quare expertam non metuis sterilitatem; & rem incertam certo præfers pudori? Scribuntur tibi nunc sponsales tabulæ, ut post paululum testamentum facere compellaris. Simulabitur mariti infirmitas; &, quod te morituram facere uolet, ipse uicturus faciet: aut, si euenerit, ut ex secundo marito habeas filios, domestica oritur pugna, intestinum prælium. Non licebit tibi amare liberos, nec æquis aspicere oculis, quos genuisti. Clam porriges cibos, inuidebit mortuo: &, nisi oderis filios, adhuc eorum amare uideberis patrem. Quod si, de priore uxore sobolem habens, domum te introduxerit; etiam si clementissima fueris, omnes contemdes, & mimographi, & communes rhetorum loci in nouercam se uissimam declamabunt. Si priuignus languerit, & condolerit caput, infamaberis ut malefica. si non dederis cibos, crudelis; si dederis, uenefica diceris. Oro te, quid habent tantum boni secundæ nuptiæ, ut hæc mala ualeant compensare? Volumus scire, quales esse debeant uiduæ? Legamus euangelium

euangelium secundum Lucam : Et erat, inquit, Anna pro *Luc. 2*
 phetissa, filia Phanuelis de tribu Aser. Anna interpretatur
 gratia: Phanuel in lingua nostra resonat, uultum Dei: Aser
 uel in beatitudinem, uel in diuitias uertitur. Quia igitur ab
 adolescentia usque ad octogintaquattuor annos uiduitatis
 onus sustinuerat, & non recedebat de templo, diebus ac
 noctibus insistens ieiuniis & obsecrationibus; iccirco meruit
 gratiam spiritualem, & nuncupari filia uultus Dei, & atui
 beatitudine diuitiisq. censi. Recordemur uiduæ Sarepta- *3. Reg. 17*
 næ, quæ & suæ, & filiorum saluti, Helix prætulit famem;
 ut in ipsa nocte moritura cum filio superstitem hospitem re
 linqueret; malens uitam perdere, quam eleemosynam; &
 in pugillo farinæ, seminarium sibi messis Dominicæ præpa
 rauit. Farina feritur, & olei capsaces nascitur. in Iudæa fru
 menti est penuria. granum enim tritici ibi mortuum fuerat, *Ioan. 12*
 & in gentium uidua olei fluente manabant. Legimus in Iu
 dith, (si cui tamen placet uolumen recipere) uiduam, con- *Iudith 10*
 sectam ieiuniis, & habitu lugubri sordidatam, quæ non lu
 gebat mortuum uirum, sed squalore corporis, sponsi quæ
 rebat aduentum. Video armatam gladio manum, cruen
 tam dexteram. recognosco caput Holophernis, de mediis
 hostibus reportatum. Vincit uiros femina, & castitas trun
 cat libidinem: habituq. repente mutato, ad uictrices sordes
 redit, omnibus sæculi cultibus mundiores. Quidam impe
 rite & Deborah inter uiduas numerant; ducemq. Barach *Iud. 4*
 arbitrantur Deborah filium; cum aliud scriptura commemo
 ret. Nobis ad hoc nominabitur, quod prophetissa fuerit,
 & in ordine iudicum supputetur. Et, quia dicere poterat:
 Quam dulcia gutturi meo eloquia tua: super mel & fauum *Psal. 118*
 ori meo: Apis nomen accepit, scripturarum floribus pa
 sta, spiritus sancti odore perfusa, & dulces ambrosiæ succos
 propheta ore componens. Noemi, quæ nobis sonat *Ruth 1*
 πακεκλημένη, quam interpretari possumus, consolatam,
 marito & liberis peregre mortuis, pudicitiam reportauit in
 patriam; & hoc sustentata uiatice, nurum Moabitidem
 tenuit: ut illud Esaiæ uaticinium compleretur: Emitte *Esa. 16*
 agnum

agnum Dōmine dominatorem terræ, de petra deserti, ad
Luc. 21 montem filiæ Sion. Venio ad uiduam de euangelio, uiduā
 pauperculam, omni Israelitico populo ditiozem, quæ acci-
Mar. 12 piens granum sinapis, & mittens fermentum in farinæ satis
Luc. 13 tribus, patris & filii confessionem, spiritus sancti gratia tem-
 perauit, & duo minuta misit in gazophylacium: idest:
Esa. 6 quidquid habere poterat in substantia sua, uniuersasq. diui-
 tias in utroque fidei suæ obtulit testamento. Hæc sunt duo
 seraphin ter glorificantia trinitatem, & in thesauros Eccle-
 siæ condita. unde & forcipe utriusque testamenti, ardens
 carbo comprehensus, purgat labia peccatoris. Quid uete-
 ra repetam, & uirtutes feminarum de libris proferam; cum
 possis multas ante oculos tibi proponere in urbe, qua ui-
 uis, quarum imitari exemplum debeas? Et ne uidear adu-
 latione per singulas currere, sufficit tibi sancta Marcella;
 quæ respondens generi suo, aliquid nobis de euangelio retu-
Luc. 2 lit. Anna septem annis a uirginitate uixerat cum marito,
 ista septem mensibus. Illa Christi expectabat aduentum:
 ista tenet, quem illa suscepit. Illa uagientem canebat:
 ista prædicat triumphantem. Illa loquebatur de eo omni-
 bus, qui expectabant redemptionem Israel: hæc cum re-
Psal. 48 demptis gentibus clamat: Frater non redimit, redimet ho-
Psal. 86 mo. Et de alio psalmo: Homo natus est in ea, & ipse fun-
 dauit eam altissimus. Scio me ante hoc ferme biennium edi-
 disse libros contra Iouinianum; quibus uenientes econtra-
 rio quæstiones, ubi Apostolus concedit secunda matrimo-
 nia, scripturarum auctoritate contriui. & nō est necesse ea-
 dem ex integro scribere; cum possis inde, quæ scripta sunt,
 mutuari. hoc tantum, ne modum egrediar epistolæ, admo-
 nitam te uolo: cogita quotidie, te esse morituram: & num-
 quam de secundis nuptiis cogitabis.

A R G V.

Hieron. ad Ageruchiam, de monogamia. 111

ARGVMENTVM. AGERVCHIAM uirginem, Celerini filiam, & Metro-
nie neptem, a secundis dehortatur nuptiis, rejiciens argumenta
omnia, quæ in contrarium facere uiderentur. incipit autem,
ut solet, a laudibus, & explicata re ipsa, postremo uagatur,
in hunc eundem sensum mundi calamitates illi ante oculos po-
nens.

AD AGERVCHIAM VIDVAM,

de monogamia.

EPISTOLA XXI.

N ueterē uia nouam semitam quærimus; & in anti-
qua, detritaque materia, rudem artis excogitamus
elegantiam: ut nec eadem sint, & eadem sint. Vnū
iter, & perueniendi quo cupias multa compendia. Sæpe
ad uiduas scripsimus; & in exhortationem earum multa de
scripturis sanctis exempla repetentes, uarios testimonio-
rum flores in unam pudicitie coronam texuimus. nunc ad
Ageruchiam nobis sermo est: quæ, quodam uaticinio futu-
rorum, ac Dei præsentis auxilio, nomen accepit. quam
auia, matris, amiteque, probatarum in Christo femina-
rum; nobilis turba circumstat: quarum auia Metronia, per
quadraginta annos uidua perseverans, Annam nobis filiam
Phanuelis de euangelio retulit. Benigna mater, quartum & Luc. 2
decimum uiduitatis implens annum, centenatio uirginum
choro cingitur. Soror Celerini patris Ageruchia, quæ par-
uulam nutriuit infantem, & in suo natam suscepit gremio;
per annos uiginti mariti solatio destituta, erudit neptem,
docens quod a matre didicit. Hæc breui sermone perstrin-
xi, ut ostendam adolescentulam meam non præstare mono-
gamiam generi suo, sed reddere; nec tam laudandam esse,
si tribuat; quam omnibus execrandam, si negare tentaue-
rit; præsertim cum posthumus eius Simplicius nomen pa-
tris

tris referat; & nulla sit excusatio desertæ, ac sine herede domus; sub quorum patrocínio interdum sibi libido blanditur; ut, quod propter intemperantiam suam faciunt, uideantur facere desiderio liberorum. Sed quid ego quasi ad retractantem loquor; cum audiam eam multos palatii proceres ecclesiæ uitare præsidio; quos certatim diabolus inflammat, ut uiduæ nostræ castitatem probent, quam & nobilitas, & forma, & ætas, & opes faciunt cunctis appetibilem; ut, quanto plura sunt, quæ impugnant pudicitiam, tanto uicticis maiora sint præmia? Et, quia nobis de portu egredientibus quasi quidam scopulus opponitur, ne possimus ad pelagi tuta decurrere; & Apostoli Pauli scribentis ad Timotheum profertur auctoritas, in qua, de uiduis disputans, ait: *2. Tim. 5* Volo autem iuniores nubere, filios procreare, matres familias esse nullam occasionem dare aduersario; male dicti gratia; iam enim quædam abierunt retro post satanam: oportet primum sensum tractare præcepti, & omnem loci huius continentiam discutere, atque ita Apostolicis uestigiis insistentem, ne transversum quidem, ut dici solet, unguem in partem alteram declinare. Supra scripserat, qualis uidua esse deberet: unius uiri uxor, quæ liberos educavit, quæ in bonis operibus habuit testimonium, quæ tribulatis de sua substantiola subministravit, cuius spes Deus est, & quæ permanet in obsecratione, & orationibus nocte ac die. Post quæ iungit contraria: Quæ autem in deliciis est, uiuens mortua est. Statimq. infert, ut discipulum suum muniat *2. 2* omni arte doctrinæ: Adolescentiores autem uiduas deuota: quæ cum lasciuierint, in Christo nubere uolunt; habentes damnationem, quod primam fidem irritam fecerunt. Propter has igitur, quæ fornicatæ sunt in iniuriam uiri sui Christi, (hoc enim *κατασφυσίασται* Græcus sermo significat) uult Apostolus alterum matrimonium, præferens digamiâ fornicationi, secundum indulgentiam dimittaxat, non secundum imperium. Simulq. singula testimonii uerba tractanda sunt. Volo, inquit, adolescentulas nubere. Cur, quæso? quia nolo adolescentulas fornicari. Procreare filios. quam

quam ob causam? ne metu partus ex adulterio filios necare cogantur. Matres familias esse. quare obsecro? quia multo tolerabilius est digamam esse, quam scortum; & secundum habere uirum, quam plures adulteros. in altero enim miseriarum consolatio, in altero poena peccati est. Sequitur: Nullam occasionem dare aduersario maledicti gratia: in quo breui accinctoq. præcepto multa simul monita continentur: Ne propositum uiduæ exquisitior scultus infamet: Ne oculorum nubibus, & hilaritate uultus, iuuenum post se greges trahat: Ne aliud uerbo, aliud habitu polliceatur, & conueniat ei uersiculus ille uulgatus: Risit, & arguto quiddam promisit oculo. Atque ut omnes nubendi causas breui sermone concluderet; cur hoc præcepisset, ostendit, dicens: Iam enim quædam abierunt retro post satanam. Ideo ergo secunda, & si necesse est, tertia incontinentibus aperit matrimonia, ut a satana abstrahat; ut magis mulierem qualicumque uiro iunctam faciat esse, quam diabolo. Sed & ad Corinthios tale quid loquitur: Dico autem inuuptis, & uiduis: bonum est illis, si sic permanserint ut ego. si autem non se continent, nubant: melius enim est nubere, quam uri. Cur Apostole? Statim intulit: Quia peius est uri. Alioquin absolutum bonum est, & sine comparatione peioris, esse quod Apostolus est, idest, solum, non ligatum; nec seruum, sed liberum, cogitantem ea, quæ Dei sunt, non ea, quæ uxoris. Et protinus in consequentibus, Mulier, inquit, alligata est uiro, quamdiu uir eius uiuit: quod si dormierit uir eius, libera est: cui uult nubat, tantum in Domino. beatior autem erit, si sic permanserit, secundum consilium meum. Puto autem, quod & ego spiritum Dei habeam: & in hoc idem sensus est, quia idem spiritus: diuersæ epistolæ, sed unus auctor epistolarum. Viuent uiro mulier alligata est, & mortuo soluta. Ergo matrimonium uinculum est, & uiduitas solutio. Vxor alligata est uiro, & uir uxori alligatus est, intantum, ut sui corporis non habeant potestatem, & alterutrum debitum reddant; nec possint habere pudicitie libertatem, qui seruiunt domina-

1. Cor. 7

H tui

- tui nuptiarum. Quodq. addidit, Tantum in Domino, amputat ethnicorum coniugia. de quibus & in alio loco dixerat: Nolite iugum ducere cum infidelibus. Quæ enim participatio iustitiæ cum iniquitate? aut quæ societas luci cum tenebris? quæ conuentio Christi cum Belial? aut quæ pars fidei cum infidei? qui consensus templo Dei cum idolis?
- Deut. 20** Ne scilicet aremus in boue, & asino: ne tunica nuptialis uario sit texta subtegmine. Ex temploq. tollit, quod concesserat; &, quasi pæniteat eum sententiæ suæ, retrahit: Beatior erit, si sic permanferit: suiq. hoc magis dicit esse consilii. quod ne contemnatur ut hominis; spiritus sancti auctoritate confirmat; ut non indulgens homo fragilitati carnis humanæ, sed in Apostolo spiritus sanctus præcipiens audiat. Nec sibi in eo annorum puellarium debet uidua blandiri, quod nō minus sexagenariam eligi præcipit: neque enim in nuptas, uel iuuenculas cogit, ut nubant, qui de nuptis quoque loquitur: Tempus breue est: superest, ut & qui habent uxores, sic sint, quasi non habeant: sed de his uiduis disputat, quæ suorum nutriuntur alimentis, quæ filiorum & nepotum ceruicibus imponuntur. Quibus imperat, ut discant domum suam colere, & remunerare parentes, & sufficienter eis tribuere; ut non grauetur ecclesia, & possit certis uiduis ministrare. de quibus scriptum est: Honora uiduas, quæ ueræ uiduæ sunt, hoc est, quæ omni suorum auxilio destitutæ sunt; quæ manibus suis laborare nō possunt; quas paupertas debilitat, ætasq. conficit; quibus Deus spes est, & omne opus oratio. Ex quo datur intelligi; adolescentulas uiduas, exceptis iis, quas excusat infirmitas, uel suo labori, uel liberorum ac propinquorum ministerio delegari. Honor autem impræsentiarum uel pro eleemosyna, uel pro munere accipitur, ut est illud: Presbyteri duplici honore digni habeantur, maxime qui laborant in uerbo, & doctrina. Et in euangelio Dominus differit mandatum legis, in quo dicitur: Honora patrem tuum, & matrem tuam: non in uerborum sono, qui inopiam parentum cassa potest adulatione frustrari, sed in uictus necessariis ministrandis debere
- 2. Cor. 7**
- Leuit. 19**
- 1. Cor. 7**
- 1. Tim. 5**
- Matth. 15**

debere intelligi. iubente enim Domino, ut filii alerent parentes pauperes, & redderent beneficia senibus, quæ parvuli acceperant, scribæ & pharisæi e contrario docebant filios, ut parentibus responderent: Corban, hoc est, donum, *Marc. 7* quod altari pollicitus sum, & in templi dona promisi, si tu a me acceperis cibos, uertetur in tuum refrigerium. Atque ita fiebat, ut, egentibus patre, & matre, sacrificium offerrent filii, quod sacerdotes, scribæq. consumerent. Si ergo *1. Tim. 5* Apostolus pauperes uiduas, eas tamen, quæ adolescentulæ sunt, & nulla debilitate franguntur, cogit suis manibus laborare, ne grauetur ecclesia, & possit anus uiduas sustentare: qua excusatione utetur, quæ opibus mundi affluit, quæ potest etiam aliis ministrare, & de iniquo mammona sibi facere amicos, qui possint eam in æterna tabernacula recipere? Simulq. considera, quod uidua non eligatur, nisi unius uiri uxor: & nos putabamus sacerdotum hoc tantum esse priuilegium, ut non admittatur ad altare, nisi qui unam habuerit uxorem. non solum enim ab officio sacerdotii digamus excluditur, sed & ab elemosyna ecclesiæ, dum indigna putatur stipe, quæ ad secunda coniugia deuoluta est. Quamquam lege sacerdotali teneatur & laicus, qui talem præbere se debet, ut possit eligi in sacerdotium. non autem eligitur, si digamus fuerit. porro eliguntur ex laicis sacerdotes. ergo & laicus tenetur mandato; per quod ad sacerdotium peruenitur. Aliud est, quod uult Apostolus: aliud, quod cogitur uelle. Vt concedat secunda matrimonia, meæ est incontinentiæ, non illius uoluntatis. Vult omnes esse sicut se ipsum, & ea cogitare, quæ Dei sunt, & solutos nequaquam ultra alligari. sed, si labentes per incontinentiam ad barathrum stupri uiderit peruenire, digamix porrigit manum; ut cum una magis, quam cum pluribus uoluentur. Quod nequaquam ut amare dictum, & contra Apostoli regulam, secundus nuptiator exaudiat. Dux enim sunt Apostoli uoluntates, una, qua præcipit: Dico autem innuptis, & uiduis: bonum est illis, si sic permanserint, sicut & ego. Altera, qua indulget: Si autem non se continent, nubant.

H 2 melius

Leuit. 21. 22

melius est enim nubere, quam uri. Primum, quid uelit, deinde, quid cogatur uelle, demonstrat. Vult nos permanere post nuptias, sicut se ipsum: et propositorum beatitudinis Apostolicum ponit exemplum. sin autem nos uiderit nol-le, quod ipse uult; incontinentiæ nostræ tribuit indulgentiam. Quam e duabus eligimus uoluntatem; quod magis uult, & quod per se bonum est; an quod mali comparatione fit leuius, & quodam modo nec bonum est, quia præferatur malo? Ergo, si eligimus, quod Apostolus non uult, sed uelle compellitur, immo acquiescit deteriora cupientibus; non Apostoli, sed nostram facimus uoluntatem. Legimus in ueteri testamento: Semel maritatas filias sacerdotum, si uiduæ fuerint, uesci debere de sacerdotalibus cibis, mortuisq. sic a patre exhibendum inferiarum officium: sin autem alios uiros acceperint, alienas eas & a patre & a sacrificiis fieri, & inter externas debere deputari. Quod quidem obseruat & gentilitas, in condemnationem nostri, si hoc non exhibeat ueritas Christo, quod tribuit mendacium diabolo, qui & castitatem reperit perditricem. Hierophanta apud Athenas euiratur, & æterna debilitate fit castus. Flamen unius uxoris ad sacerdotiū admittitur. Flaminica quoque unius mariti eligitur uxor. Ad tauri Aegyptii sacra semel maritus assumitur. Ut omittā uirgines Vestæ, & Apollinis, Iunonisq. Achiuæ, & Dianæ, ac Mineruæ, quæ perpetua sacerdotii uirginitate marcescunt; stringam breuiter reginam Carthaginis, quæ magis ardere uoluit, quam Hiarbæ regi nubere; & Hadrubalis uxorem, quæ, apprehensis utraque manu liberis, in subiectum se præcipitauit incendium, ne pudicitie damna sentiret; & Lucretiam, quæ, amissa gloria castitatis, noluit pollute conscientie superuivere. Ac ne multa longo sermone contexam, quæ potes de primo contra Iouinianum uolumine ad ædificationem tuam sumere; unum tantum, quod in patria tua gestū est, repetam; ut scias, pudicitiam etiam barbaris, ac feris, & sanguinariis gentibus esse uenerabilem. Gens Theutonum, ex ultimis Gallorum oceani atque Germaniæ profecta litoribus,

ribus, omnes Gallias inundauit; sæpiusq. cæsis Romanie exercitibus, apud aquas Sextias, Mario pugnante, superata est. quorum trecentæ matronæ, cum aliis se uiris, captiuitatis condicione, tradendas esse didicissent; primum consulem deprecatae sunt, ut templo Cereris ac Veneris in seruitium traderentur: quod cum non impetrarent, submovente eas lictore, paruulis cæsis liberis, mane mortuæ sunt repertæ, soffocatis laqueo faucibus, & mutuis complexibus se tenentes. Quod igitur barbaræ castitati non potuit inferre captiuitas, hoc matrona nobilis faciet? & experietur alterum uirum, quæ priorem aut bonum perdidit, aut malum experta est, ut rursus contra iudicium Dei facere nitatur? Quid, si statim secundum perdiderit? societur & tertio, & si ille dormierit, in quartum quintumq. procedat, ut nihil sit, quo a meretricibus differat? Omni ratione uiduæ providendum est, ne castitatis primos excedat limites. quos si exceßerit, & uerecundiam ruperit matronalem; in omnem debacchabitur luxuriam, ita ut prophetam mereatur audire dicentem: Facies meretricis facta est tibi: Hier. 3
impudorata es tu. Quid igitur? damnamus secunda matrimonia? minime, sed prima laudamus. Abiicimus de Ecclesia digamos? absit: sed monogamos ad continentiam prouocamus. In arca Noe non solum munda, sed & immunda Gen. 7
fuerunt animalia. habuit homines, habuit & serpentes. In domo quoque magna, uasa diuersa sunt; alia in honorem, alia in contumeliam. est & crater ad bibendum, est & matula ad secretiora naturæ. Nam cum in semente terræ bonæ, centesimum, & sexagesimum, & trigesimum fructum, 2.Tim. 2
euangelia doceant; & centenarius, pro uirginitatis corona, primum gradum teneat; sexagenarius, pro labore uiduarum, in secundo sit numero; tricenarius fœdera nuptiarum ipsa digitorum coniunctione testetur: digamia in quo erit numero? immo extra numerum. certe in bona terra non oritur, Matth. 13
sed in uepribus, & spinetis uulpium, quæ Herodi impiissimi-
mo cōparantur; ut in eo se putet esse laudabilem, si scortis
melior sit; si publicarum libidinum uictimas superet; si

H 3 uni sic

uni sit prostituta, non pluribus. Rem dicturus sum incredibilem, sed multorum testimoniis approbatam. Ante annos plurimos, cum in chartis ecclesiasticis iuuarem Damasum, Romanæ urbis episcopum, & orientis atque occidentis synodicis consultationibus responderem; uidi duo inter se paria, uilissimorum e plebe hominum, comparata, unum, qui uiginti sepelisset uxores, alteram, quæ uicesimum secundum habuisset maritum, extremo sibi, ut ipsi putabant, matrimonio copulatos. Summa omnium expectatio, uirorum pariter ac feminarum, post tantas rudes quis quem prius efferret. uicit maritus, & totius urbis populo confluente, coronatus, & palmam tenens, adoreturq. per singulos sibi acclamantes, uxoris multinubæ feretrum præcedebat. Quid dicemus tali mulieri? nempe illud, quod Dominus Samaritanæ: Vingt duos habuisti maritos, & iste, a quo sepelieris, non est tuus. Itaque obsecro te, religiosa in Christo filia, ut testimonia ista non noueris, quibus incontinentibus, & miseris subuenitur; sed illa potius lætites, quibus pudicitia coronatur. Sufficit tibi, quod primum perdidisti uirginitatis gradum; & per tertium ueniisti ad secundum, idest, per officium coniugale ad uiduitatis continentiam. Extrema, immo abiecta, ne cogites: nec aliena & longe posita exempla perquiras: habes auiam, matrem, & amitam: quarum tibi abundans imitatio, atque doctrina, & præcepta uiuendi, norma uirtutum est. si enim multæ in coniugio, uiuentibus adhuc uiris, intelligunt illud Apostoli: Omnia licent, *1. Cor. 6* sed non omnia expediunt: & castrant se propter regna cælorum, uel a secunda natiuitate post lauacrum ex consensu, uel post nuptias ex ardore fidei: cur uidua, quæ iudicio Dei uirum habere desuit, non illud lætabunda congeminet: Do *Iob 1* minus dedit, Dominus abstulit: & oblatam occasionem arripiat libertatis, ut sui corporis habeat potestatem, nec rursum ancilla fiat hominis? Et certe multo laboriosius est, non frui eo, quod habeas, quam desiderare, quod amiseris. Vnde & uirginitas in eo facilius est, quod carnis incentiua

non

non nouit; & uiduitas in eo sollicitior, quod præteritas ani-
 mo recolit uoluptates, maxime si se uirum putet perdidisse,
 non præmisisse; quorum alterum doloris, alterum gaudiū
 est. Primi hominis creatura nos doceat, plures nuptias re-
 futare. Vnus Adam & una Eua, immo una ex eo costa, se
 paratur in feminam. rursumq. quod diuisum fuerat, nu-
 ptiis copulatur, dicente scriptura: Erunt duo in carnem
 unam: non in duas, nec in tres. Propter quod relinquet
 homo patrem, & matrem, & adhærebit uxori suæ: cer-
 te non uxoribus. Quod testimonium Paulus edisserens,
 ad Christum refert, & ad Ecclesiam; ut primus Adam
 in carne, secundus in spiritu monogamus sit. Sit una
 Eua, mater cunctorum uiuentium; & una Ecclesia, parens
 omnium Christianorum. Sicut illam maledictus Lamech
 in duas diuise uxores: sic hanc hæretici in plures Ecclesias
 lacerant; quæ iuxta Apocalypsim Ioannis synagogæ magis
 diaboli appellandæ sunt, quam Christi conciliabula. Legi-
 mus in carminum libro: Sexaginta sunt reginæ, & octogin-
 ta concubinæ, & adolescentulæ, quarum non est numerus.
 Vna est columba mea, perfecta mea: una est matri suæ,
 electa genitrici suæ. Ad quam scribit idem Ioannes episto-
 lam: Sēnior electæ dominæ, & filiis eius. Sed & in Arcam,
 quam Petrus apostolus sub typo interpretatur Ecclesiæ,
 Noe cum tribus filiis, singulas, non binas uxores introdu-
 xit. Etiam de immundis animalibus bina sumuntur, mascu-
 lus, & femina: ut ne in bestiis quidem, serpentibusq. cro-
 codilis, ac lacerris digamia habeat locum. Quod si de mun-
 dis septena ponuntur, idest, imparia; & in hoc uirginitatis
 ac pudicitie palma mōstratur: Egressus enim de arca Noe,
 Deo uictimas immolauit: non utique de pari, sed de impa-
 ri numero, quia alterum fetibus, atque coniugio, alterum
 sacrificio præparatum est. Atqui patriarchæ non singulas ha-
 buerunt uxores, immo & concubinas habuere plurimas.
 Et, ne hoc parum sit; Dauid multas, & Salomon habuit
 innumerabiles. Iudas ad Thamar, quasi ad scortum, in-
 greditur. Et iuxta occidentem litteram, Osce propheta

Gen. 2.

Matth. 19

Eph. 5

Gen. 4

Apoc. 2

Cant. 6

2. Ioan. 1

1. Petr. 3

Gen. 7

Gen. 8

1. Reg. 25

3. Reg. 12

Gen. 38

Osce 1

H 4 non

non solum meretrici, sed etiam adulteræ copulatur. Quod si & nobis iure conceditur, adhinniamus ad omnes feminas, &, in exemplum Sodomæ, & Gomorræ, ab ultimo die
Matth. 24 deprehendamus uendentes, & ementes, nubentes, & nuptui tradentes: ut tunc sit finis coniugii, quando terminus uitæ. Quod etsi post diluuium, & ante diluuium uiguit ista
Gen. 1. 8 sententia: Crescite, & multiplicamini, & replete terram:
1. Cor. 7 quid ad nos? in quos fines sæculorum decurrerunt, quibus
Matth. 3 dicitur: Tempus breue est, & iam securis ad radices arborum posita est, quæ siluam legis, & nuptiarum, euangelica
Eccl. 3 castitate succidat? Tempus amplexandi, & tempus longe
Hier. 16 fieri ab amplexibus. Hieremias, captiuitate propinqua,
Ezech. 24 uxorem prohibetur accipere. Ezechiel in Babylone, Morma est, inquit, uxor mea: & apertum est os meum. Nec ducturus uxore, nec ille, qui duxerat, possunt in opere coniugali libere prophetare. Olim gloriæ erat, illi audire uersiculum: Filii tui sicut nouellæ oliuarum, in circumitu mentis tuæ: & uideas filios filiorum tuorum. nunc de continentibus dicitur: Qui adhæret Domino, unus spiritus est. Et
Psal. 61 adhæsit anima mea post te: me suscepit dextera tua. Tunc
Exod. 21 oculum pro oculo, nunc uerberanti maxillam, præbemus
Matth. 5 & alteram. Illo tempore bellatoribus dicebatur: Accingere gladio tuo super femur tuum potentissime: modo
Ioan. 18 audit Petrus: Conde gladium tuum in uaginam: qui enim
Matth. 26 gladio percutit, gladio morietur. Hæc dicimus, non separantes legem & euangelium, ut Marcion calumniatur, sed unum atque eundem suscipientes Deum: qui pro uarietate temporum atque causarum principium & finis: serit, ut metat: plantat, ut habeat quod succidat: iacet fundamentum, ut ædificationi, consummato sæculo, culmen imponat. Alioquin, si ad sacramenta ueniamus, & futurorum ty
Gal. 4 pos, non nostro arbitrio, sed Apostolo disserente consideremus; Agar, & Sara, uel mons Sina, & Sion, duo testamenta significant. Lia lippientibus oculis, & Rachel, quæ Iacob amabat plurimum, synagogam Ecclesiamque testantur. Vnde & Anna prius sterilis, Fenennæ ubertate fecundior

dior est. Licet monogamia nos in Isaac & Rebecca præce- *Gen. 28*
 se rit: cuius solius partus Domini reuelatio est. Nec ulla alia
 feminarum Deum per se ipsam consulit. Quid loquar de
 Thamar, quæ Zaram, & Phares geminos fudit infantes:
 in quorū natiuitate diuisa maceria duos populos separauit:
 et ligata manus coccino, conscientiam Iudæorum iam tunc
 Christi passione resperfit. Ac de scorto prophetico? cuius *Osee 1*
 similitudo uel Ecclesiam significat de gentibus congregatā,
 uel, quod ipsi loco magis conuenit, synagogam primum as-
 sumptam de idololatriis per Abraham, & Moysen; deinde,
 post adulterium, & negationem saluatoris, sedentem plu-
 rimo tempore sine altari, sacerdotibus ac prophetis, & ui-
 ri pristini consortium præstolantem; ut, postquam subin-
 trauerit plenitudo gentium, tunc omnis Israel saluus fiat. *Rom. 11*
 Quasi in breui tabella latissimos terrarum situs ostendere
 uolui, ut pergā ad alias quæstiunculas; quarum prima de
 Annæ consilio est. Sola ne perpetua mærens carere iuuen-
 ta? Nec dulces natos, Veneris nec præmia noris? Id cine-
 rem, aut manes credis curare sepultos? Cui breuiter re-
 spondeat ipsa, quæ passa est: Tu lacrymis euicta meis, tu
 prima furentem His germana malis oneras, atque obii-
 cis hosti. Non licuit thalami expertem sine crimine ui-
 tam Degere more feræ, tales nec tangere curas. Non ser-
 uata fides cineri promissa Sichæi. Proponis mihi gaudia
 nuptiarum: ego tibi opponam pyram, gladium, & incen-
 dium. Non tantum boni est in nuptiis, quod speramus,
 quantum mali, quod accidere potest. & timendum est. Li-
 bido enim transacta semper sui relinquit pænitudinem;
 numquam satiatur; & extincta redaccenditur; usu crescit,
 & deficit; nec rationi paret, quæ impetu ducitur. Sed di-
 ces: Amplæ opes, & dispensatio rei familiaris egent aucto-
 ritate uiri. Scilicet perierunt domus cælibum: &, nisi cum
 seruulis tuis ipsa seruieris, familiæ tuæ imperare nō poteris.
 Auia tua, mater, & amita, nonne auctoritatis pristinae, ho-
 norisq. maioris sunt, dum eas & tota prouincia, & ecclesia-
 rum principes suspiciunt? Ergo milites, & peregrinantes,
 sine

sine uxoribus sua hospitola non regunt? & nec inuitant ad conuiuia, nec inuitantur? Quasi non possis probatæ ætatis habere famulos, uel libertos, in quorum nutrita es manibus; qui præsent domui, ad publicum respondeant, tributa persoluant; qui te suspiciant, ut patronam; diligant, ut alumnam; uenerentur, ut sanctam. Quære primum regnum Dei, & hæc omnia adiicientur tibi. Si de ueste cogitaueris; lilia tibi de euangelio proponuntur. Si de cibo; remitteris ad aues, quæ non serunt, neque metunt, & pater tuus cælestis pascit illas. Quæræ uirgines, & uiduæ, absque ulla sorde rumoris, suam sustantiolam gubernarunt? Caue, ne iungaris adolescentulis; ne iis adhæræas, propter quas Apostolus concedit secunda matrimonia, & sustineas in media tranquillitate naufragium. Si Timotheo dicitur: Adolescentiores uiduas deuota: Et iterum: Ama anus, ut matres; adolescentulas, ut sorores cum omni castitate: quare tu me commonentem non audias? Fuge personas, in quibus potest malæ cōuersationis esse suspicio: nec paratū habeas illud e triuio: sufficit mihi conscientia mea: non cu
Rom. 12 ro, quid de me loquantur homines. Et certe Apostolus prouidebat bona non tantum coram Deo, sed etiam coram hominibus: ne per illum nomen Dei blasphemaretur in gentibus. Habebat utique potestatem sororem mulierem circumducendi; sed nolebat se iudicari ab infideli conscientia.
1. Cor. 9 Et cum posset de euangelio uiuere, diebus ac noctibus laborabat manibus suis, ne quem grauaret credentium. Si scandalizat, inquit, esca fratrem; in æternum carnem non manducabo. Dicamus & nos: Si scandalizat soror, uel frater non unum, & alterum, sed totam Ecclesiam; nec sororem nidebō, nec fratrem. Melius est rem familiarem minui, quam salutem animæ perire. Melius est amittere, quod, uelimus, nolimus, aliquando perituum est. Melius est sponte dimittere, quam id amittere, pro quo omnia dimittenda sunt.
Luc. 12 Quis nostrum, non dicam cubitum, quod enorme est, sed unius unciolæ decimam parrem adicere potest ad staturam suam? & solliciti sumus, quid manducemus, aut quid

quid bibamus? Ne cogitemus ergo de crastino. Sufficit *Matth. 6*
 diei malitia sua. Iacob fratrem fugiens, magnis in patris do-
 mo diuitiis derelictis, nudus pergit in Mesopotamiam; &
 ut nobis fortitudinis suæ præberet exemplum, lapide capi- *Gen. 28*
 ti supposito, uidit scalam ad cælum usque subrectam, &
 Dominum innitentem super eam; per quam ascendebant
 angeli, & descendebant: ut nec peccator desperet salutem,
 nec iustus de sua uirtute securus sit. Atque, ut multa præ-
 teream: neque enim tempus est, ut assumpti testimonii om-
 nia edisseram: post annos uiginti diues Dominus, & pa- *Gen. 32*
 ter ditior, qui dudum Iordanem in baculo transierat, cum
 tribus turmis gregum in patriam reuertitur. Apostoli, to- *Matth. 10*
 to orbe peregrini, non æs in zona, non uirgam in manu,
 non caligas habuere in pedibus; & tamen dicere poterant:
 Nihil habentes, & omnia possidentes. Et: Aurum & ar- *2. Cor. 6*
 gentum non est nobis: quod autem habemus, hoc tibi da- *Act. 3*
 mus: in nomine Iesu Christi Nazareni surge, & ambula.
 Non enim erant diuitiarum sarcina prægrauati. Et ideo stan- *3. Reg. 19*
 tes cum Helia in foramine petrae, per angustias acus tran- *Matth. 19*
 sire poterant, & posteriora Domini contemplari. Nos ue-
 ro ardemus auaritia; & contra pecunias disputantes, auro
 sinum expandimus; nihilq. nobis satis est: et illud, quod
 de Megarensibus dicitur, iure miseris coaptari potest: Ae-
 dificant, quasi semper uicturi: uiuunt, quasi altera die mo-
 rituri. Et hæc facimus, quia Domini uerbis non credimus,
 & quia ætas optata cunctis non uiciniam mortis, quæ debe-
 tur mortalibus lege naturæ, sed, cassa spe, annorum nobis
 spatia pollicetur. nemo enim tam fractis uiribus, & sic de-
 crepitæ senectutis est, ut non putet se unum adhuc annum
 esse uicturum. unde subrepat obliuio condicionis suæ; ut
 terrenum animal, & iam iamq. soluendum erigatur in su-
 perbiam, & animo cælum teneat. Verum quid ago? fra-
 cta naui, de mercibus disputo. Qui tenebat, de medio fit:
 & non intelligimus antichristum appropinquare, quæ do-
 minus Iesus Christus interficiet spiritu oris sui. Væ prægnā *2. Thess. 2*
 tibus, & nutrientibus in illa die: quorum utrumque de fru- *Marc. 13*
 ctibus

Psal. 82

stibus nuptiarum est. Præsentium miseriarum pauca percurram. Quod rari hucusque residemus, non nostri meriti, sed Domini misericordiæ est. Innumerabiles, & ferocissimæ nationes uniuersas Gallias occuparunt. Quidquid inter alpes & Pyrenæum est, quod Oceano & Rheno includitur, Quadus, Vuandalus, Sarmata, Halani, Gipedes, Heruli, Saxones, Burgundiones, Alemanni, & o lugenda respublica, hostes Pannonii uastarunt. Etenim Assur uenit cum illis. Maguntiacum, nobilis quondam ciuitas, capta, atque subuersa est, & in ecclesia multa hominum milia trucidata. Vangiones longa obsidione deleti. Remorū urbs præpotens, Ambiani, Attrebatæ, extremiq. hominum Morini, Tornacus, Nemete, Argentoratus, translati in Germaniam. Aquitanix, nouemq. populorū Lugdunensis, & Narbonensis prouinciæ, præter paucas urbes populata sunt cuncta: quas & ipsas foris gladius, intus uastat fames. Non possum absque lacrymis Tolosæ facere mentionē: quæ ut hucusque non rueret, sancti episcopi Exuperii merita præstiterunt. Ipsæ Hispaniæ, iam iamq. peritura, quotidie contremiscunt, recordantes irruptionis Cimbricæ; & quidquid alii semel passi sunt, illæ semper timore patiuntur. cetera taceo, ne uideas de Dei desperare clementia. Olim a mari Pontico usque ad alpes Iulias non erant nostra, quæ nostra sunt: & per annos triginta, fracto Dannubii limite, in mediis Romani imperii regionibus pugnabatur. Aruerunt uetustate lacrymæ. præter paucos senes, omnes in captiuitate, & obsidione generati, non desiderabant, quam non nouerant, libertatem. Quis hoc credet? quæ digno sermone historiæ comprehendent? Romā in gremio suo, non pro gloria, sed pro salute pugnare? immo ne pugnare quidem, sed auro & cuncta supellectile uitam redimere? quod non uitio principum, qui uel religiosissimi sunt, sed scelere semibarbari accidit proditoris; qui nostris contra nos opibus armauit inimicos. Aeterno quondam dedecore Romanū laborabat imperiū; quod, Gallis cuncta uastantibus, fusoq. apud Aliam exercitu, Romam Brennus

Brennus intrauit, nec pristinam poterat abolere ignominiam, donec & Gallias, genitale Gallorum solum, & Gallograciam, in qua confederant orientis occidentisq. uictores, suo imperio subiugasset. Hannibal, de Hispaniæ finibus orta tempestas, cum uastasset Italiam, uidit Urbem, nec ausus est obsidere. Pyrrhum tanta tenuit Romani nominis reuerentia, ut, deletis omnibus, e propinquo recederet loco: nec audebat uictor aspicere, quam regum didicerat ciuitatem. et tamen pro hac iniuria, (non enim dicam superbia) quæ bonos exitus habuit, alter, toto orbe fugitiuus, tandem Bithyniæ mortem ueneno reperit: alter reuersus in patriam, in suo regno occubuit: & utriusque prouinciæ, populi Romani uestigiales sunt. Nunc, ut omnia prospero fine eueniant; præter nostra, quæ amisimus, non habemus quod uictis hostibus auferamus. Potentiam Romanæ urbis ardens poeta describens, ait: Quid satis est, si Roma parum est? Quod nos alio mutemus elogio: Quid saluum est, si Roma perit. Non, mihi si linguæ centum sint, oraq. centum, Ferrea uox, omnes captorū dicere pœnas, Omnia cæforū percurrere nomina possim. Et hæc ipsa, quæ dixi, periculosa sunt tam loquentibus, quam audientibus; ut ne gemitus quidem liber sit; nolentibus, immo nec audentibus nobis flere, quæ patimur. Responde mihi, carissima in Christo filia: inter ista nuptura es? quem acceptura uirum, cedo? fugiturum, an pugnatum? quid utrumque sequatur, intelligis. et pro Felcennino carmine, terribilis tibi rauco sonitu buccina concrepabit: ut, quas habes pronubas, habeas forte lugentes. aut quibus deliciis affluas; quæ possessionum tuarum redditus perdidisti, quæ obsessam familiolam tuam morbo & fame cernis contabescere? Sed absit, ut de te talia sentiā, ut sinistrum quippiam suspicer de ea, quæ suā Domino animam consecrauit. Non tam tibi, quā sub tuo nomine aliis sum locutus; quæ otiosæ, & curiosæ, atque uerbosæ domos cir-
1.Tim.5
Eph.3.
 cumeunt matronarum: quarum Deus uenter est, & gloria
 in confusione earum: quæ nihil aliud de scripturis, nisi di-
gamix

gamix præcepta nouerunt: quæ in alieno corpore sua desideria consolantur; ut, quod ipsæ fecerunt, alias facere uideant, & malarum societate palpentur. quarum cum impudentiam, & propositiones apostolicarum sententiarum interpretatione contriueris; legito, quo modo tibi in uirginitate seruanda uiuendum sit, librum ad Eustochium de uirginitate seruanda, & alios ad Furiam, atque Saluinam: quarum altera Probi, quondam consulis, nurus, altera Gildonis, qui Africam tenuit, filia est. hic libellus de monogamia, sub nomine tuo, titulum possidebit.

ARGUMENTVM.

GAUDENTII precibus motus, docet quo modo Pacatula infantis, uirginitati iam destinata, rudis, ac tenera ætas sit instruenda.

HIERONYMVS AD GAUDENTIVM,
de pacatulae infantulae educatione.

EPISTOLA XII.

CAUSA difficilis paruulae scribere; quæ non intelligit, quid loquaris; cuius animum nescias; de cuius uoluntate periculose promittas; ut, secundum præclari oratoris exodium, spes in ea magis laudanda sit, quam res. Quid enim hortaris ad continentiam, quæ placetas desiderat? quæ in sinu matris garrula uoce balbutit? cui dulciora sunt mella, quàm uerba? Audiat profunda Apostoli, quæ anilibus magis fabulis delectatur? Prophetarum ænigmata sentiat, quam tristior gerulae uultus exagitat? Euangelii intelligat maiestatem, ad cuius fulgura omnis mortalium sensus hebetatur? Ut parenti subiiciatur, hortet, quæ manu tenera ridentem uerberat matrem? Itaque Pacatula nostra hoc epistolum post lectura suscipiat: interim modo litterarum elementa cognoscat; iungat syllabas; discat nomina;

Ad Gaudentium, de infantula educatione. 127

na; uerba confociet: atque, ut uoce tinnula ista meditetur, proponantur ei crustula, mulsa præmia; &, quidquid guttu suaue est, quod uernat in floribus, quod rutilat in gemmis, quod blanditur in pupis, acceptura festinet. interim & tenero tentet pollice fila ducere: rumpat sæpe stamina, ut aliquando non rumpat: post laborem lusibus gestiat: de matris pendeat collo: rapiat oscula propinquorum: psalmos mercede decantet: amet, quod cogitur discere; ut non opus sit, sed delectatio; non necessitas, sed uoluntas. Solent quædam, cum futuram uirginem sponderint, pulchra tunica eam induere, & furtiuo operire pallio, auferre linteamina, nihil in collo, nihil in capite auri sinere: reuera bona consilio, ne habere discat in tenero, quod postea ponere compellatur. Aliis uero econtra uidetur. Quid enim, aiunt, si ipsa non habuerit, habentes alias non uidebit? *Φιλόκοσμον* genus femineum est; multasq. etiam insignis pudicitie, quamuis nulli uirorum, tamen sibi scimus libenter ornari. quin potius habendo satietur; & cernat laudari alias, quæ ista non habeant. meliusq. est, ut satiata contemnat, quam non habendo habere desideret. Tale uero quid & Israelitico fecisse uides populo Dominum, ut, cupientibus Aegyptias carnes, usque ad nauseam & uomitum præberet examina coturnicum: multosq. sæculi reperiens homines facilius carere experta corporis uoluptate, quam eos, qui a pueritia libidine nesciant: ab aliis enim nota calcari, ab aliis ignota appeti: illos uitare pœnitendo suauitatis infidias, quas fugerunt; hos carnis illecebras, dulci titillatione corporis blandientes, dum mella putant, uenena noxia reperire: mel enim distillare labia meretricis, quod ad tempus impinguat uescentium fauces, & postea felle amarius inuenitur. unde & in Domini sacrificiis mel non offerunt; ceraq. contempta, quæ mellis hospitum est, oleum accenditur in templo Dei, quod de amaritudine exprimitur oliuarum. Pascha quoque cum amaritudinibus comedi in azy-
mis sinceritatis, & ueritatis iubetur: quas qui habuerit, in
sæculo persecutionem sustinebit. unde & propheta mystice
cantat:

Exod. 16

Prou. 5

Leuit. 2

Exod. 12

1. Cor. 5

Hier. 15 cantat: Sedebam solus; quia amaritudine repletus sum.

Quid igitur? Luxuriandum est in adolescentia, ut postea luxuria fortius contemnatur? Absit uero, inquit. Vnus-

1. Cor. 7 quisque enim, in qua uocatione uocatus est, in ea permaneat. Circumcisis quis, idest, uirgo uocatus est: non adducat præputium, hoc est, non querat pelliceas tunicas nu-

Gen. 3 ptiarum, quibus Adam, eiektus de paradiso uirginitatis, indutus est. In præputio quis uocatus est, hoc est, habens uxorem, & matrimonii pelle circumdatus: non querat uirginitatis & æternæ pudicitie nuditatem, quam semel habe-

Prou. 5 re desinit: sed utatur uase suo in sanctificatione, & pudici-

Hier. 2 tia; bibatq. de fontibus suis: & non querat cisternas luparum dissipatas; quæ purissimas aquas pudicitie continere

1. Cor. 7 non possunt. unde & idem Paulus in eodem capitulo, de uirginitate & nuptiis disputans, seruos carnis uocat in matrimonio constitutos, liberos eos, qui absque iugo nuptiarum tota Domino seruiunt libertate. Quod loquimur, nõ in uniuersum loquimur, sed in parte tractamus, nec de omnibus, sed de quibusdam dicimus. ad utrumque enim sexum, non solum ad uas infirmum, noster sermo dirigitur. Virgo es: quid te mulieris delectat societas? quid fragilem & subtilem ratem magnis comittis fluctibus, & grande periculum nauigationis incertæ securus ascendis? Nescis quid desideres, & tamen sic ei iungeris, quasi aut ante desideraueris, aut, ut leuissime dicam, postea desideraturus sis. Sed ad ministerium iste sexus est aptior. Elige ergo anum deformem: elige probatæ in Domino continentie. quid te adolescentula, quid pulchra, quid luxuriosa delectat? Uteris balneis; cute nitida, rubicundis genis incedis; carnibus uesceris; affluis diuitiis; pretiosa ueste circumdaris: & iuxta serpentem mortiterum secure dormire te credis? At non habitas in eodem hospitio. In nocte dum taxat: ceterum totos dies in huius confabulatione consumis. Quare solus cum sola, & non cum arbitris sedes; ut, cum ipse non pecces, aliis peccare uidearis; ut exemplo sis miseris, qui nominis tui auctoritate delinquant?

Tu

Tu quoque uirgo, uel uidua, cur tam longo sermone uiri retineris? cur cum solo relictâ non metuis? saltemalui te, & uesicæ cogat necessitas, ut ex eas foras; ut deserâs in hac re eum, cum quo licentius, quam cum germano, multo inuerecundius, quam cum marito, egisti. Sed de scripturis sanctis aliquid interrogas. Interroga publice, audiant pedisequæ, audiant comites tuæ. Omne, quod manifestatur, lux est. Bonus sermo secreta non quærit, quin potius delectatur laudibus suis, & testimonio plurimorum. Magister egregius contemnit uiros, despicit fratres, & in unius mulierculæ secreta eruditione defudat. Declinanti parumper de mea disputatione, aliorum occasione; & dum infantem Paculam instituo, immo & nutrio, multarum subito mihi male pacatarum bella suscepi. reuertar ad propositum. Sexus femineus suo iungatur sexui: nesciat, immo timeat cû pueris ludere. Nullum impudicum uerbum nouerit: et, si forte in tumultu familiæ discurrentis aliquid audiat, non intelligat. Matris nutum pro uerbis, ac monitis, & pro imperio habeat. Amet ut parentem, subiiciatur ut dominæ, timeat ut magistram. Cum autem uirgunculam rudem, & edentulam septimus ætatis annus exceperit, & creperit erubescere, scire quid taceat, dubitare quid dicat; discat memoriter psalterium, & usque ad annos pubertatis libros Salomonis; Euangelia, Apostolos, & Prophetas sui cordis thesaurum faciat: nec liberior procedat ad publicum, nec semper ecclesiarum quærat celebritatem: in cubiculo suo totas delicias habeat: numquam iuuenulos, numquam cincinnatos uideat: uocis dulcedines per aurem animam uulnerantes, puellarumq. lasciuia repellantur: quæ quanto licentius adeunt, tanto difficilius euitantur: & quod didicerunt, secreto docent, inclusamq. Danaen uulgi sermonibus uiolant. Sit ei magistra comes, pædago cultos, non multo uino dedita, non, iuxta Apostolum, otiosa, atque uerbosa, sed sobria, grauis, lanifica, & ea tantum loquens, quæ animum puellarem ad uirtutem instituunt. Vt enim aqua in areola digitum sequitur præcedentem; ita ætas

I mollis

1.Tim.5

mollis & tenera in utramque partem flexibilis est, &, quocumque duxeris, trahitur. Solent lasciuī, & comptuli iuuenes blandimentis, affabilitate, munusculis aditum sibi per nutrices, aut alumnas quærere, &, cum clementer intrauerint, de scintillis incendia concitare, paulatimq. proficere ad impudentiam, & nequaquam posse prohiberi, illo in se uersiculo comprobato: Aegre reprehendas, quod finis consuescere. Pudet dicere, & tamen dicendum est. Nobiles feminae, quæ nobiliores habuere neglectui procos, uilissimæ condicionis hominibus & seruulis copulantur, ac, sub nomine religionis, & umbra continentie, interdum deserunt uiros Helenæ, sequuntur Alexandros, nec Menelaos pertimescunt. Videntur hæc, planguntur, & nō uiuificantur: quia multitudo peccantiū peccandi licentiam subministrat. Pro nefas, orbis terrarum ruit, in nobis peccata nō ruunt. Vrbs incluta, & Romani imperii caput, uno hausta est incendio. nulla est regio, quæ non exules Romanos habeat. in cineres ac fauillas sacræ quondam ecclesiæ conciderunt, & tamen studemus auaritiæ. Viuimus quasi altera die morituri, & ædificamus quasi semper in hoc sæculo uiaturi. Auro parietes, auro laquearia, auro fulgent capita columnarum; & nudus, atque esuriens ante fores nostras Christus in paupere moritur. Legimus Aaron pontificem isse obuiam furentibus flammis, &, accenso thuribulo, Dei iram cohibuisse, stetit inter mortem & uitam sacerdos magnus: nec ultra uestigia eius ignis procedere ausus est. Moyse loquitur

Leu. 10 Deus: Dimitte me, & delebo populum istum. Quando dicit, Dimitte me, ostendit se teneri posse, ne faciat quod minatus est. Dei enim potentiam serui preces impediabant. Quis, putas, ille sub cælo est, qui nunc iræ Dei possit occurrere? qui obuiare flammis? & cum Apostolo dicere:

Rom. 9 Optabam ego anathema esse pro fratribus meis? Pereunt cum pastoribus greges: quia sicut populus, sic sacerdos.

Esai. 24 Moyses compassionis loquebatur affectu: Si dimittis populo huic, dimitte: sin autem, dele me de libro tuo. Vult perire cum pereuntibus, nec propria salute contentus est.

Gloria

Gloria quippe regis, multitudo populi. His Pacatula nostra nata est temporibus: inter hæc crepundia primam carpit ætatem, ante lacrymas scitura, quam risum; prius fletum sensura, quam gaudium. necdum introitus, iam exitus. talem semper putet fuisse mundum: nesciat præterita, fugiat præsentia, futura desideret. Hæc ut tumultuario sermone distarem, & post neces amicorum, luctumq. perpetuum, infanti senex longo postliminio scriberem, tua, Gaudenti frater, impulit caritas: maluiq. parum, quam nihil omnino, poscenti dare: quia in altero uoluntas oppressa luctu, in altero amicitie dissimulatio est.

ARGVMENTVM.

PAVLINVS, qui postea Nola fuit Episcopus, eloquens, ac eruditus iuuenis, cum seculo monachus factus renunciasset, ad Hieronymum iam senem scripsit, laudans eum, quod longo tempore Christo in sanctis Hierosolymæ locis seruierit, misso interea ad illum libro, quem in laudem, & defensionem Theodosii Imperatoris scripserat, rogansq. ut modum aliquem peragenda sibi uite præfigeret. Hunc igitur ob eloquentiam, dicendiq. facilitatem collaudatum, hortatur ad sacrarum Scripturarum cognitionem; normamq. uiuendi, sancte, accommodateq. illi proponit.

HIERONYMVVS AD PAVLINVM,
de institutione monachi.

EPISTOLA XIII.

ONVS homo de bono cordis thesauro profert ea, Matth. 12

B quæ bona sunt: & ex fructibus arbor cognoscitur. Luc. 6. 14

Metiris nos uirtutibus tuis, & paruos magnus extollis: ultimamq. partem conuiuui occupas, ut patrisfamilias iudicio proueharis. quid enim in nobis, aut quantum est, ut doctæ uocis mereamur præconiū? ut illo ore,

I 2 quo

quo religiosissimus princeps defenditur, humiles nos, modiciq. laudemur? Noli igitur, frater carissime, annorū nos æstimare numero: nec sapientiam canos reputes, sed canos sapientiam, Salomone testante: Cani hominis prudentia
Sap. 4 eius. Nam & Moyses septuaginta presbyteros iubetur elige-
Exod. 18 gere, quos ipse sciret esse presbyteros, utique non æuo, sed prudentia iudicandos. Et Daniel adhuc puer longæuos iudicat, atque impudicos senes ætas lasciuia condemnat. Noli, inquam, fidem pensare temporibus: ne me iccirco meliorem putes, quod prior in Christi exercitu cœperim militare. Paulus apostolus, & uas electionis, de persecutore mutatus, nouissimus in ordine, primus in meritis est:
1. Cor. 15 quia, extremus licet, plus omnibus laborauit. Iudas, qui
Psal. 54 quondam audierat: Tu autem homo, qui simul mecū dulces capiebas cibos, dux meus & notus meus, in domo Dei ambulauimus cum consensu, proditor amici & magistri:
Matth. 27 Saluatoris arguitur uoce, & nodum in formis leti trabe necit ab alta. E contrario latro crucē mutat paradiso, & facit homicidii poenā martirium. Quanti hodie diu uiuēdo portant funera sua, & quasi sepulcra dealbata, plena sunt ossibus mortuorū? Subitus calor longum uincit teporem. Denique & tu, audita sententia Saluatoris: Si uis perfectus esse, uade, uende omnia, quæ habes, & da pauperibus, & ueni sequere me: uerba uertis in opera, & nudam crucem nudus sequens, expeditior & leuior scandis scalam Iacob. Tunicam mutas cum animo: nec, pleno marsupio, gloriosas sordes appetis; sed, puris manibus, & candido pectore, pauperem te & spiritu, & operibus gloriaris. Nihil est enim grande, tristi & lurida facie uel simulare, uel ostentare ieiunia, possessionem redditibus abundare, & uile iactare palliolum. Crates ille Thebanus, homo quondam ditissimus, cum ad philosophandum Athenas pergeret, magnum auri pondus abiicit, nec putauit se simul posse & uirtutes, & diuitias possidere. nos suffarcinati auro, Christum pauperem sequimur; & sub prætextu elemosynæ, pristinis opibus incubantes, quo modo possumus aliena fideliter distribuere, qui

qui nostra timide referuamus. Plenus uenter facile de ieiunio disputat. Non Hierosolymis fuisse, sed Hierosolymis bene uixisse, laudandum est. Illa expetenda est ciuitas, non quæ occidit prophetas, & Christi sanguinem fudit; sed quæ in monte sita, celi non potest: quam matrem sanctorum Apostolus clamarat: in qua se municipatum cum iustis lætatur habere. Neque uero hoc dicens memet ipsum inconstantiæ redarguo; damnoque quod facio: ut frustra uidear, ad exemplum Abraham, & meos, & patriam reliquisse; sed non audeo Dei omnipotentiam angusto fine concludere, & coartare paruo terræ loco, quem non capit cælum. Singuli quique credentium, non locorum diuersitatibus, sed fidei merito ponderantur. Et ueri adoratores neque Hierosolymis, neque in monte Garizim adorant patrem: quia Deus spiritus est, & adoratores eius in spiritu & ueritate adorare oportet. Spiritus autem spirat, ubi uult: & Domini est terra, & plenitudo eius. Postquam, siccato Iudææ uellere, uniuersus orbis celestis rore persusus est; & multi, de oriente & occidente uenientes, recubuerunt in sinu Abraham: desit notus esse tantum in Iudæa Deus, & in Israel magnum nomen eius: sed in omnem terram exiuit sonus apostolorum, & in fines orbis terræ uerba eorum. Saluator ad discipulos loquens cum esset in templo, Surgite, inquit, abeamus hinc. Et ad Iudæos: Relinquetur uobis domus uestra deserta. Si cælum & terra transibunt, utique transibunt omnia, quæ terrena sunt. Et crucis igitur & resurrectionis loca profunt his, qui portant crucem suam, & cum Christo resurgunt quotidie, qui dignos se tanto exhibent habitaculo. Ceterum qui dicunt: Templum Domini, templum Domini: audiant ab Apostolo: Vos estis templum Domini, & spiritus sanctus habitat in uobis. Et de Hierosolymis, & de Britannia æqualiter patet aula celestis: Regnum enim Dei intra uos est. Antonius, & cetera Aegypti, & Mesopotamiæ, Ponti, Cappadociæ, & Armeniæ examina monachorum, non uidere Hierosolymam: & patet illis absque hac urbe paradisi ianua. Beatus Hila-

rion, cum Palæstinus esset, & in Palæstina uiueret, uno tantum die uidit Hierosolymam; ut nec contemnere loca sancta propter uiciniam, nec rursus Deum loco claudere uideretur. Ab Hadriani temporibus usque ad imperium Constantini, per annos circiter centum octoginta, in loco resurrectionis simulacrum Iouis, in crucis rupe statua ex marino re Veneris a gentibus posita colebatur, exillimantibus persecutionis auctoribus, quod tollerent nobis fidem resurrectionis, & crucis, si loca sancta per idola polluisent. Bethlehem nunc nostram, & angustissimum orbis locum, de quo psalmista canit, Veritas de terra orta est, lucus inumbrabat Thamuz, idest, Adonidis: & in specu, ubi quondam Christus paruulus uaguit, Veneris amasius plangebatur. Quorsum, inques, hæc tam longo repetita principio? Videlicet, ne quidquam fidei tuæ deesse putes, quia Hierosolymam non uidisti; nec nos ideo meliores existimes, quod huius loci habitaculo fruimur; sed siue hic, siue alibi, æqualem te pro operibus tuis apud Dominum habere mercedem. Reuera, ut simpliciter motus mentis meæ fatear, considerans & propositum tuum, & ardorem, quo sæculo renunciaisti, differentias in locis arbitror, si, urbibus & frequentia urbium derelicta, in agello habites, & Christum quæras in solitudine, & ores solus in monte cum Iesu, sanctorumque tantum locorum uicinitatibus perfruaris, idest, ut & urbe careas, & propositum monachi non amittas. Quod loquor, non de episcopis, non de presbyteris, non de clericis loquor, quorum aliud officium est, sed de monacho, & monacho quondam apud sæculum nobili: qui ideo pretium possessionum suarum ad pedes apostolorum posuit, docens pecuniam esse calcandam, ut humiliter & secreto uictitans, semper contēnat, quod semel contempsit. Si crucis, & resurrectionis loca nō essent in urbe celeberrima, in qua curia, in qua aula militum, in qua scorta, mimi, scurræ, & omnia sunt, quæ solent esse in ceteris urbibus; uel si monachorum turbis solummodo frequentaretur; expectandum re uera huiusmodi cunctis monachis esset habitaculum: nunc uero

summar

summa stultitia est renunciare saeculo, dimittere patriam, urbes deserere, monachum profiteri, & inter maiores populos periculosius uiuere, quam eras uicturus in patria. De toto huc orbe concurritur. plena est ciuitas uniuersi generis hominum: & tanta utriusque sexus confusio, ut, quod alibi ex parte fugiebas, hic totum sustinere cogaris. Quia igitur fraterne interrogas, per quam uiam incedere debeas; reuelata tecum facie loquar. Si officium uis exercere presbyteri; si episcopatus te uel opus, uel honor forte delectat; uide in urbibus, & castellis; & aliorum salutem fac lucrum animae tuae. sin autem cupis esse, quod diceris, monachus, idest, solus: quid facis in urbibus, quae utique non sunt solorum habitacula, sed multorum? Habet unumquodque propositum principes suos. Romani duces imitentur Camillos, Fabricios, Regulos, Scipiones. philosophi proponant sibi Pythagoram, Socratem, Platonem, Aristotelem. poetae annulentur Homerum, Virgilium, Menandrum, Terentium: historici Thucydidem, Sallustium, Herodotum, Liuium: oratores Lysiam, Gracchos, Demosthenem, Tullium. & ut ad nostra ueniamus, episcopi & presbyteri habeant in exemplum apostolos, & apostolicos uiros: quorum honorem possidentes, habere nitantur & meritum. nos autem habeamus propositi nostri principes, Paulos, Antonios, Iulianos, Hilariones, Macarios. & ut ad scripturarum auctoritatem redeam, noster princeps Helias, noster Heliseus, nostri duces filii prophetarum, qui habitabant in agris & solitudinibus, & faciebant sibi tabernacula prope fluentia Iordanis. De his sunt & illi filii Rechab, qui uinum & ficeram non bibebant, qui morabantur in tentoriis, qui Dei per Hieremiam uoce laudantur, & promittitur eis, quod non deficiat de stirpe eorum uir stans coram Domino. hoc reor & septuagesimi psalmi titulum significare: Filiorum Ionadab, & eorum, qui primi in captiuitatem ducti sunt. Iste est Ionadab filius Rechab, qui in Regnorum libro scribitur currum ascendisse cum Hieu. Et huius filii sunt, qui in tabernaculis semper habitantes, ad

4. Reg. 6

Hier. 35

4. Reg. 16

Hier. 35

I 4 extremum

extremum, propter irruptionem Chaldaici exercitus, Hierosolymam intrare compulsi, hanc primi captiuitatem sustinuisse dicuntur, quod, post solitudinis libertatem, urbe, quasi carcere, sunt reclusi. Obsecro itaque te, ut, quoniam sanctæ sororis tuæ ligatus es uinculo, & non penitus expedito pergis gradu, siue hic, siue ibi, multitudines hominum, & officia, & salutationes, & conuiuia, ueluti quasdam catenas, fugias, uoluptatum. Sit utilis & uespertinus cibus, holera, & legumina: interdumq. pisciculos pro summis ducas deliciis. Qui Christum desiderat, & illo pane uestitur; non querit magnopere, de quam pretiosis cibus sterco conficiat. Quidquid post gulam non sentitur, idem tibi sit, quod panis, & legumina. Habes aduersus Iouinianum libros, de contemptu uentris, & gutturis plenius differentes. Semper in manu tua sacra sit lectio. Frequenter orandum, & flexo corpore mens erigenda ad Dominum. Crebræ uigiliæ, & uentre uacuo sæpius dormiendum. Rumusculos, & gloriolas, & palmantes adulatorum, quasi hostes, fuge. Pauperibus, & fratribus, refrigeria sumptuum manu propria distribue. Rara est in hominibus fides. Non credis uerum esse, quod dico? cogita Iudæ oculos. Humilitatem uestium tumentis animo non appetas. Sæcularium, & maxime potentium consortium deuita. Quid tibi necesse est ea uidere crebrius, quorum contemptu monachus esse cœpisti? Soror præcipue tua matronarum declinet consortia. Nec inter sericas uestes, & gemmas circumsedentium feminarum se sordidatâ aut doleat, aut miretur: quia alterum propositi pœnitentia, alterum iactantiæ seminariū est. Caue, ne, quasi fidelis & famosus tuorum quondam dispensator, alienam pecuniam distribuendam accipias. intelligis, quid loquar. Dedit enim tibi Dominus in omnibus intellectum. Habeto simplicitatem columbæ, ne cuiquam machineris dolos; & serpentis astutiam, ne aliorum supplanteris insidiis. Non multum distat in uitio, uel decipere posse, uel decipi Christianum. Quem senseris tibi aut semper, aut crebro de nummis loquentem, excepta eleemosyna, quæ

Matth. 10

quæ indifferenter omnibus patet, institorē potius habeto, quam monachum. Præter uictum, & uestitum, & manifestas necessitates, nihil cuiquam tribuas, ne filiorum panem canes comedant. Verum Christi templum anima credentis est: illam exorna, illam uesti, illi offer donaria, in illa Christum suscipe. Quæ utilitas est, parietes fulgere gemmis, & Christum in paupere fame periclitari? Iam non sunt tua, quæ possides: sed dispensatio tibi credita est. *Act. 5* Memeto Ananixe, & Saphiræ. illi sua timide seruauerunt: tu considera, ne Christi substantiam imprudenter effundas, idest, ne immoderato iudicio re pauperū tribuas, non pauperibus; & secundum dictum prudentissimi uiri, liberalitate liberalitas pereat. Noli respicere ad phaleras, & nomina uana Catonū. Ego te, inquit, intus, & in cute noui. Esse Christianū, grande est, nō uideri. Et nescio quo modo plus placent mūdo, qui Christo displicent. Hæc nō, sicut aiunt, Sus Mineruæ, sed ingredientem pelagus amicus amicū monui, maleis a te facultatem meam requiri, quam uoluntatem: ut, in quo ego lapsus sum, tu firmo pergeres gradu. Librum tuum, quem pro Theodosio principe prudenter ornatēq. compositum transmissisti, libenter legi, & præcipue mihi in eo subdiuisio placuit. cumq. in primis partibus uincas alios, in penultimis te ipsum superas. Sed & ipsum genus eloqui præsum est, & nitidum, & cum Tulliana luceat puritate, crebrū est in sententiis. iacet enim, ut ait quidā, oratio, in qua tantum uerba laudantur. Præterea magna est rerum consequentia, & alterum pendet ex altero. Quidquid assumpseris, uel finis superiorum, uel initium sequentium est. Felix Theodosius, qui a tali Christi oratore defenditur. Illustrasti purpuras eius, & utilitatem legum futuris sæculis consecrasti. Maeste uirtute: qui talia habes rudimenta, qualis exercitatus miles eris? O si mihi liceret istiusmodi ingenium non per Aonios montes, & Heliconis uertices, ut poetæ canunt, sed per Sion, & Itabirium, & Sina excelsa ducere; si contingeret docere, quæ didici, & quasi per manus mysteria tradere scripturarum: nasceretur nobis aliquid

quid, quod docta Græcia non haberet. Audi ergo mi conserne, amice, germane, ausculta paulisper, quo in scripturis sanctis calle gradiaris. Totum, quod legimus in diuinis libris, nitet quidem, & fulget etiam in cortice, sed dulcius in medulla est. Qui edere uult nucleum, frangat nucem.

Psal. 118 Reuela, inquit Dauid, oculos meos, & considerabo mirabilia de lege tua. Si tantus propheta tenebras ignorantie confitetur; qua nos putas paruulos, & pene lactentes inscitie nocte circumdari? Hoc autem uelamen non solum in facie Moysi, sed & in euangelistis, & apostolis positum est.

2. Cor. 3 Turbis saluator in parabolis loquebatur, & contestans mysticum esse quod dicebatur, aiebat: Qui habet aures audiendi, audiat. Nisi aperta fuerint uniuersa, quæ scripta sunt

Matth. 13 ab eo, qui habet clauem Dauid; qui aperit, & nemo claudit; claudit, & nemo aperit: nullo alio referate pandentur.

Luc. 8 Si haberes hoc fundamentum; immo si quasi extrema manus operi tuo induceretur; nihil pulchrius, nihil doctius, nihil dulcius, nihilq. Latinius tuis haberemus uoluminibus. Ter tullianus creber est in sententiis, sed difficilis in loquendo.

Apoc. 3 Beatus Cyprianus, instar fontis purissimi, dulcis incedit, & placidus; & cū totus sit in exercitatione uirtutum, occupatus persecutionum angustiis, de scripturis diuinis nequaquam disseruit. Indyto Victorinus martyrio coronatus, quod intelligit, eloqui non potest. Lactantius, quasi quidam fluminis eloquentie Tullianæ, utinam tam nostra confirmare potuisset, quam facile aliena destruxit. Arnobius inæqualis, & nimius est, & absque operis sui partitione confusus. Sanctus Hilarius Gallicano cothurno attollitur; & cū Græcæ floribus adornetur, longis interdum periodis inuoluitur, & a lectione simpliciorum fratrum procul est. Taceo de ceteris, uel defunctis, uel etiam adhuc uiuentibus, super quibus in utramque partem post nos alii iudicabunt. Ad re ipsum ueniam Symmysten, sodalem meum, & amicum, amicum, inquam, meum, antequam notum: & precabor, ne assentatione in necessitudine suspiceris: quin potius uel errare me existimato, uel amore labi, quam amicum adulatione

latione

latione decipere. Magnum habes ingenium, & infinitam sermonis suppellectilē: & facile loqueris, & pure; facilitasq. ipsa, & puritas mixta prudentiæ est: capite quippe sano, omnes sensus uigent. huic prudentiæ, & eloquentiæ si accederet uel studium, uel intelligentia scripturarum; uiderem te breui arcem tenere nostrorum; & ascendentem cum Iacob tecta Sion, canere in domatibus, quod in cubilibus cognouisses. Accingere, queso te, accingere. Nihil sine magno labore uita dedit mortalibus. Nobilem te Ecclesia habeat, ut prius senatus habuit. Prepara tibi diuitias, quas quotidie eroges, & numquam deficiant, dum uiget ætas, dum nondum canis spargitur caput, antequā subeant morbi, tristisq. senectus, Et labor, & diræ rapiat inclementia mortis. Nihil in te mediocre esse cōtentus sum: totū summum totū perfectum desidero. Sanctū Vigilantium presbyterum qua auuiditate susceperim, melius est ut ipsius uerbis, quā meis discas litteris: qui cur tam cito a nobis profectus sit, & nos reliquerit, nō possum dicere; ne lædere quēpiam uidear. tamen, quasi prætereuntem & festinantem paululum retinui, & gustum ei nostræ amicitie dedi; ut per eum discas, quid in nobis non desideres. Sanctam conseruam tuam, & tecum Domino militantem, per te saluari uolo.

ARCV-

PAVLINVS (eius enim epistola hæc esse creditur, non Hieronymi) Celantiam, nobilem matronam, a qua obnixè rogatus de hoc fuerat, instruit quo modo inter honores, diuitias, matrimony onera, vitam suam sancte, ac religiose ducat.

AD CELANTIAM MATRONAM,
de ratione pie uiuendi, forte Paulini
Nolani episcopi

EPISTOLA XIII.

Eccl. 4

ETVS scripturæ celebrata sententia est: Esse pudorem, quo gloria inueniatur, & gratia; & esse rursus pudorem, qui soleat parere peccatum. Cuius dicti ueritas, quamquam satis ad omnium intelligentiam ipsa sui luceat claritate, mihi tamen nescio quo modo in præsentī causa proprius innotuit. prouocatus enim ad scribendum litteris tuis, quæ miris hoc a me obsecrationibus flagitabant, diu fateor de responsione dubitavi, silentium mihi imperante uerecundia. cui tamē fortissime resistebat, & uim faciebat, precum tuarum fidelis ambitio: pugnatq. acriter cum hæsitazione mea humilitas obsecrantis; & magna quadam fidei uiolentia, oris claustra pulsabat. cumq. sic animum in utroque nutantem cogitatio diuersa libraret; pene pudor exclusit officium. sed me illa, quam supra posui, sapientis sententia armauit ad depellendā inutilem uerecundiam, & damnosum silentium resoluendum; cum utique ipsam scribendi causam tam honestam uiderem esse, tam sanctam, ut peccare me crederem, si tacerem, illud mecum scripturæ reputans: Tempus tacendi, & tempus loquendi. Et iterum: Ne retineas uerbum in tempore salutis. Et illud Beati Petri: Parati semper ad satisfactionē omni poscenti uos rationem. Petis namque, & solícite ac uiolenter petis, ut tibi certam ex scripturis sanctis præliniamus

Eccl. 3

Eccl. 4

1. Pet. 3

mus

mus regulam , ad quam tu ordines cursum uitæ tuæ ; ut , co-
gnita Domini uoluntate , inter honores sæculi , & diuitiarū
illecebras , morum magis diligas supellectilem , atque ut
possis in coniugio constituta , non solum coniugi placere ,
sed etiam ei , qui ipsum indulsit coniugium . Cui tam san-
ctæ petitioni , tamq. pio desiderio nō satisfacere , quid aliud
est , quam profectum alterius non amare ? Parebo igitur
precibus tuis , teq. paratam ad implendam Domini uolun-
tatem ipsius nitar incitare sententiis . Idem est enim uerus
omnium Dominus , ac magister : qui nos placere sibi iubet ,
& docet , quo modo placere ei possimus . Ipse itaque te in-
formet , ipse te doceat : qui interroganti in euangelio adole
scenti , quid faceret , ut mereretur uitā æternā , diuina cōti-
nuo mandata proponit , ostēdens nobis eius uoluntatē esse
faciendam , a quo speramus & præmia . propter quod alio
testatur loco : Non omnis , qui dicit mihi , Domine , Domi
ne , intrabit in regnum celorū : sed , qui facit uoluntatē pa-
tris mei , qui in cælis est , ipse intrabit in regnū celorū . Quo
manifeste illud ostenditur , nos nō sola Dei cōfessione tanti
præmii magnitudinē promereri , nisi fidei , & iustitiæ opera
coniuncta sint . Qualis enim est illa confessio , quæ sic Deo
credit , ut pro nihilo eius ducat impériū ? aut quo modo ex
animo , ac uere dicimus , Domine , Domine ; si eius , quem
Dominū confitemur , præcepta contēnimus ? Vnde ipse in
euangelio dicit : Quid autem uocatis me , Domine , Domi-
ne ; & non facitis , quæ dico ? Et iterum : Populus hic labiis
me honorat , cor autem eorum longe est a me . Et rursum
loquitur per prophetam : Filius honorificat patrem , & ser-
uus dominum suum timer . Et , si pater ego sum ; ubi est ho-
nor meus ? & , si dominus ego sum ; ubi est timor meus ?
Ex quo apparet , nec honorari ab eis dominum , nec time-
ri , qui eius præcepta non faciunt . Vnde ad Dauid expres-
sius dicitur , qui peccatum admiserat : Et pro nihilo duxisti
Deum . Et ad Heli fit sermo Domini : Qui honorificat me ,
honorificabo eum ; qui autem pro nihilo me habent , ad
nihilum redigentur . Et nos securo , ac bono animo sumus ;
qui

Matth. 19

Matth. 7

Luc. 6

Matth. 19

Mal. 1

2. Reg. 12

1. Reg. 2

Psal. 118

Matth. 19

Gal. 2

Ioan. 14

qui per singula quæque præcepta, inhonorantes Deum de-
mentissimum, ad iracundiam prouocamus; eiusq. impe-
rium superbissime contemnendo, in tantæ maiestatis inuis
iniuriam? Quid enim umquam tam superbum, quid ue-
ro tam ingratum uideri potest, quam aduersus eius uiue-
re uoluntatem, a quo ipsum uiuere acceperis? quam illius
præcepta despicere, qui ideo aliquid imperat, ut causas ha-
beat remunerandi? neque enim obsequii nostri Deus indi-
get, sed nos illius iudicemus imperio. Mandata eius deside-
rabilia super aurum & lapidem pretiosum multum, & dul-
ciora super mel, & fauam: quoniam in custodiendis illis re-
tributio multa. Et ideo nobis irascitur, eccirco magis illa
immensa Dei bonitas offenditur, quia eam per tanti etiam
præmii detrimenta contemnimus; nec solum imperata, sed
etiam promissa illius pro nihilo ducimus. Vnde sæpe, im-
mo semper illa nobis Domini reuolucunda sententia: Si uis
ad uitam uenire, serua mandata. hoc enim tota nobiscum
lege agitur: hoc propheta, hoc apostoli docent: hoc a no-
bis & nox Christi, & sanguis efflagitat: Qui ideo pro om-
nibus mortuus est, ut, qui uiuunt, iam non sibi uiuant,
sed ei, qui pro illis mortuus est. Viuere autem illi, non est
aliud, quam eius præcepta seruare, quæ nobis ille, quasi
certum quoddam dilectionis suæ pignus, seruanda manda-
uit. Si diligitis, inquit, me, mandata mea seruare. Et qui
habet mandata mea, & seruat ea, ille est, qui diligit me.
Ac rursus: Si quis diligit me, sermonem meum seruabit: &
pater meus diliget eum: & ad eum ueniemus, & mansio-
nem apud eum faciemus. Qui non diligit me, sermones
meos non seruat. Grandem uim obtinet uera dilectio. Et
qui perfecte amatur, totam sibi amantis uindicat uolunta-
tem. Nihil est imperiosius caritate. Nos si uere Christum
diligimus; si eius nos redemptos sanguine recordamur; ni-
hil magis uelle, nihil omnino debemus agere, quam quod
illum uelle cognoscimus. Duo autem sunt genera manda-
torum, in quibus clauditur tota iustitia, prohibendi unum
est, iubendi alterum. Vt enim mala prohibentur, ita
præcipiuntur.

præcipiuntur bona . ibi otium imperatur , hic studium . ibi
 coercetur animus , hic incitatur . hic fecisse , illic non fecisse , culpabile est . Vnde & propheta dicit : Quis est homo , *Psal. 33*
 qui uult uitam , & cupit uidere dies bonos ? Prohibe linguam tuam à malo , & labia tua , ne loquantur dolum . Declina a malo , & fac bonum . Et beatus Apostolus : Odientes malum , adhærentes bono . Hoc itaque duplex diuersumq. præceptum , prohibendi scilicet , & imperandi , æquo omnibus iure mandatum est . non uirgo , non uidua , non nupta ab hoc imperio libera est . in quouis proposito , in quouis gradu , æquale peccatum est , uel prohibita admittere , uel iussa non facere . Neque uero eorum te seducat error , qui ex arbitrio suo eligunt , quæ potissimum Dei mandata faciant , quæque quasi uilia ac parua despiciant : nec metuunt , ne , secundum diuinam sententiam , minima contemnendo , paulatim decidant . Stoicorum quidem est , peccatorum tollere differentiam , & delicta omnia paria iudicare , nec ullum inter scelus & erratum discrimen facere . Nos uero , etsi multum inter peccata distare credimus , quia & legimus : tamen satis prodesse ad cautionem dicimus , etiam minima pro maximis cauere . tanto enim facilius abstinemus a quocumque delicto , quanto illud magis metuemus . nec cito ad maiora progreditur , qui etiam parua formidat . Et sane nescio , an possimus leue aliquod peccatum dicere , quod in Dei contemptum admittitur . Estq. ille prudentissimus , qui nō tam considerat quod iussum sit , quam illum , qui iusserit ; nec quantitatem imperii , sed imperantis cogitat dignitatem . Aedificanti itaque tibi spirituales domū , non super leuitatem arenæ , sed super soliditatem petræ , innocentie in primis fundamentum ponatur , super quod facilius possis arduum culmen iustitiæ erigere . Maximā enim partem æquitatis impleuit , qui nulli nocuit . Beatusq. est , qui potest cum sancto Iob dicere : Nulli nocui hominum : *Iob 27.31*
 iuste uixi cū omnibus . Vnde audenter & simpliciter loquebatur ad Dominum . *Iob. 3* Quis est ille , qui iudicetur mecum ? idest , quis tuum aduersum me potest implorare iudicium ,

ut lo

ut se læsum a me, conuincat? Purissimæ conscientiæ est, se-
cure canere cum propheta: Perambulabam in innocentia
Psal. 100 cordis mei, in medio domus tuæ. Vnde idem alibi dicit:

Psal. 83 Non fraudauit eos Deus bonis, qui ambulant in innocen-
tia. Itaque malitiam, odium, atque inuidiam, quæ uel ma-
xima, uel sola semina sunt nocendi, Christiana a se propel-
lat anima: neque manu tantum, aut lingua, sed corde quo-
que custodiat innocentiam: nec opere modo, sed uoto etiã
nocere formidet. quantum enim ad peccati rationem perti-
net, nocuit & qui nocere disposuit. Multi nomen illud ab-
solute atque integre definiunt, innocentem, qui ne in eo
quidem ulli noceat, quo prodesse desistat. quod si est uerum,
tum demum lætare de innocentie conscientia, si, cum po-
tes, adiuuare non desinas. si uero diuisa inter se ista, atque
distincta sunt; aliudq. est non nocere, quod semper potes;
aliud prodesse, cum possis; aliud malum non facere, aliud
operari bonum: illud tibi rursum occurrat, non sufficere
Christiano, si partem unam iustitiæ impleat; cui utrumque
præcipitur. neque enim debemus ad multitudinis exempla
respicere; quæ nullam morum disciplinam sequens, nul-
lum uiuendi tenens ordinem, non tam ratione ducitur, quam
quodam impetu fertur. Nec imitandi nobis illi sunt, qui
sub Christiano nomine gentilem uitam agunt, & aliud pro-
Tit. 1 fessione, aliud conuersatione testantur; atque, ut Aposto-
lus ait, Deum confitentur se nosse, factis autem negant.

Inter Christianum, & gentilem non fides tantum debet,
sed etiam uita distinguere, & diuersam religionem per di-
a. Cor. 6 uersa opera monstrare. Nolite, ait Apostolus, iugum du-
cere cum infidelibus. Quæ enim participatio iustitiæ cum
iniquitate? aut quæ societas lucis ad tenebras? Quæ autem
conuentio Christi ad Belial? aut quæ pars fidei cum infide-
li? qui autem consensus templo Dei cum idolis? Sit ergo in-
ter nos, & illos maxima separatio. Disiungitur certo discri-
mine error, & ueritas. Illi terrena sapiant, qui cælestia pro-
missa non habent. illi breui huic uitæ se totos implicant, qui
æterna nesciunt. illi peccare non metuant, qui peccatorum
impu-

impunitatem putant . illi seruiant uitiis , qui non sperant futura præmia uirtutum . Nos uero , qui purissima cōfitemur fide , omnem hominem manifestandum esse ante tribunal Christi , ut recipiat unusquisque propria corporis sui , prout gessit , siue bonum , siue malum , procul esse debemus a uitiis , dicente Apostolo : Qui enim Christi sunt , carnem suam crucifixerunt cum uitiis , & concupiscentiis . Nec turbam sequantur errantem , qui se ueritatis discipulos confitentur . Duas certe conuersationis uias , & distincta in diuersum itinera uiuendi , saluator in euangelio ostendit . Quā , inquit , spatiosa uia , quæ ducit ad mortem ; & multi sunt , qui intrant per eam . Et rursum : Quam arcta uia , & angusta est , quæ ducit ad uitā : & pauci sunt , qui inueniunt eam . Vide , quanta inter has uias separatio sit , quantumq. discrimen . illa ad mortem , hæc tendit ad uitam . illa celebratur & teritur a multis , hæc uix inuenitur a paucis . illa enim uitiis per consuetudinem , quasi decliuior , ac mollior , & uelut quibusdam amœna floribus uoluptatum , facile ad se rapit commeantium multitudinem : hæc uero , insueto calle uirtutum , tristior , atque horridior , ab iis tantum eligitur , quibus non tam delectatio itineris cordi est , quam utilitas mansionis . asperam enim nobis , & insuauem uirtutū uiam nimia facit uitiorum consuetudo : quæ si in partem alteram transferatur ; inuenietur , sicut scriptura dicit , semita iustitiæ leuis . Ponamus ergo iam rationem uitæ nostræ ; & , per quam potissimum gradiamur uiam , conscientia teste discamus . omne enim , quod agimus , omne , quod loquimur , aut de lata , aut de angusta uia est . si cum paucis angustum iter , & subtilem quandam semitam inuenimus ; ad uitā tendimus . si uero multorum comitamur uiam ; secundum Domini sententiam imus ad mortem . Si ergo odio , atque inuidia possidemur ; si cupiditati & auaritiæ cedimus ; si præsentia cōmoda futuris præferimus : per spatiosam uiam incedimus . habemus enim ad hæc comitum multitudinem , & late similibus stipamur agminibus . Si iracundiam libidinemq. explere uolumus , si iniuriā uindicare ; si maledicenti-

K remaledi-

2. Cor. 5

Gal. 5

Matth. 7

Matth. 11

Prou. 4

remaledicimus; & aduersum inimicum inimico animo sumus: æque cum pluribus ferimur. Si uel adulamur ipsi, uel adulantem libenter audimus; si uerum dicere gratia impedi-
mur; & magis offendere animos hominum timemus, quã non ex animo loqui: de multorũ item uia sumus. Tot nostri sunt focii, quot extranei ueritatis. At e contrario, si ab his omnibus uitis sumus extranei; si purum ac liberum animum præstamus; & omni cupiditate calcata, solis studentes diuites esse uirtutibus: per angustam uiam nitimur. conuersatio enim ista paucorum est: estq. perrarum, atque difficile, idoneos huius itineris comites reperire. quinetiã multi hac ire se simulant; & per diuersa errorum diuerticula ad uiam multitudinis reuertuntur. ideoq. timendum est, ne, quos duces recti huius itineris habere nos credimus, eos comites habeamus erroris. Si igitur inueniuntur exempla, quæ nos per hanc ducant uiam, & rectum euangelii tramitem teneant: sequenda sunt. sin uero ea uel deficiunt, uel deficere putantur: apostolorum forma uniuersis proposita est. Clamat uas electionis Paulus; nosq. quasi adangustum hoc iter conuocans, dicit: Imitatores mei estote, sicut & ego Christi. Certe, quod est amplius omnibus, ipsius Domini relucet exemplum, qui in euangelio ait: Venite ad me omnes, qui laboratis & onerati estis; & ego reficiam uos. Tollite iugum meum super uos, & discite a me, quia mitis sum, & humilis corde. Si periculosum est imitari illos, de quibus dubitas an imitandi sint: hunc certe imitari turissimum est, atque eius uestigia sequi, qui dixit:

Philip. 3 Ego sum uia, ueritas, & uita. Numquam enim errat, qui sequitur ueritatem. unde & apostolus Ioannes ait: Qui dicit se in Christo manere, debet, sicut ille ambulauit, & ipse ambulare. Et beatus Petrus ait: Christus pro nobis passus est, uobis relinquens exemplum, ut sequamini uestigia eius, qui peccatum non fecit, nec est inuentus dolus in ore eius. Qui cum malediceretur, non maledicebat: cum pateretur, non comminabatur. tradebat autem iudicanti se iniuste. qui peccata nostra ipse pertulit in corpore suo super lignum;

lignum ; ut , peccatis mortui , iustitiæ uiuamus . Cesset
 omnis excusatio errorum . auferantur peccandi sœda so-
 latia . Nihil omnino agimus , qui nos per multitudinis
 exempla defendimus ; & ad consolationem nostram alie-
 na sepe numerantes uitia , deesse nobis dicimus , quos
 debeamus sequi . Ad illius exemplum mittimur , quem
 omnes fatemur imitandum . Atque ideo præcipua tibi
 cura sit , legem nosse diuinam ; per quam possis quasi præ-
 sentia cernere exempla sanctorum , & , quid faciendum
 sit , quidue uitandum , illius consilio discere . Maximum
 enim ad iustitiam auxilium est , implere diuinis eloquiis
 animum , & , quod opere exequi cupias , semper cor-
 de meditari . Rudi adhuc populo , & hominibus ad obedi-
 entiam insuetis per Moysen imperatur a Domino , ut in *Num. 15*
 signum memoriæ , qua præcepta Domini recordentur , per
 singulas uestimentorum fimbrias habeant eum cocco hia-
 cyntini coloris insignia ; ut , etiam casu huc illucq. respicien-
 tibus oculis , mandatorum cælestium memoria nascatur . de
 quibus fimbriis pharisei redarguuntur a Domino , quod eas *Matth. 23*
 peruerso usu , non ad commonitionem præceptorum Dei ,
 sed ad ostentationem sui habere cœperint : ut scilicet quasi
 de maioris obseruationis diligentia sancti a populo iudica-
 rentur . Tibi uero seruanti non iam litteræ præcepta , sed spi-
 ritus , diuinorum mandatorum memoria spiritualiter exco-
 lenda est , cui non tam frequenter recordanda sunt præce-
 pta Domini , quam semper cogitanda . Sint ergo diuinæ
 scripturæ semper in manibus tuis , & iugiter in mente uol-
 uantur . nec sufficere tibi putes , mandata Dei memoria te-
 nere , & operibus obliuisci : sed ideo illa cognosce , ut facias *Rom. 2*
 quidquid faciendam didiceris . Non enim auditores legis ius-
 ti sunt apud Deum , sed factores legis iustificabuntur . Latus
 quidem , & immensus diuinæ legis campus extenditur : qui
 diuersis testimoniis ueritatis , uelut cælestibus , quibusdam
 floribus , uernans , mira oblectatione legentis animum pa-
 scit , ac refouet . Quæ omnia semper cognoscere , secumq.
 reuoluere , ingens ad conseruandam iustitiam beneficiū est .

K 2 Sed

Sed quasi ad compendiosum quoddam commonitorium, illa tibi euangelii eligenda sententia est, & superscribenda cordi tuo, quæ ad totius iustitiæ breuiarium Dominico ore **Matth. 7** profertur: Omnia, quæcumque uultis ut faciant uobis homines, hæc & uos facite illis: Cuius præcepti uires exprimes iungit, ac dicit: Hæc enim lex & prophetæ. In finitæ namque sunt species, partesque iustitiæ: quas non modo stylo persequi, sed cogitatione etiam capere difficillimum est: quas omnes una ac breui sententia comprehendit, & latentem hominum conscientiam, secreto animi iudicio, aut absoluit, aut damnat. Ad omnem igitur actum, ad omne uerbum, ad omnem etiam cogitatum, hæc sententia retractetur: quæ tibi quasi speculum quoddam paratum, & ad manum semper positum, qualitatem tuæ uoluntatis ostendat, ac etiam uel de iniusto opere redarguat, uel de iusto lætificet. quotiescumque enim talem in alterum habueris animum, qualē in te ab altero seruari cupis: æquitatis uiam tenes. quoties uero talis erga alterum fueris, qualem in te uis neminem: iter iustitiæ dereliquisti. En totum illud diuinæ legis arduum, totumque difficile. en, ob quam causam dura imperia. Domino reclamamus, & dicimus nos uel difficultate, uel impossibilitate mandatorum. premi. Nec sufficit, quod iusta non facimus; nisi etiam iubentem, iniustum pronunciamus, dum ipsum æquitatis auctorem non modo dura, & ardua, sed etiam impossibilia præcepisse conquerimur. Omnia, inquit, quæcumque uultis ut faciant uobis homines, hæc & uos facite illis. Coniungi uult inter nos, atque cōnecti per mutua beneficia caritatem; omnesque homines uicario inter se amore copulari; ut, id unoquoque præstante alteri, quod sibi ab omnibus præstari uelit, tota iustitia, & præceptum hoc Dei, communis sit utilitas hominum. Et o miram clementiam Domini, o ineffabilem Dei benignitatem. Præmium nobis pollicetur, si nos inuicem diligamus, id est, si nobis ea præstemus inuicem, quorum uicissim indigemus. & nos, superbo simul & ingrato animo, eius renitimur uoluntati, cuius etiam imperium beneficium est?

est? Nulli umquam omnino detrahas, nec aliorum uitu-
patione te laudabilem uideri uelis. Magisq. uitam tuam or-
dinare discas, quam alienam carpere. Ac semper scripturæ
memor esto dicentis: Noli diligere detrahere; ne eradiceris. *Prou. 20*
Pauci admodum sunt, qui huic uitio renuncient: raroq. in-
uenies, qui ita uitam suam irreprehensibilem exhibere ue-
lint, ut non libenter reprehendant alienam, tantaq. huius
mali libido mentes hominum inuasit, ut etiam qui procul
ab alijs uitis recesserunt, in istud tamen quasi in extremum
diaboli laqueum incidant. Tu uero hoc malum ita effuge,
ut non modo ipsa non detrahas, sed ne alii quidem detra-
henti aliquando credas. Nec obrectatoribus auctoritatem
de consensu tribuas; ne eorum uitium nutrias annuendo.
Noli, inquit scriptura, consentaneus esse cum deroganti-
bus aduersus proximum tuum; & non accipies super illum
peccatum. Et alibi: Sæpi aures tuas spinis, & noli audire *Ecclesi. 28*
linguam nequam. Vnde & beatus David, diuersas inno-
centiæ species iustitiæq. dinumerans, de hac quoque uirtu-
te non tacuit, dicendo: Et opprobrium non accepit aduer- *Psal. 14*
sus proximos suos: Propterea quod ipse non solum aduer-
satur, sed etiam persequitur detrahentem. Ait enim:
Detrahentem secreto proximo suo, hunc persequabar. Est *Psal. 106*
fane tale hoc uitium, quod uel in primis extinguere debeat, &
ab eis, qui se sancte instituere uolunt, prorsus excludi. Ni-
hil enim tam inquietat animum, nihil est, quod ita mobi-
lem mentem, ac leuem faciat, quam facile totum credere,
& obrectatorū uerba temerario mentis assensu sequi. hinc
enim crebræ dissensiones, hinc odia iniusta nascuntur. hoc est,
quod sæpe de amicissimis etiam inimicos facit, dum concor-
des quidem, sed credulas animas maliloqua lingua dissociat.
At contra, magna quies animi, magnaq. est morum graui-
tas, non temere de quoquam sinistri quid audire. Beatusq.
est, qui ita se contra hoc uitium armauit, ut apud eum de-
trahere nemo audeat. Quod si hæc in nobis esset diligentia,
ne passim obrectatoribus crederemus: iam omnes detra-
here timerent; ne non tam alios, quam se ipsos, uiles de-

K 3 trahendo

trahendo facerent. sed hoc ideo malum celebre est, iccirco in multis feruet hoc vitium, quia pene ab omnibus libenter auditur. Adulatorum quoque assentationes, & noxia blandimenta fallacie, uelut quasdam pestes animæ fuge. nihil est, quod tam facile corrumpat mentes hominum; nihil, quod tam dulci & molli uulnere animum feriat. unde & quidam sapiens ait: Verba adulatorum mollia, feriunt autem interiora uentris. Et Dominus loquitur per prophetam: Popule meus, qui beatificant uos, seducunt uos, & semitas pedum uestrorum dissipant. In multis, isto maxime tempore, regnat hoc vitium, quodq. est grauissimum, humilitatis ac beneuolentiæ loco ducitur. eo fit, ut, qui adulari nescit, aut inuidus, aut superbus putetur. Est sane grande & subtile artificium, laudare alterum in commendationem sui, & decipiendo, animum sibi obligare decepti, quodq. hoc maxime uitio agi solet, fictas laudes certo pretio uendere. Quæ hæc tanta est leuitas animi, quæ tanta uanitas, relicta propria conscientia alienam opinionem sequi, & quidem fictam atque simulatam? rapi uento falsæ laudationis, gaudere ad circumuentionem suâ, & illusionem pro beneficio accipere? Tu ergo, si uere laudabilis esse cupis, laudem hominum ne requiras: illiq. præpara conscientiam tuam, qui & illuminabit abscondita tenebrarum, & manifestabit consilia cordiū: & tunc laus tibi erit a Deo. Sit igitur intentus, ac uigilans, & aduersus peccata semper armatus animus tuus. Sermo in omnibus moderatus, & parcus, & qui necessitatem loquendi magis indicet, quam uoluntatem. Ornet prudentiam uerecundia; quodq. præcipuum in feminis semper fuit, cunctas in te uirtutes pudor superet. Diu ante considera, quid loquendum sit: & adhuc tacens prouide, ne quid dixisse pœniteat. Verba tua ponderet cogitatio; & singulæ officiū animi libra dispense. unde scriptura dicit: Argentum, & aurum tuum confila; & uerbis tuis facito statheram, & frenos ori tuo rectos; & attende, ne forte labaris lingua. Numquam malum uerbum de ore tuo procedat, quæ ad cumulum benignitatis iuberis etiam maledicentibus benedicere.

Miseri-

Misericordes , inquit , modesti , humiles , non reddentes ma-
lum pro malo , neque maledictum pro maledicto , sed econ-
trario benedicentes . Mentiri uero , atque iurare lingua tua
prorsus ignoret : tantusq. in te sit ueri amor , ut , quidquid
dixeris , iuratum putes . de quo saluator ad discipulos ait :
Ego autem dico uobis , nō iurare omnino . Et paulo post :
Sit autem sermo uester , est , est , non , non : quod autem his
abundantius est , a malo est . In omni igitur actu , atque uerbo
quieta mens & placida seruetur : semperq. cogitationi tuæ
Dei præsencia occurrat : sit humilis animus , ac mitis , & ad-
uersus sola uitia erectus . numquā illū aut superbia extollat ,
aut auaritia inflectat , aut ira præcipitet . nihil enim quietius ,
nihil purius , nihil denique pulchrius ea mente esse debet ,
quæ in Dei habitaculū præparanda est ; quæ non auro tem-
pla fulgentia , nō gēmis altaria distincta delectant , sed anima
ornata uirtutibus . ideo & templum Dei , sanctorum corda
dicuntur , affirmante Apostolo , qui ait : Si quis templum
Dei uiolauerit , disperdet illum Deus . templum enim Dei
sanctum est , quod estis uos . Nihil habeas humilitate præ-
stantius , nihil amabilius . hæc est enim præcipua conserva-
trix , & quasi custos quædam uirtutum omnium : nihilq. est ,
quod nos ira & hominibus gratos , & Deo faciat , quam si
uitæ merito magni , humilitate infimi simus . propter quod
scriptura dicit : Quāto magnus es , humilia te in omnibus , &
corā Deo inuenies gratiam . Et Dominus loquitur per pro-
phetā : Super quem alium requiescam , nisi super humilem ,
& quietū , & tementem uerba mea ? Verumtamen humili-
tatem sequere , non quæ ostenditur , atque simulatur gestu
corporis , aut fracta uoce uerborū , sed quæ puro affectu cor-
dis exprimitur . aliud est enim , uirtutem habere ; aliud , uir-
tutis similitudinem : aliud est , rerum umbram sequi ; aliud ,
ueritatē . Multo deformior illa est superbia , quæ sub quibus-
dam humilitatis signis latet . Nescio enim quo modo turpio-
ra sunt uitia , cū uirtutum specie cælantur . Nulli te umquam
de generis nobilitate præponas ; neque obscuriores quasque ,
& humiliore loco natus , te inferiores putes . Nescit religio no-

Rom. 12

Matth. 5

1. Cor. 3

Eccli. 3

Esa. 66

tra personas accipere; nec condiciones hominum, sed animos inspicit singulorum: seruū & nobilem de moribus pronunciat. Sola apud Deum libertas est, non seruire peccatis. Summa apud Deum est nobilitas, clarum esse uirtutibus. Quid apud Deum in uiris nobilius Petro, qui piscator & pauper fuit? quid in feminis beata Maria illustrius, quæ sponsa fabri describitur? sed illi piscatori & pauperi cælestis regni
 Matth. 16 a Christo creduntur clauēs; hæc sponsa fabri meruit esse mater illius, a quo ipsæ clauēs datæ sunt. elegit enim Deus ignobilia, & contemptibilia huius mundi, ut potentes ac nobiles ad humilitatem facilius adduceret. Nam & alias frustra si bi aliquis de nobilitate generis applaudit; cum uiueri par honoris, & eiusdem apud Deum pretii sint, qui uno Christi sanguine sunt redempti: nec interest, quæ quis conditione natus sit, cum omnes in Christo æqualiter renascamur. nam & si obliuiscimur, quia ex uno omnes generati sumus: saltem id semper meminisse debemus, quia per unū omnes regeneramur. Caue, ne, si ieiunare aut abstinere cœperis, te putes esse iam sanctā. hæc enim uirtus adiumentum est, non perfectio sanctitatis. magisq. id prouidendum est, ne tibi hoc, quod licita contemnas, securitatem quandam illicitorum faciat. Quidquid supra iustitiam offertur Deo, non debet impedire iustitiam, sed adiungere. quid autem prodest tenuari abstinentia corpus, si animus intumescat superbia? quam laudem merebimur de pallore ieiunii, si inuidia liuidi sumus? quid uirtutis habet, uinum non bibere, & ira atque odio inebriari? Tunc, inquam, præclara est abstinentia, tunc pulchra atque magnifica castigatio corporis, cum est animus ieiunus a uitiiis. Immo qui probabiliter ac scienter abstinentiæ uirtutem tenent, eo affligunt carnem suam, quo animæ frangant superbiam: ut quasi de quodam fastigio contemptus sui atque arrogantiae descendant ad implendam Domini uoluntatem, quæ maxime in humilitate perficitur. Idcirco a uariis ciborum desideriis mentem retrahunt, ut totam eius uim occupent in cupiditate uirtutum. Jamq. minus ieiuniorum, & abstinentiæ laborem caro sentit; anima

ma esuriente iustitiam. Nam & uas electionis Paulus, dum *1. Cor. 9*
 castigat corpus suum, & in seruitutem redigit, ne aliis præ-
 dicans ipse reprobis inueniatur, non ob solam, ut quidam
 imperiti putant, hoc facit castitatem: non enim huic tan-
 tummodo, sed omnibus omnino uirtutibus abstinentia opi-
 tulatur. neque magna, aut tota Apostoli gloria est, non for-
 nicari: sed hoc agit, ut castigatione corporis erudiatur ani-
 mus; quantoq. nil ex uoluptatibus concupiscit, tãto magis
 possit de uirtutibus cogitare; ne persecutionis magister im-
 perfectum aliquid in se ostendat; ne Christi imitator extra
 præceptũ quidquam aut uoluntatem Christi faciat; neue
 minus exemplo, quam uerbo doceat; cumq. aliis prædica-
 uerit, ipse reprobetur; audiatq. cum phariseis: Dicunt
 enim, & non faciunt. Apostolici uero & præcepti est, & *Matth. 23*
 exempli, ut habeamus rationem non conscientie tantum, *Rom. 12*
 sed etiam famæ. Non superfluum, & a fructu uacuum, gen-
 tium magister hoc docet: uult enim etiam extraneos ad fi- *Phil. 3*
 dem homines per fideiũ opera proficere, ut religionem ip-
 sam religionis disciplina commendet. Et ideo sicut lumina-
 ria in mundo lucere nos iubet, in medio nationis prauæ &
 peruersæ; ut incredulæ mentes errantiũ ex nostrorũ actuũ
 lumine, ignorantie suæ tenebras deprehendant. unde ipse
 ad Romanos ait: Providentes bona non solum coram Deo *Rom. 12*
 sed etiam coram hominibus. Et alibi: Sine offensione esto- *1. Cor. 10*
 te Iudæis, & gentibus, & Ecclesiæ Dei, sicut ego per omnia
 omnibus placeo, non querens quod mihi utile est, sed quod
 multis. Beatus est, qui tam sancte, tamq. grauius disposuit
 uitam suam, ut de eo finistri aliquid ne fingi quidem possit;
 dum aduersus obrectatorum libidinem pugnat meriti ma-
 gnitudo; nec fingere quisquam ausus est, quod a nullo pu-
 tat esse credendum. Quod si id assequi difficile, atque nimis
 arduum est; saltem hanc adhibeamus uitæ nostræ diligen-
 tiam, ne malæ mentes occasione inueniant detrahendi; ne
 ex nobis scintilla procedat, per quam aduersus nos sinistra
 famæ flamma conflatur. alioquin frustra irascimur obrecta-
 toribus nostris, si eis ipsi obrectandi materiam ministra-
 mus.

mus. Si autem, nobis diligenter atque solícite omnia ad honestatem providentibus, cunctisq. actibus nostris timorem Dei præferētibus, illi nihilominus insaniunt: cōsoletur nos conscientia nostra; quæ tunc maxime tuta est, tunc optime secura est, cū ne occasione quidē male de se sentiendi dedit.

Esa. 5 illis enim, uæ, dicitur per prophetam, qui dicunt, quod bonū est malum, qui lucem appellant tenebras, & quod dulce est, amarū uocant. Nobis ergo saluatoris aptabitur sermo: Beati

Matth. 5 estis, cū uobis maledixerint homines mentientes. Nos modo id agamus, ut male de nobis nemo loqui absque mendacio possit. Ita habeto sollicitudinē domus, ut aliquā tamen uacationem animæ tribuas. Eligatur tibi opportunus, & aliquantum a familiæ strepitu remotus locus, in quem tu, uelut in portum, quasi ex multa tempestate curarum te recipias, & excitatos foris cogitationum fluctus secreti tranquillitate cōponas. Tantum ibi sit diuinæ lectionis studium, tam crebræ orationum uices, tam firma & pressa de futuris cogitatio, ut omnes reliqui temporis occupationes facile hac uacatione compēses. Nec hoc ideo dicimus, quo te retrahamus a tuis: immo id agimus ut ibi discas, ibiq. mediteris, qualem tuis præbere te debeas. Familiam tuam ita rege, & consone, ut te matrem magis tuorum, quam dominam uideri uelis: a quibus benigne potius, quā seueritate exige reuerentiā. Fidelius & gratius semper obsequium est, quod ab amore, quam quod a metu proficiscitur. Præcipue autem in conuiugio uenerabili, atque immaculato, apostolicæ regulæ ordo teneatur. Seruetur in primis uiro auctoritas sua: totaq. a te discat domus, quantum illi honoris debeat. Tu illum dominum obsequio tuo, tu magnum illum tua humilitate demonstra, tanto ipsa honoratior futura, quanto illum amplius honoraueris. Caput enim, ut ait Apostolus, mulieris est uir: nec aliunde magis reliquum corpus ornatur, quam ex capitis dignitate. Vnde idem alibi dicit: Mulieres subditæ estote uiris, sicut oportet in Domino. Sed & Beatus Petrus apostolus ait: Similiter subditæ sint uiris, ut & si qui non credunt uerbo, per mulieris conuersationē sine uerbo lucrifiant.

1. Cor. 11

Col. 3

1. Petr. 3

lucrifiant. Si ergo etiam gentilibus maritis debetur honor iure coniugii, quanto magis reddendus est Christianis? Atque ut ostendat, quibus ornamentis etiam uiris iunctæ feminæ decorari debeant, ait: Quarum sit non extrinsecus capillatura, aut circumdatio auri, aut uestimentorum cultus, sed qui absconditus cordis est homo, in incorruptibilitate quieti & modesti spiritus, qui est in conspectu Dei locuples. Sic enim aliquando & sanctæ mulieres sperantes in Domino ornabant se, subiectæ propriis uiris, sicut Sara obediebat Abraham, Dominum suum uocans. Hæc autem præcipiens, non eas iubet squalore, sordibus, & horrentibus pannorum assumptis tegi: sed immoderato cultui, & nimis exquisito interdicit ornatui; simplicemq. commendat ornatum, atque habitum. de quo & uas electionis ait: Similiter autem & mulieres in habitu ornato, cum uerecundia, & sobrietate, ornantes se non in tortis crinibus, aut auro, aut margaritis, uel ueste pretiosa, sed, quod decet mulieres, promittentes castitatem per opera bona. Reperi uero te, miro fidei ardore succensam, aliquot iam ante annos continentiam proposuisse, & reliquum uitæ tuæ tempus pudicitie consecraste. Magni hoc animi signum, & perfectæ uirtutis indicium est, renunciare subito expertæ uoluptati, fugere notas carnis illecebras, & calentis adhuc ætatis flâmas fidei amore restinguere. Sed illud quoque simul didici, quod me non mediocriter angit, ac stimulat, te uidelicet tantum hoc bonum absque consensu & pacto uiri seruare cœpisse; cum hoc Apostolica omnino interdicit auctoritas, quæ in hac duntaxat causa non modo uxorem uiro, sed etiam uirum uxoris subiecit potestati. Vxor, inquit, sui corporis potestatem non habet, sed uir: similiter autem & uir potestatem non habet sui corporis, sed mulier. Tu uero, quasi oblita fœderis nuptialis, pactiq. huius, ac iuris immemor, inconsulto uiro uouisti Domino castitatem. Sed periculose promittitur, quod adhuc in alterius potestate est. & nescio, quam sit grata donatio, si unus offerat rem duorum. Multa iam per huiusmodi ignorantiam & audaciam,

1. Tim. 2

1. Cor. 7

& uidi-

& uidimus scissa cōiugia : quodq. recordari piget, occasione castitatis adulterium perpetratum . nam , dum una pars se etiam a licitis abstinet , altera ad illicita delapsa est . Et nescio , in tali causa quis magis accusari , quis amplius culpari debeat ; utrum ille , qui repulsus a coniuge fornicatur ; an illa , quæ , repellendo a se uirum , eum fornicationi quodam modo obiicit . Atque ut super hac causa , quid ueritas habeat , agnoscas ; pauca mihi de diuina auctoritate ponenda sunt . Apostolicæ doctrinæ regula nec cum Iouiniano æquat continentix opera nuptiarum , nec cum Manichæo coniugia condemnat . ita uas electionis , ac magister gentium , inter utrumque temperatus incedit , ac medius , ut remediū incontinentix indulgeat , & ad præmium prouocet continentiam . totusq. in hac causa eius hic sensus est , ut ex utriusque sententia proponatur castitas , aut certe ab utroque debitum commune soluatur . Sed ipsa iam Apostoli uerba ponamus , totamq. hanc causam a sui principio retractemus . Loquitur ad Corinthios . De quibus autem scripsistis mihi : Bonum est homini mulierem nō tangere . Et quamquam hic laudauerit castitatem ; tamen , ne aliquibus uideatur prohibere coniugia , subiungit : Propter fornicationem autem unusquisque suam uxorem habeat , & unaquæque suū uirum habeat . uxori uir debitū reddat , similiter autem & uxor uiro . mulier autem sui corporis potestatem non habet , sed uir . & uir sui corporis potestatem non habet , sed mulier . nolite fraudare inuicem . Ac rursus , ne , tanta pro nuptiarum parte dicendo , uideretur excludere castitatem , sequitur : Nisi forte ex cōsensu ad tempus , ut uacetis orationi . Et statim quasi recusat hoc , quod dixit , Ad tempus ; ne non tam perpetuā , quā temporalem , ac breuem continentiam docere uideatur . ait enim : Propter incontinentiam uestram . Hoc autem dico secundum indulgentiam , non secundum imperium . Vnde hoc , quod dixit , Ad tempus , docet meditationem debere fieri castitatis , ut per certa interualla temporum , quasi exploratis continentix firæ uiribus , sine periculo utrique promittant , quod semper est ab utroque

que

que seruandum . Quid uero absolute uelit , manifeste dicit : Volo autē omnes homines esse sicut me ipsum , idest in iugi ac perpetua castitate uiuere . Vides ne , quam caute , quam prouide , quam sine ullius occasione scandali , magister firma uerit de castitate sententiam , nolens tantum bonum in unius temeritate nutare , quod ligare & confirmare debet consensu amborū ? Et re uera quid ea castitate firmitus est , quid ue tutius , quā quæ ex duorum cœpta sententia , ab utroque uelut in commune seruatur ? Nec de se tantum pars altera sollicita , mutuo se ad uirtutis animet perseverantiā . hoc enim , sicut alia quoque bona , non tantum cœpisse , sed perfecisse laudandum est . Iamdudum , ut intelligis , scopuloso difficultiq. in loco uersatur oratio , nec audet in alterutrā declinare partem , dum æqualiter utrumque formidat , sed ex nostra difficultate tuum agnosce discrimen . maluimus enim te contristare forsitan uera dicēdo , quā ficta adulatione decipere . Duplex , ut uides , malum , æquale & anceps periculum est . ex utroque arctaris , ex utroque constringeris . Contemnere omnino uirū , atque despicere , aperte cōtra Apostoli sententiā est : Perdere uero tanti temporis castitatem , & Deo non redere quod promiseras , timendū , atque metuendum est . ut uulgo dicitur : Facile ex amico inimicū facies , cui promissa nō reddas . Sic enim scriptura dicit : Quod si uoueris uotum *Dent. 23* domino Deo ; non moreris reddere illud : quia quærens quærit illud dominus Deus abs te : Et erit tibi in peccatum . At ergo : Debitam honorificentiam uiro exhibe , ut ex utroque domino debitum , quod uouisti , reddere possis . De cuius conscientia non diffidimus , si paululū expectasses : nō quod te a bono castitatis retrahamus , sed huius animum ad castitatis oraculū totis uiribus incitemus ; ut uoluntarium sacrificium offerat Deo , in odorem suauitatis ; ut exuta mens a cūctis retinaculis mundanis , atque corporalibus uoluptatibus sit ; ut ualeas plenius inhærere Dominicis præceptis . quod tamē , ne quid a nobis negligenter esse dictum arbitreris , dinarum scripturarū testimoniis edocuius , sicut etiam Apostolus dicit : Et erunt duo in carne una , iam non una caro , *1. Cor. 6* sed

- sed unus spiritus. Hoc sacramentū magnū est; arduumq. est iter castitatis: sed magna sunt præmia, uocatq. nos Dominus in euangelio, dicens: Venite benedicti patris mei, poscitate præparatū uobis regnū ab origine mundi. Idē ipse Dominus dicit: Venite ad me omnes, qui laboratis, & onerati estis; & ego uos reficiam. Tollite iugum meum super uos, & discite a me, quia mitis sum, & humilis corde: & inuenietis requiem animabus uestris. iugum enim meum suauē est, & onus meum leue. Dicit enim idem Dominus iis, qui ad sinistram eius erunt: Discendite a me maledicti in ignem æternū, quē præparauit pater meus diabolo, & angelis eius: nescio uos operari iniquitatis. Erit ibi fletus & stridor dentium. Illi utique omnes plangent, illi lugebunt, qui ita curis se uitæ præsentis inuoluunt, ut obliuiscantur futuram; quos somno quodam ignorantie, & malæ securitatis oppressos fluctibus, Domini cōprehendet aduentus. unde ipse in euangelio ait:
- Luc. 21** Attendite uobis, ne forte grauentur corda uestra in crapula, & ebrietate, & curis huius uitæ: ne forte superueniat in uos repentina dies illa: tamquā laqueus enim superueniet in omnes, qui sedent super facie omnis terræ. Et rursum: Vigilate, & orate: nescitis enim, quando tēpus sit. Beati sunt, qui ita expectant, ita illū speculantur diem, ut se ad eū quotidie præparent, qui nō de præterita sibi iustitia blandiētes, secundū Apostolum, per dies singulos in uirtute renouantur. Iustitia enim iusti non proderit ei, a quo die iustus esse desierit. Sicut etiam iniquo non nocebit iniquitas sua a die, quo se ab iniquitate conuerterit. Nec sanctus ergo securus esse debet, quādiu in huius uitæ agone uersatur; nec desperare peccator, qui, secundum prædictam prophete sententiam, uno die iustum se efficere potest; sed totum, quo tenditur, spatium uitæ tue est, ut peragere possis iustitiā; nec de præterita iustitia confidens remissior efficiaris: sed, sicut dicit Apostolus, Posteriora obliuiscens, ad ea autem, quæ anteriora sunt, me extendens, ad deum uti persequor brachiū super nā uocationis, sciens scriptū esse cordis inspectorem Deū.
- Act. 1** Et iccirco satagit, ut animam mundam habeat a peccato.
- Pro-

Propter quod scriptum est: Omni custodia serua cor tuū. Et *Prou. 4*
 iterum: Diligit Dominus munda corda. Accepti autē sunt
 ei omnes immaculati. Iccirco age, ut ordines reliquum tem-
 pus uitæ tuæ sine offensa, ut possis secure canere cū prophe-
 ta: Perambulabā in innocentia cordis mei, in medio domus
 mex. Et iterum: Introibo ad altare Dei, ad Deum, qui læ *Psal. 100*
 tificat iuuentutem meam. Quia inchoasse non sufficit; sed *Psal. 42*
 perfecisse iustitia est.

ARGVMENTVM.

*A*SELLAM uirginem, ante natiuitatem in utero benedi-
 ctam, patriq. in uitrea phiala per somnium a Deo monstratam,
 quæ Romæ, ueluti in heremo, solitaria, ac monache uitam pro-
 fitens, uixit, laudat. Epistolam autem non ad eam, sed ad Mar-
 cellam, a qua illius sanctitatem audierat, mittit; quo eius exem-
 plo ceteræ adolescentule ad huiusmodi uitam excitentur.

HIERONYMVS AD MARCELLAM.

de laudibus Asellæ.

EPISTOLA XV.

*E*MO reprehendat, quod in epistolis aliquos aut
N laudamus, aut carpinus: cum & in arguendis ma-
 lis sit correctio ceterorum; & in optimis prædican-
 dis bonorum ad uirtutem studia concitentur. Nudius ter-
 tius de beatæ memoriæ Lea aliqua dixeramus: illico pupu-
 git animum, & mihi uenit in mentem, non debere nos ta-
 cere de uirgine, qui de secundo ordine castitatis locuti su-
 mus. Igitur Asellæ nostræ uita breuiter explicanda est: cui,
 quæro, ne hanc epistolam legas: grauatur quippe laudi-
 bus suis: sed sis potius, quæ adolescentulæ sunt, legere di-
 gnare: ut ad exemplum eius se instituētes, conuersationem
 illius, perfectæ uitæ normā arbitrentur. Patermitto, quod in
 matris utero benedicatur ei, antequam nascatur; quod in
 phiala

phiala nitentis uitri, & omni speculo purioris patri uirgo traditur per quietem; quod adhuc infantie inuoluta pannis, & uix annum decimum ætatis excedens, honore futuræ beatitudinis consecratur. Sit gratiæ omne, quod ante laborem

Hier. 1 fuit, licet deus præscius futurorum & Hieremiam sanctificet

Luc. 1 in utero, & Ioannem in aluo matris faciat exultare, & Paulum ante constitutionem mundi separet in euangelium filii sui. Ad ea uenio, quæ post duodecimum annum sudore proprio elegit, arripuit, tenuit, cœpit, impleuit. Vnius cellulæ clausa angustis, latitudine paradisi fruebatur. Idem terræ solum, & orationis locus extitit, & quietis. Ieiunium pro ludo habuit, inediam pro refectioe. & cum eam non uescendi desiderium, sed humana confectio ad cibum traheret; pane, sale, & aqua frigida concitabat magis esuriem, quam restinguebat. Et quia pene oblitus sum, quod in principio debui dicere: cum primum hoc propositum arripuit, aurum colli sui, quod quidem murenulam uulgi uocat, quod scilicet, metallo in uirgulas lentescente, quadam ordinis flexuosi catena contextitur, absque parentibus uendidit; & tunicam fusciorem, quam a matre impetrare non poterat, induta, pio negotiationis auspicio, se repente Domino consecrauit; ut intelligeret uniuersa cognatio, non posse aliud ei extorqueri, quæ iam sæculum damnasset in uestibus. Sed, ut dicere cœperamus, ita se semper moderate habuit, & intra cubiculi sui secreta custodivit, ut nunquam pedem proferret in publicum, numquam uiri nosset alloquium; & quod magis sit admirandum, sororem uirginem amaret potius, quam uideret. Operabatur manibus

2. Thess. 3 suis, sciens scriptum esse: Qui non operatur, non manducet. Sponso aut orans loquebatur, aut psallens. Ad martyrum limina pene inuisa properabat. Et cū gauderet proposito suo, in eo uehementius exultabat, quod se nullus cognosceret. Cumq. per omnem annum iugiter ieiunio pascere

retur, biduo triduoq. sic permanens; tum uero in quadagesima nauigii sui uela tendebat, omnes pene hebdomadas uultu lætante coniungens. & quod impossibile forsitan est homi-

hominibus ad credendum, Deo autem præstante possibile est, ita ad quinquagenariam pervenit ætatem, ut non doleret stomachum; non viscerum cruciaretur iniuria; non sicca humus iacentia membra confringeret; non, sacco asperata cutis, foetorem aliquem situmque contraheret; sed sana corpore, animo sanior, solitudinem putaret esse delicias, & in urbe turbida inueniret eremum monachorum. Et hæc quidem tu melius nosti, a qua pauca didicimus, & cuius oculis durities de genibus camelorum in illo sancto corpusculo præ orandi frequentia obcalluisse perspecta est. nos, quod scire possumus, explicamus. Nihil illius severitate iucundius, nihil iucunditate severius, nihil suavitatem tristius, nihil tristitia suavius. ita pallor in facie est, ut, cum continentiam indicet, non redolet ostentationem. sermo silens, & silentium loquens. nec citus, nec tardus incessus. idem semper habitus. neglecta mundities, & in culta ueste cultus ipse sine cultu. Sola vitæ suæ æqualitate promeruit, ut in urbe pompæ, lasciviæ, deliciarum, in qua humilem esse miseria est, & boni eam prædicent, & mali detrahere non audeant; viduæ eam imitentur, & uirgines; maritatæ colant, noxiæ timeant, suspiciant sacerdotes.

L ARGV-

ARGVMENTVM.

MARCELLA Albina filia, nobilis Romana, prius patre, mox septimo a nuptiis mense uiro orbata, Cerealiq. consule, eam in uxorem petente, reiecto, ab Athanasio, Petroq. Alexandrinis episcopis edocta, prima omnium Roma monacha uitam professæ est: ubi a D. Hieronymo instructa, una cum Principia sanctissime uixit. Eius autem illud præcipuum facinus memoratur, quod Origenistarum hæresim ex Vrbe expulerit, & Hierosolymam pietatis ac religionis causa accesserit. Obiit paucis diebus post captam a Gothis Romam. Huius nunc uitam elegantissime scribit D. Hieronymus.

AD PRINCIPIAM VIRGINEM

Marcellæ uiduæ epitaphium.

EPISTOLA XVI.

AEPE, & multum flagitas, uirgo Christi Principia, ut memoriam sanctæ feminæ Marcellæ litteris recolam, & bonum, quo diu frui sumus, etiā ceteris noscendum, imitandumq. describam. Satis doleo, quod hortaris sponte currentem, & me arbitraris indigere precibus; qui ne tibi quidem in eius dilectione concedam; multoq. plus accipiam, quam tribuam beneficii, tantarū recordatione uirtutum. nam, ut hucusque reticerem, & biennium præterirem silentio, non fuit dissimulationis, ut male existimas, sed tristitiæ incredibilis; quæ ita meum oppressit animum, ut melius iudicarem tacere impræsentiarum, quam nihil dignum illius laudibus dicere. Neque uero Marcellam tuam, immo meam, & ut uerius loquar, nostram, omniumq. sanctorum, & propriæ Romanæ urbis inclytum decus, institutis rhetorum prædicabo, ut exponam illustrem familiam, alti sanguinis decus, & stemmata per proconsules & præfectos prætorio decurrentia.

nihil

nihil in illa laudabo, nisi quod proprium est, & eo nobilius, quod, opibus & nobilitate contempta, facta est paupertate & humilitate nobilior. Orbata patris morte, uiro quoque post nuptias septimo mense priuata est. cumq. eā Cerealis, cuius clarum inter consules nomen est, propter ætatem, & antiquitatem familiæ, & insignem, quod maxime uiris placere consuevit, decorem corporis, ac morum temperantiam ambiciosius peteret, suasq. longæuus polliceretur diuitias; & non quasi in uxorem, sed quasi in filiam uellet donationem transfundere; Albinaq. mater tam clarum præsidium uiduatæ domus ultro appeteret; illa respondit: Si uellem nubere, & nō æternæ me cuperem pudicitie dedicare; utique maritū quærerem, non hereditatem. Illoq. mandante, posse & senes diu uiuere, & iuuenes cito mori, eleganter luit. iuuenis quidem potest cito mori, sed senex diu uiuere non potest. qua sententia repudiatus, exemplo ceteris fuit, ut eius nuptias desperarent. Legimus in euangelio secundū Lucā: Et erat Anna prophetissa filia Phanuelis de tribu Aser: Et hæc prouectæ ætatis in diebus plurimis. Vixeratq. cū uiro suo annis septē a uirginitate sua, & erat uidua annis octoginta quattuor, nec recedebat de templo, ieiuniis, & obsecrationibus Domino seruiens die ac nocte. Nec mirum, si uidere meruit saluatorem, quem tanto labore quærebat. Conferamus septem annos septem mensibus; sperare Christum, & tenere; natum confiteri, & in crucifixum credere; paruulum non negare, & uirum gaudere regnantem. Non facio ullam inter sanctas feminas differentiam; quod nōnulli inter sanctos uiros & ecclesiarum principes stulte facere consueuerunt: sed illo tendit assertio, ut, quarum unus est labor, unum & præmium sit. Difficile est, in maledica ciuitate, & in urbe, in qua orbis quondam populus fuit, palmaq. uitiorum, si honestis detraherent, & pura ac munda macularent, non aliquam sinistra rumoris fabulam contrahere. unde quasi rem difficilissimam, & pene impossibilem optat propheta, potiusquā præsumit, dicens: Beati immaculati in uia qui ambulant in

Luc. 2

Psal. 118

L 2 lege

- lege Domini. Immaculatos in uia huius sæculi appellat,
Psal. 14 quos nulla obsceni rumoris aura macularit, qui opprobriū
 non acceperint aduersus proximos suos. De quibus & sal-
Matth. 5 uator in euangelio, Esto, inquit, beneuolus, siue bene sen-
 tiens de aduersario tuo, dum es in uia cum illo. Quis um-
 quam de hac muliere, quod displiceret, audiuit, ut crede-
 ret? quis credidit, ut nō magis se ipsum malignitatis & in-
 famiæ cōdemnaret? Ab hac primum confusa gentilitas est,
 dum omnibus patuit, quæ esset uiduitas Christiana, quam
 & conscientia & habitu promittebat. Illæ enim solent pur-
 purisso & cerussa ora depingere, sericis nitere uestibus, splen-
 dere gemmis, aurum portare ceruicibus, & auribus perfo-
 ratis rubri maris pretiosissima grana suspēdere, fragrare mu-
 sco mure, maritos ita plangere, ut tandem dominatu eo-
 rum se caruisse lætentur, quærantq. alios, non quibus iu-
1. Petr. 3 xta Dei sententiam seruiant, sed quibus imperent. unde &
 pauperes eligunt, ut nomen tantū uirorum habere uidean-
 tur, qui patienter riuales sustineant; si mustitauerint, illico
 proiciendi. Nostra uidua talibus usa est uestibus, quibus
 arceret frigus, non membra nudaret, aurum usque ad anu-
 li signaculum repudians, & magis in uentribus egenorum,
 quam in marsupiiis recondens. Nusquam sine matre. Nul-
 lum clericorum, aut monachorum, quod amplæ domus
 interdum exigebat necessitas, uidit absque arbitris. Sem-
 per in comitatu suo uirgines, ac uiduas, & ipsas graues fe-
 minas, habuit, sciens ex lasciuia puellarum sæpe de domi-
 narum moribus iudicari, & qualis quæque sit, talium con-
 sortio delectari. Diuinarum scripturarum ardor erat incre-
Psal. 118 dibilis: semperq. cantabat: In corde meo abscondi eloquia
Psal. 1 tua, ut non peccem tibi. Et illud de perfecto uiro: Et in le-
 ge Domini uoluntas eius, & in lege eius meditabitur die ac
 nocte. Meditationem legis non in replicando, quæ scripta
 sunt, ut Iudæorum existimant pharisæi, sed in opere intel-
1. Cor. 10 ligens, iuxta illud Apostolicum: Siue comeditis, siue bibi-
 tis, siue quid agitis, omnia in gloriam Domini facientes.
Psal. 118 Et prophetæ uerba, dicentis: A mandatis tuis intellexi, ut,
 postquam

postquam mandata compleisset, tunc se sciret mereri intelligentiam scripturarum. quod & alibi legimus: Quia coepit Iesus facere, & docere. Erubescit enim quamuis præclara doctrina, quam propria reprehendit conscientia. Frustraq. eius lingua prædicat paupertatem, & docet eleemosynas, qui Cræsi diuitiis tumet; uiliq. opertus pallio, pugnat contra tineas uestium sericarum. Illi erant moderata ieiunia, carniū abstinentia, uini odor magis, quam gustus, propter stomachum, & frequentes infirmitates. Raro procedebat in publicum; & maxime nobilium matronarum uitabat domos; ne cogeretur uidere, quod contempserat, apostolorum & martyrum basilicas secretis celebrans orationibus, & quæ populorum frequentiam declinarent. Matri intantum obediens, ut interdum faceret, quod nolebat, nam, cum illa suum diligeret sanguinem; & absque filiis, & nepotibus, uellet in fratris liberos uniuersa conferre: ista pauperes eligebat, & tamen matri contraire nō poterat, monilia, & quidquid supellectilis fuit, diuitibus peritura concedens, magisq. uolens pecuniam perdere, quam parentis animum contristare. Nulla eo tempore nobilium feminarum nouerat Romæ propositum monachorum; nec audebat, propter rei nouitatem, ignominiosum, ut tunc putabatur, & uile in populis nomen assumere. Hæc ab Alexandrinis prius sacerdotibus, papaq. Athanasio, & postea Petro, qui, persecutionem Arianæ hæreseos declinantes, quasi ad tutissimum communionis suæ portum Romā confugerant, uitam beati Antonii, adhuc tunc uiuentis, monasteriorumq. in Thebaide Pachumii, & uirginum ac uiduarum didicit disciplinam: nec erubuit profiteri, quod Christo placere cognouerat. Hanc multos post annos imitata est Sophronia, & aliæ: quibus rectissime illud Ennianum aptari potest: Vtinam ne in nemore Pelio. Huius amicitia fruita est Paula uenerabilis. in huius cubiculo nutrita Eustochium, uirginitatis decus: ut facilis æstimari sit, qualis magistra, ubi tales discipulæ. Rideat forsitan infidelis lector, me in muliercularum laudibus immorari: qui si recordetur

L 3 sanctas

- sanctas feminas, comites Domini saluatoris, quæ ministra-
Matth. 27. bant ei de sua substantia, & tres Marias stantes ante crucem
Ioan. 19 Mariamq. proprie Magdalene, quæ, ob sedulitatem & ar-
 (et 20 dorem fidei, Turritæ nomen accepit, & prima ante aposto-
 los Christum uidere meruit resurgentem; se potius super-
 bix, quam nos condemnabit ineptiarum; qui uirtutes non
 sexu, sed animo iudicamus, contemptæq. nobilitatis ac di-
 uitiarum maiorem gloriam ducimus. Vnde & Iesus Ioan-
 nem euangelistam amabat plurimum; qui propter generis
 nobilitatem erat notus pontifici, & Iudæorum insidias non
Ioan. 18 timebat; intantum, ut Petrum introduceret in atrium, &
 staret solus apostolorum ante crucem; matremq. saluatoris
 in sua reciperet; ut hereditatem uirginis Domini, uirgi-
 nem matrem filius uirgo susciperet. Annis igitur plurimis
 sic suam transegit ætatem, ut ante se uetulam cerneret, quā
 adolescentulam fuisse meminisset; laudans illud Platoniciū,
 qui philosophiam meditationem mortis esse dixit. unde &
 noster Apostolus, Quotidie, inquit, morior propter ue-
1. Cor. 15 strā salutem. Et Dominus iuxta antiqua exemplaria: Nisi
Luc. 9 quis tulerit crucem suam quotidie, & secutus fuerit me, nō
 potest meus esse discipulus. Multoq. ante per prophetam
Psal. 43 Spiritus sanctus: Propter te mortificamur tota die, æstima-
 ti sumus ut oues occisionis. Et post multas ætates illa sen-
Eccl. 7 tentia: Memento semper diem mortis, & numquam pec-
 cabis. Disertissimiq. præceptum Satyrici: Viue memor le-
 ti: fugit hora: hoc, quod loquor, inde est. Sic ergo, ut
 dicere cœperamus, ætatem duxit, & uixit, ut semper
 se crederet esse morituram: sic induta est uestibus, ut
Rom. 13 meminisset sepulcri, offerens se hostiam rationabilem, ui-
 uam, placentem Deo. Denique, cum & me Romam cum
 sanctis pontificibus, Paulino, et Epiphanio, ecclesiastica tra-
 xisset necessitas; quorum alter Antiochenam Syriæ, alter
 Salaminiam Cypri rexit ecclesiam; & uerecunde nobilium
2. Tim. 4 seminarum oculos declinare; ita egit, secundum Aposto-
 lum, importune opportune, ut pudorem meum sua supera-
 ret industria. Et quia alicuius tunc nominis esse existimabar
 super

super studio scripturarum; numquam conuenit, quin de scripturis aliquid interrogaret; nec ut statim acquiesceret, sed moueret e contrario quæstiones; non ut contenderet; sed ut quærendo disceret earum solutiones, quas opponi posse intelligebat. Quid in illa uirtutum, quid ingenii, quid sanctitatis, quid puritatis inuenerim, uereor dicere; ne fidem credulitatis excedam, & tibi maiore dolorem incutiam, recordanti quanto bono carueris. hoc solum dicam; quod, quidquid in nobis longo fuit studio congregatum, & meditatione diuturna quasi in naturam uersum, hoc illa libauit, didicit, atque possedit; ita ut, post profectiorem nostram, si in aliquo testimonio scripturarum esset oborta contentio, ad illam iudicem pergeretur. et quia ualde prudens erat, & nouerat illud, quod appellant philosophi τὸ πρέπον idest, decere quod facias; sic ad interrogata respondebat, ut etiam sua non sua diceret, sed uel mea, uel cuiuslibet alterius; ut in eo ipso, quod docebat, se discipulam fateretur: sciebat enim dictum ab Apostolo: Docere autem mulieri non permitto: ne uirili sexui, & interdum sacerdotibus, de obscuris & ambiguis sciscitantibus, facere uideretur iniuriam. In nostrum locum statim audiuius te illius adhæsisse consortio, & numquam ab illa ne transuersum quidem unguem, ut dicitur, recessisse; eadem domo, eodem cubiculo usam; ut omnibus in urbe clarissima notum fieret, & te matrem, & illam filiam reperisse. Suburbanus ager uobis pro monasterio fuit, & rus electum pro solitudine. multoq. ita uixistis tempore, ut, ex imitatione uestri, & conuersione multarum, gauderemus Romam factam Hierosolymam. Crebra uirginum monasteria, monachorum innumerabilis multitudo; ut pro frequentia seruientium Deo, quod prius ignominie fuerat, esset postea glorie. Interim absentiam nostri mutuis solabamur alloquiis; & quod carne non poteramus, spiritu reddebamus. semper obuiare epistolis, superare officiis, saluationibus præuenire. non multum perdebat absentia, quæ iugibus sibi litteris iungebatur. In hac tranquillitate, & Domini seruitute, hæretica in his prouinciis exorta

1. Tim. 2

L 4 tempestas

tempestas cuncta turbauit; & in tantam rabiem concitata est, ut nec sibi, nec ulli bonorum parceret: et, quasi parum esset, hic uniuersa mouisse, nauem plenam blasphemiarum Romano intulit portui: inuenitq. protinus patella operculum; & Romanæ fidei purissimum fontem cœno lutosâ per miscuere uestigia. nec mirū, si in plateis, & in foro rerū uenialium, fictus ariolus stultorum uerberet nares, & obtorto fuisse dentes mordentium quatiat; cum uenenata spurcaq. doctrina Romæ inuenerit, quos induceret. tunc librorum *πρὸς ἀρχαίαν* infamis interpretatio: tunc discipulus *ὁ ἄβιος*, & uere nominis sui, si in talem magistrum non impegiisset. tunc nostrorum *διδασκαλικῶν* contradictio, & pharisæorum turbata est schola. tunc sancta Marcella, quæ diu se cohibuerat, ne per æmulationem quippiam facere uideretur, postquam sensit fidem, Apostolico ore laudatam, in plerisque uiolari, ita ut sacerdotes quoque, & nonnullos monachorum, maximeq. sæculi homines, in assensum sui traheret, ac simplicitati illuderet Episcopi, qui de suo ingenio ceteros æstimabat, publice refutit, malens Deo placere, quam hominibus. Laudat saluator in euangelio uillicum iniquitatis, quod contra Dominum quidem fraudulenter, at tamen pro se prudenter fecerit. Cernentes hæretici de parua scintilla maxima incendia concitari, & suppositam dudum flammam iam ad culmina peruenisse, nec posse latere, quod multos deceperat, petunt, & impetrant ecclesiasticas epistolas; ut, communicantes Ecclesiæ, discessisse uiderentur. Non multum tempus in medio, succedit in pontificatum uir insignis Anastasius; quem diu Roma habere non meruit, ne orbis caput sub tali Episcopo truncaretur: immo iccirco raptus, atque translatus, est, ne semel latam sententiam precibus suis flectere conaretur: dicente Domino ad Hieremiam: Ne oraueris pro populo isto, neque depreceris in bonum. quia, si ieiunauerint, non exaudiam preces eorum: & si holocausta & uictimas obtulerint, non suscipiam eas. in gladio enim, & fame, & pestilentia ego consummam eos. Dicas, quid hæc ad laudem Marcellæ? Damnationis

Rom. 1

Luc. 16

Hier. 14

tionis hæreticorum hæc fuit principium; dum adducit testes, qui prius ab eis eruditi, & postea ab hæretico fuerant errore correpti; dum ostendit multitudinem deceptorum; dum impia *ὁδὸς ἀρχαῖν* ingerit uolumina, quæ emendata manu scorpium monstrabantur; dum acciti frequentibus litteris hæretici, ut se defenderent, uenire non sunt ausi; tan-
taq. uis conscientiæ fuit, ut absentes damnari, quam præsentem coargui, maluerint. Huius tam gloriosæ uictoriæ origo Marcella est: tuq. caput horum & causa bonorum, scis me uera narrare; quem nosti uix de multis pauca dicere; ne legenti fastidium faciat odiosa replicatio; & uidear apud maleuolos sub occasione laudis alterius stomachum meum digerere. Pergam ad reliqua. De occidentis partibus ad orientem turbo transgressus minitabatur plurimis magna naufragia. tunc impletum est, Putas ueniens filius hominis fidem inueniet super terram? Refrigerata caritate multorum, pauci, quia amabant fidei ueritatem, nostro lateri iungebantur; quorum publice petebatur caput; contra quos opes omnes parabantur, ita ut Barnabas quoque duceretur in illam simulationem, inimo apertum parricidium; quod non uiribus, sed uoluntate, commisit. Et ecce uniuersa tempestas, Domino flante, deleta est, expletumq. uaticinium prophetales: Auferes spiritum eorum, & defici-
ent, & in puluerem suum reuertentur, in illa die peribunt omnes cogitationes eorum. Et illud euangelicum: Stulte, hac nocte auferetur anima tua a te: quæ autem præparasti, cuius erunt? Dum hæc aguntur in Iebus, terribilis de occidente rumor affertur, obsideri Romam, & auro salutem ciuium redimi, spoliatosq. rursus circumdari, ut post substantiam uitam quoque perderent. Hæret uox, & singultus intercepti uerba dictantis. capitur urbs, quæ totum cepit orbem: immo fame perit antequam gladio; & uix pauci, qui caperentur, inuenti sunt. ad nefandos cibos erupit esurientium rabies; & sua inuicem membra laniarunt; dum mater non parcat lactenti infantæ, & suo recipit utero, quem paulo ante effuderat. Nocte Moab capta est, nocte cecidit
murus

Luc. 18

Gal. 2

Psal. 103

Luc. 12

Isa. 15

Psal. 78 murus eius . Deus , uenerunt gentes in hereditatem tuam : polluerunt templum sanctum tuum : posuerunt Hierusalem in pomorum custodiam : posuerunt cadauera sanctorum tuorum escas uolatilibus cæli , carnes sanctorum tuorum bestiis terræ . Effuderunt sanguinem eorum , sicut aquam , in circumitu Hierusalem ; & non erat , qui sepeliret . Quis cladem illius noctis , quis funera fando Explicet , aut posset lacrymis æquare dolorem ? Vrbs antiqua ruit , multos dominata per annos : Plurima perq. uias sparguntur inertia passim Corpora , perq. domos , & plurima mortis imago . Cum interim , ut in tanta confusione rerum , Marcellæ quoque domum cruentus uictor ingreditur . Sit mihi fas audita loqui , immo a sanctis uiris uisâ narrare , qui interfuere præses , qui te dicunt in periculo quoque ei fuisse sociatam . Intrepido uultu excepisse dicitur introgressos . cumq. posceretur aurum , & defossas opes uili excusaret tunica , non tamen fecit fidem uoluntariæ paupertatis . cæsam sultibus flagellisq. aiunt non sensisse tormenta , sed hoc lacrymis , hoc pedibus eorum prostratam egisse , ne te a suo consortio separarent , ne sustineret adolescentia , quod senilis ætas timere non poterat . Christus dura corda molliuit , & inter cruentos gladios inuenit locum pietas . cumq. & illam , & te ad beati apostoli Pauli basilicam barbari deduxissent , ut uel salutem uobis ostenderent , uel sepulcrum : in tantam lætitiâ dicitur erupisse , ut gratias ageret Deo , quod te integram sibi reseruasset ; quod pauperem illam non fecisset captiuitas , sed inuenisset ; quod egeret quotidiano cibo ; quod saturata Christo non sentiret esuriem ; quod & uoce , & ope re loqueretur : Nuda exiui de utero matris meæ , nuda & redeam . Sicut Domino uisum est , ita & factum est : Sit nomen Domini benedictum . Post aliquot dies , sano , integro , uegetoq. corpusculo obdormiuit in Domino ; & te paupertatule suæ , immo per te pauperes reliquit heredes , claudens oculos in manibus tuis , reddens spiritum in tuis osculis , dum inter lacrymas tuas illa rideret conscientia uitæ bonæ , & præmiis futurorum . Hæc tibi , Marcella uenerabilis ,

bilis, & tibi, Principia filia, una & breui lucubratione dicta
ui, non eloquii uenustate, sed, uoluntate in uos animi gra-
tissimi, & Deo, & legentibus placere desiderans.

ARGVMENTVM.

PAVLA, & Eustochium, quæ iam Bethlehem in monaste-
rio uitam agebant, Marcellam, nobilissimam feminam, cuius
epitaphium superior epistola continet, ut, relicta Roma, ad
loca sancta se conferat, adhortantur.

PAVLA, ETEVSTOCHIVM
Marcellæ, ut commigret Bethlehem.

EPISTOLA XVII.

ENSVRAM caritas non habet; & impatientia
M nescit modum, & desiderium non sustinet. unde &
nos oblita uirium nostrarum, &, non quid possu-
mus, sed quid uelimus, tantum cogitantes, magistram cu-
pinus docere discipulæ, &, ut est uulgate prouerbium, Sus-
artium repertricem. Tu, quæ primam scintillam nostro fo-
miti subiecisti, quæ ad hoc studium nos & sermone hortata
es, & exemplo, & quasi gallina congregasti sub alas pullos *Matth. 23*
tuos, nunc nos libere absque matre uolitare pateris, &
accipitis pauere formidinem, & ad omnem umbram præ-
teruolantium auium formidare? Igitur, quod solum absen-
tes facere possumus, querulas fundimus preces; & deside-
rium nostrum non tam fletibus, quam eiulatibus contesta-
mur; ut Marcellam nostram nobis reddas, & illam mitem,
illam suauem, illam omni melle & dulcedine dulciorem nō
patiaris apud eas esse rigidam, & tristem rugare frontem,
quas affabilitate sua ad simile uitæ studiū prouocauit. Cer-
te, si sunt meliora quæ poscimus, non est impudens desi-
derium. si cunctæ scripturarum uoces nostræ sententiæ con-
gruunt, non facimus audacter, ad ea te prouocantes, ad
quæ

- quæ tu nos sapissime cohortata es. Prima Dei uox ad Abraham, Exi, inquit, de terra tua, & de cognatione tua, & uade in terram, quam monstrauero tibi. Iubetur patriarchæ, ad quem primum de Christo facta est repromissio, ut relinquat Chaldæos; relinquat confusionis urbem, & Rohoboth, idest, latitudines eius; relinquat campum Senaar, in quo superbix usque ad cælum erecta turris est; & post fluctus huius sæculi, post flumina, super quæ sederunt sancti, & fleuerunt cum recordarentur Sion, post gurgitem grauem Cobar, de quo Ezechiel, capillo uerticis subleuatus, Hierusalem usque transfertur, ut habitet terram repromissionis, quæ non rigatur ut Aegyptus deorsum, sed defursum; nec facit holera languentium cibos, sed temporaneum & serotinum de cælo expectat imbrem. Hæc terra montuosa, & in sublimi sita, quantum a deliciis sæculi uacat, tanto maiores habet delicias spiritus. Denique & Maria, mater Domini, postquam ad eam angeli facta est promissio, & uterum suum intellexit esse domum filii Dei, derelictis campestribus ad montana perrexit. De hac urbe Alyphylo quondam hoste superato, & diabolicæ percussa frontis audacia, postquam ille in faciem corruit, exultantium animarum turba processit: & concinens chorus decem millium, David nostri uictoriam prædicauit. In hac angelus gladium tenens, & totam impietatis deuastans urbem, in Orne Iebuseorum regis area templum Domini designauit, iam tunc significans Ecclesiam Christi, non in Israel, sed in gentibus consurgentem. Recurre ad Genesim: & Melchisedech, regem Salem, huius principem inuenies ciuitatis: qui iam tunc in typo Christi panem & uinum obtulit, & mysterium Christianum in saluatoris sanguine & corpore dedicauit. Tacita forsitan mente reprehendes, cur non sequamur ordinem scripturarum, sed passim, & ut quidque obuiam uenerit, turbidus sermo perstringat. Sed in principio testatæ sumus, dilectionem ordinem non habere, & impatientiam nescire mensuram. unde & in Cantico canticorum quasi difficile præcipitur: Ordinate in me caritatem, & nunc

& nunc eadem dicimus, nos non ignoracione, sed, affectu
 labi. Denique, ut multo ordinatius aliquid proferamus,
 antiquiora repetenda sunt. In hac urbe, immo in hoc tunc
 loco & habitasse dicitur, & mortuus esse Adam. unde & lo-
 cus, in quo crucifixus est Dominus noster, Caluaria appel-
 latur, scilicet quod ibi sit antiqui hominis Caluaria cōdita:
 ut secundi Adam, idest, Christi sanguis de cruce stillans, pri-
 mi Adam & iacentis protoplasti peccata dilueret; & tunc
 sermo ille Apostoli compleretur: Excitare, qui dormis, &
 exurge a mortuis, & illuminabit te Christus. *Eph. 5*
 Quantos hæc
 urbs prophetas, quantos emisit sanctos uiros, longum
 est recensere. Totum mysterium nostrum istius prouinciæ
 urbisq. uernaculum est. In tribus nominibus trinitatis de-
 monstrat fidem. Iebus, Salem, & Hierusalem appellatur.
 primum nomen calcata, secundum pax, tertium uisio pa-
 cis. Paulatim quippe peruenimus ad finem, & post concu-
 lationem ad pacis uisionem erigimur: ex quo Salomō, id-
 est, pacificus, in ea natus est: & factus est in pace locus eius.
 Et in figura Christi, sub etymologia urbis, Dominus do-
 minantium, & rex regum nomen accepit. Quid referemus
 de Dauid, & tota progenie eius, quæ in hac ciuitate regna-
 uit? quanto enim Iudæa ceteris prouinciis, tanto hæc urbs
 cuncta sublimior est Iudæa. et, ut coactius differamus, to-
 tius prouinciæ gloria metropoli uindicatur; & quidquid in
 membris laudis est, omne refertur ad caput. Iamdudum te
 cupientem in uerba prorumpere, ipsi litterarum apices sen-
 tiunt; & uenientem contra charta intelligit quæstionem.
 Respondebis quippe, & dices, hoc olim fuisse, quando di-
 lexit Dominus portas Sion super omnia tabernacula Iac-
 cob, & fuerunt fundamenta eius in montibus sanctis: licet
 & hæc possint altius interpretari. Postquam uero consur-
 gentis Domini uox illa pertonuit: Ecce relinquetur uobis *Luc. 13*
 domus uestra deserta: & ruinam eius flebiliter propheta-
 uit, dicens: Hierusalem Hierusalem, quæ occidis prophe-
 tas, & lapidas eos, qui ad te missi sunt: quoties uolui con-
 gregare filios tuos, sicut gallina congregat pullos suos sub
 alis,

*Psal. 79**Apoc. 19**1.Tim. 6**Psal. 86**Luc. 13**Matth. 23*

Marc. 15 alis, & noluit. Ecce dimittetur uobis domus uestra deser-
 ta, & postquam uelum templi scissum est, & circumdata
 ab exercitu Hierusalem, & Dominico cruore uiolata, tunc
 ab ea angelorum praesidia & Christi gratiam recessisse. De-
 nique etiam Iosephum, qui uernaculus scriptor est Iudaeo-
 rum, asserere illo tempore, quo crucifixus est Dominus,
 ex adytis templi uirtutum caelestium erupisse uoces, dicen-
 tium: Transmigremus ex his sedibus. Ex quibus & aliis ap-
Rom. 5 parere, ubi abundauit gratia, ibi superabundasse peccatu:
Matth. 28 & postquam audierunt apostoli: Euntes docete omnes gen-
Act. 13 tes: Et ipsi apostoli dixerunt: Oportebat quidem uobis
 primum annunciare uerbum Dei: quoniam autem nolui-
 stis, ecce transimus ad gentes: tunc omne sacramentum Iu-
 daeae, & antiquam Dei familiaritatem per apostolos in na-
 tiones fuisse translatam. Valida quidem quaestio, & quae
 posset etiam eos, qui scripturarum aliquid attigerunt, con-
Luc. 19 cutere; sed perfacile soluitur. Numquam eam fleret Domi-
Ioan. 11 nus corruentem, nisi diligeret. Fleuit & Lazarum, quia ama-
 bat eum. Et hoc tamen, prima fronte cognoscito, non lo-
 ci, sed hominum fuisse peccatum: uerum, quia interfectio
 populi captiuitas ciuitatis est, propterea urbem deletam,
 ut populus puniretur; ideo templum subrutum, ut typicae
 hostiae tollerentur. Ceterum, quantum ad locum pertinet,
Hebr. 9 per profectus temporum multo nunc augustior est, quam
Exod. 25 ante fuit. Venerabantur quondam Iudaei sancta sanctorum,
 quia ibi erant Cherubin, & propitiatorium, & arca testa-
 menti, manna, uirga Aaron, & altare aureum. Nonne ti-
 bi uenerabilius uidetur sepulcrum Domini? quod quoties-
 cumque ingredimur, toties iacere in syndone cernimus sal-
Ioan. 22 uatorem: & paululum ibidem commorantes, rursus ui-
Marc. 16 demus angelum sedere ad pedes eius, & ad caput sudarium
Luc. 24 conuolutum. Cuius sepulcri gloria, multo antequam exci-
Esa. 11 deretur a Ioseph, scimus Esaiae uaticinio prophetatum, di-
 centis: Et erit requies eius honor: quod scilicet sepulturae
 Domini locus esset ab omnibus honorandus. Sed dices,
Apoc. 11 quo modo in Apocalypsi Ioannis legimus: Et occider illos
 (haud

(haud dubium, quin propheta) bestia, quæ ascendit ex abyſſo; & corpora eorum iacebunt in plateis ciuitatis magnæ, quæ uocatur ſpiritualiter Sodoma & Aegyptus, ubi & Dominus eorū crucifixus eſt. Si enim ais: Ciuitas magna, in qua crucifixus eſt Dominus, nulla eſt alia, niſi Hieruſalem: ubi autē crucifixus eſt Dominus, ſpiritualiter Sodoma appellatur, & Aegyptus: ergo Hieruſalem Sodoma eſt, & Aegyptus, in qua crucifixus eſt Dominus: Primū te ſcire uolumus, omnem ſanctam ſcripturā nō poſſe ſibi eſſe contrariā, & maxime unū aduerſum ſe nō diſcrepare librū; & ut plus adiiciamus, eundē eiſdemq. libri locū in Apocalypſi, de qua nunc teſtimonium protuliſti, ante decem circiter uerſiculos ſcribitur: Surge, & metire templum Dei, & altare, & adorantes in eo. Atrium autem, quod eſt foris templum, eiice foras: & ne metiaris illud, quoniam datum eſt gentibus: & ciuitatem ſanctam calcabunt menſibus quadraginta duobus. ſi enim Apocalypſis multo poſt paſſionem Domini ſcripta eſt a Ioanne; & in ea Hieruſalem ſancta ciuitas appellatur: quo modo ruſum ſpiritualiter Sodoma uocatur & Aegyptus? Nec ſtatim potes dicere, ſanctam dici Hieruſalem cæleſtem, quæ futura eſt, & Sodomam, quæ corruiſcit, appellari: quia de futura dicitur, quod beſtia, quæ aſcenſura eſt de abyſſo, faciet aduerſus duos prophetas bellum, & uincet illos, & occidet, & corpora eorum iacebunt in platea ciuitatis magnæ. De qua ciuitate & in fine eiſdem libri ſcribitur; Et ciuitas in quadro poſita *Apoc. 21* eſt: & lōgitudō eiſ, & latitudo tanta eſt, quāta & altitudo: & menſus eſt ciuitatem de arundine aurea, per ſtadia duodecim millia. Lōgitudō, & latitudo, & altitudo eiſ æqualia ſunt. Et menſus eſt muros eiſ centū quadraginta quatuor cubitorū menſura hominis, quæ eſt angeli. Et erat ſtruſtura muri eiſ ex lapide iaspide: ipſa uero ciuitas auro mūdo &c. Vbi quadrū eſt, ibi nec longitudo, nec latitudo appellari poteſt. Et quæ eſt iſta menſura, ut tanta ſit longitudo, & latitudo, quanta altitudo eiſ, & muri de lapide iaspide, & tota ciuitas de auro mundo, & fundamenta & plateæ eiſ

eius de lapidibus pretiosis, & duodecim portæ fulgentes margaritis? Cū ergo hæc nō possint carnaliter accipi; (absurdum quippe est, per duodecim millia stadiorū tantam ciuitatis longitudinem & latitudinē, quātam & altitudinem, prædicari) spiritualiter intelligenda sunt singula: & ciuitas magna, quam uidelicet primus ædificauit Cain, & nominauit eam ex uocabulo filii sui, hic mundus intelligendus est, quem accusator fratrum suorum diabolus, & fraticida Cain periturus extruxit uitis, sceleribus condidit, iniquitate compleuit, quæ spiritualiter appellatur Sodoma, & Aegyptus. de qua Sodoma, scribitur: Restituetur Sodoma in antiquum: quod scilicet ita restituentus sit mundus, ut ante fuit. nec enim possumus credere rursum ædificandam Sodomam, & ceteras, Gomorram scilicet, & Adamam, & Seboim, sed in perpetuos cineres relinquendas. Aegyptum autem numquam pro Hierusalem legimus, sed semper pro hoc mundo. Et, quia longum est de scripturis innumerabilia exempla congerere; unum testimonium proferamus, ubi manifestissime mundus hic Aegyptus appellatur. In

Gen. 4 epistola canonica Iudas apostolus, frater Iacobi, scribit, dicens: Cōmonere autem uos uolo, scientes semel omnia, quoniam Iesus populum de terra Aegypti saluans, secundo eos, qui non crediderunt, perdidit. Et ne putares de Iesu dici filio Naue, statim sequitur: Angelos uero, qui non seruauerunt suū principatum, sed dereliquerunt suum domicilium, in iudicium magni Diei uinculis æternis sub caligine reseruauit. Et ut credas, ubicumque simul Aegyptus, & Sodoma, & Gomorra nominantur, non loca, sed mundum hunc interpretari, statim subiungit exemplum: Sicut Sodoma, & Gomorra, & finitimæ ciuitates simili modo fornicatæ, & abeuntes post carnem alteram, factæ sunt exemplum, ignis æterni pœnam sustinentes. Et quid necesse est plura conquirere, cum post passionem & resurrectionem Domini Matthæus euangelista cōmemoret: Et petre scissæ sunt, & sepulcra aperta, & plurima corpora dormientium sanctorū surrexerunt: & egredientes de sepulcris post

resurre-

resurrectionem suam, ingressi sunt sanctam ciuitatem, & apparuerunt multis. Nec statim Hierosolyma caelestis, sicut plerique ridicule arbitrantur, in hoc loco intelligitur; cum signum nullum esse potuerit apud homines Domini resurgentis, si corpora sanctorum in caelesti Hierusalem uisa sunt. Cum ergo & euangelistae, & omnes scripturae Hierosolymam sanctam nomen ciuitatem; & Psalmista praecipiat, ut adoremus in loco, ubi steterunt pedes eius, ne patiaris eam appellari Sodomam, & Aegyptum, per quam Dominus iurare uetat, quia sit ciuitas magni regis. Maledictam terram nominant, quod cruorem Domini hauserit. Et quo modo benedicta loca putant, in quibus Petrus, & Paulus, Christiani exercitus duces, sanguinem fudere pro Christo? Si serudrum, & hominum gloriosa confessio est; cur Domini & Dei non sit gloriosa confessio? Et martyrum ubique sepulcra ueneramur. et sanctam fauillam oculis apponentes, si liceat, etiam ore contingimus: & monumentum, in quo Dominus conditus est, quidam exultant negligendum? Si nobis non credimus, credamus saltem diabolo, & angelis eius: qui quotiescumque ante illud de obsessis corporibus expelluntur, quasi in conspectu tribunalis Christi stantes contremiscunt, rugini, & sero dolent crucifixisse, quem timeant. Si post passionem Christi (ut scelerata uox concrepat) hic detestabilis locus est: quid sibi uoluit Paulus Hierosolymam festinare, ut ibi faceret Pen-
Psal. 131
Matth. 23
Act. 20
Gal. 2
1. Cor. 16
M nisi

nisi in illis Christum adorassent locis, de quibus primum euangelium de patibulo coruscauerat. Certe si præclarus orator reprehendendum nescio quem putat, quod litteras Græcas nō Athenis, sed Lilybæi, Latinas nō Romæ, sed in Sicilia didicerit; quod uidelicet unaquæque prouincia habeat aliquid proprium, quod alia æque habere non possit: cur nos putamus absque Athenis nostris quemquā ad studiorū fastigia peruenisse? Nec hoc dicimus, quod renuamus, regnū Dei intra nos esse, & sanctos uiros etiā esse in ceteris regionibus; sed quod hoc asseramus, uel maxime eos, qui in toto orbe sunt primi, huc pariter cōgregari: ad quæ nos loca nō ut primæ, sed ut extremæ uenimus, ut primos in eis omnium gentiū cerneremus. Certe flos quidā, & pretiosissimus lapis inter ecclesiastica ornamenta, monachorum & uirginum chorus est. Quicumque in Gallia fuerit primus, huc properat. Diuisus ab orbe nostro Britannus, si in religione processerit, occiduo sole dimisso, querit locum, fama sibi tantum & scripturarum relatione cognitum. Quid referamus Armenios, quid Persas, quid Indiæ, quid Aethiopum populos, ipsamq. iuxta Aegyptum, fertilem monachorum, Pontum, & Cappadociam, Syriam Cœlen, & Mesopotamiam, cunctaq. orientis examina?

Matth. 24 Quæ iuxta saluatoris eloquium, dicentis: Vbicumque fuerit corpus, illuc congregabuntur aquilæ: cōcurrunt ad hæc loca, & diuersarum nobis uirtutum specimen ostendunt. Vox quidem dissona, sed una religio. tot pene psallentium chori, quot gentium diuersitates. et inter hæc, quæ uel prima in Christianis uirtus est, nihil arrogant sibi de contentia supercilii. Humilitatis inter omnes contentio est. Quicumque nouissimus fuerit, hic primus putatur. In ueste nulla discretio, nulla admiratio. Vt cumque placuerit incedere, nec detractio est, nec laudis. Ieiunia quoque neminem subleuant: nec desertur inedia, nec moderata saturitas condemnatur. Suo domino stat unusquisque, aut cadit. Nemo iudicat alterum, ne a Domino iudicetur. Et, quod in plerisque prouinciis familiare est, ut genuino

dente

dente se lacerent, hic penitus non habetur. Procul luxuria, procul uoluptas: tanta in ipsa urbe orationum loca, ut ad ea peragrandia dies sufficere non possit. Verum, ut ad uillulam Christi, & Mariæ diuersorium ueniamus, (plus enim laudat unusquisque, quod possidet) quo sermone, qua uoce speluncam tibi possumus Saluatoris exponere? Et illud præsepe, in quo infantulus uagiit, silentio magis, quam infimo sermone, honorandum est. Vbi sunt latæ porticus? ubi aurata laquearia? ubi domus miserorum, pœnis, & damnatorum labore uestitæ? ubi, instar palatii, opibus priuatorum extructæ basilicæ, ut uile corpusculum hominis pretiosius inambulet, &, quasi mundo quidquam possit esse ornatius, tecta magis sua uelint adspicere, quam cælum? Ecce in hoc paruo terræ foramine cælorum conditor natus est: hic inuolutus pannis, hic uisus a pastoribus, hic demonstratus a stella, hic adoratus a Magis. Et hic puto locus sanctior est Tarpeia rupe, quæ, de cælo sæpius fulminata, ostendit, quod Domino displiceret. Lege Apocalypsim Ioannis; &, quid de muliere purpurata, & *Apoc. 17. 18* scripta in eius fronte blasphemia, septem montibus, aquis multis, & Babylonis canteritur exitu, contuere. Exite, inquit Dominus, de illa populus meus; & ne participes sitis *Hier. 50* delictorum eius; & de plagis eius non accipiat. Fugite de medio Babylonis, & saluate unusquisque animam suam. Cecidit enim, cecidit Babylon magna, & facta est habitatio dæmonum, & custodia omnis spiritus immundi. Est quidem ibi sancta ecclesia; sunt trophæa apostolorum, & martyrum; est Christi uera confessio; est ab Apostolo præ *Rom. 1* dicata fides; &, gentilitate calcata, in sublime se quotidie erigens uocabulum Christianum: sed ipsa ambitio, potentia, magnitudo urbis, uideri, & uidere, salutari, & salutare, laudare, & detrahare, uel audire, uel proloqui, & tantam frequentiam hominum saltem inuitum uidere, a proposito monachorum, & quiete aliena sunt: aut enim uidemus uenientes ad nos, & silentium perdimus; aut non uidemus, & superbie arguimur. interdumq. ut ui-

M 2 sitanti-

stantibus reddamus uicem, ad superbas fores pergimus; & inter linguas rodentium ministrorum, postes ingredimur auratos. In Christi uero, ut supra diximus, uillula, tota rusticitas, & extra psalmos silentium est. Quocumque te uerteris, arator stiuam tenens, Alleluia decantat. Sudans messor psalmis se auocat, & curua attondens uitem falce uinitor, aliquid Dauidicum canit. Hæc sunt in hac prouincia carmina, hæc, ut uulgo dicitur, amatorie cantiones; hic pastorum sibilus, hæc arma culturæ. Verum, quid agimus, nec, quid deceat, cogitantes, solum, quod cupimus, hoc uidemus? O quando illud tempus adueniet, cum anhelus nuncium uiator apporet, Marcellam nostram ad Palæstinæ litus appulsam; & toti monachorum chori, tota uirginum agmina concrepabunt? obuiam iam iamq. gestimus occurrere, & non expectato uehiculo, concitum pedibus ferre corpus. Tenebimus manus; ora cernemus; & a desiderato uix auellemur amplexu. Ergo ne erit illa dies, quando nobis liceat speluncam saluatoris intrare? in sepulcro Domini flere cum sorore, flere cum matre? crucis deinde lambere lignum, & in oliueti monte cum ascendente Domino, uoto & animo subleuari? uidere exire Lazarum fasciis colligatum, & fluentia Iordanis ob lauacrum Domini puriora; inde ad pastorum caulas pergere, in Dauid orare Mausoleo? Amos prophetam etiã nunc buccina pastoralis in sua conspicere rupe clangentem? ad Abraham, Isaac, & Iacob, trium quoque illustrium seminarum, uel tabernacula properare, uel memorias? uidere fontem, in quo a Philippo eunuchus est tinctus? Samariã pergere, & Ioannis Baptistæ, Helisæi quoque, & Abdæ pariter cineres adorare? ingredi speluncas, in quibus persecutionis & famis tempore prophetarum agmina sunt nutrita? Ibimus ad Nazareth, & iuxta interpretationem nominis eius, florem uidebimus Galilææ. Haud procul inde cernetur Cana, in qua aquæ in uinum uerse sunt. Pergemus ad Itabyrium; & tabernacula saluatoris non, ut Petrus quondam uoluit, cum Moyse, & Helia, sed cum patre cernemus, & spiritu sancto.

Ioan. 2
Matth. 17

sancto. Inde ad mare ueniamus Genezareth; & de quin- Matth. 14
que & septem panibus uidebimus in deserto quinque &
quattuor hominum millia saturata. Apparebit opidum
Naim, in cuius porta uiduæ filius suscitatus est. Videbitur Marc. 8
& Hermon, & torrens Endor, in quo superatus est Sisara. Iud. 3
Capharnaum quoque signorum Domini familiaris, & o-
mnis pariter Galilæa cerneretur. Et tunc comitante Christo,
cum per Silo, & Bethel, & cetera loca, in quibus Ecclesiæ
quasi quædam uictoriarum Domini sunt erecta uexilla, ad
nostram speluncam redierimus, canemus iugiter, crebro
flebitur, indefinenter orabimus, & uulneratæ iaculo sal-
uatoris in commune dicemus: Inueni, quem quæsiuit ani- Cant. 3
ma mea: tenebo eum, & non dimittam illum.

ARGUMENTVM.

EANDEM Marcellam, quam superiori epistola Paula,
& Eustochium ad loca sancta hortate sunt, nunc D. Hierony-
mus ad rus Bethlehemitici uitæ inuitat. hoc autem ut assequa-
tur, primo rus omne collaudat: mox, quæ Romæ uiuendi in-
commoda, & quæ in Bethlehem commoda sint, commemorat.

HIERONYMVS MARCELLAM
inuitat ad rus Bethlehemiticum.

EPISTOLA XVIII.

AMBROSIVS, quo chartas, sumptus, notarios
ministrante, tam innumerabiles libros uere Ada-
mantius, & Chalcenterus noster explicauit, in qua-
dam epistola, quam ad eundem de Athenis scripserat, re-
fert, numquam se cibum, Origene præsentē, sine lectione
sumpsisse; numquam inisse somnum, nisi unus e fratribus
sacris litteris personaret: hoc diebus egisse & noctibus; ut
& lectio orationem exciperet, & oratio lectionem. quid

M 3 nos,

nos, uentris animalia, tale umquam fecimus? quos si uel secunda hora legentes inuenerit, oscitamus: manu faciem defricantes, continemus stomachum: &, quasi post multū laborem, mundialibus rursus negotiis occupamur. Prætermitto prandia, quibus mens onerata premitur. Pudet dicere frequentiam salutandi, qua aut ipsi quotidie ad alios perginus, aut ad nos uenientes ceteros expectamus. Deinceps itur in uerba: sermo teritur: lacerantur absentes: uita aliena describitur; & mordentes inuicem, consumimur ab inuicem. Talis nos cibus occupat, & dimittit. Cum uero amici recesserint, ratiocinia supputamus. nunc ira personam leonis nobis imponit: nunc cura superflua in annos plurimos duratura præcogitat. nec recordamur euangelii, dicens: *Stulte, hac nocte auferent animam tuam a te: quæ autem præparasti, cuius erunt?* Velles non ad usus tantum, sed ad delicias, conquiruntur. ubicumque compendium est, uelocior pes, citus sermo, auris attentior. Si damnum, ut sæpe in re familiari accidere solet, fuerit nunciatum, uultus mærore deprimitur: lætamur ad nummum, amisso obolo contristamur. unde, cum in uno homine animorum tam diuersa sit facies, propheta Dominum deprecatur, dicens: *Domine in ciuitate tua imaginem eorum dissipas.* Cum enim ad imaginem & similitudinem Dei conditi simus, ex uitio nostro personas nobis plurimas superinducimus: & quo modo in theatralibus scenis unus atque idem histrio nunc Herculem robustus ostendit, nunc mollis in Venerem frangitur, nunc tremulus in Cybelem; ita & nos, qui si de mundo non essemus, odiremur a mundo, tot habemus personarum similitudines, quot peccata. Quapropter, quia multa iam uitæ spatia transmissimus fluctuando; & nauis nostra, nunc procellarum concussa turbine, nunc scopulorum illisionibus perturbata est: cum primum licet, quasi portum quendam secreta ruris intremus, ibi cibarius panis, & holus nostris manibus irrigatum, & lac, deliciae rusticane, uiles quidem, sed innocentes cibos præbent. ita uiuentes non ab oratione somnus, nec saturitas a lectione reuocabit.

Si

Si æstas est, secretum arboris umbra præbebit; si autumnus, ipsa aeris temperies, & strata subter folia, locum quietis ostendunt. uere ager floribus pingitur; & inter querulas aues psalmi dulcius cantabuntur. Si frigus fuerit, & brumales niues; ligna non coemam; & calidius uigilabo, uel dormiam; certe, quod sciam, uilius non algebo. Habeat sibi Roma suos tumultus, arena sæuiat, circus insanat, theatra luxurient: & quia de nostris dicendum est, matronarum quotidie uisitetur senatus. nobis adhærere Domino bonum est, & ponere in domino Deo spem nostram; ut, cum paupertatem istam cælorum regna mutauerint, erumpamus in uocem: Quid enim mihi est in cælo, & a te quid uolui super terram? quo scilicet, cum tanta reperiamus in cælo, parua & caduca quæsisse nos doleamus in terra. Verum, ut ad uillam, & ad Mariæ diuersorium ueniamus: (plus laudat enim unusquisque, quod possidet) quo sermone, qua uoce tibi speluncam Saluatoris exponam? Et illud præsepe; in quo infantulus uagiit, silentio magis, quam infimo sermone, honorandum est. Vbi sunt latæ porticus? ubi aurata laquearia? ubi domus miserorum, pœnis, & damnatorum labore uestitæ? ubi, instar palatii, priuatorum extructæ basilicæ, ut uile corpusculum hominis pretiosius inambulet, & quasi mundo quidquam possit esse ornatus, tecta sua magis uelint adspicere, quam cælum? Bethlehem ecce in hoc paruo terræ foramine cælorum conditor natus est. hic inuolutus pannis, hic uisus a pastoribus, hic demonstratus a stella, hic adoratus a Magis. & puto, sanctior locus est rupe Tarpeia, quæ, de cælo sæpius fulminata, ostendit, quod Deo displiceat. Est quidem ibi sancta ecclesia; sunt trophæa apostolorum & martyrum; est Christi uera confessio; est apostolorum prædicata fides, & gentilitate calcata, in sublime quotidie erigitur uocabulum Christianum: sed ambitio, potentia, magnitudo urbis, uideri, & uidere, salutare, & salutare, laudare, & detrahare, uel audire, uel proloqui, & tantam hominum frequentiam uidere, a proposito monachorum,

M 4 chorum,

184 Hieron. Marcellam inuitat ad rus Bethl.

chorum, & quiete aliena sunt. aut enim uidemus ad nos uenientes, & silentium perdimus: aut, si non uidemus, superbix arguimur. interdum, ut uisitantibus reddamus uicem, ad superbas fores pergimus. inter linguas rodentium ministrorum, postes ingredimur deauratos. in Christi uero uilla, ut supra diximus, tota rusticitas est. extra psalmos silentium est. quocumque te uerteris, arator stiuam tenens, Alleluia decantat. Sudans messor psalmis se auocat, & curua attondens uitem falce uinitor, aliquid Dauidicum canit. Hæc sunt in hac prouincia carmina, hæc, ut uulgo dicitur, amatorix cantiones. Vale.

ARGVMENTVM.

EVSTOCHIVM in die festo Petri Apostoli, qui **XXIX** die Iunij celebratur, munuscula quadam, inter quæ cerasa erant, una cum epistola ad Hieronymum miserat: nunc is ei respondet, sanctaq. ad institutionem bonorum morum pie, ac festiniter transfert.

AD EVSTOCHIVM, DE ACCEPTIS
ab ea munusculis.

EPISTOLA XIX.

ARVA specie, sed caritate sunt magna, munera accepisse a uirgine, armillas, epistolam, & columbas. et, quoniam mel in Dei sacrificiis nō offertur, nimia dulcedo arte mutata est, & quadam, ut ita dicam, piperis austeritate condita. apud Deum enim nihil uoluptuosum, nihil tantum suaue placet, nisi quod in se habet mordacis aliquid ueritatis. Pascha Christi cū amaritudinibus manducatur. Festus est dies & natalis beati Petri festiuius est solito condiendus, ita tamen, ut scripturarum cardinem iocularis sermo nō fugiat; nec a præscripto palæstræ nostræ

Leuit. 2

Exod. 12

nostræ longius euagemur. Armillis in Ezechiele ornatur *Ezech. 16*
Hierusalem. Baruch epistolas accipit ab Hieremia. In co- *Hier. 36*
lumbæ specie Spiritus sanctus allabitur. Itaque, ut te aliquid *Ioan. 1*
& piperis mordeat, & pristini libelli etiã nunc recorderis;
caue, ne operis ornamenta dimittas, quæ ueræ armillæ sunt
brachiorum; ne epistolam pectoris tui scindas, quam a Ba-
ruch traditam nouacula rex profanus incidit; ne ad similitu-
dinem Ephraim per Osee audias: Facta es insipiens, ut co- *Osee 7*
lumba. Nimium respondebis austere, & quod festo non
conueniat dici. Talibus ipsa muneribus prouocasti: dum
dulcibus amara sociata sunt, & a nobis paria recipies, lau-
dem amaritudo comitabitur. Verum, ne uidear dona mi-
nuisse, accepimus & canistrum, cerasis refertum talibus, &
tam uirginali uerecundia rubentibus, ut ea nunc a Lucullo
delata existimarim. siquidem hoc genus pomi, Ponto & Ar-
menia subiugatis, de Cerasunto primus Romam pertulit.
unde & de patria arbor nomen accepit. Igitur, quia in scri- *Hier. 24*
pturis canistrum ficis plenum legimus, cerasa uero non in-
uenimus; in eo, quo allatum est, id, quod allatũ non est,
prædicamus; optamusq. te de illis pomis fieri, quæ contra
templum Dei sunt, & de quibus Deus dicit: Quia bona bo-
na ualde. Nihil quippe saluator mediũ amat: & sicuti, frigi-
dũ non refugiens, calidis delectatur; ita tepidos in Apoca- *Apoc. 3*
lypsi euomere se loquitur. Vnde nobis sollicitius prouiden-
dum est, ut sollemnem diem, non tam ciborũ abundantia,
quam spiritus exultatione celebremus. quia ualde absurdũ
est, nimia saturitatem uelle honorare martyrem, quem sci-
mus Deo placuisse ieiuniis. Ita tibi semper comedendum
est, ut cibum & oratio sequatur, & lectio. quod si aliqui-
bus displicet, Apostoli uerba cantato: Si adhuc hominibus *Gal. 1*
placerem, Christi ancilla non essem.

ARGUMENTVM.

MARCELLA Hieronymo, Paula, Eustochio, uirginibus cum eis degentibus, miserat sellas, saccos, cereos, calices, muscariaq. quibus muscæ abiguntur, xeniola. Hieronymus nunc ei respondens, omnia ἀλλεγορικάς ad animæ documentum in utramque partem sancte, ac festiuiter interpretatur.

AD MARCELLAM,
de acceptis munusculis.

EPISTOLA XX.

Tabentiam corporum spiritus confabulatione solemur; facit unusquisque quod præualeat. uos dona transmittitis: nos epistolas remittimus gratiarum; ira tamen, ut, quia uelatarum uirginum munus est, aliqua in ipsis munusculis esse mysteria demonstremus. Sacculus, orationis signum atque ieiunii est. sella, ut foras pedes uirgo non moueat. cerei, ut, accenso lumine, sponsi expectetur aduentus. calices mortificationem carnis ostendunt, & semper animum ad martirium præparatum. Calix quippe Domini inebrians, quam præclarus est. Quod autem & matronis offertis muscaria, parua, paruis animalibus euentilandis: elegans significatio est, debere luxuriā cito restringere; quia muscæ morituræ oleum suauitatis ex terminant. Hic typus sit uirginum, hæc figura matronarū. Nobis autem, licet in peruersum, munera ueltra conueniunt. Sedere, aptum est otiosis; in sacco iacere, penitentibus; calices habere, potantibus. licet & propter nocturnos metus, & animos semper malo conscientie formidantes, cereos quoque accendisse sit gratum.

ARCV-

ARGUMENTVM.

PAVLVM Concordiensem, centesimum agentem annum, uirenti tamen, integroq. corpore, laudat, & de uitæ termino doctæ multa admiscens petit ab eo libros quosdam, mittens ei interea uitam Pauli Heremite, quam ipse Hieronymus ediderat.

HIERON. AD PAVLVM CONCORD.

EPISTOLA XXI.

YMANAE uitæ breuitas, damnatio delictorum
 H est. et in ipso sæpe lucis exordio, mors secuta. nascentem, labentia quotidie in uitium sæcula proficetur. Nam, cum primum paradisi colonum, uiperinis nexibus præpeditum, coluber deduxisset ad terras; æternitas, mortalitate mutata, in nongentos, & eo amplius annos, secunda quodam modo immortalitate maledicti hominis distulerat elogium. exinde, paulatim recrudescente peccato, totius orbis naufragium gygantum adduxit impietas. post illud, ut ita dixerim, purgati baptisma mundi, in breue tempus hominum uita contracta est. hoc quoque spatium sceleribus nostris, semper cōtra diuina pugnantibus, pene perdidimus. quotus enim quisque aut centenariā trāsgreditur ætatē, aut nō ad eā sic peruenit, ut peruenisse pæniteat? secundū quod in libro Psalmodū scriptura testatur: Dies uitæ nostræ septuaginta anni; si autem multū; octoginta: quid nostræ reliquum est, labor, & dolor. Quorsum, ais, ista, tam alto repetita principio, & ita procul cœpta, ut merito quis Horatiano de nobis possit sale ludere: Et gemino bellum Trojanū orditur ab ouo? Videlicet ut senectutē tuā, & caput ad Christi similitudinē candidū, dignis uocibus prædicemus. Ecce iam centenus ætatis circulus uoluitur: & tu semper præcepta Domini custodiens, futuræ beatitudinē uitæ per præsentia exēpla meditaris. Oculi puro lumine uigēt: pedes imprimunt certa uestigia: auditus penetrabilis, detestabili, uox sonora, corpus solidū, & succiplenum: cani cū rubore discrepant, uires cū ætate dissentiunt. nō memoris tenaci-

Gen. 3

Gen. 6. 7

Psal. 89

tenacitatem, ut in plerisque cernimus, antiquior senectia dissoluit. nam calidi acumen ingenii frigidus sanguis obtundit. non contractam rugis faciem arata frons exasperat. non denique tremula manus per curuos ceræ tramites errantem stylum ducit. Futuræ nobis resurrectionis uirorem in te Dominus ostendit; ut peccati sciamus esse, quod ceteri adhuc uiuentes præmoriuntur in carne; iustitiæ, quod tu adolescentiam in aliena ætate mentiris. Et quamquam multis istam corporis sanitatem, etiam peccatoribus, euenire uideamus: tamen illis hoc diabolus ministrat, ut peccent; tibi Dominus præstat, ut gaudeas. Doctissimi quique Græcorum, de quibus pro Flacco agens luculenter Tullius ait: Ingenita leuitas, & erudita uanitas: regum suorum ac principum laudes, accepta mercede, dicebant. hoc ego nunc faciens, pretium posco pro laudibus. Et, ne putes modica esse, quæ deprecor: margaritum de euangelio postularis: Eloquia Domini, eloquia casta, argentum igne examinatum, probatum terræ, purgatum septuplum: Scilicet commentarios Fortunatiani. &, propter notitiam persecutionū, Aurelii Victoris historiam, simulque epistolas Novatianæ; ut, dum schismatici hominis uenena cognoscimus, libentius sancti martyris Cypriani bibamus antidotum. Misimus interim te tibi, idest, Paulo seni Paulum seniore: in quo propter simplices quosque multum in deiciendo sermone laborauimus. sed nescio quo modo, etiam si aqua plena sit, tamen eundem odorem lagena seruat, quo, dum rudis esset, imbuta est. Si hoc munusculum placuerit; habemus etiam alia condita, quæ cum plurimis orientalibus mercibus ad te, si spiritus sanctus afflauerit, nauigabunt.

ARGV-

ARGVMENTVM.

EVSTOCHIVM, sola ex omnibus liberis Paula, nobi-
lis apud Romanos Matrone, perpetuam uirginitatem professa,
matrem usque in Bethlehem, ubi sanctissime cum uirginibus in
monasterio amba uixerunt, secuta est. Hanc nunc D. Hierony-
mus docet, quo modo custodire uirginitatem debeat: eosq. qui ca-
stitatis specie uentri, auaritiæq. inserviunt, acriter interea
reprehendit.

HIERONYMVS AD EVSTOCHIVM,
de custodia uirginitatis.

EPISTOLA XXII.

V D I filia, & uide, & inclina aurem tuam, & obli-
A uiscere populum tuum, & domum patris tui; &
concupiscet rex decorem tuum. In quadragesimo Psal. 44
quarto psalmo Deus ad animam loquitur humanam; ut,
secundum exemplum Abrahæ, exiens de terra sua, & de co-
gnatione sua, relinquat Chaldæos, qui quasi dæmonia in-
terprentantur; & habitet in regione uiuentium, quam ali-
bi propheta suspirat, dicens: Credo uidere bona Domi- Psal. 26
ni in terra uiuentium. Verum non sufficit tibi exire de
terra tua, nisi obliuiscaris populi tui, & domus patris tui;
ut, carne contempta, sponsi iungaris amplexibus. Ne
respexeris, inquit, retro: nec steteris in omni circa regio- Gen. 19
ne, sed in monte saluum te fac, ne fortè comprehenda-
ris. Non expedit, apprehenso aratro, respicere post ter- Luc. 9
rum, nec de agro reuerti domum, nec, post Christi tuni- Matth. 24
cam, ad tollendum aliud uestimentum tecto descendere.
Grande miraculum: Pater filiam cohortatur, ne memine-
rit patris sui. Vos de patre diabolo estis, & desideria patris Ioan. 8
uestri uultis facere, dicitur ad Iudæos. Et alibi: Qui facit 1. Ioan. 3
peccatum, de diabolo est. Tali primum parente generati,
nigri

- nigri sumus; & post pœnitentiam, necdum culmine uirtutis ascenso, dicimus: Nigra sum, sed speciosa filix Hierusalem. Exiui de domo infantix meæ: oblita sum patris mei, renascor in Christo. Quid pro hoc mercedis accipio? Sequitur: Et concupiscet rex decorem tuum. Hoc ergo illud
- Eph. 5** magnum est sacramentum: Propter hoc relinquet homo patrem, & matrem, & adhærebit uxori suæ, & erunt ambo, iam non, ut ibi, in una carne, sed in uno spiritu. Non
- Num. 12** est sponsus tuus arrogans, non superbus, æthiopissam duxit uxorem. Statim ut uolueris sapientiam audire ueri Solomonis, & ad eum ueneris, confitebitur tibi cuncta, quæ
- Cant. 3** nouit, & inducet te rex in cubiculum suum, & mirum in modum colore mutato, sermo tibi ille conueniet: Quæ est ista, quæ ascendit dealbata? Hæc iccirco, domina mi Eustochium, scribo, (dominam quippe uocare debeo sponsam Domini mei) ut ex ipso principio lectionis agnosceres, non me nunc laudem uirginitatis esse dicturum, quam probasti optimam, & consecuta es; nec enumeraturum molestias nuptiarum, quo modo uterus intumescat, infans uagiat, cruciet pellex, domus cura sollicitet, & omnia, quæ putantur bona, mors extrema præcidat: habent enim &
- Hebr. 13** maritalæ ordinem suum, honorabiles nuptias, & cubile immaculatum: sed ut intelligeres tibi exeunti de Sodoma, timendum esse Lot uxoris exemplum. nulla est enim in hoc libello adulatio. adulator quippe, blandus inimicus est. Nulla erit rhetorici pompa sermonis, quæ te etiam inter angelos statuatur, & beatitudine uirginitatis exposita, mundum subiiciat pedibus tuis. Nolo tibi uenire superbiam de proposito, sed timorem. Onusta incedis auro: latro tibi uitandus est. Stadium est hæc uita mortalibus: hic contendimus, ut alibi coronemur. Nemo inter serpentes, & scorpiones securus ingreditur. Et inebriatus est, inquit Dominus, gladius meus in cælo: & tu pacem arbitraris in terra,
- Gen. 3** quæ tribulos generat, & spinas, quam serpens comedit?
- Eph. 6** Non est nobis colluctatio aduersus carnem, & sanguinem, sed aduersus principatus, & potestates huius mundi, & rectores

rectores harum tenebrarum, aduersus spiritualia nequitie
 in celestibus. Magnis inimicorum circumdamur agminibus,
 hostium plena sunt omnia. caro fragilis, & cinis futura post
 modicum, pugnat sola cum pluribus. cum autem fuerit
 dissoluta; & uenerit princeps mundi huius; & inuenerit in *Ioan. 14*
 ea nihil: tunc secunda audies per prophetam: Non timebis *Psal. 96*
 a timore nocturno: A sagitta uolante per diem, a negotio
 perambulante in tenebris, ab incurfu & dæmonio meridia
 no. Cadent a latere tuo mille, & decem millia a dextris
 tuis: ad te autem non appropinquabunt. Quod si eorum
 te multitudo turbauerit; & ad singula incitamenta uitiorum
 coeperis æltuare; & dixerit tibi cogitatio tua: Quid facie
 mus? respondebit tibi Helisæus: Noli timere, quia plures *4. Reg. 6*
 nobiscum sunt, quam cum illis: & orabit, & dicet: Domi
 ne, aperi oculos puellæ tuæ, ut uideat: & apertis oculis ui
 debis igneum currum, qui te ad exemplum Helix in astra *4. Reg. 2*
 sustollat: & tunc læta cantabis: Anima nostra, sicut pas
 ser, erepta est de laqueo uenantiū: Laqueus contritus est,
 & nos liberati sumus. Quamdiu hoc fragili corpore deti
 nemur; quamdiu habemus thesaurum istum in uasis fictili
 bus; & concupiscit spiritus aduersus carnem, & caro aduer
 sus spiritum; nulla est certa uictoria. Aduersarius noster dia
 bolus, tamquam leo rugiens aliquem deuorare quærens,
 circumit. Posuisti, ait David, tenebras; & facta est nox. *Psal. 103*
 In ipsa pertransibunt omnes bestię filię: Catuli leonum
 rugientes ut rapiant, & quærant a Deo escam sibi. Non
 quærit diabolus homines infideles: non eos, qui foris sunt,
 & quorum carnes rex Assyrius in olla succendit, de ecclesia *Hier. 29*
 Christi rapere festinat. Escæ eius secundum Abacuc electę *Abac. 1*
 sunt. Iob subuertere cupit, & deuorato Iuda, ad cribra
 dos apostolos expetit potestatem. Non uenit saluator pa
 cem mittere super terram, sed gladium. Cecidit Lucifer, *Luc. 22*
 qui mane oriebatur: & ille, qui in paradiso deliciarum *Marc. 10*
 nutritus est, meruit audire: Si exaltatus fueris ut aquila
 in corde suo: Super sidera cæli ponam sedem meam, *Esa. 14*
 & ero *Abd. 1*

- Esa.* 14 & ero similis altissimo. Vnde quotidie ad eos, qui per sca-
Gen. 28 lam Iacob somniantis descendunt, loquitur Deus: Ego di-
Psal. 81 xi, Dii esus, & filii altissimi omnes: uos autem sicut homi-
 nes moriemini, & tamquam unus de principibus cadetis.
 Cecidit enim primus diabolus, & cum stet Deus in synago-
2. Cor. 3 ga Deorum, in medio autem Deos discernit. Apostolus iis,
 qui Dii esse desinunt, scribit: Vbi enim in uobis sunt dissen-
 siones, & æmulationes: nonne homines esus, & secundū
2. Cor. 9 hominem ambulatis? Si Apostolus, uas electionis, & se-
 paratus in euangelium Christi, ob carnis aculeos & incenti-
 ua uitiorum reprimat corpus suum, & seruituti subiicit, ne
Rom. 7 aliis prædicans ipse reprobis inueniatur; & tamen uidet
 aliam legem in membris suis repugnantem legi mentis suæ,
 & captiuum se in legem duci peccati: si post nuditatem, iei-
 iunia, fames, carcerem, flagella, supplicia, in semet ipsum
 reuersus exclamat: Infelix ego homo, quis me liberabit de
 corpore mortis huius: tu te putas securam esse debere? Ca-
Amos 5 ue quaeso, ne quando de te dicat Deus: Virgo Israel ce-
 cidit; & non est, qui suscitet eam. Audenter loquar:
 Cum omnia possit Deus, suscitare uirginem non potest
 post ruinam. ualet quidem liberare de pœna, sed non
 uult coronare corruptam. Timeamus illam prophe-
Amos 8 tiam, ne in nobis etiam compleatur: Virgines bonæ defi-
 cient. Obserua quid dicat, Et uirgines bonæ deficient: quia
Matth. 5 sunt & uirgines malæ. Qui uiderit, inquit, mulierem ad
 concupiscendum eam, iam moechatus est eam in corde
Matth. 25 suo. Perit ergo & mente uirginitas. Istæ sunt uirgines ma-
 læ, uirgines carne, non spiritu; uirgines stultæ, quæ
 oleum non habentes excluduntur a sponso. Si autem
 & illæ, quæ uirgines sunt, ob alias tamen culpas uirgini-
 tate corporum non saluantur: quid fiet illis, quæ pro-
 stituerunt membra Christi, & mutauerunt templum san-
 cti spiritus in lupanar? illico audient: Descende, sede in
Esa. 47 terra uirgo filia Babylonis: sede in terra: non est solum fi-
 liæ Chaldæorum: non uocaberis ultra mollis, & delicata.
 accipe molam, mole farinam: discooperi uelamen tuum,
 denuda

denuda crura, transi flumina: reuelabitur ignominia tua, apparebunt opprobria tua. Et hoc post Dei filii thalamos, post oscula fratruelis & sponsi, illa, de qua quondam sermo propheticus concinebat: Astitit regina a dextris tuis, in uenitu deaurato, circumdata uarietate: nudabitur, & posteriora eius ponentur in faciem ipsius: Sedebit ad aquas solitudinis; &, posito uase, diuaricabit pedes suos omni transenti, & usque ad uerticem polluetur. Rectius fuerat homini, subiisse coniugium; ambulasse per plana, quam, ad altiora tendentem, in profundum inferni cadere. Ne fiat, obsecro, ciuitas meretrix, fidelis Sion: ne post trinitatis hospitium ibi dæmones saltent, & Sirenæ nidificent, & heridici. Non soluatur fascia pectoralis; sed statim ut libido titillauerit sensum, aut blandum uoluptatis incendium dulcinos calore perfuderit, erumpamus in uocem: Dominus auxiliator meus, non timebo quid faciat mihi caro. Et cum paululum interior homo inter uitia atque uirtutes cœperit fluctuare, dicito: Quare tristis es anima mea, & quare conturbas me? Spera in Deo, quia confitebor illi, salutare uultus mei, & Deus meus. Nolo finas cogitationem crescere. Nihil in te Babylonium, nihil confusionis adolescat. Dum paruus est hostis, interfice: nequitia, ne zizania crescant, elidatur in semine. Audi psalmistâ, dicentem: Filia Babylonis misera: beatus, qui retribuet tibi retributionem tuâ, quâ retribuisti nobis: beatus, qui tenebit, & allidet paruulos tuos ad petram. Quia enim impossibile est in sensum hominis non irruere innatû medullarû calorem, ille laudatur, ille prædicatur beatus, qui ut cœperit cogitare sordida, statim interficit cogitatus, & allidit ad petram: petra autem Christus est. O quoties ego ipse in eremo constitutus, & in illa uasta solitudine, quæ exusta solis ardoribus horridum monachis præstat habitaculum, putabam me Romanis interesse deliciis. sedebam solus, quia amaritudine repletus erâ. horrebant sacco membra deformia; & squalida cutis situm æthiopice carnis obduxerat. quotidie lacrymæ, quotidie gemitus; &, si quando repugnantem somnus imminens

N oppressisset,

Psal. 44

Ezech. 16

Esa. 1. 34

Hier. 2

Psal. 117

Psal. 41

Psal. 136

1. Cor. 10

oppressisset, nuda humo uix ossa hærentia collidebam. de
 cibis uero, & potu taceo; cum etiam languentes monachi
 aqua frigida utantur, & coctum aliquid accepisse, luxuria
 sit. Ille igitur ego, qui ob gehennæ metum tali me carcere
 ipse damnaueram, scorpionum tantum socius, & ferarum,
 sæpe choris intereram puellarum. pallebant ora ieiuniis;
 & mens desideriis æstuabat in frigido corpore; & ante ho-
 minem sua iam carne præmortuum, sola libidinum incen-
 dia bulliebant. itaque omni auxilio destitutus, ad Iesu iace-
 bam pedes, rigabam lacrymis, crine tergebam, & repugnā-
 tem carnem hebdomadarum inedia subiugabam. Non eru-
 besco confiteri infelicitatis meæ miseriam: quin potius plā-
 go me non esse, quod fuerim. Memini me clamantem diē
 crebro iunxisse cum nocte, nec prius a pectoris cessasse uer-
 beribus, quam rediret, Domino increpante, tranquillitas.
 ipsam quoque cellulam meam, quasi cogitationum mearū
 consciam, pertimescebam: & mihimet iratus, & rigidus,
 solus deserta penetraui. sicubi concaua uallium, aspera
 montium, rupium prærupta cernebam; ibi meæ orationis
 locus, ibi illud miserrimæ carnis ergastulum; &, ut ipse mi-
 hi testis est Dominus, post multas lacrymas, post cælo in-
 hærentes oculos, nonnunquam uidebar mihi interesse
 agminibus angelorum; & lætus gaudensq. cantabā: Post
 te in odorem unguentorum tuorum curremus. Si autem
 hoc sustinent illi, qui, exeso corpore, solis cogitationibus
 oppugnantur: quid patitur puella, quæ deliciis fruitur? nē
 pe illud Apostoli: Viuens mortua est. Si quid itaque in me
 potest esse consilii; si experto creditur; hoc primum mo-
 neo, hoc obtestor, ut sponsa Christi uinum fugiat pro ue-
 neno. hæc aduersus adolescentiam prima arma sunt demo-
 num. Non sic auidia quatit, inflat superbia, delectat am-
 bitio. facile aliis caremus uitiis: hic hostis nobis inclusus
 est. Quocumque pergimus, nobiscum portamus inuicū.
 Vinum, & adolescentia, duplex est incendium uoluptatis.
 quid oleum flammæ adiicimus? quid ardenti corpusculo fo-
 menta ignium ministramus? Paulus ad Timotheum, Iam
 noli,

noli, inquit, aquam bibere; sed uino modico utere; propter stomachum, & frequentes tuas infirmitates. Vide, quibus causis uini potio concedatur; ut ex hoc stomachi dolor, & frequens medeatur infirmitas. Et ne nobis forsitan de agrotationibus blandiremur; modicum præcepit esse sumendum, medici potius consilio, quam Apostoli: licet & Apostolus sit medicus spiritualis: ne Timotheus imbecillitate superatus, euangelii prædicandi non posset implere discursus. alioquin se dixisse meminerat: Vinum, in quo est luxuria: Et bonum est homini uinum non bibere, & carnē Eph. 5 non manducare. Noe uinum bibit, & inebriatus est. Post Rom. 14 diluuium, rudi adhuc sæculo, & tunc primū plantata uinea; Gen. 9 inebriare uinum forsitan nesciebat. Et ut intelligas scripturæ in omnibus sacramentum: Margaritum quippe est sermo Dei, & ex omni parte forari potest. post ebrietatem nudiatio femorum subsecuta est, libido iuncta luxuriæ. prius enim uenter extenditur, & sic cetera membra concitantur. Manducauit enim populus, & bibit; & surrexerunt ludere. Exo. 32 Lot, amicus Dei, in monte saluatus; & de tot millibus populi solus iustus inuentus, inebriatur a filiabus suis: & licet illæ putarent genus hominum defecisse, & hoc facerent liberorum magis desiderio, quam libidinis; tamen sciebant, uirum iustum hoc, nisi ebrium, nō esse facturum. denique, quid fecerit, ignorauit: & quamquam uoluntas non sit in crimine, error in culpa est. inde nascuntur Moabitæ, & Ammonitæ, inimici Israel: qui usque ad quartam, & decimam progeniem, & usque in æternum, non ingrediuntur in Ecclesiam Dei. Helias cum Iezabel fugeret, & sub quercu iaceret lassus; ueniente ad se angelo suscitatur, & dicitur ei: Surge, & manduca. Respexit, & ecce ad caput eius panis collyra, & uas aquæ. Reuera nō poterat Deus conditū ei merū mittere, & electos cibos, & carnes cōtusione mutatas. Helisæus filios prophetarū inuitat ad prandiū, & herbis agrestibus eos alēs consonū prandentiū audit clamorē: 4. Reg. 4 Mors in olla: Homo Dei nō iratus est cocis: lautioris enim mensæ consuetudinē non habebat, sed, farina desuper iacta,

Exod. 15 amaritudinē dulcorauit, eadē spiritus uirtute, qua Moyses
 mutauerat marā in dulcedinē. Necnon & illos, qui ad eum
 cōprehendendum uenerant, oculis pariter ac mente cæca
 4.Reg.6 tos, cum in Samariam nescios induxisset, qualibus eos epu-
 lis refici imperauerit, ausculta. Pone eis, inquit, panem,
 & aquā: manducent, & bibant, & remittantur ad Domi-
 num suum. Potuit & Danieli de regis ferculis opulentior
 Dan.14 mensa transferri: sed Abacuc ei messorū prandium portat,
 Dan.9 arbitror rusticanum. ideoq. & desideriorum uir appellatus
 est, quia panem desiderii non manducauit, & uinum concu-
 piscentiæ non bibit. Innumerabilia sunt de scripturis di-
 uina responsa, quæ gulam damnent, & simplices cibos pro-
 bent. uerum, quia nunc nō est propositum de ieiuniis di-
 sputare; &, uniuersa exequi, sui est tituli, & uoluminis;
 hæc sufficiant pauca de plurimis. alioqui, ad exemplum
 horum, poteris tibi ipsa colligere, quo modo primus de
 Gen.3 paradiso homo, uentri magis obediens, quā Deo, in hanc
 Matth.4 lacrymarum deiectus est uallem: & ipsum Dominum sata-
 1.Cor.6 nas fame tētauerit in deserto: & Apostolus clamitet: Escæ
 Philip.3 uentri, & uenter escis: Deus autem & hunc, & illas de-
 struet. et de luxuriosis, quorum Deus uenter est: id enim
 colit unusquisque, quod diligit. Ex quo solícite prouiden-
 dum est, ut, quos saturitas de paradiso expulit, reducat
 esuries. Quod si uolueris respondere, te nobili stirpe gene-
 ratam, semper in deliciis, semper in plumis, non posse a
 uino & esculentioribus cibis abstinere, nec his legibus uiue-
 re: districtius respondebo: Viue ergo lege tua, quæ Dei nō
 potes. Nō quod Deus, uniuersitatis creator, & Dominus;
 intestinorū nostrorū rugitu, & inanitate uentris, pulmo-
 nisq. delectetur ardore; sed quod aliter pudicitia tuta esse
 Iob.40 non possit. Iob, Deo carus, & testimonio ipsius immacu-
 latus, & simplex, audi quid de diabolo suspicetur: Virtus
 eius lumbis, & potestas eius in umbilico. Honestæ uiri mu-
 lierisq. genitalia, immutatis sunt appellata nominibus. un-
 Psal. 131 de & de lumbis Dauid super sedem eius promittitur esse sel-
 Act.2 surus. & septuaginta quinque animæ introierūt in Aegyptū,
 quæ

quæ exierunt de femore Iacob . At postquam , colluctante domino , latitudo femoris eius emarcuit ; a liberorû opere cessauit . Et qui pascha facturus est , accinctis mortificatisq. lumbis facere præcipitur . Et ad Iob dicit Deus : Accinge sicut uir lumbos tuos . Et Ioânes zona pellicea cingitur circa lumbos suos . Et apostoli iubentur accinctis lumbis , euangelii tenere lucernas . Ad Hierusalê uero , quæ respersa sanguine , in câpo inuenitur erroris , in Ezechiele dicitur : Non est præcisus umbilicus tuus . Omnis igitur aduersus uiros diaboli uirtus , in lumbis est : omnis in umbilico cōtra feminas fortitudo . Vis scire ita esse , ut dicimus ? accipe exempla . Sâmpson , leone fortior , & saxo durior , qui & unus , & nudus mille persecutus est armatos , in Dalilæ mollescit amplexibus . David , secundum cor Domini electus , & qui uenturum Christum sancto sæpe ore cantauerat ; postquam deambulans super tectum domus suæ , Bethsabææ captus est nuditate , adulterio iunxit homicidium . Vbi & illud breuiter attende , quod nullus sit etiam in domo tutus aspectus . Quapropter ad Dominû pœnitens loquitur : Tibi soli peccaui , & malum coram te feci . Rex enim erat , alium non timebat . Salomon , per quem se cecinit ipsa sapientia , qui disputauit a cedro Libani usque ad hisopum ; quæ exiit per parietem , recessit a Domino , quia amator mulierum fuit . Et ne quis sibi de sanguinis propinquitate confideret , in illicitum Thamar sororis Amnon frater exarsit incendium . Piget dicere , quot quotidie uirgines ruant ; quantas de suo gremio mater perdat Ecclesia ; super quæ sidera inimicus superbus ponat thronum suum ; quot petras excauet , & habitet coluber in foraminibus earum . Videas plerasque uiduas ante quam nuptas , infelicem conscientiam mentita tantum ueste protegere . quas nisi tumor uteri , & infantum prodiderit uagitus , sanctas & castas se esse gloriantur , & erecta ceruice , & ludentibus pedibus incedunt . Aliæ uero sterilitatem præbunt , & nec dum sati hominis homicidium faciunt . Nonnullæ , cum se senserint concepisse de scelere , abortiui uenena meditantur ; & frequenter etiam ipsæ com-

N 3 mortuæ,

Exod. 12

Iob 40

Marc. 1

Luc. 12

Ezech. 16

Iud. 16

2. Reg. 11

Psal. 50

3. Reg. 4. 11

2. Reg. 13

Ez. 14. 11.

mortuæ, trium criminum reæ, ad inferos perducuntur, homicidæ sui, Christi adulteræ, nec dum nati filii parricidæ.

Tit. 1 Istæ sunt, quæ solent dicere: Omnia munda mundis: Sufficit mihi conscientia mea: Cor mundum desiderat Deus:

1.Tim.4 Cur me abstinence a cibis, quos creauit Deus ad utendum? Et si quando festiue & lepide uolunt uiuere, ubi se mero ingurgitauerint, ebrietati sacrilegium copulantes aiunt: Absit, ut ego me a Christi sanguine abstinence. Et quam uiderint pallentem, atque tristem, miseram, & Manichæam uocant. Et consequenter: Tali enim proposito ieiunium hæresis est. Hæ sunt, quæ per publicum notabiliter incedunt; & furtiuis oculorum nutibus, adolescentium greges post se trahunt, quæ semper audiunt per prophetam: Facies meretricis facta est tibi, impudorata es tu. Purpura tantum in ueste tenuis, & laxius, ut crines decident, ligatum caput, foccus uilior, & per humeros hiacynthina læna mauorte uolitans, succinctæ manicæ brachiis adhærentes, & solutis genibus fractus incessus: hæc est apud illas tota uirginitas. Habeant istæ huiusmodi laudatores suos, & sub uirginali nomine lucrosius pereant. Libenter talibus non placemus. Pudet dicere, pro nefas: triste, sed uerum est: Vnde in ecclesias Agapetarum pestis introiit? unde sine nuptiis aliud nomen uxoribus? immo unde nouum concubinarum genus? Plus inferam. Vnde meretrices uniuerse? eadem domo, uno cubiculo, sæpe uno tenentur & lectulo; & suspiciosos nos uocant, si aliquid extimemus. Frater sororem uirginem deserit, cælibem spernit uirgo germanum, fratrem querit extraneum; & cum in eodem proposito esse se simulent, querunt alienorum spiritale solatium, ut domi habeant carnale commercium. Istiusmodi homines Salomō

Pro.6 in Prouerbiis spernit, dicens: Alligabit quis in sinu ignem, & uestimenta eius non comburentur? aut ambulabit super carbones ignis, & pedes illius non ardebunt? Explosis igitur, & exterminatis his, quæ nolunt esse uirgines, sed uideri, nunc ad te mihi omnis dirigatur oratio. quæ quanto prima Romane urbis uirgo nobilis esse cœpisti, tanto tibi amplius

amplius laborandum est, ne & presentibus bonis careas, & futuris. Et quidem molestias nuptiarum, & incerta coniugii, domestico exemplo didicisti; cum soror tua Blæfilla, ætate maior, sed proposito minor, post acceptum maritum, septimo mense uiduata est. O infelix humana condicio, & futuri nescia. Et uirginitatis coronam, & nuptiarum perdidit uoluptatem. Et quamquam secundum pudicitie gradum teneat uiduitas: tamen quas illam per momenta sustinere existimas cruces, spectantem quotidie in sorore, quod ipsa perdidit; & cum difficilius experta careat uoluptate, minorem continentie habere mercedem? Sit tamen & illa secura, sit gaudens. Centesimus & sexagesimus fructus de uno sunt semine castitatis. Nolo habeas consortium matronarum: nolo ad nobilium domos accedas: nolo te frequenter uidere, quod contemnēs, uirgo esse uoluisti. Sic sibi solent applaudere mulierculæ de iudiciis uiris, & in aliqua positis dignitate. Si ad imperatoris uxorem concurret ambitio salutantium, cur tu facis iniuriam uiro tuo? Ad hominis coniugem Dei sponsa quid properas? Disce in hac parte superbiam sanctam: scito te illis esse meliorem. Neque uero earum tantum te cupio declinare congressus, quæ maritorum instantur honoribus, quas eunuchorum greges sepiunt, & in quarum uestibus attenuata in filum auri metallica textur; sed etiam eas fuge, quas uiduas necessitas fecit, non uoluntas: non quod mortem optauerint maritorum; sed quod datam occasionem pudicitie non libenter acceperint. Nunc uero, tantum ueste mutata pristina, non mutatur ambitio. Præcedit caueas Basternarum ordo semiuiorum: & rubentibus buccis, cutis facta distenditur; ut eas putes maritos non amisisse, sed quærere. Plena adulatoribus domus, plena conuiuiis. Clerici ipsi, quos & magisterio esse oportuerat pariter, & timori, osculantur capita matronarum, & extenta manu, ut benedicere eos putes uelle, si nescias, pretia accipiunt salutandi. Illæ interim, quæ sacerdotes suo uiderint indigere præsidio, eriguntur in superbiam: & quia maritorum expertæ dominarum, uidui-

tatis præferunt libertatē; castæ uocantur, & nōn, & post cenā dubiā apostolos somniāt. Sint tibi sociæ, quas ieiunia
Cant. 1 tenuant, quibus pallor in facie est, quas & ætas probauit, &
Philip. 1 uita, quæ quotidie in cordibus suis canunt: Vbi pascis? ubi cubas in meridie? Quæ ex affectu dicunt: Cupio dissolui, & esse cum Christo. Esto subiecta parentibus; imitare sponsum tuum: Rarus sit egressus in publicum; martyres tibi quærantur in cubiculo tuo. numquam causa deerit procedendi, si semper, quando necesse est, processura sis. Sit tibi moderatus cibus, & numquam uenter expletus. Plures quippe sunt, quæ, cum uino sint sobriæ, ciborum largitate sunt ebræ. Ad orationem tibi nocte surgenti non indigestio ructum faciat, sed inanitas. Crebrius lege, disce quamplurima. Tenenti codicem somnus obrepat, & cadentem faciem pagina sancta suscipiat. Sint tibi quotidiana ieiunia, & refectio satietatem fugiens. Nihil prodest, biduo triduoq. transmissio, uacuum portare uentrem, si pariter obruatur, si compensetur saturitate ieiunium. illico mens repleta torpescit, & irrigata humus spinas libidinū germinat. Si quando senseris, exteriorem hominem florem adolescentiæ suspirare; & accepto cibo, cum te in lectulo componam
Eph. 6 sitam dulcis libidinum pompa concusserit: arripe scutum fidei, in quo ignitæ diaboli extinguuntur sagittæ. Omnes
Osee 7 adulterantes, quasi clibanus corda eorum. At tu, Christi comitata uestigiis, & sermonibus eius intenta, dic: Nonne
Luc. 24 cor nostrum ardens erat in uia, cum aperiret nobis Iesus scripturas? Et illud: Ignitum eloquium tuum uehementer, & seruus tuus dilexit illud. Difficile est humanam animam aliquid non amare: & necesse est, ut in quoscumque mens nostra trahatur affectus. Carnis amor spiritus amore superatur. Desideriū desiderio restinguitur. quidquid inde minuitur, hinc crescit. Quin potius semper ingemina, & dicito super lectū tuum: In noctibus quæsiui, quæ dilexit anima mea.
Cant. 3 Mortificate ergo, inquit Apostolus, mēbra ueltra, quæ sunt super terrā. Vnde & ipse postea confidenter aiebat: Viuo autem iam non ego, uiuit uero in me Christus. Qui morti
Col. 3 ficat
Gal. 2

ficat membra sua, & in imagine perambulat, non timet di- *Psal. 118*
 cere: Factus sum, sicut iter pruina. Quidquid enim in me *Psal. 101*
 fuit humoris libidinis, excoctum est; & infirmata sunt in ieiunio
 genua mea; & oblitus sum manducare panem meum.
 A uoce gemitus mei adhæsit os meum carni meæ. Esto ci-
 cada nocturnum. Laua per singulas noctes lectum tuum, lac- *Psal. 6*
 crymis tuis stratum tuum riga. Vigila, & fias sicut passer *Psal. 101. 102*
 in solitudine: Psalle spiritu, psalle & sensu: Benedic ani-
 ma mea dominum, & ne obliuiscaris omnes retributio-
 nes eius, qui propitiatur cunctis iniquitatibus tuis:
 Qui sanat omnes infirmitates tuas, & redimit ex corru-
 ptione uitam tuam. Et quis nostrum ex corde dicere po-
 test: Quia cinerem tamquam panem manducabam, &
 portionem meam cum fletu miscebam? An non flendum
 est, non gemendum, cum me rursus serpens inuitat ad illi- *Gen. 3*
 citos cibos? Cum de paradiso uirginitatis eiectum tunicis *4. Reg. 2*
 uult uestire pelliceis, quas Helias, ad paradisum rediens,
 proiecit in terram? Quid mihi, & uoluptati, quæ breui pe-
 rit? Quid cum hoc dulci, & mortifero carmine Sirenarum?
 Nolo te illi subiaccere sententiæ, qua in hominem est illata *Gen. 3*
 damnatio: In doloribus, & in anxietatibus paries. Mulie-
 ris lex ista est, non mea. Et ad uirum conuersio tua. Sit cō-
 uersio illius ad maritum, quæ uirum non habet Christum:
 Et ad extremum, Morte morieris. Finis ille coniugii, meum
 propositum sine sexu est. Habeant nuptæ suum tempus,
 & titulum. Mihi uirginitas in Maria dedicatur & Christo.
 Dicat aliquis: Et audes nuptiis detrahere, quæ a Deo be-
 nedictæ sunt? Nō est detrahere nuptiis, cum illis uirginitas
 antefertur. Nemo malum bono comparat. Gloriantur & *Gen. 1*
 nuptæ, cum a uirginibus sint secundæ: Crescite, ait, & multi-
 plicamini, & replete terrā. Crescat, & multiplicetur ille, qui
 impleturus est terram. Tuum agmen in cælis est. Crescite;
 & multiplicamini, hoc expletur edictum post paradisum, &
 nuditatem, & ficus folia, auspicantia pruriginem nuptia-
 rum. Nubat, & nubatur ille, qui in sudore faciei comedit pa-
 nē suum, cui terra tribulos & spinas generat, & cuius herba *Matth. 13. 19*
 senti-

- Matth. 13 & 19. sentibus suffocatur. Meum semen centenaria fruge secundum est. Non omnes capiunt uerbum Dei, sed ii, quibus datum est. alium eunuchum necessitas faciat, me uoluntas.
- Eccl. 3. Tempus amplexandi, & tempus abstinendi a complexibus: tempus mittendi lapides, & tempus colligendi. Postquam de duritia nationum generati sunt filii Abraham, coeperunt sancti lapides uolui super terram. Pertranseunt quippe mundi illius turbines, & in curru Dei rotarum celeritate uoluntur.
- Ioan. 19. Consuant tunicas, qui inconsutam defursum tunicam perdiderunt, quos uagitus delectat infantium, in ipso lucis exordio fletu lugentium quod nati sunt. Eua in paradiso uirgo fuit, post pelliceas tunicas initium sumpsit nuptiarum. Tua regio paradisi est. Serua quod nata es, & dic: Reuertere anima mea in requiem tuam. Et ut scias uirginitatem esse naturae, nuptias post delictum: uirgo nascitur caro de nuptiis, in fructu reddens, quod in radice perdiderat. Exiet uirga de radice Iesse, & flos de radice eius ascendet. Virga mater est Domini simplex, pura, sincera, nullo extrinsecus germine coherente, & ad similitudinem Dei unione fecunda. Virge flos Christus est, dicens: Ego flos campi, & liliū conuallium. Qui & in alio loco, lapis praedicatur abscissus de monte sine manibus, significante propheta, uirginem nasciturum esse de uirgine. Manus quippe accipiuntur pro opere nuptiarum, ut ibi: Sinistra eius sub capite meo, & dextera illius amplexabitur me. In huius sensus congruit uoluntatem etiam illud, quod animalia, quae in arcam Noe bina inducuntur, immunda sunt. Impar enim numerus est mundus: Et Moyses & Iesus Naue nudis in sanctam terram pedibus iubentur incedere: & discipuli sine calciamentorum onere, & uinculis pellium ad praedicationem noui euangelii destinantur: & milites, uestimentis Iesu sorte diuisis, caligas non habuere quas tollerent. nec enim poterat habere Dominus, quod prohibuerat seruis. Laudo nuptias, laudo coniugium: sed quia mihi uirgines generant, lego de spinis rosam, de terra aurum, de concha margaritum. Numquid, qui arat, tota die arabit? nonne & laboris sui fruge letabitur?

tur ? Plus honorantur nuptiæ , quando , quod de illis nascitur , plus amatur . Quid inuides mater filiæ ? Tuo lacte nutrita est ; tuis educata uisceribus , in tuo adoleuit sinu . tu illam uirginem sedula pietate seruasti . Indignaris , quod noluit militis esse uxor , sed regis ? Grande tibi beneficium præstitit . Socrus Dei esse cœpisti . De uirginibus , inquit apostolus , præceptum Domini non habeo . cur ? quia , & ipse ut esset uirgo , non fuit imperii , sed propriæ uoluntatis . Ne que enim audiendi sunt , qui eum uxorem habuisse confingunt ; cum de continentia differens , & suadens perpetuam castitatem , intulerit : Volo autem omnes esse sicut me ipsū . Et infra : Dico autem innuptis , & uiduis : Bonum est illis , si sic permaneant , sicut & ego . Et in alio loco : Numquid non habemus potestatem circumducendi mulieres , sicut & ceteri apostoli ? Quare ergo non habet Domini de uirginitate præceptum ? Quia maioris est mercedis , quod non cogitur , & offertur : quia , si fuisset uirginitas imperata , nuptiæ uidebantur ablatæ : & durissimum erat contra naturam cogere , angelorumq. uitam ab hominibus extorquere , & id quodam modo damnare , quod conditum est . Alia fuit in ueteri lege felicitas . ibi dicitur beatus , qui habet semen in Sion , & domesticos in Hierusalem . Et : Maledicta sterilis , quæ non pariebat . Et : Filii tui sicut nouellæ oliuarum , in circumitu mensæ tuæ . Et : Repromissio diuitiarum . Et : Non erit infirmus in tribubus tuis . Nūc eunuchis dicitur : Ne te lignum arbitreris aridum . Habes locum pro filiis & filiabus , in cælestibus sempiternum . Nunc benedicuntur pauperes , & Lazarus diuiti præfertur in purpura . Nunc , qui infirmus est , fortior est . Vacuus erat orbis : & , ut de typicis taceam , sola erat benedictio liberorum . Propterea & Abraham iam senex Cæthuræ copulatur : & Iacob mandragoris redimitur : & conclusam uuluam in Ecclesiæ figuram Rachel conqueritur . Paulatim uero crescente segete , messor immissus est . Virgo Helias , Heliseus uirgo , uirgines multi filii prophetarum . Hieremiæ dicitur : Et tu ne accipias uxorem . Sanctificatus

1. Cor. 7

1. Cor. 9

Esa. 32

Psal. 127

Deut. 15

Esa. 56

Matth. 5

Luc. 16

2. Cor. 12

Gen. 25. 30

Hier. 16

in

- in utero, captiuitate propinqua, uxorem prohibetur accipere. Aliis uerbis id ipsum apostolus loquitur: Existimo hoc bonum esse propter instantem necessitatem, quoniam bonum est homini sic esse. Quæ est ista necessitas, quæ aufert gaudia nuptiarum? Tempus breuiatum est: reliquum est, ut & qui habent uxores, sic sint quasi non habeant. In proximo est Nabuchodonosor. Promouit se leo de cubili suo. Quo mihi superbissimo regi seruitura coniugia? Quo
- Thren. 4* paruulos, quos propheta complorat, dicens? Adhæsit lingua lactentis ad faucem ipsius in siti. Paruuli postulauerunt panem; & qui frangeret eis, non erat. Inueniebatur ergo, ut diximus, in uiris tantum hoc continentia bonum, & in
- Esa. 9* doloribus iugiter Eua parturiebat. Postquã uero uirgo concepit in utero, & peperit nobis puerum, cuius principatus in humeros eius, Deum, fortem, patrem futuri sæculi; soluta maledictio est. Mors per Euam, uita per Mariam. Ideoq. & ditius uirginitatis donum fluxit in feminas, quia cœpit a femina. Statim ut filius Dei ingressus est super terram, nouam sibi familiam instituit, ut, qui ab angelis adorabatur in cælo, haberet angelos & in terris. Tunc Holofer
- Iudith 13* nis caput Iudith continens amputauit. Tunc Aman, qui interpretatur iniquitas, suo combustus est igni. Tunc Iacobus, & Ioannes, relicto patre, rete, nauicula, secuti sunt saluatorem, affectum sanguinis, & uincula sæculi, & curam domus pariter relinquentes. Tunc primum auditum est:
- Marc. 3* Qui uult uenire post me, abneget semet ipsum, & tollat crucem suam, & sequatur me. Nemo enim aniles cū uxore pergit ad prælium. Discipulo, ad sepulturam patris ire cupienti, non permittitur.
- Luc. 9* Vulpes foueas habent, & uolucres cæli nidos, ubi requiescant: filius autem hominis non habet ubi caput suum reclinet. Ne forsitan contristeris, si anguste manseris. Qui sine uxore est, sollicitus est quæ Domini sunt, quo modo placeat Domino. Qui autem cum uxore est, sollicitus est quæ sunt mundi, quo modo placeat uxori. Diuisa est mulier, & uirgo. Quæ non est nupta, cogitat quæ sunt Domini, ut sit sancta corpore, & spiritu.
- nam

nani, quæ nupta est, cogitat quæ sunt mundi, quo modo placeat uiro. Quantas molestias habeant nuptiæ, & quot solitudinibus uincantur, in eo libro, quem aduersus Heluidium de beatæ Mariæ perpetua uirginitate edidimus, puto breuiter expressum. nunc eadem replicare perlongū est: & si cui placet, de illo potest haurire fonticulo. Verum ne penitus uidear omisisse; nunc dicam, quod cum Apo-^{1. Thess. 5} stolus sine intermissione orare nos iubeat, & qui in coniugio debitum soluit, orare non possit, aut oramus semper, & uirgines sumus; aut orare desinimus, ut coniugio seruiamus. Et si nupserit, inquit, uirgo, non peccat: tribulatio^{1. Cor. 7} nem tamen carnis habebunt huiusmodi. Et in principio libelli præfatus sum, me de angustiis nuptiarum aut nihil omnino, aut pauca dicturum: & nunc eadem admoneo; ut, si tibi placet scire, quot molestiis uirgo libera, quot uxor adstricta sit, legas Tertullianum ad amicum philosophum scribentem, & de uirginitate alios libellos, & beati Cypriani uolumen egregium, & Papæ Damasi super hac re uersu, profaq. composita, & Ambrosii nostri, quæ nuper scripsit ad sororem, opuscula: in quibus tanto se effudit eloquio, ut, quidquid ad laudes uirginum pertinet, exquisierit, expresserit, ordinarit. nobis diuerso tramite incedendum. uirginitatem non tantum efferimus, sed seruamus: nec sufficit scire, quod bonū est; nisi custodiatur attentius, quod electum est: quia illud iudicii est, hoc laboris; & illud commune cum pluribus, hoc cum paucis. Qui perseuerauerit,^{Matth. 10. 20} inquit, usque in finem, hic saluus erit. Et multi uocati, pauci autem electi. Itaque obtestor te coram Deo, & Christo Iesu, & electis angelis eius, ne uasa templi Domini, quæ solis sacerdotibus uidere concessum est, facile in publicum proferas; nec sacrarium Dei quisquam profanus aspiciat. Oza arcam, quam non licebat tangere, attingens, subita^{2. Reg. 6} morte prostratus est. neque enim uas aureum, & argenteum tam carum Deo fuit, quam templum corporis uirginalis. Præcessit umbra, nunc ueritas est. Tn quidem simpliciter loqueris, & ignotos quosque blanda non despicias: sed

4. Reg. 20

Dan. 5

Psal. 140

Hebr. 9

Matth. 21

Exo. 5

Marc. 11

Exo. 34

sed aliter uident impudici oculi : non norunt animæ pulchritudinem considerare, sed corporum. Ezechias thesaurum Dei monstrat Assyriis : sed Assyrii non debuerunt uidere, quod cuperent. Denique, frequentibus bellis Iudæa conuulsa, uasa primum Domini capta atque translata sunt; & inter epulas & concubinarum greges, quia palma uitiorum est, honesta polluere, Balthasar potat in phialis. Ne declines aurem tuam in uerba malitiæ. Sæpe enim indecens aliquid loquentes, tentât mentis arbitrium : si libenter audias uirgo, quod dicitur; si ad ridicula quæque soluaris; quidquid dixeris, laudant; quidquid negaueris, negât; facetam uocant, & sanctam, & in qua nullus sit dolus; Ecce uere ancilla Christi, dicentes; Ecce tota simplicitas; non, ut illa horrida, turpis, rusticana, terribilis, & quæ ideo forsitan maritum non habuit, quia inuenire nō potuit. Naturali dumur malo. adulatoribus nostris libenter fauemus : & quāquam nos respōdeamus indignos, & calidus rubor ora perfundat; attamen ad laudem suam intrinsecus anima lætatur. Sponsa Christi arca est testamenti, intrinsecus & extrinsecus deaurata, custos legis Domini. Sicut in illa nihil aliud fuit, nisi tabulæ testamenti : ita & in te nullus sit extrinsecus cogitatus. Super hoc propitiatorium, quasi super cherubim, sedere uult Dominus. Mittit discipulos suos, ut in te, sicut in pullo asinæ, sedeat. Curis te sæcularibus soluat; ut, paleas & lateres Aegypti derelinquens, Moysen sequaris in eremo, & terram repromissionis introeas. Nemo sit, qui prohibeat, non mater, non soror, non cognata, non germanus : Dominus te necessariam habet. Quod si uoluerint impedire; timeant flagella Pharaonis, qui, populum Dei ad colendum eum nolens dimittere, passus est ea, quæ scripta sunt. Iesus ingressus in templum, ea, quæ templi non erant, proiecit. Deus enim zelotes est, & non uult patris domum fieri speluncam latronum. Alioquin, ubi æra numerantur, ubi sunt cauæ columbarum; simplicitas enecatur : ubi in pectore uirginali sæcularium negotiorum cura æstuat, statim uelum templi scinditur; sponsus confurgit iratus,

iratus; & dicit: Relinquetur uobis domus uestra deserta: Matth. 23
 Lege euangelium, & uide quo modo Maria ad pedes Domi Luc. 10
 ni sedens Marthæ studio præferatur. Et certe Martha, sedū
 lō hospitalitatis officio, Domino atque discipulis eius conui
 uium præparabat. Martha, inquit, Martha, sollicita es, &
 turbaris erga plurima: pauca autē necessaria sunt aut unū:
 Maria bonam partem elegit, quæ non auferetur ab ea. Es-
 to & tu Maria, cibus præfero doctrinam. Sorores tuæ cur
 sitent, & quærant quo modo Christum hospitem suscipiāt:
 Tu, semel sæculi onere proiecto, sede ad pedes Domini, &
 dic: Inueni eum, quem quærebat anima mea: tenebo eū, Cant. 3
 & non dimittam: & ille respōdeat: Vna est columba mea, Cant. 6
 perfecta mea; una est matri suæ, electa genitrici suæ, cæle-
 sti uidelicet Hierusalem. Semper te cubiculi tui secreta cu-
 stodiant: semper tecum sponsus ludat intrinsecus. Oras, lo-
 queris ad sponsum: legis, ille tibi loquitur: & cum te so-
 mnus oppresserit, ueniet post parietem, & mittet manum
 suam per foramen, & tanget uentrem tuum: Et expergefa-
 cta consurges, & dices: Vulnerata caritate ego sum. Et rur Cant. 4
 sus ab eo audies: Hortus conclusus, soror mea sponsa: hor-
 tus conclusus, fons signatus. Caue, ne domum exeas, &
 uelis uidere filias regionis alienæ, quamuis fratres habeas
 patriarchas, & Israel parente læteris. Dina egressa corrup- Gen. 34
 pitur. Nolo te sponsum quærere per plateas: nolo te cir-
 cumire angulos ciuitatis, dicas licet: Surgam, & circum- Cant. 3
 ibo ciuitatem, & in foro, & in plateis quæram, quem dile-
 xit anima mea: & interrogas: Num, quem dilexit anima
 mea, uidistis? nemo tibi respondere dignabitur. Spon-
 sus in plateis non potest inueniri. Arcta & angusta uia est, Matth. 7
 quæ ducit ad uitam. Denique sequitur: Quæsiui eum, & Cant. 5
 non inueni: uocaui eum, & non respondit mihi. Atque uti-
 nam non inuenisse sufficiat. uulneraberis, nudaberis, & ge-
 mebunda narrabis: Inuenerunt me custodes, qui circum-
 eunt ciuitatē: percusserūt me, & uulnerauerūt me, tulerūt
 theristrum meum mihi. Si autem hoc exiens patitur illa,
 quæ dixerat: Ego dormio, & cor meum uigilat: & fasci- Cant. 5. 1
 culus

culus stactes fratrueis meus mihi, in medio uberum meorum commorabitur: quid de nobis fiet, quæ adhuc adolescentulæ sumus? quæ, sponsa intrante cum sponso, remanemus extrinsecus? Zelotypus est Iesus, non uult ab aliis uideri faciem tuam. Excuses licet, atque causeris obducto uelamine, ora cõtexi, & quasiui te ibi, & dixi: Annuncia mihi, quem dilexit anima mea: ubi pascis, ubi cubas in meridie, ne quando efficiar sicut operta super greges sodalium tuorũ: indignabitur, tumebit, & dicet: Si non cognoueris te ipsam o pulchra inter mulieres; egredere in uestigiis gregum, & pasce hædos tuos in tabernaculis pastorũ. Sis licet pulchra, & inter omnes mulieres species tua diligatur a sponso: nisi te cognoueris, & omni custodia seruaueris cor tuũ; nisi oculos iuuenum fugeris; egredieris de thalamo meo, & pasces hædos, qui statuti sunt a sinistris. Itaque mi Eustochium filia, domina, conserua, germana, (aliud enim ætatis, aliud meriti, aliud religionis, hoc caritatis est nomen) audi

Isa. 26 Efaïam loquentem: Populus meus intra cubiculum tuum. Claude ostium tuum, abscondere pusillum aliquantulum,

Matth. 25 donec transeat ira Domini. Foris uagetur uirgines stultæ, tu intrinsecus esto cum sponso: quia si ostiũ claueris, & secum

Matth. 6 dum euangelii præceptũ in occulto oraueris patrem tuum,

Apoc. 3 ueniet, pulsabit, & dicet: Ecce ego sto ante ianuam, & pulso. Si quis mihi aperuerit, introibo, & carnabo cum eo, &

Cant. 5 ipse mecum. Et tu statim sollicita respondebis: Vox fratris mei pulsantis, & dicentis, Aperi mihi soror mea, proxima mea, perfecta mea, columba mea. Necesse est ut dicas: Dispoliaui me tunica mea, quo modo induam illam? laui pedes meos, quo modo inquinabo eos? Illico consurge, & aperi; ne te morante pertranseat, & postea conqueraris, & dicas: Aperui ego fratruei meo, fratrueis meus pertranfuit. Quid enim necesse est, ut cordis tui ostia clausa sint? Sponso aperiuntur Christo, claudantur diabolo, secundum illud: Si spiritus potestatem habentis ascenderit super te; ne dimiseris locum tuum. Daniel in sublimi cenaculo suo (neque enim manere poterat in humili) fenestras apertas

ad

ad Hierusalem habuit. & tu habeto apertas fenestras, sed unde lumen introeat, unde uideas ciuitatem Domini. ne aperias illas fenestras, de quibus dicitur, Intrauit mors per fenestras nostras. Illud quoque tibi uitandum est cautius, ne inanis gloriæ ardore capiaris. Quo modo, inquit Iesus, potestis credere, gloriam ab hominibus accipientes? Vide, quale malum sit, quod qui habuerit, non potest credere. Nos uero dicamus: Quoniam gloriatio mea tu es. Et: Psal. 3 Qui gloriatur, in Domino gloriatur. Et: Si adhuc hominibus placerem, Christi seruus non essem. Et: Mihi autem absit gloriari, nisi in cruce Domini nostri Iesu Christi, per quem mihi mundus crucifixus est, & ego mundo. Et illud: In te laudabimur tota die: In Domino laudabitur anima mea. Cum facis eleemosynam, Deus solus uideat. Cum ieiunas, læta sit facies tua. Vestis nec satis munda, nec sordida, & nulla diuersitate notabilis; ne ad te obuiam prætereuntium turba consistat, & digito monstreris. Frater est mortuus, sororis est corpusculum deducendum: caue, ne, dum hæc sæpius facis, ipsa moriaris. Nec satis religiosa uelis uideri, nec plus humilis, quam necesse est; ne gloriam fugiendo quæras. plures enim, paupertatis, misericordiæ, atque ieiunii arbitros declinantes, hoc ipso cupiunt placere, quod placere contemnunt; & mirum in modum laus, dum uitatur, appetitur. Ceteris perturbationibus, quibus hominis mens gaudet, ægrescit, sperat, & metuit, plures in uenio extraneos. hoc uitio, pauci admodum sunt, qui caruerint: & ille optimus, qui, quasi in pulchro corpore, rareæuorum sorde respergitur. Neque uero moneo, ne de diuitiis glorieris; ne de generis nobilitate te iactes; ne te ceteris præferas. scio humilitatem tuam. scio te ex affectu dicere: Domine, non est exaltatum cor meum, neque elati sunt oculi mei. noui, & apud te, & apud matrem tuam superbiam, per quam diabolus cecidit, penitus locum non habere. unde ad te super ea scribere superfluum sit. stultissimū quippe est docere, quod nouerit ille, quem doceas. Sed ne hoc ipsum tibi iactantiam generet, quod sæculi iactantiam

O contem-

contempsisti: ne cogitatio tacita subrepat, ut, quia in auris uestibus placere desisti, placere coneris in sordidis: & si quando in conuentum fratrum ueneris, uel sororum, humilis sedeas, scabello te causeris indignam: uocem ex industria, quasi confectam ieiuniis, non tenues: & deficiētis imitata gressum, humeris ne innitaris alterius. Sunt quippe nonnullæ exterminantes facies suas, ut appareant hominibus ieiunantes: quæ statim ut aliquem uiderint, ingemiscunt, demittunt supercilium, & operta facie, uix unum oculum liberant ad uidendum. uestis pulla, cingulum sacceum, & sordidis manibus pedibusq. uenter solus, quia uideri non potest, æstuat cibo. his quotidie psalmus ille canitur: Dominus dissipabit ossa hominum sibi placentium. Aliæ uirili habitu, ueste mutata, erubescunt esse quod natæ sunt, crinem amputant, & impudenter erigunt facies eunuchinas. Sunt quæ ciliciis uestiuntur, & cucullis fabrefactis, ut ad infantiam redeant, imitantur noctuas & bubones. Sed ne tantum uidear disputare de feminis, uiros quoque fuge, quos uideris catenatos: quibus feminei contra Apostolum crines, hircorum barba, nigrum pallium, & nudi in patientia frigoris pedes. Hæc omnia argumenta sunt diaboli. talem olim Antymum, talem nuper Sophronium Roma congenuit: qui postquam nobilium introierunt domos, & deceperunt mulierculas oneratas peccatis, semper discantes, & numquam ad scientiam ueritatis peruenientes, tristitiam simulant, & quasi longa ieiunia iurūis noctium cibis protrahunt. pudet dicere reliqua, ne uidear potius inuehi, quam monere. Sunt alii, (de mei ordinis hominibus loquor) qui ideo presbyterium, & diaconatum ambiunt, ut mulieres licentius uideant. Omnis his cura de uestibus, si bene oleant; si pes, laxa pelle, non folleat. crines calami stri uestigio rotantur: digiti de anulis radiant: & ne plantas humidior uia spargat, uix imprimunt summa uestigia. tales cum uideris, sponso magis existimato, quam clericos. Quidam in hoc omne studium, uitamq. psouerunt, ut matronarum nomina, domos, moresq. cognoscant: ex quibus unum,

unum, qui huius artis est princeps, breuiter strictimq. describam; quo facilius, magistro cognito, discipulos recognoscas. Cum sole festinus exurgit: salutandi ei ordo disponitur; uiarum compendia requiruntur; & pene usque ad cubacula dormientium senex importunus ingreditur. si puillum uiderit, si mantile elegans, si aliquid domesticæ supellectilis; laudat, miratur, attrectat; & se his indigere conquirens, non tam impetrat, quam extorquet: quia singulæ metuunt ueredarium urbis offendere. Huic inimica castitas, inimica ieiunia: prandium nidoribus probat, & altissimi *πύργου* uulgo pipizo nominatur. Os barbarum, & prociacax, & in cōiucia semper armatum. Quocūque te uerteris, primus in facie est. Quidquid nouū insonuerit, aut auctor, aut exaggerator est famæ. Equi per horarum momēta mutantur, tam nitidi, tamq. feroces, ut Thracii regis illum putes esse germanum. Variis callidus hostis pugnat insidiis. Sapiētiōr erat coluber omnibus bestiis, quas creauerat Dominus super terram. unde & Apostolus, Non, inquit, ignoramus eius astutias. Nec affectatæ sordes, nec exquisitæ mūditiæ conueniunt Christiano. Si quid ignoras, si quid de scripturis dubitas; interroga eum, quem uita commendat, excusat ætas, fama non reprobatur, qui possit dicere: Desponsus. *Gen. 3*
2. Cor. 2
2. Cor. 11
 faui enim uos uni uiro, uirginem castam exhibere Christo. Aut, si non est qui possit exponere, melius est aliquid nescire secure, quam cum periculo discere. Memento, quia in medio laqueorum ambulas: & multæ ueteranæ uirgines, castitatis indubitatae, in ipso mortis limine coronam perdere de manibus. Si quæ ancillulæ sunt comites propositi tui, ne erigaris aduersus eas, ne infleas ut domina. Vnum sponsum habere cœpistis: simul psallitis: Christi simul corpus accipitis: cur mensa diuersa sit? Prouocentur & alie. honor uirginum sit inuitatio ceterarum. quod si aliquam senseris infirmiore in fide, suscipe; consolare, blandire, & pudicitiam illius fac lucrum tuum. Si qua simulat, fugiens seruitutem: huic aperte Apostolum lege: Melius est nubere, quam uri. *1. Cor. 7*
 Eas autem uirgines, & uiduas, quæ otiosæ

O 2 &

- & curiosæ domos circumeunt matronarum, quæ, rubore frontis abstrito, parasitos uincunt mimorum, quasi quassam pestes abiice. Corruptunt mores bonos cōfabulationes pessimæ. Nulla illis, nisi uentris, cura est, & quæ uentri sunt proxima. Istiusmodi hortari solent, & dicere: *Mi catella*, rebus tuis utere, uiue dum uiuis: & numquid filiis tuis seruas? *Vinosæ*, atque lasciuæ quiduis mali insinuant,
1. *Tim. 5* ac ferreas quoque mentes ad delicias emolliunt. Et cum luxuriatæ fuerint in Christo, nubere uolunt, habentes damnationem, quod primam fidem irritam fecerunt. Nec tibi diserta multum uelis uideri, aut lyrici festiua carminis metro ludere. Non delumbem matronarum saluam delicata secteris, quæ nunc strictis dentibus, nunc labiis dissolutis, balbutientem linguam in dimidiata uerba moderantur, rusticum putantes omne, quod nascitur. adeo illis adulteriū
2. *Cor. 6* etiam linguæ placet. Quæ enim communicatio luci ad tenebras? qui consensus Christo cum Belial? quid facit cum psalterio Horatius? cum euangeliiis Maro? cum apostolis
1. *Cor. 8* Cicero? Nonne scandalizatur frater, si te uiderit in idolio
- Tit. 1* retumbentem? Et licet omnia munda mundis, & nihil rei ciendum, quod cum gratiarum actione percipitur: tamen simul bibere non debemus calicem Christi, & calicem demoniorum. Referam tibi meæ infelicitatis historiam. Cū ante annos plurimos domo, parentibus, sorore, cognatis, &, quod his difficilius est, consuetudine lautioris cūbi propter celorum me regna castrassem; & Hierosolymam militaturus pergerem; bibliotheca, quā mihi Romæ summo studio ac labore confeceram, carere omnino non poterā. itaque miser ego, lecturus Tullium, ieiunabam. post notum crebras uigilias, post lacrymas, quas mihi præteritorum recordatio peccatorū ex imis uisceribus eruebat, Plautus sumebatur in manus. si quando, in memet ipsum reuersus, prophetas legere cœpissem; sermo horrebat incultus: & quia lumen cæcis oculis non uidebam, non oculorum putabam culpam esse, sed solis. dum ita me antiquis serpens illuderet, in media ferme quadragesima medullis infusa febris

bris corpus inuasit exhaustum, & sine ulla requie, quod dictu quoque incredibile sit, sic infelicia membra depasta est, ut ossibus uix hærerem . interim paratur exequiæ ; & uitalis animæ calor, toto frigesciente iam corpore, in solo tantum tepente pectusculo palpitabat : cum subito raptus in spiritu, ad tribunal iudicis pertrahor : ubi tantum luminis, & tantum erat ex circumstantium claritate fulgoris, ut, proiectus in terram, sursum aspicere non auderem . Interrogatus de condicione, Christianum me esse respondi . Et ille, qui præsidebat, Mentiris, ait ; Ciceronianus es, non Christianus . Vbi enim thesaurus tuus, ibi & cor tuum . Illico *Matth. 6* obmutui, & inter uerbera (nam cædi me iusserat) conscientie magis igne torquebar, illum mecum uersiculum reputans : In inferno autem quis confitebitur tibi ? Clamare autem cœpi, & ciulans dicere : Misere mei Domine, misere mei . Hæc uox inter flagella resonabat . Tandem ad præfidentis genua prouoluti qui astabant, precabantur ut ueniã tribueret adolescentiæ, & errori locum pœnitentiæ commo- *Psal. 6* daret ; exacturus deinde cruciatum, si gentilium litterarum libros aliquando legissem . Ego, qui, in tanto constrictus articulo, uellem etiam maiora promittere, deierare cœpi, & nomen eius obtestans dicere : Domine, si umquam habuero codices sæculares, si legero, te negaui . In hæc sacramenti uerba dimissus, reuertor ad superos, & mirantibus cunctis, oculos aperio, tanto lacrymarum imbre perfusos, ut etiam incredulis fidem facerem ex dolore . Nec uero sopor ille fuerat, aut uana somnia, quibus sæpe deludimur . testis est tribunal illud, ante quod iacui : testis iudicium triste, quod timui . ita mihi numquam contingat in talem incidere quæstionem . liuentes fateor habuisse me scapulas, plagas sensisse post somnum, & tanto dehinc studio diuina legisse, quanto non ante mortalia legeram . Auaritiæ tibi quoque uitandum est malum, non ut aliena non appetas, (hoc enim & publicæ leges puniunt) sed quo tua, quæ tibi sunt aliena, non serues . Si in alieno, inquit, fideles non fuistis ; *Luc. 16* quod uestrum est, quis dabit uobis ? Aliena nobis auri ar-

Pro. 13 gentiq. sunt pōdera; nostra possessio spiritualis est; de qua
Luc. 16 alibi dicitur; Redemptio animæ uiri, propriæ diuitiæ. Nemo enim potest duobus dominis seruire: aut enim unum odiet, & alterum amabit; aut unum patietur, & alterum contemnet. Non potestis Deo seruire, & mammonæ, id est, diuitiis. nam gentili Syrorum lingua, mammona diuitiæ nuncupantur. Cogitatio uictus, spinæ sunt fidei. Radix auaritiæ, cura gentilium. At dicis: Puella sum delicata, & quæ manibus meis laborare non possum. si ad senectam uenero, si ægrotare cæpero; quis mei miserebitur? Audi **Apoc. 6** stolis loquentem Iesum: Ne cogitetis in corde uestro, quid manducetis; neque corpori uestro quid induamini. Nonne anima plus est, quam esca, & corpus plus, quam uestimentum? Respicite uolatilia cæli, quoniam non serunt, neque metunt, neque congregant in horrea, & pater uester **Matth. 5** cælestis pascit illa. Si uellis defuerit, lilia proponantur.
2. Cor. 12 Si esurieris, audias, Beatos pauperes, & esuriētes. Si aliquis te affixerit dolor, legito: Propter hoc cōplaceo mihi in infirmitatibus meis, & datus est mihi stimulus carnis meæ, angelus satanæ, qui me colaphizet, ne extollar. Latere in omnibus iudiciis Dei. Exultauerūt enim filix Iudæ in omnibus iudiciis tuis Domine. Illa tibi semper in ore uox resonet: Nudus exiui de utero matris meæ, nudus reuertar: Et: **1. Tim. 6** Nihil intulimus in hunc mundū, neque auferre quid possumus. At nunc plerasque uideas armaria stipare uestibus, tunicas mutare quotidie, & tamen tineas non posse superare. Quæ religiosior fuerit, unum exterit uestimentum, & plenis arcis pannos trahit. Infiuntur membranæ colore purpureo: aurum liquefeit in litteras: gemmis codices ueniuntur: & nudus ante fores earum Christus emoritur: & cum manum egenti porrexerint bucinant: cum ad agapen uocauerint, præco conducitur. Vidi nuper (nomen taceo, ne satyram putes) nobilissimam Romanorum mulierem in basilica beati Petri, semiuiris antecedentibus, propria manu, quo religiosior putaretur, singulos nummos, dispartire pauperibus. interea, ut usū nolle perfacile est
anus

anus quædam, annis pannisq. oblita, præcucurrit, ut alte-
 rum nummum acciperet: ad quam cum ordine peruenis-
 set, pugnus porrigitur pro denario, & tanti criminis reus
 sanguis effunditur. Radix omnium malorum est auaritia: 1. Tim. 6
 ideoque ab Apostolo idolorum seruitus appellatur. Quære Gal. 5
 primum regnum: Dei. & hæc omnia apponentur tibi. Nō Matth. 6
 occidet fame animam iustam Dominus. Iunior fui, & se- Psal. 36
 nui, & non uidi iustum derelictum, neque semen eius quæ- 3. Reg. 17
 rens panem. Helias coruis ministrantibus pascitur. Vidua
 Sareptana, ipsa cum filiis nocte moritura, prophetam pa-
 scit esuriens: & mirum in modum, capface completo, qui
 alendus uenerat, alit. Petrus apostolus inquit: Argen- Act. 3
 tum, & aurum non habeo: quod autem habeo, hoc tibi
 do. In nomine Domini Iesu surge, & ambula. At nunc
 multi, licet sermone taceant, opere loquuntur: Fidem, &
 misericordiam non habeo: quod autem habeo, argentum,
 & aurum, hoc tibi non do. Habentes autem uictum, & ue Gen. 28
 stitum, his contenti sumus. Audi, Iacob quid sua oratio-
 ne postulet: Si fuerit Deus mecum; & seruauerit me in uia
 hac, per quam ego iter facio; & dederit mihi panem ad mā
 ducandum, & uestitum ad uestiendum. Tantum necessaria
 deprecatus est: & post annos uiginti diues dominus, & di-
 tior pater, ad terrā reuertitur Chanaan. Infinita de scriptu-
 ris exempla suppetunt, quæ auaritiam doceant esse fugien-
 dam: uerum, quia nunc ex parte de ea dicitur, & suo, si
 Christus annuerit, uolumini reseruatur; quid ante non plu-
 res annos Nitrix gestum sit, referemus. Quidam ex fratri-
 bus parciore magis, quam auarior, & nesciens triginta ar-
 genteis Dominum uenditum, centum solidos, quos lina Matt. 26
 texendo acquisierat, moriens dereliquit. initum est inter
 monachos consilium, (nam in eodem loco circiter quin-
 que millia diuisis cellulis habitabant) quid facto opus esset.
 alii pauperibus distribuendos esse dicebant, alii dando ec-
 clesie, nonnulli parentibus remittendos. Macarius uero,
 & Pambo, & Isidorus, & ceteri, quos patres uocant, san-
 cto in eis loquente spiritu, decreuerunt infodiendos esse

O 4 cum

exemplum

A7.8 cum eodem, dicentes: Pecunia tua tecum sit in perditionem. Nec hoc crudeliter quisquam putet factum: tantus cunctos per totam Aegyptum terror inuasit, ut, unum solidum dimisisse, sit criminis. Et quoniam monachorum fecimus mentionem, & te scio libenter audire, quæ sancta sunt; aurem paulisper accommoda. Tria sunt in Aegypto genera monachorum. Primum Cœnobitæ, quod illi Sauses gentili lingua uocant; nos, In communi uiuentes, possumus appellare. Secundum Anachoritæ, qui soli habitant per desertum, & ab eo, quod procul ab hominibus recesserint, nuncupantur. Tertium genus est, quod Remoboth dicunt, deterrimum, atque neglectum, & quod in nostra prouincia aut solum, aut primum est. Hi bini, uel terni, nec multo plures simul habitant, suo arbitratu ac ditione uiuentes; & de eo, quod laborauerint, in medium partes conferunt, ut habeant alimenta communia. Habitant autem quamplurimum in urbibus, & castellis: &, quasi ars sit sancta, non uita, quidquid uendiderint, maioris est pretii. inter hos sæpe sunt iurgia: quia, suo uiuentes cibo, non patiuntur se alicui esse subiectos. reuera solent certare ieiuniis, & rem secreti uictoriæ faciunt. Apud hos affectata sunt omnia, laxæ manicæ, caligæ follicantes, uestis crassior, crebra suspiria, uisitatio uirginum, detractio clericorum: &, si quando dies festus uenerit, saturantur ad uomitum. His igitur, quasi quibusdam pestibus, exterminatis, ueniamus ad eos, qui plures sunt, & in commune habitant, id est, quos uocari Cœnobitas diximus. Prima apud eos confederatio est, obedire maioribus, &, quidquid iusserint, facere. diuisi sunt per decurias, atque centurias, ita ut nouem hominibus decimus præsit; & rursus decem præpositos sub se centesimus habeat. manent separati, sed iunctis cellulis. usque ad horam nonam, ut institutum est, nemo pergit ad alium, exceptis his decanis, quos diximus; ut, si cogitationibus forte quis fluctuat, illius consoletur aliquis. post horam nonam in commune concurritur: psalmi resonant, scripturæ recitantur ex more: & completis oratio-

orationibus, cunctisq. residentibus, medius, quem patrem uocant, incipit disputare: quo loquente tantum silentium fit, ut nemo alium respicere, nemo audeat excreare. dicentis laus in fletu est audientium. tacitæ uoluntur per ora lacrymæ; & ne in singultus quidem erumpit dolor. Cum uero de regno Christi, & de futura beatitudine, & de gloria cœperit annunciare uentura; uideas cunctos, moderato suspirio, & oculis ad cælum leuatis, intra se dicere: Quis dabit mihi pennas sicut columbæ; & uolabo, & requiescam. Post hæc concilium soluitur, & unaquæque decuria cum suo parente pergit ad mensam, quibus per singulas hebdomadas uicissim ministrant. Nullus in cibo strepitus est: nemo comedens loquitur. uiuitur pane, leguminibus, & holeribus, quæ sale solo condiuntur: uinum tantum senes accipiunt, quibus, & paruulis sæpe fit prandiū; ut aliorum fessâ sustentetur ætas, aliorum non frangatur incipiens. Dehinc consurgunt pariter, & hymno dicto, ad præsepia redeunt: ibi usque ad uesperam cum suis unusquisque loquitur, & dicit: Vidistis illum, & illum? quanta in ipso sit gratia? quantum silentium? quam moderatus incessus? Si infirmum uiderint, consolantur; si in Dei amore feruentem, cohortantur ad studium. Et quia nocte extra orationes publicas in suo cubili unusquisque uigilat, circum eunt cellulas singulorum, & aure apposita, quid faciant, diligenter explorant. quem tardiozem deprehenderit, non increpat; sed dissimulato quod norunt, eum sæpius uisitant, & prius incipientes, prouocant magis orare, quàm cōgunt. Opus diei statum est: quod decano redditum, fertur ad œconomum: qui & ipse per singulos menses patri omnium cum magno tremore reddit rationem: a quo etiam cibi, cum facti fuerint, prægustantur: & quia non licet dicere cuiquam: Tunicam, & sagum, textaq. iuncis strata non habeo: ille ita uniuersa moderatur, ut nemo quid postulet, nemo non habeat. Si quis uero cœperit ægrotare, transferatur ad exedram latiore; & tanto senum ministerio confovetur, ut nec delicias urbium, nec matris querat affectū.

Psa. 54

Dominicis diebus orationi tantum & lectionibus uacant: quod quidem & omni tempore, completis opusculis, faciunt. Quotidie aliquid de scripturis discitur. Ieiunium totius anni æquale est, excepta quadragesima, in qua sola conceditur districtius uiuere. a pascha ad pētecostem cenæ mutantur in prandia; quo & traditioni ecclesiasticæ satisfiat, & uentrem cibo non onerent duplicato. Tales Philo, Platonici sermonis imitator, tales Iosephus, Græcus Liuius, in secunda Iudaicæ captiuitatis historia Essenos refert. Verum quia nunc, de uirginibus scribens, pene superfluum de monachis disputauimus, ad tertium genus ueniam, quos anachoritas uocant: qui & de cœnobiis exeuntes, excepto pane, & sale, ad deserta nihil perferunt amplius, huius uitæ auctor Paulus, illustrator Antonius, &, ut ad superiora conscendam, princeps Ioannes Baptista fuit. Talem uero uirū

Luc. 1
Thren. 3 Hieremias quoque propheta describit, dicens: Bonum est uiro, cum portauerit iugum ab adolescentia sua. sedebit solitarius, & tacebit, quoniam sustulit super se iugum, & dabit percutienti se maxillam, saturabitur opprobriis; quia non in sempiternum abiiciet Dominus. Horum laborem, & conuersationem in carne non carnis, alio tempore, si uolueris, explicabo. Nunc ad propositum redeam; quia de auaritia differens ad monachos ueneram. Quorum tibi exemplum proponens, non dico aurum, atque argentum, & ceteras opes, sed ipsam terram, & cælum despiciens, & Christo copulata cantabis: Pars mea Dominus. Post hæc quamquam Apostolus orare nos semper iubeat; & sanctis etiam ipse sit somnus oratio: tamen diuisas orandi horas debemus habere; ut, si forte aliquo fuerimus opere detenti, ipsum nos ad officium tempus admoneat. Horam tertiam, sextam, nonam, diluculum quoque, & uesperam nemo est qui nesciat. Nec cibi sumantur, nisi oratione præmissa: nec recedatur a mensa, nisi referatur creatori gratia. Noctibus bis terque surgendum: reuoluenda, quæ de scripturis memoriter retinemus. Egreddentes de hospitio armet oratio: regrediētibus de platea oratio

oratio occurrat ante, quam sessio; nec prius corpusculum
 requiescat, quam anima pascatur. Ad omnem actum, ad
 omnem incessum manus pingat crucem. Nulli detrahas,
 nec aduersus filium matris tuæ ponas scandalum. Tu quæ *Psal. 49*
 es, ut alienum seruum iudices? Suo Domino stat, aut ca- *Rom. 14*
 dit. stabit autem: Potens est enim Deus statuere illum.
 Nec, si biduo ieiunaueris, putes te non ieiunantibus esse me
 liorem. Tu ieiunas, & irasceris; ille comedit, & fronte blā
 ditur. Tu uexationem mentis, & uentris esuriem rixando
 digeris; ille moderatius alitur, & Deo gratias agit. unde
 quotidie clamat Esaias: Non tale ieiunium elegi, dicit Do- *Esa. 58*
 minus. Et iterum: In diebus ieiuniorum uestrorum inue-
 niuntur uoluntates uestre, & omnes, qui sub uestra pote-
 state sunt, stimulis. In iudiciis, & litibus ieiunatis, & per-
 cutitis pugnis humilem. Vt quid mihi ieiunatis? Quale il-
 lud potest esse ieiunium, cuius iram non dicam nox occu-
 pat, sed luna integram derelinquit? Te ipsam considerans,
 noli in alterius ruina, sed in tuo opere gloriari. Nec illarū
 tibi exempla proponas, quæ carnis curam facientes, posses-
 sionum reditus, & quotidianas domus impensas supputāt.
 Neque enim undecim apostoli Iudæ prodicione sunt fracti:
 nec, Phileto & Alexandro facientibus naufragium, ceteri a *2. Tim. 2. 4*
 cursu fidei substiterunt. Nec dicas, illa & illa suis rebus frui-
 tur: honoratur ab hominibus: fratres ad eam conueniunt,
 & sorores. Numquid ideo uirgo esse desit? Primum dubiū
 est, an uirgo sit talis. Non enim, quo modo uidet homo, ui *1. Reg. 16*
 det Deus. Homo uidet in facie, Deus autem uidet in cor- *1. Cor. 7*
 de. Dehinc, etiam si corpore uirgo est, an spiritu uirgo sit,
 nescio. Apostolus autem ita uirginem definiuit: Vt sit san-
 cta corpore, & spiritu: Ad extremum habeat sibi gloriam
 suam. Vincat Pauli sententiam; deliciis fruatur, & uiuat.
 Nos meliorum exempla sectemur. Propone tibi beatam *Luc. 1*
 Mariam: quæ tantæ extitit puritatis, ut mater Domini esse
 mereretur. ad quam cum Angelus Gabriel in uiri specie
 descendisset, dicens: Ave gratia plena, Dominus tecum:
 consternata, & perterrita, respondere non potuit. numquā
 enim

enim a uiro fuerat salutata. Denique nuncium discit, & loquitur: &, quæ hominem formidabat, cum angelo fabulatur intrepida. Potes & tu esse mater Domini. Accipe tibi
Esa. 8 tomum magnum, nouum, & scribe in eo stylo hominis: uelociter spolia detrahe: &, postquam accesseris ad prophetissam, & conceperis in utero, & pepereris filium, dic:
Esa. 26 A timore tuo Domine concepimus, & doluimus, & peperimus spiritum saluationis tuæ, quem fecimus super terrā.
Mar. 3 Tunc & filius tuus tibi respondebit, & dicet: Ecce mater mea, & fratres mei. Et mirum in modum ille, quem in latitudine pectoris tui paulo ante descriperas, quem in nouitate cordis stylo signaueras, postquam spolia ex hostibus receperit, postquam denudauerit principatus, & potestates, & affixerit eas cruci, conceptus adolescit, & maior effectus sponsam te incipit habere de matre. Grandis labor, sed grā de præmium, esse quod martyres, esse quod apostoli, esse quod Christus est. quæ quidem uniuersa tūc profunt, cum in ecclesia fiunt, cum in una domo pascha celebramus: si arcam ingredimur cum Noe: si, pereunte Hiericho, Rahab
Gen. 7 meretrix iustificata nos continet. ceterum uirgines, quales apud diuersas hæreses, & quales apud impurissimum Manichæum esse dicuntur, scorta sunt existimandæ, non uirgines. si enim corporis earum auctor est diabolus, quo modo possunt honorare plasmationem hostis sui? sed quia sciunt uirginale uocabulum gloriosum, sub ouium pellibus lupos tegunt. Christum mentitur antichristus, & turpitudinem uitæ falso nominis honore conuestiunt. Gaude soror, gaude filia, gaude mi uirgo: quia, quod alix simulant, tu uere esse cepisti. Hæc omnia, quæ digestimus, dura uidebuntur ei, quæ non amat Christum. Qui autem omnem sæculi pompam pro purgamento habuerit, & uana duxerit uniueria sub sole, ut Christum lucrifaciat, qui commortuus est Domino suo, & consurrexit, & crucifixit carnem cum uitis & concupiscentiis, libere proclamabit: Quis nos separabit a caritate Christi? an tribulatio? an angustia? an persecutio? an fames? an nuditas? an periculum? an gladius

dius? Et iterum: Certus sum, quia neque mors, neque uita, neque angelus, neque principatus, neque potestates, neque instantia, neque futura, neque fortitudo, neque excellum, neque profundum, neque alia creatura poterit nos separare a caritate Dei, quæ est in Christo Iesu Domino nostro. Dei filius pro nostra salute hominis factus est filius. Nouem mensibus in utero, ut nascatur, expectat, fastidia sustinet, cruentus egreditur, pannis inuoluitur, blanditiis delinitur; & ille pugillo mundum includens, præsepis continetur angustiis. Taceo, quod, usque ad triginta annos ignobilis, parentum paupertate contentus est: uerberatur, & tacet: crucifigitur, & pro crucifigentibus deprecatur. Quid igitur retribuam Domino pro omnibus, quæ retri- Psa. 115
buit mihi? Calicem salutaris accipiam, & nomen Domini inuocabo. Pretiosa est in conspectu Domini mors sanctorum eius. Hæc est sola digna retributio, cum sanguis sanguine compensatur, & redempti cruore Christi, pro redemptore libenter occumbimus. Quis sanctorum sine certamine coronatus est? Abel iustus occiditur: Abraham uxorem pe- Gen. 20
riclitatur amittete. Et, ne in immensum uolumen extendam, quære, & inuenies singulos aduersa perpeffos. Solus in deliciis Salomon fuit, & forsitan ideo corruit. Quem Prou. 3
enim diligit Dominus, corripit: castigat autem omnem filium, quem recipit. Nonne melius est, breui tempore dimicare, ferre uallum, arma sumere, lassescere sub lorica, & postea gaudere uictorem, quam impatientia unius horæ seruire perpetuo? Nihil amantibus durum est, nullus difficilis cupienti labor est. Respice, quanta Iacob pro Rachel pacta uxore sustinuit: Et seruiuit, inquit scriptura, Iacob pro Gen. 29.31
Rachel annis septem. Et erant in conspectu eius quasi dies pauci: quoniam amabat illam. Vnde & ipse postea memorat: In die urebar æstu, & gelu nocte. Amemus & nos Christum, eiusque semper quæramus amplexus: & facile uidebitur omne difficile: breuia putabimus uniuersa, quæ longa sunt: & iaculo illius uulnerati, per horarum momenta dicemus: Heu me, quia peregrinatio mea prolōgata est. Nō Psal. 119
sunt

- Rom. 5.8** sunt enim condignæ passionē huius temporis ad futuram gloriam, quæ reuelabitur in nobis. Quia tribulatio patientiam operatur, patientia autem probationem, probatio autem spem, spes autem non confundit. Quando tibi graue uidetur esse, quod sustines; Pauli secundam epistolam
- 2. Cor. 11** ad Corinthios lege: In laboribus plurimum, in carceribus abundantius, in plagis supra modum, in mortibus frequenter. A Iudæis quinquies quadragenas una minus accepi: ter uirgis cæsus sum: semel lapidatus sum: ter naufragium feci: nocte & die in profundo maris fui. In itineribus sæpius, periculis fluminum, periculis latronum, periculis ex genere, periculis ex gentibus, periculis in ciuitate, periculis in deserto, periculis in mari, periculis in falsis fratribus, in laboribus, in miseriis, in uigiis multis, in fame & siti, in ieiuniis plurimis, in frigore, & nuditate. Quis nostrum saltem minimam portionem de catalogo harum sibi potest uindicare uirtutum? ob quæ ille postea confidenter aiebat:
- 2. Tim. 4** Cursum consummaui, fidem seruaui. Superest mihi corona iustitiæ, quam retribuet mihi in illa die Dominus iustus iudex. Si cibus insulsius fuerit, contristamur: & putamus Deo nos aliquod præstare beneficiū, cum aquatius uinum bibimus. Calix frangitur, mensa subertitur, uerba resonant, & aqua tepidior sanguine uindicatur. Regnum celorum uim patitur, & uiolenti rapiunt illud. Nisi uim feceris, celorum regna non capies. Nisi pulsaueris importune, pacem non accipies sacramenti. An non tibi uidetur uiolentia, cum caro cupit esse quod Deus est, & illuc, unde angeli corruerunt, angelos iudicatura conscendit? Egredere, quæso, paulisper de carcere, & præsentis laboris ante oculos tuos tibi pingue mercedem, quam nec oculus uidit, nec
- Esa. 64** auris audiuit, nec in cor hominis ascendit. Qualis erit illa dies, cum tibi Maria, mater Domini, choris occurret comitata uirgineis? cum post Rubrum mare, submerso cum suo exercitu Pharaone, tympanum tenens præcinet responsuris: Cantemus Domino: gloriose enim honorificatus est; equum & ascensorem proiecit in mare. Tunc Thecla in

in tuos læta uolabit amplexus. Tūc & ipse sponsus occur-
ret, & dicet: Surge ueni proxima mea, speciosa mea, co
lumba mea: quia ecce hiems transiit, pluuia abiit sibi. *Cant. 2*
Tunc angeli mirabuntur, & dicent: Quæ est ista prospiciens *Cant. 6*
quasi diluculum, speciosa ut luna, electa ut sol? Videbunt
te filix, & laudabunt reginæ, & concubinæ prædicabunt.
Hinc & alius castitatis chorus occurrēt: Saracū nuptis ue-
niet, filia Phanuelis Anna cum uiduis. Erunt in diuersis gre-
gibus carnis & spiritus matres tuæ. Lætabitur illa, quod ge-
nuit. exultabit ista, quod docuit. Tunc uere super asinam
Dominus ascendet, & cælestem ingredietur Hierusalem. *Matth. 21*
Tunc paruuli, de quibus in Esaia saluator effatur: Ecce ego, *Esa. 8*
& pueri mei, quos mihi dedit Deus, palmas uictoriæ suble-
uantes, consono ore cantabunt: Osanna in excelsis: Bene-
dictus, qui uenit in nomine Domini, osanna in excelsis.
Tunc centum quadraginta quattuor millia in cōspectu thro- *Apoc. 14*
ni & seniorum tenebunt citharas, & cantabunt canticum
nouum: et nemo poterit dicere canticum illud, nisi nume-
rus definitus. Hi sunt, qui cum mulieribus se non coinqui-
nauerunt: uirgines enim permanserunt: hi sunt, qui se-
quuntur agnum, quocumque uadit. Quotiescumque te ua-
na sæculi delectauerit ambitio; quoties in mundo aliquid ui-
deris gloriosum; ad paradysum mente trāsgredere; esse in-
cipe, quod futura es; & audies a sponso tuo: Pone me si- *Cant. 8*
cut umbraculum in corde tuo, sicut signaculum in bra-
chio tuo; & corpore pariter ac mente munita clamabis, &
dices: Aquæ multæ non poterunt extinguere caritatem, &
flumina non operient eam.

ARGVMENTVM.

BLAESILLA, Paule filia, & Eustochii soror, amisso uiro, et ualida febre admonita, se totam ad Christum conuertens, monacha uitam profiteri coepit. D. Hieronymus nunc eius obrectatoribus respondet, & sanctam commendat uitam.

HIERONYMVS AD MARCELLAM,
de agrotatione Blaesillæ.

EPISTOLA XXIII.

Gen. 22.37.48 BRAHAM tentatur in filio, & fidelior inuenitur.
A Ioseph in Aegyptum uenditur, ut patrem pascat,
4. Reg. 20 & fratres. Ezechias uicina morte terretur; & fusus
in lacrymas, & quindecim annorum spatio protelatur ad
Matth. 26 uitam. Petrus Apostolus Domini passione concutitur, &
Ioan. 21 amariter flens audit: Pasce oues meas. Paulus, lupus ra-
Gen. 49 pax, & Benjamin adulescētiō in ecclasi cæcatur, ut uideat;
Act. 9 &, repentino tenebrarum horrore circumdatus, Dominum
uocat, quem dudū ut hominem persequabatur. Ita & nūc,
mi Marcella, Blaesillam nostram uidimus ardore febriū per
triginta ferme dies iugiter æstualle; ut sciret reiiciendas de-
licias corporis, quod paulo post uermibus exarandum sit.
Luc. 4 Venit & ad hanc Dominus Iesus, tetigitq. manum eius, &
ecce surgens ministrat ei. Redolebat aliquid negligentie;
Ioan. 11 & diuitiarū fasciis colligata, in sæculi iacebat sepulcro. sed
infrēnuī Iesus, & conturbatus in spiritu, clamauit dicens:
Blaesilla, ueni foras. Quæ uocata surrexit, & egressa cū Do-
mino uescitur. Iudæi minentur, & tumeant, quærant oc-
cidere suscitātam: soli apostoli gloriantur. Scit se uitam
suam ei debere, qui reddidit. scit se eius amplexari pedes, cu-
ius paulo ante iudicium pertimescebat. Corpus pene iace-
bat exanime, & anhelos artus mors uicina quatiebat. ubi
tunc erant auxilia propinquorum? ubi uerba omni ina-
niora

niora fumo? Nihil tibi debet, o ingrata cognatio, quæ mûdo perit, & Christo reuixit. Qui Christianus est, gaudeat: qui irascitur, non se esse indicat Christianum. Vidua, quæ soluta est uinculo maritali, nihil necesse habet nisi perseuerare. At scandalizat quempiam uestis fuscior. Scandalizet Ioannes, quo inter natos mulierum maior nullus fuit; qui angelus dictus, ipsum quoque Dominum baptizauit; qui, *Matth. 12* camelorum uestitus tegmine, zona pellicea cingebatur. *Mar. 1*

Cibi displicent uiliores? nihil uilius est locustis. Illæ Christianos oculos scandalizent potius, quæ purpurisso, & quibusdam fucis ora oculosq. depingunt; quarum facies gypseæ, & nimio candore deformes, idola mentiuntur. quibus si forte improvidis lacrymarum stilla eruperit, sulco defluit: quas nec numerus annorum potest docere, quod uetulae sint, quæ capillis alienis uerticem struunt, & præteritam iuuetutem in rugis anilibus poliunt; quæ denique ante nepotum gregem tremantes uirgunculæ componuntur. Erubescat mulier Christiana; si naturæ cogit decorem, si carnis curam facit ad concupiscentiam; in qua qui sunt, secundum Apostolum, Deo placere non possunt. Vidua nostra *Rom. 8* ante morosius ornabatur, & die tota, quid sibi deesset, quærebat ad speculum. nunc loquitur confidenter: Nos autem *2. Cor. 3* omnes reuelata facie, gloriam Domini speculantes, in eandem imaginem transformamur, a gloria in gloriam quasi a Domini spiritu. Tunc crines ancillulæ disponebant, & mitellis crispantibus uertex artabatur innoxius: nunc neglectum caput scit sibi tantum sufficere, quod uelatur. Illo tēpore plumarum quoque dura mollities uidebatur, & in extructis toris iacere uix poterat. nunc ad orandum festina confurgit, & tinnula uoce ceteris alleluia præripiens, prior incipit laudare Dominum suum. Flectuntur genua supra nudam humum, & crebris lacrymis facies psimmithio ante fordidata purgatur. Post orationem psalmi concrepant; et laxa ceruix poplites uacillantes, in somnumq. uergentes oculi, nimio mentis ardore uix impetrant ut quiescat. Pul la tunica, minus cum humi iacuērit, fordidatur. Soccus

P uilior,

226 *Hier. ad Marcellam de agrotat. Blasil.*

uilior, auratorum pretium calceorum egentibus largitur.
Cingulum non auro, gemmisq. distinctum est, sed laneū,
& tota simplicitate purissimū, & quod possit magis attrin-
gere uestimenta, quam scindere. Si huic proposito inuider-
Gen. 3 icatorpius, & sermone blando de uetita rursus arbore co-
Medere persuadet; illidatur ei pro solea anathema, & in suo
Matth. 4 morienti puluere dicatur: Vade retro satana: quod inter-
pretatur, aduerse. aduersarius quippe Christi est, & anti-
christus, cui præcepta displicent Christi. Oro te, quid tale
umquam, quale apostoli, fecimus, ut merito scandalizen-
Matth. 4 tur? Patrem senem cum nauicula & reti dimittunt. Publi-
iuc. 5-9 canus a teloneo surgit, & sequitur saluatorem: uolens disci-
Matth. 8 pulus reuerti domum, & suis ante renunciare, magistri uo-
ce prohibetur. Sepultura non datur patri: & pietatis genus
est, impium esse pro Domino. Nos, quia serica ueste non
utimur, monachi iudicamur: quia ebrii non sumus, nec ca-
chinno ora dissoluimus, continentes uocamur, & tristes. si
ranica non canduerit; statim illud e triuio, impostor, &
Græcus est. Cauillentur uasiora licet, & pingui aqualiculo
fartos circumferant homines. Blasilla nostra ridebit, nec
dedignabitur loquacium ranarum audire conuicia, cum Do-
minus eius dictus sit beelzebub.

ARGVMENTVM.

LEAE, religiosissima femina, & monasterii prefecte, mortem laudat, cum Consulis designati, infidelis hominis, qui per id tempus obierat, morte comparans; ostendens quantum discrimen sit inter sanctorum, & ethnicorum exitus.

HIERONYMVVS AD MARCELLAM,

de exitu Lex.

EPISTOLA XXIIII.

VM hora ferme tertia hodiernæ diei septuageſimum secundum psalmum, idest, tertii libri principium legere cœpissimus; & docere cogeremur, tituli ipsius partem ad finem secundi libri, partem ad principium tertii libri pertinere; quod scilicet, Defecerunt hymni Dauid, filii Iesse, finis esset prioris; psalmus uero Asaph, principium sequentis; & usque ad eum locum peruenissemus, in quo iustus loquitur: Si dicebam, narrabo sic, ecce generationem filiorum tuorum præuaricatus sum: quod in Latinis codicibus non ita habemus expressum: repente nobis nunciatum est, sanctissimam Leam exisse de corpore: ibiq. ita te palluisse conspexi, ut uere aut pauca, aut nulla sit anima, quæ, fracto uase testaceo, non tristis erumpat. et tu quidem, non quod futuri incerta esses, dolebas, sed quod triste funeri obsequium non dedisses. Denique in medijs fabulis rursus didicimus, reliquias eius iam Ostiâ fuisse delatas. Queras, quo pertineat ista replicatio? Respondebo tibi uerbis Apostoli, Multum per omnem modum. Primum, quod uniuersorum gaudijs prosequenda sit, quæ, calcato diabolo, coronam iam securitatis accepit. Secundo, ut eius uita breuiter explicetur. Tertio, ut designatum consulem de suis sæculis detrahentes, esse doceamus in tartaro. Et quidem cōuersationem Lex nostræ quis

Rom. 2

P 2 possit

possit digno alleuare præconio? Ita eam totam ad Dominum fuisse conuersam, ut monasterii princeps, mater uirginum fieret, post molliem uestium sacco membra truiisset, insomnes orationibus duxisset noctes, & comites suas plus exemplo docuisset, quam uerbis. Humilitatis fuit tantæ, tamq. subiectæ, ut quondam domina plurimorum, ancilla omnium putaretur, nisi quod eo Christi magis esset ancilla, dum domina hominum non putatur. Inculta uestis, uilis cibus, neglectum caput, ita tamen, ut, cum omnia faceret, ostentationem fugeret singulorum, ne reciperet in præsentis sæculo mercedem suam. Nunc igitur pro breui labore æterna beatitudine fruitur, excipitur angelorū choris, Abrahæ sinibus confouetur; & cum paupere quondam Lazaro, diuitem purpuratum, & non palmatum consulem, sed atratum, stillam digiti minoris cernit inquirere. O quanta rerum mutatio, Ille, quem ante paucos dies dignitatum omniū culmina præcedebant; qui, quasi de subiectis hostibus triumpharet, Capitolinas ascendit arces; quem plausu quodam & tripudio populus Romanus excepit; ad cuius interitum urbs uniuerſa commota est; nunc desolatus, & nudus, non in lacteo celi palatio, ut uxor mētitur infelix, sed in sordentibus tenebris continetur. Hæc uero, quam unius cubiculi secreta uallabant, quæ pauper uidebatur, & tenuis, cuius uita putabatur amentia, Christum sequitur, & dicit: Quæcumque audimus, ita & uidimus in ciuitate Dei nostri: & reliqua. Quapropter moneo, & flens gemensq. contestor, ut, dum huius mundi uiam currimus, non duabus tunicis, idest, duplici uestiamur fide: non calciamentorum pellibus, mortuis uidelicet operibus prægrauemur: non diuitiarum nos opera ad terram premat: non uirgæ, idest, potentie secularis queratur auxilium: non pariter & Christum uelimus habere, & sæculum: sed pro breuibus & caducis, æterna succedant; & cum quotidie, (secundum corpus loquor) præmoriāmur, in ceteris non nos perpetuos existimemus, ut possimus esse perpetui.

ARGV-

ARGVMENTVM.

*BLAESILLA, Paula primogenita, septimo a nuptijs men-
se uiro amisso, periit. consolatur matrem D. Hieronymus; eā-
que, quod nimis intemperanter filia mortem ploret, reprahe-
dens, Blaessilla interea uitam admiscet.*

HIERONYMVS AD PAVLAM,
super obitu Blaessillae filiae.

EPISTOLA XXV.

*Q*UIS dabit capiti meo aquam, & oculis meis fontem lacrymarum, & plorabo, non, ut Hieremias Hier. 9
ait, uulneratos populi mei, nec, ut Iesus, Luc. 19 mise-
riam Hierusalem; sed plorabo sanctitatem, misericordiam,
innocentiam, castitatem; plorabo omnes pariter in unius
morte defecisse uirtutes: non quod lugenda sit illa, quæ
abiit: sed quod nobis impatientius sit dolendum, qui ta-
lem uidere desuimus. Quis enim ficcis oculis recordetur,
uiginti annorum adolescentulam tam ardenti fide crucis le-
uasse uexillum, ut magis amissam uirginitatem, quam ma-
riti doleret interitum? Quis sine singultibus transeat oran-
di instantiam, nitorem linguæ, memoriæ tenacitatem, acu-
men ingenii? Si Græce loquentem audisses; Latine eam ne
scire putares. Si in Romanum sonum lingua se uerterat; ni-
hil omnino peregrini sermo redolebat. Iam uero, quod in
Origene quoque illo Græcia tota miratur, in paucis non
dicam mensibus, sed diebus, ita Hebrææ linguæ uicerat dif-
ficultates, ut in discendis canendisq. psalmis cum matre cō-
tenderet. Humilitas uestium non, ut in plerisque solet, tu
mentes animos arguebat; sed, cum interiori se mente deie-
cerat, inter ancillarum uirginum cultum dominamq. nihil
medium, nisi quod in eo facilius dignoscebatur, quod negle-
ctius incedebat. Vacillabant ægrotatione gressus; & pallens

P 3 tena

tem ac trementem faciem uix collum tenue sustinebat; & ramentum aut prophetam, aut euangelium semper in manibus tenebat. Lacrymis ora complentur: fingultus occupat uocem: & hærentem linguam uiscera commota non laxant. Cum sanctum corpusculum febrium ardor excoqueret, & semianimæ lectulum uallaret circulus propinquorum; hæc in extremo uerba mandabat: Orate dominum Iesum, ut mihi ignoscat; quia implere non potui, quod uolebam. Secura esto, mi Blæfilla: confidimus, probas uera quæ dicimus: Numquam est sera conuersio. Vox hæc primum dedicata est in latrone: Amen dico tibi, hodie mecum eris in paradiso. Postquam autem, sarcina carnis abiecta, ad suam anima reuolauit auctorem, & in antiquam possessionem diu peregrinata conscendit: ex more parantur exequiæ, & nobilium ordine præeunte, aureum feretro uelamen obtenditur. Videbatur mihi tunc clamare de cælo: Non agnosco uestes: amictus iste non est meus: hic ornatus alienus est. Sed quid agimus? Matris prohibitori lacrymas, ipsi plangimus. Confiteor affectus meos: totus hic liber fletibus scribitur. Fleuit & Iesus Lazarum, quia amabat illū. Non est optimus consolator, quem proprii uincunt gemitus, cuius uisceribus emollitis, fracta in lacrymis uerba defudant. Testor, mi Paula, Iesum, quem Blæfilla nunc sequitur; testor sanctos angelos, quorum consortio fruitur; eadem me dolorum perpeti tormenta, quæ pateris; patrem esse spiritu, nutricium caritate, & interdum dicere:

Iob 3 Pereat dies illa, in qua natus sum. Et, Hei mihi mater, ut

Hier. 15. 12 quid genuisti me uirum, qui diceret discrimen omni terræ. Et illud: Iustus es Domine, ueruntamen iudicia loquar ad te. Quid est, quod uix peccatorum prosperantur? Et:

Isal. 72 Mei quoque pene moti sunt pedes, pene effusi sunt gressus mei. Quia zelaui in peccatoribus, pacem peccatorum uidens. Et dixi: Quo modo cognouit Deus, & si est scientia in excelsis? Ecce ipsi peccatores, & abundantes in sæculo, obtinuerunt diuitias. Sed rursus illud occurrit: Si narrauerō sic, ecce generationem filiorum tuorum præuarica-

tus

tus sum : Numquid & in meam mentem non hic sæpius flu-
 tus illiditur ? Quare senes impii , sæculi diuitiis perfuun-
 tur ? quare adolescentia rudis , & sine peccato pueritia , im-
 maturo flore metitur ? Quid causæ est , ut sæpe bimuli tri-
 mulique , & ubera materna lactentes , a dæmonio corripiā-
 tur , repleantur lepra , morbo regio deuorentur ? & contra-
 rio , impii , adulteri , homicidæ , sacrilegi , uegeti , atque securi
 de sua sanitate , in Deum blasphemant ? præsertim cum in- Exe. 18
 iustitia patris non redundet ad filium ; & anima , quæ pecca-
 uerit , ipsa moriatur . Aut , si manet uetus illa sententia , pec-
 cata patrum in filios oportere reſtitui , iniquum sit longæui Exo. 20
 patris innumera delicta in inuocentem infantiam repensa-
 re . Et dixi : Ergo sine causa iustificauit cor meum : & laui in- Pſal. 72
 ter innocentes manus meas : & factus sum flagellatus tota
 die . Sed , cum hæc cogitarem , statim didici cum propheta :
 Et ſuſcepi , ut cognoscerem hoc : labor est in cōſpectu meo ,
 donec ingrediar ſanctuarium Dei , & intelligam in nouiſſi-
 ma eorum . Iudicia enim Domini abyſſus multa . Et : O Pſal. 35
 profundum diuitiarum ſapientiæ & ſcientiæ Dei , quam in- Rom. 11
 ſcrutabilia ſunt iudicia eius , & inueſtigabiles uix eius .
 Bonus eſt Deus ; & omnia , quæ bonus facit , bona ſunt
 neceſſe eſt . Mariti orbitas irrogatur : plango , quod acci-
 dit : ſed , quia ſic placet Domino , æquo animo ſuſtinebo .
 Vnicus raptus eſt filius : durum quidem , ſed tolerabile ,
 quia ſuſtulit ille , qui dederat . Si cæcus fuero , amici me le-
 ctio conſolabitur . Si auditum quoque ſurdæ aures negaue-
 rint ; uacabo a uitiiſ ; nihil aliud , niſi Dominum cogitabo .
 Imminebit ſuper hæc & dura pauperies , frigus , languor ,
 & nuditas : extremam expectabo mortem , & breue puta-
 bo malum , quod ſinis melior ſubſequetur . Conſideremus
 quid ethicus ille pſalmus ſonet : Iuſtus es Domine , & rectū Pſal. 119
 iudicium tuum . Hoc non poteſt dicere , niſi ille , qui ad uni-
 uerſa , quæ patitur , magnificat Dominum , & ſuo merito
 impūtanſ , in aduerſis de eius clementia gloriatur . Exultaue Pſal. 96
 runt enim filiæ Iudæ in omnibus iudiciis Domini . Si Iuda
 conſeſſio interpretatur ; cōſtans autem omnis anima cre-

P + deſtis

dentis est: necesse est, ut, qui se credere dicit in Christo, in omnibus Christi iudiciis gaudeat. Sanus sum, gratias refero creatori. Languco, & in hoc laudo Domini uoluntate.

2. Cor. 12 Quando enim infirmior, tunc fortior sum, & uirtus spiritus in carnis infirmitate perficitur. Patitur & Apostolus aliquid, quod non uult; pro quo ter Dominum deprecatur. sed dicitur ei: Sufficit tibi gratia mea: quia uirtus in infirmitate perficitur; & ad reuelationum humiliandam superbiam, monitor quidam humane imbecillitatis apponitur, in similitudinem triumphantium; quibus in curru retro comes adhererebat, per singulas acclamationes ciuium dicens: Hominem te esse memento. Cur autem durum sit, quod quandoque patiendum est? & cur dolemus quemquam mortuum? ad hoc enim nati non sumus, ut maneamus æterni. Abraham, Moyses, Esaias, Petrus, Iacobus, Ioannes, Paulus, electionis uas, & super omnia filius Dei, moritur: & nos indignamur aliquem exire de corpore, qui ad hoc forsitan raptus est, ne malitia mutaret intellectum eius? placita enim erat Deo anima eius. propter hoc properauit educere eam de media iniquitate, ne, longo uitæ itinere, deuiis oberraret anfractibus. Lugeatur mortuus, sed ille, quem gehenna suscipit, quem tartarus deuorat, in cuius pœnam æternus ignis æluat. Nos, quorum exitum angelorum turba comitatur, quibus obuiam Christus occurrit, grauemur magis, si diutius in tabernaculo isto mortis habitamus. Quia quamdiu hic moramur, peregrinamur a Domino. Illa illa nos cupido teneat: Hei mihi, quia peregrinatio mea prolongata est a me, habitauim cum habitantibus Cedar, multum peregrinata est anima mea. Si Cedar tenebræ sunt, & mundus iste sunt tenebræ, quia lux lucet in tenebris, & tenebræ eam non comprehenderunt: faueamus Blaxillæ nostræ, quæ de tenebris migravit ad lucem, & inter fidei incipientis ardorem, consummati operis percepit coronam. Reuera, si sæculare desiderium, & quod Deus a suis auertat, delicias uitæ huius cogitantem mors immatura rapuisset, plangenda erat, & omni lacrymarum fonte ploranda.

ploranda. nunc uero cum, propitio Christo, ante quatuor ferme menses, secundo quodam modo propositi se baptismo lauerit; & ita deinceps uixerit, ut, calcato mundo, semper monasterium cogitarit: non uereris, ne tibi saluator dicat: Irascaris Paula, quia tua filia, mea facta est filia? indignaris de iudicio meo; & rebellibus lacrymis facis iniuriam possidenti? scis enim, quid de te, quid de ceteris tuis cogitem. Cibus tibi denegas; non ieiuniorum studio, sed doloris. non amo frugalitatem istam. ieiunia ista aduersarii mei sunt. nullam animam recipio, quæ, me nolente, separatur a corpore. Tales stulta philosophia habeat martyres, habeat Zenonem, Cleombrotum, uel Catonem. Super nullum requiescit spiritus meus, nisi super humilem, & quietum, & tremementem uerba mea. Hoc est, quod mihi monasterium promittebas? quod, habitu a matronis ceteris separato, tibi quasi religiosior uidebaris? Mens ista, quæ plangit, sericarum uestium est. Interciperis, & emorens, &, quasi non in meas manus uentura sis, crudelem iudicem fugis. Fugerat quondam & Ionas animosus propheta, sed in profundo maris meus fuit. Si uiuentem crederes filiam, nunquā plangeres ad meliora migrasse. Hoc est, quod per Apostolum meum iusseram, ne de dormientibus in similitudinem gentiū tristaremini. Erubescere, ethnicæ cōparatione superaris. melior diaboli ancilla, quā mea est. illa infidelem maritū translatum fingit in cælum: tu mecum tuam filiam commorantem, aut non credis, aut non uis. Sed dicis: quo modo lugere me probibes, cū & Iacob Ioseph in sacco fleuerit, congregatisq. ad se omnibus propinquis noluerit cōsolari, dicens: Descendā ad filium meum lugens in infernum? Et David Absalon cooperto capite planxerit, repetens; Fili mi Absalon, Absalon fili mi; quis dabit, ut moriar pro te fili mi Absalon? Moyse quoque, & Aaron, ceterisque sanctorum sollemnis sit luctus exhibitus? Perfacilis ad ista responsio est: Luxisse Iacob filium, quem putabat occisum, ad quem & ipse erat ad inferos descendurus, dicens; Descendam ad filium meum lugens in infer-

nam

*Esa. 66**Ion. 1. 2**1. Thes. 4**Gen. 37**2. Reg. 18**Deut. 34**Num. 20**Gen. 37*

num: quia necdum paradisi ianuam Christus effregerat; necdum flammeam illam rompheam, & uertiginem praefidentium cherubin, sanguis eius extinxerat. Vnde & Abraham, licet in loco refrigerii, tamen apud inferos cum Lazarus fuisse scribitur. Et Dauid iusse fleuisse filium partidam, qui alium paruulum, postquam, ut uiueret, impetrare non potuit, quia sciebat non peccasse, non fleuit. De Moyse uero, & Aaron, quod eis ex ueteri more sit planctus exhibitus, non mirandum est; cum & in Actis apostolorum, iam euangelio coruscante, Stephano fecerint Hierosolymae fratres planctum magnum; et utique planctus magnus, non in plangentium examinatione, ut tu putas, sed in pompa funeris, & exequiarum frequentia intelligendus sit. Denique de Iacob scriptura sic loquitur: Et ascendit Ioseph sepelire patrem suum: & ascenderunt cum eo omnes pueri Pharaonis, & seniores domus eius, & seniores omnis terrae Aegypti, & omnis domus Ioseph, & fratres eius. Et post paruulum: Et ascenderunt cum eo quadrigae, & equites, & facta sunt castra grandia nimis. Ac deinde: Et planxerunt eum planctu magno, & fortissimi nimis. Planctus iste sollemnis non longas Aegyptiis imperat lacrymas, sed funeris monstrat ornatum. Iuxta quem modum Aaron quoque, & Moysen fletos esse, manifestum est. Nequeo satis scripturae laudare mysteria, & diuinum sensum in uerbis licet simplicibus admirari, quid tibi uelit, quod Moyses plangitur, & Iesus Naue, uir sanctus, sepultus refertur, & tamen fletus esse non scribitur. Nempe illud, quod in Moyse, idest, in lege ueteri sub peccato Adam, omnes tenebantur elogio, & ad inferos descendentes consequenter lacrymae prosequiebantur, secundum Apostolum, qui ait: Et regnauit mors ab Adam usque ad Moysen, etiam super eos, qui non peccauerunt. In Iesu uero, idest, in euangelio, per quem paradisi est apertus, mortem gaudia prosequuntur, flentesque hodie Iudaei, & nudatis pedibus in cinere uolutati, sacco incubant; ac, ne quid desit, superstitioni, ex ritu uanissimo phariseorum, primum cibum lentis

lentis accipiunt, uidelicet ostendentes, quali edulio primo- *Gen. 28*
genita perdiderint: sed merito: quia in resurrectionem Do-
mini non credentes, antichristi præparantur aduentui. Nos
uero; qui Christum induimus, & facti sumus, iuxta Aposto- *1. Pet. 1*
lum, genus regium & sacerdotale, non debemus super mor- *Leuit. 10*
tuos contristari. Et dixit, inquit, Moyses ad Aaron, & Elea-
zar, & Ithamar filios eius, qui relictæ erant: Caput uest-
rum non denudabitis, & uestimenta uestra non scindetis, ne mo-
riamini, & super omnem synagogam ueniat ira. Nolite, in-
quit, scindere uestimenta uestra, & luctum exhibere gentili, ne
moriamini. Mors nostra peccatum est. Et, quod forsitan cru-
dele alicui uideatur, sed fidei necessarium est, in eodem Le-
uitico scribitur, quo modo sacerdos magnus ad patrem, ma- *Leuit. 21*
trem, fratresque, uel liberos mortuos prohibeatur accede-
re; ne uidelicet anima Dei, sacrificiis uacans, & tota in il-
lius mysteriis occupata, aliquo impediatur affectu. Nonne
aliis uerbis id ipsum in euangelio præcipitur, ut non renun- *Luc. 9*
ciet domui discipulus? ut mortuo patri non exhibeat sepul- *Matth. 8*
turam? Et de sanctis, inquit, non exiet, & non contamina- *Leuit. 21*
bitur sanctificatio Dei eius, quia sanctum oleum unctionis &
Deo super eum est. Certe, postquam credimus in Christum;
& oleo unctionis eius accepto, illum portamus in nobis;
non debemus exire de templo, id est, de proposito Christia-
no; non foras egredi, incredulitati uidelicet gentilium com-
misceri, sed esse semper intrinsecus, id est, uoluntati Do-
mini ministrare. Hæc ideo dicimus; ne ignorantia scri-
pturarum auctoritatem tibi præberet in luctu, & uidereris
rationabiliter errare. Et adhuc sic locutus sum, quasi unam
de turbis conuenerim Christianam. nunc uero, cum sciam
toti te renunciassæ mundo, & abiectis calcatisq. deliciis sæ-
culi; orationi, ieiuniis, lectioni uacare quotidie; cum ad e-
xemplum Abraham cupias exire de terra tua, & de cognata- *Gen. 12*
tione tua, ut, & Chaldæis & Mesopotamia derelictis, ter-
ram repromissionis introeas; cum omnem substantiolam
aut pauperibus dilargita sis, aut filiis ante mortem mundo
mortua dederis: miror te ea facere, quæ si facerent ceteræ,
repre-

reprehensione dignæ uiderentur. Redit tibi in memoriam confabulatio eius, blanditiæ, sermo consortium: & quod his careas, pati non potes. Ignoscimus matris lacrymis, sed modum quærimus in dolore. Si parentem cogito; non reprehendo, quod plangis: si Christianam, & monacham; illis nominibus mater excluditur. Recens uulnus est, & tactus iste, quo blandior, non tam curat, quam exasperat. Attamen, quod tempore mitigandum est, cur ratione non vincitur? Nam & Noemi, famem fugiens in terra Moab, & maritum perdidit, & filios. Et cum suorum auxilio esset destituta, Ruth alienigena ab eius latere non recedit. Vide, quanti meriti sit deserte præstitisse solatium. ex eius semine Christus oritur. Respice Iob, quanta sustinuit; & uidebis te nimium delicatam, illum erectis in cælum oculis, inter ruinas domus, poenas ulceris, innumeras orbitates, & ad extremum uxoris insidias, inuictam tenuisse patientiam. Scio, quod responsura sis, hoc illi quasi iusto ad probationem euenisse. Et tu e duobus elige, quod uelis: aut sancta es, & probaris: aut peccatrix, & iniuste quereris, minora sustinens, quam mereris. Quid uetera replicem? præsentia exempla sectare. Sancta Melania, nostri temporis inter Christianos uera nobilitas, cum qua tibi Dominus, mihiq. concedat in die sua habere partem, calente adhuc mariti corpusculo, & necdum humato, duos simul perdidit filios. Rem sum dicturus incredibilem, sed teste Christo non falsam. Quis illam tunc non putaret more lympatico, sparsis crinibus, ueste conscissa, lacerum pectus inuadere? Lacrymæ gutta non fluxit: stetit immobilis, & ad pedes aduoluta Christi, quasi ipsum teneret, arrisit. Expeditius, inquit, tibi seruitura sum Domine, quia tanto me onere liberaisti. Sed forsitan superatur in ceteris. Quinimmo, qua illos mente contempserit, in unico postea filio probat: cui omni, quam habebat, possessione concessa, ingruente iam hieme Hierosolymam nauigauit. Parce, quæso, tibi, parce filix cum Christo iam regnanti: parce saltem Eustochio tuæ, cuius parua adhuc ætas, & rudis pene infantia, te magi-

magistrante dirigitur. Sæuit nunc diabolus; & quia unam cernit de tuis liberis triumphantem, obtritum se esse condolens, quærit in rimanente uictoriam, quam in præeunte iam perdidit: Grandis in suos pietas, impietas in deum est. Abraham unicum filium lætus interficit; & tu unam de pluribus quereris coronatam? Nō possum sine gemitu eloqui, quod dicturus sum. Cum de media pompa funeris te exanimem referrent, hoc inter se populus musitabat: Nōne illud est, quod sæpius dicebamus? Dolet filiam ieiuniis interfectam, quod non uel de secundo eius matrimonio tenuerit nepores. quousque genus detestabile monachorum non urbe pellitur? non lapidibus obruitur? non præcipitatur in fluctus? Matronam miserabilem seduxerunt: quæ quia monacha esse noluerit, hinc probatur, quod nulla gemitum ita suos umquam fleuerit filios. Qualem putas ad istas uoces Christum habuisse tristitiam? Quo modo exultasse satanam, qui nunc tuam animam eripere festinans, & pii tibi proponens doloris illecebram; dum ante oculos tuos filie semper imago uersatur, cupit matrem simul necare uicticis, & solitudinem sororis inuadere relicte. Non ut terream, loquar, sed, ut mihi testis est Dominus, quasi ante tribunal eius assistens, in hæc te uerba conuenio. Detestanda sunt istæ lacrymæ, plenæ sacrilegio, incredulitate plenissimæ, quæ non habent modum, quæ usque ad uiciniam mortis accedunt. Vlulas, & exclamitas, & quasi quibusdā facibus accensa, quātum in te est, tui semper homicida es. Sed ad talem clemens ingreditur Iesus, & dicit: Quid ploras? Non est mortua puella, sed dormit. Irrideant circumstantes. Ista infidelitas Iudæorum est. Te quoque, si ad sepulcrum filie uolueris uolutari, angelus increpabit: Quid quæris uiuentem cum mortuis? quod quia Maria fecerat Magdalene, postquam uocem Domini se clamantis agnouit, ad eius prouoluta pedes audit: Ne tetigeris me: necdum enim ascendi ad patrem meum. idest, non mereris tangere resurgentem, quem mortuum existimas in sepulcro. Quas nunc existimas Blæfillam nostram pati cruces, quæ

Gen. 22

Matth. 9

Luc. 24

Ioan. 20

ferre

ferre tormenta, quod tibi Christum uideat subiratum? Clamat nunc illa lugenti: si umquam me amasti mater; si tua ubera suxi; si tuis instituta sum monitis; ne inuideas glorie mee; nec hoc agas, ut a nobis in perpetuum separemur. Putas esse me solam? Habeo pro te Mariam, matrem Domini. multas hic uideo, quas ante nesciebam. o quanto
Luc. 2 melior est iste comitatus. habeo Annam, quondam in euangelio prophetantem. & quo magis gaudeas, tantorum annorum labores ego in tribus mensibus consecuta sum. Vnam palmam castitatis accepimus. Misereris mei, quia mundum reliqui? At ego uestri sortem doleo, quos adhuc seculi carcer includit, quos quotidie in acie praeliantes nunc ira, nunc auaritia, nunc libido, nunc uariorum incentiua uiti-
 tiorum pertrahunt ad ruinam. Si uis, ut mater mea sis; cura placere Christo. non agnosco matrem, meo Domino displicentem. Loquitur illa & alia multa, quae taceo; & pro te Dominum rogat, mihi que, ut de eius mente securus sum, ueniam impetrat peccatorum: quod monui, quod hortatus sum, quod inuidiam propinquorum, ut salua esset, excepi. Itaque, dum spiritus hos artus regit, dum uitae huius fruimur commeatu, spondeo, promitto, polliceor, illam mea lingua resonabit, illi mei dedicabuntur labores, illi meum sudabit ingenium: nulla erit pagina, quae non Blasii sonet: quocumque sermonis nostri monumenta peruenierint, illa cum meis opusculis peregrinabitur. hanc in mea mente defixam legent uirgines, uiduae, monachi, sacerdotes. breuis uitae spatium aeterna memoria compensabit. quae cum Christo uiuit in caelis, in hominum quoque ore uictura est. transibit & praesens aetas, sequentur saecula post futura, quae sine amore, sine inuidia iudicabunt. inter Paulam, Eustochiumque nomen media ponetur. numquam in meis moritura est libris: audiet me semper loquentem cum sorore, cum matre.

ARGVMENTVM.

PAMMACHIVS, nobilis, doctusq. iuuenis, Paulinam, Paule, & Texotii filiam, quam habebat uxorem, amisit: qua mortua, se totum Dei cultui, ac Christianæ tradidit uite, opes omnes suas in pauperes, & in Xenodochium, quod Romano in portu construxerat, erogans. nunc mortuam uxorem laudat D. Hieronymus, Pammachiumque, ut in sancto perseveret proposito, docte, eloquenterq. hortatur.

HIERONYMI AD PAMMACHIVM

consolatio super obitu Paulinæ uxoris.

EPISTOLA XXVI.

ANATO uulneri, & in cicatricem superductæ cuti si medicina colorem reddere uoluerit, dum pulchritudinem corporis quærit, plagam doloris inflaurat. ita & ego serus consolator, qui importune per biennium tacui, uereor ne nunc importunius loquar, & attritans uulnus pectoris tui, quod tempore & ratione curatū est, commemoratione exulcerem. Quæ enim aures tam duræ, quæ de silice excisa præcordia, & Hyrcanarum tigrum lacte nutrita, possunt sine lacrymis Paulinæ tuæ audire nomen? quis parturientem rosam, & papillatum corymbum, antequam in calathum fundatur orbis, & tota rubentium foliorum pandatur ambitio, immatiure demessum, æquis oculis marcescere uideat? Fractum est pretiosissimum margaritum. uirens smaragdi gemma contrita est. quid boni habeat sanitas, languor ostendit. Plus sensimus, quod habuimus, postquam habere desuimus. In agro ter Luc. 8
ræ bonæ tres fructus legimus, centesimum, sexagesimum, & tricesimum. In tribus mulieribus, & sanguine & uirtute coniunctis, tria Christi præmia recognosco. Eustochium uirginitatis flores metit. Paula laboriosam uiduitatis arē
terit

terit. Paulina castum matrimonii cubile seruat. Tali filiarum mater sulta comitatu, totum sibi in terris uindicat, quod Christus promisit in celo. Et, ut quadrigam domus una emitteret sanctitatis, & feminarum uirtutibus responderent uiri, additur comes Pammachius, uerum

Ezech. 10. 11 Ezechielis Cherubin, cognatus, gener, maritus, immo frater amantissimus; quia sancta consortia spiritus uocabula non tenent nuptiarum. Huic quadrigæ Iesus præsidet.

Abac. 3 De his equis & Abacuc canit: Ascende super equos tuos, & equitatio tua salus. Impari cursu, pari animo ad palmam tenditur. Discolores equi, sed uoluntate concordēs, unum aurigæ iugum trahunt, non expectantes flagelli uerbera, sed ad uocis hortamenta feruentes. Dicamus aliquid & de philosophis. Quattuor uirtutes describunt Stoici, ita sibi inuicem nexas, & mutuo cohærentes, ut, qui unam non habuerit, omnibus careat, prudentiam, iustitiam, fortitudinem, temperantiam. Has omnes sic habetis singuli, ut tamen emineatis in singulis. Prudentia in te, in matre iustitia, in uirgine fortitudo, in nupta temperantia prædicatur. Quid enim eo sapientius, qui, contempta mundi stultitia, Christum secutus est, Dei uirtutem, & Dei sapientiam? Quid matre iustius, quæ, inter liberos opibus distributis, docuit diuitias contemnendo, quid filii amare deberent? Quid Eustochio fortius, quæ nobilitatis portas, & arrogantiam generis consularis, uirginali proposito fregerit, & in urbe prima primum genus subiugauerit pudicitie? Quid Paulina temperantius? quæ legens illud Apostoli:

Hebr. 13 Honorabiles nuptiæ, & cubile immaculatum: nec sororis felicitatem, nec matris continentiam ausa appetere, maluit in humilioribus tuta pergere, quam pendulo gradu in sublimioribus fluctuare. Quamquam illa, semel inito matrimonio, nihil aliud diebus ac noctibus cogitauerit, nisi ut, reddito fructu nuptiarum, secundum castimonie gradum arriperet; & tanti dux femina facti, uirum proposito suo iungeret, non relinquens salutis comitem, sed expectans. dumq. crebris abortiis, & experta secunditate conceptum,

non

non desperat liberos, & socrus auiditatem, maritiq. tristitiam præponit imbecillitati suæ; passa est aliquid de Rachel exemplo; & pro filio doloris ac dexteræ, uirum desiderii sui peperit heredem. Certisq. auctoribus didici, illam non primæ sententiæ Dei: Crescite & multiplicamini, & replete terram: nec officio coniugali seruire uoluisse, sed ad hoc optasse filios, ut Christo uirgines pareret. Legimus & uxorem sacerdotis Phinees, audita captiuitate arcæ Domini, subito uteri dolore correptam, edidisse filium Ichabod, & inter manus, & officia feminarum, animâ emisisse cum prole. De prima, Benjamin, hoc est filius uirtutis, ac dexteræ, de secunda inclutus sacerdos Dei ex arcæ cognomine nascitur. Nobis, post dormitionem somnumq. Paulinæ, Pammachium monachum Ecclesia peperit posthumum, & patris & coniugis nobilitate patricium, eleemosynis diuitem, humilitate sublimē. Apostolus scribit ad Corinthios: Videte fratres uocationem uestram: quia non multi sapientes, non multi nobiles. Hoc nascentis Ecclesiæ rudimenta poscebant, ut granum sinapis paulatim in arborem cresceret, ut sensim euangelii fermentum totam Ecclesiæ massam altius eleuaret. Nostris temporibus Roma possidet, quod mundus ante nesciuit. Tunc rari sapientes, potentes, nobiles, Christiani: nunc multi monachi sapientes, potentes, nobiles, quibus cunctis Pammachius meus sapientior, potentior, nobilior, magnus in magnis, primus in primis, ἀρχισπέρτης monachorum. Tales Paulina morte sua nobis liberos dedit, quos uiuens concupiuerat possidere. Lætare sterilis, quæ non parit; erumpe, & clama, quæ non parturit; quoniam, quot Romæ sunt pauperes, tot filios repente genuisti. Ardentes gemmæ, quibus antea collum & facies ornabantur, egentium uentres saturant. Vestes sericæ, & aurum in fila lentescens, in mollia lanarum uestimenta mutata sunt, quibus repellatur frigus, non quibus nudentur ambitio. Deliciarum quondam supellectilem uirtus insumit. Ille cæcus extendens manum, & sæpe, ubi nemo est, clamitans, heres Paulinæ, coheres Pammachii est. Illum

Gen. 35

Gen. 9.1

1. Reg. 4

1. Cor. 2

Mar. 4

Luc. 13

1. Cor. 5

Esa. 54

Q truncum

truncum pedibus, & toto corpore se trahentem, teneræ
 puellæ sustentat manus. Fores, quæ prius salutantium tur-
 bas uomebant, nunc a miseris obsidentur. Alius tumentis
 aqualiculo mortem parturit: alius elinguis, & mutus, & ne
 hoc quidem habens unde roget, magis rogat, dum rogare
 non potest. hic debilitatus a paruo, non sibi mendicat sti-
 pē: ille putrefactus morbo regio, superuiuit cadaueri suo.
 Non, mihi si linguæ centum sint, oraq. centum, Omnia
 pœnarum percurrere nomina possim. Hoc exercitu comi-
 tatus incedit, in his Christum confouet, horum sordibus
 dealbatur. Munerarius pauperum, & egentium candida-
 tus, sic festinat ad cælum. Ceteri mariti super tumulos con-
 iugum spargunt uiolas, rosas, lilia, floresq. purpureos, &
 dolorem pectoris his officiis consolantur. Pammachius no-
 ster sanctam fauillam, ossaq. ueneranda, eleemosynæ balsa-
 mis rigat: his pigmentis, atque odoribus fouet cineres quie-
 scentes, sciens scriptum: Sicut aqua extinguit ignem, ita
Eccli.3 eleemosyna peccatum. Quātas uires habeat misericordia,
 & quibus donanda sit præmiis, beatus Cyprianus grandi uo-
Dan.4 lumine prosequitur, & Danielis consilium probat; qui re-
 gem impiissimum, si se audire uoluisset, scit pauperum su-
 stentatione saluandum. Gaudet huiusmodi filix mater he-
 rede. Non dolet opes ad alium peruenisse, quas cernit iis-
 dem, quibus ipsa uoluerat, erogari: quin potius gratulatur,
 absque labore suo sua uota compleri. non enim substantiæ
 diminutio, sed operarii commutatio est. quis enim hoc cre-
 deret, ut consulum pronepos, & Furiani germinis decus, in-
 ter purpuras senatorum, furua tunica pullatus incederet,
 & non erubesceret oculos sodalium, ut deridentes se deri-
Eccli.4 deret? Est confusio, quæ ducit ad mortem: & est confusio,
 quæ ducit ad uitam. Prima uirtus est monachi, contemne-
 re hominum iudicia, & semper Apostoli recordari, dicen-
Gal.1 tis: Si adhuc hominibus placerem, Christi seruus non es-
 sem. Tale quid & Dominus loquitur ad prophetas, quod
Ezech.3 posuerit faciem eorum, quasi urbem æneam, & lapidem
Hier.1 adamantinum, & columnam ferream, ne pauerent ad ini-
 iurias

iurias populi, sed impudentiam subsannantium frontis rigore contererent. Ingenia liberaliter educata, facilius uerecundia, quam metus, superat: & quos tormenta non uincunt, interdum uincit pudor. Non est parum, uirum nobilem, uirum disertum, uirum locupletem, potentium in plateis uitare comitatum, miscere se turbis, adherere pauperibus, rusticis copulari, de principe uulgum fieri. sed quanto humilior, tanto sublimior est. Lucet margaritum in sordibus, & fulgor gemmæ purissimæ etiam in luto radiat: Hoc est, quod Dominus repromisit: Glorificantes me, glorifica- *1.Reg.2*
bo. Alii hoc intelligant de futuro, quando mæror uertetur in gaudium, & transeunte mundo, sanctorum corona non transit. ego & in præsentiarum uideo sanctorum promissa compleri. Antequam Christo tota mente seruiret, notus erat in senatu; sed multi alii habebant insulas proconsulares. Totus orbis huiusmodi honoribus plenus est. Primus erat, sed inter primos. Præcedebat alios dignitate, sed & alios sequebatur. Quamuis clarus honor, uilescit in turba, & apud uiros bonos indignior fit ipsa dignitas, quam multi indigni possident. unde egregie de Cæsare Tullius, Cum quosdam, ait, ornare uoluit, non illos honestauit, sed ornamenta ipsa turpauit. At nunc omnes Christi ecclesiæ Pammachium loquuntur. miratur orbis pauperem, quem hucusque diuitē nesciebat. Quid consulatu illustrius? Annuus honor est, & postquam alius successerit, prior definit. Latent in multitudine lauræ; & triumphum interdum triumphantium sordibus polluantur. Quod ante per manus patricias tradebatur, & sola nobilitas possidebat; quo consul Marius, uictor Numidiæ, Teuthonum, atque Cimbrorum, ob ignobilitatem familiæ putabatur indignus; quod Scipio ultra annos pro uirtute meruit; nunc sola militia possidet, & agrestia dudum corpora fulgens palma circumdat. Plus ergo accipimus, quam dedimus. Parua dimisimus, & grandia possidemus. Cēuplicato fenore Christi *Matth.19*
promissa redduntur. In tali & Isaac quondam agro seuerat, qui paratus ad mortem, ante euangelium euangelicam *Gen.26*
Q 2 porta-

Matth. 19 portauit crucem. Si uis, inquit, perfectus esse, uade, & uende omnia, quæ habes, & da pauperibus, & ueni sequere me. Si uis perfectus esse. Semper grandia in audientium
1. Cor. 7 ponuntur arbitrio. & ideo uirginitatem Apostolus non imperat, quia Dominus disputans de eunuchis, qui se castrassent propter regna cælorum, ad extremum intulit: Qui potest capere, capiat. Non est enim uolentis, neque currentis, sed misereantis Dei. Si uis perfectus esse. Non tibi imponitur necessitas, ut uoluntas præmium consequatur. Si uis ergo esse perfectus, & desideras esse quod propheta, quod Apostoli, quod Christus est: uende, non partem substantiæ, ne timor penuriæ infidelitatis occasio sit, & cum
Act. 5 Anania & Sapphira pereas, sed uniuersa, quæ possides. Cumq. uendideris, da pauperibus, non locupletibus, non superbis: da quo necessitas sustentetur, non quo augeantur opes. Cumq. legeris illud Apostoli, Boui trituranti os
1. Cor. 9 non alligabis: Et; Dignus est operarius mercede sua: Et; Qui altario ministrant, de altario participantur: memento
1. Tim. 6 quoque huius sententiæ: Habêtes uictum, & uestiunt, his contenti sumus. Vbi uideris fumare patinas, & Phasides aues lentis uaporibus decoqui, ubi argenti pondus, ubi feruentes Buricos mannos, comatulos pueros, pretiosas uestes, picta tapetia; ibi ditior est largitore, cui largiendum est. Pars sacrilegii est, rem pauperum dare non pauperibus. Et tamen non est satis perfecto & consummato uiro opes contemnere, pecuniam dissipare, & proicere quod in momento & perdi, & inueniri potest. fecit hoc Crates Thebanus, fecit Antisthenes, fecerunt plurimi, quos uitiosissimos legimus. Plus debet Christi discipulus præstare, quam mundi philosophus, gloriæ animal, & popularis auræ, atque rumorum uenale mancipium. Tibi non sufficit opes contemnere, nisi Christum sequaris. Christum autem sequitur, qui peccata dimittit, & uirtutum comes est. Christum scimus sapientiam. Hic thesaurus in agro scripturarum nascitur: hæc gemma multis emitur margaritis. Sin autem
Deut. 21 adamaueris captiuam mulierem, idest, sapientiam secularem

rem

renā, & eius pulchritudine captus fueris : decalua eam, & il-
lecebras crinium atque ornamenta uerborum cum emor-
tuis unguibus seca. Laua eam prophetali nitro, & tunc re- *Hier. 2*
quiescens cum illa dicito : Sinistra eius sub capite meo, & *Cant. 2*
dextera illius amplexabitur me, & multos tibi fetus captiua
dabit, ac de Moabitide efficietur Israelitis. Christus sancti
ficatio est, sine qua nemo uidebit faciem Dei. Christus re-
demptio, idem redemptor, & pretium. Christus omnia,
ut, qui omnia propter Christum dimiserit, unum inueniat *Psalm. 118*
pro omnibus, & possit libere proclamare : Pars mea Do-
minus. Sentio te diuinis ardere doctrinis, nec temeritate
quorundam docere, quod nescias; sed ante discere, quod
docturus sis. Simples epistolæ tuæ olent prophetas, apo-
stolos sapiunt. Non cothurnatam affectas eloquentiam,
nec more puerorum argutas sententias in clausulis struis.
Cito turgens spuma dilabitur; & quamuis grandis tumor,
contrarius sanitati est. Scitum est illud quoque Catonis :
Sat cito, si sat bene. Quod nos quondam adolescentuli, cū
a perfecto oratore in præfatiuncula diceretur, risimus. Me
minisse te puto erroris mutui, quod omne Athenæū scho-
lasticorum uocibus consonabat : Sat cito, si sat bene. Feli-
ces, inquit Fabius, essent artes, si de illis soli artifices iudica-
rent. Poetam non potest nosse, nisi qui uersum potest strue-
re. Philosophos non intelligit, nisi qui scit dogmatum ua-
rietates. Manu facta & oculis patientia, magis probant arti-
fices. Nostra quam dura sit necessitas, hinc potes animad-
uertere, quod uulgi standum est iudicio, & ille in turba me-
tuendus, quem cum uideris solum, despicias. Hoc præte-
riens tetigi, ut eruditus contentus auribus, non magnopere
cures, quid imperitorum de ingenio tuo rumusculi iactitēt,
sed prophetarum quotidie medullas bibas, Christi mystes,
patriarcharum symmystes. Siue legas, siue scribas, siue ui-
giles, siue dormias, amor tibi semper buccina in auribus so-
net : hic lituus excitet animam tuam : hoc amore furibun-
dus, quære in lectulo tuo quem desiderat anima tua, & lo-
quere confidenter : Ego dormio, & cor meum uigilat, Cūq; *Cant. 3. 5*

Q 3 inue-

- inueneris eum, & tenueris, ne dimittas: & si paucillū dormitanti elapsus fuerit e manibus, noli protinus desperare.
- Cant. 2** Egredere in plateas, adiura filias Hierusalem: reperies eū
- Cant. 1. 5** cubantem in meridie, lassum, ebrium, noctis rore madefactum, inter greges sodalium, in aromatum uarietatibus, inter poma paradisi. ibi ei da mammillas tuas; fugat de erudito pectore, & requiescat inter medios cleros pennæ columbæ deargentatæ, & interiora eius in fulgore auri. Paru-
- Psal. 67** lus iste, & puer, qui butyro, & melle saginatur, qui inter caseatos nutritus est montes, cito crescit in iuuenem, uelociter in te hostes spoliatur, maturæ prædatur Damascum, & regem uincit Assyrium. Audio te Xenodochium in portu fecisse Romano, & uirgam de arbore Abraham in Ausonio plantasse litore. Quasi Aeneas noua castra metaris; & super undam Tiberis, ubi ille cogente quondam pænuria, cruentis fatalibus & quadris patulis non pepercit, tu uiculum nostrum, idest, domum panis ædificas, & diuturnam famem repentina saturitate compensas. Euge, nostra initia transgrederis: statum summū tenes: de radice peruenis ad cacumen: primus inter monachos, in prima urbe, primum sequeris patriarcham. Lot, qui interpretatur declinans, campetria eligat, & iuxta Pythagoræ litteram, facilia magis ac sinistra sectetur. Tu in arduis & saxosis cum Sara
- Gen. 23** ra tibi monumentum para. Iuxta sit ciuitas litterarum: de
- Ios. 15** letisq. gygantibus, filiis EnaKim, hereditatem tuam gaudium & risus excipiat. Diues erat Abraham auro, argento, pecore, possessione, uestibus: tantam habebat familiam,
- Num. 13** ut ad subitos nuncios, iuuenibus electis, armare posset exercitum, & quattuor reges, quos quinque reges fugerant, in Dan consecutus occideret: & tamen post tam crebra hospitalitatis officia, dum non refutat homines, suscipere meruit Deum. Non seruis, & ancillis imperabat, ut ministrarent hospitibus: nec bonum, quod exercebat, per alios minuit; sed, quasi reperta præda, cum Sara sua humanitati solus incubuit. ipse pedes lauit: ipse pinguem uitulum portauit humeris de armento. stetit ut seruus peregrinis

nis

nis prandentibus; & Saræ manibus coctos cibos ieiunaturus apposuit. Hæc moneo, frater carissime, pietate, qua te diligo; ut non solum pecuniam, sed & te ipsum Christo offeras, hostiam uiuam, sanctam, placentem Deo, ratio *Rom. 12* nabile obsequium tuum; & imiteris filium hominis, qui non uenit ministrari, sed ministrare: &, quod patriarcha *Matth. 20* alienis, hoc discipulis, & seruis magister exhibuit, & do- *Ioan. 13* minus. Corium pro corio, & omnia, quæ homo possidet, dare potest pro anima sua. Sed tange, inquit diabolus, carnes eius, nisi in faciem benedixerit tibi. Scit hostis antiquus, maius continentia, quam nummorum, esse certamen. Facile abiicitur, quod hæret extrinsecus: intestinum bellum periculosius est: cõiuncta disglutinamus, unita diffuimus. Zachæus diues erat, apostoli pauperes. Red- *Luc. 19* didit ille quadruplum, quod rapuerat; diuisitq. pauperibus medietatem substantiæ suæ, quæ remanserat: suscepit Christum hospitem: salus facta est domui eius; & tamen, quia paruulus erat, & apostolicæ proceritati se non poterat extendere, non fuit in duodecim numero apostolorum. apostoli autem, quantum ad diuitias, nihil, quantum ad uoluntatem, totum mundum pariter reliquerunt. Si offeramus Christo opes cum anima nostra, libenter suscipiet; si autē, quæ foris sunt, Deo, quæ intus sunt, diabolo demus: non est æqua partitio; & dicitur nobis: Nonne, si recte offeras, & non recte diuidas, peccasti? Quod patricii generis, primus inter primos monachos esse cœpisti; non tibi sit tu moris, sed humilitatis occasio, scienti filium Dei factum filium hominis. Quantumcumque te deieceris, humilior Christo non eris. Esto, incedas nudis pedibus: fusca tunica uestiaris: æqueris pauperibus: inopum cellulas dignanter introeas: cæcorum oculus sis, manus debiliū, pes claudorum: ipse aquam portes, ligna concidas, focū exstruas: ubi uincula? ubi alapæ? ubi sputa? ubi flagella? ubi patibulum? ubi mors? Et, cum omnia, quæ dixi, feceris, ab Eustochio tua, Paulaq. uinceris, si non opere, certe sexu. Ego quidem Romæ nō eram, & tunc me tenebat eremus,

Q 4 atque

atque utinam pertenuisset, quando, focero tuo uiuente **T**o-
 xotio, sæculo seruebant: sed tamen audio, quæ immundi-
 tias platearum ferre non poterant, quæ eunuchorum ma-
 nibus portabantur, & inæquale solum molestius transcen-
 debant, quibus serica uestis oneri erat, & solis calor incen-
 dium; nunc sordidatæ, & lugubres, & sui comparatione
 forticulæ, uel lucernas concinnant, uel succendunt focum,
 pauimenta uerrunt, mundant legumina, holerum fascicu-
 los in feruentem ollam deiiciunt, apponunt mensas, cali-
 cès porrigunt, effundunt cibos, huc illucq. discurrunt. Et
 certe magnus uirginum chorus cum illis habitat. num hu-
 iuscemodi ministeria aliis imperare non poterant? sed no-
 lunt uinci ab his labore corporum, quas ipsæ superant uir-
 tute animi. Hæc dico, non quod de ardore mentis tuæ
 quidquam dubitem, sed quo currentem impellam, & acri-
 ter dimicanti feruorem fauore augeam. Nos in ista prouin-
 cia ædificato monasterio, & diuersorio propter extructo,
 ne forte & modo Ioseph cum Maria in Bethlehem ueniēs
 non inueniat hospitium, tantis de toto orbe confluentibus
 turbis obruimur monachorum, ut nec cœptum opus dese-
 rere, nec supra uires ferre ualeamus: unde, quia pene nobis
 illud de euangelio contigit, ut futuræ turris non ante com-
 putaremus expēsas, compulsi sumus fratrem Paulinianum
 ad patriam mittere, ut semirutas uillulas, quæ barbarorum
 effugerunt manus, & parentum communium census uen-
 deret; ne cœptum sanctorum ministerium deferentes, ri-
 sum maledicis & æmulis præbeamus. In calce epistolæ re-
 cordatus sum, quadrigæ uestre & proposito quintam dees-
 se Blæfillam, pene oblitus de ea loqui, quæ prima de uo-
 bis præcessit ad Dominum. Vere nunc quinque in tres,
 ac duas uidemus esse diuisas. illa cum sorore Paulina dolci
 somno fruitur: tu, duarum medius, ad Christum leuius
 subuolabis.

ARGV-

ARGVMENTVM.

PAVLA, nobilissima matrona Romana, patre Rogato, matre Blasilla, ex Corneliorum, & Gracchorum familiis orta, Toxotio nupsit; ex eoq. quattuor edidit filias, Blasillam, Paulinam, Eustochium cognomento Iuliam, & Ruffinam, & preter has Toxotium etiam filium. viro mortuo, se totam in obsequium Christi tradens, a Paulino, & Epiphanio episcopis docta, monache uitam profiteri cepit. uixit in hoc proposito Rome annos quinque: mox Hierosolymam profecta, in Bethlehemi consedit: ubi cum pro uiris, tum pro mulieribus uirginibus monasteriis conditis, annis uiginti sanctissime uixit. nunc eius uitam D. Hieronymus scribit, & Eustochium filiam, quae post eam monasterii praeses relicta est, consolatur,

AD EVSTOCHIVM VIRGINEM

epitaphium Paulae matris.

EPISTOLA XXVII.

Si cuncta corporis mei membra uerterentur in linguas, & omnes artus humana uoce resonarent; nihil dignum sanctae ac uenerabilis Paulae uirtutibus dicerem. Nobilis genere, sed multo nobilior sanctitate; potens quondam diuitiis, sed nunc Christi paupertate insignior. Gracchorum stirps, soboles Scipionum, Pauli heres, cuius uocabulum trahit, Martiae Papiriae, matris Africani, uera & germana progenies. Romae praetulit Bethlehem; & auro tecta fulgentia informis luti uilitate mutauit. Non mæremus, quod talem amisimus; sed gratias agimus, quod habuimus; immo habemus. Deo enim uiuunt omnia; & quidquid reuertitur ad Dominum, in familiae numero computatur. Quamquam amissio illius, caelestis domus habitatio sit: quae quamdiu in corpore fuit, 2. Cor. 9 peregrinata est a Domino; & uoce semper flebili querebatur, dicens: Heu mihi, quia peregrinatio mea prolongata Psal. 119 est,

est, habitavi cum habitantibus Cedar, multum peregrinata est anima mea. Nec mirum, si planxerit se uersari in tenebris, (hoc enim Cedar interpretatur) cum mundus in
1. Ioan. 5 maligno positus sit; & sicut tenebræ illius, ita & lumen
Psal. 138 eius, luxq. in tenebris luceat, & tenebræ eam non comprehendunt. Vnde & illud crebrius inferebat: Aduenā
Psal. 38 sum, & peregrina, sicut omnes patres mei. Et iterum: Cu
Philipp. 1 pio dissolui, & esse cum Christo. Quoties autem infirmitate corpusculi, quam incredibili abstinentia, & duplicatis contraxerat ieiuniis, uexabatur, hoc in ore uoluebat:
1. Cor. 9 Subiicio corpus meum, & in seruitutem redigo; ne aliis
Rom. 14 prædicans, ipsa reprobā inueniar. Et: Bonum est uinum
Psal. 34. 40. 31 non bibere, & carnem non manducare. Et: Humiliaui in ieiunio animam meam. & Totum lectum meum uersasti in infirmitate mea. & Versata sum in miseria, dum mihi cōfigitur spina. Atque inter doloris aculeos, quos mira patientia sustinebat, quasi apertos sibi cælos aspiceret, loquebatur: Quis dabit mihi pennas, sicut columbæ: & uolabo, & requiescam? Testor Iesum, & sanctos eius, ipsumq. proprium angelum, qui custos fuit, & comes admirabilis femine, me nihil in gratiam, nihil more blandientium loqui, sed, quidquid dicturus sum, pro testimonio dicere, & minus eius esse meritis, quam totus orbis canit, sacerdotes mirantur, uirginum chori desiderant, monachorum, & pauperum turbæ deplangunt. Vis, lector, eius breuiter scire uirtutes? Omnes suos pauperes pauperior ipsa dimisit. Nec mirum, de proximis, & familiola, quam in utroque sexu de seruis & ancillis, in fratres sororesq. mutaue rat, ista proferre; cum Eustochium uirginem, & deuotam Christo filiam, in cuius consolationem libellus hic cuditur, procul a nobili genere, sola fide & gratia diuitem reliquerit. Carpat igitur narrandi ordinem. Alii altius repetant, & a cunabulis eius, ipsisque, ut ita dicam, crepundiis matrem Blæfillam, & Rogatum proferant patrem: quorum altera Scipionum, Gracchorumque, progenies est; alter per omnes fere Græcias usque hodie stemmatibus, & diuitiis,

uitiis, ac nobilitate Agamemnonis fertur sanguinem trahere, qui decennali Troiam obsidione deleuit. nos nihil laudabimus, nisi quod proprium est, & de purissimo sanctæ mentis fonte profertur. Quamquam Dominus atque saluator in euangelio doceat apostolos, sciscitantes quid sibi redditurus sit, qui omnia sua pro nomine eius dimiserunt, centuplum in præsentiarum recepturos, & in futuro uitam æternam. Ex quo intelligimus, non laudis esse, possidere diuitias, sed pro Christo eas contemnere, non timere ad honores, sed pro Dei fide eos paruipendere. Vere, quod pollicitus est seruis suis & ancillis saluator, reddidit in præsentem. nam quæ unius urbis contempsit gloriam, totius orbis opinione celebratur: quam Romæ habitantem nullus extra Romam nouerat, latentem in Bethlehem & barbara & Romana terra miratur. Cuius enim gentis homines ad sancta loca non ueniunt? quis autem in sanctis locis, præter Paulam, quod plus inter homines miraretur, inuenit? Hæc, sicut inter multas gemmas pretiosissima gemma micat, & iubar solis paruos igniculos stellarum obruit, & obscurat; ita cunctorum uirtutes & potentias sua humilitate superauit; minimaq. fuit inter omnes, ut omnium maior esset; & quanto se plus deiciebat, tanto magis a Christo subleuabatur. latebat, & non latebat. fugiendo gloriam, gloriam merebatur; quæ uirtutem quasi umbra sequitur, & appetitores sui deferens appetit contemptores. Sed quid ago, narrandi ordinem prætermittens? dum in singulis teneor, non seruo præcepta dicendi. Tali igitur stirpe generata, iuncta est uiro Toxotio, qui Aenæ & Iuliorum altissimum sanguinem trahit. unde etiam filia eius Christi uirgo Eustochium Iulia nuncupatur, & ipse, Iulius a magno demissum nomen Iulo. Et hæc dicimus, non quod habentibus grandia sint, sed quo contemnenti-
bus mirabilia. Sæculi homines suspiciunt eos, qui his pol-
lent priuilegiis: nos laudamus, qui pro saluatore ista despe-
xerint: & mirum in modum, quos habentes paruipendi-
mus, si habere noluerint, prædicamus. His, inquam,

Mar. 10

Matth. 19

orta

orta maioribus, & fecunditate ac pudicitia probata, primum uiro, deinde propinquis, & totius urbis testimonio, cum quinque liberos edidisset, Blæfillam, super cuius morte eam Romæ consolatus sum; Paulinam, quæ sanctum, & admirabilem uirum, & propositi & rerum suarum Pam-machium reliquit heredem, ad quem super obitu eius paruulum libellum edidimus; Eustochium, quæ nunc in sanctis locis uirginitatis & Ecclesiæ monile pretiosum est; Rufinam, quæ immaturo funere pium matris animum consternauit; & Toxotium, post quem parere desuit; ut intelligeres eam non diu seruire uoluisse officio coniugali, sed mariti desiderio, qui marem optabat, liberos edidisse; postquam uir mortuus est, ita eum planxit, ut prope ipsa moreretur; ita se cōuertit ad Domini seruitutem, ut eius mortem uideretur optasse. Quid ego referam, amplæ & nobilis domus, & quondam opulentissimæ, omnes pene diuitias in pauperes erogatas? quid in cunctos clementissimum animum, & bonitatem etiam in eos, quos numquam uiderat, euagantem? quis inopum moriens non illius uestimentis obuolutus est? quis clinicorum non eius facultatibus sustentatus est? quos curiosissime tota urbe perquirēs, damnum putabat, si quisquam debilis & esuriens cibo sustentaretur alterius. Spoliabat filios, & inter obiurgantes propinquos, maiorem se eis hereditatem, Christi misericordiam, dimittere loquebatur. Nec diu potuit excelsi apud sæculum generis, & nobilissimæ familiæ uisitationes & frequentiam sustinere. Mærebat honore suo, & ora laudantium declinare ac fugere festinabat. cumq. orientis & occidentis episcopos ob quasdam ecclesiarum dissensiones Romam imperiales litteræ contraxissent, uidit admirabiles uiros, Christi q. pontifices, Paulinum Antiöchenæ urbis episcopum; & Epiphanium, Salaminæ Cypri, quæ nunc Constantia dicitur: quorum Epiphanium etiam hospitem habuit; Paulinum, in aliena manentem domo, quasi proprium humanitate possedit. quorum accensa uirtutibus, per momenta patriam deserere cogitabat. non domus, nō liberorum,

liberorum , non familiæ , non possessionum , non alicuius rei , quæ ad sæculum pertinet , memor , sola , si dici potest , & incommutata ad eremum Antoniorum , atque Paulorum pergere gestiebat . tandemque , exacta hieme , aperto mari , redeuntibus ad ecclesias suas episcopis , & ipsa uoto cum eis ac desiderio nauigauit . Quid ultra differo ? descendit ad portum , fratre , cognatis , affinibus , & , quod his maius est , liberis prosequentibus , & clementissimam matrem pietate uincere cupientibus . Iam carbasa tendebantur , & remorū ductu naui in altū protrahebatur . paruus Toxotius supplices manus tendebat in litore . Ruffina iam nubilis , ut suas expectaret nuptias , tacens fletibus obsecrabat . & tamen illa siccos tendebat ad cælum oculos , pietatem in filios pietate in Deum superans . Nesciebat se matrem , ut Christi probaret ancillam . Torquebantur uiscera , & , quasi a suis membris distraheretur , cum dolore pugnabat ; in eo cunctis admirabilior , quod magnam uinceret caritatem . Inter hostium manus & captiuitatis duram necessitatem nihil crudelius est , quam parentes a liberis separari . hoc contra iura naturæ plena fides patiebatur , immo gaudens animus appetebat ; & amorem filiorum maiore in Deum amore contemnens , in sola Eustochio , quæ & propositi & nauigationis eius comes erat , acquiescebat . Sulcabat interim naui mare ; & cunctis , qui cum ea uehebantur , litora respicientibus , ipsa auersos tenebat oculos ; ne uideret , quos sine tormento uidere non poterat . Fateor , nulla sic amauit filios , quibus , antequam proficisceretur , cuncta largita est , exheredans se in terra , ut hereditatem inueniret in cælo . Delata ad insulam Pontiam , quam clarissimæ quondam seminarum , sub Domitiano principe pro confessione nominis Christiani , Flauie Domitillæ nobilitauit exilium ; uidensq. cellulas , in quibus illa longum martyrium duxerat , sumptis fidei alis , Hierosolymam & sancta loca uidere cupiebat . Tardi erant uenti , & omnis pigra uelocitas . Inter Scyllam , & Charybdim Adriatico se credens pelago , quasi per stagnū uenit Methonem : ibiq. refocillato corpusculo ,

lo, Et sale tabentes artus in litore ponens, Per Maleam,
 & Cytheram sparsasq. per æquor Cycladas, & crebris fre-
 ta concita terris; post Rhodum & Lyciam tandem uidit Cy-
 prum: ubi sancti & uenerabilis Epiphanii pedibus prouolu-
 ra, decem ab eo diebus retenta est, non in refectionem, ut
 ille arbitrabatur, sed in opus Dei, ut re comprobatum est.
 nam omnia illius regionis lustrans monasteria, prout po-
 tuit, refrigeria sumptuum fratribus dereliquit, quos amor
 sancti uiri de toto illuc orbe conduxerat. Inde breui cursu
 transfretauit Seleuciam; de qua ascendens Antiochiam,
 sancti confessoris Paulini modicum caritate detenta, media
 hieme, calente ardore fidei, femina nobilis, quæ prius eu-
 nuchorum manibus portabatur, asello sedes profecta est.
 Omitto Cœles Syriæ & Phœnices iter: (neque enim ho-
 dæporicon eius disposui scribere) ea tantum loca nomina-
 bo, quæ sacris uoluminibus continentur. Beryto Roma-
 na colonia, & antiqua urbe Sydona derelicta, in Sareptæ li-
 tore Helix est ingressa turriculam: in qua adorato Domi-
 no saluatore, per arenas Tyri, in quibus genua Paulus fixit,
 peruenit ad Coth, quæ nunc Ptolemais dicitur; & per cā-
 pos Mageddo, Iosæ necis conscios, intrauit terram Phi-
 listiim. Mirata ruinas Dor, urbis quondam potentissimæ,
 & uersa uice Stratonis turrin ab Herode rege Iudæ in ho-
 norem Cæsaris Augusti Cæsaream nuncupatam, in qua
 Acl. 10. 21 Cornelii domum, Christi uidit ecclesiam, & Philippi ædi-
 culas, & cubicula quattuor uirginum prophetarum. dein-
 de Antipatrida semirutum opidulum, quod de patris nomi-
 ne Herodes uocauerat; & Lyddam uersam in Diospolim,
 Acl. 9 Dorcadis atque Aenæ resurrectione ac sanitate inclutam.
 Mar. 15 Haud procul ab ea Arimathiam uiculum Ioseph, qui Do-
 1. Reg. 21. 22 minum sepeliuit; & Nobe, urbem quondam sacerdotum,
 nunc tumulum occisorum. Ioppen quoque, fugientis por-
 Ion. 1 tum Ionæ, & (ut aliquid perstringam de fabulis poetarum)
 religatæ ad saxum Andromades spectatricem. Repetitoq.
 itinere Nicopolim, quæ prius Emaus uocabatur, apud quā
 Luc. 24 in fractione panis cognitus Dominus, Cleopæ domum
 in

in ecclesiam dedicauit. Atque inde proficiscens, ascendit Bethoron inferiorem & superiorem, urbes a Salomone cōditas, sed uaria postea bellorum tempestate deletas; ad dexteram aspiciens Haialon, & Gabaon, ubi Iesus, filius Naue, contra quinque reges dimicans, soli imperauit, & lunæ; & Gabaonitas ob dolos & insidias fœderis impetrati, in aquarios lignariosq. damnauit. In Gabaon, urbe usque ad solum diruta, paululum substitit, recordata peccati eius, & concubinæ in frustra diuise, & tribus Benjamin trecentos uiros propter Paulum apostolū referuatos. Quid diu moror? Ad laeuam mausoleo Helenæ derelicto, quæ Adiabenorū regina in fame populum frumento iuuerat, ingressa est Hierosolymam, urbē trinominem, Iebus, Salē, Hierusalem, quæ ab Helio postea Hadriano de ruinis, & cineribus ciuitatis in Heliam suscitata est. Cumq. proconsul Palæstinæ, qui familiam eius optime nouerat, præmissis apparitoribus iussisset parari prætorium, elegit humilem cellulam; & cuncta loca tanto ardore ac studio circumuiuit, ut, nisi ad reliqua festinaret, a primis non posset abduci. prostrataq. ante crucem, quasi pēdentem Dominum cerneret, adorabat. Ingressa sepulcrum, resurrectionis osculabatur lapidem, quem ab ostio monumenti amouerat angelus: & ipsum corporis locum, in quo Dominus iacuerat, quasi sitiens desideratas aquas, fidei ore lambebat. Quid ibi lacrymarum, quantum gemituum, quid doloris effuderit, testis est cuncta Hierosolyma, testis est ipse Dominus, quem rogabat. Inde egrediens ascendit Sion, quæ in arcem uel speculam uertitur. Hanc urbem quondam expugnauit & rexdificauit Dauid. De expugnata scribitur: Væ tibi ciuitas Ariel, idest, leo Dei: & quondam fortissima, quam expugnauit Dauid. Et de ea, quæ ædificata est, dictum est: Fundamenta eius in montibus sanctis: diligit Dominus portas Sion, super omnia tabernacula Iacob. Non eas portas, quas hodie cernimus in fauillam & cinerem dissolutas, sed portas, quibus non præualet infernus, & per quas creditum ad Christum ingreditur multitudo. Ostendebatur illi columna,

2. Par. 8

Ios. 9. 10

Iud. 19. 20

Matth. 28

2. Reg. 5

Esa. 29

Psal. 86

Matth. 16

columna, Ecclesiæ porticum sustinens, infecta cruore Domini, ad quam uinctus ducitur & flagellatur. Monstrabatur locus, ubi super centum uiginti credentium animas spiritus sanctus descendisset, ut Iohelis uaticinium compleretur. Deinde, pro facultatula sua pauperibus atque conseruis pecunia distributa, perrexit Bethlehem, & in dextera parte itineris stetit ad sepulcrum Rachel, in quo mater Beniamin, non, ut uocauerat moriens, Benoni, hoc est, filius doloris mei, sed, ut pater prophetauit in spiritu, filium dextræ procreauit. Atque inde Bethlehem ingressa, & in specum saluatoris introiens, postquam uidit sacrum uirginis diuerforiū, & stabulū in quo agnouit bos possessorem suū, & asinus præsepe Domini sui, ut illud impleretur, quod in eodem propheta scriptum est: Beatus, qui seminat super aquas, ubi bos & asinus calcant: me audiente iurabat, cernere se oculis fidei infantem pannis inuolutum, uagientem in præsepe Dominum, Magos adorantes, stellam fulgentem desuper, matrem uirginem, nutrimum sedulum, pastores nocte uenientes, ut uiderent uerbum, quod factū erat, & iam tunc euangelistæ Ioannis principium dedicarent: In principio erat uerbum, & uerbum caro factum est: Paruulos interfectos, Herodem seuientem, Ioseph & Mariam fugientes in Aegyptum. Mixtisq. gaudio lacrymis, loquebatur: Salue Bethlehem, domus panis, in qua natus est ille panis, qui de cælo descendit. Salue Ephrata regio uberissima, atque καρποφόρε, cuius fertilitas Deus est. De te quōdam Michæas uaticinatus est. Et tu Bethlehē domus Ephrata, non minima es in millibus Iuda. Ex te mihi egredietur, qui sit princeps in Israel, & egressus eius ab initio a diebus æternitatis. Propterea dabis eos usque ad tempus parientis. Pariet, & reliquæ fratrum eius conuertentur ad filios Israel. In te enim natus est princeps, qui ante luciferum genitus est, cuius de patre natiuitas omnem excedit ætatem, Et tamdiu in te Dauidici generis origo permansit; donec uirgo pareret; & reliquæ populi credētis in Christum, conuerterentur ad filios Israel, & libere prædicarent: Vobis oportet

oportebat primum loqui uerbum Dei : sed quoniam repu-
 listis illud , & indignos uos iudicastis æternæ uitæ , ecce con-
 uertimur ad gentes . Dixerat enim Deus : Non ueni nisi ad *Matth. 18*
 oues perditas domus Israel . Et eo tempore Iacob super eo
 uerba completa sunt : Non deficiet princeps ex Iuda , & dux *Gen. 49*
 de fermoribus eius ; donec ueniat , cui repositum est , & ipse
 erit expectatio gentium . Bene Dauid iurabat , bene uota fa-
 ciebat , dicens : Si introiero in tabernaculum domus meæ ; *Psal. 131*
 si ascendero in lectum strati mei ; si dederò somnum oculis
 meis , & palpebris meis dormitationem , & requiem tem-
 poribus meis ; donec inueniam locum Domino , tabernacu-
 lum Deo Iacob . Et statim , quid desideraret exposuit , at-
 que oculis prophetalibus , quæ nos uenisse iam credimus ,
 ille uenturum esse cernebat . Ecce audiuius eum in Ephra-
 ra , inuenimus eum in campis siluæ . Vau quippe sermo He-
 braicus , ut te docente didici , non Mariam matrem Domi-
 ni , hoc est , *αυτη* , sed ipsum , id est , *αυτον* , significat . unde loquitur cōfidenter : Introibimus in tabernaculum eius ,
 adorabimus in loco ubi steterunt pedes eius . Et ego mise-
 ra , atque peccatrix , digna sum iudicata deosculari præsepe ,
 in quo Dominus paruulus uaguit ? orare in spelunca , in qua
 uirgo puerpera Dominū fudit infantē ? Hæc requies mea :
 quia Domini mei patria est . hic habitabo : quoniam salua-
 tor elegit eam . Paraui lucernam Christo meo : anima mea
 illi uiuet , & semen meum seruiet ipsi . Haud procul inde de-
 scendit ad turrin Ader , id est , gregis : iuxta quam Iacob pa-
 uit greges suos , & pastores nocte uigilantes audire me-
 ruerunt : Gloria in excelsis Deo , & super terram pax ho- *Luc. 2*
 minibus bonæ uoluntatis . Dumq. seruant oues , in-
 uenerunt agnum Dei puro & mundissimo uellere , quod
 in ariditate totius terræ cælesti rore complutum est ; & *Iud. 6*
 cuius sanguis tulit peccata mundi , & exterminatorem
 Aegypti , litus in postibus fugauit . statimque concito gra- *Exo. 12*
 du , cœpit per uiam ueterem pergere , quæ ducit Ga-
 zam , ad potentiam , uel ad diuitias Dei , & tacita secum
 uoluere , quo modo Eunuchus Aethiops gentium populos *Act. 8*

R præ-

præfigurans mutauerit pellem suam : & dum uetus religio
instrumentū, fontem reperit euangelii . Atque inde ad dex-
teram , transita Bethsur , uenit Escol , quæ in botrum uer-
titur . Vnde in testimonium terræ fertilissimæ , & in typum
Esa. 63 eius qui dicit : Torcular calcaui solus , & de gentibus non
Ios. 2 est uir mecum : exploratores botrum miræ magnitudinis
Gen. 18 portauerunt . Nec post longum spatium intrauit Saræ cel-
lulas , uidens incunabula Isaac , & uestigia quercus Abra-
Ioan. 8 ham , sub qua uidit diem Christi , & lætatus est . Atque in-
Ios. 14. 15 de confurgens , ascendit Chebron : hæc est Cariath arbe ,
Iud. 1 idest , opidum uirorum quattuor , Abraham , Isaac , Ia-
cob , & Adam magni , quem ibi conditum , iuxta librum
Iesu Naue , Hebræi autumant : licet plerique Caleb quar-
tum putent , cuius ex latere memoria monstratur . His in-
Ios. 15 spectis , noluit pergere ad Cariathsephor , idest , uiculum
litterarum : quia contemnens occidentem litteram , repe-
rerat spiritum uiuificantem . Magisq. mirabatur superio-
Iud. 1 res & inferiores aquas , quas Othoniel filius Iephone Ke-
naz pro australi terra & arida possessione susceperat ; & qua-
rum ductu siccos prioris instrumenti agros faciebat irri-
guos ; ut redemptionem ueterum peccatorum in aquis bap-
tismi reperiret . Altera die , orto iam sole , stetit in super-
cilio Caphar Barucha , idest , uillæ benedictionis : quem ad
Gen. 18 locum Abraham Dominum persecutus est . Vnde latam
despiciens solitudinem , ac terram quondam Sodomæ , &
Gomorræ , Adamæ , & Seboim , contemplata est balsa-
Esa. 15 mi uineas in Engaddi , & Segor uitulam conternantem ,
quæ prius Bala uocabatur : & in Zoaram , idest , paru-
lam , Syro sermone translata est . Recordabatur speluncæ
Gen. 19 Lot ; & uersa in lacrymas , uirgines socias admonebat , ca-
uendum esse uinum , in quo est luxuria , cuius opus Moa-
Cant. 1 bitæ sunt , & Ammonitæ . Diu hæreo in meridie , ubi spō-
Gen. 43 sa cubantem reperit sponsum , & Ioseph inebriatus est cum
fratribus suis . Reuertar Hierosolymam , & per Thecuam
atque Amos rutilantem montis Oliueti lucem aspiciam ,
Act. 1 de quo saluator ascendit ad patrem . In quo per annos sin-
gulos

gulos uacca ruffa in holocaustum Domino cremabatur, & Num. 19
cuius cinis expiabat populum Israel: in quo, iuxta Eze-
chielem, Cherubim de templo transmigrantes, Ecclesiam Exe. 10
Domini fundauerunt. Post ingressa sepulcrum Lazari, Ma-
riæ & Marthæ uidit hospitium, & Bethphage uillam sacer- Matth. 21
dotalium maxillarum, & locum, in quo pullus lasciuiens Luc. 19
gentium, Dei frena suscepit; apostolorumq. stratus uesti-
bus, mollia terga præbuit ad sedendum. Rectoq. itinere
descendebat Hiericho, recogitans illum de euangelio uul- Luc. 10
neratum, ac sacerdotibus & leuitis, mentis feritate præte-
reuntibus, clementiam Samaritæ, idest custodis; qui semi-
necem suo iumento impositum, ad stabulum ecclesiæ de-
portauit. Et locum Adomim, quod interpretatur sangui-
num, quia multus in eo sanguis crebris latronum fundeba-
tur incurfibus. Et arborem sycomorum Zachæi, idest, bo Luc. 19
na penitentiae opera, quibus cruenta dudum, & noxia ra-
pinis, peccata calcabat, excelsumq. Dominum de excelsis
uirtutum intuebatur. Et iuxta uiam cæcorum loca, qui, re- Matth. 9
ceptis luminibus utriusque populi credentis, in Dominum
sacramenta præmiserant. Ingressa Hiericho, uidit urbem,
quam fundauit Hiel in Abiram primogenito suo, & cuius 3. Reg. 16
portas posuit in Segub nouissimo filiorum. Intuita est ca-
stra Galgæ, & acruum præputiorum, & secundæ circum Ios. 6. 3
cisionis mysterium: & duodecim lapides, qui de Iordanis
illuc translati alueo, duodecim apostolorum fundamenta
firmauerant: & fontem quodam legis amarissimum & steri-
lem, quem uerus Helisæus sua condidit sapientia, & in dul 4. Reg. 2
corem ubertatemq. conuertit. Vix nox transierat, feruen-
tissimo æstu uenit ad Iordanem. Stetit in ripa fluminis, &
orto sole, solis iustitiæ recordata est, quo modo in medio Ios. 3
amnis alueo sicca sacerdotes posuerint uestigia; & ad He-
liæ & Helisæi imperium, stantibus ex utraque parte aquis, 4. Reg. 2
iter nuda præbuerit; pollutasq. diluuium aquas, & totius hu-
mani generis interfectione maculatas, suo Dominus mun-
dauit baptismo. Longum est, si uelim de ualle Achor Ios. 7
dicere, idest, tumultus atque turbarum, in qua furtum &

R 2 auaritia

- Gen.* 28 auaritia condemnata est : & de Bethel domo Dei, in qua super nudam humum nudus & pauper dormiuit, Iacob :
Zach. 3 & posito subter caput lapide, qui in Zacharia septem oculos habere describitur, & in Esaia lapis dicitur angularis, uidit scalā usque ad cælū tendētem, in qua Dominus desuper innitebatur, ascendentibus porrigens manū, & negligentes de sublimi præcipitās. Sepulcra quoque in monte Ephraim
Ios. 24 Iesu filii Naue, & Eleazari filii Aarō sacerdotis, e regione uenerata est : quorū alter cōditus est in Tamnathsare a septentrionali parte montis Gaas, alter in Gabaa filii sui Phinees : fatiq. mirata est, quod distributor possessionum sibi montana & aspera delegisset. Quid narrem Silo, in quo altare dirutum hodieq. monstratur, & raptum Sabinarum a Romano
Iud. 21 mulo tribus Beniamitica præcucurrit : Transiuit Sichem, non, ut plerique errantes legunt, Sichar, quæ nunc Neapolis appellatur, & ex latere montis Garizim extructam circa puteum Iacob intrauit ecclesiam : super quo residens Dominus, sitiensq. & esuriens, Samaritanæ fide satius est : quæ quinque Mosaicorum uoluminum uiris, sextoque, quem se habere iactabat, errore Dosithei derelicto, uerum Messiam, & uerum reperit saluatorem. Atque inde diuertens, uidit duodecim patriarcharum sepulcra, & Sebastē, idest, Samariā, quæ in honorem Augusti ab Herode Græco sermone Augusta est nominata. ibi siti sunt Helisæus, & Abdias propheta, & , quo maior inter natos mulierum nō fuit, Ioannes Baptista. ubi multis intremuit consternata mirabilibus : namque cernebat uariis dæmones rugire cruciatibus, & ante sepulcra sanctorum ululare homines more luporum, uocibus latrare canum, fremere leonum, sibilare serpentum, mugire taurorum ; alios rotare caput, & post tergum terram uertice tangere ; suspensisq. pede feminis, uestes defluere in faciem. miserebatur omnium ; & , per singulos effusus lacrymis, Christi clementiam deprecabatur. Et sicut erat inualida, ascendit pedibus montem : in cuius duabus spelūcis, persecutionis & famis tempore, Abdias propheta centum prophetas aluit pane & aqua. Inde cito
- 3. Reg.* 13

cito itinere percucurrit Nazaret, nutriculum Domini, Cha *Matth. 2*
 naan, & Capharnaum, signorum eius familiares: lacū Ty-
 beriadis navigante Domino sanctificatum: & solitudinem, *Luc. 4*
 in qua multa populorum millia paucis saturata sunt pani- *Ioan. 6*
 bus, & de reliquiis uescentium repleti sunt cophini duode-
 cim tribuum Israel. Scandebat montem Thabor, in quo *Matth. 17*
 transfiguratus est Dominus. Aspiciebat procul mōtes Her-
 mon & Hermonim, & campos latissimos Galilææ, in qui-
 bus Sisara & omnis exercitus eius, Barach uincente, pro- *Iud. 4*
 stratus est. Torrens Cifon, qui mediam planitiem diuide-
 bat, & opidum iuxta Naim, in quo uiduæ suscitatus est fi- *Luc. 7*
 lius, monstrabatur. Dies me prius, quam sermo, deficiet,
 si uoluerō cuncta percurrere, quæ Paula uenerabilis fide in-
 credibili peruagata est. Transibo ad Aegyptum, & inter So-
 choth atque fontem Sampson, quem de molari maxillæ dē *Iud. 15*
 te produxit, subsistam parumper; & arentia ora colluam,
 ut refocillatus uideam Morasthim, sepulcrum quondam
 Michæ prophetæ, nunc ecclesiam. Et ex latere derelin-
 quam Choreos, & Getheos, Marefa, Idumæam, & La-
 chis: & per arenas mollissimas pergentium uestigia subtra-
 hentes, latamq. eremi uastitatem, ueniam ad Aegypti flu-
 uiū Sior, qui interpretatur turbidus: & quinque Aegypti
 transeā ciuitates, quæ loquuntur lingua Chananitide, & ter-
 ram Gessen, & campos Tamneos, in quibus fecit Deus mi-
 rabilia: et urbem No, quæ postea uersa est in Alexandria:
 & opidum Domini Nitriam, in quo purissimo uirtutum ni-
 tro sordes lauantur quotidie plurimorū. Quod cum uidis-
 set, occurrente sibi sancto & uenerabili episcopo Isidoro
 confessore, & turbis innumerabilibus monachorum, ex
 quibus multos sacerdotalis & leuiticus sublimabat gradus,
 letabatur quidem ad gloriam Domini, sed se indignam tan-
 to honore fatebatur. Quid ego narrem Macarios, Arse-
 nios, Serapionas, & reliqua columnarum Christi nomina?
 cuius non intrauit cellulam? quorum pedibus non aduolu-
 ta est? Per singulos sanctos Christum se uidere credebat;
 & quidquid in illos contulerat, in Dominum se contulisse

R 3 leta-

lætatur. Mirus ardor, & uix in femina credibilis fortitudo. Oblita sexus, & fragilitatis corporeæ, inter tot millia monachorum cum puellis suis habitare cupiebat: & forsitan, cunctis eam susipientibus, impetrasset, ni maius sanctorum locorum retraxisset desiderium. Atque propter feruentissimos æstus de Pelusio Maiomam navigatione perueniens, tanta uelocitate reuersa est, ut auem putares. Nec multo post in sancta Bethlehem mansura perpetuo, angusto per triennium mansit hospitio, donec extrueret cellulas ac monasteria, & diuersorum peregrinorum iuxta uiam conderet mansiones, in qua Maria & Ioseph hospitium non inuenerant. Hucusque iter eius descriptum sit, quod cum multis uirginibus, & filia comite peragrauit. nunc uirtus latius describatur, quæ ipsius propria est, & in qua exponenda, Deo iudice ac teste profiteor, me nihil addere, nihil in maius attollere more laudantium, sed, ne rerum excedam fidem, multa detrachere, & ne apud detractores, & genuino me semper dente rodentes fingere puter, & cornicem Aesopi alienis coloribus adornare. Quæ prima Christianorum uirtus est, tanta se humilitate deiecit, ut, qui eam non uidisset, & pro celebritate nominis uidere gestisset, ipsam esse non crederet, sed ancillarum ultimam. et cum frequentibus choris uirginum cingeretur, & ueste, & uoce, & habitu, & incessu minima omnium erat. Numquam post uiri mortem usque ad diem dormitionis suæ cum ullo comedit uiro, quamuis eum sanctum, & in pontificali sciret culmine constitutum. Balneas, nisi periclitans, non adiit. Mollia, etiam in grauissima febre, lectuli strata non habuit; sed super durissimam humum, stratis ciliciolis quiescebat: si tamen illa quies dicenda est, quæ iugibus pene orationibus dies noctesque iungebat: illud implens de psalterio: Lauabo per singulas noctes lectum meum lacrymis: meis stratum meum rigabo. In qua fontes crederes lacrymarum: ita leuia peccata plangebat, ut illam grauissimorum criminum crederes ream. Cumque a nobis crebrius moneretur, ut parceret oculis, & eos seruaret Euangelicæ lectioni, aiebat: Turpanda est

Psalm. 6

da est facies, quam contra Dei præceptum purpurisso, & ce-
 russa, & stibio sæpe depinxi. Affligendum corpus, quod
 multis uacauit deliciis. Longus risus perpeti cõpensandus
 est fletu. Molliã linteamina, & serica pretiosissima, asperi-
 tate cilicii commutanda. Quæ uiro, & sæculo placui, nunc
 Christo placere desidero. Si inter tales tantasq. uirtutes ca-
 sitatē in illa uoluerõ prædicare, superfluous uidear: in qua,
 etiam cum sæcularis esset, omnium Romæ matronarum
 exemplum fuit: quæ ita se gessit, ut numquam de illa etiã
 maledicorum quidquam auderet fama confingere. Nihil
 animo eius clementius, nihil erga humiles blandius fuit.
 Non appetebat potentes; nec tamen superbos & glorio-
 lam quærentes, fastidio despiciebat. Si pauperem uidebat,
 sustentabat: si diuitem, ad benefaciendũ hortabatur. Libe-
 ralitas sola excedebat modum. Et usuras tribuens, uersu-
 ram quoque sapius faciebat, ut nulli stipem rogantium de-
 negaret. Fateor errorem meum: cum in largiēdo esset pro-
 fusior, arguebam, illud proferens de Apostolo: Nõ ut aliis
 refrigerium, uobis autem tribulatio: sed ex æqualitate in
 hoc tempore, ut uestra abundantia sit ad illorum inopiam,
 & illorum abundantia sit ad uestram inopiam. Et hoc de
 euangelio saluatoris: Qui habet duas tunicas, det alteram
 non habenti. Et prouidendum esse, ne, quod libenter fa-
 ceret, semper facere non posset: multa q. huiuscemodi,
 quæ illa mira uerecundia, & sermone parcissimo dissolue-
 bat, testem inuocans Deum, se pro illius nomine cuncta fa-
 cere; & hoc habere uoti, ut mendicans ipsa moreretur; ut
 unum nummum filix non dimitteret, & in funere suo alic-
 na sindone inuolueretur. Ad extremum inferebat: Ego, si
 petiero, multos inueniam, qui mihi tribuant: iste mendi-
 cans si a me non acceperit, quæ ei possum etiam de alieno
 tribuere, & mortuus fuerit, a quo eius anima requiretur?
 Ego cautiorem in re familiari esse cupiebam: sed illa arden-
 tior fide, toto saluatori animo iungebatur; & pauperem Do-
 minum pauper spiritu sequebatur, reddens ei quod accepe-
 rat, pauper pro ipso effecta. Denique consecuta est, quod

2. Cor. 8

Luc. 3

R 4 opta-

optabat; & in grandi ære alieno filiam dereliquit; quod hucusque debens, non suis uiribus, sed Christi se confidit misericordia reddituram. Solent pleræque matronarum buccinatoribus suis dona conferre, & in paucos largitate profusa, manum a ceteris retrahere. quo illa omnino carebat uitio: ita enim singulis suam pecuniam diuidebat, ut singulis necessarium erat, non ad luxuriam, sed ad necessitatem. nemo ab ea pauperum uacuis reuersus est: quod obtinebat non diuitiarum magnitudine, sed prudentia dispensandi, **Matth. 5** illud semper replicans: Beati misericordes, quoniam ipsi **Eccli. 3** misericordiam consequentur. Et: Sicut aqua extinguit ignem, **Luc. 16** ita eleemosyna extinguit peccatum. Et: Facite uobis amicos de iniquo mammona, qui uos recipiant in æterna tabernacula. Et: Date eleemosynam, & ecce omnia munda **Luc. 11** sunt uobis. Et uerba Danielis, regem Nabuchodonosor monentis, ut eleemosynis redimeret peccata sua. Nolebat in his lapidibus pecuniam effundere, qui cum terra & sæculo transitori sunt, sed in uiuis lapidibus, qui uoluntur super **Apoc. 21** terram, de quibus, in Apocalypsi Ioannis, ciuitas magni regis extruitur; quos in saphirum, & smaragdum, & iaspidem, & ceteras gemmas esse uertendos, scriptura commemorat. Verum hæc possunt esse communia cum multis: & scit diabolus, non in summo uirtutum culmine posita: **Iob. 2** unde loquitur ad Dominum: Post amissam Iob substantiam, post euersam domum, post liberos interfectos, corium pro corio, & omnia, quæ habuerit homo, dabit pro anima sua: sed extende manum tuam, & tange ossa eius, & carnes, nisi in faciem benedixerit tibi. Scimus plerosque dedisse eleemosynam, sed de proprio corpore nihil dedisse; porrexisse egentibus manum, sed carnis uoluptate superatos; dealbasse ea, quæ foris erant, & intus plenos fuisse ossibus mortuorum. At non Paula talis: quæ tantæ continentię fuit, ut prope mensuram excederet, & debilitatem corporis nimis ieiuniis ac labore contraheret: quæ, exceptis diebus festis, uix oleum in cibo caperet: ut ex hoc uno æstimeretur, quid de uino, & liquamine, piscibus, & lacte, & melle, &

& ouis, & reliquis, quæ gustui suauia sunt, iudicari: in quibus sumendis quidam se abstinentissimos putant; & si his uentrem ingurgitauerint, turam pudicitiam suspicantur. Semper quidem uirtutes sequitur inuidia, feriuntq. summos fulgura montes. nec mirum, si hoc de hominibus loquar, cum etiam Dominus noster phariseorum zelo sit crucifixus, & omnes sancti æmulos habuerint; in paradiso quoque serpens fuerit, cuius inuidia mors introiuit in orbem terrarum. *Sap. 2*
 Suscitauerat ei Dominus Adad Idumæum, qui eam colaphizaret, ne se extolleret: & quasi quodam stimulo carnis sæpius admonebat, ne magnitudo uirtutum altius raperet, & aliarum uitiiis feminarum se in excelsis crederet constitutam. ego aiebam, liuori esse cedendum, & dandū infantiæ locum; quod fecisset Iacob in fratre suo Esau, & Dauid in pertinacissimo inimicorum Saul; quorum alter in Mesopotamiam fugerit, alter se Allophylis tradiderit, malens hostibus, quam inuidis, subiacere. At illa respondēbat: Iuste hæc diceret, si diabolus contra seruos Dei & ancillas non ubique pugnaret, & ad omnia loca fugientes non præcederet; si non sanctorum locorum amore retineret, & Bethlehem meam in alia reperire possem parte terrarum. cur enim non patientia liuorem superem? cur non humilitate frangam superbiam, & percutienti maxillam offeram alteram? dicēte apostolo Paulo: Vincite in bono malum. *Rom. 12*
 Nonne apostoli gloriabantur, quando pro Domino sunt passi contumeliam? Nonne ipse saluator humiliavit se, formam serui accipiens, & factus est obediens patri usque ad mortem, & mortem crucis, ut nos sua passione saluaret? *Act. 5*
 Iob nisi certasset, & uicisset in prælio, non accepisset coronam iustitiæ, nec audisset a Domino: Putas me aliter locutum tibi, quam ut apparerem iustus? Beati dicuntur in euangelio, qui persecutionem patiuntur propter iustitiam. Secura scit conscientia, quod non propter peccata patiamur; & afflictio in sæculo, materia præmiorum est. Si quando procacior fuisset inimicus, & usque ad uerborum iurgia pro silisset; illud psalterium decantabat: Cum consisteret aduersum
Philip. 2
Iob. 42
Matth. 5
Psalm. 28
 sum

- sum me peccator, obmutui, & silui a bonis: Et rursus:
Psal. 37 Ego autem quasi surdus non audiebam, & quasi mutus nō
 aperiens os suum. Et factus sum sicut homo non audiens,
 & non habens in ore suo increpationes. In tentationibus,
Deut. 13 Deuteronomii uerba uoluebat: Tentat uos dominus Deus
 uester, ut sciat si diligatis dominum Deū uestrū de toto cor
 de uestro, & de tota anima uestra. In tribulationibus & an-
Esa. 28 gustiis, Esaia replicabat eloquia: Qui ablactati estis a lacte,
 qui abstracti ab ubere, tribulationē super tribulationem ex
 pectate, spem super spem, adhuc pusillū propter malitiā la-
 biorū, propter linguā malignā. & scripturæ testimoniū in
 cōsolationem suam edisserbat: Ablactorum esse, eorum
 scilicet, qui ad uirilem ætatem peruenissent, tribulationem
 super tribulationem sustinere, ut spem super spem merean-
Rom. 5 tur accipere: Scientes quoniam tribulatio patientiam ope-
 ratur, patientia autem probationem, probatio uero spē,
 spes autem non confundit. Et: Quod si is, qui foris est,
2. Cor. 4 homo noster corrumpatur, ille, qui intus est, innouetur:
 & in præsentiarum leue & momentaneum tribulationis ue-
 stræ, æternum gloriæ pondus operatur in uobis, non aspi-
 cientibus quæ uidentur, sed quæ non uidentur. quæ enim
 uidentur, temporalia sunt: quæ autem non uidentur, æter-
 na. Nec longum fore tempus, etiam si humanæ impatien-
 tiæ tardum uideatur, quin Dei statim uideatur auxilium,
Esa. 49 dicentis: Tempore opportuno exaudiui te, & in die salu-
 tis auxiliatus sum tibi. Nec dolosa labia, & linguas iniquo-
 rum esse metuendas; cum Domino adiutore letemur, &
Esa. 51 ipsum debeamus audire per prophetam monentem: Noli-
 te timere opprobria hominum, & blasphemias eorum ne
 metueritis. sicut enim uestimentum, sic comedit eos uer-
 mis: & sicut lanam, sic deuorauit eos tinea. Et: Per pa-
Luc. 21 tientiam uestram possidebitis animas uestras. Et: Non
Rom. 8 sunt condignæ passionēs huius temporis ad futuram glo-
 riam, quæ reuelabitur in nobis. Et alibi: Tribulationem
 super tribulationem sustinere, ut patiēter agamus in omni-
Pro. 14 bus, quæ accidunt nobis. Patiens enim uir multum pru-
 dens.

dens . Qui autem pusillanimis est , uehementer insipiens .
 In languoribus , & crebra infirmitate dicebat : Quando in 2. Cor. 12
 firmor , tunc fortior sum . Et : Habemus thesaurum istum 2. Cor. 4
 in uasis fictilibus , donec mortale hoc induat immortalita-
 tem , & corruptiuium hoc uestiatur incorruptione . Et ite- 1. Cor. 15
 rum : Sicut superabundant passionēs Christi in nobis , ita
 & per Christum abundat & consolatio . Ac deinde : Ut
 socii passionum ellis , siceritis & consolationis . In mæro- 2. Cor. 1
 re cantabat : Quare tristis es anima , & quare conturbas Psal. 42
 me ? Spera in Deo , quoniam adhuc confitebor illi , saluta-
 re uultus mei , & Deus meus . In periculis loquebatur :
 Qui uult uenire post me , abneget semet ipsum , & tollat Luc. 9
 crucem suam , & sequatur me . Et iterum : Qui uult ani-
 mam suam saluam facere , perdet eam . Et : Qui perdiderit
 animam suam propter me , saluam eam faciet . Quando di-
 spendia rei familiaris , & euersio totius patrimonii nuncia-
 batur , aiebat : Quid enim prodest homini , si totum mun- Matth. 16
 dum lucrifecerit , & animæ suæ damnum habuerit ? aut quā
 dabit homo commutationem pro anima sua ? Et : Nudus Iob 1
 exiui de utero matris meæ , nudus & redeam . Sicut Domi-
 no placuit , ita factum est . Sit nomen Domini benedictum .
 Et illud : Nolite diligere mundum , neque ea , quæ sunt in 1. Ioan. 2
 mundo : quoniam omne , quod in mundo est , desiderium
 carnis est , & concupiscentia oculorum , & superbia uitæ
 huius : quæ non est ex patre , sed ex mundo : et mundus
 transit , & cōcupiscentia eius . Scio ei scriptas infirmitates
 grauissimas liberorum , & maxime Toxotii sui , quem dili-
 gebat plurimum . Cumq. illud uirtute compleisset , Turba- Psal. 76
 ta sum , & non sum locuta , in hæc uerba prorupit : Qui Matth. 10
 amat filium , aut filiam plus quam me , non est me dignus .
 Et orans ad Dominum , loquebatur : Posside Domine fi- Psal. 78
 lios mortificatorum , qui pro te quotidie mortificant cor-
 pora sua . Noui susurronem quendam , (quod genus ho-
 minum perniciosissimum est) quasi beneuolum nuncia-
 se , quod pro nimio feruore uirtutum quibusdam uideretur
 insana , & cerebrum illius dicerent confouendum . Cui
 illa

1. Cor. 4 illa respondit: Theatrum facti sumus mundo, & angelis;
 1. Cor. 1 & hominibus. Et: Nos stulti propter Christum: sed stultum Dei sapientius est hominibus. Vnde & saluator loquitur ad patrem: Tu scis insipientiam meam. Et iterum: Tamquam prodigium factus sum multis, & tu adiutor fortis: ut iumentum factus sum apud te, & ego semper tecum.
 Mar. 3 Quem in euangelio & propinqui quasi mentis impotem ligare cupiebant, & aduersarii suggillabant, dicentes: Dæmonium habet, & Samaritanus est. Et: In Beelzebub
 Ioan. 8 principe dæmoniorum eiicit dæmonia. Sed nos audiamus
 Matth. 12 Apostolum cohortantem: Hæc est gloria nostra, testimonium conscientie nostræ: quoniam in sanctitate, & sinceritate, & in gratia Dei conuersati sumus in mundo. Et Dominus
 Ioan. 15 minum dicentem ad apostolos: Ideo mundus odit uos, quoniam non estis de mundo. si enim essetis de mundo, amaret utique mundus quod suum erat. Et ad ipsum Dominum
 Psal. 43 minum uerba uertebat: Tu nosti cordis abscondita: & hæc omnia uenerunt super nos: nec sumus obliti tui: nec inique egimus in testamento tuo, nec auersum est retrorsum
 Psal. 117 cor nostrum. Et: Propter te mortificati sumus tota die: reputati sumus ut oues occisionis. Sed Dominus auxiliator meus: non timebo quid faciat mihi homo. Legi enim: Fili
 Pro. 7 li honora Dominum, & confortaberis, & extra Dominum nullum timueris. His, & talibus testimoniis, quasi armatura Dei, & aduersus omnia quidem uitia, sed præcipue instruebat se contra inuidiam sæuientem, & patiundo iniurias, furorem rabidi pectoris mitigabat. Denique usque ad diem mortis & huius patientia, & aliorum zelus omnibus patuit; qui suum rodit auctorem, &, dum æmulum lædere nititur, in semet ipsum proprio furore bacchatur. Dicam & de ordine monasterii, quo modo sanctorum continentiam in suum uerterit lucrum. Seminabat carnalia, ut meteret spiritualia: dabat terrena, ut cælestia tolleret: breuia concedebat, ut pro his æterna mutaret. Post uiro-
 rum monasterium, quod uiris tradiderat gubernandum, plures uirgines, quas e diuersis prouinciis congregarat, tã nobi-

nobiles, quam medii & infimi generis, in tres turmas monasteriaq. diuisit, ita dumtaxat, ut in opere & in cibo separatae, psalmodiis & orationibus iungerentur. Post alleluia cantatum, quo signo uocabantur ad collectam, nulli refidere licitum erat: sed prima, seu inter primas ueniens, ceterarum operiebatur aduentum, pudore & exemplo ad laborem eas prouocans, non terrore. Mane hora tertia, sexta, nona, uespere, noctis medio, per ordinem psalterium cantabant: nec licebat cuiquam sororum ignorare psalmos, & non de scripturis sanctis quotidie aliquid discere. Die tantum Dominico ad ecclesiam procedebant, ex cuius habitabant latere. et unumquodque agmen matrem propriam sequebatur: atque inde pariter reuertentes, instabant operi distributo, & uel sibi, uel ceteris indumenta faciebant. Si qua erat nobilis, non permittebatur de domo sua habere comitem; ne ueterum actuum memor, & lasciuiantis infantiae errorem refricaret antiquum, & crebra cōfabulatione renouaret. Vnus omnium habitus. Linteamine ad tergendas solum manus utebatur. A uiris tanta separatio, ut a spadonibus quoque eas seiungeret, ne ullam daret occasionem linguae maledicæ, quæ sanctos carpere solita est in solatium delinquendi. Si qua uel tardior ueniebat ad psalmos, uel erat in opere pigrior, uariis eam modis aggrediebatur: si erat iracunda, blanditiis: si patiens, correptione: illud Apostoli imitans: Quid uultis? in uirga ueniam ad uos, an in spiritu lenitatis, & mansuetudinis? 1. Cor. 4 Excepto uictu & uestitu, nullam habere quidquam patiebatur, dicente Paulo: Habentes uictum, & uestitum his contenti sumus: ne consuetudine plus habendi præberet locū auaritiæ; quæ nullis expletur opibus; & quanto amplius habuerit, plus requirit; & neque copia, neque inopia minuitur. Iurgantes inter se, sermone lenissimo fœderabat. Lasciuentem adolescentularum carnem crebris & duplicatis frangebat ieiuniis, malens eis stomachum dolere, quam mentem. Si uidisset aliquam comptiorem; contractione frontis, & uultus tristitia arguebat errantem, dicens: Mūditiā

1. Tim. 6

ditiam corporis, atque uestitus, animæ esse immunditiam : & turpe uerbum, atque lasciuum, numquam de ore uirgineo proferendum : quibus signis libidinosus animus ostenditur : & per exteriorem hominem interioris hominis uitia demonstrantur. Quam linguosam, garrulam, ac procacem, rixisq. perspexerat delectari, & sæpius commonitam nolle conuerti, inter ultimas & extra conuentum sororum, ad fores triclinii orare faciebat, & separatim cibum capere; ut, quam obiurgatio non correxerat, emendaret pudor. Furtum quasi sacrilegium detestabatur; & quod inter sæculi homines uel leue putatur, uel nihil, hoc in monasteriis grauissimum dicebat esse delictum. Quid memorem clementiam, & sedulitatem in ægrotantes, quas miris obsequiis, & ministeriis confouebat? cumq. aliis languentibus large præberet omnia, & esum quoque exhiberet carniū; si quando ipsa ægrotasset, sibi non indulgebat; & in eo inæqualis uidebatur, quod in aliis clementiam, in se duritiam commutabat. Nulla iuuenum puellarum, sano, & uegeto corpore, tantæ se dederat continentię, quantæ ipsa fracto, & senili, debilitatoq. corpusculo. Fateor, in hac re pertinacior fuit, ut sibi nõ parceret, & nulli cederet admonenti. Referā, quod expertus sum. Mense Iulio feruentissimis aestibus incidit in ardorem febris: & post desperationem cum Dei misericordia respirasset; & medici persuaderent, ob refectiōē corporis uino opus esse tenui, & parco, ne aquam bibens in hydropem uerteretur; & ego clam beatum Papam Euphanium rogarem, ut eam moneret, immo compelleret uinum bibere; illa, ut erat prudens & solertis ingenii; statim sensit insidias: & subridens, meum esse, quod ille diceret, intimauit. Quid plura? cum beatus pontifex post multa hortamenta exisset foras, quærenti mihi quid egisset, respondit: Tantum profeci, ut seni homini pene persuaserit, ne uinum bibam. Hæc refero, non quod inconsideranter, & ultra uires sumpta onera probem, monente scriptura: *Pro. 13* Super te onus ne leuaueris: sed quod mentis eius ardorem, & desiderium fidelis animæ, ex hac quoque probare uelim perle-

perseuerantia, decantantis: Sitiuit anima mea in te, quam *Psal. 62*
multipliciter tibi caro mea. Difficile est modum tenere in
omnibus. Et uere, iuxta philosophorum sententiam,
μεσότης ἡ ἀρετὴ, κακία ὑπερβολὴ πέλεται: idest: mo-
dus uirtus est, uitium nimietas reputatur. quod nos una
& breui sententiola exprimere possumus: Ne quid nimis.
Quæ in contemptu ciborum tantam habebat pertinaciã;
in luctu mitis erat, & suorum mortibus frangebatur, ma-
xime liberorum. nam & in uiri, & filiarum dormitione,
semper periclitata est. et cum os, stomachumq. signaret;
& matris dolorem, crucis niteretur impressione lenire; su-
perabatur affectu; & credulam mentem, parentis uiscera
consternabant; animoq. uincens, fragilitate corporis uince-
batur. quam semel languor arripiens, longo tēpore possi-
debat; ut & nobis inquietudinem, & sibi discrimina affer-
ret. in quo illa lætabatur, per momenta commemorans:
Miser ego homo, quis me liberabit de corpore mortis hu- *Rom. 7*
ius? Dicat prudens lector, pro laudibus me uituperationē
scribere. testor Iesum, cui illa seruiuit, & ego seruire cu-
pio, me utramque in partem nihil fingere, sed quasi Chri-
stianum de Christiana, quæ sunt uera, proferre, idest hi-
storiam scribere, non panegyricum; & illius uitia, aliorum
esse uirtutes. uitia loquor, secundum animum meum, &
omnium sororum ac fratrum desiderium, qui illam diligi-
mus, & absentem quærimus. Ceterum illa impleuit cur- *2. Tim. 4*
sum suum, fidemq. seruauit, & nūc fruitur corona iustitiæ, *Apoc. 14*
sequiturq. agnum, quocumque uadit. Saturatur, quia esu-
riuit, & læta decantat: Sicut audiuius, ita & uidimus in *Psal. 47*
ciuitate Domini uirtutum, in ciuitate Dei nostri. O beata
rerum commutatio. fleuit, ut semper rideret: despexit la- *Hier. 2*
cus contritos, ut fontem Dominum reperiret. uestita cili-
cio est, ut nunc albis uestimentis uteretur, & diceret: Scidi-
sti saccum meum, & induisti me lætitia. Cinerem sicut pa- *Psal. 29*
nem manducabat, & potionem suam cum fletu miscebat, *Psal. 101*
dicens: Fuerunt mihi lacrymæ meæ panes die ac nocte, ut *Psal. 41. 33*
in æternum pane angelorum uesceretur, & caneret: Gustate
&

Psal. 44 & uidete, quoniam suavis est Dominus. Et: Eructauit cor
Esa. 65 meum uerbum bonū: dico ego opera mea regi. Vt *Esaia*,
 immo Domini per *Esaia* in se cerneret uerba compleri:
 Ecce, qui seruiunt mihi, manducabunt: uos autem esurie-
 tis. Ecce, qui seruiunt mihi, bibent: uos autem sitietis.
 Ecce, qui seruiunt mihi, lætabuntur: uos autem confunde-
 mini. Ecce, qui seruiunt mihi, exultabunt: uos autem cla-
 mabitis ob dolorem cordis, & propter contritionem spi-
 ritus ululabitis. Dixeram, lacus eam semper fugisse cōtritos,
 ut fontem Dominum reperiret, ut posset læta cantare: Si-
Psal. 41 cut ceruus desiderat ad fontes aquarum, ita desiderat ani-
 ma mea ad te Deus: Quando ueniam, & apparebo ante fa-
 ciem Dei? Tangam ergo breuiter, quo modo hæreticorum
 canosos deuiterit lacus, & eos instar habuerit ethnico-
 rum. Quidā ueterator callidus, atque, ut sibi uidebatur,
 doctus, & sciolus, me nesciente cœpit ei proponere quæstio-
 nes, & dicere: Quid peccauit infans, ut a dæmone corripia-
 tur? in qua ætate resurrecturi sumus? si in ipsa qua mori-
 mur: ergo nutricibus post resurrectionem opus erit. si in
 altera: nequaquam erit resurrectio mortuorum, sed trans-
 formatio in alios. Diuersitas quoque sexus maris ac femi-
 næ erit, aut non erit? si erit: sequentur & nuptiæ, & con-
 cubitus, sed & generatio. si non erit: sublata diuersitate se-
Sap. 9 xus, eadem corpora non resurgent: aggrauat enim terrena
 inhabitatio sensum multa cogitantem: sed tenuia erunt, &
1. Cor. 15 spiritualia, dicente Apostolo: Seminatur corpus animale,
 surget corpus spirituale. Ex quibus omnibus probare cu-
 piebat, rationales creaturas ob quædam uitia, & antiqua
 peccata in corpora esse delapsas; & pro diuersitate & meri-
 tis peccatorum, tali uel tali condicione generari; ut uel cor-
 porum sanitate gauderent, & parentum diuitiis, ac nobili-
 tate; uel in morbidas carnes, & domos inopum uenien-
 tes, pœnas pristinorum luerent delictorum, & præsentī se-
 culo atque corporibus, quasi carcere, clauderentur. Quod
 cum audisset, & ad me retulisset, indicans hominem; mi-
 hiq. incubuisset necessitas nequissimæ uiperæ ac mortiferæ
 bestię

bestiæ resistendi; de quibus psalmista commemorat, dicēs:
 Ne tradas bestiis animas confitentium tibi: Et; Increpa *Psal. 73. et 67*
 Domine bestias calami, qui scribentes iniquitatem, loquū-
 tur contra Dominum mendacium, & eleuant in excelsū
 os suum: conueni hominem, & orationibus eius, quam de-
 cipere nitebatur, breui interrogatione conclusi, dicens:
 Virum crederet futuram resurrectionem mortuorum, an
 non? Qui cum se credere respondisset, intuli: Eadem re-
 surgent corpora, an altera? Cum dixisset, eadem: sciscita-
 tus sum: In eodem sexu, an in altero? Ad interrogata reti-
 centi, & instar colubri huc atque illuc transferenti caput,
 ne feriretur; Quia, inquam, taces, ego mihi pro te respō-
 debo, & consequentia inferam. Si non resurget mulier,
 ut mulier, neque masculus, ut masculus: non erit resurre-
 ctio mortuorum; quia sexus membra habet, membra au-
 tem totum corpus efficiunt. si autem sexus & membra nō
 fuerint; ubi erit resurrectio corporum, quæ sine sexu non
 constant, & membris? Porro si corporum non fuerit resur-
 rectio, nequaquam erit resurrectio mortuorum. Sed & il-
 lud, quod de nuptiis obiicis: Si eadem membra fuerint, se-
 qui nuptias: a saluatore dissoluitur. Erratis nescientes scri- *Matth. 22*
 pturas, neque uirtutem Dei. In resurrectione enim mor- *Luc. 20*
 tuorum, non nubent, neque nubentur, sed erunt similes an-
 gelorum. Vbi dicitur, Non nubent, neque nubentur, se-
 xuum diuersitas demonstratur. nemo enim de lapide, & li-
 gno dicit, non nubent, neque nubentur, quæ naturam nu-
 bendi non habent; sed de iis, qui possint nubere, & gratia
 Christi ac uirtute non nubant. Quod si opposueris: quo
 modo ergo erimus similes angelorum; cum inter angelos
 non sit masculus, & femina? breuiter ausculta. Non substā-
 tiam nobis angelorum, sed conuersationem, & beatitudinē
 Dominus repromittit: quo modo & Ioannes Baptista, an *Luc. 7*
 tequam decollaretur, angelus appellatus est, & omnes san-
 cti, ac uirgines Dei, etiam in isto sæculo uitam in se expri-
 munt angelorum. quando enim dicitur: Eritis similes an-
 gelorum: similitudo promittitur, non natura mutatur. Si-
 mulq.

- mulq. responde; quo modo illud interpreteris, quod Tho-
Ioan. 20.21 mas Domini resurgentis tetigerit manus, & uiderit lancea-
Luc. 24 latus eius perforatum? Et Petrus in litore stantem uiderit
 Dominum, & partem assis piscis, ac faenum mellis comeden-
 tem? Qui stabat, profecto habebat pedes. Qui monstra-
 uit latus uulneratum, utique & uentrem, & pectus habuit,
 sine quibus non sunt latera, uentri & pectori coherencia.
 Qui locutus est, lingua & palato ac dentibus loquebatur.
 sicut enim plectrum cordis, ita lingua illiditur dentibus, &
 uocalem reddit sonum. Cuius palpatæ sunt manus, con-
 sequenter & brachia habuit. Cum igitur omnia membra
 habuisse dicatur; necesse est, ut totum corpus habuerit,
 quod conficitur ex membris, non utique femineum, sed ui-
 rile, idest, eiusdem sexus, in quo mortuus est. Quod si ob-
 tenderis: Ergo & nos post resurrectionem comedemus?
Ioan. 20 Et quo modo clausis ingressus est ianuis, contra naturam
 pinguium, & solidorum corporum? Audies: Noli propter
 cibum, resurrectionis fidem in calumniam trahere. Nam &
Mar. 5 archisynagogi filia resuscitata iussit cibum dari: & Laza-
Ioan. 12 rus quatruiduanus mortuus, cum ipso scribitur inisse conui-
 uium, ne resurrectio eorum phantasma putaretur. Sin au-
 tem clausis ingressus est ianuis; & ideo spirituale & aeriū
 corpus niteris approbare: ergo & antequā pateretur, quia
 contra naturam grauiorum corporum super mare ambula-
Matth. 14 uit, spirituale corpus habuit. Et apostolus Petrus, qui &
 ipse super aquas pendulo incessit gradu, spirituale corpus
 habuisse credendus est, cum potentia magis & uirtus osten-
 datur Dei, quando fit aliquid contra naturam. Et ut scias,
 in signorum magnitudine nō naturæ mutationem, sed Dei
 omnipotentiam demonstrari: Qui ambulabat fide, cepit
 infidelitate mergi, nisi eum manus Domini subleuasset, di-
 centis: Modicæ fidei, quare dubitasti? Miror autem te ob-
Ioan. 20 durare frōtem loquente Domino, Infer digitum tuum huc,
 & tange manus meas: & porrige manum tuam, & mitte in
 latus meum: & noli esse incredulus, sed fidelis. Et alibi:
Luc. 24 Videte manus meas, & pedes meos, quia ipse ego sum.
 Palpa-

Palpate, & uidete, quia spiritus carnem & ossa non habet, sicut me uidetis habere. Et cum hoc dixisset, ostendit eis manus, & pedes. Ossa audis, & carnem, & pedes, & manus: & globos mihi Stoicorum, atque aëria quædam deliramenta confingis. Porro, si quæris, cur infans a dæmone corripiatur, qui peccata non habuit; aut in qua ætate resurrecturi simus, cum diuersa ætate moriamur: ingratis suspicies, Iudicia Dei abyssus multa. Et: O altitudo diuitiarum sapientiæ, & scientiæ Dei, quam inscrutabilia sunt iudicia eius, & inuestigabiles uiæ eius. Quis enim cognouit sensum Domini? aut quis consiliarius eius fuit? Aetatum autem diuersitas non mutat corporum ueritatem. cū enim corpora quotidie nostra fluant, & aut crescant, aut decrescant: ergo tot erimus homines, quot quotidie commutamur: aut alius fui, cum decem annorū essem; alius, cum triginta; alius, cum quinquaginta; alius, cum iam toto cano capite sum? Igitur, iuxta ecclesiarum traditiones, & apostolum Paulum, illud est respondendum: quod in uirum perfectum, & in mensuram ætatis plenitudinis Christi resurrecturi sumus, in qua & Adam Iudæi conditum autumant, & Dominum saluatorem legimus surrexisse: & multa, quæ de utroque testamento in suffocationem hæretici protuli. Ex quo die ita cœpit hominē detestari, & omnes, qui eiusdem dogmatis erāt, ut eos uoce publica hostes Domini proclamaret. Et hæc dixi, non ut breuiter hæresim cōfutarem, cui multis uoluminibus respondēdum esset; sed ut fidem tantæ feminae ostenderem, quæ maluit inimicitias hominum subire perpetuas, quam Dei offensam amicitiiis noxiis prouocare. Dicam ergo, ut cœperam: nihil ingenio eius docilius fuit. Tarda erat ad loquendum, uelox ad audiendū, memor illius præcepti: Audi Israel, & tace. Scripturas sanctas tenebat memoriter. Et cū amaret historiā, & hoc ueritatis diceret fundamentum; magis tamen sequebatur intelligentiam spiritualem; & hoc culmine ædificationem animæ protegebat. Denique compulit me, ut uetus & nouum instrumentum cum filia, me differente, pers-

*Psal. 35**Rom. 12**Eph. 4*

S 2 legeret.

legeret. quod propter uerecundiam negans, propter affi-
 duitatem tamen, & crebras postulationes eius præstiti, ut
 docerem quod didiceram, non a me ipso, idest, a præsum-
 ptione, pessimo præceptore, sed ab illustribus Ecclesiæ ui-
 ris. Sicubi hæsitabam, & nescire me ingenue confitebar;
 nequaquā mihi uolebat acquiescere; sed iugi interrogatio-
 ne cogebat, ut e multis uariisq. sententiis, quæ mihi uide-
 retur probabilior, indicarem. Loquar & aliud, quod forsi-
 tan æmulis uideatur incredibile. Hebræam linguam, quam
 ego ab adolescentia multo labore ac sudore ex parte didici,
 & infatigabili meditatione non desero, ne ipse ab ea dese-
 rar, discere uoluit, & consecuta est; ita ut psalmos Hebrai-
 ce caneret, & sermonem absque ulla Latinæ linguæ pro-
 prietate personaret. quod quidem usque hodie in sancta fi-
 lia eius Eustochio cernimus: quæ ita semper adhæsit matri,
 & eius obediuit imperiis, ut numquam absque ea cubaret,
 numquam procederet, numquam cibum caperet, ne unū
 quidem nummum haberet potestatis suæ, sed & paternam,
 & maternam substantiolam a matre distribui pauperibus læ-
 taretur; & pietatem in parentem, hereditatem maximam
 & diuitias crederet. Non debeo silentio præterire, quanto
 exultauerit gaudio, quod Paulam, neptem suam, ex Leta
 & Toxotio genitam, immo uoto & futuræ uirginitatis re-
 promissione conceptam, audierat in cunis, & crepitaculis
 balbutiente lingua, alleluia, cantare, auxq. & amittæ nomi-
 na dimidiatis uerbis frangere. In hoc solo patriæ desiderium
 habuit, ut filium, nurum, neptem renunciasse sæculo, & Chri-
 sto seruire cognosceret. quod & impetrauit ex parte, nam
 neptis Christi flammeo reseruatur: nurus æternæ se tradēs
 pudicitæ, socrus opera, fide & eleemosynis sequitur, & Ro-
 mæ conatur exprimere, quod Hierosolymis illa comple-
 uit. Quid agimus anima? cur ad mortem eius uenire for-
 midas? Iam dudum prolixior liber cuditur, dum timemus
 ad ultima peruenire; quasi, tacentibus nobis, & in laudibus
 illius occupatis, differri possit occubitus. Hucusque pro-
 speris nauigauimus uentis, & crispantia maris æquora la-
 beas

bens carina sulcauit: nunc in scopulos incurrit oratio; & iumentibus fluctuum motibus, præsens utrique nostrum intentatur naufragium, ita ut cogamur dicere: Præceptor saluos nos fac, perimus. Et illud: Exurge, ut quid obdormis Domine? Quis enim possit siccis oculis Paulam narrare morientem? Incidit in grauissimam ualetudinem: immo, quod optabat, inuenit, ut nos desereret, & plenius Domini iungeretur. In quo lāguore, Eustochi filiæ probata seniper in matre pietas, magis ab omnibus comprobata est. ipsa assidere lectulo, flabellum tenere, sustentare caput, puluillū supponere, fricare pedes, manu stomachum cōfouere, molliā strata cōponere, aquam calidam temperare, mappulā apponere, omnium ancillarum præuenire officia, & quid quid alia fecisset, de sua mercede putare subtractum. quibus illa precibus, quibus lamentis & gemitu inter iacentē matrem & specum Domini discurret, ne priuaretur tanto contubernio, ne illa absente uiueret, ut eodem feretro portaretur? Sed o mortalium fragilis, & caduca natura; & nisi Christi fides nos extollat ad cælum, & æternitas animæ promittatur, cū bestiis ac iumentis corporū una condicio est. idem occubitus iusto & impio, bono & malo, mūdo ac immūdo, sacrificati & nō sacrificati. sicut bonus, ita & qui peccat: sicut qui iurat, ita & is, qui iuramentum metuit: similiter & homines, & iumenta in fauillam & cinerem dissoluantur. Quid diu immoror, & dolorem meum differendo facio longiorem? Sentiebat prudentissima feminarum adesse mortem, & frigente alia parte corporis atque membrorum, solum animæ teporem in sacro pectore palpitare: & nihilominus, quasi ad suos pergeret, alienosque desereret, illos uersiculos susurrabat: Domine, dilexi decorem domus tuæ, & locum habitationis gloriæ tuæ. Et: Quam dilecta tabernacula tua Domine uirtutum: concupiscit & deficit anima mea in atria Domini. Et: Elegi abiecta esse in domo Dei mei, magis quam habitare in tabernaculis peccatorum. Cumque a me interrogaretur, cur taceret, cur nollet respondere, an doleret aliquid: Græco ser-

Luc. 8

Psal. 43

Psal. 23

Psal. 83

S 3 mono

mone respondit, nihil se habere molestiæ, sed omnia quæta & tranquilla perspicere. Post hæc obmutuit, & clausis oculis, quasi iam mortalia despiceret, usque ad expirationem animæ eosdem repetebat uersiculos; ut, quod dicebat, uix audire possemus. digitumq. ad os tenens, crucis signum pingebat in labiis. Defecerat spiritus, & anhelabat in mortem: animaq. erumpere gestiens, ipsum stridorem, quo mortalium uita finitur, in laudes Domini conuertebat. Aderant Hierosolymarum & aliarum urbium episcopi, & sacerdotum inferioris gradus, ac leuitarum innumera bilis multitudo. omne monasterium, uirginum & monachorum chori repleuerant. Statimq. ut audiuit sponsum

Cant. 2 uocantem: Surge, ueni proxima mea, speciosa mea, columba mea: Quoniam ecce hiems transit, & recessit, pluuia abiit sibi: Læta respondit: Flores uisi sunt in terra,

Psal. 26 tempus sectionis aduenit. Et: Credo uidere bona Domini in terra uiuentium. Exhinc non ululatus, non planctus, ut inter sæculi homines fieri solet, sed psalmorum linguis diuersis examina concrepabant. Translataq. episcoporum manibus, & ceruicem feretro subiicientibus, cum alii pontifices lanipadas cereosq. præferrent, alii choros psallentium ducerent, in media ecclesiæ speluncæ saluatoris est posita. Tota ad funus eius Palestinarum urbium turba conuenit. quem monachorum latentium in eremocellula sua tenuit? quam uirginum cubiculorum secreta texerunt? Sacrilegum putabant, qui non tali femine ultimum reddidisset officium. Viduæ, & pauperes, in exemplum Dorcadis, uestes ab ea præbitas ostendebant. omnis inopum multitudo matrem, & nutriciam se perdidisse clamabat. quodq. mirum sit, nihil pallor mutauerat faciem; sed ita dignitas quædam, & grauitas ora compleuerat, ut eam putares non mortuam, sed dormientem. Hebræo, Græco, Latino, Syroq. sermone psalmi in ordine personabant, non solum triduo, donec subter ecclesiam, & iuxta specum Domini conderetur, sed per omnem hebdomadam, cunctis, qui uenerant, suum funus, & proprias credentibus

Psal. 130 dam, cunctis, qui uenerant, suum funus, & proprias credentibus

dentibus lacrymas. Venerabilis uirgo filia eius Eustochiū,
 quasi ablactata super matrem suam, abstrahi a parente nō
 poterat: deosculari oculos, hærere uultui, totum corpus
 amplexari, & se cum matre uelle sepeliri. Testis est Iesus,
 ne unum quidem nummum ab ea filia derelictum, sed, ut
 ante iam dixi, derelictum magnum æs alienum, &, quod
 his difficilius est, fratrum & sororum immensam multitu-
 dinem, quos & sustentare arduum, & abiicere impium est.
 Quid hac uirtute mirabilius, feminā nobilissimæ familiæ, ma-
 gnis quondam opibus, tanta fide omnia dilargitam, ut ad
 egestatem pene ultimam perueniret? Iactent alii pecunias,
 & in carbonam Dei æra congesta, funalibusq. aureis dona
 pendentia. nemo plus dedit pauperibus, quam quæ sibi
 nihil reseruauit, nunc illa diuitiis fruitur, & iis bonis, quæ
 nec oculus uidit, nec auris audiuit, nec in cor hominis ascen- *Esa. 64*
 derunt. Nostram uicem dolemus, & inuidere potius glō-
 riæ eius uidebimur, si uoluerimus diutius flere regnantem.
 Secura esto Eustochium, magna hereditate ditata es. Pars
 tua Dominus; &, quo magis gaudeas, mater tua longo
 martyrio coronata est. non solum enim effusio sanguinis in
 confessione reputatur; sed deuotæ quoque mentis seruitus
 immaculata, quotidianum martyrium est. Illa corona de
 rosis & uiolis plectitur, ista de liliis. unde & in Cantico scri- *Cant. 5*
 bitur canticorum: Fratrueus meus candidus, & rubicun-
 dus, & in pace, & in bello eadem præmia uincens tribu-
 ens. Mater, inquam, tua audiuit cum Abraham: Exi *Gen. 12*
 de terra tua, & de cognatione tua, & ueni in terram, quam
 ostendam tibi. Et per Hieremiam Dominum præcipientem: *Hier. 50. 48*
 Fugite de medio Babylonis, & saluate animas ue-
 stras. Hæc autem exiit de terra sua; et usque ad diem mor-
 tis suæ non est reuersa in Chaldæam; nec ollas Aegypti, & *Exod. 16*
 uirulentias carniū desiderauit; sed choris comitata uirgi-
 neis, ciuis est saluatoris effecta; de paruula Bethlehem, cæ-
 lestia regna conscendens, dicit ad ueram Noemi: Populus *Ruth 1*
 tuus, populus meus: & Deus tuus, Deus meus. Hunc tibi
 librum ad duas lucubrationunculas, eodem, quem tu inslines,
 S 4 dolore

280 *Ad Eustoc. uirg. Epitaph. Paula mat.*

dolore dictavi . nam quotiescumque stylum figere uolui , & opus exarare promissum ; toties obriguerunt digiti , cecidit manus , sensus elanguit . unde & inculta oratio uotum scribentis absque ulla elegancia & uerborum lepore testatur . Vale , o Paula , & cultoris tui ultimam senectutem orationibus iuua . Fides & opera tua Christo te sociant : præsens facilius , quod postulas , impetrabis . Exegi monumentum tuum ære perennius , quod nulla destruere possit uetustas . incidi elogium sepulcro tuo , quod huic uolumini subdidi ; ut , quocumque noster sermo peruenerit , te laudatam , te in Bethlehem conditam lector agnoscat .

Sequitur titulus sepulcri .

Scipio quam genuit , Pauli fudere parentes ,
Gracchorum soboles , Agamemnonis indyta proles ,
Hoc iacet in tumulo , Paulam dixere priores ,
Eustochi genitrix , Romani prima senatus ,
Pauperiem Christi , & Bethlehemitica rura secuta est .

In fronte speluncæ .

Aspicias angustum præcisa rupe sepulcrum ?
Hospitium Paulæ est , cælestia regna tenentis .
Fratrem , cognatos , Romam patriamq. relinquens ,
Diuitias , sobolem , Bethlehemi conditur antro .
Hic præsepe tuum Christe , atque hic mystica magi
Munera portantes , hominiq. deoq. dedere .
Dormiuit sancta & beata Paula VII. Kal. Febr. tertia sabbati post solis occubitum . sepulta est V. Kal. earundem ,
Honorio Augusto sexies & Arestenio consulibus . Vixit in sancto proposito Romæ annos quinque , Bethlehem annos uiginti : omne uitæ tempus impleuit annis quinquaginta sex , mensibus octo , diebus uiginti , & uno .

ARGV.

ARGVMENTVM.

LVCINIVS, Baticus natione, qui una cum Theodora uxore castam ducebat uitam, suis sumptibus D. Hieronymi gem adiunxerat, & ad sancta Hierosolyma loca, ibi reliquum uiae traducturus, nauigare statuerat. Hieronymus nunc eum hortatur, ut in proposito perstet, & cum primum potuerit, adnauiget. interea opera quadam sua, quae postulauerat, una cum quattuor ciliciolis, & Esaie codice, litteris iungens, ad eum mittit.

HIERONYMVS AD LVCINIVM.

EPISTOLA XXVIII.

ECopinanti mihi subito litterae tuae redditae sunt:
 N quae quanto insperatae, tanto gaudiorum plenae,
 quiescentem animam suscitauerunt; ut statim amore
 complecterer, quem oculis ignorabam; & illud mecum ta- *Psal. 94*
 citus musitarem: Quis dabit mihi pennas, sicut colum-
 ba? & uolabo, & requiescam; ut inueniat, quem diligit,
 anima mea. Vere nunc in te sermo Dominicus completus
 est: Multi ab oriente & occidente uenient, & recumbent *Matth. 8*
 in sinu Abrahae. Cornelius, centurio cohortis Italicae, iam *Act. 10*
 tunc Lucinii mei praefigurabat fidem. Apostolus Paulus scri- *Rom. 15*
 bens ad Romanos, Cum, inquit, in Hispaniam proficisci
 coepero, spero quod praeteriens uideam uos, & a uobis de-
 ducar illuc: tantis fluctibus approbavit, quid de illa provin-
 cia quaereret. In breui tempore ab Hierosolymis usque ad
 Illyricum euangelii iaciens fundamenta, Romam ninctus in-
 greditur; ut uinctos superstitionis erroribus liberos faciat.
 Manet in hospitio conducto per biennium, ut nobis utrius- *Act. 28*
 que instrumenti aeternam reddat domum. Piscator homi-
 num, missa rete apostolico, te quoque quasi pulcherrimum
 aurata inter innumera piscium genera traxit ad litus. Re-
 liquisti amaros fluctus, salfos gurgites, fissuras montium,
 & Le-

Iob 40 & Leviathan regnantem in aquis, cum Iesu deserta ex-
 tens contempnisti, ut possis illud propheticum canere: In
Psal. 62 terra deserta, & in intuitu, & in aquoso, sic in sancto apparui
Psal. 54 tibi. Et iterum: Ecce elongari fugiens, & mansi in solitu-
 dine. Expectabam eum, qui saluum me fecit pusillanimita-
 te spiritus & tempestate. Obsecro ergo te, & monco paren-
 tis affectu, ut, qui Sodomam reliquisti, ad mōtana festinās,
Gen. 19 post tergum ne respicias: ne aratri stiuam, ne fimbriam sal-
Luc. 9 uatoris, ne cincinnos eius, noctis rore madefactos, quos
Cant. 5 semel tenere cōpisti, aliquando dimittas: ne de tecto uirtu-
Matth. 24 tum pristina quæsiturus uestimēta descendas: ne de agro re-
 uertaris domum: ne campestria cum Loth & amœna hor-
Gen. 13 torum diligas; quæ non irrigantur de cælo, ut terra sancta,
 sed de turbido flumine Iordanis, postquam dulces aquas
 maris mortui commixtione mutauit. Cœpisse, multorum
 est; ad culmen peruenisse, paucorum. Qui in stadio cur-
1. Cor. 6 runt, omnes quidem currunt, sed unus accipit brauium.
1. Cor. 9 At contra de nobis dicitur: Sic currite, ut apprehendatis.
 Non est inuidus agonothesa noster: nec alterius palma al-
 teri parat ignominiam. omnes athletas suos desiderat coro-
 nari. Gaudet anima mea, & magnitudine lætitiæ rem mæro-
Ruth 1 ris patior. Ruth in lacrymas uerba prorumpit. Zachæus
Luc. 19 publicanus ad unius horæ conuersionem, hospitem habere
Ioan. 12 meruit saluatorem. Martha & Maria, conuiuio præpara-
Luc. 7 to, Dominum suscipere. Meretrix lauat fletibus pedes,
 & unguentis bonorum operum Dominici corporis dedicat
Mar. 14 sepulturam. Simon leprosus inuitat magistrum cum disci-
Gen. 12 pulis, & non contemnitur. Abraham dicitur: Egredere de
 terra tua, & de cognatione tua, & de domo patris tui; & ua-
 de in terram, quam monstrauero tibi. relinquit Chaldæā,
 relinquit Mesopotamiam: quærit, quod nescit; ne perdat,
 quod inuenerat. nō enim arbitratus est simul se habere pos-
 se & patriam & Dominum, sed iam tunc illud prophetæ Da-
Psal. 38 uid opere complebat: Aduena ego sum apud te, & peregri-
 nus, sicut omnes patres mei. Hebræus, id est, *ἑβραῖος*,
 atque transitor, dum non est præsentis uirtute contentus,
 sed

sed præteritorum obliuiscens, in futurum se extendit, & scit illud: Ibunt de uirtute in uirtutem: mysticum sortitus est nomen, & uiam tibi aperuit, quo modo non quæras ea, quæ tua sunt, sed quæ aliena: & illos putes parentes, fratres, affines, atque cognatos, qui tibi in Christo copulati sunt. Mater, inquit, mea, & fratres mei sunt hi, qui faciunt uoluntatem patris mei. Habes tecum prius in carne, nunc in spiritu sociam, de coniuge germanam, de femina iurum, de subiecta parem; quæ sub eodem iugo ad cælestia simul regna festinat. Cauta rei familiaris dispensatio, & ad calculos rediens, non cito deponitur. Ioseph cum tunica Aegyptiam effugere non potuit. Adolescens ille, qui opertus sine done sequebatur Iesum, quia tentus fuerat a ministris, terrenum abiiciens operimentum, nudus euasit. Helias igneo curru raptus ad cælum, meloten reliquit in terris. Helisæus boues & iuga prioris operis uertit in uota. Loquitur sapientissimus uir: Qui tangit picem, inquinabitur ab ea. Quam diu uersamur in rebus sæculi, & anima nostra possessionum ac reddituum procuracione deuincta est, de Deo libere cogitare non possumus. Quæ enim participatio iustitiæ cum iniquitate, aut quæ societas lucis ad tenebras? qui consensus Christi ad Belial? quæ pars fidei cum infidei? Non potestis, inquit Dominus, Deo seruire, & mammonæ. Aurum deponere, incipientium est, non perfectorum. fecit hoc Crates Thebanus, fecit Antisthenes. se ipsum offerre Deo, proprie Christianorum est, & apostolorum: qui duo cum uidua paupertatis suæ in gazophylacium æra mittentes, totum censum, quem habuerunt, Domino tradiderunt, & merentur audire: Sedebitis super duodecim solia, iudicantes duodecim tribus Israel. Hæc, & ipse intelligis, quo animo replicem, & quod sub aliis uerbis te ad sanctorum locorum inuitem habitaculum. Abundantia tua multorum inopiâ sustentauit; ut & horum diuitiæ in tuam indigentiam redûdarent. Fecisti tibi amicos de iniquo mammona, qui te reciperent in æterna tabernacula. Laudanda res, & apostolicorum temporum uirtutibus cœquanda; quando, uenditis

Psal. 83

Matth. 12

Gen. 39

Mar. 14

4. Reg. 2

3. Reg. 19

Eccli. 13

2. Cor. 6

Matth. 6

Luc. 21

Matth. 19

Luc. 16

tis

Act. 4 tis possessionibus suis, credentes afferebant pecunias, atque fundebant ante pedes apostolorum, ostendentes auaritiam esse calcandam. Sed Dominus magis quærit animas
Prov. 13 credentium, quam opes. Legimus: Redemptio animæ uiri, propriæ diuitiæ. Possumus quidem diuitias proprias intelligere, quæ non de alieno, non de rapinis sunt: iuxta illud:
Prov. 3 Honora Deum de tuis iustis laboribus. sed melior est intelligentia, ut diuitias proprias cognoscamus thesauros
Luc. 12 absconditos, quos nec fur possit suffodere, nec latro uiolentus eripere. Opuscula mea, quæ non sui merito, sed tua bonitate desiderare te dicis, ad describendum hominibus tuis dedi, & descripta uidi in chartaceis codicibus; ac frequenter monui, ut conferrent diligentius, & emendarent. ego enim tanta uolumina, præ frequentia commeantium, & peregrinorum turbis, relegere non potui: & ut ipsi probauerent præsentibus, longo tentus incommodo, uix diebus quadragessimæ, quibus ipsi proficiscebantur, respirare cœpi. unde, si paragrammata repperis, uel minus aliqua descripta sunt, quæ sensum legentis impediunt; non mihi debes imputare, sed tuis, & imperitiæ notariorum, libriorumque incuriæ; qui scribunt, non quod inueniunt, sed quod intelligunt; & dum alienos errores emendare nituntur, ostendunt suos. Porro Iosephi libros, & sanctorum Papiæ & Polycarpi uolumina, falsus ad te rumor pertulit, a me esse translata: quia nec otii mei, nec uirium est, tantas res eadem in alteram linguam exprimere uenustate. Origenis & sancti Didymi pauca transtulimus, uolentes nostris ex parte ostendere, quid Græca doctrina retineret. Canonem Hebraicæ ueritatis, excepto Heptateucho, quem nunc in manibus habeo, pueris tuis & notariis dedi describendum. Septuaginta interpretum editionem & te habere non dubito, & ante annos plurimos diligentissime emendatam, studiofis tradidi: nouum testamentum Græcæ reddidi auctoritati. ut enim ueterum librorum fides de Hebræis uoluminibus examinanda est, ita nouorum Græci sermonis normam desiderat. De sabbato quod quæris, utrum ieiunandum sit;
&

& de eucharistia, an accipienda quotidie, quod Romanæ ec-
clesiæ & Hispaniæ obseruare perhibentur; scripsit quidē &
Hippolytus, uir disertissimus, & carptim diuersi scriptores
e uariis auctoribus edidere: sed ego illud te breuiter admo-
nendum puto, traditiones ecclesiasticas, præsertim quæ fidei
nō officiant, ita obseruandas, ut a maioribus traditæ sunt;
nec aliorum consuetudinem aliorum cōtrario more subuer-
ti. atque utinam omni tempore ieiunare possimus; quod
in Actibus apostolorum diebus Pentecostes & die Domini- *Act. 13. 20. 27*
co apostolum Paulum, & cum eo credētes fecisse legimus.
nec tamen Manichææ hæreseos accusandi sunt; cum carna-
lis cibus præferri nō debuerit spirituali. Eucharistiam quo-
que absque condemnatione nostri, & pungente conscien-
tia, seniper accipere, & psalmistam audire, dicentem: Gu *Psal. 33*
stare, & uidete, quoniam suavis est Dominus: & cum eo ca-
nere, Eructauit cor meum uerbum bonum. Nec hoc dico, *Psal. 44*
quod Dominicis diebus ieiunandum putem, & contextas
quingenta diebus ferias auferam: sed unaquæque pro-
uincia abundet in sensu suo, & præcepta maiorum leges
apostolicas arbitretur. Duo palliola, & amphyallum de
tuis uisibus uel utenda, uel sanctis danda suscepi. Ego insi-
gnia paupertatis, & quotidianæ symbolia pænitentiae, tibi
& sorori tuæ misi, quattuor ciliciola apta proposito & uis-
ibus uestris, & codicem, hoc est uisiones Esaiæ ualde obscu-
rissimas, quas nuper historica explanatione disserui: ut,
quotiescumque mea opuscula uideris, toties amici dulcis-
simi recordatus, nauigationem, quam parumper distuleras,
pares. Et quia nō est in homine uia eius, & a Domino gres- *Hier. 10*
sus hominis diriguntur: si forte, quod procul absit, aliquid *Psal. 36*
fuerit impimenti; quæso, ut, quos caritas iungit, terra-
rum longitudo non separet; & absentem Lucinium no-
strum, semper præsentem litterarum uicissitudine sentia-
mus.

ARGV-

LVCINIVS Beticus, ad quem superior extat epistola, dum esset in procinctu pergendi in Bethlehem, obiit. D. Hieronymus Theodoram uxorem, cum qua, uti cum sorore, caste uiuebat, nunc consolatur, & Lucinii laudes describit.

HIERONYMVS AD THEODORAM

epitaphium Lucinii Bæti.

EPISTOLA XXIX.

VGVBR I nuncio consternatus super sancti & uenerabilis mihi dormitione Lucinii, uix breuem epistolam dictare potui: non quod eius uicem dolens, quem scio ad meliora transisse, dicente Moyse: Transiens uidebo uisionem hanc magnam: sed quo torquear desiderio, non meruisse me eius uiri uidere faciem, quem in breui tempore huc uenturum esse credebam. Verum est illud super necessitate mortis prophetale uaticinium, quod fratres diuidat, & carissima inter se nomina crudelis & dura dissociet. Sed habemus consolationem, quia Domini uoce iugulatur, per quem ad eam dicitur: Ero mors tua o mors, era morsus tuus inferne. Et in consequentibus: Adducet urentem uentum Dominus de deserto ascendentem, qui siccabit omnes uenas eius, & desolabit fontem illius.

Exo. 3 Exiuit enim uirga de radice Iesse, & flos de uirginali frutice pullulauit. Qui loquitur in Cantico canticorum: Ego flos campi, & lilium conuallium. Flos noster mortis interitus: ideoq. & mortuus est, ut mors illius morte moreretur. Quod autem de deserto dicitur adducendus, uirginalis uterus demonstratur, qui absque coitu & semine uiri Deum nobis fudit infantem; qui calore Spiritus sancti exiccaret fontes libidinum, & caneret in psalmo: In terra deserta, & inuia, & inaquosa, sic in sancto apparui tibi. Aduersum ergo mortis duritiam, & crudelissimam necessitatem hoc solatio

solatio erigimur, quod breui uisuri sumus eos, quos dole-
mus absentes. Neque enim mors, sed dormitio, & som-
nus appellatur. unde & beatus Apostolus uetat de dor-
mientibus contristari: ut, quos dormire nouimus, suscita-
ri posse credamus, & post digestum soporem uigilare cum
sanctis, & cum angelis dicere: Gloria in excelsis Deo, & in
terra pax hominibus bonæ uoluntatis. In cælo, ubi non
est peccatum, gloria est, & perpetua laus, & indefessa præ-
conia. In terra autem, ubi seditio, bella, atque discordiæ,
pax imprecanda est, & pax non in omnibus, sed in iis,
qui bonæ uoluntatis sunt, & salutationem audiunt Aposto-
licam: Gratia uobis & pax a Deo patre, & Domino nostro
Iesu Christo multiplicetur: ut in pace sit locus eius, & ha-
bitatio eius in Sion, idest, in specula, in sublimitate dog-
matum atque uirtutum, in anima credentis: cuius quoti-
die angelus uidet faciem Dei, & reuelato uultu, gloriam
Dei contemplatur. Vnde, obsecro te, & currentem, ut
aiunt, impello, ut Lucinium tuum desideres quidem ut fra-
trem, sed gaudeas regnare cum Christo: quia raptus est,
ne malitia immutaret mentem eius. placita enim erat Deo
anima illius, & in breui spatio tempora multa compleuit.
Nos dolendi magis, qui quotidie stamus in prælio peccato-
rum, uitiiis sordidamur, accipimus uulnera, & de otioso uer-
bo reddituri sumus rationem. Ille iam securus & uictor te
aspicit de excelsis, & fauet laboranti: & iuxta se locum præ-
parat, eodem amore & eadem caritate, qua, oblitus offi-
cii coniugalis, in terra quoque sororem te habere cœperat,
immo tu illum fratrem: quia casta coniunctio sexum non
habet nuptialem. Et si adhuc in carne positi & renati in
Christo, non sumus Græci & barbarus, seruus & liber,
masculus & femina, sed omnes in eo unum sumus: quan-
to magis, cum corruptiuum hoc induerit incorruptionem,
& mortale hoc induerit immortalitatem, non nubent, ne-
que nubentur, sed erunt sicut angeli in cælis? Quando di-
cit; Non nubent, neque nubentur, sed erunt sicut ange-
li in cælis: non natura & substantia corporum tollitur, sed
gloriæ

1. Tes. 4

Luc. 2

1. Petr. 1

Psal. 75

Matth. 18

2. Cor. 3

Sap. 4

Matth. 12

Gal. 3

1. Cor. 15

Matth. 22

gloriæ magnitudo monstratur. neque enim scriptum est, Erunt angeli, sed, Sicut angeli. ubi similitudo promittitur, ueritas denegatur. Erunt, inquit, sicut angeli, idest, similes angelorum: ergo homines esse non desinent: inclyti quidem, & angelico splendore decorati, sed tamen homines: ut apostolus apostolus sit, & Maria Maria; & confundatur hæresis; quæ ideo incerta & magna promittit, ut, quæ certa & moderata sunt, auferat. Et quia hæreseos semel fecimus mentionem; qua Lucinius noster digne eloquentiæ tuba prædicari potest? qui, spurcissima per Hispanias Basilidis hæresi sæuiente, &, instar pestis & morbi, totas intra Pyrenæum & Oceanum uastante provincias, fidei ecclesiasticæ tenuit puritatem, nequaquam suscipiens Armagil, Barbelon, Abraxas, Balsamum, & ridiculum Leusiboram, ceteraq. magis portenta, quam nomina; quæ, ad imperitorum & muliercularum animos concitandos, quasi de Hebraicis fontibus hauriunt, barbaro simplices quosque terrentes sono; ut, quod non intelligunt, plus mirentur. Refert Hirenæus, uir apostolicorum temporum, & Papiæ, auditoris euangelistæ Ioannis, discipulus, episcopus ecclesiæ Lugdunensis, quod Marcus quidam, de Basilidis gnostici stirpe descendens, prima ad Gallias uenerit; & eas partes, per quas Rhodanus & Garumna fluunt, sua doctrina maculauerit; maximeq. nobiles feminas, quædam in occulto mylteria repromittens, hoc errore seduxerit, magicis artibus, & secreta corporum uoluptate amorem sui concilians; inde, Pyrenæum transiens, Hispanias occuparit, & hoc studii habuerit, ut diuitum domos, & in ipsis feminas maxime appeteret, quæ ducuntur uariis desiderijs, semper discentes, & numquam ad scientiam ueritatis peruenientes. Hoc ille scripsit ante annos circiter trecentos, & scripsit in iis libris, quos aduersus omnes hæreses doctissimo & eloquentissimo sermone composuit. Ex quo perpendat prudentia tua, qua Lucinius noster laudem sit dignus; qui clausit aurem, ne audiret iudicium sanguinis; & omnem substantiam suam disperfit, & dedit pauperibus,

2. Tim. 3

ribus, ut iustitia eitis maneret in æternum: nec patriæ suæ largitate contentus, misit Hierosolymarum & Alexandrinæ ecclesiæ tantum auri, quanto multorum possit inopiæ subueniri. quod cum multi mirentur, & prædicent; ego in illo magis laudabo feruorem, & studium scripturarum. quo ille desiderio opuscula nostra flagitauit; & missis sex notariis, quia in hac prouincia Latini sermonis scriptorumque penuria est, describi sibi fecit, quæcumque ab adolescentia usque in præsens tempus dictauimus: non nos honorauit, qui paruuli & minimi Christianorum omnium sumus, & ob cōscientiam peccatorū, Bethlehemitici ruris saxa incolimus; sed Christum, qui honoratur in seruis suis, & apostolis repromittit, dicens: Qui uos recipiunt, me recipiunt: & qui me recipiunt, recipiunt eum, qui me misit. Itaque, carissima filia, hanc epistolam amoris mei in illum habeto epitaphium; & quidquid posse me scieris in opere spirituali, audacter impera; ut sciant sæcula post futura, eum, qui dicit in Esaia: Posuit me ut sagittam electam, in pharetra sua ascondit me: duos uiros, tantis maris atque terrarum inter se spatiis separatos, suo acumine uulnerasse; ut, cum mutuo in carne se nesciant, amore spiritus copulentur. Subscriptio. Sanctam te corpore & spiritu seruet ille Samaritanus, idest, seruator & cultor, de quo in psalmo scribitur: Non dormitabit, neque dormiet, qui custodit Israel: ut Hir, qui interpretatur uigil, qui descendit ad Danielelem, ad te quoque ueniat, & possis dicere: Ego dormio, & cor meum uigilat.

Psal. 111

Matth. 10

Esa. 49

Psal. 120

Dan. 4

Cant. 5

T ARGV-

FABIOLAM, nobilem Romanam, quæ, uiro ob adulterium dimisso, alteri perperam nupsit, nunc D. Hieronymus laudat, quod post errorem publica penitentia elutum, ad Christum conuersa, sanctam traduxerit uitam, & cunctis facultatibus suis in pauperes distributis, post reditum ex sanctis Hierosolymæ locis obierit.

HIERONYMVS AD OCEANVM.

epitaphium Fabiolæ.

EPISTOLA XXX.

LVRES anni sunt, quod super dormitione Blæ-
P fillæ Paulam, uenerabilem feminam, recenti adhuc uulnere, consolatus sum. quartæ ætatis circulus uoluitur, ex quo, ad Heliodorum episcopum Nepotiani scribens epitaphium, quidquid habere potui uirum, in illo tunc dolore consumpsi. ante hoc ferme biennium Pammachio meo pro subita peregrinatione Paulinæ breuem epistolam dedi, erubescens ad disertissimum uirum plura loqui, & ei suâ ingerere; nè non tam consolari amicum uiderer, quam stulta iactantia docere perfectum. nunc mihi, fili Oceane, uolenti, & ultro appetenti, debitum munus imponis; quod pro nouitate uirtutum, ueterem materiam nouam faciam. in illis enim uel parentis affectus, uel maior anunculi, uel desiderium mariti temperandum fuit, & pro diuersitate personarum, diuersa de scripturis adhibenda medicamina. in præsentiarum tradis mihi Fabiolam, laudem Christianorum, miraculum gentilium, luctum pauperum, solatium monachorum. Quidquid primum arripuero, sequentium comparatione uilescit. Ieiunium prædicem? sed præualefcunt eleemosynæ. Humilitatem laudem? sed maior est fidei ardor. Dicam appetitas fordes, & in condemnationem uestium sericarum, plebeium cultum, & seruilia indu-

indumenta quæ sita plus est animum deposuisse, quam cul-
tum. difficilius arrogantia, quam auro, caremus, & gem-
mis. his enim abiectis, interdum gloriosis tumemus sordi-
bus, & uendibilem paupertatem populari auræ offerimus.
Celata uirtus, & conscientie fota secreto, Deum solum iu-
dicem respicit. Vnde nouis mihi est efferenda præconiis, &
ordine rhetorum prætermisso, tota de confessionis ac pæ-
nitentie incunabulis assumenda. Alius forsitan, scholæ me-
mor, Q. Maximum, Vnus qui nobis cunctando restituit
rem, & totam Fabiorum gentem proferret in medium: di-
ceret pugnas: describeret prælia; & per tantæ nobilitatis
gradus Fabiolam uenisse iactaret: ut, quod in uirga non po-
terat, in radicibus demonstraret. Ego, diuersorii Bethlehe-
mitici, & præsepis Domini amator, in quò uirgo puerpera
Deum fudit infantem, ancillam Christi non de nobilitate
ueteris historie, sed de ecclesiæ humilitate producam. Et
quia statim in principio quasi scopulus quidam, & procel-
la mihi obtrektorum eius opponitur, quod, secundū sor-
tita matrimonium; primum reliquerit: non laudabo con-
uersam, nisi prius ream absoluero. Tanta prior maritus ui-
tia habuisse narratur, ut ne scortum quidem & uile manci-
pium ea sustinere posset. quæ si uoluerò dicere, perdā uir-
tutem feminæ; quæ maluit culpam subire disidii, quā cor-
poris sui infamare partem, & maculas eius detegere. hoc
solum proferam, quod uerecundæ matronæ & Christianæ
satis est. Præcepit Dominus uxorem non debere dimitti, *Matth. 5*
excepta causa fornicationis, & si dimissa fuerit, manere in- *1. Cor. 7*
nuptam. Quidquid iuris iubetur, hoc consequenter redun-
dat in feminas. neque enim adultera uxor dimittenda est,
& uir mæchus retinendus: Si, qui meretrici iungitur, unū *1. Cor. 6*
corpus facit: ergo, & quæ scortatori impuroq. sociatur,
unum cum eo corpus efficitur. Aliæ sunt leges Cæsarum,
aliæ Christi: aliud Papinianus, aliud Paulus noster præci-
pit. apud illos uiris impudicitie frena laxantur; & solo stu-
pro atque adulterio condemnato, passim per lupanaria &
ancillulas libido permittitur; quasi culpam dignitas faciat,

T 2 non

non uoluntas : apud nos, quod non licet feminis, æque nō
 licet uiris ; & eadem seruitus pari condicione censetur . Di-
 misit ergo , ut aiunt , uitiosum : dimisit illius & illius crimi-
 nis noxium : dimisit , pene dixi , quod , clamante uicinia ,
 uxor sola non prodidit . Sin autem arguitur , quare , repu-
 diato marito , non innupta permanserit : facile culpam fa-
 tebor , dum tamen referam necessitatem . Melius est , in-
 quit Apostolus , nubere , quam uri . Adolescentula erat , ui-
 ditatem suam seruare non poterat . uidebat aliam legem
 in membris suis repugnātem legi mentis suæ , & se uinctam
 & captiuam ad coitum trahi . melius arbitrata est , aperte
 confiteri imbecillitatem suam , & umbram quandam mise-
 rabilis subire coniugii , quam sub gloria uniuiuæ opera exer-
 cere meretricum . Idem Apostolus uult uiduas adolescentu-
 las nubere , filios procreare , nullam dare occasionem ad-
 uersario maledicti gratia : & protinus , cur hoc uelit , expo-
 nit : Iam enim quædam abierunt retro post satanam . Igi-
 tur & Fabiola , quia persuaferat sibi , & putabat a se uiuiri
 iure dimissum , nec euangelii uigorem nouerat , in quo nu-
 bendi uniuersa causatio , uiuentibus uiris , feminis amputa-
 tur ; dum multa diaboli uitat uulnera , unum incauta uul-
 nus accepit . Sed quid ego in abolitis & antiquis moror ,
 quarens excusare culpam , cuius pænitentiam ipsa confessæ
 est ? Quis hoc crederet , ut , post mortem secundi uiri in se-
 met ipsam reuersa , quo tempore solent uiduæ negligentes ,
 iugo seruitutis excusso , agere se liberius , adire balneas , uo-
 litare per plateas , uultus circumferre meretricis , faccum in-
 dueret ; ut errorem publice fateretur ; & , tota urbe spectan-
 te Romana , ante diem Paschæ in basilica quondam Latera-
 ni , qui Casariano truncatus est gladio , staret in ordine pæ-
 nitentium , episcopo , presbyteris , & omni populo colla-
 crymantibus ; sparsum crinem , ora lurida , squalidas ma-
 nus , sordida colla submitteret ? Quæ peccata fletus iste nō
 purget ? quas inueteratas maculas hæc lamenta nō abluāt ?
 Petrus trinam negationem trina confessione deleuit . Aarō
 sacrilegium , ob conflatum ex auro uituli caput , fraternæ
 cor-

Ioan. 21

Exod. 32

correxere preces . David, sancti & māsuetissimi uiri, homici-
dium pariter & adulterium septem dierum emendauit fa-
mes . iacebat in terra ; uolutabatur in cinere ; &, oblitus re-
giæ potestatis , lumen quærebat in tenebris : illumq. tantū
respiens, quem offenderat , lacrymali uoce dicebat : Tibi *Psal. 50*
soli peccaui, & malum coram te feci . Et : Redde mihi lati-
tiam salutaris tui, & spiritu principali confirma me . Atque
ita factum est, ut, qui me prius docuerat uirtutibus suis,
quo modo stans non caderem, doceret per pænitentiam,
quo modo cadens resurgerem . Quem tam impium legi-
mus inter reges , quam Achab , de quo scriptura dicit : Nō
fuit alius talis ut Achab : qui uenundatus est , ut faceret ma-
lum in cōspectu Domini ? Hic cum propter sanguinem Na-
buthæ correptus fuisset ab Helia , & audisset iram Domini
per prophetā : Occidisti , & insuper possedisti : & ecce ego
inducam super te malum, & demetam posteriora tua : & re-
liqua : scidit uestimenta sua , & operuit cilicio carnem suā :
ieiunabatq. in sacco , & ambulabat demisso capite . Tunc
factus est sermo Dei ad Heliam Thesbyten, dicens . Non-
ne uidisti Achab humiliatum coram me ? quia ergo humi-
liatus est mei causa, non inducam malum in diebus eius . O
felix pænitentia ; quæ ad se Dei traxit oculos ; quæ furentē
sententiam Dei , confesso errore , mutauit . Hoc idem &
Manassen in Paralipomenon, & Niniuen fecisse, legimus in *2. Par. 33*
propheta , publicanum quoque in euangelio . e quibus pri-
mus non solum indulgentiam , sed & regnum recipere me-
ruit : alter impendentem Dei fregit iram : tertius, pectus
uerberans pugnis, oculos non leuabat ad cælum . & multo
iustificatio recessit publicanus humili confessione uitiorū,
quam pharisæus superba iactatione uirtutum . Non est lo-
ci huius , ut pænitentiam prædicem, & , quasi contra Mō-
tanum : Nouatumq. scribens , dicam illam hostiam Domi-
no esse placabilem : Et, Sacrificium Deo, spiritum contri-
bulatum : Et, Malo, pænitentiam peccatoris, quam mor-
tem : Et, Exurge, exurge Hierusalem : & multa alia, quæ
prophetarum clangunt tubæ . hoc unum loquar, quod &
T 3 legem

- legentibus utile sit, & præsenti causæ conueniat. Non est
Luc. 9 confusa Dominum in terris, & ille eam non confundet in
 cælo. Aperuit cunctis uulnus suum, & decolorem in cor-
 pore cicatricem flens Roma conspexit. Dissuta habuit late-
 ra, nudum caput, clausum os. Non est ingressa ecclesiam
Num. 12 Domini, sed extra castra cum Maria sorore Moyfi, separa-
 ta confedit; ut, quam sacerdos eiecerat, ipse reuocaret. De
Esa. 47 scendit de solio deliciarum suarum, accepit molam, fecit fa-
 rinam, & discalciatis pedibus, transiit fluenta lacrymarum.
 sedit super carbones ignis. hi ei fuere in adiutorium. Fa-
 ciem, per quam secundo uiro placuerat, uerberabat: ode-
 rat gemmas, linteamina uidere non poterat, ornamenta fu-
 giebat. sic dolebat, quasi adulterium commisisset; & mul-
 tis inpendiis medicaminum unum uulnus sanare cupiebat.
 Diu morati sumus in pænitentia: in qua, uelut in uadosis
 locis, resedimus; ut maior nobis & absque ullo impedimē-
 to se laudum eius campus aperiret. Recepta sub oculis
Ecclesi. 11 omnis ecclesiæ communionem, quid fecit? Scilicet in die bo-
 na malorum non oblita est; & post naufragium rursum ten-
 tare noluit pericula nauigandi. quin potius omnem censum,
 quem habere poterat, (erat autem amplissimus, & respo-
 dens generi eius) dilapidauit, ac uendidit; & in pecuniam
 congregatum, uisibus pauperum præparauit; & prima om-
 nium *νοσοκομειον* instituit, in quo ægotantes colligeret
 de plateis, & consumpta languoribus atque inedia misero-
 rum membra foueret. Describam ego nunc diuersas homi-
 num calamitates, truncas nares, effossos oculos, semiui-
 stos pedes, luridas manus, tumentes aluos, exile femur,
 crura turgentia, & de exes ac putridis carnibus uermiculos
 bullientes? Quoties morbo regio & pedore confectos hu-
 meris suis ipsa portauit? quoties lauit purulentam uulnerum
 faniem, quam alius aspicere non ualebat? Præbebat cibos
 propria manu, & spirans cadauer sorbitiunculis irrigabat.
 Scio multos diuites & religiosos, ob stomachi angustiam,
 exercere huiusmodi misericordiam per aliena ministeria, &
 clementes esse pecunia, non manu. quos equidem non re-
 probo;

probo; & teneritudinem animi nequaquã interpreter infidelitatem: sed, sicut imbecillitati stomachi ueniã tribuo, sic perfectæ mentis ardorem in cælum laudibus fero. Magna fides ista contemnit. Scit, quid in Lazaro diues purpuratus aliquando non fecerit, quali superba mens retributione damnata sit. Ille, quem despiciamus, quem uidere nõ possumus, ad cuius intuitum nobis uomitus erumpit, nostri similis est, de eodem nobiscum formatus est luto, iisdẽ compactus elementis. quidquid patitur, & nos pati possumus. uulnera eius existimemus propria: & omnis animi in alterum duritia, clementi in nosmet ipsos cogitatione frangitur. Non mihi si linguæ centum sint, oraq. centum, Ferrea uox, Omnia morborum percurrere nomina possim, Quæ Fabiola in tanta miserorum refrigeria commutauit, ut multi pauperum sani languentibus inuiderent. Quamquam illa simili liberalitate erga clericos, & monachos, ac uirgines fuerit. Quod monasterium non illius opibus sustentatum est? quem nudum, & clinicum non Fabiolæ uestimenta texerunt? in quorum se indigentiam non effudit præceps & festina largitio? Angusta misericordiæ eius Roma fuit. peragrabat ergo insulas, & totum Etruscum mare; Volscorumq. prouinciam, & reconditos curuorum litorũ sinus, in quibus monachorum consistunt chori, uel proprio corpore, uel transmissa per uiros sanctos ac fideles munificentia, circumibat. unde repente, & contra opinionem omnium Hierosolymam nauigauit: ubi multorum excepta concursu, nostro parumper usa est hospitio: cuius societatis recordans, uideor mihi adhuc uidere, quam uidi. Iesu bone, quo illa seruire, quo studio intenta erat diuinis uoluminibus? &, ueluti quandam famem satiare desideras, per prophetas, euangelia, psalmosq. currebat, quæstiones & proponens, & solutas recondens in scriniolo pectoris sui. Nec uero satiabatur audiendi cupidine; sed addens scientiam, addebat dolorem, & quasi oleum flammæ adiiciens, maioris ardoris fomenta capiebat. Quodam die, cum in manibus Moysi Numeros teneremus, & me uerecunde ro-

Luc. 16

Eccl. 1

T 4 garet,

garet, quid sibi uellet nonnium tanta congeries; cur singula tribus in aliis atque aliis locis uarie iungerentur; quo modo Balaam ariolus sic futura Chrysi myteria prophetarit, ut nullus propemodum prophetarum tam aperte de eo uaticinatus sit: respondi, ut potui, & uisus sum interrogatoni eius satisfacere. Reuoluens ergo librum, peruenit ad eum locum, ubi catalogus describitur omnium mansionum, per quas de Aegypto egrediens populus, peruenit usque ad flumen Iordanis: cumque causas quaereret & rationes singularum; in quibusdam haesitavi; in aliis inoffenso cucurri pede; in plerisque simpliciter ignorantiam confessus sum. tunc uero magis coepit urgere, & quasi non mihi liceret nescire, quod nescio, expostulare, ac se indignam tantis mysteriis dicere. Quid plura? Extorsit mihi negandi uerecundia, ut proprium ei opus huiusmodi disputatiunculam pollicerer; quod usque in praesens tempus, ut nunc intelligo, Domini uoluntate dilatum, reddetur memoriae illius; ut sacerdotalibus prioris ad se uoluminis induta uestibus, per mundi huius solitudinem gaudeat se ad terram repromissionis aliquando uenisse. Verum, quod coepimus, prosequamur. Quarentibus nobis dignum tantae feminae habitaculum, cum illa ita solitudinem cuperet, & diuersorio Mariae carere nollet; ecce subito discurrentibus nunciis, oriens totus intremuit ab ultima Maetide inter glaciale Tanain, & Massagetarum immanes populos, ubi Caucaei rupibus feras gentes Alexandri claustra cohibent, erupisse Hunnorum examina, quae pernicibus equis huc illucque uolitantia, caedis pariter ac terroris cuncta complerent. aberat tunc Romanus exercitus, & bellis civilibus in Italia tenebatur. hanc gentem Herodotus refert sub Dario rege Medorum uiginti annis orientem tenuisse captiuum, & ab Aegyptiis atque Aethiopibus annum exegisse uestigal. Abigat Iesus ab orbe Romano tales ultra bestias. Insperati ubique aderant; & famam celeritate uincentes, non religioni, non dignitatibus, non aetati parcebant, non uagientis miserebatur infantiae. cogeantur mori, qui nondum uiuere coeperant: et nescientes

scientes malum suum, inter hostium manus ac tela ridebant. Consonus inter omnes rumor, petere eos Hierosolimam, & ob nimiam auri cupiditatem ad hanc urbem percurrere. Muri, neglecti pacis incuria, sarciebantur: Antiochia obsidebatur: Tyrus, se uolens a terra abrumperere, insulam quærebat antiquam. tunc & nos compulsi sumus parare naues, esse in litore, aduentum hostium præcauere, & seuientibus uentis, magis barbaros metuere, quam naufragium, non tam propriæ salutis, quam uirginum castimonie prouidentes. Erat in illo tempore quædam apud nos dissensio, & barbarorum pugnam domestica bella superabant. Nos in oriente tenuerunt iam fixæ sedes, & inueteratum locorum sanctorum desiderium. Illa, quia tota in sarcinis erat, & in omni urbe peregrina, reuersa est ad patriam; ut ibi pauper uiueret, ubi diues fuerat; manens in alieno, quæ multos prius hospites habuit; & ne sermonem longius protraham, in conspectu Romanæ urbis pauperibus erogaret, quod illa teste uenerat. Nos hoc tantum dolemus, quod pretiosissimum de sanctis locis monile perdidimus. recepit Roma, quod amiserat, & procax ac maledica lingua gentilium oculorum testimonio confutata est. Laudent ceteri misericordiam eius, humilitatem, fidem: ego ardorem animi plus laudabo. Librum, quo Heliodorum quondam iuuenis ad eremum cohortatus sum, tenebat memoriter; & Romana cernens moenia, inclusam se esse plangebat. oblita sexus, fragilitatis immemor, ac solitudinis tantum cupida, ibi erat, ubi animo morabatur. non poterat teneri consiliis amicorum: ita ex urbe, quasi de uinculis, gestiebat erumpere. Dispensationem pecuniæ, & cautam distributionem, genus infidelitatis uocabat. Non aliis distributionem elemosynarum tribuere, sed, suis pariter effusis, ipsa pro Christo stipem optabat accipere. Sic festinabat, sic impatiens erat morarum, ut illam crederes profecturam. itaque, dum semper paratur, mors eam inuenire non potuit imparatam. Inter laudes femine subito mihi Pammachius meus

exo-

- exoritur. Paulina dormit, ut iste uigilet: præcedit maritum, ut Christo famulum derelinquat. Hic heres uxoris, & hereditatis alii possessores. Certabant uir, & femina;
- Gen. 18** quis in portu, Abrahæ tabernaculum figeret: & erat hæc inter utrumque contentio, quis humanitate superaret. uicit uterque, & uterque superatus est. ambo se uictos & uictores fatentur, dum, quod alter cupiebat, uterque perfecit. iungunt opes, sociant uoluntates; ut, quod æmulatione dissipatura erat, concordia cresceret. Necdum dictum, iam factum. Emitur hospitium, & ad hospitium turba cõcurrit. Nõ
- Num. 23** est enim labor in Iacob, nec dolor in Israel. Adducunt maria, quos in gremio suo terra suscipiat. mittit Roma properantes, quos nauigaturos litus molle confoueat. Quod Publius semel fecit in insula Melite erga unum apostolum, &
- Act. 27.28** ne contradictioni locum tribuam, in una naui; hoc isti & frequenter faciunt, & in plures; nec solum inopum necessitas sustentatur, sed prona in omnes munificentia aliquid & habentibus prouidet. Xenodochium in portu Romano situm, totus pariter mundus audiuit. Sub una æstate didicit Britannia, quod Aegyptus & Parthus nouerant uere.
- Rom. 8** Quod scriptum est: Timentibus Dominum, omnia cooperantur in bonum: in obitu tantæ feminæ uidimus comprobatum. Quodam præfagio futurorum ad multos scripserat monachos, ut uenirent, & se graui onere laborantem
- Luc. 16** absoluerent, faceretq. sibi de iniquo mammona amicos, qui eam reciperent in æterna tabernacula. uenerunt; amici facti sunt: dormiuit illa, quo modo uoluit; & deposita tandem sarcina, leuior uolauit ad cælum. Quantum haberet uiuentis Fabiolæ Roma miraculum, in mortua demonstrauit. Necdum spiritum exhalauerat, necdum debitam Christo reddiderat animam: Et iam fama uolans, tanti prænuncia luctus, totius urbis populum ad exequias congregabat. sonabant psalmi; & aurata testa templorum, reboans in sublime quatiebat alleluia. Hic iuuenum chorus, ille senum, qui carmine laudes Femineas, & facta ferant. Non sic Furius de Gallis, non Papirius de Samnitibus, nõ
- Scipio

Scipio de Numantia, non Pompeius de Ponti gentibus triumphauit. illi corpora uicerant, hæc spirituales nequias subiugauit. Audio præcedentium turmas, & cateruatim in exequiis eius multitudinem confluentem. non plateæ, non porticus, non imminencia desuper tecta capere poterant prospectantes. tunc suos in unum populos Roma conspexit: fauebant sibi omnes in gloria pænitentis. nec mirum, si de eius salute homines exultarent, de cuius conuersione angeli lætabantur in cælo. Hoc tibi, Fabiola, ingenii mei senile munus, has officiorum inferias dedi. Laudauimus sæpe uirgines, uiduas, ac maritatas, quarum semper fuere candida uestimenta, quæ sequuntur agnum, quocumque uadit. Felix præconium, quod nulla totius uitæ sorde maculatur. procul liuor faceffat, absit inuidia. Si pater familias bonus est; quare oculus noster malus est? Quæ inciderat in latrones, Christi humeris reportata est. Multæ mansiones sunt apud patrem. Vbi abundauit pecatū, superabundauit gratia. Cui plus dimittitur, plus amat.

Luc. 15.

Matth. 20

Luc. 10. 15

Ioan. 14

Rom. 5

Luc. 7

ARGVMENTVM.

THEOPHILVS, Alexandrinæ ecclesiæ uicesimus primus Episcopus, miserat ad D. Hieronymum paschalem librum, ut eum in Latinum sermonem uerteret. excusat se nunc ei, quod serius uerterit, cum ualetudine, tum Paula obitu impeditus. librum laudat: & ut alia opera uel sibi legenda, uel uertenda transmittat, rogat.

HIERONYMVVS AD THEOPHILVM,

Episcopum Alexandrinum.

EPISTOLA XXXI.

XFO tempore, quo beatitudinis tuæ accepi epistolas, iuncto paschali libro, usque in præsentem diem ita & mærore luctus, & sollicitudine, ac diuersis super statu ecclesiæ hinc inde rumoribus exagitatus sum

sum, ut uix uolumen tuum potuerim in Latinum sermonem uertere. optime enim nosti, iuxta ueterem sententiam, non esse tristem eloquentiam, maxime si ad ægritudinem animi accedat corporis ægritudo. & hanc ipsam epistolam febre æstuans, & quintum iam diem decumbens lectulo, nimia festinatione dictaui, breuiter indicans beatitudini tuæ, magnum me laborem sustinuisse in translatione eius, ut omnes sententias pari uenustate transferrem, & Græcæ eloquentiæ Latinum aliqua ex parte responderet eloquiū. In principio philosopharis; & generaliter agens, dum omnes erudis, unum iugulas: in reliquis autem, quod uel difficillimum est, rhetoricæ eloquentiæ iungis philosophos, & Demosthenem, atque Platonem nobis consocias. O quanta dicuntur in luxuriam; quantis præconiis extollitur continentia; & de intimis sapientiæ disciplinis, diei ac noctis, lunæ cursus ac solis ratio, & mundi istius natura describitur: & hanc ipsam disputationem ad scripturarum refert auctoritatem; ne in paschali libro uidearis de sæcularibus quidquam fontibus mutuatus. Quid plura? In his laudare te uereor, ne assentandi crimen incurram. Optimus liber est, & in philosophis, & agens susceptam causam absque inuidia personarum. Vnde, obsecro te, ignoscas tarditati meæ. ita enim sanctæ & uenerabilis Paulæ confectus sum dormitione, ut absque translatione huius libri, usque in præsentiarum, nihil aliud diuini operis scripserim. perdidimus enim, ut ipse nosti, repente solatium; quod, ut conscientie nostræ testis est Dominus, non ad proprias ducimus necessitates, sed ad sanctorum refrigeria, quibus illa solícite seruiebat. Sancta & uenerabilis te, filia tua, Eustochium, quæ nullam pro matris absentia recipit consolationem, te uniuersa fraternitas suppliciter salutat. Libros, quos dudum scripssisse te nunciasti, uel legendos nobis, uel uertendos trans mitte. Vale in Christo.

ARGV.

ABIGAO, presbytero Hispano, quod non scripserit; se excusat; consolaturq. eum de corporis cecitate, asserens quod sponse, hoc est animæ oculum habeat. uirum præterea laudat, Theodoram commendat, & salutationem admiscet.

HIERONYMVS AD ABIGAVM.

EPISTOLA XXXII.

QVAMVIS mihi multorum sim conscius peccatorum; & quotidie in oratione flexis genibus loquar; Delicta iuuentutis meæ, & ignorantias meas *Psal. 2. 4* ne memineris: tamen sciens scriptum esse ab Apostolo, *1. Tim. 3* Ne inflatus superbia incidat in iudicium diaboli: Et in alio loco scriptum: Superbis Deus resistit, humilibus autem *1. Petr. 5* dat gratiam: nihil ita a pueritia conatus sum uitare, quam tumentem animum, & ceruicem erectam, Dei contra se odium prouocantem. noui enim, magistrum, & dominum, & Deum meum, in carnis humilitate dixisse: Discite a me, quia mitis sum, & humilis corde: & ante per os *Matth. 11* David cecinisse: Memento Domine David, & omnis manus *Psal. 131* suetudinis eius. Et in alio loco legimus: Ante gloriam humiliabitur cor uiri, & ante ruinam eleuatur. Itaque, obsecro te, ne me putes sumptis litteris tuis ante tacuisse; & aliorum uel infidelitatem, uel negligentiam in me referas. quid enim causæ erat, ut prouocatus officio tacerē, & amicitias tuas meo silentio repellerem, qui ultro soleo bonorum appetere necessitudinem, & me eorum ingerere caritati? Quia meliores sunt duo, quam unus: &, si alter ceciderit, *Eccl. 4* ab altero fulcietur. Funiculus triplex non facile rumpitur: & frater fratrem adiuuans exaltabitur. Scribe ergo audacter, & absentiam corporum crebro iunge sermone. Nec doleas, si hoc nō habeas, quod formiculae, & muscæ, & serpentes habent, id est, carnis oculos: sed illum te oculum habere

- Cant.** 4 bere lætare, de quo in Cantico dicitur canticorum: Vulnerasti me, soror mea sponsa, uno de oculis tuis, quo Deus uidetur: de quo a Moyse dicitur: Transiens uidebo uisionē hanc magnam. Denique quosdam etiam mundi philosophos legimus, ut totam cogitationem ad mentis cogerent puritatem, sibi oculos eruisse. Et a propheta dicitur: Intrauit mors per fenestras nostras. Et apostoli audiūt: Qui uidet mulierem ad concupiscendum eam: & reliqua. Vn
- Matth.** 5 uidet mulierem ad concupiscendum eam: & reliqua. Vn
- Ioan.** 4 de præcipitur eis, ut leuent oculos, & uideant segetes candidas, quæ præparatæ sunt ad metendum. Quod autē precaris, ut nostris monitis Nabuchodonosor, & Rapsaces, & Nabuzardan, & Holofernes in te occidantur: numquā nostra auxilia postulares, si in te uiuerent: sed quia illi in te mortui sunt, & cū Zorobabel, & cum Iesu filio Iosedech
- 1. Esd.** 3 sacerdote magno, cum Ezra quoque & Neemia ruinas Hierusalem ædificare cœpisti, nec mittis mercedes in pertusum sacculum, sed thesauros tibi in cælestibus paras; ideo nostras appetis amicitias, quos Christi famulos arbitraris. Sāctam filiam meam Theodoram, sororem beatæ memoriæ Lucini, per se commendatam, meo sermone commendo, ut in cepto itinere non lassetur; ut ad terram sanctam multo per eremum labore perueniat; ut non putet perfectam esse uirtutem exisse de Aegypto, sed per innumerabiles insidias ad montem Nabo, & ad Iordanem fluuium peruenire; ut accipiat secundam in Galgala circumcisionem; ut illi
- Num.** 33 muri Hiericho corruant, sacerdotalium tubarum subuersi clangoribus; ut iuguletur AdonizedeK; ut Hai, & Azor pulcherrimæ quondam corruant ciuitates. Fratres, qui nobiscum in monasterio sunt, te salutant. Sanctos, qui nos diligere dignantur, per te opido salutamus.

CASTRVTIVS Pannonius nauigare, ut Hieronymum inuiferet, constituerat. agit nunc ei gratias, & de oculorum cecitate consolatur, docens tribulationes ob amorem a Deo imitti; & sequenti se illum anno asserit expectare.

HIERONYMVS AD CASTRVTVM.

EPISTOLA XXXIII.

SANCTVS filius meus Heraclius diaconus mihi retulit, quod cupiditate nostri Cissam usque uenisses; & homo Pannonius, idest terrenum animal, non timueris Adriatici maris ætus, & Aegæi atque Ionii subire discrimina; &, nisi te pius fratrum retinuisset affectus, uoluntatem opere complexses. Habeo itaque gratias, & in acceptum refero. In amicis enim non res quæritur, sed uoluntas: quia alterum ab inimicis sæpe præbetur; alterum sola caritas tribuit. Simulq. obsecro, ne imbecillitatem corporis, quam sustines, de peccato tibi existimes euenisse. quod quidem & apostoli suspicantes de eo, qui natus erat cæcus ex utero, interrogantesq. Dominum saluatorem: Iste peccauit, an parentes eius, ut cæcus nasceretur? audiunt: Neque hic peccauit, nec parentes eius, sed ut manifestentur opera Dei in illo. Quantos enim cernimus ethnicos, atque Iudæos, hæreticos, atque diuersorum dogmatum homines, uolutari in cæno libidinum, maderere sanguine, feritate lupos, rapacitate miluos uincere, & nihilominus flagellum non appropinquare tabernaculis eorum, nec eos cum hominibus uerberari, & iccirco superbire contra Deum, & transire usque ad cælum os eorum? Cum sanctos econtrario uiros sciamus ægrotationibus, miseriis, & egestate torqueri, qui forsitan dicunt: Ergo frustra sanctificaui animam meam, & laui inter innocētes manus meas. Statimq. se reprehendentes aiunt: Si narrauero sic,

Ioan. 9

Psal. 90

Psal. 72

- ro sic, ecce nationem filiorum tuorum reprobaui. Si cæcitas causam putas esse peccatum, & id Dei inferre irā, quod
- Gen. 27* crebro medici remediuntur: infimulabis Isaac, qui in tantum lucis istius expers fuit, ut, etiam cui noller, errore de-
- Gen. 24* ceptus benediceret. Referes crimen in Iacob, cuius caligauerat acies: & cum interioribus oculis, & spiritu propheta li longe post futura prospiceret, & Christum cerneret de stirpe regia esse uenturum, Ephraim & Manassē uidere non
- 4. Reg. 23* poterat. Quid inter reges Iosia sanctius? Aegypto mucrone interfectus est. Quid Petro, quid Paulo sublimius? Neronianum gladium cruentarunt. Et (ut de hominibus taceam) Dei filius sustinuit ignominiam crucis. Et tu putas beatos, qui felicitate istius sæculi & deliciis perfruuntur? Magna ira est, quando peccantibus non irascitur Deus.
- Exe. 16* Vnde & in Ezechiele ad Hierusalem, Iam inquit, non irascar tibi: zelus meus recessit a te. Quem enim diligit Dominus, corripit, & castigat omnem filium, quem recipit. Non erudit pater, nisi quem amat. Non corripit magister discipulum, nisi eum, quem ardentioris cernit ingenii. Medicus, si cessauerit curare, desperat. Quod si responderis:
- Lue. 16* quo modo Lazarus recepit mala in uita sua: libenter nunc
- Naum 1* tormenta patiar, ut futura mihi gloria referuetur. Nō enim iudicabit Dominus bis in id ipsum. Iob, uir sanctus, & inmaculatus, & iustus in generatione sua, cur tanta perpeffus sit, ipsius uolumine continetur. Et ne, ueteres replicando historias, longum faciam, & excedam mensuram epistolæ; breuem tibi fabulam referam, quæ infantiae meæ temporibus accidit. Beatus Antonius cum a sancto Athanasio, Alexandriae episcopo, propter confutationem hæreticorum in urbem Alexandriam esset accitus, & isset ad eum Dydimus, uir eruditissimus, captus oculis: inter ceteras sermocinationes, quas de scripturis sanctis habebant, cum eius admiraretur ingenium, & acumen animi collaudaret, sciscitans ait: Num tristis es, quod oculis carnis careas? Cum ille pudore reticeret; secundo tertioq. interrogans, tandem elicit, ut mærorem animi simpliciter fateretur. Cui Antonius,
- Miror,

Miror, ait, prudentem uirum eius rei dolere damno, quā formicæ, & muscæ, & culices habent; & non lætari illius possessione, quam sancti soli, & apostoli meruerunt. ex quo peruides, quod multo melius sit spiritu uidere, quam carne, & illos oculos possidere, in quos peccati festuca nō possit incidere. Nos, licet hoc anno non ueneris, tamē nō desperamus aduentum tuum. quod si sanctus Diaconus, portitor litterarum, tuis amplexibus fuerit irretitus; & illo comitante huc ueneris: libenter suscipiam dispensationis moram, magnitudine fenoris duplicatam. Luc. 6

ARGVMENTVM.

IVLIANVM diuitem, ac prapotentem Iob exemplo consolatur, quod duas uirgunculas filias, unam octo, alteram sex annorum, intra uiginti dies amiserit; subsecuta deinde sit Faustine uxoris mors, & infelix generi cum unica superstite filia contracta affinitas, totius insuper familie, reiq. familiaris dispendium. caritatem eius laudat, & exemplo Pammachij, Paulini, & Vere ad perfectam hortatur uitam, multis ostendens, oblatio sui ipsius quantum excedat cuncta alia caritatis opera.

HIERONYMI AD IVLIANVM

consolatio.

EPISTOLA XXXIIII.

ILIVS meus, frater tuus, Ausonius in ipso iam
F professionis articulo, cum mihi præsentiam sui
tarde dedisset, & cito abstulisset; atque in puncto
temporis, salue pariter ualeque, dixisset, uacuum se redi-
re arbitratus est, nisi mearum aliquid ad te nugarum tumultu-
uario sermone portaret. Iam, demisso synthemate, equus
publicus sternebatur; & nobilem iuuenem, punicea indutū
tunica, baltheus ambiebat; & tamen ille, appposito nota-
rio, cogebat loqui, quæ uelociter edita uelox consequere-
tur

tur manus; & linguæ celeritatem prenderent signa uerborum. itaque, non scribentis diligentia, sed dictantis temeritate, longum ad te silentium rumpo, offerens tibi nudam officii uoluntatem. extemporalis est epistola, absque ordine sensuum, sine lenocinio & compositione uerborum, ut totum in illa amicum, nihil de oratore reperias. in pro cinctu effusam putes, & abire cupienti ingestum uaticum.

Ecl. 22 Diuina scriptura loquitur: Musica in luctu, intempestiua narratio. Vnde & nos, leporem artis rhetoricæ contemnētes, & puerilis atque plausibilis eloquii uenustatem, ad sanctarum scripturarum grauitatem confugimus; ubi uera uulnerum medicina est, ubi dolorum certa remedia; in quibus recipit unicum filium mater in feretro; ubi turbæ dicitur circumstanti: Non est mortua puella, sed dormit. Vbi &

Luc. 7. 8 **Joan. 11** quadriduanus mortuus ad uocem inclamantis Domini ligatus egreditur. Audio te in breui tempore duas uirgunculas filias iunctis pene extulisse funeribus, & pudicissimam ac fidelissimam cōiugem tuam Faustina, immo fidei calore germanam, in qua sola post amissos liberos acquiescebas, subita tibi dormitione subtractam: quasi, si naufragus in litore latrones reperiat, & iuxta eloquia prophetarum fugiens

Amos 5 ursum incidat in leonem; extendensq. manum ad parietē, a colubro mordeatur: consecuta rei familiaris damna; uastationem totius barbaro hoste prouinciæ, & in communi depopulatione priuatas possessionum tuarum ruinas, abactos armentorum ac pecorū greges, uinctos occisosq. seruulos, & in unica filia, quam tibi tam crebræ orbitates fecerant cariorem, electum nobilissimum generum; ex quo, ut omnia taceam, plus mæroris, quam gaudii, suscepisti. Hic est catalogus tentationum tuarum, hæc cum Iuliano, tirunculo Christi, pugna hostis antiqui. quæ, si ad te respicias, grandia sunt: si ad bellatorem fortissimum, ludus &

Iob 2 umbra certaminis. Beato Iob post malorū examina uxor pessima reservata est, ut per eam disceret blasphemare. tibi sublata est optima, ut miseriarum solatium perderes. Aliud est sustinere, quam nolis: aliud desiderare, quam diligas.

ligas . Ille in tot mortibus filiorum domus suæ ruinam unū
habuit sepulcrum , & , scissis uestibus , ut parentis monstra-
ret affectum , procidens in terram adorauit , & dixit : Nu-
dus exiui de utero matris meæ , nudus & redeam : Domi-
nus dedit , Dominus abstulit : sicut Domino placuit , ita fa-
ctum est : sit nomen Domini benedictum . Tu , ut parcissi-
me dicam , inter multorum officia propinquorum , & con-
solantes amicos , tuorum exequias prosecutus es . Perdidit
ille simul omnes diuitias ; & , succedentibus sibi malorum
nunciis , ad singulas plagas feriebat immobis , complens
in se illud de sapiēte præconium : Si fractus illabatur orbis ,
Impavidum ferient ruinæ . Tibi maior pars derelicta substā-
tiæ ; ut tantum tenteris , quantum ferre potes . necdū enim
ad eum peruenisti gradum , ut totis aduersum te cuneis di-
micetur . Diues quondam Dominus , & ditior pater , subi-
to orbis , & nudus est . Cumq. in omnibus his , quæ conti-
gerant ei , non peccasset coram Domino ; nec quidquam lo-
cutus esset insipiens ; exultans Dominus in uictoria famuli
sui , & illius patientiam suam ducens triumphum , dixit ad
diabolum : Animaduertisti famulum meum Iob , quia non
est quisquam ei similis super terram ? Homo innocens , ue-
rus Dei cultor , abstinens se ab omni malo , & adhuc perse-
uerans in innocentia . Pulchre addidit : Et adhuc perseue-
rans in innocentia : quia difficile est pressam malis innocen-
tiam non dolere ; & hoc ipso fide non periclitari , quod se ui-
deat iniuste sustinere , quod patitur . Ad quæ respōdens dia-
bolus Domino , ait : Corium pro corio , & omnia , quæ ha-
buerit homo , dabit pro anima sua : sed extende manū tuā ,
& tange ossa , & carnes eius , nisi in faciem benedixerit tibi .
Callidissimus aduersarius , & inueteratus dierum malorū ,
nouit alia esse , quæ extrinsecus sint , & philosophis quoque
mundi adiaphora , hoc est indifferentia , nominentur , in eo-
rumq. amissione atque contemptu perfectam non esse uir-
tutem , alia , quæ intrinsecus & desiderata cogant dolere per-
dentem . Vnde audacter Dei renuit prædicationem , & dicit
nequaquam eum debere laudari , qui nihil de se , sed totum

Iob 1

Iob 2

extra se dederit, qui pro corio suo coria obtulerit filiorum, & deposuerit malsurpium, ut fruatur corporis sanitate. Unde intelligat prudentia tua, usque ad hunc terminum peruenisse tentationes tuas, & dedisse te corium pro corio, pellem pro pelle, omniaque, quæ habes, parum esse dari pro anima tua, necdum autem extetam in te manum Dei, nec tactas carnes, nec ossa confracta, ad quorum dolorem difficile est non ingemiscere; & in faciem Deo benedicere, pro eo quod est maledicere. Vnde & Nabutha in Regum libris dicitur benedixisse Deum, & regem; & ideo lapidatur a populo. Sciens autem Dominus athletam suum, immo uirum fortissimum, etiam in isto extremo perfectoque certamine non posse superari, Ecce, inquit, trado illum tibi: tantum animam illius custodi. Caro uiri sancti datur in diaboli potestatem, & animæ sanitas reseruatur; ne, si illud percussisset, in quo sensus est mentisq. iudicium, non esset culpa peccantis, sed eius, qui statum mentis euerterat. Laudent ergo te alii, & tuas contra diabolum uictorias panegyricis prosequantur; quod læto uultu mortes tuleris filiarum; quod in quadragesimo die dormitionis earum lugubrem uestem mutaueris; & dedicatio ossium martyris, candida tibi uestimenta reddiderit; ut non sentires dolorem orbitatis tuæ, quem ciuitas uniuersa sentiret, sed ad triumphum martyris exultares; quod sanctissimam coniugem tuam non quasi mortuam, sed quasi proficiscentem deduxeris. Ego te nequaquam adulatione decipiam, nec lubrica laude supplantabo: loquar illud potius, quod tibi audire conducit. Fili, accedens ad seruitutem Dei, præpara animam tuam ad tentationem; & cum omnia feceris, dicito: *Luc. 17* Seruus inutilis sum: feci, quod facere debui. Tulisti liberos, quos ipse dederas. Recepisti ancillam, quam mihi ob breue solatium commodaueras. Non contristor, quod recepisti: sed ago gratias, quod dedisti. Quondam diues adulescens omnia, quæ in lege præcepta sunt, se implexisse iactabat: ad quem Dominus in euangelio, Vnum, inquit, tibi deest: Si uis perfectus esse, uade, uende omnia, quæ habes, &

& da pauperibus; & ueni sequere me. Qui omnia se fecisse dicebat, in primo certamine diuitias uincere non potest. unde & difficile intrāt diuites in regna cælorum: quæ expeditos, & alarum leuitate subnixos, habitatores desiderant. *Matth. 19*
 Vade, inquit, & uende: non partem substantiæ, sed uniuersa, quæ possides: & da, non amicis, non consanguineis, non propinquis, non uxori, non liberis: plus aliquid addā: nihil tibi ex omnibus metu inopiæ reseruans, ne cum Anna Damneris & Sapphira: sed da cuncta pauperibus: & fac *Act. 5*
 tibi amicos de iniquo mammona, qui te recipiant in æterna tabernacula, ut me sequaris; ut dominum mundi, possessionem habeas: ut possis canere cū propheta: Pars mea *Luc. 16*
 Dominus, & ut uerus leuita nihil de terrena hereditate possideas. Et hoc hortor; Si uis esse perfectus; si apostolicæ dignitatis culmen cupis, si sublata cruce Christum sequi, si apprehenso aratro non respicere post tergum; si in sublimi te cæto positus, pristina uestimenta contemnis, & ut euadas Aegyptiam dominam, sæculi pallium derelinquis. Vnde *Deut. 10*
 & Helias, ad cælorum regna festinans, non potest ire cum pallio, sed mundi in mundo uestimenta dimittit. Sed hoc, ais, apostolicæ dignitatis est, & eius qui uelit esse perfectus. *Luc. 17*
 Cur autem & tu nolis esse perfectus? cur, qui in sæculo primus es, non & in Christi familia primus sis? an quia uxorem habueris? habuit & Petrus, & tamen cum reti eam & nauicula dereliquit. Prouidentissimus Dominus, & omnium salutem desiderans, malensq. pænitentiam peccatoris quā mortem, abstulit tibi hanc excusationem, ut non illa te retrahat ad terras, sed tu eam sequaris ad paradisi regna traherem. Bona liberis pares, qui te ad Dominum præcesserūt: ut partes eorum nō in diuitias sororis proficiant, sed in redemptionem animæ tuæ, arque alimenta miserorum. Hæc monilia filix tuæ a te expetunt, his gemmis ornari capita sua uolunt. Quod perituum erat in serico, in uilibus pauperum tunicis seruetur. repetunt a te partes suas, iunctæ spōso nolunt uideri pauperes, & ignobiles, propria ornamenta desiderant. Nec est, quod excuses nobilitatem, & diuitia-

rum pondera. respice sanctum uirum Pammachium, & feruentissimæ fidei Paulinum presbyterum: qui non solum diuitias, sed se ipsos Domino obtulerunt: qui contra diaboli

Iob 2 tergiuersationem, nequaquam pellem pro pelle, sed carnes, & ossa, & animas suas Domino consecrarunt: qui te & exemplo, & eloquio, idest, & opere, & lingua possunt ad maiora perducere. Nobilis es: & illi, sed in Christo nobiliores. Diues, & honoratus: & illi, immo ex diuitibus, & honoratis pauperes, & inglorii, & iccirco ditiores, & magis inclyti, quia pro Christo pauperes, & inhonorati. Et tu quidem bene facis, quod sanctorum diceris uisibus ministrare, fouere monachos, ecclesiis offerre quamplurima. Sed hæc rudimenta sunt militiæ tuæ. Contemnis aurum, contempserunt & multi philosophi. e quibus unus, ut ceteros si leam, multarum possessionum pretium proiecit in pelagus, Abite, dicens, in profundum malæ cupiditates: ego uos mergam, ne ipse mergar a uobis. Philosophus, gloriæ animal, & popularis auræ uile mancipium, totam simul farcinam deposuit: & tu te putas in uirtutum culmine constitutum, si partem ex toto offeras? Te ipsum uult Dominus,

Rom. 11 hostiam uiuam, placentem Deo, Te, inquam, non tua: & ideo uariis tentationibus commonet, quia multis plagis

Hebr. 12 & doloribus eruditur Israel. Et quem diligit, Dominus corripit: flagellat autem omnem filium, quem recipit. Pauper

Luc. 21 cula uidua duo æra minuta misit in gazophylaciū: & quia totum obtulit, quod habebat; omnes dicitur in oblatione munerum Dei superasse locupletes, quæ non pondere sui, sed offerentium uoluntate pensantur. Vt multis erogaueris censum tuum, & quidam tua gaudeant liberalitate; tamen multos plures sunt, quibus nihil dedisti. neque enim Darii opes, & Cræsi diuitiæ ualent explere pauperes mundi. Quod si te ipsum Domino dederis; & apostolica uirtute perfectus, sequi cõperis saluatorem: tunc intelliges, ubi fueris, & in exercitu Christi quam extremum tenueris locum. Non planxisti filias mortuas, & paternæ in genis lacrymæ Christi timore siccatae sunt. Quanto maior Abraham;

ham; qui unicum filium uoluntate iugulauit; & quem heredem mundi futurum audierat, non desperat etiā post mortem esse uicturum. Iepte obtulit uirginem filiam, & iccirco in enumeratione sanctorum ab Apostolo ponitur. Nolo tantum ea offeras Domino, quæ potest fur rapere, hostis inuadere, proscriptio tollere; quæ & accedere possunt, & recedere, & instar undarum, ac fluctuum, a succedentibus sibi dominis occupantur; atque, ut uno cuncta sermone comprehendam, quæ, uelis, nolis, in morte dimissurus es, illud offer, quod tibi nullus hostis possit auferre, nullus eripere tyrannus: quod tecum pergat ad inferos, immo ad regna cælorum, & ad paradisi delicias. Extruis monasteria, & multus a te per insulas Dalmatiæ sanctorum numerus sustentatur: sed melius faceres, si & ipse sanctus inter sanctos uiueres. Sancti estote, quoniam ego sanctus sum, dicit Dominus. Apostoli gloriantur, quod omnia dimiserint, & secuti sint saluatorem. & certe, præter retia, & nauem, nihil legimus eos dimisisse: & tamen testimonio futuri iudicis coronantur: quia, se offerentes, totum dimiserant, quod habebant. Hæc loquor non in sugillationem operum tuorum; uel quod extenuem liberalitatem & eleemosynas tuas; sed quod te nolim inter sæculares esse monachum, & inter monachos sæcularem; totumq. a te expetam, cuius audio mentem diuino cultui deditam. Si huic consilio nostro uel amicus, uel affecla, uel propinquus renititur, & te ad delicias splendentis mensæ reuocat: intelligito eum non de tua anima, sed de suo uentre cogitare, & omnes opes, lautaq. cōuiuia, subita morte finiri. Octo & sex annorum intra uiginti dies duas filias amisisti; & arbitraris senem diu posse uiuere? cuius ut ætas longa tendatur, audi & Dauid, Dies uitæ nostræ septuaginta anni. si autem amplius, octoginta: & quidquid superest, labor, & dolor est. Felix, & omni dignus beatitudine, quem senectus Christo occupat seruientem, quem extrema dies saluatori inuenerit militantē, qui non confundetur cum loquetur inimicis suis in porta: cui in intoitu paradisi dicetur, Recepisti mala in uita tua, nūc

Hebr. 12

Iud. 12

Leuit. 20

Matth. 19

Psal. 89

Psal. 126

V 4 autem

Naum 1 autem hic lætare. Nec enim ulciscetur bis Dominus in eadem re. Diuitem purpuratum gehennæ flamma suscepit.

Luc. 16 Lazarus pauper, & ulceribus plenus, cuius carnes putridas lambabant canes, & uix de micis mensæ locupletis miserabilem sustentabat animam, in sinu Abraham recipitur, & tanto patriarcha parente lætatur. Difficile, immo impossibile est, ut & præsentibus quis & futuris fruatur bonis; ut & hic uentrem, & ibi mentem impleat; ut de deliciis transeat ad delicias; ut in utroque sæculo primus sit; ut & in cælo & in terra appareat gloriosus. Quod si tibi tacita cogitatio scrupulum mouerit, cur monitor ipse non talis sim, qualem te esse desidero, & nonnullos uideris in medio itinere corruisse: illud breuiter respondebo, non mea esse, quæ dico, sed Domini saluatoris; nõ monere quod ipse possim, sed qui debeat uelle, uel facere, qui seruus futurus est Christi. Et athletæ suis incitatoribus fortiores sunt: & tamen monet debilior, ut pugnet ille, qui fortior est. Noli respicere Iudam negantem, sed Paulum respice confitentem. Iacob, ditissimi patris filius, solus, & nudus in baculo pergit Mesopotamiam, iacet lassus in itinere; & qui delicatissime a Rebecca matre fuerat educatus, lapide ad caput pro puluillo utitur. uidit scalam de terra usque ad cælum, & ascendentes per eam angelos & descendentes, & desuper innitentem Dominum, ut lapsis manum porrigeret, ut ascendentes suo ad laborem prouocaret aspectu. unde & uocatur locus ipse Bethel, idest, domus Dei, in qua quotidie ascenditur, atque descenditur. Et sancti enim corruunt, si fuerint negligentes: & peccatores pristinum recipiunt gradum, si fordes fletibus lauerint. Hoc ideo dixi, ut non te terreant descendentes, sed prouocent ascendentes. Numquam exemplum a malis sumitur. etiam in sæculi rebus semper a meliori parte incitamenta uirtutum sunt. Oblitus propositi, & epistolaris breuitatis, plura distare cupiebam: ad materix quippe dignitatem, & ad meritum personæ tuæ, parua est omne quod dicitur: & ecce tibi noller Ausonius cœpit schedulas flagitare, urgere notarios; & hinnitus feruentis equi,

equi, ingenioli mei festinus arguere tarditatem. Memento igitur nostri, & cura ut in Christo ualeas. atque, ut cetera taceâ, domestica sanctæ Veræ exempla sectare; quæ uere secuta Christum, peregrinationis molestias sustinet; & sit tibi tanti dux femina facti.

ARGUMENTVM.

EXUPERANTIVM, qui sub paludamento & chlamyde militari Christianam agebat uitam, ad perfectionem hortatur, ut, distributis diuitiis, se ipsum Deo offerat, & una cum fratre Quintiliano Bethlehem migret.

AD EXUPERANTIVM HORTATORIA.

EPISTOLA XXV.

INTER omnia, quæ mihi sancti fratris Quintiliani amicitia præstiterunt, hoc uel maximum est, quod te mihi, ignotum corpore, mente sociauit. quis enim non diligit eum, qui sub paludamento & habitu militari agat opera prophetarum, & exteriorem hominem, aliud promittentem, uincat interiori homine, qui formatus est ad imaginem creatoris? unde & prior ad officium prouoco litterarum; & precor, ut mihi occasionem tribuas sæpius rescribendi, quo de cetero scribam audacius. Illud autem prudentiæ tuæ breuiter significasse sufficiat, ut memineris apostolicæ sententiæ: Vincit es uxori, ne quæras solutionem: solutus es, ne quæras uxorem: idest, alligationem, quæ solutioni contraria est. Qui igitur seruit officio coniugali, uinctus est: qui uinctus est, seruus est. qui autem solutus est, liber est. Cum ergo Christi gaudeas libertate; & aliud agas, aliud repromittas; ac propemodum in domate constitutus sis; non debes ad tollendam tuni-
cam tecto descendere, nec respicere post tergum, nec ara-
tri semel arrepti siuam dimittere. sed, si fieri potest, imi-
tare

1. Cor. 7

Luc. 17

Luc. 9

tare Ioseph, & Aegyptiæ dominæ pallium relinque; ut nudus sequaris Dominum saluatorem, qui dicit in euangelio:
Luc. 14. 9 Nisi quis dimiserit omnia, & tulerit crucem suam, & secutus me fuerit, non potest meus esse discipulus. Proiice saccinam sæculi; ne quæras diuitias, quæ camelorum prauitibus comparantur: nudus & leuis ad cælum euola, ne alas uirtutum tuarum auri deprimant pondera. Hoc autem dico, non quod te auarum didicerim; sed quod intelligam, iccirco adhuc militiæ operam dare, ut impleas sacculum, quem euacuare Dominus præcepit. Si igitur, qui habent possessiones, & diuitias, iubentur omnia uendere, & dare pauperibus, & sic sequi saluatorem: dignatio tua aut diues est, & debet facere, quod præceptum est; aut adhuc tenuis, & non debet quærere, quod erogatura est. Certe Christus pro animi uoluntate omnia in acceptum refert. Nemo apostolis pauperior fuit, & nemo tantum pro Domino dereliquit. Vidua illa in euangelio paupercula, quæ duo minuta misit in gazophylacium, cunctis præfertur diuitibus, quia totum, quod habuit, dedit. Et tu igitur eroganda non quæras, sed quærita iam tribue; ut fortissimum tirunculum suum Christus agnoscat; ut lætus tibi de longissima regione uenienti occurrat pater; ut stolam tribuat; ut donet anulum; ut immolet pro te uiculum saginatum; ut expeditum cum sancto fratre Quintiliano ad nos cito faciat nauigare. Pulsaui amicitiarum fores: si aperueris, nos crebro habebis hospites.

ARGVMENTVM.

CASTORINAM, materteram suam, cum qua nescio quid dissidii fuerat, ad pacem, & concordiam, quod per alias etiam fecerat litteras, adhortatur.

AD CASTORINAM MATERTERAM.

EPISTOLA XXXVI.

I OANNES, idem apostolus, & euangelista, in epistola sua ait: Quicumque odit fratrem suum, *1. Ioan. 3* homicida est. & recte: cum enim homicidium ex odio sæpe nascatur; quicumque odit, etiam si necdum gladio percussit, animo tamen homicida est. Cur, ais, tale principium? Scilicet ut, ueteri rancore deposito, mundum pectoris Deo paremus habitaculum. Irascimini, inquit David, & nolite peccare. Hoc quid uelit intelligi, Aposto *Psal. 4* lus plenius interpretatur: Sol non occidat super iracundiam uestram. *Eph. 4* Quid agemus nos in die iudicii, super quorum iram non unius diei, sed tantorum annorum sol testis occubuit? Dominus loquitur in euangelio: Si offers munus *Matth. 5* tuum ad altare, ibiq. recordatus fueris, quia frater tuus habet aliquid aduersum te; relinque ibi munus tuum ante altare, & uade reconciliari prius fratri tuo, & tunc ueniens offeres munus tuum. Væ mihi misero, ne dicam & tibi, qui tanto tempore aut non obtuli munus ad altare, aut, ira permanente, sine causa obtuli. Quo modo in quotidiana prece umquā diximus: Dimitte nobis debita nostra, sicut *Matth. 6* & nos dimittimus debitoribus nostris: animo discrepante cum uerbis, oratione dissidente cum factis? Precor itaque, quod & ante annum prioribus litteris rogauerā, ut pacem, quam nobis reliquit Dominus, habeamus; & meum desiderium, & tuam mentem Christus intueatur. in breui, ante tribunal eius, reconciliata, seu scissa concordia aut præmium recuperabit, aut pœnam. quod si tu, quod procul absit, nolueris; ego liber ero. epistola me hæc mea, cum lecta fuerit, absoluet.

ARGV-

EX heremo, quo una cum Heliodoro adolescens fere Hieronymus accesserat, Iulianum diaconum Stridonensem salutat, excusans se quod eius litteras non habuerit. cumq. ipse, quid ageretur in patria, nesciret, rogat, ut, an soror in proposito uirginitatis perseueret, certiores illum reddat, addens se obrectatorem suum interea non timere.

HIER. AD IVLIANVM DIACONVM.

EPISTOLA XXXVII.

ANTIQVVS sermo est: Mendaces faciunt, ut
A nec uera dicentibus credatur. Quod mihi a te ego
 obiurgatus de silentio litterarum accidisse uideo.
 Dicam: saepe scripsi, sed negligentia baiulorum fuit? Respondebis: omnium non scribentium uetus ista excusatio est. Dicam: non reperi, qui epistolas ferret? Dices, hinc istuc isse quamplurimos. Contendam, me etiam his dedisse? At illi, quia non reddiderunt, negabunt: & erit inter absentes incerta cognitio. Quid igitur faciam? Sine culpa ueniam postulabo, rectius arbitrans pacem loco motum petere, quam æquo gradu certamina concitare: quàmquam ita me iugis tam corporis ægrotatio, quam animæ ægritudo consumpsit, ut, morte imminente, nec mei pene memor fuerim. quod ne falsum putes, oratorio more post argumenta testes uocabo. Sanctus frater Heliodorus hic affuit, qui cum mecum eremum uellet incolere, meis sceleribus fugatus abscessit. Verum omnem culpam præsens uerbositas excusabit. nam, ut ait Flaccus in Satyra, Omnibus hoc uitium est cantoribus, inter amicos Rogati ut numquam cantent, iniussi numquam desistant. Ita te deinceps fascibus obruam litterarum, ut econtrario incipias rogare, ne scribam. Sororem meam, filiam in Christo tuam, gaudeo, te primum nunciante, in eo permanere,

re,

re, quod cœperat. hic enim, ubi nunc sum, non solum quid agatur in patria, sed, an ipsa patria perstet, ignoro. & licet me sinistro Hibera excetra ore dilaniet; non timebo hominum iudicium, habiturus iudicem meum, iuxta illud, quod quidam ait: Si fractus illabatur orbis, Impavidum ferient ruinæ. Quapropter quæso, ut apostolici memor præcepti, quo docet opus nostrum permanere debere, & tibi a Domino præmium in illius salute pares, & me de communi in Christo gloria crebris reddas sermonibus lætorem.

ARGVMENTVM.

THEODOSIVM, & ceteros sub eo Anachoretas rogat, ut suis precibus a Deo impetrent, ut cum ipsis, sicut habet in votis, in deserto uiuere possit.

AD THEODOSIVM, ET ALIOS
Anachoretas.

EPISTOLA XXXVIII.

QVAM uellem nunc uestro interesse conuentui, & admirandum consortium, licet isti oculi non mereantur aspicere, tota cum exultatione complecti. Spectarem desertum omni amœnius ciuitate: uiderem, desolata ab accolis loca, quasi ad quoddam paradisi instar, sanctorum cœtibus obsideri. uerum, quia hoc mea faciunt delicta, ne consortio beatorum inseratur obsessum omni crimine caput; iccirco obsecro, (quia uos impetrare posse non ambigo) ut me ex istius tenebris sæculi uestro libereis oratu. Et ante dixeram præsens, & nunc per litteras uotum indicare non cesso, quod mens mea omni ad id studium cupiditate rapiatur. Nunc uestrum est, ut uoluntatem sequatur effectus; meum est, ut uelim: obsecrationū uestra-

318 *Ad Theodosium, & alios Anachoretas.*

Luc. 15 uestrarum est, ut, quod uelim, & possim. Ego ita sum, quasi a cuncto grege morbida aberrans ovis. quod nisi me bonus pastor ad sua stabula humeris impositum reportarit: lababunt gressus, & in ipso conamine uestigia concident assurgentis. ego sum ille prodigus filius, qui, omni, quam mihi pater crediderat, portione profusa, necdum me ad genitoris genua submisi, necdum coepi prioris a me luxuriæ blandimenta depellere. & quia paululum non tam defui a uitiis, quam coepi uelle desinere: nunc me uouis diabolus ligat retibus; nunc noua impedimenta proponens, maria undique circundat, & undique pontum: nunc in medio constitutus elemento, nec regredi ualeo, nec progredi possum. superest, ut oratu uestro sancti spiritus aura me prouehat, & ad portum optatum optati litoris prosequatur.

ARGVMENTVM.

CONQVERITVR, quod uirgines in monte Hermon degentes, sepe ab eo litteris prouocate, numquam rescripserint: ostenditq. non esse obrectatoribus credendum, qui contra ipsam adlatabant: cum ante tempus de homine iudicandum non sit, & esse possit ut uir malus in bonum mutatus sit. scripsit autem hanc epistolam e solitudine adulescens, sicut & aliquot alias superiores.

HIERONYMVS AD VIRGINES

Hermonenses.

EPISTOLA XXXIX.

HARTAE exiguitas indicium solitudinis est: & ideo
C circo longum sermonem breui spatio coarctavi: quia & uobiscum uolebam prolixius loqui, & angustia schedulæ cogebat tacere. nunc igitur ingenio est uicta pauperies. minutæ quidem litteræ, sed confabulario longa est.

ga est. & tamen in hoc necessitatis articulo animaduertite
 caritatem; cum nec penuria scriptionis ualuerit prohibere,
 ne scriberem. Vos autem ignoscite, obsecro, dolenti. dico
 enim læsus, dico lacrymans: ne unum quidem apicem, to 2. Cor. 6
 ties uobis tribuenti officium, præstitistis. Scio, quia nulla
 communio luci & tenebris est, nulla cum ancillis Dei pec-
 catori societas: attamen & meretrix Domino pedes lacry- Luc. 7
 mis lauit: & de dominorum micis canes edunt: & ipse sal- Matth. 15
 uator non uenit iustos uocare, sed peccatores. Non enim Luc. 5
 egent sani medico. Et magis uult pænitentiam peccatoris, Exec. 18
 quam mortem. Et errantem ouiculam suis humeris refert, Matth. 12
 Et prodigum filium reuertentem excipit lætus pater. Quin Luc. 15
 potius Apostolus ait: Nolite iudicare ante tempus. Tu 1. Cor. 4
 enim quis es, qui alienum seruum iudices? Suo Domino Rom. 14
 stat, aut cadit. Et qui stat, uideat ne cadat. Et inuicem 1. Cor. 10
 onera uestra portate. Aliter, sorores carissimæ, hominum Gal. 6
 lior, aliter Christus iudicat. Non eadem est sententia tri-
 bunalis eius, & anguli susurronum. Multæ hominibus uiæ
 uidentur iustæ, quæ postea reperiuntur prauæ. Et in testa-
 ceis uasculis thesaurus sæpe reconditur. Petrum ter negan- Luc. 22
 tem amaræ in suum locum restituere lacrymæ. Cui plus di Luc. 7. 15
 mittitur, plus amat. De toto grege filetur, & ob unius
 morbidæ pecudis salutem angeli lætantur in cælo. Quod si
 cui uideretur indignum, audiat a Domino: Amice, si ego Matth. 20
 bonus sum, quare oculus tuus nequam est?

ARGV-

ARGVMENTVM.

DOLET, quicumque hanc scripsit epistolam, (nam stylus Hieronymi non uidetur) quod in urbe Leges eum inuenire non potuerit: & quantum eum amet, uidereq. desideret, exuens, rogat ut pro eo Dominum oret.

AD AVGVSTINVM.

EPISTOLA XL.

VM in urbem Leges anteriori tempore commeassem; nimium sum contristatus, quod te totum ibidem minime potui reperire. inueni enim te medium, & ut ita dicam, partem animæ tuæ, Seuerum carissimum: de quo ex parte gauisus sum: perfecte enim gauderem, si te totum inuenirem. unde ex parte, qua te repperam, gratulabar; & propter partem tuam, quam nequaquam cernebam, omnibus modis contristabar. proinde dixi animæ meæ: Quare tristis es, & quare conturbas me? Spera in Deo; & faciet præsentem amicum, quem diligis. Vnde confido in Domino; & spero, quod me faciet de tua uisione gratulari. O si oculis cerni dilectio posset: profecto uideres, quanta apud te nostra esset dilectio. aut enim æquiparans dilectioni tuæ magnum tibi afferret gaudium; aut, si maior esset, magnū tibi afferret imitationis studium. Ergo, quia in Domino te diligo, dilige diligentem, & ut ceteri tecum diligant, per ecclesiasticam auctoritatem hortare. Nam quod petis litteris tuis, ut ego pro te orem: id recte facerem, si ego ipse a peccatis liber essem, ut pro aliis liceret orare. & ideo te admoneo, ut orationes assiduas animi tui pro me emitras ad Dominum; & memor professionis, illam ante oculos tuos constituas diem, in qua iustus ab auditu malo non timebit, & ideo iustus non timebit, quia nō audiet, Vade in ignem æternum: sed ueni benedicte patris mei, percipe regnum. Ad quod nos perducatur, qui uiuit & regnat in sæcula sæculorum, Amen.

ARGV-

RVFFINVM Aquileiensem, quem in Aegyptum concessisse audierat, ut ad se in Syriam pergit, inuitat, asserens se, uno Euagrio excepto, ab omnibus derelictum fuisse, Innocentio scilicet, Hylaq. defunctis, & Bonoso insulam quandam, penitentiae peragenda causa, incolente.

HIERONYMVS AD RVFFINVM.

EPISTOLA XLI.

IVS Deum tribuere, quam rogatur, & ea saepe concedere, quæ nec oculus uidit, nec auris audiuit, *Esa. 64*
 nec in cor hominis ascenderunt, licet ex sacrorum ministerio uoluminum ante cognouerim, tamen in causa propria nunc probaui, Ruffine carissime. Ego enim, qui audaci fieri satis uoto credebam, si uicissitudine litterarum imaginem nobis præsentiæ mentiremur, audio te Aegypti secreta penetrare, monachorum inuisere choros, & caelestem in terris circumire familiam. O si mihi nunc Dominus Iesus Christus uel Philippi ad Eunuchum, uel Abacuc ad *Act. 8* Danielem translationem repente concederet: quam ego *Dan. 14* nunc tua arctis stringerem colla complexibus: quam illud os, quod mecum uel errauit aliquando, uel sapuit, impressis figerem labiis. Verum, quia non tam te sic ad me uenire, quam ad te sic ire non mereor; & inualidum, etiam cum sanum est, corpusculum crebri fregere morbi: has mei uicarias, & tibi obuias mitto, quæ te, copula amoris innexum, ad me usque perducant. Prima inopinati gaudii ab Heliodoro fratre mihi est nunciata felicitas. Non credebam certum, quod certum esse cupiebam, præsertim cum & ille ab alio se audisse diceret, & rei nouitas fidem sermonis auferret. rursum suspensam uoto nutante mentem, quidā Alexandrinus monachus, qui ad Aegyptios confellores, & uoluntate iam martyres, pio plebis iamdudum fuerat trāsmis-

X sus

sus obsequio, manifestus ad credulitatem nuncii auctor impulerat. Fateor & in hoc meam labasse sententiam. nam cum & patriam tuam ignoraret, & nomen: in eo tamē plus uidebatur asserere, quod eadem assererat, quæ iam aliis indicauerat. Tandem plenum ueritatis pondus erupit. Rufinum enim Nitriæ esse, & ad beatum perrexisse Macarium, crebra commeantium multitudo referebat. Hic uero tota credulitatis frena laxauit, & tunc ueræ, ægrotum esse me, dolui: & nisi me attenuati corporis uires quadam compede præpedissent; nec mediæ feruor ætatis, nec nauigantibus semper incertum mare, pia cum festinatione gradienti, ualuisset obfistere. Credas mihi frater: non sic tempestate iactatus portum nauta prospectat, non sic sitientia imbres arua desiderat, non sic curuo assidens litori anxia filium mater expectat. postquam me a tuo latere subitus turbo conuulsit; postquam glutino caritatis hærentem impia distraxit auulsio: Tunc mihi cæruleus supra caput astitit imber: Tunc maria undique, & undique cælum. Tandem in incerto peregrinationis erranti, cum me Thracia, Pontus, atque Bithynia, totumq. Galatiæ & Cappadociæ iter, & feruido Cilicum terra fregisset æstu; Syria mihi, uelut fidissimus naufrago portus, occurrit. ubi ego, quidquid morborum esse poterat, expertus, ex duobus oculis unum perdi. Innocentium enim, partem animæ meæ, repentinus febrium ardor abstraxit. nunc uno & toto mihi lumine Euagrio nostro fruor; cui ego semper infirmus ad laborem cumulus accessi. Erat nobiscum & Hylas, sancti Melanii famulus; qui puritate morum, maculam seruitutis abluerat, & hic necdum obductam rescidit cicatricem. Verum quia, de dormientibus contristari, Apostoli uoce prohibemur; & nimia uis mæroris læto superueniente nuncio temperata est: indicamus hæc tibi; ut, si nescis, discas; si ante cognouisti, pariter gaudeamus. Bonosus tuus, immo meus, & ut uerius dicam, noster, scalam præfagatam Iacob somniantem iam scandit; portat crucem suam; nec de crassino cogitat, nec Luc. 9. Ps. 125 post tergum respicit. Seminat in lacrymis, ut in gaudio metat,

1. Theff. 4

Gen. 28

Mat. 16.6

Luc. 9. Ps. 125

merat. Et sacramento Moyſi ſerpentem in eremo ſuſpen- *Num. 21*
dit. Cedant huic ueritati tam Græco quam Romano ſtylo
mendaciis ficta miracula. Ecce puer honeſtis ſæculi nobiſcū
artibus inſtitutus, cui opes affatim, dignitas apprime in-
ter æquales erat, contempta matre, ſororibus, & cariſſi-
mo ſibi germano, inſulam pelago circumſonante naufragā,
cui aſperæ cautes, & nuda ſaxa, & ſolitudo terrori eſt, qua-
ſi quidam nouus paradifi colonus inſedit. nullus ibi agrico-
larum, nullus monachorum, ne paruulus quidem, quem
noſti, Oneſimus, quo uelut fratre in oſculo fruebatur, in
tanta uarietate adhæret lateri comes. ſolus ibi, immo iam
Chriſto comitante non ſolus, uidet gloriā Dei, quam etiā
apoſtoli, niſi in deſerto, non uiderant. Non quidem con- *Matth. 17*
ſpicit turritas urbes; ſed in nouæ ciuitatis cenſu dedit. no-
men ſuum. Horrent ſacco membra deformia. ſed ſic me-
lius obuiam Chriſto rapietur in nubibus. Nulla Euriporū *1. Theſ. 4*
amœnitate perfruitur; ſed de latere Domini aquam uitæ bi-
bit. Propone tibi ante oculos, amice dulciſſime, & in præ-
ſentiam rei totus animo ac mente conuertere. tunc poteris
laudare uictoriam, cum laborem præliantis agnoueris. To-
tam circa inſulam fremit inſanum mare, & ſinuofis mon-
tium illiſum ſcopulis æquor reclamant. nullo terra gramine
uiuet: nullis uernans campus denſatur umbraculis. abrup-
tæ rupes quaſi quendam horrore carcerem claudunt. Ille
ſecurus, intrepidus, & totus de Apoſtolo armatus, nunc
Deum audit, dum diuina religit; nunc cum Deo loquitur, *Eph. 6*
cum Dominum rogat; & fortasſe ad exemplum Ioannis a-
liquid uidet, dum in inſula commoratur. Quas nunc dia-
bolū neſtere credis tricas? quas parare arbitraris inſidias?
Forſitan, antiquæ fraudis memor, ſamem ſuadere tentabit.
ſed iam illi reſponſum eſt: Non in ſolo pane uiuit homo. *Deut. 8*
Opes forſitan, gloriāq. proponet. ſed dicetur illi: Qui
cupiunt diuites fieri, incidunt in muſcipulam, & tentatio- *1. Tim. 6*
nes. Et: Mihi gloriatio omnis in Chriſto eſt. Feſſa mem-
bra ieiuniis, morbo grauante, concutiet. ſed Apoſtoli re-
percutietur eloquio: Quando enim infirmor, tunc fortior *Gal. 6*

X 2 ſum

2. Cor. 12 sum . Et : Virtus in infirmitate perficitur . Minabitur mor-
 Philipp. 1 tem : sed audiet : Cupio dissolui , & esse cum Christo . Igni-
 Eph. 6 ra iacula vibrabit : sed excipientur scuto fidei . Et , ne multa
 replicē , impugnabit satanas , sed tutabitur Christus . Gra-
 tia tibi , Domine Iesu , quod in die tua habeo , qui pro me te
 possit rogare . Scis ipse (tibi enim patent pectora singulo-
 rum , qui cordis arcana rimaris , qui tantæ bellæ alio inclu-
 son. 2 sum prophetam in profundo uides) ut ego & ille pariter a
 tenera infantia ad florentem usque adoleuerimus ætatem ;
 ut iidem nos nutricum sinus , iidem amplexus fouerint ba-
 iulorum ; & , cum post Romana studia ad Rheni semibarba-
 ras ripas , eodem cibo , pari frueremur hospitio , ut ego pri-
 mus coeperim uelle te colere . Memento , quæso , hunc bel-
 latorem tuum , mecum quondam fuisse tironem . Habeo
 Matth. 5 promissum maiestatis tuæ . Qui docuerit , & non fecerit , mi-
 nimus uocabitur in regno cælorum . Qui autem docuerit ,
 & fecerit , maximus uocabitur in regno cælorum . Fruatur
 ille uirtutis corona , & ob quotidiana martyria stolatus
 Apoc. 7. 14 agnum sequatur . Multæ enim sunt mansiones apud patrē .
 Ioan. 14 Et : Stella a stella differt in claritate . Mihi concede , ut in-
 1. Cor. 15 ter sanctorum calcanea caput possim leuare : ut , cum ego
 uoluerim , ille perfecerit , mihi ignoscas , quia implere non
 potui ; illi tribuas præmium , quod meretur . Plura fortas-
 se , quam epistolæ breuitas patiebatur , longo sermone pro-
 traxerim : quod mihi semper accidere consuevit , quando
 aliquid de Bonosi nostri laude dicendum est . Sed ut ad illud
 redeam , unde discesseram ; obsecro te , ne amicum , qui diu
 quaritur , uix inuenitur , difficile seruiatur , pariter cum ocu-
 lis mens amittat . Fulgeat , cui libet , auro , & pompaticis
 ferculis corusca ex sarcinis metalla radient . Caritas non po-
 test comparari . Dilectio pretiū non habet . Amicitia , quæ
 desinere potest , uera numquam fuit . Vale in Christo .

ARGVMENTVM.

NICEAM, subdiaconum Aquileie, ueterem sodalem, ut
ad se aliquando scribat, exemplo Chromatii, & Eusebii fra-
trum, hortatur.

HIERONYMVS AD NICEAM,

hypodiaconum Aquileie.

EPISTOLA XLII.

VRPILIVS comicus, tractans de uicissitudi-
ne litterarum, Sola, inquit, res est, quæ homines
absentes præsentis facit. Nec falsam dedit, quam-
quam in re non uera, sententiam. quid enim est, ut ita di-
cam, tam præsens inter absentes, quam per epistolas & al-
loqui, & audire quos diligas? nam & rudes illi Italiae homi-
nes, quos cascos Ennius appellat, qui sibi, ut in rhetoricis
Cicero ait, ritu ferino uictum quærebant, ante chartæ &
membranarum usum aut in dedolatis e ligno codicillis, aut
in corticibus arborum mutuo epistolarum alloquia missita-
bant. unde & portitores earum tabellarios, & scriptores a
libris arborum librarios uocauere. quâto magis igitur nos,
expolito iam artibus mundo, id non debemus omittere,
quod illi sibi præstiterunt, apud quos erat cruda rusticitas,
& qui humanitatem quodam modo nesciebant? Ecce bea-
tus Chromatius cum sancto Eusebio, nō plus natura, quā
morum æqualitate germano, litterario me prouocauit offi-
cio. tu, modo a nobis abiens, recentem amicitiam scindis
potius, quam dissuis. quod prudenter apud Ciceronē Læ-
lius uetat. Nisi forte ita tibi exosus est oriens, ut litteras
quoque tuas huc uenire formides. Expergiscere, expergi-
scere, euigila de somno, præsta unam chartæ schedulam ca-
ritati, inter delicias patriæ, & communes, quas habuimus,
peregrinationes, aliquando suspira. si amas, scribe obse-
cranti: si irasceris, iratus licet scribe. magnum & hoc desi-
derii solamē habebō, si amici litteras uel indignantis accipiam.

X 3 ARGV

CHROMATIVM, & Eusebium fratres, una cum Iouino amico, necnon matre, & sororibus uirginibus eadem in domo sancte uiuentes, omnes Stridonenses resalutat. Bonosum laudat, & sororem suam illis commendat.

HIERONYMVVS AD CHROMATIVM.

Iouinum, & Eusebium.

EPISTOLA XLIII.

NON debet charta diuidere, quos amor mutuus copulauit: nec per singulos officia mei sunt partienda sermonis; cum sic inuicem uos ametis, ut non minus tres caritas iungat, quam duos natura sociauit: quin potius, si rei condicio pateretur, sub uno litterulæ apice nomina indiuisa concluderem, uestris quoque ita me litteris prouocantibus, ut & in uno tres, & in tribus unum putarem. nam postquam, sancto Euagrio transmittente, in ea ad me eremi parte delatæ sunt, quæ inter Syros ac Saracenos uastum limitem ducit; sic gauisus sum, ut illum diem Romanæ felicitatis, quo primum Marcelli apud Nola prælio post Cannensem pugnam Hannibalis agmina ceciderunt, ego uicerim. & licet supra dictus frater sæpe me uisitet, atque me ita, ut sua in Christo uiscera, foueat: tamen longo a me spatio seiunctus, non minus mihi dereliquit abeundo desiderium, quàm attulerit ueniendo lætitiā. Nunc cum uestris litteris fabulor, illas amplector: illæ mecum loquuntur, illæ hic tantum latine sciunt: hic enim aut barbarus semisermo discendus est, aut tacendum. quotiescumque carissimos mihi uultus, notæ manus referunt impressa uestigia; toties aut ego hic non sum, aut uos hic estis. Credite amori uera dicenti: & cum has scriberem, uos uidebam. De quibus hoc primum queror, cur, tot interiacentibus spatiis maris, atque terrarum tam paruam epistolam miseritis; nisi quod ita merui, qui uobis, ut scribitis, ante non scripsi.

scripsi. Chartam defuisse non puto, Aegypto ministrante
 commercia. et si alicui Ptolemæus maria clausisset, ta-
 men rex Attalus membranas a Pergamo miserat, ut penu-
 ria chartæ pellibus pensaretur: unde & Pergamenarum no-
 men ad hunc usque diem, tradente sibi inuicem posteri-
 rate, seruatum est. Quid igitur? arbitrer baiulum festi-
 nasse? quamuis longæ epistolæ una nox sufficit. An uos
 aliqua occupatione detentos? nulla necessitas maior est ca-
 itate. Restant duo; ut aut uos piguerit, aut ego non me-
 merim. e quibus malo uos inculcare tarditatis, quam me
 condemnare non meritum. facilius enim negligentia emen-
 dari potest, quam amor nasci. Bonosus, ut scribitis, qua-
 si filius *ἰχθύος*, idest, piscis, aquosa petit: nos pristina con-
 tagione sordentes, quasi reguli & scorpiones, arentia quæ-
 que sectamur. ille iam calcit super colubri caput: nos ser-
 penti, terram ex diuina sententia comedenti, adhuc cibus *Gen. 3*
 sumus. ille iam potest summum graduum psalmum scande *Psal. 150*
 re: nobis, adhuc in primo ascensu flentibus, nescio an di-
 cere aliquando contingat: Leuaui oculos meos in montes, *Psal. 120*
 unde ueniet auxilium mihi. Ille inter minaces sæculi fluctus
 in tuto insulæ, hoc est, Ecclesiæ gremio sedens, ad exem-
 plum Ioannis, librum forte iam deuorat: ego, in scelerum *Apoc. 10*
 reorum sepulcro iacens, & peccatorum uinculis colliga-
 tus, Dominicum de Euangelio expecto clamorem: Hiero- *Ioan. 11*
 nyme ueni foras: Bonosus, inquam, (quia, secundum
 prophetam, omnis diaboli uirtus in lumbis est) trans Eu- *Iob 40*
 phratem tulit lumbare suum; ubi illud in foramine petræ *Hier. 13*
 abscondens, & postea scissum reperiens, cecinit: Domi- *Psal. 138. 118*
 ne, in possidisti renes meos: Dirupisti uincula mea: tibi
 sacrificabo hostiam laudis. Me uero Nabuchodonosor ad *4. Reg. 25*
 Babylonem, idest, confusionem mentis meæ catenatum
 duxit: ibi mihi captiuitatis iugum imposuit: ibi ferri circu-
 lum naribus meis innectens, de canticis Sion cantare præ-
 cepit. Cui ego dixi: Dominus soluit compeditos, Domi- *Psal. 136. 145*
 nus illuminat cæcos. Et, ut breuiter cœptam dissimilitudi-
 nem finiam, ego ueniam deprecor, ille expectat coronam.

X 4 Soror

- Soror mea, sancti Iuliani in Christo fructus est. Ille plan-
 1. Cor. 3 tavit, uos rigate: Dominus incrementum dabit. Hanc m-
 hi Iesus pro eo uulnere, quod diabolus infixerat, præsti-
 tit, uitam reddendo pro mortua. Huic ego, ut ait genti-
 lis poeta, omnia etiam tuta timeo. Scitis ipsi lubricum ad-
 leſcentiæ iter; in quo & ego lapsus sum, & uos non sine ti-
 more tranſiſtiſti. hoc illa nunc maxime ingrediens, omnium
 eſt fulcienda præceptis, omnium eſt ſuſtentanda ſolatiis,
 ideſt, crebris ueſtræ ſanctitudinis epiſtolis roboranda. &
 1. Cor. 13 quia caritas omnia ſuſtinet, obſecro ut etiam a Papa Vale-
 riano ad eam confortandam litteras exigatis. Noſtis puel-
 lares animos his rebus plerumque ſolidari, ſi ſe intelligen-
 turæ eſſe maioribus. in mea enim patria, ruſticitatis uer-
 nacula, Deus uenter eſt, & in diem uiuitur: & ſanctior eſt
 ille, qui ditior eſt. acceſſit huic patellæ, iuxta tritum popi-
 li ſermone prouerbium, dignum operculum: Lupicinus
 ſacerdos, ſecundum illud quoque, de quo ſemel in uita Craſ-
 ſum ait riſiſſe Lucilius: Similem habent labra lactucam,
 aſino carduos comedente: uidelicet ut perforatam nauera
 debilis gubernator regat, & cæcus cæcos ducat in foueam,
 talisq. ſit rector, quales illi qui reguntur. Matrem com-
 munem, quæ cum uobis ſanctitate ſocietur, in eo uos præ-
 uenit, quia tales genuit, cuius uere uenter aureus poteſt li-
 ci, eo ſalutamus honore, quo noſtis: una quoque ſuſci-
 piendas cunctis ſorores, quæ ſexum uicere cū ſæculo; quæ,
 Matth. 25 oleo ad lampadas largiter præparato, ſponſi operiuntur
 aduentum. O beata domus, in qua morantur Anna ui-
 dua, uirgines prophetiſſæ, geminus Samuel nutritus in tem-
 plo. o teſta felicia, in quibus cernimus Machabæorū mar-
 tyrum coronis cinctam martyrem matrem. Nam licet quo-
 tidie Chriſtum confiteamini, dum eius præcepta ſeruatis:
 tamen ad priuatam gloriam publica hæc acceſſit uobis &
 aperta conſeſſio, quod per uos ab urbe ueſtra Ariani quon-
 dam dogmatis uirus excluſum eſt. Et miramini forſitan,
 quod in fine iam epiſtolæ ruruſum exorſus ſim. Quid faciã
 uocem pectori negare nō ualeo: epiſtolæ breuitas compellit

lit tacere; desiderium uestri cogit loqui. præproperus sermo: confusa turbatur oratio: amor ordinem nescit.

ARGVMENTVM.

CVM Chrysogono, Aquileia monacho, quod nihil ad se scripserit, expostulat.

HIERONYMVS AD CHRYSOGONVM,
monachum Aquileiæ.

EPISTOLA XLIIII.

Vt circa te affectus meus sit, carissimus ambobus
Q Heliodorus tibi potuit fideliter nunciare; qui non
minore te diligit amore, quam ego diligo: ut semper in ore meo nomen tuum sonem, ut ad primam quamque confabulationem iucundissimi mihi consortii tui recorder; ut humilitatem admirer; uirtutem efferam; prædicem caritatem. Verum tu; quod natura lynces insitum habent, ne post tergum respicientes meminerint priorum; & mens perdat, quod oculi uidere desierint; ira nostræ es necessitudinis penitus oblitus, ut illam epistolam, quam in corde Christianorum scriptam Apostolus refert, non parua litura, sed iniis, ut aiunt, ceris eraseris. & illæ quidem, quas diximus, feræ, sub frondente captantes arboris ramo fugaces, capreas, aut timidum ceruos animal comprehendunt; currentemq. frustra prædam, dum hostem suum secum uehit, rabido desuper ore dilaniant, & tamdiu meminere prædandi, quamdiu uenter uacuuus siccuus fame guttur exasperat: ubi uero sanguine pasta feritas uiscera diutenta compleuerit, cum saturitate succedit obliuio, tamdiu nescitura quid capiat, donec memoriam reuocauerit esuries. tu, necdum satiatuſ e nobis, cur finem iungis exordio? cur amittis ante, quâ teneas? nisi forte, negligentia semper excusatione socia, asseras te non habuisse, quod scriberes: cū hoc ipsum debueris scribere, te nō habuisse, quod scriberes.

2. Cor. 9

ARGV-

ANTONIVM, quod, toties rogatus, numquam rescripserit, reprehendit, & superbie coarguit.

HIERONYMVVS AD ANTONIVM,
de modestia.

EPISTOLA XLV.

OMINVS noster, humilitatis magister, disceptatibus de dignitate discipulis, unum apprehendit e paruulis, dicens: Quicumque uestrum non fuerit conuersus sicut infans, non potest introire in regnum cælorum. Quod ne tantum docere, nec facere uideretur, impleuit exemplo; dum discipulorum pedes lauat; dum traditorem osculo excipit; dum loquitur cum Samaritana; dū, ad pedes sibi sedente Maria, de cælorum disputat regno; dum ab inferis resurgens, primum mulierculis apparet. Sathanas autem ex archangelico fastigio non aliam ob causam, nisi ob contrariam humilitati superbiam, ruit. Et Iudaicus populus primas sibi cathedras, & salutationes in foro uindicans, deputato antea in stillam situlæ, gentium populo succedente, deletus est. Contra sophistas quoque sæculi & sapientes mundi Petrus & Iacobus piscatores mittuntur. Cuius rei causa scriptura ait: Superbis Deus resistit, humilibus autem dat gratiam. Vide frater, quale malum sit, quod aduersarium habet Deum: ob quod in euangelio & phariseus arrogans spernitur, & humilis publicanus auditur. Decem iam, nisi fallor, epistolas, plenas tam officii, quam precum, misi: cum tu ne nutum quidem facere dignaris; & Domino loquente cum seruis, frater cum fratre non loqueris. Nimis, inquires, contumeliose. Crede mihi, nisi styli uerecundia prohiberet, tanta læsus ingererem, ut inciperes mihi rescribere uel iratus. sed quoniam &, irasci, hominis est; &, iniuriam non facere, Christiani; ad antiquum morem reuertens, rursus precor, ut & diligentē te diligas, & conseruo sermonē conseruus impertias. Vale in Domino.

ARGV-

ARGVMENTVM.

RVSTICVM, quod promissam cum uxore Artemia continentiam fregerat, ad penitentiam, & ut sancta inuisat, coniugis exemplo, loca, hortatur.

HIERONYMVVS AD RVSTICVM.

EPISTOLA XLVI.

QVOD ignotus ad ignotum audeo scribere, sanctæ ancillæ Christi Hedibæ, & filiæ mex, coniugis tuæ, Artemiæ, immo sororis ex coniuge atque conseruæ, fecit deprecatio: quæ nequaquam propria salute contenta, tuam & ante quæsiuit in patria; & nunc in sanctis locis quærit, imitari cupiens Andreæ & Philippi apostolorum beneuolentiam; quorum uterque inuentus a Christo, fratrem Simonem, & amicum Nathanael inuenire desiderat, *Ioan. 1.* ut alter eorum mereatur audire: Tu es Simon filius Iohanna, tu uocaberis Cephas, quod interpretatur Petrus. Alter donum Dei (hoc enim lingua nostra sonat Nathanael) Christi ad se loquentis testimonio subleuetur: Ecce uere Israelita: in quo dolus non est. Optauerat quondam & Loht *Gen. 19* cum filiabus saluare coniugem suam, & de incendio Sodomæ & Gomorræ pene semiustus erumpens, educere eam, quæ pristinis uitiis tenebatur adstricta: sed ea desperatione trepida, respiciensq. post tergum, æterno infidelitatis titulo condemnatur. Et ardens fides pro una muliere perdita, totam Segor liberat ciuitatem. Denique postquam Sodomiticæ ualles ac tenebras derelinquens, ad montana conscendit, ortus est ei Sol in Segor, quæ interpretatur paruula; ut parua fides Lot, quia maiora non poterat, saltem minora seruaret. Neque enim Gomorræ quondam & erroris habitator, statim ad meridiem poterat peruenire, in qua Abraham, amicus Domini, cum angelis suscepit Deum. *Gen. 18. 46* Et Ioseph fratres pascit in Aegypto, sponsusq. audit a sponsa: *Cant. 1* Vbi cubas? ubi pascis in meridie? Samuel quondam plangebatur Saulem, quia superbæ uulnera penitentia medicamine non

1. Cor. 5 ne non curabat. Et Paulus lugebat Corinthios, qui fornicationis maculas lacrymis delere nolebant. Vnde & Ezechiel librum deuorat scriptum intus & foris, carmine, & planctu, & uæ: carmine, super laude iustorum: planctu, super penitentibus: uæ, super iis, de quibus scriptum est:
- Pro. 18 Cum uenerit impius in profundum malorum, contemnit.
- Esa. 22 Quos ostendit Esaias, dicens: Vocauit Dominus sabaoth in die illa ad fletum, & planctum, & decaluationem, & ac cinctionem ciliciorum: ipsi autem fecerunt lætitiā, & exultationem, mactantes uitulos, occidentes oues, ut comederent carnes, dicentes: Manducemus, & bibamus; cras enim moriemur. De quibus & Ezechiel loquitur: Et tu fili hominis dic domui Israel, sic locuti estis, dicentes: Errores nostri & iniquitates nostræ super nos erunt, & in ipsis cōtabescimus: & quo modo salui esse poterimus? Dic eis: Viuo ego, dicit Dominus. Nolo mortem impij, sed ut conuertatur a uia sua. Et iterum: Reuertimini recedentes a uia uestra: quare moriemini domus Israel? Nihil tam offendit Deum, quam desperatione meliorum hære prioribus. licet & ipsa desperatio incredulitatis indicium sit. qui enim desperat salutem, non putat futurum esse iudicium. quod si metueret, utique bonis operibus se iudici præpararet.
- Hier. 2 Audiamus per Hieremiam loquentem Deum: Conuerte pedem tuum a uia aspera, & guttur tuum a siti. Et iterum:
- Hier. 8 Numquid, qui cadit, non resurget? aut, qui auersus est, non reuertetur? Et per Esaiam: Quando conuersus ingemueris, tunc saluus eris, & scies ubi fueris. Scire non possumus ægrotationis mala, nisi cum fuerit sanitas consecuta. Et quantum boni uirtus habeat, uitia demonstrant: clariusq. fit lumen comparatione tenebrarum. Ezechiel quoque iisdem uerbis, quia eodem & spiritu, Conuertimini, inquit, & redite ab iniquitatibus uestris domus Israel, & non erunt uobis in tormentū impietates. Proiците omnes impietates uestras, quibus impie egistis aduersum me; & facite uobis cor nouum, & spiritum nouum. Et quare moriemini domus Israel? Nolo enim mortem peccatoris, dic

cit Dominus. Vnde & in consequentibus loquitur: Vno
 ego, dicit Dominus. Nolo mortem peccatoris, nisi ut re-
 uertatur a uia sua, & uiuat; ne mens incredula de bono-
 rum repromissione desperet; & semel perditioni animus
 destinatus, non adhibeat uulneri curationem: quod nequa
 quam exultimat posse curari. Idcirco iurare se dicit, ut, si
 non credimus promittenti Deo, credamus saltem pro no-
 stra salute iuranti. Quam ob causam iustus precatur, & di-
 cit: Conuerte nos Deus salutaris noster, & auerte furorem *Psal. 84*
 tuum a nobis. Et iterum: Domine, in uoluntate tua præ- *Psal. 29*
 stitisti decori meo fortitudinem. Auertisti faciem tuam a
 me, & factus sum conturbatus. Postquam enim scditatem
 delictorum meorum uirtutum decore mutauī, infirmita-
 tem meam tua gratia roborasti. Ecce audio pollicentem:
 Persequar inimicos meos, & comprehendam illos, & non *Psal. 17*
 reuertar donec deficiant: ut, qui te ante fugiebam, & ini-
 micus eram, tua comprehendar manu. Ne cesses a perse-
 quendo, donec deficiam, a uia mea pessima, & reuertar
 ad uirum meum pristinum; qui mihi dabit linteamina mea,
 & oleum, & similam, & cibabit me pinguisimīs cibis. Qui
 idcirco obsepsit, atque præcluserit uias meas pessimas, ut
 eam inuenirem uiam, quæ dicit in euangelio: Ego sum *Ioan. 14*
 uia, ueritas, & uita. Audi prophetā loquentem: Qui semi *Psal. 125*
 nant in lacrymis, in gaudio metent. Euntes ibant, & fle-
 bant, mittentes semina sua. Venientes autem uenient in
 exultatione, portantes manipulos suos. Et loquere cum
 eo: Lauabo per singulas noctes lectum meum, in lacrymis *Psal. 6*
 meis stratum meum rigabo. Et iterum: Sicut desiderat ceruus *Psal. 41*
 ad fontes aquarū, ita desiderat anima mea ad te Deus. Si-
 tiuit anima mea ad te Deum fontem uiuum, quando ueniā,
 & apparebo ante faciē Dei. Factæ sunt mihi lacrymæ meæ
 panes per diem & noctem. Et in alio loco: Deus Deus me- *Psal. 62*
 us, ad te de luce uigilo. Sitiuit anima mea ad te, quā multi-
 pliciter tibi & caro mea: In terra deserta & inuia & in aquo-
 sa, sic in sancto apparui tibi. Quamquā enim sitierit te ani-
 ma mea; tamen multo te plus carnis meæ labore quæsiui,
 & tibi

& tibi in sancto apparere non potui, nisi prius in terra deserta a uitiiis, & inuia aduersariis potestatibus, & absque humore & rheumate ullius libidinis cōmorarer. Fleuit & Do

Luc.19 minus super ciuitatem Hierusalem, quia non egissent pēnitentiam: & Petrus trinam negationem amaritudine ab-

Mar.14 luit lacrymarum, impleuitq. illud propheticum: Exitus a-

Psal.118 quarum deduxerunt oculi mei. Plangit & Hieremias popu-

Hier.9 lum pēnitentiam non agentem, dicens: Quis dabit capiti

meo aquam, & oculis meis fontē lacrymarum, & plorabo

populum istum per diem & noctem? Cur autem plangat,

Hier.22 & desseat, sequenti sermone demonstrat: Nolite flere mor-

uum, neque plangatis eum. Flete planctu, qui egreditur;

quia non reuertetur ultra. Nequaquam igitur gentilis plan-

gendus est, atque Iudæus, qui in ecclesia non fuerunt, & se-

Matth.8 mel mortui sunt: de quibus saluator dicit: Dimitte mor-

tuos sepelire mortuos suos: sed eos plange, qui per sce-

lera atque peccata egrediuntur de Ecclesia, & nolunt ul-

tra reuerti ad eam damnatione uitiorum. Vnde & ad ui-

ros ecclesiasticos, qui muri & turres Ecclesiæ nuncupantur,

Thr.2 loquitur sermo propheticus, dicens: Muri Sion, proferte

Rom.12 lacrymas, implentes illud Apostoli: Gaudere cum gauden-

tibus, flere cū flentibus; ut dura corda peccantium uestris

lacrymis prouocetis ad fletum; ne perseverantes in malitia,

Hier.2 audiant: Ego plantaui te uineam frugiferam, omne semen

uerum: quo modo uersa es in amaritudinem uitis alienæ?

Et iterum: Ligno dixerunt, pater meus es tu, & lapidi, tu

genuisti me, & uerterunt ad me dorsa, & non facies suas.

Et est sensus: Noluerunt ad me conuerti, ut agerent pēni-

tentiam, sed per cordis duritiam in iniuriam meam sua ter-

ga uerterunt. Quamobrem & Dominus loquitur ad Hiere-

Hier.3 miam: Vidisti, quæ fecerunt mihi habitatio Israel? Abie-

runt super omnem montem excelsum, & subter omne li-

gnum frondosum, & fornicati sunt ibi, & dixi: Postquam

fornicata est, & fecit hæc omnia, ad me reuertere, & non

est reuersa. O clementia Dei, o nostra duritia, dum & post

tāta scelera nos prouocat ad salutem: et ne sic quidem uo-

lumus

lumus ad meliora conuerti. Si reliquerit, inquit, uxor uirum suum, & alii nupserit, & noluerit postea reuerti ad eum; numquid suscipiet eam, & non detestabitur? Pro quo scriptum est, iuxta Hebraicam ueritatem, quod in Græcis & Latinis codicibus non habetur: Et tu reliquisti me: tamen conuertere, & suscipiam te, dicit Dominus. *Esa. 31*
que in eundem sensum iisdem pene loquitur sermonibus: Conuertimini, qui profundum consilium cogitatis, & iniquum filii Israel: reuertere ad me, & redimam te. Ego Deus, & non est alius præter me, iustus & saluator non est *Esa. 45*
absque me. Reuertimini ad me, & salui eritis, qui estis in extremis terræ. Recordamini horum, & ingemiscite, & agite penitentiam qui erratis. Conuertimini corde, & mentote priorum a sæculo: quoniam ego sum Deus, & non est alius absque me. Scribit & Iohel: Cōuertimini ad *Iohel 2*
me ex toto corde uestro, in ieiunio, & lacrymis, & planctu: scindite corda uestra, & non uestimenta uestra. Miseri cors enim & miserator est Dominus, & agens penitentiam super malitiis. Quantæ autem sit misericordiæ, & quam, ut ita loquar, nimis ineffabilisq. clementiæ, *Osee 11*
ta nos doceat, per quem loquitur Deus: Quid tibi faciam Ephraim? quo modo te protegam Israel? quid tibi, inquam, faciam? Sicut Adama ponam te, & sicut Seboim. Conuersum est cor meum in me, & conturbata est penitudo mea. Nequaquam faciam secundum iram furoris mei. Vnde & *Psal. 6*
David loquitur in psalmo: Nō est in morte qui memor sit tui, in inferno autem quis cōfitebitur tibi? Et in alio loco: Peccatum meum notum tibi feci, & iniquitatem meam nō *Psal. 31*
abscondi. Dixi, pronunciabo contra me iniquitatem meam Domino, & tu dimisisti impietatem cordis mei. Pro hac orabit ad te omnis sanctus in tempore opportuno: Verū tamen in diluuiō aquarum multarum ad eum uon approximabunt. Vide, quanta magnitudo sit fletuum, ut aquarū diluuiō comparetur. quos qui habuerit, & dixerit cum Hieremia: Non fileat pupilla oculi mei: statim in illo completur: Misericordia & ueritas obuiauerunt sibi, iustitia & *Thren. 2*
Psal. 84
pax

- pax deosculatæ sunt : ut , si te iustitia & ueritas terruerint , misericordia & pax prouocent ad salutem . Totam pœnitentiam peccatoris ostendit psalmus quinquagesimus , quando ingressus est Dauid ab Bethsabeæ , uxorem Uriæ Ethiei , & a
2. Reg. 12 Nathan prophetante correptus , respondit , Peccaui : Statimq. meruit audire : Et Dominus abs te abstulit peccatū . Adulterio enim iunxerat homicidium : & tamen conuersus ad lacrymas , Miserere , ait , mei Deus secundum magnam misericordiam tuam : Et , secundum multitudinem miserationum tuarum , dele iniquitatem meam . Magnum enim peccatum magna indigebat misericordia . unde iungit , & dicit : Multum laua me ab iniquitate mea , & a peccato meo munda me : Quoniam iniquitatem meam ego agnosco , & delictum meum contra me est semper . Tibi soli peccaui , (rex enim eram , & alium non timebam) & malum coram te feci , ut iustificeris in sermonibus tuis , & uincas cum iudicaris . Concluserit enim Deus omnia sub peccato , ut omnibus misereatur . Tantumq. profecit , ut dudum peccator & pœnitens transierit in magistrum , & dicat , Docebo iniquos uias tuas , & impii ad te conuertentur . Cōfessio enim , & pulchritudo coram eo : ut , qui sua confessus fuerit peccata , & dixerit : Putruerunt , & corruptæ sunt cicatrices meæ a facie insipientiæ meæ : sceleratam uulnerum in sanitatis decorem commutet . Qui enim abscondit iniquitatē suā , nō prosperabitur . Achab , rex impiissimus , uineam Nabuthæ cruore possedit ; & cum Hiezabel non tam coniugio sibi , quam crudelitate coniuncta , Heliæ increpatione corripitur . Hæc dicit Dominus : Occidisti , & possedisti . Et iterum : In loco , in quo linxerunt canes sanguinem Nabuthæ , ibi lingent sanguinem tuum , & Hiezabel canes comedent ante muros Iezrael . Quod cum audisset Achab , scidit uestimenta sua , & posuit saccum super carnē suam , ieiunauitq. & dormiuit in cilicio : factusq. est sermo Domini ad Heliā , dicens : Quoniam reueritus est Achab faciem meam , non inducam malum in diebus eius . Vnum scelus Achab & Hiezabel : tamen , conuerso ad pœnitentiam Achab , pœna differtur

differtur in posteros, & Hiezabel, in scelere perseverans, præfenti iudicio condemnatur. Loquitur & Dominus in euangelio: Viri Niniuite surgent in iudicium cum generatione hac, & condemnabunt eam, quia egerunt pænitentiam in prædicatione Ionæ. Et iterum: Non enim ueni uocare iustos, sed peccatores ad pænitentiam. Drachma perit, & tamen inuenitur in stercore. Nonagintanovem oues relinquuntur in solitudine; & una ouis, quæ aberrauerat, pastoris humeris reportatur. unde & lætitia angelorum est super uno peccatore agente pænitentiam. Quanta felicitas, ut de salute nostra exultet cælestia? De quibus dicitur; Pænitentiam agite: appropinquabit enim regnū cælorū. Nul-
 lum in medio spatium. Mors & uita sibi contraria sunt, & tamen pænitentia copulantur. Luxuriosus filius totam prodegerat substantiam; &, procul a patre, uix porcorum cibis inedia sustentabat. reuertitur ad parentem: immolatur ei uitulus saginatus: stolam accipit & anulum, ut Christi recipiat uestimentum, quod dudum polluerat, & audire mereatur: Candida sint semper uestimenta tua: receptoq. signaculo Dei, proclamet ad Dominum: Pater, peccaui in cælum, & coram te: & reconciliatus osculo, dicat ad eum: Signatum est super nos lumen uultus tui Domine. Iustitia iusti non liberabit eum, in quacumque die peccauerit: & iniquitas iniqui non nocebit ei, quacumque die conuersus fuerit. Vnumquemque iudicat, sicut inuenerit. Nec præterita considerat, sed præsentia: si tamen uetera crimina nouella conuersione mutantur. Septies cadit iustus, & resurgit. Si cadit, quo modo iustus? si iustus, quo modo cadit? Sed iusti uocabulum non amittit, qui per pænitentiam semper resurgit. Et non solum septies, sed septuagies septies delinquenti, si conuertatur ad pænitentiam, peccata donantur. Cui plus dimittitur, plus diligit. Meretrix lacrymis pedes saluatoris lauat, & crine detergit; & in typum Ecclesiæ de gentibus congregatæ meretur audire: Dimittuntur tibi peccata tua. Pharisei iustitia perit superbia: & publicani humilitas confessione saluatur. Per Hieremiam contesta-

Matth. 12

Luc. 5.15

Matth. 18

Matth. 3

Luc. 15

Eccl. 9

Psal. 4

Ezec. 18

Prou 24

Matth. 18

Luc. 7

Luc. 18

Hier. 18

Y tur

tur Deus : Ad summā loquar contra gentem, & regnum, ut
 eradicem, & destruam, & disperdam illud. Si pænitentiam
 egerit gens illa a malo suo, quod locutus sum aduersum eā :
 agam & ego pænitentiam super malo, quod cogitavi ut fa-
 cerem ei. Et ad summam loquar super gentem, & regnū,
 ut ædificem, & ut plantem illud. Si fecerit malum in con-
 spectu meo, ut non audiat uocem meam : pænitentiam agā
 super bono, quod locutus sum ut facerem ei. Statimq. in-
 fert : Ecce ego fingo contra uos malum, & cogito cōtra uos
 cogitationem. Reuertatur unusquisque a uia sua mala, &
 dirigite uias uestras, & studia uestra. Qui dixerunt : De-
 sperauimus : post cogitationes enim nostras ibimus, &
 unusquisque post prauitatem cordis sui malum faciemus.

Luc. 2 Symeon iustus in euangelio loquitur : Ecce hic positus est
 in ruinam, & in resurrectionem multorum : in ruinam uide
 licet peccatorum, & in resurrectionem eorum, qui agunt

1. Cor. 5 pænitentiam. Apostolus scribit ad Corinthios : Auditur in-
 ter uos fornicatio, & talis fornicatio, qualis ne inter gentes
 quidem, ita ut uxorem patris aliquis habeat. Et uos inflati
 estis, & non magis luctum habuistis, ut tollatur de medio
 uestrum, qui hoc opus fecit. Et in secunda ad eosdem epi-
 stola, ne abundātorī tristitia pereat, qui eiusmodi est, reuo-
 cat eum, & obsecrat, ut confirmet super illum caritatem ;
 ut qui incestu perierat, pænitentia conseruetur. Nullus qui

Iob 14 dem mundus est a peccato, ne si unius quidem diei fuerit ui-
Iob 25 ta eius. numerabiles autem anni uitæ illius. Astra quoque
 ipsa non sunt munda in conspectu eius : & aduersum ange-
 los suos peruersum quid excogitauit. Si in cælo peccatum,

Iob 4 quanto magis in terra ? Si delictum in iis, qui carent tenta-
 tione corporea : quāto magis in nobis, qui fragili carne cir-
 cumdamur, & cum Apostolo dicimus : Miser ego homo,
Rom. 7 quis me liberabit de corpore mortis huius ? Non enim ha-
 bitat in carne nostra bonum, nec agimus quod uolumus,
 sed quod nolumus ; ut aliud anima desideret, aliud caro fa-
 cere cogatur. Quod si quidam iusti appellantur in scriptu-
 tis, & non solum iusti, sed iusti in conspectu Dei : iuxta il-
 lam

Iam iustitiam appellantur iusti, iuxta quam supra dictum est: Septies in die cadit iustus, & resurgit. Et iuxta quod ini- *Prou. 24*
 quitas iniqui non nocebit ei, in quacumque die conuersus *Ezech. 18*
 fuerit. Denique & Zacharias, pater Ioannis, qui scribitur *Luc. 1*
 Iustus, peccauit in eo, quod non credidit, & statim silen-
 tio condemnatur. Et Iob, qui iustus, & immaculatus, ac *Iob 1.39*
 sine querela in principio uoluminis sui scribitur, postea &
 Dei sermone, & confessione sui peccator arguitur. Si Abra-
 ham, Isaac, & Iacob, prophetæ quoque, & apostoli, ne-
 quaquam caruere peccato; si purissimum triticum habuit
 mixtas paleas: quid de nobis dici potest, de quibus illud
 scriptum est: Quid paleis ad frumentum, dicit Dominus? *Hier. 23*
 Et tamen paleæ futuro referuatur incendio: & zizania hoc *Luc. 3*
 tempore mixta sunt segetibus frumentorum, donec ueniat,
 qui habet uentilabrum in manu sua, & purgauerit cream;
 ut congreget triticum in horrea, & quisquilias gehennæ igni
 comburat. Hæc omnia, quasi per pulcherrima scripturarū
 prata discurrens, in unum locum uolui congregare, & de spe-
 ciosissimis floribus coronam tibi texere pœnitentiæ, quam
 imponas capiti tuo, & assumes pennas columbæ, & uoles, *Psal. 54*
 & requiescas, & clementissimo reconcilieris patri. Narra-
 uit mihi uxor quondam tua, nunc soror, atque conserua,
 quod iuxta præceptum Apostoli ex consensu abstineritis *1. Cor. 7*
 uos ab opere nuptiarum, ut uacaretis orationi; tuaq. rur-
 sum uestigia, quasi in salo posita, fluctuasse, immo, ut aper-
 tius loquar, esse prolapsa; illam autem audisse a Domino
 cum Moyse: Tu uero hic sta mecum: & dixisse de Domi- *Exod. 34*
 no: Statuit supra petram pedes meos: Tuam domū, quæ *Psal. 39*
 fundamenta fidei solida non habebat, postea diaboli tur-
 bine concidisse: porro illius perstare in Domino, & suum
 tibi hospitium non negare: ut, cui prius coniunctus fueras
 corpore, nunc spiritu copuleris. Qui enim adhæret Domi- *1. Cor. 6*
 no, unus spiritus est. Cumq. uos rabies barbarorum, & im-
 minens captiuitas separaret, sub iurifurandi testificatione
 pollicitum, ut ad sancta transeuntem loca uel statim, uel po-
 stea sequereris, & seruares animam tuam, quam uisus fue-

ras negligētia perdidisse. Redde igitur, quod præsente Deo
 spondidisti. Incerta est uita mortalium; ne ante rapiaris,
 quam tuam impleas sponsonem. Imitare eam, quam do-
 cere debueras. Pro pudor, fragilior sexus uincit sæculum,
 & robustior superatur a sæculo. Tanti dux femina facti est,
 & non sequeris eā, in cuius salute cādidatus es fidei? Quod
 si te rei familiaris tenent reliquiæ, ut scilicet & mortes ami-
 corum, & ciuium uideas, & ruinas urbium, atque uillarum:
 saltem inter captiuitatis mala, & feroces hostium uultus,
 & provinciæ tuæ infinita naufragia, teneto rabulam pœni-
 tentiæ, & memento conseruæ tuæ, quæ tuam quotidie sus-
 pirat, nec desperat salutem. Tu uagaris in patria, immo nō
 patria, quia patriam perdidisti: ista pro te in locis uenerabi-
 libus resurrectionis, & crucis, & incunabulorum Domini
 saluatoris, in quibus paruulus uagiit, tui nominis recorda-
 tur, teq. ad se orationibus trahit; ut, si non tuo merito, sal-
 tem huius salueris fide. Iacebat quōdam paralyticus in le-
 ctulo, & sic erat cunētis artubus dissolutus, ut nec pedes ad
 ingrediendum, nec manus mouere posset ad precandum;
 & tamen profertur ab aliis, & restituitur pristinæ sanitati,
 ut portaret lectulum, qui dudum portabatur a lectulo. Et
 te igitur absentem corpore, præsensem fide, offert conserua
 tua Domino saluatori. & dicit cum Chananea: Filia mea
 male uexatur a dæmonio. Recte enim appellabo animam
 tuam filiā animæ eius, quæ sexus nescit diuersitatem: quia
 te, quasi paruulum, atque lactentem, & necdum ualentem
 sumere solidos cibos, inuitat ad lac infantie, & nutricis ti-
 bi alimenta demonstrat: ut possis dicere cum propheta:
 Erraui sicut ouis perdita: quare seruum tuum: quoniam
 mandata tua non sum oblitus.

A R G V

DOMESTICAM eorum consuetudinem, unde uel fama, uel pudicitia periculum sit, a uiduis & uirginibus uitandam esse docet. sumptum autem declamatorio more a se fuisse hoc argumentum, tum in fine huius, tum in alia quadam prodit epistola. Dicendi genus suasorium est: propterea coniecturis, dilemmatisq. festiuitate quadam admixtis, utitur.

DE VITANDO SVSPECTO

contubernio.

EPISTOLA XLVII.

ET VLT mihi quidam frater e Gallia, se habere sororem uirginem, matremq. uiduam; quæ in eadem urbe diuisis habitarent cellulis; & uel ob hospitii solitudinem, uel ob custodiendas facultatulas, præsulibus sibi quosdam clericos assumpsissent; ut maiore dedecore iungerentur alienis, quam a se fuerant separatæ. cumq. ego ingemiscerem, & multo plura tacendo, quam loquendo, significarem, Quæso te, inquit, corripas eas litteris tuis, & ad concordiam reuoces; ut mater filiã, & filia matrem agnoscat. Cui ego, Optimam, inquam, mihi iniungis prouinciam; ut alienus conciliem, quas filius, fraterq. non potuit. quasi uero episcopalem cathedram teneam, & non, clausus cellula, ac procul a turbis remotus, uel præterita plangam uitia, uel uitare nitam præsentia. Sed & incongruum est latere corpore, & lingua per totum orbem uagari. Et ille, Nimium, ait, formidolosus es. ubi illa quondã constantia, in qua multo sale orbem defricans, Lucilianũ quippiam retulisti? Hoc est, aio, quod me fugat, & labra diuidere non sinit. postquam enim, arguendo crimina, factus sum criminosus; & iuxta tritum uulgi sermone prouerbium, Iurgantibus, & negantibus cunctis, nec aures me credo habere, nec tactum; ipsiq. parietes in me maledicta

Y 3 resona-

Psal. 68 runt; & in me psallebant, qui bibebant uinum: coactus
Psal. 140 malo tacere didici, rectius esse arbitrans, ponere custodiam
 ori meo, & ostium munitum labiis meis, quam declinare
 cor meum in uerba malitiæ, &, dum carpo uitia, in uitium
 detractionis incurrere. Quod cum dixissem, Non est, in-
 quit, detrahere, uerum dicere: nec priuata correptio gene-
 ralem facit doctrinam: cum aut rarus, aut nullus sit, qui
 sub huius culpæ reatum non cadat. Quaeso ergo te, ne me,
 tanto itinere uexatum, frustra uenisse patiaris. Scit enim
 Dominus, quod, post uisionem sanctorum locorum, hanc
 uel maxime causam habui, ut cum tuis litteris sorori mede-
 rer, ac matri. Et ego, Iamiam, inquam, quod uis faciam:
 nam & epistolæ transmarinæ sunt; & specialiter sermo di-
 ctatus, raro potest inuenire quos mordeat. Te autem ob-
 secro, ut clam sermonem hunc habeas: cumq. portaueris
 eum pro uiatico, si auditus fuerit, lætemur pariter; si autē
 contemptus, quod & magis reor, ego uerba perdiderim, tu
 itineris longitudinem. Primum uos scire cupio, mater, &
 filia, me non iccirco scribere, quia aliquid de uobis finistru
 suspicer, sed ne ceteri suspicentur, uestram errare concor-
 diam. alioqui, quod absit, si peccatorum uos existimarem
 glutino cohæsisse, numquam scriberem, sciremq. me surdis
 narrare fabulā. Deinde hoc obsecro, ut, si mordacius quip-
 piam scripsero, non tam meæ putetis austeritatis esse, quā
 morbi. Putridæ carnes ferro curantur, & cauterio: uene-
 na serpentina pelluntur antidoto. Quod satis dolet, maio-
 ri dolore expellitur. Ad extremum hoc dico, quod, si etiā
 hæc conscientia criminis uulnus non habeat, habet tamen
 fama ignominiam. Mater, & filia, nomina pietatis, officio
 rum uocabula, uincula naturæ, secundaq. post Deum fæde
 ratio. Non est laus, si uos diligitis: scelus est, quod odistis.

Luc. 2 Dominus Iesus Christus subiectus erat parentibus suis: ue-
 nerabatur matrem, cuius ipse erat pater: colebat nutriciū,
 quem nutriuerat: gestatumq. se meminerat alterius utero,

Iean. 19 alternis brachiis. unde & in cruce pendens, commendat pa-
 rentem discipulo, quam numquam ante crucem dimiserat.

Tu

Tu uero filia, (iam enim desino ad matrem loqui, quā forsitan & ætas, & imbecillitas, ac solitudo excusabilem facit) tu, inquam, filia eius domum angustam iudicas, cuius non tibi fuit uenter angustus? Decem mensibus utero clausa uiuisti, & uno die in uno cubiculo cum matre non duras? An oculos eius ferre nō potes? & quia omnes motus tuos, ut pote illa quæ genuit, quæ aluit, & ad hanc adduxit ætatē, facilius intelligit, testem domesticam fugis? Si uirgo es, quid times diligentem custodiam? si corrupta, cur non palam nubis? Secunda post naufragium tabula est, quod male cœperis, saltē hoc remedio temperare. Neque uero hoc dico, quod post peccatum tollam pænitentiam, ut, quod male cœpit, male perseueret; sed quod desperem in istiusmodi copula diuulsionem. Alioqui, si ad matrem migraueris post ruina, facilius poteris cum ea plangere, quod per illius absentiam perdidisti. Quod si adhuc integra es, & non perdidisti: serua, ne perdas. Quid tibi necesse est in ea uersari domo, in qua necesse habeas quotidie aut perire, aut uincere? Quis umquam mortalium iuxta uiperam securos somnos capit? quæ etsi non percutiat, certe sollicitat. Securius est perire non posse, quam iuxta periculum non perisse. In altero tranquillitas est, in altero gubernatio. ibi gaudemus, hic euadimus. Sed forte respondeas: Non bene morata mater est, res sæculi cupit, amat diuitias, ignorat ieiunium, oculos stibio linir, uult compta procedere, & nocet proposito meo; nec possum cum huiusmodi uiuere. Primum quidem, etiam si talis est, ut causaris, maius habebis præmium, si talem non deseras. Illa te diu portauit in utero, diu aluit, & difficiliore infantie mores blāda pietate sustinuit. lauit pannorum sordes, & immūdo sæpe fœdata est stercore. assedit ægrotanti; &, quæ pro te sua fastidia sustinuit, tua quoque passa ad hanc perduxit ætatem: ut Christum amares, docuit. Non tibi displiceat eius conuersatio, quæ te sponso tuo uirginem consecrauit. Quod si ferre non potes; & delicias eius fugis, atque (ut uulgo solet dici) secularis est mater: habes alias uirgines, habes

Y + sanctum

sanctum pudicitæ chorum. Quid matrem deferens, eum eligis, qui forsitan suam reliquit sororem, & matrem? Illa difficilis, sed iste facilis: illa iurgatrix, ergo iste placabilis. Quæro, utrum uirum secuta sis, an postea inueneris? Si eum secuta es; manifestum est, cur matrem reliqueris. si postea reperisti; ostendis, quid in matris hospitio non potueris inuenire. Durus dolor, & meo mucrone me uulnerans: Qui

Prov. 10 ambulat, inquit, simpliciter, ambulat confidenter. Tacerem, si me non morderet conscientia, & in aliis meum cri-

Matth. 7 men non reprehenderem, nec per trabem oculi mei alterius festucam uiderem. Nunc autem, cum inter fratres procul habitans, eorumque fruens contubernio, honeste sub arbitris & uideam raro, & uidear; impudentissimum est eius te uerecundiam non sequi, cuius sequeris exemplum. Quod si dixeris: Et mihi sufficit conscientia mea: habeo Deum iudicem, qui meæ uitæ est testis: non curo quid loquantur ho-

Rom. 12 mines: audi Apostolum scribentem: Prouidentes bona non solum coram Deo, sed etiam coram omnibus hominibus. Si quis te carpit, quod sis Christiana, quod sis uirgo: non cures: quod ideo dimiseris matrem, ut in monasterio inter uirgines uiueres, talis detractio laus tua est. Vbi non luxuria in puella Dei, sed duritia carpitur, crudelitas ista pietas

Matth. 10 est. illum enim præfers matri, quem præferre iuberis & ani-

Ioan. 12 mæ tuæ. quem si & ipsa prætulerit, & filiam te sentiet, & sororem. Quid igitur? scelus est, sancti uiri habere contubernium? Obtorto collo me in ius trahis; ut aut probè quod nolo, aut multorum inuidiam subeam. Sanctus uir nunquam a matre filiam seiungit: utramque suscipit, utramque ueneratur. Sit quamlibet sancta filia, mater uidua; indicium castitatis est. Si coruus tuus est ille nescio quis, matrem tuam honoret ut suam: si senior te, ut filiam diligit, & parentis subiiciat disciplinæ. Non expedit amborum famæ, plus te illum amare, quam matrem: ne non uideatur in te affectum eligere, sed ætatem. Et hæc dicerem, si fratrem monachum non haberes, si domesticis careres præfidiis: nunc uero, pro dolor, inter matrem, atque germanum

manum, & matrem uiduam, fratremq. monachum, cur se alienus interfecerit? Bonum quidem est, ut te & filiam noueris, & sororem. si autem utrumque non potes, & mater quasi dura respuitur; saltem frater placeat. si frater asperior est; mollior sit illa, quæ genuit. Quid palles? quid æstuas? quid uultum rubore suffundis? & trementibus labiis impatientiam pectoris contestaris? Non superat amorem matris & fratris, nisi solius uxoris affectus. Audio præterea te suburbana rura, uillarum amœnitates cum affinis, atque cognatis, & istiusmodi generis hominibus circumire. nec dubito, quin uel consobrina, uel soror sit, in quarum solatium noui generis ducaris affecla. Absit quippe, ut, quamuis proximi sint, & cognati, uirorum te suspicer captare consortia. Obsecro ergo te uirgo, ut mihi respondeas. Sola uadis in comitatu propinquorum, an cū amasio tuo? Quamuis sis impudens, sæcularium oculis eū ingerere non audebis. si enim hoc feceris: & te, & illum familia uniuersa cantabit: uos cunctorum digiti denotabunt. ipsa quoque soror, aut affinis, siue cognata, quæ in adulationem tui sanctum nonnumquam coram te uocant, cum se paululum auerterint, portentuosum ridebunt maritum. Sin autem sola ieris; quod & magis existimo: utique inter seruos adolescentes, inter maritatas feminas, atque nupturas, inter lasciuas puellas, & comatos linteatosq. iuuenes, furuarum uestium puella gradieris. Dabit tibi batulus quilibet manum; sustentabit lassam; & pressis digitis, aut tentabitur, aut tentabit. Erit tibi inter uiros matronasq. conuiuium: spectabis aliena oscula, prægustatos cibos: & non absque scandalo tuo in aliis sericas uestes, auratasq. miraberis. In ipso quoque conuiuium ut uestaris carnibus, quasi inuita cogeris. Vt uinum bibas, Dei laudabitur creatura. Vt laues balneis, sordibus detrahetur. Et omnes te, cum aliquid eorum, quæ suadent, retractans feceris, puram, simplicem, dominam, & uere ingenuam cōclamabunt. Personabit interim aliquis cantor ad mensam, & inter psalmos dulci modulamine currentes, quoniam alie

nas non autdebit uxores, te, quæ custodem non habes, sepius respectabit: loquetur nutibus; &, quidquid metuit dicere, significabit affectibus. Inter has tantas illecebras uoluptatum etiam ferreas mentes libido domat; quæ maiorem in uirginibus patitur famem, dum dulcius putat omne, quod nescit. Narrant gentilium fabulæ, cantibus Sirenarum nautas isse in saxa præcipites, & ad Orphei citharam arbores bestiasq. ac filicum dura mollita. Difficile inter epulas seruetur pudicitia. Nitens cutis sordidum ostendit animum. Legimus in scholis pueri, & spirantia in plateis æra perspeximus; aliquem, ossibus uix hærentem, illicitis arsisse amoribus, & ante uita caruisse, quam peste. Quid tu facies puella, sani corporis, delicata, pinguis, rubens, æstuans inter carnes, inter uina, & balneas, iuxta maritos, iuxta adolescentulos? quæ etsi rogata non feceris, tamen formæ putes testimonium, si rogeris. Libidinosa mens ardentius honesta persequitur, &, quod non licet, dulcius suspicatur. Vestis ipsa uilis & pulla, animi tacentis indicium est; si rugam non habeat; si per terram, ut altior uidearis, non trahatur; si de industria dissuta sit tunica, ut aliquid intus appareat, operiatq. quod foedum est, & aperiat quod formosum. Caliga quoque ambulantis nigella ac nitens, stridore ad se iuuenes uocat. Papillæ fasciis comprimuntur, & crispanti cingulo angustius pectus arctatur. Capilli uel in frontem, uel in aures defluunt. Palliolum interdum cadit, ut candidos nudet humeros, &, quasi uideri noluerit, celat festina, quod uolens detexerat. Et quando in publico quasi per uerecundiam operit faciem; lupanarium arte, id solum ostendit, quod ostensum magis placere potest. Respondebis: Vnde me nosti; et quo modo, tam longe positus, iactas in me oculos tuos? Fratris hoc tui mihi narrauerunt lacrymæ, & intolerabiles per momenta singultus. atque utinam ille mentitus sit, & magis timens hoc, quam arguens, dixerit. sed, mihi crede, nemo mentiens plorat. Dolet sibi prælatum iuuenem, non quidem comatum, non uestium sericarum, sed torosulum, & in sordibus

bus delicatum; qui ipse sacculum signet, textrinum teneat, pensa distribuat, regat familiam, emat quidquid de publico necessarium est; dispensator, & dominus, & praeueniens officia seruulorum, quem omnes rodant famuli, & quidquid domina non dederit, illum clamitent subtraxisse. Querulum seruulorum genus est; & quantacumque dederis, semper eis minus est. non enim considerant, de quanto, sed quantum detur; doloremq. suum solis, quod possunt, obtrectationibus consolantur. Ille parasitum, iste impostorem, hic heredipetam, alius nouo quolibet appellat uocabulo. Ipsum iactant assidere lectulo, obstetrices adhibere languenti, portare matulam, calefacere linthea, plicare fasciolas. Facilius mala credunt homines, & quodcumque domi fingitur, rumor in publicum fit. Nec mireris, si ancillæ & seruuli de uobis ista consingant: cum mater quoque id ipsum queratur, & frater. Fac igitur, quod moneo, quod precor, ut primum matri, dehinc, si id fieri non potest, saltem fratri reconcilieris. aut, si ista tam cara nomina hostiliter detestaris; diuidere ab eo, quæ tuis diceris prætulisse. si autem & hoc non potes; reuerere certe tuos, si non potes deferere; uel honestius sodali tuo utere. Separentur domus uestræ, diuidaturq. conuiuium; ne maledici homines, sub uno tectulo uos manentes, lectulum quoque criminetur habere communem. Potes & ad necessitates tuas, quale uoluisti, habere solatium, & aliqua ex parte publica carere infamia. quamquam cauenda sit macula, quæ nullo nitro, secundum Hieremiam, nulla *Hier. 2* fullonum herba elui potest. Quando uis, ut te uideat, & inuisat; adhibe arbitros, amicos, libertos, seruulos. Bona conscientia nullius oculos fugit. Intret intrepidus, securus exeat. Taciti oculi, & sermo silens, & totius corporis habitus uel trepidationem interdum, uel securitatem loquuntur. Aperi, quæso, aures tuas, & clamorem totius ciuitatis exaudi. Iam perdidistis uestra uocabula, & mutuo ex uobis cognomina suscepistis: tu illius diceris, & ille tuus. Hæc mater audit, & frater; paratiq. sunt, & precantur nos sibi

sibi diuidere, & priuatam uestra coniunctionis infamiam laudem facere communem. Tu esto cum matre, sit ille cum fratre. Audentius diliges sodalem fratris tui: honestius amabit mater amicum filii, quam filia suam. quod si nolueris, si mea monita rugata fronte contempseris; epistola tibi hæc uoce libera proclamabit: Quid alienum seruum obfides? quid ministrum Christi, famulum tibi facis? respice ad populum: singulorum facies intueri. ille in ecclesia legit, in te aspiciunt uniuersi, nisi quod pene licentia coniugali de tua infamia gloriaris. Nec iam secreto dedecore potes esse contenta. procacitatem libertatem uocas. Facies meretricis facta est tibi, nescis erubescere. Iterum me malignum, iterum suspiciosum, & rumigerulum clamitas. Ego ne suspiciosus? ego ne maleuolus? qui, ut in principio epistolæ præfatus sum, ideo scripsi, quia non suspicabar: an tu negligens, dissoluta, contemptrix; quæ, annos nata uigintiquinque, adolescentem necdum bene barbatulum, ita brachiis tuis, quasi cassibus, inclusisti? Optimum reuera pædagogum, qui te moneat, qui asperitate frontis terreat. Et quamquam in nullis ætatibus libido sit tuta; tamen, uel cano capite, ab aperta defendat ignominia. Veniet, ueniet tempus; (dies enim allabitur, dum ignoras) & iste formosulus tuus, quia cito senescunt mulieres, maxime quæ iuxta uiros sunt, uel ditiozem reperiet, uel iuniorem. tunc te pænitebit consilii tui, & tædebit pertinaciæ, quando & rem, & famam amiseris; quando, quod male iunctum fuerat, diuidetur bene. Nisi forte segura es, &, coalescente tanti temporis caritate, dissidium non uereri. Tu quoque mater, quæ propter ætatem maledicta non metuis, noli sic uindicare, ut pecces. Magis a te discat filia separari, quàm tu ab illa seiungi. Habes filium, & filiam, & generum, immo & contubernalem filia tuæ: quid quæris aliena solatia, & ignes iam sopitos suscitare? honestius est tibi saltem culpam filia sustentare, quam occasionem tuæ quærere. Si tecum filius monachus, pietatis uiduitatisque præsidium: quid tibi alienum hominem quæris, in ea præsertim domo, quæ filium,

Hier. 3

filium, & filiam capere non potuit? Eius iam ætatis es, ut possis nepotes habere ex filia: inuita ad te utrumque: reuertatur cum uiro, quæ sola exierat. uirum dixi, non maritum. nemo calumniatur. sexum significare uolui, non cōiugium. Aut, si erubescit, & retractat, & domum, in qua nata est, arbitratur angustam: uos ad eius hospitium pergit: quamuis arctum sit, facilius matrem, & fratrem capere potest, quam hominem alienum; cum quo certe in domo una, sine cubiculo, casta manere non poterat. Sint in una domo duæ feminæ, & duo masculi. si autem & tertius ille *γυπαζόστροφος* tuus abire non uult, & seditiones ac turbas concitat; sit biga, sit triga, frater ueliter, ac filius; & sororem illi exhibebis, & matrem. Alii uitricum, & generum uocitent, ille nutricium appellet, & fratrem. Hæc ad breuem lucubratiunculam celeri sermone dictaui, uolens desiderio postulantis satisfacere, & quasi ad scholasticam materiam me exercens: eadem enim die mane pulsabat ostium, qua profecturus erat: simulq. ut ostenderem obrectatoribus meis, quod & ego possem, quidquid ueniret in buccam, dicere: unde & de scripturis pauca perstrinxi; nec orationem meam, ut in ceteris libris facere solitus sum, illarum floribus texui. extemporalis est dictatio, & tanta ad lumen lucernulæ facilitate profusa, ut notatiorum manus lingua præcurreret, & signa ac furta uerborum uolubilitas sermonum obrueret. quod iccirco dixi, ut, qui non ignoscit ingenio, ignoscat uel tempori.

ARGV-

SABINIANVS Diaconus, uirum, cuius uxorem uigilaerat, fugiens, in Bethlehem uenerat: per litteras Episcopus suus illum Hieronymo commendauerat: manens in sanctis locis, & Diaconi officio fungens, uirginem quandam sacram a monasterio Bethlehemitico ad stuprum, fugamq. sollicitauit: deprehenso, ac ueniam potenti ignouit uir sanctus. is deinde passim fame illius obrectare cepit. admonet nunc eum per litteras, ut pœnitentiam aliquo in monasterio inclusus agat.

AD SABINIANVM DIACONVM,

inreparatoria.

EPISTOLA XLVIII.

1. Reg. 16

2. Cor. 12

Luc. 15

Rom. 2

Exo. 4

AMVEL quondam lugebat, Saulem, quia pœnituerat Dominum, quod unxisset eum regem super Israel. et Paulus Corinthios, in quibus audiebatur fornicatio, & talis fornicatio, qualis nec inter gentes quidem; uoce flebili commonebat, dicens: Ne, cum rursus uenero, humiliet me Deus apud uos, & lugeam multos ex iis, qui ante peccauerunt, & non egerunt pœnitentiam super immunditiis, quas gesserunt in impudicitia, & fornicatione. Si hoc propheta, & Apostolus, nulla ipsi labe maculati, clementi in cunctos mente faciebant: quanto magis ego ipse peccator in te debeo facere peccatore, qui non uis erigi post ruinam, nec oculos ad cælum leuare; sed, prodita patris substantia, porcorum siliquis delectaris; & superbix prærupta conscendens, præceps laberis in profundum? Deum uentrem uis habere pro Christo: seruis libidini; gloriaris in carne, & confusione tua; &, quasi pinguis hostia, in mortem propriam saginaris; imitarisq. eorum uitam, quorum tormenta non metuis; ignorans, quoniam benignitas Dei ad pœnitentiam te hortetur. Secundum autem duritiam tuam & cor impœnitens, thesaurizas tibi iram in die iræ. An iccirco induratur, iuxta Pharaonem,

raonem, cor tuum, quia non statim percuteris, & differ-
ris diu ad poenam? Et ille dilatus est; & decem plagas, non
quasi ab irato Deo, sed quasi a patre commonente susti-
nuit: donec, in peruersum acta penitentia, populum, quē
dimiserat, per deserta sequeretur, & ingredi auderet ma-
ria: per quā uel sola doceri potuit, timori habendum eum, *Exod. 14*
cui etiam elementa seruiunt. Dixerat & ille: Non noti Do- *Exod. 5*
minum, neque dimitto Israel. Quem tu imitans loqueris:
Visio, quam hic uidet, in dies longos est, & in tempora lō
ga iste prophetat. Propter quod dicit idem propheta: Hæc *Exech. 12*
dicit Adonai Dominus: Non prolongabuntur amplius
omnes sermones mei, quoscumque loquar, quia loquar
uerbum, & faciam. Sanctus Dauid de impiis, & de scele-
stis; quorum tu pars non modica, sed princeps es; quod
sæculi felicitate fruerentur, & dicerent: Quo modo cogno *Psal. 72*
uit Deus, & si est scientia in excelsis? Ecce ipsi peccatores
& abundantes in sæculo obtinuerunt diuitias: pene lapso
pede, & fluctuanti uestigio causabatur, dicens: Ergo sine
causa iustificauit cor meum, & laui inter innocentes manus
meas: Præmiserat enim, quia æmulatus sum super iniqua
agentes, pacem peccatorum uidens; quia non est respec-
tus morti eorum, & solida plaga in flagella eorum. In la-
boribus hominum non sunt, & cum hominibus non flagel-
labuntur. Propterea tenuit eos superbia, circumdati sunt
iniquitate, & impietate sua. Egre dietur, sicut ex adipe,
iniquitas eorum: transferunt in affectum cordis. Cogitaue-
runt, & locuti sunt mala, iniquitatem in excelsis locuti
sunt. Posuerunt in cælum os suum, & lingua eorum per-
transiit super terram. Nonne tibi uidetur de te omnis iste
psalmus esse compositus? Vegeto quippe es corpore; &
nouus antichristi apostolus, cum in una notus fueris ciuita-
te, transgrederis ad aliam. Non indiges sumptibus, non
plaga forti percuteris. Et cum hominibus, qui non sunt,
ut tu, irrationabilia iumenta, corripere non mereris. Pro-
pterea elatus es in superbiam; & uestimentum tuum fœ-
tet luxuria; &, quasi ex aruina pingui & quodam adipe eru-
ctans

Etans uerba mortifera, non te respicis esse moriturum; nec unquam, post expletam libidinem, pœnitentia remorde-
ris. Transisti in affectum cordis; &, ne tibi solus uidearis
errasse, simulas nefanda de seruis Dei, nesciens quod ini-
quitate in altum loquaris, & ponas in cælum os tuum.
Nec mirum, si a te qualescumque serui Dei blasphemem-
tur, cum patrem familias Beelzebub uocauerint patres tui.

Matth. 10 Non est discipulus supra magistrum, nec seruus supra Do-

Luc. 6. 23 minum suum. Si illi in uiridi ligno tanta fecerunt, tu in me,

Malach. 3 arido ligno, quid factururus es? Tale quid & in Malachia
plebs scandalizata credentium, de ore tuo loquitur: Dixe-
runt, uanus est, qui seruit Deo. Et quid plus? Quia culto
diuimus mandata eius, & quoniam iniimus supplicantes
ante faciam Dei omnipotentis. Et nunc nos beatos dici-
mus alienos. Reëdificantur omnes, qui faciunt iniqua.
Aduersati sunt Deo, & salui facti sunt. Quibus postea diem
iudicii Dominus comminatur; &, quid inter iustum, & ini-
ustum futurum sit, multo ante prænuncians, ait: Et conuer-
timini: & uidebitis, quid sit inter iustum, & iniustum, inter
seruientem Domino, & non seruientem Domino. Hæc ti-
bi ridicula forte uideantur, qui comædis, & lyricis, scripto-
ribus, mimis, & Lentulis delectaris: quamquam ne ista tibi
quidem præ nimia cordis hebetudine intelligenda cōcesse-

Amos 1. 2 rim. Prophetarum uerba cōtemnas, sed respondebit Amos:
Et in tribus & in quattuor impietatibus nonne auersabor
eum, dicit Dominus? Quoniam enim Damascus, Gaza,
Tyros, Idumæa, Ammonitæ, & Moabitæ, Iudæi quoque,
& Israel, sæpe ad se Dei uaticinio destinato, ut agerent ali-
quando pœnitentiam, audire contempserunt, iræ suæ, quam
illaturus est Dominus, causas iustissimas profert, dicens:
In tribus & quattuor impietatibus nonne auersabor eos?
Sceleratum est, inquit, mala cogitare: concessi. Nequius
est, male cogitata uelle perficere: & hoc pro mea misericor-
dia benignus induli. Numquid & opere implendum pecca-
tum fuit; & mea superbe calcæda clementia? Tamē & post
Ezech. 18 factum, quia malo pœnitentiam peccatoris, quam mortem:
Non

Non enim sani opus habent medico, sed male habentes : *ia Mar. 2*
 centi manum porrigo, & cōspersum in sanguine suo, ut pro
 priis fletibus lauetur, exhortor. Quod si nec sic pænitiā
 uult agere, &, fracto nauigio, tabulam, per quam saluari
 poterat, non retentat; cogor dicere: Super tribus & quat-
 tuor impietatibus nonne auersabor eum, dicit Dominus?
 Auerfionem dicens pro pœna, dum suæ peccator relinqui-
 tur uoluntati. Inde est, quod peccata patrum in tertiam & *Exo. 20*
 quartam generationem restituit, dum non uult statim pu-
 nire peccantes; sed ignoscens primis, postrema cōdemnat.
 Alioqui, si protinus scelerū ultor existeret; & multos alios,
 & certe Paulum apostolum Ecclesiæ non haberēt. Ezechiel
 propheta, cuius supra fecimus mentionem, Dei uerbum ad
 se factum referens, ait: Aperi os tuum, & manduca, quæ *Ezech. 3*
 ego dabo tibi. Et uidi, inquit, & ecce manus extēta ad me, *Ezech. 2*
 & in ipsa uolumen libri. Et reuoluit illud in cōspectu meo,
 & in ipso scriptum erat a facie & retrorsum, lamentum, &
 carmen, & uæ. Prima scriptura ad te pertinet, si tamen uo-
 lueris agere pænitiā post delictum. Secūda ad sanctos,
 qui ad Dei canticum prouocantur. nō est enim pulchra lau *Eccli. 19*
 datio in ore peccatoris. Tertia ad tui similes: qui desperan-
 tes, semet ipsos tradiderunt immunditiæ, & fornicationi,
 & uentri, & iis quæ infra uentrem sunt, qui putant omnia
 morte finire, & nihil esse post mortem, & dicunt: Tempe- *Esa. 28*
 stas si transierit, nō ueniet super nos. Liber ille, quem pro-
 pheta deuorat, omnis series scripturarum est. In quibus &
 pænitens plangitur, & iustus canitur, & maledicunt despe-
 rans. Nihil ita repugnat Deo, quam cor impænitens. So-
 lum crimen est, quod ueniam consequi non potest. si enim
 ei ignoscitur post peccatum, qui peccare desistit; & ille fle-
 ctit iudicem, qui rogat; impænitens autem omnis ad ira-
 cundiam prouocat iudicantem: solum desperationis crimē
 est, quod mederi nequeat. Porro, ut scias Deum quotidie
 peccatores ad pænitiā prouocare: qui si rigidi persiste-
 rint; de clemente eum seuerum & trucem faciunt: audi E-
 saie uerba, dicentis: Et uocabit, inquit, Dominus Sa- *Esa. 22*
 baath

baath in die illa ad fletum, & planctū magnum, & decalua-
tionem, & accinctionem ciliciorum. Ipsi uero fecerunt læ-
titiā, & exultationem, mactantes uitulos, & immolantes
oues, ut comederent carnes, & biberent uinum, dicentes:

1. Cor. 15 Māducemus, & bibamus: cras enim moriemur. Post quas
uoces, & perditæ mentis audaciam, scriptura commemo-

Esa. 22 rat, dicens: Et reuelata sunt hæc in auribus Domini Sa-
baath: non remittetur uobis hoc peccatum, donec moria-
mini. Si enim peccato mortui fuerint, tunc eis remittetur
peccatum: quod, quamdiu in peccato uixerint, non di-
mittitur. Parce, quæso, animæ tuæ. Crede, Dei filium fu-
turum esse iudicem. Recordare, a quo episcopo diaconus
ordinatus sis. Nec mirum, quamuis sanctum hominem, ta-

1. Reg. 15 men in homine deligendo potuisse falli; cum & Deum præ-
niteat, quod Saul in regem unxerit: & in duodecim aposto-

Matth. 27 lis Iudas sit proditor repertus: & de quondam ordinis tui

Apoc. 2 hominibus Nicolaus Antiochenus, immunditiarū omniū,
& Nicolaitarum hæreseos auctor extitisse referatur. Non ti-
bi illa nunc replico, quod plures uirgines stuprasse narres;
quod a te nobiliū uiolata matrimonia publico cæsa sint gla-
dio; quod per lupanaria impurus, & helluo cucurristi. Ma-
gna quidem ista sunt pondere suo, sed fiunt eorum, quæ il-
laturus sum, comparatione leuiora. Rogo, quantum cri-
men est, ubi stuprum & adulterium parum est? Infelicissi-
me mortalium, tu speluncam illam, in qua Dei filius natus

Psal. 84 est, & ueritas de terra orta est, & terra dedit fructum suum,
de stupro conditurus ingrederis? non times, ne de præse-
pi infans uagiat, ne puerpera uirgo te uideat, ne mater Do-

Luc. 2 mini contempletur? Angeli clamant, pastores currunt, stel-
Matth. 2 la desuper rutilat, Magi adorant, Herodes terretur, Hie-
rosolyma conturbatur: & tu cubiculum uirginis, deceptu-
rus uirginem, irrepis? Paueo miser, & tam mente, quam
corpore perhorresco, ponere tibi uolens ante oculos tuos
opus tuum. Tota ecclesia nocturnis uigiliis Christum domi-
num personabat; & in diuersarum gentium linguis unus in
laudibus Dei spiritus concinebat. tu inter ostia quondam
præse-

præsepis Domini, nunc altaris, amatorias epistolas fulciebas, quas postea illa miserabilis, quasi flexo adoratura genu, inueniret, & legeret. Et stabas deinceps in choro psallentium, & impudicis nutibus loquebaris. Pro nefas, non possum ultra progredi. prorumpunt lacrymæ ante, quam uerba, & indignatione pariter ac dolore: in ipso meatu faucium spiritus coarctatur. Vbi mare illud eloquentiæ Tullianæ? ubi torrens fluuius Demosthenis? nunc profecto muti essetis ambo, & uestra lingua torpesceret. inuenta est res, quam nulla eloquentia explicare queat. repertum est facinus, quod nec mimus fingere, nec scurra ludere, nec Atellanus possit effari. Moris est in Aegypti & Syriæ monasteriis, ut tam uirgo, quam uidua, quæ se Deo uouerint, & sæculo renunciantes, omnes delicias sæculi conculcarint, crinem monasteriorum matribus offerant desecandum, nõ intacto postea contra Apostoli uoluntatem incessuræ capite, 1. Cor. 12 sed ligato pariter ac uelato. nec hoc quispiam, præter ton dentes, nouit, & tonsas, nisi quod, quia ab omnibus fit, penes scitur ab omnibus. hoc autem duplicem ob causam de consuetudine uersum est in naturam; uel quia lauacrum nõ adeunt; uel quia oleum nec capite, nec ore norunt; ne a paruis animalibus, quæ inter cutem & crinem gigni solent, & concretis sordibus opprimantur. Videamus igitur, tu uir bone inter ista quid feceris. Futuro matrimonio, in spelunca illa uenerabili, quasi quosdam obsides accipis capillos, sudariola infelicitis, & cingulum dotale pignus deportas, iurans ei te nullam similiter amaturum: deinde curris ad pastorum locum, & angelorum desuper strepitu concinente, in eadē uerba testaris. Nihil dico amplius, quod in oscula rueris, quod amplexatus sis. Totum quidem de te credi potest; sed ueneratio præsepis & campi non me sinunt plus credere, quam te uoluntate tantum & animo corruisse. Miser, nonne, quando in spelunca cum uirgine stare cœpisti, caligauerunt oculi tui, lingua torpuit, conciderunt brachia, pectus intremuit, nutauit incessus? Post apostoli Petri basilicam, in qua Christi flammeo consecrata est, post crucis & resur-

rectionis & ascensionis Dominicæ sacramenta, in quibus
 rursum se in monasterio uicturam sponderat, audes cri-
 nem accipere tecum noctibus dormituræ, quem Christo
 messuerat in spelunca? Deinde a uespere usque mane fene-
 stræ illius affides; & quia, propter altitudinem, hære-
 re uobis comminus non licebat, per funiculū uel accipis aliquid,
 uel remittis. Vide, quanta diligentia domini fuerit, ut num-
 quam domi uirginem, nisi in ecclesia, uideris; & cum talem
 uterque uestrum habuerit uoluntatem, nisi per fenestram
 nocte facultas uobis non fuerit colloquendi. Oriebatur ti-
 bi, ut postea didici, sol inuito: exanguis, marcidus, palli-
 dus, ut suspicione omni careres, euangelium Christi, qua-
 si diaconus, lectitabas. Nos pallorem ieiunii putabamus;
 exangue os contra institutum ac morem tuum, quasi con-
 fectum uigiliis, mirabamur. Iam tibi & scalæ, per quas de-
 poneres miseram, parabantur: iam iter dispositum, decre-
 ta nauigia, condita dies, fuga animo pertractata: & ecce
 angelus ille, cubiculi Mariæ ianitor, cuniarum Domini cu-
 stos, & infantis Christi gerulus, coram quo tanta faciebas,
 ipse te prodidit. O funestos oculos meos, o diem illum
 omni maledictione dignissimū, in quo epistolas illas tuas,
 quas hucusque retinemus, consternata mente legi. Quæ
 ibi turpitudines? quæ blanditiæ? quanta de cōdicto stupro
 exultatio? Hæccine diaconum, non dicam loqui, sed scire
 potuisse? Vbi miser ista didicisti, qui in ecclesia te nutritum
 esse iactabas? nisi quod in eisdem epistolis iuras te numquā
 pudicum, numquam fuisse diaconum. si negare uolueris,
 manus tua te redarguet, ipsi apices proclamabunt. Habe-
 to igitur interim lucrum sceleris: nō possum tibi ingerere,
 quæ scripsisti. Iaces itaque aduolutus genibus meis, & mise-
 ricordiam, ut tuis uerbis utar, sanguinis deprecari. Et o
 te miserum, neglecto iudicio Dei, me tantum, quasi uindi-
 cem, times. Ignoui, fateor. quid enim aliud possum tibi
 facere Christianus? hortatus sum, ut ageres pænitentiam,
 & in cilicio, & cinere uolutareris; ut solitudinem peteres;
 ut uiueres in monasterio; ut Dei misericordiam iugibus la-
 crymis

erymis implorares. At tu, bonæ spei columen, excetræ stimulis inflammatus, factus es mihi in arcum peruersum, & *Osee 7*
contra me conuiciorum sagittas iacis. Inimicus tibi factus
sum, uera dicens. Non doleo de maledictis: quis enim ne- *Gal. 4*
sciat, nihil, nisi flagitiosum, tuo ore laudari? hoc plango,
quod te ipse nō plangis, quod te non sentis mortuū, quod,
quasi gladiator paratus libithynæ, in proprium funus orna-
ris. Amiciris linteis: digitos anulis oneras: dentes puluere
teris: raros in rubenti caluaria digeris capillos: taurina cer-
uix, toris adipeis intumescens, nec, quia propter libidinem
fracta est, inclinatur. super hæc, unguenta fragras: mutas
balneas: & contra renascentes pilos pugnās: per forum ac
plateas nitidus ac politus amator incedis: Facies meretri- *Hier. 3. 13*
cis facta est tibi, nescis erubescere. Cōuertere miser ad Do-
minum, ut ad te Dominus conuertatur. Age pænitentiam;
ut & ille agat pænitentiam super omnibus, quæ locutus
est, malis, ut faceret tibi. Quid, neglecto uulnere pro-
prio, alios niteris infamare? quid me, bene tibi & sedulo
consulentē, quasi phreneticus morfu laceras? Esto, ego fla-
gitiosus sim, ut uulgo iactitas: saltem mecum age pæniten-
tiam. Criminosus, ut simulās: imitare lacrymas crimino-
si. Num mea peccata uirtutes tuæ sunt? an malorum tuo-
rum putas solatium, si multos tui similes habeas? Fluant
paululum de oculis lacrymæ: inter sericum & linteamina,
quibus tibi uideris fulgidus & formosus, intellige te nudum,
conscissum, sordidatum, mendicantem. Numquam est se-
ra pænitentia. Quamuis de Hierosolymis descenderis, & *Luc. 10*
sis in itinere uulneratus, inde te Samaritanus impositum iu-
mento, curandumq. ad stabulum referet. Sed et si mortuus
iaces in sepulcro, tamen & foetentem Dominus suscitabit. *Ioan. 11*
Imitare saltem cæcos illos, propter quos saluator, dimittens *Matth. 9*
domum suam, & hereditatem suam, Hiericho uenit.
Sedētibus in tenebris & umbra mortis lux orta est eis. Qui *Marc. 10*
postquam præterire Dominum cognouissent, cœperunt cla- *Esa. 9*
mare, dicentes, Fili David miserere nostri. Poteris & tu ui- *Matth. 9*
dere, si clames, si accitus ab eo sordida uestimenta proicias.

Z 3 Cum

Cum conuersus ingemueris, tunc saluus eris, & tunc scies ubi fueris. Tangat modice cicatrices tuas, pertractet lumen quondam tuorum uestigia. Licet ab utero sic genitus sis, & in delictis conceperit te mater tua: asperget te hyssopo, & mundaberis: lauabit te, & super niuem dealbaberis. Quid incuruus terræ hæres, & totus in cæno iaces? Illa, quæ Luc. 13 decem & octo annis satanax uinxerat, postquam a saluatore Gen. 4 re curata est, cælum erecta suspexit. Quod ad Cain dictum est, tibi dictum puta: Peccasti, quiesce. Quid longius recedis a facie Dei, & habitas in terra Naid? Quid totus in salo Psal. 39 fluctuas, nec statuis supra petram pedem tuum? Caue, ne Num. 25 te Phinees cum Madianitide fornicantem sua hasta cõfigat: 2. Reg. 13 qui plus quæ Thamar uirginem frater & cõsanguineus polluit, 2. Reg. 18 uersus in Absalom, occidere eum cupis, qui te rebelantem plangit, & mortuum. Clamat contra te sanguis Nabuthæ; & uinea Iezrael, hoc est seminis Dei, quam in horum uoluptatis, & lasciuie holera conuertisti, dignam de te ultionem reposcit. Mittitur tibi Helias, tormentum & interitum nuncians. Incuruare, & sacco uestire paulisper, & de te poterit dicere Deus: Vidisti, quia reueritus fuerit Achab a facie mea? Non superducam malitiam in diebus eius. Sed forte blandiris tibi, quod a tali episcopo diaconus ordinatus es. Iam superius dixi, nec patrem pro filio, nec Exech. 18 filiũ pro patre puniri. Anima enim, quæ peccauerit, ipsa 1. Reg. 8 morietur. Et Samuel habuit filios, qui recesserunt a timore Dei, & abierunt post auaritiam, & iniquitatem. Et Heli 3. Reg. 2 sacerdos sanctus fuit, sed habuit filios, qui, ut in Hebræorũ uoluminibus legimus, fornicabantur cum mulieribus in tabernaculo Dei: & in similitudinem tui, impudenter sibi Dei ministerium uindicabant unde & locus tabernaculi ipse subuersus est: & propter uitia sacerdotum Dei, sanctuarium desitutum est. Quamquam & ipse Heli, dum est nimium lenis in filios, offendit Deum. Tantumq. abest, ut te ualeat episcopi tui iustitia liberare, ut timendum sit, ne 2. Reg. 6 propter te de solio suo corruens, pereat insanabilis. Oza leuites arcam Domini, quam portare ipse debuerat, quasi ruen-

ruentem sustentare uoluit, & percussus est: quid de te futurum putas, qui stantem arcam Domini præcipitare conatus es? Quanto magis episcopus, qui te ordinauit, probabilis est: tanto tu amplius detestandus, qui talem hominẽ fefellisti. Solemus mala domus nostræ scire nouissimi, ac liberorum & coniugum uitia, uicinis canentibus, ignorare. Nouerat te omnis Italia. uniuersi te stare ante altare Christi ingemiscebant. nec tu tam callidus eras, ut prudenter tua uitia celares. sic æstuabas, sic subantem te & lasciuientem huc atque illuc rapiebat uoluptas, ut quasi quosdam triumphos, palmamq. uitiorũ de expletis libidinibus subleuares. Denique inter gladios barbari mariti, & mariti potentis excubias, impudicitix flamma te rapuit. Non timuisti in illa domo adulterium facere, in qua sine iudice læsus uir se poterat ulcisci. Duceris ad hortulos, ad suburbana pertraheris: tam libere & insane te agis, ut, absente marito, uxorem te putes habere, non adulteram. unde per quosdam cuniculos, dum illa tenetur, erumpis. Romam occultus ingredieris: latitas inter Samnitas latrones, & ad primum mariti nuncium, quod nouus tibi ex alpibus Hannibal descendisset, nauigio te credis intuito. tanta fugæ celeritas fuit, ut tempestatem terra duceres tutiorem. uenisti utcumque in Syriam: inde te uelle Hierosolymam transcedere, & seruiturum Domino polliceris. Quis non susciperet eum, qui se monachum promittebat, præsertim ignorans tragœdias tuas, & episcopi tui commendaticias ad ceteros sacerdotes epistolas legens? At tu infelix transfigu- 2. Cor. 12
bas te in angelum lucis; & minister satanæ, ministrum iustitiæ simulabas. Sub uestitum ouium latebas lupo, & post Matth. 7
adulterium hominis adulter Christi esse cupiebas. Hæc iccirco retuli, ut totam tibi scenam operum tuorum quasi in breui depingerem tabella, & gesta tua ante oculos tuos ponerem; ne misericordiam Domini, nimiamq. clementiam, materiam existimes delictorum, rursus crucifigens tibi met ipsi filium Dei, & ostentui habens, & nõ legens illud, quod sequitur: Terra enim uenientem saepe super se bibens im-
Z 4 brem,

360 *Ad Sabin. sollicitatorem uirginis ad stupr.*

bre, & generans herbam opportunam illis, a quibus colligitur, accipit benedictionem a Domino; proferens autem spinas, & tribulos, reprobata est, & maledictio proxima, cuius consummatio erit in combustionem.

ARGUMENTVM.

REFERT historiam cuiusdam mulieris, quæ a uiro Ver-
cellis adulterii falso accusata, cum, confitente ob tormenta de-
lato iuvene, ipsa nulla ui ad confessionem non admissi sceleris
adduci posset, occiso iuvene, sæpius icta mori non potuit. Scri-
psit autem hanc epistolam D. Hieronymus, ipso teste ut remis-
sum, ac desuescentem iam stylum, rursus ad scribendum acue-
ret, ac reuocaret.

AD INNOCENTIVM DE MVLIERE

septies icta.

EPISTOLA XLIX.

AEPE a me, Innocenti carissime, postulasti, ut
S de eius rei miraculo, quæ nostra ætate acciderat,
non tacerem. cumq. ego id uerecunde, & uere, ut
nunc exuperior, negarem; meq. assequi posse diffiderem; si-
ue quia omnis sermo humanus inferior esset laude cælesti;
siue quia otium, quasi quædam ingenii rubigo, paruulam
licet facultatem pristini siccasset eloquii: tu econtrario asse-
rebas, in Dei rebus non possibilitatem inspicere debere, sed
animum; neque posse eum uerba deficere, qui credidisset
in uerbo. Quid igitur faciam? quod implere non possum,
negare non audeo. super onerariam nauem rudis uector im-
ponor: et homo, qui necdum scalmum in lacu rexi, Euxi-
ni maris credor fragoribus. Nunc mihi euanescentibus ter-
ris, cælum undique, & undique pontus. nunc unda tene-
bris inhorrescit; & cæca nocte, nimborum spumei flu-
ctus canescunt. Hortaris, ut tumida malo uela suspendam,
rudentes explicem, clauum regam. Pareo iam iubenti; &
quia

Ad Innocentium de muliere septies ista . 361

quia caritas omnia potest, Spiritu sancto cursum prosequente confidam, habiturus in utraque parte solatium. si me ad opertos portus æstus appulerit: gubernator putabor: si inter asperos orationis anfractus impolitus sermo subliterit: facultatem forsitan requires, uoluntatem certe flagitare non poteris. Igitur Vercellæ, Ligurum ciuitas, haud procul a radicibus Alpium sita, olim potens, nunc raro est habitatore semiruta. hanc cum ex more consularis inuiseret, oblatam sibi quandam mulierculam una cum adultero, (nam hoc crimen maritus impegerat) pœnali carceris horrore circumdedit. neque multo post, cum liuidas carnes ungula cruenta pulsaret, & sulcatis lateribus, dolor quæreret ueritatem, infelicissimus iuuenis uolens compendio mortis longos cruciatus uitare, dum in suum mentitur sanguinem, accusauit alienum, solusque omnium miser, merito iussus est percuti, quia non reliquit innoxia, unde posset negare. At uero mulier, sexu fortior suo, cum eculeus corpus extenderet, & sordidas fœtore carceris manus post tergum uincula cohiberent, oculis, quos tantum tortor alligare non poterat, suspexit ad cælum, & uolutis per ora lacrymis, Tu, inquit, testis es domine Iesu, cui occultum nihil est, qui es scrutator renis & cordis, non Deo me negare uelle, ne peream, sed ideo mentiri nolle, ne peccem. At tu miser homo, si interire festinas, cur duos interimis innocentes? equidem & ipsa cupio mori, cupio inuisum hoc corpus exuere, sed non quasi adultera. præsto iugulum, micantem intrepida excipio mucronem, innocentiam tamen mecum feram. Non moritur, quisquis uicturus occiditur. Igitur consularis, pastis cruore luminibus, ut fera, quæ gustatum semel sanguinem semper sitit, duplicari tormenta iubet; & sæuum dentibus frendens, similem carnifici minitatus est pœnam, nisi confiteretur sexus infirmior, quod non poterat robur uirile reticere. Succurre domine Iesu: ad unum hominem tuum complura sunt inuenta supplicia. Crines ligantur ad stipitem, & toto corpore ad eculeum fortius alligato, uicinus pedibus ignis apponi-

Psal. 9

apponitur : utrumque latus carnifex fodit : nec papillis dantur induciæ : immota mulier manet , & , a dolore corporis spiritu separato , dum conscientiæ bono fruitur , uetuit circa se sæuire tormenta . Iudex crudelis , quasi superatus , attollitur . Illa Deum deprecatur , soluuntur membra compagibus . Illa oculos ad cælum tendit , quasi de communi scelere alius confitetur . Illa pro confitente negat : & periclitans ipsa , alium uindicat periclitantem . Vna interim uox est ; Cæde , ure , lacera , non feci . si dictis tollitur fides : ueniet dies , quæ hoc crimen diligenter discutiat : habeo iudicem meum . Iam lassus tortor suspirabat in genitum : nec erat nouo uulneri locus . iam uicta sæuitia corpus , quod laniarat , horrebat . extemplo ira excitus consularis , Quid miramini , inquit , circumstantes , si torqueri mulier mauult , quam perire ? adulterium certe sine duobus committi non potuit : & esse credibilius reor , noxiam ream negare de scelere , quam innocentem iuuenem confiteri . Pari igitur prolata in utrumque sententia , damnatos carnifex trahit : totus ad spectaculum populus effunditur , ut prorsus quasi migrare ciuitas putaretur : stipatis proruens portis turba densatur . et quidem miserrimi iuuenis ad primum statim ictum amputatur gladio caput , truncumq. in suo sanguine uolutatur cadauer . postquam uero ad feminam uentum est ; & , flexis in terram poplitibus , super trementem ceruicem micans eleuatus est gladius ; & exertam carnifex dexteram totis uiribus concitauit ; ad primum corporis tactum stetit mucro letalis , & leuiter perstringens cutem , rasuræ modicæ sanguinem asperxit . imbellem manum percussor expauit ; & uictam dexteram gladio marcescente miratus , in secundos impetus torquet : languidus rursus in feminam mucro delabitur , & , quasi ferrum eam timeret attingere , circa ceruicem torpet innoxiam . itaque furens & anhelans lictor , paludamento in ceruicem retorto , dum totas expedit uires , fibulam , quæ chlamydis mordebat oras , in humum excussit , ignarusq. rei , enseni librabat in uulnus . En tibi , ait mulier , ex humero aurum ruit : collige multo questitum

fitum labore, ne pereat. Pro, rogo, quæ est ista securitas? Impendentem non timet mortem: lætatur percussa: carnifex pallet: oculi, gladium non uidentes, fibulam uident: et, ne parum esset, quod non formidabat interitum, præstat beneficium sæuienti. Iam igitur & tertius ictus sacramentum frustratus erat trinitatis. iam spiculator exterritus, & non credens ferro, mucronem aptabat in iugulum, ut, qui secare non poterat, saltem, premente manu, corpori conderetur. O omnibus res inaudita sæculis. Ad caput gladius reflectitur, &, uelut dominum suum uictus aspiciens, confessus est se ferire non posse. Huc huc mihi trium exempla puerorum, qui inter frigidos flammarum Dan. 3 globos hymnos edidere pro fletibus; circa quorum saraballa, sanctamq. cæsariem, innoxium ludit incendium. Huc beati Danielis reuocetur historia; iuxta quem, adulantibus Dan. 13. 14 caudis, prædam suam leonum ora timuerunt. Nunc Susanna, nobilis fide, omnium subeat mentibus, quæ, iniquo damnata iudicio, spiritu sancto puerum replente, saluata est. Ecce non dispar in utraque misericordia Domini. Illa liberata per iudicem, ne iret ad gladium: hæc a iudice damnata, absoluta per gladium est. Tandem ergo ad feminam uindicandam populus armatur. omnis ætas, omnis sexus carnificem fugat, &, cœtu in circulum coeunte, exclamat. non credit pene unusquisque, quod uidet. turbatur tali nuncio urbs propinqua, et tota lictorum turma glomeratur. e quibus medius, ad quem damnatorum cura pertinebat, erumpens, & canitiem immundam perfuso puluere turpans, Quin meum, inquit, o ciues petitis caput? me illi uicarium datis? Si misericordes, si clementes estis? si uultis seruare damnatam? innocens certe perire non debeo. Quo fletu uulgi concussus est animus, mæstusq. se per omnes torpor insinuat, & mirum in modum uoluntate mutata, cum pietatis fuisset, quod ante denfederant, pietatis uisum est genus, ut paterentur occidi. Nouus igitur ensis, nouus percussor apponitur. Stat uictima, Christo tantum fauente munita: semel percussa concutitur, iterum

Psal. 117

rum repetita quassatur, tertio uulnerata prosternitur. O diuinæ potentæ sublimanda maiestas: quæ prius fuerat quarto percussa, nec læsa, ideo post paululum uisa est mori, ne pro ea periret innoxius. Clerici, quibus id officii erat, cruentum linteo cadaver obuoluunt, & fossam humum lapidibus cōstruentes, ex more tumulum parant. Festinato sol cursu occasum petit; & misericordia Domini, celeriore cursu naturæ, nox aduenit. Subito feminæ palpitāt pectus; & oculis quærentibus lumē, corpus animatur ad uitam. Iam spirat, iam uidet, iam subleuatur, & loquitur: iam in illam potest uocem erumpere: Dominus auxiliator meus; non timebo quid faciat mihi homo. Anus interim quædā, quæ ecclesiæ sustentabatur opibus, debitum cælo spiritum reddidit, & quasi de industria ordine currente rerum, uicariū tumulo corpus operitur. Dubia adhuc luce, in listore diabolus occurrit, quærit cadaver occisæ, sepulcrum sibi monstrati petit: uiuere putat, quam mori potuisse miratur. Recens a clericis cespes ostenditur, & dudū superiecta humus, cum his nocibus ingeritur flagitanti: Erue scilicet ossa iam condita: infer nouum sepulcro bellum: & si hoc parū est, auius ferisq. lanianda membra discerpe. Septies percussa, debet aliquid plus morte perpeti. Tali ergo inuidia carnifice confuso, clam domi mulier refocillatur. Et ne forte creber medici ad ecclesiam commeatus suspicionis panderet uiam, cum quibusdam uirginibus ad secretiorem nullam secto crine transmittitur. ibi paulatim, uirili habitu ueste mutata, in cicatricem uulnus obducitur. Et o uere, Ius summū summa malitia: post tanta miracula adhuc sæuiunt leges. En, quo me gestorū ordo pertraxit. Iam enim ad Euagrii nostri nomen peruenimus. cuius ego pro Christo laborem si arbitrer a medici posse, non sapiam. si penitus tacere uelim, uoce in gaudium erumpente nō possim. quis enim ualeat digno canere præconio, Auxentium, Mediolani incubantem, huius excubiis sepultum pene ante, quam mortuum? Romanum episcopum, iam pene factionis laqueis irretitum, & uicisse aduersarios, & non nocuisse super-

pera-

pēratīs? Verum hæc ipse equidem, spatiis exclusus iniquis, Prætereo, atque aliis post me memoranda relinquo. præsentis tantum rei fine contentus sum. Imperatorem de indulgentia adit, precibus fatigat, merito lenit, solitudine promeretur; ut redditam uitæ, redderet libertati.

ARGVMENTVM.

PAVLVS, a quo primum eremus habitari cœpta est, patria Thebæus, annos natus circiter quindecim, tam Græcis, quàm Aegyptiacis litteris eruditus, utroque orbatus parente, accusatus a sororis marito, quod Christianus esset, sub Decio, & Valeriano persecutoribus fugiēs, eremiū petiit. ibi annis xcviii mira abstinentia, ac sanctitate, usque quo a magno illo Antonio diuinitus admonito inuiseretur, uitam traducens, obdormiuit in Domino. Huius uitæ luculenter describit D. Hieronymus.

VITA PAVLI EREMITAE.

INTER multos sæpe dubitatum est, a quo potissimum monachorum eremus habitari cœpta sit. I quidam enim, altius repetentes, a beato Helia, & Ioanne sumpsere principium. quorum & Helias plus nobis uidetur fuisse, quam monachus, & Ioannes ante prophetare cœpisse, quam natus est. Alii autem, in quam opinionem uulgus omne consentit, asserunt, Antonium huius propositi fuisse caput. quod ex parte uerum est. non enim tam ipse ante omnes fuit, quam ab eo omnium incitata sunt studia. Amathas uero, & Macarius, discipuli Antonii, quorum superior magistri corpus sepeliuit, etiam nunc affirmant, Paulum quendam Thebæum, principem istius rei fuisse. quod nō tam nomine, quam opinione nos quoque comprobamus. Nonnulli & hæc, & alia, prout uoluntas tulit, iactitant: subterraneo specu crinitum calcaneo tenus hominem fuisse, & multa, quæ persequi otiosum est, incredibilia fingentes. quorum quia impudens mendacium fuit, ne refellenda quidem sententia uidetur. Igitur, quia de Antonio

tonio tam Græco, quam Romano stylo diligenter traditum est; pauca de Pauli principio & fine scribere disposui, magis quia res omissa fuit, quam fretus ingenio. Quo modo autem in media ætate uixerit, & quas satanæ pertulerit insidias, nulli hominum compertum habetur. Sub Decio & Valeriano persecutoribus, quo tempore Cornelius Romæ, & Cyprianus Carthagine, felici cruore damnati sunt, multas apud Aegyptum & Thebaida ecclesias tempestas sæua populata est. Voti tunc Christianis erat, pro Christi nomine gladio percuti. uerum hostis callidus, tarda ad mortem supplicia conquirens, animas cupiebat iugulare, non corpora: & ut ipse, qui ab eo passus est, Cyprianus ait, uolentibus mori, non permittebatur occidi. cuius ut crudelitas notior fiat; duo memoriæ causa exempla subiecimus. Perseuerantem igitur in fide martyrem, & inter eculeos laminasq. uictorem, iussit melle perungi, & sub ardentissimo sole, ligatis manibus post tergum, resupinari, scilicet ut muscarum aculeis cederet, qui ignitas sartagines ante superasset. Alium, iuuenili ætate florentem, in amœnissimos hortulos præcepit abduci, ibiq. inter lilia candentia, & rubentes rosas, cum leni iuxta murmure aquarum serperet riuus, & molli sibilo arborum folia uentus præstringeret, super exstructum plumis lectum resupinari, & ne se inde posset excutere, blandis serico nexibus irretitum relinqui. quo cū, recedentibus cunctis, meretrix speciosa uenisset, cœpit delicatis stringere colla complexibus, & quod dictu quoque scelus est, manibus attrectare uirilia; ut, corpore in libidinem concitato, se uictrix impudica superiaceret. Quid ageret miles Christi, & quo se uerteret, nesciebat. quem tormenta non uicerant, superabat uoluptas. tandem cælitus inspiratus, præcisam morsu linguam in osculantis se faciem expuit, ac sic libidinis sensum succedens doloris magnitudo superauit. Per idē ergo tempus, quo talia gerebantur apud inferiorem Thebaida, cū sorore iam uiro tradita, post mortem amborum parentum in hereditate locupleti, Paulus relictus est annorum circiter quindecim, litteris tam Græcis quam

quam Aegyptiacis apprime eruditus, mansueti animi, Deū ualde amans: & cum persecutionis procella detonaret, in uillam remotiorem & secretiorem secessit. Verum quid nō mortalia pēctora cogis Auri sacra fames? Sororis maritus cōpit prodere uelle, quem celare debuerat. nō illum uxoris lacrymæ, non communio sanguinis, non spectans cuncta ex alto Deus ab scelere reuocauit. ad hæc instabat crudelitas, quæ pietatem uidebatur imitari. Quod ubi prudētissimus adolescens intellexit, ad montium deserta confugiēs, dum persecutionis finem præstolaretur, necessitatem in uoluntatem uertit, ac paulatim progrediens, rursusq. subsistens, atque hoc idem sæpius faciens, tandem reperit saxei montem; ad cuius radicem haud procul erat grandis spelūca, quæ lapide claudebatur. quo remoto, ut est cupiditas hominum occulta cognoscere, auidius explorans, animaduertit intus grande uestibulum, quod, aperto desuper cælo, patulis diffusa ramis uetus palma contexerat, fontem lucidissimum ostendens; cuius riuum tantummodo foras erumpentem, statim modico foramine, eadem, quæ genuerat, aquas terra sorbebat. erant præterea per exesum montem haud pauca habitacula, in quibus scabræ iam incudes, & mallei, quibus pecuniæ olim signatæ uisebantur. hunc locum Aegyptiorum litteræ ferunt furtiue monetæ officinam fuisse, ea tempestate, qua Cleopatrar iunctus est Antonius. Igitur adamatō, quasi quod a Deo sibi offerretur, habitaculo, omnem ibidem in orationibus & solitudine duxit ætatem. cibum & uestimentum ei palma præbebat. quod ne cui impossibile uideatur; Iesum testor, & sanctos angelos eius, in ea eremi parte, quæ iuxta Syriam Saracenīs iungitur, uidisse me monachos, de quibus unus, per triginta annos clausus, hordeaceo pane & lutulēta aqua uixit; alter in cisterna ueteri, quam gentili sermone Syri cubam uocant, quinque caricis per singulos dies sustentabatur. Hæc igitur incredibilia esse uidebuntur iis, qui non crediderint: quia omnia possibilia sunt credentibus. Sed, ut Mar. 9 ad id redeam, unde digressus sum: cum iam centum tredecim

cim annos beatus Paulus uitam celestem ageret in terris, & nonagenarius in alia solitudine Antonius moraretur, ut ipse asserere solebat, hæc in mentem eius cogitatio incidit, nullum ultra se perfectum monachum in eremo consedisſe. at illi per noctem quiescenti reuelatum eſt, eſſe alium ulterius multo ſe meliorem, ad quem uiſendum deberet proficiſci. Illico, erumpente luce, uenerabilis ſenex inſirmos artus baculo regente ſuſtentans, cœpit ire uelle, quo neſciebat. & iam media dies, coquente deſuper ſole, ſeruebat: nec tamen a cœpto itinere abducebatur, dicens: Credo in Deum meum, quod ſeruum ſuum, quem mihi promiſit, oſtendet. Nec plura his, conſpicit hominem equo mixtum, cui opinio poetarum hippocentauro uocabulum indidit, quo uiſo, ſalutaris impreſſione ſigni armat frontem; & Heus tu, inquit, quanam in parte hic ſeruus Dei habitat? At ille barbarū neſcio quid inſrendens, & frāgens potius uerba, quam proloquens, inter horrentia ora ſenis blandum quæſiuit alloquium, & dextræ protenſione manus cupitum indicat iter; & ſic patentes campos uolucris transmittens fuga, ex oculis mirantis euauit. Verum hæc utrum diabolus ad terrendum eum ſimulauerit, an, ut ſolet, eremus, monſtruosorum animalum ferax, iſtam quoque gignat beſtiam, incertum habemus. Stupens itaque Antonius, & de eo, quod uiderat, ſecum uoluens, ulterius progreditur. nec mora, inter ſaxoſam conuallem haud grandem homunculum uidet, aduncis naribus, fronte cornibus aſperata, cuius extrema pars corporis in caprarum pedes deſinebat. infra-
Ph.6 ctusq. & hoc Antonius ſpectaculo, ſcutum fidei, & lorica miſeri-
 cordiæ ſpei, ut bonus præliator, arripuit. nihilominus memora-
 tum animal, palmarum fructus eidem ad uiaticum, quaſi
 pacis obſides, afferebat. quo cognito, gradum preſſit An-
 tonius; & quiſnam eſſet, interrogans, hoc ab eo respon-
 ſum accepit: Mortalis ego ſum, & unus ex accolis eremi,
 quos uario deluſa errore gentilitas, faunos, ſatyrosque,
 & incubos uocans colit. legatione fungor gregis mei. pre-
 camur, ut pro nobis communem Deum depreceris; quem

pro

pro salute mundi uenisse cognouimus , & in uniuersam terram exiit sonus eius . Talia eo loquente , longæuus uiator uberrimam faciem lacrymis rigabat , quas magnitudo lætitiæ indices cordis effuderat . gaudebat quippe de Christi gloria , & de interitu satanæ : simulq. admirans , quod eius posset intelligere sermonem , & baculo humum percutiens , aiebat : Væ tibi Alexandria , quæ pro Deo portenta ueneraris : uæ tibi ciuitas meretrix ; in quam totius orbis dæmonia cōfluxere . quid nunc dictura es ? bestia Christum loquūtur , & tu pro Deo portenta ueneraris . Necdum uerba compleuerat , & quasi pennigero uolatu petulcum animal aufugit . Hoc ne cuiquam ob incredulitatem scrupulum moueat , sub rege Constantino , uniuerso mundo teste , defenditur . nam Alexandriam istiusmodi homo uiuus perductus , magnum populo spectaculum præbuit : & postea cadauer exanime , ne calore æstatis dissiparetur , sale infuso , Antiochiam , ut ab imperatore uideretur , allatum est . Sed , ut propositum persequar : Antonius cœptam regionem pergebat , ferarum tantum uestigia intuens , & eremi latam uastitatem , quid ageret , quo uerteret gradum , nesciebat . iam altera effluxerat dies . restabat unum , ut deserire se a Christo non posse cōfideret . Pernox secūdas in oratione exegit tenebras ; & , dubia adhuc luce , procul intuetur , lupam , sitis ardoribus anhelantem , ad radicem montis irrepere : quam secutus oculis , & iuxta speluncam , cum fera abiisset , accedens , intro cœpit aspicere , nihil curiositate proficiente , tenebris arcenibus uisum . uerum , ut scriptura ait , perfecta dilectio foras 1 . Ioan. 4 mittit timorem : suspensō gradu & anhelitu temperato , calidus explorator ingressus , ac paulatim progrediens , sæpiusq. subsistens , sonum aure captabat . tandem per cæcæ noctis horrorem procul lumen intuitus , dum auidius properat , offensus in lapidem pede , strepitum concitauit : post cuius sonitū beatus Paulus ostium , quod patebat , occludens , fera obfirmauit . Tūc uero Antonius præ foribus corruēs , usque ad sextā , & eo aniplius horā aditum precabatur , dicens : Qui sum , unde , uel cur uenerim , nostis . scio me non mereri con-

A a speculum

Matth. 7 spectum tuum : tamen , nisi uidero , non recedam . qui be-
 neficiis recipis , hominē cur repellis ? quæsiui , & inueni : pul-
 so , ut aperiatur . quod si non impetro ; hic moriar ante po-
 stes tuos : certe sepelies uel meum cadauer . Talia perstabat
 memorans , fixusq. manebat . Ad quem responsum paucis
 ita reddidit heros . Nemo sic petit , ut minetur : nemo cū la-
 crymis iniuriam , uel calumniam facit . & miraris , si non re-
 cipiam , cum moriturus adueneris ? Sic arridens Paulus pa-
 tescebat ingressum . quo aperto , dum in mutuos miscentur
 amplexus , propriis se salutauere nominibus , gratiæ Domi-
 no in commune referuntur . Et post sanctum osculum resi-
 dens Paulus , cum Antonio ita exorsus est : En , quem tanto
 labore quæsiisti , putridis senectute membris operit inculta
 canities : en uides hominem , puluerem mox futurum . Ve-
 rum , quia caritas omnia sustinet , narra mihi , quæso , quo
1. Cor. 13 modo se habeat humanum genus ; an in antiquis urbibus
 noua tecta consurgant ; quo mundus regatur imperio ; an
 supersint aliqui , qui dæmonum errore rapiantur . Inter has
 fermocinationes suspiciunt alitem coruum in ramo arboris
 confedissee ; qui inde leniter subuolans integrum panem an-
 te mirantium ora deposuit . post cuius abscessum , Eia , in-
 quit Paulus , Dominus nobis prandium misit , uere pius , ue-
 re misericors . sexaginta iam anni sunt , quod accipio dimi-
 dit semper panis fragmentum : uerum ad aduentum tuum ,
 militibus suis Christus duplicauit annonam . Igitur , Domi-
 no gratiarum actione celebrata , super uitrei marginem fon-
 tis uterque confedit . Hic uero , quis frangeret panē , obor-
 ta contentio , pene diem duxit in uesperum . Paulus more
 cogeat hospitii : Antonius iure refellebat ætatis . Tandem
 consilium fuit , ut , apprehenso e regione pane , dum ad se
 quisque nititur , pars cuique sua remaneret in manibus .
 Dehinc paululum aquæ in fonte prono ore libauerunt :
 & immolantes Deo sacrificiū laudis , noctem transgere uigi-
 liis . Cumq. iam esset terræ redditus dies , beatus Paulus ad
 Antonium sic locutus est . Olim te , frater , in istis regionibus
 habitare sciebam : olim te conseruum meum mihi pro-
 miserat

miserat Deus. sed quia iam dormitionis meæ tempus adue-
nit; &, quod semper cupiebam, dissolui, & esse cum Chri- *Philipp. 1*
sto, peracto cursu superest mihi corona iustitiæ: tu missus *2. Tim. 4*
es a Domino, qui humo corpusculum meum tegas, immo
terræ terrâ reddas. His Antonius auditis, flens, & gemēs,
ne se desereret, atque ut comitē talis itineris acciperet, pre-
cabatur. Et ille, Non debes, inquit, quærere quæ tua sunt,
sed quæ aliena. expedit quidem tibi, sarcina carnis abiecta,
agnum sequi: sed & ceteris expedit fratribus, ut tuo adhuc
instituantur exemplo. quamobrem, quæso, perge, nisi mo-
lestum est, & palliū, quod tibi Athanasius episcopus dedit,
ad inuoluendum corpusculum meum defer. Hoc autē bea-
tus Paulus rogauit, non quod magnopere curaret utrum te-
ctum putresceret cadauer, an nudum; quippe qui, tanto tē-
poris spatio, contextis palmarum foliis uestiebatur; sed ut
a se recedenti mæror suæ mortis leuaretur. Stupescit ergo
Antonius, quod de Athanasio & pallio eius audierat,
quasi Christum in Paulo uidens, & in pectore eius Deum
uenerans, ultra respondere nihil ausus est; sed cum silentio
lacrymans, osculatis eius oculis manibusq. ad monasteriū,
quod postea a Saracenis occupatum est, regrediebatur. ne-
que uero gressus sequebantur animum: sed quamuis cor-
pus inane ieiuniis, seniles etiam anni fregerant, tamen ani-
mo uincebat ætatem. tandem fatigatus, & anhelus, ad ha-
bitaculum suum, confecto itinere, peruenit. Cui cum duo
discipuli, qui ei longo iam tempore ministrare consueuerāt,
occurrissent, dicentes: Vbi tamdiu moratus es, pater? Re-
spondit: Væ mihi peccatori, qui falsi monachi nomē fero.
uidi Heliam, uidi Ioannem in deserto, & uere uidi Paulum
in paradiso. & sic ore compresso, & manu uerberans pec-
tus, ex cellula pallium protulit: rogantibusq. discipulis,
ut plenius, quidnam rei esset, exponeret, ait: Tempus ta- *Eccl. 3*
cendi, & tempus loquendi. Tunc egressus foras, & ne mo-
dicum quidem cibi sumens; per uiam, qua uenerat, regres-
sus est, illum sitiens, illum uidere desiderans, illum oculis
ac mente contemplanus. timebat enim, quod euenit, ne se

A 1 2 ab sente,

absente, Christo debitum spiritum redderet. cumq. iam dies alia illuxisset, & trium horarum spatio uiam remeauisset, uidit inter angelorum cateruas, inter prophetarum & apostolorum choros, niueo Paulum candore fulgentem in sublime conscendere: & statim in faciem suam procidens, sabulum capiti superiacebat: ploransq. & eiulans, aiebat: Cur me Paule dimittis? cur in salutatus abis? tam tarde notus, tam cito recedis? Referebat postea beatus Antonius, tanta se uelocitate, quod reliquum erat uite, cucurrisse, ut instar auis peruolasset: nec immerito: nā introgressus speluncam, uidit genibus complicatis, erecta ceruice, extēsisq. in altum manibus, corpus exanime: ac primum & ipse uiuere eum credens, pariter orabat. postquam uero nulla, ut solebat, suspiria precantis audiuit, in flebile osculum ruēs, intellexit quod etiam cadauer sancti Deum, cui omnia uiuunt, officioso gestu precabatur. Igitur obuoluto & prolato foras corpore, hymnos quoque & psalmos de Christiana traditione decantans, contristabatur Antonius, quod sacculum, quo terram foderet, non haberet: fluctuansq. uario mentis æstu, & secū multa reputans, dicebat: Si ad monasterium reuertar, tridui iter est: si hic maneam, nihil ultra proficiam. moriar ergo, ut dignum est, & iuxta bellatorem tuum, Christe, ruens, extremum halitum fundam. Talia eo animo uolente, ecce duo leones ex interioris eremi parte currentes, uolantibus per colla iubis, ferebantur: quibus aspectis primo exhorruit: rursusq. ad Deum referens mentem, quasi columbas uideret, mansit intrepidus. et illi quidem directo cursu ad cadauer beati senis sublitterūt; aduolantibusq. catidis circa eius pedes accubere, fremitu ingēri rugientes; prorsus ut intelligeret eos plangere, quo modo poterant. deinde haud procul cōperunt humum pedibus scalpere; arenamq. certatim egerentes, unius hominis capacem locum foderunt: ac statim quasi mercedem pro opere postulantes, cum motu aurium ceruice deiecta, ad Antonium perrexerunt, manus eius pedesq. lingentes. at ille animaduertit, benedictionem eos a se precari. nec mora, in

ra, in laudationem Christi effusus, quod muta quoque animalia Deum esse sentirent, ait: Domine, sine cuius nutu nec folium arboris defluit, nec unus passerum ad terram cadit, da illis sicut tu scis. Et manu annuens eis, ut abirent, imperavit. cumq. illi recessissent, sancti corporis oneri seniles curuavit humeros; & deposito eo in fossam, desuper Matth. 10 humum congregans, tumulum ex more composuit. Postquam autem alia dies illuxit, ne quid pius heres ex intestati bonis non possideret, tunicam eius sibi uindicauit, quam in sportarum modum de palmæ foliis ipse sibi cōtexuerat. ac sic ad monasterium reuersus, discipulis cūcta ex ordine replicauit, diebusq. sollemnibus Paschæ & Pētecostes semper Pauli tunica uestitus est. Libet in fine opusculi eos interrogare, qui sua patrimonia ignorant, qui domos marmoribus uestiunt, qui uno filo uillarum insuunt prædia: huic seni nudo quid unquam defuit? Vos gemma bibitis: ille naturæ concavis manibus satisfacit. Vos in tunicis aurum textitis: ille ne uilissimum quidem indumentum habuit mancipii uestri. Sed ecōtrario illi quidem pauperculo paradisu patet: uos auratos gehenna suscipiet. Ille uestem Christi, nudus licet, tamen seruauit: uos, uestiti sericis, indumentū Christi perdidistis. Paulus uilissimo puluere coopertus iacet, resurrecturus in gloriam: uos operosa saxi sepulcra premunt, cum uestris opibus aruros. Parcite, quæso, uobis, parcite saltem diuitiis, quas amatis. cur & mortuos uestros auratis obuoluitis uestibus? cur ambitio inter luctus lacrymasq. non cessat? an cadauera diuitum nisi in serico putrescere ne sciunt? Obsecro, quicumque hæc legis, ut Hieronymi peccatoris memineris: cui si Dominus optionem daret, multo magis eligeret tunicam Pauli cum meritis eius, quam regum purpuram cum pœnis suis.

HILARION *monachus, Thabatha, Palaestina uico, ortus, magni illius Antonii discipulus, quanta abstinentia, ac sanctitate uitam duxerit, quantisq. semper, etiam latitando, claruerit miraculis, late, eruditeq. Hieronymus ita describit, ut in eo perfectum monachum contemplari iure quis ualeat.*

VITA SANCTI HILARIONIS.

SCRIPTVRVS uitam beati Hilarionis, habitatorem eius inuoco spiritum sanctum; ut, qui illi uirtutes largitus est, mihi ad narrandas eas sermonem tribuat, ut facta dictis exæquentur. Eorum enim, qui fecere, uirtutes, ut ait Crispus, tanta habentur merita, quantum ea uerbis potuere attollere præclara ingenia. Alexander Magnus Macedo, quem uel arietem, uel pardum, uel hircum caprarum Daniel uocat, cum ad Achillis tumulum peruenisset, Felicem te, ait, iuuenis, qui magno fruaris præcone meritorum: Homerum uidelicet significans. Porro mihi tanti ac talis uiri conuersatio, uitaq. dicenda est, ut Homerus quoque, si adesset, uel inuideret materiæ, uel succumberet. quamquam enim sanctus Epiphanius, Salaminæ Cypri episcopus, qui cum Hilarione plurimum uersatus est, laudem eius breui epistola scripserit, quæ uulgo legitur: tamen aliud est, locis communibus laudare defunctum; aliud, defuncti proprias narrare uirtutes. unde & nos fauore magis illius, quam iniuria, cœptum ab eo opus aggredientes, maledicorum uoces contemnimus; qui olim detrahentes Paulo meo, nunc forte detrahent & Hilarioni, illum solitudinis calumniati, huic obiectantes frequentiam; ut qui semper latuit, non fuisse, qui a multis uisus est, uilis existimetur. Fecerunt hoc & maiores eorum quondam pharisæi, quibus nec Ioannis eremus, ac ieiuniû, nec Domini saluatoris turbæ, cibi potusq. placuere. Verum destinato operi imponam manum, & Scyllæos canes obturata aure transibo. Hilarion, ortus uico Thabatha, qui

qui circiter quinque millia a Gaza, urbe Palæstinæ, ad austrum situs est, cum haberet parentes idolis deditos, rosa, ut dicitur, de spinis floruit. a quibus missus Alexandriam, grammatico traditus est: ibique, quantum illa patiebatur ætas, magna ingenii & morum documenta præbuit in breui, carus omnibus, & loquendi arte gnarus: quodq. his maius est omnibus, credens in Dominum Iesum, non circi furoribus, non arenæ sanguine, non theatri luxuria delectabatur, sed tota illi uoluntas in Ecclesiæ erat congregatione. Audiens autem tunc celebre nomen Antonii, quod per omnes Aegypti populos ferebatur, incensus uisendi eius studio, perrexit ad eremum: & statim, ut eum uidit, mutato pristino habitu, duobus fere mensibus iuxta eum mansit, contemplans ordinem uitæ eius, morumq. gravitatem; quam creber in oratione, quam humilis in suscipiendis fratribus, seuerus in corripiendis, alacer in exhortandis esset; & ut continentiam, cibiq. eius asperitatem nulla umquam infirmitas frangeret. Porro frequentiam eorum, qui ad eum ob uarias passionum aut impetus dæmonum concurrerant, ultra non ferens; nec congruum esse ducens, pati in eremo populos ciuitatum; sicq. sibi magis incipiendum esse, ut cœpisset Antonius; illum quasi uirum fortem uictoriæ præmia accipere, se uero necdum militare cœpisse; reuersus est cum quibusdam monachis ad patriam; & parentibus iam defunctis, partem substantiæ fratribus, partem pauperibus largitus est, nihil sibi omnino reseruans, timens illud de Actibus apostolorum, Ananiæ, & Sapphiræ uel exemplum, uel supplicium; maximeq. Domini memor, dicentis: Qui non renunciauerit omnibus, quæ habet, non potest meus esse discipulus. Erat autem tunc annorum quindecim. Sic nudus, & armatus in Christo, solitudinem, quæ in septimo milliario a Maioma, Gazæ emporio, per litus euntibus Aegyptum ad læuam flectitur, ingressus est. cumq. essent cruenta latrocinii loca, & propinqui amiciq. eius imminens periculum denunciarent; cōtempnit mortem, ut mortem euaderet. Mirabatur omnes

A a 4 animum,

animum, mirabantur ætatem, nisi quod flamma quædam pectoris, & scintillæ fidei in oculis relucebant. Lenes erant genæ, delicatum corpus & tenue, & ad omnem iniuriam impatiens, quod leni uel frigore, uel æstu posset affligi. Igitur sacco tantum membra coopertus, & pellicum habens ependyten, quem illi beatus Antonius proficiscenti dederat, sagumq. rusticum inter mare & paludem, uasta & terribili solitudine fruebatur, quindecim tantum carycas post solis occasum comedens; &, quia regio latrocinii infamis erat, numquam in eodem loco mansitans. Quid faceret diabolus, quo se uerteret? Qui gloriabatur ante, dicens:

Esai. 54. In cælum ascendam: super sidera cæli ponam thronum meum, & ero similis altissimo: cernebat se uinci a puero, & prius ab eo calcatum fuisse, quam per ætatem calcare potuisset. Titillabat itaque sensus eius, & pubescenti corpori solita uoluptatum incendia suggerebat. Cogebatur tirunculus Christi cogitare quod nesciebat, & eius rei animo pompam uoluere, cuius experimenta non nouerat. Iratus itaque sibi, & pectus pugnis uerberans, quasi cogitationes cæde manus posset excludere, Ego, inquit, aselle faciam, ut non calcitres; nec te hordeo alam, sed paleis: fame te conficiam, & siti: graui onerabo pondere: per æstus indagabo & frigora, ut cibum potius, quam lasciuiam, cogites. Herbarum ergo succo, & paucis caryeis post triduum uel quatrimum deficientem animam sustentabat, orans frequenter, & psallens, & rastro humum fodiens; ut ieiuniorum laborem labor operis duplicaret. simulq. fiscellas iunco texens, æmulabatur Aegyptiorum monachorum disciplinam, & Apostoli sententiam, dicentis: Qui autem non operatur, non manducet. Sic attenuatus, & in tantum ex corpore, ut ossibus uix hæreret, quadam nocte cepit infantum audire uagitus, balatus pecorum, mugitus bo-um, planctum quasi mulierum, leonum rugitus, murmur exercitus, & rursus uariarum portenta uocum, ut ante sonitu, quam aspectu, territus cederet. intellexit demonum ludibria: &, prouolutus genibus, Christi crucem signauit in

2. Thess. 3. plinam, & Apostoli sententiam, dicentis: Qui autem non operatur, non manducet. Sic attenuatus, & in tantum ex corpore, ut ossibus uix hæreret, quadam nocte cepit infantum audire uagitus, balatus pecorum, mugitus bo-um, planctum quasi mulierum, leonum rugitus, murmur exercitus, & rursus uariarum portenta uocum, ut ante sonitu, quam aspectu, territus cederet. intellexit demonum ludibria: &, prouolutus genibus, Christi crucem signauit in

in frontē: taliq. armatus casside, & lorica fidei circunda-
tus, iacens fortius præliabatur, amodo uidere desiderans,
quos horrebat audire, & sollicitis oculis huc illucq. circum-
spiciens: cum interim ex improviso, splendente luna, cer-
nit rhedam feruentibus equis super se irruere: cumq. incla-
masset Iesum, ante oculos eius repentino terræ hiatus pom-
pa omnis absorpta est. Tunc ille ait: Equum, & ascenso- *Exod. 15*
rem proiecit in mare. Et, Hi in curribus, & hi in equis, *Psal. 19*
nos autem in nomine Dei nostri magnificabimur. Multæ
sunt tentationes eius, & die noctuq. uariæ dæmonum insi-
diæ: quas si omnes narrare uelim, modum excedam uolu-
minis. Quoties illi nudæ mulieres cubanti, quoties esurien-
ti largissimæ apparuere dapes? Interdum orantem lupus
ululans & uulpecula ganniens transiuit; psallentiq. gladia-
torum pugna spectaculum præbuit, & unus, quasi interfe-
ctus, & ante pedes eius corruens, sepulturam rogauit.
Orauit semel fixo in terram capite: &, ut natura fert ho-
minum, abducta ab oratione mens nescio quid aliud cogi-
tabat: insiliit dorso eius festinus agitator: & latera calcibus,
cervicem flagello uerberans, Eia, inquit, cur dormitas? ca-
chinnansq. desuper, cum defecisset, an hordeum uellet ac-
cipere, sciscitabatur. Igitur a sextodecimo usque ad uicesi-
mum suæ ætatis annum, æstus & pluuias breui tuguriuncu-
lo declinauit, quod iunco & carice texerat: extructa dein-
ceps breui cellula, quæ usque hodie permanet, latitudine
pedum quattuor, altitudine pedum quinque, hoc est statu-
ra sua humliore, porro longitudine paulo ampliore, quam
eius corpusculum patiebatur, ut sepulcrum potius, quam
domum, crederes; capillum semel in anno die Paschæ to-
ndit: super nudam humum, stratumq. iunceum usque
ad mortem cubitauit; saccum, quo semel fuerat indutus,
numquam lauans; & superfluum esse dicens, munditias in
cilicio quærere. nec mutauit alteram tunicam, nisi cum
prior penitus scissa esset. Scripturas quoque sanctas memo-
riter tenens, post orationes & psalmos, quasi Deo præsen-
te, recitabat. Et, quia longum est per diuersa tempora
carptim

carptim ascensum eius edicere, comprehendam breuiter, ante lectoris oculos uitam eius pariter exponens, & deinceps ad narrandi ordinem regrediar. A uicesimoprimo anno usque ad uicesimumseptimum, tribus annis dimidium lentis sextarium madefactum aqua frigida comedit, & aliis tribus panem aridum cum sale & aqua. Porro a uigesimo-septimo usque ad tricesimum, herbis agrestibus, & uirgultorū quorundam radicibus crudis sustentatus est. A tricesimo autem primo usque ad tricesimumquintum, sex uncias hordeacei panis, & coctum modice holus absque oleo in cibo habuit. Sentiens autem caligare oculos suos, & totum corpus impetigine & pumicea quadum scabredine contrahi, ad superiorem uictum adiecit oleum: & usque ad sexagesimum tertium uitæ suæ annum hoc continentiae cucurrit gradu, nihil extrinsecus aut pomorum, aut leguminis, aut cuiuslibet rei gustans. Inde, cum se uideret corpore defatigatum, & propinquam putaret imminere mortem, a sexagesimoquarto anno usque ad octogesimum pane abstiuit, incredibili feruore mentis; ut eo tempore quasi nouus accederet ad seruitutē Domini, quo ceteri solent remissius uiuere. Fiebant autem ei de farina & comminuto holeris sorbitiunculæ, cibo & potu uix quinque uncias appendentibus: sicq. complens ordinem uitæ, numquam ante solis occasum, nec in diebus festis, nec in grauissima ualitudine soluit ieiunium. Sed iam tempus est, ut ad ordinem reuertamur. Cum habitaret adhuc in tuguriolo annos natus decem & octo, latrones ad eum nocte uenerunt, uel existimantes habere aliquid, quod tollerent, uel in contemptum sui reputantes fieri, si puer solitarius eorum impetus non pertimesceret. itaque inter mare & paludem a uespere usque ad solis ortum discurrentes, numquam locum eius cubiculi inuenire potuerunt. Porro, clara luce reperto puero, quasi per iocum, Quid, inquiunt, faceres, si latrones ad te uenirent? Quibus ille respondit: Nudus latrones non timet. Et illi, Certe, aiunt, occidi potes. Possum, inquit, possum: & ideo latrones non timeo, quia mori paratus

tus sum. Tunc admirati constantiam eius, & fidem, confessi sunt noctis errorem, cæcatosq. oculos, correctiorem deinceps uitam pollicentes. Viginti & duos iam in solitudine habebat annos, fama tantum notus omnibus, & per totas Palæstinæ uulgatus urbes: cum interim mulier quædam Eleutheropolitana, cernens despectui se haberi a uiro ob sterilitatem, (iam enim per annos quindecim nullos cōiugii fructus dederat) prima irrumperè ausa est ad beatum Hilarionem: & nihil tale suspicanti, repente genibus eius aduoluta, Ignosce, inquit, audaciæ, ignosce necessitati meæ. quid auertis oculos? quid rogantem fugis? noli mulierem aspicere, sed miseram. hic sexus genuit saluatorem. non habent sani opus medico, sed qui male habent. Tan- Mar. 2
dem subleuit, & post tantum temporis uisa mulierè, interrogauit causam aduentus eius, ac fletuum: & postquam didicit, leuatis ad cælum oculis, fidere iussit; euntemq. lacrymis prosecutus, exacto anno uidit cum filio. Hoc signorum eius principium maius aliud signum nobilitauit. Aristæneta, Helpidii, qui postea præfectus prætorio fuit, uxor ualde nobilis inter suos, & inter Christianos nobilior, reuertens cum marito & tribus liberis a beato Antonio, Gazæ propter eorum infirmitatem remorata est. ibi enim, siue ob corruptum aerem, siue, ut postea clariuit, propter gloriam Hilarionis serui Dei, hemitritæo pariter arrepti, omnes a medicis desperati sunt. Iacebat ululans mater, & quasi inter tria filiorum discurrens cadauera, quem prius plangeret, nesciebat. cognito autem quod esset quidam monachus in uicina solitudine, oblita matronalis pompæ, tantum se matrem nouerat, uadit comitata ancillis, & eunuchis: uixq. a uiro persuasum est, ut a sella se dens pergeret. ad quem cum peruenisset, Per ego te, ait, Iesum, clementissimum Deum nostrum, obtestor, per crucem eius, & sanguinem, ut reddas mihi tres filios, & glorificetur in urbe gentilium nomen Domini saluatoris: ingrediatur seruus eius Gazam, & Marnas corruat. Remuente illo, & dicente, numquam se egressurum de cella, nec habere

habere consuetudinem, ut non modo ciuitatem, sed ne uillulam quidem ingrederetur; prostravit se illa humi, crebro clamitans: Hilarion, serue Christi, redde mihi liberos meos: quos Antonius tenuit in Aegypto, a te seruentur in Syria. Flebant cuncti, qui aderant: sed & ipse negans fleuit. Quid multa? Non prius mulier recessit, quam ille pollicitus est, se post solis occasum Gazam introiturum. quo postquam uenit, singulorum lectulos, & arentia membra considerans, inuocauit Iesum. et, o mira uirtus, quasi de tribus fontibus sudor pariter erupit: eadem hora acceperunt cibos; lugentemq. matrem cognoscentes, & benedicientes Deum, sancti manus deosculati sunt. Quod postquam auditum est, & longe lateq. percrebuit; certatim ad eum de Syria & Aegypto confluabant; ita ut multi crederent in Christum, & se monachos profiterentur. necdum enim tunc monasteria erant in Palæstina, nec quisquam monachos ante sanctum Hilarionem in Syria nouerat. ille fundator, & eruditor huius conuersationis, & studii in hac provincia fuit. Habebat Dominus Iesus in Aegypto senem Antonium, habebat in Palæstina Hilarionem iuniorem. Facidia uicus est Rhinocoruræ, urbis Aegypti. de hoc, sunt decem iam anni, cæca mulier adducta est ad beatum Hilarionem: oblataq. ei a fratribus (iam enim multi cū eo monachi erant) omnem se substantiam expendisse ait in medicos. Cui respondit: Si, quæ in medicis perdidisti, dedisses pauperibus; curasset te uerus medicus Iesus. Clamante autē illa, & misericordiā deprecante, expuit in oculos eius: statimq. saluatoris exemplū uirtus eadem profecuta est. Au riga quoque Gazensis, in curru percussus a dæmone, totus obriguit, ita ut nec manus agitare, nec ceruicem posset reflectere. delatus ergo in lecto, cum solam linguam moueret ad preces, audit, non prius posse sanari, quam crederet in Iesum, & se sponderet arti pristinæ renunciaturum. credit, spondit, sanatus est; magisq. de animæ, quam de corporis salute exultauit. Præterea fortissimus iuuenis, nomine Marfitas, de territorio Hierosolymæ, tantum sibi applaude-

Mar. 3

plaudebat in uiribus, ut quindecim frumenti modios diu longeque portaret; & hanc haberet palmam fortitudinis suæ, si asinos uinceret. hic afflicto pessimo dæmone, non catenas, non compedes, non claustra ostiorum integra patiebatur: multorum nasum & aures moribus amputauerat: horum pedes, illorum gulam fregerat: tantumque terrorem omnibus incusserat, ut, oneratus catenis & funibus, in diuersa nitentium, quasi ferocissimus taurus ad monasterium pertraheretur: quem postquam fratres uidere, perterriti, (erat enim miræ magnitudinis) nunciauerunt patri. Ille, sicut sedebat, iussit eum ad se pertrahi, & dimitti: solutoque. Inclina, ait, caput, & ueni. Tremere ille, & ceruicem flectere; nec aspicere contra ausus, omniq. ferocitate deposita, pedes cœpit sedentis lambere. adiuratus itaque dæmone, & tortus, qui iuuenem possederat, septima die egressus est. Sed nec illud tacendum est, quod Orionus, uir primarius & ditissimus urbis Ailæ, quæ mari Rubro imminet, a legione possessus dæmonum, ad eum adductus est: manus, ceruix, latera, pedes ferro onerati erant; furorisque seuitiâ torui oculi minabantur. cumque deambulare sanctus cum fratribus, & de scripturis nescio quid interpretarentur; erupit ille de manibus se tenentium; & amplexus eum post tergum, in sublime leuauit. clamor ortus ab omnibus: timebant enim, ne confecta ieiuniis membra collideret. et sanctus arridens, Sinite, inquit, & mihi meum palæstritam dimittite. Ac sic reflexa super humeros manu, caput eius tetigit: apprehensoque crine, ante pedes adduxit; stringens e regione ambas manus eius, & plantas utroque calcans pede; simulque ingeminans, torquere, ait, dæmonum turba, torquere. Cumque ille eiularet, & reflexa ceruice terram uertice tangeret; Domine, inquit, Iesu, solue miserum, solue captiuium. ut unum, ita & plures uincere, tuum est. Rem loquor inauditam: ex uno hominis ore diuersæ uoces, & quasi confusus populi clamor audiebatur. Curatus itaque & hic, non post multum temporis cum uxore & liberis uenit ad monasterium, plurima, quasi gratiam redditurus, dona afferens.

4. Reg. 5 Cui sanctus, Non legisti, inquit, quid Giezi, quid Simón
 Act. 8 passi sint; quorum alter accepit pretium, alter obtulit; ut
 ille uenderet gratiam spiritus sancti, hic mercaretur? Cūq.
 Orionus flens diceret: Accipe, & da pauperibus: respon-
 dit: Tu melius potes tua distribuere, qui per urbes ambu-
 las, & nosti pauperes: ego, qui mea reliqui, cur aliena ap-
 petam? Multis nomen pauperum, occasio auaritiæ est: mi-
 sericordia uero artem non habet. Nemo melius erogat,
 quam qui sibi nihil reseruat. Tristi autem, & in terra iacen-
 ti, Noli, inquit, contristari fili: quod facio pro me, & pro
 te facio: si enim hæc accepero; & ego offendam Deum, &
 ad te legio reuertetur. Quis uero possit silentio prætereire,
 quod Gazanus Maiomites, haud longe a monasterio eius
 lapides ad ædificandum de ora maris cudent, totus paralyti
 dissolutus, & ab operis sociis delatus ad sanctum, statim ad
 opus reuersus est? etenim litus, quod Palæstinæ Aegyptoq.
 prætenditur, per naturam molle, arenis in saxa durefcenti-
 bus, asperatur; paulatimq. cohærescens sibi glarea, perdit
 tactum, cum non perdat aspectum. Sed & Italicus, eiusdē
 opidi municeps, Christianus, aduersum Gazensem duum-
 uirum, Marnæ idolo deditum, Circenses equos nutriebat.
 hoc siquidem in Romanis urbibus iam inde seruatur a Ro-
 mulo, ut, propter felicem Sabinarum raptum, Conso, qua
 si consiliorum deo, quadrigæ septeno currant circumitu;
 & equos partis aduersæ fregisse, uictoria sit. Hic itaque,
 æmulo suo habente maleficum, qui dæmoniacis quibusdā
 imprecationibus huius impediret equos, & illius incitaret
 ad cursum, uenit ad beatum Hilarionem, & nō tam aduer-
 sarium lædi, quā se defendi obsecrauit. Ineptum uisum est
 uenerando seni, in huiuscemodi nugis orationem perdere:
 cumq. subrideret, & diceret: Cur enim non magis equorū
 pretium pro salute animæ tuæ pauperibus erogas? ille re-
 spondit, functionem esse publicam; & hoc non tam se uel-
 le, quam cogi; nec posse hominem Christianum uti magi-
 cis artibus, sed a seruo Christi potius auxilium petere, ma-
 xime contra Gazenses, aduersarios Dei, & non tam sibi,
 quam

quam Ecclesiæ Christi insultantes. Rogatus ergo a fratribus, qui aderant, scyphum fictilem, quo bibere consueverat, aqua iussit impleri, eiq. tradi. quem cum accepisset Italicus; & stabulum, & equos, & aurigas suos, rhedam, carcerumq. repagula asperfit. Mira vulgi expectatio: nam & aduersarius hoc ipsum irridens diffamauerat; & fautores Italici, sibi certam uictoriam pollicentes, exultabant. Igitur, dato signo, hi aduolant, isti præpediuntur: sub horum curru rotæ feruent, illi præteruolantium terga uix cernunt. clamor fit vulgi nimius, ita ut ethnici quoque ipsi concreperent, Marnas uictus a Christo est. Porro furentes aduersarii Hilarionem maleficū Christianorum ad supplicium poscere. Indubitata ergo uictoria & illis, & multis retro Circensibus plurimis, fidei occasio fuit. De eiusdem Gazensis emporii opido uirginē Dei uicinus iuuenis deperibat. qui cū frequenter tactu, iocis, nutibus, sibilis, & ceteris huiusmodi, quæ solent morituræ uirginitatis esse principia, nihil profecisset; perrexit Memphim, ut cōfesso uulnere suo, magicis artibus rediret armatus ad uirginem. igitur post annum doctus ab Aesculapii uatibus, nō remediatis animas, sed perdentis, uenit præsumptum animo stuprum gestiens, & subter limen domus puellæ tormenta quædam uerborū, & portentosas figuras sculptas in æris Cyprii lamina defodit. Illico insanire uirgo, & amictu capitis abiecto, rotare crinem, stridere dentibus, inclamare nomen adolescentis. magnitudo quippe amoris se in furorem uerterat. perducta ergo a parentibus ad monasterium, seni traditur: ululante statim & confitente dæmone, uim sustinui, inuitus abductus sum: quam bene Memphis somniis homines deludebam. o cruces, o tormenta, quæ patior. exire me cogis, & ligatus subter limen teneor. non exeo, nisi me adolesces, qui tenet, dimiserit. Tunc senex, Grandis, ait, fortitudo tua; qui licio & lamina strictus teneris. dic, quare ausus es ingredi puellam Dei? Vt seruarem, inquit, eam uirginē. Tu seruares, proditor castitatis? cur non potius in eum, qui te mittebat, es ingressus? Vt quid, respondit, intrarem in eum,

eum, qui habebat collegam meum amoris dæmonem? Non fuit autem sanctus ante, quam purgaret uirginem, uel adolescentem, signa iubere perquiri: ne aut solitis incantationibus recessisse dæmon uideretur, aut ipse sermoni eius accommodasse fidem, afferens fallaces esse dæmones, & ad simulandum esse callidos: & magis, reddita sanitate, increpuit uirginem, cur fecisset talia, per quæ dæmon intrare potuisset. Non solum autem in Palæstina, & in uicinis urbibus Aegypti, uel Syriæ, sed etiam in longinquis prouinciis fama eius percrebuerat. Namque candidatus Constantii imperatoris, rutilus coma, & candore corporis indicans prouinciam, (inter Saxones quippe, & Alemanos gens eius, non tam lata, quam ualida, apud historicos Germania, nunc uero Francia uocatur) antiquo, hoc est, ab infantia possessus a dæmone, qui noctibus eum ululare, ingemiscere, fremere dentibus compellebat, secreto ab imperatore euectionem petiit, causam ei simpliciter indicans; & acceptis ad consularem quoque Palæstinæ litteris, cum ingenti honore & comitatu Gazam deductus est. qui cum a decurionibus illius loci quaesisset, ubi habitaret Hilarion monachus; territi Gazæses, & putantes eum ab imperatore missum, ad monasterium adduxerunt; ut & honorem commendato exhiberent, & si quid ex præteritis iniuriis in Hilarionem ei esset offensa, nouo officio deleteretur. Deambulabat tunc senex in arenis mollibus, & secum de psalmis nescio quid submurmurabat: uidensque tantam turbam uenientem, substitit; & resalutatis omnibus, manuque eis benedicens, post horam ceteros abire præcepit, illum uero cum seruis suis & apparitoribus remanere. ex oculis enim eius, & uultu, cur uenisset, agnouit. Statim ergo ad interrogationem suspensus homo, uix terram pedibus tangens, & immane rugiens, Syro, quo interrogatus fuerat, sermone respondit. Videres de ore barbaro, & qui Francam tantum & Latinam linguam nouerat, Syra ad purum uerba resonare; ut non stridor, non aspiratio, non idioma aliquod Palæstini deesset eloquii. Confessus est itaque, quo in eum intrasset

set

set ordine. Et, ut interpretes eius intelligerent, qui Græcā tantum & Latinam linguam nouerant, Græce quoque eū interrogauit. Quo similiter & in uerba eadem respondente, multasq. incantationum occasiones, & necessitates magicarum artium obtendente, Non curo, ait, quo modo intraueris, sed, ut ex eas, in nomine Domini nostri Iesu Christi impero. Cumq. curatus esset, simplicitate rustica decem auri libras offerens, hordeaceum ab eo panem accepit, audiens quod, qui tali cibo alerentur, aurum pro luto ducerent. Parum est de hominibus loqui: bruta quoque animalia quotidie ad eum furentia pertrahebantur: in quibus Bactrum camelum, enormis magnitudinis, qui iam multos obtriuera, triginta & eo amplius uiri distentum solidissimis funibus cum clamore adduxerunt. Sanguinei erant oculi: spumabat os: uolubilis lingua turgebat: & super omnē terrorem rugitus personabat immanis. Iussit igitur eum dimitti senex. statim uero & qui adduxerant, & qui cum senex erant, usque ad unum omnes diffugerunt. porro ille solus perrexit obuiam, & sermone Syro, Non me, inquit, terres diabole tanta mole corporis: & in uulpecula, & in camelo unus atque idem es. Et interim porrecta stabat manu. ad quem dum furens, & quasi eum deuoratura belua peruenisset, statim corruit; submissumq. caput terræ coequauit, mirantibus cunctis, qui aderant, post tantam ferociam tantam subito mansuetudinem. Docebat autem senex, hominum causa diabolum etiam iumenta corripere; & tāto eorum ardere odio, ut non solum ipsos, sed & ea, quæ ipsorum essent, cuperet interire. huiusq. rei proponebat exemplū, quod, antequam beatum Iob tentare permetteretur, omnē Iob 1 substantiam eius interfecerit. nec mouere quempiam debere, quod Domini iussione duo millia porcorum a dæmoni- Luc. 8 bus interfecta sunt: siquidem eos, qui uiderant, non potuisse aliter credere, exisse de homine tantam dæmonū multitudinem, nisi grandis porcorū numerus, & quasi a multis actus pariter corruisset. Tempus me deficiet, si uolnero uniuersa signa, quæ ab eo perpetrata sunt, dicere. in tantam

B b enim

enim a Domino fuerat eleuatus gloriam, ut beatus quoque Antonius, audiens conuersationem eius, scriberet ei, libenterq. eius epistolas sumeret; & si quādo de Syriæ partibus ad se languentes perrexissent, diceret eis: Quare uos tam longe uexare uoluistis, cum habeatis ibi filium meum Hilarionem? Exemplo itaque eius per totam Palæstinam innumerabilia monasteria esse cœperunt, & omnes ad eum monachi certatim currere. quod ille cernens, laudabat Domini gratiam; & pro affectu animi singulos cohortabatur, dicens: Præterire figuram huius mundi; & illam esse ueram uitam, quæ uitæ præsentis emeretur incommodo. Volens autem exemplum eis dare & humilitatis, & officii, statis diebus ante uindemiā lustrabat cellulas monachorū. quod postquam cognitum est a fratribus; omnes ad eum cōfluebant; & comitati tali duce, circumibant monasteria, habentes uaticum suum: quia interdum usque ad duo millia hominum congregabantur. Sed &, procedente tempore, unaquæque uillula uicinis monachis, ad susceptionem sanctorum gaudens, cibos offerebat. Quantum autem fuerit in eo studii, ut nullum fratrem, quamuis humilem, quamuis pauperem, præteriret, uel illud indicio est, quod uadens in desertum Cades ad unum de discipulis suis uisendum, cum infinito agmine monachorum peruenit Elusam, eo forte die, quo anniuersaria sollemnitas omnem opidi populū in templum Veneris congregauerat. colunt autem illā ob Luciferum, cuius cultui Saracenorum natio dedita est. sed & ipsum opidum ex magna parte semibarbarū est propter loci situm. Igitur audito, quod sanctus Hilarion præteriret, (multos enim Saracenorum arreptos a demone frequenter curauerat) gregatim ei cum uxoribus & liberis obuiam processere, submittentés colla, & uoce Syra Barach, idest, benedic, inclamantes. quos ille blande humiliterq. suscipiens, obsecrabat, ut Deum magis, quam lapides, colerent; simulq. ubertim flebat, cælum spectans, & pollicens, si Christo crederent, ad eos se crebro esse uenturum. Mira Domini gratia: nō prius abire passi sunt, quam futuræ ecclesiæ

eleſiæ lineam mitteret; & ſacerdos eorum, ut erat coronatus, Chriſti ſigno denotaretur. Alio quoque anno cum exiturus eſſet ad uiſenda monaſteria, & digereret in ſchedula, apud quos manere, quos in tranſitu uiſitare deberet; ſcientes monachi quendam de fratribus parciorem, ſimulq. cupientes uitio eius mederi, rogabant ut apud eum maneret. Et ille, Quid, inquit, uultis & uobis iniuriam, & fratri uexationem facere? Quod poſtquam frater ille parcus audiuit, erubuit; & annitentibus cunctis, uix ab inuito impetrauit, ut ſuum quoque monaſterium in manſionum ordinem poneret. poſt diem ergo decimum uenerunt ad eum, cuſtodibus iam in uinea, qua uenirent, illi diſpoſitis; qui cū lapidibus & glebarum iactu, fundæq. uertigine accedentes deterrerent, ſine eſu uix mane omnes profeſti ſunt, ridente ſene, & diſſimulante ſcire quod euenerat. Porro ſuſcepti ab alio monacho, cui Sabas uocabulum eſt, (debemus quippe parci tacere uocabulum, largi dicere) quia Dominicus erat dies, inuitabantur ab eo uniuerſi in uineam, ut ante horam cibi uuarum paſtu laborem uix ſubleuarēt. Et ſanctus, Maledictus, ait, qui prius refectionem corporis, quam animæ, quæſierit. oremus, pſallamus, reddamus Domino officium, & ſic ad uineam properabitis. Completo itaque miniſterio, in ſublimi ſtans benedixit uineæ, & ſuas ad paſcendum dimiſit oues. Erant autem, qui ueſcebantur, non minus tribus millibus. Cumq. centum lagenis æſtimata fuiſſet integra adhuc uinea, poſt dies uiginti trecentas fecit. Porro ille parcus frater multo minus ſolito colligens, etiam id, quod habuerat, uerſum in acetū ſero doluit. hoc multis fratribus ſenex ante futurum dixerat. Detestabatur autē præcipue monachos, qui infidelitate quadam in futurum reſeruarent ſua; & diligentiam haberent uel ſumptuum, uel uestitus, aut alicuius earum rerum, quæ cum ſæculo tranſeunt. Denique unum de fratribus, in quinto fere a ſe miliario manentem, quia comperiebat hortuli ſui nimis cautum timidumq. cuſtodem, & pauxillum habere nummorum, ab oculis abegerat. qui uolens ſibi reconciliari ſenem, fre-

B b 2 quenter

quenter ueniebat ad fratres, & maxime ad Hefychiū, quō ille uehementissime delectabatur. Quadam igitur die ciceris fascem uiuentis, sicut in herbis erat, detulit. quem cum Hefychius posuisset in mensa ad uesperum; exclamauit senex, se putorem eius ferre non posse; simulque, unde esset, rogauit. Respondente autem Hefychio, quod frater quidā primitias agelli sui fratribus detulisset, Non sentis, inquit, putorem tæterrimum, & in cicere scætere auaritiam? mitte bubus, mitte brutis animalibus; & uide, an comedant. Quod cum ille iuxta præceptum in præsepe posuisset; exterriti boues, & plus solito mugientes, ruptis uinculis in diuersa fugerunt. habebat enim senex hanc gratiam, ut ex odore corporum, uestiumque, & earum rerum, quas quis tetigerat, sciret cui dæmoni, uel cui uitio subiaceret. Igitur sexagesimo tertio uitæ suæ anno cernens iam grande monasterium, & multitudinem fratrum secum habitantium, turbasque eorum, qui diuersis languoribus & immundis spiritibus occupatos ad se deducebant, ita ut omni genere hominum solitudo per circumitum repleretur, flebat quotidie, & incredibili desiderio conuersationis antiquæ recordabatur. interrogatus a fratribus, quid haberet, cur se conficeret, ait: Rursum ad sæculū redii, & recepi mercedem meā in uita mea. en homines Palæstinæ & uicinæ prouinciæ existimant me alicuius esse momenti; & ego, sub prætextu monasterii ad dispensationem fratrum, uilem suppellectilem habeo. Seruabatur autem a fratribus, maxime ab Hefychio: qui miro amore uenerationi senis deditus erat. Cumque ita uixisset lugens biennium; Aristæneta illa, cuius supra fecimus mentionem, præfecti tunc uxor, sed nihil de præfecti ambitu habens, uenit ad eum, uolens etiam ad Antonium pergere. Cui ille flens, Vellem, ait, ipse quoque ire, si non carcere huius monasterii clausus tenerer, & si eundi fructus esset. biduum enim hodie est, quod totus mundus tali parente orbatus est. Credidit illa, & substitit; & post paucos dies, ueniente nuncio, Antonii dormitionem audiuit. Mirentur alii signa, quæ fecit: mirentur incredibilem abstinentiam

tiam, scientiam, humilitatem: ego nihil ita stupeo, quam, gloriam illum & honorem calcare potuisse. Concurrabant episcopi, presbyteri, clericorum & monachorum greges, matronæ quoque Christianorū, grandis tentatio, & hinc inde ex urbibus & agris uulgus ignobile: sed & potētes uiri, & iudices, ut benedictum ab eo panem, uel oleum acciperent. at ille nihil aliud, nisi solitudinem, meditabatur, intantum, ut quadam die proficisci statuerit, &, adducto asello, (nimis quippe exesus ieiuniis uix ingredi poterat) iter arripere conaretur. quod cum percrebuisse; & quasi uasitas, & iustitium Palæstinæ indiceretur; plus quam decem millia hominum diuersæ ætatis & sexus ad retinendum eum congregata sunt. Immobiles ille ad preces, & baculo arenas discutiens, loquebatur: Fallacem Dominum meum non faciam: non possum uidere subuersas ecclesias, calcata Christi altaria, filiorum meorum sanguinem. Vniuersi autem, qui aderant, intelligebant reuelatum ei quiddam esse secreti, quod nollet confiteri; & nihilominus custodiebāt eum, ne proficisceretur. decreuit ergo, publica omnes uoce contestans, non tibi se, non potus quidquam sumere, nisi dimitteretur: & post septem dies inediæ, tandem relaxatus, ac, Vale, dicens plurimis, cum infinito agmine prosequentium uenit Betiliū: ubi persuasis turbis ut reuerterentur, elegit quadraginta monachos, qui haberent uaticū, & possent ieiunantes ingredi, idest, post solis occasum cibum sumere. quinto igitur die uenit Pelusiū; uisitatisq. fratribus, qui in uicina eremo erant, & in loco, qui dicitur Lychnos, morabantur, perrexit post triduum ad castrum Theubatū, ut uideret Dracontium episcopum, & confessorem, qui ibi exulabat. quo incredibiliter consolato tanti uiri præsentia, post aliud triduum multo Babylonem labore peruenit, ut uideret Philonem episcopum, & ipsum confessorem. Constantius enim rex, Arianorum fauens hæresi, utrumque in ea loca deportauerat. Inde egrediens post triduum, uenit ad opidum Aphroditon: ubi conuento diacono Baifane, qui locatis camelis & dromedis, ob aquæ in eremo penuriā,

B b 3 consue-

consueuerat euntes ad Antonium ducere, confessus est fratribus, instare diem dormitionis beati Antonii, & perui-
lem noctem in ipso, quo defunctus fuerat, loco a se ei debe-
re celebrari. Tribus igitur diebus per uastam & horribilem
solitudinem, tandem ad montem altissimum peruenerunt,
reperitis ibi duobus monachis, Isaac, & Pelusiano, quorum
Isaac interpretes Antonii fuerat. Et quia se præbet occasio,
& ad id loci uenimus, dignum uidetur, breui sermone habi-
taculum tanti uiri describere. Saxeus & sublimis mons per
mille circiter passus, ad radices suas aquas exprimit: qua-
rum alias arenæ ebibunt, aliæ ad inferiora delapsæ, paula-
tim riuû efficiunt: super quem ex utraque ripa palmæ in-
numerabiles, multum loco & amœnitatis, & commodi tri-
buunt. Videres senem huc atque illuc cum discipulis beati
Antonii discurrere. Hic, aiebant, psallere, hic orare, hic
operari, hic fessus residere solitus erat: has uites, has arbu-
sculas ipse plantauit: illam areolam manibus suis ipse com-
posuit: hanc piscinam ad irrigandum hortulum multo sudo-
re fabricatus est. istum sarculum ad fodiendum terram plu-
ribus annis habuit. Iacebat in stratu eius, & quasi calens ad-
huc cubile deosculabatur. Erat autem cellula nō plus men-
suræ per quadrum tenens, quam homo dormiens extendi
poterat. Præterea in sublimi montis uertice, quasi per co-
chleam ascendentibus, arduæ ualde, duæ eiusdem mensuræ
cellulæ uisebantur: in quibus uenientium frequentiam, &
discipulorum suorum contubernium fugiens moratus est.
uerum hæ in uiuo excise saxo, ostia tantum addita habe-
bant. Postquam autem ad hortulum uenerāt; Videtis, in-
quit Isaac, hoc pomarium arbusculis confitum, & holeri-
bus uirens. Ante hoc ferme triennium, cum onagrorum
grex uastaret, unum e ductoribus eorum stare iussit, bacu-
loq. tundens latera, Quare, inquit, comeditis, quod non
feminastis? Et exinde acceptis aquis, ad quas potâdas uen-
titabant, numquam eos nec arbusculam, nec holera conti-
gisse. Præterea rogabat senex, ut sibi locû tumuli eius osten-
derent. qui cum seorsum eum abduxissent, utrum mōstra-
uerint

uerint nec ne, ignoratur. Causam occultandi iuxta præceptum Antonii fuisse referentes, ne Pergamus, qui in illis locis ditissimus erat, sublato ad uillam suam sancti corpore, martyrium fabricaretur. Igitur reuersus ad Aphroditon, duobus secum tantundem retentis fratribus, in uicina eremo moratus est, tanta abstinencia, & silentio, ut tunc primum se cœpisse Christo seruire diceret. Porro iam triennium erat, quod clausum cælum illas terras arefecerat; ut uulgo dicerent, Antonii mortem etiam elementa lugere. Non latuit fama Hilarionis accolæ quoque illius loci: & certatim uirilis ac muliebris sexus ora luridi, & attenuati fame, pluuias a seruo Christi, idest, a beati Antonii successore deprecabantur. quos ille cernens, mire doluit: eleuatissq. in cælum oculis, & utrasque in sublime erigens palmas, statim impetrauit, quod rogauerant. Ecce autem fitiens arenosaq. regio, postquam pluuiis irrorata est, tantam serpentum & uenenatorum animalium ex improviso ebulliuit multitudinem; ut percussi innumerabiles, nisi ad Hilarionem concurrissent, statim interirent. benedicto itaque oleo uniuersi agricolæ atque pastores tangentes uulnera, certam salutem resumebant. Videns etiam ibi se miris honoribus affici, perrexit Alexandriam, inde ad ulteriorem Oasam, eremum transiturus. Et quia numquam, ex quo cœperat esse monachus, in urbibus manserat, diuertit ad quosdam fratres sibi notos in Brutio, haud procul ab Alexandria: qui cum miro gaudio suscepissent senem, & iam uicina nox esset, repente audiunt discipulos eius asinū sternere, illumq. parare proficisci. itaque aduoluti pedibus, rogabant ne hoc faceret, & ante limen prostrati, citius se mori, quam tanto carere hospite testabantur. Quibus ille respondit: Iccirco abire festino, ne uobis molestiam generem. Certe ex posterioribus cognoscetis, non sine causa me subito ambulasse. Igitur altera die Gazenses cum lictoribus profecti, (nam pridie cum uenisse cognouerant) intrantes monasterium, cum illum minime inuenissent, inuicem loquebantur. Nonne uera sunt, quæ de eo audiuius? ma-

B b 4 gus

gus est, & futura cognoscit. Vrbs autem Gaza, postquā, profecto de Palæstina Hilarione, Iulianus in imperium successerat, destructo monasterio eius, precibus ad imperatorem datis, & Hilarionis & Hesychii mortem impetrauerat: amboq. ut quæerentur, toto orbe scriptum erat. Egressus ergo de Brutio, per inuiam solitudinem intravit Oasam: ibiq. anno plus minus exacto, quia illuc quoque sua fama præuenerat, quasi iam in oriente latere non posset, ubi multi illum & opinione, & uultu nouerant, ad solas nauigare insulas cogitabat; ut, quem terra uulgauerat, saltem maria celarent. Eodem ferme tempore Hadrianus, discipulus eius, de Palæstina superuenit, dicens Iulianum occisum, Christianum imperatorem regnare cœpisse: reuertium debere ad monasterii sui reliquias. Quod ille audiens, detestatus est, &, conducto camelo, per uastam solitudinē peruenit ad maritimam urbem Libyæ Paretonium: ubi Hadrianus infelix uolens Palæstinam reuerti, & pristinan sub nomine magistri quærens gloriam, multas ei fecit iniurias. Ad extremum, conuasatis quæ a fratribus ei missa detulerat, nesciente illo profectus est. Super hoc, quia alter locus referendi non est, hoc tantum dixerim in terrorem eorum, qui magistros despiciunt, quod post aliquantulum temporis computruerit morbo regio. Habens igitur senex Gazanum secum, ascendit classem, quæ Siciliam nauigabat. cumq. uenundato euangeliorum codice, quem manu sua adolescens scripserat, dare nautum disponderet; in medio ferme Adriæ, naucleri filius arreptus a dæmone, clamare cœpit, & dicere: Hilarion serue Dei, cur nobis per te & in pelago tutos esse non licet? Da mihi spatium, donec ad terram ueniam; ne hic eiec tus, præcipiter in abyssum. Cui ille, Si Deus meus, ait, tibi concedit, ut mancas, mane: sin autem ille te eicit, quid mihi inuidiam facis, homini peccatori, atque mendico? Hoc autem dicebat, ne nautæ, & negotiatores, qui in naui erant, se, cum ad terram peruenissent, proderent. nec multo post purgatus est puer, patre fidem dante, & ceteris, qui aderant, nulli se super
cuius

eius nomine locuturos . Ingressus autem Pachynum , promontorium Siciliæ , obtulit nauclero euangelium pro subuectione sua , & Gazani . qui nolens accipere , maxime cū uideret illos , excepto illo codice , & iis , quibus uestiti erāt , amplius nihil habere , ad extremum iurat se non accepturum . Sed & senex , accensus fiducia pauperis conscientie , in eo magis letabatur , & quod nihil haberet sæculi , & ab aecolis illius loci mendicus putaretur . Porro recogitans , ne negotiatores , de oriente uenientes , se notum facerent , ad mediterranea fugit loca , idest , uicesimo a mari milliario ; ibiq. in quodam deserto agello , lignorum quotidie fascem alligans , imponebat dorso discipuli . quo in proxima uilla nenundato , & sibi alimoniam , & iis , qui forte ad eos ueniebant , pauxillulum panis emebant . Sed uere , iuxta quod scriptum est , Non potest ciuitas latere super montem posita . Scutarius quidam cum in basilica beati Petri Romæ torqueretur , clamauit in eo immundus spiritus : Ante paucos dies Siciliam ingressus est Hilarion , seruus Christi ; & nemo eum nouit ; & putat se esse secretum : ego uadam , & prodam illum . Statimq. cum seruulis suis , ascensa in portu naue , appulsus est Pachynum , & , deducente se dæmone , ubi ante tugurium senis se prostrauit , ilico curatus est . Hoc initium signorum eius in Sicilia , innumerabilem ad eum deinceps ægrotantium , sed & religiosorum hominum adduxit multitudinem , intantum , ut de primoribus quidam , tumens morbo intercutis , eodem die , quo ad eum uenerat , curatus sit : qui postea offerens ei infinita munera , audiuit dictum saluatoris ad discipulos : Gratis accepistis , gratis date . Dum hæc ita geruntur in Sicilia , Hefychius , discipulus eius , toto senem orbe quærebat , lustrans litora , deserta penetrans , & hanc tantum habens fiduciā , quia , ubicumque esset , diu latere non posset . Transacto igitur iam triennio , audiuit Methonæ a quodam Iudæo , uilia populis scruta uendente , prophetam Christianorum apparuisse in Sicilia , tanta miracula & signa facientem , ut de ueteribus sanctis putaretur . interrogatus itaque habitum

*Matth. 5**Matth. 10*

tum eius, incessum, & linguam, maximeq. ætatem, nihil dicere potuit. ille enim, qui referebat, famam ad se uenisse tantum hominis testabatur. Ingressus igitur Adriam, prospero cursu uenit Pachynum, & in quadam curui litoris uillula, famam senis sciscitatus, consona uoce omnium cognouit ubi esset, quid ageret, nihil in eo ita cunctis admirantibus, quam quod, post tanta signa, atque miracula, ne fragmen quidem panis a quoquam in illis locis accepisset. Et, ne longum faciam, sanctus uir Hesychius ad magistri genua prouolutus, plantasq. eius lacrymis rigans, tandem ab eo subleuatus, post bidui triduiq. sermonem audit a Gazano, non posse senem iam illis habitare regionibus, sed uelle ad barbaras quasdam pergere nationes, ubi & nomen, & sermo suus incognitus foret. Duxit itaque illum ad Epidaurum, Dalmatiæ opidum: ubi paucis diebus in uicino agello mansitans, non potuit abscondi. siquidem draco miræ magnitudinis, quos gentili sermone boas uocant, ab eo, quod tam grandes sint, ut boues glutire soleant, omnem late uastabat prouinciam; & non solum armenta, & pecudes, sed agricolas quoque, & pastores, tractos ad se ui spiritus, absorbebat. cui cum pyram iussisset præparari; & oratione ad Christum missa euocato præcepisset struem lignorum scandere, ignem supposuit. tum itaque, cuncta spectante plebe, immanem bestiam concremauit. unde æstuans, quid faceret, quo se uerteret, aliam parabat fugam; & solitarias terras mente perlustrans, mærebat quod, tacente de se lingua, miracula loquerentur. Ea tempestate, terræ motu totius orbis, qui post Iuliani mortem accidit, maria egressa sunt terminos suos; & quasi rursum Deus diluuium minaretur, uel in antiquum chaos redirent omnia, naues, ad prærupta delatæ montium, pependerunt. quod cum uiderent Epidauritani, frementes scilicet fluctus, & undarum moles, & montes gurgitum litoribus inferri, uerentes quod iam euenisse cernebant, ne opidum funditus subuerteretur, ingressi sunt ad senem, &, quasi ad prælium proficiscentes, posuerunt eum in litore. Qui cum

eum tria crucis signa pinxisset in fabulo, manusq. contratenderet; incredibile dictu est, in quantam altitudinem intumescens mare ante eum steterit; ac diu fremens, & quasi ad obicem indignans, paulatim in semet ipsum relapsu sit. Hoc Epidaurus, & omnis illa regio usque hodie prædicat, matresq. docent liberos suos ad memoriam in posteros transmittendam. Vere illud, quod ad apostolos dictu est: Si credideritis, dicetis huic monti, transi in mare, & fiet: Etiam iuxta litteram impleri potest; si tamen quis habuerit apostolorum fidem, & talem, qualem illis habendâ Dominus imperavit. quid enim interest, utrum mons descendat in mare, an immensi undarû montes repente obriuerint, & ante senis tantum pedes saxei, ex alia parte moliter fluxerint. Mirabatur omnis ciuitas, & magnitudo signi Salonis quoque percrebuerat. quod intelligens senex, in breui lembo clam nocte fugit, & inuenta post biduum oneraria naui, perrexit Cyprium. Cumq. inter Maleam & Cytheram pirate, derelicta classe in litore, quæ non antemna, sed conto regitur, duobus haud paruis myoparonibus occurrissent; & denuo hincinde fluctus occurrerent; remiges omnes, qui in naui erant, trepidare, flere, discurrere, præparare contos, & quasi non sufficeret unus nunciu, certatim seni piratas adesse dicebant. Quos ille procul intuens subrisit, & conuersus ad discipulos dixit: Modicæ, inquit, fidei quare trepidatis? Numquid plures sunt hi, quam Pharaonis exercitus? tamen omnes, Deo uolente, submersi sunt. Loquebatur hic; & nihilominus, spumantibus rostris, hostiles turmæ imminebant, iactu tantum lapidis medio. Stetit ergo in prora nauis, & porrecta contra uenientes manu, Hucusque, ait, uenisse sufficiat. Omira rerum fides: statim resiliuere nauiiculæ, & impellentibus contra remis, ad puppim impetus redit. Mirabantur pirate, post tergum se redire nolentes: totoq. corporis nixu, ut ad nauigium peruenirent, laborantes, uelocius multo, quam uenerant, ad litus ferebantur. Prætermitto cetera; ne uidear, in narratione signorum, uolumen extendere. hoc

Matth. 17

Exo. 15

re. hoc solum dicam, quod inter Cycladas nauigans, hinc inde clamantium de urbibus & uicis, & ad litora concurrentium, immundorum spirituum uoces audiebantur. Ingressus ergo Paphum, urbem Cypri, nobilem carminibus poetarum, quæ frequenter terræ motu lapsa, nunc ruinarum tantum uestigiis, quid olim fuerit, ostendit, in secundo ab urbe milliaro habitabat ignobilis, gaudensq. quod paucis diebus quiete uiueret. uerum non ad plenum uiginti transire dies, cum per omnem illam insulam, quicumque immundos habebant spiritus, clamare cœperunt, uenisse Hilarionem, seruum Christi, & ad eum se debere properare. hoc Salamina, hoc Curium, hoc Lapetha, & urbes reliquæ conclamabant, plerisque assentibus, scire se quidem Hilarionem, & uere illum esse famulum Dei, sed, ubi esset, ignorare. Intra triginta igitur nec multo amplius dies, ducenti ferme, tam uiri, quam mulieres, ad eum congregati sunt. quos cum uidisset, dolens quod se non paterentur quiescere, & quodam modo in ultionem sui seuiens, tanta eos orationum instantia flagellauit, ut quidam statim, alii post biduum, triduumue, omnes uero intra unam hebdomadam curarentur. Manens itaque ibi biennio, & semper de fuga cogitans, Hefychium ad se ueris tempore reuersurum, Palæstinam ad salutationem fratrum, & monasterii sui cineres uisendos misit. Qui cum reuertisset, cupienti rursum ad Aegyptum nauigare, hoc est ad ea loca, quæ uocantur Bucolia, eo quod nullus ibi Christianorum esset, sed barbara tantum & ferox natio, suasisit ut in ipsa magis insula ad secretiorem locum conscenderet. quem cum diu lustrans omnia reperisset, perduxit eum duodecim millibus a mari procul inter secretos asperosq. montes, & quo uix reptando manibus genibusq. posset ascendere. qui introgressus, contemplatus quidem est terribilem ualde & remotum locum, arboribusq. hincinde circumdatum, habentem etiâ aquas de supercilio collis irriguas, & hortulum peramœnū, & pomaria plurima, quorum fructum numquam in cibo sumpsit, sed antiquissimi iuxta templi ruinam, ex quo, ut ipse

ipse referebat , & eius discipuli testantur , tam innumerabilem per noctes & dies dæmonum uoces resonabant , ut exercitum crederes . quo ille ualde delectatus , quo scilicet antagonistas haberet in proximo , habitauit ibi per annos quinque ; & , sæpe inuisente se Hefychio , in hoc extremo iam uitæ suæ tempore refocillatus est ; quod , propter asperitatem difficultatemq. loci , & umbrarum , ut ferebatur uulgo , multitudinē , aut nullus , aut rarus ad se uel posset , uel auderet ascendere . Quodam autem die egressus hortulum , uidit hominem toto corpore paralyticum , iacentem ante fores ; interrogauitq. Hefychium , quisnam esset , uel quo modo fuisset adductus . qui respondens ait ; procuratorem se fuisse uillulæ , ad cuius cōfinia hortulus quoque , in quo ipsi erāt , pertineret . Et ille collacrymans , tendensq. ad iacentē manum , Tibi , inquit , dico in nomine domini nostri Iesu Christi , surge , & ambula . Mira uelocitas : adhuc uerba in ore loquentis uoluebantur , & iam membra solidata ad stā dum hominem surrigebant . quod postquam auditum est , etiam difficultatem loci , & iter inuium plurimorum uicit necessitas , nihil æque per circumitum cunctis uillis obseruantibus , quam ne quo modo elaberetur . disseminauerat enim hoc de eo rumor , diu eum in eodem loco manere nō posse . quod ille non leuitate quadam , aut puerili sensu uictus faciebat , sed honorem fugiens , & importunitatem : semper enim silentium , & uitam ignobilem desiderabat . Igitur octogesimo ætatis suæ anno , cum absens esset Hefychius , quasi testamenti uice breuem manu propria scripsit epistolam , omnes diuitias suas ei derelinquens , euāgelium scilicet , & tunicam sacceam , cucullam , & palliolum : nam minister eius ante paucos dies obierat . uenerunt itaque ad ægrotantem de Papho multi religiosi uiri , & maxime quod cum dixisse audierant , iam se ad Dominum migraturum , & de corporis uinculis liberandum ; sed & Constantia quædam , sancta femina ; cuius generum , & filiam de morte liberauerat unctione olei . quos omnes adiurauit , ut ne puncto quidem horæ post mortem reseruaretur , sed statim eum

in

in eodem hortulo terra operirent, sicut uestitus erat in tunica cilicina, & cuculla, & fago rustico. Iamq. modicus calor tepebat in pectore; nec, præter sensum, quidquam uiui hominis supererat: & tamen apertis oculis loquebatur: Egredere, quid times? egredere anima mea, quid dubitas? septuaginta prope annis seruisti Christo, & mortem times? In hæc uerba exhalauit spiritum. statimq. humo obrutum, ante urbi sepultum, quam mortuum, nunciauerunt. Quod postquam Palæstinæ sanctus uir audiuit Hesychnus; perrexit ad Cyprum; & simulans se uelle habitare in eodem hortulo, ut diligentis custodiæ suspicionem accolis tolleret, cum ingenti uitæ suæ periculo post decem fere menses corpus eius furatus est: quod Maiomam deferens, totis monachorum & opidorum turbis prosequentibus, in antiquo monasterio condidit, illæsa tunica, cuculla, & palliolo, & toto corpore, quasi adhuc uiueret, integro, tantisq. fragrantibus odoribus, ut delibutum unguentis putaretur. Non mihi uidetur in calce libri tacenda Constantiæ illius, sanctissimæ mulieris, deuotio; quæ, perlato ad se nuncio, quod corpusculum Hilarionis Palæstinæ esset, statim exanimata est, ueram in seruum Dei dilectionem etiam morte comprobans: erat enim solita per uigiles in sepulcro eius noctes ducere, & quasi cum præsentem ad adiuvandas orationes suas fermocinari. Cernas usque hodie miram inter Palæstinos & Cyprios contentionem, his corpus Hilarionis, illis spiritum se habere certantibus. et tamen in utrisque locis magna quotidie signa fiunt, sed magis in hortulo Cypri, forsitan quia plus illum locum dilexerit.

A R G V -

ARGVMENTVM.

MALCHI, ex Maronia Syria uico orti, uitam, & captiuitatem describit: ut post solitarium, & celebrem monachum, alium oppressum, & exagitatam ante oculos lectoribus ponat.

DE VITA MALCHI, CAPTIVI,
monachi.

QVI in nauali praelio dimicaturi sunt, ante in portu, & in tranquillo mari flectunt gubernacula, remos trahunt, ferreas manus, & uncas præparant, dispositumq. per tabulata militem, pendente gradu, & labente uefligio, stare firmiter consuefcunt; ut, quod in simulacro pugnae didicerint, in uero certamine non perhorrescant. ita & ego, qui diu tacui, (filere quippe me fecit, cui meus sermo supplicium est) prius exerceri cupio in paruo opere, & ueluti quandam rubiginem linguæ abstergere, ut uenire possim ad latiore[m] historiam. scribere enim disposui (si tamē uitam Dominus dederit, & si uituperatores mei saltem fugientem me, & inclusum persequi desierint) ab aduentu saluatoris usque ad nostrā ætatem, idest, ab apostolis usque ad nostri temporis fecem, quo modo, & per quos Christi Ecclesia nata sit, & adulta, persecutionibus creuerit, martyriis coronata sit, & postquam ad Christianos principes uenit, potentia quidem & diuitiis maior, sed uirtutibus minor facta sit. Verum hæc alias: nunc, quod imminet, explicemus. Maronia triginta ferme millibus ab Antiochia, urbe Syriæ, haud grandis ad orientē distat uiculus. hic post multos uel dominos, uel patronos, dum ego adolescentulus morarer in Syria, ad papæ Euagrii, necessarij mei, possessionem deuolutus est: quem iccirco nunc nominaui, ut ostenderem, unde nossem, quod scripturus sum. Erat igitur illic quidam senex, nomine Malchus, quem nos Latine regem possumus dicere, Syrus natione, & lingua, & reuera αὐτόχθων: annus quoque in eius contubernio, ualde decrepita,

pita, & iam morti proxima uidebatur: tam studiose ambo
Luc. 1 religiosi, & sic ecclesie limen terentes, ut Zachariam, & He-
 lizabeth de euangelio crederes, nisi quod Ioannes in medio
 non erat. De his cum curiose ab accolis quærerem, quænam
 esset eorum copula, matrimonii, sanguinis, an spiritus; o-
 mnes uoce consona, sanctos, & Deo placitos, & mira ne-
 scio quæ respondebant. qua cupiditate illectus, ad iocun-
 dum hominem; & curiosius sciscitatus rerum fidem, hæc ab
 eo accepi. Ego, inquit, mi nate, Maroniaci agelli colebas,
 sed solus parentibus fui. qui cum me, quasi stirpem gene-
 ris sui, & heredem familie suæ, ad nuptias cogerent, ma-
 chum potius me uelle esse respondi. quantis pater uir-
 quantis mater blanditiis persecuti sint, ut pudicitiam prede-
 rem, hæc res sola indicio est, quod & domum, & parentes
 fugi. & quia ad orientem ire non poteram propter uicem
 Persidem, & Romanorum militum custodiam, ad occiden-
 tem uerti pedes, pauxillum nescio quid portans ueneti,
 quod me ab inopia tantum defensaret. Quid multa? per-
 ueni tandem ad eremum Chalcidos, quæ inter Imbram & Es-
 sam magis ad austrum sita est. ibi repertis monachis, con-
 me magisterio tradidi, manuum labore uictum quantis,
 lasciuiaq. carnis refrenans ieiuniis. Post multos annos in-
 cidit mihi desiderium, ut ad patriam pergerem; & dum ad-
 huc uiueret mater, (iam enim patrem mortuum audieram)
 solarer uiduitatem eius; & exinde uenundata possessione
 la, partem erogarem pauperibus, partem monasterium con-
 stituerem; quid erubescō cōfiteri infidelitatem meam? par-
 tem in sumptuum meorum solatia reseruarem. Clamare
 cepit abbas meus, diaboli esse tentationem, & sub hanc
 stæ rei occasione, latere antiqui hostis insidias: hoc esse, re-
2. Pet. 2 uerti canem ad uomitum suum: sic multos monachorum
 esse deceptos; nusquam diabolum aperta fronte se ponde-
 re. Proponebat mihi exempla de scripturis plurima; inter
Gen. 3 quæ illud, quod initio Adam quoque & Euam spe deuita-
 tis supplantauerit. Et cum persuadere non posset, prauolu-
 tus genibus obsecrabat, ne se desererem, ne me perderem;

nec, aratrum tenens, post tergum respicerem. Væ misero *Luc. 9*
 mihi: uici monitorem pessima uictoria, putans illum non
 meam salutem, sed suum solatium querere. Prosecutus er-
 go me de monasterio, quasi fumus efferret, & ad extremum
 uale dicens, Videbo, ait, te fili satanæ cauterio notatum:
 non quero causas, excusationes non recipio. Ouis, quæ de
 ouilibus egreditur, lupi statim moribus patet. De Beria ad
 Essam pergentibus, uicina est publico itineri solitudo, per
 quam Saraceni incertis sedibus huc atque illuc semper ua-
 gantur. quæ suspicio frequentiam in illis locis uiatorum cō-
 gregat, ut imminens periculum auxilio mutuo declinetur.
 Erant in comitatu meo uiri, feminae, senes, iuuenes, par-
 uuli, numero circiter septuaginta. Et ecce subito equorum
 camelorumq. sessores Ismaelitæ irruunt, crinitis uittatisq.
 capitibus, ac seminudo corpore, pallia & latas caligas tra-
 hentes: pendebāt ex humero pharetræ: laxos arcus uibran-
 tes, hastilia longa portabant. non enim ad pugnandum, sed
 ad prædā uenerant. Rapimur, dispergimur, in diuersa tra-
 himur. ego enim, lōgo postliminio hereditarius possessor,
 & sero mei consilii pœnitens, cū altera muliercula in unius
 heri seruitutem sortitus uenio. Ducimur, immo portamur
 sublimes in camelis, & per uastam eremum, semper ruina-
 timentes, pendemus potius, quam sedemus. Carnes semi-
 crudæ cibis, & lac camelorum potus erat. Tandem, gran-
 di amne transinssio, peruenimus ad interiorem solitudinē;
 ubi dominam liberosq. ex more gentis adorare iussi, cerui-
 ces flectimus. Hic, quasi clausus carcere, mutato habitu,
 idest, nudus ambulare disco. nam aeris quoque intempe-
 ries, nihil aliud, præter pudenda, uelari patiebatur. Tradū-
 tur mihi pascendæ oues; & in malorum comparatione hoc
 fruor solatio, quod dominos meos, & conseruos rarius ui-
 deo. Videbar nui aliquid habere sancti Iacob: recorda- *Gen. 29*
 bar Moyse: qui & ipsi in eremo quondam fuere pastores. *Exod. 3*
 Vescebar recenti caseo, & lacte. Orabam iugiter, cane-
 bam psalmos, quos in monasterio didiceram. Delectabat me ca-
 ptiuitas mea. Agebam Dei iudicio gratias, quod monachū,
 C c quem

quem in patria fueram perditurus, in eremo inueneram. O nihil umquam tutum apud diabolum: o multiplices & ineffabiles eius insidiae. sic quoque latentem me inuenit inuidia. Dominus uidens gregem suum crescere, nihilq. in me deprehendens fraudulentiae, (sciebam enim Apostolum Eph.6 praecepisse, dominis sic, quasi Deo, fideliter seruiendum) & uolens me remunerare, quo fidum sibi magis faceret, tradidit mihi illam conseruam meam, aliquando captiuam. et, cum ego refutarem, diceremq. me Christianum, nec licere mihi uxorem uiuentis mariti accipere, (siquidem captus nobiscum uir eius, ab alio domino fuerat abductus) rursus ferus ille, & implacabilis, in furorem uersus, euaginato me coepit petere gladio; & nisi confestim brachia tendens mulierem praecupasssem, illico fudisset sanguinem. Iam igitur uenerat tenebrosior solito, & mihi nimium matura nox. Duco in speluncam semirutam nouam coniugem, & pronubante nobis maestitia, uterque detestamur alterum, nec fate mur. tunc uere sensi captiuitatem meam; prostratusq. humi, monachum coepi plangere, quem perdebam, dicens: Huccine miser seruatus sum? ad hoc me mea scelera perduxerunt, ut, incanescente iam capite, uirgo maritus fierem? Quid prodest, parentes, patriam, rem familiarem contempnissse pro Domino; si hoc facio; quod ne facerem, illa contempni? nisi quod forte propterea haec sustineo, quia patriam desiderauim. Quid agimus anima? perimus, an uincimus? expectamus manum Domini, an proprio mucrone confodimur? uerte in te gladium: tua magis mors timenda est, quam corporis. habet & seruata pudicitia suum martyrium. iaceat inssepultus Christi testis in eremo: ipse mihi ero persecutor, & martyr. Sic fatus, eduxi in tenebris quoque micantem gladium; & acumine contra me uerso, Vale, inquam, infelix mulier: habeto me martyrem potius, quam maritum. Tunc illa, pedibus meis prouoluta, Precor te, inquit, per Iesum Christum, & per huius horae necessitatem adiuro, ne effundas sanguinem tuum in crimen meum: uel, si mori placet, in me primum uerte mucronem: sic nobis potius

tius coniugamur. Etiam si uir meus ad me redierit, serua-
 rem castitatem, quam me captiuitas docuit; uel interirem
 potius, quam perderem. Cur moreris; ne mihi iungaris?
 ego morerer, si mihi iungi uelles. habeto me coniugem pu-
 dicitæ; & magis animæ copulam amato, quam corporis.
 Sperent domini maritum, Christus nouerit fratrem. faci-
 le suadebimus nuptias, cū nos uiderint sic amare. Fateor,
 inquit, obstupui; & admiratus uirtutem feminæ, coniugē
 plus amaui. numquam tamen illius nudum corpus intui-
 tus sum: numquam eius carnem attigi, timens in pace per-
 dere, quod in prælio seruaueram. Transeunt in tali matri-
 monio dies plurimi: amabiliores nos dominis fecerant nu-
 ptia. nulla fugæ suspicio: interdum & mense toto aberam
 fidus gregis pastor per solitudinem. Post grande interual-
 lum, dum solus in eremo sedeo, & præter cælum, terramq.
 nihil uideo, cœpi mecum tacitus uoluere, & inter multa cō-
 tubernii quoque monachorum recordari, maximeq. uultū
 patris mei, qui me erudierat, tenuerat, perdideratque. sicq.
 cogitans, aspicio formicarum gregem angusto calle feruere,
 ferre onera maiora, quam corpora. aliæ herbarum quædā
 semina forcipe oris trahebant; aliæ egerebant humum de
 foueis, & aquarum meatus aggeribus excludebāt. illæ, uen-
 turæ hiemis memores, ne madefacta humus in herbam hor-
 rea uerteret, illata semina præcidebant; hæ, luctu celebri,
 corpora defuncta deportabant. quodq. magis mirum est,
 in tanto agmine egrediens non obstabat intranti; quin po-
 tius, si quam uidissent sub fasce, & onere concidisse, suppo-
 sitis humeris adiuuabāt. Quid multa? pulchrum mihi spe-
 ctaculum dies illa tribuit. unde recordatus Salomonis, ad Prov. 16
 formicarum solertiam nos mittentis, & pigras mentes tali
 exemplo suscitantis, cœpi tædere captiuitatis, & monaste-
 rii cellulas quærere, ac formicarum illarum similitudinem
 desiderare, ubi laboratur in medium; cumq. nihil cuiusquā
 proprium sit, omnium omnia sunt. Regressō ad cubile oc-
 currit mulier: tristitiam animi dissimulare non potui. ro-
 gat, cur ita exanimatus sim: audit causas: hortatur fugam.

Peto silentii fidem : non aspernatur , & iugi susurro inter spem & metum medii fluctuamus . Erāt mihi in grege duo hirci miræ magnitudinis : quibus occisis , utres facio , eorumq. carnes uiatico præparo . & primo uesperī , putantibus nos dominis secreto cubitare , inuadimus iter , utres & partes carniū portantes . cumq. peruenissemus ad fluuiū ; (nam decem millibus aberat) inflatis cōscensiq. utribus , aquis nos credimus , paulatim pedibus subremigantes , ut , deorsum nos flumine deferente , & multo longius , quam conscenderamus , in alteram nos exponente ripam , uestigium sequētes perderent . Sed inter hæc madefactæ carnes , & ex parte lapsæ , uix tridui cibum pollicebantur . Bibimus usque ad satietatem , futuræ nos siti præparantes . Currimus , post tergū semper aspiciamus , & magis noctibus prouehimus , quam diebus , uel propter insidias late uagantiū Saracenorum , uel propter ardorem solis nimium . Pauesco miser etiam referens ; etsi tota mente securus , toto tamen corpore perhorresco . Post diem uero tertium , dubio prospectu procul aspiciamus duos camelis insidentes uenire conitos . statimq. mens , mali præfaga , putare cœpit , dominū meditari mortem , solem cernere nigrescentem . dumq. timemus , & uestigiis nos proditos per arenas intelligimus , offertur ad dexteram specus , longe sub terram penetrans . igitur timentes uenenata animalia , (nam solent uiperæ , reguli , & scorpiones , ceteraq. huiusmodi , feruorem solis declinantia , umbram petere) intrauimus quidem speluncam , sed statim in ipso introitu sinistra nos foueæ credimus , nequaquam ultra progredientes ; ne , dum mortem fugimus , incurramus in mortem ; illudq. nobiscum reputantes , si iuuat Dominus miseros , habemus salutem ; si despicit peccatores , habemus sepulcrum . Quid putas fuisse nobis animi , quid terroris , cum ante specum haud procul starent dominus , & conseruus , & uestigio indice iam ad latebras peruenissent ? O multo grauior expectata , quam illata mors . Rursus cum timore & labore lingua balbutit , & , quasi clamante domino , mutire non audeo . Mittit seruum , ut nos
de

de specu trahat: ipse camelos tenet, & euaginato gladio, nostrum expectat aduentum. Interea, tribus fere uel quatuor cubitis introgresso famulo, nobis ex occulto tergum eius uidentibus, (nam oculorum istiusmodi natura est, ut post solem umbram intransibis cæca sint omnia) uox per antrum sonat: Exite furciferi, exite morituri: quid statis? quid moramini? exite. dominus uocat, patienter expectat. Adhuc loquebatur; & ecce per tenebras aspicimus lænam inuasisse hominem, & gutture suffocatum cruentum intrahere. Iesu bone, quid tunc terroris nobis, quid gaudii fuit? spectabamus, domino nesciente, hostem nostrum perire: qui cū uideret illum moras facere, suspicatus est duos uni resistere: sed iram differre non ualens, sicut tenebat gladium ad speluncam uenit, & furore rabido serui increpans uecordiam, prius a fera est tentus, quā ad nostras latebras perueniret. Qui sunt, qui hoc crederent, ut ante os nostrū bestia pro nobis dimicaret? Sublato autem illo metu, similia ante oculos nostros uersabatur interitus; nisi quod tutius erat, rabiem leonis, quam iram hominis, sustinere. Pauemus intrinsecus; & ne mouere quidem nos ausi, præstolabamur euentum rei, inter tanta pericula, pudicitia tantum conscientia pro muro septi. Læna, insidias cauens, & uisam esse se sentiens, apprehensos mordicus catulos effert, nobisq. cedit hospitium. neque tamen satis creduli statim erumpimus; sed expectantes diu, & egredi cogitantes, illius nobis semper figurabamus occursum. Sublato ergo horrore, & alia transacta die, egredimur ad uesperam, uidimusq. camelos, quos ob nimiam uelocitatem dromedarios uocant, præteritos cibos in ore uoluere, & in alium missos iterum retrahere. quibus ascensis, & noua sitarcia, idest, annona refocillati, decima tandem die ad Romana per desertum castra uenimus: oblatiq. tribuno, rem ordine pandimus: inde transmissi ad Sabinum, Mesopotamiae ducem, camelorum pretium accepimus: & quia iam abbas ille meus dormierat in Domino, ad hæc delatus loca me monachis reddo, hanc trado uirginibus, diligens eam ut sororem, non

tamen ei me credens ut forori. Hæc mihi senex Malchus
adoleſcentulo retulit: hæc ego uobis narraui ſenex, & caſtis
hiſtoriam caſtitaſis expono: uirgines caſtitaſem cuſtodire
exhortor. uos narrate poſteris; ut ſciant, inter gladios, &
inter deſerta, & beſtias, pudicitiam numquam eſſe captiuā;
& hominem Chriſto deditum poſſe mori, non poſſe ſupe-
rari.

LIBER DE VIRIS ILLUSTRIBVS,
VEL DE SCRIPTORIBVS
ECCLESIASTICIS,

Ad Dextrum, prætorio præfectum.

PROOEMIUM.

ORTARIS, Dexter, ut Tranquillum sequens,
H ecclesiasticos scriptores in ordinem digeram; &
quod ille in enumerandis gentilium litterarum ui-
ris fecit illustribus, ego in nostris faciam, idest, ut a passio-
ne Christi usque ad decimumquartum Theodosii imperato-
ris annum, omnes, qui de scripturis sanctis memoriæ ali-
quid prodiderunt, tibi breuiter exponam. Fecerunt quidem
hoc idem apud Græcos Hermippus Peripateticus, Antigo-
nus Carystius, Satyrus, doctus uir, & lōge omnium doctis-
simus, Aristoxenus musicus; apud Latinos autem Varro,
Santra, Nepos, Hyginus, & ad cuius nos exemplū uis pro-
uocare, Tranquillus. Sed non mea & illorum similis est cō-
dicio. illi enim ueteres, historias annalesq. replicantes, po-
tuerunt quasi de ingenti prato paruum opusculi sui coronā
texere: ego quid acturus, qui; nullum præuium sequens,
pessimum, ut dicitur, magistrum memet ipsum habeo: quā
quam Eusebius Pamphili in decem Ecclesiasticæ historiæ li-
bris maximo nobis adiumento fuerit; & singulorū, de qui-
bus scripturi sumus, uolumina ætates auctorum suorum sæ-
pe testentur. itaque dominum Iesum Christum precor, ut,
quod Cicero tuus, qui in arce Romanæ stetit eloquentiæ,
non est facere dedignatus in Bruto, oratorum Latinæ lin-
guæ texens catalogum, id ego, in Ecclesiæ illius scriptori-
bus enumerandis, digne cohortatione tua impleam. Si qui
autem de iis, qui usque hodie scriptitant, a me in hoc uolu-
mine prætermitti sunt; sibi magis, quam mihi, debent im-
putare. neque enim celantes scripta sua, de iis, quæ non le-
gi, nosse potui; & quod aliis forsità sit notum, mihi in hoc

C c 4 terra-

terrarum angulo fuerit ignotum . certe , cum scriptis suis claruerint , non magnopere nostri silentii dispendio suspirabunt . Discant ergo Celsus , Porphyrius , Iulianus , rabidi aduersus Christum canes , discant eorum sectatores , qui putant Ecclesiam nullos philosophos , & eloquentes , nullos habuisse doctores , quanti , & quales uiri eam fundauerint , extruxerint , & ornauerint : & desinant fidem nostram rusticæ tantum simplicitatis arguere , suamq. potius imperitiæ agnoscant .

SIMON Petrus , filius Ioannis , prouinciæ Galilææ , uico Bethsaida , frater Andreæ apostoli , & princeps apostolorum , post episcopatum Antiochenis ecclesiæ , & prædicationem dispersionis eorum , qui de circumcisione crediderant , in Ponto , Galatia , Cappadocia , Asia , & Bithynia , secundo Claudii anno , ad expugnandum Simonem Magum Romam pergit ; ibiq. uiginti quinque annis cathedram sacerdotalem tenuit , usque ad ultimum annum Neronis , id est , decimum quartum : a quo & affixus cruci , martyrio coronatus est , capite ad terram uerso , & in sublime pedibus eleuatis ; asserens se indignum , quod sic crucifigeretur ut Dominus suus . Scripsit duas epistolas , quæ catholicæ nominantur ; quarum secunda a plerisque eius esse negatur , propter styli cum priore dissonantiam . Sed & euangelium iuxta Marcum , qui auditor eius & interpretes fuit , huius dicitur . Libri autem , e quibus unus Actorum eius inscribitur , alius Euangelii , tertius Prædicationis , quartus Apocalypseos , quintus Iudicii , inter apocryphas scripturas reputantur . Sepultus Romæ , in Vaticano , iuxta uiam Triumphalem , totius urbis ueneratione celebratur .

Andreas non est Hieronymi , sed e Graeco Sophronii dicauit , quæ cognominatur Magna , ubi est irruptio Apfari , & Phasis fluius . illic incolunt Aethiopes interiores . Sepultus est autem Patris , ciuitate Achaïæ , cruci suffixus ab Aegæa , præfecto Edessenorum .

IACO-

IACOBVS, qui appellatur frater Domini, cognomento Iustus, ut nonnulli existimant, Ioseph ex alia uxore, ut autem mihi uidetur, Mariæ, sororis matris Domini, cuius Ioannes in libro suo meminit, filius, post passionem Domini statim ab apostolis Hierosolymorum episcopus ordinatus, unam tantum scripsit epistolam, quæ de septem catholicis est, quæ & ipsa ab alio quodam sub nomine eius edita asseritur: licet paulatim, tempore procedente, obtinuerit auctoritatem. Hegesippus, uicinus apostolicorum temporum, in quinto commentariorum libro de Iacobo narrans, ait: Suscepit ecclesiam Hierosolymæ post apostolos frater Domini Iacobus, cognomento Iustus. multi siquidem Iacobi uocabantur. Hic de utero matris sanctus fuit, uinum & siceram non bibit, carnem nullam comedit, numquam attonsus est, nec unctus unguento, nec usus balneo. Huic soli licitum erat ingredi sancta sanctorum. siquidem uestibus laneis non utebatur, sed lineis, solusque ingrediebatur templum, & flexis genibus pro populo deprecabatur, in tantum, ut camelorum duritiem traxisse eius genua crederentur. Dicit & alia multa, quæ enumerare longum est. Sep & Iosephus in uicesimo libro antiquitatum refert, & Clemens in septimo *ὑποτυπώσεων*, mortuo Festo, qui Iudæam regebat, missum a Nerone esse successorem eius Albinum: qui cum necdum ad prouinciam peruenisset, Ananus, inquit, pontifex, adolescens, Anani filius, de genere sacerdotali, accepta occasione, *ἀναρχίας* concilium congregauit: & compellens publice Iacobum, ut Christum dei filium denegaret, contradicentem lapidari iussit: qui cum præcipitatus de pinna templi, contractis cruribus, adhuc semiuivus tollens ad cælum manus diceret, Domine ignosce eis: quod enim faciunt, nesciunt: fullonis fuisse, quo uida uestimenta extorqueri solent, in cerebro percussus interiit. Tradit item Iosephus tantæ eum sanctitatis fuisse, & celebritatis in populo, ut, propter eius necem, creditum sit subuersam esse Hierosolymam. Hic est, de quo Paulus apostolus scribit ad Galatas: Alium autem apostolorum uidi nemi-

neminem, nisi Iacobum, fratrem Domini. Et apostolorum super hoc crebrius Acta testantur. Euangelium quoque, quod appellatur secundum Hebræos, & a me nuper in Græcum Latinumq. sermonem translatus est, quo & Origenes sæpe utitur, post resurrectionem Saluatoris refert. Dominus autem cum dedisset sindonem seruo sacerdotis, iuit ad Iacobum, & apparuit ei. iurauerat enim Iacobus, se non comesturum panem ab illa hora, qua biberat calicem Domini, donec uideret eum resurgentem a mortuis. Rursusq. post paululum, Afferte, ait Dominus, mensam, & panem. Statimq. additur: Tulit panem, & benedixit, ac fregit, & dedit Iacobo Iusto, & dixit ei: Frater mi comede panem tuum, quia resurrexit filius hominis a dormientibus. Triginta itaque annos Hierosolymis rexit ecclesiam, idest, usque ad septimum Neronis annum, & iuxta templum, ubi & præcipitatus fuerat, sepultus est. Titulum usque ad obsidionem Titi & ultimam Hadriani notissimum habuit. Qui dam e nostris in monte Oliueti eum putauerunt conditum: sed falsa eorum opinio est.

MATTHÆVS, qui & Leui, ex publicano apostolus, primus in Iudæa propter eos, qui ex circumcisione crediderant, Euangelium Christi Hebraicis litteris uerbisq. composuit. quod quis postea in Græcum transtulerit, non satis certum est. Porro ipsum Hebraicum habetur usque hodie in Cæsariensi bibliotheca, quam Pamphilus Martyr studiofissime confecit. mihi quoque a Nazaræis, qui in Berceæ, urbe Syriæ, hoc uolumine utuntur, describendi facultas fuit. In quo animaduertendum, quod ubicumque euangelista, siue ex persona sua, siue ex persona Domini saluatoris, ueteris scripturæ testimoniis utitur, non sequatur Septuaginta translatorum auctoritatem, sed Hebraicam, e quibus illa duo sunt: Ex Aegypto uocaui filium meum. Et: Quo

Hæc usque ad niam Nazaræus uocabitur.

Iudam non sunt IACOBVS, Zebedæi filius, duodecim tribubus, quæ Hieron. sed a erant in dispersione, omnibus prædicauit euangelium do-
Græcis adiecta. mini nostri Iesu Christi. interfectus est autem gladio ab Herode,

rode, Tetrarcha Iudæorum.

PHILIPPVS apostolus in Phrygia prædicat euangelium Domini Iesu. Sepelitur Hierapoli cum filiabus honorifice.

BARTHOLOMAEVS apostolus Indis iis, qui dicuntur Fortunati, prædicauit Euangelium Christi, & Euangelium, quod est secundum Matthæum, eis tradidit. Dormiuit autem Albanopoli, opido maioris Armeniæ.

THOMAS apostolus, quemadmodum traditum est nobis, Parthis, & Mædis, & Persis, & Germanis, & Hircanis, & Bactris, & Magis prædicauit euangelium Domini. Dormiuit in ciuitate Calamina, quæ est Indiæ.

SIMON Cananæus, cognomento Iudas, frater Iacobi episcopi, qui & successit illi in episcopatum, post obitum Iacobi cognomento iusti, uixit annos uiginti supra centum. Crucifixus autem sub Traiano præfecto, mota persecutione graui, dormiuit.

MATTHIAS, cum unus esset e numero septuaginta, electus est in ordinem undecim apostolorum, in locum Iudæ Iscariotæ, qui fuit proditor. in altera Aethiopia, ubi est irruptio Apfari & Hyssi portus, prædicauit euangelium, cum essent homines agrestes: & illic dormiuit, & illic sepultus est, usque ad hodiernum diem.

TIMOTHEVS autem, Ephesiorum episcopus ordinatus a beato Paulo, ex gentibus erat, non ex circūcisione: de quo multa testatur Paulus, admonens ut honestam professionem dati sibi doni seruaret, qui & gloriose illic testificatus est.

TITVS, episcopus Cretæ, in eadem, & in circumiacentibus insulis prædicauit euangelium Christi. ibidem autem & dormiuit, & sepultus est, nempe in Creta.

CRESCENS in Galliis prædicauit euangelium, & illic sepultus est: Eunuchus Candaces Aethiopum reginæ, in Act. 8 Arabia, cognomento Felici, & in Taprobana insula maris rubri prædicauit euangelium Domini. Aiunt autem eum & ibidem martyrium pertulisse, & honorifice fuisse sepultum.

IUDAS, frater Iacobi, paruam quidem, quæ de septem catholicis est, epistolam reliquit. Et quia de libro Enoch, qui

qui apocryphus est, in ea assumit testimonium, a plerisque relicitur: tamen auctoritatem uetustate iam & usu meruit, & inter sanctas scripturas computatur.

- PAVLVS apostolus, qui ante Saulus, extra numerum duodecim apostolorum, de tribu Benjamin & opido Iudææ Gischalis fuit: quo a Romanis capto, cum parentibus suis Tarsum Ciliciæ commigravit: a quibus ob studia legis missus Hierosolymam, a Gamaliele, uiro doctissimo, cuius Lucas meminit, eruditus est. cum autem interfuisset neci mar-
- Act. 22. 5* tyris Stephani, &, acceptis a pontifice templi epistolis, ad persequendos eos, qui Christo crediderant, Damascum pergeret, reuelatione compulsus ad fidem, quæ in Actibus apostolorum scribitur, in uas electionis de persecutore translatus est: cumq. primum ad prædicationem eius Sergius
- Act. 13* Paulus, proconsul Cypri, credidisset, ab eo, quod eum Christi fidei subegerat, sortitus est nomen Paulus; & iuncto sibi Barnaba, multis urbibus peragratis, reuertentesq. Hierosolymam, a Petro, Iacoboq. & Ioanne gentium apostolus ordinatur. Et quia in Actibus apostolorum plenissime de eius conuersatione scriptum est; hoc tantum dicam, quod post passionem domini uicesimo quinto anno, idest, secundo Neronis, eo tempore, quo Festus, procurator Iudææ, successit Felici, Romam uinctus mittitur; & biennium in libera manens custodia, aduersus Iudæos de aduentu Christi quotidie disputauit. Sciendum autem in prima satisfactione, necdum Neronis imperio roborato, nec in tanta erumpente scelera, quanta de eo narrant historiæ, Paulum a Nerone dimissum, ut euangelium Christi in Occidentis quoque partibus prædicaret, sicut ipse scribit in secunda
- 2. Tim. 4* epistola ad Timotheum, eo tempore, quo & passus est, & de uinculis dictat epistolam: In prima mea satisfactione nemo mihi affuit, sed omnes me dereliquerunt: non eis imputetur. Dominus autem mihi affuit, & confortauit me, ut per me prædicatio compleretur, & audirent omnes gentes: & liberatus sum de ore leonis. Manifestissime leonem propter crudelitatem Neronem significans. Et in sequentibus:

bus : Liberatus sum de ore leonis . Et statim : Liberavit me Dominus ab omni opere malo , & saluavit me in regnum suum cæleste . quod scilicet præsens sibi sentiret imminere martirium . nam & in eadem epistola præmiserat : Ego enim iam immolor , & tempus resolutionis meæ instat .

Hic ergo xiiii Neronis anno, eodem die, quo Petrus, Romæ pro Christo capite truncatus, sepultusq. est in uia Ostiensis, anno post passionē Domini tricesimo septimo . Scripsit autem nouem ad septem ecclesias epistolas, ad Romanos unam , ad Corinthios duas, ad Galatas unam, ad Ephesios unam , ad Philippenses unam, ad Colossenses unam , ad Thessalonicenses duas ; præterea ad discipulos suos , Timotheo duas , Tito unam , Philemoni unam . epistola autem, quæ fertur ad Hebræos, non eius creditur, propter styli sermonisq. dissonantiam, sed uel Barnabæ, iuxta Tertulianum ; uel Lucæ euangelistæ, iuxta quosdam ; uel Clementis, Romanæ postea ecclesiæ episcopi, quem aiunt sententias Pauli proprio ordinalle, & ornasse sermone : uel certe, quia Paulus scribebat ad Hebræos, & propter inuidiā sui apud eos nominis titulum in principio salutatio nis amputauerit . Scripserat autem, ut Hebræus Hebræis, Hebraice, idest, suo eloquio disertissime, ut ea, quæ eloquenter scripta fuerant in Hebræo, eloquentius uerterentur in Græcum : & hanc causam esse, quod a ceteris Pauli epistolis discrepare uideatur . Legunt quidam & ad Laodicensens, sed ab omnibus exploditur .

BARNABAS Cyprius, qui & Ioseph Leuites, cum Paulo gentium apostolus ordinatus, unam ad ædificationem ecclesiæ pertinentem epistolam composuit, quæ inter apocryphas scripturas legitur . Hic postea propter Ioannem discipulum, qui & Marcus uocabatur, separatus a Paulo, nihilominus euangelicæ prædicationis iniunctum sibi opus exercuit .

LUCAS, medicus Antiochenis, ut eius scripta indicant, Græci sermonis non ignarus fuit, sectator apostoli Pauli, & omnis peregrinationis eius comes . Scripsit euangelium

2. Cor. 8 gelium, de quo idem Paulus, Misimus, inquit, cum illo
 Col. 4 fratrem, cuius laus est in euangelio, per omnes ecclesias.
3. Tim. 4 Et ad Colossenses, Salutat uos Lucas, medicus carissimus.
 Et ad Timotheum: Lucas est mecum solus. Aliud quoque
 edidit uolumen egregium, quod titulo *πράξεις ἀποστόλων*
 prænотatur: cuius historia usque ad biennium Romæ com-
 morantis Pauli peruenit, idest, usque ad quartum Nero-
 nis annum. Ex quo intelligimus, in eadem urbe librum
 esse compositum. Igitur *ᾠκιστοῦς* Pauli, & Theclæ, & to-
 tam baptizari Leonis fabulam, inter apocryphas scriptu-
 ras computamus. Quale enim est, ut indiuiduus comes
 apostoli, inter ceteras eius res, hoc solum ignorauerit?
 Sed & Tertullianus, uicinus eorum temporum, refert pre-
 sbyterum quendam in Asia *πρωτοκλήτου* apostoli Pauli, con-
 uictum a Ioanne, quod auctor esset libri, & confessum se
 hoc Pauli amore fecisse, & ob id loco excidisse: quidam
 1. Tim. 1 suspicantur, quotiescumque in epistolis suis Paulus dicit,
 2. Tim. 2 Iuxta euangelium meum, de Lucæ significare uolumine: &
 Lucam non solum ab apostolo Paulo didicisse euangelium,
 qui cum Domino in carne non fuerat, sed a ceteris aposto-
 lis, quod ipse quoque in principio sui uoluminis declarat,
 Luc. 1 dicens: Sicut tradiderunt nobis, qui a principio ipsi uide-
 runt, & ministri fuerunt sermonis. Igitur euangelium sicut
 audierat, scripsit. Acta uero apostolorum, sicut uiderat
 ipse, composuit. Vixit octoginta & quattuor annos, uxo-
 rem non habens. sepultus est Constantinopoli, ad quam
 urbem uicesimo Constantini anno, ossa eius cum reliquiis
 Andreæ Apostoli translata sunt de Achaia.
- Marcus, discipulus & interpres Petri, iuxta quod Pe-
 trum referentem audierat, rogatus Romæ a fratribus, bre-
 ue scripsit euangelium. Quod cum Petrus audisset, proba-
 uit, & ecclesiæ legendum sua auctoritate dedit, sicut scri-
 bunt Clemens in sexto *ὑποτύπωσις* libro, et Papias, Hie-
 1. Pet. 5 rapolitanus episcopus. meminit huius Marci; & Petrus in
 epistola prima, sub nomine Babylonis figuraliter Romam
 significans: Salutat uos Ecclesia, quæ est in Babylone colle-
 cta

sta, & Marcus filius meus. Assumpto itaque euangelio, quod ipse confecerat, perrexit Aegyptum, & primus Alexandriæ Christum annuncians, constituit ecclesiam, tanta doctrina, & uitæ continentia, ut omnes sectatores Christi ad exemplum sui cogeret. Denique Philo, disertissimus Iudæorum, uidens Alexandriæ primam ecclesiam adhuc Iudaizantem, quasi in laudem gentis suæ librum super eorum conuersatione scripsit. Et quo modo Lucas narrat Hierosolymæ credentes omnia habuisse communia: sic & ille, quod Alexandriæ sub Marco fieri doctore cernebat, memoriæ tradidit. Mortuus est autem octauo Neronis anno, & sepultus Alexandriæ, succedente sibi Aniano. Act. 2

IOANNES apostolus, quem Iesus amauit plurimum, filius Zebedæi, frater Iacobi apostoli, quem Herodes post passionem Domini decollauit, nouissimus omnium scripsit Act. 12 euangelium, rogatus ab Asiæ episcopis, aduersus Cerinthum, aliosq. hæreticos, & maxime tunc Ebionitarum dogma consurgens. qui asserunt, Christum ante Mariam non fuisse. unde & compulsus est diuinam eius natiuitatem edicere. Sed & aliam causam huius scripturæ ferunt: quod cū legisset Matthæi, Marci, & Lucæ uolumina, probauerit quidem textum historię, & uera eos dixisse firmauerit, sed unius tantum anni, in quo & passus est, post carcerem Ioannis historiam texuisse. Prætermisso itaque anno, cuius acta a tribus exposita fuerant, superioris temporis, antequam Ioannes clauderetur in carcerem, gesta narrauit, sicut manifestum esse poteritis, qui diligenter quattuor euangeliorum uolumina legerint. Quæ res etiam *διὰ τὴν*, quæ uidetur Ioannis esse cum ceteris, tollit. Scripsit autem & unam epistolam, cuius exordium est: Quod fuit ab initio, quod audiuius & uidimus oculis nostris, quod perspeximus, & manus nostræ contrectauerunt de uerbo uitæ: quæ ab uniuersis ecclesiasticis, & eruditis uiris probatur. Reliquæ autem duæ, quarum principium est: Senior electæ dominæ, & natis eius: & sequentis: Senior Caio carissimo, quem ego diligo in ueritate: Ioannis presbyteri asseruntur, cuius

cuius & hodie alterum sepulcrum apud Ephesum ostenditur: & nonnulli putant duas memorias eiusdem Ioannis euangelistæ esse: super qua re cum per ordinem ad Papiam, auditorem eius, uentum fuerit, differemus. Quarto decimo igitur anno, secundam post Neronem persecutionem mouente Domitiano, in Patmos insulam relegatus, scripsit Apocalypsim, quam interpretatur Iustinus Martyr, & Irenæus. Interfecto autem Domitiano, & actis eius ob nimiam crudelitatem a senatu rescissis, sub Nerua principe rediit Ephesum: ibiq. usque ad Traianum principem perseueras, rotas Asiæ fundauit, rexitq. ecclesias; &, confectus senio, sexagesimo octauo post passionem Domini anno mortuus, iuxta eandem urbem sepultus est.

Rom. 16

HERMAS, cuius apostolus Paulus ad Romanos scribens meminit: Salutate Asyncritum, Phlegontem, Herman, Patrobam, Hermen, & qui cum eis fratres sunt: asserunt auctorem esse libri, qui appellatur Pastor, & apud quasdam Græciæ ecclesias etiam publice legitur. reuera utilis liber, multiq. de eo scriptorum ueterum usurpauerunt testimonia: sed apud Latinos pene ignotus est.

PHILO Iudæus, natione Alexandrinus, de genere sacerdotum, iccirco a nobis inter scriptores ecclesiasticos ponitur, quia librum de prima Marci euangelistæ apud Alexandriam scribens ecclesia, in nostrorum laude uersatus est, non solum eos ibi, sed in multis quoque prouinciis esse memorans, & habitacula eorum dicens monasteria. Ex quo apparet, talem primum Christo credentium fuisse Ecclesiâ, quales nunc monachi esse nituntur & cupiunt; ut nihil cuiusquam proprium sit, nullus inter eos diues, nullus pauper; patrimonia egentibus diuidantur; orationi uaceret, & psalmis, doctrinæ quoque, & continentia, quales & Lucas refert primum Hierosolymæ fuisse credentes. Aiunt hunc sub Caio Caligula Romæ periclitatum, quo legatus gentis suæ missus fuerat: cum secunda uice uenisset ad Claudium, in eadem urbe locutum esse cum apostolo Petro, eiusq. habuisse amicitias; & ob hanc causam etiam Marci, discipuli Petri

Petri, apud Alexandriam sectatores ornasse laudibus. Ex
tant huius præclara & innumerabilia opera, in quinque
libros Mosi: De confusione linguarum liber unus: De na-
tura & inuentione liber unus: De iis, quæ sensu precamur,
& detestamur, liber unus: De eruditione liber unus: De
herede diuinarum rerum liber unus: De diuisione æqualiū
& cōtrariorum liber unus: De tribus uirtutibus liber unus:
Quare quorundam in scripturis mutata sunt nomina, liber
unus: De pactis libri duo: De uita sapientis liber unus: De
gygantibus liber unus: Quod quandoque somnia mittan-
tur a Deo, libri quinque: Quæstionum & solutionum in
Exodo libri quinque: De tabernaculo & decalogo libri
quattuor: Necnon de uictimis, & repromissionibus, siue
maledictis: De prouidentia: De Iudæis: De conuersatio-
ne uitæ: De Alexandro, & quod propriam rationem mu-
ta animalia habeant, & quod omnis insipiens seruus sit:
Et de uita nostrorum liber unus, de quo supra diximus,
idest, de apostolicis uiris, quem & inscripsit *ᾧ ἐν βίᾳ θεωρη-
τικῇ ἱκετῶν*, quod uidelicet cælestia contemplantur, & sem-
per Deum orent: De agricultura duo: De ebrietate duo.
Sunt & alia eius monumenta ingenii, quæ in nostras ma-
nus non peruenerunt. De hoc uulgo apud Græcos dicitur,
ἢ πλατῶν φιλονίξει, ἢ φίλων πλατωνίξει, idest, aut Plato
Philonem sequitur, aut Platonem Philo: tanta est similitu-
do sensuum, & eloquii.

L. ANNAEVS Seneca Cordubensis, Socionis Stoici di-
scipulus, & patruus Lucani poetæ, continentissimæ uitæ
fuit: quem non ponerem in catalogo sanctorum, nisi me
illæ epistolæ prouocarent, quæ leguntur a plurimis, Pauli
ad Senecam, & Senecæ ad Paulum. in quibus, cum esset
Neronis magister, & illius temporis potentissimus, opta-
re se dicit, eius esse loci apud suos, cuius sit Paulus apud
Christianos. Hic ante biennium, quam Petrus, & Paulus
coronarentur martyrio, a Nerone interfectus est.

IOSEPHVS, Matthathiæ filius, ex Hierosolymis sacer-
dos, a Vespasiano captus, cum Tito filio eius relictus est.

D d Hic,

Hic, Romam ueniens, septem libros Iudaicæ captiuitatis imperatoribus patri filioq. obtulit, qui bibliothecæ publicæ traditi sunt: & ob ingenii gloriam statutam quoque meruit Romæ. Scripsit autem & alios uiginti antiquitatum libros, ab exordio mundi, usque ad decimum quartum annum Domitiani Cæsaris, & duos ἀρχαιότητος aduersum Appionem grammaticum Alexandrinum, qui sub Caligula legatus missus ex parte gentilium, contra Philonem etiā librum, uituperationem gentis Iudaicæ continentem, scripserat. Alius quoque liber eius, qui inscribitur περὶ αὐτοκράτορος λογισμῶν, ualde elegans habetur, in quo & Machabæorū sunt digesta martyria. Hic in decimo octauo antiquitatum libro manifestissime confitetur, propter magnitudinē signorum, Christum a pharisæis interfectum, & Ioannem Baptistam uere prophetam fuisse, & propter interfectionē Iacobi apostoli, dirutam Hierosolymam. Scripsit autem de Domino in hunc modum: Eodem tempore fuit Iesus, uir sapiens, si tamen uirum eum oportet dicere. erat enim mirabilium patrator operum, & doctor eorum, qui libenter uera suscipiunt: plurimos quoque tam de Iudæis, quā de gentibus, sui habuit sectatores, & credebatur esse Christus. cumq. inuidia nostrorum principum, cruci eum Pilatus addidisset; nihilominus, qui eum primum dilexerant, perseverauerunt. apparuit enim eis tertia die uiuens. Multa & hæc & alia mirabilia, carminibus prophetarum de eo uaticinantibus: & usque hodie Christianorum gens, ab hoc sortita uocabulum, non defecit.

Iysrus Tiberienſis, de prouincia Galilæa, conatus est & ipse Iudaicarum rerum historiam texere, & quosdam commentariolos de scripturis componere: sed hunc Iosephus arguit mendacii. Constat autem illum eo tempore scripsisse, quo & Iosephus.

Philipp. 4 CLEMENS, de quo apostolus Paulus ad Philippenſes scribens, ait: Cum Clemente & ceteris cooperatoribus meis, quorū nomina scripta sunt in libro uitæ, quartus post Petrū Romæ episcopus. siquidem secundus Linus fuit, & ter-

tertius Cletus : tamen si plerique Latinorum, secundum post Petrum apostolum putent fuisse Clementem . Scripsit ex persona Romanæ ecclesiæ ad ecclesiam Corinthiorum ualde utilem epistolam, quæ & in nonnullis locis publice legitur, quæ mihi uidetur characteri epistolæ, quæ sub Pauli nomine ad Hebræos fertur, conuenire . sed & multis de eadē epistola nō solum sensibus, sed iuxta uerborum quoque ordinem abutitur . omnino grādis in utraque similitudo est . Fertur & secunda eius nomine epistola, quæ a ueteribus reprobatur . Et disputatio Petri & Appionis longo sermone conscripta, quam Eusebius in tertio Historiæ ecclesiasticæ uolumine coarguit . Obiit tertio Traiani anno, & nominis eius memoriam usque hodie Romæ extracta ecclesia custodit .

IGNATIUS, Antiochenæ ecclesiæ tertius post Petrum apostolum episcopus, commouente persecutionem Traiano, damnatus ad bestias, Romam uinctus mittitur . cūq. nauigans, Smyrnam uenisset, ubi Polycarpus auditor Ioannis episcopus erat, scripsit unam epistolam ad Ephesios, alteram ad Magnesianos, tertiam ad Trallenses, quartam ad Romanos, & inde egrediens scripsit ad Philadelphæos & ad Smyrnæos, & proprie ad Polycarpum, commendans illi Antiochensem ecclesiam : in qua & de Euangelio, quod nuper a me translatus est, super persona Christi ponit testimonium, dicens : Ego uero & post resurrectionem in carne eum uidi, & credo quia sit . Et quando uenit ad Petrum, & ad eos, qui cum Petro erant, dixit eis : Ecce, palpate me, & uidete, quia non sum dæmonium incorporale . Et statim tetigerunt eum, & crediderunt . Dignum autem uidetur, quia tanti uiri fecimus mentionem, & de epistola eius, quam ad Romanos scribit, pauca ponere . De Syria usque ad Romam pugno ad bestias in mari & in terra, nocte dieq. ligatus cum decem leopardis, hoc est, militibus, qui me custodiunt : quibus & cum benefeceris, peiores fiunt . iniquitas autem eorum, mea doctrina est ; sed non iccirco iustificatus sum . utinam fruor bestiis, quæ mihi sunt præparatæ,

D d 2 quas

quas & oro mihi ueloces esse ad interitum, & ad supplicia; & allici ad comedendum me, ne, sicut & aliorum martyrum non audeant corpus attingere. Quod si uenire noluerint; ego uim faciam, ut deuorer. Ignoscite mihi filioli: quid mihi profit, ego scio. Nunc incipio Christi esse discipulus, nihil de his, quæ uidentur, desiderans, ut Iesum Christum inueniam. Ignis, crux, bestia, contractio ossium, membrorum diuisio, & totius corporis contritio, & tota tormenta diaboli in me ueniant, tantum ut Christo fruatur. Cumq. iam damnatus esset ad bestias, & ardore patiendi rugientes audiret leones, ait: Frumentum Christi sum, dentibus bestiarum molar, ut panis mundus inueniar. Passus est anno undecimo Traiani. Reliquiæ corporis eius Antiochiæ iacēt extra portam Daphniticam in cœmiterio.

POLYCARPVS, Ioannis apostoli discipulus, & ab eo Smyrnæ episcopus ordinatus, totius Asiæ princeps fuit; quippe qui nonnullos apostolorum, & eorum, qui uiderant Dominum, magistros habuerit, & uiderit. Hic propter quasdam super die Paschæ quæstiones, sub Imperatore Antonino Pio, ecclesiam in urbē regente Aniceto, Romam uenit, ubi plurimos credentium, Marcionis, & Valentini persuasione deceptos, reduxit ad fidem. Cumq. ei fortuito obuiam fuisset Marcio, & diceret: Cognoscis nos? Respondit: Cognosco primogenitum diaboli. Postea uero regnante M. Antonino & L. Aurelio Commodō, quarta post Neronem persecutione, Smyrnæ, sedente proconsule, & uniuerso populo in amphitheatro aduersus eum personante, igni traditus est. Scripsit ad Philippenses ualde utilem epistolam, quæ usque hodie in Asiæ conuentu legitur.

PAPIAS, Ioannis auditor, Hierapolitanus episcopus in Asia, quinque tantum scripsit uolumina, quæ prænotauit, Explanatio sermonum Domini. in quibus cū se in præfatione asserat, non uarias opiniones sequi, sed apostolos auctores habere, ait: Considerabam, quid Andreas, quid Petrus dixissent, quid Philippus, quid Thomas, quid Iacobus, quid alius Iacobus, quid Ioannes, quid Matthæus; uel

uel alius quilibet discipulorum Domini; quid etiam Aristio & senior Ioannes, discipuli Domini, loquebantur. non enim tantum mihi libri ad legendum profunt, quantum uiua uox, usque hodie in suis auctoribus personans. Ex quo apparet ex ipso catalogo nominum, alium esse Ioannem, qui inter apostolos ponitur; & alium seniore Ioannem, qui post Aristionem enumeratur. Hoc autem diximus propter superiorem opinionem, quam a plerisque retulimus traditam, duas posteriores epistolas Ioannis, non apostoli esse, sed presbyteri. Hic dicitur mille annorum Iudaicam edidisse *Ἀντέρωτιν*, quem secuti sunt Irenæus & Apollinarius, & ceteri, qui post resurrectionem aiunt in carne cum sanctis Dominum regnaturum. Tertullianus quoque in libro de spe fidelium, & Victorinus Pictauiensis, & Lactantius hac opinione ducuntur.

QUADRATUS, apostolorum discipulus, Publio, Athenarum episcopo, ob Christi fidem martyrio coronato, in locum eius substituitur, & ecclesiam, grandi terrore dispersam, fide & industria sua congregat. Cumq. Hadrianus Athenis exegisset hiemem, inuisens Eleusinâ, & omnibus pene Græciæ sacris initiatus, dedisset occasionem iis, qui Christianos oderant, absque præcepto imperatoris uexare credentes: porrexit ei librum, pro religione nostra compositum, ualde utilem, plenumq. rationis, & fidei, & apostolica doctrina dignum: in quo & antiquitatem suæ ætatis ostendens, ait, plurimos a se uisos, qui sub Domino uariis in Iudæa oppressi calamitatibus sanati fuerant, & qui a mortuis resurrexerant.

ARISTIDES Atheniensis, philosophus eloquentissimus, & sub pristino habitu discipulus Christi, uolumen, nostri dogmatis rationem continens, eodem tempore, quo & Quadratus, Hadriano principi dedit, idest, apologeticum pro Christianis; quod usque hodie perseverans, apud philosophos ingenii eius indicium est.

AGRIPPA, cognomento Castor, uir ualde doctus, aduersum uiginti quattuor Basilidis hæretici uolumina, quæ in

D 3 euan-

euangelium confecerat, fortissime differuit, prodens eius uniuersa myſteria, & prophetas enumerans, Barcaban & Marcob, & ad terrorem audientium alia quædam barbara nomina: & Deum maximum eius Abraxas, qui, quasi annum continens, iuxta Græcorum numerum ſupputetur. Mortuus eſt autem Baſilides, a quo Gnoſtici in Alexandria, temporibus Hadriani: qua tempeſtate & Chochibus, dux Iudaicæ factionis, Chriſtianos uariis ſuppliciis enecauit.

HEGESIPPVS, uicinus apoſtolicorum temporum, omnes a paſſione Domini uſque ad ſuam ætatem, eccleſiaſticorum actuum texens hiſtorias, multaq. ad utilitatem legentium pertinentia, hinc inde congregans, quinque libros compoſuit, ſermone ſimplici: ut, quorum uitam ſectabatur, dicendi quoque exprimeret characterem. Aſſerit ſe ueniſſe ſub Aniceto Romam, qui decimus poſt Petrum epiſcopus fuit, & perſeueraffe ibi uſque ad Eleutherum eiſdem urbis epiſcopum, qui Aniceti quondam diaconus fuerat. Præterea aduerſum idola diſputans, ex quo primum errore creuiſſent, ſubtexit hiſtoriam: ex qua oſtendit, qua floruerit ætate. ait enim: Tumulos mortuis templaq. fecerunt, ſicut uſque hodie uidemus: e quibus eſt & Antinous, ſeruus Hadriani Cæſaris, cui & gymnicus agon exercetur apud Antinoum ciuitatem: quam ex eius nomine cõdidit, & ſtatuit prophetas in templo. Antinoum autem in deliciis habuiſſe Cæſar Hadrianus ſcribitur.

IUSTINVS philoſophus, habitu quoque philoſophorũ incedẽs, de Neapoli, urbe Palæſtinæ, patre Priſco Bacchio, pro religione Chriſti plurimum laborauit, in tantum, ut Antonino quoque Pio, & filiis eius, & ſenatui librum contra gentes ſcriptum daret, ignominiamq. crucis non erubeſceret, & alium librum ſucceſſoribus eiſdem Antonini, M. Antonino Vero, & L. Aurelio Commodo. Extat eiſ & aliud uolumen contra gentes, ubi de dæmonum quoque natura diſputat: & quartum aduerſus gentes, cui titulum prænotauit ἑλεγχος: ſed & aliud de monarchia Dei, & alius liber, quem prænotauit Πſalten, & alius de anima. Dialogus

gus cōtra Iudæos, quem habuit aduersus Tryphonem, principem Iudæorum : sed & contra Marcionem insignia uolumina, quorum Irenæus quoque in quinto aduersus hæreses libro meminit : & alius liber contra omnes hæreses : cuius facit mentionem in apologetico, quem dedit Antonino Pio . Hic, cum in urbe Roma haberet τὰς διατριβὰς, & Crescentem Cynicum, qui multa aduersum Christianos blasphemabat, redargueret, gulosum, & mortis timidum, luxuriamq. & libidinum sectatorem, ad extremum studio eius & insidiis accusatus, quod Christianus esset, pro Christo sanguinem fudit.

MBLITO Asianus, sardensis episcopus, librum imperatori M. Antonino Vero, qui Frontonis oratoris discipulus fuit, pro Christiano dogmate dedit. scripsit quoque & alia, de quibus ista sunt, quæ subiecinus : De Pascha libros duos : de uita prophetarum librum unum, de ecclesia librum unum : de die dominica librum unum : de sensibus librum unum : de fide librum unum : de plasinate librum unum : de anima & corpore librum unum : de baptismo librum unum : de ueritate librum unum : de generatione Christi librum unum : de prophetia sua librum unum : de philoxenia librum unum : & alium librum, qui Clauis inscribitur : de diabolo librum unum : de apocalypsi Ioannis librum unum, καὶ πρὸς ἐντομὰς θεῶν librum unum, & ἐκλογῶν libros sex. Huius elegans & declamatorium ingenium laudans Tertullianus in septem libris, quos scripsit aduersus ecclesiam pro Montano, dicit, eum a plerisque nostrorum prophetam putari.

THEOPHILVS, sextus Antiochenis ecclesiæ episcopus, sub imperatore M. Antonino Vero librum contra Marcionem composuit, qui usque hodie extat. Feruntur eius & ad Autolycum tria uolumina, & contra hæresim Hermogenis liber unus, & alii breues elegantesq. tractatus, ad ædificationem ecclesiæ pertinentes. Legi sub nomine eius in euangelium & in proueria Salomonis commentarios, qui mihi cum superiorum uoluminum elegantia & phrasi non

Dd 4 uiden-

videntur congruere.

APOLLINARIUS, Asiæ Hierapolitanus episcopus, sub imperatore M. Antonino Vero floruit, cui & insigne uolumen pro fide Christianorum dedit. Extant eius & alii quinque aduersum gentes libri, & de ueritate duo, & aduersum Cataphrygas, tunc primum exortos, cum Priscilla & Maximilla infans uatibus, incipiente Montano.

DIONYSIUS, Corinthiorum ecclesiæ episcopus, tantæ eloquentiæ & industriæ fuit, ut non solum suæ ciuitatis & prouinciæ populos, sed & aliarum prouinciarum & urbium episcopos epistolis erudiret. e quibus est una ad Lacedæmonios, alia ad Athenienses, tertia ad Nicomedienses, quarta ad Cretenses, quinta ad ecclesiam Amastrianam, & ad reliquas Ponti ecclesias, sexta ad Gnosianos, & ad Pinytū, eiusdem urbis episcopum; septima ad Romanos, quam scripsit ad soterem episcopum eorum; octaua ad Chrysophoram, sanctam feminam. Claruit sub imperatore M. Antonino Vero, & L. Aurelio Commodō.

PINYTVS Cretensis, Gnosiiæ urbis episcopus, scripsit ad Dionysium Corinthi episcopum ualde elegantem epistolam: in qua docet, non semper lacte populos nutriendos, ne quasi paruuli ab ultimo occupentur die: sed & solido uesci debere cibo, ut in spiritualem proficiant senectutem. Et hic sub M. Antonino Vero, & L. Aurelio Commodō floruit.

TATIANVS, qui primum oratoriam docens, non paruum sibi ex arte rhetorica gloriam comparauerat, Iustini Martyris sectator fuit, florens in ecclesia, quamdiu ab eius latere non discessit. postea uero inflatus eloquentiæ tumore, nouam condidit hæresim, quæ Encratitarum dicitur, quam postea seuerus auxit, a quo eiusdem partis hæretici seueriani usque hodie appellantur. Porro Tatianus infinita scripsit uolumina: e quibus unus contra gentes florentissimus extat liber, qui intet omnia opera eius fertur insignis. Et hic sub imperatore M. Antonino Vero, & L. Aurelio Commodō floruit.

uiden-

PHILIPPVS, episcopus Cretensis, hoc est, urbis Gortynæ, cuius Dionysius in epistola sua meminit, quam scripsit ad eiusdem ciuitatis ecclesiam, præclarum aduersum Marcionem edidit librum; temporibusq. M. Antonini Veri, & L. Aurelii Commodi claruit.

MYSANVS, non ignobilis inter eos, qui de ecclesiastico dogmate scripserunt, sub imperatore M. Antonino Vero confecit librum aduersus quosdam fratres, qui de ecclesia ad Encratitarum hæresim declinauerant.

MODESTVS & ipse sub imperatore M. Antonino, & L. Aurelio Commodio aduersum Marcionem scripsit librū, qui usque hodie perseuerat. Feruntur sub nomine eius & alia συγγράμματα, sed ab eruditis quasi ἰσθδ επιγραφα re pudiantur.

BARDESANES in Mesopotamia clarus habitus est, qui, primum Valentini sectator, deinde confutator, nouam hæresim condidit. Ardens eius a Syris prædicatur ingenium, & in disputatione uehemens. Scripsit infinita aduersum omnes pene hæreticos, qui ætate eius pullulauerant: in quibus clarissimus ille est, & fortissimus liber, quem M. Antonino de fato tradidit: & multa alia super persecutione uolumina, quæ sectatores eius de syra lingua uerterunt in Græcam. si autem tanta uis est, & fulgor in interpretatione, quantam putamus in sermone proprio?

VICTOR, tertiusdecimus Romanæ urbis episcopus, super quæstione paschæ, & alia quædam scribens opuscula, rexit ecclesiam sub seuerio principe annis decem.

IRENÆVS, Pothini episcopi, qui Lugdunensem in Gallia regebat ecclesiam, presbyter, a martyribus eiusdem loci ob quasdam ecclesiæ quæstiones legatus Romam missus, honorificas super nomine suo ad Eleutherum episcopum perfert litteras. Postea, iam Pothino prope non agenario ob Christum martyrio coronato, in locum eius substituitur. Constat autem, Polycarpi, cuius supra fecimus mentionem, sacerdotis, & martyris, hunc fuisse discipulum. Scripsit quinque aduersus hæreses libros, & contra gentes

uolu-

uolumen breue, & de disciplina aliud, & ad Marcianum fratrem de apostolica prædicatione, & librum uariorum tractatum, & ad Blastum de schismate, & ad Florinum de monarchia, siue quod Deus non sit conditor malorum, & *καὶ τῶν ὁμοιωμάτων* egregium commentarium, in cuius fine significans se apostolorum temporum uicinum fuisse, sic subscripsit: Adiuro te, qui transcribis librum istum, per dominum Iesum Christum, & per gloriosum eius aduentum, quo iudicaturus est uiuos & mortuos, ut conferas postquam transcripseris, & emendes illum ad exemplar, unde scripsisti, diligentissime: hanc quoque obtestationem similiter transferas, ut inuenisti, in exemplari. Feruntur eius & aliae ad Victorem, episcopum Romanum, de quaestione Paschae epistolae, in quibus commonet eum, non facile debere unitatem collegii scindere. siquidem Victor multos Asiae, & orientis episcopos, qui a decimaquarta luna cum Iudaeis Pascha celebrabant, damnandos crediderat. in qua sententia ii, qui discrepabant ab illis, Victori non dederunt manus. Floruit maxime sub Commodio principe, qui M. Antonino Vero in imperium successerat.

PANTAENVS, Stoicæ sectæ philosophus, iuxta quandam ueterem in Alexandria consuetudinem, ubi a Marco euangelista semper ecclesiastici fuere doctores, tantæ prudentiæ & eruditionis tam in scripturis diuinis, quam in sæculari litteratura fuit, ut in Indiam quoque, rogatus ab illius gentis legatis, a Demetrio Alexandriae episcopo mitteretur. ubi reperit, Bartholomæum de duodecim apostolis, aduentum domini Iesu, iuxta Matthæi euangelium, prædicasse; quod Hebraicis litteris scriptum, reuertens Alexandriam, secum retulit. Huius multi quidem in sanctam scripturam extant commentarii, sed magis uiua uoce ecclesiis profuit. Docuitq. sub Seuero principe, & Antonino cognomento Caracalla.

RHODON, genere Asianus, a Tatiano, de quo supra diximus, Romæ in scripturis eruditus, edidit plurima, præcipuumq. aduersus Marcionem opus; in quo refert, quo modo

modo ipsi quoque inter se Marcionitæ discrepent; & Apellem senem, alium hæreticum, a se quodam fuisse cõuentum, & risui habitum, eo quod Deum, quem coleret, ignorare se diceret. Meminit in eodem libro, quem scripsit ad Callistionem, Tatiani se Romæ fuisse auditorem. Sed & in Hexaameron elegantes tractatus composuit, & aduersum Phrygas insigne opus. Temporibusq. Commodi, & Seueri floruit.

CLEMENS, Alexandrinæ ecclesiæ presbyter, Pantæni, de quo supra retulimus, auditor, post eius mortem Alexandria ecclesiasticam scholam tenuit, & κατηχήσεων magister fuit. Feruntur eius insignia uolumina, plenaq. eruditionis & eloquentiæ, tam de scripturis diuinis, quam de sæcularis litteraturæ instrumento. e quibus illa sunt, *σποματεῖς*, libri octo: *ὑποτυπώσεων* libri octo: aduersus gētes liber unus: pædagogi libri tres: de Pascha liber unus: de iunio disceptatio: & alius, qui inscribitur, Quisnam diues ille sit, qui saluetur: de obrectatione liber unus: de canonicis ecclesiasticis, & aduersum eos, qui Iudæorum sequuntur errorem, liber unus, quem proprie Alexandro, Hierosolymorum episcopo, *προσεφώνησε*. meminit autem in Stromatibus suis uoluminis Tatiani aduersus gentes, de quo supra diximus: & Cassiani cuiusdam *χρονογραφίας*, quod opusculum inuenire non potui. Necnon & de Iudæis Aristobulum quendam, & Demetrium & Eupoleum scriptores aduersus gentes refert, qui in similitudinem Iosephi *ἀρχαιογονίας* Moyfi, & Iudaicæ gentis asseuerent. Extat Alexandri, Hierosolymorum episcopi, qui cum Narcisso postea rexit ecclesiam, epistola super ordinatione Asclepiadis confessoris ad Antiochenes, congratulantis eis: in qua ponit in fine: Hæc uobis domini, ac fratres scripta transmisi per Clementem beatum presbyterum, uirum illustrem, & probatum: quem uos quoque scitis, & nunc plenius recognoscetis: qui cum huc uenisset iuxta prouidentiam & uisitacionem Dei, confirmauit, & auxit Domini Ecclesiam. Constat, Origenem huius fuisse discipulum. Floruit autem

autem Seueri, & Antonini, filii eius, temporibus.

MILTIADES, cuius Rhodon in opere suo, quod aduersus Montanum, Priscillam, Maximillamq. composuit, recordatur, scripsit contra eosdem uolumen præcipuum, & aduersus gentes Iudæosq. libros alios: & principi illius temporis apologeticum dedit. Floruit autem M. Antonini Cōmodi temporibus.

APOLLONIUS, uir disertissimus, scripsit aduersus Mōtanum, Priscillam, & Maximillam insigne & longum uolumen, in quo asserit Montanum & insanas uates perisse suspendio: & multa alia, in quibus de Priscilla, & Maximilla refert: Si negant eas accepisse munera, confiteantur non esse prophetas, qui accipiunt: & mille hoc testibus approbabo. Sed & ex aliis fructibus probantur prophetæ. Dic mihi, crinem fucat propheta? stybio oculos linit? propheta uestibus & gemmis ornatur? propheta tabula ludit & resseris? propheta fenus accipit? Respondeant, utrum hoc fieri liceat, an non: meum est approbare, quod fecerint. Dicit in eodem libro, quadragesimum esse annum usque ad tempus, quo ipse scribebat librum, ex quo hæresis Cathrygarum habuerit exordium. Tertullianus sex uoluminibus aduersus Ecclesiam editis, quæ scripsit *œt̃i exord̃eas*, septimum proprie aduersus Apollonium elaborauit, in quo omnia, quæ ille arguit, conatur defendere. Floruit autem Apollonius sub Commodo, Seueroq. principibus.

SARAPION, undecimo Comodi imperatoris anno, Antiochiæ episcopus ordinatus, scripsit epistolam ad Carinum, & Pontium, de hæresi Montani, in qua & hæc addit: Vt autem sciatis, falsi huius dogmatis, idest, nouæ prophetiæ, ab omni mundo insaniam reprobari, misi uobis Apollinaris beatissimi, qui fuit in Hierapoli Asiæ episcopus, litteras. Ad Dominum quoque, qui persecutionis tempore ad Iudæos declinauerat, uolumen composuit; & aliū de euangelio, quod sub nomine Petri fertur, librum ad Rhosensem Ciliciæ ecclesiam, quæ in hæresim eius lectione diuerterat. Leguntur & sparsim eius breues epistolæ,
auctoris

auctoris sui ἀσκήσει, & uitæ congruentes.

APOLLONIUS, Romanæ urbis senator, sub Commodo principe a seruo, Seuerø proditus, quod Christianus esset, imperato ut rationem fidei suæ redderet, insigne uolumen composuit, quod in senatu legit, & nihilominus sententia senatus pro Christo capite truncatus est, ueteri apud eos obtinente lege, absque negatione non dimitti Christianos, qui semel ad eorum iudicium pertracti essent.

THEOPHILUS, Cæsareæ Palæstinæ (quæ olim Turris Stratonis uocabatur) episcopus, sub Seuerø principe aduersum eos, qui decimaquarta luna cum Iudæis Pascha faciebant, cum ceteris episcopis Synodicam ualde utilem composuit epistolam.

BACCHYLUS, Corinthi episcopus, sub eodem Seuerø principe clarus habitus, de Pascha ex omnium, qui in Achaia erant, episcoporum persona elegantem librum scripsit.

POLYCRATES, Ephesiorum episcopus, cum ceteris episcopis Asiæ, qui iuxta quandam ueterem consuetudinem cum Iudæis decimaquarta luna Pascha celebrabant, scripsit aduersus Victorem episcopum Romanum epistolam Synodicam, in qua docet, se apostoli Ioannis & ueterum auctoritatem sequi: de qua hæc pauca excepsimus: Nos igitur in uiolabilem celebramus diem, neque addentes aliquid, neque dementes. etenim in Asia elementa maxima dormierunt, quæ resurgent in die Domini, quando uenturus est de cælis in maiestate sua, & suscitaturus omnes sanctos, Philippum loquor de duodecim apostolis, qui dormiuit Hierapoli, & duas filias eius, quæ uirgines senuerunt; & Act. 21 aliam eius filiam, quæ, spiritu sancto plena, in Epheso occubuit. Sed & Ioannes, qui super pectus Domini recubuit, Ioan. 21 & pontifex eius fuit, auream laminam in fronte portans, martyr, & doctor in Epheso dormiuit, & Polycarpus episcopus, & martyr Sniyrnæ cubat. Thraseas quoque episcopus, & martyr de Eumenia in eadem Smyrna requiescit. Quid necesse est Sagaris episcopi, & martyris recordari, qui in Laodicea soporatur; & Papirii beati, & Melitonis in sancto

sancto spiritu eunuchi, qui, semper Domino seruiens, positus est in sardis, & expectat in aduentu eius resurrectionem? Hi omnes obseruauerunt Paschæ diem decimaquarta luna, ab euangelica traditione in nullam partem declinantes, & ecclesiasticum sequentes canonem. Ego quoque, minimus omnium uestrum, Polycrates secundum doctrinam propinquorum meorum, quos & secutus sum, (septem siquidem fuerunt propinqui mei episcopi, & ego octauus) semper Pascha celebraui, quando populus Iudæorum azyma faciebat. Itaque, fratres, sexagintaquinque annos ætatis meæ natus in Domino, & a multis ex toto orbe fratribus eruditus, peragrata omni scriptura, non formidabo eos, qui nobis minantur. dixerunt enim maiores mei:

Act. 5 Obedire Deo magis oportet, quam hominibus. Hæc propterea posui, ut ingenium, & auctoritatem uiri ex paruo opusculo demonstrarem. Floruit temporibus Seueri principis, eadem ætate, qua Narcissus Hierosolymæ.

HERACLIVS, sub Commodi Seueriq. imperio, in apostolum commentarios composuit.

MAXIMVS sub iisdem principibus famosam quæstionem insigni uolumine uentilauit, unde malum, & quod materia a Deo facta sit.

CANDIDVS, regnantibus supra scriptis, in Hexæmeron pulcherrimos tractatus edidit.

APPION sub Seuero principe, similiter in Hexæmeron tractatus fecit.

SEXTVS, sub imperatore Seuero, librum de resurrectione scripsit.

BRABIANVS sub eodem principe edidit quædam opuscula ad Christianum dogma pertinentia.

IVDAS de septuaginta apud Daniele hebdomadibus plenissime disputauit, & chronographiam superiorum temporum usque ad decimum Seueri perduxit annum. in qua erroris arguitur, quod aduentum antichristi circa sua tempora futurum esse dixerit: sed hoc ideo, quia magnitudo persecutionum præsentem mundi minabatur occasum.

TER-

TERTULLIANVS presbyter, nunc demum primus post Victorem & Apollonium Latinorum ponitur, prouinciæ Africæ, ciuitatis Carthaginiensis, patre centurione proconsulari. Hic acris & uehementis ingenii, sub Seuero principe & Antonino Caracalla floruit, multa. scripsit uolumina: quæ quia nota sunt pluribus, prætermittimus. Vidi ego quendam Paulum Concordiæ, quod opidum Italiæ est, senem, qui se beati Cypriani iam grandis ætatis notarium, cum ipse admodum esset adolescens, Romæ uidisse diceret, referreque sibi solitum, nunquam Cyprianum absque Tertulliani lectione unam diem præterisse: ac sibi crebro dicere: Da magistrum: Tertullianum uidelicet significans. Hic cum usque ad mediam ætatem presbyter ecclesiæ permansisset, inuidia postea & contumeliis clericorum Romanæ ecclesiæ ad Montani dogma delapsus, in multis libris nouæ prophetiæ meminit: specialiter autem aduersum Ecclesiam texuit uolumina De pudicitia, De persecutione, De ieiuniis, De monogamia, De ecclasi libros sex, & septimum quem aduersum Apollonium composuit. Ferturque uixisse usque ad decrepitam ætatem, & multa, quæ non extant, opuscula condidisse.

ORIGENES, qui & Adamantius, decimo Seueri Pertinacis anno aduersum Christianos persecutione commota, a Leonide patre, Christi martyrio coronato, cum sex fratribus & matre uidua, pauper relinquitur annos natus circiter decem & septem. rem enim familiarem ob confessionem Christi fiscus occupauerat. Hic Alexandriæ, dispersa Ecclesia, decimo octauo ætatis suæ anno κατηχήσεων opus aggressus: postea a Demetrio, eiusdem urbis episcopo, in locum Clementis presbyteri confirmatus, per multos annos floruit: & cum iam mediæ esset ætatis, & propter ecclesias Achaïæ, quæ pluribus hæresibus uexabantur, sub testimonio ecclesiasticæ epistolæ Athenas per Palæstinam pergeret, a Theodotisto, & Alexandro, Cæsareæ & Hierosolymarum episcopis, presbyter ordinatus, Demetrii offendit animum; qui tanta in eum debacchatus est infania, ut per totum

totum mundum super nomine eius scriberet. Constat eū, antequam Cæsaream migraret, fuisse Romæ sub Zephyrino episcopo, & statim Alexandriam reuersum, Heraclan presbyterum, qui sub habitu philosophi perseuerabat, adiutorem sibi fecisse *κατηχητήος*, qui quidem & post Demetrium Alexandrinam tenuit ecclesiam. Quantæ autem gloriæ fuerit, hinc apparet, quod Phirmillianus, Cæsareæ episcopus, cum omni Cappadocia eum inuitauit, & diu tenuit, & postea sub occasione sanctorum locorum Palæstinā ueniens, diu Cæsareæ in sanctis scripturis ab eo eruditus est. sed & illud, quod ad Mammeam, matrem Alexandri imperatoris, religiosam feminam, rogatus uenit Antiochiā, & summo honore habitus est; quodq. ad Philippum imperatorem, qui primus de regibus Romanis Christianus fuit, & ad matrem eius litteras fecit, quæ usque hodie extant; quis ignorat? Et quod tantum in scripturis diuinis haberet studii, ut etiam Hebræam linguā contra ætatis gentisq. suæ naturam edisceret: & exceptis septuaginta interpretibus, alias quoque editiones in unum congregaret uolumen, Aquilæ scilicet Pontici profelyti, & Theodotionis Hebræi, & Symmachi eiusdem dogmatis, qui in euangelium quoque *κατὰ Ματθαῖον* scripsit commentarios, de quo & suum dogma confirmare conatur. Præterea quintam & sextam & septimam editionem, quas etiam nos de eius bibliotheca habuimus, miro labore reperit, & cum ceteris editionibus comparauit. Et quia indicem operum eius in uoluminibus epistolarum, quas ad Paulam scripsimus, in quadam epistola contra Varronis opera conferens posui, nunc omitto: illud de immortali eius ingenio non tacens, quod Dialecticam quoque, & Geometriam, Arithmeticam, Musicam, Grammaticā, & Rhetoricam, omniumq. philosophorum sectas ita didicit, ut studiosos quoque sæcularium litterarum sectatores haberet, & interpretaretur eis quotidie, concursusq. ad eum mirificerent: quos ille propterea recipiebat, ut sub occasione sæcularis litteraturæ, in fide Christi eos institueret. De crudelitate autem persecutio

NIS,

nis, quæ aduersum Christianos sub Decio consurrexit, eo quod in religionem Philippi defœuisset, quem & interfecit, superfluum est dicere, cum etiam Fabianus Romanæ ecclesiæ episcopus in ipsa occubuerit, & Alexander Babylasq. Hierosolymorum, & Antiochenæ ecclesiæ pontifices, in carcere pro confessione dormierint. Et super Origenis statu, si quis scire uelit, quid actum sit; primum quidem de epistolis eius, quæ post persecutionem ad diuersos missæ sunt; deinde & de sexto Eusebii Cæsariensis ecclesiasticæ hystoriæ libro, & pro eodem Origene in sex uoluminibus poterit liquido cognoscere. Vixit usque ad Gallum & Volusianum, idest, usque ad LXX. ætatis suæ annum; & mortuus est Tyri, in qua urbe & sepultus est.

HAMMONIVS, uir disertus, & eruditus in philosophia, eodem tempore Alexandriæ clarus habitus est: qui, inter multa ingenii sui, & præclara monumenta, etiam de consolatione Moyfi, & Iesu elegans opus composuit; & euangelicos canones excogitauit, quos postea secutus est Eusebius Cæsariensis. Hunc falso accusat Porphyrius, quod ex Christiano ethnicus fuerit; cum constet, eum usque ad extremam uitam Christianum perseuerasse.

AMBROSIVS, primum Marcionites, deinde ab Origene correctus, Ecclesiæ diaconus, & confessionis Dominicæ gloria insignis fuit: cui pro Theoctisto presbytero liber Origenis de martyrio scribitur. Huius industria, & sumptus, & instantia, ad hunc infinita Origenes dictauit uolumina. Sed & ipse, quippe ut uir nobilis, non inelegantis ingenii fuit, sicut eius ad Origenem epistolæ indicio sunt. Obiit ante mortem Origenis: & in hoc a plerisque reprehenditur, quod uir locuples amici sui, egeni, senis, & pauperis, moriens non sit recordatus.

TRYPHON, Origenis auditor, ad quem nonnullæ eius extant epistolæ, in scripturis eruditissimus fuit. quod quidem & multa eius sparsim ostendunt opuscula, sed præcipue liber, quem composuit de uacca rufa in Numeris, & de dichotomematibus, quæ cum columna, & turture Abrahæ

Num. 19

E e ponun

Gen. 15 ponuntur in Genesi.

MINUCIUS Felix, Romæ insignis causidicus, scripsit dialogum Christiani & ethnici disputantium, qui Octavius inscribitur: sed & aliud sub nomine eius fertur de fato, uel cōtra mathematicos; qui, cum sit & ipse disertus hominis, nō mihi uidetur cum superioris libri stylo conuenire. Meminit huius Minucii & Lactantius in libris suis.

GAIVS sub Zephyrino, Romanæ urbis episcopo, idest, sub Antonino, Seueri filio, disputationem aduersum Proculum, Montani sectatorem, ualde insignem habuit; arguens eum temeritatis, super nouam prophetiam defendendam: & in eodem uolumine epistolas quoque Pauli, tredecim tantum enumerans, decimamquartam, quæ fertur ad Hebræos, dicit non eius esse. sed & apud Romanos usque hodie quasi Pauli apostoli non habetur.

BERYLLVS, Arabiæ Bostrenus episcopus, cum aliquantō tempore gloriose rexisset ecclesiam, ad extremum lapsus in hæresim, quæ Christum ante incarnationem negat, ab Origene correctus, scripsit uaria opuscula, & maxime epistolas, in quibus Origene gratias agit: sed & Origenis ad eum litteræ sunt. Extat dialogus Origenis, & Berylli, in quo hæreseos coarguitur. Claruit autem sub Alexandro, Mammeæ filio, & Maximino, & Gordiano, qui ei in imperium successerunt.

HIPPOLYTUS, cuiusdam ecclesiæ episcopus, (nomen quippe urbis scire non potui) rationem Paschæ, temporumq. canones scripsit usque ad primum annum Alexandri imperatoris, & sedecim annorum circulum, quem Græci ἐκκασισταετηρίδα uocant, reperit; & Eusebio, qui super eodem Pascha canonem, decem & nouem annorum circulum, idest, ἐννεακασισταετηρίδα composuit, occasionem dedit. Scripsit nonnullos in Scripturas commētarios, e quibus hos reperi, in ἐξάημερον, & in Exodum, & in Canticū canticorum, in Genesim, & in Zachariam, de Psalmis, & in Esaiam, de Daniele, de Apocalypsi, de Prouerbiis, de Ecclesiaste, de Saul, de Phytonissa, de Antichristo, de Resurrectione,

Elione, contra Marcionem, de Pascha, aduersum omnes hæreses, & *προτομολιῶν*, de laude Domini saluatoris; in qua, præsentem Origene se loqui in ecclesia, significat. In huius æmulationem Ambrosius, quem de Marcionis hæresi ad ueram fidem correctum diximus, cohortatus est Origenem, in Scripturas commentarios scribere, præbens ei septem & eo amplius notarios, eorumque expensas, & librariorum parem numerum; quodque his maius est, incredibili studio quotidie ab eo opus exigens. unde in quadam epistola *ἐργασίῳ* eum Origenes uocat.

ALEXANDER, episcopus Cappadociæ, cum, desiderio sanctorum locorum, Hierosolymam pergeret; & Narcissus eiusdem urbis, iam senex regeret ecclesiam; & Narcisso, & multis clericis eius reuelatum est, altera die mane intrare episcopum, qui adiutor sacerdotalis cathedræ esse deberet. itaque, re ita completa, ut prædicta fuerat, cunctis in Palæstina episcopis in unum cōgregatis, aduente quoque ipso, uel maxime Narcisso, Hierosolymitanæ ecclesiæ cum eo gubernaculum suscepit. Hic in fine cuiusdam epistolæ, quam scribit ad Antiochos super pace Ecclesiæ, ait: Salutat uos Narcissus, qui ante me hic tenuit episcopalem locum, & nunc mecum eundem orationibus regit, annos natus circiter centum sedecim, & uos mecum precatur, ut unum idēque sapiatis. Scripsit & aliam ad Antiochenes per Clementem presbyterum Alexandriæ, de quo supra diximus: necnon ad Origenem, & pro Origene contra Demetrium, eo quod iuxta testimonium Demetrii eum presbyterum constituerit. Sed & aliæ eius ad diuersos feruntur epistolæ. Septima autem persecutione sub Decio, quo tempore Babylas Antiochiæ passus est, ductus Cæsaream, & clausus in carcere, ob confessionem Christi martyrio coronatur.

IULIUS Africanus, cuius quinque de temporibus extant uolumina, sub imperatore M. Aurelio Antonino, qui Macroino successerat, legationem pro instauratione urbis Emmaus suscepit, quæ postea Nicopolis appellata est. Huius extat epistola ad Origenem, super questione susannæ, eo

E e 2 quod

quod dicat in Hebræo hanc fabulam non haberi; nec conuenire cum Hebræica etymologia, *ὅτι τὸ γίνε χρίσαι, καὶ ὅτι τὸ πρὶν ὀρίσαι*: contra quem doctam epistolam scribit Origenes. Extat eius ad Ariftidem altera epistola; in qua super diaphonia, quæ uidetur esse in genealogia saluatoris apud Matthæum, & Lucam, plenissime disputat.

GEMINVS, Antiochenæ ecclesiæ presbyter, pauca ingenii sui monumenta composuit, florens sub Alexandro principe, & episcopo urbis suæ Zebenno, eo uel maxime tempore, quo Heraclas Alexandrinæ ecclesiæ pontifex ordinatus est.

THEODORVS, qui postea Gregorius appellatus est, Neocæsaræ Ponti episcopus admodum adolescens, ob studia Græcarum, & Latinarum litterarum, de Cappadocia Berytum, & inde Cæsaream Palæstinæ transiit, iuncto sibi fratre Athenodoro. quorum cum egregiam indolem uidisset Origenes, eos ad philosophiam cohortatus est. in qua paulatim Christi fidem subintroducens, sui quoque sectatores reddidit. Quinquennio itaque eruditi ab eo, remittuntur ad matrem; e quibus Theodorus proficiscens *παννυχτικὴν εὐχαριστίαν* scripsit Origeni, &, conuocata grandi frequentia, ipso quoque Origene præsentē recitauit; qui usque hodie extat. Scripsit & *μετάφρασιν* in Ecclesiasten, breuem quidem, sed ualde utilem. Et aliæ huius uulgo feruntur epistolæ, sed præcipue signa, atque miracula, quæ iam episcopus cum multa ecclesiarum gloria perpetravit.

CORNELIVS, Romanæ urbis episcopus, ad quæ octo Cypriani extant epistolæ, scripsit epistolam ad Flavianum, Antiochenæ ecclesiæ episcopum, de synodo Romana Italica, Africana; & aliam de Nouatiano, & de iis, qui lapsi sunt; tertiam de gestis synodi; quartam ad eundem Flavianum, ualde prolixam, & Nouatianæ hæreseos causas, & anathema cōtinentem. Rexit ecclesiam annis duobus sub Gallo, & Volusiano; cui, ob Christum martyrio coronato, successit Lucius.

CYPRIANVS Afer primum gloriose rhetoricam docuit: exinde,

exinde, suadente presbytero Cæcilio, a quo & cognomen-
tum sortitus est, Christianus factus, omnem substantiam
suam pauperibus erogauit; ac post non multum temporis
electus in presbyterum, etiam episcopus Carthaginien-
sis constitutus est. Huius ingenii superfluum est indicem texe-
re, cum sole clariora sint eius opera. Passus est sub Valeria-
no, & Gallieno principibus, persecutione octaua, eodem
die, quo Romæ Cornelius, sed non eodem anno.

PONTIVS, diaconus Cypriani, usque ad diem passionis
eius cum ipso exilium sustinens, egregium uolumen uitæ, &
passionis Cypriani reliquit.

DIONYSIVS, Alexandrinæ urbis episcopus, sub Hera-
cla scholam κατηχιστεων presbyter tenuit, & Origenis ual-
de insignis adiutor fuit. Hic, in Cypriani & Africanæ syno-
di dogma consentiens, de hæreticis rebaptizandis ad diuer-
sos plurimas misit epistolas, quæ usque hodie extant: & ad
Flavianum Antiochenæ urbis episcopum scripsit de pæni-
tentia, & ad Romanos per Hippolytum alteram: ad Xy-
stum, qui Stephano successerat, duas epistolas: & ad Phi-
lemonem, & ad Dionysium, Romanæ ecclesiæ presbyteros,
duas epistolas: & ad eundem Dionysium, postea Romæ
episcopum, & ad Nouatianum causantem, quod inuitus
Romæ episcopus ordinatus esset: cuius epistolæ hoc exor-
dium est. Dionysius Nouatiano fratri salutem. Si inuitus,
ut dicis, ordinatus es, probabis, cum uolens secesseris. Est
eius ad Dionysium & ad Didymum altera epistola: & ἐορ-
τασικὴ de Pascha plurimæ, declamatorio sermone con-
scriptæ, & ad Alexandrinam ecclesiam de exilio; & ad Hera-
clam in Aegypto episcopum: & alia de mortalitate, & de
sabbato, & περὶ γυμνασίου, & ad Hermammone[m], & alia
de persecutione Decii: & duo libri aduersum Nepotem epi-
scopum, qui mille annorum corporale regnum suis scriptis
asseuerat: in quibus & de Apocalypsi Ioannis diligentissi-
me disputat: & aduersum Sabellium, & ad Ammonem, Be-
ronices episcopum, & ad Telesphorum, & ad Euphran, &
quatuor libri ad Dionysium, Romanæ urbis episcopum;

E c 3 & ad

& ad Laodicenses de pœnitentia : item ad Cononem de pœnitentia, & ad Origenem de Martyrio, ad Armenios de pœnitentia, & de ordine delictorum, de natura ad Timotheū, de tentationibus ad Euphranorem. Ad Basilidem quoque multæ epistolæ; in quarum una se asserit, etiam in Ecclesiasten cœpisse scribere commentarios. Sed aduersus Paulum Samosatenum, ante paucos dies, quam moreretur, insignis eius fertur epistola. Moritur duodecimo Galieni anno.

NOVATIANVS, Romanæ urbis presbyter, aduersus Cornelium cathedram sacerdotalem conatus inuadere, Novatianorum, quod Græce dicitur *καθαρὸν*, dogma constituit, nolens apostatas suscipere pœnitentes. huius auctor Novatus, Cypriani presbyter, fuit. Scripsit autem de Pascha, de sabbato, de circumcissione, de sacerdote, de oratione, de cibis Iudaicis, de instantia, de Attalo, multaq. alia, & de trinitate grande uolumen, quasi *ἐπιτομὴ* operis Tertulliani faciens: quod plerique nescientes Cypriani existimant.

MALCHION, disertissimus Antiochenæ ecclesiæ presbyter, quippe qui in eadem urbe rhetoricam florētissime docuerat, aduersum Paulum Samosatenum, qui Antiochenæ ecclesiæ episcopus, dogma Artemonis instaurarat, excipientibus notariis disputauit: qui dialogus usque hodie extat. Sed & alia grandis epistola ex persona synodi ab eo scripta ad Dionysium, & Maximum, Romanæ, & Alexandrinæ ecclesiæ episcopos, dirigitur. Floruit sub Claudio, & Aureliano.

ARCHELAUS, episcopus Mesopotamiæ, librum disputationis suæ, quam habuit aduersum Manichæum, exeuntem de Perside, Syro sermone composuit, qui translatus in Græcū habetur a multis. Claruit sub imperatore Probo, qui Aureliano, & Tacito successerat.

ANATOLIUS Alexandrinus, Laodicæ Syriæ episcopus, sub Probo, & Caro imperatoribus floruit, miræ doctrinæ uir fuit in arithmetica, geometria, astronomia, grammatica, rhetorica, dialectica; cuius ingenii magnitudinem de uolumine, quod super Pascha composuit, & ex decem libris de

de Arithmetica institutionibus, intelligere possumus.

VICTORINVS, Pictauiensis episcopus, non æque Latine, ut Græce, nouerat: unde opera eius grandia sensibus, uiliora uidentur cōpositione uerborum. sunt autem hæc: Commentarii in Genesim, in Exodum, in Leuiticum, in Esaïam, in Hezechielem, in Habacuc, in Ecclesiasten, in Cantica canticorum, in Apocalypsim Ioannis, aduersum omnes hæreses, & multa alia. ad extremum martyrio coronatus est.

PAMPHILVS presbyter, Eusebii, Cæsariensis episcopi, necessarius, tanto bibliothecæ diuinæ amore flagrauit, ut maximam partem Origenis uoluminum sua manu descripsit, quæ usque hodie in Cæsariensi bibliotheca habentur; sed & in duodecim prophetas uiginti quinque *ἐξηγήσεις*. Origenis uolumina, manu eius exarata, reperi; quæ tanto amplector, & seruo gaudio, ut Cræsi opes habere me credam. si enim lætitia est, unam epistolam habere martyris: quāto magis, tot millia uersuum, per quæ mihi uidetur sui sanguinis signasse uestigia? Scripsit ante, quam Eusebius scriberet apologeticum pro Origene: & passus est Cæsareæ Palæstinæ, sub persecutione Maximini.

PIERIVS, Alexandrinæ ecclesiæ presbyter, sub Caro, & Diocletiano principibus, eo tempore, quo eandem ecclesiam Theonas episcopus regebat, florentissime docuit populos, & in tantam sermonis, diuersorumq. tractatum, qui usque hodie extant, uenit elegantiam, ut Origenes iunior uocaretur. Constat hunc miræ *δοκίμους*, & appetitorem uoluntariæ paupertatis, scientissimumq. dialecticæ, & rhetoricæ artis, & post persecutionem omne uitæ suæ tempus Romæ fuisse uersatum. Huius est longissimus tractatus de propheta Osee; quem in peruilegio Paschæ habitum, ipse sermo demonstrat.

LUCIANVS, uir disertissimus, Antiochenæ ecclesiæ presbyter, tantum in scripturarum studio laborauit, ut usque nunc quædam exemplaria scripturarum Lucianea nuncupentur. feruntur eius de fide libelli, & breues ad nonnul-

E e 4 los

los epistolæ. Passus est Nicomediæ ob confessionem Christi, sub persecutione Maximini, sepultusq. Helenopoli Bithyniæ.

PHILEAS de urbe Aegypti, quæ uocatur Thmuis, nobili genere, & non paruis opibus, suscepto episcopatu, elegantissimum librum de martyrum laude composuit; &, disputatione actorum habita aduersum iudicem, qui eum sacrificare cogebat, pro Christo capite truncatur, eodem in Aegypto persecutionis auctore, quo Lucianus Nicomediæ.

ARNOBIUS sub Diocletiano principe Siccæ, apud Africam florentissime rhetoricam docuit; scripsitq. aduersum gentes, quæ uulgo extant uolumina.

FIRMIANVS, qui & Lactantius, Arnobii discipulus, sub Diocletiano principe accitus cum Flauio grammatico, cuius de medicinalibus uersu compositi extant libri, Nicomediæ rhetoricam docuit; ac, penuria discipulorum, ob Græcam uidelicet ciuitatem, ad scribendum se contulit. Habemus eius symposium, quod adolescentulus scripsit Africæ, & ἑξοπορικὸν de Africa usque Nicomediā, hexametris scriptum uersibus, & alium librum, qui inscribitur Grammaticus; & pulcherrimum de ira Dei; & institutionum diuinarum aduersum gentes libros septem; & ἐπιτομὴν eiusdem operis in libro uno acephalō, & ad Asclepiadem libros duos, de persecutione librum unum, ad Probum epistolarum libros quatuor, ad Seuerum epistolarum libros duos, ad Demetrianum auditorem suum epistolarum libros duos ad eundem de opificio Dei, uel formatione hominis, librum unum. Hic in extrema senectute magister Cæsaris Crispi, filii Constantini, in Gallia fuit, qui postea a patre interfectus est.

EVSEBIUS, Cæsareæ Palæstinæ episcopus, in scripturis diuinis studiosissimus, & bibliothecæ diuinæ cum Pamphilo martyre diligentissimus peruestigator, edidit infinita uolumina: de quibus hæc sunt: εὐαγγελικὴς ἀποδείξεως libri uiginti, εὐαγγελικὴς προπαρασκευῆς libri quindecim, τοπικῶν libri quinque, ecclesiasticæ historiæ libri decem, chroni-

chronicorum canonum omnimoda historia, & eorum ἐπι-
τομή, et de euangeliorum diaphonia, in Esaiam libri de-
cem, & contra Porphyrium, qui eodem tempore scribe-
bat in Sicilia, ut quidam putant, libri triginta: de quibus
ad me viginti tantum peruenerunt. τοπικὸν liber unus.
ἁπολογίαι pro Origene libri sex. de uita Pamphili libri
tres. De martyribus alia opuscula. Et in c. l. psalmos erudi-
tissimi commentarii. & multa alia. Floruit maxime sub
Constantino imperatore, & Constantio; &, ob amicitia
Pamphili martyris, ab eo cognomentum sortitus est.

RHAETICVS, Aeduorum, idest, Augustudunensis epi-
scopus, sub Constantino celeberrimæ famæ habitus est in
Galliis. Leguntur eius commentarii in Cantica canticorū,
& aliud grande uolumen aduersus Nouatianum. nec præter
hæc quidquam eius operum reperi.

METHODVS, Olympi Lyciæ, & postea Tyri episco-
pus, nitidi, compositiq. sermonis aduersum Porphyrium
confecit libros, & simposium decem uirginum, de resur-
rectione opus egregium; contra Origenem, & aduersus
eundem de Pythonissa, & de ἀντεξουσίῳ: in Genesim
quoque, & in Cantica canticorū commentarios: & multa
alia, quæ uulgo lætitantur. & ad extremū nouissimæ per-
secutionis, siue, ut alii affirmant, sub Decio, & Valeria-
no, in Chalcide Græciæ, martyrio coronatus est.

IUVENCVS, nobilissimi generis, Hispanus, presbyter,
quattuor euangelia hexametris uersibus pene ad uerbum
transferens, quattuor libros composuit, & nonnulla eo-
dem metro ad sacramentorum ordinem pertinentia. Flo-
ruit sub Constantino principe.

EUSTATHIUS, genere Pamphilius, Sidites, primum
Berææ Syriæ, deinde Antiochiæ rexit ecclesiam; &, aduer-
sum Arianorum dogma componens multa, sub Constan-
tino principe pulsus est in exilium Traianopolim Thracia-
rum, ubi usque hodie conditus est. Extant eius uolumina
de anima, de engastrimycho aduersum Origenem, & infi-
nitæ epistolæ, quas enumerare longum est.

MAZ-

MARCELLVS, Ancyranus episcopus, sub Constantio, & Constante principibus floruit, multaq. diuersarum ὑποθέσεων scripsit uolumina, & maxime aduersum Arianos. Feruntur contra hunc Asterii, & Apollinarii libri, Sabelianæ eum hæresis arguentes. sed & Hilarius in septimo aduersum Arianos libro, nominis eius, quasi hæretici, meminit. porro ille defendit, se non esse dogmatis, cuius accusatur; sed communione Iulii, & Athanasii, Romanæ, & Alexandrinæ urbis pontificum, se esse munitum.

ATHANASIVS, Alexandrinæ urbis episcopus, multas Arianorum perpeffus insidias, ad Constantem, Galliarum principem, fugit, unde reuersus cum litteris, & rursus post mortem eius fugatus, usque ad Iouiani imperium latuit; a quo recepta ecclesia, sub Valente moritur. Feruntur eius aduersum gentes duo libri, & contra Valentem, & Ursatium unus, & de uirginitate, & de persecutionibus Arianorum plurimi, & de psalmorum titulis, & historia; Antonii monachi uitam continens, ἐκπασίχα epistolæ, & multa alia, quæ enumerare longum est.

ANTONIUS monachus, cuius uitam Athanasius, Alexandrinæ urbis episcopus, insigni uolumine persecutus est; misit Aegyptiace ad diuersa monasteria Apostolici sensus, sermonisq. epistolas septem, quæ in Græcam linguam translatae sunt: quarum præcipua est ad Arsenoitas. Floruit sub Constantino, & filiis eius regnantibus. Vixit annos centum quinque.

BASILIVS, Ancyranus episcopus, artis medicinæ, scripsit contra Marcellum, & de uirginitate librum, & nonnulla alia, & sub rege Constantino Macedonianæ partis cum Eustathio Sebasteno princeps fuit.

THEODORVS, Heracliae Thraciarum episcopus, elegantis, apertiq. sermonis, & magis historicæ intelligentiæ, edidit sub Constantio principe commentarios in Matthæum, & in Ioannem, & in Apostolum, & in Psalteriũ.

EVSEBIVS, Emesenus episcopus, elegantis, & rhetorici ingenii, innumerabiles, & qui ad plausum populi pertinent,

tinent, confecit libros: magisq. historiam secutus, ab iis, qui declamare uolunt, studiosissime legitur; e quibus uel præcipui sunt aduersum Iudæos, & gentes, & Nouatianos, & ad Galatas libri decem, & in euangelia homiliæ breues, sed plurimæ. Floruit temporibus Constantii imperatoris; sub quo & mortuus, & Antiochiæ sepultus est.

TRIPHYLLIVS, Cypri Ledrensis, siue *Λευτεῖνος* episcopus, eloquentissimus suæ ætatis, & sub rege Constantio celeberrimus fuit. Legi eius in Cantica canticorum commentarios. Et multa alia composuisse fertur, quæ in nostras manus minime peruenerunt.

DONATVS, a quo Donatiani, per Africam sub Constante, Constantioq. principibus, asserens a nostris scripturas in persecutione ethnicis traditas, totam pene Africam, & maxime Numidiam sua persuasione decepit. Extant eius multa, ad suam hæresim pertinentia, & de spiritu sancto liber, Ariano dogmati congruens.

ASTERIVS, Arianæ philosophus factionis, scripsit, regnante Constantio, in epistolam ad Romanos, & in euangelia, & psalmos commentarios, & multa alia, quæ a suæ partis hominibus studiosissime leguntur.

LVCIFER, Caralitanus episcopus, cum Pancratio, & Hilario, Romanæ ecclesiæ clericis, ad Constantium imperatorem a Liberio episcopo pro fide legatus missus, cum nollet sub nomine Athanasii Nicenam damnare fidem, Palæstinam relegatus, miræ constantiæ, & præparati animi ad martyrium, contra Constantium imperatorem scripsit librum, eiq. legendum misit; ac non multo post sub Iuliano principe Caralis reuersus, Valentiniano regnante obiit.

EVSEBIVS, natione Sardus, & ex lectore urbis Romanæ, Vercellensis episcopus, ob confessionem fidei a Constantio principe Scythopolim, & inde Cappadociam relegatus, sub Iuliano imperatore ad ecclesiam reuersus, edidit in psalmos commentarios Eusebii Cæsariensis, quos de Græco in Latinum uerterat. Mortuus est Valentiniano, & Valente regnantibus.

FOR-

FORTVNATIANVS, natione Afer, Aquileienſis epiſcopus, imperante Constantino, in euangelia titulis ordinatis, breui & rustico ſermone scripsit commentarios: & in hoc habetur detestabilis, quod Liberium, Romanæ urbis epiſcopum, pro fide ad exilium pergentem, primus sollicitauit, ac fregit, & ab subscriptionem hæreseos compulſit.

ACACIUS, quem, quia luseus erat, μονόθεαλον nunc *Græcus & mul* eupabant, Cæsariensis ecclesiæ in Palæstina epiſcopus, elata *ta manuscri-* borauit in Ecclesiasten decem & septem uolumina, & συμ- *pta exempla-* μικτων ζητημάτων sex, & multos præterea, diuersosque *ria, non ha-* tractatus. In tantum autem sub Constantio imperatore clauſa *bent, Arianæ.* ruit, ut, in Liberii locum, Romæ Felicem Arianum epiſcopum, conſtitueret.

SARAPION Θυέως, Aegypti urbis, epiſcopus, qui ob elegantiam ingenii, cognomen Scholaſtici meruit, carus Antonio Monacho, edidit aduerſum Manichæum egregiū librum, & de psalmorum titulis alium, & ad diuersos utiles epiſtolas; et sub Constantio principe etiam in confessione inclutus fuit.

HILARIUS, urbis Pictauorum Aquitanix epiſcopus, factione Saturnini, Arelatenſis epiſcopi, de ſynodo Piterenſi, Phrygiam relegatus, duodecim aduerſus Arianos conſecit libros, & alium librum de ſynodis, quem ad Galliarum epiſcopos scripsit, et in psalmos commentarios, primum uidelicet & ſecundum, & a quinquageſimoprimo uſque ad ſexageſimumſecundum, & a centeſimo decimo octauo uſque ad extremum: in quo opere imitatus Origenem, nonnulla etiam de ſuo adidit. eſt eius & ad Conſtantium libellus, quem uiuenti Conſtantinopoli porrexerat: et alius in Conſtantium, quem poſt mortem eius ſcripsit: et liber aduerſum Valentem & Vrſatium, hiftoriam Ariminenſis & ſeleucienſis ſynodi continens: et aduerſus præfectum Salluſtium, ſiue contra Dioſcorum: & liber hymnorum, & myſteriorum alius: et commentarii in Matthæum: & tractatus in Iob, quos de Græco Origenis ad ſenſum tranſtulit: & alius elegans libellus contra Auxentium: & non nullæ ad diuerſos

diuersos epistolæ. Aiunt quidam, scripsisse eum & in Cantica canticorum: sed a nobis hoc opus ignoratur. Mortuus est Pictauis, Valentiniano, & Valente regnantibus.

VICTORINVS, natione Afer, Romæ sub Constantio principe rhetoricam docuit: & in extrema senectute, Christi se tradens fidei, scripsit aduersus Arium libros more dialectico ualde obscuros, qui ab eruditis modo intelliguntur, & commentarios in Apostolum.

TITVS, Bostrinus episcopus, sub Iuliano, & Iouiano principibus, fortes aduersum Manichæos scripsit libros, & nonnulla alia. Moritur autem sub Valente.

DAMASVS, Romanæ urbis episcopus, elegans in uersibus componendis ingenium habuit, multaq. & breuia metro edidit: & prope octogenarius sub Theodosio principe mortuus est.

APOLLINARIUS, Laodiceus Syriæ episcopus, patre presbytero, magis grammaticis in adolescentia operam dedit: & postea in sanctas scripturas innumerabilia scribens uolumina sub Theodosio imperatore obiit. Extant eius aduersum Porphyrium triginta libri, qui inter cetera opera eius uel maxime probantur.

GREGORIUS, Bæticus Iliberi episcopus, usque ad extremam senectutem diuersos mediocri sermone tractatus composuit, & de fide elegantem librum, qui hodieq. super esse dicitur.

PACIANVS, in Pyrinæi iugis, Barcilonæ episcopus, castitate, & eloquentia, & tam uita, quam sermone clarus, scripsit uaria opuscula, de quibus est *κέρβος*, & contra No-
natianos. sub Theodosio principe iam ultima senectute mortuus est.

PHOTINVS de Gallogræcia, Marcelli discipulus, Sirinii episcopus ordinatus, Hebionis hæresim instaurare conatus est: postea, a Valentiniano principe pulsus ecclesia, plura scripsit uolumina, in quibus uel præcipua sunt, contra gentes, & ad Valentinianum libri.

SOEBADIVS, Agenni Galliarum episcopus, edidit cō-
tra

tra Arianos librum. Dicuntur & eius esse alia opuscula, quæ necdum legi. Viuit usque hodie decrepita senectute.

DIDYMVS Alexandrinus, captus a parua ætate oculis, & ob id elementorum quoque ignarus, tantum miraculum sui omnibus præbuit, ut dialecticam quoque, & geometriam, quæ uel maxime uisu indiget, usque ad perfectum didicerit. Is plura opera & nobilia conscripsit: commentarios in psalmos omnes; commentarios in euangelium Matthæi, & Ioannis; & de dogmatibus, & contra Arianos libros duos; & de spiritu sancto librum unum, quem ego in Latinum uerti; in Esaiam tomos decem & octo; in Osee, ad me scribēs, commentariorum libros tres; & in Zachariam, meo rogatu, libros quinque; commentarios in Iob, & infinita alia, quæ digerere, proprii indicis est. Viuit usque hodie, & octogesimum tertium ætatis excessit annum.

OPTATVS Afer, episcopus Miliuitanus, ex parte catholica, scripsit sub Valentiniano, & Valentino principibus aduersum Donatianæ partis calumniam libros sex, in quibus asserit, crimen Donatianorum in nos falso retorqueri.

AQVILIVS Seuerus, in Hispania, de genere illius Seueri, ad quem Lactantii duo epistolarum scribuntur libri, composuit uolumen, quasi *ἀποστολικὴν*, totius suæ uitæ statum continens, tam prosa, quam uersibus, quod uocauit *καταστροφὴν*, siue *πείραν*, & sub Valentiniano principe obiit.

CYRILLVS, Hierosolymorum episcopus, sæpe pulsus Ecclesia, & receptus, ad extremum sub Theodosio principe octo annis incōcussum episcopatum tenuit. Extant eius *κατηχήσεις*, quas in adolescentia composuit.

EVZOTVS apud Thespesium rhetorem, cum Gregorio Nazianzeno episcopo, adolecens Cæsareæ eruditus est; & eiusdem postea urbis episcopus, plurimo labore, corruptam bibliothecam Origenis, & Pamphili, in membranis instaurare conatus est. ad extremum sub Theodosio principe Ecclesia pulsus est. Feruntur eius uarii, multiplicesque tractatus,

status, quos nosse perfacile est.

ERIPHANIVS, Cypri Salaminæ episcopus, scripsit aduersum omnes hæreses libros, & multa alia, quæ ab eruditissimis propter res, a simplicioribus propter uerba lectitantur. Superest usque hodie, & in extrema senectute uaria cudit opera.

EPHRAEM, Edeffenæ ecclesiæ diaconus, multa Syro sermone composuit; & ad tantam uenit claritudinem, ut, post lectionem Scripturarum, publice in quibusdam ecclesiis eius scripta recitentur. Legi eius de spiritu sancto Græcum uolumen, quod quidam de syriaca lingua uerterat; & acumen sublimis ingenii etiam in translatione cognoui. Decessit sub Valente principe.

BASILIVS, Cæsareæ Cappadociæ, quæ prius Mazaca uocabatur, episcopus, egregios contra Eunomium elaborauit libros, & de Spiritu sancto uolumen; & in hexaemeron homilias nouem, & ἀσκητικὸν, & breues, uariosq. tractatus. Moritur imperante Gratiano.

GREGORIUS, primum Sasimorum, deinde Nazianzenus episcopus, uir eloquentissimus, præceptor meus, quo scripturas explanante didici, ad triginta millia uersuum omnia opera sua composuit, e quibus illa sunt: De morte fratris Cæsarii: περὶ εὐλοπρωχίας: laudes Machabæorum: laudes Cypriani: laudes Athanasii: laudes Maximi philosophi, post exilium reuersi, quem falso nomine quidam Heronis superscripserunt: quia est & alius liber, uituperationem eiusdem Maximi continens: quasi non licuerit eundem & laudare, & uituperare pro tempore. Et liber, hexametro uersu, uirginitatis, & nuptiarum, contra se differentium. Aduersum Eunomium liber unus: De spiritu sancto liber unus. Contra Iulianum Imperatorem libri duo. Secutus est autem Polemonem dicendi caractere: uiuq. se, episcopum in loco suo ordinans, ruri uitam monachi exercuit: decessitq. ante hoc ferme triennium, sub Theodosio principe.

LVCIVS, post Athanasium Arianæ partis episcopus, usque

usque ad Theodosium principem, a quo & pulsus est, Alexandrinam ecclesiam tenuit. Extant eius sollemnes de Pascha epistolæ, & pauci uariarum *ὑποθέσεων* libelli.

DIODORVS, Tarsensis episcopus, dum Antiochiæ esset presbyter, magis claruit. Extant eius in Apostolum commentarii, & multa alia, ad Eusebii magis Emiseni characterem pertinentia; cuius cum sensum secutus sit, eloquentiâ imitari non potuit, propter ignorantiam sæcularium litterarum.

EVNOMIVS, Arianæ partis, Cyzicenus episcopus, in apertam hæreseos suæ prorumpēs blasphemiam, ut, quod illi tegunt, iste publice fateretur, usque hodie uiuere dicitur in Cappadocia, & multa contra Ecclesiam scribere. Responderunt ei Apollinarius, Didymus, Basilii Cæsariensis, Gregorius Nazianzenus, & Gregorius Nyfenus.

PRISCILLIANVS, Abilæ episcopus, qui factione Hylatii, & Ithacii, Treueris a Maximo tyranno cæsus est, edidit multa opuscula, de quibus ad nos aliqua peruenerunt. Hic usque hodie a nonnullis Gnosticæ, idest, Basilidis, & Marcionis, de quibus Irenæus scripsit, hæreseos accusatur, de fendentibus aliis, non ita eum sensisse, ut arguitur.

MATRONIANVS, provincie Hispaniæ uir ualde eruditus, & in metrico opere ueteribus comparandus, cæsus est & ipse Treueris cum Priscilliano, Felicissimo, Iuliano, Eucheriotia, eiusdem factionis auctoribus. Extant eius ingenii opera, diuersis metris edita.

TIBERIANVS Beticus scripsit, pro suspitione, qua cū Priscilliano accusabatur hæreseos, apologeticum, tumenti, compositoq. sermone: postea, post suorum cædem, tradito uictus exilii, mutauit propositum; & iuxta sanctam scripturam, Canis reuersus ad uomitum situm, filiam, deuotam Christo uirginem, matrimonio copulauit.

AMBROSIVS, Mediolanensis episcopus, usque in præsentem diem scribit: de quo, quia superest, meum iudiciū subtraham; ne in alterutram partem aut adulatio in me reprehendatur, aut ueritas.

EVAGRIVS,

EVAGRIVS, Antiochiæ episcopus, acris & feruentis ingenii, cum adhuc esset presbyter, diuersarum *ὑποθέσεων* tractatus mihi legit, quos necdum edidit: uitam quoque beati Antonii de Græco Athanasii in sermonem nostrum transtulit.

AMBROSIVS Alexandrinus, auditor Didymi, scripsit aduersum Apollinarium uolumen multorum uersuum, de dogmatibus, & ut ad me, nuper quodam narrante, perlatum est, commentarios in Iob: qui usque hodie superest.

MAXIMVS, philosophus, natus Alexandria, Constantinopoli episcopus ordinatus est, & pulsus; insignem de fide aduersus Arianos scripsit librum, quem Mediolani Gratiano principi dedit.

GREGORIUS, Nyssenus episcopus, frater Basilii Cæsariensis, ante paucos annos mihi, & Gregorio Nazianzeno contra Eunomium legit libros: qui & multa alia scripsisse, & scribere dicitur.

IOANNES, Antiochenæ ecclesiæ presbyter, Eusebii Emiseni, Diodorig. sectator, multa componere dicitur, de quibus *ὁ δὲ ἱερογυνὴς* tantum legi.

GELASIVS, Cæsareæ Palæstinæ post Euzoiū episcopus, ac curati limatiq. sermonis, fertur quædā scribere, sed celare.

THEOTIMVS, Scythiæ Tomorum episcopus, in morem dialogorum, & ueteris eloquentiæ breues, commaticosq. tractatus edidit. audio eum & alia scribere.

DEXTER, Paciani, de quo supra dixi, filius, clarus apud sæculum, & Christi fidei deditus, fertur ad me omnimodam historiam texnisse, quam necdum legi.

AMPHILOCHIVS, Iconii episcopus, nuper mihi librum legit de spiritu sancto, quod Deus est, & quod adorandus, quodq. & omnipotens sit.

SOPHRONIVS, uir apprime eruditus, laudes Bethlehē, adhuc puer, & nuper de subuersione Serapis insignem librum composuit: de uirginitate quoque ad Eustachium, & uitam Hilarionis monachi, opuscula mea, in Græcum eleganti sermone transtulit; psalterium quoque & prophetas,

Ff quos

quos nos de Hebræo in Latinum uertimus.

HIERONYMVS, patre Eusebio natus, opido Stridonis, quod, a Gothis euersum, Dalmatiæ quondam, Pannoniæq. confinium fuit, usque in præsentem annum, idest, Theodosii principis decimumquartum, hæc scripsi: Vitam Pauli monachi; epistolarum ad diuersos librum unum; ad Heliodorum exhortatoriam; altercationem Luciferiani & Orthodoxi; chronicon omnimodæ historiæ; in Hieremiâ & in Ezechielem homilias Origenis uiginti octo, quas de Græco in Latinum uerti; de Seraphin, & Osanna; de frugi & luxurioso filiis; de tribus quæstionibus legis ueteris; homilias in Cantica canticorum duas; aduersus Heluidium de uirginitate Mariæ perpetua; ad Eustochium, de uirginitate seruanda; ad Marcellam, epistolarum librum unum; consolatoriâ de morte filiæ, ad Paulam; in epistolam Pauli ad Galatas cõmentariorũ libros tres; in epistolam ad Titũ librũ unum; in epistolam ad Philemonẽ librũ unum; in Ecclesiasten cõmentarios; quæstionum Hebraicarũ in Genesim librũ unum; de locis librum unum; Hebraicorũ nominum librũ unum; de spiritu sancto Didymi, quem in Latinum trãstuli, librum unum; in Lucam homilias trigintano uem; in psalmos, a decimo usque ad decimũ sextum, tractatus septem; Captiui monachi uitam, & beati Hilarionis. Nouũ testamentũ Græcæ fidei reddidi, uetus iuxta Hebraicam transtuli. Epistolarum autem ad Paulam, & Eustochiũ, quia quotidie scribuntur, incertus est numerus. Scripsi præterea in Michæam explanationum libros duos; in Sophoniam librum unum; in Nahum librum unum; in Habacuc libros duos; in Aggæum librum unum; multa q. alia de opere prophetali, quæ nunc habeo in manibus, & necdum expleta sunt; aduersum Iouinianũ libros duos; & ad Pammachium apologeticum, & epitaphium.

EPISTOLARVM D. HIERONYMI

FINIS TOMI PRIMI.

00568250

ALTER TOMVS
EPISTOLARVM
D. HIERONYMI

STRIDONIENSIS,

complectens ἐλεγκτικὰ, καὶ ἀπολογητικὰ, nimirum
ea, quæ pertinent ad diuersas hæreses, &
maledicorum calumnias.

ARGVMENTVM.

MARIA, quæ Iesum, Dei filium, mundo peperit, semper
uirgo fuit, ut quæ uirum numquam cognauit, & Christum Spi-
ritu sancto cooperante concepit. hoc autem quamuis certissimū
sit, & perpetua totius Ecclesiæ consensione firmatum, inuentus
est tamen unus Heluidius, Auxentii Ariani discipulus, homo
nec doctus, neque facundus, qui librum contra hanc ueritatem
scribens, ex testimoniis sacra scripturae perperam intellectis, &
duorum ueterum Patrum auctoritatibus parum perpensis, pro-
bare conatus est, Deiparam Mariam, postquam Iesum citra ho-
minis operam peperit, ex Ioseph marito filios aliquot, qui fra-
tres Domini sint appellati, communi ceterorum hominum more
genuisse. Infantem hunc hereticum, motiq. capitis hominem,
secuti sunt aliqui deinde infantiores, amentioresque, qui modo
Heluidiani, ab auctore, modo Antidicomariani, ueluti Mariæ
uirginis aduersarij, dicti sunt. Hunc errorem confutat nunc
D. Hieronymus, & heretici libri ineptias nō minus accurata fa-
cundia, quā docta, eruditaq. oratione, ingulat, atque cōfodit.

HIERON. ADVERSVS HELVIDIVM,

de perpetua uirginitate beatæ Mariæ.

VPER rogatus a fratribus, ut aduersus libellum
N cuiusdam Heluidii responderem; facere distuli; nō
quod difficile fuerit, hominem rusticanum, & nix
primis quoque imbutum litteris super ueri assertionem con-
Ff 2 uincere;

vincere; sed ne, respondendo, dignus fieret, qui uinceretur. Huc accedebat, quod uerebar, ne homo turbulentus, & solus in uniuerso mundo simul & laicus & sacerdos, qui, ut ait ille, loquacitatem facundiam existimat; & maledicere omnibus, bonæ conscientie signum arbitratur; accepta materia disputandi, amplius inciperet blasphemare, & quasi de sublimi loco in totum orbem ferre sententiam; meque, quia ueritate non posset, laceraret conuiciis. Verum, quia hæc omnes tam iustæ silentii mei causæ, ob scandalum fratrum, qui ad eius rabiem mouebantur, iustiori fine cessarunt: iam ad radices infructuosæ arboris euangelii securis est admouenda, & cum infœcunditate foliorum tradenda flammis: ut discat aliquando reticere, qui numquam didicit loqui. Igitur sanctus mihi inuocandus est spiritus, ut beatæ Mariæ uirginitatem, suo sensu, ore meo defendat. Inuocandus & dominus Iesus, ut sacri uentris hospitium, cuius nouem mensibus inhabitator fuit, ab omni concubitus suspitione tueatur. Ipse quoque Deus pater est imprecandus, ut matrem filii sui uirginem ostendat fuisse post partum, quæ fuit mater ante, quam nupta. Non rhetorici campum desideramus eloquii; non dialecticorum tendiculas, nec Aristotelis spineta conquirimus: ipsa scripturarum uerba ponenda sunt; ut ipsis, quibus aduersum nos usus est, testimoniis reuincatur: ut intelligat se & legere potuisse, quæ scripta sunt, & non potuisse, quæ pietate roborata sunt, cognoscere. Prima eius propositio fuit: Matthæus loquitur: Christi autem generatio sic erat: Cum esset desponsata mater eius Maria Ioseph, priusquam conuenirent, inuenta est habens in utero de spiritu sancto: Ioseph autem, uir eius, cum esset iustus, & nollet eam traducere, uoluit occulte dimittere eam. Hæc autem eo cogitante, ecce angelus Domini in somnis apparuit ei, dicens Ioseph, fili David, ne timeas accipere Mariam coniugem tuam. quod enim natum est in ea, de spiritu sancto est. Ecce, inquit, habes desponsatam, non commendatam, ut dicis; & utique nō ob aliud desponsatam, nisi quandoque nupturam. neque enim de non

non conuenturis euangelista dixisset: Prius quam conuenirent: quia nemo de non pransuro dicit, antequam pranderet. Deinde ab angelo uxorem appellatam, & coniunctam. Audiamus nunc, quid scriptura pronunciet. Exurgens, inquit, Ioseph a somno, fecit sicut præceperat ei angelus Domini; & accepit uxorem suam; & non cognouit eam, donec peperit filium suum. Curramus per singula; & impietatem eisdem, quibus ingressa est, uestigiis persequentes, pugnantia inter se dixisse doceamus. Desponsatam confiteatur; & statim uxorem uult esse, quam cōfessus est sponsam. Rursum, quam uxorem nominat, dicit non ob aliud desponsatam, nisi quandoque nupturam. Et ne parum hoc arbitremur: habes, inquit, desponsatam, non commendatam, id est, necdum uxorem, necdum maritali uinculo copulatam. In eo uero, quod ait: Neque enim de non conuenturis euangelista dixisset: Prius quam conuenirent: quia nemo de non pransuro dicit, Antequam pranderet: doleam ne, an rideam, nescio; imperitiæ arguam, an temeritatis accusem. Quasi, si quis dixerit; ante quam in portu pranderem, ad Africam nauigauim; non possit stare sententia, nisi ei in portu prandendum quandoque sit. aut, si uelimus dicere: Paulus apostolus, ante quam ad Hispanias pergeret, Romæ in uincula coniectus est: aut certe illud: Heluidius, antequam pœnitentiam ageret, morte præuentus est: statim aut Paulo post uincula ad Hispanias sit eundum; aut Heluidio pœnitentia agenda post mortem; cum scriptura dicat: In inferno autem quis confitebitur tibi? ac non potius sit intelligendum, quod, Ante, præpositio, licet sæpe consequentia indicet, tamen nonnumquam ea tantum, quæ prius cogitabantur, ostendat. Vnde nec necesse sit, ut cogitata fiât, cum aliud ideo interuenerit, ne ea, quæ cogitata sunt, fierent. Igitur cum euangelista dicat, Priusquam conuenirent, proximum nuptiarum tempus ostendit, & in eo iam rem fuisse, ut, quæ prius sponsa fuerat, esse uxor inciperet. quasi dixerit: ante quam oscula, amplexusque miscerent; antequam rem agerent nuptiarum; inuenta est habens in ute-

*Psal. 6**Matth. 1*

Ff 3 ro.

ro. inuenta est autem a nullo alio, nisi a Ioseph: qui sponsæ uterum tumentem pene iam licentia maritali, & curiosis oculis deprehendit. Non tamen sequitur, ut prioribus docuimus exemplis, eum cum Maria conuenisse post partum, cuius conueniendi desiderium uteri cōceptione sublatum est. Quod autem in somnis dicitur ad Ioseph: Ne timeas accipere Mariam uxorem tuam: Et rursum: Exurgens autem Ioseph a somno, fecit sicut præcepit ei angelus Domini; & accepit uxorem suam: nullum mouere debet, quasi ex eo, quod uxor est appellata, sponsa esse desierit: cum hanc esse scripturæ diuinæ consuetudinem nouerimus, ut sponsas appellet uxores: sicut sequentibus Deuteronomii testimoniis approbatur: Si quis, inquit, inuenerit

Deut. 22 uirginem desponsatam uiro in campo; & uim faciens dormierit cum ea; morte moriatur: quia humiliavit uxorem proximi sui. Et in alio loco: Si autem fuerit adolescentula desponsata uiro; & inuenerit homo eam in ciuitate; & dormierit cum ea; educetis utrumque ad portā ciuitatis illius; & lapidabuntur lapidibus, & morientur; adolescentula quidem, quia non proclamauit, cum esset in ciuitate; uir autem, quia humiliavit uxorem proximi sui: & eradicabitis malum ex uobismet ipsis. Necnon & alibi: Et quis est ille homo, cui desponsata est uxor, & non accepit eam? Vadat, & reuertatur in domum suam: ne forte moriatur in bello, & forte homo alius accipiat eam. Si cui autem scrupulus commouetur, quare desponsata, & non potius sine sponso, siue, ut scriptura appellat, marito uirgo conceperit: sciat triplicem fuisse rationem: primo, ut per genealogiam Ioseph, cui Maria cognata erat, origo quoque Mariæ monstraretur: secundo, ne, iuxta legem Moyse, ut adultera lapidaretur a populo: tertio, ut ad Aegyptum fugiens, haberet solatium custodis potius, quam mariti. Quis enim in tempore illo uirgini credidisset, de sancto eam spiritu cōcepisse, uenisse ad eam angelum Gabrielem, Dei detulisse mandatum; ac non magis, quasi adulteram, iuxta exemplū

Deut. 20 Susannæ sententiæ omnium condemnassent: cum hodie, toto

toto iam credente mundo, argumententur Iudæi, Esaiâ do
 cente de Maria & uirginitate eius: Ecce uirgo in utero con-
 cipiet, & pariet filium: in Hebræo iuenculam scriptum
 esse, non uirginem, idest, halma, non bethula? Aduersus
 quos in alio loco competentius differemus. Denique, ex-
 cepto Ioseph, & Elizabet, & ipsa Maria, paucisq. admo-
 dum, si quos ab his audisse possumus existimare, omnes Ie-
 sum filium existimabant Ioseph: intantum, ut etiam euan-
 gelistæ, opinionem uulgi exprimentes, quæ uera historiæ
 lex est, patrem eum dixerint saluatoris: ut ibi: Et uenit in
 spiritu in templum: haud dubium, quin Simeon. Et cum
 inducerent puerum Iesum parentes eius, ut facerent de illo
 secundum consuetudinem legis. Et alibi: Et erant pater il-
 lius & mater admirantes super iis, quæ dicebantur de eo.
 Et rursum: Et ibant parentes eius per annum in Hierusa-
 lem in sollempni die Paschæ. Ac deinde: Et, completis die-
 bus cum reuerterentur, remansit puer Iesus in Hierusalem,
 & non cognouerunt parentes eius. Ipsa quoque Maria,
 quæ ad Gabrielem responderat, dicens: Quo modo fiet
 hoc, quia uirum non cognosco? quid de Ioseph loquatur,
 ausculta: Fili, quid fecisti nobis sic? Ecce pater tuus & ego
 dolentes quærebatuſ te. Non enim hæc Iudæorum, ut ple-
 riſque argumentantur, non illudentium uox est. Euangeli-
 stæ patrem Ioseph dicunt, patrem Maria confitetur: non
 quod, ut superius indicauimus, uere pater Ioseph fuerit salua-
 toris: sed quod, ad famam Mariæ conseruandam, pater sit
 ab omnibus existimatus: qui antequam moneretur ab an-
 gelo: Ioseph fili Dauid, ne timueris accipere Mariâ coniu-
 gem tuâ: quod enim in ea natû est, de spiritu sancto est: cõ-
 gitabat occulte dimittere eam: intantû suum non esse, qui
 cõceptus fuerat, cõfidebat. Sed iam satis docēdi magis, quā
 respondendi studio disputatû est, cur Ioseph pater Domini,
 cur Maria appellata sit coniux: in quo et hoc breuiter conti-
 netur, cur fratres eius quidam esse dicantur. Verum quia
 suum locum huic quæstiunculæ reseruamus, & ad reliqua fe-
 stinat oratio: nunc illud est differendum, quo modo scri-

Esai. 7

Luc. 2

Luc. 1

Luc. 2

Matth. 1

Ff 4 ptura

ptura dicat: Exurgens autem Ioseph a somno, fecit sicut praecepit ei angelus Domini; & accepit uxorem suam; & non cognouit eam, donec peperit filium, & uocauit nomē eius Iesum. In quo primum aduersarius superfluo labore desudat, cognoscendi uerbum ad coitum magis, quam ad scientiam esse referendum: quasi hoc quisquam negauerit, & eas ineptias, quas redarguit, aliquando prudens quispiā potuerit suspicari. Deinde uult docere, quod, Donec, siue, Usque, aduerbia certum tempus significant; quo completo, fiat id, quod usque ad illud temporis, quod praescriptum est, non fiebat, uelut in praesenti: Et non cognoscebat eam, donec peperit filium. Apparet, inquit, cognitam esse post partum, cuius cognitionem filii tantum differebat generatio. Et ad hoc approbandum congerit de scripturis exempla quamplurima, more Andabatarum gladium in tenebris uentilans, & linguae sonum ad confodienda sui tantum corporis membra concutiens. Ad quod nos breuiter respondemus: & Cognoscebat, & Donec, & Usque, ad sermonem in scripturis sanctis dupliciter intelligi. Et de eo quidem, quod scriptum est, Cognoscebat, ad coitum esse referendum; ipse dissert, nullo dubitante, quin ad scientiā

Luc.2 saepe referatur, ut ibi remansit puer Iesus in Hierusalem, & non cognouerunt parentes eius. Nunc illud est ostendendum, ut, quo modo ibi consuetudinem scripturae secutus est, sic etiam in, Donec, eiusdem scripturae auctoritate frāgatur: quae saepe certum tempus, ut ipse dissert, in eius assumptione significat, saepe infinitum, ut est illud, quod

Hier.7 Deus ad quosdam loquitur in prophetis: Ego sum, ego

Esa.46 sum: & donec senescatis, ego sum. Numquid, postquam illi senuerint, Deus esse desisset? Et saluator in euangelio ad

Matth.28 apostolos, Ecce ego, inquit, uobiscum sum omnibus diebus, usque ad consummationem saeculi. Ergo, post consummationem saeculi, a discipulis suis Dominus abscedet;

Luc.21 & tunc, quando in duodecim foliis iudicaturi sunt duodecim tribus Israel, Domini consortio fraudabuntur? Paulus

1. Cor.15 quoque apostolus Corinthiis scribens, Primitiae, ait, Christus:

stus: deinde ii, qui sunt Christi, qui in aduentu eius crediderunt: deinde finis, cum tradiderit regnum Deo, & patri, cum deltruxerit omnem principatum, & omnem potestatem, & uirtutem. oportet enim illum regnare, donec ponat omnes inimicos sub pedibus eius: omnia enim sub pedibus eius subiecit. Esto, de homine dictum sit; non negamus; de eo, qui passus est crucem, qui postea sedere iubetur a dextris: quid sibi uult hoc, quod ait: Oportet enim illum regnare, donec ponat omnes inimicos sub pedibus eius? Numquid tamdiu regnaturus est Dominus, donec incipiant esse inimici sub pedibus eius; &, postquam illi sub pedibus fuerint, regnare desistet; cum utique tunc magis regnare incipiet, cum inimici coeperint esse sub pedibus? Dauid quoque in quarto graduum psalmo, Sicut oculi ancil- *Psal. 122*
læ, ait, in manibus dominæ suæ, ita oculi nostri ad dominum Deum nostrum, donec misereatur nostri. Ergo tamdiu propheta oculos habebit ad Dominum, quādiu misericordiam impetret, & post impetratā misericordiam oculos torquebit in terram? Qui in alio loco dicit: Oculi mei defecerunt in salutare *Psal. 118*
tuum, & in uerbum iustitiæ tuæ. Poterā super hoc innumera bilia exēpla congerere, & omnem lacescentis procacitatem testimoniorum nube celare: uerum adhuc pauca subiiciam, ut his similia ipse sibi lector inueniat. Loquitur in Genesi sermo diuinus: Et tradiderunt Iacob deos alienos, qui erant in *Gen. 35*
manibus eorum, & in aures, quæ erant in auriculis eorum. Et abscondit ea Iacob subter terebinthum, quæ est in Sichimis, & perdidit ea usque in hodiernum diem. Item in fine Deuteronomii: Et defunctus est Moyses, seruus Domini, in terra *Deut. 34*
Moab per uerbum Domini, & sepelierunt eum in Gethi prope domum Phegor, & nemo scit sepulcrum eius usque in diem istum. Certe hodiernus dies illius temporis existimandus est, quo historia ipsa contexta est. siue Moysen dicere uolueris, auctorem Pentateuchi, siue Esdram, eiusdem instauratorem operis, non recuso. nunc hoc queritur, an id, quod dictum est, Usque in diem istum, ad illam referatur ætatem, qua libri editi, siue conscripti sunt. Do-
ceat

ceat igitur, post illam diem tot iam annorum usque ad nos uoluminibus exactis, aut idola, quæ sub terebintho condita fuerant, reperta, aut Moyſi tumulum inuestigatum: quia obnixè aſſerit, post donec & usque eſſe incipere, quod tamdiu non fuit, quamdiu usque compleretur & donec. quin potius animaduertat scripturæ sanctæ idioma; & nobiscū, in quo hæſitabat, intelligat ea, de quibus posset ambigi, si non fuissent scripta, signari; cetera uero nostræ intelligentiæ derelinqui. Si enim adhuc recenti tempore, uidentibus iis, qui uiderant Moyſen, sepulcrum eius potuit ignorari: multo magis, tot sæculis prætereuntibus. Iuxta quod & illud intelligitur de Ioseph, euangelistam id indicasse, de quo scandalum poterat moueri, non eam cognitam eſſe a uiro suo usque ad partum: ut multo magis intelligeremus, cognitam non fuisse post partum, a qua tunc se abſtinuit, cum adhuc de uisione poterat fluctuare. Ad summam, illud requiro, quare se abſtinuerit Ioseph usque ad partus diem. Respondebit utique, quia angelum audierat dicentem: Quod enim in ea natum eſt, de spiritu sancto eſt. Ad quod nos inferimus: Et certe audierat: Ioseph fili Dauid, ne timeas accipere Mariam uxorem tuam. Prohibitum ei fuerat, ne relinqueret, ne adulteram existimaret uxorem: numquid & a congressu coniugis separatus fuerat, cum utique, ne separaretur, magis fuisset admonitus? Et audebat, inquit, uir iustus, Dei in utero audiens filium, de uxoris coitu cogitare? Pulchre. qui ergo somnio tantum credidit, ut uxorem non auderet attingere; is postquā pastorum uoce cognouerat angelum Domini uenisse de cælis, & dixisse ad eos: Nolite timere: Ecce euangelizo uobis gaudium magnum, quod erit omni populo: quia natus eſt uobis hodie ſaluator, qui eſt Chriſtus dominus in ciuitate Dauid: & cum eo laudes militiæ concinuisse cælestis: Gloria in excelsis Deo, & in terra pax hominibus bonæ uoluntatis: qui Symeonem Iustum inter amplexus paruuli uiderat prædicantem: Nunc dimittis ſeruum tuum Domine ſecundum uerbum tuum in pace: quia uiderunt oculi mei ſalutare

*Luc. 2**Matth. 2*

Iutare tuum : qui Annam prophetissam , Magos , stellam ,
Herodem , angelos uiderat : qui , inquam , miracula tanta
cognouerat , Dei templum , spiritus sancti sedem , Domi-
ni sui matrem audebat attingere ? Et certe Maria conserua- *Luc. 2*
bat omnia uerba hæc , conferens in corde suo . Ac ne impu-
denter neges ista ignorasse Ioseph : Et erant , inquit Lucas ,
pater illius & mater admirantes super his , quæ dicebantur
de eo . Licet tu mira impudētia hæc in Græcis codicibus fal-
sata contendas , quæ non solum omnes pene Græciæ tracta-
tores in suis uoluminibus reliquerunt , sed nonnulli quoque
e Latinis , ita ut in Græcis habentur , assumpserint . nec ne-
cesse est nūc de exemplariorum uarietate tractare ; cū omne
& ueteris , & nouæ scripturæ instrumentum in Latinum ser-
monem exinde translatus sit ; & multo purior manare cre-
denda sit fontis unda , quam riui . Hæc , ais , apud me nu-
gæ sunt , & argumentationes superflue , & disputatio ma-
gis curiosa , quam uera . Numquid non potuit scriptura
dicere : & accepit uxorem suam , & non fuit amplius ausus *Gen. 38*
contingere eam : sicut de Thamar dixit & Iuda ? aut defue-
runt Matthæo uerba , quibus id , quod intelligi uolebat ,
posset effari ? Non cognouit , inquit , eam , donec peperit *Matth. 1*
filium . Post partum ergo cognouit , cuius cognitionem ad
partum usque distulerat . Si tam contentiosus es , iam nunc
tua mente superaberis . Nolo mihi aliquod inter partum &
coitum tempus interferas . Nolo dicas , mulier , quæcum-
que concepit , & peperit masculum , immunda erit septem *Leuit. 12*
diebus , secundum dies secessionis & purgationis suæ im-
munda erit ; & octauo die circumcidet carnem præputii
eius ; & trigintatribus diebus sedebit in sanguine puro ; &
omne sanctum non tanget : & reliqua . Statim eam inuadat
Ioseph : statim audiat per Hieremiam : Equi insanientes in *Hier. 5*
feminas facti sunt mihi : unusquisque ad uxorem proximi
sui hinniebat . Alioqui quo modo stare poterit : Non co-
gnouit eam , donec peperit filium : si post purgationis tem-
pus expectat ; si quadraginta rursus diebus tanto tempore
dilata libido differtur ? Polluatur cruore puerpera : obste-
trices

- trices suscipiant paruulum uagientem : maritus lassam teneat uxorem . Sic incipiant nuptiæ , ne euangelista mentitus sit . Sed absit , ut hoc de matre saluatoris , & uiro iusto sit existimandum . Nulla ibi obstetrix : nulla mulierculari se dulitas intercessit : ipsa pannis inuoluit infantem : ipsa &
- Luc.2** mater , & obstetrix fuit : Et collocauit eum , inquit , in præsepio , quia non erat ei locus in diuersorio . Quæ sententia & apocryphorum deliramenta conuincit , dum Maria ipsa pannis inuoluit infantem ; & Heluidii expleri non patitur uoluptatem , dum in diuersorio locus non fuit nuptiarum . Verum , quia iam satis abundeq. respondimus ad id , quod proposuerat : Ante quam conuenirent , & non cognouit eam donec peperit filium : ad tertiam ueniendum est questionem , ut , iuxta disputationis eius ordinem , etiam nostræ responsionis ordo procedat . Vult enim alios quoque filios Mariam procreasse : & ex eo , quod scriptum est : Ascendit autem Ioseph in ciuitatem Dauid , ut profiteretur cum
- Luc.2** Maria desponsata sibi uxore , prægnante : Factum est autem cum ibi essent , impleti sunt dies ut pareret , & peperit filiū suum primogenitum : nititur approbare , primogenitum nō posse dici , nisi eum , qui habeat & fratres : sicut unigenitus ille uocatur , qui parentibus solus sit filius . Nos autem ita definimus : Omnis unigenitus est & primogenitus : non omnis primogenitus est unigenitus . primogenitus est non tantum post quem & alii , sed ante quem nullus . Omne ,
- Num.18** inquit Dominus ad Aaron , quod aperit uulnam ab omni carne , quæ offertur Domino , ab homine usque ad pecus , tibi erunt : tantummodo pretiis redimant primogenita hominum , & primogenita pecorum immundorum . Definuit sermo Dei , quid sit primogenitum : Omne , inquit , quod aperit uulnam . Alioqui , si non est primogenitus , nisi is tantum , quem sequuntur fratres ; tamdiu sacerdotibus primogenita non debentur , quamdiu & alia fuerint procreata ; ne forte , partu postea non sequente , unigenitus sit , & non primogenitus . Redemptio , inquit , eius erit ab uno mense , æstimatio quinque siclorum . Siclus , secundum siclum sanctuarii ,

Etuarii, uiginti oboli sunt. Tantummodo primogenita uitorum, & primogenita ouium, & primogenita caprarum non redimes, quia sancta sunt. Cogit me sermo Dei, ut omne masculinum, quod aperit uuluum, si de mundis animalibus sit, deo uoueam, si de immundis, redimam, dās pretium sacerdoti. Possum respondere, & dicere: Quid me in unius mensis stringis articulo? Quid primogenitum uocas, quem an fratres sequantur, ignoro? Expecta donec nascatur secundus. Nihil debeo sacerdoti, nisi & ille fuerit procreatus, per quem is, qui ante natus est, incipiat esse primogenitus. Nonne mihi ipsi apices loquentur, & me stultitiæ redarguent, eum esse dictum primogenitum, qui aperiat uuluum non qui habeat & fratres? Denique interrogo de Ioanne, quem constat esse unigenitum, an & primogenitus fuerit? utrum ne & ipse, secundum legem, pro toto ei legi fuerit obnoxius? ambigi non potest. Certe de saluatore scriptura sic loquitur: Cum expleti essent dies purgationis eorum, secundum legem Moyfi, duxerunt eum in Hierusalem, ut offerrent eum Domino: sicut scriptum est in lege Domini: Quia omne masculinum adaperiens uuluum, sanctum Domino uocabitur: & ut darent hostias, secundum quod dictum est in lege Domini, par turturum, aut duos pullos columbarum. Si hæc lex tantum ad primogenitos pertinet, primogenitum autem sequentes faciunt; non debuit lege primogeniti teneri, qui de sequētibz ignorabat: sed quia tenetur lege primogeniti etiam ille, quem fratres ceteri non sequuntur; colligitur, eum primogenitū uocari, qui uuluum aperiat, & ante quem nullus sit, non eum, quem frater post genitus subsequatur. Moyses scribit in Exodo: Factum est autem circa mediam noctem, & Dominus percussit omne primogenitum in terra Aegypti, a primogenito Pharaonis, qui sedebat super thronum eius, usque ad primogenitum captiuae, quæ est ad lacum, & omne primogenitum pecoris. Responde mihi: Qui tunc ab exterminatore fuerant interempti, primogeniti fuerunt, an & unigeniti? si primogeniti tantum illi uocantur, qui fratres

Luc. 2

Exod. 13

Leuit. 12

Exo. 12

tres habent: ergo ab interemptione unigeniti liberati sunt. si autem & unigeniti cæsi sunt: contra sententiam factum est, ut inter primogenitos & unigeniti morerentur. aut unigenitos liberabis a pœna, & ridiculus eris: aut, si confiteberis interfectos, ingratis obtinebimus, & unigenitos primogenitos appellari. Extrema propositio fuit, (licet id ipsum in primogenito uoluerit ostendere) fratres Domini in euangelis nominari, ut ibi: Ecce mater eius & fratres eius stabant foris, quærentes loqui cum eo. Et alibi: Post hæc descendit Capharnaum ipse & mater eius, & fratres eius. Et ibi: Dixerunt ergo fratres eius ad eum: Trāsi hinc, & uade in Iudæam, ut & discipuli tui uideant opera tua, quæ facis. Nemo enim aliquid in occulto faciens, quærit ipse in palam esse. Si hæc facis, manifesta te ipsum mundo. Ioanne desuper inferente: Neque enim fratres eius tunc credebant in eum. Item Marcus, & Matthæus: Et docebat eos in synagoga eorum in patria sua, ita ut stuperent, & dicerent: Vnde huic omnis hæc sapientia, & uirtutes? Nonne hic est fabri filius? nonne mater eius dicitur Maria, & fratres eius Iacobus, & Ioses, & Simon, & Iudas, & sorores eius omnes apud nos sunt: Lucas quoque in Actibus apostolorum ita refert: Hi omnes erant instantes unanimes in oratione cum mulieribus, & Maria matre Iesu, & fratribus ipsius. Necnō & Paulus apostolus in eadem historię ueritate pari uoce concordat: Ascendi autem secundum reuelationem, & neminem uidi apostolorum nisi Petrum, & Iacobum, fratrem Domini. Et rursum in alio loco: Numquid non habemus potestatem manducandi, & bibendi? Numquid non habemus potestatem mulieres circumducendi, sicut & ceteri apostoli, & fratres Domini, & Cephas? Et ne forte aliquis Iudæorum testimonium non admitteret, qui etiam nomina fratrum illius ediderunt, simili eos asserens in fratribus errore deceptos, quo in patre æstimando sunt lapsi: argute præcauit, & ait, hæc eadem uocabula ab euangelistis in alio loco nominari, & eosdem esse fratres Domini filios Mariæ. Matthæus loquitur: Erant autem ibi (haud dubium,

dubium, quin ante crucem Domini) & mulieres multæ a longe spectantes, quæ secutæ fuerant Iesum a Galilæa, ministrantes illi : inter quas erant Maria Magdalene, & Maria Iacobi, & Iosetis mater, & mater filiorum Zebedæi . Item Marcus : Erant autem & mulieres a longe aspicientes, inter *Mar. 15* quas erant Maria Magdalene, & Maria Iacobi minoris, & Iosetis mater, & Salome : Ibiq. post modicū : Et aliæ multæ, quæ ascenderant cum eo in Hierusalem . Necnon & Lucas : Erant autem Maria Magdalene, & Ioanna, & Maria Iacobi, & ceteræ cum eis . Hæc iccirco replicauimus, ne calumniatur, & clamitet, ea, quæ pro se faciant, a nobis esse subtracta, & sententiam suam non testimoniis scripturarum, sed lubrica disputatione conuulsam : Ecce, inquit, Iacobus, & Ioses, filii Mariæ, quos Iudæi fratres appellauerunt . Ecce Maria Iacobi minoris, Iosetis mater . Minoris *Mar. 15* autem Iacobi, ad distinctionem maioris, qui erat filius Zebedæi : sicut & in alio loco Marcus ponit : Maria autem Magdalene, & Maria Iacobi, & Iosetis, uiderunt ubi poneretur, & transacto sabbato, emerunt aromata, & uenerunt ad monumentum . Et utique ait : Quam miserum erit, & impium, de Maria hoc sentire, ut, cum aliæ feminæ curam sepulturæ Iesu habuerint, matrem eius dicamus absentem : aut alteram esse Mariam, nescio quam, confingamus : præsertim cum euangelium Ioannis testetur præsentem eam illic fuisse, quando illam de cruce Dominus iam uiduam, ut *Ioan. 19* matrem Ioanni commendabat . Aut numquid euangelistæ & falluntur, & fallunt, ut eorum Mariam matrem dicerent, quos Iudæi fratres Iesu esse dixerunt ? O furor cæcus, & in proprium exitium mens uesana . Dicis, ad crucem Domini matrem eius fuisse præsentem : dicis, Ioanni discipulo ob uiduitatem & solitudinem commendatam ; quasi iuxta te non haberet quattuor filios, & innumeras filias, quarum cōsortio frueretur . Viduam quoque nominas : quod scriptura non loquitur . Et cum omnium euangelistarum exempla proponas, solius tibi Ioannis uerba non placent . Dicis, trāsitorie ad crucem Domini eam fuisse præsentem ; ne cōsul-

to

- to præterisse uidearis : & tamen , quæ cum illa mulieres fuerint , files . Ignoscerem nescienti , nisi uiderem consulto re-
- Ioan. 19.** timentem . Audi itaque , Ioannes quid dicat : Stabant autem iuxta crucem Iesu mater eius , & soror matris eius Maria Cleophe , & Maria Magdalene . Nulli dubium est , duos fuisse apostolos , Iacobi uocabulo nuncupatos , Iacobum Zebedæi , & Iacobum Alphæi . Istum nescio quem minorem Iacobum , quem Mariæ filium , nec tamen matris Domini , scriptura commemorat , apostolum uis esse , an non ? Si apostolus est , Alphæi filius erit , & credidit in Iesum , &
- Ioan. 7.** non erit de illis fratribus , de quibus scriptum est . Neque enim fratres eius credebant in eum . Si non est apostolus , sed tertius nescio quis Iacobus : quo modo est frater Domini putandus ? & quo modo tertius ad distinctionem maioris appellabitur minor ? cum maior & minor non inter tres , sed inter duos soleant præbere distantiam , & frater Domini apostolus sit , Paulo dicente : Deinde post triennium ueni Hierusalem uidere Petrum , & mansi apud illum diebus quindécim . alium autem apostolorum uidi neminem , nisi Iacobum , fratrem Domini . Et in eadem epistola : Et cognita gratia , quæ data est mihi , Petrus , & Iacobus , & Ioannes , qui uidebantur columnæ esse . Ne autem hunc putes Iacobum filium Zebedæi , lege Actus apostolorum . Iam ab Herode fuerat interemptus . Restat conclusio , ut Maria ista , quæ Iacobi minoris scribitur mater , fuerit uxor Alphæi , & soror Mariæ , matris Domini , quam Mariam Cleophe Ioannes euangelista cognominat , siue a patre , siue a gentilitate familiæ , aut quacumque alia causa ei nomē imponens . Si autem inde tibi alia atque alia uidetur , quod alibi dicatur : Maria Iacobi minoris mater , & hic Maria Cleophe : discere scripturæ consuetudinem , eundem hominem diuersis nominibus nūcupari . Raguel socer Moyse & Iethro dicitur . Gen. 31. 40. Iud. 6. 1. to Hieroboal legitur . Ozias rex Iuda uicissim Azarias uocatur . 4. Reg. 14. 2. 2. Par. 26. Mons Tabor Itabyrium dicitur . Rursum Hermon Phœnices cognominant Sanior , & Amorraeus cognominat eum

eū Sanir . Eadem celi plaga tribus nominibus appellatur ,
 Nageb, Theman, Darom . Lege Ezechielem . Petrum & Si
 mon dicitur , & Cephas . Iudas zelotes , in alio euangelio
 Thaddæus dicitur : multa q. alia , quæ ad exemplum horum
 pertinent , ipse sibi de omnibus scripturis lector poterit con
 gregare . Nunc illud est , quod conamur ostenderæ , quemad-
 modū fratres Domini appellentur , filii materteræ eius Ma-
 riæ ; qui antea non credentes , postea crediderunt . Licet fie-
 ri potuerit , ut , uno statim credente , alii diu increduli fue-
 rint ; & hanc fuisse matrem Iacobi , & Iosetis , idest Mariam
 Cleophe , uxorem Alphæi ; & hanc dictam Mariam Iacobi
 minoris . Quæ si esset mater Domini ; magis eam , ut in o-
 mnibus locis , matrem illius appellasset ; & non , aliorum
 dicendo matrem , alterius uoluisset intelligi . Verum in hac
 parte contentiosum funem non traho . alia fuerit Maria
 Cleophe , alia Maria Iacobi , & Iosetis , dummodo constet ,
 non eandem Mariam Iacobi , & Iosetis esse , quam matrem
 Domini . Et unde , ais , fratres Domini dicti sunt , qui non
 erant fratres ? Iam nunc doceberis , quattuor modis in scri-
 pturis diuinis fratres dici , natura , gente , cognatione , affe-
 ctu : Natura , Esau , Iacob , duodecim patriarchæ , Andreas
 & Petrus , Iacobus , & Ioannes : Gente , qua omnes Iudæi
 inter se fratres uocantur : ut in Deuteronomio : si autem
 emeris fratrem tuum , qui est Hebræus , uel quæ est He-
 bræa , seruiet tibi sex annis : & septimo anno dimittes eum
 liberum abs te . Et in eodem : Constituendo contitues su-
 per te principem , quem elegerit Dominus Deus tuus , eū ,
 qui ex fratribus tuis sit . Non enim poteris constituere su-
 per te hominem alienigenam , quia non est frater tuus . Et
 rursum : Ne , uiso uitulo fratris tui , uel oue eius errantibus
 per uia , negligas ea : reuersione reduces ea fratri tuo . Quod
 si non appropinquat tibi frater tuus , neque noueris eum :
 colliges ea intra domum tuam ; & erūt tecum , donec quæ-
 rat ea frater tuus ; & reddes ei . Et apostolus Paulus , Opta-
 bam , inquit , ego ipse anathema esse a Christo pro fratri-
 bus meis , cognatis secundum carnem , qui sunt Israelitæ .

Exech. 47.48

Ioan. 1

Luc. 6

Matt. 10

Deut. 15

Deut. 17

Deut. 22

Rom. 9

G g Porro

Porro cognatione fratres uocantur, qui sunt de una familia, idest πατρία: quod Latini paternitate interpretantur: cum ex una radice multa generis turba diffunditur, ut in Gene-

Gen. 13 si. Dixit autem Abraham ad Lot: Non sit rixa inter me, & te: inter pastores meos, & pastores tuos: quia fratres nos sumus: Ibiq. Et. elegit sibi Lot regionem Iordanis: & eleuauit Lot ab Oriente: & discesserunt unusquisque a fratre suo. Et certe Lot non est frater Abraham, sed filius fratris

Gen. 11 eius Aram. Thara quippe genuit Abraham, & Nachor, &

Gen. 12 Aram: & Aram genuit Lot. Et rursum: Abraham autem erat annorum septuagintaquinque, cum exiret de Charan. Et sumpsit Abraham Saram uxorem suam, & Lot filiū fratris sui. Quod si adhuc dubitas, fratrem, fratris filium nuncupari: accipe exemplum. Cum autem audisset Abraham,

Gen. 14 quia captiuus ductus est Lot frater suus; numerauit uernaculos suos trecentos decem & octo. Et cum eadem nocturni impetus descripisset, adiecit: Et reduxit omnem equitatum Sodomorum, & Lot fratrem suum reuocauit. Sufficiebant hæc ad ea, quæ diximus, approbanda. Sed, ne in aliquo canilleris; & te quasi lubricus anguis enolias: testimoniorum stringendus es uinculis; ne querulus sibilis, & dicas te magis argumentationibus tortuosis, quam scripturarum ueritate superatum. Iacob, Isaac filius ac Rebecce, cum fratris insidias metuens Mesopotamiam perrexisset, accessit & deuoluit lapidem ab ore putei, & adaquauit oues Laban, fratris matris suæ: & osculatus est Iacob Rachel: & ex

Gen. 29 clamans uoce sua plorauit: & indicauit Rachel, quia frater est patris eius: & quia filius Rebecce est. Ecce & hic eadē lege, qua supra, frater sororis filius appellatur. Et iterum: Dixit autem Laban ad Iacob: Quoniam frater meus es, nō seruius mihi gratis: Dic mihi, quæ sit merces tua. Expletis

Gen. 31 itaque uiginti annis, cū, ignorante socero, uxoribus filiisq. comitatus reuerteretur ad patriam, consecutus est eum Laban in monte Galaad. & cū idola, quæ Rachel occultabat, quæsitā non inuenisset in sarcinis; respondit Iacob, & dixit ad Laban: Quæ culpa mea est, & quod delictum meum, quod

quod persecutus es me? & quare scrutatus es omnia uasa mea? quid inuenisti de omnibus rebus tuis? Pone hic in cōspectu fratrum tuorum & fratrum meorum: & redarguent inter nos duos. Responde, qui sint isti fratres Iacob & Laban, qui tunc fuerant in præsenti. Esau certe frater Iacob absens erat, & Laban filius Bathuel, fratres, excepta sorore Rebecca, non habuit. Innumerabilia sunt istiusmodi, libris inserta diuinis. sed, ne longum faciam: ad extremam diuisionis partem reuertar: idest, & affectu fratres dici, qui in duo scinditur, in spiritale, & in commune. In spiritale, quia omnes Christiani fratres uocamur, ut ibi: Ecce quam bonum, & quam iucundum, habitare fratres in unum. Et in alio psalmo saluator, Narrabo, inquit, nomen tuum fratribus meis. Et alibi: Vade, dic fratribus meis. Porro In cōmune, quia omnes homines ex uno patre nati, pari inter nos germanitate coniungimur. Dicite, ait, iis, qui oderunt uos, Fratres nostri estis. Et Apostolus ad Corinthios: Si quis frater nominatur fornicator, aut auarus, aut idolis seruans, aut maledicus, aut ebriosus, aut rapax, cum eiusmodi nec cibum sumere. Et cetera his similia. Interrogo nūc, iuxta quem modum fratres Domini in euangelio intelligas appellari. Iuxta naturam? Sed scriptura non dicit, nec Mariæ eos uocans filios, nec Ioseph. Iuxta gentem? Sed absurdum est, ut pauci ex Iudæis uocati sint fratres: cum omnes, qui ibi erant hac lege Iudæi, fratres potuerint appellari. Iuxta affectum humani iuris, ac spiritus? Verum, si sic; qui magis fratres, quam apostoli, quos docebat intrinsecus, quos matres uocabat, & fratres? Aut, si omnes, quia homines, fratres; stultum fuit nunciari, quasi proprium: Ecce fratres tui querentes te: cum generaliter omnes homines hoc iure sint fratres. Restat igitur, ut iuxta superiorem expositionem, fratres eos intelligas appellatos cognitione, non affectu, non gentis priuilegio, non natura: quo modo Lot Abrahæ, quo modo Iacob Laban est appellatus frater: quo modo & filiæ Salphaad accipiunt clerum inter fratres suos: quo modo & Abraham ipse Saram sororem

Psal. 132

Psal. 21

Ioan. 20

1. Cor. 5

Matth. 12

Num. 27

Gen. 20

G g 2 suam

suam habuit uxorem. Etenim ait: Vere soror mea est de patre, sed non de matre, idest, fratris est filia, non sororis. Alioqui quale est, ut Abraham, uir iustus, patris sui filiam coniugem sumpserit: cum in primis hominibus propter aurum sanctitatem id ipsum scriptura non nominet, malens intelligi, quam proferri; & Deus lege postea sanciat, ac mi-

Leuit. 20 netur: Qui acceperit sororem suam de patre suo, uel de matre sua, & uiderit turpitudinem eius, & ipsa uiderit turpitudinem illius; opprobrium est: & exterminabuntur coram filiis generis sui. Turpitudinem sororis suæ detexit, peccatum suum recipiet. Imperitissime hominum, ista non legeras: & toto scripturarum pelago derelicto, ad iniuriam uirginis tuam rabiem contulisti, in exemplum eius, quem fabulæ ferunt, cum uulgo esset ignotus, & nihil boni posset facinoris excogitare, quo nobilis fieret, Dianæ incendisse templum: & nullo prodente sacrilegium, fertur ipse in medium processisse, clamitans sese incendium subiecisse: sciscitantibus Ephesi principibus, quam ob causam hoc facere uoluisset, respondisse: ut, quia bene non poteram, male omnibus innotescerem. Et hoc quidem Græca narrat historia. Tu uero templum Domini corporis succendisti: tu contaminasti sacrarium spiritus sancti, ex quo uis quadriiugam fratrum & sororum processisse congeriem. Denique

Matth. 13 cum Iudæis uoce sociata dicis: Nonne hic est fabri filius? nonne mater eius dicitur Maria; & fratres eius Iacobus, & Iosès, & Simon, & Iudas, & sorores eius omnes apud nos sunt? Omnes, nisi de turba, non dicitur. Quis te, oro, ante hanc blasphemiam nouerat? quis dupondii supputabat? consecutus es quod uolebas, nobilis es factus in scelere. ego ipse, qui contra te scribo, cum in eadem tecum urbe consistam, albus, ut aiunt, ater ue sis, nescio. Prætermitto uitia sermonis, quibus omnis liber tuus scatet. Taceo ridiculum exordium: O tempora, o mores. Non quæro eloquentiam; quam ipse non habens in fratre Carterio requisisti. non, inquam, flagito linguæ nitorem: ani-

mæ

ma quæro puritatem. Apud Christianos enim solœcismus est magnus, & uitium, turpe quid uel narrare, uel facere. Ad calcem uenio, & te cornuta interrogatione concludo: sicq. tecum agam, quasi superius nihil egerim, eodem modo dictos esse fratres Domini, quo Ioseph dictus est pater; Ego, inquit, & pater tuus, dolentes quærebamus te. Ma- *Luc. 2*
ter hæc loquitur, non Iudæi. Et ipse euangelista refert: Et erant pater & mater illius admirantes super iis, quæ dicebantur de eo. & his similia, quæ iam enumerauimus, in quibus parentes uocantur. Ac ne forte de exemplariorum ueritate causeris; quia tibi stultissime persuasisti, Græcos codices esse falsatos: ad Ioannis euangelium uenio, in quo ple- *Ioan. 1*
nissime scribitur: Inuenit Philippus Nathanael, & ait illi: Quem scripsit Moyses in lege, & prophetæ, inuenimus Iesum filium Ioseph a Nazareth. Certe hoc in tuo codice continetur. Responde mihi, quo modo Iesus sit filius Ioseph, quem constat de spiritu sancto esse procreatum? Vere Ioseph pater fuit? Quamuis sis hebes, dicere non audebis. An putabatur? Eodem modo æstimentur & fratres, quo æstimatus est pater. Sed quoniam iam e cautibus & confragosis locis enauigauit oratio; pandenda sunt uela, & in epilogos illius irruendum; in quibus sciulus sibi uisus, Tertullianum in testimonium uocat, & Victorini, Pictauiensis episcopi, uerba proponit. Et de Tertulliano quidem nihil amplius dico, quam Ecclesiæ hominem non fuisse. De Victorino uero id assero, quod & de euangelistis fratres eum dixisse Domini, non filios Mariæ, fratres autem eo sensu, quem superius exposuimus, propinquitate, nō natura. Verū nugasterimus, & fonte ueritatis omissio, opinionū riuulos consecramur. Numquid non possum tibi totam ueterum scriptorum seriem commouere, Ignatium, Polycarpum, Irenæū, Iustinum Martyrem, multosq. alios apostolicos & eloquentes uiros, qui aduersus Hebionem, & Theodotum Byzantium, & Valentinum, hæc eadem sentientes, plena sapientie uolumina conscripserunt? quæ si legis aliquādo, plus sciperes. sed melius puto, breuiter ad singula respondere,

G g 3 quam,

quam, diutius immorando, uolumen extendere. In illud nunc impetum facio: in quo tu, uirginitatem & nuptias comparando, disertus esse uoluisti. Risimus in te prouerbiū, Camelum uidimus saltitantes: Dicis: Numquid meliores sunt uirgines, Abraham, Isaac, & Iacob, qui habuere coniugia? Numquid non quotidie Dei manibus paruuli finguntur in uentribus; ut merito erubescere debeamus, Mariam nupsisse post partum? Quod si hoc illis turpe uidetur; superest, ut non credant etiam Deum per genitalia uirginis natum. turpius est enim iuxta eos, Deum per uirginis pudenda genitum, quam uirginem suo uiro nupsisse post partum. Iunge, si libet, & alias naturæ cōtumelias, nouem mensibus uterū insolescentem, fastidia, partum, sanguinem, pannos. Ipse tibi describatur infans, tegmine membranarum solito cōuolutus. Ingerātur dura præsepia, uagitus paruuli, oēta uæ dici circumcisio, tempus purgationis, ut probetur immundus. Non erubescimus, non flemus. Quanto sunt humiliora, quæ pro me passus est: tanto plus illi debeo. Et cum omnia replicaueris, cruce nihil contumeliosius proferes, quā profitemur, & credimus, & in qua de hostibus triumphamus. Sed, ut hæc, quæ scripta sunt, non negamus; ita ea, quæ non sunt scripta, renuimus. Natum Deum esse de uirgine credimus, quia legimus: Mariam nupsisse post partum, non credimus, quia non legimus. Nec hoc ideo dicimus, quo nuptias condēnemus: ipsa quippe uirginitas fructus est nuptiarum: sed quod nobis de sanctis uiris temere æstimare nihil liceat. Possumus enim hac æstimatione ne possibilitatis contendere, plures quoque uxores habuisse Ioseph, quia plures habuerit Abraham, plures habuerit Iacob; & de his esse uxoribus fratres Domini; quod plerique non tam pia, quam audaci temeritate confingunt. Tu dicis Mariam uirginem non permansisse: ego mihi plus uindico, etiam ipsum Ioseph uirginem fuisse per Mariam, ut ex uirginali coniugio uirgo filius nasceretur. Si enim in uirum sanctum fornicatio non cadit, & aliam eum uxorem habuisse non scribitur, Mariæ autem; quam putatus est habuisse,

buisse, custos potius fuit, quam maritus: relinquitur, uirginem eum mansisse cum Maria, qui pater Domini meruit appellari. Et quia de comparatione uirginitatis & nuptiarum sum aliqua dicturus; obsecro lecturos, ne me putent nuptiis detraxisse in uirginum laude, & aliquam fecisse distantiam inter sanctos ueteris testamenti & noui, idest inter eos, qui habuere coniugia, & eos, qui a complexu mulierum penitus recesserunt; uerum pro condicione temporum alii eos tunc subiacuissse sententiae; & alii nos, in quos fines seculorum decurrerunt. Quamdiu lex illa permansit: *1. Cor. 10*
 Crescite, & multiplicamini, & replete terram: Et, Male *Gen. 1.8*
 dicta sterilis, quae non parit semen in Israel: nubebant *Exod. 23*
 omnes, & nubebantur, & derelictis parentibus, fiebant *Deut. 7*
 una caro. quando uero uox illa pertonuit: Tempus breuia *1. Cor. 7*
 tum est: reliquum est, ut, qui habent uxores, sic sint, qua *2. Cor. 6*
 si non habeant, adhærentes Domino: unis cum eo effici- *1. Cor. 7*
 mur spiritus. Quare? Quia qui sine uxore est, cogitat ea, quae Domini sunt, quò modo placeat Deo: qui autem cū uxore est, sollicitus est quae sunt huius mundi, quò modo placeat uxori. Et diuisa est mulier, & uirgo. Quae non est nupta, cogitat quae sunt Domini, ut sit sancta corpore, & spiritu. nam quae nupta est, cogitat quae sunt mundi, quò modo placeat uiro. Quid oblatras? quid repugnans? Vas electionis hæc loquitur. Diuisa est, dicens, mulier, & uirgo. Vide, quantæ felicitatis sit, quæ & nomen sexus amiserit. Virgo iam mulier non uocatur. Quae non est nupta, cogitat quae sunt Domini, ut sit sancta & corpore, & spiritu. Virginis definitio, sanctam esse corpore, & spiritu, quia nihil profit carnem habere uirginem, si mente quis nupserit. Quae uero nupta est, cogitat quae sunt mudi, quò modo placeat uiro. Idē tu putas esse, diebus & noctibus uacare orationi, uacare ieiuniis, & ad aduētum mariti expolire faciē, gressum frangere, simulare blanditias? Illa hoc agit, ut turpior appareat, & naturæ bonum infuset iniuria: hæc ad speculum pingitur, & in contumeliam artificis conatur pulchrior esse, quam nata est. Inde infantes garriunt: familia

Gg + perstrepat:

perstrepit: liberi ab osculis & ab ore dependent: computantur sumptus: impendia præparantur. hinc cocorum accincta manus carnes terit: hinc textricum turba commurmurat: nunciatur interim uir uenire cum sociis. Illa ad hircinis modum lustrat uniuerſa penetralia, si torus rigeat, si pauimenta uerrerint, si ornata sint pocula, si prandium præparatum. Responde, quæſo, inter ista ubi sit Dei cogitatio? Et hæ felices domus. Ceterum, ubi tympana sonant, tibia clamitat, lyra garrit, cymbalum concrepat, quis ibi Dei timor? Parasitus in contumeliis gloriatur: ingrediuntur expolitæ libidinum uictimæ: & tenuitate uestiū nudæ impudicis oculis ingeruntur. his infelix uxor aut lætatur, & perit; aut offenditur, & maritus in iurgia concitatur. hinc discordia, seminarium repudiū. Aut, si aliqua inuenitur domus, in qua ista non fiant, quæ rara auis est: tamen ipsa dispensatio domus, liberorum educatio, necessitates mariti, correctio seruulorum, quam a Dei cogitatione non auocent? Desierunt, inquit scriptura, Saræ fieri muliebria: post quod dicitur ad Abraham: Omnia quæcum-

Gen. 18 que dicit tibi Sara, audi uocem eius. Quæ non est in partus anxietatibus & dolore, quæ, deficientibus menstrui cruoris officiis, mulier esse desit, a Dei maledictione sit libera: nec est ad uirum conuersio eius, sed e contrario uir subiicitur ei, & Domini uoce præcipitur: Omnia quæcumque tibi dicit Sara, audi uocem eius. & sic incipiunt uacare orationi: quia quamdiu in coniugio debitum soluitur, orandi præteritur instantia. Non negamus, uiduas, non negamus, maritatas sanctas mulieres inueniri, sed quæ uxores esse desierint, quæ in ipsa necessitate coniugii, uirginum imitentur

1. Cor. 7 castitatem. Hoc est, quod Apostolus breuiter, Christo in se loquente, testatus est: Innupta cogitat quæ Dei sunt, quo modo placeat Deo: nupta uero cogitat, quæ sunt mundi, quo modo placeat uiro: nobis super hoc campum intelligentiæ derelinquens. Neque tamen alicui necessitatem imponit, aut laqueum, sed id, quod honestum est, suadet, uolens omnes esse sicut se ipsum. Et quanquam de uirginitate,

nitate, Domini præceptum non habeat; quia ultra homines est; & quodam modo impudens erat, aduersum naturam cogere, alioq. modo dicere, uolo uos esse, quod angeli sunt; unde & uirgo maioris est meriti, dum id contemnit, quod si fecerit, non delinquit: nihilominus in coherentibus infert: Consilium autem do, tamquam misericordiam consecutus a Domino, ut sim fidelis. Existimo ergo hoc bonum esse propter instantem necessitatem: quia bonum est homini sic esse. Quæ est ista necessitas? Vx prægnantibus, & nutrientibus in illa die. Ideo silua succrescit, *Matth. 24* ut postea recidatur: ideo ager feritur, ut metatur. Iam plenus est orbis, terra nos non capit. Quotidie bella nos secant, morbi subtrahunt, naufragia absorbent, & nihilominus de terminis litigamus? De hoc numero sunt illi, qui agnum sequuntur, qui uestimenta sua non coinquinauerunt: *Apoc. 14* uirgines enim permanserunt. Obserua quid significet, Non coinquinauerunt: ego nõ audeo exponere; ne Heluidius calumnietur. Quod autem ais, quasdam esse uirgines tabernarias: ego tibi plus dico, esse in his & adulteras, & quo magis mireris, clericos esse caupones, & monachos impudicos. sed quis non statim intelligat, nec tabernariam uirginem, nec adulterum monachum, nec clericum posse esse cauponem? Numquid uirginitatis est culpa, si simulator uirginitatis in crimine est? Ego certe, ut, aliis personis prætermis, ad uirginem ueniam, quæ institutorias exercet artes, nescio an corpore, quod scio, spiritu uirgo non permanet. Rhetorici sumus, & in morem declamatorum, paululum lusimus. tu nos, Heluidi, coegisti; qui, iam euangelio coruscante, eiusdem uis esse gloriæ uirgines, & maritatas. et quia arbitror te, ueritate superatum, ad detractorem uitæ meæ & ad maledicta conuerti: (solent enim hoc & mulierculæ facere, quæ uictoribus dominis male optant in angulis) illud dico præueniens, gloriæ mihi fore tua conuicia; cum eodem, quo Mariæ detraxisti, ore me laceres; & caninam facundiam seruus Domini pariter experiatur, & mater.

ARGV-

IOVINIANVS, primum monachus, postea clericus diues, uir neque doctus, neque disertus, extinctam iam Basilidis haesim scriptis super ea re cōmentariis reuocare conatus, asserēbat, uirgines, uiduas, & maritatas eiusdem esse meriti, si in ceteris uita operibus nō discrepārēt: item eōs, qui uere baptizati sunt, in peccatū relabi haud posse: rursus, nihil distare inter uescentē cibis, et ieiunantem, si cum gratiarū aēctione comedatur: postremo, in regno calorū par omnium fore premium. Augustinus addit praeterea, eum asseruisse, omnia peccata esse paria; & quod uirgo Maria, Iesu mater, pariendo corrupta fuerit. Hic Roma neminem, praeter mulierculas quasdam, inficere potuit: habuit tamen alibi discipulos, tali dignos praēceptores, Ausentium scilicet, Genialem, Geminatorem, Fabium, Photinum, Martianum, Ianuariū, & Ingeniosum: quos omnes, una cum haesi, Siricius Papa damnauit, Victorini, & Pammachii opera, antequam contra eam Hieronymus scriberet, Augustino scilicet tum iuuenē. Omnis autem disputatio, ueluti quae prolixior esset, in duos partita est libros; in eaq. ita omnes ingenij, & eloquentiae uires uir sanctus explicuit, ut ex hoc uno tantum opere, quantum ingenio, eloquentia, doctrina, rerumq. omnium scientia D. Hieronymus praestiterit, liquido omnibus constare possit.

DIVI HIERONYMI ADVERSUS

Iouinianum liber primus.

A V C I admodum dies sunt, quod sancti ex urbe
P Roma fratres cuiusdam mihi Iouiniani commentariolos transmiserunt, rogantes, ut eorum inceptis responderem, & Epicurum Christianorum, euangelico atque apostolico uigore contererem. Quos cum legissem, & omnino non intelligerem, coepi reuoluere crebrius, & non uerba modo, atque sententias, sed singulas pene syllabas discutere, uolens prius scire quid diceret, & sic uel probare, uel redarguere, quod dixisset. Verum scriptorum tanta barbares est, & tantis uitis spurcissimus sermo confusus, ut
nec,

nec, quid loquatur, nec quibus argumentis uelit probare quod loquitur, potuerim intelligere. totus enim tumet, totus iacet: attollit se per singula; &, quasi debilitatus coluber, in ipso conatu frangitur. non est contentus nostro, id est, humano more loqui: altius quiddam aggreditur. Parturiunt montes: nascetur ridiculus mus; Quod ipse Non sani esse hominis, non sanus iuret Orestes. Præterea sic inuoluit omnia, & quibusdam inextricabilibus nodis uniuersa perturbat, ut illud Plautinarum litterarum ei possit aptari: Has quidem, præter Sibyllam, legēt nemoq. nam diuinandum est. Furiosas Apollinis uates legimus: et illud Virgilianum: Dat sine mentem sonum. Heraclitum quoque, cognomento *σκοτεινόν*, sudantes pilosophi uix intelligunt. Sed quid ad nostrum *ἀνιγμᾶτίην*, cuius libros multo difficilius est nosse, quam uincere? Quamquam & in uictoria non parua sit difficultas. Quis enim eum superare queat, cuius assertionem penitus ignoret? Et, nelectorem longius traham, cuiusmodi eloquentiæ sit, & quibus uerborum floribus ornatus incedat: secundi libri eius monstrabit exordium, quod hesternam crapulam ructans ita euomit: Satisfacto inuitatis, non ut claro curram nomine, sed ut rumore purgatus uiuam uano: Obsecro agrum, nouellas plantationum, arbuta teneritudinis, erepta de uitiorum gurgitibus; audientiam, communitam agminibus. Scimus ecclesiam, spe, Fide, Caritate, inaccessibleem, inexpugnabilem. non est in ea immaturus, omnis docibilis: impetui irrumpere, uel arte illudere potest nullus. Rogo, quæ sunt hæc portenta uerborum? quod descriptionis dedecus? non ne uel per febrem somnare eum putes, uel arreptum morbo phrenetico, Hippocratis uinculis alligandum? Quotiescumque eum legero, ubi me defecerit spiritus, ibi est distinctio. Totum incipit, totum pendet ex altero, nescias quid cui cohareat, & exceptis testimoniis scripturarum, quæ illo uenustissimo eloquentiæ suæ flore mutare non ausus est; reliquus sermo omni materiæ conuenit, quia nulli conuenit. Quæ res mihi aliquam suspicionem intelligentiæ dedit;

dit, uelle eum ita nuptias prædicare, ut uirginitati detraxat. Quando enim minora maioribus cœquantur; inferioris comparatio, superioris iniuria est. Neque uero nos Marcionis & Manichæi dogma sectantes nuptiis detrahimus: nec Tatiani principis Encratitarum errore decepti, omnem coitum spurcum putamus: qui non solum nuptias, sed cibos quoque, quos Deus creauit ad utendum, damnat, & reprobat. Scimus in domo magna non solum uasa esse aurea, & argentea, sed & lignea, & fictilia: et super fundamentum Christi, quod Paulus architectus posuit, alios ædificare aurum, argentum, lapides pretiosos; alios econtrario fenum, ligna, stipulam. Non ignoramus honorabiles nuptias & torum immaculatum. Legimus primam Dei sententiam: Crescite, & multiplicamini, & replete terram: sed ita nuptias recipimus, ut uirginitatem, quæ de nuptiis nascitur, præferamus. Numquid argentum non erit argentum, si aurum argento pretiosius est? aut arboris & segetis contumelia est, si radici, & foliis, culmo, & aristis, poma præferantur, & fructus? Vt poma ex arbore, frumentum e stipula, ita uirginitas e nuptiis. Centesimus & sexagesimus & tricesimus fructus, quamquam de una terra & de una semente nascatur, tamen multum differt in numero. Triginta referuntur ad nuptias. Nam & ipsa digitorum coniunctio, quasi mollis complexans osculo & fœderans, maritum pingit, & coniugem. sexaginta uero ad uiduas, eo quod in angustia & tribulatione sunt positæ. unde & superiori digito deprimuntur: quantoq. maior est difficultas, expertæ quondam uoluptatis illecebris abstinere; tanto maius est præmium. Porro centesimus numerus, (diligenter quæso lector attende) de sinistra transfertur ad dexteram, & eisdem quidem digitis, sed non eadem manu, quibus in læua nuptiæ significantur, & uiduæ, circulum faciens, exprimit uirginitatis coronam. Hæc de impatientia magis, quam iuxta ordinem disputationis, dixerim. Cum enim adhuc uix de portu egrediar, & rudentibus uela sustollam; in medium me quæstionum pelagus subitus loquendi æstus abripuit,

abripuit . unde cohibebo cursum , & paulisper sinus contra
ham , nec indulgebo mucroni , iam nunc pro uirginitate fe
rire cupienti . Balista , quanto plus retrahitur , tanto fortius
mittit . Non est damnum dilatio , ubi certior fit ex dila
tione uictoria . Proponam breuiter aduersarii sententias , &
de tenebrosis libris eius , quasi de foueis serpentes protra
ham , neque sinam uenenosum caput spiris maculosi corpo
ris protegi . Pateat , quod noxium est ; ut possit conteri ;
cum patuerit . Dicit uirgines , uiduas , & maritatas , quæ se
mel in Christo lotæ sunt , si non discrepent ceteris operibus ,
eiusdem esse meriti . Nititur approbare , eos , qui plena fi
de in baptismo renati sunt , a diabolo non posse subuerti .
Tertium proponit inter abstinentiam ciborum , & cum gra
tiarum actione perceptionem eorum , nullam esse distantiam .
Quartum , quod & extremum , esse omnium qui suum ba
ptisma seruauerint , unam in regno celorum remuneratio
nem . Hæc sunt sibi serpentes antiqui : his consiliis draco
de paradiso hominem expulit . nam & , saturitatem ieiuniis
præferendo , repromisit eos immortales futuros , quasi num
quam possent corruere : & , dum diuinitatem æqualem Deo
pollicetur , expulit eos de paradiso , ut , qui nudi , & expediti
& absque ulla macula uirgines , Domini consortio frue
bantur , deiectione in uallem lacrymarum , tunicis confutis &
pelliceis uestirentur . Sed , ne lectorem diutius morer ; se
quar uestigia partitionis expositæ ; & , aduersus singulas pro
positiones eius , scripturarum uel maxime nitar testimoniis ;
ne querulus garriat , se eloquentia magis , quam ueritate , su
peratum . quod si expleuero ; & illum utriusque testamen
ti nube oppressero : assumam exempla sæcularis quoque lit
teraturæ , ad quam & ipse prouocat : doceboque , etiam in
ter philosophos , & egregios in republica uiros , uirtutes uo
luptatibus , idest Pythagoram , Platonem , & Aristidem , Ari
stippo , Epicuro , & Alcibiadi ab omnibus solere præferri .
Vos quæso utriusque sexus uirgines & continentes , mariti
quoque & digami , ut conatus meos orationibus adiuuetis .
Cunctorum in commune Iouinianus hostis est . nam qui
æqualia

Gen. 13

æqualia omnium asserit merita, tam uirginitati facit iniuriam, dum eam nuptiis comparat, quam & nuptiis, sic eas licitas asserens, ut secunda & tertia matrimonia. Sed & digamis, & trigamis. aduersarius est, ibi ponens scortatores quōdam libidinofissimos post pœnitentiam, ubi duplicata, & triplicata matrimonia. nisi quod in eo digami, & trigami dolere non debent, quia idem scortator, & pœnitens, in regno cœlorum etiam uirginibus adæquatur. Proponā igitur manifestioribus uerbis, & habentibus aliquam consequentiam, argumenta eius, & exempla de nuptiis; eodēq. ordine omnia, quo ab eo dicta sunt, digeram. Nec molestum lectori sit, si nauseam eius & uomitum legere compellatur. Libentius antidotum Christi bibet, cum diaboli uenena præcesserint. Audite patienter uirgines, audite, quæso, uoluptuosissimum concionatorem; immo, quasi sirenarum cantus, & fabulas, clausa aure transite. Vestras ferte paulisper iniurias: putate uos cum Domino crucifixo phariseorum audire blasphemias. Prima, inquit, Dei sententia est, propter quod dimittet homo patrem, & matrem suam, & adhærebit uxori suæ, & erunt duo in carne una. Ac, ne forte diceremus hoc scriptum in ueteri testamento, asserit a Domino quoque id ipsum in euangelio cōfirmari: Quod Deus coniunxit, homo non separet. statimq. subnectit: Crescite, & multiplicamini, & replete terram. & per ordinem replicat, Seth, Enos, Cainan, Malalehel, Jared, Enoch, Matusalem, Lamech, Noe, omnes habuisse uxores, & ex Dei sententia filios procreasse: quasi generationis ordo, & historia condicionis humanæ, sine coniugibus, & Gen. 7 liberis potuerit enarrari. Ille, inquit, est Enoch, qui ambulauit cum Deo, & raptus in cœlum est. Ille Noe, qui, cū essent utique multi uirgines propter ætatem, solus cum filiis, & uxoribus naufrago orbe seruatus est. Rursus post diluuium, quasi altero principio generis humani, uirorum & uxorū paria iunguntur, & ex integro generationis instauratur benedictio: Crescite, & multiplicamini, & replete terram. Insuper etiam comedendarū carniū licentia relaxatur.

tur . Et omne, quod mouetur, & uiuit, erit uobis in escam :
 sicut holera herbarū, dedi uobis uniuersa . Currit ad Abra-
 ham, Isaac, & Iacob : e quibus prior trigamus, secundus
 monogamus, tertius quattuor uxorum est, Liæ, Rachel,
 Balæ, Zelphæ ; & asserit Abraham, ob fidei meritum, be-
 nedictionem in generatione filii accepisse ; Saram in typum *Gen. 15*
 Ecclesiæ, cui defecerant muliebria, maledictionem sterilita-
 tis, partus benedictione mutasse : quod Rebecca ierit quasi
 prophetes interrogare Dominum ; & audierit ab eo, Duæ *Gen. 25*
 gentes & duo populi in utero tuo sunt : quod Iacob pro
 uxore seruierit, & existimante Rachel uiri esse dare liberos,
 ac dicente ; Da mihi filios ; sin autem, moriar ; responderit ; *Gen. 30*
 Num pro Deo ego sum, qui te conclusit ? In tātum, inquit,
 sciebat fructus nuptiarum esse Domini, non mariti : quod
 Ioseph, uir sanctus, atque castissimus, & omnes patriar- *Gen. 41*
 chæ uxores habuerint, quibus per Moysen æqualiter bene-
 dicat Deus . Iudam quoque proponit, & Thamar, & occi- *Gen. 38*
 sum Onā perstringit a Domino, quia fratri inuidens, se-
 men nuptiarum dedita opera perdebat . Moysen proponit, *Num. 12*
 & Mariæ lepram ; quæ fratri pro uxore detrahens, illico Dei
 ultione percussa est . Laudat Sampson, & uxorium Naza-
 ræum miris effert præconiis . Debboram quoque replicat, *Iud. 4*
 & Barach ; quod absque uirginitatis bonis, Sisaram, & Ia- *Iud. 5*
 bin, & currus ferreos debellarint . Iahel uxorem Chaber *Iud. 11*
 Cynei adducit in medium, & palo armatam prædicat ma-
 num . Inter Ieptæ patrem & filiam uirginem, quæ immola-
 ta sit Domino, dicit nullam fuisse distantiam : quin potius
 fidem patris præfert ei, quæ cesa sit lugens . Venit ad samue-
 lem alterum Nazaræum Domini, qui ab infantia nutritus *1. Reg. 1.2*
 in tabernaculo est, & uestitus est ephod bad, quod interpre-
 tatur uestibus lineis, dicitq. eum filios procreasse, nec sacer-
 dotalem pudicitiam, uxoris imminutam esse complexu .
 Booz eum sua Ruth in area collocat, & Iesse ac Dauid inde *Ruth 2*
 producit . Ipsumq. Dauid centum præputiis etiam cum ui- *1. Reg. 18*
 tæ periculo, regis filia quæsisse concubitus . Quid dicam de
 Salomone, quem ponens in catalogo maritorum, imagi-
 nem

- Psal.* 71 nem afferit saluatoris? & de illo uult esse scriptum: Deus iudicium tuum regi da, & iustitiam tuam filio regis. Et dabitur ei de auro Arabiæ, & adorabunt pro eo semper. Ac
- 4. Reg.* 2 repente transcendit ad Eliam & Elisæum: & narrat quasi grande mysterium, quod requieuerit spiritus Eliæ in Elisæo: & cur hæc dixerit, tacet: nisi forte Eliam quoque & Elisæum uxores habuisse arbitratur. Transit ad Ezechiam: & cum
- Esa.* 38 in eius laudibus immoretur, miror cur oblitus sit dicere:
- 4. Reg.* 22 Amodo filios faciam. Iosiam, uirum iustissimum, sub quo in templo Deuteronomii liber repertus est, ab Holda uxore Sellum instructum refert. Daniel quoque & tres pueros inter maritos ponit; & ad euangelium repente transcendens Zachariam & Elizabeth, Petrum ponit & socrum eius, ceterosque apostolos: & consequenter infert dicens: Si autem uoluerint assumere uanam defensionem, & obtendere, quod rudis mundus eguerit incremento, audiant Paulum loquentem: Adolescentiores uiduas uolo nubere, filios procreare, & honorabiles nuptiæ, & cubile immaculatum, &
- 1. Tim.* 5 *Heb.* 13 mulier alligata est uiro quoadiu uiuit uir eius: si autem mortuus fuerit; nubat cui uult, tantum in Domino. Et Adam non est seductus: mulier autem seducta, facta est in præuariationem. Salua autem fiet per filiorum generationem, si permanserint in fide, & dilectione, & sanctificatione cum sobrietate. Certe cessat hic illud apostolicum: Et qui habent uxores, sic sint, quasi non habeant. nisi forte dicetis: propterea uult eas nubere, quia iam quædam conuersæ sunt retro post satanam. quasi ex uirginibus nulla cadat, & non sit earum maior ruina. ex quo manifestum est, uos Manichæorum dogma sectari, prohibentium nubere, & uesci cibis, quos Deus creauit ad utendum, cauteriatam habentium conscientiam. Et post multa, quæ nunc otiosum est reuoluere, excutit se quasi in locum rhetoricum, & facit apostrophon ad uirginem, dicens: Non tibi facio, uirgo, iniuriam: elegisti pudicitiam propter præsentem necessitatem: placuit tibi, ut sis sancta corpore, & spiritu: ne superbias: eiusdem Ecclesiæ membrum es, cuius & nuptæ sunt. Nimius fortasse

fortasse fuerim in expositione propositionū eius; & legenti fastidium fecerim: sed utile ratus sum, cuncta molimina eius, quasi instructam aciem contra me; ponere, & totum hostilem exercitum cum suis turmis ac ducibus cōgregare; ne, post primam uictoriam, alia mihi deinceps prœlia nascerentur. Igitur nō dimicabo contra singulos; nec paucorum ero passim congressione contentus: toto certandum est agmine; & incompōiti hostium cunei, ac latrocinii more pugnantes; instructa & ordinata acie repellendi. Oppōnam in prima fronte apostolum Paulum; & fortissimum ducem suis telis, idest, suis armabo sententiis. sciscitanti-
bus enim super hac quæstione Corinthiis plenissime respōdit doctor gentium, & magister Ecclesiæ. quidquid autem statuerit hic, Christi in eo loquentis legem putemus. Simulq. ne lectoris tacita cogitatio, cum cœperimus singula; quæ propōita sūt, diluere, semper ad Apostolum se referret, & studio ualidissimarum quæstionum, priora negligens ad extrema festinet; Inter cetera Corinthii per litteras quæsierant, utrum post fidem Christi cælibes esse deberent, & cōtinentiæ causa, quas habebant, uxores dimittere, an, si uirgines credidissent, inirent matrimonia: et, cum e duobus ethnicis unus credidisset in Christum, utrumnam credens relinqueret non credentem: et si essent ducendæ uxores, Christianas tantum accipi iuberet, an & ethnicas. Videamus igitur, quid ad hæc Paulus rescripserit. De his au- 1. Cor. 7
teni, quæ scripsistis mihi, bonum est homini mulierem nō tangere. Propter fornicationes autem unusquisque uxore suam habeat, & unaquæque uirum suum habeat. Vxorī uir debitū reddat, similiter & uxor uiro. Vxor sui corporis non habet potestatem, sed uir. Similiter & uir corporis sui non habet potestatem, sed uxor. Nolite fraudare inuicem, nisi forte ad tempus ex consensu, ut uacetis orationi. Et iterum ad idipsum reuertimini, ne tētet uos satanas propter incontinentiam uestram. Hoc autem dico iuxta indulgentiā, nō iuxta imperium. Volo autem omnes homines esse ut me ipsum: sed unusquisque proprium donum habet

H h ex

ex Deo, alius quidem sic, alius autem sic. Dico autem in-
nuptis, & uiduis: bonum est eis, si sic permanserint, ut ego.
quod si se nō cōtinent, nubāt. melius est enim nubere, quā
uri. Reuertamur ad caput testimonii. Bonum est, inquit,
homini mulierem non tangere. Si bonum est, mulierem
non tangere; malum est ergo tangere: nihil enim bono cō-
trarium est, nisi malum. si autem malum est, & ignoscitur:
ideo conceditur, ne malo quid deterius fiat. Quale autem
illud bonum est, quod condicione deterioris conceditur?
numquam enim subiecisset, Vnusquisque uxorem suam
habeat; nisi præmisisset, Propter fornicationes autem. Tol-
le fornicationes, & non dicit, Vnusquisque uxorem suam
habeat. Velut si quis definiat: Bonum est triticeo pane ue-
sci, & edere purissimam similam. Tamen, ne quis compul-
sus fame comedat sterco bubulum; concedo ei, ut uescatur
& hordeo. Num iccirco frumentum non habebit purita-
tem suam, si fimo hordeum præferatur? Bonum est illud na-
turaliter, quod comparisonem non habet mali, quod præ-
latione alterius non obumbratur. Simulq. animaduerten-
da est Apostoli prudentia. Non dixit, bonum est uxorem nō
habere, sed, bonum est mulierem non tangere: quasi & in
tactu periculum sit: quasi, qui illam tetigerit, non euadat,
quæ uiro- rum pretiosas animas rapit, quæ facit adolescen-
tium euolare corda. Alligabit quis in sinu ignem, & non
comburetur? aut ambulabit super carbones ignis, & non
ardebit? Quo modo igitur, qui ignem tetigerit; statim adu-
ritur: ita uiri tactus, & feminæ, sentit naturam suam, & di-
uersitatem sexus intelligit. Narrant & gentium fabulæ, Mi-
trham & Erichthonium, uel in lapide, uel in terra, de solo
Gen. 39 æstu libidinis esse generatos. Vnde & noster Ioseph, quia
tangere uolebat eum Aegyptia, fugit ex manibus eius; &
quasi ad morsum rabidissimæ canis, ne paulatim uirus ser-
1. Cor. 7 peret, pallium, quod tetigerat, abiecit. Propter fornicatio-
nes autem unusquisque uxorem suam habeat, & unaquæ-
que uirū suum habeat. Non dixit autem, Vnusquisque pro-
pter fornicationes ducat uxorem: alioquin hac excusatione
libidi-

libidini frena laxasset, ut, quotiescumque uxor moritur, toties ducenda sit alia, ne fornicemur: sed, Vnusquisque uxorem suam habeat. Suam, inquit, habeat, sua utatur, quā habebat ante, quam crederet. Quam bonum erat, non tangere, & post fidem Christi sororem tantum nosse, non coniugem: nisi fornicatio tactum eius excusabilem faceret. Vxor proprii corporis non habet potestatem, sed uir: similiter & uir sui corporis non habet potestatem, sed uxor. Omnis hæc quæstio de hiis est, qui in matrimonio sunt deprehensi, an eis liceat uxores dimittere; quod & Dominus in euangelio prohibuit. unde & Apostolus, Bonum est, ait, uxorem non tangere. Sed quia, qui semel duxit uxorem, nisi ex consensu, non ualeat se abstinere, nec dare repudium non peccanti: reddat coniugi debitum: sponte quippe se al ligauit ut reddere cogeretur. Nolite fraudare inuicem: nisi forte ex consensu ad tempus, ut uacetis orationi. Oro te, quale illud bonum est, quod orare prohibet? quod Corpus Christi accipi non permittit? Quamdiu impleo mariti officium, non impleo continentis. Iubet idem Apostolus *1. Thes. 5* in alio loco, ut semper oremus. Si semper orandum est: numquam ergo coniugio seruiendum: quoniam, quotiescumque uxori debitum reddo, orare non possum. Petrus *1. Pet. 3* Apostolus, experimentum habens coniugalium uinculorum, uide quo modo informet Ecclesiam, quid doceat Christianos: Similiter uiri cohabitantes iuxta scientiam, quasi infirmiori uasculo muliebri tribuentes honorem, & sicut coheredibus multiplicis gratiæ, ut non impediatur orationes uestræ. Ecce eodem sensu, quia eodem & spiritu, impediri dicit orationes officio coniugali. Quod autem ait, Similiter; iccirco ad imitationem prouocat uiros, quia iam supra uxoribus præceperat, dicens: Vt uideant uiri in timore castam uestram conuersationem, quarum sit non exterius compositio crinium, & distinctio auri, & in cultu uestis ornatus, sed absconditus cordis homo, in incorruptione mitis & silentis spiritus: hoc est, coram Deo placens. Cernis, quale coniugium inter uiros uxoresque præcipiat? Cohabitanter iuxta

H h 2 scientiam,

scientiam, ut nouerint quid uelit, quid desideret Deus, ut tribuant honorem uasculo muliebri. Si abstinemus nos a coitu; honorem tribuimus uxoribus: si non abstinemus; perspicuum est, honori contrariam esse contumeliam. Ad uxores quoque: Ut uideant, inquit, uiri castam conuersationem uestram, & ornatum in abscondito cordis homine, in incorruptione mitis & silentis spiritus. O uere digna uox apostolo, & Petra Christi. Maritis uxoribusq. dat legem; &, damnato carnis ornatu, castitatem prædicat, & ornatum interioris hominis, in incorruptione mitis & silentis spiritus, quodam modo hoc dicens: Quoniam exterior uester homo corruptus est; & beatitudinem incorruptionis, quæ proprie uirginum est, habere desistis; imitamini incorruptionem spiritus saltem per seram abstinentiam, & quod corpore non potestis, mente præstate. has enim Christus diuitias, & hos uestræ coniunctionis quærit ornatus: Verum, ne quis putet ex eo, quod sequitur, Ut uacetis orationi, & iterum reuertimini ad id ipsum, Apostolum hoc uelle, & non propter maiorem ruinam concedere: statim infert, Ne tentet uos satanas propter incontinentiam uestram. Pulchra nimirum indulgentia, Et iterum ad id ipsum, quod erubescit suo uocare nomine, quod tentationi præfert satanæ, quod causam habet incontinentiam. laboramus quasi obscurum differere, cum exposuerit ipse, quod scripsit. Hoc autem, inquit, dico iuxta indulgentiam, non iuxta imperium, & musitamus adhuc nuptias non uocare indulgentiam, sed præceptum: quasi non eodem modo & secunda, & tertia matrimonia concedantur: quasi non & fornicatoribus per penitentiam fores aperiatur Ecclesiæ, quodq. his est maius, & incestis. Nam illum uiolatorem noueræ, quem in prima ad Corinthios epistola tradiderat satanæ, in interitum carnis, ut spiritus saluus fieret, in secunda retrahit, &, ne abundantiori tristitia absorbeatur frater, laborat. Aliud est, uelle quid Apostolum; aliud, ignorare. In uoluntate promeremur, uenia abutimur. Vis scire, quid uelit Apostolus? iunge, quod sequitur: Volo autem omnes homines esse, sicut me ipsum. Beatus, qui Pauli similis erit.

1. Cor. 7

1. Cor. 5

2. Cor. 2

1. Cor. 7

erit. Felix, qui audit Apostolum uolentem, non ignoscentē.
 Hoc, inquit, uolo, hoc desidero, ut imitatores mei sitis, si-
 cut & ego Christi. Ille uirgo de uirgine, de incorrupta in-
 corruptus: nos, quia homines sumus, & natiuitatem sal-
 uatoris non possumus imitari, imitemur saltem conuer-
 sationem. Illud diuinitatis est, & beatitudinis; hoc hu-
 manæ conditionis est, & laboris. Volo omnes homines,
 similes mei esse, ut, dum mei similes sunt, similes fiant &
 Christi, cuius ego similis sum. Qui enim in Christum ^{1 Ioan. 2}
 credit, debet, sicut ille ambulauit, & ipse ambulare. Sed ^{1. Cor. 7}
 unusquisque proprium donum habet ex Deo, alius qui-
 dem sic, alius autem sic. Quid, inquit, uelim, perspicuum
 est. Sed quoniam in Ecclesia diuersa sunt dona; concedo &
 nuptias, ne uidear damnare naturam. Simulq. considera,
 quod aliud donum uirginitatis sit, aliud nuptiarum. si enim
 eadem esset merces nuptiarum, & uirginum; numquam di-
 xisset post præceptum continentiae; Sed unusquisque pro-
 prium habet donum ex Deo, alius quidem sic, alius autem
 sic. Vbi proprietas singulorum est, ibi altrinscuss diuersi-
 tas. Concedo & nuptias esse Dei donum: sed inter donum
 & donum magna diuersitas est. Denique & Apostolus de
 eodem post incestum pœnitente, E contrario, inquit, dona ^{2. Cor. 2}
 re ei, & consolamini: &, si cui quid donastis, & ego. Ac,
 ne putaremus donum hominis esse contemnendum, addi-
 dit: Nam & ego quod donauī, si quid donauī propter uos,
 in persona Christi. Diuersa sunt dona Christi. unde & Io- ^{Gen. 37}
 seph in typo eius uariam habet tunicam. et in psalmo qua-
 dragesimoquarto legimus: Astitit regina a dextris tuis, in ue-
 stitu deaurato, circumdata uarietate. Et Petrus apostolus,
 Sicut dispensatores, ait, multiplicis gratiæ Dei. Quod signi- ^{1. Petr. 4}
 ficantius Græcæ dicitur ποικίλης, idest, uariæ. Sequitur:
 Dico autem innuptis, & uiduis: Bonum est eis, si sic per- ^{1. Cor. 7}
 manserint ut ego. si autem non se continent, nubant. me-
 lius enim est nubere, quam uri. Postquam nuptis concess-
 rat usum coniugii, & ostenderat ipse quid uellet, quidue
 concederet; transit ad innuptas & uiduas; & sui proponit

Hh 3 exem-

exemplum; & felices uocat, si sic permanserint. Si autem non se continent, nubant, id ipsum quod supra: propter fornicationes autem, & ne tentet uos satanas, propter incontinentiam uestram. Redditq. causam, cur dixerit, Si se non continent, nubāt. melius est enim nubere, quam uri. Ideo melius est nubere, quia peius est uri. Tolle ardorem libidinis, & non dicet, Melius est nubere. Melius enim semper ad comparisonem deterioris respicit, non ad simplicitatem incomparabilis per se boni. uelut si diceret: Melius est unum oculum habere, quam nullum: melius est uno inniti pede, & alteram partem corporis baculo sustentare, quam fractis cruribus repere. Quid ais Apostole? Non tibi
 2. Cor. 11 credo dicenti, Etsi imperitus sermone, non tamen scien-
 1. Cor. 15 tia. Quo modo illud de humilitate descendit, quia non sum dignus uocari apostolus, & mihi minimo omnium apostolorum, & tamquam abortiuo: sic & hoc humilitatis dictum puto. Nosti sermonum proprietates; quamobrem & de Epimenide, & de Menandro, & de Arato quædam sumis testimonia. Vbi de continentia loqueris, & uirginitate,
 1. Cor. 7 Bonum est, ais, homini mulierem non tangere: & Bonum est ais, si sic permanserint ut ego: & Puto hoc bonum eis esse propter instantem necessitatem: & Quia bonum est homini sic esse. Vbi ad nuptias uenis; non dicis, bonum est nubere, quia non potes iungere, quam uri: sed dicis, Melius est nubere, quam uri. Si per se nuptiæ sunt bonæ; noli illas incendio comparare; sed dic simpliciter, bonum est nubere. suspecta est mihi bonitas eius rei, quam magnitudo alterius mali malum esse cogit inferius. ego autem non leuius malum, sed simplex per se bonum uolo. Hucusque primum capitulum edisertum est: ueniamus ad sequentia. His autem, qui matrimonio iuncti sunt, præcipio non ego, sed Dominus, uxorem a uiro non discedere: quod si discesserit, manere innuptam, aut uiro suo reconciliari. Et uir uxorem non dimittat. Nam ceteris ego dico, non Dominus: Si quis frater uxorem habet infidelem, & hæc consentit habitare cum illo; non dimittat illam: & cetera,

tera, usque ad eum locum, ubi ait: Vnusquisque, sicut uocauit eum Deus, ita ambulet. Et sicut in omnibus ecclesiis doceo. Hic locus ad præsentem controuersiam non pertinet. docet enim, iuxta sententiam Domini, uxorem, excepta causa fornicationis, non repudiandam, & repudiam, uiuo marito, alteri non nubere, aut certe uiro suo reconciliari debere. His autem, quos in matrimonio deprehendisset fides, hoc est, si unus credidisset e duobus, præcipit nè credens repudiet non credentem. Causisq. expostitis, quod candidatus fidei sit infidelis, si nolit a credente discedere; econtrario iubet, si infidelis repudiet fidelem propter fidem Christi, discedere debere credentem, ne coniungam præferat Christo, cui etiam anima postponenda est. At nunc pleræque contemnentes Apostoli iussionem, iunguntur gentilibus, & templa Christi idolis prostituunt; nec intelligunt se corporis eius partem esse, cuius & costæ sunt. Ignoscit Apostolus infidelium coniunctioni, quæ habentes maritos in Christum postea crediderunt; non iis, quæ, cum Christianæ essent, nupserunt gentilibus: ad quas alibi loquitur: Nolite iugum ducere cum infidelibus. Quæ 2. Cor. 6
enim participatio iustitiæ cum iniquitate? aut quæ societas luci ad tenebras? quæ autem conuentio Christi ad Belial? aut quæ pars fidei cum infidei? qui autem consensus templo Dei cum idolis? Vos enim estis templum Dei uiui. Licet in me sæuituras sciam plurimas matronarum, licet eadem impudentia, qua Dominum contempserunt, in me, pulicem, & Christianorum minimum, debacchaturas: tamen dicam, quod sentio: loquar, quod me Apostolus docuit; non illas iustitiæ esse, sed iniquitatis; non lucis, sed tenebrarum; non Christi, sed Belial; non templa Dei uiuentis, sed fana & idola mortuorum. Vis apertius discere, quod Christianæ omnino non liceat ethnico nubere? Audi eundem Apostolum: Mulier, inquit, alligata est legi, 1. Cor. 7
quanto tempore uir eius uiuit: quod si dormierit uir eius, liberata est: cui uult nubat, tantum in Domino, id est, Christiano. Qui secundas tertiasq. nuptias concedit in Domi-

H h 4 no,

Gen. 24 no, primas cum ethnico prohibet. Vnde & Abraham adiur-
 rat seruum suum in femore suo, hoc est in Christo, qui de
 eius semine erat nasciturus, ut filio sua Isaac alienigenam
1. Esdr. 10 non adducat uxorem. Et Esdras offensam Dei huiuscemo-
Malach. 2 di uxorum repudiatione compescit. Et Malachias prophe-
 ta, Præuaricatus est, inquit, Iudas, & abominationem fe-
 cit in Israel & in Hierusalem. Polluit enim sanctum Domi-
 ni, & dilexit & habuit filiam Dei alieni. Disperdat Domi-
 nus uirum, qui fecerit hoc, magistrum, & discipulum, de
 tabernaculis Iacob, & offerentem munera Domino uirtu-
 tum. Hæc iccirco dixi, ut, qui nuptias uirginitati compa-
 rant, sciant saltem tales nuptias digamix & trigamix subi-
 ciendas. Ad superiorem disputationem, in qua docuerat,
 fidelem ab infideli non debere discedere, sed permanere in
 matrimonio, sicut eos inuenisset fides; & unumquemque
 uel celibem, uel maritum ita durare, ut esset Christi bap-
 tismate deprehensus; infert subito parabolas circumcisi &
 ethnici, serui & liberi; & sub metaphora earum de nuptis
1. Cor. 7 disputat & innuptis. Circumcissus aliquis uocatus est, non
 adducat præputium. In præputio uocatus est, non circum-
 cidatur. Circumcisio nihil est, & præputium nihil est, sed
 obseruatio mandatorum Dei. Vnusquisque, in qua uoca-
 tione uocatus est, in ea permaneat. Seruus uocatus es,
 nō sit tibi curæ: sed &, si potes liber fieri, magis utere. Qui
 enim in Domino uocatus est seruus, libertus est Domini.
 similiter & qui liber uocatus est, seruus est Christi. Pretio
 empti estis: nolite fieri serui hominum. Vnusquisque, in
 quo uocatus est frater, in eo permaneat apud Deum. Ac
 primum, quia nonnullos hanc intelligentiam reprehensu-
 ros arbitror; interrogare libet, quæ sit consequentia, ut,
 de maritis & uxoribus disputans, repente transfret ad com-
 parationem Iudæi & ethnici, serui & liberi, & rursus,
 hac disputatione finita, rediret ad uirgines, dicens: De uir-
 ginibus autem præceptum Domini non habeo. Quid sibi
 uult inter coniugia & uirginitatem, Iudæi & ethnici, serui
 liberiq. collatio? Secundo, quo modo possit intelligi, Cir-
 cumcissus

circumcisis aliquis uocatus est, non adducat præputium .
 Num, qui semel amputatum habet præputium, potest,
 si uelit, rursus illud adducere? Deinde, quo sensu exponen-
 dum sit, Qui enim in Domino uocatus est seruus, libertus
 est Domini? Similiter, Qui liber uocatus est, seruus est *Eph. 6*
 Christi? Quarto, quo modo ille, qui præcepit seruis obe-
 dire Dominis carnalibus, nunc dicat: Nolite fieri serui ho-
 minum? Ad extremum, quid pertineat ad seruitutem, uel
 circumcisionem, Vnusquisque, in quo uocatus est frater, *1. Cor. 7*
 in eo permaneat apud Deum . nam & contrarium est supe-
 riori sententiæ . si enim illud audiuius: Nolite fieri serui
 hominum: qua ratione possumus in ea permanere uocatio-
 ne, qua uocati sumus; cum multi crediderint habentes car-
 nales dominos, quibus nunc seruire prohibentur? Porro
 ad circumcisionem quid facit, permanere in ea uocatione,
 in qua uocati sumus? cum in alio loco idem Apostolus cla-
 mitet: Ecce ego Paulus dico uobis, quoniam si circumcidi-
 mini, Christus uobis nihil proderit . Restat igitur, ut cir-
 cumcisio & præputium, seruus & liber, superiori sensui co-
 aptentur, & de antecedentibus pendeant . Circumcisis ali- *Gal. 5*
 quis uocatus est, non adducat præputium . Eo, inquit, tem- *1. Cor. 7*
 pore, quo uocatus es, & credidisti in Christum, si circum-
 cisis uocatus es ab uxore, & cælebs eras; noli ducere uxo-
 rem; hoc est noli adducere præputiū; ne circumcisionis &
 pudicitie libertatem oneres sarcina nuptiarum . Rursum, si
 in præputio quis uocatus est, non circumcidatur . Habe-
 bas, inquit, uxorem, cum credidisti: noli fideni Christi
 putare causam diffidii: quia in pace uocauit nos Deus . Cir-
 cumcisio nihil est, & præputium nihil est, sed obseruatio
 mandatorum Dei . Nihil enim prodest absque operibus,
 cælibatus, & nuptiæ; cum etiam fides, quæ proprie Chri-
 stianorum est, si opera non habuerit, mortua esse dicatur, *Iacob 2*
 & hac lege uirgines quoque Vestæ & Iunonis uniuiuæ in san-
 ctarum queant ordine numerari . Vnusquisque, in qua uo- *1. Cor. 7*
 catione uocatus est, in ea permaneat . Quando credidit, si-
 ue habebat, siue non habebat uxorem, in eo permaneat, in
 quo

quo uocatus est. Ac per hoc non tam uirgines cogit ut nubant, quam repudia prohibet: et sicut habentibus uxores tollit licentiam dimittendi eas, sic uirginibus nubendi amputat facultatem. Seruus uocatus es: non sit tibi curæ; sed &, si potes liber fieri, magis utere. Etiam si habes, inquit, uxorem; & illi alligatus es; & soluis debitum; & non habes tui corporis potestatem; atque, ut manifestius loquar, seruus uxoris es: noli propter hoc habere tristitiam, nec de amissa uirginitate suspires: sed etiam, si potes causas aliquas inuenire discidii, ut libertate pudicitiae perfruaris, noli salutem tuam cum alterius interitu quærere. Habeto paulisper uxorem: nec præcurras morantem: expecta dum sequitur. si egeris patienter, coniux mutabitur in sororem. Qui enim in Domino uocatus est seruus, libertus est Domini: similiter qui liber uocatus est, seruus est Christi. Reddit causas, cur nolit uxores deserui. Iccirco ait: Præcipio, ut in Christum de gentilitate credentes, inita ante fidem matrimonia non relinquant: quia, qui uxorem habens credidit, non tanto Dei seruitio detinetur, quanto uirgines, & innuptæ; sed quodam modo est liberior; & seruitutis illi freno laxantur; &, dum uxoris est seruus, (ut ita dicam) libertus est Domini. Porro qui uxorem non habens credidit, & liber a seruitute coniugii uocatus est a Domino; ille uere seruus est Christi. Quanta felicitas, non uxoris seruum esse, sed Christi; non carni seruire, sed spiritui? Qui enim adhæret Domino, unus spiritus est. Ac ne forsitan in eo, quod supra dixerat: Seruus uocatus es; non sit tibi curæ; sed &, si potes liber fieri, magis utere: suggillasse continentiam uideretur, & in famulatum nos tradidisse coniugum: infert sententiam, quæ omnem amputet cauillationem: Pretio empti estis: nolite fieri serui hominum. Redempti sumus pretioso sanguine Christi: immolatus est pro nobis agnus: &, aspersi calidissimo rore hyssopi, omnem pituitâ noxiæ uoluptatis excoximus. Quibus in baptisinate mortuus est Pharao, & uniuersus eius suffocatus est exercitus, cur rursus Aegyptum quærimus, &, post manna angelorum

Exod. 12

Num. 19

Exo. 14

Num. 11

lorum cibum, allia, & cepe, & pepones, & carnes varias su-
spiramus? Maritorum & continentium disputatione præ-
missa, tandem ad uirgines uenit, & ait: De uirginibus au-
tem præceptum Domini non habeo, consilium autem do,
tamquam misericordiam consecutus a Domino, ut sim
fidelis. Existimo ergo hoc bonum esse propter instantem
necessitatem, quoniam bonum est homini sic esse. Hic ad
uersarius tota exultatione bacchatur: hoc uelut fortissimo
ariete uirginitatis murum quatiens, Ecce, inquit, Aposto-
lus profitetur de uirginibus Domini se non habere præcep-
tum: & qui cum auctoritate de maritis & uxoribus iussit,
non audet imperare, quod Dominus non præcepit. Et
recte. quod enim præcipitur, imperatur: quod imperatur,
necesse est fieri: quod necesse est fieri, nisi fiat, poenam ha-
bet. Frustra enim iubetur, quod in arbitrio eius ponitur,
cui iussum est. Si uirginitatem Dominus imperasset; uide-
batur nuptias condemnare, & hominum auferre semina-
rium, unde & ipsa uirginitas nascitur. Si præcidisset radicem,
quo modo fruges quæreretur? Nisi ante fundamenta iecisset,
qua ratione ædificium extrueretur, & operturum cuncta desit
per culmen imponderet? Multo labore fossorum subuertun-
tur montes: terrarum pene interna penetrantur, ut inue-
niatur aurum. Cumq. de granis minutissimis prius confla-
tione fornacis, deinde callida artificis manu fuerit monile
compactum: non ille beatus uocatur, qui de luto excreuit
aurum, sed qui auri utitur pulchritudine. Noli igitur admi-
rari, si inter titillationem carnis, & incentiua uitiorum, an-
gelorum uitam non exigimur, sed docemur. Quia ubi con-
silium datur, offerentis arbitrium est: ubi præceptum, ne-
cessitas est seruientis. Præceptum, inquit, Domini non ha-
beo, consilium autem do, tamquam misericordiam conse-
cutus a Domino. Si non habes præceptum Domini, quare
audes dare consilium, de quo non habes iussione? Respon-
dit mihi Apostolus: Et uis ut ego iubeam quod Domi-
nus obtulit potius, quam præcepit? Ille creator, & figulus,
sciens fragilitatem uasculi, quod operatus est, uirginitatem
in

- 1. Cor. 9** in audientis potestate dimisit : & ego , doctor gentium , qui omnibus omnia factus sum , ut omnes lucrificerem , onus perpetuæ castitatis statim in principio credentium imponā ceruicibus infirmorum ? Discant prius ferias nuptiarum : uacent ad tempus orationi : ut , accepto gustu pudicitiae , id semper habere desiderent , quo ad modicum delectati sunt .
- Mar. 10** Dominus tentatus a pharisæis , utrū secundum legem Moy si uxores liceret dimittere , omnino fieri prohibuit . quod discipuli considerantes , dixerunt ei : Si talis est . causa hominis cum uxore , non expedit nubere . Quibus ille respondit :
- Matth. 19** Non omnes capiunt uerbum , sed quibus datum est : Sunt enim eunuchi , qui de utero matris ita sunt : & sunt eunuchi , qui ab hominibus eunuchizati sunt : & sunt eunuchi , qui se castrauerunt propter regnum cælorum . Qui potest capere ,
- 1. Cor. 7** capiat . In propatulo est , cur Apostolus dixit : De uirginibus autem præceptum Domini non habeo : profecto quia præmiserat Dominus : Non omnes capiunt uerbum , sed quibus datum est : & , Qui potest capere , capiat . Proponit *αγαπο* *ἑτένης* præmium : inuitat ad cursum : tenet in manu uirginitatis brauium : ostendit purissimum fontem , & clamat : Qui sitit , ueniat , & bibat : qui potest capere , capiat .
- Matth. 19** Non dicit , uelitis nolitis bibendum uobis est , atque currendum : sed , qui uoluerit , qui potuerit currere , atque potare , ille uincet , ille satiabitur . Et ideo plus amat uirgines Christus , quia sponte tribuunt , quod sibi non fuerat imperatū . Maiorisq. gratiæ est , offerre quod non debeas , quam reddere quod exigaris . Apostoli , uxoris onera contemplati , Si talis est , inquiunt , causa hominis cum uxore , non expedit nubere . Quorum Dominus sententiam probans , Recte quidem sentitis , ait , quod non expediat homini , ad cælorum regna tēdenti , accipere uxorem ; sed difficilis res est : non omnes capiunt uerbum illud , uerum quibus datum est . Alios eunuchos natura facit , alios uis hominum . mihi illi eunuchi placent , quos castrauit non necessitas , sed uoluntas . libēter illos in meos sinus recipio , qui se castrauerunt propter regnum cælorum ; & ob mei cultum . noluerūt esse ,
quod

quod nati sunt. Simulq. tractanda sententia: Qui se, inquit, castrauerunt propter regnum cælorum. Si castrati mercedem habent regnum cælorum; ergo, qui se non castrauerunt, locum non possunt accipere caltratorum. Qui potest, inquit, capere, capiat. Grandis fidei est, grâdisq. uirtutis; Dei templum esse purissimum, totum se holocaustum offerre Domino; &, iuxta eundem Apostolum, esse sanctum & corpore, & spiritu. Hi sunt eunuchi, qui, se lignum aridū ob sterilitatem putantes, audiunt per Esaiam, quod pro filiis & filiabus locum in cælis habeant paratum. Horum typus est Abdemelech eunuchus in Hieremia, & spado ille reginæ Candaces in Actis apostolorum; qui, ob robur fidei, uiri nomen obtinuit. Ad hos & Clemens, successor apostoli Petri, cuius Paulus apostolus meminit, scribit epistolas, omnemq. pene sermonem suum de uirginitatis puritate contexuit; & deinceps multi apostolici, & martyres, & illustres tam sanctitate quam eloquentia uiri, quos ex propriis scriptis nosse perfacile est: Existimo enim, inquit, hoc bonum esse propter instantem necessitatem. Quæ est illa necessitas, quæ, spreto uinculo coniugali, uirginitatis appetit libertatem? Væ prægnantibus, & nutrientibus in illo die. Non hic scorta, non hic lupanaria condemnantur, de quorum damnatione nulla dubitatio est, sed uteri tumescientes, & infantum uagitus, & fructus atque opera nuptiarum. Quoniam bonum est homini sic esse. Si bonum est homini sic esse; malum est ergo homini sic non esse. Alligatus es uxori: noli quærere solutionem. Solutus es ab uxore: noli quærere uxorem. Habet unusquisque nostrum terminos suos: redde mihi meum, & tuum tene. Si alligatus es uxori, ne illi des repudium. Si solutus sum ab uxore, nō quæram uxorem. Vt ego non soluo coniugia, si semel ligata sunt: ita tu non liges, quod solutum est. Simulq. significantia consideranda uerborum est. Qui uxorem habet; & debitor dicitur, & esse in præputio, & seruus uxoris, &, quod malorum seruorum est, alligatus. qui autem sine uxore est, primum nullius debitor est, deinde circumcissus, tertio liber,

1. Cor. 7

Esa. 56

Hier. 38

Act. 8

Philip. 4

1. Cor. 7

ber, ad extremum solutus. Curramus per reliqua: neque enim nos patitur magnitudo uoluminis diutius in singulis immorari. Si autem acceperis uxorem, non peccasti. Aliud est, non peccare; aliud, benefacere. Et si nupserit uirgo, non peccauit. Non illa uirgo, quæ semet Dei cultui dedicauit. harum enim si qua nupserit, habebit damnationem,

1. *Tim. 5*

quia primam fidem irritam fecit. Si autem hoc de uiduis dictum obiecerit: quanto magis de uirginibus præualebit; cum etiam his non liceat, quibus aliquando licuit? Virgines enim, quæ post consecrationem nupserint, non tam adultæ sunt, quam incestæ. Ac ne uideretur in eo, quod dixerat;

2. *Cor. 7*

Et si nupserit uirgo, non peccauit; rursus cælibes ad nuptias prouocare: statim se refrenauit; & aliud inferendo, infirmavit quod concesserat, dicens: Tribulationem tamen carnis habebunt huiusmodi. Qui sunt isti, qui tribulationem carnis habebunt? Quibus supra indulserat: Si acceperis uxorem, non peccasti: & si nupserit uirgo, non peccauit: tribulationem tamen carnis habebunt huiusmodi. Nos, ignari rerum, putabamus nuptias saltem carnis habere lætitiā. Si autem nubentibus etiam in carne tribulatio est, in qua sola uidebantur habere delicias: quid erit reliquum, propter quod nubant; cum & in spiritu, & in anima, & in ipsa carne tribulatio sit? Ego autem uobis parco. Sic ait, obtendo carnis tribulationem, quasi non maiora sint, propter quæ nubere non debeatis. Igitur hoc dico fratres: Tempus breue est. Reliquum est, ut, qui habent uxores, sic sint tamquam non habentes. Nequaquam iam de uirginibus disputo, quos nulla ambiguitas est esse felices: ad maritos uenio. Tempus breue est, Dominus prope est. Etiam si nongentis uiueremus annis, ut antiqui homines; tamen breue putandum esset, quod haberet aliquando finem, & esse cessaret. nunc uero cum breuis sit non tam lætitia, quam tribulatio nuptiarum: quid accipimus uxores, quas cogemur cito amittere? Et qui flent, inquit, & gaudent, & emunt, & utuntur hoc mundo, sic sint, quasi non fléant, gaudeāt, emant, utantur hoc mundo. præterit enim
figura

figura huius mundi . Si mundus transiit , quo uniuersa clauduntur , immo figura & conuersatio huius mundi , quasi nubes , præterit : inter cetera mundi opera & nuptiæ præteribunt . neque enim erunt post resurrectionē coniugia . si autem mors finis est nuptiarum : cur necessitatem non in uoluntatem uertimus ? & , quod inuitis extorquendum est , cur non spe præmiorum offerimus Deo ? Qui sine uxore est , sollicitus est quæ Domini sunt , quo modo placeat Deo . Qui autem cum uxore est , sollicitus est quæ sunt mundi , quo modo placeat uxori , & diuisus est . Intueamur curarū uirginis , maritiq. distantias . Virgo Domino , maritus uxori placere desiderat : & ut uxori placeat , sollicitus est de iis , quæ sunt mundi , quæ cum mundo utique transitura sunt : & diuisus est , in multas scilicet solitudinum partes , miseriarumq. distractus . Non est huius loci , nuptiarum angustias describere , & quasi in communibus locis rhetorico exultare sermone . plenius super hac re contra Heluidium , & in eo libro , quem ad Eustochium scripsi , arbitror absolutum . certe & Tertullianus , cum adhuc esset adolescens , lusit in hac materia ; & præceptor meus Gregorius Nazianzenus uirginitatem & nuptias differens Græcis uersibus explicauit . nunc illud breuiter admoneo , in Latinis codicibus hunc locum ita legi : Diuisa est uirgo , & mulier . quod quamquā habeat suum sensum , & a me quoque pro qualitate loci sic edisseritum sit : tamen non est apostolicæ ueritatis . siquidē Apostolus ita scripsit , ut supra transulimus : sollicitus est quæ sunt mundi , quo modo placeat uxori , & diuisus est : & hac sententia definita , transgreditur ad uirgines , & continentas , & ait ; Mulier innupta , & uirgo , cogitat quæ sunt Domini , ut sit sancta corpore , & spiritu . Non omnis innupta , & uirgo est . Quæ autem uirgo , utique & innupta est . Quamquam ob elegantiam dictionis potuerit id ipsum altero uerbo repetere , mulier innupta , & uirgo ; uel certe definire uoluisse , quid esset innupta , idest , uirgo ; ne & meretrices putemus innuptas , nulli certo matrimonio copulatas . Quid ergo cogitat innupta , & uirgo ? Quæ Domini sunt

sunt : ut sit sancta & corpore, & spiritu. Vt nihil aliud esset, ut nulla merces uirginem amplior sequeretur, sufficeret ei hæc sola prælatio, cogitare quæ Domini sunt. Statimq. docet, quæ sit ipsa cogitatio, ut sit sancta & corpore, & spiritu. Nonnullæ quippe sunt uirgines carne, non spiritu: quarum corpus integrum est, & anima corrupta. Sed illa uirginitas hostia Christi est, cuius nec mentem cogitatio, nec carnem libido maculauit. E contrario, quæ nupta est, cogitat quæ mundi sunt, quo modo placeat uiro. Sicut, qui uxorem habet, sollicitus est quæ sunt mundi, quo modo placeat uxori: sic nupta res mundi cogitat, quo modo placeat uiro. Nos autem non sumus de hoc mundo, qui in maligno positus est, cuius figura præterit. De quo dicitur ad
Ioan. 15 apostolos: si essetis de hoc mundo, amaret utique mundus, quod suum erat. Ac ne forsitã putaretur onus grauissimum castitatis nolentibus imponere, statim iungit causas
1. Cor. 7 suadendi, & ait: Hoc autem ad utilitatem uestram dico, nõ ut laqueũ uobis iniiciam; sed ut ad id, quod honestum est, & intente facit seruire Domino, absque ulla distractione uos adhorter. Proprietatem Græcam Latinus sermo non explicat. quibus enim uerbis quis possit dicere: Τοῦτο δὲ πρὸς τὸ ὑμῶν ἀγαθὸν συμφέρον λέγω, οὐκ ἵνα βρόχον ὑμῖν ἐπιβάλλω; ἀλλὰ πρὸς τὸ εὐσχήμον καὶ εὐπρόσδεχον τῷ κυρίῳ, ἀπειπαύτως. unde & in Latinis codicibus, ob translationis difficultatem, hoc penitus non inuenitur. utamur igitur eo, quod nos uertimus. Nõ imponit nobis Apostolus laqueũ, nec cogit esse quod nolumus; sed suadet quod honestum est & decorum, & intente facit seruire Domino, & semper esse sollicitum, & expectare paratum Domini uoluntatem: ut, cum quid imperauerit, quasi strenuus & armatus miles statim impleat, quod præceptum est, & hoc faciat sine ulla distentione, quæ data est secundum Ecclesiasten hominibus huius mundi, ut distendantur in ea. Si quis autem considerat uirginem suam, idest, carnem lasciuire & ebullire in libidinem, nec refrenare se potest; duplexq. ei incumbit necessitas, aut accipiendæ coniugis, aut ruendi: quod uult facit:
non

non peccat, si nubat. Faciat, inquit, quod uult; non quod debet. Non peccat, si ducit uxorem: non tamen bene facit, si duxerit: quia non, quod debet; facit, sed quod uult. nam qui statuit in corde suo firmus, non habens necessitatē, potestatem autem habens suæ uoluntatis; & hoc iudicat in corde suo seruare uirginem suā: bene facit. Igitur & qui matrimonio iungit uirginem suam, bene facit, & qui non iungit, melius facit. Signanter & proprie supra dixerat: Qui ducit uxorem, non peccat: hic, qui seruat uirginē suam, bene facit. Aliud est autem, non peccare; aliud, bene facere, Declina, inquit, a malo, & fac bonū. Illud declinamus, hoc sequimur, in altero initiū, in altero perfectio est. Verū ne in eo, quod dixit, Et qui matrimonio iungit uirginem suā, bene facit; existimet aliquis obseruationem nostrā non stare: protinus hoc ipsum bonum extenuat, & obumbrat comparatione melioris, & dicit: Et qui non iungit, melius facit. Nisi illaturus esset, Melius facit, nunquam præmisisset, Bene facit. ubi autem bonum & melius est, ibi boni & melioris non unum est præmium: & ubi non unum præmium, ibi utique dona diuersa. Tantum est igitur inter nuptias & uirginitatem, quantum inter non peccare & bene facere, immo, ut leuius dicam, quantum inter bonum & melius. Finita disputatione coniugiorum, & uirginitatis, & inter utrumque cauto moderamine præceptorum, ut nec ad sinistram, nec ad dexteram diuerteret, sed uia regia graderetur, & illud impleret; Ne sis iustus multum; rursus monogamiam digamiae comparat; & quo modo nuptias subdiderat uirginitati, ita digamiam primis nuptiis subiicit, & ait: Mulier alligata est, quanto tempore uir eius uiuit: quod si dormierit uir eius, libera est, cui uult, nubat, tantum in Domino. beator autem erit, si sic permanserit, secundum consiliū meū. Puto autem, quod & ego spiritum Dei habeam. Concedit secundas nuptias, sed uolentibus, sed iis, quæ se continere non possunt; ne, luxuriatæ in Christo, nubere uelint; habentes damnationem, quod primam fidem irritam fecerint: & hoc concedit, quia multæ abierunt retro post satanam.

Psal. 33

1. Cor. 7

Eccl. 7

1. Cor. 7

Ti Ceterum

Ceterum beatiores, inquit, erunt, si sic permanferint: continuoq. subiungit apostolicam auctoritatem, secundum meum consilium. Porro, ne auctoritas Apostoli quasi hominis leuior uideretur, addidit: Puto autem, quod & ego spiritum Dei habeam. Vbi ad continentiam prouocat, ibi non hominis, sed spiritus Dei consilium est: ubi autem nubendi concedit ueniam, spiritum Dei non nominat, sed prudentiæ librat consilium, ita singulis relaxans, ut unusquisque ferre potest. Iuxta hunc sensum omnia illa sunt accipienda: Nam quæ sub uiro est mulier, uiuente uiro alligata est legi: si autem mortuus fuerit uir, soluta est a lege uiri. Igitur, uiuente uiro, uocabitur adultera, si fuerit cum altero uiro: si autem mortuus fuerit uir eius, soluta est a lege, ut non sit adultera, si fuerit cum alio uiro. Et illud ad Timotheum: Volo ergo iuniores uiduas nubere, filios procreare, matres familias esse, nullam occasionem dare aduersario maledicti gratia. iam enim quædam conuersæ sunt retro post satanam. & reliqua his similia. Quo modo enim uirginibus ob fornicationis periculum concedit nuptias; & excusabile facit, quod per se non appetitur: ita, ob eandem fornicationem uitandam, concedit uiduis secunda matrimonia. Melius est enim, licet alterum & tertium, unum uirum nosse, quam plurimos: idest, tolerabilius est uni homini prostitutam esse, quam multis. siquidem & illa in euangelio Ioannis Samaritana, sextum se maritum habere dicens, arguitur a Domino, quod non sit uir eius. ubi enim numerus maritorum est, ibi uir, qui proprie unus est, esse desit.

Gen. 2 Vna cõsta a principio in unam uxorem uersa est. Et erunt, inquit, duo in carne una, non tres, neque quattuor: alioquin iam non duo, sed plures. Primus Lamech, sanguinarius, & homicida, unam carnem in duas diuisit uxores: fratricidium, digamiam eadem cataclysmi deleuit pœna. de altero septies, de altero septuagies septies uindicatum est. Quantum distant in numero, tantum & in crimine. Quã sancta sit digamia, hinc ostenditur, quod digamus in cleru eligi non potest: & ideo Apostolus ad Timotheum, Viduas, inquit,

inquit, eligatur non minus sexaginta annorum, quæ fuerit
unius uiri uxor. Hoc omne præceptum de his est uiduis,
quæ Ecclesiæ pascuntur eleemosynis. Et ideo ætas præ-
scribitur, ut illæ tantum accipiant pauperum cibos, quæ
iam laborare non possunt. Simulq. considera, quod, quæ
duos habuit uiros, etiam si anus est, & decrepita, & egens,
Ecclesiæ stipēs non meretur accipere. si autem panis illi tol-
litur eleemosynæ; quanto magis ille panis, qui de cælo de-
scendit; quem qui indigne comederit, reus erit uiolati cor-
poris & sanguinis Christi? Quamquam hæc testimonia,
quæ supra posui, in quibus uiduis conceditur, ut, si uelint,
denuo nubant; quidam interpretantur, super iis uiduis,
quas; amissis maritis, sic inuenerit fides Christi. nec enim
consequens esset, ut Apostolus, post baptisma, uiro mor-
tuo, iubeat alteri nubere: cum habentibus quoque ux-
ores præceperit, ut sic sint, quasi non habentes: & ob hanc
causam non esse uxorū numerum definitum, quia, post
baptisma Christi, etiam si tertia & quarta uxor fuerit, quasi
prima reputetur. alioqui, si, post baptisma primo mortuo,
accipitur secundus; quare non, secundo, & tertio, & quar-
to, & quinto mortuo, accipiat sextus, & reliqui? potest
enim accidere, ut infelicitate quadam, uel iudicio Dei suc-
cidentis nuptias repetitas, adolescentula plures accipiat ui-
ros; & anus primo marito in extrema senectute uidetur.
Primus Adam monogamus, secundus agamus. Qui digam-
iā probant, exhibeant tertiū Adam digamum, quem se-
quantur. Verum fac ut concesserit Paulus secunda matrimo-
nia: eadem lege & tertia concedit, & quarta, & quotiescū-
que uir moritur. Multa cōpellitur Apostolus uelle, quæ nō
uult: circūcidit Timotheū: rasi in se caluitiū: nudipedalia
exercuit: comā nutriuit, & totōdit in Cenchris: & certe ca-
stigauebat Galatas, Petrūq. reprehēderat, quod se propter
obseruationes Iudaicas a gentibus separaret. Quo modo
igitur in ceteris Ecclesiæ disciplinis Iudæis Iudæus, ethni-
cis ethnicus; & omnibus omnia factus est, ut omnes lucrifaceret,
sic & digamiam concessit incontinentibus, nec nu-

1. Cor. 11

Act. 16. 18. 21

Gal. 2

1. Cor. 9

I i 2 pria-

ptiarum numerum præfinit: ut, dum uiderent sibi mulieres ita post mortem mariti secundum concedi, ut tertius quartusq. conceditur; erubescant alterum accipere, ne trigamis & quadrigamis compareantur. ubi enim unus exceditur; nihil refert, secundus, an tertius sit, quia definit esse monogamus. Omnia licent, sed non omnia expediunt. 1. Cor. 10 Non damno digamos, immo nec trigamos, &, si dici potest, octogamos. plus aliquid inferam, etiam scortatorem recipio penitentem. Quidquid æqualiter licet, æquali lance pensandum est: Sed quoniam ad uetus nos retrahit testamentum; & incipiens ab Adā, ad Zachariam, & Elisabet peruenit; ac deinde opponit, Petrum, & ceteros apostolos habuisse uxores: nos quoque debemus per eadem currere uestigia quæstionum, & docere, castitatem semper operari nuptiarum fuisse prælatam. Ac de Adam quidem & Eva illud dicendum, quod ante offensam in paradiso uirgines fuerint, post peccatum autem & extra paradysum protinus Eph. 5 nuptiæ: deinde, quod hoc ipsum interpretetur Apostolus: Propter hoc relinquet homo patrem, & matrem suam, & adhærebit uxori suæ, & erunt duo in carne una. Statimq. subiungat: Sacramentum hoc magnum est: ego autem dico in Christo, & in Ecclesia. Christus in carne uirgo, in spiritu monogamus. Vnā enim habet Ecclesiam, de qua idem Apostolus, Viri, inquit, diligite uxores uestras, sicut & Christus Ecclesiam. Si Christus sancte, si caste, si absque Thess. 4 ulla macula Ecclesiam diligit: uiri quoque in castitate uxores suas diligant, & sciat unusquisque uas suum possidere in sanctificatione, & honore, non in passione desiderii, sicut & gentes, quæ ignorant Deum. Neque enim uocauit Col. 3 nos Deus in immunditiam, sed in sanctificationem, exuentes nos ueterem hominem cum actibus suis, & induentes nouum, qui renouatur in cognitionem secundum imaginem creatoris sui, ubi nō est masculus & femina, Græcus & Iudeus, circumcisio & præputiū, barbarus & Scythæ, seruus & liber, sed est omnia in omnibus Christus. Imago creatoris nō habet copulā nuptiarum. Vbi diuersitas sexus aufertur,

tur, & ueteri homine exuimur, & induimur nouo: ibi in Christum renascimur uirginem, qui & natus ex uirgine, & renatus per uirginem est. Quod autem ait: Crescite, & multiplicamini, & replete terram: necesse fuit prius plantare siluam, & crescere; ut esset quod postea posset excidi: simulq. considerata uis uerbi, Et replete terram. Nuptiæ terram replent, uirginitas paradisum. Sed & hoc intuentum dumtaxat iuxta Hebraicam ueritatem, quod, cum scriptura in primo, & tertio, & quarto, & quinto, & sexto die, expletis operibus singulorum, dixerit: Et uidit Deus quia bonum est: in secundo die hoc omnino subtrahit, nobis intelligentiam derelinquens, non esse bonum duplicem numerum, qui ab unione diuidat, & præfiguret fœdera nuptiarum. Vnde & in arca Noe, omnia animalia, quæcumque bina ingrediuntur, immunda sunt: impar numerus est mundus. Quamquam in duplici numero ostendatur & aliud sacramentum, quod ne in bestiis quidem & in immundis auibus digamia comprobata sit. bina enim ingrediuntur immunda, & septena, quæ munda sunt: ut haberet Noe post diluuium, quod de impari numero statim Deo posset offerre. Si autem transfertur Enoch, & seruatur in diluuium Noe: non reor iccirco translatus Enoch, quod uxorem habuerit, sed quod primus inuocauerit Deum, & crediderit in saluatorem: de quo Paulus apostolus in epistola ad Hebræos plenissime docet. Porro Noe, qui quasi secunda radix humano generi seruabatur, utique cum uxore & filiis debuit reseruari. quamquam in hoc mysterium scripturarum sit. Arca illa, iuxta apostolum Petrum, typus Ecclesiæ fuit, in qua octo animæ saluæ factæ sunt. Quando ingreditur in eam Noe; tam ipse, quam filii eius ab uxoribus separantur: quando uero egreditur in terram, iunguntur paria; & quod in arca, idest, in Ecclesia fuerat separatim, in mundi conuersatione sociatur. Simulq. si arca plures habuit mansiones, & nidulos, & bicamerata, & tricamerata, & diuersas bestias, &, pro qualitate animalium, habitationes quoque uel maiores, uel minores: existimo,

Ii 3 quod

quod diuersitas illa mansionū, præfigurauerit Ecclesiæ uarietate. Quod autem nobis obiicit, in secūda Dei benedictione comedendarum carniū licentiam datam, quæ in prima concessa non fuerat: sciat, quo modo repudium iuxta
Matth. 19 eloquium saluatoris ab initio non dabatur, sed, propter duritiam cordis nostri, per Moysen humano generi concessum est; sic & esum carniū usque ad diluuiū ignotum fuisse; post diluuiū uero, quasi in eremo murmuranti populo coturnices, ita dentibus nostris neruos & uirulentias
Deut. 24 carnis ingestas. Docet Apostolus scribens ad Ephesios, Deum proposuisse in adimplerione temporum recapitulare omnia, & ad principium retrahere in Christum Iesum, quæ sunt super cælos & super terram. unde & ipse saluator
Eph. 1 in Apocalypsi Ioannis, Ego sum, inquit, *α*, & *ω*, initium & finis. Ab exordio condicionis humanæ nec carnibus uescēbamur; nec dabamus repudium; nec præputia nobis eripiebantur in signum. hoc cursu usque ad diluuiū peruenimus. post diluuiū autem cum datione legis, quam implere nullus potuit, carnes ingestæ sunt ad uescendum, & repudia concessa duritiæ; & cultellus circumcisionis appositus: quasi Dei manus plus in nobis creauerit, quam necesse est. Postquam autem Christus uenit in fine temporum, & *ω* reuoluit ad *α*, & extremitatem retraxit ad principium:
Matth. 19 nec repudium nobis dare permittitur, nec circumcidimur, *Rom. 14* nec comedimus carnes, dicente Apostolo: Bonum est uinū non bibere, & carnes non comedere. Et uinum enim cum carnis post diluuiū dedicatū est. Quid loquar de Abraham, ut ipse asserit, trigamo, qui signum fidei in circumcisionem suscepit? Si imitamur uxorū illius numerum; imitemur & circumcisionem. neque enim in parte sectandus, & in parte repudiandus est. Porro Isaac, unius Rebecæ uir, Christi præfigurat Ecclesiam, & digamiæ suggillat lasciuiam. Si autem duas bigas uxorū & concubinarum habuit Iacob, & non uult aduersarius acquiescere, lippientem Liam deformem atque factosam, synagogæ typum prætulisse; Rachel uero, pulchram, & diu sterilem, Ecclesiæ signifi-

significasse mysterium: sciat eo tempore hoc fecisse Iacob, Gen. 31
 quando erat inter Assyrios, & in Mesopotamia Laban, du-
 rissimo domino, seruebat. Quando autem terram sanctā
 ingredi uoluit, & in monte Galaad extruxit aceruum testi-
 monii, in quo nihil inter sarcinas eius, Mesopotamiæ pos-
 sessor inuenerat; iurans se numquam ad locum, in quo ser-
 uierat, reuersurum: & ad torrentem Iaboch cum angelo Gen. 32
 luctatus claudicare cœpit: & πλατὺ νεῦρον eius emarcuit,
 statimq. Israel sortitus est nomen: & illa quondam dilecta
 coniux, pro qua seruierat, iuxta Bethlehem, in qua erat
 uirginitatis præco Dominus nasciturus, a filio doloris occi-
 ditur: & consortia Mesopotamiæ euangelica in uicinitate Gen. 39
 moriuntur. Miror autem, cur Iudam & Thamar nobis Gen. 38
 proposuerit in exemplum, nisi forte & meretricibus delecta-
 tur, aut occisum Onan, quod fratri semen inuiderit: qua
 si nos qualemcūque seminis fluxum absque liberorum ope-
 re comprobemus. Perspicuum est de Moyse, quod periculi Exod. 4
 ratus esset in diuersorio, nisi Sephora, quæ interpretatur
 Auis, filium circumcidisset, & præputium nuptiarum cul-
 tro euangelico defecasset. Iste nempe Moyses est, qui cum Exod. 3
 uidisset uisionem magnam, & angelum, siue Dominum lo-
 quentem in rubo, nequaquam ualuit ad eum accedere, nisi
 soluisset corrigiam calciamenti sui, & abiecisset uincula nu-
 ptiarum. Nec mirum hoc de amico, & propheta, & legi-
 ferro Dei; cum omnis populus accessurus ad montem Sina, Exod. 19
 & Dei auditurus eloquium, tribus diebus sanctificari iussus
 sit, & se ab uxoribus abstinere. Quod quidem scimus (licet
 præpostere faciam historiæ ordinem confundere) etiam ad
 Dauid fugientem ab Achimelech sacerdote dictum: Si mun- 1. Reg. 21
 di sunt pueri ab uxoribus? Et ille respondit: Ab heri & nu-
 diustertius. Panes enim propositionis, quasi corpus Chri-
 sti, de uxoribus eubilibus confurgentes edere non poterant.
 Et nobis in transitu est contemplandum, quod dixit: Si mū-
 di sunt pueri ab uxoribus, uidelicet, quod ad munditias cor-
 poris Christi, omnis coitus immundus sit. In lege quoque Leuit. 21. 22
 præcipitur, ut pontifex, nisi uirginem, non ducat uxorem,

Ii 4 nec

nec uiduam accipiat. si eadem uirginis uiduæq. condicio est; quare altera recipitur, altera reprobatur? Et sacerdotis uidua in domo iubetur sedere patris sui, nec secundum nosse matrimonium. si soror uirgo moritur sacerdotis; quo modo ipsa ad patris exequias, ita pater ad eam iubetur accedere. si uero nupta sit, quasi aliena contemnitur.

Deut. 24. 20 Qui uxorem duxerit, & qui plantauerit uineam, uelut pro-

Exod. 38 pagines filiorum, prohibetur ad bella procedere. Non enim potest domini seruire militæ, seruus uxoris: & de speculis mulierum ieiunantium, quasi de purissimis corporibus uirginum, luter in tabernaculo funditur: & intrinsecus in san-

Exod. 25. 37 ctuario tam cherubim, quam propitiatorium, & arca testamenti, & mensa propositionis, & candelabrum, & thuribulum ex auro mundissimo sunt. neque enim in Sancta san-

Num. 13 ctorum inferri poterat argentum. Quid moror in Moyse, cum mihi propositum sit, cursim celeriterq. dictanti, singula breuiter perstringere, & intelligentiæ quasdam lineas ducere? Transcendam ad Iesum, filium Naue, qui ante dictus est Ause, siue, ut rectius habetur in Hebræo, Osee, idest,

Iud. 1 Saluator. Ipse enim, secundum epistolam Iudæ, saluauit, & eduxit populum Israel ex Aegypto, & in terram repro-

Ios. 3 missionis induxit. Hic Iesus statim ut uenit ad Iordanem; aquæ nuptiarum, quæ semper in lege fluxerant, arefactæ

Ios. 5 sunt, & steterunt; & ficcis pedibus, ac nudis populus omnis transit; & uenit in Galgala, ibiq. secundo est circumcisus. quod si iuxta litteram accipimus, penitus stare non potest.

si enim duplex haberemus præputium; uel excisa pellicula iterum nasceretur: recte secunda circumcisio haberet locum. nunc autem hoc significatur, quod Iesus cultello euangelii populum, qui per desertum uenerat, circumcidit, & circumcidit cultello petrino; ut, quod in Moyse filio præfigurabatur ante in paucis, id sub Iesu duce impleretur in cunctis. Sed & ipsa præputia in unum cumulum coaceruata, & sepulta, & terra obruta, & ablatum opprobrium Aegypti, & nomen loci Galgala, quod interpretatur reuelatio, ostendunt, dum in præputio ambularet populus per desertum,

tum, oculos eius fuisse cæcatos. Videamus & consequen-
 tia. Post euangelii circumcisionem, & consecrationem duo
 decim lapidum in loco reuelationis, statim pascha celebra-
 tur: immolatur eis agnus, & sanctæ terræ uestuntur alimen-
 tis. egreditur Iesus: occurrit ei princeps militiæ gladium te-
 nens, idest, uel pro circumciso populo pugnare se mon-
 strans, uel dissecans glutinum nuptiarum. Similiterque, ut
 Moyfi præceptum fuerat, & huic præcipitur. Solue calcia-
 mentum tuum. locus enim, in quo stas, terra sancta est.
 quia sic erat Domini armatus exercitus in tubis sacerdotali-
 bus, quasi ad euangelicam prædicationem, sub typo Hie-
 richo, mundus subuertitur. Et ut infinita præteream; (ne-
 que enim nunc mihi propositum est omnia ueteris testamen-
 ti aperire mysteria) quinque reges, qui in terra repromissio-
 nis ante regnabant, resistebantq. euangelico exercitui, Iesu
 pugnante superantur. Hoc puto intellectu esse perspicuum,
 quod, antequam Dominus populum suum educeret de Ae-
 gypto, & circumcideret eum, uisus, odoratus, gustus, au-
 ditus, tactusq. regnauerint, & his quasi principibus fuerint
 uniuersa subiecta. quos Iesus ad speluncam corporis confu-
 gientes, & ad tenebrosum locum, idest, ipsum ingredien-
 tes corpus, interfecit; ut per id occiderentur, per quod an-
 te regnabant. Verum iam tempus est, ut castitatis Iesu ue-
 xillum leuemus. Moyses scribitur habuisse uxorem. Moy-
 sen autem & Dominus noster, & Apostolus interpretan-
 tur legem: Habent Moysen & prophetas. Et: Ab Adam
 usque ad Moysen regnavit peccatum, etiam super eos, qui
 non peccauerunt, in similitudine præuaricationis Adæ: nul-
 liq. dubium est, in utroque testimonio Moysen legem signi-
 ficare. sicut ergo legimus, quod Moyses, idest, lex habue-
 rit uxorem; ostende mihi, Iesum Naue uel uxorem habuif-
 se, uel filios: &, si potueris monstrare, uictum me esse fa-
 tebor. Et certe pulcherrimum terræ Iudææ in partitione ac-
 cepit locum, moriturq. non in uicenario numero, qui sem-
 per in scripturis infauit; in quo seruiuit Iacob, & uen-
 ditus est Ioseph, & quem diligit Esau, accipiens in eo quæ-

Ios. 5

Ios. 6

Ios. 10

Exod. 2

Luc. 16

Rom. 5

Gen. 31. 37

data

Gen. 32.33 dam munera; sed in decimo, de cuius laude crebro diximus:
Ios. 24 sepeliturq. in Thamnat Sareh, idest, in perfectissimo prin-
cipatu, siue in numero operimēti noui: ut uirginū signifi-
cāret greges, saluatoris auxilio coopertos in monte Ephra-
im, hoc est, in monte frugifero, ab aquilone montis Gaas,
Psal. 47 qui interpretatur commotio. Mons enim sion, latera aq-
uilonis, ciuitas regis magni; quæ opposita semper inuidiæ est,
Psal. 72 per singulas tentationes dicit: Mei uero pene mori sunt pe-
Iud. 1.2 des. Cumq. in sepultura Iesu, liber, qui ex nomine eius
appellatur, expletus sit: rursum in Iudicum uolumine,
quasi uiuēs resurgēsq. describitur: & sub ἀνακεφαλαίωσι
opera ipsius prædicantur, & legitur: Misit Iesus populum,
& abierunt filii Israel unusquisque in hereditatem suam, ut
possiderent terram. Et seruiuit populus Domino cunctis
diebus Iesu &c. Statimq. subiungitur: Et mortuus est Ie-
sus Naue, seruus Domini, centum decem annorum. Por-
Dent. 34 ro Moyses uidit tantum terram repromissionis, & intrare
non potuit, & mortuus est in terra Moab, & sepeliuit eum
Dominus in ualle terræ Moab contra domum Phegor, &
non cognouit uir sepulcrum eius usque in diem hunc. Com-
paremus utriusque sepulturam. Moyses in terra Moab mo-
ritur, Iesus in terra Iudææ. ille sepelitur in ualle contra do-
mum Phegor, quod interpretatur ignominia: (proprie
quippe Phegor lingua Hebræa priapus appellatur) hic in
monte Ephraim ab aquilone montis Gaas. Et est in uerbis
simplicibus semper diuinarum scripturarum sensus aug-
Exod. 23 stior: quia apud Iudæos gloria erat in partibus, & parturi-
tionibus: & maledicta sterilis, quæ non habebat semen in
Esa. 31 Israel: & beatus, cuius erat semen in Sion: & domestici
Psal. 127 in Hierusalē: & in benedictione maxima ponebatur: Vxor
tua sicut uitis abundans in lateribus domus tuæ: Fili tui si-
cut nouellæ oliuarum in circuitu mensæ tuæ: iccirco sepul-
crum eius positum in ualle describitur contra domum idoli,
quod proprie libidini consecratur. Nos autem, qui mili-
tamus sub Iesu duce, usque ad præsentem diem ignoramus,
ubi Moyses sit sepultus: contemnimus enim Phegor, &
omnem

omnem ignominiam eius, scientes quod, qui in carne sunt, Deo placere nō possunt. Et Dominus ante diluuium quod dixerat: Non permanebit spiritus meus in hominibus illis, quia caro sunt. Quamobrem & Moyses moriens plangitur a populo Israel: Iesus autem, quasi uiicturus, non plangitur. nuptiæ enim finiuntur in morte, uirginitas post mortem incipit coronari. Sanson quoque producit in medium: nec decaluatum quondam Domini Nazaræum a muliere considerat; qui licet typum teneant saluatoris, quod meretricem ex gentibus adamarit Ecclesiam; & multo plures hostium moriens, quam uiuus, occiderit; tamen coniugalis pudicitiae exempla non præbet. Et certe iste est secundum prophetiam Iacob: qui cum concitus equi pernicitate ferretur, a serpente percussus, retrorsum cecidit. Debboram autem, & Barach, & uxorem Heber Cynei cur enumererit, prorsus non intelligo: cum aliud sit, bellorum princeps, & historiæ ordinem texere, aliud, figuras aliquas significare. coniugii, quæ in istis omnino non comparent. Porro, quod præfert Iephte patris fidem lacrymis uirginis filiae, pro nobis facit. & nos enim non tam uirgines sæculi, quam eas, quæ propter Christum sunt uirgines, prædicamus; & a plerisque Hebræorum reprehenditur pater uoti temerarii, quia dixerit: Si tradens tradideris filios Ammon in manibus meis; quicumque exierit de domo mea in occursum mihi, cum reuerti cœpero in pace a filiis Ammon, erit Domino, & offeram illum holocaustum. Si canis, inquit, si asinus occurrisset; quid faceret? Ex quo uolunt Dei dispensatione esse factum, ut, qui improspecte uouerat, errorem uotorum in filiae morte sentiret. Si autem samuel nutritus in tabernaculo duxit uxorem: quid hoc ad præiudicium uirginitatis? quasi non hodie quoque plurimi sacerdotes habeant matrimonia; & Apostolus episcopum describat unius uxoris uirum, habentem filios cum omni castitate. simulq. noscendum, quod Samuel leuita non sacerdos, non pontifex fuerit. unde & faciebat illi mater sua ephod bad, superhumerales uidelicet lineum, qui habitus proprie

Rom. 8.

Gen. 6

Deut. 34

Jud. 13. 15. 16

Gen. 49

Jud. 4

Jud. 11

1. Reg. 8

1. Tim. 3

1. Reg. 2

proprie leuitarum & minoris est ordinis . unde & in psalmis
Psal. 98 non nominatur inter sacerdotes , sed inter eos , qui inuo-
cant nomen Domini . Moyses, inquit, & Aaron in sacerdo-
tibus eius , & Samuel inter eos, qui inuocant nomen eius .
1. Par. 6 Leui enim genuit Caath, Caath genuit Aminadab, Amina-
dab genuit Chore, Chore genuit Assir, Assir genuit Hel-
chana, Helchana genuit Sub, sub genuit Tou, Tou genuit
Heliu, Heliu genuit Ieroam, Ieroam genuit Helchana, Hel-
chana genuit Samuelem . Nulliq. dubium est, sacerdotes de
Aaron , & Eleazar , & Phinees stirpe generatos . qui cum
& ipsi uxores habuerint, recte nobis opponeretur, si errore
Encratitarum ducti, contenderemus matrimonia reproba-
da ; & non esset noster pontifex secundum ordinem Melchi
Hebr. 7 sedec sine patre, sine matre, ἀγενεαλόγητος, hoc est, sine nu-
1. Reg. 8 ptiis . Et reuera magnos fructus ex liberis Samuel capit : ut,
quia ipse placuit Deo , tales genuerit , qui Domino displice-
Ruth 2 rent . Quod si Booz , & Ruth nobis obicit ad comproban-
Matth. 1 dam digamiam : sciat, in euangelio , ob typum Ecclesie ,
etiam Raab meretricem in ordine maiorum Domini enu-
1. Reg. 18 meratam . Porro quod Dauid ducentis præputiis emisit iac-
tat uxorem : nouerit, illum & alias habuisse quampluri-
mas ; & Michol , filiam saul, quam pater alteri tradiderat,
3. Reg. 1 postea recepit ; & iam senem sunamitidis puellæ calefa-
ctum esse complexibus . Nec hoc dico , quod sanctis uiris
quidquam detrudere audeam ; sed quod aliud sit, in lege uer-
fari ; aliud, in euangelio . Ille occidit Vriam Hetheum, mœ-
cus exitit in Bethabee . Et quia erat uir sanguinarius , non ,
ut plerique existimant , propter bella, sed propter homici-
dium ; templum Domini ædificare prohibetur . Nos autem
Matth. 5 si unum de minimis scandalizauerimus ; & si fratri dixerim-
us Raka , & non recte uiderimus : expedit , ut mola asina
ligetur circa collum nostrum ; & rei erimus gehennæ ; &
adulterium in solo nobis aspectu reputabitur . Transiit ad
salomonem , per quem se cecinit ipsa sapientia : & cum
uxorium eum dicat , atque in illius laudibus immoretur ,
Cant. 6 miror cur non iungat & illud de Cantico canticorum : Sexa-
ginta

ginta sunt reginæ, & octoginta concubinæ, & adolescentu-
 læ, quarum non est numerus. Et illud de Regnorum ter-
 tio, quod septingentas habuerit uxores, & trecentas con-
 cubinas, & alias innumerabiles. Hæ nempe sunt, quæ auer-
 terunt cor eius a Domino: & tamen, antequam plures ha-
 beret uxores, & carnis uitiis laberetur, in principio regni
 & adolescentiæ extruit Domino templum. unusquisque
 enim non de futuris, sed de præsentibus iudicatur. Quod
 si salomonis exempla ei placent: iam non digamus erit, &
 trigamus; sed, nisi septingentas habuerit uxores, & trecen-
 tas concubinas, typum eius & meritum implere non pote-
 rit. Obsecro te lector, & id ipsum sæpe commoneo, ut
 scias me, quæ loquor, necessitate dicere; nec detrahare iis,
 qui in lege præcesserint, sed seruasse eos temporibus, & con-
 ditionibus suis, & illam Domini impleisse sententiam: Cre-
 scite, & multiplicamini, & replete terram: &, quod his
 maius est, futurorum typos præbuisse: nobis autem, qui-
 bus dicitur: Tempus in collecto est: superest, ut, qui ha-
 bent uxores, sic sint quasi non habeant: aliud præcipi, &
 uirginitatem a saluatore uirgine dedicari. Eliam, & Eliseum
 quam stulte in Catalogo posuerit maritorum, me tacente
 manifestum est. si enim Ioannes Baptista uenit in spiritu &
 uirtute Eliæ, & Ioannes uirgo est: utique non solum in spi-
 ritu eius uenit, sed etiam in corporis castitate. Porro illud,
 quod de Ezechia commemorari potest, quamquam hoc il-
 le solita stoliditate non uiderit, quod post uitam recupera-
 tam, & quindecim annorum spatia protelata, dixerit: Amo-
 do filios faciam: sciat in Hebræis uoluminibus non haberi,
 sed legi pro hoc: Pater filiis notam faciet ueritatem tuam.
 Nec mirum, si Holda, uxor sellum, prophetissa consulatur
 ab Iosia rege Iudæ, iam captiuitate uicina, & ira Domini
 stillante super Hierusalem: cum hæc norma sit scripturarū,
 ut, deficientibus uiris sanctis, mulieres in uirorum lauden-
 tur opprobria. superfluum autem est de Daniele dicere,
 cum Hebræi usque hodie autument, & illum, & tres pue-
 ros fuisse eunuchos, ex illa Dei sententia, quam Esaias lo-
 quitur

3. Reg. 11

Gen. 1

1. Cor. 7

Luc. 2

Esa. 38

4. Reg. 22

Esa. 39

- Dan. 1** quitur ad Ezechiam : Et de filiis tuis , qui nascentur ex te , tollent ; & facient eunuchos in domo regis . Rursusq. in Daniele legimus : Et dixit rex Alphanes principi eunuchorum , ut introduceret de filiis captiuitatis Israel , & de semine regio , & de Pharthemmim pueros , in quibus non esset macula , pulchros facie , & intelligentes sapientiam . Et argumentantur ; si de semine regio electi sunt Daniel , & tres pueri ; de semine autem regio eunuchos fore scriptura prædixit ; hos esse , qui eunuchi facti sunt . si uero & illud opposuerit , quod in Ezechiele dicitur , Noe , Daniel , & Iob in terra peccatrice filios & filias liberare non posse : respondendum est , quod iuxta hypothese[m] dictum sit . nec enim eo tempore Noe , & Iob erant ; quos multis ante sæculis fuisse , cognouimus . Et est sensus : si tales & tales uiri fuerint in terra peccatrice , filios suos & filias liberare non poterunt : quia iustitia patris non liberabit filium ; nec peccatum alterius alteri imputabitur . Anima enim , quæ peccauerit , ipsa morietur . sed & hoc dicendum , Daniele[m] , iuxta historiã libri eius , cum Ioachim rege captum eo tempore , quo Ezechiel quoque ductus est in captiuitatem . Quo modo ergo potuit habere filios , qui adhuc puer erat ? & , expleto triennio , inductus est ad regis obsequium . At ne quis putet Ezechielem iam uiri meminisse Danielis , & non pueri : Factum est , inquit , in anno sexto , regis scilicet Ioachim , in mense sexto , in quinta mensis : & ego sedebam in domo mea , & senes Iuda sedebant coram me . Atque in eadem die ad eum dicitur : si fuerint Noe , Daniel , & Iob . Erat igitur Daniel adhuc puer , & notus populo , uel propter interpretationem somniorum regis , uel propter susannæ liberationem , & occisionem presbyterorum . Et perspicue comprobatur , eo tempore , quo hæc dicebantur de Noe , Daniele , & Iob , adhuc puerum fuisse Denielem , nec potuisse habere filios & filias , quos sua iustitia liberaret . Hucusque de lege . Venit ad euangelium , & proponit nobis Zachariam , & Elizabeth , Petrum , & socrum eius : & consueta uerborum non intelligit istos quoque inter eos ; qui legi seruierint , debuisse

nume-

numerari. neque enim euangelium ante crucem Christi est, quod passione & sanguine ipsius dedicatur. Iuxta quam regulam Petrus, & ceteri apostoli, ut ei ex superfluo interim concedam, habuerunt quidem uxores, sed quas eo tempore acceperant, quo euangelium nesciebant: qui assumpti postea in apostolatam, relinquunt officium coniugale. nam cum Petrus ex persona apostolorum dicit ad Dominum: Ecce nos reliquimus omnia, & secuti sumus te: respondit ei Dominus: Amen dico uobis, quoniam nemo est, qui dimiserit domum, aut parentes, aut fratres, aut uxorem, aut filios propter regnum Dei, qui non recipiat multo plura in sæculo isto, & in sæculo futuro uitam eternam. si autem nobis illud opposuerit, ad probandū quod omnes apostoli uxores habuerint: Numquid nō habemus potestatem mulieres, uel uxores circumducendi, (quia *γυνή* apud Græcos utrumque significat) sicut ceteri apostoli, & Cephas, & fratres Domini? iungat & illud, quod in Græcis codicibus est: Numquid non habemus potestatem sorores mulieres, uel uxores circumducendi? Ex quo apparet, eum de aliis sanctis dixisse mulieribus, quæ, iuxta morem Iudaicum, magistris de sua substantia ministrabant, sicut legimus ipsi quoque Domino factitatum. nam & ordo uerborum hoc significat: Numquid nō habemus potestatem manducandi, & bibendi, aut sorores mulieres circumducendi? Vbi de comedendo, & bibendo, ac de administratione sumptuum præmittitur, & de mulieribus sororibus infertur: perspicuum est, non uxores, debere intelligi, sed eas, ut diximus, quæ de sua substantia ministrabant. quod & in ueteri lege de sunamitide illa scribitur, quæ solita sit Elifæum recipere, & ponere ei mensam, & panem, & candelabrum &c. Aut certe, si *γυναῖκες* uxores accipimus, nō mulieres: id, quod additur, sorores, tollit uxores; & ostendit, eas germanas in spiritu fuisse, non coniuges. Quamquam, excepto apostolo Petro, non sit manifeste relatum de aliis apostolis, quod uxores habuerint: & cum de uno scriptum sit, ac de ceteris tacitum, intelligere debemus, sine uxoribus

Matth. 19

1. Cor. 9

Matth. 27

4. Reg. 4

- uxoribus eos fuisse, de quibus nihil tale scriptura significet.
- Luc. 1** Et tamen ille, qui nobis obiecit Zachariam, & Elisabet, Petrum, & socrum eius; sciat de Zacharia, & Elisabet Ioannem fuisse generatum, idest, de nuptiis uirginem, de lege euangelium, de matrimonio castitatem: ut a propheta uirgine uirgo Dominus & annūciaretur, & baptizaretur. Possumus autem de Petro dicere, quod habuerit socrum eo tempore, quo credidit, & uxorem iam non habuerit: quāquam legatur in *παιόδους* & uxor eius, & filia. sed nunc nobis de canone omne certamen est. Et quia ad apostolos prouocauit, quod principes disciplinæ nostræ, & Christiani dogmatis duces, uirgines non fuerint: ut eos interim uirgines concedamus non fuisse, (neque enim hoc, præter Petrum, probari potest) nouerit hos esse apostolos, de quibus Esaias uaticinatur: Nisi Dominus sabaoth reliquisset nobis semen, quasi Sodoma essemus, & similes Gomorræ fuisset. Qui ergo erant ex Iudæis, uirginitatem, quā in Iudaismo amiserant, in euangelio habere non poterant. Et tamen Ioannes, unus ex discipulis, qui minimus traditur fuisse inter apostolos, & quem fides Christi uirginem repperat, uirgo permāsit; & ideo plus amatur a Domino, & recūbit super pectus Iesu. Et quod Petrus, qui uxorem habuerat, interrogare non audet, illum rogat ut interroget.
- Ioan. 13.21** Et post resurrectionem, nunciante Maria Magdalene, quod Dominus resurrexisset, uterque cucurrit ad sepulcrum, sed ille præuenit. Cumque essent in naui, & piscarentur in lacu Genesareth, Iesus stabat in litore, nec sciebant apostoli quē uiderent: solus uirgo uirginem agnoscit, & dicit Petro: Dominus est. Rursum, post auditam sententiam, quod ab alio cingendus esset Petrus, & ducendus quo nolle; & crucis fuisset illi passio prophetata; & ille diceret: Domine, Quid iste: nolens deserere Ioannem, cum quo semper fuerat copulatus, dicit ei Dominus: Si eum sic uolo esse, quid ad te? Vnde & sermo exiuit inter fratres, illum discipulum non moriturum. Ex quo ostenditur, uirginitatem non mori, nec sordes nuptiarum ablui cruore martyrii, sed manere cum

em Christo, & dormitionem eius transitum esse, non mor-
 tui. Si autem obnixè contenderit, Ioannem uirginem nō
 fuisse; & nos amoris præcipui causam uirginitatē diximus:
 exponat ille; si uirgo non fuit, cur ceteris apostolis plus
 amatus sit? At dicis: super Petrum fundatur Ecclesia: licet *Matth. 16. 18*
 id ipsum in alio loco super omnes apostolos fiat; & cuncti
 claves regni cælorum accipiant; & ex æquo super eos Eccle-
 siæ fortitudo solidetur; tamen propterea inter duodecim
 unus eligitur; ut capite constituto, schismatis tollatur oc-
 casio. Sed cur non Ioannes electus est uirgo? Aetati dela-
 tum est, quia Petrus senior erat: ne adhuc adolescens, ac
 pene puer, progressæ ætatis hominibus præferretur: & ma-
 gister bonus, qui occasionem iurgii debuerat auferre discipu-
 lis, & qui dixerat eis, Pacem meam do uobis, pacem relin- *Ioan. 14*
 quo uobis: Et: Qui uoluerit inter uos maior esse, mini- *Luc. 9*
 mus omnium sit: in adolescentem, quem dilexerat, causam
 præbere uideretur inuidiæ. Vt autem sciamus, Ioannem
 tunc fuisse puerum; manifestissime docent ecclesiasticæ hi-
 storix, quod usque ad Traiani uixerit imperium, idest, post
 passionem Domini sexagesimo octauo anno dormierit:
 quod & nos in libro de illustribus uiris breuiter perstrinxi-
 mus. Petrus apostolus est, & Ioannes apostolus; maritus,
 & uirgo: sed Petrus apostolus tantum; Ioannes & aposto-
 lus, & euangelista, & propheta; apostolus, quia scripsit ad
 ecclesias ut magister; euangelista, quia librum euangelii con-
 didit, quod, excepto Matthæo, alii ex duodecim apostoli
 non fecerunt; propheta, uidit enim in Pathmos insula, in *Apoc. 1*
 quo fuerat a Domitiano principe ob Domini martyrium re-
 legatus, Apocalypsim, infinita futurorum mysteria conti-
 nentem. Refert autem Tertullianus, quod Romæ missus
 in feruentis olei dolium, purior & uegetior exiuerit, quam
 intrauerit. Sed & ipsum eius euangelium multum distat a
 ceteris. Matthæus quasi de homine incipit scribere: Liber *Matth. 1*
 generationis Iesus Christi, filii Dauid, filii Abraham: Lu- *Luc. 1*
 cas a sacerdotio Zachariæ: Marcus a prophetia Malachiæ
 prophetæ, & Esaie. Primus habet faciem hominis propter
 K k genea-

genealogiam : secundus faciem uituli , propter sacerdotiū :
tertius faciem leonis , propter uocem clamantis in deserto :

Mar. 1 Parate uiam Domini , rectas facite semitas eius . Ioannes

Ioan. 1 uero noster , quasi aquila , ad superna uolat , & ad ipsum pa-
trem peruenit , dicens : In principio erat uerbum , & uerbū
erat apud Deum , & Deus erat uerbum : hoc erat in princi-
pio apud Deum : &c. Exposuit uirginitas , quod nuptiæ sci-
re non poterant . & , ut breui sermone multa comprehen-
dam , doceamq. cuius priuilegii sit Ioannes , immo in Ioan-

Ioan. 19 ne uirginitas : a Domino uirgine mater uirgo uirgini discipu-
lo commendatur . Verum casto labore sudamus . Obicit
quippe nobis aduersarius apostolicam sententiam , & ait :

1. Tim. 2 Adam primus formatus est , deinde Eua : & Adam non est
seductus , mulier autem seducta in prauaricatione facta est .
Salua autem fiet per filiorum generationem , si permanse-
rint in fide , & dilectione , & sanctificatione cum sobrietate .
Consideremus , cur Apostolus ad hanc sententiam , & unde
peruenerit : Volo ergo uiros orare in omni loco , leuantes san-
ctas manus sine ira , & disceptatione . Consequenter itaque
mulieribus dat præcepta uitæ , & ait : similiter & mulieres in
habitu ornato , cum uerecundia , & castitate , ornantes se
non in tortis crinibus , aut auro , nel margaritis , siue ueste
pretiosa , sed secundum quod decet mulieres , promitten-
tes pietatem per opera bona . Mulier in silentio discat cum
omni subiectione . Docere autem mulieri non permitto ,
neque dominari in uirum , sed subditam esse in silentio . Et
ne uideretur mulieris dura condicio , quæ eam in mariti re-
digeret seruitutem : legis recordatur antiquæ , & ad origina-
le exemplum redit : quod Adam primus factus sit , deinde
mulier ex costa eius : & quod Adam diabolus seducere non
potuerit , sed Euam : quod post offensam Dei statim uiro sub-
iecta sit , & ad maritum illius facta conuersio : quodq. er-
rorem ueterem illa , quæ semel connubio copulata est , & re-
ducta in condicionem Eux , filiorum procreatione deleteret ;
ita tamen , si ipsos filios erudiret in fide , & dilectione Chri-
sti , & in sanctificatione , & pudicitia . Non enim , ut male
habe-

habetur in Latinis codicibus, sobrietas est legenda; sed castitas, idest, σωφροσύνη. Vide igitur, quo modo ex hoc quoque ipso testimonio supereris; & quod putas esse pro nuptiis, pro uirginitate sentire cogaris. Nam si saluatur mulier in filiorum generatione; & liberorum numerus salus matrum est: cur addidit, Si permanserint filii in fide, & caritate, & sanctificatione cum castitate? Tunc ergo saluabitur mulier, si illos genuerit filios, qui uirgines permansuri sunt; si, quod ipsa perdidit, acquirat in liberis; & damnum radicis, & cariem, flore compenset, & pomis. Supra in transitu, ubi nobis aduersarius proposuerat Salomonem multinubum, qui templum Dei extruxit, strictim responderam, ut per quaestiones reliquas currem: nunc, ne clamitet, & hunc, & alios in lege patriarchas, & prophetas, & sanctos uiros a nobis esse temeratos; proponam huius ipsius, qui multas uxores, & concubinas habuit, de nuptiis uoluntatem. nemo enim melius scire potest, quid sit uxor, uel mulier, illo, qui passus est. loquitur ergo in Pro. 9 uerbis: Mulier insipiens, & audax, inops panis efficitur. Cuius panis? nempe illius, qui de caelo descendit. statimque subiungit: Terrigenae apud eam pereunt, & in profundum inferni incurrunt. Qui sunt terrigenae, qui apud eam pereunt? Vtique illi, qui sequuntur primum Adam, qui de terra est; & non secundum, qui de caelo est. Et rursus in alio loco: Sicut in ligno uermis, ita perdit uirum suum uxor malefica. Si autem asseueraueris, hoc de malis coniugibus dictum esse: & ego tibi breuiter respondebo. Quae enim mihi incumbit necessitas uenire in dubium, utrum bona, an mala futura sit, quam duxero? Melius est, inquit, habere in terra deserta, quam cum uxore litigiosa, & iracunda. Quam farum sit, uxorem sine his uitiiis inueniri, nouit ille, qui duxit uxorem, unde pulchre Varius Geminius, sublimis orator, Qui non litigat, inquit, caelebs est. Melius est habitare in angulo tecti, quam cum uxore maledica in domo communi. Si domus communis mariti & uxoris, erigit uxorem in superbiam, & contumeliam uiro facit:

K k 2 quanto

quanto magis, si ditior uxor fuerit, & in domo eius nūc
 manserit? incipit enim non uxor esse, sed domina; & uiro,
 Pro.27 si offenderit, migrandum est. Stillicidia eiciunt hominem
 in die hiemali de domo sua: similiter & mulier maledica de
 propria domo. assiduus quippe iurgis, & quotidiana garru-
 litate facit perfluere domum eius, & eiicit eum de ædibus
 suis, idest, de Ecclesia. Vnde & supra ab eodem Salomo-
 ne præcipitur: Fili ne perfluas. Et Apostolus ad Hebræos,
 Hebr.2 Propterea, inquit, debemus intendere amplius his, quæ
 Pro.30 dicuntur, ne forte perfluamus. Illud uero quis taceat, quod
 sub ænigmate scribitur? Sanguisugæ tres filiæ erant dilectio-
 ne dilectæ: sed istæ non saturauerunt eam: & quartæ non
 sufficit dicere, satis est: Infernus, & amor mulieris, & ter-
 ra, quæ non satiatur aqua, & ignis non dicit, satis est. San-
 guisuga diabolus est: diaboli filiæ sunt dilectæ, quæ satiari
 interfectorum cruore non possunt: Infernus, & amor mu-
 lieris, & terra arens, & ignis exæstuans. Non hic de mere-
 trice, non de adultera dicitur: sed amor mulieris generali-
 ter accusatur, qui semper insatiabilis est, qui extinctus ac-
 cenditur, & post copiam rursus inops est, animumq. uiri-
 lem effeminat, & excepta passione, quam sustinet, aliud
 non finit cogitare. Simile quid & in sequenti parabola legi-
 mus: Per tria mouetur terra: quartum autem non potest
 Pro.30 ferre, si seruus regnet, & stultus si saturetur panibus, & odio-
 sa uxor si habeat bonum uirum, & ancilla si eiiciat dominā
 suam. Ecce & hic inter malorum magnitudinem uxor po-
 nitur. Quod si responderis, sed uxor odiosa: dicam tibi,
 quod & supra. Atqui, hoc periculum in memet fieri, graue
 est. qui enim ducit uxorem, in ambiguo est, utrum odio-
 sam, an amabilem ducat. si odiosam duxerit, ferri non po-
 test: si amabilem, amor illius inferno, & arenti terræ, &
 Eccl.3 incendio comparatur. Veniamus ad Ecclesiasten, de ipso
 quoque pauca testimonia ponentes. Omnibus tempus est,
 & tempus omni rei sub cælo. Tempus pariendi, tempus
 moriendi, tempus plantandi, tempus euellendi quod plan-
 tatum est. Peperimus in lege cum Moyse: moriamur in
 euan-

euangelio cum Christo. Plantauimus in nuptiis: euellamus per pudicitiam, quod plantatum est. Tempus amplexandi, & tempus longe fieri ab amplexu. Tempus amandi, & tempus odiendi. Tempus belli, & tempus pacis. Simulq. nos commonet, ne legem euangelio præferamus; ne puritatem uirginitatis, nuptiis putemus æquandam: Meliora sunt, dicens, nouissima sermonis, quam initium eius. Statimq. subiungit: Ne dixeris, quid factum est: quia dies *Eccl. 7* priores meliores erant, quam hi. Quia non sapienter interrogasti de hoc, reddit causam, quare dies posteriores meliores sint, quam priores: Quia bona, inquit, est sapientia cum hereditate. In lege enim sapientiam carnis, mors sequebatur occidens: in euangelio sapientiam spiritus, hereditas expectat æterna. Ecce hoc inueni, dixit Ecclesiastes, hominem unum de mille inueni, & mulierem in his omnibus non inueni. Verumtamen reperi, quod fecit Deus hominem rectum, & ipsi quæsierunt cogitationes malas. Rectum hominem inuenisse se dicit. considera uim uerbi: in homine & uir, & femina continetur: Et mulierem, inquit, in his omnibus non inueni. Legamus principium Geneseos, & inueniemus, Adam, hoc est hominem, tam uirum, *Gen. 2* quam mulierem nuncupari. Cum ergo boni creati simus & recti a Deo; ipsi uitio nostro sumus ad peiora delapsi; & quod in paradiso rectum in nobis fuerat, egredientibus de paradiso deprauatum est. Quod si obieceris, antequam peccarent, sexum uiri & feminae fuisse diuisum, & absque peccato eos potuisse coniungi: quid futurum fuerit, incertum est: neque enim Dei possumus scire iudicia, & ex nostro arbitrio, illius sententiæ præiudicare: hoc, quod factum est, in propatulo est, quod, qui in paradiso uirgines permanserunt, eiectione de paradiso copulati sunt. Aut, quid nocebat, si paradisu nuptias recipit, & nulla est inter maritatum uirginemq. diuersitas, etiam in paradiso eos ante sociari? Eiciuntur de paradiso; & quod ibi non fecerunt, in terra faciunt, ut statim a principio condicionis humanæ uirginitatem paradisu, & terra nuptias dedicauerit. In omni tem-

pore sint uestimenta tua candida. Candor uestium sempiternus, uirginitatis est puritas. In matutino seminauimus semen nostrum, & ad uesperam non cessemus. Qui seruauimus in lege nuptiis, uirginitati in euangelio seruauimus. Transeo ad Canticum canticorum: & quod aduersarius totum putat esse pro nuptiis, uirginitatis continere sacramenta monstrabo. Audiamus, quid loquatur sponsa, antequam sponsus eius ad terras ueniat, patiat, inferos pene

Cant. 1 tret, ac resurgat: similitudines auri faciemus tibi cum distinctionibus argenti, quoadusque rex in accubitu suo est.

Antequam resurgeret Dominus, & euangelium coruscaret, non habebat aurum sponsa, sed similitudines auri: argentum autem, quod in nuptiis habere se pollicetur, habebat uarium atque distinctum in uiduis, continentibus, ac maritatis. Deinde sponsus respondet ad sponsam, & eam docet, quod ueteris legis umbra transferit, & ueritas euangelii uenerit: Surge, ueni proxima mea, speciosa mea, columba mea: quoniam ecce hiems transiit, pluuia abiit sibi.

Cant. 2 Hoc de ueteri testamento. Rursum de euangelio, & uirginitate: Flores uisi sunt in terra, tempus sectionis aduenit. *1. Cor. 7* Nonne tibi uidetur id ipsum dicere, quod & Apostolus: Superest, ut, qui habent uxores, sic sint, quasi non habeant.

Cant. 2 Et manifestius de praconio castitatis: Vox, inquit, turturis audita est in terra nostra. Turtur auis pudicissima, semper habitans in sublimibus, typus est saluatoris. Legamus physiologos; & reperiemus, turturis hanc esse naturam, ut, si parem perdiderit, alteri non iungatur: & intelligemus digamiam etiam a multis auibus reprobari. Statimque turtur dicit ad turturem: Ficus protulit grossos suos: id est, ueteris legis praecepta ceciderunt: & de euangelio uites flo-

2. Cor. 2 rentes dederunt odorem. Vnde & Apostolus: Christi bonus odor sumus. Surge, ueni proxima mea, speciosa mea,

Cant. 2 & ueni. Tu columba mea in uelamento petrae iuxta promurale, & ostende mihi faciem tuam, & audiam fac mihi uocem tuam: quoniam uox tua suavis, & facies tua speciosa. Dum uultum tuum tegeres cum Moyse, & uelamentum esset

esset in lege; nec faciem tuam uidebam; nec uocem tuam dignabar audire, dicens: Et si multiplicaueritis preces uestras, nec sic exaudiam uos. Nunc autem, reuelata facie, contemplare gloriam meam, & petrae firmissimæ tegere promurali. Quod audiens sponsa aperit sacramenta pudicitiae. Fratruius meus mihi, & ego illi, qui pascit inter lilia, hoc est inter uirginum candidissimos choros. Vis scire, quale uerus Salomon & pacificus noster solium, quales habeat armigeros? Ecce, ait, lectus Salomonis, sexaginta potentes in circuitu eius de potentibus Israel, omnes tenentes fra meam, & docti bello, uniuscuiusque uiri gladius in femore ipsius. Qui in circuitu salomonis sunt, gladium habent in femore, sicut Ahod ille iudex ἀμφιδέξιος, qui interfecit hostem pinguisimum, & totum carni deditum, omnes amputans uoluptates. Ibo, inquit, ad montem myrrhae, ad eos scilicet, qui mortificauerunt corpora sua, & ad collem Libani ad purissimos uirginum greges, & loquar sponsae meae: Tota speciosa es amica mea, & non est macula in te. Vnde & Apostolus, Ut exhibeat, inquit, sibi sanctam Ecclesiam, non habentem maculam, neque rugam. Veni a Libano sponsa, ueni a Libano: Venies, & pertransibis ab initio fidei, a capite Sanir, & Hermon, a cubilibus leonum; a montibus leopardorum. Libanus λευκασμός, id est, candor interpretatur. Veni ergo sponsa candidissima, de qua alibi dicitur: Quæ est ista, quæ ascendit dealbata, & transit per uiam huius sæculi: ab exordio fidei, & ex sanir, quod interpretatur Deus lucernæ, iuxta illud quod in psalmo legimus: Lucerna pedibus meis uerbum tuum Domine, & lux semitis meis: & Hermō, id est consecratione: & fuge leonum cubilia, & leopardorum montes, qui non possunt mutare uarietatem suam. Fuge, inquit, cubilia leonum, fuge superbiam dæmonum; ut, postquam mihi fueris consecrata, possim tibi dicere: Vulnerasti cor meum, soror mea sponsa uulnerasti cor meum, in uno oculorum tuorum, in uno ornamento colli tui. Quod dicit, huiusmodi est. Non repudio nuptias: habes & sinistrum oculum, quem

Esa. 1

Cant. 2

Cant. 3

Iud. 3

Cant. 3

Eph. 5

Cant. 4

Cant. 3

Psal. 118

Cant. 4

Cant. 4

K k 4 tibi

tibi dedi propter imbecillitatem eorum, qui recta uidere non possunt: sed magis mihi dexter uirginitatis oculus placet: qui si cæcatus fuerit, omne corpus in tenebris est. Ac, ne putaremus eum amorem carnis, & nuptias significare corporeas; illico excludit hunc sensum, & ait: Vulnerasti cor meum soror mea sponsa. Vbi sororis nomen est, suspitio omnis fœdi amoris excluditur. Quam speciosa sunt

Cant. 2 ubera tua a uino: de quibus & supra dixerat: Fratrueles meus mihi, & ego illi, in medio uberum meorum commorabitur, in principali cordis, ubi habet sermo Dei hospitium. Quam speciosa sunt ubera tua uino. Quod istud uinum est, quod sponsæ mammas pulcherrimas facit, & pudicitæ lacte fœcundat? Nempe illud, de quo sponsus in cō

Cant. 5 sequentibus loquitur: Bibi uinum meum cum lacte meo. Manducate proximi mei, & bibite, & inebriamini fratres.

Act. 2 Vnde & Apostoli dicebantur musto pleni: Musto, inquit, **Matth. 9** non uino ueteri, quia uinum nouum in utres novos mittitur: & non ambulabant in uetustate litteræ, sed in nouitate spiritus. Hoc est uinum, quod cum inebriauerit adolescentes, & puellas, statim uirginitatem sitiunt, & in crapu

Zach. 8 lam castitatis eructant, & expletur illud uaticinium Zachariæ, dumtaxat iuxta Hebraicam ueritatem de Ecclesiæ uirginibus prophetantis: Complebuntur infantibus, & puelis ludentibus plateæ eius. Quid enim bonum eius est, & quid pulchrum eius, nisi frumentum electorum, & uinum germinans uirgines? Istæ sunt uirgines, de quibus in quadagesimo quarto psalmo scriptum est: Adducentur regi uirgines post eam, proximæ eius afferentur tibi in lætitia, &

Cant. 4 exultatione: adducentur in templū regis. Sequitur: Hortus conclusus soror mea sponsa: hortus conclusus, fons signatus. Quod clausum est, atque signatum, similitudinem habet matris Domini, matris & uirginis. unde & in sepul-

Luc. 23 cro saluatoris nouo, quod in petra purissima fuerat excisum, nec ante, nec postea quisquam positus est. et tamen hæc uirgo perpetua multarum est mater uirginum. sequi-

Cant. 4 tur enim: Emissiones tuæ paradisi malogranatorum cum fructu

fructu pomorum . in malogranatis & pomis omnium uirtu-
tum significatur in uirginitate concentus . Fratrueis meus
candidus , & rubicundus ; candidus in uirginitate , rubicun-
dus in martyrio . Et quia rubicundus & cādidus est , iccirco
statim additur : Guttur eius dulcedines , & totus cōcupiscen-
tia . Sponsus uirgo laudatus a spōsa uirgine , laudat uicissim
uirginem sponsam , & dicit ei : Speciosi facti sunt gressus tui
in calciamentis filii Aminadab ; quod interpretatur , popu-
li sponte offerentis . uirginitas enim uoluntaria est , & ideo
gressus Ecclesiæ in castitatis pulchritudine collaudantur . Nō
est huius temporis , in morem commentarii omnia de Can-
tico canticorum uirginitatis pandere sacramenta : quia &
hæc ipsa fastidioso lectori nares contractura non ambigo .
Loquatur Esaias , spei nostræ fideiq; mysterium : Ecce uir-
go in utero concipiet , & pariet filium , & uocabis nomen
eius Emantiel . Scio Iudæos opponere solere , in Hebræo
uerbum , *עַלְוָה* , non uirginem sonare , sed adolescentulam .
et reuera uirgo proprie bethula appellatur , adolescentula
autem , uel puella , non halma dicitur , sed naara . Quid est
igitur , quod significat halma ? Absconditam uirginem , id-
est , non solum uirginem , sed cum *ἐπιτάσσει* uirginem :
quia non omnis uirgo abscondita est , nec ab hominum for-
tuito separata conspectu . Denique & Rebecca in Genesi ,
ob nimiam castitatem , & Ecclesiæ typum , quem in sua uir-
ginitate signabat ; halma scribitur , non bethula : sicut ma-
nifestum esse poterit ex sermonibus pueri Abraham , quos
loquitur in Mesopotamia , & dicit : Domine Deus domini
mei Abraham , si tu dirigis uiam meam , per quam ego in-
gredior , ecce , dum stetero super fontem aquæ , uirgo , quæ
egredietur , ut hauriat aquam , & dixero ad eam : Da mihi
paululum aquæ , ut bibam de hydria tua ; & responderit ,
& tu bibe , & camelis tuis hauriam : hæc erit uxor , quam
præparauit Dominus filio Domini mei . In eo enim loco in
quo ait : Virgo , quæ egredietur , ut hauriat aquam , in He-
braico scriptum est *עַלְוָה* halma , idest , uirgo secreta , & ni-
mia parentū diligentia custodita . aut certe ostendant mihi ,
ubi

Cant. 5

Cant. 6

Esa. 7

Gen. 24

ubi hoc uerbo appellantur & nuptæ; & imperitiam confitebor. Ecce uirgo in utero concipiet, & pariet filium. Si non præfertur nuptiis uirginitas: spiritus sanctus cur maritam, cur uiduam non elegit? nam illo tempore erat Anna, filia Phanuelis de tribu Aser, insignis pudicitæ, & semper uacans orationibus & ieiuniis in templo Dei. Si conuersatio tantum, & bona opera, & ieiunia absque uirginitate, spiritus sancti ad se merentur aduentum: potuit & ista mater esse Domini. Curramus ad reliqua. Spreui te, inquit, & despexi, uirgo filia Sion. Quam filiam dixerat, appellauit & uirginem: ne, si tantum filiam nominasset, arbitrareris & nuptam. Hæc est uirgo filia, ad quam alibi dicitur: *Esa. 54* Lætare sterilis, quæ non paris; erumpe, & clama, quæ non parturis: quoniam multi filii desertæ magis, quam eius, quæ habet uirum. Ista est, de qua per Hieremiam loquitur Deus, dicens: Numquid obliuiscetur sponsa ornamenti sui, *Hier. 31* aut uirgo fasciæ pectoralis suæ? De hac in eadem prophetia grande miraculum est, quia femina circumdederit uirum; & uniuersitatis parentem uirginis uenter incluserit. Esto, inquit; nuptiarum & uirginitatis sit diuersa condicio: quid ad hoc potes dicere? Si uirgo & uidua fuerint baptizatæ, & ita permanserint; quæ erit inter utrâque diuersitas? Quod de Petro, & Ioanne, Anna, & Maria dudum diximus, hoc præsentis loco proficiat. Si enim inter uirginem & uiduam baptizatas nihil interest, quia baptisma nouum hominem facit: eadem condicione & scorta, atque prostibula, si fuerint baptizatæ, uirginibus æquabuntur. si enim præteritæ nuptiæ nihil nocent uiduæ baptizatæ: & præteritæ in meretricibus uoluptates, expositaq. publicæ libidini corpora, post lauacrum uirginitatis præmia cōsequuntur. Aliud est, purissimam mentem, & nulla recordatione pollutam Deo iungere; aliud, meminisse amplexuum uiri, fœdæ necessitatis, & quod corpore non agas, recordatione simulare. Hieremias, qui in utero sanctificatus est, & cognitus in uulua matris, ideo hoc priuilegio fruitur, quia uirginitatis erat beatitudini destinatus: & cum omnes capti sint, uasa quoque templi,

templi; Babylonio rege uastante, direpta; iste solus liber Hier. 40
 ab hostibus est, & captiuitatis nescit iniurias, & a uictori-
 bus accepit stipendia; & Nabuzardan, cui de Sanctis sancto-
 rum Nabigchodonosor non præceperat, præcepit de Hiere-
 mia: hoc enim uerum templum Dei est, & hæc Sancta san-
 ctorum; quæ uirginitatis puritate Domino consecrantur.
 At e contrario Ezechiel, qui captiuus tenebatur in Baby- Ezech. 1
 lone, qui tempestatem ab aquilone uenientem uiderat, & Ezech. 24
 turbinem cuncta rapientem, ait: Mortua est uxor mea ad
 uesperam, & feci mane sicut præceptum mihi erat. Prædi-
 xerat enim ei Dominus, quod in die illa aperiretur os eius,
 & loqueretur, & non taceret amplius. Diligenter attende.
 donec uxor uiueret, non habebat libertatem populum com-
 monendi. moritur uxor, & coniugale uinculum soluitur,
 & absque ulla trepidatione semper in officio prophetali est.
 Qui enim liber uocatus est, uere est seruus Christi. Non 1. Cor. 7
 nego, beatas esse uiduas, quæ ita post baptismum manser-
 rint; nec illarum detraho merito, quæ cum uiris in castita-
 te perdurant: sed, sicut hæ maioris apud Deum præmii sunt,
 quam nuptæ coniugali officio seruientes; ita & ipsæ æquo
 animo patiantur uirginitatem sibi præferri. si enim illas sera
 pudicitia, post despumatas corporis uoluptates, erigit con-
 tra maritatas: cur non infra perpetuam castitatem esse se no-
 uerint? Frustra; inquit, hæc loqueris: quia & episcopi, &
 presbyteri, & diaconi, unius uxoris uiri, & habentes filios,
 ab Apostolo constituuntur. Quo modo de uirginibus Apo- 1. Tim. 3
 stolus dicit se non habere præceptum; & tamen dat consi- 1. Cor. 7
 lium, quasi misericordiam consecutus a Domino; & hoc
 agit in omni illa disputatione, ut uirginitatem præferat ma-
 trimonio; & suadet, quod imperare non audet; ne iniice-
 re uideatur laqueum, & plus imponere ponderis, quam po-
 test hominum sustinere natura: ita & in ecclesiastico ordine
 constituendo, quia rudis ex gentibus constituebatur Eccle-
 sia, leuiora nuper credentibus dat præcepta; ne territi ferre
 non possent. Denique & apostoli, & seniores de Hierosoly- Act. 15
 mis litteras mittunt; ut non amplius imponatur oneris iis,
 qui

- qui de gentibus crediderunt, nisi ut abstineant se ab idololatria, & fornicatione, & a sanguine, & a suffocatis: & quasi paruulis atque infantibus lac potum dant, non solidum cibum, nec præcipiunt de continentia: nec de uirginitate significant: nec ad ieiunia prouocant: neque dicunt illud,
- Matth. 10** quod in euangelio ad apostolos dirigitur, ne habeant duas tunicas, ne peram, ne æs in zonis, ne uirgam in manu, ne calciameta in pedibus; aut certe illud: Si uis perfectus esse, uade, & uende omnia tua, & da pauperibus: & ueni sequere me. Si enim adolescens ille, qui se iactauerat, cuncta fecisse, quæ legis sunt, audiens hoc tristis abiit, quia habebat possessiones multas; & pharisæi huiusmodi Domini sententiam subsannabant: quanto magis tanta gentium multitudo, cui summa uirtus erat aliena non rapere, non habebat necesse præceptum de castitate & continentia perpetua, quibus scribebatur, ut abstinerent se ab idolis, & a fornicatione, & in quibus audiebatur fornicatio, & talis fornicatio, quæ nec inter gentes quidem est? Sed & ipsa episcopalis electio mecum facit. non enim dicit: eligatur episcopus, qui unam ducat uxorem, & filios faciat: sed, qui unam habuerit uxorem, & filios in omni subditos disciplina. Certe confiteris non posse esse episcopum, qui in episcopatu filios faciat: alioquin, si deprehensus fuerit, non quasi uir tenebitur, sed quasi adulter damnabitur. Aut permitte sacerdotibus exercere opera nuptiarum, ut idem sint uirgines, quod mariti: aut, si sacerdotibus non licet uxores tangere, in eo sancti sunt, quia imitantur pudicitiam uirginalem. Sed & hoc inferendum. Si laicus, & quicumque fidelis orare non potest, nisi careat officio coniugali: sacerdoti, cui semper pro populo offerenda sunt sacrificia, semper orandum est. si semper orandum est, ergo semper carendum matrimonio. nam & in ueteri lege, qui pro populo hostias offerebant, non solum in domibus suis non erant, sed purificabantur ad tempus ab uxoribus separati, & uinum & licera non bibebant, quæ solent libidinem prouocare. Eliguntur mariti in sacerdotium. non nego: quia non sunt tanti uirgines,

gines, quanti necessarii sunt sacerdotes. Numquid, quia in exercitu fortissimus quisque eligendus est, ideo non assumuntur & infirmiores, cum omnes fortes esse non possint? Si exercitus uiribus tantum constaret, & non etiam numero militum; abiicerentur imbecilliores: nunc & secundarum & tertiarum uirium gradus assumitur; ut turba, & numero exercitus compleatur. Et quo modo, inquires, frequenter in ordinatione sacerdotali uirgo negligitur, & maritus assumitur? Quia forte cetera opera non habet uirginitati congruentia: aut uirgo putatur, & non est: aut est uirginitas infamis: aut certe ipsa uirginitas ei parit superbiam; & dum sibi applaudit de sola corporis castitate, uirtutes ceteras negligit: non fouet pauperes: pecuniae cupidior est. Euenit interdum, ut tristior uultus, adductum superciliū, incessus pomparum ferculis similis, offendant populum, & quia nihil habet, quod reprehendat in uita, habitum solum oderit, & incessum. Multi eliguntur non amore sui, sed alterius odio. In plerisque suffragium meretur sola simplicitas: & alterius prudentiae & calliditati, quasi malitiae, opponitur. Nonnumquam errat plebis uulgiq. iudicium; & in sacerdotibus comprobandis, unusquisque suis moribus fauet; ut non tam bonum, quam sui similem quærat præpositum. Euenit aliquoties, ut mariti, quæ pars maior in populo est, maritis quasi sibi applaudant, & in eo se arbitrentur minores non esse uirginibus, si maritum uirgini præferant. Dicam aliquid, quod forsitan cum multorum offensa dicturus sum: sed boni mihi non irascentur, quia eos peccati conscientia non remordebit. Interdum hoc & pontificum uitio accidit, qui non meliores, sed argutiores in clerum allegunt, & simplices quosque, atque innocentes in habiles putant, uel affinibus & cognatis quasi terrenæ militiæ officia largiuntur, siue diuitum obediunt iussioni: quodque his peius est, illis clericatus donant gradum, quorum sunt obsequiis delinuti. alioqui, si iuxta sententiam Apostoli non erunt episcopi nisi mariti, ipse Apostolus episcopus esse non debuit, qui dixit: Volo autem omnes sic esse, sicut ego 1. Cor. 7.

sum

- sum. Et Ioannes indignus hoc gradu existimabitur, & omnes uirgines, & continentes, quibus quasi pulcherrimis gemmis Ecclesie monile decoratur. Episcopus, & presbyter, & diaconus non sunt meritorum nomina, sed officiorum.
- 1. Tim. 3** rum. Nec dicitur: Si quis episcopatum desiderat, bonum desiderat gradum: sed, Bonum opus desiderat; quod, in maiori ordine constitutus, possit, si uelit, occasionem exercendam habere uirtutum. Oportet ergo episcopum irreprehensibilem esse, ut nulli uitio mancipatus sit: Vnius uxoris uirum: qui unam uxorem habuerit, non habeat: Sobrium, siue, ut melius in Græco dicitur, uigilantem, idest, *νηφελος*: Pudicum; hoc enim significat *σωφρονα*, ornatu & castitate & moribus: Hospitalem; ut imitetur Abraham, & cum peregrinis, immo in peregrinis Christum suscipiat: Doctorem; nihil enim prodest conscientia uirtutum frui, nisi & creditum sibi populum possit instruere, ut ualeat exhortari in doctrina, & eos, qui contradicunt, redarguere: Non uiolentum; quia, qui semper in Sanctis sanctorum est, & qui offert hostias, uinum & siceram non bibit: quia in uino luxuria est: sic bibat episcopus, ut, an biberit, ignoretur: Non percussorem; idest, qui conscientias non percutiat singulorum: neque enim pugilem describit sermo apostolicus; sed pontificem instituit, quid facere non debeat. Docet nunc e regione, quid faciat: Sed modestum, non litigiosum, non cupidum, domum suam bene regentem, filios habentem subditos cum omni castitate. Vide, quanta pudicitia exigatur in episcopo, ut, si filii eius impudici fuerint, ipse episcopus esse non possit; & eodem uitio offendant Deum, quo offendit Heli pontifex, qui corripuerat quidem filios, sed, quia non abiecerat delinquentes, retrorsum cecidit, & mortuus est, lucerna Dei antequam extingueretur. Mulieres similiter pudicas, & reliqua. In omni gradu, & sexu tenet pudicitia principatum. Cernis igitur, quod episcopus, presbyter, & diaconus non ideo sint beati, quia episcopi, uel presbyteri sint; aut diaconi, sed si uirtutes habuerint nominum suorum, & officiorum. alio-
- qui,

qui, si diaconus sanctior episcopo suo fuerit, non ex eo, quod inferior gradu est, apud Christum deterior erit. aut Srephanus diaconus, qui primus martyrio coronatus est, *Act. 7* minor futurus est in regno cælorum multis episcopis, & Timotheo, ac Tito; quos ut subiicere non audeo, ita nec antepone. quo modo in legionibus & exercitu sunt duces, sunt tribuni, sunt centuriones, sunt ferentarii, ac leuis armaturæ, & miles gregarius, & manipuli; commissaq. pugna, uacant nomina dignitatum, & sola fortitudo quæritur: ita in hoc campo, & prælio, quo contra dæmones dimicamus, non quærentur nomina, sed opera; & gloriosior ille sub uero imperatore Christo, non qui nobilior, sed qui fortior est. At dices: Si omnes uirgines fuerint; quo modo stabit humanum genus? Par pari referam. Si omnes uiduæ fuerint, uel in matrimonio continentes; quo modo stirps mortalium propagabitur? hac ratione nihil omnino erit, ne aliud esse desistat. uerbi gratia: Si cuncti philosophi sint, agricolæ non erunt: quid loquar de agricolis? non oratores, non iurisperiti, non reliquarum artium præceptores. si uniuersi principes, quis erit miles? si omnes caput, cuius uocabuntur caput, cum cetera membra defuerint? Vereris, ne, si uirginitatem plures appetierint, cessent lupæ, cessent adulteræ, ne infantes in urbibus uillisq. non uagiāt. Quotidie mæchorum sanguis effunditur: adulteria damnantur: & inter ipsas leges, & secures, ac tribunalia, flagrans libido dominatur. Noli metuere; ne omnes uirgines fiant. difficilis res est uirginitas, & ideo rara, quia difficilis: Multi uocati, pauci electi. incipere; plurimorum est; perseverare, paucorum. unde & grande præmium eorum, qui perseverauerint. Si omnes uirgines esse possent, numquā & Dominus diceret: Qui potest capere, capiat: & Apostolus in *Matth. 19* suadendo non trepidaret: De uirginibus autem præceptum *1. Cor. 7* Domini non habeo. Et cur, inquires, creata sunt genitalia, & sic a conditore sapientissimo fabricati sumus, ut mutuū nostri patiamur ardorem, & gestiamus in naturalem copulam? Periclitamur responsionis uerecundia, & quasi inter duos

duos scopulos, & quasdam necessitatis & pudicitiae συμ-
 πλῆγας, hinc atque inde uel pudoris, uel causae nau-
 fragium sustinemus. si ad proposita respondeamus; pudore
 suffundimur. si pudor imperarit silentium; quasi de loco
 uidebimur cedere, & aduersario ferendi occasionem dare.
 melius est tamen clausis, quod dicitur, oculis, Andabata-
 rum more, pugnare, quam directa spicula clypeo non repel-
 lere ueritatis. Poteram quidem dicere: Quo modo poste-
 rior pars corporis, & meatus, per quem alui stercore ege-
 runt, relegatus est ab oculis, & quasi post tergum positus:
 ita & hic, qui sub uentre est, ad dirigendos humores, & po-
 tus, quibus uenae corporis irrigantur, a Deo conditus est:
 sed quoniam ipsa organa, & genitalium fabrica, & nostra
 feminarumq. discretio, & receptacula uuluae, ad suscipien-
 dos & coalendos foetus condita, sexus differentiam prae-
 dicant; hoc breuiter respondebo. Numquam ergo cessemus
 a libidine; ne frustra huiusmodi membra portemus. cur
 enim maritus se absteineat ab uxore; cur casta uidua perseue-
 ret, si ad hoc tantum nati sumus, ut pecudum more uiua-
 mus? aut quid mihi nocebit, si cum uxore mea alius con-
 cubuerit? Quo modo enim dentiū officium est mandere, &
 in alium ea, quae sunt mansa, transmittere; & non habet
 crimen, qui coniugi suae panem dedit: ita, si genitalium
 hoc est officium, ut semper fruantur natura sua; meam las-
 titudinem alterius uires superent; & uxoris, ut ita dixerim,
 ardentissimam gulam fortuita libido restinguat. Quid sibi au-
 tem uult Apostolus, ut ad continentiam cohortetur, si cō-
 tra naturam est? quid ipse Dominus, qui eunuchorum prae-
 cipit uarietates? Certe Apostolus, qui ad suam nos prouoc-
 at pudicitiam, debet constanter audire, cur portas uere-
 trum o Paule? cur a sexu feminarum barba, pilis, aliaq.
 membrorum qualitate distingueris? cur tuae non intume-
 scunt papillae, non dilatantur renes, non pectus arctatur?
 uox obsoletior est, sermo ferocior, & hirsutius supercilium.
 frustra haec omnia uirorum habes, si complexu non uteris
 feminarum. Compellor aliquid loqui, & insipiens fieri: sed

uos

Matth. 19

1. Cor. 7

nos me; ut loqui audeam, coegistis. Dominus noster, at- *Philip. 2*
 que saluator, qui, cum in forma Dei esset, formam serui di-
 gnatus est assumere, factus obediens patri usque ad mortem,
 mortem autem crucis, quid necesse erat, ut his membris na-
 sceretur, quibus usus non erat? qui certe, ut sexum osten-
 deret, etiam circumcisus est. Cur Ioannē apostolū, & Baptistā
 sua dilectione castrauit, quos uiros nasci fecerat? Qui ergo
 in Christū credimus, Christi sectemur exempla. Et si noue-
 ramus illum iuxta carnem, sed iam nō nouimus eū secundū
 carnem. Certe in resurrectione eadem erit corporum sub-
 stantia, qua nunc utimur, licet auctior gloria. nam & salua-
 tor intantum ipsum corpus habuit post inferos, in quo &
 crucifixus est, ut manus perforatas clauis, & lateris uulnus
 ostenderet. Porro si clausus ingressus est ostiis; quod huma *Ioan. 20*
 norum corporum natura non patitur: ergo & Petrum, & *Matth. 14*
 Dominum negabimus uera habuisse corpora, quia ambula-
 uerunt super aquas; quod contra naturam est. In resurre- *Luc. 20*
 ctione mortuorum, non nubent, neque nubentur, sed si-
 miles erunt angelis. Quod alii postea in cælis futuri sunt,
 hoc uirgines in terra esse cœperunt. Si angelorum nobis si-
 militudo promittitur; inter angelos autem non est sexus di-
 uersitas: aut sine sexu erimus, quod angeli sunt; aut certe,
 quod liquido comprobatur, resurgentes in proprio sexu,
 sexus nō fungemur officio. Verū quid agimus argumentis,
 & propositiones aduersarii callida cupimus responsione supe-
 rare? Vetera trāsierunt, ecce facta sunt omnia noua. Currā
 per apostolorum sententias; & quo modo in Salomonis *2. Cor. 3*
 exemplis breues expositiunculas subdidi, ob intelligendi fa-
 cilitatem; ita & nunc castitatis & continentiae Christianae
 exempla replicabo; & de multis testimoniis quasi unū cor-
 pus efficiam; quo & nihil, quod ad pudicitiam pertineat,
 praetermittam; & nimiae prolixitatis declinem fastidium.
 Scribit inter cetera Paulus apostolus ad Romanos: Quem *Rom. 6*
 ergo fructum habuistis tunc in illis, in quibus nunc erubesci-
 tis? nam finis illorum mors est. nunc uero liberati a pecca-
 to, serui autem Dei facti, habetis fructum uestrum in san-

LI ctifica-

ificationem, finem uero uitam æternam. Puto quod & nuptiarum finis mors sit. Fructus autem sanctificationis, qui uel ad uirginitatem, uel ad continentiam pertinet, uita

Rom. 7 pensatur æterna. Ac deinde: Itaque fratres mei & uos mortificati estis legi per corpus Christi: ut sitis alterius, qui ex mortuis resurrexit: ut fructificemus Deo. cum enim essemus in carne, passionibus, quæ per legem erant, operabantur in membris nostris, ut fructificarent morti: nunc autem soluti sumus a lege mortis, in qua detinebamur, ut seruiamus in nouitate spiritus, & non in uetustate litteræ. Cum, inquit, essemus in carne, & non in nouitate spiritus, sed in uetustate litteræ, faciebamus ea, quæ carnis erant, & fructificabamus morti: nunc autem, quia mortui sumus legi per corpus Christi; fructificemus Deo, ut simus eius, qui ex mortuis resurrexit. Necnon & in alio loco, cum prædixisset: Scio, quia lex spiritualis est: & cum de uoluntate carnis, quod crebro nos impellat facere quod uolumus, latius disputasset, ad extremum intulit: Infelix ego homo, quis me liberabit de corpore mortis huius? gratia Dei per

Rom. 7 Iesum Christum dominum nostrum. Et iterum: Ipse igitur mente seruo legi Dei, carne autem legi peccati. Et nihil damnationis est iis, qui sunt in Christo Iesu, qui non secundum carnem ambulant. Lex enim spiritus in Christo Iesu, liberauit me a lege peccati, & mortis. Ac manifestius in consequentibus docet, Christianos non ambulare secundum carnem, sed secundum spiritum, dicens: Qui enim secundum carnem sunt, quæ sunt carnis, sapiunt: qui uero secundum spiritum, quæ sunt spiritus, sentiunt. nam prudentia carnis mors est: prudentia autem spiritus, uita & pax: quoniam prudentia carnis, inimicitia est in Deum: legi enim Dei non subiicitur: nec enim potest. qui autem in carne sunt, Deo placere non possunt. Vos autem in carne non estis, sed in spiritu; si tamen spiritus Dei habitat in uobis. Et reliqua usque ad illum locum, in quo ait: Ergo fratres debitores sumus non carni, ut secundum carnem uiuamus, si enim secundum carnem uixeritis, moriemini. si autem

tem spiritu facta carnis mortificaueritis, uiuetis. quicumque enim spiritu Dei aguntur, hi filii Dei sunt. si prudentia carnis, inimicitia est in Deum; & qui in carne sunt, Deo placere non possunt: arbitror eos, qui seruiunt officio coniugali, quod prudentiam carnis diligant, & in carne sint. a qua nos retrahens Apostolus, & iungens spiritui, deinceps loquitur: Obsecro uos fratres per misericordiam Dei, ut exhibeatis corpora uestra hostiam uiuentem, sanctam, Deo placentem, rationabile obsequium uestrum. Et nolite conformari huic sæculo, sed reformamini in nouitate sensus uestri, ut probetis quæ sit uoluntas Dei bona, & beneplacens, & perfecta. Dico enim per gratiam, quæ data est mihi, omnibus, qui sunt inter uos; non plus sapere, quàm oportet sapere, sed sapere ad pudicitiam. Non ad sobrietatem, ut male in Latinis codicibus legitur, sed sapere, inquit, ad pudicitiam. siquidem Græce scriptum est, *εἰς τὸ σωφρονεῖν*. Consideremus sententiam Apostoli. Reformamini, inquit, in nouitate sensus uestri, ut probetis, quæ sit uoluntas Dei bona, & beneplacens, & perfecta. Quod dicit, huiuscemodi est. Concedit quidem Deus nuptias, concedit digamiam, & si necesse fuerit, fornicationi & adulterio præfert etiam trigamiam: sed nos, qui corpora nostra exhibere debemus hostiam uiuam, sanctam, placentem Deo, rationabile obsequium nostrum, non quid concedat Deus, sed quid uelit, consideremus; ut probemus, quæ sit uoluntas Dei bona, & beneplacens, & perfecta. Ergo, quod concedit, nec bonum, nec beneplacens est, nec perfectum. Redditq. causas, cur hoc suadeat: Scientes tempus, quia hora est iam nos de somno surgere. nunc autem propior est nostra salus, quam cum credidimus. nox processit, dies autem appropinquauit. Et in extremo: Induimini dominum Iesum Christum, & carnis curæ ne feceritis in desideriis. Aliud est uoluntas Dei, aliud indulgentia. Vnde & ad Corinthios scribens, ait: Ego fratres non potui loqui uobis sicut spiritualibus; sed sicut carnalibus, sicut paruulis in Christo, lac uobis potum dedi,

Rom. 12

Rom. 13

1. Cor. 3

Ll 2 non

1. Cor. 2 non escam : nondum enim poteratis : sed neque nunc potestis : adhuc enim carnales estis . Quia qui animalis est , & non recipit ea , quæ spiritus Dei sunt ; stultitia enim illi est ; nec potest intelligere , quia spiritualiter diiudicatur : iste nõ perfecto castitatis cibo , sed rudi nuptiarum lacte nutritur .
1. Cor. 15 Sicut per hominem mors , sic & per hominem resurrectio mortuorum . Quo modo in Adam omnes morimur ; sic in Christo omnes uiuificabimur . Seruiuius in lege ueteri Adam : seruiamus in euangelio nouo Adam . Factus est enim primus homo Adam in animam uiuentem , & nouissimus Adam in spiritum uiuificatorem . Primus homo de terra terrenus : secundus homo de cælo cælestis . Qualis terrenus , tales & terreni : & qualis cælestis , tales & cælestes . sicut portauimus imaginem terreni , portemus & imaginem cælestis . Hoc autem dico fratres , quia caro & sanguis regnum Dei possidere non possunt , neque corruptio incorruptionem possidebit . Hoc tam clarum est , ut nulla expositione queat manifestius fieri . Caro , inquit , & sanguis regnum Dei possidere non possunt , neque corruptio incorruptionem . Si corruptio ad omnem coitum pertinet ; incorruptio autem proprie castitatis est : præmia pudicitie nuptiæ possidere non possunt .
2. Cor. 5 Scimus enim , quoniam , si terrena domus huius habitationis destructa fuerit , ædificationem habeamus ex Deo , domum non manu factam , sempiternam in cælis . In quo ingemiscimus , habitaculum nostrum , quod de cælo est , superindui cupientes . cupimus enim egredi de corpore , & habitare cum Christo ; propter quod & studiosissime nitimur , siue in corpore , siue extra corpus , placere Deo . Et ut plenius exponeret , quales nos esse uellet , in alio loco docet , dicens : Despondi enim uos uni uiro uirginem castam exhibere Christo . Quod si ad totam Ecclesiam credentium uolueris referre , & in hac despositionem Christi & maritatas , & digamas , & uiduas , & uirgines contineri : hoc quoque pro nobis facit . nam dum omnes ad pudicitiam , & præmium uirginitatis inuitat ; ostendit , cunctis gradibus uirginitatem esse potiozem . Rursumq.

sumq. ad Galatas, Ex operibus, inquit, legis, non iustificabitur omnis caro. Opera legis & nuptiæ sunt, unde & maledicuntur in ea, quæ non habent filios. Quæ si conceduntur etiam in euangelio: aliud est, indulgentiam infirmis tati tribuere; aliud, uirtutibus præmia polliceri. Dicam & ego nuptiatoribus meis, qui post castitatem, & diuturnam continentiam subant ad coitum, & pecudum more lasciuunt: Sic insipientes estis, ut, cum cœperitis spiritu, nunc carne consumamini? Tanta passi estis sine causa? Apostolus, quod continentix quibusdam nodos relaxat, & dimittit frena currentibus, propter infirmitatem carnis hoc facit. Contra quam scribens denuo loquitur: Spiritu ambulare, & desideria carnis non perficietis. Caro enim concupiscit aduersus spiritum, & spiritus aduersus carnem. Non necesse est nunc de operibus carnis dicere: quia longum est, & facile potest de Apostoli epistola sumere, qui uoluerit. dicam tantum de spiritu, cuius fructus sunt, caritas, gaudium, pax, longanimitas, benignitas, bonitas, fides, mæfuetudo, continentia. Omnes uirtutes spiritus, quasi solidissimum fundamentum, & sublime culmen, continentia sustentat, & protegit. Aduersum huiusmodi non est lex. Qui autem sunt Christi, carnem suam crucifixerunt cum uitiis, & concupiscentiis. Si uiuimus spiritu, spiritu & ambulemus. Qui cum Christo carnem nostram, & passionem eius desideriaq. crucifiximus, quid rursus ea, quæ carnis sunt, agere cupimus? Quodcumque seminauerit homo, hoc & metet. Qui seminat in carne sua, de carne metet corruptionem: qui autem seminat in spiritu, de spiritu metet uitam æternam. Existimo, quod qui uxorem habet, quam diu reuertitur ad id ipsum, ne tentet eum satanas, in carne seminet, & non in spiritu. Qui autem in carne seminat, (non ego, sed Apostolus loquitur) metit corruptionem. Elegit nos in Christo Deus pater ante mundi constitutionem, ut essemus sancti, & immaculati coram eo. Ambulauimus in concupiscentiis carnis, facientes uoluntatem eius, & cogitationum: & fuimus filii iræ, sicut & ceteri. nunc autem

Gal. 2

Gal. 3

Gal. 5

Gal. 6

Eph. 8

- conrefuscitauit, & confidere nos fecit in cæleſtibus in Chriſto Ieſu; ut deponamus ſecundum priorem conuerſationē ueterem hominem, qui corrumpitur iuxta deſideria erroris; & aptari nobis illa benedictio poſſit, quæ miſſam ad Eph. 6 ſios epistolam tali fine concludit: Gratia uobis cum omni-
 Philip. 3 bus, qui diligunt Dominum; in incorruptione. Conuerſatio noſtra in cælis eſt. unde & ſaluatorem expectamus dominum noſtrum Ieſum Chriſtū, qui transfigurabit corpus humilitatis noſtræ, conforme fieri corpori gloriæ ſuæ.
 Philip. 4 Quæcumque ergo ſunt uera, quæcumque pudica, quæcumque iuſta, quæcumque ad caſtitatem pertinentia, his copulemur, hæc ſequamur. Reconciliauit nos Chriſtus in corpore ſuo Deo patri per mortem: & exhibuit ſanctos, & immaculatos, & abſque ulla reprehentione coram ſe: in quo & circumciſi ſumus circumciſione non manu facta, in expoliationem corporis carnis, ſed circumciſione Chriſti, conſepulti ei in baptiſmo, in quo & conſurreximus. Si ergo
 Col. 3 conſurreximus cum Chriſto; ea, quæ ſurſum ſunt, quæramus, ubi Chriſtus eſt in dextera Dei ſedens; ea ſapiamus, quæ ſurſum ſunt, non quæ ſuper terram. mortui enim ſumus, & uita noſtra abſcondita eſt cum Chriſto in Deo. cū
 1. Tim. 2 enim Chriſtus apparuerit uita noſtra, tunc & nos apparebi-
 Tit. 2 mus cum ipſo in gloria. Nemo, militans Deo, implicat ſe negotiis ſæcularibus, ut poſſit ei placere, qui ſe eligit. apparuit enim gratia Dei ſaluatoris omnibus hominibus, erudiens nos, ut, abnegantes impietatem & ſæcularia deſideria, caſte, & iuſte, & pie uiuamus in præſenti ſæculo. Dies me deficiet, ſi uoluerō omnia caſtitalis de Apoſtolo præcepta memorare. Iſta ſunt, de quibus ad apoſtolos Domi
 Ioan. 16 nus loquebatur: Adhuc multa habeo uobis dicere; ſed nō poteſtis ea portare modo. Cum autem uenerit ille ſpiritus ueritatis, docebit uos omnem ueritatem. Poſt crucē Chri-
 Act. 21 ſti, ſtatim in Actis apoſtolorum una domus Philippi euan-
 Act. 10 gelixæ quadrigam producit uirginum filiarum: ut Cæſarea, in qua ex gentibus eccleſia per centurionem Cornelium fuerat dedicata, etiam uirginum puellarum præberet exempla.
 Cumq.

Cumq; Dominus in euangelio dixerit; Lex & prophetæ, *Luc. 16*
 usque ad Ioannem: istæ, quia uirgines erant, etiam post
 Ioannem prophetasse referuntur. neque enim poterant
 ueteris testamenti lege retineri, quæ uirginitatis fulserant cla-
 ritate. Transeamus ad Iacobum, qui frater Domini diceba-
 tur, tantæ sanctitatis, tantæq; iustitiæ, & perpetuæ uirgini-
 tatis, ut Iosephus quoque, historicus Iudæorum, propter
 huius necem Hierosolymam subuersam referat. Hic pri-
 mus episcopus ex Iudæis Hierosolymæ credentis ecclesiæ,
 ad quem Paulus cum Tito, Barnabaq. pergebat, loquitur *Act. 15*
 in epistola sua: Nolite errare fratres mei dilecti. Omne da- *Gal. 2*
 tum bonum, & omnis perfecta donatio desursum est, de- *Iacob. 1*
 scendens a patre luminum, apud quem non est differentia,
 aut conuersionis obumbraculum. Volens genuit nos uer-
 bo ueritatis, ut simus primitiæ creaturarum eius. Virgo
 mystice uirginitatem docet. Omne perfectum donum de-
 sursum descendit, ubi non sunt nuptiæ, & descendit non a
 quolibet, sed a patre luminum, qui dicit ad apostolos:
 Vos estis lux mundi, apud quem non est differentia Iudæi, *Matth. 5*
 siue gentilis; nec illa umbra, quæ uersabatur in lege, pre-
 mit eos, qui de nationibus crediderunt: sed uerbo nos ge-
 nuit, & uerbo ueritatis: quia umbra, & imago, & species
 quædam ueritatis præcessit in lege, ut simus primitiæ crea-
 turarum eius. Et quo modo ipse primogenitus ex mortuis
 omnes in se mortuos suscitauit: sic ipse uirgo primitias uir-
 ginum suorum in se uirgine dedicauit. Petrus quoque quid *1. Petr. 1*
 deuocatione gentium sentiat, contemplemur: Benedictus,
 inquit, Deus & pater domini nostri Iesu Christi, qui, se-
 cundum magnam misericordiam suam, regenerauit nos in
 spem uitæ, per resurrectionem Iesu Christi ex mortuis, in
 hereditatem incorruptam, & immaculatam, & immarcessi-
 bilem, quæ seruatur in cælis; in uos, qui uirtute Dei custo-
 dimini per fidem; in salutem, quæ præparata est reuelari in
 tempore nouissimo. Vbi incorrupta prædicatur hereditas,
 & immaculata, & immarcessibilis, & præparata in cælis,
 & in tempus nouissimum reseruata, & spes uitæ æternæ,

Ll 4 quando

quando non nubent, neque nubentur, ibi aliis uerbis uirginitatis priuilegia describuntur. nam & in sequentibus hoc ipsum docet: Propter hoc accincti lumbos mentis uestræ, uigilantes perfecte, sperate in eam gratiam, quæ uobis deferenda est in reuelatione Iesu Christi. Quasi filii obedientiæ non conformemini prioribus ignorantiae uestræ desideriis, sed secundum eum, qui uos uocauit, sanctum & ipsi sancti estote, in omni conuersatione. scriptum est enim:

Leuit. 19 Sancti estote, quia ego sanctus sum. Neque enim corrupti-

1. Petr. 1 bili auro & argento redempti sumus, sed pretioso sanguine immaculati agni Iesu Christi, ut calificemus animas nostras in obedientia ueritatis, renati non ex coitu corruptibili, sed ex incorruptione, per uerbum uiuentis Dei, & permanentis; & sicut lapides uiui ædificemur in domum spirituales, sanctum sacerdotium, offerentes spirituales uictimas, per Christum dominum nostrum. nos enim sumus genus electum, regale sacerdotium, gens sancta, populus acquisitionis. Christus pro nobis carne mortuus est. Ar-

1. Petr. 4 memur eadem conuersatione, qua Christus: quoniam, qui passus est in carne, quieuit a peccato; ut nequaquam in desideriis hominum, sed in uoluntate Dei reliquum in carne tempus exigamus. sufficit enim nobis præteritum tempus, quando ambulauimus in luxuriis, & desideriis, ceterisque uitiis. Grandia nobis, & pretiosa uirginitatis promissa donauit; ut per hanc efficiamur diuinæ consortes naturæ, fugientes eam, quæ in mundo est, concupiscentiam

2. Petr. 2 corruptionis. Nouit Dominus pios de tentatione eripere, & iniquos cruciandos in diem reseruare iudicii, præcipue eos, qui post carnem in desideriis pollutionis ambulant, & dominationes despiciunt, audaces, & procaces. isti enim, quasi irrationabilia iumenta, in uentrem, & libidinem proni sunt, blasphemantes; qui & in corruptione sua corrumpuntur; recipientque mercedem iniquitatis luxuriam; qui putant delicias esse, iniustitiam, sordes, & maculas, & nihil aliud nisi de uoluptatibus cogitantes; qui habent oculos plenos adulterio, & insatiabili libidine, & decipiunt animas necdum

necdum Christi caritate robustas . loquuntur enim uerba tu-
 mentia , & indoctos facile illecebris carnis irretiunt , repro-
 mittentes eis libertatem , cum ipsi serui uitiorum sint , at-
 que luxuriæ , & corruptionis . unusquisque enim ei subiacet
 passioni , a qua uincitur . Quod si , fugientes coinquinatio-
 nes mundi per scientiam saluatoris nostri Iesu Christi , iis-
 dem rursus superantur , quæ ante superauerant : facta sunt
 eis nouissima peiora prioribus : meliusq. eis erat , non nos-
 se uiam iustitiæ , quam post agnitionem retrorsum conuer-
 ti , & relinquere sanctum mandatũ , quod eis traditum fue-
 rat : completumq. est in eis uerissimum illud prouerbium :
 Canis reuersus ad uomitum suum : & , sus lota in uoluta-
 bro luti . Nolui omnem locum secundæ Petri epistolæ po-
 nere , ne longum facerem ; sed tantũmodo ostendi , spiritus
 sancti uaticinio huius temporis & doctores , & hæresim præ-
 nunciatam . Denique manifestius eos denotat , dicens : Ve 2 .Pet. 3
 nient in nouissimis diebus illufores seducentes , iuxta pro-
 pria desideria ambulantes , &c. Descripsit sermo apostoli-
 cus Iouinianum loquentem buccis tumentibus , & inflata
 uerba trutinantem , repromittentem in cælis libertatem ;
 cum ipse corruptionis seruius sit , atque luxuriæ , canis reuer-
 tens ad uomitum suum . nam cum monachum esse se ia-
 ctiter ; & post fordidam tunicam , & nudos pedes , & ciba-
 rium panem , & aquæ potum , ad candidam uestem , & niti-
 dam cutem , ad mulsum , & elaboratas carnes , ad iura Api-
 tii , & Paxami , ad balneas quoque , ac fritillas , & popinas
 se conferat : manifestum est , quod terram cælo , uitia uirtu-
 tibus , uentrem præferat Christo , & purpuram coloris eius
 putet regna cælorum . Et tamen iste formosus monachus ,
 crassius , nitidus , dealbatus , & quasi sponsus semper incedēs ,
 aut uxorem ducat , ut æqualem uirginitatem nuptiis pro-
 bet : aut , si non duxerit , frustra contra nos uerbis agit , cū
 opere nobiscum sit . Sed & Ioannes in eadem uerba con- 1 .Ioan. 2
 cordat : Nolite diligere mundum , neque ea , quæ in mundo
 sunt . Si quis diligit mundum , non est caritas patris in eo :
 quoniam omne , quod in mundo est , desiderium carnis est ,

& desiderium oculorum, & superbia huius uitæ, quæ non est de patre, sed de mundo est. Et: Mundus præterit, & desiderium eius: qui autem facit uoluntatem Dei, manet in æternum. Mādātum nouum scripsi uobis; quod est uerissimum & in Christo, & in nobis: quia tenebræ præterierunt, & lux iam lucet. Et rursum: Carissimi nunc filii Dei sumus, & necdum apparuit quid futuri sumus. Scimus autem, quia, cum apparuerit, similes ei erimus: quoniam uidebimus eum, sicuti est: et omnis, qui habet hanc spem, castificat semet ipsum, sicut & ille castus est. In hoc perfecta est nostra caritas, si fiduciam habeamus in die iudicii, ut, quo modo ille est, sic & nos simus in hoc sæculo. Epistola quoque Iudæ tale quid significat. Odientes & carnis pollutam tunicam. Legamus Apocalypsim Ioannis; & ibi reperiemus agnum super montem Sion, & cum eo centum quadragintaquattuor millia signatorū, habentium nomen eius, & nomen patris eius scriptum in frontibus suis, qui cantant canticum nouum: & nemo potest dicere canticum illud, nisi ii, qui empti sunt de terra. Isti sunt, qui cum mulieribus se non coinquinauerunt: uirgines enim permanserunt. hi sequuntur agnum, quocumque uadit. Empti sunt enim ex hominibus primitiæ Deo, & agno; & in ore ipsorum nō est inuentum mendacium; & sine macula sunt. De singulis tribubus, excepta tribu Dan, pro qua reponitur tribus Leui, duodena millia uirginum signatorum creditura dicuntur, qui cum mulieribus non sunt coinquinati. Ac ne putaremus de iis dici, qui scorta non norunt, statim intulit: Virgines enim permanserunt. Ex quo ostendit, omnes, qui uirgines non permanserunt, ad comparisonem purissimæ & angelicæ castitatis, & ipsius domini nostri Iesu Christi esse pollutos. Hi sunt, qui cantant canticum nouum, quod nemo potest canere, nisi qui uirgo est. Hi sunt primitiæ Dei, & agni, & sine macula. si uirgines primitiæ Dei sunt: ergo uiduæ, & in matrimonio continentes erunt post primitias, idest, in secundo & tertio gradu; nec prius perditus populus saluari poterit, nisi tales hostias castitatis Deo obtu-

obtulerit, & immaculatum agnum purissimis uictimis reconciliauerit. Infinitum est, de euangelio decem uirginum *Matth. 25* exponere sacramentum, quinque stultarum, & quinque sapientum. hoc solum nunc dico, quod quo modo absque ceteris operibus uirginitas sola non saluat, sic omnia opera absque uirginitate, puritate, continentia, castitate, imperfecta sunt. ex quo nequaquam nos illud poterit impedire, quod aduersarius obiicit, fuisse Dominum in Cana Galilææ, *Ioan. 2* & nuptiarum festa celebrasse, quando aquas uertit in uinum. *Luc. 2* Hoc enim breuissime respondebo, quod, qui octaua die circumcisisus est, & pro quo par turturum & duo pulli columbarum die purgationis oblatis sunt, cum ceteris, antequam pateretur, Iudaicam consuetudinem comprobauit, ne illis occasionem iuste se interficiendi tribuere uideretur quasi legem destruens, damnansq. naturam. Quamquam & hoc pro nobis faciat. Qui enim semel uenit ad nuptias, semel docuit esse nubendum. Et tunc uirginitati posset officere, si nuptias post uirginitatem & uiduitatis castimoniam non in gradu tertio poneremus. nunc autem, cum hæreticorum sit damnare coniugia, & Dei spernere condicionem; quidquid de laude dixerit nuptiarum, libenter audimus. Eccllesia enim matrimonia non damnat, sed subiicit; nec abiicit, sed dispensat; sciens, ut supra diximus, in domo magna non solum esse uasa aurea, & argentea, sed & lignea, & fictilia; & alia esse in honorem, alia in contumeliam; & quicumque se mundauerit, eum futurum esse uas honorabile, & necessarium in omne opus bonum præparatum. Satis abundeq. Christianæ pudicitie & uirginitatis angelicæ de diuinis libris exempla præbuimus: sed quoniam intellexi in commentariis aduersarii, prouocari nos etiam ad mundi sapientiam, quod numquam hoc genus in sæculo sit probatum, & nouum dogma contra naturam religio nostra prodiderit; percurram breuiter Græcas, & Latinas, barbarasq. historias; & docebo, uirginitatem semper tenuisse pudicitie principatum. Referunt fabulæ, Atalantam Calydoniam uirginem semper in uenatibus, semper in siluis, nō tumen-

tumentes uteros feminarum, fastidiaque conceptuum, sed expeditam & castam amasse uirtutem. Harpalicen quoque, uirginem Thraciam, insignis poeta describit, & reginam Volscorum Camillam; quam Turnus, cui auxilio uenerat, laudare uolens, non amplius habuit, quod diceret, nisi uirginem nominaret, O decus Italiae uirgo. Chalcæcus quoque filia illa λέω, uirgo perpetua, pestilentiam patriæ scribitur spontanea morte soluisse, & Iphigeniæ uirginis sanguis aduersos placasse uentos. Quid referam Sibyllas Erithræam, atque Cumanam, & octo reliquas? (nam Varro decem fuisse autumat) quarum insigne uirginitas est, & uirginitatis præmium diuinitas. Quod si Aeolici genere sermonis sibylla θεοβέλη appellatur: recte consilium Dei sola scribitur nosse uirginitas. Cassandram quoque, & Chrysein, uates Apollinis, ac Iunonis, uirgines legimus. Et sacerdotes Dianæ Tauricæ, & Vestæ, innumerabiles extiterunt. quarum una Minutia propter suspicionem stupri uirginitas defossa est, iniusta, ut reor, pœna, nisi grande crimen putaretur læsa uirginitas. Certe, Romanus populus quanto honore uirgines semper habuerit, hinc apparet, quod consules, & imperatores, & in curribus triumphantes, qui de superatis gentibus trophæa referebant, & omnis dignitatis gradus eis de uia cedere solitus sit. Claudia, uirgo Vestalis, cum in suspicionem uenisset stupri, & simulacrum matris Idææ in uado Tiberis hæreret, ad comprobendam pudicitiam suam fertur cingulo duxisse nauem, quam multa milia hominum trahere nequiuerant. Melius tamen, inquit Lucani poetæ patruus, cum illa esset actum, si hoc, quod euenit, ornamentum potius exploratæ fuisset pudicitiae, quam dubiæ patrocinium. Nec mirū hoc de hominibus; cum Mineruam quoque, & Dianam uirgines deas finxerit error gentilium; & inter duodecim signa cæli, quibus mundum uolui putant, uirginem collocarint. Magna iniuria nuptiarum, ut ne inter scorprios quidem, & centauros, & canes, & pisces, & ægocerotas uxorem maritumque contraherint. Triginta Atheniensium tyranni, cum Phidonem in conuiuio

cōuiuio necassent, filias eius uirgines ad se uenire iusserunt, & scortorum more nudari, ac super pauimenta, patris sanguine cruentata, impudicis gestibus ludere: quæ, paulisper dissimulato doloris habitu, cum temulentos conuiuas cernerent, quasi ad requisita naturæ egredientes, inuicem se cōplexæ præcipitauerunt in puteum, ut uirginitatem morte seruarent. Demotionis, Areopagitarum principis, uirgo filia, audito sponsi Leosthenis interitu, qui bellum Lamiacū concitarat, se interfecit; asserens, quamquam intacta esset corpore, tamen, si alterum accipere cogeretur, quasi secundum acciperet, cum priori mente nupfisset. Spartiatæ, & Messenii diu inter se habuere amicitias, intantum, ut ob quædam sacra etiam uirgines ad se mutuo mitterent. quodam igitur tempore, cum quinquaginta uirgines Lacedæmoniorum Messenii uiolare tentassent, de tanto numero ad stuprum nulla consensit, sed omnes libentissime pro pudicitia occubuerunt. quamobrem graue bellum, & longissimum concitatum est; & post multum temporis Mameritia subuersa est. Aristoclides, Orchomeni tyrannus, admauit uirginem Stymphalidem: quæ cum, patre occiso, ad templum Dianæ confugisset, & simulacrum eius teneret, nec ui posset auelli, in eodem loco confossa est: ob cuius necem tanto omnis Arcadia dolore commota est, ut bellum publice sumeret, & necem uirginis ulcisceretur. Aristomenes Messenius, uir iustissimus, uictis Lacedæmoniis, & quodam tempore nocturna sacra celebrantibus, quæ uocabantur Hiacynthina, rapuit de choris ludentium uirgines quindecim; & tota nocte gradu concito fugiens excessit de finibus Spartanorum: cumq. eas comites eius uellent uiolare; monuit, quantum potuit, ne hoc facerent; & ad extremum quosdam non parentes interfecit, ceteris metu coercitis. redemptæ postea a cognatis puellæ, cum Aristomenem uiderent cædis reum fieri, tamdiu ad patriā non sunt reuersæ, quamdiu iudicum aduolutæ genibus defensores pudicitæ suæ cernerent absolutum. Quo ore laudandæ sunt Scedasi filia in Leuctris Bœotia, quas traditum est,

est, absente patre, duos iuuenes prætereuntes iure hospitii suscepisse? qui multum indulgentes uino, uim per noctem intulere uirginibus: quæ, amissæ pudicitia nolentes superuiuere, mutuis conciderunt uulneribus. Iustum est & Locridas uirgines non tacere: quæ cum Ilium mitterentur ex more per annos circiter mille, nulla obsceni rumoris, & pollutæ uirginitatis ulla fabulam dedit. Quis ualeat silentio præterire septem Milesias uirgines? quæ, Gallorum impetu cuncta uastante, ne quid indecens ab hostibus sustinerent, turpitudinem morte fugerunt, exemplum sui cunctis uirginibus relinquentes, honestis mentibus magis pudicitiam curæ esse, quam uitam. Nicanor, uictis Thebis, atque subuersis, unius uirginis captiua amore superatus est: cuius coniugium expetens, & uoluntarios amplexus, quod scilicet captiua optare debuerat, sensit pudicis mentibus plus uirginitatem esse, quam regnum; & interfectam propria manu, flens & lugens, amator tenuit. Narrant scriptores Græci, & aliam Thebanam uirginem, quam hostis Macedo corruerat, dissimulasse paulisper dolorem, & uiolatorem uirginitatis suæ iugulasse postea dormientem, seq. interfecisse gladio; ut nec uiuere uoluerit post perditam castitatem, nec ante mori, quam sui ultrix existeret. Apud Gymnosophistas Indiæ, quasi per manus huius opinionis auctoritas traditur, quod Buddam, principem dogmatis eorum, e latere suo uirgo generarit. Nec hoc mirum de barbaris; cum Minervam quoque de capite Iouis, & Liberum patrem de femore eius procreatos, doctissima finxerit Græcia. speusippus quoque, sororis Platonis filius, & Clearchus in laude Platonis, & Anaxilides in secundo libro Philosophiæ, Perictionem, matrem Platonis, phantasmate Apollinis oppressam ferunt; & sapientiæ principem non aliter arbitrantur, nisi de partu uirginis editum. Sed & Timæus scribit Pythagoræ uirginem filiam choro uirginum præfuisse, & castitatis eas instituisse doctrinis. Diogenes Socraticus quinque filias dialecticas insignis pudicitia habuisse narratur; de quibus & Philo, Carneadis magister,

ster, plenissimam scribit historiam. Ac ne nobis Dominum saluatorem de uirgine procreatum Romana exprobraret potentia; auctores urbis & gentis suæ Ilia uirgine & Marte genitos arbitrantur. Hæc de uirginibus sæculi, currens per multiplices historias, & properans sermo perstrinxerit. Veniam ad maritatas; quæ, mortuis, uel occisis uiris, superuiuere noluerunt, ne cogerentur secundos nosse concubitus; & quæ mire unicos amauerunt maritos; ut sciamus digamiam apud ethnicos etiam reprobari. Dido, soror Pygmalionis, multo auri & argenti pondere congregato, in Africam nauigauit, ibiq. urbem Carthaginem condidit: & cum ab Iarba, rege Libyæ, in coniugium peteretur, paulisper distulit nuptias, donec conderet ciuitatem: nec multo post extructa in memoriam mariti quondam Sichæi pyra, maluit ardere, quam nubere. Casta mulier Carthaginem condidit, & rursus eadem urbs in castitatis laude finita est. nam Hasdrubalis uxor, capta, & incensa urbe, cum se cerneret a Romanis capiendam esse, apprehensis ab utroque latere paruulis filiis, in subiectum domus suæ deuolauit incendium. Quid loquar Nicerati coniugem? quæ impatiens iniuriæ uiri, mortem sibi ipsa consciiuit; ne triginta tyrannorum, quos Lysander, uictis Athenis, imposuerat, libidinem sustineret. Artemisia quoque, uxor Mausoli, insignis pudicitie fuisse perhibetur. quæ cum esset regina Carie, & nobilium poetarum atque historicorum laudibus prædicetur; in hoc uel maxime effertur, quod defunctum maritum sic semper amauit, ut uiuum; & miræ magnitudinis extruxit sepulcrum, intantum, ut usque hodie omnia sepulcra pretiosa ex nomine eius Mausolea nuncupentur. Teuta, Illyricorum regina, ut longo tempore uiris fortissimis imperaret, & Romanos sæpe frangeret, miraculo utique meruit castitatis. Indi, ut omnes pene barbari, uxores plurimas habent. apud eos lex est, ut uxor carissima cum defuncto marito cremetur. hæc igitur contendunt inter se de amore uiri: & ambitio summa certantium est, ac testimonium castitatis, dignam morte decerni. itaque

itaque uictrix in habitu ornatuq. pristino iuxta cadauer accu-
bat, amplexans illud, & deosculans, & suppositos ignes
pudicitiae laude contemnens. Puto, quae sic moritur, secun-
das nuptias non requirit. Alcibiades ille Socraticus, uictis
Atheniensibus, fugit ad Pharnabazum. qui, accepto pre-
tio a Lysandro, principe Lacedaemoniorum, iussit eum in-
terfici. cumq. suffocato caput esset ablatum, & missum Ly-
sandro in testimonium caedis expletæ; reliqua pars corpo-
ris iacebat insepulta. sola igitur concubina, contra crude-
lissimi hostis imperium, inter extraneos, & imminente dis-
crimine, funeri iusta perfoluit, mori parata pro mortuo,
quem uiuum dilexerat. Inuitentur matronæ, & matronæ
Christianæ, saltem concubinarum fidem; & præstent libe-
ræ, quod captiua seruauit. Strato, regulus Sidonis, ma-
nu propria se uolens confodere, ne imminentibus Persis lu-
dibrio foret, quorum foedus Aegyptii regis societate negle-
xerat; retrahebatur formidine, & gladium, quem arripue-
rat, circumspectans, hostium pavidus expectabat aduen-
tum. quem iam iamq. capiendum uxor intelligens, extor-
sit acinacem de manu, & latus eius transuerberauit; com-
positoq. ex more cadaueri se moriens superiecit, ne post uir-
ginalia foedera alterius coitum sustineret. Xenophon in Cy-
ri maioris scribit infantia, occiso Abradote uiro, quem Pan-
thea uxor miro amore dilexerat, collocasse se iuxta corpus
lacerum, &, confosso pectore, sanguinem suum mariti in-
fudisse uulneribus. Iustam causam regis occidendi putauit
uxor, quam maritus nudam amico suo & ignorantem mon-
strauerat. iudicauit enim se non amari, quæ & alteri posset
ostendi. Rhodogune, filia Darii, post mortem uiri, nutri-
cem, quæ illi secundas nuptias suadebat, occidit. Alcestin
fabulæ ferunt pro Admieto sponte defunctam: & Penelo-
pes pudicitia Homeri carmen est. Laodamia quoque poe-
tarum ore cantatur, occiso apud Troiam Protefilao, no-
luisse superuiuere. Ad Romanas feminas transeam, & pri-
mam ponam Lucretiam: quæ uiolatæ pudicitiae nolens su-
peruiuere, maculam corporis cruore deleuit. Duellius,
qui

qui primus Romæ nauali certamine triumphauit, Biliam uirginem duxit uxorem, tantæ pudicitie, ut illo quoque sæculo pro exemplo fuerit, quo impudicitia monstrum erat, non uitium. is iam senex, & trementi corpore, in quodâ iurgio audiuit exprobrari sibi os foetidum; & tristis se domum contulit: cumq. uxori questus esset, quare nunquam se monuisset, ut huic uitio mederetur; Fecissem, inquit illa, nisi putassem omnibus uiris sic os olere. Laudanda in utroque pudica & nobilis femina, & si ignorauit uitium uiri, & si patienter tulit, & quod maritus infelicitatem corporis sui non uxoris fastidio, sed maledicto sensit inimici. Certe, quæ secundum ducit maritum, hoc non potest dicere. Marcia, Catonis filia minor, cum quæreretur ab ea, cur post amissum maritum denuo non nuberet; respondit, non se inuenire uirum, qui se magis uellet, quam sua. quo dicto ostendit, diuitias magis in uxoribus eligi solere, quam pudicitiam; & multos non oculis, sed digitis uxores ducere. optima sane res, quam avaritia conciliat. Eadem cum lugeret uirum; & matronæ ab ea quærent, quem diem haberet luctus ultimum; ait, quem & uitæ. Arbitror, quæ ita uirum quærebat absentem, de secundo matrimonio nō cogitabat. Brutus Porciam uirginem duxit uxorem, Marciam Cato non uirginem: sed Marcia inter Hortensium Catonemq. discurrit: & sine Catone uiuere Marcia potuit, Porcia sine Bruto non potuit. magis enim se unicis uiris applicant feminae: & nihil aliud nosse, magnum arctioris indulgentiæ uinculum est. Anniam cum propinquus moneret, ut alteri uiro nuberet: esse enim ei & ætatem integrā, & faciem bonam: nequaquam, inquit, hoc faciam. si enim uirum bonum inuenero, nolo timere ne perdam: si malū, quid necesse est post bonum pessimum sustinere? Porcia minor, cum laudaretur apud eam quædam bene morata, quæ secundum habebat maritum, respondit: Felix & pudica matrona, numquam præterquam semel nubit. Marcella maior rogata a matre sua, gauderet ne se nuplisse, respondit: ita ualde, ut amplius nolim. Valeria, Messallarum

M m foror,

fotor, amisso Seruio uiro, nulli uolebat nubere: quæ interrogata cur hoc faceret, ait sibi semper maritum Seruium uiuere. Sentio in catalogo feminarum multo me plura dixisse, quam exemplorum patitur consuetudo, & a lectore erudito iuste posse reprehendi: sed quid faciam, cum mihi mulieres nostri temporis Apostoli ingerant auctoritatem; & necdum elato funere prioris uiri, memoriter digamix præcepta decantent? ut, quæ Christianæ puditiæ despiciunt fidem, discant saltem ab ethnicis castitatem. Fertur aureolus Theophrasti liber de nuptiis, in quo quærit, an uir sapiens ducat uxorem: et cum definisset, si pulchra esset, si bene morata, si honestis parentibus, si ipse sanus, ac diues, sic sapientem aliquando inire matrimonium, statim intulit: Hæc autem in nuptiis raro uniuersa concordant. nõ est ergo uxor ducenda sapienti. Primum enim impediri studia philosophiæ, nec posse quemquã libris & uxori pariter inseruire. Multa esse, quæ matronarum usibus necessaria sint, pretiosæ uestes, aurum, gemmæ, sumptus, ancillæ, supellex uaria, lecticæ, & esseda deaurata. Deinde per noctes totas garrulæ conuersiones: Illa ornatio procedit in publicum; hæc honoratio ab omnibus: ego in conuentu feminarum misella despicio. Cur aspiciebas uicinam? quid cum ancillula loquebaris? de foro ueniens quid attulisti? Non amicum habere possumus, non sodalem. Alterius amorem, suum odium suspicatur. Si doctissimus præceptor in qualibet urbium fuerit, nec uxorem relinquere, nec cum sarcina ire possumus. Pauperem alere, difficile est: diuitem ferre, tormentum. Adde, quoniam nulla est uxoris electio, sed, qualiscumque obuenerit, habenda: si iracunda, si fatua, si deformis, si superba, si foetida: quodcumque uitii est, post nuptias discimus. Equus, asinus, bos, canis, & uilissima mancipia, uestes quoque, & lebetes, sedile ligneum, calix, & urceolus fictilis probantur prius, & sic emuntur: sola uxor non ostenditur; ne ante displiceat, quam ducatur. Attendenda semper eius est facies, & pulchritudo laudanda: ne, si alteram aspexeris, se existimet displicere.

cere. Vocanda domina, celebrandus natalis eius, iurandum per salutem illius: ut sit superstes, optandum: honoranda nutrix eius, & gerula, seruus, patrimus, & alumnus, & formosus affecla, & procurator calamistratus, & in longam securamq. libidinem exectus spado: sub quibus nominibus adulteri delitescunt. quoscumque illa dilexerit, ingratis amandi. Si totam domum regendam ei commiseris; seruiendum est. si aliquid tuo arbitrio reseruaueris; fidem sibi haberi nō putabit, sed in odium uertetur, ac iurgia; & nisi cito cōsulueris, parabit uenena. Anus, & aruspices, & hariolos, & institores gēmarum sericarumq. uestiū si intromiseris, periculum pudicitiae est; si prohibueris, suspicionis iniuria. Verum quid prodest etiā diligens custodia, cum uxor seruari impudica non possit, pudica non debeat? Infida enim custos est castitatis necessitas: & illa uere pudica dicenda est, cui licuit peccare, si uoluit. Pulchra cito adamat, foeda facile concupiscit. Difficile custoditur, quod plures amant. Molestum est possidere, quod nemo habere dignetur. Minore tamen miseria deformis habetur, quam formosa seruatur. Nihil tutum est, in quod totius populi uota suspirant. Alius forma, alius ingenio, alius facietis, alius liberalitate sollicitat. Aliquo modo, uel aliquando expugnatur, quod undique incessitur. Quod si, propter dispensationem domus, & languoris solatia, & fugam solitudinis ducuntur uxores: multo melius seruus fidelis dispensat, obediens auctoritate domini, & dispensationi eius obtemperans, quam uxor: quae in eo se exillimat dominam, si aduersum uiri faciat uoluntatem, idest, quod placet, nō quod iubetur. Assidere autem aegrotanti magis possunt amici, & uernulae beneficiis obligati, quam illa, quae nobis imputat lacrymas suas; & hereditatis spe uendit iluuiem; & solitudinem iactans, languentis animum desperatione conturbat. Quod si ipsa languerit; coaegrotandum est, & numquam ab eius lectulo recedendum: aut, si bona fuerit & sua uis uxor, quae tamen rara auis est; cum parturiente gemimus, cum periclitante torquemur. Sapiens autem num-

M m 2 quam

quam solus esse potest : habet secum omnes , qui sunt ,
 quique umquam fuerunt boni ; & animum liberum , quocum-
 que uult , transfert : quod corpore non potest , cogitatione
 complectitur ; & , si hominum inopia fuerit , loquitur cum
 Deo : numquam minus solus erit , quam cum solus fuerit .
 Porro , liberorum causa uxorem ducere , ut uel nomen no-
 strum non intereat , uel habeamus senectutis praesidia , & cer-
 tis utamur heredibus ; stolidissimum est . quid enim ad nos
 pertinet recedentes e mundo , si nomine nostro alius nomi-
 netur ; cum & filius non statim patris uocabulum referat ;
 & innumerabiles sint , qui eodem appellentur nomine ; aut
 quae senectutis auxilia sunt , enutrire domi , qui aut prior te
 forte moriatur , aut peruersissimis sit moribus ; aut certe ,
 cum ad maturam aetatem uenerit , tarde ei uidearis mori ?
 Heredes autem meliores , & certiores amici sunt , & propin-
 qui , quos iudicio deligas , quam quos , uelis nolis , habere
 cogaris . licet certior hereditas sit , dum adiuuis , bene abuti
 substantia tua , quam tuo labore quaesita in incertos usus re-
 linquere . Hæc & huiusmodi Theophrastus differens , quæ
 non suffundat Christianorum , quorum conuersatio est in
 cælis , qui quotidie dicunt : Cupio dissolui , & esse cū Chri-
 sto ? Heredem nimirum desiderabit hominē coheres Chri-
 sti : & optabit liberos , nepotumq. serie delectabitur , quos
 forsitan sit occupaturus Antichristus ; cum legamus Moysen
 & Samuelem filiis suis alios prætulisse , nec putasse liberos ,
 quos uidebant Domino displicere . Cicero , rogatus ab Hir-
 tio , ut , post repudium Terentiæ , sororem eius duceret , om-
 nino facere supersevit , dicens , non posse se uxori & philo-
 sophiæ pariter operam dare . illa interim coniux egregia ,
 & quæ de fontibus Tullianis hauserat sapientiam , nupsit
 Sallustio , inimico eius , & tercio Messallæ Cornuino , & qua-
 si per quosdam gradus eloquentiæ deuoluta est . Socrates
 Xantippen , & Myron , neptem Aristidis , duas habebat uxo-
 res . quæ cum crebro inter se iurgarentur , & ille eas irride-
 re esset solitus , quod propter se , foedissimum hominem , si-
 mis naribus , recalua fronte , pilosis humeris , & repandis
 cruribus ,

Philip. 3. & 1

Exod. 29

1. Reg. 8

eruribus, disceptarent; nouissime uerterunt in eum impetum, & male multatum fugientemq. diu persecutæ sunt. Quodam autem tempore cum infinita conuicia ex superiori loco ingerenti Xantippæ restitisset, aqua perfusus immunda, nihil amplius respondit, quam, capite deterfo, Sciebā, inquit, futurum, ut ista tonitrua imber sequeretur. L. Syllæ, Felicis, si non habuisset uxorem, Metella coniux palam erat impudica: & (quia nouissimi mala nostra discimus) id Athenis cantabatur, & Sylla ignorabat, secretaq. domus suæ primum hostium conuicio didicit. Cn. Pompeio Muciam uxorem impudicam, quam Pontici spadones & Mithridaticæ ambiebant cateruæ, cum eum putarent ceteri scientem pati, indicauit in expeditione commilito, & uictorem totius orbis tristi nuncio cōsternauit. M. Cato Censorius habuit uxorem Actoriam Paullam, humili loco natam, uinolentam, impotentem, &, quod nemo posset credere, Catoni superbam. Hoc ideo dico, ne quis putet, si pauperem duxerit, satis se concordiae prouidisse. Philippū, regem Macedonum, contra quem Demosthenis Philippicæ tonant, introeuntem ex more cubiculum uxor exclusit irata: qui exclusus tacuit, & iniuriam suam uersu tragico consolatus est. Gorgias rhetor librum pulcherrimum de concordia Græcis tūc inter se dissidentibus recitauit Olympiæ. cui Melanthius, inimicus eius, Hic nobis, inquit, de concordia præcipit, qui se, & uxorem, & ancillam, tres in una domo, concordare non potuit. æmulabatur quippe uxor eius ancillulæ pulchritudini, & castissimum uirum quotidianis iurgiis exagitabat. Totæ Euripidis tragædiæ, in mulieres maledictæ sunt. unde & Hermione loquitur: Malorum me mulierum decipere consilia. In Lepti, urbe semi-barbara, posita in solitudine, moris est, ut nurus altera die socrum ollam mutuū postulet. cui illa statim negat: ut scias illud uerum esse Terentii, quod consulto ambigue extulit: Quid est hoc? omnes socrus oderunt nurus. Legimus quendam apud Romanos nobilem, cum eum amici arguerent, quare uxorem formosam, & castam, & diuitem re-

M m 3 pudiasset,

pudiasset, protendisse pedem, & dixisse eis: Et hic foccus, quem cernitis, uidetur uobis nouus, & elegans; sed nemo scit præter me, ubi me premat. Scribit Herodotus, quod mulier cum ueste deponat & uerecundiam. Et noster Comicus fortunatum putat, qui uxorem nunquam duxerit. Quid referam Pasiphaen, Clytemnestram, & Eriphylam: quarum prima deliciis diffuens, quippe ut regis uxor, tauri dicitur expetisse concubitus; altera occidisse uirum ob amorem adulteri; tertia prodidisse Amphiaraum, & saluti uiri monile aureum prætulisse. Quidquid tragœdiæ tumet, & domos, urbes, regnaq. subuertit, uxorū pellicumq. contentio est. Armantur parentum in liberos manus: nefandæ apponuntur epulæ: &, propter unius mulierculæ raptum, Europa atque Asia decennali bello configit. Quasdam repudiatas, altero nuptiarum die statim nupsisse legimus. Vterque reprehendendus maritus, & cui tam cito displicuit, & cui tam cito placuit. Epicurus, uoluptatis assertor, (quamquam Metrodorus, discipulus eius, Leontium habuerit uxorem) raro, dicit, sapienti ineunda coniugia; quia multa incommoda admixta sunt nuptiis: & quo modo diuitiæ, & honores, & corporum sanitates, & cetera, quæ indifferētia nominamus, nec bona, nec mala sunt, sed uelut in meditullio posita, usu, & euentu uel bona uel mala sunt; ita & uxores sitas in bonorum malorumq. confinio: graue autem esse uiro sapienti uenire in dubium, utrū bonam an malam ducturus sit. Ridicule Chrysippus ducendam uxorem sapienti præcipit; ne Iouem Gamelium & Genethlium uiolet. isto enim modo apud Latinos ducenda uxor non erit, quia Iouem non habent nuptialem. quod si decorum, ut putant, nomina uitæ hominum præiudicant: offendet ergo Statorem Iouem, qui libenter sederit. Scripserunt Aristoteles, & Plutarchus, & noster Seneca de matrimonio lieros: ex quibus & superiora nonnulla sunt, & ista, quæ subiicimus. Amor formæ, rationis obliuio est, & infantiæ proximus: sed dum minimeq. conueniens animo spiritui uitium. turbat consilia: altos & generosos spiritus frangit:

git: a magnis cogitationibus ad humillimas detrahit: querulos, iracundos, temerarios, dure imperiosos, seruiliter blandos, omnibus inutiles, ipsi nouissime amoris facit. nam cum fruendi cupiditate insatiabilis flagrat; plura tempora suspicionibus, lacrymis, conquestionibus perdit; odium sui facit; & ipse nouissime sibi odio est. Tota amoris infectatio apud Platonem exposita est; & omnia eius incommoda I. y fias explicat; quod non iudicio, sed furore ducatur; & maxime uxorū pulchritudini grauissimus custos accubet. Refert præterea Seneca, cognouisse se quendam ornatum hominem, qui exiturus in publicum, fascia uxorū pectus colligabat, & ne puncto quidem horæ præsentia eius carere poterat: potionemq. nullam, nisi alterius tactam labris, uir & uxor hauriebant: alia deinceps non minus inepta facientes, in quæ improuida uis ardentis affectus erumpebat. Origo quidem amoris honesta erat, sed magnitudo deformis. nihil autem interest, quam ex honesta causa quis insaniat. Vnde & Xyllus in sententiis, Adulter est, inquit, in suam uxorem amator ardentior. In aliena quippe uxore omnis amor turpis est, in sua nimius. Sapiens uir iudicio debet amare coniugem, non affectu. Reget impetus uoluptatis, nec præceps feretur in coitum. Nihil est foedius, quam uxorem amare quasi adulteram. Certe, qui dicunt se causa reipublicæ, & generis humani uxoribus iungi, & liberos tollere; imitentur saltem pecudes, & postquam uxorū uenter intumuerit, non perdant filios; nec amatores uxoribus se exhibeant, sed maritos. Quorundam matrimonia adulteriis cohaeserunt: & o rem improbam, iidem illis pudicitiam præceperunt, qui abutulerant. itaque cito eiusmodi nuptias satietas soluit. cum primum lenocinium libidinis abscessit, quod libebat eniluit. Nam quid, ait Seneca, de uiris pauperibus dicam, quorum in nomen mariti, ad eludendas leges, quæ contra cælibes latae sunt, pars magna conducitur? Quo modo potest regere mores, & præcipere castitatem, & mariti auctoritatem tenere, qui nupsit? Doctissimi uiri uox est, pudicitiam in primis esse retinendam: qua

M m + amissa,

amissa, omnis uirtus ruit. In hac muliebrium uirtutum principatus est. hæc pauperem commendat, diuitem extollit, deformem redimit, exornat pulchram; bene meretur de maioribus, quorum sanguinem furtiua sobole non uitiat; bene de liberis, quibus nec de matre erubescendum, nec de patre dubitandum est; bene in primis de se, quam a contumelia externi corporis uindicat. Captiuitatis nulla maior calamitas est, quam ad alienam libidinem trahi. Viros consilatus illustrat, eloquentia in nomen æternum effert, militaris gloria triumphusque nouæ gentis cōsecrat. multa sunt, quæ præclara ingenia nobilitent. mulieris uirtus proprie pudicitia est. hæc Lucretiam Bruto æquauit, nescias an & prætulerit: quoniam Brutus, non posse seruire, a femina didicit. hæc æquauit Corneliam Graccho, hæc Porciam alteri Bruto. Notior est marito suo Tanaquil: illum inter multa regum nomina iam abscondit antiquitas: hanc rara inter feminas uirtus altius sæculorum omnium memoriæ, quam ut excidere possit, infixit. Imitentur ergo nuptæ Theano, Cleobulinam, Gorgunten, Timodiam, Claudias, atque Cornelias: & cum Apostolum malis mulieribus digamiam uiderint ignoscentem, legant, antequam religio nostra fulgeret in mundo, unicubas semper habuisse inter matronas decus; per illas Fortunæ muliebri sacra fieri solitum, nullum sacerdotem digamum, nullum flaminem bimaritum; hierophantas quoque Atheniensium usque hodie cicutæ sorbitione castrari, & postquam in pontificatum fuerint electi, uiros esse desinere.

1. Cor. 7

DVI

ECVNDa propositio est, eos, qui fuerunt baptiza-
 S ti, a diabolo non posse tentari. et, ne hoc stulte di-
 cere uideretur, adiecit: Quicumque autem tentati *Act. 8*
 fuerint, ostendi eos aqua, & non spiritu baptizatos. Quod
 in Simone Mago legimus. Vnde & Ioannes dicit: Omnis, *1. Ioan. 3*
 qui natus est ex Deo, peccatum non facit: quoniam semen
 ipsius in eo manet, & non potest peccare: quia ex Deo na-
 tus est, & in hoc manifesti sunt filii Dei & filii diaboli. et
 in fine epistolæ: Omnis, qui natus est ex Deo, non peccat, *1. Ioan. 5*
 sed generatio Dei conseruat eum, & malignus non tangit
 eum. Reuera fortis obiectio, & quæ indissolubilis permane-
 ret, nisi ipsius Ioannis testimonio solueretur. statim enim
 intulit: Filioli custodite uos a simulacris. Si omnis, qui na-
 tus est ex Deo, non peccat, & a diabolo tentari non potest,
 quo modo præcipit ut caueant ne tententur? Et in eadem *1. Ioan. 1*
 rursum epistola: si dixerimus, quia peccatum non habemus;
 ipsi nos seducimus, & ueritas in nobis non est. Si cō-
 fiteamur peccata nostra: fidelis & iustus est, ut remittat no-
 bis peccata, & mundet nos ab omni iniquitate. Si dixerim-
 us, quia non peccauimus: mendacem facimus eum, &
 uerbum eius non est in nobis. Existimo quod Ioannes bap-
 tizatus ad baptizatos scripserit, & quod omne peccatum
 a diabolo sit. Ille peccatorem se confiteretur, & sperat remis-
 sionem post baptismum peccatorum: & Iouinianus meus di-
 cit: Ne tangas me, quoniam mundus sum. Quid ergo? cō-
 traria: sibi Apostolus loquitur? Minime. in eodem quippe *1. Ioan. 2*
 loco cur hoc dixerit, statim edisserit: Filioli mei hæc scri-
 bo uobis, ut non peccetis. sed & si quis peccauerit, aduoca-
 tum habemus apud patrem Iesum Christum iustum, & ipse
 est propitiatio pro peccatis nostris. Non pro nostris autem
 tantum, sed etiam pro totius mundi. Et in hoc scimus,
 quod

quod cognouimus eum, si mandata eius obseruamus. Qui dicit se nosse eum, & mandata eius non custodit, mendax est, & in eo ueritas non est. qui autem seruat uerbum eius, uere in hoc caritas Dei perfecta est. In hoc scimus, quoniam in ipso sumus. Qui dicit se in ipso manere, debet, sicut ille ambulauit, & ipse ambulare. Propterea, inquit, scribo uobis filioli mei; Omnis, qui natus est ex Deo, non peccat; ut non peccetis; & tamdiu sciatis nos in generatione Domini permanere, quamdiu non peccaueritis. Immo qui in generatione Domini perseverant, peccare non possunt. Quæ
 2. Cor. 6 enim communicatio luci & tenebris? Christo & Belial? Quo modo dies & nox misceri non queunt: sic nec iustitia & iniquitas, peccatum & bona opera, Christus & antichristus. Si susceperimus Christum in hospitio nostri pectoris, illico fugamus diabolum. Si peccauerimus, & per peccati ianuam ingressus fuerit diabolus: protinus Christus recipit. Vnde & David post peccatum, Redde mihi, ait, letitiam salutaris tui, scilicet quam peccando amiserat. Qui dicit se nosse Deum, & mandata eius non custodit, mendax est, & in hoc ueritas non est. Christus ueritas appellatur:
 Ioan. 14 Ego sum, inquit, uia, ueritas, & uita. Frustra nobis in eo plaudimus, cuius mandata non facimus. Scienti bonum, & non facienti illud peccatum est. Quo modo corpus sine spiritu mortuum est, sic & fides sine operibus mortua est.
 Iacob. 1 Nec grande putemus unum Deum nosse; cum & demones
 2. Ioan. 2 credant, & contremiscant. Qui dicit se in ipso manere, debet, sicut ille ambulauit, & ipse ambulare. Eligat aduersarius e duobus quod uult: optionem enim damus. Manet in Christo, an non manet? Si manet, ita ergo ambulet ut Christus. si autem temerarium est similitudinem uirtutum Domini polliceri, non manet in Christo, quia non ingreditur ut Christus. Ille peccatum non fecit, neque inuentus est dolus in ore eius: qui cum malediceretur, non remaledixit, & tamquam agnus coram tondente sic non aperuit os suum, ad quem uenit princeps mundi istius, & inuenit in eo nihil: Qui cum peccatum non fecisset, pro nobis peccatum

catum eum fecit Deus : nos autem iuxta epistolam Iacobi, 2. Cor. 8
 multa peccamus omnes , & nemo mundus a peccatis , nec Iacob 3
 si unius quidem diei fuerit uita eius : Quis enim gloriabitur Iob 14
 callum se habere cor ? aut quis confidet mundum se esse a Pro. 20
 peccatis ? Tenemurq. rei in similitudinem præuicationis Rom. 5
 Adam . Vnde & David , Ecce , ait , in iniquitatibus conce- Psal. 50
 ptus sum , & in delictis concepit me mater mea . Et beatus
 Iob : Si fuero iustus , os meum impia loquetur : & si sine cri Iob 9
 mine , prauus inueniar . Et si purificatus in niue , & lotus mû
 dis manibus , satis me sorde tinxisti , & execratum est me ue
 stimentum meum . Verum ne penitus desperemus , arbitra
 res nos post peccata baptismi non posse saluari , statim hoc
 ipsum temperat . Et si quis peccauerit , aduocatum habe- 1. Ioan. 2
 mus apud patrem Iesum Christum iustum , & ipse est pro
 pitatio pro peccatis nostris . Non pro nostris autem tan
 tum , sed etiam pro totius mundi . Hoc ad credentes post
 baptismum loquitur , & aduocatum pro delictis eorum Domi
 num pollicetur . Nec dicit : si quid peccaueritis , aduocatû
 habetis apud patrem Christum , & ipse est propitiatio pro
 peccatis uestris : ne eos diceret non plena fide baptismum cõ
 secutos : sed aduocatum , inquit , habemus apud Patrem Ie
 sum Christum ; & ipse est propitiatio pro peccatis nostris ,
 & non solum pro Ioannis , aliorumq. peccatis , sed etiam
 pro totius mundi . In toto autem mundo & apostoli
 sunt , omnesq. credentes . Ex quibus liquido compro
 batur , post baptismum posse peccari . frustra enim habe
 mus aduocatum Iesum Christum , si peccari non potest . Pe
 trus apostolus , ad quem dictum fuerat , Qui lotus est , non Ioan. 13
 necesse habet ut iterum lauet : Et , Tu es Petrus , & super hanc Matth. 16
 petram ædificabo Ecclesiam meam : ab ancilla perterritus
 negat . Et ipse Dominus , Simon , Simon , ecce , inquit , sa Ioan. 18
 tanas postulauit uos , ut cribraret sicut triticum . ego autem
 rogavi pro te , ne deficeret fides tua . Et in eodem loco : Vi Luc. 22
 gilate , & orate , ne intretis in tentationem : spiritus quidem
 promptus est , caro autem infirma . Quod si ante crucem
 dictû responderis : certe post crucem in oratione Dominica
 dici-

- Matth. 6* dicimus: Dimitte nobis debita nostra, sicut & nos dimittimus debitoribus nostris: & ne nos inducas in tentationem, sed libera nos a malo. Si non peccamus post baptismum; cur nobis poscimus peccata dimitti, quæ in baptismo iam dimissa sunt? quid oramus ne intremus in tentationem, & ut liberemur a malo, si diabolus tentare non potest iam baptizatos? Aliud autem est, si ad catechuminos hæc oratio
- 1. Cor. 9* pertinet, & non conuenit fidelibus, & Christianis. Paulus,
- 2. Cor. 12* electionis uas, castigat corpus suum, & in seruitutem redigit; ne, aliis prædicans, ipse reprobis inueniatur. Et datus est mihi, inquit, stimulus carnis, angelus satanæ, qui me colaphizet. Et ad Corinthios, Timeo, inquit, ne, sicut serpens decepit Euam in astutia sua, ita corrumpantur sensus uestri a simplicitate, quæ est in Christo. Et alibi:
- 2. Cor. 2* Cui autem aliquid donastis, & ego. nam & ego, quod donauimus, si quid donauimus, propter uos, in persona Christi, ut non circumueniamur a satana. non enim eius ignoramus astutias. Et rursum: Tentatio uos non apprehendat, nisi humana. Fidelis autem Deus, qui non dimittet uos tentari supra id, quod potestis, sed faciet cum tentatione etiam prouentum, ut possitis sustinere. Et qui sibi uidetur stare, uideat ne cadat. Et ad Galatas: Currebatis bene, quis
- Gal. 5* uos impediuit ueritati non obedire? Et alibi: Voluimus uenire ad uos, ego quidem Paulus, & semel, & iterum, sed
- 1. Thess. 2* impediuit nos satanas. Et ad maritos: Et iterum reuertimini ad id ipsum, ne tentet uos satanas propter incontinentiam uestram. Et rursum: Dico autem, spiritu ambulate, & desideria carnis non perficietis. caro enim concupiscit aduersus spiritum, & spiritus aduersus carnem. hæc enim inuicem aduersantur sibi, ut non, quæ uultis, illa faciatis. ex utroque compacti, necesse est, ut utriusque contra se subsistant bella patiamur. Et ad Ephesios: Non est nobis colluctatio aduersus carnem, & sanguinem, sed aduersus principatus, & potestates, aduersus rectores tenebrarum istarum, aduersus spiritualia nequitie in cælestibus. Et existimat aliquis securos & dormientes nos esse debere post baptismum

ptissimum? Necnon ad Hebræos: Impossibile est enim, eos, *Hebr. 6*
 qui semel sunt illuminati, & gustauerunt donum cæleste,
 & participes facti sunt spiritus sancti, gustaueruntq. nihilo-
 minus bonum Dei uerbum, uirtutesq. sæculi futuri, & pro-
 lapsi sunt, renouari iterum ad pænitentiam, rursùm cruci-
 figentes sibi met ipsos filium Dei, & ostentui habentes. Cer-
 te eos, qui illuminati sunt, & gustauerunt donum cæleste,
 & participes facti sunt spiritus sancti, gustaueruntq. bonum
 Dei uerbum, negare non possumus baptizatos. si autem
 baptizati peccare non possunt; quo modo nunc Apostolus
 dicit, Et prolapsi sunt? Verum ne Montanus, & Nouatus
 hic rideant; qui contendunt, non posse renouari per pæni-
 tentiam eos, qui crucifixerunt sibi met filium Dei, & osten-
 tui habuerunt: consequenter hunc errorem soluit, & ait:
 Confidimus autem de uobis, dilectissimi, meliora, & uici-
 niora saluti, tametsi ita loquimur: non enim iniustus est
 Deus, ut obliuiscatur operis uestri, & dilectionis, quam
 ostendistis in nomine ipsius, qui ministrastis sanctis, & nunc
 ministratis. Et reuera grandis iniustitia Dei, si tantum pec-
 cata puniret, & bona opera nō susciperet. Ita locutus sum,
 inquit Apostolus, ut uos a peccatis retraherem, & despe-
 rationis metu facerem cautiores. ceterum confido de uo-
 bis, dilectissimi, meliora, & uiciniora saluti. neque enim
 iustitiæ Dei est, ut obliuiscatur bonorum operum, & mini-
 sterii, quod propter nomen eius exhibuistis, & exhibetis in
 sanctos, & tantum meminerit peccatorum. Sed & aposto-
 lus Iacobus, sciens baptizatos posse tentari, & propria *Iacob. 1*
 corruiere uoluntate, Beatus, ait, uir, qui suffert tentatio-
 nem: quia, cum probatus fuerit, accipiet coronam uitæ,
 quam repromisit Deus diligentibus se. Ac ne putaremus,
 secundum illud Geneseos, ubi scribitur, Abraham a Deo
 fuisse tentatum, nos quoque tentari a Deo: Nemo, in- *Gen. 22*
 quit, cum tentatur, dicat, quoniam a Deo tentor. Deus
 enim intentator malorum est, ipse autem neminem ten-
 tat. unusquisque uero tentatur a concupiscentia sua abstra-
 ctus, & illectus: dehinc concupiscentia cum conceperit, pa-
 rit

rit peccatum: peccatum autem, cum consummatum fuerit, generat mortem. Liberi arbitrii nos condidit Deus; nec ad uirtutes, nec ad uitia necessitate trahimur. alioquin, ubi necessitas est, nec damnatio, nec corona est.

Rom. 9 Sicut in bonis operibus perfectior est Deus; non est enim uolentis, neque currentis, sed misentis & adiuuantis Dei, ut peruenire ualeamus ad calcem: sic in malis, atque peccatis, semina nostra sunt incentiua, & perfectio diaboli.

1. Cor. 3 Cum uiderit nos super fundamentum Christi ædificare fennum, ligna, stipulam, tunc supponit incendium. Aedificemus ergo aurum, argentum, lapides pretiosos; & tentare non audebit: quamquam & in hoc non sit certa & secura possessio. Sedit quippe leo in insidiis, & in occultis, ut

Psal. 9 interficiat innocentem. Et uasa figuli probat fornax, homines autem iustos tentatio tribulationis. Et in alio loco scribitur: Fili, accedens ad seruitutem Dei, præpara te ad

Iacob. 1 tentationem. Rursum idem Iacobus loquitur: Estote factores uerbi, & non auditores tantum. Si quis auditor est uerbi, & non factor; ille similis est uiro, qui considerat uultu natiuitatis sue in speculo. Considerauit illum, & statim recedens oblitus est qualis sit. Frustra monuit, ut iungerent opera fidei, si post baptismum peccare non poterant.

Iacob. 2 Qui totam legem, inquit, seruauerit, & peccauerit in uno, factus est omnium reus. Quis nostrum absque peccato?

Rom. 11 Concluserit Deus omnia sub delicto, ut omnibus misereatur. *2. Petr. 2* Petrus quoque, Nonit, inquit, Dominus pios de tentatione eruere. Et de falsis doctoribus: Hi sunt fontes sine aqua, & nebulae turbinibus exagitatae; quibus caligo tenebrarum reseruatur. Superba enim uanitatis loquentes pellicient in desideriis carnis luxurie eos, qui paululum effugerant, & ad errorem reuersi sunt. Nonne tibi uidetur pinxisse sermo apostolicus nouam imperitiæ factionem: aperiunt enim quasi fontes scientiæ, qui aquam non habent doctrinarum: promittunt imbrem, uelut nubes prophetiæ, ad quas perueniat ueritas Dei; & turbinibus exagitantur demonum, atque uitiorum. Loquuntur grandia; & totus
eorum

eorum sermo superbia est . Immundus est autem apud Deū
 omnis , qui exaltat cor suum ; ut , qui paululum refugerant
 a peccatis , ad suum reuertantur errorem ; & suadent in luxu-
 ria , ciborum carnisq. delicias . Quis enim non libenter au-
 diat : manducemus , & bibamus , & in æternum regnabi-
 mus ? Sapientes , & prudentes , prauos uocant : eos uero ,
 qui dulces sunt in sermonibus , plus audiunt . Ioannes apo-
 stolus , immo in Ioanne saluator , scribens angelo Ephesi
 ecclesie , Scio , inquit , opera tua , & laborem , & pacien- *Apoc.2*
 tiam tuā , & quia sustinuiſti propter nomen meum , & non
 defecisti : sed habeo aduersus te , quod caritatem tuā primā
 reliquisti . Memor esto , unde cecideris : & age pænitentiam ,
 & prima opera fac . sin autem ; ueniam tibi ; & mouebo
 candelabrum tuum de loco , nisi pænitentiam egeris . Simi- *Apoc.3*
 liter & ceteras ecclesias , Smyrnam , Pergamum , Thyati-
 ram , Sardis , Philadelphiam , Laodiceam ad pænitentiam
 prouocat , & , nisi reuertantur ad opera pristina , commina-
 tur . Et in Sardis paucos habere se dicit , qui non coinquina-
 uerunt uestimenta sua , & ambulaturi sunt cum eo in albis ,
 quia digni sunt . Cui autem dicit : Memento , unde cecide-
 ris , & ecce missurus est diabolus ex uobis in carcerem , ut
 tentemini : & scio ubi habitas , ubi sedes est satanæ : & in
 mente habe , qualiter acceperis , & audieris , & serua , & pæ-
 nitentiam age , & reliqua : utique ei dicit , qui credidit , &
 baptizatus est , & stans quondam , corruit per delictum .
 Paulisper de ueteri testamento exempla distuleram ; quia so-
 lent , ubicumque contra eos facit , dicere , & lex & prophe- *Matth.11*
 te usque ad Ioannem . ceterum quis ignorat , sub altera dis-
 pensatione Dei omnes retro sanctos eiusdem fuisse meriti ,
 cuius nunc Christiani sunt ? Quo modo ante Abraham pla-
 cuit in coniugio , sic nunc uirgines placent in perpetua ca-
 stitate . seruiuit ille legi , & tempori suo : seruiamus & nos
 euangelio , & tempori nostro , in quos fines sæculorum de-
 currerunt . Dauid , electus secundū cor Domini , qui omnes *1. Cor.10*
 eius fecerat uoluntates , & qui in quodam psalmo dixerat : *1. Reg.13*
 Iudica me Domine , quoniam ego in innocentia mea in- *Psal.25*
 gressus

- gressus sum, & in Domino sperans non infirmabor: Proba
me Domine, & tenta me, ure renes meos, & cor meum:
postea tentatur a diabolo, & post peccatum pœnitens loqui
Psal. 50 tur: Miserere mei Deus secundum magnam misericordiam
3. *Reg.* 11 tuam. Magnum peccatum magna deleri uult misericordia.
Salomon, amabilis Domini, & cui bis Deus fuerat reuela-
tus; quia amator mulierum fuit, a Dei amore discessit.
2. *Par.* 33 Manassén, impiissimum regem, post captiuitatem Babylo-
4. *Reg.* 23 nicam in pristinam dignitatem liber Dierum restitutum re-
Zach. 3 fert. Et Iosias, uir sanctus, in campo Magedo ab Aegypto
rege confoditur. Iesus quoque, filius Iosedech, sacerdos
magnus, quamquam in typo præcesserit saluatoris, qui no-
stra peccata portauit, & alienigenam sibi ex gentibus eccle-
siam copulauit, tamen, secundum litteram, post sacerdo-
tium sordidatus inducitur: & stat diabolus a dextris eius: &
Num. 20 candida illi uestimenta deinceps redduntur. superfluum
Iob 4 est de Moyse & Aaron scribere, quod ad aquam contradi-
ctionis offenderint Deum, & terram repromissionis non
intrauerint; cum beatus Iob angelos quoque, & omnem
creaturam peccare posse cōmemoret, dicens: Quid enim,
numquid homo coram Deo mundus est? aut in operibus
suis sine macula uir? Si contra seruos suos non credit, &
aduersum angelos suos prauum quid reperit; quanto magis
habitantes in domibus luteis, de quibus & nos ex eodem lu-
Iob 7 to sumus? Tentatio est uita hominis super terram: Et ceci-
Esa. 14 dit Lucifer, qui mittebat ad uniuersas nationes. Et ille,
qui in paradiso deliciarum inter duodecim nutritus est lapi-
des, uulneratus a monte Domini, ad inferna descendit.
unde & saluator in euangelio, Videbam, inquit, satanam
Luc. 10 quasi fulgur de celo cadentem. Si altissima illa sublimitas
cecidit, quis cadere non possit? si in celo ruinæ, quanto
magis in terra? Et tamen cum ceciderit Lucifer, immo post
Iob 40 casum coluber antiquus; uirtus eius in lumbis eius, & po-
testas eius super umbilicum uentris: obumbrantur in eo ar-
bores magnæ, & dormit iuxta iuncum, & calamum, & ca-
ricem. Ipse est rex omnium, quæ in aquis sunt; ubi scilicet
uoluptas,

uoluptas, & luxuria; & propago, & irrigatio nuptiarum. Quis enim denudabit faciem uestitus eius? Et portas uultus eius quis aperiet? Saginantur in eo nationes Aethiopum, & partiuntur eum Phœnicum gentes. Ac ne forsitan *Psal. 73* tacite legentis cogitatio putaret, eas tantum Phœnicum gentes, & populos Aethiopum significari, quibus draco in escam datus sit; statim de iis, qui per mare huius sæculi trāseunt, & ad portum salutis peruenire festinant, dicitur: Et *Iob 42* in nauibus piscatorum caput eius stat; sicut incus infatigabilis: reputat ferrum, ut paleas, &, sicut lignum putres: et omne aurum maris sub eo est, sicut lutum: feruescere facit abyssum, sicut uas æneum: æstimat mare, sicut deletum; & tartarū abyssi, ut captiuum: omne altum uidet. Et arbitratur Iouinianus meus, facile sibi eum posse succumbere. Quid loquar de sanctis uiris, & de angelis; qui cum creaturæ Dei sint, possunt utique recipere peccatum? Filium Dei tentare ausus est; & prima eius, & secunda sententia *Matth. 4.* percussus, nihilominus caput leuat; & tercio uulneratus, usque ad tempus recedit, differens magis tentationem, quā auferens: & nos nobis blādimur de baptismo: quod, sicut priora peccata dimittit, sic in futurum seruare non potest, nisi baptizati omni custodia seruauerint cor suum. Tandem peruenimus ad cibos; & tertiæ quæstionis nobis opponitur difficultas: ad hoc creata esse omnia, ut usui mortalium deferrent: & quo modo homo, rationale animal, quasi quidam habitator & possessor mundi, Deo subiacet, & suum ueneratur auctorem; ita cuncta animantia aut in cibos hominum, aut in uestitum, aut ad scindendam terrā, aut ad subuectionem frugum, aut ipsius hominis esse creata; unde & iumenta ab eo, quod iuuent, appellentur. Quid *Psal. 8* est, ait Dauid, homo, quod memor es eius, aut filius hominis, quoniam uisitas eum? Minuisti eum paulo minus ab angelis; gloria, & honore coronasti eum; & cōstituisti eum super opera manuum tuarum. Omnia subiecisti sub pedibus eius, oues & boues uniuersas, insuper & pecora campi, uolucres cæli, & pisces maris, qui perambulant semi-

N n tas

tas maris. Esto, inquit, bos ad arandum, ad sedendum equus, canis ad seruandum, capræ ad lac, oues ad lanitia cõditæ sint: quis usus porcorum absque esu carniū? quid capræ, ceruuli, damulæ, apri, lepores, & huiusmodi uenatio? quid anseres siluestres, & domestici? quid anates? quid ficedulæ? quid attagen? quid fulica? quid turdus? cur in domibus gallina discurrit? si non comeduntur hæc omnia, frustra a Deo creata sunt. Verum quid opus est argumentis?

Gen.9 cum manifestissime scriptura doceat, omne, quod mouetur, sicut holera herbarum, data nobis in escam: & *Apo. Tit.1* stolidus clamitet: Omnia munda mundis: & nihil recedendum, quod cum gratiarum actione percipitur: & uenturos *1.Tim.4* in nouissimo, qui prohibeant nubere, & uesci cibis, quos *Luc.7* Deus creauit ad utendum. Ipse Dominus, uini potator & uorator a pharisæis appellatur, & publicanorum conuiuia, *Ioan.2* & peccatorum; Zachæi prandium non recusans, uadens ad nuptiarum epulas. Porro aliud est, si stulta contentione dicis eum isse ad nuptias ieiunaturum, & impostorum more dixisse: hoc comedo, illud non comedo: nolo uinum bibere, quod ex aquis creauit. In typo sanguinis sui non obtulit aquam, sed uinum. Post resurrectionem piscem & fauum comedit, non sesama, nuces, & sorbitiunculas. *Pe Act.10* trus apostolus non expectans stellam more Iudaico, sed hora sexta in solarium pransurus ascendit. Paulus in navi panem frangit, non caricas. *1.Tim.5* Timotheo dolenti stomachum, uinum suadet bibere, non piracium. De ciborum sibi placent abstinentia: quasi non & superstitio gentilium cossum matris Deum obseruet, & Isidis. sequar ergo uestigia propositionis expositæ: & antequam ad scripturas ueniam, doceamq. ex eis Deo grata ieiunia, & acceptabilem continentiam, argumentis philosophorum argumenta componam: & probabo, non Empedoclis & Pythagoræ nos dogma sectari, qui, propter *μετεμψύχωσιν*, omne, quod mouetur, & uiuit, edendum non putant; & eiusdem criminis reos arbitrantur, qui abietem quercumq. succiderint, cuius parricidæ sunt, & uenefici; sed uenerari conditorem nostrum,

strum, qui in usus hominum cuncta creauit: et quo modo
bos ad arandum, equus ad sedendum, canes ad seruand-
um, capræ ad lac, oues ad lanitia conditæ sunt; ita sues,
& ceruos, & capreas, & lepores, & cetera; sed illa non sta-
tim ad comedendum creata esse, sed in alios usus homi-
num. si enim omne, quod mouetur, & uiuit, ad uestien-
dum factum est, & præparatum gulæ: respondeant mihi; cur
elephanti, cur leones, urfi, leopardi; lupi, cur uiperæ, scor-
pii, cimices, culices, pulicesque, cur uultur, aquila, coruus,
accipiter, cur ceti, delphines, phocæ, minutæq. cochleolæ
conditæ sint. quis nostrum leonem, quis uiperam, quis
uulturem, quis ciconiam, quis miluum, quis reptantes in
litoribus uermiculos umquam comedit? Sicut igitur hæc
proprius usus habent: ita possumus dicere, & ceteras bestias,
piscis, aues non ad esum, sed ad medicinas creatas. Deni-
que carnes uiperæ, unde theriace conficitur, quantis rebus
aptæ sint, norunt medici. Segmenta eboris in medelas ua-
rias assumuntur. Fel hyenæ oculorum restituit claritatem;
& ster cus eius, & canum, putrida curat uulnera. Et, quod
forfit an legenti mirum sit, hominis fimus quantis curatio-
nibus proficiat, Galenus ἐν ἀπλῶς docet. Aiunt physici,
quod pellis colubri, qua exuitur, decocta in oleo, mire do-
lorem aurium mitiget. Quid ita inutile uidetur nescienti-
bus, ut cimices? Si sanguisuga faucibus hæserit; fumo eius
excepto, statim euomitur: & difficultas urinæ huius ap-
positione laxatur. Porcorum autem, & anserum, & galli-
narum, phasianorumq. adipēs quid commodi habeant,
omnes medicorum declarant libri: quos si legeris, uidebis
tot curationes esse in uulture, quot membra sunt. Pau si-
mus podagræ feruorem mitigat. Gruis, ciconiæ fel, aui-
læ, sanguis accipitris, struthiocamelus, ranæ chamæleotes,
hirundinis ster cus, & carnes, quibus morbis aptæ sint, dice-
rem, si mihi propositum esset de medela corporum dispu-
tare. Legat, qui uult, Aristotelem & Theophrastum pro-
sa, Marcellum Sidetem, & nostrum Flauium hexamétris
uersibus differentes, Plinium quoque Secundum; & Dio-

N n 2 scori-

scoridem, & ceteros tam physicos, quam medicos, qui nul-
lam herbam, nullum lapidem, nullum animal, tam repti-
le, quam uolatile, & natatile, non ad suæ artis utilitatem
referunt. Igitur, cum mihi dixeris, cur porcus creatus est?
statim tibi respondebo puerorum more certantium, cur ui-
peræ, cur scorpii? nec Deum superfluatorum iudicabis artifi-
cem, quia plurimæ & bestiar, & uolucres sunt, quas tuæ
fauces reculent. Sed ne contentiosum hoc, & pugnax ma-
gis uideatur esse, quam uerum; audi iccirco sues, & apros,
& ceruos, & reliquas animantes creatas, ut milites, & athle-
tæ, nautæ, sectores, metallorumq. fossiores, & ceteri du-
ro operi mancipati haberent cibos, quibus fortitudo cor-
porum necessaria est; qui portant arma, & cibaria; qui pu-
gnis, & calcibus sua inuicem membra debilitant; qui re-
mos trahunt; quorum latera ad clamandum, dicendumq.
sunt ualida; qui subuertunt montes, & sub diuæ & imbri-
bus dormiunt. Ceterum nostra religio non *πύκτω*, non
athletam, non nautas, non milites, non fossiores, sed sa-
pientiar erudit sectatorem; qui se Dei cultui dedicauit; &
scit, cur creatus sit, cur uersetur in mundo, quo abire festi-
net. unde & Apostolus loquitur: Quando infirmior, tunc
2. Cor. 4 fortior sum. Et: Si exterior noster homo corrumpitur, sed
philip. 1 interior renouatur de die in diem. Et: Cupio dissolui, & esse
Rom. 13 cum Christo. Et: Carnis curam ne feceritis in desideriis.
Matth. 10 Numquid omnibus præceptum est, ne duas tunicas habe-
ant; ne cibos in pera, æs in zona, uirgam in manu, calcia-
mentum in pedibus; ut uendant uniuersa, quæ possident,
dentq. pauperibus, & sequantur Iesum? sed de iis utique,
Luc. 3 qui uolunt esse perfecti. alioquin a Ioanne Baptista aliud
præcipitur militibus, aliud publicanis. Dominus autem di-
cit in euangelio ad eum, qui se iactauerat legis uniuersa com-
Matth. 19 plesse: Si uis perfectus esse, uade, & uende omnia, quæ
habes, & da pauperibus, & ueni sequere me. Ne graue
onus nolenti uideretur imponere, in propria audientis uo-
luntate dimisit, dicens: Si uis perfectus esse. Quamobrem
& ego tibi dicam: Si uis perfectus esse, bonum est uinum
non

non bibere, & carnem non manducare. Si uis perfectus *Rom. 14*
 esse, melius est faginare animam, quam corpus. Si autem
 adhuc paruulus es, & coquorum iura te delectant; nemo
 eripit faucibus tuis esculentas dapes. Manduca, & bibe: *1 Cor. 13*
 &, si tibi placet, cum Israele ludé confurgens, & canito:
 Manducemus, & bibamus: cras enim moriemur. Mandu-
 cet, & bibat, qui post cibos expectat interitum: qui cum
 Epicuro dicit: Post mortem nihil est, & mors ipsa nihil est.
 Nos Paulo credimus intonanti: Esca uentri, & uenter escis: *1 Cor. 6*
 Deus autem & hunc, & illam destruet. Hæc de scripturis
 pauca posuimus, ut congruere nostra cum philosophis do-
 ceremus. Ceterum quis ignoret, unamquamque gentem
 non communi lege naturæ, sed iis, quorum apud se copia
 est, uesci solitam? uerbi gratia: Arabes, & Saraceni, &
 omnis eremi barbaria, camelorum lacte & carnibus uiuit:
 quia huiusmodi animal pro temperie & sterilitate regio-
 num facile apud eos & gignitur, & nutritur. hi nefas arbi-
 trantur, porcorum uesci carnibus. sues enim, qui glande,
 castaneis, radicibus filicum, & hordeo ali solent, aut raro
 apud eos, aut penitus non inueniuntur, &, si inuenti fue-
 rint, alimenta non habent, quæ supra diximus. E regio-
 ne, septemtrionales populos si ad esum asinorum camelo-
 rumq. compellas, simile putabunt eorum uesci carnibus,
 ac si lupum comedere cogantur, aut coruum. In Ponto,
 & Phrygia uermes albos, & obesos, qui nigello capite sunt,
 & nascuntur in lignorum carie, pro magnis redditibus pater
 familias exigit. & quo modo apud nos attagen, & ficedula,
 mullus, & scarus in deliciis computantur: ita apud illos, *ξυ-
 λοφάγον* comedisse, luxuria est. Rursum orientales & Li-
 byæ populos, quia per desertum & calidam eremi uastita-
 tem locustarum nubes reperiuntur, locustis uesci moris est.
 hoc uerum esse, Ioannes quoque Baptista probat. Com- *Matth. 3*
 pelle Phrygem, & Ponticum, ut locustam comedat: nefas
 putabit. Coge Syrum, Afrum, & Arabem, ut uermes Pon-
 ticos glutiat: ita eos despiciet, ut muscas, millepedias, &
 lacertos. quamquam Syri & crocodilis terrenis, Afri etiam

Na 3 lacertis

lacertis uiridibus uesci soleant. In Aegypto, & Palæstina, propter bouum raritatem, nemo uaccam comedit, tauro-
rumq. carnes, & bouum, uitulorumq. assument in cibis. at
in nostra prouincia scelus putant uitulos deuorare. unde &
imperator Valens nuper legem per orientem dederat, ne
quis uitulorum carnibus uesceretur, utilitati agriculturæ
prouidens, & pessimam Iudaizantis uulgi emendans con-
suetudinem, pro altilibus & lactentibus uitulos consumen-
tis. Nomades, & Troglodytæ, & Scythæ, & Hunnorum
noua feritas, semicrudis uescuntur carnibus. Porro Ichthyo-
phagi, gens errans in litore maris Rubri, super petras, solis
calore feruentes, assant pisces, & hoc solo alimento uicti-
tant. Sarmatæ, Quadi, Vuandali, & innumerabiles aliæ
gentes, equorum & uulpium carnibus delectantur. Quid lo-
quar de ceteris nationibus; cum ipse adolescentulus in Gal-
lia uiderim Scotos, gentem Britannicam, humanis uesci car-
nibus; & cum per siluas porcorum greges, & armentorum,
pecudumq. reperiant, pastorum nates, & feminarum pa-
pillas solere abscindere, & has solas ciborum delicias arbitra-
ri? Scotorum natio uxores proprias non habet; &, quasi
Platonis politiam legerit, & Catonis sectetur exemplum,
nulla apud eos coniux propria est; sed, ut cuique libitum
fuerit, pecudum more lasciuunt. Persæ, Medi, Indi, & Ae-
thiopes, regna non modica, & Romano imperio paria,
cum matribus, & auis, cum filiabus, & neptibus copulan-
tur. Massagetæ, & Derbices miserrimos putant, qui ægro-
tatione moriantur; & parentes, cognatos, propinquos,
cum ad senectam uenerint, iugulatos deuorant; rectius esse
ducentes, ut a se potius, quam a uermibus comedantur: Ti-
bareni, quos dilexerint, senes suspendunt in patibulis: Hir-
cani uolucris, & canibus semiuiuos proiciunt, Caspii iis-
dem bestiis mortuos. Scythæ eos, qui a defunctis amati
sunt, uiuos infodiunt cum ossibus mortuorum. Bactri ca-
nibus, ad hoc ipsum nutritis, obiciunt senes. quod cum
Alexandri præfectus Nicanor emendare uoluisset, pene ami-
sit prouinciam. Coge Aegyptium, ut ouium lacte uescatur:
impelle

impelle, si uales, Pelusioten, ut manducet cepe. Singulæ
pene in Aegypto ciuitates, singulas bestias & monstra uene-
rantur; & quodcumque colucrint, hoc inuiolabile & sacrū
putant. unde & urbes quoque apud eos ex animalium uo-
cabulis nuncupantur, Leonto, Cyno, Lyco, Busyris,
Thmuis, quod interpretatur hircus. Et ut sciremus, quales
deos semper Aegyptus recepisset: nuper ab Hadriani ama-
sio urbs eorū Antinoïs appellata est. Peruides igitur, quod
non solum in esu, sed & in sepulturis, & in connubiis, & in
omni conuersatione unaquæque gens suo ritu & propieta-
tibus uictit; & hoc eam naturæ legem putare, quod didi-
cit. Verum fac esum carniū cunctis nationibus esse com-
munem, & passim licere, quod passim gignitur: quid ad
nos, quorum conuersatio in cælis est; qui, super Pythago-
ram, & Empedoclem, & omnes sapientiæ sectatores, non
ei debemur, cui nascimur, sed cui renascimur; qui repu-
gnantem carnem, & ad libidinum incentiua rapientem,
inedia subiugamus? Esus carniū, & potus uini, uentrisq.
saturitas seminarium libidinis est. unde & Comicus, Sine
Cerere, inquit, & Libero friget Venus. Per quinque sen-
sus, quasi per quasdam fenestras, uitiorum ad animam in-
troitus est. Non potest ante metropolis & arx mentis capi,
nisi per portas eius irruerit hostilis exercitus. horum per-
turbationibus anima prægrauatur, & capitur aspectu, audi-
tu, odoratu, sapore, tactu. Si Circensibus quispiam dele-
ctetur; si athletarum certamine, si mobilitate histrionum, si
formis mulierum, splendore gemmarum, uestium, metal-
lorum, & ceteris huiuscemodi; per oculorum fenestras ani-
mæ capta libertas est; & impletur illud propheticū: Mors
intrauit per fenestras nostras. Rursum auditus uario orga-
norum cantu; & uocum inflexionibus delinitur, & carmi-
ne poetarum, & comædorum, mimorumq. urbanitatibus,
& strophis, & quidquid per aures introiens uirilitem men-
tis effeminat. Odoris autem suauitas, & diuersa thymiamā-
ta, & amomum, & cyphi, oenanthæ, muscus, & peregrini
muris pellicula, quod dissolutis & amatoribus conue-

Philip. 3

Hier. 9

N n 4 niat

niat, nemo nisi dissolutus negat. Porro, ciborum auaritia, quod auaritiæ mater sit, & animum quasi quibusdam compedibus degrauatum in terra teneat, quis ignorat? Propter breuem gulæ uoluptatem terræ lustrantur, & maria; & ut mulsum uinum, pretiosusq. cibus fauces nostras transeat, totius uitæ opera desudamus. Tactus autem alienorum corporum, & feminarum ardentior appetitus, uicinus insanix est. ob hunc sensum cupimus, irascimur, gestimus, inuidemus, æmulamur, solliciti sumus; &, expleta uoluptate, per quandam plenitudinem rursus accendimur; quærimusq. facere, quod cum fecerimus, iterum pænitemus. Igitur, cum per has portas quasi quidam perturbationum cunei ad arcem nostræ mentis intrauerint; ubi erit libertas, ubi fortitudo eius, ubi de Deo cogitatio, maxime cum tactus depingat sibi etiam præteritas uoluptates, & recordatione uitiorum cogat animam compati, & quodam modo exercere quod non agit? His igitur rationibus inuitati multi philosophorum, reliquerunt frequentias urbium, & hortulos suburbanos, ubi ager irriguus, & arborum comæ, & susurrus auium, fontis speculum, riuus immurmurans, & multæ oculorum auriumq. illecebræ; ne per luxum & abundantiam copiarum, animæ fortitudo mollesceret, & eius pudicitia constupraretur. Inutile quippe est, crebro uidere per quæ aliquando captus sis, & eorum te experimento committere, quibus difficulter careas. nam & Pythagorei huiusmodi frequentiam declinantes, in solitudine & desertis locis habitare consueuerant. Platonici quoque, & Stoici in templorum locis, & porticibus uersabantur; ut admoniti augustioris habitaculi sanctitate, nihil aliud, quam de uirtutibus, cogitarent. Sed & ipse Plato, cum esset diues, & toros eius Diogenes lutatis pedibus conculcasset; ut posset uacare philosophiæ, elegit Academicam uillam, ab urbe procul, non solum desertam, sed & pestilentem; ut cura & assiduitate morborum, libidinis impetus frangeretur; discipuliq. sui nullam aliam sentirent uoluptatem, nisi earum rerum, quas discerent. Quosdam legimus effodisse sibi oculos, ne per

per eorum uisum a contemplatione philosophiæ auocarentur. Vnde & Crates ille Thebanus, proiecto in mari non paruo auri pondere, Abite, inquit, pessum malæ cupiditates: ego uos mergam, ne ipse mergar a uobis. Quod si quis existimat, & abundantia ciborum potionumq. se perfrui, & uacare posse sapientiæ, hoc est, & uersari in deliciis, & deliciarum uitiis non teneri; se ipsum decipit. cum enim, procul ab his remoti, sæpe capiamur naturæ illecebris; & cogamur ea cupere, quorum copiam non habemus: quanto magis, si circumdati retibus uoluptatum, esse nos liberos arbitremur? Sensus noster illud cogitat, quod uidet, audit, odoratur, gustat, attrectat; & ad eius rei trahitur appetitum, cuius capitur uoluptate: quod mens uideat, & mens audiat, & quod nec audire quippiam, nec uidere possimus, nisi sensus in ea, quæ cernimus, & audimus, fuerit intentus. Vetus quoque sententia est: difficile est, immo impossibile, deliciis & uoluptatibus affluentes non ea cogitare, quæ gerimus: frustra quidam simulant, salua fide, & pudicitia, & integritate mentis, se abuti uoluptatibus; cum contra naturam sit, copiis uoluptatum sine uoluptate perfrui; & Apostolus, hoc ipsum cauens, dixerit: Quæ autem

1. Tim. 5

in deliciis est uidua, uiuens mortua est. Sensus corporum quasi equi sunt, sine ratione currentes: anima uero in auxilium modum retinet frena currētium. & quo modo equi absque rectore præcipientes ruunt: ita corpus sine ratione, & imperio animæ, in suum fertur interitum. Alia quoque comparatio animæ & corporis a philosophis ponitur, corpus puerum, animam pædagogum esse dicentibus. unde & historicus, Animæ, inquit, imperio, corporis seruitio magis utimur. alterum nobis cum diis, alterum cum belluis commune est. Igitur, nisi uitia adolescentis, & pueri, prudentia pædadogi rexerit, omnis conatus eius & impetus ad lasciuiam properant. sine quattuor sensibus uiuere possumus, id est, sine aspectu, auditu, odoratu, atque complexu: absque gustu autem & cibis impossibile est humanum corpus subsistere. adesse ergo debet ratio, ut tales ac tantas

sumas

sumamus escas, quibus non oneretur corpus, nec libertas animæ prægrauetur; quia & comedendum est, & deambulandum, & dormiendum, & digerendum, & postea, inflatis uenis, incentiua libidinum sustinenda. Luxuriosa res uinum, & tumultuosa ebrietas. omnis, qui cum his miscetur, non erit sapiens. Ne tales accipiamus cibos, quos aut difficulter digerere, aut comesos, magno partos & perditos labore doleamus. holerum, pomorum, ac leguminum & facilius apparatus est; & arte impendiisq. coquorum non indiget; & sine cura sustentat humanum corpus; moderateq. sumptus, (quia nec auide deuoratur, quod irritamenta gulæ non habet) leuiori digestionem concoquitur. nemo enim uno aut duobus cibis, hisq. uilibus, usque ad inflationem uentris oneratur; quæ diuersitate carniū, & saporis delectatione percipitur. Cum uariis nidoribus fumant patinæ; ad esum sui, expleta esurie, quasi captiuos trahunt. unde & morbi ex saturitate nimia concitantur: multiq. impatientiam gulæ, uomitu remediuntur; &, quod turpiter ingesserunt, turpius egerunt. Hippocrates in Aphorismis docet, crassa & obesa corpora, quæ crescendi mensuram compleuerint, nisi cito ablatione sanguinis imminuantur, in paralysem & pessima morborum genera erumpere; & iccirco esse necessariam demptionem, ut rursus habeant, in quæ possint crescere: non enim manere in uno statu naturam corporum, sed aut crescere semper, aut decrescere; nec posse uiuere animal, nisi crescendi capax sit. unde & Galenus, uir doctissimus, Hippocratis interpres, athletas, quorum uita & ars sagina est, dicit in exhortatione medicinæ, nec uiuere posse diu, nec sanos esse; animasq. eorum ita nimio sanguine & adipibus, quasi luto, inuolutas, nihil tenue, nihil cæleste, sed semper de carnibus, & ractu, & uentris ingluuie cogitare. Diogenes tyrannos & subuersiones urbiū, bellaq. uel hostilia, uel ciuilia, non pro simplici uictu holerum pomorumque, sed pro carnibus & epularum deliciis asserit excitari. Quodq. mirandum sit; Epicurus, uoluptatis assertor, omnes libros suos repleuit holeribus, & pomis;

mis; & uilibus cibus dicit esse uiuendum; quia carnes & exquisitæ epulæ ingenti cura ac miseria præparentur; maioremq. poenam habeant in inquirendo, quam uoluptatem in abutendo: corpora autem nostra cibo tantum & potu indigere: ubi aqua & panis sit, & cetera his similia, ibi naturæ satisfactum: quidquid supra fuerit, non ad uiræ necessitatē spectare, sed ad uitium uoluptatis: bibere, & comedere nō ad deliciarum ardorem, sed sitim famemq. restinguere: qui carnibus uescantur, indigere etiam iis, quæ non sunt carniū; qui autem simplici uictu abutantur, eos carnes non requirere. sapientiæ quoque operam dare non possumus, si mensæ abundantiam cogitemus, quæ labore nimio & cura indiget. Cito expletur naturæ necessitas: frigus, & fames, simplici uestitu, & cibo expelli potest. unde & Apostolus, Habentes, inquit, uictum, & uestitum, his contenti sumus. Deliciæ, & epularum uarietates, fomenta auaritiæ sunt. Grandis exultatio animæ est, cum paruo contentus fueris, mundum habere sub pedibus, & omnem eius potentiam; epulas, libidines, propter quæ diuitiæ comparantur, uilibus mutare cibus, & crassiore tunica compensare. Tolle epularum, & libidinis luxuriam: nemo quæret diuitias; quarum usus aut in uentre, aut sub uentre est. Qui ægrotat, non aliter recipit sanitatem, nisi tenui cibo & castigato uictu, quæ λεπτὴ διαίτα dicitur. quibus ergo cibus recipitur sanitas, his & seruari potest: ne quis putet morbos holeribus concitari. Si autem Milonis illius Crotoniatæ uires holera nō ministrant, quæ nascuntur, & aluntur carnibus: quid necesse est uiro sapienti, & philosopho Christi, tantā habere fortitudinem, quæ athletic & militibus necessaria est; quā cū habuerit, ad uitia prouocetur? Illi arbitratur carnes sanitati congruas, qui uolunt abuti libidine; & in cœnum demer si uoluptatum, ad coitum semper exæstuant. Christiano sanitas absque uiribus nimis necessaria est. Nec turbare nos debet, si rari sint huius propositi sectatores: quia rari sunt & amici boni, & fideles, & pudici, & continentes: semperq. uirtus rara est. Lege Fabricii continentiam; Curii pauper-

1.Tim.6

paupertatem : & in tanta urbe uix paucos inuenies, quos se
 quaris . Noli timere, ne , si carnes non comederis , aucupes
 & uenatores frustra artificia didicerint . Legimus, quosdam,
 morbo articulari & podagræ humoribus laborantes , pro-
 scriptione bonorum ad simplicem mensam & pauperes ci-
 bos redactos , conualuisse . caruerant enim solitudine dis-
 pensandæ domus, & epularum largitate, quæ & corpus fran-
 gunt, & animum . Irridet Horatius appetitum ciborum ,
 qui consumpti relinquunt pœnitentiam : Sperne uolupta-
 tes : nocet empta dolore uoluptas . Et cum in amœnissimo
 agro in morsum uoluptuosorum hominum se crassum pin-
 guemq. describeret , lusit his uersibus : Me pinguem, & ni-
 tidum , & bene curata cute , uises , Cum ridere uoles , Epi-
 curi de grege porcum . Sed & ex uilissimis cibis uitanda sa-
 tietas est . nihil enim ita obruit animum , ut plenus uenter,
 & exæstuans , & huc illucq. se uertens , & in ructus , uel in
 crepitus uentorum efflatione respirans . Quale illud ieiuniũ
 est, aut qualis illa refectio post ieiunium , cum pridianis epu-
 lis distendimur , & guttur nostrum meditatorium efficitur
 latinarum ? dumq. uolumus prolixioris inediæ famã quæ-
 rere , tantum uoramus , quantum uix alterius diei nox dige-
 rat . itaque non tam ieiunium appellandum est , quam cra-
 pula, ac scetens & molesta digestio . Dicæarchus in libris an-
 tiquitatum , & descriptione Græciæ , refert , sub Saturno ,
 idest , in aureo sæculo , cum omnia humus funderet, nullum
 comedisse carnes , sed uniuersos uixisse frugibus , & pomis ,
 quæ sponte terra gignebat . Persarum regis Cyri uitam Xe-
 nophon octo uoluminibus explicat , polenta , & cardamo ,
 & sale, ac pane cibario eos asserens uictitare . Lacedæmonio-
 rum mentis , frugalitatisq. & superscriptus Xenophon , &
 Theophrastus , & omnes pene scriptores Græciæ testes
 sunt . Cheræmon Stoicus, uir eloquentissimus, narrat de ui-
 ta antiquorum Aegypti sacerdotum , quod , omnibus mun-
 di negotiis curisq. postpositis, semper in templo fuerint ; &
 rerum naturas , causasq. ac rationes siderum contemplati
 sint ; numquam mulieribus se miscuerint ; numquam co-
 gnatos

gnatos & propinquos, ne liberos quidem uiderint; ex eo tempore, quo cœpissent diuino cultui deferuire, carnibus & uino se semper abstinuerint, propter tenuitatem sensus, & uertiginem capitis, quam ex paruo cibo patiebantur, & maxime propter appetitus libidinis, qui ex his cibis, & ex hac potione nascuntur. pane raro uescebantur, ne onerarent stomachum: & si quando comedebant, tustum pariter hyssopum sumebant in cibo, ut escam grauiorem illius calore decoquerent. oleum tantum in holeribus nouerant, uerum & ipsum parum, propter nauseam, & asperitatem gustus leniendam. Quid loquar, inquit, de uolatilibus, cum ouum quoque pro carnibus uitauerint, & lac? quorum alterum carnes liquidas, alterum sanguinem esse dicebāt, colore mutato. Cubile eis de foliis palmarum, quas baias uocant, cōtextum erat: scabellum accliuē, & ex una parte obliquum, in terra pro puluillo capiti supponebant, bidui triduique in diem sustinentes. Humores corporis, qui nascuntur ex otio, & ex mansione unius loci, nimia uictus castigatione siccabant. Iosephus in secunda Iudaicæ captiuitatis historia, & in octauodecimo antiquitatum libro, & contra Appionem duobus uoluminibus, tria describit dogmata Iudæorum, Phariseos, Sadducæos, Essænos: quorum nouissimos miris effert laudibus, quod & ab uxoribus, & uino, & carnibus semper abstinuerint, & quotidianum ieiunium uerterint in naturam. Super quorum uita & Philo, uir doctissimus, proprium uolumen edidit. Eantes Cizycenus, & Asclepiades Cyprius, ætate, qua Pygmaleon in oriente regnabat, scribunt esum carniū non fuisse. Ebulus quoque, qui historiam Mithræ multis uoluminibus explicuit, narrat apud Persas tria genera Magorum; quorum primos, qui sint doctissimi, & eloquentissimi, excepta farina, & holere, nihil amplius in cibo sumere. Apud Eleusinam etiam uolucris, & piscibus, & quibusdam pomis abstinere, sollemne est. Bardesanes, uir Babylonius, in duo dogmata apud Indos Gymnophistas diuidit: quorum alterum appellat Bragmanas, alterum Samanæos; qui tantæ continentię sint,

sint, ut uel pomis arborū iuxta Gangem fluiuium, uel publico orizæ, uel farinæ alantur cibo; & cum rex ad eos uenerit, adorare illos solitus sit, pacemq. suæ prouinciæ in illorum precibus arbitrari sitam. Euripides, in Creta Iouis prophetas non solum carnibus, sed & coctis cibis abstinuisse, refert. Xenocrates philosophus, de Triptolemi legibus apud Athenienses tria tantum præcepta in templo Eleusinæ residere scribit, honorandos parentes, uenerandos deos, carnibus non uescendum. Orpheus in carmine suo esum carniū detestatur. Pythagoræ, Socratis, Antisthenis, & reliquorum frugalitatem referrem in confusionem nostram, nisi & longum esset, & proprii operis indigeret. hic certe est Antisthenes; qui, cum gloriose docuisset rhetoricam, audissetq. Socratem de paupertate disputantem, dixisse fertur ad discipulos suos: Abite, & magistrum querite: ego enim iam reperi. Statimq. uenditis, quæ habebat, & publice distributis, nihil sibi amplius, quam palliolum, seruauit. paupertatisq. eius, & laboris & Xenophon testis est in Symposio, & innumerabiles libri eius; quorum alios philosophico, alios rhetorico genere scripsit. Huius Diogenes ille famosissimus sectator fuit, potentior rege Alexandro, & naturæ uictor humanæ. nam cum discipulorum Antisthenes nullum reciperet, & perseverantem Diogenem remouere non posset; nouissime claua minatus est, nisi abiret. cui ille subiecisse dicitur caput, atque dixisse: Nullus tam durus baculus erit, qui me a tuo possit obsequio separare. Refert Satyrus, qui illustrium uirorum scribit historias, quod Diogenes palliolo duplici usus sit propter frigus, peram pro cellario habuerit, secumq. portarit clauam ob corpusculi fragilitatem, qua iam senex membra sustentare solitus erat; & *ἡμάρβριος* uulgo appellatus sit, in præsentem horam poscens a quolibet, & accipiens cibum. Habebat autem in portarum uestibulis, & porticibus ciuitatum: cumq. se contorqueret in dolio, uolubilem se habere domum iocabatur, & se cum temporibus immutantem. frigore enim os dolii uertebat in meridiem, æstate ad

te ad septentrionem : & , utcumque sol se inclinauerat , Dio
 genis simul prætorium uertebatur . Quodam uero tempore
 habens ad potandum cauum ligneum , uidit puerum manu
 concaua bibere ; & elisisse illud fertur ad terram , dicens :
 Nesciebam , quod natura haberet poculum . Virtutem eius
 & continentiam mors quoque indicat . nam , cum ad agonem
 Olympiacum , qui magna frequentia Græciæ celebraba-
 tur , iam senex pergeret , febri in itinere dicitur apprehen-
 sus : accubuisse in crepidine uix : uolentibusq. eum amicis
 aut in iumentum , aut in uehiculum tollere , non acquieuit :
 sed , transiens ad arboris umbram , locutus est : Abite quæ-
 so , & spectatum pergite : hæc me nox aut uictorem proba-
 bit , aut uictum . si febrem uicero , ad agonem ueniam ; si
 me uicerit , ad inferna descendam : ibiq. per noctem eliso
 gutture non tam mori se ait , quam febrem morte excludere .
 Vnius tantum philosophi exemplum posui , ut formo-
 suli nostri , & thorosuli , & uix summis pedibus adumbran-
 tes uestigia , quorum uerba in pugnis sunt , & syllogismi in
 calcibus , qui paupertatem apostolorum , & crucis duritiã
 aut nesciunt , aut contemnunt , imitentur saltem gentilium
 paritatem . Hæc de argumentis philosophorum , exem-
 plisq. differui . nunc ad exordium generis humani , idest ,
 ad nostra transiens , docebo , primum Adam in paradiso ac
 cepisse præceptum , ut , cetera poma comedens , ab una ar-
 bore ieiunaret . Beatitudo paradisi asque abstinentia cibi
 non potuit dedicari . Quamdiu ieiunauit , in paradiso fuit :
 comedit , & eiectus est : eiectus , statim duxit uxorem . Qui
 ieiunus in paradiso uirgo fuerat , satur in terra matrimonio
 copulatur : & tamen eiectus , non protinus accepit licen-
 tiam carniū uescendarum ; sed tantum poma arborum ,
 & fruges segetum , & herbarum holera ei traduntur in ci-
 bum : ut exul quoque paradisi , non carnibus , quæ in para-
 diso non erant , sed similitudine frugum paradisi uesceretur .
 Postea uero uidens Deus , quod diligenter appositum esset
 ad malitiam cor hominis ab adolescentia , & spiritus eius in
 his permanere non posset , quia erant caro , opera carnis
 diluuiio

- Gen.9** diluuiο condemnauit; & auidiſſimam hominum gulam probans, dedit eis licentiam comedendarum carnum: ut, dum ſibi intelligunt licere omnia, non deſiderent magnopere quod licebat; ne mandatum in cauſam uerterent prauaricationis. Quamquam & tunc ex parte imperatum ieiunium ſit. nam, cum alia munda dicantur, alia immunda;
- Gen.6** & in arca Noe de immundis bina, de mundis introducuntur imparia; & utique immundorum eſus ablatus ſit, ne ſine cauſa dicerentur immunda: ex parte ieiunium dedicatum eſt, docens abſtinentiam omnium in quorundam reſiſtione. Cur perdidit Eſau primogenita ſua? nonne propter cibum? impatientiamq. gulę lacrymis emendare non potuit. Eiectus de Aegypto populus Iſrael, & in terram re-promiſſionis lacte & melle manantem introducendus, Aegyptias carnes, & pepones, alliaq. deſiderat. Vtinam, inquit, obiſſemus percuffi a Deo in terra Aegypti, quando ſuper ollas carnum ſedebamus. Et iterum: Quis nos paſcet carnibus? Venerunt in mentem nobis piſces, quos in Aegypto comedebamus gratis, & cucumeres, & pepones, & porri, & cepe, & allia: at nunc anima noſtra arida, nihil niſi manna oculi noſtri conſpiciunt. Angelorum cibum contemnentes, carnes Aegyptias ſuſpirabant. Moyses quadraginta diebus & noctibus ieiunus in monte Sina, etiam tunc
- Exod.24** **Deut.8** probans non in pane ſolo uiuere hominem, ſed in omni uerbo Dei, cum Domino loquitur: populus autem ſatur idola fabricatur. Ille, uacuo uentre, legem accipit, ſcriptā digito Dei: iſte, manducans & bibens, conſurgensq. ludere, aurum conflat in uitulum, & Aegyptium bouem præfert Domini maieltati. tot dierum labor unius horę ſaturitate perit. Frangit audacter Moyses tabulas: ſciebat enim Dei ſermonem non poſſe audire temulentos. Incraſſatus eſt, & pinguefactus, & dilatatus, & recalcitrauit dilectus,
- Deut.32** & dereliquit Dominum, qui fecerat eum, & abſceſſit a Deo ſalutari ſuo. Vnde & in eodem Deuteronomio præcipitur: Ne, cum manducaueris, & biberis, & domos optimas ædificaueris, ouibus, & bubus tuis multiplicatis, & argento,

argento, & auro, extollatur cor tuum, & obliuiscaris Domini tui. Denique manducauit populus, & increassatum est *Matth. 13*
cor eius, ne uideret oculis, & audiret auribus, & corde con-
uiceret: & uultum ieiunantis Moyfi, & iuxta Hebraicam *Exod. 34*
ueritatem, Dei confabulatione cornutum, pallus & pin-
guior populus sustinere non potuit. Quamobrem & Domi-
nus noster, atque saluator, non ob differentiam uirginita-
tis, & nuptiarum, ut quidam putant, sed ob ieiuniorum
confortia, Moysen, & Eliam transfiguratus in monte se-
cum ostendit in gloria. Quamquam Moyses, & Elias ty-
pum proprie legis prophetarumq. monstrauerint: sicut ma-
nifeste euangelii scriptura testatur: Dicebant ei exitum, quē *Matth. 17*
completurus erat in Hierusalem. passionem enim Domi-
ni non uirginitas, & nuptiæ, sed lex nunciat, & prophe-
tæ. Quod si contentiose in Moyse nuptias, in Elia uirgini-
tatem dixerint demonstrari: breuiter audiant, Moysen mor *Deut. 34*
tuum, & sepultum, Eliam igneo curru raptum, ante im- *4. Reg. 2*
mortalem esse coepisse, quam mortuum. Sed nec secunda *Exod. 34*
cōscriptio tabularū absque ieiunio potuit impetrari. quod
ebrietas perdiderat, inedia reperit. Ex quo ostenditur, pos-
se nos per ieiunium redire in paradysum, unde per saturita-
tem fueramus eiectioni. In Exodo aduersus Amelech, oratio- *Exod. 17*
ne Moyfi, & totius populi, usque ad uesperam ieiunio di-
micatum est. Iesus, filius Naue, stationem imperauit soli *Ios. 10*
& lunæ: & inediam plus quam unius diei, uictoris exerci-
tus protelauit. Saul, sicut in Regnorum primo libro scribi-
tur, Maledictus, inquit, qui ederet panem usque ad uespe- *1. Reg. 14*
ram, donec ulciscar me de inimicis meis. Et non gustauit
omnis populus eius, & tota terra prandebat. Tantiq. fuit
auctoritas itationis, semel Domino destinata, ut Ionathas,
qui causa uictoriæ extiterat, deprehenderetur sorte, & igno-
rantia crimen declinare non posset, patrisq. in se concita-
ret manum, & uix populi precibus saluaretur. Elias, qua- *3. Reg. 19*
draginta dierum ieiunio preparatus, Deum uidit in monte
Oreb, & audit ab eo: Quid tu hic Elia? Multo familiarior
ista uox, quam illa in Genesi: Adam ubi es? Illa in pa- *Gen. 3*
stium

1. Reg. 7 stum terrebat, & perditum: hæc ieiunanti famulo blandie-
 2. Par. 32 batur. Congregatum samuel populum in Masphat, indi-
 cto ieiunio roborauit, & fecit hostibus fortio-
 Esa. 37 rum impetum, & potentiam Sennacherib, Ezechie regis
 lacrymæ, saccus, & humiliatio uictus, fregit, prostrauit,
 Ion. 3 & uicit. Et e contrario ciuitas Niniue imminentem iram
 Domini ieiuniorum miseratione detorsit: quam & sodoma
 placasset, & Gomorra, si uoluissent agere pænitentiam, &
 lacrymas pænitiæ patrocinate conciliare ieiunio. A-
 3. Reg. 21 chab, rex impiissimus, ut sententiam Dei subterfugeret,
 1. Reg. 1 & euersio domus eius differretur in posteros, ieiunio impe-
 trauit, & sacco. Anna, uxor Helchanæ, inanem cibo uen-
 trem filio meruit implere. Periclitantur in Babylone Ma-
 gi; omnis coniectur, & hariolus, & haruspex cæditur. Da-
 Dan. 1 niel & tres pueri reuelationem merentur ieiunio; & pastile
 guminibus, pulchriores sunt, & prudentiores iis, qui de
 mensa regis carnibus uestebantur. Deinde scriptum est,
 Dan. 10 quod Daniel tribus hebdomadibus ieiunauerit; panem sua-
 uem non comederit; caro & uinum non intrauerit os eius;
 oleo unctus non sit; & uenerit ad eum angelus, dicens: Da-
 niel, homo miserabilis es. Qui deo miserabilis apparue-
 rat, post ieiunium leonibus in lacu fuit horribilis. Quam
 Dan. 14 pulchra res; quæ placat Deum, leones mitigat, Dæmones
 terret. Mittitur ad eum (licet hoc in Hebraicis uolumini-
 bus non inuenerimus) Habacuc, messorum prandium por-
 tans, talem enim discophorum inedia meruerat hebdoma-
 2. Reg. 12 dis. Dauid, periclitante filio post adulterium, ἐν ξομολό-
 Psal. 101 γητιν in cinere & ieiunio facit, dicens: Quia cinerem tam
 quam panem manducabam, & potum meum cum fletu
 Psal. 108 miscebam. Et infirmata sunt in ieiunio genua mea. Et cer-
 Iud. 13 te iam audierat a Nathan: Dominus abstulit a te hoc pecca-
 1. Reg. 3 tum. Sampson & Samuel uinum & siceram non bibunt:
 erant enim filii repromissionis, & per abstinentiam ieu-
 Lewit. 10 niumq. concepti. Aaron, & ceteri sacerdotes, ingressuri
 templum, omne, quod potest inebriare, non potant, ne
 moriantur. ex quo intelligimus, mori eos, qui in ecclesia
 non

non sobrii ministrarint : Quamobrem exprobratur Israeli, potum dabatis Nazaræis meis uinum . Ionadab , filius Rechab , præcepit filiis suis , ut non biberent uinum usque in æternum . Quibus cum offerret Hieremias uinum , ut biberent ; & illi bibere nolissent ; loquitur Dominus per prophetam : Quia obedistis præcepto Ionadab patris uestri , non deficiet uir de stirpe Ionadab , filii Rechab , stans in conspectu meo cunctis diebus . In foribus Euangelii Anna , filia Phanuelis , uniura inducitur , semperq. ieiunans . Et Dominum uirginem longa castitas longaq. ieiunia susceperit . Præcursor eius , & præco Ioannes locustis alitur , & filii uestri melle , non carnibus : habitatioq. deserti , & incunabula monachorum , talibus inchoantur alimentis . Sed & ipse Dominus baptisma suum quadraginta dierum ieiunio dedicauit , & acriora dæmonia docuit non nisi oratione & ieiuniis posse superari . Cornelius centurio , ut spiritum sanctum acciperet ante , quam baptisma , eleemosynis meruit , crebrisq. ieiuniis . Paulus apostolus post famem , & sitim , & ceteros labores suos , & pericula latronum , naufragia , solitudines , crebra ieiunia enumerat . Et discipulo Timotheo dolenti stomachum , & infirmitates plurimas sustinenti , suadet uini modicam portionem : Iam noli , inquit , aquam bibere . Cui autem dicit , Iam noli aquam bibere , ostendit eum aquam ante potasse . quod non concederet , nisi crebræ infirmitates , & dolor stomachi postulassent . Reprobat quidem Apostolus eos , qui prohibebant nuptias , & iuebant cibis abstinere , quos Deus creauit ad utendum cum gratiarum actione : sed Marcionem designat , & Tatianum , & ceteros hæreticos , qui abstinentiam indicunt perpetuam , ad destruenda , & contemnenda , & abominanda opera creatoris . Nos autem & creaturam omnem laudamus Dei ; & maciem faginæ , abstinentiam luxuriæ , ieiunia præferimus saturitati . Vir quippe in laboribus laborat sibi , & uim facit in interitum suum . Et a diebus Ioannis Baptiste , ieiunatoris , & uirginis , regnum cælorum uim patitur , & uiolenti diripiunt illud . Timemus enim , ne ab ad

Amos 2

Hier. 35

Luc. 2

Matth. 2

Matth. 4

Matth. 17

Act. 10

2. Cor. 11

1. Tim. 5

1. Tim. 4

Matth. 11

uentu æterni iudicis, sicut in diebus diluuii, & euerfionis So
Luc. 17 domæ, & Gomorræ, deprehendamus manducantes, & bi
 bentes, & nubentes, & nuptui tradentes. nam & diluiui-
 um, & ignis de cælo saturitatem pariter & nuptias, quas
1. Cor. 10 deleret, inuenit. Nec mirum, si omne, quod in macello
 uenditur, Apostolus emi iubeat, & comedi: cum idolola-
 tris, adhuc in templis idolorum quasi idolothyta uescenti-
 bus, pro summa abstinencia fuerit, cibus tantum abstinere
Rom. 14 gentilium. Quod si loquitur ad Romanos: Is, qui mandu-
 cat, non manducantem non spernat; & qui non mandu-
 cat, manducantem non iudicat: non inter ieiunia & satura-
 tatem æqualia merita dispensat; sed contra eos loquitur,
 qui, in Christum credentes, adhuc Iudaizabant; & eos,
 qui ex gentibus crediderant, monet, ut ne scandalizent il-
 los cibo suo, qui adhuc in fide infirmiores erant. Denique
 & in consequentibus hoc ipsum sonat. Scio, & confido in
 Domino Iesù, quod nihil commune per se ipsum est, nisi
 ei, qui existimat quid commune esse, illi commune est. si
 enim propter cibum frater tuus contristatur; iam non se-
 cundum caritatem ambulas. noli cibo tuo illum perdere,
 pro quo Christus mortuus est. Non ergo blasphemetur bo-
 num nostrum. Non est enim regnum Dei esca, & potus.
 Ac, ne quis putaret hoc de ieiuniis dici, & non de supersti-
 tione Iudaica, statim edisserit: Alius credit manducare
 omnia: qui autem infirmus est, holera manducat. Et rur-
 sum: Alius iudicat diem plus, quam diem; alius iudicat
 omnem diem. Vnusquisque in suo sensu abundet. Qui sa-
 pit diem, Domino sapit: & qui manducat, Domino man-
 ducat: gratias enim agit Deo. & qui non manducat, Do-
 mino non manducat: & gratias agit Deo. Qui enim adhuc
 infirmi erant in fide; & alias carnes mundas, alias arbitra-
 bantur immundas; & inter diem & diem esse aliquid existi-
 mabant, uerbi gratia, sanctius esse sabbatum, & neome-
 nias, & scenopegiam, quam reliquos dies; iubentur holer-
 ra manducare; quæ indifferenter comeduntur ab omnibus.
 qui uero firmioris erant fidei; omnes carnes, & dies omnes
 æquales

æquales esse credebant. Illud autem, quod proponere ad-
 uersarius ausus est, Dominum uoratore, & potatore *Matth. 23*
 uini a phariseis appellatum; & quia ad epulas ierit nuptia- *Ioan. 2*
 rum, & conuiuia non despexerit peccatorum; existimo
 quod nobiscum faciat. Iste est Dominus, ut arbitraris, uo- *Matth. 4. 5*
 rator: qui quadraginta diebus Christianorum ieiunium san- *Ioan. 4*
 ctificauit: qui beatos appellat esurientes, & sitientes: qui
 escam habere se dicit, non quam discipuli suspicabantur,
 sed quæ in perpetuum non periret: qui de die crastino cogi- *Matth. 6*
 tare prohibet: qui, cum esurisse & sitisse dicatur, & isse tre-
 quenter ad prandia, excepto mysterio, quod in typum suæ
 passionis expressit; & probandi corporis ueritate, nec gu- *Matth. 26*
 læ scribitur seruasse, nec uentri: qui diuitem purpuratum
 propter epulas narrat in tartaro, & Lazarum pauperem ob *Luc. 16*
 inediam dicit esse in sinu Abraham: qui, quando ieiunamus, *Matth. 6*
 ungi caput & lauare faciem præcipit; ut non gloriæ homi-
 num, sed Domino ieiunemus: qui comedit quidem post re- *Luc. 24*
 surrectionem partem piscis assi, & fauam, non propter esu-
 riam, & gutturis suauitatem, sed ut ueritatem sui corporis *Mar. 5*
 comprobaret. nam, quotiescumque mortuum suscitauit, *3. Ioan. 12*
 iussit ei dari manducare; ne resurrectio phantasma putare-
 tur. Et Lazarus, post resurrectionem, ob hanc causam scri-
 bitur cum Domino inisse conuiuium. Nec hoc dicimus,
 quod negemus pisces, & cetera, si uoluntas fuerit, in cibo
 esse sumenda: sed, quo modo nuptiis uirginitatem, ita satu-
 ritati & carnibus ieiunia spiritumq. præferimus. Si autem
 Petrus hora sexta pransurus ascendit in cenaculum, fortui- *Act. 10*
 ta esuries non facit præiudicium ieiuniorum. hoc enim mo-
 do & Dominus, quia ad puteum Samariæ hora sexta fessus *Ioan. 4*
 resedit, & bibere uoluit; omnibus incumbet necessitas, ut
 lint nolint, hoc tempore bibendi. Potuit autem fieri, ut
 uel sabbatum esset, uel dies Dominicus; & post bidui, tri-
 duuq. ieiunium, hora sexta esurierit. numquam enim credi-
 derim, apostolum, si ante unam diem cenauerat, epulisq.
 distentus fuerat, alterius diei esurisse meridie. quod si cena-
 uit pridie, & sequenti die esuriuit ante prandium: non exi-

O o 3 limo,

- Esa.* 58 flimo; quod usque ad satietatem comederit; qui tam cito potuit esurire. Porro, si per Esaiam loquitur Deus, quod non tale ieiunium elegerit, dicens: In diebus ieiuniorum uestrorum inueniuntur uoluntates uestræ; & subiectos percussit; & in iudicia, & in lites ieiunatis, & cæditis pugnis: non tale ieiunium elegi, dicit Dominus: quale elegerit, docet: Frange esurienti panem tuum, & pauperes sine tecto induc in domum tuam. Si uideris nudum, uesti: & domesticos seminis tui ne despicias. Non igitur ieiunium reprobauit, sed, quale uellet, ostendit. Neque enim uentris esuries accepta est Deo, quam lites, & rapinæ, & luxuria destruit.
- Leuit.* 16 Si non uult ieiunium Deus, quo modo in Leuitico præcipit, ut septimo mense, decima mensis, omnis populus ieiunet usque ad uesperam; & qui non afflixerit animam suam, moriatur, & exterminetur de populo suo? Quare sepulcra concupiscentiæ, ubi carnibus deditus populus ruit, usque hodie in solitudine perseverant? Et crassus populus ortygometram scribitur ad choleram usque ructasse? Cur homo Dei, ad cuius prophetiam manus aruerat regis Hieroboam, quia manducauit contra edictum Dei, illico percussus est? & leo, qui asinam custodiuit intactam, prophetæ leuanti se de prædio non pepercit? Qui ieiunus miracula fecerat, pransus illico saturitatis poenas luit. Sed & Ioel clamat: sanctificate ieiunium: prædicate curationem: ut monstraretur, ieiunium sanctificari ceteris operibus, & sanctificatum ieiunium curationi proficere peccatorum. Quo modo autem uirginitati ueræ non præiudicat imitatio uirginum diaboli: ita nec ueris ieiuniis cofferum Isis, & Cybelis, & quorundam ciborum in æternum abstinentia; maxime cum apud illos ieiunium panis, sagina carniū compensetur. Et, sicut signa, quæ faciebat Moyses, imitabantur signa Aegyptiorum, sed non erant in ueritate; nam uirga Moyse uirgas Magorum deuorabat: ita per omnia, quæ in æmulationem Dei facit diabolus, non religionis nostræ superstitio, sed nostra arguitur negligētia, id nolentium facere, quod bonum esse, etiā sæculi homines non ignorant. Quarta propositio; quæ & extre-

extrema est; duos esse ordines, ouium, & hircorum; alterum iustorum, alterum peccatorum; alios stare ad dextris, alios a sinistris; & audire iustos: Venite benedicti patris mei, possidete paratum uobis regnum a constitutione mundi: Peccatoribus uero dici: Discedite a me maledicti in ignem æternum, qui præparatus est diabolo, & angelis eius: Arborem bonam non posse malos fructus facere, nec malam bonos: Vnde & Saluator loquitur ad Iudæos: Vos de patre diabolo estis, & concupiscentias patris uestri facere uultis. Decem uirgines proponit stultas, atque sapientes; & quinque, quæ oleum non habuerunt, remansisse extrinsecus: alias uero quinque, quæ sibi lumen bonorum operum præparauerant, thalamum intrasse cum sponso. Ascendit ad diluuium, & ait: Qui erant cum Noe, iusti seruati sunt; qui uero peccatores, omnes in commune perierunt. Apud Sodomam, & Gomorram, exceptis duobus gradibus bonorum malorumque, nulla diuersitas inuenitur. qui est iustus, eripitur: qui peccator, pari deuoratur incendio. una salus liberatis, unus interitus remanentibus. Ne paululum quidem a iustitia declinandum, indicio est uxor Lot. Si autem, inquit, mihi opponis, quare iustus labore in pace, aut persecutionibus; si nullus profectus est, nec maiora præmia: scias hoc eum facere, non ut plus quid mereatur, sed ne perdat, quod accepit. In Aegypto quoque decem plagas æqualiter omnes sentiunt peccatores: & similes tenebræ domino & seruo, nobili & ignobili, regi imminet & uulgo: sanctis uero Dei, & populo Israel una erat lux. Sed & in mari Rubro iusti pariter transeunt, peccatores pariter obruuntur. Sexcenta hominum millia, excepta imbelli ætate & sexu, in deserto æqualiter ruunt: & duo, qui iustitia preces erant, æqualiter liberantur. Per quadraginta annos cum suis Israel similiter laborat, & moritur. Gomor mannae uniuersis ætatibus una in cibo mensura est: uestitus pariter non deteruntur: capilli simul non augentur: barba in commune non crescit: calciamenta ex æquo omnibus durant: non incaluerunt pedes: cibis in ore cunctorum æqualiter sa-

O o 4 pit.

- pit: ad mansionem unam pati labore & mercede pergebāt. Omnis Hebræus æquale habet pascha, æquales scenope-
Leuit. 25 gias, æquale sabbatum, æquales neomenias. Septimo re-
 quietionis anno absque personarum discretionem dimittitur:
Matth. 13 & in iubilæo uniuersa cunctis debita relaxantur, atque ad
 antiquam possessionem uenditor redit. Parabolam autem
 in euangelio seminantem, in qua in terra bona centesimus &
 sexagesimus & tricesimus fructus exoritur; & e contrario in
 terra mala, triplex sterilitatis uarietas indicatur; in duos or-
Marc. 10 dines diuidit, bonæ terræ, & malæ. Et quo modo aposto-
Matth. 19 lis, pro derelictis filiis & uxoribus, in alio euangelio centies,
 in alio septies Dominus repromittit, & in futuro uitam
 æternam; nullaq. distantia est inter centum, & septem: sic
 & in hoc numero non facere præiudicium, ubi huius ter-
 ræ fertilitas prædicatur, præsertim cum & euangelista Mar-
Marc. 4 cus retrorsum numeret triginta, sexaginta, & centum. Di-
Ioan. 6 cit Dominus: Qui manducat meam carnem, & bibit meū
 sanguinem, in me manet, & ego in illo. Sicut ergo sine ali-
 qua differentia graduum Christus in nobis est: ita & nos in
Ioan. 14 Christo sine gradibus sumus. Omnis, qui diligit me, sermo-
 nem meum seruabit: & pater meus diliget eum, & ad eum
 ueniemus, & mansionem apud eum faciemus. Qui iustus
 est, diligit: qui diligit, ueniunt ad eum pater, & filius, & in
 eius habitant hospitio. Vbi autem huiuscemodi habitator
 est, puto quod nihil deesse possit hospiti. Sin autem dicit:
 Multæ mansiones sunt apud patrem meum: non in regno
 cælorum diuersas significat mansiones, sed ecclesiarum in
 toto orbe numerum, quæ constat una per septem. Vado,
 inquit, & præparabo uobis locum, non loca. Si hæc repro-
 missio proprie duodecim apostolorum est; ergo Paulus ex-
 clusus est de hoc loco; & electionis uas superfluum putabi-
Matth. 20 tur, & indignus. Ioannes, & Iacobus, quia plus ceteris
1. Cor. 6 petierunt, non impetrauerunt: & tamen non est dignitas eo-
 rum imminuta; quia reliquis apostolis æquales fuerunt.
 Nescitis, quia corpora uestra templum est spiritus sancti?
 Templum, inquit, est; non templa: ut similiter in omni-
 bus

bus habitatorem ostenderet Deum. Non pro his rogo tantum, sed pro illis, qui credituri sunt per uerbum eorum in me; ut, sicut tu pater in me, & ego in te unum sumus, ita omnes unum sint in nobis. Gloriam, quam dedisti mihi, dedi eis: dilexi eos, sicut me dilexisti. et quo modo nos sumus pater & filius & spiritus sanctus unus Deus: sic & unus populus in ipsis sit, hoc est, quasi filii carissimi, diuinæ con-
 sortes naturæ. Sponsa, soror, mater, & quæcumque alia putaueris uocabula, unius Ecclesiæ congregatio est, quæ nunquam est sine sponso, fratre, filio; unam habet fidem; nec constupratur dogmatum uarietate; nec hæresibus scinditur: uirgo permanet. Quocumque uadit agnus, sequitur illum: *Apoc. 14*
 sola nouit canticum Christi. Si autem, inquit, mihi opposueris, stella a stella differt in claritate: audies differre stellam a stella, hoc est, spirituales a carnalibus. Omnia membra *1. Cor. 15*
 æqualiter diligimus, nec oculum præponimus digito, nec digitum auriculæ; sed in singulorum amissione membrorum communis dolor est. Aequaliter introimus in hoc sæculum, & æqualiter de eo egredimur. Vnus Adam terrenus, & alter cælestis. qui in terreno fuerit, a sinistris est, & peribit: qui in cælesti, a dextris est, & saluabitur. Qui fratri dixerit, *Matth. 5*
 fatue, & raka; reus erit gehennæ. Et qui homicida fuerit, & adulter; mittetur similiter in gehennam. In persecutione qui incenditur, qui suffocatur, qui decollatur, qui fugerit, qui in carcere inclusus obierit; uaria quidem luctus genera, sed una corona uictorum est. Inter eum fratrem, qui *Luc. 15*
 semper cum patre fuerat, & qui postea pœnitens est receptus, nulla diuersitas est. Operariis primæ horæ, & tertiæ, & sextæ, & nonæ, & undecimæ, unus denarius æqualiter red-
 ditur: & quo magis admireris, ab iis incipit præmium, qui minus in uinea laborarunt. His, & huiusmodi diuina-
 rum scripturarum testimoniis, quæ ad peruersitatem sui dog-
 matis callidus disputator inclinat, quis non tentetur etiam
 electorum Dei? & quod Ioannes apostolus antichristos di-
 cit uenisse multos, hæc uera est antichristi prædicatio, quæ
 inter Ioannem & ultimum pœnitentem nullam facit esse di-
 stan-

stantiam. Simulq. miror, quo modo serpens lubricus, & Proteus noster, in uariarum se mutet portenta formarum. qui enim in coitu & in saturitate Epicureus est, subito in retributione meritorum Stoicus efficitur. Hierosolymam Cithio, Iudæam Cipro, Christum Zenone commutat. Si nō licet a uirtutibus paululū declinare; & omnia peccata sunt paria; eiusdemq. criminis reus est, qui panem esurienti surripuerit, & qui hominem occiderit: tu quoque maximorum scelerum reus teneberis. Porro aliud est, si te dicas ne minima quidem habere peccata; & cum omnes apostoli, & prophetæ, & sancti, iuxta id, quod in secunda propositione disserui, peccatores esse se plangant, solus de iustitia glorieris. Ante nudo eras pede, modo non solum calciato, sed & ornato. tunc pexa tunica, & nigra subucula uestiebaris, sordidatus, & pallidus, & callosam opere gestitans manum: nunc lineis & sericis uestibus, & Atrebatum ac Laodiceæ indumentis ornatus incedis. rubent buccæ: nitet cutis: comæ in occipitium frontemq. tornantur: protensus est aqualiculus: insurgunt humeri: turgēt guttur: & de obefis faucibus uix suffocata uerba promuntur. Certe in tanta diuersitate uictus & uestitus, necesse est, aut hic, aut ibi esse peccatum: non quod peccatum in cibo, aut in uestibus asseram: sed quod uarietas & commutatio in deterius, reprehensioni proxima sit. Quod autem reprehenditur, a uirtute procul est: quod a uirtute procul est, uitio mancipatur: quod uitiosum arguitur, peccato iungitur: quod peccatum est, iuxta tuam sententiam in sinistra parte, & hircorum grege describitur. Aut reuerteris igitur ad antiquum propositum, ut ovis possis esse ad dexteram: aut, si priorem sententiam peruersa pœnitentia commutaris; uelis nolis, quamquam barbam raseris, inter hircos numeraberis. Verum quid prodest luscum uocare luscum, & accusatoris docere inconstantiam, cum propositionum series diluenda sit? Oves, & hædos a dextera, & sinistra, duos iustorum, & peccatorum esse ordines non negamus. Arborem bonam, fructus malos non facere, nec malam bonos, nulli dubium est.

Decem quoque uirgines sapientes, & stultas, in bonas, malasq. diuidimus. In diluuiio liberatos iustos, & peccatores aquis obrutos, non ignoramus. In Sodoma & Gomorra ereptum iustum, & impios igne consumptos, omnibus perspicuum est. Decem quoque plagis percussam Aegyptum, & Israel fuisse sospitem nouimus. In mari Rubro transisse iustos, & Pharaonem cum suo exercitu demersum, etiam in scholis cantant paruuli. Sexcenta millia in deserto cecidisse, quia increduli fuerint, & duos tantum terram re-
 missionis intrasse, scripturae docent, & reliqua, quae usque ad operarios uineae, in duos bonorum & malorum ordines descripsisti. Sed quale est, ut, quia inter bonos & malos di-
 uisio est, tu asseras inter ipsos bonos, uel e contrario malos nullam esse distantiam, nihilq. referre, utrum in pecore aliquis aries sit, an ouicula? utrum primam lanam habeat, an secundam? utrum scabidum pecus sit, & morbidum, an ue-
 getum, atque sussultans? maxime cum Ezechiel oues ratio-
 nables, & diuersitatem inter pecus & pecus, suae prophe-
 tiae auctoritate demonstraret, dicens: Ecce ego iudico inter
 pecus & pecus, & inter arietes & hircos, & inter pecus pin-
 gue, & macilentum: pro eo quod lateribus & humeris im-
 pingebatis, & cornibus uestris uentilabatis omnia infirma
 pecora, donec dispergerentur. Et ut sciremus quae ista sunt
 pecora, statim intulit: Vos autem greges mei, oues pascuae
 meae homines estis. Id ipsum ergo erit Paulus, & ille pae-
 nitens, qui cum patris uxore dormierat, quia in Ecclesia post
 penitentiam receptus est, & quia simul a dextris est, in ea-
 dem cum apostolo claritate fulgebit? Et quo modo in uno
 agello usque ad messem in consummationem mundi ziza-
 nia pariter frumenta-
 que succrescunt? Qua consequentia pi-
 sces boni & mali, sagma Christi & reti euangelico continen-
 tur? Cur in typo Ecclesiae, in arca Noe, diuersa animalia,
 & pro qualitate meritorum, diuersae sunt mansiones? Cur
 astitit regina a dextris Domini in uestitu deaurato, circum-
 data uarietate? Cur Ioseph in forma Christi, uariam ha-
 buit tunicam? Cur Apostolus loquitur ad Romanos: Vni
 cuique

Ezech. 34

1. Cor. 5

2. Cor. 2

Matth. 13

Psal. 44

Gen. 37

Rom. 12

cuique sicut Deus diuisit mēsuram fidei? Sicut enim in uno corpore multa membra habemus; omnia autem membra non eundem actum habent: ita multi unum corpus sumus in Christo, singuli autem alter alterius membra. Habentes autem donationes secundum gratiam, quæ data est nobis, differentes, siue prophetiam secundum mensuram fidei, siue ministerium in ministrando, siue qui docet in doctrina, qui exhortatur in exhortando, qui tribuit in simplicitate, **Rom. 12** qui præest in sollicitudine, & reliqua. Et in alio loco: Alius iudicat diem plus quam diem; alius iudicat omnem diem. Vnusquisque in suo sensu abundet. Et ad Corinthios: Ego **1. Cor. 3** plantavi, Apollo rigauit, sed Deus incrementum dedit. Itaque neque, qui plantat, est aliquid; neque, qui rigat; sed qui incrementum dat Deus. Qui plantat, & qui rigat, unum sunt. Vnusquisque autem propriam mercedem accipiet secundum suum laborem. Dei enim sumus adiutores: Dei agricultura, Dei ædificatio estis. Et rursum: secundum gratiam Dei, quæ data est mihi, ut sapiens architectus fundamentum posui: alius autem superædificat. fundamentum enim aliud nemo potest ponere, præterquam id, quod positum est, quod est Christus Iesus. Si quis autem superædificat super fundamentum hoc, aurum, argentum, lapides pretiosos, ligna, fenum, stipulam; uniuscuiusque opus apparebit. Dies enim Domine illud manifestabit: quoniam in igne reuelabitur; & singulorum opus quale sit, ignis probabit. Si cuius opus manserit, quod superædificauit; mercedem accipiet. Si cuius opus arserit, detrimentum patietur; ipse autem saluus erit, sic tamen quasi per ignem. Si is, cuius opus arsit, & periit, & damnum sustinuit laboris sui, perdet quidem laboris præmium, sed ipse saluabitur; non tamen absque probatione ignis: ergo is, cuius opus manserit, quod superædificauit, sine ignis probatione saluabitur, & inter saluationem & saluationem utique erit diuersitas aliqua. **2. Cor. 4** Necnon in alio loco, Sic nos, inquit, existimet homo quasi ministros Christi, & dispensatores mysteriorum Dei. Hic iam quæritur inter dispensatores, ut fidelis quis inueniatur.

Vis

Vis scire, quoniam inter dispensatorem, & dispensatorem sit multa distantia: (non dico de malis & bonis, sed de ipsis bonis, qui ad dexteram stant) audi consequentia: Nescitis, 1. Cor. 9
 quoniam qui in sacrificiis operantur, de sacrificiis comedunt: & qui altario deseruiunt, de altario participantur? Sic & Dominus disposuit iis, qui euangelium annunciant, de euangelio uiuere. Ego autem non abutar horum aliquo. Non scripsi autem hæc, ut sic fiant in me. melius est enim mihi mori, quam ut gloriam meam quis euacuet. si enim euangelizauero, non est mihi gloria: necessitas quippe mihi incūbit. uix enim mihi est, si non euangelizauero. nam si uoluntate hoc ago, mercedem habeo: si autem nolens, dispensatio mihi credita est. quæ est ergo merces mea? Ut euangelizans sine sumptu, ponam euangelium Christi; ut non abutar potestate, quæ data est mihi in euangelio. Cum enim essem liber, ex omnibus omnium me seruum feci, ut plures lucrificerem. Numquid potes dicere, peccare eos, qui uiuunt de euangelio, & qui de sacrificiis participantur? Vtique non. Dominus enim disposuit, ut, qui prædicant euangelium, de euangelio uiuant. Apostolus autem, qui non abutitur hac licentia, sed laborat manibus suis, ne quem grauet, & die ac nocte operatur, & ministrat iis, qui secum sunt, utique ideo hoc facit, ut plus laborans, plus aliquid mercedis accipiat. 1. Thes. 2
 Curramus ad reliqua. Diuisiones gratiarum sunt, idem autem spiritus. Et diuisiones ministeriorum sunt, idem autem Dominus. Et diuisiones operationum sunt, idem autem Deus, qui operatur omnia in omnibus. Vnicuique autem data est operatio spiritus iuxta id, quod expedit. Et iterum: 1. Cor. 12
 sicut corpus unum est, & membra plura habet; omnia autem membra corporis cum sint multa, unum corpus est: sic & Christus. Verum ne dicas in uno corpore diuersa membra unum habere meritum, statim gradus describit Ecclesiæ, & ait: Quosdam quidem posuit Deus in Ecclesia, primum apostolos, secundo prophetas, tercio doctores, deinde uirtutes & gratias curationū, opitulationes, gubernationes, genera linguarū. Numquid omnes apostoli? nūquid omnes prophete?

propheta? numquid omnes doctores? numquid omnes uirtutes? numquid omnes gratiam habent curationum? numquid omnes linguis loquuntur? numquid omnes interpretantur? Aemulamini autem dona maiora; & adhuc excellentiorem uiam uobis demonstro. Cumq. de caritatis uirtutibus latinis disputasset, adiecit: siue prophetie euacuabuntur, siue lingue cessabunt, siue scientia destruetur: ex parte enim cognoscimus, & ex parte prophetamus; cum autem uenerit, quod perfectum est, euacuabitur, quod ex parte est. Et in continentibus: Nunc autem manent fides, spes, caritas, tria hæc. maior autem horum est caritas: Sectamini caritatem, æmulamini spiritualia, magis autem ut prophetetis. Et iterum: Volo autem omnes uos loqui linguis, magis autem prophetare. Nam maior est qui prophetat, quam qui loquitur linguis. Et rursum: Gratias ago Deo, quod omnium uestrum linguis loquor. Vbi diuersa sunt dona, & alius maior, alius minor est, & omnes spirituales appellantur; certe oues sunt, & stant a dextris, & inter ouem & ouem est aliqua diuersitas. Loquitur quidem de humilitate Paulus apostolus: Ego sum nouissimus apostolorum; qui non sum dignus uocari apostolus, quia persecutus sum Ecclesiam Dei: gratia autem Dei sum id, quod sum: & gratia eius in me uacua non fuit, sed amplius omnibus illis laboraui; non ego autem, sed gratia Dei, quæ in me est. Verumtamen in eo, quod se humiliat, ostendit posse apostolos alios minores, alios esse maiores: & qui utique uas electionis dicitur, & cunctis amplius laborauit; non est iniustus Deus, ut obliuiscatur operis eius, & dispar meritum æquali mercede compenset. Dehinc legimus: Sicut in Adam omnes moriuntur, ita & in Christo omnes uiuificabuntur, unusquisque autem in suo ordine. Quando unusquisque in suo resurget ordine, utique diuersa sunt merita resurgentium. Non omnis caro, eadem caro; sed alia hominum, alia pecorum, alia uolucrum, alia autem piscium. Et corpora cælestia, & corpora terrestria: sed alia quidem cælestium gloria, alia autem terrestri-

restrium . alia claritas solis , alia claritas lunæ , alia claritas stellarum . stella enim a stella differt in claritate . Sic erit & resurrectio mortuorum . quod tu scilicet doctus interpret sic exposuisti , ut diceret spirituales differre a carnalibus . Ergo & spirituales & carnales in cælestibus erunt : & iam non solum oues , sed etiam hirci tui conscendent regna cælorum . Stella , inquit , a stella differt in claritate , non oues & hirci , sed oues & oues , idest , stella & stella . Denique alia , inquit , claritas solis , & alia claritas lunæ . Ne stellam & stellam totum humanæ multitudinis assereres genus , solem posuit & lunam , quos certe inter hircos non poteris numerare . sic , inquit , erit & resurrectio mortuorum , ut iusti in claritate solis luceant , & qui in sequenti gradu sunt , lunæ splendore rutilent , ut alius Lucifer sit , alius Arcturus , alius Orion , alius Mazuroth , & cetera stellarum uocabula , quæ sacrata in Iob uolumine continentur . Omnes enim , ait , *Iob 9* manifestari nos oportet ante tribunal Christi , ut recipiat unusquisque quæ gessit per corpus , siue bonum siue malum . Ac ne forsitan dicas , ante tribunal Christi nos manifestari , *2. Cor. 5* ut boni bona , mali recipiant mala ; in eadem epistola docet : Qui parce seminat , parce & metet : & qui seminat in benedictionibus , de benedictionibus & metet . Certe & qui plus , & qui minus seminat , de parte sunt dextra . Et cum unius sementis genus sit , tamen mensura & numero differunt . Scribit ad Ephesios idem Paulus : Ut nota fieret nunc *Eph. 3* principatibus & potestatibus in cælis per Ecclesiam , multiplex & uaria sapientia Dei . Cernis , quod in diuersis agminibus Ecclesiæ uaria & multiplex sapientia Dei prædicetur ? Næcnon in eadem epistola : Vnicuique autem nostrum data *Eph. 4* est gratia , iuxta mensuram gratiæ Christi : non quod mensura Christi diuersa sit : sed tantum gratiæ eius iafunditur , quantum ualemus haurire . Frustra igitur oues & hircos , quinque & quinque uirgines , Aegyptios , & Israelitas , & cetera huiusmodi replicas : quia non est in præsentis retributio , sed in futuro . unde & dies iudicii consummatione promittitur , quia nunc non est iudicium . sine causa enim appella-

appellatur dies extrema iudicii, si modo indicat Deus: In-
 præsentiarum nauigamus, luctamur, atque pugnamus, ut
 in fine perueniamus ad portum, coronemur, triumphemus.
 Tu autem peruerse & lubrice præsentis sæculi conuer-
 sationem in futurorum exempla proponis; cum utique hic
 iniustitia sit, ibi iustitia, donec intremus in sanctuarium
 Dei, & intelligamus in nouissimis eorum. Non aliter san-
 ctus, aliter peccator moritur? in eodem mari nauigantibus
 eadem tranquillitas, & tempestas est? non aliter latro, ali-
 ter martyr occiditur? nec alio modo de adulterio & prosti-
 bulis, alio de castis matrimoniis nascuntur liberi? Certe

Mar. 15 Dominus & latrones æquali iudicio crucifixi sunt. Si idem
 est huius sæculi futuriq. iudicium: ergo, quia hic pariter
 crucifixi sunt, & in futuro similiter habebuntur. Paulus, &
Act. 27 qui eum uinxerant, simul nauigant, simul sustinent tempe-
 statem, simul, naui fluctibus dissipata, in litus euadunt. Ne-
 gare non potes, quin inter uinctum & uincientes diuersa
 sint merita. et quo modo unum Apostoli militumq. nau-
 fragium est? Refert postea Paulus reuelationem, & eos,
 qui in naui fuerant, dicit sibi a Domino esse donatos. Num-
 quid is, cui donantur, & qui donantur, unius meriti sunt?
 Decem sancti peccatricem possunt eruere ciuitatem. Lot
Gen. 18 cum filiabus ereptus est de incendio: liberati essent & gene-
 ri, si exire uoluissent. & certe multa differentia est inter
Gen. 19 Lot, & generos eius. Liberatur Segor, una urbs de penta-
 poli; & quæ eiusdem meriti erat, atque uni sententiæ subia-
 cebat, cui Sodoma, & Gomorra, Adama, & Seboim, san-
 cti precibus custoditur. Ecce diuersum meritum in Lot, &
 Segor; & tamen de incendio pariter euadunt. Latrunculi,
1. Reg. 30 qui, absente Dauid, uastauerant Sicelech, & uxores eo-
 rum, & liberos in prædam duxerant, die tertia caduntur in
 campo, & quadringenti homines ascensis camelis fugiunt.
 Dic aliquam inter eos, qui cæsi sunt, & qui fugere potue-
Luc. 13 runt, esse distantiam. Legimus in euangelio, turrem Siloe
 cecidisse super decem & octo uiros, & obrutos occidisse.
 certe, iuxta sententiam saluatoris, non soli fuerant pecca-
 tores

tores; sed in formidinem reliquorum puniti sunt, ut, pe- *Pro. 19*
 stilente flagellato, stultus sapientior fieret. Si omnium pec-
 catorum unum est supplicium; iniuste alius occiditur, &
 per mortem alterius alius commonetur. Opponis mihi,
 Gomor mannæ, unamq. mensuram, & uestitum, & capil-
 los, & barbam, & calciamenta, ex æquo fuisse Israelita-
 rum: quasi non & nos Christi corpus æqualiter accipia-
 mus. una est in mysteriis sanctificatio, domini & serui, no-
 bilis & ignobilis, regis & militis. quamquam pro accipien-
 tium meritis diuersum fiat quod unum est. Qui enim indi-
 gne manducauerit, & biberit, reus erit uiolati corporis &
 sanguinis Christi. Numquid, quia & Iudas de eodem cali-
 ce bibit, de quo & ceteri apostoli, unius cum reliquis erit
 meriti? Quod si non uis recipere sacramentū: certe omnes
 æqualiter uiuimus, unum trahimus aerem, eodem humo-
 re irrigamur, iisdem cibis pascimur. Porro, si alimenta co-
 quorum arte mutantur in melius, & sit aliquid suauius con-
 dituris: huiusmodi cibi non naturæ satisfaciunt, sed uo-
 luptati. Aequē esurimus, æquē algemus: simul contrahi-
 mur frigore, æstibus & calore dissoluimur. Sol quoque ipse,
 & luna, & omnis astrorum chōrus, & pluuiæ, & mundus
 æqualiter nobis currunt: & iisdem omnes iuxta euangeli- *Matth. 5*
 um imbris irrigamur, boni & mali, iusti & iniusti. Si præ-
 sentia, exempla sunt futurorum: ergo & sol iustitiæ æqua-
 liter iustis & peccatoribus, impiis & sanctis, Christianis,
 & Iudæis, atque gentilibus orietur: cum scriptura dicat:
 Timentibus autem Dominum orietur sol iustitiæ. Si timen- *Malach. 4*
 tibus orietur, ergo contemptoribus & pseudoprophetis oc-
 cidet. Oues, quæ stant a dextris, uadunt ad regna celo-
 rum, hirci in tartarū detruduntur. Parabola ista non ouiu-
 um inter se merita & e contrario describit hircorum, sed in-
 ter oues & hircos tantum distantiam facit. neque enim in
 omnibus locis docentur omnia; sed unaquæque similitudo
 ad id refertur, cuius similitudo est. sicut & decem uirgines,
 non totius generis humani, sed sollicitorum & pigrorum
 exempla sunt: quorum alteri semper Domini præstolan-

P p tur

tur aduentum; alteri, somno, & inertia se dantes, futurum iudicium non putant. unde & in fine parabolæ dicitur: Vigilate, quia nescitis diem, neque horam. Si in diluuiio liberatus est Noe, & omnis orbis interiit; omnes caro erant, & propterea perierunt. aut non eiusdem esse meriti dices filios Noe, & Noe, propter quem filii liberati sunt: maledictum Cham in eodem pones loco, in quo & patrem, quia de diluuiio similiter liberatus est. In passione Christi omnes declinauerunt; simul inutiles facti sunt; & non fuit qui faceret bonum, non fuit usque ad unum. Audebis ne igitur dicere, sic negasse Petrum, & ceteros apostolos, qui fugerunt, quo modo Caipham, & pharisæos, & clamantem populum, Crucifige crucifige talem? Et, ut de apostolis taceam; eiusdem ne tibi sceleris uideatur reus Annas, & Caiphas, & Iudas proditor, cuius & Pilatus, qui nolens cōpulsus est contra Dominum ferre sententiam? Quanto maioris meriti fuit Iudas, tanto maioris criminis est: &, quanto maioris criminis, tanto maioris & pœnæ: Potentes enim potenter tormenta patientur. Arbor mala fructus bonos non facit, nec bona malos. Si hoc ita est; responde mihi, quomodo Paulus, cum esset arbor mala, persequens Ecclesiam Christi, fecit postea fructus bonos? & Iudas, cum esset arbor bona, signa faciens cum apostolis, postea uersus in proditorem fecerit fructus malos. Tamdiu ergo nec arbor bona malos fructus facit, nec mala bonos, quamdiu nel in bonitate sua, uel in malitia perseverant. Porro, quod omnis Hebræus æqualiter facit pascha, & septimo anno liber efficitur, & in Iobelæo, idest, quinquagesimo, uniuersa possessio redit ad Dominos: hoc non de præsentī dicitur, sed de futuro: quia in sex diebus huius sæculi seruientes, in septimo die uero & æterno sabbato liberi erimus; si tamen uoluerimus esse liberi, dum adhuc seruimus in sæculo: si autem noluerimus; perforabitur nobis auricula, in testimonium inobedientiæ; & cum uxore, & liberis nostris, quos prætulimus libertati, idest, cum carne & operibus eius iugiter seruiemus. Parabola autem sementis, quæ ex utraque

utraq[ue] parte ternos fructus facit; &, iuxta Apostolum, ^{1 Cor.3}
fundamentum Christi alius ædificat aurum, argentum, la- ^{2.Tim.2}
pides pretiosos, alius ligna, fenum, stipulam; cum & in
domo magna, diuersa uasa sint; perspicue patet; & huic uel
le contradicere, apertissimæ impudentiæ est. tamen, ne
exultet in mendacio, & exemplum apostolorum in præiu-
diciu[m] centenarii, & sexagenarii, & tricenarii afferat nu-
meri; sciat in Matthæo, & in Marco, apostolis, qui uni-
uersa sua dimiserant, centuplum repromissum; in euange-
lio autem Lucæ multo plura, idest, *πολλαπλασίονα*; & pe-
nit in nullo euangelio pro centum scriptum esse septem:
seq. aut falsarii, aut imperitiæ reum teneri: nec nocere no-
bis, quia in alio euangelio a centum, in alio a triginta inci-
pit numerari: cum omnis scriptura, maxime uetus, mino-
rem præponat numerum, & sic ad maiorem gradatim con-
scendat. Verbi gratia, ut dicat aliquem fuisse annorum quin-
que & septuaginta & centum, nec tamen quinque & septua-
ginta plura poterunt esse, quam centum, quæ priora sunt
nominata. Si non accipis in bonam partem diuersitatem
numeri centum & sexaginta & triginta: nec in malam par-
tem accipies, & idem uitium erit feminis, quod secus uiani
cecidit, & super petras, & super spinas. sin & illa tria, &
hæc uel in bonam, uel in malam partem singula sunt: stul-
tum fuit pro duabus rebus sex species numerare, præsertim
cum in Mattheo, & in Marco, & in Luca narrata parabo-
la, saluator semper intulerit: Qui habet aures audiendi,
audiat. Vbi nihil est, quod intrinsecus lateat, frustra ad in-
telligentiam mysticam prouocamur. Si autem pater, & fi- ^{Ioan. 14}
lius mansionem faciunt apud credentes; & ubi Christus ho-
spes est, ibi nihil deesse existimas: puto quod aliter Chri-
stus habitauerit in Corinthiis, aliter in Ephesiis, hoc est, ali-
ter in iis, apud quos Paulus apostolus peccata multa depre-
hendit; & aliter in iis, quibus sacramenta a sæculis ignora- ^{Matth. 11}
ta disseruit; aliter in Tito & Timotheo, aliter in Paulo. Cer- ^{Luc. 7}
te inter natos mulierum non surrexit maior Ioanne Bapti-
sta. Vbi autem maior dicitur, neesse est ut ceteros habue-

- rit minores. Et qui minimus est in regno cælorum; maior est illo. Vides ergo, quod in cælis sit maximus & minimus, & inter angelos quoque, & inter inuisibiles creaturas sit
- Luc. 17** multiplex & infinita diuersitas. Quare dicunt apostoli, Do
- Matth. 14** mine auge nobis fidem; si omnium una mensura est? Et Dominus ad discipulum: Modicæ fidei, quid dubitasti? In
- Hier. 31** Hieremia quoque de futuro regno legimus: Ecce dies ueniunt, dicit Dominus, & feriam domui Israel & domui Iacob fœdus nouum, non secundum pactum, quod pepigi cū patribus uestris. Et post paululum: Dabo legem meam in uisceribus eorum, & in corde eorum scribam illam, & ero eis in Deum, & ipsi erunt mihi, in populum: & non docebit uir ultra proximum suum, & uir fratrem suum, dicens: cognosce Dominum. omnes enim cognoscent me a minimo usque ad maximum. Perspicue ex contextu illius loci, futurum Christi regnum propheta describit. & qua consequentia ibi erit minimus & maximus, si omnes æquales futuri sunt? utique ea, qua & in euangelio dicitur: Qui docuerit, & fecerit, hic uocabitur maximus in regno cælorum. qui autem docuerit, & non fecerit, erit minimus.
- Luc. 14** In conuiuio saluator præcipit, ut inferiorem occupemus locum: ne, cum maior uenerit, de superiori turpiter detrudamur. Si cadere non possumus, sed tantum per pœnitentiam subleuamur: quid sibi uult scala illa in Bethel, per quam angeli descendunt, atque ascendunt, qui de cælis ad terram ueniunt? certe inter oues & ad dexterā stabant, dum ibi essent. Angeli de cælis descendunt, & Iouinianus de eorum possessione securus est. Quis autem risum tenere queat in eo, quod multas mansiones apud patrem, Ecclesia arbitretur in toto orbe diffusas; cum manifestissime scriptura doceat, secundum euangelium Ioannis, non de ecclesiarum
- Ioan. 14** numero, sed de cælorum mansionibus, & æternis tabernaculis, quæ propheta desiderat, Domino fuisse sermonem?
- Psal. 83** In domo, inquit, patris mei mansiones multæ sunt. Si
- Ioan. 14** quo minus, dixissem uobis: quia uado uobis parare locū: & si abiero, & preparauero uobis locum, iterum ueniam, & acci-

& accipiam uos ad me ipsum ; ut, ubi ego sum, & uos sitis .
 Locus, & mansiones, quas præparare se dicit Christus apo-
 stolis, in domo utique sunt patris, idest in regno cælorum,
 nō in terra, in qua præsens apostolos relinquebat . Simulq.
 sensus scripturæ intuendus . Dicerem, inquit, uobis, quia
 uado, & præparabo uobis locum, si non mansiones multæ
 essent apud patrem, hoc est, si non unusquisque mansio-
 nem sibi non ex largitate Dei, sed ex propriis operibus præ-
 pararet : & ideo non est meum parare, sed uestrum : quia
 & Iudæ nihil profuit paratus locus, quem suo uitio perdi-
 dit . Iuxta quem sensum & illud intelligendum, quod ad fi-
 lios dicitur Zebedæi, quorum alter a sinistris, alter cupiebat
 sedere a dextris : Calicem quidem meum bibetis, sedere au-
 tem a dextris meis siue a sinistris, non est meum dare uobis,
 sed quibus paratum est a patre meo . Non est filii dare ; &
 quo modo patris est præparare ? Paratæ, inquit, sunt in cæ-
 lo diuersæ & plurimæ mansiones, plurimis diuersisq. uirtu-
 tibus, quas non personæ accipiunt, sed opera . Frustra ergo
 a me petitis, quod in uobis situm est, quod pater meus illis
 parauit, qui dignis uirtutibus ad tantam ascensuri sunt di-
 gnitatem . Porro quod ait, Iterum ueniā, & accipiam uos
 ad me ipsum ; ut, ubi ego sum, & uos sitis : proprie ad apo-
 stolos loquitur, de quibus & in alio loco scriptum est : Vt,
 quo modo ego & tu pater unum sumus, sic & illi in nobis
 unum sint, qui crediderunt, qui perfecti sunt, qui possunt di-
 cere, pars mea Dominus . Si autem non sunt plurimæ man-
 siones : quo modo & in ueteri testamento & in nouo alium
 ordinem pontifex tenet, alium sacerdotes, alium leuitæ,
 alium ianitores, alium æditui ? Et in uolumine Ezechielis,
 ubi futuræ Ecclesiæ & cælestis Hierusalem ordo describitur,
 sacerdotes, qui peccauerant, regradantur in ædituos, & ho-
 stiarios : & cum sint in templo Dei, hoc est, a dextris, non
 sunt inter arietes, sed inter minimas oues . In fluuio quo-
 que illo, qui de templo egreditur, & irrigat salsum mare,
 & uniuersa uiuificat, multæ species piscium describuntur .
 Quare in regno cælorum archangeli sunt, angeli, throni,

Matth. 20

Ioan. 14

Ioan. 17

Ezech. 40. 44

Ezech. 47

P p 3 domi-

dominationes, potestates, cherubini, & seraphim, & omne nomen, quod nominatur non solum in præsenti sæculo, sed etiam in futuro? Sine causa diuersitas nominum est, ubi nō est diuersitas meritorum. Archangelus utique aliorum minorum est angelorum archangelus: & potestates, & dominationes habent aliqua, super quæ exerceant potestatem, & in quæ subiecta dominantur. Hoc in cælis est, hoc in ministerio Dei; ne nos solito more irrideas, atque subsannes, si imperatores posuerimus, & præfectos, & comites, & tribunos, & centuriones, & manipulos, & reliquum militiæ ordinem. Illud autem, quod ait: Nescitis, quia corpora uestra templum est spiritus sancti: friuolum est; cum scriptura diuina soleat & unum pluraliter, & plura singulariter appellare; & tamen sciat in templo quoque ipso multas esse mansiunculas, esse exterius atrium, esse interius, esse uestibula, esse sanctum, esse sancta sanctorum. sunt & culinæ in templo, sunt & cellariola, sunt & torcularia, & uasorum receptacula. ita & in templo corporis nostri diuersa sunt merita. Non æque Deus omnes inhabitat, nec ad eandem mensuram omnibus infunditur. De spiritu Moyse aufertur, & septuaginta presbyteris datur. Puto aliam esse abundantiam fluminis, aliam riulorum. Eliæ spiritus Elisæo duplex datus est: unde & duplex gratia, fecit signa maiora. Ille uiuus mortuum, iste mortuus mortuum suscitauit: ille famem imprecatus est populo, iste obsessæ ciuitati sub una die hostiles copias præbuit. Licet hoc, quod ait: Nescitis quia corpora uestra templum est spiritus sancti: de cuncta credentium dicat Ecclesia; qui pariter congregati, unum Christi corpus efficiunt. Hic iam quæritur in corpore, qui pedibus Christi dignus sit, qui capite, qui oculus eius sit, qui manus. Quod & duæ mulieres in euangelio, pænitens & sancta significant: quarum altera pedes, altera caput tenet. tamen nonnulli existimant unam esse, & quæ primum caput a pedibus, eam gradatim ad uerticem peruenisse. Sed & illud, quod obiicit: Non pro his rogo tantum; sed & pro illis, qui credituri sunt per uerbum eorum in me; ut,

ut, sicut ego pater in te, & tu in me unū sumus; ita omnes unum sint in nobis. Et quod omnis populus Christianus unum sit in Deo, quasi filii carissimi diuinæ consortes naturæ; iam supra diximus, & nunc plenius inculcandum est, non nos secundum naturam, sed secundum gratiam unum esse in patre, & filio. Neque enim eiusdem substantiæ est, quod Manichæi solent dicere, anima humana &, Deus. Sed dilexisti, inquit, eos, sicut & me dilexisti. Vides ergo, quod in consortium substantiæ eius assumimur, non naturæ esse, sed gratiæ: & ideo nos diligit, quia filium dilexit pater, & membra diliguntur, scilicet in corpore. Quotquot enim receperunt Christum, dedit eis potestatem filios Dei *Ioan. 2* fieri, iis qui credunt in nomine eius, qui non ex sanguinibus, neque ex uoluntate carnis, neque ex uoluntate uiri, sed ex Deo nati sunt. Verbum caro factum est, ut nos de carne transiremus in uerbum. Nec uerbum desit esse, quod fuerat: nec homo perdidit esse, quod natus est. gloria aucta est, non mutata natura. Vis scire, quo modo cum Christo unum corpus efficiamur? Doceat te ipse, qui condidit. Qui comedit carnem meam, & bibit sanguinem meum, *Ioan. 6* hic in me manet, & ego in illo. Sicut misit me uiuens pater, & ego uiuo propter patrem: & qui comedit me, uiuit propter me. Iste est panis, qui de cælo descendit. Sed & *Ioan. 3* Ioannes euangelista, qui de pectore Christi hauserat sapientiam, in eadem uerba concordat, dicens: In hoc intelligimus, quod in eo manemus, & ipse in nobis: quoniam de spiritu suo dedit nobis. Si quis confessus fuerit, quoniam Iesus est *1. Ioan. 4* filius Dei; Deus in eo manet, & ipse in Deo est. Si credis in Christum, quo modo & apostoli crediderunt: unum cum eis in Christo corpus efficieris. si autem temerarium est fidem eorum tibi & opera uindicare, qui fidem eādem & opera non habes: eundem locum habere non poteris. Porro, quod iactitas, sponsam, sororem, matrem, & omnia hæc uocabula unius esse Ecclesiæ, cunctosque credentes his nominibus significari: cōtra te facit. Si enim unus ordo Ecclesiæ est, & non habet plura membra in uno corpore: quid ne-

P p + cesse

- cesse est, ut sponsa, soror, uocetur, & mater? nisi aliorum sponsa, aliorum soror, aliorum mater sit. Stant quidem omnes ad dexteram: sed alius stat ut sponsus, alius ut frater, alius ut filius. Filioli, inquit, mei, quos iterum parturio, donec Christus formetur in uobis. Putasne eiusdem esse meriti eos, qui parturiuntur, & qui parturit? Vnde & stulte asserere uoluisti, omnia membra æqualiter nos diligere, nec oculum præponere digito, nec manum auriculæ, sed in singulorum amissione membrorum dolorem esse communem; cum Apostolus doceat ad Corinthios, alia membra esse honestiora, alia uerecundiora; & quæ uerecundiora sunt, maiore honestate circumdari; quæ uero per se honesta, nostri non indigere sollicitudine. Eiusdem ne ordinis arbitraris & meriti, os & aliu, oculos & meatus, per quos
- Gal. 4.** finis egeritur & urina? Lucerna, inquit, corporis tui est oculus tuus. Si oculus cæcus fuerit, totum corpus in tenebris est. si digitum amputes, si summitatem auriculæ: est quidem dolor, sed non tantum damnum, nec tanta cum dolore deformitas, quanta si oculos eruas, trunces nares, os diffices. sine aliis membris uiuere possumus, sine aliis omnino non possumus. Sunt peccata leuia, sunt graua. Aliud est, decem millia talenta debere; aliud, quadrantem.
- Matth. 6** Et de otioso quidem uerbo & adulterio rei tenebimur: sed non est idem suffundi & torqueri, erubescere & longo tempore cruciari. Putas nostrum esse, quod loquimur? Audi
- Matth. 12** apostolum Ioannem: Qui scit fratrem suum peccare peccatum non ad mortem, petat, & dabit ei uitam, peccanti non ad mortem: qui uero peccauerit ad mortem, quis orabit pro eo? Cernis quod, si pro peccatis minoribus deprecemur, impetremus ueniam; si pro maioribus, difficilis impetratio sit; & inter peccata & peccata magnam esse distantiam. Vnde & de populo Israel, quia peccauerat peccatum ad mortem, dicitur ad Hieremiam: Noli orare pro populo hoc; nec assumes pro eis deprecationem: & non obstitas mihi; quia non exaudiam te. Si autem omnes æqualiter & introimus sæculū, & eximus de sæculo; & hoc præiudicium

iudicium futurorum est : ergo æqualiter & iusti , & peccatores habebimur apud Deum , quia nunc pari modo & generamur , & morimur . Quod si duos esse contendis Adam , alterum terrenum , alterum cælestem ; & qui in terreno fuerint , eos esse a sinistra ; qui uero in cælesti , eos esse a dextris : responde mihi interim , ut de duobus te fratribus interrogem : Esau in terreno fuit , an in cælesti ? nulli dubium est , quin in terreno eum fuisse respondeas . Iacob in quo fuit ? dices protinus , in cælesti . Et quo modo in cælesti fuit , cum adhuc Christus non uenisset in carne , qui secundus & cælestis Adam dicitur ? Aut igitur omnes ante incarnationē Christi in ueteri reputabis Adam ; & iusti quoque in terreno homine , & ad sinistrā erunt inter hircos tuos : aut , si impiū est ibi Isaac ponere , ubi Ismael ; ibi Iacob , ubi Esau ; ibi sanctos ; ubi peccatores ; nouissimus Adam ex eo tempore numerabitur , quo Christus est natus ex uirgine ; & argumentum duorum Adam non proficiet ouibus & hædis tuis ; quia in primo Adam & oues & hædos conuincimus fuisse , & in uno atque eodem homine alios a dextris Dei stetisse , alios a sinistris . ab Adam enim usque ad Moysen mors super omnes dominata est , etiam super eos , qui non peccauerunt in similitudine præuaricationis Adam . De eo autem , quod niteris approbare , conuicium & homicidium , raka & adulterium , & otiosum sermonem , & impietatem uno supplicio repensari : iam & supra tibi responsum est , & nūc breuiter respondebo . Aut peccatorem te negabis , ut non sis reus gehennæ : aut , si peccator fueris , etiam de leui crimine duceris ad tartarum . Os , inquit , quod mentitur , occidit animam . suspicior te aliquando ut hominem fuisse mentitum . omnis enim homo mendax , ut sit solus Deus uerax , & iustificetur in sermonibus suis , & uincat cum iudicauerit . Aut igitur homo non eris , ne mendax sis : aut , si , quia homo es , mendax fueris , cum parricidis & adulteris punieris . nulla est enim inter peccata diuersitas : & non tibi habebunt tantas gratias , quos de humili in sublime leuas ; quantum irascentur , quos , propter leue quotidianumq.

Rom. 5

Matth. 5. 12

Sap. 1

Psal. 115

Rom. 3

numq. peccatum, in exteriores tenebras retrusisti. Si autem in persecutione, qui suffocatur, & qui decollatur, & qui fugerit, & qui in carcerem reclusus obierit, in uariis luctu generibus una corona uictoriae est: & hoc pro nobis facit. In martyre enim uoluntas, ex qua ipsa mors nascitur, coronatur. Meum est, opponere me gentilium furori, & Dominum non negare. Iam in illorum arbitrio est, aut decollare, aut urere, aut recludere in carcerem, aut uaria adhibere genera poenarum. quod si fugero, & in solitudine obiero; nec eadem erit corona morientis, quia non eadem causa

Luc. 15 mortis est Christus. Ad illud uero, quod dicis, inter eum fratrem, qui semper cum patre fuerit, & qui postea poenitens est receptus, nihil penitus discrepare: adiicio, si uis, & drachnam unam, quae perditam fuerat, & inuenta, iunctam esse cum reliquis, & ouem unam, quam, nonagintanovem ouibus derelictis, bonus pastor inquisiuit, & retulit, explese numerum centenarium. Sed aliud est, poenitentem esse, & lacrymis ueniam deprecari; aliud, semper esse cum patre.

Ezech. 16 Vnde per Ezechielem ad reportatam ouem, & perditum quondam filium loquitur pastor, & pater: Et suscitabo pactum meum tecum: & scies, quia ego Dominus: & recordaberis, & confunderis, ut non sit tibi ultra aperire os praefusione tua, cum placatus fuero tibi in omnibus, quae fecisti. Ut nihil minus iusto habeant poenitentes, sufficit eis

Ezech. 20. pro omni poena sola confusio. Vnde & in alio loco dicitur ad eos: Et recordabimini uiarum uestrarum pessimarum, & omnium scelerum, quibus polluti eratis: & displicebitis uobis in conspectu uestro, in omnibus malitiis uestris, quas fecistis: & scietis quia ego Dominus, cum benefecero uobis, propter nomen meum, & non secundum uias uestras malas, neque secundum scelera uestra pessima.

Luc. 15 Arguitur quoque a patre filius, quod saluti fratris inuideat, & cum angeli laetentur in caelo, ille liuore crucietur. Quamquam duorum fratrum similiendo, frugi, & luxuriosi, non ad merita totius generis humani, sed uel ad Iudaei pertinent, Christiani nique personas, uel ad sanctorum, & poenitentium. super qua

qua parabola libellum quondam Damaso episcopo, dum
adhuc uiueret, dedicaui. Porro, si operariis primæ horæ, & *Matth. 20*
tertiæ, & sextæ, & nonæ, & undecimæ unus denarius red-
ditur; & ab eis incipit præmium, qui nouissimi in uinea la-
borauerunt; & hic non unius temporis & unius ætatis ho-
mines describuntur, sed ab exordio mundi usque ad finem:
uocationum sacramenta sunt diuersarum. Prima hora uo-
catus est Abel & Seth: tertia Enoch & Noe: sexta Abrahā
Isaac & Iacob: nona Moyses & prophetæ: undecima gen-
tium populus, cui primo redditur merces; quia in crucifi-
xum credens Dominum, difficultate fidei magnitudinem
meruit præmiorum: multiq. reges & prophetæ quæsierūt
uidere, quæ uidemus, & non uiderunt. Vnus autem dena *Matth. 13*
rius non unum est præmium, sed una uita, & una de gehē-
na liberatio. Ceterum quo modo ad indulgentiam princi-
palem, diuersorum criminum rei dimittuntur de carcere;
& unusquisque, pro labore uel operibus suis, in hoc uel in
illo statu uitæ est: ita & denarius, quasi indulgētia ueri prin-
cipis, omnes per baptismum emittit de carcere. Iam nostri
laboris est, pro diuersitate uirtutum diuersa nobis præmia
præparare. Hucusque per partes ad proposita respōdimus:
sequens sermo in commune ad omnia respondebit. Domi-
nus ad discipulos suos, Qui uult, inquit, inter uos maior *Matth. 20*
esse, sit omnium minimus. Si omnes in cælo æquales futu-
ri sumus; frustra nos hic humiliamus, ut ibi possimus esse
maiores. De duobus debitoribus, quingentorum denario-
rum, & quinquaginta; cui plus dimittitur, plus amat. Vn-
de & saluator, Dico, inquit, tibi, remittuntur ei peccata *Luc. 7*
multa, quoniam dilexit multum. Cui autem minus dimit-
titur, minus diligit. Qui minus diligit, & minus ei dimit-
titur; utique in minori gradu erit. Paterfamilias proficiscēs
tradidit seruis suis substantiam, alii quinque talenta, alii
duo, alii unum, unicuique secundum proprias uirtutes. Si-
milē quid & in alio euangelio scribitur, quod homo nobilis *Matth. 25*
proficiscens in regionem longinquam, ut acciperet sibi re- *Luc. 19*
gnum, & reuerteretur, uocauerit decem seruos, & dederit
eis

eis singulas mnas: de quibus unus lucratus est decem mnas, alius quinque; & singuli, iuxta vires suas, & emolumentū, uel decem, uel quinque acceperint ciuitates. Porro alius, qui unum talentum, siue unam mnā acceperat, quod accepit infodit, siue in sudario colligauit, & Domini reseruauit aduentui. Primo considerandum, quod, si iusti non spe profectus laborant, ut uult noster Zeno, sed ne perdant quod acceperant; iste, qui mnā & talentum infodit, ne perderet quod acceperat, non peccauit; magisq. laudanda est cautio reseruantis, quam cassus labor eorum, qui sine laboris præmio desudarunt. Deinde, quod hoc ipsum talentum, quod aufertur a timido, uel negligente seruo, non datur ei, qui minus lucrificerat, sed qui plus, idest, qui super decem positus fuerat ciuitates: si numerus non facit ordinem, quare dixit, Dedit unicuique secundum vires suas? Si eadem lucra sunt quinque talentorum, & decem: cur ei, qui minus lucrificerat, non decem, & ei, qui plus, nō quinque traduntur urbes? Quod autem Dominus non his contentus sit, quæ habemus, sed semper maiora desideret, ipse monstrat, dicens: Quare non dedisti pecuniam meam ad trapezitas, & ego ueniens cum usura exegissem? Quod qui dem & Paulus apostolus sciens, præteritorum obliuiscitur; & ad ea, quæ in ante sunt, se extendit, idest, quotidie proficit, nec seruat in sudario delicate gratiam, quam accepit; sed avarus negotiator renouatur de die in diem; & decrescere se putat, nisi semper creuerit. Sex urbes fugitiuorum describuntur in lege, qui hominem interfecere nolentes, & ipsæ urbes sacerdotales sunt. Rogare libet, fugitiuos istos inter hircos tuos, an inter oues nostras colloques? Si hirci essent, occiderentur ut homicidæ ceteri, nec ministrorum Dei intrarent ciuitates. Si oues dixeris; utique non erunt tales oues, quæ absque luporum metu tota libertate pascantur. Et probabitur tibi, oues quidem eos esse, sed erroneas, a dextris esse, uerum non stare, sed fugere, donec moriatur sacerdos magnus, & ad inferna descendens liberet animas fugitiuorū. Gabaonitæ occurrunt filiis Israel, &, cæsis aliis gen-

Philip. 3

Num. 35

Ios. 9

gentibus, in lignarios & aquarios reseruantur : tantiq. apud Deum meriti sunt, ut stirps saul ob eorum iniurias sit deleta. inter quos eos collocabis? inter hircos? sed non sunt interfecti, & sententia Domini uindicantur. inter oues? sed dicit scriptura diuina; quod non sint eiusdem meriti, cuius & Israelitæ. Vides ergo, quod stent quidem a dextris, sed multo inferiori gradu. Inter Dauid, uirum sanctum, & Saul, regem pessimum, medius Ionathas fuit: quem nec inter hædos possumus ponere, quia prophetæ amore dignus est; nec inter arietes, ne parem eum faciamus Dauid, maxime cum & ipse interfectus sit. erit igitur inter oues, sed inferiori ordine: & quo modo inter Dauid & Ionatham, ita inter ouem & ouem cogeris suscipere differentias. seruus, qui cognouit uoluntatem Domini sui, & non præparauit, nec fecit secundum uoluntatem eius, uapulabit multis. Qui autem non cognouit, nec fecit digna, plagis uapulabit paucis. Omni enim, cui multum datum est, multum quæretur ab eo: & cui commendatur multum, plus exigetur ab illo. Ecce seruo & seruo plus minus ue committitur; & pro qualitate commissi atque peccati, plagarum quoque numerus irrogatur. Tota Iudææ terra, tribuumq. descriptio, futuræ Ecclesiæ in cælis typus est. Legamus Iesum Naue: legamus Ezechielis extremas partes: & uidebimus, quidquid in altero quasi per historiam in terra distribuitur, in altero in cælis spiritualiter repromitti. Quid sibi uolunt in descriptione templi septem & octo gradus? quid rursus, quod in psalterio, post elementa centesimi octauo decimi psalmi, quibus mysticum erudimur alphabetum, per quindecim gradus usque illuc peruenimus, ut possimus canere: Ecce nunc benedicite Dominum omnes serui domini, Qui statis in domo Domini, in atriis domus Dei nostri? Quare duæ & semis tribus trans Iordanem habitant, ubi plurima sunt iumenta: & nouem & semis reliquæ uel expellunt pristinos habitatores de sedibus suis, uel cum ipsis habitant? Cur leuitica tribus in terra partem non accipit, sed Dominus pars eius est, & inter ipsos leuitas, & sacerdos

2. Reg. 21

Luc. 12

Ios. 13. &c.

Ezech. 40. 48

Psal. 133

Ios. 13

Num. 18

tes

res ad Sancta sanctorum, ubi cherubim & propitiatorium
Hebr. 9 est, pontifex solus ingreditur? Quare reliqui sacerdotes li-
Exod. 28 neis tantum utuntur uestibus, & non habent indumentum
auro, hiacyntho, cocco, purpura, bisoq. contextum? In-
Num. 4 ferioris gradus leuitæ, & sacerdotes plaustra & boues acci-
piunt; maioris ordinis gestant arcam Domini humeris suis.
1. Par. 15 Si tollis ordinem tabernaculi, templi, ecclesiæ; si omnes,
qui a dextris, sunt corpus unum, &, ut uulgo dicitur, ἐν
κόλῳ: nequidquam episcopi, frustra presbyteri, sine cau-
sa diaconi sunt. Quid perseverant uirgines? quid laborant
uiduæ? cur maritatæ se continent? peccemus omnes, &
post penitentiam idem erimus, quod apostoli sunt. Ve-
rum iam cœpimus terram prospectare de pelago; & post
montes gurgitum, & spumosos fluctus, & nauim uel in su-
blime subrectam, uel in ima præcipitem, paulatim fessis &
languentibus portus aperitur. Diximus de nuptis, uiduis,
uirginibus: uiduitati uirginitatem, uiduitatem prætulimus
matrimonio: exposita est περικοπή apostoli de huiuscemo-
di quæstionibus disputantis: singulis oppositionibus re-
sponsum est. Sæcularis quoque litteratura uenit in mediū,
quæ uirgines fuerint, quæ uniuiuæ, & e contrario quas in-
terdum habeat molestias uinculum coniugale. Transui-
mus ad secundam partitionem; in qua negat eos, qui tota
fide baptisma consecuti sunt, deinde posse peccare: et do-
cuimus, quod, excepto Deo, omnis creatura sub uitio
sit: non quod uniuersi peccauerint: sed quod peccare pos-
sint; & similium ruina, stantium metus sit. Tertio ueni-
mus ad ieiunia: & quia aduersarii duplex propositio fue-
rat, uel ad philosophos, uel ad diuinarum scripturarum
prouocantis exempla; nos quoque ad utramque respondi-
mus. Quarta, idest extrema diuisio, oues & hædos, dexte-
ram & sinistram, iustos & peccatores, in duos ordines dis-
tribuerat, uolens ostendere, nullam inter iustum & iustum,
peccatorem & peccatorem esse distantiam: & ut hoc pro-
baret, infinita de scripturis exempla congesserat, quasi suo
sensui congruentia. cui nos quæstioni & argumentis, &
exem-

exemplis respondimus scripturarum; ueteremq. Zenonis
 sententiam tam communi sensu, quam diuina lectione con-
 triuimus. Nunc restat, ut Epicurum nostrum, subantem in
 hortulis suis inter adolescentulos & mulierculas, alloqua-
 mur. Fauent tibi crassi, nitidi, dealbati: adde, si uis, iu-
 xta Socraticam irrisiōem, omnes sues, & carnes, &
 quia carnem amas, uultures quoque, aquilæ, accipitres,
 & bubones. Numquam nos Aristippi multitudo terrebit.
 quoscumque formosos, quoscumque calamistratos, quos
 crine composito, quos rubentibus buccis uidero, de tuo
 armento sunt, immo inter tuos sues grunniunt. de nostro
 grege tristes, pallidi, sordidati, & quasi peregrini huius sæ-
 culi, licet sermone taceant, habitu loquuntur, & gestu:
 Hei mihi, quia peregrinatio mea prolongata est: habitauimus *Psal. 19*
 cum habitantibus cedar, uidelicet in tenebris huius mundi:
 quia lux lucet in tenebris, & tenebræ eam non comprehen- *Ioan. 1*
 derunt. Ne glorieris, quod multos discipulos habeas. fi-
 lius Dei docuit in Iudæa, & duodecim tantum illum apo-
 stoli sequebantur. Torcular, inquit, calcaui solus, & de *Esa. 63*
 gentibus uir non est mecum. Ille in passione solus reman-
 sit, & Petri quoque erga eum trepidauit constantia: phari-
 sæorum autem doctrinæ omnis populus applaudebat, di-
 cens: Crucifige, crucifige talem. Non habemus regem, *Luc. 23*
 nisi Cæsarem: idest, uitia sequimur, non uirtutes; Epicurū,
 non Christum; Iouinianū, non apostolum Paulū. Quod
 multi acquiescunt sententiæ tuæ, indicium uoluptatis est.
 non enim tam te loquentem probant, quam suis fauent ui-
 tiis. In circulis platearum quotidie fictus hariolus stulto-
 rum nares uerberat, & obtorto fuste dentes mordentium
 quatit; nec tamen deest, qui semper possit induci: & pro
 magna sapientia deputas, si plures porci post te currāt, quos
 gehennæ succidiæ nutrias? Post præconium tuum, & bal-
 neas, quæ uiros pariter & feminas lauant, omnis impatien-
 tia, quæ ardentem prius libidinem quasi uerecundiæ uesti-
 bus tegebat, nudata est, & exposita: quæ ante in occul-
 to erant, nunc in propatulo sunt. Ostendisti tales discipu-
 los,

los, non fecisti. Hoc profecit doctrina tua, ut peccatum ne
 pænitentiam quidem habeat. Virgines tuæ, quas pruden-
 tissimo consilio, quod nemo umquam legerat, nec audie-
 rat, de Apostolo docuisti, Melius est nubere, quam uri;
 1. Cor. 7 occultos adulteros in apertos uerterunt maritos. non sua-
 sit hoc Apostolus, non electionis uas. Virgilianum consi-
 lium est: Coniugium uocat, hoc prætexit nomine culpam.
 Quadringenti ferme anni sunt, quod Christi prædicatio ful-
 get in mundo. ex quo innumerabiles hæreses tunicam illius
 consciderunt. uniuersus pene error de Chaldæo, & Syro,
 & Græco sermone processerat. Basilides, magister luxu-
 riæ, & turpissimorum complexuum, post tot annos ita in
 Iouinianum, quasi in Euphorbum, transformatus est, ut
 Latina quoque lingua haberet hæresim suam. Nulla ne fuit
 alia in toto orbe prouincia, quæ reciperet præconium uolu-
 ptatis, in quam coluber tortuosus irreperet, nisi quam Pe-
 tri doctrina super petram fundauerat Christum, uexillum
 crucis & prædicationis austeritas, idolorum templa destruxe-
 rat? E regione luxuria uentris & gutturis subuertere nititur
 Esa. 3 fortitudinem crucis. Vnde per Esaiam loquitur Deus: Po-
 pulus meus, qui uos beatificant, seducunt uos, & semitas
 1. Hier. 50. 48. 7 pedum uestrorum conturbant. Necnon per Hieremiam:
 Fugite de medio Babylonis, & seruate unusquisque ani-
 mam suam; & nolite credere pseudoprophetis, qui dicunt
 pax pax, & non est pax; qui semper ingeminant, templum
 1. Thr. 2 Domini, templum Domini. Prophetæ tui uiderunt tibi
 falsa & insipientia, non aperuerunt iniquitatem tuam, ut
 Psal. 13 te ad pænitentiam prouocarent: qui deuorant plebem Dei,
 Hier. 28 ut cibum panis, Deum non inuocauerunt. Hieremias, ca-
 priuitatem nunciens, lapidatur a populo. Ananias, filius
 Azur, frangebat ad præsens ligneas torques, & in futurum
 ferreas præparabat. Semper pseudoprophetæ dulcia polli-
 centur, & ad modicum placent. Amara est ueritas, & qui
 eam prædicant, replentur amaritudine: in azymis enim ue-
 1. Cor. 5 ritatis & sinceritatis, Domini pascha celebratur, & cum
 amaritudinibus comeditur. Egregia sane uox, & quam au-
 diat

diat sponsa Christi, inter uirgines, & uiduas, & cælibes, *Exod. 12*
unde & ipsum nomen inditum est, quod cælo digni sint,
quia coitu careant: Raro ieiunate, crebrius nubite. non
enim potestis implere opera nuptiarum, nisi mulsu, &
carnes, & nucleum sumpseritis. Viribus opus est ad libi-
dinem. Cito caro consumpta marcescit. Nolite timere for-
nicationem. Qui semel in Christo baptizatus est, cadere
non potest: habet enim ad despumandas libidines solatia
nuptiarum. Quod & si cecideritis, redintegrabit uos pæniten-
tia: & qui in baptismate fuistis hypocritæ, eritis in pæniten-
tia solidæ fidei. Neque turbemini, putantes inter ius-
tum & pænitentem aliquid interesse, & humiliorem gra-
dum dare quidem ueniam, sed coronam tollere. una est
enim retributio. qui ad dexteram steterit, introibit in re-
gna cælorum. His consiliis subulci tui pastoribus nostris di-
tiores sunt, & hirci plurimas secum capras trahunt. Equi
infantes in feminas facti sunt; statim ut mulieres uide- *Hier. 5*
rint, adhinnunt; & impatientiam suam, pro nefas, scriptu-
rarum solantur exemplis. sed & ipsæ mulierculæ miseræ,
& non miserabiles, præceptoris sui uerba cantantes, Quid
enim nisi semen requirit Deus? non solum pudicitiam, sed
etiam uerecundiam perdiderunt; maioriq. procacitate de-
fendunt libidinem, quam exercent. Habes præterea in exer-
citu tuo plures succenturiatos: habes scurras & uelites in
præfidiis, crassos, comptos, nitidos, clamatores, qui te
pugnis calcibusq. defendant. Tibi cedunt de uia nobiles:
tibi osculantur diuites caput. nisi enim tu uenisses, ebrii at-
que ructantes paradysum intrare non poterant. Maeste uir-
tute, immo uitiis, habes in castris tuis & Amazonas exer-
ta mamma, &, nudo brachio & genu, uenientes contra se
uiros ad pugnam libidinum prouocantes. Et quia opu-
lenti paterfamilias es, in auariis tuis non turtures, sed
upuxæ nutriuntur, quæ tota foetidæ uoluptatis lustra cir-
cumuolent. Me carpe, me disce: obice crimina, quæ
uolueris: argue luxuriam, & deliciarum. magis me amabis,

si talis fuero : ero enim de armento tuo . Sed & ad te lo-
quar , quæ scriptam in fronte blasphemiam , Christi confes-
sione delesti . Vrbs potens , urbs orbis domina , urbs Apo-

Rom. 1 stoli uoce laudata , interpretare uocabulum tuum . Roma
aut fortitudinis nomen est apud Græcos , aut sublimitatis
iuxta Hebræos , serua quod diceris : uirtus te excelsam fa-
ciat , non uoluptas humilem . Maledictionem , quam tibi

Apoec. 17. 18 saluator in Apocalypsi comminatus est , potes effugere per
pœnitentiam , habens exemplum Nimuitarum . Caue Ioui-
niani nomen , quod de idolo deriuatum est . squallet Capi-
tolium : templa Iouis & cærimoniarum conciderunt : cur uo-
cabulum eius , & uitia apud te uigeant ? Adhuc sub regibus ,
& sub Numa Pompilio facilius maiores tui Pythagoræ con-
tinentiam , quam sub consulibus Epicuri luxuriam susce-
perunt .

ARGVMENTVM.

PAMMACHIVS, Paule gener, & Hieronymi amicus, sicut quondam condiscipulus, locos quosdam notauerat, quibus multi in libris contra Iovinianum offensi fuerant, quod Hieronymus propensor, quam oportuisset, in uirginitatis laudes, & durior in matrimonium uideretur: notatos ad Hieronymum miserat, familiariter rogans, ut ad ea, quæ illi obiiciebantur, responderet, facit id nunc uir sanctus mira cause fiducia, ueluti qui optime sciret, nihil a se ea in re peccatum fuisse: acriterq. eos interea carpit, qui; uerba tantum aliqua aucupati, postea cauillantur, non considerantes, a quo dicta sint, cui, quando, uel qua occasione; neque quid aut ante præcesserit, aut postea consecutum sit.

HIERON. PRO LIBRIS ADVERSVS

Iovinianum Apologia ad Pammachium.

EPISTOLA I.

QVOD ad te hucusque non scripsi, causa fuit silentiū
 tuum: uerebar enim, ne, si tacenti scriberem, molestum nie magis, quam officiosum, putares: nunc autem, prouocatus dulcissimis litteris tuis, & huiuscemodi litteris, quæ me ad philosophiam nostri dogmatis prouocarent, & condiscipulum quondam, & sodalem, & amicum, obuiis, ut aiunt, manibus excipio, defensoremq. meorum opusculorum paro, ita tamen, si ante te placatum iudicem habuero, immo si oratorem meū super omnibus, quæ in me arguuntur, instruxero. hoc enim & Tullius tuus, & ante illum in breui, & solo uolumine scripsit Antonius, primam causam esse uictoriæ, diligenter causam, pro qua dicturus es, discere. Reprehendūt me quidam, quod in libris, quos aduersum Iovinianum scripsi, nimius fuerim uel in laude uirginum, uel suggillatione nuptarum: & aiunt condemnationem quodam modo esse matrimonii, intantum pudicitiam prædicare, ut nulla uideatur

Qq 2 tur

tur inter uxorem & uirginem comparatio derelinqui. Ego si bene problematis memini, inter Iouinianum & nos ista contentio est, quod ille exæquet uirginitati nuptias nos subiiciamus; ille parum, uel nihil, nos multum interesse dicamus. Denique iccirco, te post Dominum faciente, damnatus est, quod ausus sit perpetuæ uirginitati matrimonium cōparare. Aut, si id ipsum uirgo putatur, & nupta: cur piaculum uocis huius Romæ Victorinus audire nō potuit? Virgo a uiro, nō uir a uirgine, generatur. Mediū esse nihil potest: aut mea sentētia sequēda est, aut Iouiniani. Si reprehēdor, quod nuptias uirginitati subiicio: laudetur ipse, qui comparat. si autem damnatus est, qui æquales putabat: damnatio eius mei operis testimoniū sit. Si sæculi homines indignantur in minori gradu se esse, quam uirgines: miror, clericos, & monachos; & continentes id non laudare, quod faciunt. Castrant se ab uxoribus suis, ut imitentur uirginum castitatem: & id ipsum uolunt esse maritatas, quod uirgines? Aut iungantur itaque uxoribus suis, quibus renunciauerant: aut, si se abstinerint, etiam tacentes confitebuntur melius esse, quod nuptiarum operi prætulerunt. An ego rudis in scripturis, & nunc primum sacra uolumina legens, lineam, &, ut ita dicam, tenue dicendi filum inter uirginitatem & nuptias seruare non potui? uidelicet nesciebam dictum: Noli esse iustus multum: & dum unum latus protego, in altero uulneratus sum: atque, ut manifestius loquar, dum contra Iouinianum pressio gradu pugno, a Manichæo terga mea confossa sunt. Nonne, quæso, statim in principio operis mei ista præfatus sum? Neque enim nos, Marcionis & Manichæi dogma sectantes, nuptiis detrahimus: nec Tatiani principis Encratitarum errore decepti, omnem coitum spurcum putamus: qui non solum nuptias, sed cibos quoque, quos Deus creauit, ad utendum damnat, & reprobat. Scimus, in domo magna non solum uasa aurea, & argentea esse, sed & lignea, & fictilia: & super fundamentum Christi, quod Paulus architectus posuit, alius superædificat aurum, argentum, lapides pretiosos,

2. Tim. 2

1. Cor. 3

fos, alius e contrario fenum, ligna, stipulam. Non ignoramus honorabiles nuptias, & cubile immaculatum. Legimus primam Dei sententiam: Crescite, & multiplicamini, & replete terram. Sed ita nuptias recipimus, ut uirginitatem, quæ de nuptiis nascitur, præferamus. Numquid argentum non erit argentum, si aurum pretiosius est? aut arboris & segetis contumelia est, si radici, & foliis, culmo, & aristis poma præferantur, & fructus? Vt poma ex arbore, frumentum ex stipula, ita uirginitas ex nuptiis. Cētesimus, & sexagesimus, & tricesimus fructus, quamquam de una terra, & de una semente nascatur, tamen multum differt in numero. Triginta referuntur ad nuptias; quia & ipsa digitorum coniunctio quasi molli osculo se complexas, & fœderans, maritum pingit, & coniugem: sexaginta uero ad uiduas; eo quod in angustia, & tribulatione sint positæ. unde & superiori digito deprimuntur: quia, quanto maior est difficultas, expertæ quondam uoluptatis illecebris abstinere; tanto maius & præmium. Porro numerus centesimus (quæso diligenter lector attende) de sinistra transferitur ad dexteram: & iisdem quidem digitis, sed non eadem manu, quibus in læua, nuptæ significantur & uiduæ: circum hum faciens, exprimit uirginitatis coronam. Oro te, qui hæc loquitur, damnat nuptias? Aurum uirginitatem, argentum diximus matrimonium: centesimum & sexagesimum & tricesimum fructum de una terra exposuimus, & de una semente generari, licet multum differat in numero: & quisquam tam iniquus lector erit, ut non ex meis dictis, sed ex suo me sensu iudicet? Et certe multo clementiores erga coniugia fuimus omnibus pene Latinis & Græcis tractatoribus; qui centesimum numerum ad martyres referunt, sexagesimum ad uirgines, tricesimum ad uiduas: atque ita fit iuxta illorum sententiam, ut de bona terra, & de patris familias semine excludantur mariti. Verum, ne in principio cautus, in reliquis forsitan improuidus fuerim: nonne post partitionem opusculi, cum ad quæstiones uenirem, statim intelli? Vos quæso utriusque sexus uirgines & continentes, ma-

Heb. 13

Gen. 1

Matth. 13

Q9 3 riti

riti quoque & digami, ut conatus meos orationibus adiuue-
tis. Cunctorum in commune Iouinianus hostis est. Quorū
ego orationibus indigeo, & quos adiutores mei operis pre-
cor, eos possum Manichæi errore damnare? Curramus ad
reliqua: neque enim epistolæ breuitas patitur, diutius in sin-
gulis immorari. Interpretâtes illud Apostoli testimonium:
1. Cor. 7 Vxor proprii corporis non habet potestatem, sed uir: simi-
liter & uir corporis sui non habet potestatem, sed uxor:
hoc subiunximus: Omnis hæc quæstio de iis est, qui in ma-
trimonio sunt, an eis liceat uxores dimittere: quod & Do-
Matth. 5 minus in euangelio prohibuit. Vnde & Apostolus, Bonum
est, ait, homini uxorem, uel mulierem non tangere: quasi
in tactu eius periculum sit: quasi, qui eam tetigerit, non eua-
Gen. 39 dat. unde & Ioseph, quia illam tangere uolebat Aegyp-
tia, fugiens de manibus eius pallium abiecit. Sed quia qui se-
mel duxit uxorem, nisi ex consensu se non ualet abstinere,
nec dare repudium non peccanti: reddat coniugi debitum,
quia sponte se alligauit, ut reddere cogeretur. Qui Domi-
ni dicit esse præceptum, ne dimittantur uxores; & absque
consensu, quod Deus coniunxit, homo non separet; hic
potest dici nuptias condemnare. Rursum in sequentibus,
Sed unusquisque, ait, habet proprium donum ex Deo,
alius quidem sic, alius autem sic. Quam sententiā nos expo-
nentes, hæc intulimus. Quid, inquit, uelim, perspicuum
est. Sed, quoniam in Ecclesia diuersa sunt dona; concedo
& nuptias, ne uidear damnare naturam. simulq. considera,
quod aliud donum uirginitatis sit, aliud nuptiarum. si enim
eadem esset merces nuptiarum & uirginum; nequaquam di-
xisset post præceptum continentie: Sed, unusquisque pro-
1. Cor. 7 prium habet donum ex Deo, alius quidem sic, alius autem
sic. Vbi proprietas singulorum est, ibi altrinscūs diuersi-
tas. Concedo & nuptias esse donum Dei: sed inter donum
2. Cor. 2 & donum magna diuersitas est. Denique & Apostolus de
quodam post incestum penitente, E contrario, inquit, do-
nate ei, & consolamini. Et, si cui quid donastis, & ego.
Ac ne putaremus donum hominis contemnendum, addi-
dit:

dit: Nam & ego quod donavi, si quid donavi, propter uos in persona Christi. Diuersa sunt dona Christi. unde Ioseph in typo eius uariam habebat tunicam. Et in psalmo qua- *Gen. 37* dragesimo quarto legimus: Astitit regina a dexteris tuis in uestitu deaurato, circumdata uarietate. Et Petrus apostolus, Sicut dispensatores, ait, multiplicis gratiæ Dei. Quod *1. Petr. 4* significantius Græce dicitur ποικίλης, idest, uariæ. Rogo, quæ ista contentio, claudere oculos, nec apertissimum lumē aspicere? In Ecclesia diximus esse dona diuersa, & aliud donum uirginitatis, & aliud nuptiarum. Et post paululū: Concedo & nuptias esse donum Dei: sed inter donum & donum magna diuersitas est. Et, quod Dei donum uoce apertissima pronunciamus, damnare dicimur? Porro, si Ioseph in typo Domini accipitur; tunica eius uaria, atque distincta in uirginibus, uiduis, continentibus, ac maritatis est. Et potest uideri quasi alienus, qui de tunica Christi est; cum & ipsam reginam, hoc est Ecclesiam saluatoris in uestitu deaurato, eadem uarietate circumdatam dixerimus? *Psal. 44* Sed & in consequentibus de coniugio disputantes eundem sensum secuti sumus. Hic locus ad præsentem controuersiam non pertinet: docet enim iuxta sententiam Domini, uxorem, excepta causa fornicationis, non repudiandam; & repudiatam, uiuo marito, alteri non nubere, aut certe uiro suo debere reconciliari. Et in alio loco: Mulier; inquit, *1. Cor. 7* ligata est, quanto tempore uir eius uiuit. Quod si dormierit uir eius liberata est a lege uiri: cui uult nubat, tantum in Domino: idest, Christiano. Qui secundas nuptias tertiasq. concedit in Domino, primas cum ethnico prohibet? Aperiant; quæso; aures obtrectatores mei, & uideant secundas & tertias nuptias concessisse in Domino. qui secundas & tertias non damnaui, primum potui damnare matrimonium: in eo quoque loco, ubi interpretamur capitulum Apostoli: Circumcisus aliquis uocatus est, non ad ducat præputium: in præputio uocatus est, non circumcitur: (licet quidam prudentissimi interpretes scripturarum, hoc de circumcissione & seruitute legis dictum esse cō-

Q 4 tendant)

tendant) nonne apertissime fœdera seruamus nuptiarum? Diximus enim: Si in præputio quis uocatus est, non circūcidatur. Habebas, inquit, uxorem, cum credidisti: noli fidem Christi causam putare discidii: quia in pace nos uocauit Deus. Circumcisio nihil est, & præputium nihil est, sed obseruatio mandatorum Dei. nihil enim prodest absque operibus cælibatus & nuptiæ: cum etiam fides, quæ proprie Christianorum est, si opera non habuerit, mortua esse dicatur; & hac lege uirgines quoque Vestæ & Iunonis uirgines, in sanctorum queant ordine numerari. Et post paululum: Seruus uocatus es, non sit tibi curæ; sed &, si potes fieri liber, magis utere. Etiam si habes, inquit, uxorem, & illi alligatus es; & soluis debitum; & non habes tui corporis potestatem; atque (ut manifestius loquar) seruus uxoris es: noli propter hoc habere tristitiam, nec de amissa uirginitate suspires. Sed etiam, si potes causas aliquas inuenire discidii, ut libertate pudicitie perfruaris, noli salutem tuam cum alterius interitu quærere. Habeto paulisper uxorem, nec præcurras morantem. Expecta, dum sequitur: Si egeris patienter, coniux mutabitur in sororem. In eo quoque loco, ubi tractauimus, cur dixisset Paulus: De uirginibus autem, Domini præceptum non habeo: consilium autem do, tamquam misericordiam consecutus a Domino, ut sim fidelis: ita uirginitatem prætulimus, ut nuptiarum ordinem seruaremus. Si uirginitatem Dominus imperasset; uidebatur nuptias condemnare, & hominum auferre seminarium, unde & ipsa uirginitas nascitur. Si præcidisset radicem, quo modo fruges quæreret? Nisi ante fundamenta iecisset, qua ratione ædificium extrueret, & operturum cuncta desuper culmen imposeret? Si radicem nuptias, si uirginitatem diximus fructus; si fundamentum matrimonium, & ædificium uel culmen perpetuam castitatem: quis uel tam inuidus, uel tam cæcus obrectator mei erit, ut in eadem domo ædificium uel culmen uideat; & fundamentum, quod ædificium & culmen portat, ignoret? Porro & in alio loco proponentes Apostoli testimonium, in quo ait: Alligatus

es

es uxori, noli quærere solutionem : solutus es ab uxore, noli quærere uxorem : illico hæc subieciimus : Habet unusquisque nostrum terminos suos, redde mihi meum, & tu tene tuum. Si alligatus es uxori, ne illi des repudium : si solutus sis ab uxore, non quæram uxorem. Ut ego non soluo coniugia, si semel ligata sunt : ita tu nō liges, quod solutum est. Sed & in alio testimonio, quid de uirginitate & nuptiis senserimus, manifestissime declaratur. Non imponit nobis Apostolus laqueum, nec cogit esse, quod nolumus ; sed suadet, quod honestum est, & decorum ; & intente facit seruire Domino, & semper esse sollicitos, & expectare paratam Domini uoluntatem ; ut, cum quid imperauerit, quasi strenuus & armatus miles statim impleat quod præceptum est ; & hoc faciat sine ulla distentione, quæ data est secundum Ecclesiasten hominibus huius mundi, ut distendantur *Eccles. 1* in ea. In fine quoque comparationis nuptiarum & uirginū, disputationem nostram hoc sermone conclusimus : Vbi bonum & melius est, ibi boni & melioris non unum est præmium ; & , ubi non est unum præmium, ibi utique dona diuersa. Tantum igitur interest inter nuptias & uirginitatem, quantum inter non peccare & bene facere, immo, ut leuius dicam, quantum inter bonum & melius. Porro in consequentibus, cum dicimus : Finita disputatione coniugiorum & uirginitatis, ut inter utrumque cauto moderamine præceptorum, nec ad sinistram, nec ad dexteram diuerteret, sed uia regia graderetur, & illud impleret : Ne sis multum iustus : *Eccles. 7* rursus monogamiam digamiae comparat : & quo modo nuptias subdiderat uirginitati, ita digamiam nuptiis subiicit : nonne perspicue ostendimus, quæ sit in scripturis sanctis sinistra, quæ dextra ; & quid significet, Ne sis multum iustus ? quod uidelicet sinistra sit, si Iudæorum & gentilium sequamur libidinem, & semper æstuemus ad coitū ; dextra, si Manichæorum sequamur errorem ; & , simulata pudicitia, impudicitiae retibus implicemur : uia autem regia sit, ita appetere uirginitatem, ne nuptiæ condemnentur. Præterea, quis tam iniquus meorum opusculorum iudex erit,

erit, ut prima matrimonia damnare me dicat? cum etiam
1. Tim. 5 de secundis dixisse me legerit. Concedit Apostolus secundas nuptias, sed uolentibus, sed iis, quæ se continere non possunt; ne luxuriatæ in Christo, nubere uelint; habentes damnationem, quod primam fidem irritam fecerint. Et hoc concedit, quia multæ abierunt retro post satanam. ceterum beatiores erūt, si sic permanserint. Continuoq. subiungit Apostolicam auctoritatem: Secundum consilium meum. Porro, ne auctoritas Apostoli quasi hominis leuior uideretur, addidit: Puto autem, quod & ego spiritum Dei habeam. Vbi ad cōtinentiam prouocat, ibi non hominis, sed spiritus Dei consilio usus est: ubi autem nubendi concedit ueniam, spiritum Dei non nominat, sed prudentiæ librat consilium, ita singulis relaxans, ut unusquisque ferre possit. Propositis ergo testimoniis, in quibus Apostolus secundas concedit nuptias, statim subiecimus: Quo modo uirginibus ob fornicationis periculum concedit nuptias, & excusabile facit, quod per se non appetitur: ita ob eandem fornicationem concedit uiduis secunda matrimonia. Melius est enim, licet alterum & tertium, unum uirum nosse, quam plurimos: idest, tolerabilius est, uni homini prostitutam esse, quam multis. Faceat calumnia. De secūdo hic, & de tertio, & quarto, si libet, matrimonio disputauimus, non de primo. Sed ne quis in eo, quod diximus, Tolerabilius est, uni homini prostitutam esse, quam multis; ad primum matrimonium referat; cum omnis nobis quæstio de digamia & trigamia fuerit; denique digamiæ, & trigamiæ disputationem hac calce signauimus: Omnia licent, sed non
1. Cor. 6 omnia expediunt. Non damno digamos, immo nec trigamos, &, si dici potest, octogamos. Plus aliquid inferam: etiam scortatorem recipio penitentem. Quidquid æqualiter licet, æquali lance pensandum est. Erubescat calumniator meus, dicens me prima damnare matrimonia, quādo legit, Non damno digamos, & trigamos, &, si dici potest, octogamos. Aliud est, non damnare: aliud, prædicare: aliud est, ueniam concedere; aliud, laudare uirtutem. Si autem
durus

durus in eo uideor, quia dixi: Quidquid æqualiter licet, æquali lance pensandum est: puto non me crudelem iudicabit, & rigidum, qui alia loca uirginitati, & nuptiis, alia trigamis, & octogamis, & pænitentibus legerit præparata. Christum in carne uirginem, in spiritu monoganium, quod unam habeat Ecclesiā, noster in reliquis sermo testatus est: & crediti sumus nuptias condemnare? damnare dicor nuptias, cuius hic sermo est? Nulliq. dubium est, sacerdotes de Aaron, & Eleazar, & Phinees stirpe generatos: qui cum & ipsi uxores habuerint, recte nobis opponerentur, si errore Encratitarum contenderemus matrimonia reprobanda. Tatianum, Encratitarum principem, qui abiicit matrimonia, reprehendimus, & ipsi nuptias condemnamus? Rursumq. ubi uirgines & uiduas comparo, quid de nuptiis senserim, & quo modo tres gradus uirginitatis, uiduitatisq. uel continentiae & coniugii fecerim, declarant ipsā, quæ scripta sunt. Non nego beatas esse uiduas, quæ ita post baptismum manserint: nec illarum detraho merito, quæ cum uiris in castitate perdurant: sed sicut hæ maioris præmii apud Deum sunt, quam nuptæ coniugali officio seruientes; ita & ipsæ æquo patiantur animo, uirginitatem sibi præferri. Ad Galatas quoque testimonium Apostoli proponentes, *Gal. 2* Ex operibus legis nō iustificabitur omnis caro; huiuscemodi sensum intulimus. Opera legis & nuptiæ sunt: unde & maledicuntur in ea, quæ non habent filios: quæ si conceduntur etiam in euangelio; aliud tamen est, indulgentiam infirmitati tribuere; aliud est, uirtutibus præmia polliceri. Ecce perspicue nuptias diximus concedi in euangelio; sed tamen easdem in suo officio permanentes, præmia castitatis capere non posse. Quod si indigne accipiunt mariti; non mihi irascantur, sed scripturis sanctis, immo episcopis, & presbyteris, & diaconis, & uniuerso choro sacerdotali, & leuitico; qui se nouerunt hostias offerre non posse, si operi seruiant coniugali. Sed eo loco, ubi de Apocalypsi testimonium posuimus, nonne manifestum est, quid de uirginibus, & uiduis, & coniugibus senserimus? Hi sunt, qui can- *Apoc. 14*
tant

tant canticum nouum ; quod nemo potest cantare , nisi qui uirgo est . Hi sunt primitiæ Dei , & agni , & sine macula . si uirgines primitiæ Dei sunt ; ergo uiduæ , & in matrimonio continentes , erunt post primitias , hoc est , in secūdo & tertio gradu . In secundo & tertio gradu uiduas ponimus , & maritatas : & hæretico furore dicimur damnare nuptias ? Multa sunt , quæ per omnem librum cauto moderamine de uirginitate , de uiduis , de nuptiis diximus : sed breuitatis studio unum adhuc ponam testimonium : cui non reor contradicendum , nisi eum , qui aut se inimicum probare uoluerit , aut uecordem . nam cum proposuissem , quod Dominus isset ad nuptias in Cana Galileæ , post quædam etiam hæc addidi : Qui enim semel iuit ad nuptias , semel docuit esse nubendum : & tunc uirginitati posset officere , si nuptias post uirginitatem & uiduitatis castimoniam , non in gradu tertio , poneremus : nunc autem , cum hæreticorum sit damnare coniugia , & dei spernere condicionem ; quidquid de laude dixerint nuptiarum , libenter audimus . Ecclesia enim non damnat matrimonia , sed subiicit ; nec abiicit ,

Ioan. 2 sed dispensat , sciens , sicut supra diximus , in domo magna , non solum esse uasa aurea , & argentea , sed & lignea , & fictilia , & alia esse in honorem , alia in contumeliam ; & quicūque se mundauerit , eum futurum esse uas honorabile & necessarium , in omne opus bonum præparatum . Quidquid , inquam , de laude dixerint nuptiarum , libenter audimus . Laudari nuptias , libenter audimus , & nuptias condemnamus ? Ecclesia matrimonia non damnat , sed subiicit . Velitis nolitis , maritus subiicitur uirginitati & uiduitati . Ecclesia nuptias , sed nuptias in suo opere permanentes , subiicit , non damnat ; nec abiicit , sed dispensat . In potestate uestra est , si uelitis secūdum pudicitie gradum scandere . Quid indignamini , si in tertio stantes , nolitis ad superiora prope rare ? Igitur cum toties , & tam crebro lectorem admonuerim ; & per singula pene tractuum millia cautus uiator incessem , me ita recipere nuptias , ut eis cōtinentes uiduas , uirginesq. præferrem : debuerat prudens & benignus lector etiam

etiam ea, quæ uidentur dura, æstimare de ceteris, & non, in uno atque eodem libro, criminari, me diuersas sententias protulisse. quis enim tam hebes, & sic in scribendo rudis est, ut idem laudet, & damnet? ædificata destruat, & destructa ædificet? & cum aduersarium uicerit, suo nouissi me microne feriat? Si rustici homines, & uel rhetorica, uel dialecticæ artis ignari detraherent mihi; tribuerem ueniam imperitiæ; nec accusationem reprehenderem, ubi non uoluntatem in culpa cernerem, sed ignorantiam: nunc uero, cum disertis homines, & liberalibus studiis eruditi magis uelint lædere, quam intelligere; breuiter a me responsum habeant, corrigere eos debere peccata, non reprehendere. Patet campus: stat econtra acies: aduersarii dogma manifestum est: & (ut Virgilianum aliquid inferam) illum aspice contra, Qui uocat: respondeant aduersario: aliter te neant modum in disputando, aliter uirgam in docendo; & me, in libris suis, quid uel prætermiserim, uel addiderim, doceant. Reprehensores non audio, sequor magistros. Delicata doctrina est, pugnantis ictus dictare de muro, & cum ipse unguentis delibutus sis, cruentum militem accusare formidinis. Nec hoc dicens, statim iactantiæ reus sum, quod ceteris dormientibus solus certauerim: sed hoc dico, cautius eos posse pugnare, qui me uiderint uulneratum. Nolo tale certamen adeas, in quo tantum te protegas; & torpente dextra, sinistra clypeum circumferas. aut ferendum tibi est, aut cadendum. non possum te existimare uictorem, nisi aduersarium uidero trucidatum. Legimus, o eruditissimi uiri, in scholis pariter, & Aristotelea illa, de Gorgia fontibus manantia, simul didicimus, plura esse uidelicet genera dicendi; & inter cetera, aliud esse *γυμνασικῶς* scribere, aliud *δογματικῶς*: in priori uagam esse disputationem, & aduersario respondentem nunc hæc, nunc illa proponere; argumētari ut libet; aliud loqui, aliud agere; panē, ut dicitur, ostendere, lapidē tenere. In sequenti autē aperta frōs, & ut ita dicā, ingenuitas necessaria est. Aliud est, quæ rere; aliud, definire: in altero pugnandū, in altero docendū est.

est. Tu me stantē in prœlio, & de uita periclitantē studiosus magister doceas? Noli ex obliquo, & unde non putaris, uulnus inferre: directo percute gladio: turpe tibi est hostem dolis ferire, non uiribus. quasi non & hæc ars summa pugnantium sit, alibi minari, alibi percutere. Legite, obsecro uos, Demosthenem: legite Tullium: ac, ne forsitan rhetores uobis displiceant, quorum artis est, uerisimilia magis, quam uera, dicere; legite Platonem, Theophrastum, Xenophontem, Aristotelem, & reliquos, qui, de Socratis fonte manantes, diuersis cucurrere riuis: quid in illis apertum, quid simplex est? quæ uerba non sensuum? qui sensus non uictoriæ? Origenes, Methodius, Eusebius, Apollinarius, multis uersum millibus scribunt aduersus Celsum, & Porphyrium. Considerate, quibus argumentis, & quam lubricis problematibus diaboli spiritu contexta subuertant: & quia interdum coguntur loqui, non quod sentiunt, sed quod necesse est, dicunt aduersus ea, quæ dicunt gentiles. Taceo de Latinis scriptoribus, Tertuliano, Cypriano, Minucio, Victorino, Lactantio, Hilario; ne non tam me defendisse, quam alios uidear accusasse. Paulum apostolum proferam: quem quotiescumque lego, uideor mihi non uerba audire, sed tonitrua. legite epistolas eius, & maxime ad Romanos, ad Galatas, ad Ephesios, in quibus totus in certamine positus est: & uidebitis eum in testimoniis, quæ sumit de ueteri testamento, quam artifex, quam prudens, quam dissimulator sit eius, quod agit, uidentur quidem uerba simplicia, & quasi innocentis hominis, ac rusticani, & qui nec facere, nec declinare nouerit insidias: sed, quocumque respexeris, fulmina sunt. hæret in causa: capit omne, quod tetigerit: tergum uertit, ut superet: fugam simulat, ut occidat. Calumniamur ergo illum, atque dicamus ei: Testimonia, quibus contra Iudæos, uel ceteras hæreses usus es, aliter in suis locis, aliter in tuis epistolis sonant. Videmus exempla captiua seruire tibi ad uictoriam, quæ suis in uoluminibus nō dimicant. Nonne nobis loquitur cum saluatore, aliter foris, aliter domi

mi loquimur? Turbæ parabolas, discipuli audiunt ueritatē. *Matth. 13*
Proponit pharisæis Dominus quæstiones, & non edisserit. *Esa. 24*

Aliud est, docere discipulum; aliud, aduersarium uincere. Mysterium, inquit, meum mihi, mysterium meum mihi, & meis. Indignamini mihi, quod Iouinianum non docuerim, sed uicerim. Immo indignantur ii, qui illum anathematizatum dolent: & cum laudant quod sunt, accusant quod esse se simulant. Quasi uero rogandus fuerit, ut mihi cederet; & non, inuitus ac repugnans, in ueritatis uincula ducendus. Et hæc dicerem, si uincendi studio contra regulam scripturarum quippiam locutus fuisset, & sicut uiri fortes in controuersis solent facere, culpam præmio redimerem. nunc uero, cum interpret magis Apostoli fuerim, quam dogmatistes, & commentatoris sim usus officio; quidquid durum uidetur, ei magis imputetur, quem exposuimus, quam nobis, qui exposuimus. nisi forte ille aliter dixit, & nos simplicitatem uerborum eius maligna in interpretatione detorsimus. qui hoc arguit, de ipsis scripturis probet. Diximus: Si bonum est mulierem non tangere, malum ergo est tangere. nihil enim bono contrarium est, nisi malum. si autem malum est, & ignoscitur: ideo conceditur, ne malo quid deterius fiat: & cetera usque ad propositionem alterius capituli. Hoc ideo subiecimus, quia Apostolus dixerat: Bonum est homini mulierem non tangere: *1. Cor. 7* propter fornicationem autem unusquisque uxorem suam habeat; & unaquæque suum uirum habeat. In quo differunt uerba mea a sensu Apostoli? Nisi forte in eo, quod ille pronunciat, ego dubito: ille definit, ego sciscitor: ille aperte dicit: Bonum est homini mulierem non tangere: ego timide quæro, si bonum est mulierem non tangere. Si, dubitantis est, non confirmantis. Ille dicit: Bonum est non tangere: ego, quid bono contrarium esse possit, adiungo. Statimq. in cōsequentibus: Animaduertenda Apostoli prudentia: non dixit: Bonum est homini uxorem non habere: sed bonum est mulierem non tangere: quasi & in tactu eius periculum sit: quasi, qui illam tetigerit, non euadat.

Vides

Vides igitur, non de coniugibus nos exponere, sed de coitu simpliciter disputare, quod, ad comparationem pudicitiae & uirginitatis, & angelicae similitudinis, bonum sit homini
Eccl. 1 mulierem non tangere. Vanitas uanitatum, & omnia uanitas, dicit Ecclesiastes. Si omnes creaturae bonae, ut a bono creatore conditae; quo modo uniuersa uanitas? Si terra uanitas; numquid & caeli, & angeli, & throni, dominationes, potestates, ceteraeque uirtutes? Sed quae per se bona sunt, ut a bono creatore condita, ad comparationem meliorum uanitas appellantur. uerbi gratia. Lucerna lampadis comparatione pro nihilo est: lampas stellae comparatione non lucet: stellam lunae confer, caeca est: lunam soli iunge, non rutilat: solem Christo confer, tenebrae sunt. Ego sum,
Exod. 3 inquit, qui sum. Omnem igitur creaturam si Deo contuleris, non subsistit. Ne tradas, inquit, Hester hereditatem tuam iis, qui non sunt, idolis scilicet, & daemonibus. Et certe erant idola, & daemones, quibus ne traderentur orabat. In Iob quoque legimus, a Baldach dictum de impio:
Iob 18 Auellatur de tabernaculo suo fiducia eius, & calcet super eum quasi rex interitus. Habitent in tabernaculo illius socii eius, qui non est: haud dubium quin diaboli: qui cum habeat socios; non autem haberet, nisi esset; tamen, quia Deo periit, non esse dicitur. Ergo, secundum hunc comparationis sensum, malum diximus mulierem tangere; (licet uxoris nulla facta sit mentio) quia bonum est non tangere. Et subiecimus: Virginitatem frumentum, nuptias hordeum, fornicationem iterum bubulum nuncupantes. Vtique frumentum & hordeum creatura Dei est. Verum
Ioan. 6 in euangelio maior turba hordeaceis panibus, minor frumentaceis pascitur. Homines, inquit, & iumenta saluos facies Domine. Aliis uerbis id ipsum locuti sumus, quando aurum uirginitatem, argentum nuptias diximus, & centum quadraginta quattuor millia uirginum signatorum, qui cum mulieribus non sunt coinquinati: in quo ostendi uoluimus, omnes, qui uirgines non permanferint, ad comparationem purissimae & angelicae castitatis, & ipsius domi
 ni

ni nostri Iesu Christi, esse pollutos. Quod si cui asperum
& reprehensione dignum uidetur, tantam nos inter uirgi-
nitatem & nuptias fecisse distantiam, quanta inter frumen-
tum & hordeum est: legat sancti Ambrosii de uiduis librū;
& inueniet illum inter cetera, quæ de uirginitate & nuptiis
disputauit, etiam hoc dixisse. Neque ita coniugium prætu-
lit Apostolus, ut studia uirginitatis extingueret; sed a conti-
nentiæ persuasione incipiens, ad incontinentiæ remedia de-
scendit: & cum brauium supernæ uocationis fortibus de-
monstrasset, deficere tamen in uia neminem passus est, ita
plaudens prioribus, ut non despiceret & sequentes. didice-
rat enim & ipse, quia dominus Iesus aliis panem hordea-
ceum, ne in uia deficerent, aliis corpus suum, ut ad regnū
tenderent, demonstrauit. Et in consequentibus: Non er-
go copula nuptialis quasi culpa uitanda, sed quasi necessita-
tis sarcina declinanda est. Lex enim astringit uxorem, ut in
laboribus & tristitia filios generet; conuersio eius ad ui-
rum sit, ut ei ipse dominetur. Ergo laboribus & doloribus
in generatione filiorum addicitur nupta, non uidua: & do-
minatui uiri subditur copulata, non uirgo, Et in alio loco, *1. Cor. 7*
Pretio, inquit, empti estis, nolite fieri serui hominum.
Videtis, quam euidentis coniugalis sit definitio seruitutis.
Et post pusillum: Si igitur bonum coniugium seruitus est;
malum quid est, quando nequeunt se inuicem sanctificare,
sed perdere? Vniuersa, quæ nos de uirginitate ac nuptiis la-
to sermone diffudimus, ille breui arctauit compendio, in
paucis multa comprehendens. Virginitas ab eo persuasio
continentiæ, nuptiæ remedia incontinentiæ prædicantur.
Et significanter a maioribus ad minora descendens, uirgi-
nibus brauium supernæ uocationis ostendit; nuptas, ne in
uia deficiant, consolatur. alios laudat, alios non despicit.
coniugium hordeo, uirginitatem corpori Christi compa-
rat. et puto multo minorem distantiam inter frumentum
esse & hordeum, quā inter hordeum & corpus Christi. De-
nique nuptias dicit, quasi necessitatis sarcinam, declinan-
das, & definitionē esse euidentissimæ seruitutis. Et multa alia;

R r quæ

- quæ tribus libellis de uirginibus latissime persecutus est. Ex quibus uniuersis perspicuum est, me nihil noui de uirginibus nuptisq. dixisse, sed maiorum in omnibus secutum esse sententiam, tam huius uidelicet, quam reliquorum, qui de ecclesiasticis dogmatibus disputarunt: quorum æmulari exopto negligentiam potius, quam aliorum obscuram diligentiam. Tumeant contra me mariti, quare dixerim: Oro te, quale illud bonum est, quod orare prohibet, quod corpus Christi accipere non permittit? Quando impleo mariti officium, non impleo continentis. Iubet idem Apostolus in alio loco, ut semper oremus. Si semper orandum est, numquam ergo coniugio seruiendum: quoniam, quotiescumque uxori debitum reddo, orare non possum. hoc quare dixerim, perspicuum est: quia interpretabar illud
1. *Thes.* 5 Apostoli dictum: Nolite fraudare inuicem, nisi forte ex consensu ad tempus, ut uacetis orationi. Paulus apostolus dicit, quando coimus cum uxoribus, nos orare non posse. Si per coitum, quod minus est, impeditur, idest, orare: quanto plus, quod maius est, idest, corpus Christi prohibetur accipere? Petrus ad continentiam hortatur: Ne impediuntur orationes nostræ. Quod hic, quæso, peccatum meum est? quid commerui? quid deliqui? Si turbidæ & nebulosæ aquæ fluunt, non est aluei culpa, sed fontis. An ideo arguor, quod de meo ausus sum adicere: Quale illud bonum est, quod corpus Christi accipere non permittit? Ad hoc breuiter respondebo. Quid est maius, orare, an corpus Christi accipere? utique accipere corpus Christi. Si per coitum, quod minus est, impeditur: multo magis, quod maius est. Diximus in eodem uolumine, panes propositionis ex lege non potuisse comedere Dauid & socios eius, nisi se triduo mundos a mulieribus respondissent: non utique a meretricibus, quod damnabatur a lege, sed ab uxoribus, quibus licite iungebantur. Populum quoque, quando accepturus erat legem in monte sina, tribus diebus iussu esse ab uxoribus abstinere. Scio Romæ hanc esse consuetudinem, ut fideles semper Christi corpus accipiant: quod

quod nec reprehendo, nec probo : unusquisque enim in suo *Rom. 14*
sensu abundet : sed ipsorum conscientiam conuenio : qui eo
dem die post coitum communicant, &, iuxta Persium, no-
ctem flumine purgant. quare ad martyres ire non audent ?
quare non ingrediuntur ecclesias ? an alius in publico, alius
in domo Christus est ? quod in ecclesia non licet, nec domi
licet. Nihil Deo clausum est ; & tenebræ quoque lucent
apud eum. Probet se unusquisque, & sic ad corpus Christi
accedat : non quod dilatae communionis unus dies, aut bi-
duum sanctiorem efficiat Christianum, ut, quod hodie nō
merui, cras uel perendie merear : sed quod, dum doleo me
non communicasse corpori Christi, abstineam me pauli-
isper ab uxoris amplexu ; ut amor coniugis amorem Christi
præferam. Durum est, & non ferendum. quis hoc seculari-
um sustinere potest ? Qui potest sustinere, sustineat : qui
non potest, ipse uiderit. nobis curæ est, non quid unusquis-
que possit, aut uelit, sed, quid scripturæ præcipiant, dice-
re. Illud quoque in commentariolis meis eiusdem Aposto- *1. Cor. 7*
li carpitur, in quibus dixi : Verum ne quis putet ex eo,
quod sequitur : Vt uacetis orationi, & iterum ad ipsum re-
uertimini : Apostolum hoc uelle, & non propter maiorem
ruinam concedere : statim infert, ne tentet uos satanas pro-
pter incontinentiam uestram. Pulchra nimirum indulgen-
tia : Et iterum reuertimini ad id ipsum : quod erubescit suo
uocare nomine ; quod tentationi præfert satanæ ; quod cau-
sam habet incontinentiam. Laboramus quasi obscurum
differere, cum exposuerit ipse, qui scripsit : Hoc autem di-
co, inquit, iuxta indulgentiam, non secundum imperium.
Et mustitamus adhuc nuptias non uocare indulgentiam,
sed præceptum : quasi non eodem modo secunda & tertia
matrimonia concedantur, & reliqua. Quid hic locutus
sum, quod Apostolus non dixerit ? nimirum illud, Quod
erubescit suo uocare nomine. Ego arbitror, quando dicit,
Ad id ipsum, & rem ipsam tacet ; non eum nominare pa-
lam coitum, sed uerecunde ostendere. An quia sequitur,
Quod tentationi præfert satanæ, quod habet causam in con-

R r 2 tinen-

tinentiam? nonne alio uerborum ordine id ipsum est, ne
 tentet uos satanas propter incontinentiam uestram? An
 quia dixi, Et musitamus adhuc nuptias non uocare indul-
 gentiam, sed præceptum? quod si durum est, imputetur
 Apostolo, qui ait: Hoc autem dico secundum indulgentiam,
 non secundum imperium: non mihi, qui, excepto præ-
 ostero ordine, nec sensum, nec uerba mutauit. Tran-
 seant ad reliqua: epistolari enim breuitate festinat oratio.
 Dico, inquit Apostolus, innuptis, & uiduis: bonum est
 eis, si sic permanserint, ut ego: si autem se non continent,
 nubant: melius est enim nubere, quam uri. Quod capitu-
 lum nos sic interpretati sumus. Postquam nuptis concessit
 usum coniugii; & ostenderat, ipse quid uellet, quid
 ne concederet; transit ad innuptas, & uiduas; & sui pro-
 nit exemplum; & felices uocat, si sic permanserint: si au-
 tem se non continent, nubant: id ipsum dicens, quod supra:
 Propter fornicationem autem, & ne tentet uos satanas pro-
 pter incontinentiam uestram. Redditq. causam, cur dixe-
 rit; Si se non continent, nubant: melius est enim nubere,
 quam uri. Ideo melius est nubere, quia peius est uri. Tol-
 le ardorem libidinis; & non dicet, Quia melius est nubere.
 Melius, semper ad comparisonem deterioris respicit, non
 ad simplicitatem incomparabilis per se boni. Velut si dice-
 ret: melius est unum oculum habere, quam nullum. Et
 post paululum, cum apostropham fecissem ad Apostolum,
 intuli: si per se bonæ nuptiæ sunt, noli eas incendio com-
 parare: sed dic simpliciter, bonum est nubere. Suspecta
 est mihi bonitas eius rei, quam magnitudo alterius mali
 malum cogit esse inferius. Ego autem non leuius malum,
 sed simplex per se bonum uolo. Vult Apostolus innuptas
 & uiduas absque coitu permanere; & ad exemplum sui pro-
 uocat; & feliciores uocat, si sic permanserint. si autem se
 continere non possunt; & ardorem libidinis non tam conti-
 nentia uolunt, quam fornicatione restringere; melius est
 nubere, quam uri. Ad quod nos intulimus: Ideo melius
 est nubere, quia peius est uri: non nostram sententiam pro-
 ferentes,

ferentes, sed interpretantes illud Apostoli, Melius est nubere, quam uri: idest, melius est maritum ducere, quam fornicari. Si uri, uel fornicari bonum esse docueris; tunc bono melius præferetur. Si autem nubere melius est, quod malo præfertur: non est germanæ & puræ integritatis, nec eius beatitudinis, quæ angelis comparatur. Si dixero; melius est uirginem esse, quam nuptam: bono melius prætuli. si autem alterum gradum fecero; melius est nubere, quàm fornicari: ibi non bono melius, sed malo bonum prætuli. Multa diuersitas est inter id melius, quod nuptiis, & inter id, quod fornicationi antepositur. Obsecro te, quid in hac disputatione peccaui? Propositum mihi erat, non ad meam uoluntatem scripturas trahere, sed id dicere, quod scripturas uelle intelligebam. Commentatoris officium est, non quid ipse uelit, sed, quid sentiat ille, quem interpretatur, exponere. alioqui, si contraria dixerit, non tam interpret erit, quam aduersarius eius, quem nititur explanare. Certe, ubicumque scripturas non interpreto, & libere de meo sensu loquor, arguat me, cui libet, durum quid dixisse contra nuptias. quod si non repererit; quidquid uel austerum esse uidetur, uel durum, id scriptoris auctoritati, non interpretis officio deputet. Illud uero ferre quis posset, quod in me reprehenditur, quare exponens capitulum Apostoli, in quo de coniugibus scripsit, Tribulationem carnis habebunt huiusmodi, dixerim: Nos ignari rerum putabamus nuptias saltem carnis habere lætitiā. Si autem nubentibus & in carne tribulatio est, in qua sola uidebantur habere delicias: quid erit reliquum, propter quod nubāt; cum & in spiritu, & in anima; & in ipsa carne tribulatio sit? Quæ hæc condemnatio matrimonii est, si infantum uagitus, filiorum mortes, diuortia, damna domus, & cetera huiusmodi tribulationem diximus nuptiarum? Dū adhuc uiueret sanctæ memoriæ Damasus, librum contra Heluidium de beatæ Mariæ uirginitate perpetua scripsimus: in quo necesse fuit nobis, ad uirginitatis beatitudinem prædicandā, multa de molestiis dicere nuptiarum. Num uir egregius, & eruditus in scripturis, & uirgo,

R r 3 eccle-

ecclesiæ uirginis doctor, aliquid in illo sermone reprehēdit ? In libro quoque ad Eustochium multo duriora de nuptiis diximus ; & nemo super hac re læsus est . Amator quippe castitatis , præconium pudicitæ intenta aure captabat . Lege Tertullianum , lege Cyprianum , lege Ambrosium ; & cum illis me uel accusa , uel libera . Inuentæ sunt Plautinæ familiaræ , & scioli tantum ad detrahendum , qui in eo se doctos ostentare uelint , si omnium dicta lacerent , & in una atque eadem causa utrumque , idest ; & me & aduersarium reprehendant : ut , cum e duobus alterum necesse sit uincere , ambo uictos esse contendant . Porro , ubi de digamis , & trigamis differentes diximus ; Melius est , licet alterum & tertium , unum uirum nosse , quam plurimos ; idest , tolerabilius est uni homini prostitutam esse , quam multis ; nonne statim , cur hoc dixerim , subiecimus ? Siquidem & illa in

Ioan. 4 euangelio Samaritana , sextum maritum habere se dicens , arguitur a Domino , quod nō sit uir eius . Ego etiam nunc libera uoce proclamo ; non damnari in Ecclesia digamiam , immo nec trigamiam ; & ita licere quinto , & sexto , & ultra , quo modo & secundo marito nubere : sed quo modo non damnantur istæ nuptiæ , ita nec prædicantur . Solatia miseræ sunt , non laudes continentæ . unde & in alio loco dixi : Vbi unus maritus exceditur , nihil refert , secundus , an tertius sit : quia definit esse monogamus . Omnia licent , sed non omnia expediunt . Non damno digamos , immo nec trigamos , & , si dici potest , octogamos : habeat , cui libet ,

Gen. 1 octauum maritum , & esse desinat prostituta . Veniam & ad illum locum , in quo arguor , quare dixerim dumtaxat , iuxta Hebraicam ueritatem , in die secundo non additum , sicut in primo , & in tertio , & reliquis : Vidit deus , quia bonum est : statimq. subiecerim , nobis intelligentiam derelinqui ; non esse bonum duplicem numerum , qui ab unione diuidat , & præfiguret fœdera nuptiarum . Vnde & in arca Noë , omnia animalia , quæcumque bina ingrediuntur , immunda sunt .

Gen. 7 Impar numerus est mundus . In hoc nescio quid reprehendatur interim de secunda die : utrum quia scriptum est ,

& scri-

& scriptum esse non diximus: an, quia, etiam si scriptum est, nos aliter intelleximus, quam scripturæ simplicitas patitur. Scriptum non esse, In secundo die uidit Deus quia bonum est: non meum accipiant testimonium, sed cunctorum Hebræorum, & aliorum interpretum, Aquilæ uidelicet, & Symmachi, & Theodotionis. Si autem scriptum non est, cum in ceteris diebus scriptum sit: aut reddant aliam probabiliorem causam, quare non scriptum sit; aut, si non repererint, ingratis suscipiant quod a nobis dictum est. Porro si in arca Noe omnia animalia, quæ bina ingrediuntur, immunda sunt, & impar numerus mundus est; & hoc scriptum esse nemo dubitat: quare scriptum sit, edisserat. si autem non edisserunt; quod a me expositum est, uelint nolint, suscipiant. Aut profer meliores epulas, & me conuiuia utere: aut qualicumque nostra cenula contentus esto. Scilicet nunc enumerandum mihi est, qui ecclesiasticorum de impari numero disputarunt, Clemens, Hippolytus, Origenes, Dionysius, Eusebius, Didymus, nostrorumque Tertullianus, Cyprianus, Victorinus, Lactantius, Hilarius: quorum Hilarius de septenario, idest, impari numero differens, quæ & quantâ dixerit, ad Fortunatum liber illius testimonio est. An forsitan Pythagoram, & Architam Tarentinum, & scipionem in sexto de republica, de impari numero proferam disputantes? Et si hos audire noluerint obtrectatores mei; grammaticorum scholas eis faciam conclamare; Numero deus impare gaudet. Grande piaculum. euerse sunt ecclesiæ: orbis audire non potest, si mundiorem uirginitatem diximus esse, quam nuptias; si parem numerum impari subieciimus; & ueteris testamenti typos euangelicæ ueritati profecisse monstrauius. Cetera, quæ in libro nostro repressa sunt, uel leuiora puto, uel ad eundem sensum pertinentia. unde ad ea respondere nolui; ne & libelli excederem magnitudinem; & tuo uiderer ingenio diffidere; quæ patronum causæ meæ ante habui, quam rogarem. Igitur hoc extrema uoce protestor, me nec damnasle nuptias, nec damnare; respondisse aduersario, non meorum insidias formidasse.

midasse. Virginitatem autem in cælum fero, non quia habeam, sed quia magis mirer quod non habeo. Ingenua & uerecunda confessio est; quo ipse careas, id in aliis prædicare. Numquid, quia graui corpore terræ hæreo, auium non miror uolatus, nec columbam prædico, quod Radit iter liquidum, celeres neque commouet alas? Nullus se decipiat: nemo blando adulatore se præcipitet. Prima est uirginitas a prima natiuitate, secunda uirginitas a secunda natiuitate. Non est meus sermo, antiqua sententia est: Nemo potest duobus dominis seruire, carni, & spiritui. Caro concupiscit aduersus spiritum, spiritus autem aduersus carnem: hæc adinuicem sibi aduersantur: ut non, quæ uolumus, illa faciamus. Quando aliquid tibi asperum uidetur in nostro opusculo; non ad mea uerba respicias, sed ad scripturam, unde mea tracta sunt uerba. Christus uirgo, mater uirginis nostri uirgo perpetua, mater & uirgo. Iesus enim clausis ingressus est ostiis: & in sepulcro eius, quod non
Luc. 23 num & in petra durissima fuerat excisum, nec antea quis,
Cant. 4 nec postea positus est: Hortus conclusus, fons signatus: de
Ioel 3 quo fonte ille fluuius manat iuxta Ioel, qui irrigat torrentē, uel finium, uel spinarum; finium peccatorum, quibus ante alligabamur; spinarum, quæ suffocant sementem patris familias. Hæc est porta orientalis, ut ait Ezechiel, semper clausa, & lucida, operiens in se, uel ex se proferens sancta sanctorum, per quam sol iustitiæ & pontifex noster secundū
Ioan. 20 ordinem Melchisedek ingreditur, & egreditur. Respondeant mihi, quo modo Iesus ingressus est clausis ostiis, cū
Luc. 24 palandas manus, & latus considerandum, & ossa carnemque monstauerit; ne ueritas corporis, phantasma putaretur: & ego respondebo, quo modo sancta Maria sit & mater, & uirgo, uirgo post partum, mater ante quam nupta. Igitur, ut dicere cœperamus, Christus uirgo, uirgo Maria, utriusque sexus uirginitatem dedicauere. Apostoli uel uirgines, uel post nuptias continentes: episcopi, presbyteri, diaconi aut uirgines eliguntur, aut uidui, aut certe post sacerdotium in æternum pudici. Quid nobismet ipsis illudimus, &

& irascimur, si, subantibus nobis semper ad coitum, præmia pudicitia denegentur? Volumus opipare comedere, uxorum adhærere complexibus, & in numero uirginum, & uiduarum regnare cū Christo? idem ergo habebit fames præmium, & ingluuies? sordes, & munditiæ, faccus, & sericū? Lazarus recepit mala in uita sua, & diues ille purpuratus, *Luc. 16* crassus, & nitidus, fruitus est carnis bonis, dum adiuueret; sed diuersa post mortem tenent loca. miseriæ deliciis, & delictiæ miseriis commutantur. in nostro arbitrio est, uel Lazarum sequi, uel diuitem.

ARGVMENTVM.

IN monachum quendam, qui libros suos contra Iovinianum hereticum, ab eo aliqui conuictum, quasi in eis matrimonio detraxisset, cauillabatur, Domnioni amico respondens, sursum ac deorsum miris illum iocis exagitans, inuehitur.

HIERONYMI AD DOMNIONEM

Apologeticon.

EPISTOLA LI.

LITTERAE tuæ & amorem pariter sonant, & querelam; amorem tuum, quo sedulo monens, etiam quæ tuta sunt, in nobis pertimescis; querelam eorum, qui non amant, & quærentes occasionem in peccatis, garriunt aduersus fratrem suum, & contra filium matris suæ ponunt scandalum. scribis enim, monachum, immo nescio quem de triuio, de compitis, de plateis circumforaneum, rumigerulum, uasrum tantum ad detrahendum, qui per trabem oculi sui festucam alterius nitatur eruere, con- *Luc. 6* cionari aduersum me, & libros, quos contra Iovinianum scripsi, canino dente rodere, lacerare, conuellere; hunc dialecticum urbis uestre, & Plautinæ familiæ columen, non legisse quidem κατηγορίας Aristotelis, non δὲ ἐρμηνείας, *νομ*

non *τοτικά*, non saltem Ciceronis *τόπαις*, sed per imperitorum circulos, muliercularumq. *συμπόσια*, syllogismos texere, & quasi sophismata nostra callida argumentatione dissolvere. Stultus ego, qui me putauerim hæc absque philosophis scire non posse, qui meliorem styli partem eam legerim, quæ deleret, quam quæ scriberet. Frustra ergo Alexandri uerti commentarios: nequidquam me doctus magister per *εισαγωγὴν* introduxit ad logicam: & ut humana contemniam, sine causa Gregorium Nazianzenum, & Didymum in scripturis sanctis catechistas habui: nihil mihi profuit Hebræorum eruditio, & ab adolescentia usque ad hanc ætatem quotidiana in lege, prophetis, euangelis, apostolisq. meditatio. Inuentus est homo absque præceptore perfectus, *πνευματοφόρος, ἔνθεος, καὶ αὐτοδίδακτος*, qui eloquentia Tullium, argumentis Aristotelem, prudentia Platonem, eruditione Aristarchum, multitudine librorum Chalcenterum, Didymum scientia scripturarum, omnesq. sui temporis uincat tractatores. Denique dicitur materiam poscere, & Carneadeum aliquid referens, in utramque partem, hoc est, & pro iustitia, & contra iustitiam disputare. Liberatus est mundus a periculo; & hereditariæ, uel centuriæ causæ de barathro erutæ; quod hic, forum negligens, se ad Ecclesiam transfudit. Quis, hoc uolente, fuisset innoxius? quem criminofum non huius seruasset oratio, cum cœpisset in digitis partiri causam, & syllogismorum suorum retia tendere? nam si apploisset pedem, intendisset oculos, rugasset frontem, iactasset manum, uerba tonasset, tenebras illico ob oculos offudisset iudicibus. Nec mirum, si me & absentem iamdiu, & absque usu Latinæ linguæ, semigræculum barbarumque, homo Latinissimus & facundissimus superet; cum præsentem Iouinianum, Iesu bone qualem & quantum uirum, cuius nemo scripta intelligeret, dignum qui sibi caneret tantum & musis, eloquentiæ suæ mole oppresserit. Quæso igitur te pater carissime, ut moneas eum, ne loquatur contra propositum suum; ne callitatem, habitu pollicens, uerbis destruat; ne uirgo, uel

con-

continens, (ipse enim uiderit, quid esse se iactet) marita-
tas uirginibus comparet; & frustra aduersus hominē diser-
tissimū tanto tempore digladius sit. Audio præterea eum
libenter uirginum & uiduarum cellulas circumire, &, addu-
cto supercilio, de sacris inter eas litteris philosophari. Quid
in secreto, quid in cubiculo mulierculas docet? ut hoc sciāt
esse uirgines, quod maritatas; ut florem ætatis non negli-
gant; ut comedant, & bibant, & balneas adeant, mundi-
tias appetant, unguenta non spernant? an magis ieiunia,
& pudicitiam; & illuiem corporis? utique illa præcipit,
quæ plena uirtutis sunt. Fateatur ergo publice, quod domi
loquitur: aut, si & domi eadem docet, quæ & publice; a
puellarum consortio separandus est. Miror autem; non
erubescere, iuuenem, & monachum, ut sibi uidetur, diser-
tum, cuius de ore ueneres fluunt, qui tantæ in sermocinan-
do elegantix est, ut comico sale ac lepore conspersus sit; lu-
strare nobilium domos; hæere salutationibus matronarū,
religionem nostram paganam facere, & fidem Christi con-
tentione torquere uerborū, atque inter hæc fratri suo detra-
here. Vtique, si errare me arbitratus est; (in multis enim *Iacob.3*
offendimus omnes; &, si quis in uerbo non peccat, hic per-
fectus est uir) debuit uel arguere, uel interrogare per litte-
ras, quod uir eruditus & nobilis fecit Pammachiū: cui ego
responsū dedi, ut potui; & epistola longiore disserui, quo
quidque sensu dixerim. Imitatus saltem fuisset tuam uere-
cundiam, qui ea loca, quæ scandalum quibusdam facere ui-
debantur, excerpta de uolumine per ordinem digessisti; po-
scens ut uel emendarem, uel exponerem; & non tantæ me
putasti dementiæ, ut in uno atque eodem libro & pro nu-
ptiis, & contra nuptias scriberem. Parcat sibi, parcat mi-
hi, parcat nomini Christiano monachum se esse non lo-
quendo, & discursando, sed tacendo, & sedendo nouerit.
Legat Hieremiam, dicentem: Bonum est uiro; cum porta- *Thr.3*
uerit iugum ab adolescentia suā. Sedebit solus, & tacebit:
quia tulit super se iugum. Aut, si certe in omnes scriptores
censoriam accepit uirgulam; & ideo se eruditum putat,
quia

quia Iouinianum solus intelligit; est quippe prouerbum: Balbum melius balbi uerba cognoscere: πάντας συγγραφείς pellamus Artilio iudice. Ipse quoque Iouinianus, συγγραφεὺς ἀγράμματος, iustissime proclamabit: quod me damnant episcopi, non est ratio, sed conspiratio. Nolo mihi ille uel ille respondeat; quorum me auctoritas opprimere potest, docere non potest. scribat contra me uir, cuius & ego linguam intelligam; quem cum uicero, omnes homines simul uicerim. ego enim bene noui. Experto credite, quantus In clypeum assurgat, quo turbine torqueat hastam. Fortis est, & in disputando nodosus, & tenax, & qui obliquo & acuminato pugnet capite. sæpe de nocte usque ad uesperam contra nos in plateis clamauit: habet la tera, & athletarum robur, & belle corpulentus est. Videtur mihi occulte mei dogmatis esse sectator. Præterea nunquam erubescit; nec considerat, quid, sed quantum dicat; & in tantam uenit opinionem eloquentiæ, ut soleant dicta eius cirratorum esse dictata. Quoties me iste in circulis sto machari fecit, & adduxit ad cholera? quoties conspuat, & consputus abscessit? Sed hæc uulgaria sunt, & a quolibet de sectatoribus meis possunt fieri: ad libros prouoco, ad memoriam in posteros transmittendam. loquamur scriptis; ut de nobis tacitus lector iudicet; ut, quo modo ego discipulorum gregem duco, sic ex huius nomine Gnathonici, uel Phormionici uocentur. Non est grande, mi Domnion, garrere per angulos, & medicorum tabernas, ac de mundo ferre sententiam: hic bene dixit, ille male: iste scripturas nouit, ille delirat: iste loquax, ille infantissimus est. Ut de omnibus iudicet, cuius hoc iudicio meruit? Contra quemlibet passim in triuiis strepere, & congerere maledicta, non crimina, scurrarum est, & parasitorum. Moueat manum; figat stylum; commoueat se, & quidquid potest, scriptis ostendat: det nobis occasionem respondendi disertitudini suæ. Possum remordere, si uelim: possum genuinū dentem læsus infigere. Et nos didicimus litteras, Et nos sæpe manum ferulæ subduximus. De nobis quoque dici potest,

rest, Fenum habet in cornu, longe fuge. Sed magis uolumus esse discipuli eius, qui ait: Dorsum meum posui ad flagella, & faciem meam non auerti a confusione sputorum. Qui ^{Esa. 50} cum malediceretur, non remaledixit: & post alapas, crucem, ^{1. Petr. 2} flagella, blasphemias, nouissime pro crucifigentibus deprecatus est, dicens: Pater ignosce eis: quod enim faciunt, ne ^{Luc. 23} sciunt. Et ego ignosco errori fratris: intelligo, quia diaboli arte deceptus est. Inter mulierculas sciolus sibi & eloquens uidebatur: postquam Romam mea opuscula peruenerunt, quasi æmulum exhorruit, & de me quoque captauit gloriam, ut nullus esset in terris, qui non eius eloquentiæ displiceret, exceptis iis, quorum potentiæ non parcat, sed cedit, immo quos non honorat, sed metuit. Voluit scilicet homo peritissimus, ut ueteranus miles, uno rotatu gladii percutere utrumque, & ostendere populis, quod, quidquid ipse uellet, hoc scriptura sentiret. Dignetur igitur nobis sermonem suum mittere, & non reprehendendo, sed docendo garrulitatem nostram corrigere. tunc intelliget, aliam uim fori esse, aliam triclinii, non æque inter fusos & calathos puellarum, & inter eruditos uiros de diuinæ legis dogmatibus disputari. nunc libere & impudenter iactat in uulgus, & perstrepat, damnat nuptias; & inter uteros tumentes, infantium uagitus, & lectulos maritorum, quid Apostolus dixerit, tacet, ut me solum in inuidiam uocet. cum autem ad libros uenerit, & pedem pedi contulerit, & uel proposuerit aliquid de scripturis, uel audierit proponentem: tunc sudabit, tunc hærebit: procul Epicurus, longe Aristippus: subulci non aderunt; fœta scopha non grunnet. Et nos tela, pater, ferrumq. haud debile dextra spargimus; & nostro sequitur de uulnere sanguis. Porro, si non uult scribere, & tantum maledictis agendum putat; audiat, tot interiacentibus terris, fluctibus, populis, saltem hoc clamoris mei: Non damno nuptias, non damno coniugium: & ut certius sententiam meam teneat, uolo omnes, qui propter nocturnos forsitan metus soli cubitare non possunt, uxores ducere.

ARGV-

PAMMACHIVM, Paula generum, & Marcella consobrinum, quod eius exemplaria contra Iovinianum, quibus multi offendeabantur, occultauerit, laudat: uerum, quia id ubique fieri non poterat, Apologeticum pro eis mittit, & amicum, iam iam futurum sacerdotem, ad sacrarum litterarum studium, & suorum operum lectionem hortatur.

HIERONYMVS AD PAMMACHIVM,
pro libris suis aduersus Iovinianum.

EPISTOLA LII.

CHRISTIANI interdum pudoris est, etiam apud
C amicos tacere, & humilitatem suam magis silentio
consolari, quam, retractando ueteres amicitias,
ambitionis crimen incurrere. Quamdiu tacuisti, tacui, nec
umquam expostulare super hac re uolui; ne non amicum
querere, sed potentiorum uiderer expetere: nunc autem
prouocatus officio litterarum, primas partes semper ha-
bere tentabo; & non tam rescribere, quam scribere; ut
& uerecunde hucusque tacuisse, & uerecundius loqui coe-
pisse cognoscar. De opusculis meis contra Iovinianum,
quod & prudenter & amanter feceris exemplaria subtrahen-
do, optime noui: sed nihil profuit ista diligentia, cum ali-
quantum ex urbe uenientes, mihi eadem lectitarent, quae se
Romae excepisse referebant. in hac quoque provincia iam
libri fuerant diuulgati: et, ut ipse legisti, nescit uox missa
reuertere. non sum tantae felicitatis, quantae plerique huius
temporis tractatores, ut nugae meas, quando uoluerim,
emendare possim. statim, ut aliquid scripsero, aut amato-
res mei, aut inuidi, diuerso quidem studio, sed pari certamine,
in uulgus nostra disseminant; & uel in laude, uel in
uituperatione nimii sunt, non meritum styli, sed suum sto-
machum sequentes. itaque, quod solum facere potui, apo-
logeticum ipsius operis tibi misi, quem προτεράνισσα, & te
poscen-

poscente edidi . quem cum legeris ; aut ipse pro nobis ceteris satisfacies ; aut , si tu quoque narem contraxeris , illam Apostoli περιχοπὴν , in qua de uirginitate & nuptiis disputat , aliter differere compelleris . Nec hoc dico , quod te ad scribendum prouocem ; cuius in sacris litteris studium mihi præfero ; sed ut alios , qui nos lacerant , hoc facere compellas . Norunt litteras : uidentur sibi scioli : possunt me non reprehendere , sed docere . si quid scripserint ; magis ex operis eorum comparatione mea interpretatio negligetur . Lege , quæso te , & diligenter Apostoli uerba considera : & tunc uidebis , me propter calumniam declinandam multo plus , quam ille uoluit , in maritos fuisse clementem . Origenes , Dionysius , Pierius , Eusebius Cæsariensis , Didymus , Apollinarius latissime hanc epistolam interpretati sunt . quorum Pierius cum sensum Apostoli uentilaret , atque edissereret , & proposuisset illud exponere : Volo autem omnes esse sicut me ipsum : adiecit : ταῦτα λέγων ὁ παῦλος ἀντικρὺς ἀγαμίαν κηρύσσει . Quod hic , quæso , peccatū meum est , quæ duritia ? Vniuersa , quæ scripsi , huic sententiæ comparata leuissima sunt . Reuolue omnium , quos supra memorauimus , commentarios ; & ecclesiarum bibliothecis fruiere ; & magis concito gradu ad optata cœptaq. peruenies . Audio totius in te urbis studia concitata : audio pontificis & populi uoluntatem pari mente congruere . Minus est tenere sacerdotium , quam mereri . Libros sedecim prophetarum , quos in Latinum de Hebræo sermone uerti , si legeris , & delectari te hoc opere comperero ; prouocabis nos , etiam cetera clausa armario non tenere . Transtuli nuper Iob in linguam nostram : cuius exemplar a sancta Marcella , consobrina tua , poteris mutuari . Lege eundem Græcum & Latinum ; & ueterem editionem nostræ translationi compara : & liquido peruidebis , quantum distet inter ueritatem , & mendacium . Miseram quædam ἡ ἐπομνημάτων in prophetas duodecim sancto patri Domnioni , samuelem quoque & Malachim , idest quattuor Regum libros . quæ si legere uolueris ; probabis , quantæ difficultatis sit diuinam scri-

1 Cor.7

scripturam, & maxime prophetas intelligere, & interpretum uitio, quæ apud suos purissimo cursu orationis labuntur, apud nos scaterè uitii. Porro eloquentiam, quam pro Christo in Cicerone contemnis, in paruulis nè requiras. ecclesiastica interpretatio, etiam si habet eloquii uenustatem, dissimulare eam debet, & fugere; ut non otiosis philosophorum scholis, paucisq. discipulis, sed uniuerso loquatur hominum generi.

ARGVMENTVM.

RIPARIVS presbyter scripserat ad D. Hieronymum, quo modo Vigilantius hereticus in martyrum reliquias, & sollemnes, quæ in eorum templis fiebant, Christianorum uigilias, sicut nouatores hodie faciunt, debaccharetur. respondens nunc ei uir sanctus, ueluti quodam pugna prelude uelitatus, heresim generatim percutit, ostendens, si heretici librum mittat, se longiori oratione eius ineptiis responsurum.

HIER. ADVERSVS VIGILANTIVM,

ad Riparium presbyterum.

EPISTOLA LIII.

ACCEPTIS primum litteris tuis, non respondere, superbix est; respondere, temeritatis. de iis enim rebus interrogas, quæ & proferre, & audire sacrilegium est. Ais, Vigilantium, qui κατ' ἀντίφρασιν hoc uocatur nomine; nam Dormitantius rectius diceretur; os fœtidum rursus aperire, & putorem spurcissimum contra sanctorum martyrum proferre reliquias, & nos, qui eas suspicimus, appellare cinerarios, & idololatrias, qui mortuorum hominum ossa ueneremur. O infelicem hominem, & omni lacrymarum fonte plangendum; qui hæc dicens, non se intelligat esse Samaritanum, & Iudæum, qui corpora mortuorum pro immundis habent, & etiam uasa, quæ in eadem domo fuerint, pollui suspicantur, sequentes occidentem

dentem litteram, & non uiuificantem spiritum. Nos autem non dico martyrum reliquias; sed ne solem quidem; & lunam; non angelos, non archangelos, non cherubim, non seraphim; & omne nomen, quod nominatur & in presentis seculo; & in futuro, colimus; & adoramus; ne seruamus creaturæ potius, quam creatori; qui est benedictus in secula. Honoramus autem reliquias martyrum, ut eum, cuius sunt martyres, adoremus. honoramus seruos; ut honor seruorum redundet ad Dominum, qui ait: Qui uos *Matth. 10* suscipit, me suscipit. Ergo Petri & Pauli immundæ sunt reliquiae? ergo Moyse corpusculum immundum erit, quod iuxta Hebraicam ueritatem ab ipso sepultum est Domino? & quotiescumque apostolorum, & prophetarum, & omnium martyrum basilicas ingredimur, toties idolorum templa ueneramur? accensiq. ante tumulos eorum cerei, idololatriæ insignia sunt? Plus aliquid dicam; quod redundet in auctoris caput, & insanum cerebrum uel sanet aliquando, uel delect; ne tantis sacrilegiis simplicium animæ subuertantur. Ergo & Domini corpus, in sepulcro positum, immundum *Mar. 16* fuit? et angeli; qui candidis uestibus utebantur, mortuo caueri atque polluto præbebant excubias, ut post multa secula Dormitanti somniaret; immo eructaret immundissimam crapulam; & cum Iuliano persecutore, sanctorum basilicas aut destrueret, aut in templa conuerteret? Miror sanctum episcopum; in cuius parochia esse presbyter dicitur; acquiescere furori eius; & non uirga apostolica, uirgaq. ferrea confringere uas inutile, & tradere in interitum *1. Cor. 5* carnis; ut spiritus saluus fiat: nec meminerit illius dicti: Si uidebas furem, currebas cum eo; & cum adulteris portionem tuam ponebas. Et in alio loco: In matutino interficiebam omnes peccatores terræ, ut disperderem de ciuitate Domini omnes operantes iniquitatem. Et iterum: Non ne odientes te, Domine, odio habui, & super inimicos tuos tabescebam? Perfecto odio oderam illos. Si non sunt honorandæ reliquiae martyrum, quo modo legimus: Pretiosa in conspectu Domini mors sanctorum eius? Si ossa *Psal. 115*

S s mor-

4. Reg. 13 mortuorum polluunt contingentes; quo modo Eliseus mortuus mortuum suscitauit; & dedit uitam corpus, quod iuxta Vigilantium iacebat immundum? Ergo omnia castra Exod. 13 Israelitici exercitus & populi Dei fuere immunda, quia Ios. 24 Ioseph & patriarcharum corpora portabant in solitudine, & Gen. 50 ad sanctam terram immundos cineres pertulerunt? Ioseph quoque, qui in typo præcessit Domini saluatoris nostri, sceleratus fuit; qui tanta ambitione Iacob in Hebron ossa portauit, ut immundum patrem auo, & atauo sociaret immundis, & mortuum mortuis copularet? O præcedendam linguam a medicis, immo insanum curandum caput; ut, qui loqui nescit, discat aliquando reticere. Ego uidi hoc aliquando portentum, & testimoniis scripturarum, quasi uinculis Hippocratis, uolui ligare furiosum: sed abiit, excessit, euasit, erupit; & inter Hadriæ fluctus, Cortiq. regis alpes in nos declamando clamauit. quidquid enim amens loquitur, uociferatio, & clamor est appellandus. Tacita me forsitan cogitatione reprehendas, cur in absentem inuehar. Fatebor tibi dolorem meum. sacrilegium tantum patienter audire non possum. legi enim Siromasten Phinees, Num. 25 austeritatem Eliæ, zelum Simónis Cananæi, Petri seueritatem, Ananiam & saphiram trucidantis, Pauliq. constantiam, qui Elymam magum uiuis Domini resistentem, Act. 1. 5. 13 æterna cæcitate damnauit. Non est crudelitas, pro Deo pietas. unde & in lege dicitur: Si frater tuus, & amicus, & uxor, quæ est in sinu tuo, deprauare te uoluerit a ueritate; sit manus tua super eos, & effunde sanguinem eorum; & auferes malum de medio Israel. Iterum dicam: Ergo martyrum immundæ sunt reliquæ? Et quid passi sunt apostoli, ut immundum Stephani corpus tanta funeris ambitione præcederent; ut facerent ei planctum magnum; ut eorum luctus in nostrum gaudium uerteretur? Nam quod dicis eum uigilias execrari: facit & hoc contra uocabulum suum, ut Matth. 26 uelit dormire Vigilantius, & non audiat saluatorem dicentem: Sic non potuistis una hora uigilare mecum? Vigilate, & orate, ne intretis in tentationem: Spiritus promptus, est,

est, sed caro infirma. Et in alio loco propheta decantat: *Psal. 118*
Media nocte surgebam, ut confiterer tibi super iudicia iusti *Luc. 6*
tiae tuae. Dominum quoque in euangelio legimus perno- *Ioan. 20*
ctasse, & apostolos clausos carcere tota nocte uigilasse, ut, *Col. 4*
illis psallentibus, terra quateretur, custos carceris crede- *2. Cor. 11*
ret, magistratus & ciuitas terrentur. Loquitur Paulus: *Exod. 12*
Orationi insilite, uigilantes in ea. Et in alio loco: In uigi- *Psal. 120*
liis frequenter. Dormiat itaque Vigilantius, & ab externi *Dan. 4*
natore Aegypti cum Aegyptiis dormiens suffocetur. Nos *Matth. 8*
dicamus cum Dauid: Non dormitabit, neque dormiet,
qui custodit Israel, ut ueniat ad nos sanctus & Hir, qui in-
terpretatur uigil. Et si quando propter peccata nostra dor-
mierit, dicamus ad eum: Surge, ut quid dormitas Domi-
ne? excitemusq. illum, & nauicula fluctuante, clame-
mus: Magister saluos nos fac, perimus. Plura dictare uo-
lueram, si non epistolaris breuitas pudorem nobis tacendi
imponeret; & si librorum ipsius ad nos uoluisses mittere
cantilenas; ut scire possemus, ad quæ rescribere debere-
mus. nunc autem aerem uerberauimus; & non tam illius
infidelitatem, quæ omnibus patet, quam nostram fidem
aperuimus. ceterum, si uolueris longiorem nos aduersum
eum librum scribere, mitte naenias illius, & ineptias; ut
Ioannem Baptistam audiat prædicantem: Iam securis ad *Matth. 3*
radicem arborum posita est. Omnis enim arbor, quæ non
facit fructum bonum, excidetur, & in ignem mittetur.

ARGVMENTVM.

VIGILANTIVS, Gallus natione, Barcilonenſis eccleſia, quæ in Hispania eſt, preſbyter, homo, auctore Gennadio, in diuinis ſcripturis imperitus, eloquens tamen, & argutus, cleri primum improbato celibatu, aiebat non eſſe martyres, aut eorum reliquias uenerandas, neque ad eorum ſepulcra in eccleſiis uigilandum, ut qui nos precibus ſuis adiunare nequirent, & ſigna, quæ per eos fierent, incredulis dumtaxat prodēſſent. Cereos fruſtra in templis clara luce accendi, præterea cauſabatur. Eleemoſynas Hieroſolymam mitti debere negabat: hominiſq. ſubſtantiam retinendam, paulatimq. potius diſtribuendam, quam omnem ſemel in pauperes effundendam, aſſeuerabat: monachorum denique in ſolitudinem fugam uituperabat. Huius hæretici librum Riparius, & Deſiderius per Siſinnium fratrem Hieronymo, ut eius reſponſione confutaretur, miſerant. Reſpondet nunc acriter ac excitata bile uir ſanctus, hæreſimq. imperiti hominis omnem iugulat. Utinam ſcioli, & oculatiores noſtri temporis Vigilantii, tanti doctōris auctoritate, rationibusq. proſtrati, una cum eo penitus obdormiſcerent.

HIER. ADVERSVS VIGILANTIVM.

Eſa. 34

Iob 40

M

VLTA in orbe monſtra generata ſunt. Centauros, & Sirenas, ululas, & onocrotalos in Eſaia legitur. Iob Leuiathan & Behemoth myſtico ſermone deſcribit. Cerberum, & ſtympthalidas, aprumq. Erimanthium, & leonem Nemeæum, chimæram, atque hydram multorum capitum narrant fabulæ poetarum. Cum deſcribit Virgilius. triſormem Geryonem Hispaniæ prodiderunt. ſola Gallia monſtra non habuit, ſed uiris ſemper fortiſſimis & eloquentiſſimis abundauit. Exortus eſt ſubito Vigilantius, ſeu uerius Dormitantius, qui immūdo ſpiritu pugnet contra Chriſti ſpiritum, & martyrum neget ſepulcra ueneranda, damnandas dicat eſſe uigilias, numquam

quam nisi in pascha Alleluia cantandum; continentiam, hæ-
refim; pudicitiam, libidinis seminarium. & quo modo Eu-
phorbus in Pythagora renatus esse perhibetur, sic in isto Io-
uiniani mens praua surrexit: ut in illo, & in hoc diaboli re-
spondere cogamur insidiis. Cui iure dicitur: Semen pessim-
um, para filios tuos occisioni peccatis patris tui. Ille Ro- *Esa. 14*
manæ Ecclesiæ auctoritate damnatus, inter phasides aues,
& carnes suillas non tam emisit spiritum, quam eructauit:
iste caupo Calagurritanus, & in peruersum propter nomen
uiculi mutus Quintilianus, miscet aquam uino; & de arti-
ficio pristino suæ uenena perfidiæ catholicæ fidei sociare co-
natur, impugnare uirginitatem, odisse pudicitiam, in con-
uiuio secularium contra sanctorum ieiunia proclamare; dū
inter phialas philosophatur, & ad placenta liguriens, psal-
morum modulatione mulcetur; ut tantum inter epulas,
Dauid, & Idithum, & Asaph, & filiorum Choræ cantica au-
dire dignetur. Hæc dolentis magis effudi animo, quam ri-
dentis; dum me cohibere non possum, & iniuriam aposto-
lorum ac martyrum surda nequeo aure transire. Pro nefas,
episcopos sui sceleris dicitur habere consortes: si tamen epi-
scopi nominandi sunt, qui non ordinant diaconos, nisi
prius uxores duxerint; nulli cælibi credentes pudicitiam, im-
mo ostendentes quam sancte uiuant, qui male de omnibus
suspiciantur: & nisi prægnantes uxores uiderint clericorum,
infantesq. de ulnis matrum uagientes, Christi sacramenta
nō tribuūt. Quid facient Orientis ecclesiæ? quid Aegypti,
& Sedis Apostolicæ? quæ aut uirgines clericos accipiunt,
aut continentes; aut, si uxores habuerint, mariti esse desi-
stunt. Hoc docuit Dormitanti, libidini frena permittens,
& naturalem carnis ardorem, qui in adolescentia plerum-
que feruescit, suis hortatibus duplicans, immo extinguens
cōitu feminarum: ut nihil sit, quo distemus a porcis, quo
differamus a brutis animantibus, quo ab equis: de quibus
scriptum est: Equi insaniētes in feminas facti sunt mihi: *Hier. 25*
unusquisque in uxorem proximi sui hinniebat. Hoc est,
quod loquitur per Dauid spiritus sanctus: Nolite fieri sicut *Psal. 31*

Ss 3 equus

equus, & mulus, quibus non est intellectus. Et rursum de
 Dormitatio, & sociis eius: In chamo, & freno maxillas
 eorum constringe, qui non approximant ad te. Sed iam
 tempus est, ut ipsius uerba ponentes, ad singula responde
 re nitamur. Fieri enim potest, ut rursum malignus inter
 pres dicat fictam a me materiam, cui rhetorica declamatio
 ne respondeam, sicut illam, quam scripsi ad Gallias, matri
 & filiae inter se discordantibus. Auctores sunt huius dicta
 tiunculae meae sancti presbyteri Riparius, & Desiderius, qui
 parochias suas uicinia istius scribunt esse maculatas; mise
 runtq. libros per fratrem Sisinnium, quos inter crapulam
 stertens euomit: & asserunt repertos esse nonnullos, qui,
 2. Tim. 3 fauentes uitis suis, illius blasphemias acquiescant. Est qui
 dem imperitus: & uerbis, & scientia; & sermone incondi
 tus, ne uera quidem potest defendere: sed, propter homi
 nes saeculi, & mulierculas oncratas peccatis, semper discen
 tes, & numquam ad scientiam ueritatis peruenientes, una
 lucubrationcula illius naeniis respondebo; ne sanctorum ui
 rorum, qui, ut hoc facerem, me deprecati sunt, uidear litte
 ras respuisse. Nimirum respondet generi suo, ut qui de la
 tronum & conuenarum natus est semine; quos Cn. Pom
 peius, edomita Hispania, & ad triumphum redire festinas,
 de Pyrenaei iugis deposuit, & in unum opidum congrega
 uit; unde & conuenarum urbs nomen accepit. Hucusque
 latrocinetur contra Ecclesiam Dei: & de Vectonibus, Ar
 rebacis, Celtiberisq. descendens, incurset Galliarum ec
 clesias, portetq. nequaquam uexillum Christi, sed insigne
 diaboli. Fecit hoc idem Pompeius, etiam in Orientis par
 tibus; ut, Cilicibus & Isauris piratis, latronibusq. supera
 tis, sui nominis inter Ciliciam & Isauriam conderet ciuita
 tem. sed haec urbs hodie seruat scita maiorum; & nullus in
 ea ortus est Dormitanti. Galliae uernaculum hostem su
 stinent, & hominem moti capitis, atque Hippocratis uincu
 lis alligandum, sedentem cernunt in ecclesia, &, inter cete
 ra uerba blasphemiae, ista quoque dicentem: Quid neces
 se est, te tanto honore non solum honorare, sed etiam ado
 rare

rare illud nescio quid, quod in modico uasculo transferendo colis? Et rursum in eodem libro: Quid puluerem, lintheamine circumdatum, adorando oscularis? Et in consequentibus: Prope ritum gentilium uidemus sub prætextu religionis introductum in ecclesias, sole adhuc fulgente moles cereorum accendi, & ubicumque puluisculum nescio quod, in modico uasculo pretioso lintheamine circumdatum, osculantes adorare. Magnum honorem præbent huiusmodi homines beatissimis martyribus, quos putant de uilissimis cereolis illustrandos: quos agnus, qui est in medio throni, cum omni fulgore maiestatis suæ illustrat. Quis enim, o insanum caput, aliquando martyres adorauit? quis hominem putauit Deum? nonne Paulus, & Barnabas, cum a Lycaeonibus Iupiter & Mercurius putarentur, & eis uellent hostias immolare, sciderunt uestimenta sua, & se homines esse dixerunt? non quod meliores non essent olim mortuis hominibus, Ioue, atque Mercurio; sed quod sub gentilitatis errore honor eis Deo debitus deferretur. Quod & de Petro legimus; qui Cornelium, se adorare cupientem, manu subleuauit, & dixit: Surge: nam & ego homo sum. Et audes dicere, Illud nescio quid, quod in modico uasculo transferendo colis? Quid est illud, nescio quid? scire desidero. ex pone manifestius, ut tota libertate blasphemēs. Puluisculum, inquit, nescio quod, in modico uasculo pretioso lintheamine circumdatum. Dolet martyrum reliquias pretioso operiri uelamine; & non uel pannis, uel cilicio colligari, uel proiici in sterquilinum; ut solus Virgilantius ebrius & dormiens adoretur. Ergo sacrilegi sumus, quando apostolorum basilicas ingredimur? Sacrilegus fuit Constantinus imperator, qui sanctas reliquias Andreæ, Lucæ, & Timothei transtulit Constantinopolim, apud quas dæmōnes rugiunt, & inhabitatores Vigilantii illorum se sentire præsentia confitentur? Sacrilegus dicendus est & nūc Augustus Arcadius, qui ossa beati Samuelis longo post tempore de Iudæa transtulit in Thraciam? Omnes episcopi non solum sacrilegi, sed & fatui iudicandi, qui rem uilissimam, & cineres dissolutas

Apoc. 21

Act. 4

Act. 10

S s 4 lutos

lutos in serico, & uase aureo portauerunt? Stulti omnium ecclesiarum populi, qui occurrerunt sanctis reliquiis, & tanta lætitia, quasi præsentem, uiuentemq. prophetam cerne-
rent, susceperunt, ut de Palæstina usque Chalcedonem iun-
gerentur populorum examina, & in Christi laudem una uo-
ce resonarent? Videlicet adorabant Samuelem, & nõ Chri-
stum: cuius samuel & leuita, & propheta fuit. Mortuum
Mar. 12 suspicaris, & iccirco blasphemas. Lege euangelium: Deus
 Abraham, Deus Isaac, Deus Iacob: nõ est Deus mortuorũ,
 sed uiuorum. Si ergo uiuunt, honesto iuxta te carcere non
 clauduntur. Ais enim, uel in sinu Abrahæ, uel in loco refrige-
Apoc. 6 ri, uel subter aram Dei, animas apostolorum & martyru
 confedissee, nec posse suis tumultis, & ubi uoluerint, adesse
 præsentem. Senatoriæ uidelicet dignitatis sunt, ut non in-
 ter homicidas tæterrimo carcere, sed in libera honestaq. cu-
 stodia in fortunatorum insulis & in campis Elysiis recludan-
 tur. Tu Deo leges pones? Tu apostolis uincula iniicies, ut
 usque ad diem iudicii teneantur custodia, nec sint cum Do-
Apoc. 14 mino suo? de quibus scriptum est: Sequuntur agnum, quo
 cumque uadit. Si agnus ubique; ergo & hi, qui cum agno
 sunt, ubique esse credendi sunt. Et cum diabolus, & dæmo-
 nes toto uagentur orbe, & celeritate nimia ubique præsen-
 tes sint; martyres, post effusionem sanguinis sui, arca ope-
 rientur inclusi, & inde exire non poterunt? Dicis in libel-
 lo tuo, quod, dum uiuimus, mutuo pro nobis orare possu-
Apoc. 6 mus; postquam autem mortui fuerimus, nullius sit pro alio
 exaudienda oratio; præsertim cum martyres, ultionem sui
 sanguinis obsecrantes, impetrare non quierint. Si aposto-
 li, & martyres, adhuc in corpore constituti, possunt orare
 pro ceteris, quando pro se adhuc debent esse solliciti: quan-
 to magis post coronas, uictorias, & triumphos? Vnus ho-
Exod. 32 mo Moyses sexcentis millibus armatorum impetrat a Deo
Act. 7 ueniam: & Stephanus, imitator Domini sui, & primus
 martyr in Christo, pro persecutoribus ueniam deprecatur:
 & postquam cum Christo esse cœperint, minus ualebunt?
Act. 27 Paulus apostolus ducentas septuagintasex sibi dicit in nauis
 animas

animas condonatas; & postquam resolutus esse cœperit cū Christo, tunc ora clausurus est, & pro iis, qui in toto orbe ad suum euangelium crediderunt, mutire non poterit? Meliorq. erit Vigilantius canis uiuens, quam ille leo mortuus? Recte hoc de Ecclesiaste proponerem, si Paulum in spiritu mortuum confiterer. Denique sancti non appellantur mortui, sed dormientes. Vnde & Lazarus, qui resurrecturus erat, dormisse perhibetur. Et apostolus uetat Thessalonicenses de dormientibus contristari. Tu uigilans dormis, & dormiens scribis: & proponis mihi librum apocryphum, qui sub nomine Esdræ a te, & similibus tui legitur: ubi scriptum est, quod post mortem nullus pro aliis audeat deprecari: quem ego librum nunquam legi. quid enim necesse est in manus sumere, quod Ecclesia non recipit? Nisi forte Balsamum mihi, & Barbelum, & thesaurum Manichæi, & ridiculum nomen Leusiboræ proferas: & quia ad radices Pyrenæi habitas, uicinusq. es Hiberiæ, Basilidis, antiquissimi hæretici, & imperitiæ scientiæ, incredibilia portenta prosequeris, & proponis quod totius orbis auctoritate damnatur. Nam in commentariolo tuo, quasi pro te faciens, de Salomone sumis testimonium, quod Salomon omnino nō scripsit: ut, qui habes alterum Esdram, habeas & Salomonem alterum: & si tibi placuerit, legito fictas reuelationes omnium patriarcharum, & prophetarum: & cum illas didiceris, inter mulierum textrinas cantato, immo legendas propone in tabernis tuis: ut facilius per has nœnias uulgus indoctum prouoces ad bibendum. Cereos autem non clara luce accendimus, sicut frustra calumniaris; sed ut noctis tenebras hoc solatio temperemus, & uigilemus ad lumen; ne cæci tecum dormiamus in tenebris. Quod si aliqui, propter imperitiā, & simplicitatem, sæcularium hominum, uel certe religiosarum feminarum, de quibus uere possumus dicere: Confiteor, zelum Dei habent, sed non secundum scientiam: hoc pro honore martyrum faciunt: quid inde perdis? Causabantur quondam & apostoli, quod periret unguetum, sed Domini uoce correpti sunt. neque enim

Eccles. 9

Ioan. 11

1. Thes. 4

Rom. 10

Matth. 26

Chri-

Christus indigebat unguento, nec martyres lumine cereorum:
 & tamen illa mulier in honore Christi hoc fecit; deuotioque
 mentis eius recipitur: & quicumque accendunt cereos, se-
 cundum fidem suam habent mercedem, dicente Apostolo:
 Rom. 14 Vnusquisque in suo sensu abundet. Idololatrias appellas hu-
 iusmodi homines? Non diffiteor, omnes nos, qui in Chri-
 sto credimus, de idololatriæ errore uenisse. non enim nasci-
 mur, sed renascimur Christiani. & quia quondam coleba-
 mus idola, nunc Deum colere non debemus; ne simili eum
 uideamur cum idolis honore uenerari: illud fiebat idolis, &
 iccirco detestandum est: hoc fit martyribus, & iccirco reci-
 piendum est. nam & absque martyrum reliquiis per totas
 Orientis ecclesias, quando legendum est euangelium, accen-
 duntur luminaria, iam sole rutilante, non utique ad fugan-
 das tenebras, sed ad signum lætitiæ demonstrandum. unde
 Luc. 12 & uirgines illæ euangelicæ semper habent accensas lampades
 suas: & ad apostolos dicitur: sint lumbi uestri præcincti, &
 Ioan. 5 lucernæ ardentes in manibus uestris. Et de Ioâne Baptista:
 Ille erat lucerna ardens, & lucens: ut sub typo luminis cor-
 poralis illa lux ostendatur, de qua in psalterio legimus: Lu-
 Psal. 118 cerna pedibus meis uerbum tuum Domine, & lumen semi-
 tis meis. Male facit ergo Romanus episcopus, qui super
 mortuorum hominum Petri, & Pauli secundum nos ossa
 ueneranda, secundum te uilem puluisculum, offert Domi-
 no sacrificia, & tumulos eorum Christi arbitratur altaria?
 & non solum unius urbis, sed totius orbis errant episcopi,
 qui, cauponem Vigilantium contemnentes, ingrediuntur
 basilicas mortuorum, in quibus puluis uilissimus, & faul-
 la, nescio quæ, iacet linteamine conuoluta, ut polluta
 omnia polluat; & quasi sepulcra pharisaica foris dealbata
 sint, cum intus immundo cinere, iuxta te, immunda o-
 mnia oleant, atque sordeant? Et post hæc de barathro pe-
 ctoris tui cernofani spurcitiam euomens, audes dicere: Er-
 go cineres suos amant animæ martyrum, & circumuolant
 eos, semperque præsentés sunt; ne forte, si aliquis precator
 aduenierit, absentes audire non possint? O portentum in
 terras

terras ultimas deportandum. Rides de reliquiis martyru; & cum auctore huius hæreseos Eunomio, ecclesiis Christi calumniam struis; nec tali societate terreris, ut eadem contra nos loquaris, quæ ille contra Ecclesiam loquitur? Omnes enim sectatores eius basilicas apostolorum & martyrum non ingrediuntur, ut scilicet mortuum adorent Eunomium; cuius libros maioris auctoritatis arbitrantur, quam euangelia: & in ipso credunt esse lumen ueritatis: sicut aliæ hæreses paracletum in Montanum uenisse contendunt, & Manichæum ipsum dicunt esse paracletum. Scribit aduersum hæresim tuam, quæ olim erupit contra Ecclesiam; (ne & in hoc quasi repertor noui sceleris glorieris) Tertullianus, uir eruditissimus; insigne uolumen, quod Scorpianum uocat, rectissimo nomine; quia arcuato uulnere in Ecclesiæ corpus uenena diffudit; quæ olim appellabatur Cai-na hæresis; & multo tempore dormiens, uel sepulta, nunc a Dormitantiõ fuscitata est. Miror, quod non dicas, nequa quam perpetranda martyria; Deum enim, qui sanguinem hircorum taurorumq. non quærat, multo magis hominum non requirere. quod cum dixeris, immo & si non dixeris, ita habebis, quasi dixeris. qui enim reliquias martyrum asseris calcandas esse, prohibes sanguinem fundi, qui nullo honore dignus est. De uigiiliis & pernoctationibus in basilicis martyrum sæpe celebrandis, in altera epistola, quam ferme ante biennium sancto Ripario presbytero scripseram, respondi breuiter. Quod si ideo eas existimas respuendas, ne sæpe uideamur pascha celebrare, & non sollemnes post annum exercere uigilias; ergo & die Dominico non sunt Christo offerenda sacrificia; ne resurrectionis Domini crebro pascha celebremus; & incipiamus non unum pascha habere, sed plurima: Error autem & culpa iuuenum, uilissimarumq. mulierum, qui per noctem sæpeprehenditur, non est religiosi hominibus imputandus: quia & in uigiiliis paschæ tale quid fieri plerumque conuincitur; & tamen paucorum culpa non præiudicat religioni; qui & absque uigiiliis possunt errare uel in suis, uel in alienis domibus. Apostolo

stolorum fidem Iudæ proditio non destruxit. & nostras ergo uigilias malæ aliorum uigiliæ nõ destruent: quin potius pudicitie uigilare cogantur, qui libidini dormiunt. quod enim semel fecisse bonum est, non potest malum esse, si frequenter fiat: aut, si aliqua culpa uitanda est, non ex eo, quod sæpe, sed ex eo, quod fit aliquādo, culpabile est. Nõ uigilemus itaque diebus paschæ: ne expectata diu adulterorum desideria compleantur; ne occasionem peccandi uxor inueniat; ne maritali non possit recludi claue. Ardentius appetitur, quidquid est rarius. Non possum uniuerſa percurrere, quæ sanctorum presbyterorum litteræ comprehendunt: de libellis illius aliqua proferam. Argumentatur contra signa, atque uirtutes, quæ in basilicis martyrum sunt; & dicit eas incredulis prodesse, non credentibus: quasi nunc hoc quærat, quibus fiant, & non qua uirtute fiant. Esto, signa sint infidelium: qui quoniam sermoni & doctrinæ credere noluerunt, signis adducantur ad fidem. & Dominus incredulis signa faciebat: & tamen non iccirco Domini suggillanda sunt signa, quia illi infideles erant; sed maiori admirationi erunt, quia tantæ fuere potentie, ut etiam mentes durissimas edomarent, & ad fidem cogerent. Itaque nolo mihi dicas, signa infidelium sunt: sed responde, quo modo in uilissimo puluere, & fauilla nescio qua, tanta sit signorum uirtutumque præsentia. sentio, sentio, infelicissime mortaliū, quid doleas, quid timeas. Spiritus iste immundus, qui hæc te cogit scribere, sæpe hoc uilissimo tortus est puluere, immo hodieque torquetur; & qui in te plagas dissimulat, in ceteris confitetur. Nisi forte in morem gentiliū, impiorumque, Porphyrii, & Eunomii has præstigias dæmonum esse conſingas, & non uere clamare dæmones, sed sua simulare tormenta. Do consilium: ingredi baslicas martyrum, & aliquando purgaberis: inuenies ibi multos socios tuos; & nequaquam cereis martyrum, qui tibi displicent, sed flammis inuisibilibus combureris: tunc fateberis, quod nunc negas: & tuum nomen, qui in Vigilantio loqueris, libere proclamabis, te esse aut Mercurium propter nummorum cupiditatem.

piditatem, aut Nocturnum iuxta Plauti Amphitryonem; quo dormiente, in Alcmenæ adulterio duas noctes Iupiter copulauit, ut magnæ fortitudinis Hercules nasceretur; aut certe Liberum patrem pro ebrietate & cātharo ex humeris dependente, & semper rubente facie, & spumantibus labiis, effrenatisq. conuiciis. Vnde & in hac prouincia cum subitus terræmotus noctis medio omnes de somno excitasset; tu, prudentissimus & sapientissimus mortalium, nudus orabas, & referebas nobis Adam & Euam de paradiso: & illi quidem apertis oculis erubuerunt, nudos se esse cernentes, & uerenda texerunt arborum foliis: tu, & tunica, & fide nudus, subitoq. timore perterritus, & aliquid habens nocturnæ crapulæ, sanctorum oculis obscenam partem corporis ingerebas, ut tuam indicares prudentiam. Tales habet aduersarios Ecclesia: hi duces contra martyrum sanguinē dimicant: huiuscemodi oratores cōtra apostolos per tonant, immo tam rabidi canes contra Christi latrant discipulos. Ego confiteor timorem meum, ne forsitan de superstitione descendat. Quando iratus fuero, & aliquid mali in meo animo cogitauero, & me nocturnum phantasma deluserit; basilicas martyrum intrare non audeo: ita totus & corpore, & animo pertremisco: Rideas forsitan, & muliercularum deliramenta subsannes. Non erubesco earum fidem, quæ primæ uiderunt Dominum resurgentem, quæ mittuntur ad apostolos, quæ in matre Domini saluatoris sanctis apostolis commendantur. Tu ructato cum sæculi hominibus: ego ieiunabo cum feminis, immo cum religiosi uiris, qui pudicitiam uultu præferunt, & pallida iugi continentia ora portantes, Christi ostendunt uerecundiam. Videris mihi dolere & aliud, ne, si inoleuerit apud Gallos continentia, & sobrietas, atque ieiunium, tabernæ tuæ lucra non habeant; & uigilias diaboli, ac temulenta conuiuia tota nocte exercere nō possis. Præterea iisdem ad me relatu est epistolis, quod, contra auctoritatem apostoli Pauli, immo Petri, Ioannis, & Iacobi, qui dextras dederunt Paulo, & Barnabæ communicationis, & præceperunt eis, ut pauperum

Gen. 3

Marc. 16

Ioan. 19

Gal. 2. perum memores essent, tu prohibeas Hierosolymam in
 usus sanctorum aliqua sumptuum solatia dirigi. Videlicet,
 si ad hæc respondero, statim latrabis, meam me causam age
 re; qui tanta cunctos largitate donasti, ut, nisi uenisses Hie
 rosolymam, & tuas uel patronorum tuorum pecunias effu
Rom. 15 disses, omnes periclitaremur fame. Ego hoc loquor, quod
2. Cor. 9 beatus apostolus Paulus in cunctis pene epistolis suis loqui
 tur, & præcipit in ecclesiis gentium, per unam sabbati, hoc
1. Cor. 16 est, in die Dominico omnes conferre debere, quæ Hieroso
Act. 24 lymam in sanctorum solatia dirigantur; & uel per discipu
 los suos, uel per quos ipsi probauerint, & si dignum fue
 rit, ipse aut dirigat, aut perferat quod collectum est. In
 Actibus quoque apostolorum loquens ad Felicem præsidē,
 Post annos, ait, plures eleemosynam facturus in gentem
 meam, ueni Hierosolymam, & oblationes, & uota, in qui
 bus inuenerunt me purificatum in templo. Numquid in
 aliā parte terrarum, & in iis ecclesiis, quas nascentes fide
 sua erudiebat, quæ ab aliis acceperat, diuidere non pote
 rat? Sed sanctorum locorum pauperibus dare cupiebat,
 qui, suas pro Christo facultatulas relinquentes, ad Domi
 ni seruitutem tota mente conuersi sunt. Longum est nunc,
 si de cunctis epistolis eius omnia testimonia reuoluere uo
 luerō, in quibus hoc ait: & tota mente festinat, ut Hie
 rosolymam & ad sancta loca credentibus pecuniæ dirigantur,
 non in auaritiam, sed in refrigerium; non ad diuitias con
 gregandas, sed ab imbecillitatem corpusculi sustentandam,
 & frigus atque inedia in declinandam. Hac in Iudæa usque
 hodie perseverante consuetudine, non solum apud nos, sed
Psal. 1 & apud Hebræos; ut, qui in lege Domini meditantur die
Deut. 18 ac nocte, & partem non habent in terra, nisi solum Deum,
2. Cor. 8 synagogarum & totius orbis foueantur ministeriis, ex æqua
 litate dumtaxat; non ut aliis refrigerium, & aliis sit tribula
 tio; sed ut aliorum abundantia, aliorum sustentet inopiā.
 Respondebis, hoc unumquemque posse in patria sua face
 re, nec pauperes defuturos, qui Ecclesiæ opibus sustentan
 di sint. Nec nos negamus, cunctis pauperibus etiam Iudæ
 is, &

is, & Samaritanis, si tanta sit largitas, stipes porrigendas: sed Apostolus faciendam quidem docet ad omnes eleemosynā, sed maxime ad domesticos fidei. De quibus & saluator in euangelio loquebatur: Facite uobis amicos de mammona iniquitatis, qui uos recipiant in æterna tabernacula. Nūquid isti pauperes, inter quorum pannos & illuuiem corporis, flagrans libido dominatur, possunt habere æterna tabernacula, qui nec præsentia possident, nec futura? Non enim simpliciter pauperes, sed pauperes spiritu beati appellantur: de quibus scriptum est: Beatus, qui intelligit super egenum & pauperem: in die mala liberabit eum Dominus. In uulgi pauperibus sustentandis nequaquam intellectu, sed eleemosyna opus est. In sanctis pauperibus beatitudo est intelligentiæ, ut ei tribuat, qui erubescit accipere; & cum acceperit, dolet; metens carnalia, & seminans spiritalia. Quod autem asseris, eos melius facere, qui utuntur rebus suis, & paulatim fructus possessionum suarum pauperibus diuidunt, quam illos, qui, possessionibus uenundatis, semel omnia largiuntur: non a me eis, sed a Domino respondebitur: Si uis esse perfectus, uade, & uende omnia, quæ habes, & da pauperibus, & ueni sequere me. Ad eū loquitur, qui uult esse perfectus, qui cum apostolis patrem, nauticam, & rete dimittit. Iste, quem tu laudas, secundus & tertius gradus est; quem & nos recipimus, dummodo sciamus, prima secundis & tertiis præferenda. Nec a suo studio monachi deterrendi sunt a te; lingua uiperea, & morsu sæuissimo, de quibus argumentaris, & dicis: Si omnes se clausierint, & fuerint in solitudine, quis celebrabit ecclesias? quis sæculares homines lucrificiet? quis peccantes ad uirtutes poterit cohortari? Hoc enim modo, si omnes tecum fatui sint, sapiens quis esse poterit? & uirginitas non erit approbanda. Si enim omnes uirgines fuerint; nuptiæ non erunt; interibit humanum genus; infantes in cunis non uagient; obstetrices absque mercedibus mendicabunt; &, grauissimo frigore, solus, atque contractus Dormitantiū uigilabit in lectulo. Rara est uirtus, nec a pluribus

Gal. 6.

Luc. 16

Matth. 5

Psal. 40

1. Cor. 9

Matth. 19

Matth. 4

Matth. 20

bus appetitur . atque utinam hoc omnes essent , quod pauci sunt , de quibus dicitur : Multi uocati , pauci autem electi . uacui essent carceres . Monachus autem non doctoris , sed plangentis habet officium : qui uel se , uel mundum lugeat , & Domini pavidus prætoletur aduentum : qui sciens imbecillitatem suam , & uas fragile , quod portat , timet offendere , ne impingat , corruat , atque frangatur . unde & mulierum , maximeq. adolescentularum uitæ aspectum , & in tantum calligator sui est , ut , etiam quæ tuta sunt , perimescat . Cur , inques , pergis ad eremum ? uidelicet ut te non audiam , non uideam ; ut tuo furore non mouear ; ut tua bella nõ patiar ; ne me capiat oculus meretricis , ne forma pulcherrima ad illicitos ducat amplexus . Respondebis : hoc non est pugnare , sed fugere : sta in acie : aduersariis armatus obsiste ; ut , postquam uiceris , coroneris . Fateor imbecillitatem meam . nolo spe pugnare uictoriæ , ne perdam aliquando uictoriam . si fugero , gladium denitauit : si stetero , aut uincendum mihi est , aut cadendum . quid autem necesse est certa dimittere , & incerta sectari ? aut scuto , aut pedibus mors uitanda est . Tu , qui pugnas , & superari potes , & uincere . ego cum fugero , non uinco in eo , quod fugio ; sed ideo fugio , ne uincar . Nulla securitas est , uicino serpente dormire . potest fieri , ut me non mordeat : tamen potest fieri , ut aliquando me mordeat . Matres uocamus , sorores , & filias , & non erubescimus uitis nostris nomina pietatis obtendere . Quid facit monachus in cellulis feminarum ? quid sibi uolunt sola & priuata colloquia , & arbitros fugientes oculi ? Sanctus anior impatientiam non habet . Quod de libidine diximus , referamus ad auaritiam , & ad omnia uitia ; quæ uitantur solitudine . Et iccirco urbium frequentias declinamus , ne facere compellamur , quæ nos non tam natura cogit facere , quam uoluntas . Hæc , ut dixi , sanctorum presbyterorum rogatu , unius noctis lubricatione dictauit , festinante admodum fratre Sisinnio , & propter sanctorum refrigeria ad Aegyptum ire properante . alioquin & ipsa materia apertam habuit blasphemiam , quæ indi-

indignationem magis sribentis, quam testimoniorum multitudinem flagitaret. Quod si Dormitanti in mea rursus maledicta uigilauerit; & eodem ore blasphemio, quo apostolos & martyres lacerat, de me quoque putauerit detrahendum: nequaquam illi breui lucubrationuncula, sed tota nocte uigilabo, & sociis illius, immo discipulis, uel magistris; qui nisi tumentes uteros uiderint feminarum, maritos earum Christi ministerio arbitrantur indignos.

ARGVMENTVM.

MONTANVS, natione Phryx, a quo Cataphrygarum heresis prodiit, aiebat, per Moysen & prophetas in ueteri lege, & per Christum in noua, Deum mundum saluare non potuisse, proptereaue, ut id tandem obtineret, Spiritum sanctum a Christo promissum misisse, qui in se, Priscamque, & Maximillam feminas descenderit. in Trinitate praterea unam tantum ponebat personam: secundas nuptias immundas et tanquam adulteria reputabat: tres in anno ex prescripto quadragessimas obseruari precipiebat: Episcopos non primo, hoc est Apostolorum, sed tertio ponebat loco: Peccatorum confessionem nec faciebat, nec lapsos propterea homines ad penitentiam recipiebat. Hos errores ideo nunc omnes Marcella explicat, quia ad feminam eruditissimam, rogatus tantum quid de illis sentiret, scribit: & tam clara est eorum perfidia, ut, illos exposuisse, si perasse etiam sit. explicat tamen epistole initio redargutionem hereseos, quando in credentes descenderit Spiritus sanctus.

HIERONYMVS AD MARCELLAM,

aduersus Montanum.

EPISTOLA LIIII.

ESTIMONIA de Ioannis euangelio congregata, quæ tibi quidam Montani sectator ingessit, in quibus saluator noster se ad patrem iturum, missumq. paracletum pollicetur, in quod promissa sint tempus, & quo completa sint tempore, apostolorum acta testantur.

- Act. 1. 2* stantur. Decima die dixit post ascensum Domini, hoc est quinquagesima post resurrectionem, spiritum sanctum descendisse, linguasque credentium esse diuisas, ita ut unusquisque omnium gentium sermone loqueretur: quando quidam adhuc parum credentium, musto eos ebrios afferebant: & Petrus, stans in medio apostolorum, omnisque conuentus, ait: Viri Iudæi, & omnes, qui habitatis in Hierusalem, hoc uobis notum sit, & auribus percipite uerba mea. Non enim, sicut uos existimatis, hi ebrii sunt: nam est hora diei tertia: sed hoc est, quod dictum est per *Ioel 2* prophetam: In nouissimis diebus, dicit Dominus, effundam de spiritu meo in omnem carnem: & prophetabunt filii, & filie eorum: & iuuenes uisiones uidebunt, & seniores somnia somniabunt: & quidem in seruos meos & ancillas meas effundam de spiritu meo. Si igitur apostolus *Matth. 16* Petrus, super quem Dominus fundauit Ecclesiam, & prophetiam, & promissionem Domini, illo tempore completam memorauit; quo modo possumus nobis aliud tempus *Act. 21. 11* uindicare? Quod si uoluerint respondere, & Philippi deinceps quattuor filias prophetasse, & prophetam Agabum *Cor. 12. 11* reperiri, & in diuisionibus spiritus inter apostolos, & doctores, prophetas quoque apostolo scribente formatos, ipsi sumque Paulum apostolum multa de futuris hæresibus, & de fine sæculi prophetasse: sciant, a nobis non tam prophetiam repelli, quæ Domini est signata passione, quam eos non recipi, qui cum scripturæ ueteris & nouæ auctoritate non congruant. Primum in fidei regula discrepamus. Nos patrem & filium & spiritum sanctum in sua unumquemque persona ponimus, licet substantia copulemus: illi, Sabellii dogma sectantes, trinitatem in unius personæ angustias cogunt. Nos secundas nuptias non tam appetimus, quam *1. Tim. 5* cedimus, Paulo iubente, ut uiduæ adolescentulæ nubant: illi intantum putant scelerata coniugia iterata, ut, quicumque hoc fecerit, adulter habeatur. Nos unam quadragesimam secundum traditionem apostolorum, toto anno, tempore nobis congruo, ieiunamus: illi tres in anno faciunt qua

quadragessimas, quasi tres passi sint saluatores: non quo & per totum annum, excepta Pentecoste, ieiunare non liceat: sed quod aliud sit necessitate, aliud uoluntate munus offerre. Apud nos apostolorum locum episcopi tenent: apud eos episcopus tertius est. habent enim primos de Pepusa Phrygiæ patriarchas: secundos, quos appellant Cenones: atque ita in tertium, idest pene ultimum locum episcopi de uoluuntur: quasi exinde ambitiosior religio fiat, si, quod apud nos primum est, apud illos nouissimum sit. Illi ad omne pene delictum ecclesiæ obserant fores: nos quotidie legimus, Malo pænitentiam peccatoris, quam mortem. *Exech. 18* Et numquid qui cadet, non resurget, dicit Dominus? Et *Psal. 40* conuertimini ad me filii conuertentes, & ego curabo contritiones uestras. *Hier. 3* Rigidi autem sunt, non quo & ipsi peiora non peccent: sed hoc inter nos, & illos interest, quod illi erubescunt confiteri peccata, quasi iusti; nos, dum pænitentiam agimus, facilius ueniam promeremur. Prætermitto scelerata mysteria, quæ dicuntur de lactente puero, & de uicturo martyre confarrata. Malo, inquam, non credere: sit falsum omne, quod sanguinis est. Aperta est conuincenda blasphemiam dicentium, Deum, primum uoluisse in ueteri testamēto per Moysen, & prophetas saluare mundū; sed, quia non potuerit explere, corpus sumpsisse de uirgine, & in Christo sub specie filii prædicantem, mortē obisse pro nobis: & quia per duos gradus mundum saluare nequiverit, ad extremū per spiritum sanctum in Montanum, Priscam, & Maximillam, insanas feminas, descendisse: & plenitudinem, quam Paulus non habuerit, dicens; *1. Cor. 13* Ex parte cognoscimus, & ex parte prophetamus; & Nūc uidemus per speculum in ænigmate; abscissum & semiuirum habuisse Montanum. Hæc sunt, quæ coargutione non indigent. perfidiam eorum exposuisse, superasse est. nec necesse est, ut singula deliramenta, quæ proferunt, breuior epistolæ sermo subuertat; cum & tu, ipsas scripturas apprærens, non tam ad eorum mota sis quæstiones, quam, quid sentirem, a me uolueris sciscitari.

RIPARIVM presbyterum, cuius hortatu aduersus Vigilantium scripserat, quo modo Origenis dogmata reiecta, illorumq. disseminator Rufinus ueluti alter Catilina expulsus sit, & quid ei illa contigerit in re, docet.

HIERONYMVS RIPARIO.

EPISTOLA LV.

CHRISTI te aduersum hostes catholicæ fidei bella bellare, & tuis litteris, & multorum relatione cognoui; uentosq. esse contrarios, & in perditionem mutuam fautores esse perditionis, qui defensores sæculi esse deberent: tamen scias in hanc prouinciam nullis humanis auxiliis, sed proprie Christi sententia pulsum esse, non solum de urbe, sed de Palæstinæ quoque finibus Catilinam; nosq. dolere plurimum, quod cum Lentulo multi coniurationis socii remanserunt, qui Ioppe remorantur. Nobis autem melius uisum est, locum mutare, quam fidei ueritatem; ædificiorumq. & mansionis amœnitatem amittere; quam eorum communione maculari, quibus in præsentiarum aut cedendum erat, aut certe quotidie non lingua, sed gladiis dimicandum. Quanta autem passi simus, & quo modo excelsa manus Christi pro nobis in hostem sæuierit, puto te celebri nuncio omnium cognouisse. Quæso ergo te, ut arreptum opus impleas; nec patiaris, te præsentem, non habere Christi Ecclesiam defensorem. Certe scit unusquisque, quod uel tibi sufficiat pro uirili parte: quia non uiribus corporis, sed caritate animi dimicandum, quæ superari numquam potest. Sancti fratres, qui cum nostra sunt paruitate, plurimum te salutant. Puto autem & sanctum fratrem Alentium diaconum tuæ dignationi cuncta narrare fideliter. Incolumem te, & memorem mei, Christus, dominus noster tueatur omnipotens, domine uere sancte & suscipiende frater.

ARGV-

ARGVMENTVM.

APRONIVM, quod in fide contra Origenistas manserit, laudat, & ut sancta Hierosolyma loca petat, hortatur.

HIERONYMVS APRONIO.

EPISTOLA LVI.

ESCIO, qua tentatione diaboli factum sit, ut &
 N tuus labor, & sancti Innocentii presbyteri indu-
 stria, & nostrum desiderium ad præsens nequaquā
 uideatur habere effectum. Deo gratia, quod te sospitem,
 & fidei calore feruentem, inter ipsa tentamenta diaboli co-
 gnoui. Hoc meum gaudium est, quando in Christo audio
 filios meos dimicare: & istum zelum in nos ipse confirmet,
 cui credimus; ut pro fide eius sanguinem uoluntarie funda-
 mus. Euersam nobilem domum funditus doleo: & tamē,
 quid in causa sit, scire non potui. neque enim portitor lit-
 terarum nosse se dixit. unde dolere possumus pro amicis
 communibus, & Christi, qui solus potens & dominus est,
 & eius clementiam deprecari: licet ex parte Dei mereamur
 offensam, qui inimicos Domini fouerimus. Optimum au-
 tem facies, si, cunctis rebus omissis, Orientem, & præci-
 pue sancta loca petas. hic enim quieti sunt omnia. & licet
 uenena pectoris non amiserint, tamen os impietatis non
 audent aperire, sed sunt sicut aspides, surdæ, & obturantes *Psal. 37*
 aures suas. sanctos fratres saluta. Nostra autem domus,
 secundum carnales opes, hæreticorum persecutionibus pe-
 nitus euersa, Christo propitio spiritalibus diuitiis plena est.
 melius est enim, panem manducare, quam fidem perdere.

QVAMQVAM Ariana hæresis profligata iam esset, reli-
quia tamen eius adhuc in aliquot Orientis ecclesiis uigebant;
eamq. Antiochenus Episcopus una cum Campensibus fouens,
apud Hieronymum, ut tres confiteretur hypostases, acriter insta-
bat. nunc uir sanctus pro ea re Romanam Ecclesiam, ueluti ce-
terarum matrem, & ad quam maiores fidei quæstiones referun-
tur, consulens, quid credere debeat, postulat, & quo modo ue-
nenum in eo maneat uerbo, docet.

HIERONYMVS DAMASO.

EPISTOLA LVII.

Ioan. 19 VONIAM uetusto Oriens inter se populorum furo-
Cant. 2 Q re collisus, indiscissam Domini tunicam, & desu-
Hier. 2 per textam, minutatim per frustra discerpit; & Chri
Cant. 4 sti uineam exterminant uulpes; ut inter lacus contritos, qui
aquam non habent, difficile, ubi fons signatus, & hortus il-
le conclusus sit, possit intelligi: ideo mihi cathedram Petri,
Rom. 1 & fidem apostolico ore laudatam, censui consulendam, in-
de nunc meæ animæ postulans cibum, unde olim Christi ue-
stimenta suscepi. Neque uero tanta uastitas elementi liquē-
tis, & interiacens longitudo terrarum, me a pretiosa mar-
Luc. 17 garitæ potuit inquisitione prohibere. Vbicumque fuerit
corpus, illuc congregabuntur & aquilæ. Profligato a sobo-
le mala patrimonio, apud uos solos incorrupta patrum ser-
uatur hereditas. Ibi cespitem terra secundo, Dominici semi-
nis puritatem centeno fructu refert: hic obruta sulcis fru-
Esa. 14 menta in lolium auenasq. degenerant. Nunc in Occidente
Matth. 5 sol iustitix oritur: in Oriente autem Lucifer ille, qui cecide-
rat, supra sidera posuit thronum suum. Vos estis lux mundi,
uos sal terræ, uos aurea uasa & argentea: hic testacea uasa,
uel lignea, uirgam ferream, & æternum operiuntur incen-
dium. Quamquam igitur tui me terreat magnitudo, inui-
tat tamen humanitas. A sacerdote uictimam salutis, a pa-
store

store præsidium ouis flagito . Faceſſat inuidia : Romani cul-
 minis recedat ambitio : cum ſucceſſore piſcatoris , & diſci-
 pulo crucis loquor . Ego uullum primum , niſi Chriſtum ſe-
 quens , beatitudini tuæ , ideſt cathedræ Petri , communione
 conſocior : ſuper illam petram ædificatam Eccleſiam ſcio .
 Quicumque extra hanc domum agnum comederit , profa- *Matth. 16*
 nus eſt . Si quis in arca Noe non fuerit , peribit regnante di- *Exod. 12*
 luvio . Et quia pro meis facinoribus ad eam ſolitudinem cō-
 migravi , que Syriam iuncto Barbariæ fine diſterminat ; nec
 poſſum ſanctum Domini , tot interiacentibus ſpatiis , a ſan-
 ctimonia tua ſemper expetere : ideo hic collegas tuos Aegy-
 ptios conſeſſores ſequor , & ſub onerariis nauibus parua na-
 uicula deliteſco . Non noui Vitalem , Meletium reſpuo , igno-
 ro Paulinum . Quicumque tecum nō colligit , ſpargit : hoc-
 eſt , qui Chriſti non eſt , antiſtiti eſt . Nunc igitur , pro do-
 lor , poſt Nicenam fidem , poſt Alexandrinum iuncto pari-
 ter Occidente decretum , trium hypophaſeon ab Arianorum
 præſule & Campenſibus , nouellum a me , homine Roma-
 no , nomen exigitur . Qui , quæſo , iſta apoſtoli prodidere ?
 quis nouus magiſter gentium Paulus hæc docuit ? Interro-
 gamus , quid tres hypophaſes poſſe arbitretur intelligi . Tres
 perſonas ſubſiſtentes , aiunt . Reſpondemus nos ita crede-
 re . Non ſufficit ſenſus , ipſum nomen efflagitant : quia ne-
 ſcio . quid ueneni in ſyllabis latet . Clamamus , ſi quis tres
 hypophaſes , aut tria enypophaſata , hoc eſt , tres ſubſiſtentes
 perſonas non confitetur , anathema ſit . Et quia uocabula
 non ediciſimus , hæretici iudicamur . Si quis autem hypophaſin
 uſiam intelligens , non in tribus perſonis unam hypophaſin
 dicit , alienus a Chriſto eſt : & ſub hac confeſſione uobiſ-
 cum pariter cauterio unionis inurimur . Diſcernite , ſi pla-
 cet , obſecro : non timebo tres hypophaſes dicere : ſi iubetis ,
 condatur noua poſt Nicenam fides : & ſimilibus uerbis ; cū
 Arianis confeſteamur orthodoxi . Tota ſæcularium litterarū
 ſchola nihil aliud hypophaſin , niſi uſiam , nouit . Et quis , ro-
 go , ore ſacrilego tres ſubſtantias prædicabit ? Vna eſt Dei &
 ſola natura , quæ uere eſt . id enim , quod ſubſiſtit , non ha-

bet aliunde, sed suum est. Cetera, quæ creata sunt, etiam si uidentur esse, non sunt: quia aliquando non fuerunt; & potest rursum non esse, quod non fuit. Deus solus, qui æternus est, hoc est, qui exordium non habet, essentiae nomen uere tenet. Idcirco & ad Moysen de rubo loquitur: Ego sum, qui sum. Et rursum: Qui est, me misit. Erant utique tunc angeli, cælum, terra, maria. & quo modo commune nomen essentiae proprie sibi uindicat Deus? sed quia illa sola natura est perfecta, & in tribus personis deitas una subsistit, quæ est uere, & una natura est: quisquis tria esse, hoc est tres esse hypostasies, id est, uias dicit; sub nomine pietatis, tres naturas conatur asserere. & si ita est; cur ab Arianis parietibus separamur, perfidia copulati? Iungatur cum beatitudine tua Ursicinus, cum Ambrosio societur Auxentius. Absit hoc a Romana fide: sacrilegium tantum religiosa populorum corda non hauriant. Sufficiat nobis dicere, unam substantiam, tres personas subsistentes, perfectas, æquales, coæternas. Taceantur tres hypostasies: si placet, & una teneatur. Non bonæ suspicionis est, cum in eodem sensu uerba dissentiant. Sufficiat nobis memorata credulitas. Aut, si rectum putatis tres hypostasies cum suis interpretationibus debere nos dicere, non negamus: sed, mihi credite, uenenum sub melle latet; transfigurauit se angelus satanæ in angelum lucis. Bene interpretantur hypostasim; & cum id, quod ipsi exponunt, habere me dicam, hæreticus iudicor. Quid tam anxie unum uerbum tenent? quid sub ambiguo sermone latitant? Si sic credunt, ut interpretantur; non damno, quod retinent. Si sic credo, ut ipsi sentire se simulant; permittant & mihi, meis uerbis suum sensum loqui. Quamobrem obtestor beatitudinem tuam per crucifixum, mundi salutem, per homouisionem trinitatem, ut mihi epistolis tuis siue tacendarum, siue dicendarum hypostasim detur auctoritas. Et ne forte obscuritas loci, in quo dego, te fallat; per baiulos litterarum ad Euagrium presbyterum, quæ optime nosti, dignare scripta transmittere; simul etiam, cui apud Antiochiam debeam communicare, significes: quia

Cam-

Campanes cum Tarfenſibus hæreticis copulati, nihil aliud ambiunt, quam ut auctoritate communionis ueſtræ fultæ tres hypoftaſes cum antiquo ſenſu prædicent.

ARGVMENTVM.

ITERVM pro reſponſione eiſdem quaſtionis, quod uehementer ab Arianis uexaretur, apud Damasum inſtat.

HIERONYMVS DAMASO.

EPISTOLA LVIII.

IMPORTVNA in euangelio mulier, tandem meruit audiri: & clauſo cum ſeruis oſtio, media licet nocte ab amico panes amicus accepit. Deus ipſe, qui nullis contra ſe uiribus ſuperari poteſt, publicani precibus uincitur. Niniue ciuitas, quæ peccato petit, fletibus ſtetit. Quorſum iſta tam longo repetita principio? uidelicet, ut paruū magnus aspicias; ut diues paſtor morbidam non contemnas ouem. Chriſtus in paradifum de cruce latronem intulit: & ne quis aliquando ſeram conuerſionem putaret, fecit homicidii poenam martyrimum. Chriſtus, inquam, prodigum filium reuertentem lætus amplectitur; & nonagintanouem pecudibus dereliſtis, una ouicula, quæ remanſerat, humeris boni paſtoris aduehitur. Paulus ex perſecutore fit prædicator, oculis carnalibus excæcatur, ut mente plus uideat: & qui uinctos Chriſti famulos ducebat ad concilium Iudæorum, ipſe poſtea etiam de Chriſti uinculis gloriatur. Ego igitur, ut ante iam ſcripſi, Chriſti ueſtem in Romana urbe ſuſcipiens, nunc barbaro Syriæ limite teneor. Et ne putes alterius hanc de me fuiſſe ſententiam; quid mererer, ipſe conſtitui. Verum, ut ait gentilis poeta, Cælum, non animum, mutat, qui trans mare currit. Ita me inceſſabilis inimicus poſt tergum ſecutus eſt, ut maiora in ſolitudine bella nunc patiar. hic enim præſidijs fulta mundi Ariana rabies fremmit. hinc in tres partes ſciſſa Eccleſia ad ſe rapere me feſtinat.

Luc. 18. 17

Luc. 18

Ion. 3

Luc. 23

Luc. 15

Act. 9

2. Cor. 11

nat. monachorum circa manentium antiqua in me surgit auctoritas. Ego interim clamito: si quis cathedræ Petri iungitur, meus est. Meletius, Vitalis, atque Paulinus tibi hæc se dicunt. possem credere, si hoc unus assereret: nunc aut duo mentiuntur, aut omnes. Iccirco obtestor beatitudinem tuam per Crucem Domini, per necessarium fidei nostræ decus, per passionem Christi, ut, qui apostolos honore sequeris, sequaris & merito. ita in solio cum duodecim iudicaturus sedeas; ita te alius senem cum Petro cingat; ita municipatum cæli cum Paulo consequaris; ut mihi litteris tuis, apud quem in Syria debeam communicare, significes. noli despiciere animam, pro qua Christus mortuus est.

ARGUMENTVM.

ADVERSVS Luciferianos per dialogum disputans asserit, Episcopos, qui cum Ario senserant, recipi, Episcopatu nequaquam adempto, debere; & quod ab Arianis baptizati, rebaptizandi minime sint: inter disputandum autem quo modo pro facienda pace, Vñ nomen in Ariminensi synodo reiectum sit, quando in ceteris se consentire cum catholicis Ariani finxerunt, & quo modo rursus totus orbis, dolens se inscium Arianum factum, commotus sit, late copioseq. enarrat. Lucifer autem, a quo Luciferiani sunt dicti, cum Beatus in hoc dialogo a Hieronymo nuncupatus, multis interea præconiis extollatur; cumq. post Ariminensem synodum exulasse pro catholica fide, verbisq. tantum, non rebus, a catholici dissensisse prodatur, diversus omnino a Lucifero Smyrnenſi Episcopo Ariano fuit. Eundem autem esse certum est cum eo, quem Liberius Papa ad Constantium imperatorem misit, & quem ille in exilium una cum Eusebio Vercellenſi, ut in Trip. historia legitur, amandavit; pro eo quod Nicenam fidem damnare noluerit. Nam Hilarius quoque honorifice de Lucifero in libro ad Constantium Augustum meminit. Fuit autem de Sardinia Caralitanus Episcopus, ut ex Marcellino, & Faustino historicis, eius sectatoribus, in libro de schismate Vrsinini,

cini, qui nondum editus in bibliotheca Vaticana extat, late constat. Obiisse autem hæreticum Luciferum seu animi obstinatione, seu quod morte præuentus sententiam mutare nequiverit, testis est in decimo ecclesiasticæ historiæ libro Eusebius. Error autem eius præcipuus fuit, quod se a communione eorum, qui Episcopos, Arimini lapsos, etiam sub satisfactione receperant, Antiochiæ, ubi erat in exilio, ut auctor est Sulpicius, separauit.

HIER. ORTHODOX. ET LVCIFER.
DIALOGVS.

ROXIME accidit, ut quidam Luciferi sectator, cum
P alio Ecclesiæ alumno odiosa loquacitate contem-
dens, caninam facundiam exercuerit: assererebat
quippe, uniuersum mundum esse diaboli; &, ut iam fami-
liare est eis dicere, factum de Ecclesia lupanar. At ille econ-
trario rationabiliter quidem, sed importuno & loco, & tem-
pore defendebat, non sine causa Christum mortuum fuisse,
nec ob sardorum tantum mastrucam Dei filium descen-
disse. Quid plura? dum audiētiā & circulum lumina iam
in plateis accensa soluerent, & inconditam disputationem
nox interrūperet, consputa pene inuicem facie recesserunt;
hoc tamen iis, qui affuerant, statuentibus, ut in secretam
porticum primo mane conueniretur: quo cum iuxta placi-
tum omnes conuenissent, uisum est utriusque sermonem a
notariis excipi: atque ita cunctis residentibus, Helladius
Luciferianus dixit. Hoc primum mihi responderi uolo,
utrum Ariani Christiani sint, an non? ORTHODOXVS d.
Ego plus, inquit, interrogo, utrū ne omnes hæretici Chri-
stiani sint? LVCIFERIANVS d. Quem hæreticum dixeris,
Christianum negasti. ORTH. dixit. Omnes ergo hæretici
Christiani non sunt? LVCIF. d. Iam superius audisti. OR-
THOD. d. Si Christi non sunt, diaboli sunt. LVC. d. Ne-
mo dubitat. ORTH. d. Si autem diaboli sunt, nihil refert
hæretici sint, an gentiles. LVC. d. Non refello. ORTH. d.
Igitur præfixum inter nos habemus, de hæretico sic loquē-
dum,

dum, sicut de gentili. *LVC.* d. Plane fixum. *ORTH.* d. Quæ
re nunc ut libet: quoniam inter nos constat, hæreticos gen-
tiles esse. *LVC.* d. Quod interrogatio mea cogere uolebat,
expressum est, hæreticos Christianos non esse: nunc restat
conclusio. Si Ariani hæretici sunt, & hæretici omnes gen-
tiles sunt: & Ariani gentiles sunt. si autem Ariani gentiles
sunt, & constat nullam societatem Ecclesiæ esse cum Aria-
nis, idest cum gentilibus: manifestum est, uestram Ecclesiã,
quæ ab Arianis, idest, a gentilibus, episcopos suscipit, non
tam episcopos recipere, quam de Capitolio sacerdotes; ac
per hoc antichristi magis synagoga, quam Christi Ecclesia,
debeat nuncupari. *ORTH.* d. Ecce impleta est prophetia: Pa-

Psal. 7 rauit mihi foueam, & ipse incidit in eam. *LVC.* d. Quoniam
modo? *ORTH.* d. Si Ariani, ut dicis, gentiles sunt, & Aria-
norum conuenticula castra sunt diaboli: quo modo in ca-
stris diaboli baptizatum recipis? *LVC.* d. Recipio, sed pæni-
tentem. *ORTH.* d. Prorsus, quid dicas, non intelligis. Quis-
quam ne gentilem recipit pænitentem? *LVC.* d. Ego sim-
pliciter in exordio sermonis omnes hæreticos gentiles esse
 respondi. uerũ quia captiosa interrogatio fuit primæ quæ-
stionis; tibi palmam tradens, ad secundam ueniam: in qua
aio laicum ab Arianis uenientem recipi debere pænitentẽ,
clericum uero nõ debere. *ORTH.* d. Atqui in prima quæstio-
ne, quam obtinuisse me dicis, etiam secundam obtinui.
LVC. d. Doce, quo modo obtinueris. *ORTH.* d. Nescis
& laicos, & clericos unum habere Christum, nec alium neo-
phytis, alium episcopis esse Deum? cur ergo non recipiat
clericos, qui recipit laicos pænitentes? *LVC.* d. Non est epi-
scopi, ipsum lacrymas fundere pro peccatis, & corpus at-
trectare Domini. Non est episcopi, ad fratrum genua pro-
uolui, & de sublimi loco eucharistiam ministrare populo.
Aliud est lugere, quod fueris: aliud, neglecto peccato, in
Ecclesia uiuere gloriosum. Tu, qui hesternò die sacrilegus
creaturam Dei filium prædicabas; qui, quotidie peior Iu-
dæis, blasphemiarum lapides in Christum iaciebas; cuius
manus sanguinæ plenæ sunt, cuius stylus lancea nuditis fuit;
ad

ad unius horæ conuersionem uirginem Ecclesiam adulter ingredieris? Si peccasse te pœnitet, officium depone sacerdotis: si te non peccasse confidis, permane quod fuisti.

ORTHOD. d. Rhetoricaris, & a disputationum spinetis ad campos liberæ declamationis excurris. Verum desine, quæ so, a communibus locis, & in gradum rursum ac lineas regredere: postea, si placuerit, latius disseremus. LVCIF. dixi. Nulla declamatio hic est. dolor patientiam superat.

proponere ut libet: argumentare ut libet: numquam persuasus debis id esse episcopum, quod laicum pœnitentem. ORTHOD. dixit. Quoniam obstinate tenes, aliam esse rationem episcopi, aliam laici; ad compendium tibi concertationis tribuo, quod postulas: nec me pigebit, locum te faciente, manum tecum conferere. Expone mihi, quare laicum uenientem ab Arianis recipias, episcopum non recipias. LVC. d. Recipio laicum, qui errasse se confitetur;

& Dominus mauult pœnitentiam peccatoris, quam mortem. ORT. d. Recipe ergo & episcopum; qui & errasse se

confitetur, & Dominus mauult pœnitentiam peccatoris, quam mortem. LVC. d. Si errasse se confitetur; cur episcopus perseverat? deponat sacerdotium; concedo ueniam pœnitenti. ORT. d. Respondebo tibi & ego sermonibus tuis.

Si laicus errasse se confitetur; quo modo laicus perseverat? Deponat sacerdotium laici, idest, baptisma, & ego do ueniam pœnitenti. Scriptum est enim: Regnum quippe nos

& sacerdotes Deo & patri suo fecit. Et iterum: Gentem

sanctam, regale sacerdotiū, populum acquisitum. Omne, quod non licet Christiano, commune est tam episcopo, quam laico. Qui pœnitentiam agit, priora condemnat. Si

non licet episcopo pœnitenti perseverare, quod fuerat; non licet & laico pœnitenti permanere in eo, propter quod pœnitentiam confitetur. LVC. d. Recipimus laicos, quoniam nemo conuertetur, si se scierit rebaptizandum: & ita fiet, ut nos simus causa perditionis eorū, si repudientur. ORT. d. Tu in eo, quod recipis laicum, unam animam recipiendo saluas: & ego in recipiendo episcopum, non dicam unius

ciui-

Ezech. 18

Apoc. 1.

1. Pet. 2

ciuitatis populos, sed uniuersam, cui præest, prouinciam
 Ecclesiæ socio: quem si repellam, multos secum in ruinam
 trahet. Quamobrem quæso uos, ut eam rationem, quam
 in paucis recipiendis habere uos existimatis, etiam ad to-
 tius orbis salutem concedatis. quod si displicet, & tam du-
 ri estis, immo tam irrationabiliter inclementes, ut eum,
 qui dederit baptismum, hostem Christi, eum; qui acceperit,
 filium putetis: nos nobis aduersa non facimus: aut episco-
 pum cum populo recipimus, quem facit Christianum;
 aut, si episcopum non recipimus, scimus etiam nobis po-
 pulum reiiciendum. *LVC. d.* Oro te, nonne legisti de epi-
 scopis dictum: Vos estis sal terræ? Si autem sal infatuatum
 fuerit, in quo salietur? ad nihilum est utile; nisi ut proiicia-
 tur foras, & conculcetur ab hominibus. sed & illud, quod
 pro populo peccatore sacerdos Deum exoret, ac pro sacer-
 dote, nullus sit alius, qui deprecetur. Quæ quidem duo
 scripturarum capitula in sententiam concurrunt unam. nã
 ut sal omnem cibum condit; nec est aliquid per se tam sua-
 ue, quod absque eo gustum demulceat: ita mundi totius,
 & proprie Ecclesiæ condimentum episcopus est: qui si infa-
 tuatus fuerit, siue per negationem, siue per hæresim, siue
 per libidinem, & ut simul dicam, per uniuersa peccata;
 a quo alio poterit condiri, cum ipse fuerit omnium condi-
 mentum? Sacerdos quippe pro laico offert oblationem
 suam, imponit manum subiecto, redditum sancti spiritus
 inuocat; atque ita eum, qui traditus fuerat satanæ in inte-
 ritum carnis, ut spiritus saluus fieret, indicta in populum
 oratione, altario reconciliat; nec prius unum membrum
 restituit sanitati, quam omnia simul membra conflauerint.
 Facile quippe ignoscit filio pater, cum mater pro uisceri-
 bus suis deprecatur. Si ergo hoc, quem diximus, gradu
 laicus penitens restituitur Ecclesiæ; ibiq. sequitur uenia,
 ubi luctus præcesserat: manifestum est, sacerdotem, de gra-
 du suo motum, in eundem locum non posse restitui: quia
 aut penitens sacerdotio carebit; aut in honore persistens,
 reduci in Ecclesiam non poterit per ordinem penitentis.

Tu

Tu mihi nunc infatuato sale Ecclesiæ saporem contaminas :
tu eum , qui proiectus foras , iacere deberet in stercore a cū
ctis hominibus conculcandus , super altarium reponis ? Et
ubi erit illud Apostoli præceptum : Oportet episcopū esse
sine crimine , quasi dispensatorem Dei . Et iterum : Probet
autem se unusquisque , & sic accedat . Vbi Dominica denun
ciatio est : Ne miseritis margaritas uestras ante porcos .
Quod si de omnibus generaliter dictum intelligis : quanto
magis de sacerdotibus præcauendum est , cum etiam de lai
cis sic cauetur ? Separamini , inquit Dominus , per Moysen ,
a tabernaculis istorum , hominum durissimorum ; & noli
te tangi ab omnibus , quæ sunt eorum ; ne simul pereatis in
peccato eorum . Et rursum in duodecim prophetis : Sacrifi
cia eorum tamquam panis luctus : omnes , qui manducant
ea , contaminabuntur . Et in euangelio Dominus , Lucerna ,
inquit , corporis est oculus , idest , Ecclesiæ lumen est epi
scopus . Si autem oculus tuus simplex est , totum corpus
tuum lucidum erit . Sacerdote enim fidem ueram prædican
te , ex omnium corde tenebræ discutiuntur . Et causam
reddit : Neque enim lucernā accenditur & ponitur subter
modium , sed super candelabrum , ut luceat omnibus ,
qui in domo sunt : hoc est , ideo Deus scientiæ suæ ignicu
lum in episcopo succendit , ut non sibi tantum luceat , sed
omnibus proficit . Et in consequenti , si , inquit , oculus tuus
nequam fuerit , omne corpus tenebrosum est . si autem lu
men , quod in te est , tenebræ sunt : ipsæ tenebræ quantæ
erunt ? Et recte . nam cum ideo episcopus in ecclesia con
stituatur , ut populum coerceat ab errore ; quantus erit er
ror in populo , cum errat ipse , qui doceat ? quo modo po
test peccata dimittere , qui ipse peccator est ? quo modo
sanctum sacrilegus faciet ? unde ad me lumen introiet , cum
oculus meus cæcus sit ? Pro dolor , antichristi discipulus Ec
clesiam Christi gubernat . et ubi est illud : Non potestis duo
bus Dominis seruire ? sed & illud : Quæ communicatio lu
ei ad tenebras ? qui consensus Christo ad Belial ? Legimus
in ueteri testamento : Homo , in quo fuerit macula , & ui
tium ,

*Matth. 5**Tit. 1**1. Cor. 11**Matth. 7**Num. 16**Osee 9**Matth. 6**Luc. 11**Matth. 6**2. Cor. 6**Lewit. 21*

tium, non accedat offerre dona Domino. Et rursum: Sacerdotes, qui accedunt ad dominum Deum, ut sacrificent, mundi sint; ne forte derelinquat eos Dominus. Et in eodē: Et, cum accedunt ministrare sancta, non adducant in se delictum, ne moriantur. Et multa alia, quæ persequi infinitum est, studio breuitatis omitto. neque enim numerus testimoniorum, sed auctoritas ualet. Ex quibus ostenditur, uos per modicum fermentum totam Ecclesiæ massam corrupisse, & de eius manu hodie eucharistiam accipere, quem heri quasi idololatram respuebatis. o r r. d. Multa quidem de sacris uoluminibus niemoriter, copioseque dixisti: sed, cum totum circumieris saltum, meis cassibus concluderis. Sit quippe, ut uis, Arianorum episcopus hostis Christi, sit infatuatum sal, sit lucerna sine igniculo, sit oculus sine pupilla: nempe eo peruenies, ut salire non possit, qui sal ipse non habeat, non illuminet cæcus, non accendat extinctus. Tu autem, cum conditum ab eo cibum deuores, cur insulsum arguis conditorem? De igniculo eius Ecclesia tua lucet, & lucernam eius criminariis extinctam? Oculos tibi præbet, & cæcus est? Quamobrem oro te, ut aut sacrificandi ei licentiam tribuas, cuius baptisma probas; aut reprobas eius baptisma, quem non existimas sacerdotem. neque enim fieri potest, ut, qui in baptismo sanctus est, sit apud altare peccator. l v c. d. Sed ego recipio laicum pœnitentem per manus impositionem, & inuocationem Spiritus sancti; sciens ab hæreticis Spiritum sanctum non posse conferri. o r r. d. Omnes propositionum uestrarum calles ad unum compitum confluunt; & pauidorum more ceruorum, dum uanos pennarum euitatis uolatus, fortissimis retibus implicamini. Nam, cum in Patre & Filio & Spiritu sancto baptizatus homo templum Domini fiat; cum, ueteri æde destructa, nouum trinitatis delubrum ædificetur: quo modo dicis, sine aduentu Spiritus sancti apud Arianos peccata posse dimitti? quo modo antiquis sordibus anima purgatur, quæ sanctum non habet spiritum? neque enim lauat animam, sed prius ipsa lauatur a spiritu, ut alios laua

re

re spiritualiter possit. Spiritus, inquit Moyses, Domini se
rebatur super aquas. Ex quo apparet, baptisma non esse si- *Gen. 1*
ne Spiritu sancto. Bethesda, lacus Iudæe, nisi per aduen- *Ioan. 5*
tum angeli, debilitata corporaliter membra sanare non po-
terat: & tu mihi aqua simplici, quasi de balneo, animam lo-
tam producis. Ipse dominus noster, Iesus Christus, qui
non tam mundatus est in lauacro, quam lauacro suo uniuersas *Matth. 3*
aqua mundauit, statim ut caput extulit de fluente, Spi-
ritum sanctum accepit: non quod umquam sine Spiritu san-
cto fuerit, quippe qui de Spiritu sancto in carne natus est:
sed ut illud nobis monstraretur, uerum esse baptisma, quo
Spiritus sanctus adueniat. Igitur, si Arianus Spiritum san-
ctum non potest dare: ne baptizare quidem potest; quia
Ecclesiæ baptisma sine Spiritu sancto nullum est. Tu uero
cum baptizatum ab eo recipias, & postea inuoces Spiritum
sanctum; aut baptizare eum debes, quia sine Spiritu san-
cto non potuit baptizari; aut, si est baptizatus in spiritu,
define ei inuocare spiritum, quem tunc, cum baptizaretur,
accepit. *1 v c. d.* Obsecro te, nonne legisti in Actibus apo- *Act. 19*
stolorum, eos, qui iam a Ioanne baptizati fuerant, cum
ad interrogationem Apostoli respondissent, se nec auditu
quidem comperisse, quid esset Spiritus sanctus, postea fuisse
Spiritum sanctum consecutos? unde manifestum est,
posse aliquem baptizari, & tamen non habere Spiritum
sanctum. *o k r. d.* Non tam imperitos diuinorum uolumi-
num eos, qui audiunt, puto, ut ad hanc quæstiunculam
dissoluendam longo sermone mihi opus sit. Verum, prius
quam quid in eam sententiam loquar, ausculta, iuxta sen-
sum tuum quanta scripturarum turbatio oriatur. Quid est
hoc, quod Ioannes in baptismo suo aliis Spiritum san-
ctum dare non potuit, qui Christo dedit? et quis est iste Io-
annes? uox clamantis in deserto, Parate uiam Domini: re-
ctas facite semitas Dei nostri. ille, qui dicebat: Ecce agnus *Esa. 40*
Dei, ecce qui tollit peccata mundi. Minus dico: ille, qui *Ioan. 1*
ex matris utero clamabat: Et unde hoc mihi, ut ueniat ma- *Luc. 1*
ter Domini mei ad me? Spiritum sanctum non dedit, quem Phi-

V u lippus

- Act. 8. 9** lippus diaconus eunucho dedit? quē Ananias Paulo dedit?
 Audacter forsitan uidear Ioannem præferre cunctis. Audi
Matth. 11 Dominum loquentem: Non est in natis mulierum maior
 Ioanne Baptista. Nulli enim contigit prophetarum & an-
Mal. 3 nunciare Christum, & digito demonstrare. Ecquid mihi
 necesse est in talis uiri laudibus immorari, cum a Deo pa-
Luc. 7 tre etiam angelus nuncupetur? Ecce, inquit, mitto ange-
 lum meum ante faciem tuam, qui præparabit uiam tuam.
 Plane angelum, qui post materni uentris hospitium eremi
 deserta sectatus, paruulus de serpentibus lusit; qui, oculis
Psal. 18 spectantibus Christum, nihil aliud est dignatus aspicere;
 qui eloquiis Domini, quæ melle & fauo dulciora sunt, di-
 gnâ Deo uocem erudiuit. Et, ne quæstionem morer, sic
Act. 10 decebat crescere præcursores Domini. Iste ergo talis, tan-
 tusque Spiritum sanctum non dedit, quem Cornelius centu-
 rio, ante quam baptizaretur, accepit? Responde, quæso,
 cur non dederit? ignoras? audi, quid scripturæ doceant:
 Ioannis baptisma non tam peccata dimisit, quam baptis-
 ma penitentiae fuit in peccatorum remissionem, idest, in fu-
 turam remissionem, quæ esset postea per sanctificationem
Mar. 1 Christi subsecutura. Scriptum est enim: Fuit Ioannes in de-
 serto baptizans, & prædicans euangelium penitentiae in re-
 missionem peccatorum. Et post modicum: Et baptiza-
 bantur ab eo in Iordane confitentes peccata sua. Vt enim
 ante præcursor Domini ipse, sic & baptisma eius præmium
Иоан. 3 Dominici baptismatis fuit. Qui de terra est, aiebat, terre-
Luc. 3 na loquitur: at, qui de supernis uenit, super omnes est. Et
 iterum: Ego baptizo uos in aqua, ille baptizabit uos in
 Spiritu sancto. Si autem Ioannes, ut confessus est ipse, nō
 baptizauit in spiritu: consequenter neque peccata dimisit;
 quia nulli hominum sine spiritu sancto peccata dimittun-
 tur. Aut, si contentiose argumentaris, ideo Ioannis bap-
 tisma dimisisse peccata, quia de cælis fuit: edoce, quid ampli-
Luc. 20 us in Christi baptismo consequamur, quod peccata dimit-
 tit, & liberat a gehenna. Quod a gehenna liberat, perfe-
 ctum est. perfectum autem baptisma non est, nisi quod in
 cruce

cruce & in resurrectione Christi est. Ita tu, peruerse religiosus, dicente ipso Ioanne, Illum oportet crescere, me autem minui: dum serui baptismo plus, quam habuit, tribuis, Dominicum destruis, cui nihil amplius relinquis. Quorsum ista tendit assertio? uidelicet, ut non tibi durum uideatur, si ii, qui a Ioanne fuerant baptizati, postea per impositionem manus apostolorum sint Spiritum sanctum consecuti; cum constet, eos ne peccatorum quidem sine subsequuta fide remissionem consecutos. Tu uero, qui ab Arianis recipis baptizatum, & ei tribuis, baptismum, quod perfectum est, quo pacto, quasi modicum quid ei defuerit, sanctum inuocas spiritum; cum baptismum Christi sine Spiritu sancto nullum sit? Verum longius excessi; &, cum æqua fronte aduersari potuerim impetum submouere, leuiora eminus tela direxi. Ioannis autem baptismum intantum imperfectum fuit, ut constet, postea Christi baptismo baptizatos, qui ab eo fuerant baptizati. ita enim historia refert: Factum est autem, cum Apollo esset Corinthi, & cum Paulus pertransiret superiores partes Asiæ, deuenit Ephesum; &, cum inuenisset quosdam discipulos, dixit ad eos: Si spiritum sanctum accepistis, cum credidistis? At illi responderunt: Sed nec, si Spiritus sanctus sit, audiuius. Dixit autem ad eos: In quo ergo baptizati estis? Responderunt, In Ioannis baptismo. Dixit autem Paulus: Ioannes quidem baptizauit baptismum penitentiae plebem, dicens, in aduenientem post eum ut crederent, hoc est in Iesum, in remissionem peccatorum. His auditis, baptizati sunt in nomine domini nostri, Iesu Christi. Et, cum imposuisset illis manus Paulus, continuo cecidit Spiritus sanctus super eos. Si ergo baptizati sunt uero, & legitimo Ecclesiæ baptismate, & ita postea Spiritum sanctum consecuti sunt: & tu apostolorum sequere auctoritatem, & baptiza eos, qui Christi non habent baptismum; & poteris inuocare spiritum sanctum. *Lvc. d.* Qui dormientes sitiunt, auidè fauces fluminibus ingurgitant; &, quanto plus hauserint, tanto plus sitiunt. ita mihi & tu uideris aduersus quæ

V u 2 flun-

Act. 8. 19

stiunculam, quam proposui, hinc atque illinc argumenta
 quæsisse, & nihilo minus in eadem quæstionum siti perseue-
 rare. An nescis, etiam ecclesiarum hunc esse morem, ut ba-
 ptizatis postea manus imponantur, & ita inuocetur spiri-
 tus sanctus? exigis ubi scriptum sit? in Actibus apostolo-
 rum. Etiam si scripturæ auctoritas non subesset, totius or-
 bis in hanc partem consensus instar præcepti obtineret. nā
 & multa alia, quæ per traditionem in ecclesiis obseruantur,
 auctoritatem sibi scriptæ legis usurpauerunt, uelut in lau-
 acro ter caput mergitare; deinde egressos, lactis & mellis præ-
 gustare concordiam, ad infantie significationem; die Do-
 minico, & per omnem pentecosten, nec de geniculis adora-
 re, & ieiunium soluere: multaq. alia, quæ scripta nō sunt,
 rationabilis sibi obseruatio iudicauit. ex quo animadu-
 eris, nos Ecclesiæ consuetudinem sequi; licet ante aduoca-
 tionem spiritus constet aliquem baptizatum. **ORR. d.** Non
 quidem abnuo hanc esse ecclesiarum consuetudinem, ut ad
 eos, qui longe in minoribus urbibus per presbyteros & dia-
 conos baptizati sunt, episcopus ad inuocationem sancti spi-
 ritus manum impositurus excurrat: sed quale est, ut leges
 Ecclesiæ ad hæresim trāseras; & uirginis integritatem per-
 meretricum lupanaria patiaris spurcari? Episcopus si im-
 ponit manū, iis imponit, qui in recta fide baptizati sunt,
 qui in patre & filio, & spiritu sancto tres personas, unā sub-
 stantiam crediderunt. Arianus uero, cum aliud nihil credi-
 derit, (claudite, quæso, aures, qui audituri estis, ne tantæ
 impietatis uocibus polluamini) nisi in patre solo, uero
 Deo, & in Iesu Christo saluatore creatura, & in spiritu san-
 cto, utriusque seruo; quo modo spiritum sanctum ab Eccle-
 sia recipiet, qui necdum remissionem peccatorum consecu-
 tus est? spiritus quippe sanctus nisi mundam fidem non in-
 colit; nec habitator eius templi efficitur, quod antistitem
 non habet ueram fidem. Quod si hoc loco quæris, quare
 in ecclesia baptizatus, nisi per manus episcopi, non acci-
 piat spiritum sanctum, quem nos asserimus in uero baptis-
 mate tribui: disce, hanc obseruationem ex ea auctoritate
 descen-

descendere, quod post ascensum Domino spiritus sanctus ad apostolos descendit, & multis in locis idem factitatum reperimus, ad honorem potius sacerdotii, quam ad legis necessitatem. Alioqui si ad episcopi tantum imprecationem spiritus sanctus defluit; lugendi sunt, qui in uiculis, aut in castellis, aut in remotioribus locis per presbyteros & diaconos baptizati ante dormierunt, quam ab episcopis inuiferentur. Ecclesiæ salus in summi sacerdotis dignitate pendet: cui si non exors quædam, & ab hominibus eminens detur potestas, tot in ecclesiis efficiuntur schismata, quot sacerdotes. inde uenit, ut sine chrismate, & episcopi iussione, neque presbyter, neque diaconus ius habeant baptizandi. quod frequenter, si tamen necessitas cogit, scimus etiam licere laicis. Vt enim accipit quis, ita & dare potest. nisi forte eunuchus a Philippo diacono baptizatus, sine spiritu sancto fuisse credendus est; de quo scriptura ita loquitur: Et descendunt ambo in aquam; & baptizauit eum Philippus: & cum ascenderent ab aqua, spiritus sanctus uenit in eunuchum. Si autem illud obiiciendum putas, quia, cum audissent apostoli, qui erant Hierosolymis, quia recepit Samaria uerbum Dei, miserunt ad eos Petrum, & Ioannem; qui cum uenissent ad eos, orauerunt pro eis, ut acciperent spiritum sanctum: nondum enim ceciderat super ullum illorum. Cur ita factum sit, in consequentibus discere. ipse enim ait: Sed solum baptizati erant in nomine domini Iesu. Tunc imponebant illis manus, & accipiebant spiritum sanctum. Hoc loco si & tu similiter te facere dicis, quia hæretici non baptizauerunt in spiritu sancto: scias Philippum ab apostolis non fuisse diuisum; eandem habuisse Ecclesiā; eundem dominum Iesum Christum prædicasse; diaconum certe fuisse eorum, qui postea manus imposuerunt. Tu uero, cum apud Arianos non Ecclesiam dicas esse, sed synagogam, nec clericos Dei, sed creaturæ & idolorum cultores; quo modo in dispari causa eandem asseris rationem te tenere? l. v. c. d. Valenter quidem, & fixo gradu me tibi ini faciem dimicantem repellis: sed post tergum cæderis, & nu-

V u 3 da a

da a spiculis dorfa non protegis. Esto quippe, apud Ari-
nos ne baptisma quidem esse, & ideo spiritum sanctum ab
eis non posse dari, quia necdum remissionem peccatorum
acceperint: totum hoc uictoriæ meæ proficit; & argumen-
torum tuorum palæstra mihi palmam uictoriæ sudat. Aria-
nus baptisma non habet, & quo modo sacerdotium habet?
Laicus apud eos non est, & quo modo episcopus esse po-
test? Mihi recipere mendicum non licet, tu recipis regem?
uos hosti castra traditis, & a nobis perfuga reiiciendus est?
ORT. d. Si priorum meminisses, iam scires tibi fuisse respon-
sum: sed dum amorem contradicendi sequeris, a quæstio-
num lineis excidisti, more quorundam loquacium potius,
quam facundorum; qui cum disputare nesciant, tamen li-
tigare non desinunt. Ego enim non tam in præsentī Aria-
nos uel improbo, uel defendo, quam illam enrsus mei me-
tam circumeo; eadem ratione a nobis episcopum recipi,
qua laicus a uobis recipitur. Si erranti concedis ueniam: &
ego ignosco pæniti. Si in fide sua baptizato baptizans
nocere nō potuit: & in fide sua sacerdotem constitutum cō-
stituens non inquinuit. Subtilis est hæresis, & ideo simpli-
ces animæ facile decipiuntur. Deceptio tam laici, quam
episcopi communis est: at episcopus errare non potuit. Re-
uera de Platonis & Aristophanis sinu in episcopatum alle-
guntur. quotus enim quisque est, qui non apprimē in his
eruditus sit? denique ex litteratis quicumque hodie ordi-
nantur, id habent curæ, non quo modo scripturarum me-
dullas ebibant, sed quo modo aures populi declamationum
flosculis mulceant. Accedit ad hoc, quod Ariana hæresis ma-
gis cum sapientia sæculi facit, & argumentationum riuos de
Aristotelis fontibus mutuatur. Igitur, paruulorum inter se
certantium ritu, quidquid dixeris, dicam: affirmabis, af-
firmabo: negabis, negabo. Arianus baptizat; ergo episco-
pus est: non baptizat; tu refuta laicum, & ego non recipio
sacerdotem. Sequar te quocumque ieris: aut pariter in lu-
to hærebimus, aut pariter expediemur. I.V.C. d. sed laico
ideo ignoscendum est, quia Ecclesiam Dei putans simplici-

ter

ter accessit; & iuxta fidem suam credens baptizatus est. *ORT. d.* Nouam rem asseris, ut Christianus quisquam factus sit ab eo, qui non fuit Christianus. Accedens ad Arianos in qua fide baptizatus est? nempe in ea, quam habebant Ariani: aut, si iam ipse bene credebat, & sciens ab hæreticis baptizatus est; erroris ueniam non meretur. Verū hoc penitus absurdum est, ut discipulus ad magistrum uadens ante sit artifex, quam doceatur; ut modo ab idolorum ueneratione conuersus nouerit Christum melius, quam ille, qui doceat. At dicis: simpliciter in patre, & filio, & spiritu sancto credit, & ideo baptismum consecutus est. Quæ est ista, quæso, simplicitas, nescire quod credas? Simpliciter credidit. Quid credidit? certe aut tria nomina audiens, tres deos credidit; & idololatra effectus est; aut, in tribus uocabulis trinominem credens Deum, in Sabelii hæresim incurrit. Aut edoctus ab Arianis, unum esse uerum Deum patrem, filium, & spiritum sanctum credidit creaturas: aut, extra hæc quid credere potuerit, nescio: nisi forte homo iam edoctus in Capitolio, homouision didicerat trinitatem. Sciebat patrem, filium, & spiritum sanctum, non natura, sed personis esse diuisos. Sciebat & filii nomen in patre, & patris nomen in filio. Ridicula penitus assertio, ante de fide quemquam disputare, quam credere; ante mysterium scire, quam initiatus sit; aliter de Deo sentire baptizantem, & aliter baptizatum. Præterea cum sollemne sit in lauacro, post trinitatis confessionem interrogare: credis sanctam Ecclesiam? credis remissionem peccatorum? quam Ecclesiam credidisse eum dicis? Arianorum? sed non habent: nostram? sed extra hanc baptizatus non potuit eam credere, quam nesciuit. *l. v. c. d.* Quoniam ad omnia argumentari, & emissa a nobis spicula scuto orationis eludis; unam hastam iaciam, quæ umbonem tegminis tui, & uerba crepitantia, ui sua penetret; nec diutius patiar fortitudinem arte superari. Laicus etiam extra Ecclesiam fide baptizatus, pœnitens recipitur: episcopus uero aut pœnitentiam non agit; & sacerdos est; aut, si pœnitentiam egerit, esse episcopus

pus definit. Quamobrem recte nos & laicum suscipimus
 pœnitentem; & episcopum, si in sacerdotio perseverare
 uult, repudiamus. OR T. d. Sagitta, quæ contento nervo di
 rigitur, difficile uitatur. antè enim ad eum, ad quem iacta
 est, peruenit, quam obice clypei frustretur. Econtrario tuæ
 propositiones, quia sine ferri acumine mittuntur, hostem
 non ualent perforare. Hanc igitur hastam, quam totis uiri
 bus misisti, de qua nobis minitaris, uno, ut aiunt, digitu
 lo repellam. neque enim hic modo quæritur, an episcopus
 pœnitens esse non possit, & laicus possit, sed an hæreticus
 baptisma habeat: qui si, ut constat, non habet; quo modo
 potest esse pœnitens, ante quam Christianus? Proba mihi,
 ab Arianis uenientem laicum habere baptismum; & tunc
 ei pœnitentiam non negabo. Si uero Christianus non est, si
 non habuerit sacerdotem, qui eum faceret Christianum:
 quo modo aget pœnitentiam homo, qui necdum credit?
 LVC. d. Oro te, ut, philosophorum argumentatione depo
 sita, Christiana mecum simplicitate loquaris: si tamen non
 dialecticos sequeris, sed piscatores. Aequum ne tibi uide
 tur, ut Arianus episcopus sit? OR T. d. Tu eum episcopum
 probas, quia ab eo recipis baptizatum, & in hoc reprehen
 dendus es: quare a nobis parietibus separaris, cum in fide
 & in Arianorum nobiscum receptione consentias? LVC.
 d. Iam & superius rogauit, ut non philosophice, sed Chri
 stiane mecum loquaris. OR T. d. Discere uis, an contendis?
 LVC. d. Vtique contendo, quia facti tui a te quæro ratio
 nem. OR T. d. Si contendis, iam tibi responsum est. eadem
 enim ratione episcopum ab Arianis recipio, qua tu recipis
 baptizatum. Si discere cupis, in meam aciem transgredere.
 aduersarius enim uincitur, discipulus docetur. LVC. d. Non
 possum ante esse discipulus, quam magistrum audiam præ
 dicantem. OR T. d. Quoniam tergiuersaris, & sic uis a me
 doceri, ut aduersarium in integro habeas; tuo animo te
 docebo. Consentimus in fide: consentimus in hæreticis re
 cipiendis: consentiamus etiam in conuentu. LVC. d. Hoc
 non est docere, sed argumentari. OR T. d. Quia tu pacem
 cum

cum scito petis, & nos oliuæ raram gladio inferimus. *Lyc. d.* En tollo manus, cedo, uicisti. uerum cum arma deponam, sacramenti, in quod me iurare compellis, quero rationem. *Ort. d.* Gratulor interim tibi, & Christo Deo meo gratias ago, quia animo bono a falsitatis ardore ad totius orbis te saporem contulisti, nec dicis more quorundam: Saluum me fac Domine, quoniam defecit sanctus: quorum *Psal. 12* uox impia crucem Christi euacuat, Dei filium subiugat diabolo; & illam complorationem, quæ a Domino de peccatoribus prolata est, nunc de uniuersis hominibus dictam intelligit. Quæ utilitas in sanguine meo, dum descendo in *Psal. 29* corruptionem? sed absit, ut frustra Deus mortuus sit. Alligatus est fortis, & uasa eius direpta sunt. Allocutio patris *Matth. 12* impleta est: Postula a me, & dabo tibi gentes, hereditatem tuam, & possessionem tuam, terminos terræ. Apparuerunt *Psal. 2. 17* fontes aquarum: & reuelata sunt fundamenta orbis terrarum. In sole posuit tabernaculum suum, nec est qui se *Psal. 18* abscondat a calore eius. Deo plenus psalmista canit: *Psal. 9* Inimici defecerunt fræmæ in finem, & ciuitates eorum destruxisti. Et ubi, quæso, isti sunt nimium religiosi, immo nimium profani, qui plures synagogas asserunt esse, quam ecclesias? Quo modo destructæ sunt diaboli ciuitates; & in fine, hoc est in sæculorum consummatione, idola corruerunt? Si Ecclesiam per totum orbem diffusam non habet Christus, aut si in Sardinia tantum habet: nimium pauper factus est. En si Britanias, Gallias, Orientem, Indorum populos, barbaras nationes, & totum simul mundum possidet satanas: quo modo ad angulum uniuersæ terræ crucis trophæa collata sunt? nimirum aduersarius potens concessit Christo Hiberiam; & Celtiberos, luridos homines, inopemq. prouinciam dedignatus est possidere. Quod si de illa, quæ in euangelio scripta est, sibi sententia blandiuntur: *Luc. 18* Putas ne, cum uenerit filius hominis, inueniet fidem super terram: sciant illam fidem nominari, de qua ipse Dominus aiebat: Fides tua te saluam fecit. Et alibi de centurione: *Matth. 9* Non inueni tantam fidem in Israel. Et rursus ad apostolos: *Luc. 7*

Quid

Matth. 14 Quid timidi estis modicæ fidei? Necnon & in alio loco: Si

Luc. 17 habueritis fidem sicut granum sinapis, dicetis huic monti,

Matth. 9 transmigra, & transmigraabit. Neque enim centurio, aut illa muliercula, quæ per duodecim annos fluxu sanguinis ta-
bescebat, in trinitatis sacramenta crediderant, quæ post resurrectionem Christi apostolis manifestata sunt; ut merito fides horum, quæ in mysterio est, laudaretur: sed simplicitas mentis, & deuota Deo suo anima approbata est: dicebat enim in corde suo: si tetigero uestimentum eius tantum, salua fiam. Hæc est fides, quam raro inueniri Dominus pronunciauit. Hæc est fides, quæ etiã apud eos, qui

Luc. 18 bene credunt, difficile perfecta inuenitur. Fiat tibi, inquit

Matth. 8 Deus, secundum fidem tuam. Hanc ego uocem audire nolo. si enim secundum fidem meam fiat mihi, peribo. et certe credo in Deum Patrem; credo in Deum Filium, & credo in Deum Spiritum sanctum: credo in unum Deum: &

Matth. 13 tamen secundum meam fidem nolo mihi fieri. sæpe quippe uenit inimicus homo, & inter Dominicam messem zizania interferit. Neque hoc dico, quod maius quidquam sit, quam sacramenti fides, quam puritas animæ: sed indubitata ad Deum fides ardue reperitur. uerbi gratia dictum sit, ut; quod uolumus, perspicuum fiat: ad orationem assisto: non orarem, si non crederem: sed, si uere crederem, illud cor, quo Deus uidetur, mundarem, manibus tunderem petrus, genas lacrymis rigarem, corpore inhorrescerem, ore pallerem, iacerem ad Domini mei pedes, eosque fletu perfunderem, crine tergerem, hærerem certe trunco crucis, nec prius amitterem, quam misericordiam impetrarem. nunc uero creberrime in oratione mea aut per porticus deambulando, aut de fenore computo; aut abductus turpi cogitatione, etiam quæ dictu erubescenda sunt, gero. Vbi est fides?

Ion. 4 sicine putamus orasse Ionam? sic tres pueros? sic Daniellem inter leones? sic certe latronem in cruce? Et hæc ego exempli causa ad intelligentiam sensus protuli. Ceterum conueniat unusquisque cor suum; & in omni uita inueniet, quam rarum sit, fidelem animam inueniri, ut nihil

Dan. 3. 14

Luc. 23

ob

ob gloriæ cupiditatem; nihil ob rumusculos hominum faciat. neque enim statim, qui ieiunat, Deo ieiunat; aut, extendens pauperi manū, Deo fenerat. uicina sunt uicia uirtutibus. difficile est, Deo tantum iudice esse contentum. *l. v. c. d.* Præuenisti interrogationem meam. hanc enim scripturam mihi in ultimo referuabam. & fere omnes nostri, immo iam non mei, hoc quasi ariete in disceptionibus utuntur; quem confractum, ac comminutum, uehementer gaudeo. Sed quæso te, ut mihi omnem causam, quare ab Arianis uenientes Ecclesia recipiat, non quasi aduersario, sed quasi discipulo explices. nam cum tibi uerbo respondere non possim, animo tamen necdum assentior. *o. r. t. d.* Sub rege Constantino, Eusebio & Hippatio consulibus, nomine unitatis & fidei infidelitas scripta est, ut nunc agnoscitur. nam illo tempore nihil tam pium, nihil tam conueniens seruo Dei uidebatur, quam unitatem sequi, & a totius mundi communione non scindi; præsertim cum superficies expositionis nihil iam sacrilegum præferret. Credimus, aiebant, in unum uerum Deum, patrem omnipotentem, hoc etiam nos confitemur. Credimus in unigenitum Dei filium, qui ante omnia sæcula, & ante omne principium natus est ex Deo; natum autem unigenitum solum ex solo patre, Deum ex Deo, similem genitori suo, patri secundum scripturas, cuius natiuitatem nullus nouit, nisi qui solus eum genuit pater. Numquid hic insertum est, Erat tempus, quando nō erat? uel de nullis extantibus, Creatura est filius Dei? Perfecta fides est, Deum de Deo credere. Et natum aiebant unigenitum solum, ex solo patre. Quid est natum? certe non factum. natiuitas suspicionem auferebat creaturæ. Addebant præterea, Qui de cælo descendit, conceptus est de Spiritu sancto, natus ex Maria uirgine, crucifixus a Pontio Pilato, tertia die resurrexit a mortuis, ascendit in cælum, sedet ad dexteram Dei patris, uenturus iudicare uiuos, & mortuos. Sonabant uerba pietatem; & inter tanta illa præconia nemo uenenum insertum putabat. De uisæ uero nomine abiiciendo, uerisimilis ratio præhebatur.

Quia

Quia in scripturis, aiebant, non inuenitur, & multos simpliciores nouitate sua scandalizat; placuit auferri. nō erat curæ episcopis de uocabulo, cum sensus esset in tuto. Denique ipso in tempore cum fraudem fuisse in expositione rumor populi uentilaret; Valens, Mursiensis episcopus, qui eam conscripserat præsentē Tauro, prætorii præfecto, qui ex iussu regis synodo aderat, professus est se Arianum non esse, & penitus ab eorum blasphemiiis abhorrere. Res secrete gesta opinionem uulgi non extinxerat. itaque alia die in ecclesia, quæ est apud Ariminum, & episcoporum simul & laicorum turbis concurrentibus, Muzonius, episcopus provincie Byzantinæ, cui propter ætatem primæ ab omnibus deferebantur, ita locutus est: Ea, quæ sunt iactata per publicum, & ad nos usque perlata, aliquem e nobis sancti tati uestræ legere præcipimus: ut, quæ sunt mala, & ab auribus & a corde nostro abhorrere debent, omnium una uoce damnentur. Responsum est ab uniuersis episcopis; placet. itaque, cum Claudius, episcopus provincie Piceni, ex præcepto omnium blasphemias, quæ Valentis ferebantur, legere cœpisset, Valens, suas esse negans, exclamauit, & dixit: Si quis negat Christum Deum, Dei filium, ante sæcula ex patre genitum; anathema sit. Ab uniuersis consonatum est, anathema sit. Si quis negat filium similem patri secundum scripturas, anathema sit. Omnes responderunt, anathema sit. Si quis filium Dei non dixerit æternum cum patre, anathema sit. Ab uniuersis conclamatum est, anathema sit. Si quis dixerit creaturam filium Dei, ut sunt ceteræ creaturæ, anathema sit. Similiter dictum est, anathema sit. Si quis dixerit, de nullis extantibus filium, & non de Deo patre, anathema sit. Omnes conclamauerunt, anathema sit. Si quis dixerit, erat tempus, quando non erat filius, anathema sit. In hoc uero cuncti episcopi, & tota simul ecclesia plausu quodā & tripudio Valentis uocē exceperunt. Quod si quis a nobis fictum putat, scrinia publica scrutetur. plenæ sunt certe ecclesiarū arcæ, & recens adhuc rei memoria est. supersunt homines, qui illi synodo in

ter-

refuerunt; &, quod ueritatem firmet, ipsi Ariani hæc ita, ut diximus, gesta non denegant. Cum ergo cuncti Valentē ad cælum laudibus tollerent, & suam in eum suspicionem cū pænitentia damnarent; idem Claudius, qui supra legere cœperat, ait: Adhuc sunt aliqua, quæ subterfugerunt dominum, & fratrem meum Valentem: quæ, si uobis uidetur, ne quis scrupulus remaneat, in commune damnemus. Si quis dixerit filium Dei esse quidem ante omnia sæcula, sed non ante omne omnino tempus, ut ei aliquid anteferat, anathema sit. Dixerunt cuncti, anathema sit. Multa quæ suspiciosa uidebantur, ad pronunciationem Claudii Valens condemnauit. quæ si quis plenius discere cupit, in Ariminenſis ſynodi actis reperiet, unde & nos ista libauimus. His ita gestis, concilium soluitur: læti omnes ad prouincias reuertuntur. idem enim regi & bonis omnibus curæ fuerat, ut Oriens, atque Occidens communionis sibi uinculo neſcerentur. Sed diu scelera non latent: & cicatrix male obducta, incocto pure dirumpitur. Cœperunt poſtea Valens, & Vrfacius, ceteriq. nequitix eorum ſocii, egregii uidelicet Chriſti ſacerdotes, palmas ſuas iactitare, dicentes ſe filium non creaturam negaſſe, ſed ſimilem ceteris creaturis. tunc uſix nomen abolitum eſt, tunc Nicenæ fidei dāmnatio conſtamata eſt. Ingemuit totus orbis, & Arianum ſe eſſe miratus eſt. Igitur alii intra ſuam communionem remanere, alii ad eos conſeſſores, qui ſub nomine Athanaſii exulabant, cœperunt litteras mittere: nonnulli initam ſocietatem meliorum deſperatione planxerunt: pauci uero (ut ſe natura hominum habet) errorem pro cōſilio deſenſauere. Periclitabatur nauicula apoſolorum: urgebant uenti: fluctibus latera tundeantur: nihil iam ſupererat ſpei. Dominus excitatur, imperat tempeſtati, beſtia moritur, tranquillitas redit. Maniſteſtius dicam. Omnes epiſcopi, qui de propriis ſedibus fuerant exterminati, per indulgentiam noui principis ad eccleſias redeunt. Tunc triumphatorem ſuum Athanaſium Aegyptus excepit: tunc Hilarium, de prælio reuertentem, Galliarum

rum ecclesia complexa est : tunc ad reditum Eusebii lugubres uestes Italia mutauit . Concurrerant episcopi , qui Ariminensibus dolis irretiti , sine conscientia hæretici ferebantur , contestantes corpus Domini ; & quidquid in Ecclesia sanctum est , se nihil mali in sua fide suspicatos . Putauimus , aiebant , sensum congruere cum uerbis : nec in Ecclesia Dei , ubi simplicitas , ubi pura confessio est , aliud in corde clausum esse , aliud in labiis proferri timuimus . decepit nos bona de malis existimatio : non sumus arbitrati sacerdotes Christi aduersus Christum pugnare . Multaq. alia , quæ breuitatis studio prætereo , flentes afferebant , parati & subscriptionem pristinam , & omnes Ariatorum blasphemias condemnare . Hoc loco interrogo istos nimium religiosos , quid de confessoribus agendum putauerint ? Depositis , inquit , ueteribus episcopis , nouos ordinassent . Tentatum est : sed quousquisque bene sibi conscius patitur se deponi ? præsertim cum omnes populi , sacerdotes suos diligentes , pene ad lapides & ad interemptionem deponentium eos conuolauerint ? Mansissent , aiunt , intra suam communionem . Hoc est dicere , irrationabili crudelitate orbi totum diabolo cõdonassent . Cur damnaissent eos , qui Ariani non erant ? cur Ecclesiam scinderent , in cõcordia fidei permanentem ? cum denique credentes bene , obstinatione sua facerent Arianos . nam cum in synodo Nicæna , quæ propter Arianam perfidiam congregata est , octo episcopos Arianos susceptos sciamus ; & episcopus iam in mundo nullus sit , nisi quos synodus illa ordinauit : quo modo potuerunt aduersum eam facere , propter quam exilium sustinuerunt ? LVC. d. An tandem & tunc recepti sunt Ariani ? quinam , quæso ? ORT. d. Eusebius , episcopus Nicomedienensis ; Theogonus , episcopus Nicenus ; Saras , tunc presbyter Libyæ ; Eusebius , episcopus Cæsareæ Palæstinæ ; & reliqui , quos enumerare longum est ; ipse quoque , caput horum & causa malorum , Arius presbyter , & Euzoïus diaconus , qui post Eudoxium Antiochenus episcopus fuit , & Achilles lector . hi quippe tres , Alexandrinæ ecclesie

clesiæ clerici, auctores huius hæreseos extiterunt. lvc. d. Si quispiam eos neget fuisse susceptos, quo modo reuincetur? o r r. d. Superfunt adhuc homines, qui illi synodo interfuerunt. et si hoc parum est, quia propter temporis antiquitatem rari admodum sunt, & in omni loco testes adesse non possunt: legamus acta & nomina episcoporum synodi Nicenæ: & hos, quos supra diximus fuisse susceptos, subscripsisse hominibus, inter ceteros reperiemus. lvc. d. Si potes, ostende post synodum Nicenam illos in perfidiam declinasse. o r r. d. Recte proposuisti. solent enim oculis clausis denegare, qui non credunt factum esse, quod nolunt. sed quo modo postea non declinarunt, propter quos synodus congregata est? et quorum epistolæ & libri impietatis, ante synodum editi, usque ad præsentem diem durant? Igitur cum illo tempore trecenti & eo amplius episcopi paucos homines, quos sine damno Ecclesiæ abiicere poterant, susceperint; miror quosdam, & certe Nicenæ fidei sectatores, tantæ duritiæ existere, ut tres confessorès, de exilio reuertentes, non putent id ob totius orbis salutem necessario facere debuisse, quod tot & tales uiri uoluntate fecerunt. sed, ut dicere cœperamus, post reditum confessorum in Alexandrina postea synodo constitutum est, ut, exceptis auctoribus hæreseos, quos error excusare non poterat, pœnitentes Ecclesiæ sociarentur: non quod episcopi possint esse, qui hæretici fuerant: sed quod constaret, eos, qui reciperentur hæreticos non fuisse. Assensus est huic sententiæ occidens; & per tam necessarium concilium, Satanæ faucibus mundus ereptus est. Ventum est ad asperrimum locum, in quo aduersum uoluntatem & propositum meum cogor de beato Lucifero secus quidquam, quam & illius meritum, & mea humanitas poscit, existimare. sed quid faciam? ueritas os referat, & inuitam linguam conscium ad eloquendum pectus impellit. In tali articulo Ecclesiæ, in tanta rabie luporum, segregatis paucis ouibus, reliquum gregem deferuit, bonus quidem ipse pastor, sed multam prædam bestiis relinquens. Prætereo illa,

illa, quæ quidam ex maledicis, quasi satis firma, defendunt; hoc illum amore gloriæ, & nominis in posteros trāsmittendi fecisse; necnon & pro similitudine, quam aduersus Eusebium propter Antiochenam dissensionem susceperat. nihil istorum de tali uiro credo: unum est, quod etiam in præsentī constanter loquar, uerbis eum a nobis dissentire, non rebus; siquidem eos recipiat, qui ab Arianis baptisma consecuti sunt. *LVC. d.* Quam longe alia, & ut nunc intelligo, errori magis, quam spei proficientia, mihi antea afferebantur. uerum gratias ago Christo Deo, qui in pectus meum ueritatis lumen infudit; ne adhuc ore sacrilego uirginem eius scortum diaboli clamarem. Restat unum, quod, quæso te, ut edisseras, quid aduersum Hilarium dicendum sit, qui ne baptizatos quidem recipiat ab Arianis. *ORT. d.* Hilarius cum diaconus de ecclesia recesserit, solusque ut putat turba sit mundi, neque eucharistiam conficere potest, episcopos & presbyteros non habens, neque baptismum sine eucharistia tradere: et cum iam homo mortuus sit, cum homine pariter interit & secta: quia post se nullum clericum diaconus potuit ordinare. ecclesia autem nō est, quæ non habet sacerdotes. sed, omiſſis paucis hominibus, qui ipsi sibi & laici sunt, & episcopi, ausculta quid de omni Ecclesia sentiendum sit. *LVC. d.* Tribus, ut aiunt, uerbis tam grandem quæſtionem diſſoluisti: & quidem, dū loqueris, uideor mihi tecum facere: si uero obticueris, nescio quid rursū scrupuli nascitur, quare ab hæreticis baptizati suscipiuntur. *ORT. d.* Hoc est, quod & ego dixi, ausculta quid de omni Ecclesia sentiendum sit. ille enim, ut ais, scrupulus multos titillat. et longus fortasse ero in enarrando, uerum tanti est lucrum ueritatis. Arca Noe Ecclesiæ typus fuit, dicentes Petro apostolo: In arca Noe parci, idest, octo animæ salutæ factæ sunt per aquam. Quod & nos nunc similis formæ baptismum saluos facit. ut in illa omnium animalium genera, ita & in hac uniuersarum & gentium, & morum homines sunt. ut ibi pardus, & hædi, lupus, & agni: ita & hic iusti, & peccatores, idest, uasa aurea,

1. Pet. 3

aurea, & argentea, cum ligneis, & fictilibus commoran-
 tur. Habuit arca nidos suos: habet Ecclesia plurimas man-
 siones. Octo animæ hominum in arca Noe seruatz sunt:
 & nos Ecclesiales iubet dare partes septem, dare partes *Eccl. 11*
 octo, idest, credere utrique testamento. Ideo quidam psal *Psal. 6. 11*
 mi pro octaua inscribuntur, & per octonos uersus, qui sin-
 gulis litteris subiecti sunt, in centesimo decimooctauo psal-
 mo iustus eruditur. Beatitudines quoque, quas Dominus *Matth. 5*
 discipulis in monte pronuncians, Ecclesiam deliniauit, octo *Ezech. 40*
 sunt. Et Ezechiel in ædificationem templi octonarium nu-
 merum assumit. Multaq. alia in hunc modum per scriptu-
 ras significata reperies. Emittere itaque de arca coruus, & *Gen. 8*
 non rediit: & postea pacem terræ columba nunciat. Ita &
 in baptismo Ecclesiæ, tæterrimo alite expulso, idest, dia-
 bolo, pacem terræ nostræ columba spiritus sancti nunciat.
 A triginta cubitis incipiens, & usque ad unum cubitum pau-
 latim decrescens, arca construitur. similiter & Ecclesia,
 multis gradibus consistens, ad extremum diaconis, presby-
 teris, episcopisq. finitur. Periclitata est arca in diluuiio: pe-
 riclitatur Ecclesia in mundo. Egressus Noe uineam planta- *Gen. 9*
 uit, & bibens de ea inebriatus est: natus quoque in carne
 Christus Ecclesiam plantauit, & passus est. Nudatum pa-
 trem irrisit maior filius, & minor textit: & Deum crucifi-
 xum illuserunt Iudæi, & honorauerunt gentiles. Dies me
 deficiet, si omnia arcæ sacramenta cum Ecclesia compo-
 nens edisseram. Qui sint inter nos aquilæ, qui columbæ,
 qui leones, qui cerui, qui uermiculi, qui serpentes, quod
 ad præsens negotium pertinet, breuiter expediam. Non so-
 lum in Ecclesia morantur oues, nec mundæ tantum aues
 uolitant, sed frumentum in agro seritur, & inter nitentia
 culta Lappæq. & tribuli, & steriles dominantur auenæ.
 Quid faciat agricola? euellat lolium? sed tota pariter mes-
 sis diuellitur. Quotidie industria rusticana aues sonitu abi-
 git, imaginibus exterrit: hinc flagello crepitat, hinc formi-
 dines tendit. attamen aut ueloces capræ, aut lasciuus ona-
 ger incurrit: hinc in effossa horrea mures frumenta com-

X x por-

- portant: hinc feruenti agmine segetem formica populatur. Ita res se habet. nemo securus agrum possidet. Dormiente patrefamilias, inimicus homo zizania superseminauit: ad quæ eradicanda cum serui ire proponerent, dominus prohibuit, sibi seruans palearum & frumenti discretionem. Hæc sunt uasa iræ, & misericordiæ, quæ in domo Dei ab Apostolo prædicantur. Venit ergo dies, quando, thesauro Ecclesiæ aperto, proferet Dominus uasa iræ suæ, quibus exeuntibus sancti dicent: Ex nobis exierunt, sed non erant ex nobis: si enim fuissent ex nobis, mansissent utique nobiscum. Nemo potest Christi palmam sibi assumere, nemo ante diem iudicii de hominibus iudicare. Si iam munda est Ecclesia, quid Domino reseruamus? Est uia, quæ uidetur esse apud homines recta: nouissima autem eius neniunt in profundum inferni. In hoc errore iudicii quæ potest esse certa sententia? Conatus est & beatus Cyprianus contritos lacus fugere, nec bibere de aqua aliena; & ideo hæreticorum baptismum reprobans, ad Stephanum, tunc Romanæ urbis episcopum, qui a beato Petro uigessimus sextus fuit, super hac re Africanam synodum direxit: sed conatus eius frustra fuit. Denique illi ipsi episcopi, qui rebaptizandos hæreticos cum eo statuerant, ad antiquam consuetudinem reuoluti, nouum emisere decretum. Quid facimus? ita & nobis maiores nostri, & illis sui tradidere maiores. Sed quid de posterioribus loquar? apostolis adhuc in seculo superstitibus, adhuc apud Iudæam Christi sanguine recenti, phantasma Domini corpus asserbatur. Galatas, ad observationem legis traductos, Apostolus iterum parturit: 1. Cor. 15 Corinthios, resurrectionem carnis non credentes, pluribus argumentis ad uerum iter trahere conatur. Tunc Simon Magus, & Menander, discipulus eius, Dei se asseruere uirtutes: tunc Basilides summum Deum Abraxas cum trecentis sexagintaquinque editionibus commentatus est: tunc Act. 6 Nicolaus, qui unus de septem diaconis fuit, die noctuque nuptias faciens, obscenos & auditu quoque erubescendos coitus somniavit. Taceo de Iudaismi hæreticis, qui, ante aduentum

uentum Christi, legem traditam dissiparunt: quod Dositheus, Samaritanorum princeps, prophetas repudiavit: quod Sadducæi, ex illius radice nascentes, etiam resurrectionem carnis negauerunt: quod pharisæi, a Iudæis diuisi, *Matth. 22* propter quasdam observationes superfluas nomen quoque a discidio susceperunt: quod Herodiani Herodem regem suscepere pro Christo. ad eos uenio hæreticos, qui euangelia laniauērunt, Saturnium quendam, & Ophitas, & Gnoitam Carpocratem, & Cerinthus, & huius successorem Hebionem, & ceteras pestes: quorum plurimi, uiuente adhuc Ioanne apostolo, eruperunt: & tamen nullum eorum legimus rebaptizatum. Quoniam autem talis uiri fecimus mentionem, de Apocalypsi quoque eius approbemus, hæreticis sine baptismate debere pœnitentiam concedi. Angelo Ephesi deserta caritas imputatur. In angelo Pergamenæ ecclésiæ, idolothytorum esus, & Nicolaitarum doctrina reprehenditur. *Apoc. 2* Item apud angelum Thiatyrorum, Hiezabel prophetissa, & simulacrorum esæ, & fornicationes increpantur. Et tamen omnes hos ad pœnitentiam Dominus hortatur, sub comminatione quoque futuræ pœnæ, nisi cōuertantur. non autem cogeret pœnitere, si non esset pœnitentibus ueniam concessurus. Numquid dixit, rebaptizentur qui in Nicolaitarum fide baptizati sunt? uel imponantur eis manus, qui eo tempore apud Pergamenos crediderunt, quo disciplinam tenebant Balaam? Quin potius age, inquit, pœnitentiam: sin autem, ego ueniam tibi cito, & pugnabo tecum in rhomphæa oris mei. Verum, si uoluerint ii, qui ab Hilario instituti sunt, & oues sine pastore esse cœperunt, de scripturis ea proferre, quæ beatus Cyprianus ob hæreticos rebaptizandos in epistolis suis reliquit: sciant illum hæc non cum anathemate eorum, qui se sequi noluerant, edidisse; siquidem in communione eorum permansit, qui sententiæ suæ contraierant; sed hortatum potius fuisse propter Nouatum, & alias tunc hæreses multas enascentes, ne quisquam ab eo sine damnatione erroris sui reciperetur. Sermonem denique suum, quem super hac re ad Stepha-

num Romanum Pontificem habuit, tali fine compleuit: Hæc ad conscientiam tuam, frater carissime, & pro honore communi, & pro simplici dilectione protulimus, credentes etiam tibi pro religionis tuæ & fidei ueritate placere, quæ & religiosa pariter, & uera sunt. Ceterū scimus quosdam, quod semel imbiberunt, nolle deponere, nec propositum suum facile mutare, sed, saluo inter collegas pacis & concordie uinculo, quædam propria, quæ apud se semel sint usurpata, retinere. Quam in re non uim cuiquam facimus, aut legem damus: quin habeat in ecclesiæ administratione uoluntatis suæ arbitrium liberum: unusquisque sit præpositus, rationem actus sui Domino redditurus. Ad Iubaianum quoque de hæreticis rebaptizandis scribens, in fine libelli sic locutus est: Hæc tibi breuiter pro nostra mediocritate scripsimus, frater carissime, nemini præscribentes, aut præiudicantes, quo minus unusquisque episcoporum, quod putat, faciat, habens arbitrii sui liberam potestatem. Nos, quantum in nobis est, propter hæreticos cum collegis & coepiscopis nostris non contendimus, cum quibus diuinam concordiam & Dominicam pacem tenemus, maxime cum Apostolus dicat: Si quis autem putauerit se contentiosum esse, nos talem consuetudinem non habemus, nec Ecclesia Dei. Seruatur a nobis patienter & leniter caritas animi, collegii honor, uinculum fidei, concordia sacerdotii. Est præterea aliud, quod inferemus, aduersum quod ne mutire quidem audeat Hilarius, Deucalion orbis. Si enim hæretici baptismum non habent, & ideo rebaptizandi ab Ecclesia sunt, quia in Ecclesia non fuerunt: ipse quoque Hilarius non est Christianus: in ea quippe Ecclesia baptizatus est, quæ semper ab hæreticis baptismum recepit. Ante quam Ariminensis synodus fieret, ante quam Lucifer exularet, Hilarius, Romanæ ecclesiæ diaconus, ab hæreticis uenientes, in eo, quod prius acceperant, baptismate suscipiebat. Nisi forte tantum Ariani hæretici sunt, & ab his solis baptismum recipere non licet, ab aliis licet. Diaconus eras, o Hilari, & a Manichæis baptizatos recipiebas. diaconus

I. Cor. II

conus eras, & Hebionis baptisma comprobabas: repente, postquam exortus est Arius, totus tibi displicere cœpisti. Segregas te cum tuis uernulis, & nouum balneum aperis. Si te angelus aliquis, aut apostolus rebaptizauit: non infringo, quod sequeris. si uero in sinu meo natus, si uberrum meorum lacte nutritus, aduersum me gladium leuas: redde, quod dedi; & esto, si potes, aliter Christianus. Meretrix sum, sed tamen mater tua sum. Non seruo unius tori castitatem: talis eram, quando conceptus es. Cum Ario adulteria cōmitto: feci & antea cum Praxeas, cum Hebione, cum Cerintho, Nouato: hos amplexaris, hos in matris tuæ domum iam adulteros recipis. nescio quid te unus adulter offendat. Quod si negandum quispiam putauerit, hæreticos a maioribus nostris semper fuisse susceptos: legat beati Cypriani epistolas, in quibus Stephanum, Romanæ urbis episcopum, & inueteratæ consuetudinis lacerat errorem: legat & ipsius Hilarii libellos, quos aduersus nos de hæreticis rebaptizandis edidit: & ibi reperiet ipsum Hilarium confiteri, a Iulio, Marco, Syluestro, & ceteris ueteribus episcopis, similiter in penitentiam omnes hæreticos susceptos; nec tamen sibimet ueritatis consuetudinem præiudicare debere. Synodus quoque Nicena, cuius paulo ante fecimus mentionem, omnes hæreticos suscepit, exceptis Pauli samosatensis discipulis: & quod his maius est, episcopo Nouatianorum, si conuersus fuerit, presbyterii gradum seruat: quæ sententia & Luciferum impugnat, & Hilarium; dum idem & clericus est, & baptizatus. Poteram diem istiusmodi eloquio ducere, & omnes propositionum riuulos uno Ecclesiæ sole siccare: uerum, quia iam multum sermocinati sumus; & prolixitas concertationis audientium studia lassauit; breuem tibi apertamq. animi mei sententiã proferam; in illa esse Ecclesiã permanendum, quæ ab apostolis fundata, usque ad diem hanc durat. Sicubi audieris, eos, qui dicuntur Christi, non a domino Iesu Christo, sed a quoquam alio nuncupari; ut puta Marcionitas, Valentinianos, Montenses, siue Campitas: scito non Ecclesiã

X x 3 Chri-

Christi, sed antichristi esse synagogam. ex hoc enim ipso, quod postea instituti sunt, eos se esse indicant, quos futuros Apostolus prænunciauit. Nec sibi blandiantur, si de scripturarum capitulis uidentur sibi affirmare, quod dicunt: *1. Tim. 4* cum & diabolus de scripturis aliqua sit locutus; & scripturæ non in legendo consistant, sed in intelligendo. alioqui, si litteram sequimur, possumus & nos quoque nouum nobis dogma componere, ut asseramus in Ecclesiam non recipiendos, qui calciati sint, & duas tunicas habeant. *Luc. d.* Nō solum te uicisse existimes: uicimus utrique: uterque nostrum palmam refert, tu mei, ego erroris. utinamq. mihi sic semper disputare contingat, ut ad meliora proficiens, deferam quod male tenebam. unum tamen tibi confiteor, quia mores meorum apprime noui, facilius eos uinci posse, quam persuaderi.

ARGVMENTVM.

QVIA Ruffinus male uerterat Origenis librum *θεὸς ἀρχόν*, addens mutilansq. aliqua; ut, quæ in eo manifeste erant heretica, excusaret, & Origenem legendum cunctis ingereret; eundem ad Pammachij preces ipse denuo uertit Hieronymus, nihil immutans: uerum, ut sine periculo liber legi posset, quæ sint in eo impie dicta, proptereaue ab omnibus caueri debeant, nunc ad Auium scribens, erudire declarat.

AD AVITVM, QVID CAVENDVM

in libris *θεὸς ἀρχόν*.

EPISTOLA LIX.

NTE annos circiter decem sanctus uir Pāmachijs ad me cuiusdam schedulas misit, quæ Origenis *θεὸς ἀρχόν* interpretata uolumina continerent, immo uitiata; hoc magnopere postulans, ut Græcam ueritatem Latina seruaret translatio; & in utramque partem, seu bene seu male dixisset ille qui scripsit, abique interpretis patrocini-

trocinio Romana lingua cognosceret. Feci ut uoluit, misq. ei libros; quos cum legisset, exhorruit, & reclusit scriptio; ne prolatis in uulgus, multorum animos uulnerarent. a quodam fratre, qui habebat zelum Dei, sed non secundū scientiam, rogatus ut traderet ad legendum, quasi statim red dituro, propter angustiam temporis fraudem non potuit suspicari. qui acceperat legendos, adhibitis notariis opus omne descripsit; & multo celerius, quam promiserat, codicem reddidit: eademq. temeritate, & ut leuius dicam, ineptia, quod male surripuerat, peius aliis credidit. & quia difficile grandes libri, de rebus mysticis disputantes, notarū possunt seruire compendia, præsertim qui furtim celeriterq. distantur; ita in illis confusa sunt omnia, ut & ordine in plerisque, & sensu careant. Quamobrem petis, Auite carissime, ut ipsum ad te exemplar dirigam, quod a me olim translatus, & nulli alii traditum, a suprascripto fratre peruersè editum est. Accipe igitur, quod petisti; sed ita, ut scias detestanda tibi in eis esse quamplurima; & iuxta sermonem Domini, inter scorpiones & colubros incedendum: Luc. 10 ut est illud statim in primo uolumine: Christum filium Dei nō natum esse, sed factum: Deum patrem per naturam inuisibilem, etiam a filio non uideri: Filium, qui sit imago inuisibilis patris, comparatum patri, non esse ueritatem: apud nos autem, qui Dei omnipotentis non possumus recipere ueritatem, imaginariam ueritatem uideri, ut maiestas ac magnitudo maioris, quodam modo circumscripta sentitur in filio: Deum patrem esse lumen incomprehensibile: Christum collatione patris, splendorem esse perparuum, qui apud nos pro imbecillitate nostra magnus esse uideatur. Duarum statuarum, maioris, & paruulæ; unius, quæ mundum impleat, & magnitudine sua quodam modo inuisibilis sit; & alterius, quæ sub oculos cadat; ponit exemplum, priori patrem, posteriori filium comparans. Deum patrem omnipotentem appellat bonum, & perfectæ bonitatis: Filium non esse bonum, sed auram quandam & imaginem bonitatis: ut non dicatur absolute bonus, sed cum

X x + addita-

additamento pastor bonus : & cetera. Tertium dignitate, & honore post patrem & filium, asserit spiritum sanctum, de quo cum ignorare se dicat, utrum factus sit, an infectus; in posterioribus, quid de eo sentiret, expressit, nihil absque solo Deo patre infectum esse confirmans. Filium quoque minorem patre, eo quod secundus ab illo sit, & spiritum sanctum inferiorem filio, in sanctis quibusque uersari. atque hoc ordine maiorem patris fortitudinem esse, quam filii & spiritus sancti : & rursus maiorem filii fortitudinem esse, quam spiritus sancti : & consequenter ipsius sancti spiritus maiorem esse uirtutem ceteris, quæ sancta dicuntur. Cūq. uenisset ad rationales creaturas, & dixisset eas per negligentiam ad terrena corpora esse delapsas; etiam hoc addidit: Grandis negligentia, atque desidia est, intantum unumquemque defluere, atque euacuari, ut ad uitia ueniens, irrationabilium iumentorum possit crasso corpore colligari. Et in consequentibus, Quibus, inquit, moti disputationibus, arbitramur sua sponte alios esse in numero sanctorum, & ministerio Dei; alios ob culpam propriam de sanctimonia corruentes, in tantam negligentiam corruisse, ut etiam in contrarias fortitudines uerterentur: rursusq. nasci ex fine principium, & ex principio finem; & ita cuncta uariari, ut & qui nunc homo est, possit in alio mundo dæmon fieri; & qui dæmon est, & negligentius egerit, in crassiora corpora relegetur, idest, ut homo fiat. Sicq. permiscet omnia, ut de archangelo possit diabolus fieri, & rursus diabolus in angelum reuertatur. Qui uero fluctuauerint, & motis pedibus nequaquam corruerint, subicientur omnino dispensandi, & regendi, atque ad meliora gubernandi principatibus, potestatibus, thronis, dominationibus: & forsitan ex his hominum constabit genus in uno aliquo ex mundis; *Es. 65* quando, iuxta Esaiam, cælum & terra noua fient. Qui uero non fuerint meriti, ut per genus hominum reuertantur ad pristinum statum; fient diabolus, & angeli eius, & pessimi demones; ac pro uarietate meritorum in singulis mundis diuersa officia sortientur. Ipsosq. demones, ac rectores tenebrarum

nebrarum in aliquo mundo, uel mundis, si uoluerint ad meliora conuerti, fieri homines, & sic ad antiquum redire principium; ita dumtaxat, ut per supplicia, atque tormenta, quæ uel multo uel breui tempore sustinuerint, in hominum eruditi corporibus, rursus ueniant ad angelorum fastigia: Ex quo consequenti ratione monstrari, omnes rationabiles creaturas ex hominibus posse fieri, non semel & subito, sed frequentius: nosq. & angelos, futuros dæmones, si egerimus negligentius, & rursus dæmones, si uoluerint capere uirtutes, peruenire ad angelicam dignitatem. Corporales quoque substantias penitus dilapsuras: aut certe in fine omnium hoc esse futura corpora, quod nunc est æther, & cælum, & si quod aliud corpus sincerius & purius intelligi potest. Quod cum ita sit; quid de resurrectione sentiat, perspicuum est. Solem quoque, & lunam, & astra cetera, esse animantia; immo quo modo nos homines ob quædā peccata his sumus circumdati corporibus, quæ crassa sunt, & pigra; sic & cæli luminaria, talia uel talia accepisse corpora, ut uel plus uel minus luceant; & dæmones, ob maiora delicta, aereo corpore esse uestitos: Omnem creaturam, secundum Apostolum, uanitati esse subiectam, & liberari *Rom. 8* in reuelationem filiorum Dei. Ac ne quis putet nostrum esse quod dicimus, ipsius uerba ponamus. In fine atque cōsummationem mundi, quando uelut de quibusdam repagulis atque carceribus missæ fuerint a Domino animæ, & rationabiles creaturæ, alias earum tardius incedere ob segnitatem, alias perniti uolare cursu propter industriam. Cumq. omnes liberum habeant arbitrium, & sponte sua uel uirtutes possint capere, uel uitia: illæ multo in peiori condicione erunt, quam nunc sunt; hæ ad meliorem statum peruenient: quia diuersi motus, & uariæ uoluntates in utramque partem diuersum accipient statum, idest, ut angeli homines, uel dæmones, & rursus ex his homines, uel angeli fiant. Cumq. omnia uario sermone tractasset, asserens diabolum non incapacem esse uirtutis, & tamen necdum uelle capere uirtutem; ad extremum sermone latissimo disputauit,

tavit, angelum, siue animam, aut certe dæmonem, quos unius asserit esse naturæ, sed diuersarum uoluntatum, pro magnitudine negligentæ, & stultitiæ iumentum posse fieri; & pro dolore pœnarum & ignis ardore, magis eligere ut brutum animal sit, & in aquis habitet & fluctibus, ac corpus assumere huius uel illius pecoris: ut nobis non solū quadrupedum, sed & piscium corpora sint timenda. Et ad extremum, ne teneretur Pythagorici dogmatis reus, qui asserit μετεμύχουσιν, post tam nefandam disputationem, qua lectoris animum uulnerauit, Hæc, inquit, iuxta nostram sententiā non sint dogmata, sed quæsitā tantum, atque proiecta; ne penitus intractata uiderentur. In secundo autem libro mundos asserit innumerabiles, non, iuxta Epicurum, uno tempore plurimos, & sui similes, sed, post alterius mundi finem, alterius esse principium: & ante hunc nostrum mundum, alium fuisse mundum; & post hunc alium esse futurum, & post illum alium, rursūq. ceteros post ceteros. Et dubitat utrum futurus sit mundus alteri mundo ita ex omni parte consimilis, ut nullo inter se distare uideantur: an certe numquam mundus alteri mundo ex toto indiscretus & similis sit futurus. Rursūq. post modicum, si omnia, inquit, (ut ipse disputationis ordo compellit) sine corpore uixerint, consumetur corporalis uniuersa natura; & redigetur in nihilum, quæ aliquando facta est de nihilo; eritq. tempus, quo usus eius iterum necessarius sit. Et

1. Cor. 15 in consequentibus: Sin autem, ut ratione & scripturarum auctoritate monstratum est, corruptiū hoc induerit incorruptionem, & mortale hoc induerit immortalitatem: absorbebitur mors in uictoriam, & corruptio in incorruptionem: & forsitan omnis corporea natura tolletur e medio, in qua sola potest mors operari. Et post paululum: Si hæc non sunt contraria fidei, forsitan sine corporibus aliquando uiuemus. sin autem, qui perfecte subiectus est Christo, absque corpore intelligitur; omnes autem subiiciendi sunt Christo: & nos erimus sine corporibus, quādo ei ad perfectū subiecti fuerimus. Et in eodem loco: Cum subiecti fuerint

rint omnes Deo, omnes deposituri sunt corpora : & tunc cor-
 poralium rerum uniuersa natura soluetur in nihilum : quæ, si
 secundo necessitas postularit, ob lapsum rationabilium crea-
 turarum rursus existet. Deus enim in certamen & luctam
 animas dereliquit, ut intelligant plenam consummatamq.
 uictoriam non ex propria se fortitudine, sed ex Dei gratia
 consecutas. Et ideo arbitror pro uarietate causarum di-
 uersos mundos fieri ; & elidi errores eorum, qui similes sui
 mundos esse contendunt. Et iterum : Triplex ergo suspicio
 nobis de fine suggeritur : e quibus quæ uera & melior sit, le-
 stor inquirat. Aut enim sine corpore uiuimus, cum subie-
 cti Christo subiiciemur Deo, & Deus fuerit omnia in omni-
 bus : aut, quo modo Christo subiecta, cum ipso Christo sub-
 iicientur Deo, & in unum fœdus arctabuntur ; ita omnis
 substantia redigetur in optimam qualitatem, & dissoluetur
 in ætherem, quod purioris simpliciorisq. naturæ est : aut
 certe sphaera illa, quæ supra appellauimus *ἀπλανῆς*, & quid-
 quid illius circulo continetur, dissoluetur in nihilum : illa
 uero, quæ *ἀντιζώνη* ipsa tenetur, & cingitur, uocabitur ter-
 ra bona : necnon & altera sphaera, quæ hanc ipsam terram
 circumdabit uertigine, & dicitur cælum, in sanctorum habi-
 taculum conseruabitur. Cum hæc dicat, nonne manifestissi-
 me gentium sequitur errores, & philosophorum deliramē-
 ta simplicitati ingerit Christianæ ? Et in eodem libro : Re-
 stat, ut inuisibilis sit Deus. si autem inuisibilis per naturam
 est, neque saluatori uisibilis erit. Et in inferioribus : Nulla
 alia anima, quæ ad corpus descendit humanum, puram &
 germanam similitudinem signi in se prioris expressit, nisi il-
 la, de qua saluator loquitur : Nemo tollet animam meam Ion. 10
 a me, sed ego pono eam a me ipso. Et in alio loco : Vnde
 cum infinita cautione tractandum est, ne forte, cum ani-
 mæ salutem fuerint consecutæ, & ad beatam uitam perue-
 nerint, animæ esse desistant. sicut enim uenit Dominus at-
 que saluator querere & saluum facere quod perierat, ut per-
 ditum esse desit : sic anima, quæ perierat, & ob cuius
 salutem uenit Dominus, cum salua facta fuerit, anima esse
 cessabit. Luc. 19

cessabit. Illud quoque pariter requirendum, utrum, sicut
 perditum aliquando non fuit perditum, & erit tempus quā
 do perditum non erit; sic & anima aliquando fuerit non
 anima, & fore tempus, quando nequaquam anima perse-
 ueret. Et post inultum de anima tractatum hæc intulit. *vēs*,
 idest, mens corruens, facta est anima: & rursus anima in-
 structa uirtutibus, mens fiet. Quod & de anima Esau scru-
 tantes possumus inuenire, propter antiqua peccata eum in
 deteriori uita esse damnatum. Et de cælestibus requiren-
 dum est, quod non eo tempore, quo factus est mundus,
 solis anima, uel quodcumque eam appellari oportet, esse
 cœperit, sed antequam lucens illud & ardens corpus intra-
 ret. De luna, & stellis similiter sentiamus; quod ex cau-
 sis præcedentibus, licet inuite compulsæ sint, subiici uani-
 tati, ob præmia futurorum; non suam facere, sed creato-
 ris uoluntatem, a quo in hæc officia distributæ sunt. Ignis
 quoque gehennæ & tormenta, quæ scriptura sancta pecca-
 toribus comminatur, non punit in suppliciis, sed in con-
 scientia peccatorum, quando Dei uirtute & potentia omnis
 memoria delictorum ante oculos nostros ponitur; & ueluti
 ex quibusdam seminibus, in anima derelictis, uniuersa
 uitiorum seges exoritur; & quidquid feceramus in uita, uel
 turpe, uel impium, omnis eorum in conspectu nostro pi-
 ctura describitur; ac præteritas uoluptates mens intuens cō-
 scientiæ, punitur ardore, & pænitudinis stimulis confodi-
 tur. Et iterum: Nisi forte corpus hoc pingue, atque terre-
 num, caligo, & tenebræ nominandæ sunt; per quod, con-
 summato hoc mundo, cum necesse fuerit in alium transire
 mundum, rursus nascendi sumet exordia. Hæc dicens,
 perspicue *uereu. λέγων* Pythagoræ, Platonisq. defendit.
 Et in fine secundi uoluminis de perfectione nostra disputas,
 intulit. Cumq. intantum profecerimus, ut nequaquam car-
 nes & corpora, forsitan ne animæ quidem fuerimus, sed
 mens & sensus ad perfectum ueniens, nulloq. perturbatio-
 num nubilo caligans, intuebitur rationabiles intelligibi-
 lesq. substantias, facie ad faciem. In libro quoque tertio
 hæc

hæc uitia continentur. Sin autem semel recipimus, quod ex præcedentibus causis aliud uas in honorem, aliud in contumeliam sit creatum: cur non recurramus ad animæ arcum, & intelligamus eam egisse antiquitus, propter quod in altero dilecta, in altero odio habita sit, antequam in Iacob corpore supplantaret, & in Esau planta teneretur a fratre? Et iterum: Vt autem aliæ animæ fierent in honorem, aliæ in contumeliam, materiarum causarumq. merita præcesserunt. Et in eodem loco: Iuxta nos autem ex præcedentibus meritis, uas, quod in honorem fuerit fabricatum, si non dignum uocabulo suo opus fecerit, in alio sæculo fiat uas contumeliæ: & rursum uas illud, quod ex anteriori culpa contumeliæ nomen acceperat, si in præsentia uita corrigi uoluerit, in noua creatione fiet uas sanctificatum, & utile Domino, in omne opus bonum paratum. Statimq. subiungit: Ego arbitror posse quosdam homines, a paruís uitiis incipientes, ad tantam nequitiam peruenire; si tamen noluerint ad meliora conuerti, & pænitentia emendare peccata; ut & contrariæ fortitudines fiant, et rursum ex inimicis contrariisq. uirtutibus, intantum quosdã per multa tempora uulneribus suis adhibere medicinam, & fluentia prius delicta constringere, ut ad locum transeant optimorum. Sæpius diximus, in infinitis perpetuisq. sæculis, in quibus anima subsistit, & uiuit, sic nonnullas earum ad peiora corruere, ut ultimum malitiæ locum teneant; & sic quasdam proficere, ut de ultimo malitiæ gradu ad perfectam ueniant consummatamq. uirtutem. Quibus dictis conatur ostendere, & homines, idest, animas posse fieri dæmones, & rursum dæmones in angelicam redigi dignitatem. Atque in eodem uolumine. Sed & hoc requirendum, quare humana anima nunc ab his, nunc ab aliis uirtutibus ad diuersa moueatur. Et putat quorundam, ante quam uenirent in corpora, merita præcessisse: ut est illud Ioannis exultantis in utero matris suæ, quando, ad uocem salutationis Mariæ, indignam se confabulatione eius Elizabet confitetur. Statimq. subiungit: Et ecōtrario paruuli

Rom.9

Gen. 25

2.Tim.2

Luc.1

uuli licet & pene lactentes malis replentur spiritibus, & in diuinos atque hariosos inspirantur, intantum, ut etiam demon Pythonicus quosdam a tenera ætate possideat: quos derelictos esse apud prouidentiam Dei, cum nihil tale fecerint, ut istiusmodi insaniam sustinerent, non est eius, qui nihil uult absque Deo fieri, & omnia illius iustitia gubernari. Rursumq. de mundo, Nobis autem, inquit, placet, & ante hunc mundum alium fuisse mundum; & post istum, alium futurum. Vis discere, quod post corruptionem huius mundi alius sit futurus? audi Esaïam loquentem: Erit cælum nouum, & terra noua; quæ ego facio permanere in conspectu meo. Vis nosse, quod ante fabricam istius mundi, alii mundi in præterito fuerint? ausculta Ecclesiasten:

Esa. 65 Quid est, quod fuit? ipsum, quod erit. et quid est, quod factum est? ipsum, quod futurum est. et non est omne nouum sub sole, quod loquatur, & dicat: Ecce hoc nouum est: iam enim fuit in sæculis pristinis, quæ fuerunt ante nos. Quod testimonium non solum fuisse, sed futuros mundos esse testatur; non quod simul & pariter omnes fiant, sed alius post alium. Statimq. subiungit. Diuinitus habitaculum, & ueram requiem apud superos existimo intelligi: in qua creaturæ rationabiles commorantes ante quam ad inferiora descenderent, & de inuisibilibus ad uisibilia commigrarent, ruentesq. ad terram, crassius corporibus indigerent, antiqua beatitudine fruebantur. unde conditor Deus fecit eis congrua humilibus locis corpora, & mundum istum uisibilem fabricatus est; ministrosq. ob salutem & corruptionem eorum, qui ceciderunt, misit in mundum; ex quibus alii certa obtinerent loca, & mundi necessitatibus obedirent; alii iniuncta sibi officia, singulis quibusque temporibus, quæ nouit artifex Deus, sedula mente tractarent. et ex his sublimiora mundi loca sol, & luna, & stellæ, quæ ab

Rom. 8 Apostolo creatura dicitur, acceperunt: quæ creatura uanitati subiecta est, eo quod crassis circumdata corporibus, & aspectui pateat, & tamen non sponte subiecta est uanitati, sed propter uoluntatem eius, qui eam subiecit in spe.

Et

Et iterum : Alii uero in singulis locis , atque temporibus , quæ solus artifex nouit , mundi gubernaculis seruiunt , quos angelos eius esse credimus . Et post paululum : Quem rerum ordinem totius mundi regit prouidentia , dum aliæ uirtutes de sublimioribus corruunt , aliæ paulatim labuntur in terras . Istæ uoluntariæ descendunt , aliæ præcipitantur in uitæ . Hæ sponte suscipiunt ministeria , ut ruentibus manum porrigant : illæ coguntur ingrate , ut tanto tempore in suscepto officio perseuerent . Et iterum : Ex quo sequitur , ut ob uarios motus uarii creentur & mundi ; & post hunc , quem incolimus , alius multo dissimilis mundus fiat . Nullusq. alius diuersis casibus & profectibus , uel uirtutum præmiis , uel uitiorum suppliciis , & in præsentī , & in futuro , atque in omnibus & retro , & postea temporibus potest merito dispensare , & ad unum rursum finem cuncta pertrahere , nisi solus conditor omnium Deus , qui scit causas , propter quas alios permittat sua perfrui uoluntate , & de maioribus ad ultima delabi , alios incipiat uisitare , et gradatim , quasi manu data , ad pristinum retrahere statum , & in sublimibus collocare . Cumq. de fine disputare cœpisset , hæc intulit : Quia , ut crebro iam diximus , principium rursus ex fine generatur ; queritur utrum & tunc futura sint corpora , an sine corporibus aliquando uiuendum sit , cum reducta in nihilum fuerint , & incorporealis uita incorporealis esse credenda sit ; qualem & Dei nouimus . Nec dubium est , quin , si omnia corpora ad mundum istum sensibilem pertineant , quæ appellantur ab Apostolo uisibilia , futura sit uita incorporealis incorporealis . Et paulo post : Illud quoque , quod ab eodem Apostolo dicitur : Omnis creatura liberabitur a seruitute corruptionis , in libertatem gloriæ filiorum Dei : sic intelligimus , ut primam creaturam rationabilium & incorporealem esse dicamus , quæ non seruiat corruptioni , eo quod non sit uestita corporibus ; & , ubicumque corpora fuerint , statim corruptio subsequatur . Postea autem liberabitur de seruitute corruptionis , quando receperint gloriam filii Dei , & Deus fuerit omnia in omnibus

Joan. 18

bus. Et in eodem loco: Vt autem incorporeum finem omnium rerum esse credamus, illa nos saluatoris oratio prouocat, in qua ait: Vt, quo modo ego & tu unum sumus, sic & isti in nobis unum sint. Etenim scire debemus, quid sit Deus, & quid sit futurus in fine saluator; & quo modo in sanctis similitudo patris & filii repromissa sit; quo modo in se illi unum sint, sic & isti in eis unum sint. Aut enim suscipiendum est, uniuersitatis Deum uestiri corpore, & quo modo nos carnibus, sic illum qualibet materia circumdari; ut similitudo uitæ Dei, in fine sanctis possit æquari: aut, si hoc indecens est, maxime apud eos, qui saltem ex minima parte Dei sentire cupiunt maiestatem, & ingentis atque omnia excedentis naturæ gloriam suspicari; e duobus alterum suscipere cogimur, ut aut desperemus similitudinem Dei, si eadem semper sumus corpora habituri; aut, si beatitudo nobis eiusdem cum Deo uitæ promittitur, eadem, qua uiuit Deus, nobis condicione uiuendum est. Ex quibus omnibus approbatur, quid de resurrectione sentiat, & quod omnia corpora interitura confirmet, ut simus absque corporibus, quo modo prius fuimus, ante quam crassis corporibus uestiremur. Rursumq. de mundorum uarietate disputans, & uel ex angelis dæmones, uel de dæmonibus angelos, siue homines futuros esse contestans, & e contrario ex hominibus dæmones, & omnia ex omnibus, sententiam suam tali fine confirmat. Nec dubium est, quin, post quædam interualla temporum, rursus materia subsistat; et corpora fiant; & mundi diuersitas cõstruatur, propter uarias uoluntates rationabilium creaturarum, quæ post perfectam beatitudinem usque ad finem omnium rerum paulatim ad inferiora dilapsæ, tantam malitiam receperunt, ut in contrarium uerterentur; dum nolunt seruare principium, & incorruptam beatitudinem possidere. Nec hoc ignorandum, quod multæ rationabiles creaturæ usque ad secundum & terrium & quartum mundum seruent principium, nec mutationi in se locum tribuât: aliæ uero tam parum de pristino statu amissuræ sint, ut pene nihil per-

perdidisse uideantur: & nonnullæ, grandi ruina, in ultimum præcipitandæ sint barathrum. Nouitq. dispensator omnium Deus, in condicione mundorum singulis abuti iuxta meritum, & opportunitates, & causas, quibus mundi gubernacula sustentantur, & initiantur; ut, qui omnes uicerit nequitia, & penitus se terræ coæquauerit, in alio mundo, qui postea fabricandus est, fiat diabolus, principium plasmationis Domini; ut illudatur ei ab angelis, qui exordii amittere uirtutem. Quibus dictis, quid aliud conatur ostendere, nisi huius mundi homines peccatores, in alio mundo posse diabolum, & dæmones fieri? et rursum, nunc dæmones, in alio mundo posse uel angelos, uel homines procreari? Et post disputationem longissimam, qua omnē creaturam corpoream in spiritualia corpora & tenuia dicit esse mutandam, cunctamq. substantiam in unum corpus mundissimum, & omni splendore purius conuertendam, & talem, qualem nunc humana mens non potest cogitare, ad extremum intulit: Et erit Deus omnia in omnibus, ut uniuersa natura corporea redigatur in eam substantiam, quæ omnibus melior est, in diuinam scilicet, qua nulla est melior. In quarto quoque libro, qui operis eius extremus est, hæc ab Ecclesia Christi damnanda interserit. Et forsitan, quo modo in isto mundo qui moriuntur separatione carnis & animæ, iuxta operum differentiam diuersa apud inferos obtinent loca: sic, qui de cælestis Hierusalem, ut ita dicam, administratione moriuntur, ad nostri mundi inferna descendunt; ut, pro qualitate meritorum, diuersa in terris possideant loca. Et iterum. Et quia comparauimus, de isto mundo ad inferna pergentes animas iis animabus, quæ de superiori cælo ad nostra habitacula perueniētes quodam modo mortuæ sunt; prudenti inuestigatione rimandum est, an hoc ipsum possimus etiam in natiuitate dicere singularum; ut, quo modo quæ in ista terra nostra nascuntur animæ, uel de inferno rursum, meliora cupientes, ad superiora ueniunt, & humanum corpus assument, uel de melioribus locis ad nos usque descendunt, sic & ea loca, quæ

Y y

supra

supra sunt in firmamento, aliæ animæ possideant, quæ de nostris sedibus ad meliora proficiant, aliæ, quæ de cælestibus ad firmamentum usque delapsæ sunt, nec tantum fecere peccatum, ut ad loca, quæ incolimus, truderentur. Quibus dictis, nititur approbare, & firmamentum, idest, cælum, ad comparationem superioris cæli esse inferos; & hanc terram, quâ incolimus, collatione firmamenti inferos appellari; & rursum, ad comparationem inferiorum, qui subter nos sunt, nos cælum dici; ut, quod aliis infernus est, aliis cælum sit. Nec hac disputatione contentus, dicit in fine omnium rerum, quando ad cælestem Hierusalem reuersuri sumus, aduersariarum fortitudinum contra populum Dei bella consurgere; ut non sit eorum otiosa uirtus, sed exerceantur ad prælia, & habeant materiam roboris, quam consequi non possint, nisi fortes primum aduersariis resisterint; quos ratione, & ordine, & solertia repugnandi, in libro Numerorum legimus esse superatos. Cumq. dixisset

Num. 10. 26. iuxta Ioannis Apocalypsim, euangelium sempiternum, idest, futurum in cælis tantum præcedere hoc nostrum euangelium, quantum Christi prædicatio legis ueteris sacramenta; ad extremum intulit, (quod & cogitasse sacrilegum est) pro salute dæmonum Christum etiam in aere, & in supernis locis esse passurum. Et licet ille non dixerit, tamen, quod consequens sit, intelligitur: sicut pro hominibus homo factus est, ut homines liberaret; sic & pro salute dæmonum Deum futurum, quod sunt ii, ad quos uenturus est liberandos. Quod ne forsitan de nostro sensu putemur asserere, ipsius uerba ponenda sunt. Sicut enim per umbram euangelii, umbram legis impleuit: sic, quia omnis lex exemplum & umbra est cærimoniarum cælestium, diligentius requirendum, utrum recte intelligamus, legem quoque cælestem, & cærimonias superni cultus plenitudinem non habere, sed indigere euangelii ueritate, quod in Ioannis Apocalypsi euangelium legimus sempiternum, ad comparationem uidelicet huius nostri euangelii, quod temporale est, & in transitorio mundo ac sæculo prædicatum. Quod quidem

quidem etiam si usque ad passionem Domini saluatoris inquirere uoluerimus; quamquam audax & temerarium sit, in cælo eius quærere passionem: tamen, si spiritualia nequitie in cælestibus sunt, & non erubescimus crucem Domini confiteri propter destructionem eorum, quæ sua passione destruxit; cur timeamus, etiam in supernis locis, in consummatione sæculorum aliquid simile suspicari, ut omnium locorum gentes illius passione saluentur? Rursumq. blasphemans de filio sic locutus est: Si enim patrem cognoscit filius; uidetur in eo, quod nouit patrem, posse eum comprehendere: ut, si dicamus artificis animum artis scire mensuram. Nec dubium, quin, si pater sit in filio, comprehendatur ab eo, in quo est. Sin autem comprehensionem eam dicimus, ut non solum sensu quis & sapientia comprehendat, sed & uirtute, & potentia cuncta teneat, qui cognouit: non possumus dicere, quod comprehendat filius patrem: pater uero omnia comprehendit. inter omnia autem & filius est, ergo & filium comprehendit. Et ut sciremus causas, quibus pater comprehendat filium, & filius patrem non queat comprehendere; hæc uerba subnectit. Curiosus lector inquirat, utrum ita a semet ipso cognoscatur pater, quo modo cognoscitur a filio: sciensq. illud, quod scriptum est: Pater, qui me misit, maior me est: in omnibus uerum Ioan. 14 esse contendit, ut dicat, & in cognitione filio patrē esse maiorem, dum perfectius & purius a semet ipso cognoscitur, quam a filio. Μετεμψύχωσιν quoque & abolitionem corporum, per hoc rursum sentire conuincitur. Si quis autem potuerit ostendere, incorporalem rationabilemque naturam, cum expolauerit se corpore, uiuere per semet ipsam; & in peiori condicione esse, quando corporibus uestitur; in meliori, quando illa deponit: nulli dubium est, corpora non principaliter subsistere, sed per interualla & ob uarios motus rationabilium creaturarum nunc fieri; ut, qui his indigent, uestiantur; & rursum, cum illa deprauatione lapsos se ad meliora correxerint, dissolui in nihilum; & hac semper successione uariari. Et ne paruam putaremus impietatem

Y y z tem

tem esse eorum, quæ præmiserat, in eiusdem uoluminis fine coniūgit: omnes rationabiles naturas, idest, Patrem, & Filium, & Spiritum sanctum, angelos, potestates, dominationes, ceterasq. uirtutes, ipsum quoque hominem secundum animæ dignitatem unius esse substantiæ. Intellectualem, inquit, rationabilemque naturam sentit Deus, & unigenitus Filius eius, & Spiritus sanctus; sentiunt angeli, & potestates, ceteræque uirtutes; sentit interior homo, qui

Gen. 1 ad imaginem & similitudinem Dei conditus est. ex quo concluditur, Deum, & hæc quodam modo unius esse substantiæ. Vnum addit uerbum, Quodam modo, ut tanti sacrilegii crimen effugeret: & qui in alio loco Filium & Spiritum sanctum non uult de patris esse substantia, ne diuinitatem in partes secare uideatur; naturam omnipotentis Dei angelis hominibusque largitur. Cum hæc ita se habeant; quæ insania est, paucis de Filio & Spiritu sancto commutatis, quæ apertam blasphemiam præferebant, cetera, ita ut scripta sunt, protulisse in medium, & impia uoce laudasse; cum utique & illa, & ista de uno impietatis fonte processerint? Aduersum omnia scribere, nec huius est temporis; & omnes, qui aduersus Arium, & Eunomium, Manichæumque & diuersas scripserunt hæreses, his quoque impietatibus respondisse credendi sunt. Quisquis igitur hos

Exod. 12 uoluerit legere libros, & calciatis pedibus ad terram repositionis pergere, necubi a serpentibus mordeatur, & arcuato scorpii uulnere uerberetur; legat prius hunc librum; & , ante quam ingrediatur uiam, quæ sibi cauenda sint, nouerit.

ARGVMENTVM.

EPIPHANIVS, *Salaminae Cypri Episcopus, & intimus D. Hieronymi, a quo epistola uersa est, amicus, excusat se Ioanni Episcopo Hierosolymitano, quod presbyterum ordinavit in eius diœcesi, ipso inconsulto. Deinde, ut ab Origenis erroribus, quos multos interea recenset, caueat, hortatur. Postremo, cur uelum ad ecclesiae fores pendens, in quo hominis imago depicta erat, sciderit, rationem reddit.*

EPIPHANIVS IOANNI EPISCOPO

Hierosolymorum.

EPISTOLA LX.

DOMINO, dilectissimo fratri, Ioanni episcopo Epiphanius. Oportebat nos, dilectissime, clericatus honore non abuti in superbiam, sed custodia mandatorum Dei & obseruatione diligentissima hoc esse, quod dicimur. Si enim sancta scriptura loquitur: Cleri eorum nō Hier. 12 proderunt eis: quæ arrogantia clericatus conducere nobis poterit, qui non solum cogitatione, & sensu, uerum etiam sermone peccamus? Audiui quippe, quod tumeas contra nos, & irascaris, & miniteris scribere in extremos fines terræ: ut loca prouinciasq. non nominem. Et ubi est Dei timor, qui nos debet illo tremore concutere, qui dictus est a Domino: Si quis irascitur fratri suo sine causa, reus erit iudicio? Non quod magnopere curem, si scribas quod placuerit. Matth. 5 scribebantur enim & epistolæ biblynæ iuxta Esa. 8 Esaiam: & mittebantur super aquas, quæ cito cum sæculo transeunt. Nihil tibi nocuimus, nihil iniuriæ fecimus, nec quidquam uiolenter extorsimus. In monasterio fratrum, & fratrum peregrinorum, qui prouinciæ nihil tuæ deberent, & propter nostram paruicatem, & litteras, quas ad eos crebro direximus, communionis quoque tuæ cœperunt habere discordiam, ne uiderentur, quadam duritia & conscientia nostra, antiquæ fidei ab Ecclesia separari, ordinauimus diaconum:

Yy 3 &

& postquam ministravit, rursus presbyterum: super quo debueras gratulari, intelligens quod ob Dei timorem hoc sumus facere compulsi: maxime cum nulla sit diuersitas in sacerdotio Dei, & ubi utilitati Ecclesie prouidetur. nam etsi singuli ecclesiarum episcopi habent sub se ecclesias, quibus curam uidentur impendere, & nemo super alienam mensuram extenditur: tamen præponitur omnibus caritas Christi, in qua nulla simulatio est: nec considerandum, quid factum sit, sed quo tempore, & quo modo, & in quibus, & quare factum sit. Cum enim uidissem, quia multitudo sanctorum fratrum in monasterio consisteret; & sancti presbyteri Hieronymus & Vincentius propter uerecundiam & humilitatem nollent debita nomini suo exercere sacrificia, & laborare in hac parte ministerii, quæ Christianorum præcipua salus est; inuenire autem & comprehendere seruum Dei non posses, qui te, eo quod graue onus sacerdotii nollet suscipere, sæpe fugiebat; sed nec alius quis episcoporum facile eum reperiret: unde & satis miratus sum, quo modo dispensatione Dei ad nos uenerit cum diaconis monasterii, & ceteris fratribus, ut mihi satisfaceret, quia nescio quid aduersum eos habebam tristitiae: cum igitur celebraretur collecta in ecclesia uillæ, quæ est iuxta monasterium nostrum, ignorantem eum, & nullam penitus habentem suspicionem, per multos diaconos apprehendi iussimus, & teneri os eius; ne forte, liberari se cupiens, adiuraret nos per nomen Christi: & primum diaconum ordinauimus, proponentes ei timorem Dei, & compellentes ut ministraret. ualde quippe obnitebatur, indignum se esse contestans. Vix ergo compulimus eum, & persuadere potuimus testimoniis scripturarum, & propositione mandatorum Dei. Et cum ministraret in sanctis sacrificiis, rursus eum, ingenti difficultate tento ore eius, ordinauimus presbyterum; & uisdem uerbis, quibus antea suaferamus, impulimus ut sederet in ordine presbyterii. Post hæc scripsimus ad sanctos presbyteros monasterii, & ceteros fratres: & increpauimus eos, quare non scripsissent super eo, cum ante
annum

annum multos eorum queri audissem, cur non haberent, qui sibi Domini sacramenta conficerent, & illum omnes suo poscerent testimonio, & grandem utilitatem in commune monasterii testarentur: quare tunc, reperta opportunitate, non scripsissent nobis, neque super ordinatione eius aliquid poposcissent. Hæc ita acta sunt, ut locutus sum, in caritate Christi, quam te erga paruitatem nostram habere credebam: quamquam in monasterio ordinauerim, & non in parochia, quæ tibi subiecta sit. O uere benedicta episcoporum Cypri mansuetudo, & bonitas, & nostra rusticitas sensu tuo & arbitrato digna misericordia Dei. Nam multi episcopi communionis nostræ & presbyteros in nostra ordinauerunt prouincia, quos nos comprehendere non potueramus; & miserunt ad nos diaconos & hypodiatonos, quos suscepimus cum gratia. & ipse cohortatus sum beatæ memoriæ Philonem episcopum, & sanctum Theoprobum, ut in ecclesiis Cypri, quæ iuxta se erant, ad meam autem parochiam uidebantur ecclesiam pertinere, eo quod grandis esset, & late patens prouincia, ordinarent presbyteros, & Christi Ecclesiæ prouiderent. Numquam autem ego ordinaui diaconissas, & ad alienas nisi prouincias, neque feci quidquam ut Ecclesiam scinderem. Quid ergo tibi uisum est, sic grauitur intumescere, & iactari contra nos pro opere Dei, quod in ædificationem, & non in destructionem fratrum factum est? Sed & illud uehementer admiratus sum, quod meis locutus es clericis, asserens te per sanctum presbyterum & abbatem monachorum Gregorium mandasse mihi, ne quemquam ordinarem; & ego hoc pollicitus sum, dicēs: Numquid iuuenis sum, aut canones ignoro? Audi igitur ueritatem in sermone Dei, me hoc nec audisse, nec nosse, nec istius sermonis penitus recordari. Suspiciatus autem sum, ne forsitan inter multa quasi homo oblitus essem: & ob hanc causam sanctum Gregorium sciscitatus sum, & Zenonem presbyterum, qui cum eo est. e quibus abbas Gregorius respondit, se hoc penitus ignorare: Zenonem autem dixit, quia cum ei presbyter Rufinus nescio quæ alia transi-

torie loqueretur, etiam hoc dixerit: Putas ne, aliquos ordinaturus est sanctus episcopus? Et hucusque stetit sermo nem. Ego autem Epiphanius nec audiui quidquam, nec respondi. Vnde, dilectissime, non te præueniat furor, nec occupet indignatio, nec frustra mouearis; & aliud dolens, te uertas ad alia, ut peccandi occasionem intuenisse uidearis. Quod propheta deuotans, Dominum precatur, dicens: *Psal. 140* Non declines cor meum in uerba malitiæ, ad excusandas excusationes in peccatis. Illud quoque audiens admiratus sum, quod quidam, qui solent ultro citroque portare rumusculos, & iis, quæ audierunt, semper addere, ut tristitias, & rixas inter fratres concitent, te quoque turbauerunt, & dixerunt, quod in oratione, quando offerimus sacrificia Deo, soleamus pro te dicere: Domine, præsta Ioanni ut recte credat. Noli nos intantum putare rusticos, ut hoc tam aperte dicere potuerimus. quamquam enim hoc in corde meo semper orem: tamen, ut simpliciter fatear, numquam in alienas aures protuli; ne te uiderer parui pendere, dilectissime. quando autem complemus orationem secundum ritum mysteriorum, & pro omnibus & pro te quoque dicimus: Custodi illum, qui prædicat ueritatem. Vel certe ita: Tu præsta Domine, & custodi, ut ille uerbum prædicet ueritatis: sicut occasio sermonis se tulerit, & habuerit oratio consequentiam. Quapropter obsecro te, dilectissime, & aduolutus pedibus tuis precor, præsta mihi, & tibi, ut salueris, sicuti scriptum est, a generatione peruersa; & recede ab hæresi Origenis, & a cunctis hæresibus, dilectissime. Video enim, quod propter hanc causam omnis uestra indignatio concitata sit, quod dixerim uobis, Arii patrem, Origenem scilicet, & aliarum hæreseon radicem, & parentem laudare non debetis. Et cum uos rogarem, ne ita erraretis, & monerem, contradixistis, & me ad tristitiam atque lacrymas adduxistis, non solum autem me, sed & alios plurimos catholicos, qui intererant. Inde, ut intelligo, hæc est omnis indignatio, & iste furor. Et ideo comminamini, quod mittatis aduersum me epistolas, ut huc illucque sermo uester

uester discurrat: & propter defensionem hæreseos aduersum me odia suscitantes, rumpitis caritatem, quam in uos habuimus; intantum, ut feceritis nos etiam penitentiam agere, quare uobis communicauerimus, ita Origenis errores & dogmata defendentibus. Simpliciter loquor: nos, secun- Matth. 8
 dum quod scriptum est, nec oculo nostro parcimus, ut non effodiamus eum, si nos scandalizauerit; nec manui, neque pedi, si nobis scandalum fecerit. & uos ergo, siue oculi nostri, siue manus, siue pedes fueritis, similia sustinebitis. quis enim catholicorum possit æquo animo sustinere, & eorū, qui fidem suam bonis operibus exornant, ut audiant Origenis doctrinam, atque consilium, & credant præclaræ illius prædicationi? Non potest Filius uidere Patrem, neque Spiritus sanctus uidere Filium? Hæc in libris *τῶν ἀρχαίων* scribuntur, his uerbis legimus, & ita locutus est Origenes. Sicut enim incongruum est dicere, quod possit Filius uidere Patrem: sic inconsequens est opinari, quod Spiritus sanctus possit uidere Filium. Illud quoque quis Origenem dicentem patiat, quod animæ, angeli fuerint in cælis; & postquam peccauerint in supernis, deiectas esse in istum mundum; & quasi in tumulos, & sepulcra, sic in corpora ista relegatas, pœnas antiquorum luere peccatorum? & corpora credentium non templa Christi esse, sed carceres damnatorum? Exinde ueritatem historię, allegorię deprauans mendacio, infinita uerba multiplicat: & simplices quosque uaria persuasione supplantans, nunc asserit animas, iuxta Græcam etymologiam, *ψυχὰς* ἀπὸ τῆ *ψυχῆς* iccirco uocitatas, quia de cælestibus ad inferiora uenientes, calorem pristinum amiserint: nunc corpus hoc, ob id iuxta Græcos *δέμας*, idest, uinculum, siue, iuxta aliam proprietatem, cadauer dici, quia animæ de cælo ruerint: a plerisque autem, secundum uariam Græci sermonis suppellectilem, *σῶμα*, idest, corpus, *σῆμα*, idest, monumentum interpretari, eo quod ita animam in se clausam habeat, quo modo sepulcra & tumuli cadauera mortuorum. Et si hoc uerum est, ubi est fides nostra? ubi præconium resurrectionis? ubi aposto-

laca

Gen. 1.9

doctrina, quæ in ecclesiis Christi hucusque perdurat? ubi illa benedictio ad Adam, & ad semen eius, & ad Noe, & filios eius: Crescite, & multiplicamini, & replete terram? Iam non erit benedictio, sed maledictio, iuxta Origenem, qui angelos uertit in animas, & de sublimi fastigio dignitatis facit ad inferiora descendere: quasi Deus generi humano non possit animas per benedictionem dare, nisi angeli peccauerint, & tot in cælo sint ruinæ, quot in terra natiuitates. Dimittenda ergo nobis est doctrina apostolorum, & prophetarum, & legis, & ipsius Domini saluatoris in euangelio pertonantis. Econtrario Origenes præcipit, & legem dat, ut non dicam constringit discipulos suos; ne quis oret in cælum ascendere; ne peius iterum peccans, quam in terris ante peccauerat, præcipitur in mundum. Quamquam istiusmodi nugæ & deliramenta soleat ille scripturarum interpretatione peruersa, & aliud significante, quam quod uerum est, affirmare, dicens: Priusquam a malitia humiliarer, ego deliqui. Et illud: Reuertere anima mea in requiem tuam. Nec Psal. 141. 114. & illud: Educ de carcere animam meam. Et in alio loco: Psal. 118. 114. Confitebor Domino in regione uiuorum. cum alius proculdubio sensus scripturæ diuinæ sit, quam ille in hæresim sua maligna interpretatione detorquet. Quod faciunt & Manichæi, & Gnostici, & Hebionitæ, & Marcionis sectatores, & aliæ hæreses numero octoginta; quæ de purissimo scripturarum fonte assumentes testimonia, non ita interpretantur ut scripta sunt, sed simplicitatem sermonis ecclesiastici id uolunt significare, quod ipsi sentiunt. Illud quoque, quod asserere nititur, doleam ne, an rideam, nescio. Doctor egregius Origenes audet docere, diabolum id rursus futurum esse, quod fuerat, & ad eandem rediturum dignitatem, & conscensurum regna cælorum. Pro nefas, quis tam uecors, & stolidus, ut hoc recipiat, quod sanctus Ioannes Baptista, & Petrus, & Ioannes apostolus & euangelista, Esaias quoque, & Hieremias, & reliqui prophetae coheredes fiant diaboli in regno cælorum? Prætereo friuolam eius expositionem super tunicis pelliceis, quanto conatu, quantisq.

et isq. egerit argumentis, ut tunicas pelliceas humana esse *Gen. 3*
corpora crederemus. qui inter multa ait: Numquid coria-
rius, aut scortifarius erat Deus, ut conficeret pelles anima-
lium, & confueret ex eis tunicas pelliceas Adam & Euæ?
Manifestum est ergo, inquit, quod de corporibus nostris lo-
quatur. Et si hoc ita est; quo modo legimus, ante pelli-
ceas tunicas, & ante inobedientiam, & de paradiso ruinam
Adam loquentem non secundum allegoriam, sed uere:
Hoc nunc os ex ossibus meis, & caro de carne mea? Aut
unde assumptum est illud, quod diuinus sermo testatur:
Et iniecit Deus soporem in Adam, & dormiuit; & sumpsit
unam de costis eius; & adimpleuit pro ea carnem; & ædifi-
cavit costam, quam tulerat ex eo, illi in uxorem? Aut quæ
corpora contegebat Adam & Eua foliis ficus, postquam co-
mederunt de arbore uetita? Quis autem patiēter ferat Ori-
genem, lubricis argumentationibus resurrectionem carnis
huius negantem, sicut declarat manifestissime in uolumine
explanationum primi psalmi, & in aliis multis locis? Aut
quis audiat in tertio cælo donantem nobis Origenem para-
disum; & illum, quem scriptura commemorat, de terra ad
cælestia transferentem; & omnes arbores, quæ scribuntur
in Genesi, sic allegorice intelligentem; quod scilicet arbo-
res, angelicæ fortitudines sint; cum hoc ueritas non recipi-
at? neque enim dixit scriptura diuina: Deposuit Deus Adā
& Euam in terram, sed eiecit eos de paradiso, & habitare
fecit eos contra paradisum. Non ait, sub paradiso. Et po-
suit romphæam flammeam, & Cherubin custodire introi-
tum ligni uitæ. Non dixit, ascensum. Et fluuius egredieba-
tur ex Eden. Non dixit, descendit ex Eden. Iste diuiditur
in quattuor principia: nomen uni Phison, & nomen secun-
di Geon. Ego uidi aquas Geon, aquas, quas his carnis
oculis aspexi. Iste est Geon, quem Hieremias demonstrat,
dicens: Quid uobis & uix Aegypti, ut bibatis aquā Geon
turbidam? Bibi & de magno flumine Euphrate aquas sim-
pliciter, quas manu potes tangere, ore sorbere, non aquas
spiritalis. Vbi autem flumina sunt, quæ & uidentur, & bi-
buntur

buntur, ibi consequens est quod & ficus & alia ligna sint: de quibus dicit Deus: Ex omni ligno, quod est in paradiso, comedes: si autem aqua, quæ cernitur, uere aqua est; necesse est, ut & ficus uera sit, & alia ligna; & Adam uerus statim a principio plasmatus in corpore, sicut & Eua, & non in phantasmate; & post ruinam, ut uult Origenes, propter peccatum postea corpus acceperit. sed dicis: Legimus quod sanctus Paulus raptus sit usque ad tertium cælum, & usque in paradysum. Bene dicis. Quando ponit tertium cælum, & postea addit, Et in paradysum; ostendit alibi esse cælum, & alibi paradysum. Illas uero præstigias quis non statim abiiciat, atque contemnat, dicente Origene de aquis, quæ super firmamentum sunt, non esse aquas, sed fortitudines quasdam angelicæ potestatis; & rursus aquas, quæ super terram sunt, hoc est, sub firmamento, esse uirtutes contrarias, id est, dæmones? Et quo modo legimus, in diluuiio apertas cataractas cæli, & aquas inundasse diluuii? unde aperti sunt fontes abyssi, & totus mundus opertus est aquis? O furor hominum iunctus stultitiæ, qui reliquerunt illud, quod in Prouerbiis dicitur: Audi fili sermonem patris tui; & ne abiicias legem matris tuæ: & conuersi sunt ad errorem: & dicunt stulto, ut princeps sui sit: nec contemnunt res fatuas, quæ dicuntur a fatuo, sicut scriptura testatur: Fatuus autem fatua loquitur, & cor eius uana intelligit. Vnde, obsecro te, dilectissime, &, quasi membris meis parcens, propter caritatem, quam in te habeo, precor scribens, & orans, ut impleas illud quod dicitur: Nonne odientes te, Domine, odiui, & super inimicos tuos tabescebam? inimica & digna odio Origenis uerba sunt, & Deo repugnātia, & sanctis eius: & non ista sola, quæ dixi, sed & alia innumerabilia. neque enim nunc mihi propositum est aduersus omnia Origenis dogmata disputare. nihil mihi surripuit Origenes, nec in mea generatione fuit; nec, propter aliquas res mundi, & hereditatem, odium aduersum illum pugnasque suscepi: sed, ut simpliciter fatear, doleo, & ualde doleo, uidens plurimos fratrum, & eorum præcipue, qui profes-

fionem habent non minimam, & in gradum quoque sacer-
 dotii maximum peruenerūt, eius persuasionibus deceptos,
 & peruersissima doctrina cibos factos esse diaboli: in qui-
 bus completum est illud, quod dicitur: Super omnem mu- *Habac. 8*
 nitionem ludit, & escæ eius electæ, & congregauit sicut are-
 nam captiuitatem. Te autem, frater, liberet Deus, & san-
 ctum populum Christi, qui tibi creditus est, & omnes fra-
 tres, qui tecum sunt, & maxime Ruffinum presbyterum ab
 hæresi Origenis, & ab aliis hæresibus, & perditione earum.
 Si enim propter unum uerbum, aut duo, quæ contraria fi-
 dei sunt, multæ hæreses abiectæ sunt ab Ecclesia: quanto
 magis hic inter hæreticos habebitur, qui tantas peruersita-
 tes, & tam mala dogmata contra fidem adinuenit, Deiq. &
 Ecclesiæ hostis extitit? Inter multa enim mala etiam illud
 ausus est dicere, perdidisse imaginem Dei Adam: cum hoc
 in nullo penitus loco scriptura significet. si enim ita esset,
 nunquam omnia, quæ in mundo sunt, seruirent semini Adæ,
 idest, uniuerso generi hominum: sicut & Iacobus aposto- *Iacob. 3*
 lus loquitur: Omnia domantur, & subiecta sunt humanæ
 naturæ. Numquam enim uniuersa subiecta essent homini-
 bus, si non haberent homines iuxta id, quod uniuersis im-
 perarent, imaginem Dei. Coniungens autem atque confo-
 cians scriptura diuina gratiam benedictionis, quam Adam *Gen. 4.5*
 donauerat, & generationibus, quæ ex eo erant; ne qui for-
 sitan maligna interpretatione auderent dicere, uni datam
 gratiam Dei, & illum solum factum esse ad imaginem Dei;
 quia plasmatus esset ex humo, & uxorem eius, quam creaf-
 set de costa uiri; eos uero, qui conciperentur in utero, &
 non ita nascerentur ut Adam, Dei non habere imaginem;
 statim per ordinem iungit, & dicit: Et uiuit Adam ducen-
 tos triginta annos, & cognouit Euam uxorem suam, & pe-
 perit ei filium iuxta speciem, & iuxta imaginem eius, & uo-
 cauit nomen eius Seth. Rursusq. in decima generatione
 post annos bis mille ducentenos quadragintaduos, uindi-
 cans Deus imaginem suam, & ostendens, quod gratia, quā
 dedisset hominibus, perseveraret in eis, ait: Ne comed- *Gen. 9*
 ritis

ritis carnē cum sanguine : ego enim ulciscar sanguinem uestrum de manu omnis hominis effudentis illum : quia ad imaginem Dei feci hominem . Necnon post alteras decem generationes usque ad Abraham , & ab Abraham usque ad David alias generationes quattuordecim : quæ uigintiquatuor generationes simul faciunt annos bis mille centum decem & septem , Spiritus sanctus in tricesimo octauo psalmo , cum quereretur de omnibus hominibus , quod in uanitate ambularent , & peccatis essent obnoxii , loquitur : Veruntamen in imagine perambulat omnis homo . Necnon post Dauid , etiam sub Salomone filio eius , legimus tale quiddam super Dei imagine nominatum . Dicit enim

Sap. 2 in Sapiencia , quæ titulo eius inscribitur : Creauit Deus incorruptum hominem , & imaginem suæ proprietatis dedit ei . Et rursus post annos mille centum , & undecim plus minus , in nouo legimus testamento , quod non per-

Iacob, 3 diderunt homines imaginem Dei . Iacobus enim apostolus , & frater Domini , cuius & supra meminimus , instruit nos , ne Origenis laqueis capiamur , habere hominem imaginem & similitudinem Dei . nam , cum de lingua hominis latius disputasset , adiecit : Instabile malum : in ipsa quippe benedicemus Deum patrem , & in ipsa maledicimus homines , qui ad similitudinem Dei conditi sunt . Paulus quoque , uas electionis , & qui doctrinam euangelicam sua prædicatione compleuit , docet nos , quod homo ad imaginem

1. Cor. 11 & similitudinem Dei conditus sit , dicens : Vir non debet nutrire comam , cum gloria & imago Dei sit : imaginem simpliciter appellans suo nomine , similitudinem autem , gloriæ appellatione significans . Pro tribus igitur testimoniis , quæ tibi si de scriptura sancta reperirem , dicebas posse sufficere , ecce septem testimonia dedimus . Quis ergo sustinebit Origenis ineptias ? ut non grauius aliquid loquar , & similis efficiar uel ipsi , uel discipulis eius , qui audent in periculo animæ suæ asserere , quodcumque eis in buccam uenerit , & magis iubere Deo , & non ab eo uel orare , uel discere ueritatem . Quidam enim eorum dicunt , quod ima

go

go Dei, quam prius accepit Adam, illo peccante perierit. Alii suspicantur corpus, quod filius Dei habiturus esset ex Maria, ipsam esse imaginem: alii sensum, alii uirtutem: isti baptisma: hi quod homo ad imaginem Dei dominetur omnibus: ebriorum more hæc uel illa ructantes, quos oportebat tantum effugere discrimen, nec negare quæ loquitur Deus, & credentes simpliciter saluos fieri, Deoq. concedere donationis suæ certamen, & ueram scientiam, in qua potissimum parte homines condiderit ad imaginem & similitudinem suam. qui, hæc relinquentes, multis se quæstionibus implicarunt, & per has in cœnum demersi sunt peccatorum. Nos autem, dilectissime, credimus iis, quæ locutus est Dominus: & scimus, quod in cunctis hominibus imago Dei permaneat: ipsiq. concedimus nosse, in qua parte homo ad imaginem Dei conditus sit. Sed neque illud, *1. Ioan. 3* quod quidam in epistola Ioannis legentes non intelligunt, quemquam decipiat, ubi loquitur: Nunc filii Dei sumus; & nondum apparet, quod erimus. Nouimus autem, quia, cum ille reuelatus fuerit, similes ei erimus. uidebimus enim eum, sicuti est. Hoc enim propter gloriam, quæ ibi reuelanda est sanctis eius, dictum est: sicut & in alio loco legimus: A gloria in gloriam: cuius gloriæ iam in isto sæculo *2. Cor. 3* sancti arrhabonem & portiunculam susceperunt. Primus *Exod. 34* eorum Moyses, cuius fulsit facies ualde, & radiabat ueluti *4. Reg. 2* fulgor & sol. Secundus Elias, igneo curru raptus in cælum, *Act. 7* & ignis detrimenta non sentiens. Stephanus lapidabatur, & faciem habebat angeli, quæ ab omnibus cernebatur. Hoc autem, quod in paucis diximus, de omnibus intelligendum est; ut impleatur illud, quod scriptum est: Omnis, *Matth. 5* qui sanctificat semetipsum, inter beatos numerabitur. Beati enim mundo corde, quoniam ipsi Deum uidebunt. Cū hæc ita se habeant, dilectissime, custodi animam tuam, & desine circa nos murmurare. Dicit enim scriptura diuina: *1. Cor. 10* Nolite murmurare adinuicem, sicut quidam murmurauerunt, & a serpentibus perierunt: magis acquiesce ueritati, & dilige diligentes te, & ueritatem. Deus autem pacis præstet

stet nobis iuxta suam clementiam, ut conteratur satanas sub pedibus Christianorum, & abiiciatur omnis occasio peruersa, ne scindatur in nobis uinculum caritatis, & pacis, & rectæ fidei prædicatio. Præterea audiui quosdam murmurare contra me, quia, quando simul pergebamus ad sanctum locum, qui uocatur Bethel, ut ibi collectam tecum ex more ecclesiastico facerem, & uenissem ad uillam, quæ dicitur Anablatha, uidissemq. ibi præteriens lucernam ardentem, & interrogassem, quis locus esset, didicissemq. esse ecclesiam, & intrassem, ut orarem; inueni ibi uelum pendens in foribus eiusdem ecclesiæ, tinctum, atque depictum, & habens imaginem quasi Christi, uel sancti cuiusdam. non enim satis memini, cuius imago fuerit. cum ergo hoc uidissem in ecclesia Christi, contra auctoritatem scripturarum hominis pendere imaginem, scidi illud, & magis dedi consilium custodibus eiusdem loci, ut pauperem mortuum eo obuoluerent, & efferrent. illiq. contra murmurantes dixerunt: Si scindere uoluerat, iustum erat, ut aliud daret uelum, atque mutaret. Quod cum audissem, me daturum esse pollicitus sum, & illico esse missurum. paululum autem morarum fuit in medio, dum quæro optimum uelū pro eo mittere. arbitrabar enim de Cipro mihi esse mittendum. nunc autem misi, quod potui reperire: & precor, ut rubeas presbyteros eiusdem loci suscipere uelum a latore, quod a nobis missum est; & deinceps præcipere, in ecclesia Christi istiusmodi uela, quæ contra religionem nostram ueniunt, non appendi. decet enim honestatem tuam, hanc magis habere sollicitudinem, ut scrupulositatem tollat, quæ indigna est Ecclesia Christi, & populis, qui tibi crediti sunt. Palladium uero Galatam, qui quondam nobis carus fuit, & nunc misericordia Dei indiget, caue: quia Origenis hæresim prædicat, & docet; ne forte alios quos de populo tibi credito ad peruersitatem sui inducat erroris. Opto, ut ualeatis in Domino.

ARGV.

ARGVMENTVM.

IOANNES, Episcopus Hierosolymitanus, cum Origenem sequeretur, & octo precipuas eius hæreses foueret, admonitus primo per epistolam ab Epiphanio, Salaminæ Cypri Episcopo est, deinde, efflagitante Palestina tota, quæ illi non communicebat, cum tergiversaretur, & respondere, quid de fide sentiret, renueret, uocatusq. ad Synodum uenire contemneret, nunciumq. absque litteris, & aliqua satisfactione ad eam tantum miserit, aperte nunc a D. Hieronymo reprehenditur, & errorum, quos speciatim recenset, præsertim eius, qui contra resurrectionem carnis erat, conuincitur.

HIERON. AD PAMMACHIVM,

aduersus errores Ioannis Hierosol.

EPISTOLA LXI.

Iuxta Paulum apostolum, quod sentimus orare *Rom. 8*
S non possumus, ac propriæ mentis cogitationem sermo non explicat: quanto magis periculosum est de alterius animo iudicare, & singulorum dictorum, atque uerborum inuestigare, atque proferre rationem? Natura hominum prona est ad clementiam, & in alieno peccato sui quisque miseretur. Si ergo reum in sermone reprehenderit, simplicitatem uocabit: si calliditatem argueris, imperitiam confitebitur, ut suspicionem uitet malitiæ: atque ita fiet, ut tu, qui arguis, calumniator, ille, qui reprehenditur, non hæreticus, sed rusticus iudicetur. Nosti, Pammachi, nosti me ad hoc opus non inimicitis, non gloriæ cupiditate descendere, sed prouocatum litteris tuis ex ardore fidei; ac uelle, si fieri posset, omnes id ipsum sapere; nec impatientiæ, ac temeritatis posse reprehendi, si post triennium loquor. Denique, nisi ad apologiam, de qua nunc scribere institui; multorum animos diceres perturbatos, & in utramque partem fluctuare sententiam, decreueram in incepto silentio permanere. Faceffat itaque Nouatus, errantibus
 Z z

rantibus manus non porrigens : Montanus cum infans feminis prosternatur ; iacentes in barathrum præcipitans , ne leuentur . Quotidie peccamus omnes , & in aliquo labimur . Qui ergo in nos clementes sumus , rigorem contra alios non tenemus : quin potius oramus , petimus , obsecramus , ut aut simpliciter nostra fateatur , aut aperte defendat aliena . Nolo uerborum ambiguitates : nolo mihi dici ,

2. Cor. 3 quod & aliter possit intelligi . Reuelata facie gloriâ Domini contemplemur . Claudicabat quondam & Israeliticus populus in utroque pede : sed Elias , qui interpretatur fortis Domini , Vsquequo , ait , claudicatis in utroque uestigio ? si Dominus est Deus , ambulate post eum : si autem Baal , sequimini eum . Et ipse Dominus de Iudæis : Filii alieni mentiti sunt mihi : filii alieni inueterauerunt , & claudicauerunt a semitis suis . Certe si hæreseos nulla suspicio est , ut cupio , & credo ; cur non uerbis meis meum sensum loquitur ? quam ille simplicitatem uocat , ego malitiam interpretor . Persuadere mihi uult , quod pure credat . pure ergo & loquatur . et siquidem unum uerbum uel unus sensus esset ambiguus , si duo , si tres ; ignorantia ueniam tribuerem ; nec ea , quæ aut obscura uel dubia sunt , de certis & perspicuis æstimerem ; nunc uero quæ ista simplicitas est , quasi super oua & aristas inter theatrales præstigias pendenti gradu incedere , ubique dubium , ubique suspectum ? putes eum non expositionem fidei , sed figuratam controuersiam scribere . Quod ille nunc appetit , olim in scholis didicimus . Nostra aduersum nos dimicat armatura . Etiam si bene credit , & circumspecte , & timide loquitur , suspensionem mihi facit nimia diligentia . Qui ambulat simpliciter , ambulat confidenter .

3. Reg. 18
Psal. 17
Pro. 10 Stultum est frustra infamiam sustinere . Obicitur ei crimen , cuius non habet conscientiam . Ergo crimen , quod totum pendet in uerbo , neget confidenter , ac libere faciat inuidiam aduersario suo . eadem audacia , qua ille insinuat , hic defendat . cumq. omnia dixerit , quæ uoluerit , quæ proposuerit , quæ suspicionibus carent ; si perseverat calumnia , conserta manu in ius trahat . Nolo in suspi-

spicione hæreseos quemquam esse patientem; ne apud eos, qui ignorant innocentiam eius, dissimulatio conscientia iudicetur, si taceat: licet superfluum sit eius præsentiam quærere, & extorquere silentium, cuius apud te litteras teneas. Scimus omnes, quid tibi scripserit, quid in te arguerit, in quo, ut tu uis, calumniatus sit. Responde ad singula: per epistolæ huius gradere uestigia: ne punctum quidem & apicem calumniæ transeas. Si enim egeris negligenter, & ut ego tibi credo iuranti, casu aliqua transferis; statim ille clamabit, & dicet: Hic hic te uictum teneo: hic totius negotii cardo uersatur. Non æque inimici audiunt, & amici. Qui inimicus est, etiam in scirpo nodum quærît: amicus praua quoque recta iudicat. Scribunt sæculi literæ, amantium cæca esse iudicia: quas tu forsitan, sacris uoluminibus occupatus, omnino neglexeris. Numquam de amicorum iudicio glories. Illud uerum est testimonium, quod ab inimica uoce profertur. alioqui, si amicus pro te dixerit, non testis, aut iudex, sed fautor putabitur. Hæc & huiusmodi loquentur inimici tui, qui tibi forte non credant; & mouere cupiant stomachum. Ceterum ego, quem numquam uolens læsisti, cuius semper in epistolis tuis nomen cogeris uentilare, do consilium, ut aperte aut fidem Ecclesiæ prædices; aut loquaris, ut credis, Dispenratio etenim ac libratio ista prudens uerborum, indoctos decipere potest: cautus auditor & lector cito deprehendet insidias, & cuniculos, quibus ueritas subuertitur, aperte in luce demonstrabit. Et Ariani, quos optime nosse, multo tempore propter scandalum nominis *ἐμολογίων* se damnare sumulabant, uenenaq. erroris circumlinebant melle uerborum, sed tandem coluber se tortuosus aperuit, & noxium caput, quod spiris totius corporis tegebatur, spiritali mucrone confossum est. Recipit, ut scis, Ecclesia pœnitentes; & numero superata peccantium, dum deceptis gregibus consulit, pastorum uulneribus ignoscit. Eadem nunc in ueteri & noua hæresi consuetudo seruat, ut aliud populi audiant, aliud prædicent sacerdotes. Ac primuni, ante quam episto-

Zz 2 lam

lam tuam, quam scripsisti ad episcopum Theophilum; interpretatam huic uolumini inferam, & ostendam tibi, me intelligere nimis cautam prudentiam tuam, expostulare tecum libet. Quæ hæc est tanta arrogantia, non respondere de fide interrogantibus? tantam fratrum multitudinem, & monachorum choros, qui tibi in Palæstina non communicant, quasi hostes publicos æstimare? Dei filius propter unam morbidam ouem, non agintanouem in montibus derelictis, alapas, crucem, flagella sustinuit, & suis humeris portauit ad cælos baiulans, & patiens delicatam peccatricem. tu, beatissimus Papa, & fastidiosus antistes, solus diues, solus sapiens, solus nobilis, ac disertus, cōseruos tuos, & redemptos sanguine Domini tui, rugata fronte & obliquis oculis despicias? hoc est illud, quod, Apostolo præcipiente, didicisti? Parati semper ad satisfactionem omni poscenti uos rationem de ea, quæ in uobis est, spe. Finge nos occasionem querere, & sub prætextu fidei lites ferere, schisma conficere, iurgia concitare. Tolle occasionem uolentibus, occasionem, ut, postquam de fide satisfeceris, & omnes nodos, qui contra te neuntur, absolueris, tunc liquido omnibus probes, non dogmatum, sed ordinationis esse certamen. Nisi forte, prudenti consilio, ideo de fide interrogatus taces, ne uidearis hæreticus esse, cum satisfeceris. Omnia ergo crimina, quibus accusantur, homines refutare non debent; ne, postquam negauerint, criminosi sint. At contemnis laicos, diaconos, atque presbyteros. Potes enim, ut gloriaris, & iactitas, in una hora mille clericos facere. Habes Papam Epiphanium, qui te aperte missis litteris hæreticum uocat. certe nec ætate, nec scientia, nec uita merito, nec totius orbis testimonio maior illo es. Si ætatem quæris, iuuenis ad senem scribes. si scientiam, non sic eruditus ad doctum: licet te fautores tui disertiorē Demosthene, acutiorem Chrysippo, sapientiorē Platone contendant, & tibi ipsi forte persuaserint. De uita autē, & fide nihil amplius dicam, ne te ledere uidear. Eo tempore, quo totum Orientem, excepto Papa Athanasio, atque Pau-

Paulino, Arianorum, & Eunomianorum hæresis possidebat, quando tu occidentalibus & in medio exilio confessionibus non communicabas; ille uel presbyter monasterii ab Eutychio audiebatur, uel postea episcopus Cypri a Valente non tangebatur. tantæ enim uenerationis semper fuit, ut regnantes hæretici ignominiam suam putarent, si talem uirum persequerentur. Scribe igitur ad hunc: responde epistolæ eius: sentiant ceteri fidem, eloquentiam, prudentiam tuam; ne tibi solus disertus esse uidearis. Cur, ab alio pro uocatus, aliorum arma conuertis? Palæstinæ interrogaris, & respondes Aegypto. aliis lippientibus, ungis oculos non dolentium. Si placitura nobis alteri loqueris, satis superbe; si aliud quam quærimus, satis superflue. sed dicis, epistolam meam probauit Alexādrinus episcopum. Quid probauit? contra Arium, contra Photinum, contra Manichæum bene locutum. Quis enim te hoc tempore arguit Arianum? quis tibi nunc Photini Manichæique crimen impingit? olim ista emendata sunt, atque concussa. Non eras tam stultus, ut aperte defenderes hæresim, quam sciebas Ecclesiæ displicere. Noueras te, si hoc fecisses, statim loco mouendum, & solii tui delicias suspirabas. sic sententiam temperasti, ut nec simplicibus displiceret, nec tuos offenderet. Bene scripsisti, sed nihil ad causam pertinens. Vnde nouerat Alexandrinæ ecclesiæ Pontifex, in quibus argueris? quorum a te confessio postularetur? Debueras tibi obiecta proponere, & sic ad singula respondere. Vetus narrat historia: Quidam cum diserte diceret, ferreturque impetu ac uolubilitate uerborum, causamque omnino non tangeret, prudens auditor, & iudex, Bene, inquit, bene, sed quo istud tam bene? Imperiti medici ad omnes oculorum dolores uno utuntur collyrio. Qui arguitur in pluribus, & in dilutione criminum aliqua prætermittit, quidquid tacuerit, confitetur. An non respondisti ad epistolam Epiphani, & proposuisti ipse, quæ dissolueres? Nimirum hac fiducia respondisti. Nullus fortiter a semet ipso cæditur. Elige e duobus, quod uis: optio tibi dabitur. Aut respondisti ad epistolam Epiphani, aut

Z z 3 non.

non. si respondisti; cur maxima & plurima de iis, quæ tibi obiecta sunt, reliquisti? si non respondisti; ubi est illa apologia tua, in qua gloriaris apud simplices; & quasi ignorantibus causam, huc illucq. disseminas? Octo tibi, ut statim probabo, de spe fidei Christianæ quæstionum capita obiecta sunt. tria tantum tangis, & præteris: in ceteris grande silentium est. Si ad septem absolutissime respondisses; hærerem tantum in uno crimine; & quod tacueras, hoc tenerem: nunc uero, quasi auribus lupum apprehenderis, nec tenere potes, nec audes dimittere. Ipsa quoque tria quasi negligens, atque securus, quæsiq. aliud agens, & in quibus aut nulla aut parua sit quæstio, præteruolas, atque perstringis. et ita opertus ac tectus incedis, ut plus confitearis tacendo, quam renuas disputando. Quis non protinus tibi

Matth. 6

potest dicere: Si lumen, quod in te est, tenebræ sunt, ipsæ tenebræ quantæ erunt? si tres quæstiunculæ, de quibus uisus es aliquid dicere, suspitione & culpa non carent, & fraudulenter ac lubricè scriptæ coarguuntur: quid faciemus de quinque reliquis, in quibus quia nulla ambigui sermonis datur occasio, nec illudere poteras audiētes, maluisti omnino reticere; quam aperte, quod rectum fuerat, confiteri? Et primum de libro *ματθ. α. γ. α. ν.*, ubi loquitur: Sicut enim incongruum est dicere, quod possit filius uidere patrem; ita inconueniens est opinari, quod spiritus sanctus possit uidere filium. Secundum, quod in hoc corpore quasi in carcere sunt animæ religatæ; & antequam homo fieret, in paradiso, inter rationabiles creaturas in cælestibus commoratae sunt: unde postea in consolationem suam anima loquitur

Psal. 118. 114

Psal. 141

in psalmis: Priusquam humiliarer, ego deliqui. Et: Reuertere anima mea in requiem tuam. Et: Educ de carcere animam meam: & cetera his similia. Tertium, quod dicat, & diabolus. & dæmones acturos pœnitentiam aliquando, & cum sanctis ultimo tempore regnatos. Quartum, quod tunicas pelliceas humana corpora interpretetur, quibus

Gen. 3

post offensam & eiectionem de paradiso Adam & Eua indu ti sunt, haud dubium quin ante in paradiso sine carne, ner-

uis

uis; & ossibus fuerint. Quintum, quod carnis resurrectionem, membrorumq. compagem, & sexum, quo uiri diuidimur a feminis, apertissime neget, tam in explanatione primi psalmi, quam in aliis multis tractatibus. Sextum, quod sic paradysum allegorizet, ut historix auferat ueritatem, pro arboribus angelos, pro fluminibus uirtutes caelestes intelligens, totamq. paradisi continentiam tropologica interpretatione subuertat. Septimum, quod aquas, quæ super cælos in scripturis esse dicuntur, sanctas supernasq. uirtutes, quæ super terram, & infra terram, contrarias & demoniacas esse arbitretur. Octauum, quod extremum obicit, imaginem & similitudinem Dei, ad quam homo conditus fuerat, dicit ab eo perditam, & in homine post paradysum non fuisse. Hæ sunt sagittæ, quibus confoderis; hæc tela, quibus in tota epistola uulneraris: excepto eo, quod illis genibus aduolutus, sanctamq. canitiem, seposito parumper sacerdotis honore, substernens, deprecatur salutem tuam, & his uerbis loquitur: Præsta mihi, & tibi, ut salueris, sicut scriptum est, a generatione peruersa: & recede ab hæresi Origenis, & a cunctis hæresibus dilectissime. Et infra: Propter defensionem hæreseos aduersum me odia suscitantes rumpitis caritatem, quam in uobis habui: intantum, ut faceretur nos etiam pænitere, quare uobis communicauerimus, ita Origenis errores & dogmata defendentibus. Dic mihi disputator egregie de octo capitulis, ad quæ responderis. paulisper de ceteris taceo. Prima illa blasphemiam, quod nec Filius Patrem, nec Filium potest uidere Spiritus sanctus, quibus a te telis confossa est? Sanctam, inquit, & adorandam trinitatem, eiusdem substantiæ, & coæternæ, eiusdem gloriæ & diuinitatis credimus; anathematizantes eos, qui grande, aut paruum, aut inæquale, aut uisibile in deitate trinitatis quidquam loquuntur: sed sicut incorporalem, inuisibilem, & æternum dicimus Patrem: sic incorporalem, inuisibilem, & æternum dicimus Filium, & Spiritum sanctum. Nisi hoc diceres, Ecclesiam non teneres: & tamen non quæro, si ante non dixeris: non euentilabo, si

Gen. 2

Psal. 148

Act. 2

Z 4 ama-

amaueris eos, qui talia prædicauerunt; cum quibus fueris, quando ista dicentes exilia sustinebāt; quis sit ille, qui Theone presbytero Spiritum sanctum Deum in ecclesia prædicāte, clauferit aures, forasq. cum suis concitus fugerit, ne tantum audiret piaculum. Statim sera conuersione fidelem, inquit, uolo. Miserabilis prætextatus, qui designatus consul est mortuus. Homo sacrilegus, & idolorum cultor, solebat ludens beato Papæ Damaso dicere: Facite me Romanæ urbis episcopum, & ero protinus Christianus. Quid mihi longo sermone & laciniosis periodis Arianum te non esse demonstras? Aut nega hoc dixisse eum, qui arguitur; aut, si locutus est talia, damna, quia dixerit. Vis scire, quantus

Gal. 1 sit ardor bene credentium? audi Apostolum: Et si nos, aut angelus de cælo aliter euangelizauerit uobis, quam annunciamus, anathema sit: Tu mihi ut crimen extenues, & dissimulato nomine criminosis, quasi secuta sint omnia, & nullus in blasphemis arguatur, erosam fidem artifice sermone contextis. Dic statim, & epistola tua hoc habeat exordium: Anathema ei, qui talia ausus est scribere. Fides pura moram non patitur. Vt apparuerit scorpius, illico coterendus est.

Act. 13 David inuentus secundum cor Domini, Non-

Psal. 118 ne, inquit, odientes te Domine oderam, & super inimicos tuos tabescebam? Perfecto odio oderam illos. Ego, si patrem, si matrem, si germanum aduersum Christum meum audiuissem ista dicentes, quasi rabidi canis blasphemantia ora lacerassem, & fuisset in primis manus mea super eos.

Deut. 33 Qui patri & matri dixerunt, Non nouimus uos, hi imple-

Matth. 10 uerunt uoluntatem Domini: Qui diligit patrem, aut matrem super Christum, non est eo dignus. Obiicitur tibi, quod magister tuus, quem catholicum uocas, quem defendis obnixe, dixerit, Filius non uidet Patrem, & Filium non uidet Spiritus sanctus: & tu mihi dicis: Inuisibilis Pater, inuisibilis Filius, inuisibilis Spiritus sanctus: quasi non & angeli, & cherubim, & seraphim, secundum naturam suam oculis nostris inuisibiles sint. Certe David etiam de aspectu

Psal. 8 cælorum dubitans, Videbo, inquit, cælos, opera digitorum

rum tuorum . Videbo , non uideo . Videbo , quando , facie 2. Cor. 3
reuelata , gloriam Domini fuero cōtemplatus : nunc autem 1. Cor. 13
ex parte uidemus , & ex parte cognoscimus . Quæritur , an
Patrem uideat Filius : & tu dicis , Inuisibilis Pater est . Deli
beratur , an Filium uideat Spiritus sanctus : & tu respondes ,
Inuisibilis est Filius . Versatur in causa , an se inuicem trini
tas uideat : humanæ aures tantam blasphemiam ferre non
sustinent : & tu dicis , Inuisibilis trinitas est . In laudes cete
ras euagaris : peroras in his , quæ nullus inquit . Audito
rem aliorum trahis , ut , quod quærimus , non loquaris .
Verum hæc ex superfluo dicta sint . Donamus tibi , ut non
sis Arianus : immo plus , ut numquam fueris . Concedi
mus , ut in expositione primi capituli aduersum te nulla su
spicio sit , & totum pure , totum simpliciter sis locutus : ea
dem simplicitate & nos tecum loquimur . Num Papa Epi
phanius accusauit te , quod Arianus esses ? num Eunomii
æres tibi impegit hæresim ? Hoc per totam epistolam quæ
ritur , quod Origenis dogmatum sequaris errores , & quos
dam habeas huius hæreseos socios . Cur , aliud interroga
tus , respondes aliud ; & , quasi cum stultis loquaris , dissimu
latis criminibus , quæ in litteris continentur , replicas quid
in ecclesia præsentē Epiphanio dixeris ? Confessionem fidei
postularis , & disertissimos tractatus tuos nolentibus inge
ris ? Quæso , lector , ut , memor tribunalis Domini , & de
iudicio tuo te intelligens iudicandum , nec mihi , nec aduer
sario faueas , neue personas loquentium , sed causam con
sideres . Dicamus ergo , quod cœpimus . Scribis in epistola
tua , quod , ante quam Paulinianus presbyter fieret , num
quam te Papa Epiphanius super Origenis errore conuenit .
Primum dubium est , & de personis disputo . Ille obiecit
se dicit , tu negas . ille testes profert , tu non uis audire pro
ductos . ille etiam commemorat alium esse conuentum , tu
pro utroque dissimulas . mittit tibi per clericum suum epi
stolam , responsum flagitat : taces , mutire non audes :
& , Palæstinæ prouocatus , Alexandriæ loqueris . Inter il
lum & te cui accommodanda sit fides , non est meum dice
re .

re. puto, quod nec ipse audeas aduersum talem ac tantum uirum, tibi ueritatem, illi mendacium deputare. Sed fieri potest, ut unusquisque pro se loquatur. Te ipsum contra te testem uocabo. Si enim nulla de dogmatibus quaestio uersa batur; si stomachum senis non moueras; si ille tibi nihil responsderat: quid necesse erat, ut in uno Ecclesiae tractatu, de cunctis dogmatibus, homo non satis eloquens, disputares, & de trinitate, de assumptione Dominici corporis, de cruce, de inferis, de angelorum natura, de animarum statu, de resurrectione Saluatoris, & nostra; & interea, quae forsitan oblitus es scribere, praesentibus populis & tali ac tanto uiro intrepidus diceres, & omnia una salua continua res? Vbi sunt ueteres Ecclesiae tractatores, qui uix singulas quaestiones explicare multis uoluminibus potuerunt? ubi electionis uas, tuba euangelii, rugitus leonis nostri, tonitruus gentium, flumen eloquentiae Christianae; qui mysterium, retro generationibus ignoratum, & profundum diuitiarum sapientiae & scientiae Dei magis, miratur, quam loquitur? ubi Esaias uirginis demonstrator, qui in una quaestione succumbens ait: Generationem eius quis enarrabit? Repertus est saeculis nostris haud grandis homunculus, qui de cunctis Ecclesiae quaestionibus, uno linguae rotatu, sole clarius coruscaret. Si nemo a te postulabat, & tranquilla erant omnia; stulte tanta disputandi uoluisti subire discrimina. Si iam tunc in sanctificatione fidei loquebaris; ergo non est ordinatio presbyteri causa discordiae; quem constat multo post tempore constitutum. Fefellisti absentes, & litterae tuae peregrinis auribus blandiuntur. Nos hic eramus; cuncta nouimus, quando contra Origenem in ecclesia tua Papa Epiphanius loquebatur, quando sub illius nomine in uos iacula torquebantur. Tu & chorus tuus canino rictu, naribusq. contractis, scalpentes capita, delirum senem nutibus loquebamini. Nonne ante sepulcrum Domini, misso archidiacono, praecipisti, ut talia disputans conticesceret? Quis hoc usquam presbytero suo coram plebe imperauit episcopus? Nonne, cum de *ἀπασάντων* pergeretis ad crucem, & ad eum

eum omnis ætatis, & sexus turba conflueret, offerens paru-
ulos, pedes deosculans, fimbrias uellens; cumq. non pos-
set promouere gradum, sed in uno loco uix fluctus undan-
tis populi sustineret; tu tortus inuidia aduersus gloriosum
senem clamitabas, nec erubuisti in os ei dicere, quod uolens
& de industria moraretur? Recordare, quæso, illius diei,
quando ab horam septimam inuitatus populus spe sola,
quasi postea auditurus Epiphanium esset, detinebatur, quid
tunc concionatus sis. nempe contra Anthropomorphitas,
qui simplicitate rustica Deum habere membra, quæ in di-
uinis libris scripta sunt, arbitrantur, furens & indignans lo-
quebaris: oculos, & manus, & totius corporis truncum,
in senem dirigebas, uolens illum suspectum facere stultissi-
mæ hæreseos. Postquam lassus ore arido, resupinaq. cer-
uice, ac trementibus labiis conticuisti; & tandem totius
populi uota completa sunt; quid tibi fecit delirus & fatuus
senex? surrexit, ut se indicaret pauca dicturum esse; saluta-
taq. & uoce, & manu ecclesia, Cuncta, inquit, quæ locu-
tus est collegio frater, ætate filius meus, contra Anthro-
pomorphitarum hæresim, bene & fideliter locutus est, quæ
mea quoque damnatur uoce: sed æquum est, ut, quo mo-
do hanc hæresim condemnamus, etiam Origenis peruersa
dogmata condemnemus. Qui risus omnium, quæ acclama-
tio consecuta sit, puto quod retineas. Hoc est illud, quod
in epistola tua dicis loquentem illum ad populum, quæ uel-
let, & qualia uellet. Scilicet delirabat, qui in regno tuo cō-
tra tuam sententiam loquebatur. Quæ uellet, inquis, &
qualia uellet. Vel lauda, uel reproba. quid & hic dubius in-
cedis? Si bona erant, quæ loquebatur; cur non aperte præ-
dicas? si mala; cur non constanter reprehendis? Atqui co-
lumna ueritatis ac fidei, qui de tanto uiro audet dicere, lo-
quente illo ad populum quæ uellet, & qualia uellet, de se
ipso quam prudenter & uerecunde, quam humiliter referat,
consideremus. Cum, inquit, & nos quadam die ante eum
locuti essemus; & præsens lectio pronocasset, audiente il-
lo, & uniuersa ecclesia; de fide & omnibus ecclesiasticis do-
gmati-

gmatis hæc locuti sumus, quæ & semper gratia Dei indefinenter in ecclesia docemus, & in catechesibus. Rogo, quæ est illa confidentia, qui tantus animi tumor? Gorgian Leontinum cuncti philosophi & oratores lacerant, quod ausus sit, publice sella posita, polliceri responsurum se, de qua quisque te interrogare uoluisset. Nisi me honor sacerdotii, & ueneratio nominis refrenaret; & scirem illud Apostoli:

Act. 23 Nesciebam fratres, quia Pontifex est scriptum. est enim: Principi populi tui non maledices: qua uociferatione & indignatione uerborum de tua narratione conquereretur? licet ipse nominis tui extenuas dignitatem, cum patrem pene omnium episcoporum, & antiquæ reliquias sanctitatis & opere & sermone despicias. Dicis te, quadam die, cum præsens lectio prouocasset audiente illo & uniuersa ecclesia, de fide & omnibus ecclesiasticis dogmatibus disputasse. Non est mirari Demosthenem, qui pulcherrimam orationem contra Aeschinem multo tempore dicitur exarasse. Frustra suspicimus Tullium. refert enim Cornelius Nepos, se præsen te iisdem pene uerbis, quibus edita est, eam pro Cornelio, seditioso tribuno, defensionem peroratam. En Lysias noster, en Gracchus, & ut aliquid de neotericis inferam, Q. Aterius, qui ingenium in numero habebat; ut sine monitore tacere non posset: de quo egregie Cæsar Augustus, Quintus, inquit, noster sufflaminandus est. Quisquam ne prudentum & sani capitis, in uno Ecclesiæ tractatu, de fide & de omnibus ecclesiasticis dogmatibus se asserat disputasse? Quæso te, ut ostendas mihi, quæ sit illa lectio, toto scripturarum sapore condita, cuius te occasio prouocarit, ut repente ad periculum ingenii descenderes. Et nisi tibi disertitudinis tuæ fluuius inundasset, poteras argui, quod non posses ex tempore de cunctis dogmatibus dicere. Verum quid hoc est? aliud promittis, & aliud exhibes. Consuetudo autem apud nos istiusmodi est, ut iis, qui baptizandi sunt; per quadraginta dies publice tradamus sanctam & adorandam trinitatem. Si te præsens lectio prouocauit, ut de cunctis dogmatibus una hora dices;

res; quid necesse fuit quadraginta dierum replicare doctrinam? si autem ea referebas, quæ per totam quadragesimam locutus es: quo modo te quadam die, ut de cunctis dogmatibus diceres, una lectio prouocauit? Sed & hic ambigue loquitur: potest enim fieri, ut, quæ per quadraginta dies tradere solebat in ecclesia baptizandis, hæc sub unius lectionis occasione perstrinxerit. eiusdem enim eloquentiæ est, & pauca multis, & multa paucis uerbis posse dicere. Hoc quoque intelligi datur, quod, postquam illum una lectio prouocauit, inflammatus ardore dicendi, per quadraginta dies numquam tacuerit; sed & otiosus senex, ex eius ore dependens, dum res inauditas scire desiderat, pene dormiens ceciderit. Utcumque toleranda sunt: forsitan & hæc simpliciter more suo sit locutus. Ponamus reliqua; in quibus, post laciniosæ disputationis labyrinthos, nequaquam dubiam, sed apertam ponit sententiam, & miros tractatus suos hoc fine concludit. Cum hæc ipso præsentem locuti essemus; & ipse post nos causa honoris, quem ei super omnem mensuram exhibuimus, prouocatus esset ut diceret: prædicationem nostram laudauit, atque miratus est, & catholicam fidem esse omnibus declarauit. Quantum ei super omnem mensuram honoris exhibueris, declarant supra mensuram exhibitæ contumeliæ; quando eum per archidiaconum tacere iussisti; & morantem in populis, laudis cupidum per-tonabas. Docent præsentia de præteritis. Ille per totum exinde triennium suas iniurias deuorat, priuataque simultate contempta, fidei tantum correctionem postulat. Tu, qui sumptibus abundas, & totius orbis religio lucrum tuum est, grauissimos illos legatos tuos huc illucq. transmittis, & dormientem senem ad respondendum suscitās. Et reuera, cui tantum honoris detuleras, iustum erat, ut tua præsertim extemporalia dicta laudaret. quia uero solent interdum homines laudare quod non probant, & alienam stultitiam cassis nutrire præconiis: non solum tua dicta laudauit, sed laudauit, & miratus est; & ne miraculum quoque paruum esset, catholicæ esse fidei omni populo declarauit.

uit. Hæc quam uere dixerit, & nos testes sumus, qui audi-
uimus, ad quos tuis uocibus perturbatus uenit exanimis;
temere se communicasse, dicens: Rogatusq. ab omni mo-
nasterio, ut ad te de Bethlehem reuerteretur, tantorum pre-
ces non ferens: sic reuersus est uespere, ut medio noctis au-
fugeret, & literæ ad Papam Syritium probant: quas si le-
geris, peruidebis, quo modo tua dicta miratus sit, & cæ-
tholica declarauerit. Verum nugas terimus, & aniles & su-
perfluas cantilenas longo sermone conuincimus. Transe-
amus ad secundam quæstionem, in qua, quasi nihil sibi pro-
positum sit, securus & ructans dormire se simulat, ut legen-
tes faciat dormire. Sed de reliquis, quæ ad fidem perti-
nent, sermo nobis erat, idest, omnium uisibilibus & inuisi-
bilibus, cælestium fortitudinum, & terrestrium creatura-
rum, unum, & eundem esse conditorem Deum, idest, san-
ctam trinitatem, iuxta David dicentem: Verbo Domini
cæli firmati sunt, & spiritu oris eius omnis uirtus eorum.
Quod simpliciter ostendit & hominis creatio. Ipse est enim,
qui, accepto limo de terra, plasmavit hominem: & per
gratiam propriæ insufflationis animam donauit rationabi-
lem, & liberi arbitrii, non partem aliquam suæ naturæ, iu-
xta quosdam, qui hoc impie prædicant, sed propriam con-
ditionem. Et de sanctis angelis æque credunt, secundum
diuinam scripturam de Deo dicentem: Qui facit angelos
suos spiritus, & ministros suos ignem urentem: de quibus
credere quod immutabilis naturæ sint, non concedit nobis
scriptura, dicens: Angelos quoque, qui non custodierunt
suum principatum, sed dereliquerunt proprium domici-
lium in iudicium magni Dei, uinculis æternis in tenebris cu-
stodiuit: quia immutati sunt: & ex propria dignitate & glo-
ria, magis in demonum ordinem abisse eos cognouimus.
Animas uero hominum ex angelorum ruina, aut ex con-
uersione fieri, neque credidimus aliquando, neque docui-
mus, (absit enim) & alienum hoc esse a prædicatione ec-
clesiastica confitemur. Quærimus, utrum animæ, ante
quam homo in paradiso fieret, & plasmaretur Adam de ter-
ra,

Psal. 32

Gen. 1

Psal. 103

Iuda. 1

ra, inter rationabiles fuerint creaturas; utrum proprium statum habuerint, uixerint, moratæ sint, atque subsisterint: & an Origenis doctrina sit uera, qui dicit cunctas rationabiles creaturas, incorporeales, & inuisibiles, si negligentiores fuerint, paulatim ad inferiora labi, & iuxta qualitates locorum, ad quæ defluunt, assumere sibi corpora, uerbi gratia, primum ætherea, deinde aerea: cumq. ad uicina terræ peruenerint, crassioribus corporibus circumdari, nouissime humanis carnibus alligari: ipsosq. dæmones, qui proprio arbitrio cum principe suo diabolo de Dei ministerio recesserunt, si paululum respiscere cœperint, humana carne uestiri; ut, acta deinceps pœnitentia, post resurrectionem eodem circulo, quo in carnem uenerant, reuertantur ad uisionem Dei, liberati etiam aereis æthereisq. corporibus; & tunc omnia genua curuent Deo, cœlestium, terrestrium, & infernorum, & sit Deus omnia in omnibus. Cum ergo ista quærantur; cur tu, omissis super quibus pugna est, de scammate & loco certaminis egrediens, in peregrinis & longe alienis disputationibus immoraris? Credis quod cunctas uisibiles & inuisibiles creaturas unus Deus fecerit: hoc & Arius confitetur, qui dicit cuncta creata per filium. Si de Marcionis arguereris hæresi, quæ alterum bonum, alterum iustum Deum ferens, illum inuisibilium, hūc uisibilium asserit creatorem: recte mihi de huiusmodi satisfaceres quæstione. Credis, quod uniuersitatis trinitas sit creatrix: istud Ariani & Emeriani negant, Spiritum sanctum non conditorem, sed conditum blasphemantes. Sed te quis hoc tempore infimulat Arianum? Dicis, animas hominum non partem Dei esse naturæ: quasi Manichæus nūc ab Epiphanio sis uocatus. Detestaris eos, qui animas ex angelis asserunt fieri, & illorum ruinam nostram dicunt esse substantiam. Noli dissimulare quod nosti, nec simplicitate quod non habes fingere. nec Origenes umquam dixit, ex angelis animas fieri, cum ipsos angelos nomen esse officii doceat, non naturæ. in libris enim *οὐκ ἀγγέλων*, & angelos, & thronos, & dominationes, potestates, & rectores mundi,

mundi, & tenebrarum, & omne nomen, quod nominatur non solum in presenti sæculo, sed in futuro, dicit animas esse eorum corporum, quæ vel desiderio, vel ministerio susceperint: solemq. ipsum, & lunam, & omnium astro-
rum chorum, esse animas rationabilium quondam & incorporalium creaturarum: quæ nunc uanitati subiectæ, ignitis uidelicet corporibus, quæ nos imperiti & rudes luminaria mundi appellamus, liberabuntur a seruitute corruptionis in libertatem gloriæ filiorum Dei. unde omnis creatura con-
Rom. 8 gemiscit, & parturit. Et Apostolus deplorat, dicens: Infelix ego homo, quis me liberabit de corpore mortis huius? Non est istius temporis, contra dogma gentilium, & ex parte Platicum, scribere. ante annos ferme decem, in commentariis Ecclesiasticis, & explanatione epistolæ ad Ephesios, arbitror sensum animi mei prudentibus explicatum. Hoc nunc rogo, qui tanta loqueris, qui de cunctis sermonibus sub uno tractatu edisseris ueritatem, ut respondeas sci-
 scitantibus breuem absolutamq. sententiam. Quando plas-
 mauit Deus hominem ex limo, & per gratiam propriæ insufflationis ei animam tribuit; utrum illa anima fuerit ante & subliterit, & ubi uersata sit, quæ Dei postea insufflatione donata est; an in sexto die, quando corpus ex limo formatum est, & esse, & uiuere, Dei potestate, susceperit. De hoc taces; & quid quærat, scire dissimulans, in superfluis quæstionibus occuparis. Origenem relinquis intactum, & contra Marcionem, Appollinarem, Eunomium, Arium, Manichæum, ceterorumq. hæreticorum ineptias debaccharis. Manum peteris, & pedem porrigis: & tamen dogma, quod retines, latenter insinuas. Sic nos rusticos placas; ut tuis penitus non displiceas. Dicis, ex angelis demones potius, quam animas fieri: quasi non & ipsi demones iuxta Origenem, hoc est pium, animæ sint aerei corporis; & ex demonibus postea, si resipuerint, humanæ animæ sint futuri. Angelos scribis esse mutabiles, & sub eo, quod pium est, illud, quod impium est, introducis, ut multis pe-
 riadis animæ fiant, non ex angelis, sed ex iis uocabulis, in
 quæ

quæ prius angeli mutati sunt. Volo, quod dico, manifestus fieri. finge aliquem tribuniciæ potestatis suo uitio regradatū, per singula militiæ equestris officia ad tironis uocabulum deuolutum: numquid ex tribuno statim fit tiro? non, sed ante primicerius, deinde senator, ducenarius, biarchus, circitor, eques, dein tiro: & quamquam tribunus quondam miles gregarius sit, tamen ex tribuno non tiro, sed primicerius factus est. Docet Origenes, per scalā Iacob paula. Gen. 28 tim rationabiles creaturas ad ultimum gradum, idest, ad carnem & sanguinem descendere: nec fieri posse, ut de centenario numero subito quis ad unum numerum præcipitur, nisi per singulos numeros, quasi per scalæ gradus, ad ultimum usque perueniat: & tot mutare corpora, quot de cælo ad terram mutauerint mansiones. Hæ sunt strophæ uestræ, atque præstigiæ, quibus nos Pelusiotas & iumenta & animales homines dicitis, quia non recipimus ea, quæ spiritus sunt. Vos Hierosolymitæ etiam angelos deridetis. Pertrahuntur in medium uestra mysteria; & de gentiliū fabulis dogma contextum, Christianis auribus publicatur. Hoc, quod uos miramini, olim in Platone contempnimus: contempnimus autem, quia Christi stultitiam recepimus. Recepimus Christi stultitiam, quia fatuum Dei 1. Cor. 1 sapientius est hominibus. Non pudet Christianos & sacerdotes Dei, quasi de rebus ludicris agatur, uerbis dubiis hæere, & ambiguas librare sententias, quibus loquens magis, quam audiens, decipitur. Vnus ex choro uestro, cum a me teneretur, ut diceret quid sentiret de anima, fuisset ne ante carnem, an non fuisset; fuisse respondit simul & corpus, & animam. Sciebam hominem hæreticum laqueos in sermone querere. tandem reperi eum, ex quo corpus animallet, ex tunc eam dicere animam nuncupatam, quæ prius uel demon, uel angelus Satanæ, uel spiritus fornicationis, aut in parte contraria, dominatio, potestas, administrator spiritus, aut nuncius appellata sit. Si fuit anima ante quam Adam in paradiso formaretur, in quolibet statu & ordine; & uixit, & egit aliquid: (neque enim possumus,

A a a incor-

incorporalem & æternam in modum glirium immobilem torpentemq. sentire) necesse est, ut aliqua causa præcesserit; cur, quæ prius sine corpore fuit, postea circumdata sit corpore. et si animæ est naturale, esse sine corpore: ergo contra naturam est, esse in corpore. si contra naturam est, esse in corpore: ergo resurrectio corporis contra naturam erit. sed non fiet resurrectio contra naturam: ergo, iuxta sententiam uestram, corpus, quod contra naturam est resurgens, animam non habebit. Dicis animam non esse de Dei substantia. Pulchre: damnas enim impiissimum Manichæum, quem nominare pollutio est: Dicis ex angelis animas non fieri. Acquiesco paulisper; licet nouerim, quo sensu dixeris. Quia ergo didicimus, quid neges; nolumus scire, quid credas. Accepto, inquis, de terra limo, plasmavit Deus hominem, & per gratiam propriæ insufflationis animam donauit rationabilem, & liberi arbitrii, non partem aliquam suæ naturæ, (iuxta quosdam, qui hoc impie prædicant) sed propriam condicionem. Videte, quanto circumitu, quod non quærimus, eloquatur. Scimus, quod de terra Deus plasmavit hominem: nouimus, quod insufflauit in faciem eius, & factus est in animam uiuentem: nō ignoramus, quod anima rationalis sit, & proprii arbitrii: & scimus, quod Dei illa condicio sit. Nemo dubitat errare Manichæum, qui dicit eam esse Dei substantiam. hoc nunc interrogo: Anima ista, Dei condicio, liberi arbitrii, rationalis, neque de substantia creatoris, quando facta sit; utrum eo tempore, quo de limo factus est homo, & insufflatum est spiraculum uitæ in faciem eius, an, quæ prius fuerat, & inter rationabiles creaturas & incorporeas erat, atque uiuebat, Dei postea insufflatione donata sit? Hic taces: hic simplicem ac rusticum te simulas; & sub uerbis scripturæ ear, quæ scriptura non sentit, abscondis. In eo loco, ubi dicis, quod nullus quærit, non illam partem aliquam esse suæ naturæ, iuxta quosdam, qui hoc impie prædicant: illud magis debueras dicere, quod omnes quærimus, non eam, quæ prius fuerat, non eam, quam ante condiderat, quæ inter ratio-

rationabiles atque incorporeas & inuisibiles creaturas multo iam tempore uersabatur. nihil horum loqueris: producis nobis Manichæum, & abscondis Origenem: & sicut paruulis, cibum poscentibus, ludicra quædam offerunt gerulæ, ut auocent mentes eorum; sic tu nos rusticos auocas ad alia, ut, dum alterius personæ nouitate tenemur, quod uolumus non quæramus. Esto: hoc non loquaris; & simplicitas tua nihil in se habeat, quod callide taceas. Qui ergo de anima semel dicere cœperas, & de re tanta ab exordio condicionis humanæ repetere, cur, disputatione pendente, ad angelos & ad dispensationem Dominici corporis repente transcendis; & tam grandi in medio prætermissa salebra, dubios nos in luto hædere pateris? Si insufflatio Dei, quod non uis, & quod nunc relinquis ambiguum, humanæ animæ condicio est: Eua, in cuius faciem non insufflauit Deus, unde animam habuit? Taceo de Eua, quæ in typo Ecclesiæ de costa uiri ædificata, non debet post tanta sæcula nepotum calumnias sustinere. Cain, & Abel, primi ex primis hominibus, unde habuere animas? omne deinceps humanum genus quibus animarum censetur exordiis? utrum ex traduce, iuxta bruta animalia; ut, quo modo corpus ex corpore, sic anima generetur ex anima; an rationabiles creaturæ, desiderio corporum paulatim ad terram delapsæ, nouissime etiã humanis illigatæ corporibus sint? an certe, quod ecclesiasticum est secundum eloquia saluatoris, pater usque modo operatur, & ego operor. Et illud Zachariæ: Qui for-
Ioan. 5
Zach. 12
Psal. 32
mat spiritum hominis in ipso. Et in psalmis: Qui fingit per singulos corda eorum, quotidie Deus fabricetur animas: cuius uelle fecisse est, & conditor esse non cessat. Scio, quæ contra hæc soleatis dicere, & adulterina nobis atque incesta proponere: quæ longior pugna est, nec huius temporis patitur angustias. Eadem controuersia & in uos retorqueri potest: & quodcumque in conditorem præsentis temporis uidetur indignum, hoc etiã eo donante non est indignum. Nasci de adulterio, non eius culpa est, qui nascitur, sed illius, qui generat. Quod modo in seminibus non pec-

cat terra, quæ fouet; non semen, quod in sulcis iacitur; non humor; & calor, quibus temperata frumenta in germen pullulant; sed, uerbi gratia, fur, & latro, qui fraude & uiripit semina: sic in generatione hominum recipit terra, idest, uulua quod suum est; & receptum confouet; confortum corporat; corporatum in membra distinguit. Et inter illas secretas uentris angustias, Dei manus semper operatur: idēq, est corporis & animæ creator. Noli despicere bonitatem figuli tui, qui te plasmauit, & fecit ut uoluit. Ipse est Dei uirtus, & Dei sapientia, qui in utero uirginis edificauit sibi domum. **Hebr. 11** Iepte, inter uiros sanctos Apostoli uoce numeratus, meretricis est filius. **Gen. 25** Sed audi, ex Rebecca & Isaac Esau gentus hispidus, tam mente quam corpore, quasi bonum triticum in lolium auenasq, degenerat: quia nō in seminibus, sed in uoluntate nascentis causa est uiriorum, atque uirtutū. Si offensa est, nasci in corporibus humanis: quo modo Isaac, Sampson, Ioannes Baptista de repromissione nascuntur? **Gen. 15** **Iud. 13** Intelligis, quid sit, fidem suam audacter ac libere profiteri? **Luc. 1** Pone errare me: aperte dico, quod sentio. & tu igitur aut libere nostra profiteri, aut constanter tua loquere. noli statuere te in acie mea, ut, rusticitate simulata, in tuto abeas, cum uolueris pugnantis terga confodere. Non est illius temporis, contra Origenis dogmata conscribere: alteri istud, si Christus uitam dederit, operi dedicabimus, nunc queritur, an, qui arguitur, ad interrogata responderit, & simplex sit & aperta eius responsio. Transeamus hinc ad famosissimam de resurrectione carnis & corporis questionem: in qua te rursus, lector, admonitum uolo, ut cū timore & iudicio Dei me scias loqui, & te audire debere. neque enim tantæ stultitiæ sum, ut, si in expositione illius fides mera est, & perfidiæ nulla suspicio, quæram accusandi rationem; & dum uolo alium notare culpæ, ipse noter calumniæ. lege ergo de resurrectione carnis, quæ subdita sunt: & cum legeris, & non placuerint, (scio enim haud placitura ignorantibus) suspende iudicium, expecta paulisper usque ad finem responsionis nostræ, cohibe sententiam: & si tibi

fi tibi postea non placuerint, tunc nos calumniæ denotabis. Passionem quoque eius in cruce, & mortem, ac sepulturā, quæ uniuersa seruauit, ac resurrectionem ueritate & non putatiue confitemur: qui & primogenitus ex mortuis, primitias massæ corporum nostrorum, quas in sepulcro positas suscitauit, peruexit ad cælum, spem nobis resurrectionis in resurrectione proprii corporis tribuens: unde & omnes sic speramus resurgere ex mortuis, sicut ille resurrexit. Non in aliis quibusdam peregrinis & in alienis corporibus, quæ assumentur in phantasmate, sed, sicut ipse in illo corpore, quod apud nos in sancto sepulcro conditum resurrexit, ita & nos in ipsis corporibus, quibus nunc circumdamur, & in quibus nunc sepelimur, eadem ratione & uisione speramus resurgere. Quæ enim, iuxta Apostolum, seminantur in corruptione, surgent in incorruptione: quæ seminantur in ignobilitate, surgent in gloria. Seminatur corpus animale, surget corpus spirituale: de quibus & saluator docens locutus est: Qui enim digni fuerint sæculo illo, & resurrectione ex mortuis, neque nubent, neque nubentur: neque enim ultra mori poterunt, sed erunt sicut angeli Dei in cælo, cum sint filii resurrectionis. Rursum in alia parte epistolæ, hoc est, in fine suorum tractatuum, ut auribus illuderet nescientium, strepitum resurrectionis ac pompam hac uerborum ambiguitate librauit: Sed neque de secundo glorioso aduentu domini nostri Iesu Christi intermisimus, qui uenturus est in gloria sua iudicare uiuos & mortuos: ipse enim suscitabit omnes mortuos, & ante suum tribunal esse faciet; & unicuique reddet secundum quod egit per corpus, siue bonum, siue malum; scilicet aut coronandus in corpore, quod caste egit & iuste; aut condemnandus, quod uoluptatibus pariter iniquitatibusque seruiuit. Hoc, quod in Euangelio legimus: In consummatione mundi, si fieri potest, seduci etiā electos; in hoc capitulo comprobamus. Audit uulgus indoctum mortuos & sepultos: audit resurrectionem mortuorum, ueritate & non putatiue: audit primitias massæ nostrorum corporum, in Domini corpore, ad cælestia per-

1. Cor. 15

Luc. 20

Matth. 22

Matth. 24

uenisse: audit resurrecturos, non in peregrinis alienisq. corporibus, quæ assumuntur in phantasmate; sed, sicut surrexit Dominus in corpore, quod apud nos in sancto sepulcro conditum iacuit, ita & nos in ipsis corporibus, quibus nunc circumdamur, & sepelimur, in die iudicii resurrecturos. Et, ne hoc parum quis existimaret, addidit in extremo capitulo: Et unicuique reddet secundum quod egit in corpore, siue bonum, siue malum; scilicet aut coronandus in corpore, quod caste egit, & iuste; aut condemnandus, quod uoluptatibus, iniquitatibusq. seruituit. Hæc audiens indoctum uulgus, in tanto mortuorum sepulti corporis resurrectionis sonitu, nullam stropham, nullas insidias suspicatur, credit esse, quod dicitur. sanctiores enim sunt aures populi, quam sacerdotis animus. Iterum atque iterum te, lector, commoneo, ut patientiam teneas; & discas, quod ego quoque per patientiam didici: & tamen, ante quam uultum draconis euoluam, & dogma Origenis de resurrectione breuiter exponam, (non enim poteris uim scire antidoti, nisi uenena perspexeris) illud diligenter obserua, & caute relegens numera; quod nouies resurrectionem nominās corporis, ne semel quidem carnis inseruit: suspectumq. tibi sit, quod de industria prætermisit. Dicit ergo Origenes in pluribus locis, & maxime in libro de resurrectione quarto, & in expositione primi psalmi, & in Stromatibus, duplicem errorem uersari in Ecclesia, nostrorum, & hæreticorum: nos simplices & philosarcas dicere, quod eadem ossa, & sanguis, & caro, idest, uultus, & membra, totiusq. compago corporis resurgat in nouissima die, scilicet ut pedibus ambulemus, operemur manibus, uideamus oculis, auribus audiamus, circumferamusq. uentrem insatiabilem, & stomachū cibos concoquentem: consequens autem esse, qui ista credamus, dicere nos, quod & comedendum nobis sit; & bibendum, digerenda stercorea, effundendus humor, ducendæ uxores, liberi procreandi. quo enim membra genitalia, si nuptiæ non erunt? quo dentes, si cibi non molendi? s. Cor. 6 sunt? quo uenter, & cibi, si, iuxta Apostolum, & hic, & illi

illi destruentur? ipso iterū clamante: Caro, & sanguis regnū 1. Cor. 15
 Dei non possidebunt; neque corruptio incorruptionem.
 Hæc nos innocentes & rusticos asserit dicere. Hæreticos ue-
 ro, in quorum parte sunt Marcion, Apelles, Valentinus,
 Manes, nomen insanix, penitus & carnis & corporis resur-
 rectionem negare, & salutem tantum tribuere animæ; fru-
 straq. nos dicere ad exemplum Domini resurrecturos, cum
 ipse quoque Dominus in phantasmate resurrexerit; & non
 solum resurrectio eius, sed & ipsa natiuitas τῷ δὲ σαρκί, idest,
 putatiue, uisa magis sit, quā fuerit. Sibi autem utramque
 displicere sententiam: fugere se & nostrorum carnes, & hæ-
 reticorum phantasmata; quia utraque pars in contrarium
 nimia sit; aliis id uolentibus se esse, quod fuerunt; aliis re-
 surrectionem corporum omnino denegantibus. Quattuor,
 inquit, elementa sunt, philosophis quoque nota & medi-
 cis, de quibus omnes res & corpora humana compacta
 sunt, terra, aqua, aer, & ignis: terram in carnibus, æ-
 rem in halitu, aquam in humore, ignem in calore intelli-
 gi: cum ergo anima caducum hoc frigidumq. corpuscu-
 lum Dei iussione dimiserit, paulatim omnia redire ad ma-
 trices suas substantias: carnes in terram relabi, halitum in
 aera misceri, humorem reuerti ad abyssos, calorem ad æthe-
 ra subuolare: e quo modo, si sextarium lactis & uini mittas
 in pelagus, uelisq. rursum separare quod mixtum est, uinum
 quidem & lac, quod miseras, non perire, non tamen posse,
 quod fustum est, separari; sic substantiam carnis & sangui-
 nis non perire quidem in originalibus materiis, non tamen
 in antiquam redire compagem, nec posse ex toto eadem
 esse, quæ fuerint. Cum autem ista dicantur; soliditas car-
 nium, sanguinis liquor, crassitudo neruorum, uenarumq.
 perplexio, & ossium durities denegatur. Alia ratione resur-
 rectionem corporum confitemur, eorum, quæ in sepulcris
 posita sunt, dilapsaq. in cineres, Pauli Pauli, & Petri Petri,
 & singula singulorum; neque enim fas est, ut in aliis corpo-
 ribus animæ peccauerint, in aliis torqueantur; nec iusti iu-
 dicis alia corpora pro Christo sanguinem fundere, & alia

Aaa 4 coro-

coronari. Quis hæc audiens, resurrectionem carnis cum negare putet? Est, inquit, singulis feminibus ratio quædam a Deo artifice insita, quæ futuras materias in medullæ principis tenet. Et quo modo tanta arboris magnitudo, truncus, rami, poma, folia non videntur in semine, sunt tamen in ratione seminis, quam Græci *σπυρμα* uocant, & in grano frumenti est intrinsecus, uel medulla, uel uenula; quæ cum in terra fuerit dissoluta, trahit ad se uicinas materias, & in stipulam, folia, aristasq. consurgit; aliudq. moritur, aliud resurgit; neque enim in grano tritici, radices, culmus, folia, aristæ, paleæ sunt dissolutæ: sic & in ratione humanorum corporum manent quædam surgendi antiqua principia, & quasi *σπυρμα*, idest, seminarium mortuorum, sinu terræ confouetur. Cum autem iudicii dies aduenerit; & in uoce archangeli, & in nouissima tuba tremuerit terra; mouebuntur statim semina, & in puncto horæ mortuos germinabunt: non tamen easdem carnes, nec in iis formis restituent, quæ fuerunt. Vis scire uerum esse

1. Cor. 15 quod dicimus: audi Apostolum. Sed dicit aliquis, quo modo resurgent mortui? quo autem corpore uenient? Insuper, quod tu seminas, non corpus, quod futurum est, seminas, sed nudum granum, ut puta tritici, uitis, & arboris. Et quia de grano tritici ac semente arborum ex parte iam diximus; nunc de acino uinacii differamus. Granum paruum est, ita ut uix duobus digitulis teneri possit. ubi sunt radices? ubi radicum, & trunci, & propaginum tortuosa perplexio? ubi pampinorum umbracula, & uuarum pulchritudo, futura uina parturiens? aridum est, quod tenetur, & pene uix cernitur: sed in sicco illo grano, potentia Dei & occulta ratione sementis spumantia multa fundentur. Hæc ligno tribuis, quod perituum est; sic ornatur, quod mansurum non est, nec pristinam recipiet uilitatem: & uis rursus ossa, sanguinem, membra; ut crescentibus capillis tonsore egeas; nasus pituitas digerat; incrementa unguium secanda sint; ut per inferiores partes uel stercora, uel libidines effluant? Si affers istas ineptias rusticorum & carnis, in qua

quia Deo placere non possumus, quasi inimici; obliuisceris resurrectionem mortuorum. Seminatur in corruptione; surget in incorruptione. Seminatur in contumelia; surget in gloria. Seminatur in infirmitate; surget in uirtute. Seminatur corpus animale; surget corpus spirituale. Nunc oculis uidemus, auribus audimus, manibus agimus, pedibus ambulamus: in illo autem corpore spirituali toti uidebimus; toti audiemus, toti operabimur, toti ambulabimus; & transfigurabit Dominus corpus humilitatis nostræ, conforme *Philip. 3* corpori claritatis suæ gloriæ. Quando dixit, transfigurabit, idest, μετασχηματισει; membrorum, quibus nunc utimur, diuersitas denegatur. Aliud nobis spirituale & æthereum promittitur; quod nec tactui subiaceret, nec oculis cernitur, nec pondere prægrauatur, & pro locorum, in quibus futurum est, uarietate mutabitur. alioqui, si eadem carnes erunt, & corpora, quæ fuerunt, rursus mares & feminae, rursus nuptiæ, uiris hirsutum supercilium, barba prolixa, mulieribus leues genæ, & angusta pectora: ad concipiendos & pariendos fetus uenter & femora dilatanda sunt. resurgent etiam infantes, resurgent & senes, illi nutriendi, hi baculis sustentandi. Nec uos, o simplices, resurrectio Domini decipiat, quod latus & manus monstrauerit, in litore steterit, in itinere cum Cleopha ambulauerit, & carnes & ossa habere se dixerit. illud corpus aliis pollet privilegiis, quod de uiri semine & carnis uoluptate non natum est. Comedit post resurrectionem suam, & bibit, & uestitus apparuit; tangendum se præbuit: ut dubitantibus apostolis fidem faceret resurrectionis. sed tamen non dissimulat naturam æerei corporis & spiritualis: clausis enim ingreditur ostiis, & in fractione panis ex oculis euanescebat. Ergo & nobis post resurrectionem bibendum erit, & comedendum, & post cibum stercore egerenda? Et ubi erit illa promissio: Oportet mortale hoc induere immortalitatem? Hæc est omnis causa, cur in expositione fidei tuæ, ad decipiendas aures ignorantium, nouies corpus, & ne semel quidem carnes nominas; dum homines putant te carnes in corporibus confiteri, & idem

*Philip. 3**Luc. 24**Ioan. 20**1. Cor. 15*

idem carnem esse quod corpus. si idem est, non diuersum significat. Scio enim te hoc esse dicturum. Putavi idem corpus esse, quod carnem: simpliciter sum locutus. Quare non carnem potius nominas, ut corpus significes; & indifferenter nunc carnem, nunc corpus, ut corpus in carne, & caro in corpore demonstraretur? Sed, mihi crede, non est simplex silentium tuum. alia enim carnis, alia corporis definitio est. omnis caro est corpus, non omne corpus est caro. caro est proprie, quæ sanguine, uenis, ossibus, neruisque constringitur. corpus, quamquam & caro dicatur, interdum tamen æthereum, uel æereum nominatur, quod tactui uisuique non subiacet, & plerumque uisibile est, atque tangibile. Paries corpus est, sed non caro. Vnde Apostolus corpora cælestia appellat, & corpora terrestria. Cæleste corpus, solis, lunæ, stellarum; terrestre, ignis, aeris, aquæ, terræ, & reliquorum, quæ absque anima his sentiuntur elementis. Vides nos intelligere subtilitates uestras, & arcana, quæ in cubiculis & inter perfectos loquimini? & quæ populus foris stans non meretur audire, proferre in medium? Hoc est illud, quod, reducta ad auriculam manu, & concrepantibus digitis, ridentes dicitis: Omnis gloria filiae regis intrinsecus. Et: Introduxit me rex in cubiculum suum.

Psal. 44 **Cant. 1** Patet, quare corporis, & non carnis resurrectionem dixeris: scilicet: ut nos rudes carnem te dicere putaremus in corpore, & hi, qui perfecti sunt, intelligerent carnem in corpore denegari. Denique Apostolus in epistola sua ad Colossenses, uolens corpus Christi carneum, & non spirituale, æereum, tenue, demonstrare, significanter locutus est, dicens: Et nos, cum essetis aliquando alienati a Christo, & inimici sensus eius in operibus malis, reconciliauit in corpore carnis suæ per mortem. Rursumque in eadem

Col. 2 epistola: In quo circumcisi estis circumcisione non manufacta, in expoliatione corporis carnis. Si corpus carnem solum significat; & non est nomen ambiguum, nec ad diuersas intelligentias trahi potest: satis superflue corporeum & carneum dicit, quasi caro non intelligatur in corpore.

re.

re. In symbolo fidei & spei nostræ, quod ab apostolis traditum non scribitur in charta, & atramento, sed in tabulis cordis carnalibus, post confessionem Trinitatis, & unitatis Ecclesiæ, omne Christiani dogmatis sacramentum, carnis resurrectione concluditur. Et tu intantum in corporis, & iterum corporis, & tertio corporis, & usque nouies corporis, uel sermone, uel numero immoraris: nec semel nominas carnem: quod illi semper nominant carnem, corpus uero tacent. Sed & illud, quod argute subnectis, & prudenter præcauens dissimulas, scito nos intelligere. His enim testimoniis ueritatem resurrectionis probas, quibus Origenes negat; & de dubiis incerta confirmans, certam fidei domum subita tempestate subuertis. Seminatur, inquit, corpus animale: surget corpus spirituale. Neque enim nubent, neque nubentur, sed erunt sicut angeli in cælis. Quæ alia exempla assumeres, si resurrectionem negares? Vis resurrectionem carnis ueritate, & non putatiue, ut loqueris, confiteri. Post illa, quibus ignorantium blanditus es auribus, quod in ipsis corporibus, in quibus mortui sumus, & sepulti resurgamus, hoc potius adiunge, & dic: Quoniam spiritus carnem & ossa non habet, sicut me uideris habere: & proprie ad Thomam: Infer digitum tuum in manus meas, & manum tuam in latus meum, & noli esse incredulus, sed fidelis. Sic & nos post resurrectionem eadem habebimus membra, quibus nunc utimur, easdē carnes & sanguinem & ossa: quorum in scripturis sanctis opera, non natura, damnantur. Denique in Genesi scriptū est: Non permanebit spiritus meus in hominibus istis, quia caro sunt. Et Paulus apostolus de praua doctrina & operibus Iudæorum, Non acquieui, ait, carni & sanguini. Et ad sanctos, qui utique in carne erant, dicit: Vos autem in carne non estis, sed in spiritu: si tamen Dei spiritus habitat in uobis. Negans enim eos in carne, quos in carne esse constabat, non carnis substantiam, sed peccata damnabat. Hæc est uera resurrectionis confessio; quæ sic gloriam carni tribuit, ut non auferat ueritatem. Quod uero dicit Apostolus, Corruptibile hoc,

1. Cor. 15

Luc. 20

Luc. 24

Ioan. 20

Gen. 6

Gal. 1

Rom. 8

hoc; & mortale; hoc ipsum corpus, idest, carnem, quæ
 tunc uidebatur. Quod autem copulat, Induere incorruptio
 nem; & immortalitatem; illud indumentum, idest, uesti
 mentum, non dicit corpus abolere, quod ornat in gloria;
 sed, quod ante inglorium fuit, efficere gloriosum; ut, mor
 talitatis & infirmitatis uiliore ueste deposita, immortalita
 tis auro, &, ut ita dicam, firmitatis atque uirtutis beatitu
 dine induamur; uolentes non spoliari carne, sed superue
 stiri in gloria, & domiciliū nostrum, quod de cælo est, superin
 dui desiderantes, ut deuoretur mortale a uita. Certe nemo
 superinduitur, nisi qui ante uestitus est. Sic & Dominus no
 ster in monte transfiguratus est in gloria; non ut manus, ac
 pedes ceteraq. membra perderet, & subito in rotunditate
 uel solis uel sphaeræ uolueretur; sed eadem membra solis ful
 gore rutilantia, apostolorum oculos præfringerent; unde
 & uestimenta eius mutata sunt in candorem, non in aerem;
 ne forte & uestes eius asseras spirituales. Et facies eius, in
 quit, fulgebat sicut sol. Vbi autem facies nominatur, exi
 stimo quod & cetera membra conspecta sint. Enoch trans
 latus est in carne: Elias carneus raptus est in cælum; nec
 dum mortui; & paradisi iam coloni, habent quoque mem
 bra, cum quibus rapti sunt; atque translatis. Quod nos
 imitamur ieiunio, illi possident Dei consortio. Vescuntur
 cælesti pane, & saturantur omni uerbo Dei, eundem ha
 bentes Dominum, quem & cibum. Audi saluatorem dicen
 tem: Et caro mea requiescet in spe. Et in alio loco: Ca
 ro eius non uidit corruptionem. Et rursum: Omnis caro
 uidebit salutare Dei. Et tu semper corpus ingeminas? Pro
 fer magis Ezechielem, qui ossa iungens ossibus, & educens
 ea de sepulcris suis, & super pedes stare faciens, carnibus
 neruisq. constringit, & cute desuper tegit; donec Iob, tor
 mentorum uictor, & testa radens putridæ carnis saniem,
 miseras suas resurrectionis spe & ueritate soletur: Quis mi
 hi det, inquit, ut scribantur sermones mei? quis mihi det,
 ut exarentur in libro stylo ferreo, & plumbi lamina, uel cel
 te sculptantur in silice? scio enim, quod redemptor meus ui
 uit;

uit; & in nouissimo die de terra surrecturus sum; & rursus
 circumdabor pelle mea; & in carne mea uidebo Deum;
 quem uisurus sum ego ipse, & oculi mei conspecturi sunt,
 & non alius. reposita est hæc spes mea in sinu meo. Quid
 hac prophetia manifestius? nullus tam aperte post Chri-
 stum, quam iste ante Christum de resurrectione loquitur.
 uult uerba sua in perpetuum durare; &, ut nulla possint ue-
 rustate deleri, exarari ea uult in plumbi lamina, & sculpi in
 filice. Sperat resurrectionem, immo nouit, & uidit, quod
 uiuit Christus redemptor eius, & in nouissimo die de terra
 surrecturus sit. Necdum mortuus erat Dominus, & athle-
 ta Ecclesie redemptorem suum uidebat ab inferis resurgen-
 tem. Illud uero, quod infert: Et rursus circumdabor pel-
 le mea, & in carne mea uidebo Deum: puto quod non lo-
 quatur quasi amator carnum, quas putridas foetentesq; cer-
 nebat; sed ex fiducia resurgendi contemnit presentia, sola-
 tio futurorum. Rursus ait: Circumdabor pelle mea. Vbi
 hic corpus æthereum? ubi aereum, & spiritui & auræ simi-
 le? certe, ubi pellis, & caro, ubi ossa, & nerui, & san-
 guis, & uenæ, ibi carnis structura, ibi sexus proprietas. Et
 in carne, inquit, mea uidebo Deum. Quando omnis caro Luc. 3
 uidebit salutare Dei, idest Iesum Deum; tunc & ego uide-
 bo redemptorem, & saluatorem, & Deum meum. uidebo
 autem in ista carne, quæ me nunc cruciat, quæ nunc præ
 dolore distillat. ideo Deum in carne conspiciam, quia
 omnes infirmitates meas sua resurrectione sanauit. Nonne
 tibi uidetur iam tunc Iob contra Origenem scribere, & pro
 carnis ueritate, in qua tormenta sustinuit, alterum contra
 hæreticos habere certamen? Dolet ei, si tanta sit frustra
 perpeffus; &, alia spiritualiter resurgente, ista carnaliter cru-
 ciata sit. unde inculcat, & exaggerat, & omnia lubricæ con-
 fessionis arcana manifesta uoce concludit, dicens: Quem
 uisurus sum ego ipse, & oculi mei conspecturi sunt, & non
 alius. Is si non in sexu suo surrecturus est; si non eisdem
 membris, quæ iacuerunt in stercore; si non eosdem oculos
 aperiat ad uidendum Deum, quibus tunc uidebat uermicu-
 los;

los; ubi erit ergo Iob? Tollis ea; in quibus substitit Iob; & donas mihi inane uocabulum resurgentis: quo modo, si nauim post naufragium restitutam uelis, ac neges singula, de quibus nauis construitur? Ego libere dicam; &, quamquam torqueatis labia, trahatis capillum, applaudatis pede, Iudeorum lapides inquiratis, fidem Ecclesie apertissime confitebor. Resurrectionis ueritas catholica, sine carne & ossibus, sine sanguine & membris intelligi non potest. Vbi caro, & ossa, & sanguis, & membra sunt, ibi necesse ut sexus diuersitas sit: ubi sexus diuersitas est, ibi Ioannes Ioannes, Maria Maria. Noli timere eorum nuptias, qui etiam ante mortem in sexu suo sine sexu opere uixerunt.

Matth. 2 Quando dicitur: In illa die neque nubent, neque nubentur: de iis dicitur, qui possunt nubere, & tamen non nubent: nemo enim dicit de angelis, Non nubent, neque nubentur. Ego numquam audiui, spiritualium uirtutum in celo nuptias celebrari: sed, ubi sexus est, ibi uir & femina. Vnde & tu, inuitus licet, cogente ueritate confessus es, & dixisti: aut coronandus in corpore, quod caste egit, & iuste; aut condemnandus in corpore, quod uoluptatibus iniquitatiq. seruiuit. Tolle corpus, & pone carnem, & uirum ac feminam non negasti. quis enim uiuit cum gloria pudicitie, qui non habet sexum; per quem committi potuit impudicitia? quis enim umquam lapidem coronauit, quia uirgo permanferit? Angelorum nobis similitudo promittitur, idest, beatitudo illa, in qua sine carne & sexu sunt angeli, nobis in carne & sexu nostro donabitur. Mea rusticitas sic credit, & sic intelligit sexum confiteri sine sexuum operibus, homines resurgere, & sic eos angelis adaequari. Nec statim superflua uidebitur membrorum resurrectio, quae caritura sint officio suo, cum adhuc in hac uita positi, nitamur opera non implere membrorum. Similitudo autem ad angelos, non hominum in angelos demutatio, sed profectus immortalitatis & glorie est. Argumenta uero illa puerorum, & infantium, & senum, & ciborum, & stercoreum, quibus aduersum ecclesias uteris, non sunt tua, de gentiliu

fonte

fonte manarunt. eadem enim opponunt nobis ethnici. Qui Christianum esse te dicis, gentilium arma depone. discant illi magis a te resurrectionem carnis confiteri, quam tu ab illis negare: aut, si & tu de hostium numero es, ostende te libere aduersarium, ut ethnicorum suscipias uulnera. *Deut. 29*
 Dono tibi nutriculas tuas, ne uagiant infantes: dono decrepitos senes, ne hiberno frigore contrahantur. Frustra etiam tonsores artificia didicerunt, scientes Israeliticum populum per quadraginta annos nec unguium, nec capillorum incrementa sensisse: &, quod his maius est, non sunt attrita uestimenta eorum, nec inueterauerunt calciamenta eorum. Enoch, & Elias, de quibus dudum diximus, tanto tempore in eadem permanent ætate, qua rapti sunt: habent dentes, uentrem, genitalia; & tamen nec cibis, nec uxoribus indigent. Quid potentiam Dei calumniaris? qui potest de medulla illa, & de seminario uestro interiori, non carnes tantum de carnibus, sed corpus educere, & aliud ex alio facere, & de aqua, idest de uilitate carniū, pretiosa & aerii corporis uina mutare; potest utique eadem potentia, qua de nihilo cuncta fabricatus est, reddere quæ fuerunt: quia multo minus est, restituere quod fuerit, quàm facere quod non fuit. Miraris, si de infantibus, & senibus in perfecti uiri ætatem resurrectio fiat; cum de limo terræ, absque ullis ætatum incrementis, consummatus homo factus sit? *Gen. 3*
 Costa mutatur in feminam: & tertio humanæ conditionis modo uilia & pudenda nostræ natiuitatis elementa mutantur in carnes, ligantur membris, discurrunt in uenas, in ossa durantur. Vis & quartum genus humanæ generationis audire? Spiritus sanctus superueniet in te, & uirtus altissimi obumbrabit tibi. *Luc. 1*
 Propterea, quod nascetur ex te sanctum, uocabitur filius Dei. Aliter Adam, aliter Eua, aliter Abel, aliter homo Iesus Christus. Et in omnibus diuersis exordiis una hominis natura non differt. Resurrectionem carnis, omniumq. membrorum si uelim probare, & ad singula testimonia explanationes adiungere; multis libris opus erit: sed præsens causa hoc non desiderat. *proposui*

- posui enim, non Origeni in omnibus respondere, sed fraudulentæ satisfactionis aperire mysteria. attamen, quia longus fui in assertionem contraria; & uereor ne, dum fraudes pandere studeo, scandalum lectori reliquerim; acerrimatim testimonio ponam, cursimq. perstringam; ut toto contra uenentam argumentationem scripturarum pondere dimicemus.
- Matth. 22** Qui uestem non habet nuptialem, nec seruauit illud mandatum: Candida sint uestimenta tua: semper manibus pedibusq. constringitur: nec recumbat in conuiuio, sedeat in folio, stet ad dexteram Dei, mittitur in gehennam.
- Luc. 12** ubi fletus oculorum, & stridor dentium est. Capilli capitis uestri numerati sunt. Si capilli, puto facilius dentes. Frustra autem numerati, si aliquando perituri. Veniet hora, in qua omnes, qui in monumentis sunt, audient uocem filii Dei, & protendent; audient auribus, procedent pedibus. hoc & Lazarus ante iam fecerat. procedent autem de monumentis: idest, qui monumentis illati fuerant, uenient mortui, & resurgent de sepulcris suis. Ros enim, qui a Deo est, medulla est ossibus ipsorum. Tunc implebitur, quod
- Esa. 26** Dominus loquitur per prophetam: Populus meus intra in cellaria tua aliquantulum, donec ira mea transeat. Cellaria sepulcra significant, de quibus hoc utique profertur, quod conditum fuerat: Et exibunt de sepulcris suis ueluti hinnuli de uinculis soluti. Gaudebit cor eorum, & ossa eorum, sicut sol, orientur: ueniet omnis caro in conspectu Domini: & mandabit piscibus maris; & eructabunt ossa, quæ comederant: & faciet compagem ad compagem, & os ad os: & qui in terræ puluere dormierunt, resurgent, alii in uitam æternam, alii in opprobrium & confusionem æternam.
- Esa. 66** Tunc uidebunt iusti impiorum pœnas, atque cruciatus: quoniam uermis eorum non morietur, & ignis eorum non
- Rom. 6** extinguetur, & erunt in cōspectu omnis carnis. Quotquot igitur habemus hanc spem, sicut exhibuimus membra nostra famulantia immunditiæ & iniquitati ad iniquitatem, ita exhibeamus ea famulantia iustitiæ ad sanctificationem: ut
- 2. Cor. 4** resurgentes ex mortuis, in nouitate uitæ ambulemus. Quo modo

modo & uita domini Iesu manifestatur in nostro mortali corpore: & qui suscitauit Iesum Christum a mortuis, uiuificabit & mortalia corpora nostra, propter inhabitantem spiritum eius in nobis. Iustum enim est, ut qui semper mortificationem Christi in corpore nostro circumtulimus, uita quoque Iesu manifestetur in corpore nostro mortali, idest, in carne mortali secundum naturam, æterna autem secundum gratiam. Vidit & Stephanus stantem Iesum ad dexteram Patris: & manus Moyſi mutata est in candorem niuis, & deinceps colori pristino restituta. In utraque diuersitate manus fuit. Figulus ille Hieremiæ, cuius per duritiam lapidum uas, quod fecerat, contractum est, de eadem massa & de eodem luto redintegrait, quod ceciderat. sed & ipsum resurrectionis uocabulum significat, non aliud ruere, aliud suscitari: & quod adiicitur mortuorum, carnem propriam demonstrat: quod enim in homine moritur, hoc & uiuitur. Vulneratus ille itineris Iericho totus refertur ad stabulum, & delictorum plagæ immortalitate sanantur. Aperta sunt & sepulcra in Domini passione, quando sol fugit, terra tremuit, & multa corpora sanctorum surrexerunt, & uisa sunt in sancta ciuitate. Quis est, inquit Esaias, qui ascendit ex Edom, fulgida uestimenta eius ex Bosor, sic formosus in stola candida? Edom aut terrenus interpretatur, aut cruentus: Bosor aut caro, aut in tribulatione. Paucis uerbis totum resurrectionis mysterium demonstrat, idest, & ueritatem carnis, & augmentum gloriæ. Et est sensus: Quis est iste, qui ascendit de terra, ascendit de sanguine? Cuius uestimenta, iuxta prophetiam Iacob, qui alligauit pullum suum ad uitem, & torcular calcauit solus, multo rubentia sunt. De Bosor, idest, de carne siue tribulatione mundi: ipse enim uicit mundum. Ideoq. rubra & fulgida sunt uestimēta eius, quia speciosus forma fuit præ filiis hominum: propter gloriam triumphantis in stolam candidam commutata sunt: & tunc uere de Christi carne completum est: Quæ est ista, quæ ascendit dealbata, innitens super fratruēlem suum? Et quod in eodem libro scribitur: Fratruelis meus rubicun-

Rom. 7

Act. 7

Exod. 4

Hier. 18

Luc. 10

Matth. 27

Esa. 63

Gen. 49

Psal. 44

Cant. 8

Cant. 5

B b b dus

Apoc. 14 dus & candidus. Hunc imitantur, qui uestimenta sua non
 coinquinauerunt cum mulieribus: uirgines enim perman-
 Matth. 19 serunt: qui se castrauerunt propter regna cælorum: itaque
 in albis erunt uestibus. Eo tempore sententia Domini ope
 Ioan. 6 re perfecta monstrabitur: Omne quod dedit mihi pater,
 non perdam ex eo quidquam, sed resuscitabo illud in nouis-
 Luc. 15 simo die. Totum uidelicet hominem, quem totum nascentem
 Ioan. 19 oberrabat, humeris saluatoris tota portabitur: & quæ pec-
 catis languida fuit, clementia iudicis sustentabitur. Tunc ui-
 Matth. 24 debunt illum, qui compunxerunt, qui clamauerunt: Cru-
 Apoc. 1 cifige, crucifige talem. Tribus & tribus cædent pectora, ipsi
 & mulieres eorum, illæ mulieres, quibus Dominus locu-
 Luc. 23 tus est crucem portans: Filix Hierusalem, nolite flere su-
 per me, sed super uos flere, & super filios uestros. Tunc an-
 gelorum uaticinium complebitur, qui stupentibus, aposto-
 Act. 1 lis euntem in cælum, dixerunt: Hic Iesus, qui a uobis as-
 sumptus est in cælum, sic ueniet, quemadmodum uidistis
 eum euntem in cælum. Quale est autem, iccirco dicere Do-
 minum post resurrectionem quadraginta diebus comedis-
 se cum apostolis, ne phantasma putaretur; & hoc ipsum, quod
 comedit in carne, & in membris uisus est, in phantasmate
 confirmare? Aut uerum est, quod uidebatur, aut falsum. si
 uerum est; ergo uere comedit, & uere membra habuit. si
 autem falsum; quo modo res falsas ostendere uoluit, ut re-
 surrectionis ueritatem probaret? nemo enim falso uerum
 probat. Ergo, inquires, & nos post resurrectionem come-
 suri sumus? Nescio: non enim scriptum est: & tamen, si
 Rom. 14 quærat, non puto comesuros. Legi enim, non esse re-
 gnum Dei cibum, & potum, repromittens nobis, quæ o-
 Esa. 64 lus non uidit, nec auris audiuit, nec in cor hominis ascen-
 Exod. 24 derunt. Moyses & Elias quadraginta diebus ieiunauerunt,
 3. Reg. 19 ac noctibus. hoc hominum natura non patitur: sed quod
 homini impossibile est, Deo impossibile non est. sicut, qui
 futura prædicit, non interest utrum post decem annos, aut
 post centum futura pronūciat; quia una est scientia futuro-
 rum:

sum: sic, qui quadraginta diebus potest ieiunare, & uiuere,
 imino non potest ieiunare, sed uiuit uirtute Dei, & æterno
 tempore poterit absque esca & potu uiuere. Quare fauum *Luc. 24*
 comedit Dominus? ut resurrectionem probaret, nō ut tuis
 faucibus mella permitteret. Piscem in prunis assum petiit,
 ut dubitantes confirmaret apostolos, qui ad illum accedere
 non audebant, quod putarent se spiritum uidere, non cor-
 pus. Archisynagogi filia suscitatur, & cibum accipit. Laza-
 rus quadriduanus mortuus resurgit, & prandens inducitur; *Marc. 5*
 non quia apud inferos esuriebat; sed quia difficultas operis, *Ioan. 12*
 scrupulositatem fidei requirebat. Quo modo ueras manus
 & uerum ostendit latus; ita uere comedit cum discipulis; *Ioan. 20*
 uere ambulauit cum Cleopha; uere lingua locutus est cum *Luc. 24*
 omnibus; uero accubitu discubuit in cæna; ueris manibus
 accepit panē, benedixit, ac fregit, & porrigebat illis. Quod
 autē ab oculis repente euanuit, uirtutis Dei est, non umbræ
 & phantasmatis. Alioquin & ante resurrectionem, cum edu-
 xissent eum de Nazareth, ut præcipitarent de supercilio *Luc. 4*
 montis, transiit per medios, idest, elapsus est de manibus
 eorum. Numquid; iuxta Marcionem, dicere possumus,
 quod ideo natiuitas eius in phantasmate fuerit, quia cōtra
 naturam, qui tenebatur, elapsus est? Quod Magis licet,
 hoc Domino non licet? Apollonius Tyaneus scribitur, cū
 ante Domitianum staret in consistorio, repente non com-
 paruisse. Noli potentiam Domini Magorum præstigijs ad-
 æquare; ut uideatur fuisse, quod non fuit, & putetur come-
 disse sine dentibus, ambulasse sine pedibus, fregisse panem
 sine manibus, locutus esse sine lingua, & latus monstrasse si-
 ne costis. Et quo modo, inquires, non cognoscebant eum
 in itinere, si ipsum habebat corpus, quod ante habuit? Au-
 di scripturam dicentem: Oculi eorum tenebantur, ne eum *Luc. 24*
 agnoscerent. Et rursum: Aperti sunt oculi eorum, & cogno-
 uerunt eum. Numquid alius fuit, quando non agnosceba-
 tur, & alius, quando agnitus est? Certe unus atque idem
 erat. Cognoscere ergo, & non cognoscere, oculorum fuit,
 non eius, qui uidebatur, licet & ipsius fuerit. oculos enim
 B b b 2 tenebat

- tenebat eorum, ne se agnoscerent. Denique, ut scias errorem, qui uersabatur in medio, non corporis Domini, sed
- Ioan. 20** oculorum fuisse clausorum: Aperti sunt oculi eorum, inquit, & cognouerunt eum. Vnde & Maria Magdalene, quamdiu non agnoscebat Iesum, & uiuum quærebat inter mortuos, hortulanum putabat: agnoscit, & Dominum uocat.
- Ioan. 21** Post resurrectionem Iesus stabat in litore: discipuli in naui erant. ceteris non cognoscentibus eum, dicit discipulus, quem diligebat Iesus, Petro: Dominus est. Prior enim uirginitas uirginale corpus agnoscit. Idem erat, & non idē omnibus uidebatur. Statimq. subiungitur: Et nemo audebat interrogare eum, tu quis es? scientes, quod Dominus est. Nemo audebat, quia Deum sciebant. Vescébatur cum prandente, quia hominem & carnem uidebant, non quod alter Deus, alter homo esset, sed unus atque idem filius Dei cognoscebatur ut homo, adorabatur ut Deus. Scilicet nūc mihi philosophandum est, incertos esse sensus nostros, & maxime uisum. Carneades aliquis ab inferis excitandus, ut proferat remum in aqua fractum, uideri porticus lōgius angustiores, rotundos procul turrium angulos, columbarum colla ad singulas conuersiones colorem mutantia. Cū
- Acl. 12** Rhode Petrum nunciaret, & apostolis diceret, ob periculi magnitudinem euasisse: non credunt, phantasma suspicantur.
- Ioan. 20** Porro, quod clausis ingressus est ostiis, eiusdem uirtutis fuit, cuius & ex oculis euanescere. Lynceus, ut fabulæ ferunt, uidebat trans parietem: Dominus clausis ostiis, nisi phantasma fuerit, intrare non poterit? Aquilæ, & uultures transmarina cadauera sentiunt: saluator apostolos suos, nisi ostium aperuerit, non uidebit? Dic mihi acutissime disputator, quid est maius, tantam terræ magnitudinem appendere super nihilum, & super aquarum incerta librare, an Deum transire per clausam portam, & creaturam cedere creatori? quod maius est, tribuis: quod minus est, calumniaris. Petrus super aquas ambulat graui & solido corpore:
- Matth. 14** mollis unda non cedit: paululum fides dubitat, & statim naturam suam corpus intelligit: ut sciamus, super aquas non

non corpus ambulasse, sed fidem. Oro te, qui tantum contra resurrectionem sentis, argumentaris, an simpliciter mecum loqueris? Credis, uere Dominum resurrexisse, in eodem, quo mortuus, quo sepultus est, corpore, an non credis? si credis; cur illa proponis, per quæ resurrectio denegatur? si non credis; quid ita imperitorum lactas animas, & resurrectionem casso nomine uentilas? Audiui nuper de Marcionis schola: uxor inquit, ei, qui hac carne, & in his ossibus resurrexerit: gaudens animus statim intulit: Consepulti enim sumus, & consurreximus cum Christo per baptismum. *Rom. 6*
 Animæ, an carnis resurrectionem dicis? Respondi, non solum animæ, sed carnis, quæ cum anima renascitur in lauacro. Et quo modo peribit, quæ in Christo renata est? Quia scriptum est, ait, Caro & sanguis regnum Dei non possidebunt. Attende, obsecro te, quod dicitur: Caro & sanguis *1. Cor. 15*
 regnum Dei non possidebunt. Numquid non resurgent? absit; sed non possidebunt? Quare non possidebunt? quia sequitur, Neque corruptio in corruptione possidebit. Tamen ergo regnum Dei non possidebunt, quamdiu caro tantum sanguisq. permanferint. Cum autem corruptiuium induerit incorruptionem; & mortale induerit immortalitatem; & lutum carnis in testam fuerit excoctum: quæ prius graui pondere premebantur in terram, acceptis spiritus penis, & immutationis, non abolitionis, noua gloria uolabit ad cælum: & tunc implebitur illud, quod scriptum est: Absorpta est mors in uictoria. Vbi est mors contentio *Osee 3*
 tua? ubi est mors aculeus tuus? Præpostero ordine de animarum statu & carnis resurrectione respondimus: omissisq. *1. Cor. 3*
 principiis epistolæ, tota nobis contra egregios tractatus eius fuit disputatio. maluimus enim de Dei rebus, quam de nostris iniuriis, dicere. si peccauerit homo in hominem; roga *1. Reg. 2*
 bunt pro eo ad Dominum. si autem in Deum peccauerit; quis orabit pro eo? Nunc ediuerso, super omnia nostros aduersarios immortalis odio persequimur: blasphemantibus Deum, clementem porrigimus manum. Scribit ad Theophilum episcopum apologiam, cuius istud exordium est:

B b b 3 Tn

Tu equidem, ut homo Dei, & apostolica ornatus gratia, curam omnium ecclesiarum, maxime eius, quæ in Hierosolymis est, suslines: cum ipse plurimis solitudinibus Ecclesie Dei, quæ sub te est, distringaris. Laudat faciem, ad personam principum trahit. Tu, qui regulas quæris ecclesiasticas; & Niceni concilii canonibus uteris; & alienos clericos, & cum suis episcopis commorantes tibi niteris usurpare; responde mihi, ad Alexandrinum episcopum Palæstina quid pertinet? ni fallor, hoc ibi decernitur, ut Palæstinæ metropolis Cæsarea sit, & totius Orientis Antiochia. Aut igitur ad Cæsariensem episcopum referre debueras; cui, sprete communione tua, communicare nos noueras: aut, si procul expetendum iudicium erat, Antiochiam potius literæ dirigendæ. Sed noui, cur Cæsaream, cur Antiochiam nolueris mittere. sciebas, quid fugeres, quid uitares. maluisti occupatis auribus molestiam facere, quam debitum metropolitano tuo honorem reddere. Nec hoc dico, quod præter amicitias, quæ suspicionem generant, quidquam in legatione reprehendani; sed quia apud interrogantes magis & præsentibus te purgare debueris. Misisti religiosissimum hominem Dei, Isidorum presbyterum, uirum potentem tam ex ipsa incessus & habitus dignitate, quam diuinæ intelligentiæ, curare etiam eos, qui animo uehementer ægrotant, si tamen sensum sui languoris habeant. Homo Dei mittit hominem Dei: nihil interest inter presbyterum & episcopum: eadem dignitas mittentis & missi. hoc satis imperite: in portu, ut dicitur, naufragium. iste Isidorus, qui in cælum tuis laudibus tollitur, id ipsum infamatur Alexandriæ, quod tu Hierosolymæ: ex quo non legatus aduenisse uidetur, sed socius. Alioquin & literæ manu eius scriptæ, quæ ante tres menses legationis ad nos directæ erant, portæ res errorem, Vincentio presbytero redditæ sunt, quæ usque hodie ab eo tenentur; quibus cohortatur ducem exercitus tui, ut super petram fidei stabili persistat gradu; nec nostris ueniis teneatur. Pollicetur se, ante quam legationis esset ulla suspicio, uenturum Hierosolymam, & ad aduentum

tum

tum suum illico aduersariorum cuneos proterendos . Et inter cetera his etiam uerbis utitur . Quo modo fumus in aere dissoluitur , & cera ad uiciniam ignis liquefit : ita dissipabuntur qui semper ecclesiasticæ fidei resistentes , nunc per homines simplices eandem fidem inquietare conantur . Rogo te lector , qui hoc scribit antequam ueniat , quid tibi uideatur ? aduersarius , an legatus ? Iste est , quem nos piissimum , uel religiosissimum , & , ut uerbum exprimamus e uerbo , deicolam possumus dicere . iste est homo diuinæ intelligentiæ , tam potens , & tanta incessus ac habitus dignitate , ut , quasi spiritualis Hippocrates , languorem animarum nostrarum sua potuerit præsentia mitigare ; si tamen nos uoluerimus suæ medicinæ acquiescere . Curet se tali medicamine , qui etiam alios curare consueuit . nobis diuina illa intelligentia pro Christo stultitia est . Libenter nostra rusticitate læguemus : ne collyrio uestro impie uidere discamus . Tuæ uero sanctimonix , pro optima uoluntate , quasi ad finem usque perducta sit , deprecamur Dominum in sanctis locis nocte ac die , ut ei reddat perfectam mercedem , & coronam uitæ largiatur . Recte gratias agis : nisi enim uenisset Isidorus , tu , in tota Palæstina tam fidelem sodalem non inuenisses : nisi ille tibi promissum apportasset auxilium , hæres in turba rusticorum , quæ sapientiam tuam intelligere non posset . Hæc ipsa apologia , de qua nunc sermo est , Isidoro præsentē , & multum collaborante , dictata est ; ut idem esset & dictator , & baiulus litterarum . Cum ergo huc uenisset , & accessisset , ad nos tribus uicibus , & admouisset tam diuinæ sapientiæ tuæ , quam propriæ intelligentiæ habentia medicinam uerba ; nec profuit alicui , nec profuit ei quisquam . Hic , qui ad tres uices dicitur ad nos accessisse , ut & in ueniendo mysticum numerum conseruaret , qui Theophili episcopi mandatum nobis loquebatur , litteras ; ad nos ab eo missas , noluit reddere . cumq. diceremus , si legatus es , redde legationis epistolas ; si epistolas non habes , quo modo legatum te probabis ? respondit , se habere quidem litteras ad nos , adiuratum tamen ab Hierosolymo-

rū episcopo, ne nobis eas redderet. En legati constantia: qui ut pacem faceret, & suspensionem in alterā partem fauoris excluderet, æquum se utrisque præbuit. Et quia sine emplastro uenerat, & medicorum armamenta non habebat; iccirco eius medicina non profuit. Hieronymus, & ii, qui cum eo sunt, & secreto, & coram omnibus frequentissime, & sub iurisiurandi testificatione satis ei fecerunt, quod numquam de nobis ambiguitatem aliquam habuerint fidei, dicentes: Quo modo eo tempore, quando communicabamus ei, nunc similiter eundem affectum habemus de ratione fidei. Videte, quid faciat concordia dogmatum. Isidorus, qui, ut hæc significaret, eius socius erat, homo Dei, & presbyter *ἱερογένης*, & uir potens, & sacro ac uenerabili incessu, & diuinæ intelligentiæ, & Hippocrates Christianorum uocatur. Ego misellus, dum in solitudine delitescio, a tanto Pontifice repente truncatus, presbyteri nomen amisi. Et tamen iste Hieronymus, cum pannosa turba & sordidatis gregibus, quid Isidoro illi fulmineo ausus est respondere? At ne forte ille non crederet, & opprimeret eos præsentia, & mole corporis sui, non semel, non tertio, sed frequentissime iurauerunt, se eum, de quo quæstio erat, scire orthodoxum, nec umquam in suspitione habuisse hæreticos. O apertum impudensq. mendacium: o testimoniū pro se, nec Catoni creditum. In ore enim duorum uel trium testium stat omne uerbum. Alicubi ne dictum, aut tibi alicubi mandatum est, quod sine satisfactione fidei communionem tuam subiremus? Quando per uirum disertissimum, & Christianissimum, Archelaum comitem, qui sequester pacis erat, condictus locus fœderis fuit; nonne hoc in primis postulatum est, ut futuræ concordie fides iaceret fundamenta? Pollicitus est esse se uenturū. Instabat dies paschæ: freuens monachorum turba conuenerat: expectabaris in loco: quid faceres, nesciebas. Repente mandasti ægrotare nescio quam; illo die te non posse uenire. Ludio ne, an episcopus hæc loquitur? Pone uerum esse quod dicis: propter unius mulierculæ delicias, ne te absente doleat caput, fastidium

Matth. 18

dium sustineat, stomacho perfrigescat, Ecclesiæ causam negligis? tot uirorum & Christianorum, & monachorum cōremnis præsentiam? Noluimus occasionem dare: uidebamus enim stropham: dilationis tuæ iniuriam patientia uicimus. Rescribit Archelaus: monet altero & tertio die manere, si uellet uenire. At ille occupatus, (muliercula enim uomere non cessauit) dum nauseam euasisset, nostri penitus oblitus est. Post duos ergo menses tandem expectatus uenit Isidorus: qui non, ut tu fingis, pro te testimoniū, sed causam postulatæ satisfactionis audiuit. Cum enim obiceret nobis, quare ei communicastis; si hæreticus erat, audiuit ab omnibus, communicauimus nihil de hæresi suspicantes. Postquam uero a beato Papa Epiphanio conuentus, tam sermone quam litteris respondere contempsit; cū sis monachis ab eodem Epiphanio scripta uenerūt, ut absque satisfactione fidei nullus ei temere communicaret. Præsto sunt litteræ: nec super hac re dubitari potest. Hæc sunt, quæ fratrum turba respondit; non, ut tu argumentaris, ex eo te non esse hæreticum, quia aliquando non dictus sis. hac enim ratione ægrotare non debet, qui ante ægrotationem sanus fuit. Quando autem cœptum est de ordinatione Pauliniani, & aliorum, qui cum eo sunt, uentilari; uidentes se reprehendi; cum propter caritatem atque concordiam concederentur eis omnia; hoc autem solū expetere tur, ut licet ab aliis contra regulas ordinati essent, tamen subiicerentur Ecclesiæ Dei; & non scinderent eam, neque proprium sibi facerent principatū; in hoc nō acquiescentes cœperunt proponere de fide, & omnibus notū facere, quod, si non arguerentur ii, qui cū Hieronymo presbytero erant, nil culparent in nobis; sin autem arguerentur erroris & culpæ, cum penitus non queant de istiusmodi quæstionibus disputare, satisfactionem errati proprii non inuenientes ad ista confugerent; nō quo sperarent nos posse conuinci; sed famam nostram lædere niterentur. Quod perplexa oratio est, nemo uitium interpretationis putet: talis enim & Græca est. Interim ego gaudeo, quod, qui me decollatum putabam

tabam, subito mihi presbyteri caput uideo repositum. Dicit nos omnino cōvinci nō posse; & uenire ad prœliū perhorrescit. Si causa discordiæ non ex dissensione fidei est, sed ex Pauliniani, ut dicit, ordinatione descendit: quæ tanta stultitia est, uolentibus occasionem dare nolle respondere? Confitere fidem; sed tamen responde quod quæreris, ut omnibus luceat non de fide, sed ordinatione esse certamen. quamdiu enim interrogatus de fide tacueris, potest tibi aduersarius dicere: Non est ordinationis causa, sed fidei, si ordinationis causa est; stulte facis de fide interrogatus, tacere: si fidei; stulte prætedis ordinationē. Porro, quod dicis te petisse ut subiicerentur Ecclesiæ Dei; & non scinderent eam, neque proprium sibi facerent principatum: de quibus dicas, non satis intelligo. Si de me, & de presbytero Vincentio: satis multo dormisti tempore, qui, post annos tredecim, nunc excitatus hæc loqueris. ob id enim & ego Antiochiam, & ille Constantinopolim, urbes celeberrimas, deseruimus; non ut te in populis prædicantem laudaremus; sed ut, in agris, & in solitudine adolescentiæ peccata deslentes, Christi in nos misericordiam deflecteremus. Sin autem de Pauliniano tibi sermo est: uides eum episcopo suo esse subiectum, uersari Cypri, ad uisitationē nostram interdum uenire, non ut tuum, sed ut alienum, eius uidelicet, a quo ordinatus est. quod si hic etiam esse uoluerit, & in exilio nostro quietus in solitudine uiuere: quid tibi debet, nisi honorem, quem omnibus debemus episcopis? Fac a te ordinatum: idem ab eo audies, quod a me, misello homine, sanctæ memoriæ episcopus Paulinus audiuit. Num rogaui te, ut ordinarer? Si sic presbyterium tribuis, ut monachum nobis non auferas: tu uideris de iudicio tuo. sin autem sub nomine præsbyteri tollis mihi, propter quod sæculum dereliqui: ego habeo quod semper habui. nullum dispendium in ordinatione passus es. Ut non scinderent, inquit, eam, neque proprium sibi facerent principatum. Quis scindit Ecclesiam? nos; quorum omnis domus Bethlehem in Ecclesia communicat: an tu, qui aut bene

ne credis, & superbe de fide taces; aut male, & uere scindis Ecclesiam? Nos scindimus Ecclesiam, qui ante paucos menses, circa dies Pentecostes, cum, obscurato sole, omnis mundus iamiamq. uenturum iudicem formidaret, quadraginta diuersæ ætatis & sexus, presbyteris tuis obtulimus baptizandos? et certe quinque presbyteri erant in monasterio, qui suo iure poterant baptizare; sed noluerunt quidquam contra stomachum tuum facere; ne & hæc tibi de fide reticendi daretur occasio. An non tu potius scindis Ecclesiam, qui præcepisti Bethlehem presbyteris tuis, ne competentibus nostris in pascha baptismum traderent, quos nos Diospolim ad confessorem & episcopum misimus Dionysium baptizandos? Ecclesiam scindere dicimur, qui extra cellulas nostras locum ecclesiæ non habemus? An non tu scindis Ecclesiam, qui mandas clericis tuis, ut, si quis Paulinianum ab Epiphanio episcopo consecratum presbyterum dixerit, ecclesiam prohibeatur intrare? Ex quo tempore usque in præsentem diem uidemus tantum specum Domini; & hæreticis intransibus procul positi suspiramus. Nos ne sumus, qui Ecclesiam scindimus; an ille, qui uiuis habitaculum, mortuis sepulcrum negat, qui fratrum exilia potulat? Quis potentissimam illam feram, totius orbis ceruicibus imminentem, contra nostras ceruices spiritualiter incitauit? Quis ossa sanctorum & innoxios cineres hucusque uerberari ab imbris finit? His nos blandimentis bonus pastor inuitat ad pacem, & proprium arguit facere principatum; qui omnibus episcopis, rectam dumtaxat fidem tenentibus, & communione & caritate sociamur. An tu solus Ecclesia es; & qui te offenderit, a Christo excluditur? Si proprium defendimus principatum; ostende nos in parochia tua habere episcopum. Quod tibi non communicamus, fidei est: responde, & ordinationis erit. Occasionem quoque fingunt aliarum litterarum, quas dicunt sibi scripsisse Epiphanium. quamquam dabit ille rationem pro omnibus, quæ gesta sunt, ante tribunal Christi, ubi maior & minor absque ulla personarum acceptione iudicabitur.

Atta-

Attamen quo modo possunt illius niti epistola, quam de ordinatione Pauliniani illicita, & illorum, qui cum eo sunt, a nobis coargutus scripsit; sicut & ipsa epistola eius in exordio suo significat? Rogo, quæ tanta est cæcitas, & Cimæriis, sicut aiunt, tenebris inuoluta? Dicit nos occasionem finire, & Epiphani aduersus se litteras non habere; statimq. subiungit: Quo modo possunt illius niti epistola, quam de ordinatione Pauliniani illicita, & eorum, qui cum eo sunt, a nobis coargutus scripsit; sicut & ipsa eius epistola in exordio suo significat? Non habemus epistolam. et quæ est illa epistola, quæ in exordio suo de Pauliniano loquitur? Est aliquid post exordium, cuius tu times facere mentionem. A te est coargutus ætatis, qua Paulinianus erat: presbyterum ordinas, & legatum mittis, ac socium; tantamq. habes fiduciam, ut, ubi Paulinianum mentitus es puerum, illuc puerum mittas presbyterum. Itemq. Theosebam, Tyriæ ecclesiæ diaconum, facis presbyterum, & contra nos armas, illiusq. in nos abuteris eloquentia. Tibi soli licet Ecclesiæ iura calcare: tu quidquid feceris, norma doctrinæ est: & non erubescis ante tribunal Christi iudicandum tecum Epiphanium prouocare. Quæ sequuntur post hoc capitulum, hæc sunt. Mensæ suæ & domus contubernium imputat Epiphanio, scribitq. eum numquam esse secum de Origenis dogmatibus locutum, & sub iurisiurandi testificatione confirmat, dicens: Ne suspicionem quidem, sicut Deus testis est, peruersæ in nos fidei se habere monstrauit. Nolo respondere & arguere acriter; ne periurii episcopum conuincere uidear. Præsto sunt plures epistolæ Epiphani, una ad ipsum, aliæ ad episcopos Palæstinos, & nuper ad Romanum Pontificem: in quibus dicit se eum, coram multis, de dogmatibus arguentem non meruisse responsum: totumq. nostræ paruitatis est monasterium.

ARGVMENTVM.

THEOPHILVS, Alexandrinus Episcopus, per Isidorum presbyterum litteras ad Hieronymum, & monachos, qui cum eo degebant, miserat, ad pacem cum Ioanne Hierosolymitano presule exhortatorias. respondet nunc eis uir sanctus, asserens per se non stare, quin fracta amicitia resarciatur, dummodo pax Christiane, & amice fiat, non autem per uim, & comminationes extorqueatur. Origenis in Latinum versionem, & ordinationem sui in presbyterum monachi, quæ illi Ioannes obiebat, defendit, scribens & congrue monachum fuisse ætatis, & in Ioannis diœcesi, ubi facta est ordinatio, Bethlehem sitam non esse.

HIER. ADVERSVS IOAN. HIEROS.

ad Theophilum.

EPISTOLA LXII.

EPISTOLA tua, hereditatis Dominicæ te indicās possessorem, qui pergens ad patrē apostolis loquebatur: Pacem meam do uobis, pacem meam relinquo uobis: illius quoque felicitatis compotem te esse testata est, in qua beati pacifici nuncupātur. Blandiris ut pater, erudis ut magister, instituis ut pontifex. Venisti ad nos in austeritate uirgæ, sed in spiritu benignitatis, & lenitatis, & mansuetudinis; ut humilitatem Christi primo statim sermone resonares; qui mortalium genus non fulminans, & tonans, sed in præsepi uagiens, & tacens, saluauit in cruce. Legeras enim in typo illius ante prædictum: Memento Domine David, & omnis mansuetudinis eius, & in ipso postea præsentatum. Discite a me, quia mitis sum, & humilis corde. Vnde & multa de sacris uoluminibus super pacis laude perstringens, ac per uarios scripturarū campos more apum uolans, quidquid dulce & aptum concordix fuit, artificii eloquio messuisti. Currentes igitur ad pacē incitati sumus: exposita ad nauigandum uela crebrior exhortationis tuæ aura compleuit; ut non tam retrectantibus & fastidiosis, quā
ut

Ioan. 14. 27

Matth. 5

Psal. 131

Matth. 12

ut audis & plenis faucibus dulcia pacis fluente biberemus. Verum quid facimus, in quorum potestate uoluntas tantū pacis est, non effectus? Et quamquam uoluntas quoque apud Deum propositi sui mercedem habeat; tamen imperfectum opus etiam uolentes mœrore contristat. Quod sciens & Apostolus, perfectissimam uidelicet pacem in utrius-

Rom. 12 que partis uoluntate consistere: Quantum, inquit, ex uobis est: cum omnibus hominibus pacem habentes. Et propheta: Pax pax. Et ubi est pax? Nihil enim grande est, pacem uoce prætere, & opere destruere, aliud niti, aliud

Hier. 6 demonstrare; uerbis sonare concordiam, re exigere seruitutem. Volumus & nos pacem, et non solum uolumus, sed & rogamus, sed pacem Christi, pacem ueram, pacem sine inimicitis, pacem in qua non sit bellum inuolutum, pacem quæ non ut aduersarios subiiciat, sed ut amicos iungat. Quid dominationem pacem uocamus, & non reddimus unicuique rei uocabulum suum? Vbi odium est, appellantur inimicitie: ubi caritas, ibi tantummodo pax uocetur. Nos nec Ecclesiam scindimus, neque a patrum communione diuidimur; sed ab ipsis, ut ita dicam, incunabilis catholico sumus lacte nutriti. Nemo namque magis ecclesiasticus est, quam qui numquam hæreticus fuit. Sed ignoramus absque caritate pacem, sine pace communionem.

Matth. 5 Legimus quoque in euangelio: Si offers munus tuum ad altare; & ibi recordatus fueris, quia frater tuus habet aliquid aduersum te; dimitte ibi munus tuum coram altari, & uade prius reconciliari fratri tuo, & tunc ueniens offer munus tuum. Si munera nostra absque pace offerre non possumus; quanto magis & Christi corpus accipere? Qua conscientia ad eucharistiam Christi accedam, & respondebo amen, cum de caritate dubitem porrigentis? Quæso te, ut patienter me audias, nec ueritatem adulationem putes. Quisquam ne tibi inuitus communicat? quisquam ne extensa manu uertit faciem, & inter sacras epulas, Iudæ osculum porrigit? Ad aduentum, ut reor, tuum non pauet monachorum turba, sed gaudet. certatim tibi procedunt obuiam:

uiam; & de eremi latibulis exeuntes, sua te cupiunt humi-
litate superare. quis eos compellit exire? nonne amor-
tui? quis per eremum separatos in unum cogit? nonne tua
dilectio? Amari enim parens debet. Amari parens & epi-
scopus debet, non timeri. Antiqua sententia est: Quem
metuit quis, odit: quem odit, periisse cupit. Vnde & in
nostris litteris cum initia paruulorum in timore consistant,
perfecta dilectio foras mittit timorem. Non quæris mona-
chos tibi esse subiectos; & ideo magis subiectos habes. *1. Ioan. 2*
Tu offers osculum, illi colla submittunt. Exhibes militem,
& ducem impetras: quasi unus in pluribus es, ut sis unus
ex pluribus. Cito indignatur libertas, si opprimitur. Ne-
mo plus impetrat a libero, quam qui seruire non cogit. No-
uimus canones ecclesiasticos: non ignoramus ordines singu-
lorum: & lectione, & quotidianis exemplis usque ad hanc
ætatem multa didicimus, multa experti sumus. Qui scor-
pionibus cædit, & lumbis patris habere se putat digitos
grossiores, cito regnū mansueti Dauid dissipat. Certe Ro-
mānus populus ne in rege quidem superbiam tulit. Dux ille
Israelitici exercitus, qui decem plagis afflixerat Aegyptum,
& ad cuius imperium cælum, & terra, & maria seruebant, *Num. 12*
inter cunctos homines, quos tunc terra generauit, mansue-
tissimus prædicatur: et ideo per quadraginta annos obti-
nuit principatum; quia potestatis superbiam lenitate & mā-
suetudine temperabat. lapidabatur a populo, & pro lapidā-
tibus rogabat: quia potius deleri ipse uult de libro Dei, ne
commisissus sibi græx pereat. cupiebat enim illum imitari pa-
storem, quem sciebat etiam errantes oues suis humeris por-
taturum. Pastor, inquit, bonus, ponit animam suam pro
ouibus suis. Boni quippe pastoris discipulus optat anathe-
ma esse pro fratribus suis, atque cognatis, qui sunt Israeli-
tæ secundum carnem. Et si ille perire cupit, ne periti pe-
reant: quanto magis bonis parentibus prouidendum est,
ne ad iracundiam prouocent filios suos, & nimietate duri-
tiæ etiam lenissimos asperos esse compellant? Epistola co-
git me breuius loqui, dolor longius. Scribit in suis illis, ut
ille

ille uult, pacificis, ut ego sentio, mordacissimis litteris, quod numquam a me læsus sit, nec dictus hæreticus. Quoniam igitur modo me ipse lædit, ægrotantem morbo pessimo, & rebellem Ecclesiæ uentilans? Ab aliis laceffit, accurrit aduersariis parcere, lædere non lædentem? Ante quā ordinaretur frater meus, numquam dixit fuisse inter se & sanctum Papam Epiphanium de dogmatibus quæstionem. Et quæ eum ratio compellebat, sicut ipse tandem scribit, inde inter populos disputare, unde nemo quærebat? Scit enim prudentia tua periculosas esse huiusmodi quæstiones, & nihil esse tutius, quam tacere: nisi forte necesse est loqui de grandibus. Certe quod illud tantum ingenium flumenq. eloquentiæ fuit, ut in uno Ecclesiæ tractatu cuncta comprehendisse se dicat, de quibus singulis nouimus eruditissimos uiros infinita uersuum millia conscripsisse? Sed hoc quid ad me? nouerit ille, qui audiuit: sciat ipse, qui scripsit; meq. ab accusatione sui ipse etiam liberet. ego nec interfui, nec audiui: unus e populo sum, immo ne unus quidem, quia multis clamantibus tacui. Conferamus arguentis accusatiq. personas: & cuius uel meritum, uel uita, uel doctrina præcesserit, illi magis accommodemus fidem. Vides ne, quod clausis, ut dicitur, oculis summa quæque perstringam, nō tam eloquens quod mente concepi, quam indicans quid reticeam? Intellexi, & probaui dispensationem tuam, quod, ecclesiasticæ paci consulens, quasi sireneos cantus obturata aure pertransis. Alioqui, quia a parua ætate sacris litteris eruditus es, nosti quo sensu unumquodque dicatur; quo modo in ambiguis sententiis, tuus sermo libratus & aliena non damnet, & nostra non deneget. Sed fides pura & aperta confessio non quærit strophas, & argumenta uerborum. Quod simpliciter creditur, simpliciter confitendum est. Poteram quidem libere proclamare, & inter gladios quoque ignesq. Babylonios dicere: Cur aliud responderetur, quam quæritur? cur non simplex est, nec aperta confessio? Totū timet, totum temperat, totum relinquit ambiguum, & quasi super aristas graditur. Verum studio & expectatione
paci

pacis, feruente stomacho, uerba, non quo modo quærun-
tur, responder. Lædunt libere alii, quos lædere læsus ipse
non audet: ego interim sileo: nunc & dispensationem me-
am uel imperitiam simulabo, uel metum. Quid mihi accu-
santi facturus est, qui, ut ipse testatur, laudanti detrahit?
Tota eius epistola non tam expositione, quam nostris ple-
na est contumeliis. Nomen meum absque ullis officiis, qui-
bus nos inuicem palpare solemus homines, frequenter assu-
mitur, carpitur, uentilatur, quasi de libro uiuentium dele-
tus sim: quasi illius me litteræ suggillauerint, aut istiusmodi
nugas umquam quæserim: qui, ab adolescentia in mona-
sterii clausus cellulis, magis esse uoluerim aliquid, quam ui-
deri. Quosdam ex nobis sic cum honore appellat, ut lace-
ret: quasi & nos non possimus dicere, quæ nemo tacet. E
seruo clericum factum criminatur, cum & ipse non nullos
eiuscemodi clericos habeat, & Onesimum legerit inter Pau-
li renatum uincula, diaconum cœpisse esse de seruo. Syco- *Philem. 1*
phantam iactitat, & ne probare cogatur, audisse se dicit.
O si & mihi liberet dicere, quæ multi clamitant, & alio-
rum maledictis acquiescerem: iam & nos intelligeret scire,
quæ omnes sciunt, & me quoque audire, quæ nullus igno-
rat. Dicit ei uelut præmia pro calumnia restituta. Quis tã
argutum & callens non perhorrescat ingenium? quis tanto
potest eloquentiæ fulmini respondere? Quid est plus, susti-
nere calumniam, an facere? accusare quem postea diligas,
an peccati ueniam tribuere? quid minus ferendum, de lyco-
phanta ædilem fieri, an consulem? Scit & ipse quid taceã,
quid loquar, quid & ego audierim, quid pro Christi metu
tasse non credam. Origenem me arguit uertisse in Latinũ.
Hoc non solus ego feci, sed & confessor Hilarius fecit: &
tamen uterque nostrum, noxia quæque detruncans, utilia
transtulit. Legat ipse, si nouit; (arbitror enim eum assi-
dua confabulatione & quotidiano Latinorum consortio
Romanum non ignorare sermonem) aut, si certe penitus
non imbibit, interpretentur ei qui solent; & tunc sciet, me
in hoc ipso laudandum esse, quod detrahit. sicut enim inter-
Cc c preta-

pretationem & idiomata scripturarum Origeni semper attribui, ita dogmatum constantissime abstuli ueritatem. Numquid ego in turbam mitto Origenem? numquid ceteros tractatores? Scio me aliter habere apostolos, aliter reliquos tractatores; illos semper uera dicere, istos in quibusdam ut homines aberrare. Nouum defensionis genus, sic Origenis uitia non negare, ut cum illo ceteros crimineris. Videlicet quem aperte defendere non audeas, multorum simili errore tuearis. Sex millia Origenis tomos non poterat quisquā legere, quos ille nō scripsit: faciliusq. credo testem huius sermonis, quam auctorem esse mentitum. Fratrem meū causam dicit esse discordiæ, hominem, qui quiescit in monasterii cellula, & clericatum non honorem interpretatur, sed onus. Cumq. nos usque ad præsentem diem ficta pacis ostensione lactauerit, occidentalium sacerdotum commouit aures, dicens eum adolescentulum & pene puerum in parochia sua Bethlehem presbyterum constitutum. Si hoc uerum est, cuncti Palæstini episcopi non ignorant. monasterium enim sancti papæ Epiphaniū, nomine uetus dictum, in quo frater meus ordinatus est presbyter, in Eleuteropolitano territorio, & non in Heliensi situm est. porro ætas eius & beatitudini tuæ nota est; & cum ad triginta annorū spatia iam peruenerit, puto eam in hoc non esse reprehendam, quæ iuxta mysterium assumpti hominis in Christo perfectæ est. Recordetur legis antiquæ; & post uiginti quinque annos a Leuitica tribu eligi in sacerdotiū peruidebit. Aut, si in hoc testimonio solo Hebraicam sequitur ueritatem, nouerit triginta annorum fieri sacerdotem. Ac, ne forsitan dicat; Vetera transierunt, & facta sunt omnia noua: audiatur cum Timotheo: Adolescentiam tuam nemo contemnat. Certe ipse, quando episcopus ordinatus est, non multum ab ea, in qua nunc frater meus est, distabat ætate. Vel, si hoc in episcopis licet, in presbyteris non licet, ne per antiphrasim a suo nomine discrepare uideantur; cur ipse aut eius, aut minoris ætatis, & quod his amplius est, ministrum alterius ecclesiæ ordinauit presbyterum? Quod si nō potest

Num.8

1. Tim.4

potest pacem habere cum fratre, nisi cum subdito, & ordinationis suæ episcopo renunciante: ostendit se non tam pacem cupere, quam sub pacis occasione uindictam; nec aliter quietis & pacis ocio esse contentum, nisi integrum habeat quod minatur. Etiam si ipse eum ordinasset, & sic secreti amator quiescere uellet; nequidquā exerceret. Quod si Ecclesiam scinderet, nihil ei deberet præter honorem cunctis sacerdotibus debitū. Hucusque apologia eius, immo categoria, & laciniosus contra nos sermo protractus est. Cui ego quidem in epistola breuiter præteriensq. respōdi; ut ex his, quæ dixi, intelligat quid tacuerim; & nouerit nos homines esse, rationale animal, & prudentiam suam posse intelligere, nec ita obtusi cordis, ut, inftar brutorum animalium, uerborum tantum sonum & nō sententias audiamus. Nunc autem quæso te, ut ueniam tribuas dolori meo: & si superbum est respondisse, multo sit superbius accusasse. quamquam ita responderim, ut silentium potius meum indicauerim, quam sermonem. Quid procul pacem quærūt, & uolunt eam nobis ab aliis imperari? Sint pacifici, & illico pax sequetur. Cur nomine sanctitudinis tuæ contra nos pro terrore abutuntur; cum epistola tua pacem & mansuetudinem sonet, illorum uerba duritiem comminentur? Denique quam pacificas & ad concordiam pertinentes per Isidorū presbyterum litteras nobis miseris, hinc probamus, quod illas, quæ pacem falso iactant, reddere noluerit. Eligant itaque quod uolunt. Aut boni sumus, aut mali. si boni, dimittant quiescere; si mali, quid malorum expetunt societatem? Quantum ualeat humilitas, experimento didicit. Qui nunc dissuit, quæ suo consilio olim disiuncta sociauit, probat se nunc ad alterius uoluntatem tunc copulata discerpere. Nuper nobis postulauit, & impetrauit exilium: atque utinam implere potuisset: ut, sicut illi uoluntas imputatur pro opere, ita & nos non solum uoluntate, sed & effectu coronam haberemus exilii. Fundendo sanguinem, & patiendo magis, quam faciendo contumelias, Christi fundata est Ecclesia. persecutionibus creuit, martyriis

coronata est. Aut, si isti soli, iuxta quod legimus, amante rigorem, & non nouerunt persecutionem sustinere, sed facere: sunt & hic Iudæi; sunt uariorum dogmatum hæretici, & maxime impurissimi Manichæi: cur eorum ne uerbo quidem quempiam audent lædere, nos solos expellere cupiunt? nos soli, qui Ecclesiæ communicamus, ecclesiā scindere dicimur? Oro te, nonne æqua est ista postulatio, ut aut illos nobiscum expellant, aut nos cum illis teneant? Nisi quod in eo magis honorant, quos saltem exilio ab hæreticis separant. Monachus, pro dolor, monachis & minatur, & impetrat exiliū; & hoc monachus, apostolicam cathedram habere se iactans. Non nouit terrori natio ista succumbere, & impendenti gladio magis ceruices, quam manus subiicit. Quis enim monachorum, exul patriæ, non exul est mundi? Quid opus est auctoritate publica, & rescripti impendiis, & toto orbe discursibus? Tangat saltem digittulo, & ultro exhibimus. Domini est terra, & plenitudo eius. Christus loco non tenetur inclusus. Præterea quod scribit nos pergere tecum Romam, & Ecclesiæ communicare ei, a qua uidemur communionē separati: non necesse est ire tam longe: & hic in Palæstina eodem modo ei iungimur. Et, ne hoc, quod procul sit, in uiculo Bethlehem presbyteris eius, quantum in nobis est, communionē sociamur. Ex quo perspicuum est, dolorem proprium causam Ecclesiæ non putandum, nec stomachum unius hominis, immo per illum aliorum, generali Ecclesiæ uocabulo nuncupandum. Quapropter, quod in principio epistolæ dixi, etiam nunc repeto, nos uelle pacem Christi, optare concordiam; & te rogare, ut illos moneas, pacem non extorquere, sed uelle. Sit præteritarum nostrarum contumeliarum dolore contentus. ueterata uulnera saltem noua obliet ret caritate. sit talis, qualis ante fuit, quando nos suo arbitrio diligebat. uerba ei de alieno stomacho non fluant: faciat quod uult, & non quod uelle compellitur. aut, quasi pontifex, cunctis æqualiter imperet; aut, quasi imitator Apostoli, uniuersorum saluti ex æquo seruiat. Si talem se præ-

Psal. 23

1. Cor. 9

præbuerit; ultro præbemus manus, extendimus brachia;
amicos & parētes habeat; & sentiat in Christo, sicut omni-
bus sanctis, ita & sibi nos esse subiectos. Caritas patiens est, *1. Cor. 13*
caritas benigna est, caritas non æmulatur, non inflatur,
omnia sustinet, omnia credit. Cunctarum uirtutum mater
est caritas, & quasi spartum triplex Apostoli sententia robo- *Eccl. 4*
ratur dicentis, Fides, Spes, Caritas. Credimus, speramus;
atque ita per Fidem, & Spem dilectionis uinculo copula-
mur. Idcirco enim & nos patrias nostras dimisimus, ut quie-
ti absque ullis simultatibus in agris & in solitudine uiuere-
mus: ut pontifices Christi, qui tamen rectam fidem prædi- *Matth. 10*
cant, non dominorum metu, sed patrum honore uenere-
mur; ut deferamus episcopis ut episcopis; & non, sub no-
mine alterius, aliis, quibus nolumus, seruire cogamur.
Non sumus tam inflati cordis, ut ignoremus, quid debeat-
ur sacerdotibus Christi. qui enim eos recipit, non tam eos
recipit, quam illum, cuius episcopi sunt. Sed contenti sint
honore suo: patres se sciant esse, non dominos, maxime
apud eos, qui, spretis ambitionibus sæculi, nihil quieti &
otio præferunt. Tribuat autem orationibus tuis Christus
Deus omnipotens, ut pacis non ficto nomine, sed uero &
fideli amore sociemur: ne mordentes inuicem, consuma- *Gal. 5*
mur ab inuicem.

ARGVMENTVM.

PRAEFATIONEM suam in librum *τῆς ἀρχαῖς* Origenis,
quem uerterat, Ruffinus ita accommodat, ut Origenem, ueluti ab
adscriptis erroribus expurgatum, tamquam scilicet catholicum
cunctis legendum obtudat, & Hieronymum, quæ res discidium
inter eos peperit. Origenistam esse mundo ostendat.

Ccc 9 PRAE-

CIO quamplurimos fratrum, scientiæ scripturarū
 § desiderio prouocatos, poposcisse ab aliquantis eru-
 ditis uiris, & Græcarum litterarum peritis, ut Ori-
 genem Romanum facerent, & Latinis auribus eum dona-
 rent. in quo etiam frater, & collega noster, ab episcopo
 Damaso deprecatus, cum homilias duas de Cantico canti-
 corum in Latinum transtulisset ex Græco, ita in illo opere
 ornate magnificeq. præfatus est, ut cuius legendi Orige-
 nem, & audissime perquirendi desiderium commoueret, di-
 Cant. I cens illius animæ conuenire quod dictum est: Introduxit
 me rex in cubiculum suum: asserens eum, quod, cum in ce-
 teris libris omnes uincat, in Canticis canticorum etiam ipse
 se uicerit. Pollicetur sane in ipsa præfatione, se & ipsos in
 Cantico canticorum libros, & alios quamplurimos Orige-
 nis Romanis auribus largiturum. sed ille, ut uideo, in sty-
 lo proprio placens, rem maioris gloriæ sequitur, ut pater
 uerbi sit potius, quam interpret. Nos ergo rem ab illo qui-
 dem cœptam sequimur, & probatam; sed non æquis elo-
 quentiæ uiribus, tanti uiri ornare possumus dicta. unde ue-
 reor, ne uitio meo id accadat; ut is uir, quem ille alterum
 post apostolos Ecclesiæ doctorem scientiæ ac sapientiæ me-
 rito comprobauit, inopia sermonis nostri longe esse infe-
 rior uideatur. Quod ego sæpe considerans, reticebam, nec
 deprecantibus me frequenter in hoc opus fratribus annue-
 bam. Sed tua uis, fidelissime frater Macari, tanta est, cui
 obistere ne imperitia quidem potest. propter quod ne te
 ultra tam grauem paterer exactorem, etiam contra propo-
 situm meum cessi, ea tamen lege, atque ordine, ut, quan-
 tum fieri potest, interpretando sequar regulam præcessorū,
 & eius præcipue uiri, cuius superius fecimus mentionem:
 qui cum ultra septuaginta libellos Origenis, quos Homili-
 ticos

ricos appellauit, aliquantos etiam de tomis in Apostolum scriptis transtulisset in Latinum; in quibus cum aliquanta offendicula inueniantur in Græco; ita eliminuit omnia interpretando, atque purgauit, ut nihil in illis, quod a fide nostra discrepet, Latinus lector inueniat. Hunc ergo etiam nos, licet non eloquentiæ uiribus, disciplinæ tamen regulis, in quantum possumus, sequimur, obseruantes scilicet, ne ea, quæ in libris Origenis a se ipso discrepantia inueniuntur, atque contraria, proferamus. cuius diuersitatis causam plenius tibi in Apologetico, quem Pamphilus pro libris ipsius Origenis scripsit, edidimus, breuissimo libello superaddito: in quo euidentibus, ut arbitror, probamentis corruptos esse in quamplurimis ab hæreticis & maleuolis libros eius ostendimus; & istos præcipue, quos nunc exigis ut interpreter, idest *τῶν ἀρχῶν*; quod uel de principiis, uel de principatibus dici potest: qui sunt reuera alias & obscurissimi, & difficillimi. de rebus enim ibi talibus disputat, in quibus philosophi omni sua ætate consumpta nihil inuenire potuerunt. Hic uero noster, quantum potuit, id egit, ut creatoris fidem & creaturarum rerum rationem, quam illi ad impietatem traxerunt, ad pietatem ipse conuerteret. Si-cubi ergo nos in libris eius aliquid contra id inuenimus, quod ab eo ceteris locis fideliter, pie de Trinitate fuerat definitum; ueluti adulteratum hoc & alienum, aut præterminimus, aut secundum eam regulam protulimus, quam ab ipso frequenter inuenimus affirmatam. Si qua sane, uelut peritis iam & scientibus loquens, dum breuiter trāsire uult, obscurius protulit; nos, ut manifestior fieret locus, ea, quæ de ipsa re in aliis eius libris apertius legeramus, adiecimus, explanationi studentes: nihil tamen nostrum diximus; sed, licet in aliis locis, dicta sua tamen sibi reddidimus. Hoc autem iccirco in præfatione commonui; ne forte calumniatores iterum se criminandi putarent inuenisse materiam. Sed uiderint ipsi, quid peruersi & contentiosi homines agant. Nobis interim tantus labor, si tamen oratibus uobis Deus annuerit, iccirco susceptus est, non ut calumniosorum ora

(quod fieri non potest; licet forte etiam hoc Deus faciet) clauderemus, sed ut proficere ad scientiam rerum uolentibus materiam præberemus. Illud sane omnem, qui hos libros uel descripturus est, uel lecturus, in conspectu Dei Patris, & Filii, & Spiritus sancti confessor, atque conuenio per futuri regni fidem, per resurrectionis ex mortuis sacramentum, per illum, qui præparatus est diabolo & angelis suis, æternum ignem, si non illum locum æterna hereditate possideat, ubi est fletus & stridor dentium, & ubi ignis eorum non extinguitur, & uermis eorum non morietur; ne quis addat aliquid huic scripturæ, ne auferat, ne inserat, ne immutet; sed conferat cum exemplaribus, unde scripserit, & emendet ad litteram, & distinguat; & inemendatum uel nō distinctum codicem non habeat; ne sensuum difficultas, si distinctus codex non sit, maiores obscuritates legentibus generet.

Matth. 25

Isa. 66

ARGUMENTVM.

PAMMACHIVS, & Oceanus, D. Hieronymi amici, uidentes ex ea præfatione Ruffini, & multorum rumore, Hieronymum uti Origenistam habitum, rogant ut a suspicionibus se purget, et se minime Origenis errores sequi ostendens, liber *αὐτῶν*, a Ruffino uersus, qualis in Græco sit, & qui sint in eo errores, clare edisserat.

PAMMACHIVS ET OCEANVS

Hieronymo.

EPISTOLA LXIIII.

ANCTVS aliquis ex fratribus schedulas ad nos cuiusdam detulit, quæ Origenis uolumen, quod *αὐτῶν* inscribitur, in Latinum sermonem uersum tenerent. & quoniam in his multa sunt, quæ tenuitatem nostri ingenii permouent, quæq. minus catholice dicta

ita existimamus ; suspicamur etiam ad excusationem auctoris multa de libris eius esse subtracta , quæ apertam impietatem eiusdem monstrare potuissent : quæsumus præstantiam tuam , ut & hoc specialiter non tam nobis , quam uni uersis , qui in urbe habitant , profuturum opus digneris impendere : ut supradictum librum Origenis , quemadmodum a supradicto auctore editum est , ad fidem tuo sermone manifestes ; & quæ a defensore eius interpolata sunt , prodas ; & quæ etiam in his schedulis , quas ad sanctitatem tuam direximus , uel contra catholicam regulam , uel imperite edita sunt , redarguas , atque conuincas . sane subtiliter in præfatione operis sui , tacito nomine tuæ sanctitatis , expressit , quod a te promissum opus ipse complevit , illud oblique agens , etiam te simili ratione sentire . purga ergo suspensiones hominum , & conuince criminantem ; ne , si dissimulaueris , consentire uidearis .

ARGVMENTVM.

RESPONDENS præmissæ epistolæ , quo animo legerit , & laudarit Origenem , exponit , uti sacrarum scilicet litterarum interpretem , non autem uti dogmatistam . amulorum calumnias reiicit , & suspensiones hominum diluit . & ut uere appareat , se Origenis errores non sequi ; illos dilucide prodit , & Ruffini uersionem , defensionemque , quam pro Origene , sub nomine Pamphili martyris , emiserat , coarguit .

HIERONYMVVS PAMMACHIO

& Oceano .

EPISTOLA LXV.

CHEDVLAE , quas misistis , honorifica me affectu contumelia , sic ingenium prædicantes , ut fidei tollerent ueritatem . & quia eadem & Alexandriæ , & Romæ audieram ; & in toto pene orbe boni homines super meo nomine iactare consueuerunt ; & tantū me diligūt ,
ut

ut sine me hæretici esse non possint : omittam personas ,
 rebus tantum & criminibus respondebo . neque enim cau-
 sâ prodest , maledicentibus remaledicere , & aduersarios ta-
 lionem mordere , cui præcipitur malum pro malo non redde-
 re , sed uincere in bono malum , saturari opprobriis , & al-
 teram uerberanti præbere maxillam . Obiiciunt mihi , qua-
 re Origenem aliquando laudauerim . Ni fallor , duo loca
 sunt , in quibus eum laudaui , præfatiuncula ad Damasum
 in homilias Cantici canticorum , & prologus in librum He-
 braicorum nominum . Quid ibi de dogmatibus Ecclesiæ dici-
 tur ? quid de Patre & Filio , & Spiritu sancto ? quid de car-
 nis resurrectione ? quid de animæ statu , atque substantia ?
 simplex interpretatio , atque doctrina , simplici uoce lauda-
 ta est . nihil ibi de fide , nihil de dogmatibus comprehen-
 sum est . moralis tantum tractatur locus ; & allegoriæ nubi-
 lum serena expositione discutitur . laudaui interpretem , nō
 dogmatistam ; ingenium , non fidem ; philosophum , non
 apostolum . Quod si nolunt super Origene meum scire iudi-
 cium : legant in Ecclesiasten commentarios : replicent in
 epistolam ad Ephesios tria uolumina : & intelligent me sem-
 per eius dogmatibus contraxisse . Quæ enim stultitia est , sic
 alicuius laudare doctrinam , ut sequaris & blasphemiam ?
 Et beatus Cyprianus Tertulliano magistro utitur , ut eius
 scripta probant , cumq. eruditi & ardentis uiri delectetur in
 genio , Montanum cum eo Maximillamq. non sequitur .
 Fortissimos libros contra Porphyrium scribit Appollina-
 rius . Ecclesiasticam pulchre Eusebius historiam texuit . al-
 ter eorum dimidiatam Christi introduxit œconomiam : al-
 ter impietatis Arii apertissimus propugnator est . Væ , in-
 quit Esaias , qui dicunt bonum malum , & malum bonum ,
 & qui faciunt amarum dulce , & dulce amarum . Nec bo-
 nis aduersariorum , si honestum quid habuerint , detrahen-
 dum est : nec amicorum laudanda sunt uicia : & unumquod
 que non personarum , sed rerum pondere iudicandum est .
 Mordetur & Lucilius , quod incomposito currat pede : & ta-
 men sales eius leposq. laudantur . Dum essem iuuenis , miro
 discen-

discendi ferebar ardore, nec, iuxta quorundam præsumptionem, ipse me docui. Apollinarium Laodicenum audiui Antiochiæ frequenter, & colui: & cum me in sanctis scripturis erudiret, numquam illius contentiosum super sensu dogma suscepi. Iam canis spargebatur caput, & magistrū potius, quam discipulum decebat: perrexi tamen Alexandriam, audiui Didymum: in multis ei gratias ago: quod nesciui, didici: quod sciebam, illo docente non perdi. Putabant me homines finem fecisse discendi: ueni rursū Hierosolymam & Bethlehem: quo labore, quo pretio Barabanum nocturnum habui præceptorem? timebat enim Iudæos, & mihi alterum exhibebat Nicodemum. Horum *Ioan. 3* omnium frequenter in opusculis meis facio mentionem. Certe Apollinarii & Didymi inter se dogma contrarium est. rapiat me ergo utraque turma diuersum altrinsecus, quia magistrum utrumque confiteor. Si expedit odisse homines, & gentem aliquam detestari; miro odio auersor circumcisos. usque hodie enim persequuntur dominum nostrum Iesum Christum in synagogis satanæ. Obiciat mihi quispiam, cur hominem Iudæū habuerim præceptorem. Et audet quidā proferre litteras meas ad Didymū, quasi ad magistrū. Grande crimen discipuli, si hominem eruditum & senem magistrū dixerim. et tamen uolo inspicere ipsam epistolā, quæ tanto tempore in calumniam reseruata est. nihil præter honorē & salutationē cōtinet. Inepta sunt hæc, & friuola: arguite potius, ubi hæresim defenderim, ubi prauū Origenis dogma laudauerim. In lectione Esaie, in qua *Esa. 6* duo Seraphin clamātia describuntur; illo interpretante Filiū & Spiritum sanctū, nonne ego detestandam expositionem in duo testamenta mutauī? Habetur liber in manibus, ante uiginti annos editus. Tot opuscula mea, & maxime commentarii, iuxta opportunitatem locorum gentilem sectam lacerant. Quod autem opponunt, congregasse me libros illius super cunctos homines: utinam omnium tractatorū haberem uolumina; ut tarditatem ingenii, lectionis diligentia compensarem. Congregauī libros eius, fateor: et ideo

erro-

errores non sequor, quia scio uniuersa, quæ scripsit. Credite experto: quasi Christianus Christianis loquor. Venenata sunt illius dogmata, aliena a scripturis sanctis, uim scripturis facientia. Legi, inquam, legi Origenem: & si in legendo crimen est, fateor: & nostrum marsupium Alexandrinæ chartæ euacuarūt. Si mihi creditis, Origenistes nunquam fui. si non creditis, nunc esse cessauī. Quod si nec sic adducimini ad fidem: cōpellitis me, ad defensionem mei, contra amasium uestrum scribere: ut, si non creditis neganti, credatis saltem accusanti. Sed libentius mihi erranti creditur, quam correcto. nec mirum: putant enim me suum esse *συμμύσιν*, & propter animales & luteos nolle palam dogmata confiteri. ipsorum enim decretum est, non facile

Matth. 7 margaritas ante porcos esse mittendas, nec dandum sanctū
Psal. 118 canibus, & cum Dauid dicere: Abscondi in corde meo eloquia tua, ut non peccem tibi. Et in alio loco super iusto:

Psal. 14 Qui loquitur, inquit, ueritatem cum proximo suo, idest, cum his, qui domestici fidei sunt. Ex quo uolunt intelligi, nos, qui necdum initiati sumus, debere audire mendaciū; ne paruuli, atque lactentes, solidioris cibi edulio suffocemur. Quod autem periuriorum atque mendacii inter se orgiis fœderentur: sextus Stromateon liber, in quo ex Platonis sententia nostrum dogma componit, planissime docet. Quid igitur faciam? negem me eiusdem dogmatis esse? nō credent. iurem? ridebunt, & dicent: domi nobis ista nascuntur. Faciam, quod solum cauent, ut sacra eorum, atque mysteria in publicum proferam, & omnis prudentia eorum, qua nos simplices ludunt, in propatulo sit; & qui neganti uoci non credunt, credant saltem arguenti stylo. hoc enim uel maxime cauent, ne quando contra auctorem suum eorum scripta teneantur. Facile dicunt cum iuramento, quod postea alio soluant periurio. At subscriptionem tergiversantur, quærunq. suffugia. Alius, Non possum, inquit, damnare, quod nemo damnauit. Alius: Nihil super hoc a patribus statutum est: ut, dum totius orbis promocatur auctoritas, subscribendi necessitas differatur. Quidam

dam constantius, quo modo, inquit, damnabimus, quos synodus Nicena non tetigit? quæ enim damnavit Arium, damnasset utique & Origenem, si illius dogmata reprobasset. Scilicet uno medicamine omnes simul morbos debere curari. et iccirco Spiritus sancti neganda maiestas est, quia in illa synodo super substantia eius silentium fuit. De Ario tunc, non de Origene quæstio fuit; de Filio, non de Spiritu sancto. Confessi sunt, quod negabatur; tacuerunt, de quo nemo quærebat. Quamquam latenter Origenem, fontem Arii, percusserunt: damnantes enim eos, qui Filium de Patris negant esse substantia, illum pariter, Ariumque damnauerunt. alioqui hoc argumento nec Valentinus, nec Marcion, nec Cataphryges, nec Manichæus damnari debent: quia synodus Nicena eos non nominat; quos certe ante synodum fuisse, non dubium est. Quod si quaudò urgeri cœperint; & aut subscribendum eis fuerit, aut exeundum de Ecclesia: miras strophas uideas. sic uerba temperant, sic ordinem uertunt, & ambigua quæque concinnant; ut & nostram, & aduersariorum confessionem teneant: ut aliter hæreticus, aliter catholicus audiat: quasi non eodem spiritu & Apollo Delphicus, atque Loxias oracula fuderit Cræso & Pyrrho diuersis temporibus, sed pari illudens strophæ. Exempli causa pauca subiiciam. Credimus, inquit, resurrectionem futuram corporum. Hoc si bene dicatur, pura confessio est. sed quia corpora sunt cælestia, & terrestria; & aer iste, & aura tenuis, iuxta naturam suam corpora non minantur: corpus ponunt, non carnem; ut orthodoxus, corpus audiens, carnem putet, hæreticus spiritum recognoscit. Hæc est eorum prima decipula: quæ si deprehensa fuerit, instruunt alios dolos, & innocentiam simulant, & malitiosos nos uocant, & quasi simpliciter credentes, aiunt: Credimus resurrectionem carnis. Hoc uero cum dixerint, uulgus indoctum putat sibi sufficere, maxime quia id ipsum & in symbolo creditur. Interroges ultra: circuli strepitus commouetur, fautores clamitant: Audisti resurrectionem carnis; quid quæris amplius? Et, in peruersum uol-

studiis commutatis, nos sycophantæ, illi simplices appellantur. Quod si obduraueris frontem, & urgere cœperis, carnem digitis tenens, an ipsam dicant resurrecturam, quæ cernitur, quæ tangitur, quæ incedit, & loquitur: primo rident, deinde annuunt. Dicentibusq. nobis, utrum capillos, & dentes, pectus, & uentrem, manus, & pedes, ceterosq. artus ex integro resurrectio exhibeat: tunc uero rifi se tenere non possunt; cachinnoq. ora soluentes, tonsores nobis necessarios, & placentas, & medicos, ac sutores ingerunt. Vltroq. interrogant, utrum credamus & genitalia utriusque sexus resurgere, nostras genas hirtas, feminarum lenes fore, & habitudinem corporis pro maris ac feminae distinctione diuersam. quod si dederimus, statim expectunt uuluum, & coitum, & cetera, quæ in uentre sunt, & sub uentre. Singula membra negant; & corpus, quod constat ex membris, dicunt non resurgere. Non est huius temporis, contra dogma peruersum, rhetoricum iactare sermonem. Non mihi diues Ciceronis lingua sufficiat; nō feruens Demosthenis oratio animi mei possit implere feruorem; si uelim hæreticorum fraudulentias prodere, qui, uerbo tenus resurrectionem fatentes, animo negant. solent enim mulierculæ eorum mammas tenere, uentri applaudere, lumbos, & femora, & putres attrectare axillas, & dicere: quid nobis prodest resurrectio, si fragile corpus resurget? et, futuræ angelorum similes, habebimus & naturam? Dedignantur uidelicet cum carne & ossibus resurgere, cum quibus resurrexit & Christus. Sed fac me errasse in adolescentia, & philosophorum, idest, gentilium studiis eruditum, in principio fidei dogmata ignorasse Christiana; & hoc putasse in apostolis, quod in Pythagora, & Platone, & Empedocle legeram. Cur paruuli in Christo, atque lactentis errorem sequimini? cur ab eo impietatem discitis, qui necdum pietatem nouerat? Secunda post naufragium tabula est, culpam simpliciter confiteri. Imitati estis errantem, imitamini & correctum. Erramus iuuenes, emendemur senes. Iungamus gemitus, lacrymas copulemus,

plo-

ploremus , & conuertamur ad Dominum , qui fecit nos : non expectemus diaboli pœnitentiam . Vana est illa præsumpcio , & in gehennæ trahens profundum : hic aut quæritur uita , aut amittitur . Si Origenem numquam secutus sum ; frustra infamare me quæritis . si discipulus eius fui , imitami pœnitentem . Credidistis confitenti ; credite & neganti . Si ista , ut ais , inquit , noueras ; cur eum laudasti in opusculis tuis ? Et hodie laudarem , nisi uos eius laudaretis errores . non mihi displiceret ingenium , nisi quibusdam eius placeret impietas . Et Apostolus præcipit : Omnia le-
gentes , quæ bona sunt retinentes . Lactantius in libris suis ,
& maxime in epistolis ad Demetrianum , Spiritus sancti omnino negat substantiam ; & errore Iudaico dicit eum uel ad Patrem referri , uel ad Filium , & sanctificationem utriusque personæ sub eius nomine demonstrari . Quis mihi interdicare potest , ne legam Institutionum eius libros , quibus contra gentes scripsit fortissime , quia superior sententia detestanda est ? Apollinarius contra Porphyrium egregia scripsit uolumina . probo laborem uiri , licet fatuum in plerisque dogma contemnam . Confitemini & uos in quibusdam errare Origenem ; & mihi ultra non faciam . Dicite eum male sensisse de Filio , peius de Spiritu sancto ; animarum de cælo ruinas impie protulisse ; resurrectionem carnis uerbo tantum confiteri , ceterum assertionem destruere ; & post multa sæcula , atque unam omnium restitutionem , id ipsum fore Gabrielem , quod diabolum ; Paulum , quod Caipham , uirgines , quod prostibulas . Cum hæc reieceritis , & quasi censoria uirgula separaueritis a fide Ecclesiæ ; tuto legam cetera ; nec uenena iam timebo , cum antidotum præbitero . non mihi nocebit , si dixero : Origenes , cum in ceteris libris omnes uicerit , in Cantico canticorum ipse se uicit . nec formidabo sententiam , qua illum doctorem ecclesiarum quondam adolescentulus nominaui . nisi forte accusare debui , cuius rogatus opuscula transferebam ; & dicere in prologo : Hic , cuius interpretor libros , hæreticus est , caue lector , ne legas : fuge uiperam : aut , si legere uolue-

1. Theff. 5

uolueris, scito a malis hominibus & hæreticis corrupta esse, quæ transtuli. quamquam timere non debeas: ego enim omnia, quæ uitiata fuerant, correxi. Hoc est aliis uerbis dicere: ego, qui interpretor, catholicus sum; hic, quem interpretor, hæreticus est. Denique & uos satis simpliciter, & ingenue, & non malitiose, parui scilicet pendentes præcepta rhetorica, & præstigias oratorum, dū libros eius *καὶ ἀρχὴν* hæreticos confitemini, & in alios crimen transferre uultis, iniecitis legentibus scrupulum, ut totam auctoris uitam discuterent, & ex ceteris libris eius coniecturam præsentis facerent quæstionis. Ego callidus, qui emendandi, silens quod uolui, & dissimulans crimina, non feci inuidiam criminoso. Aiunt & medici, grandes morbos non esse curandos, sed dimittendos naturæ; ne medela languorem exasperet. Centum quinquaginta anni prope sunt, ex quo Origenes mortuus est Tyri. quis Latinorum ausus est umquam transferre libros eius de resurrectione, *καὶ ἀρχὴν, σπουδαίως, & τόμους*? quis per infame opus se ipsum uoluit infamari? nec disertiores sumus Hilario, nec fideiores Victorino, qui eius tractatus non ut interpretes, sed ut auctores proprii operis transtulerunt. Nuper sanctus Ambrosius sic Hexaameron illius compilauit, ut magis Hippolyti sententias Basiliiq. sequeretur. Ego ipse, cuius æmulatores esse uos dicitis, & ad ceteros talpæ, caprearum in me oculos possidetis, si malo animo fuissetem erga Origenem, interpretatus essem hos ipsos, quos supra dixi, libros; ut mala eius etiam Latinis nota facerem. sed numquam feci, & multis rogantibus acquiescere nolui. non enim cōsueui eorum insultare erroribus, quorum miror ingenia. ipse, si adhuc uiueret, Origenes irasceretur uobis fautoribus suis, & cum *Gen. 34* Iacob diceret, Odiosum me fecistis in mundo. Vult aliquis laudare Origenem? laudet ut laudo. magnus uir ab infanzia, & uere martyris filius: Alexandria ecclesiasticam scholam tenuit, succedens eruditissimo uiro Clementi presbytero. uoluptates intantum fugit, ut zelo Dei, sed tamen non secundum scientiam, ferro truncaret genitalia. caleauit auaritiam:

ritiam : scripturas memoriter tenuit ; & in studio explana-
tionis earum, diebus defudauit ac noctibus . Mille & eo am-
plius tractatus in Ecclesia locutus est : edidit innumerabiles
præterea cōmentarios, quos ipse appellat *τόμους*, & quos
nunc prætereo, ne uidear operum eius indicem texere . quis
nostrum tanta potest legere, quanta ille conscripsit ? quis
ardentem in scripturis animum non miretur ? Quod si quis
Iudas zelotes opposuerit nobis errores eius, audiat libere :
Interdum magnus dormitat Homerus : Verum operi lon-
go fas est obrepere somnum . Non imitemur eius uitia, cu-
ius uirtutes non possumus sequi . Errauerūt in fide alii tam
Græci, quam Latini : quorum non necesse est proferre no-
mina, ne uideamur eum non sui merito, sed aliorum erro-
re defendere . Hoc non est, inquires, excusare Origenem,
sed accusare ceteros . Pulchre, si eum errasse non dicerem,
si in fidei prauitate saltem apostolum Paulum uel angelum
de cælo audiendum crederem . nunc uero, cum simpliciter
errorem eius fatear, sic legam ut ceteros, quia sic errauit ut
ceteri . Sed dicas : si multorum communis est error, cur so-
lum persequimini ? Quia uos solum laudatis ut apostolum .
Tolle amoris *ὑπερβολὴν*, & nos tollimus odii magnitudi-
nem . Ceterorum uitia de libris suis ad hoc tantum excerpi-
tis, ut huius defendatis errorem : Origenem sic fertis in cæ-
lum, ut nihil eum errasse dicatis . Quisquis es assertor no-
uorum dogmatum, quæso te, ut parcas Romanis auribus,
parcas fidei, quæ Apostoli uoce laudata est . Cur post qua-
dringētos annos docere nos niteris, quod ante nesciuimus ?
cur profers in medium, quod Petrus & Paulus edere nolue-
runt ? Vsq̃ue ad hunc diem sine ista doctrina mundus Chri-
stianus fuit . illā senex tenebo fidem, in qua puer natus sum .
Pelusiotas nos appellant, & luteos, animalesq̃ . & carneos,
quod non recipiamus ea, quæ spiritus sunt . illi scilicet Hie-
rosolymitæ, quorum mater in cælo est . Non contemno car-
nem, in qua Christus natus est, & resurrexit : non despicio
lutum, quod excoctum in testam purissimam, regnat in cæ-
lo . & tamen miror, cur carni detrahentes uiuant carnali-

Gal. 2

Rom. 2

Gal. 4

D d d ter

ter, & inimicam suam foueant, & nutrant delicate. nisi for
Luc. 6 te implere uolunt scripturam dicentem: Amate inimicos
Matth. 5 uestros: benefacite iis, qui persequuntur uos. Amo car-
nem castam, uirginem, ieiunantem: amo carnis non ope-
ra, sed substantiam: amo carnem, quæ iudicandam se esse
nouit: amo illam, quæ pro Christo in martyrio cæditur, la-
niatur, exurit. Illud uero, quod asserunt, a quibusdam hæ-
reticis & maleuolis hominibus libros eius esse uiolatos, quæ
ineptū sit, hinc probari potest. Quis prudentior, doctior,
eloquentior Eusebio, & Didymo, assertoribus Origenis, in-
ueniri potest? quorū alter sex uoluminibus τῆς εἰς πολλοὺς λόγους
ita eum, ut se, sensisse confirmat: alter sic eius errores ni-
titur excusare, ut tamen illius esse fateatur; non scriptum
negans, sed sensum scribentis edisserens. Aliud est, si, quæ
ab hæreticis addita sunt, Didymus quasi bene dicta defen-
dat. Solus inuentus est Origenes, cuius scripta in toto orbe
falsarentur, &, quasi ad Mithridatis litteras, omnis ueritas
uno die de uoluminibus illius raderetur. Si unus uiolatus est
liber; num uniuersa eius opera, quæ diuersis & locis & tem-
poribus edidit, simul corrumpi potuerunt? Ipse Origenes
in epistola, quam scribit ad Fabianum, Romanæ urbis epi-
scopum, pænitentiam agit, cur talia scripserit; & causæ te-
meritatis in Ambrosium refert, quod secreto edita in pu-
blicum protulerit: & quid adhuc αἰτιολογεῖσιν, aliena es-
se, quæ displicent? Porro, quod Pamphilum proferunt lau-
datorem eius, gratias illis ago meo nomine, quod dignum
me putauerunt, quem cum martyre calumniarentur. Si
enim ab inimicis Origenis libros eius dicitis esse uiolatos,
ut infamarentur: quare mihi non liceat dicere, ab amicis
eius & sectatoribus compositum esse sub nomine Pamphili
uolumen, quod illum testimonio martyris ab infamia uin-
dicaret? Ecce uos emendatis in Origenis libris, quod ille
non scripsit: & miramini, si edat aliquis librum, quem ille
non edidit? Vos in edito opere potestis coargui: ille, qui
nihil aliud edidit, facilius patet calumniæ. Date quodlibet
aliud opus Pamphili: nusquam reperietis. hoc unum est.
unde

unde igitur sciam, quod Pamphili sit ? uidelicet stylus & salua docere me poterit . Numquam credam, quod doctus uir primos ingenii sui fructus quæstionibus & infamiae dedicarit : & ipsum nomen apologetici ostendit accusationem : nō enim defenditur, nisi quod in crimine est . Vnum nunc proferam, cui contradicere uel stulti sit, uel impudentis . Sexti libri Eusebii super Origenis defensione principium usque ad mille ferme uersus liber iste, qui Pamphili dicitur, continet . Et in reliquis scriptor eiusdem operis profert testimonia, quibus nititur approbare Origenem fuisse catholicum . Eusebius & Pamphilus tantam inter se habuere concordiam, ut unius animæ homines putes, & ab uno alter nomen acceperit . quo modo igitur inter se dissentire potuerunt, ut Eusebius in toto opere suo Origenem Ariani probet dogmatis, & Pamphilus Nicenæ synodi, quæ fuit postea, defensorem ? Ex quo ostenditur, uel Didymi, uel cuiuslibet alterius esse opusculum, qui, sexti libri capite detruncato, cetera membra sociarit . Sed concedamus ex superfluo, ut Pamphili sit, sed necdum martyr . ante enim scripsit, quæ martyrium perpeteretur . Et quo modo, inquires, martyrio dignus fuit ? Scilicet ut martyrio deleter errorem, ut unam culpam sanguinis sui effusione purgaret . Quanti in toto orbe martyres, ante quam caderentur, uariis subiacuere peccatis ? Defendamus ergo peccata : quia qui postea martyres, prius peccatores fuerunt . Hæc, fratres amantissimi, ad epistolam uestram celeri sermone dictavi, uincens propositum, ut contra eum scriberem, cuius ingenium ante laudaueram, malens existimatione periclitari, quam fide . hoc mihi præstiterunt amici mei, ut, si tacuero, reus, si respondero, inimicus iudicer . dura utraque condicio : sed e duobus eligam, quod leuius est . similtas redintegrari potest, blasphemia ueniam non meretur . Quid autem laboris in libris transferendis *τῶν ἀρχαίων* sustinuerim, uestro iudicio de relinquo : dum, & mutare quippiam de Græco, non est uertentis, sed euertentis ; & eadem ad uerbum exprimere, nequaquam eius, qui seruare uelit eloquii uenustatem .

RESPONDENS Ruffino, ait reconciliatam amicitiam a se nullo modo fuisse laesam, sed obiectum tantum sibi crimen dilutum. Deinde cum obliquis, figuratisq. Ruffini laudibus in suspicionem haresum Originis traheretur, admonet ne se posthac simili extollat praconio; & de quibusdam suis rebus certiores reddit.

HIERONYMVVS RVFFINO.

EPISTOLA LXVI.

IV TE Romæ moratum, sermo proprius indicauit. nec dubito spiritualium parentum ad patriam reuocatum desiderio, quem matris luctus ire prohibebat; ne magis coram doleres, quod absens uix ferre poteras. Quod quereris, stomacho suo unumquemque feruire, & nostro non acquiescere iudicio: conscientiae nostrae testis est Dominus, post reconciliatas amicitias nullum intercessisse rancorem, quo quempiam læderemus: quin potius cum omni cautione prouidimus, ne saltem casus in maleuolentiam uerteretur. Sed quid possumus facere; si unusquisque iuste putat se facere, quod facit? & uidetur sibi remorderi potius, quam mordere? Vera amicitia, quod sentit, dissimulare non debet. Præfatiuncula librorum *ὁ δὲ ἀρχαῖος* ad me missa est: quam ex stylo intellexi tuam esse: in qua oblique, immo aperte ego petor. qua mente sit scripta, tu uideris: qua intelligatur, & stultis patet. Poteram & ego, qui sæpissime figuratas controuersias declamaui, aliquid de uetere artificio repetere, & tuo te more laudare: sed absit a me, ut, quod reprehendo in te, imiter: quin potius ita sententiam temperaui, ut & obiectum crimen effugerem, & amicum, quantum in me est, nec læsus lederem. Sed obsecro te, ut, si deinceps aliquem sequi uolueris, tuo tantum iudicio sis contentus. aut enim bona sunt, quæ appetimus, aut mala: si bona, non indigent alterius auxilio: si mala,

mala, peccantium multitudo non parit errori patrociniū. Hæc apud te amice potius expostulare uolui, quam laceſſitus publice deſæuire; ut animaduertas me reconciliatas amicitias pure colere, & non, iuxta Plautinam ſententiam, altera manu lapidem tenere, panem offerre altera. Frater meus Paulinianus necdum de patria reuerſus eſt; & puto, quod eum Aquileiæ apud ſanctum Papam Chromatium uideris. Sanctum quoque preſbyterum Ruffinum ob quandam cauſam per Romam Mediolanum miſimus; & orauimus, ut noſtro animo & obſequio uos uideret. ceterisq. amicis eadem ſignificauimus; ne mordentes inuicem, conſumamur ab Inuicem. Iam tuæ moderationis eſt, & tuorū, nullam occaſionem impatientibus dare; ne non omnes ſimiles mei inuenias, qui poſſint figuratis laudibus delectari.

Gal. §

ARGUMENTVM.

CVM Ruffinus, ruſum recrudefcente inimicitie uulnere, multa in D. Hieronymum inuectus ſcripſerit, & inter cetera in ſuſpicionem Origenis errorum inuoluere illum tentauerit, uir ſanctus ex amicorum litteris certior de his factus, excitato nunc ſtomacho, ac flaua prodeunte bile, omnes eius calumnias refellit, & modo clypeo, modo gladio utens, ita ſemet tuetur, ut aduerſarium, nihil illi parcens, omnino proſternat, ac necet. Opus autem omne in tres libros partitum eſt. primo crimina ſibi a Ruffino obiecta diluit: altero Ruffini inuectiuam, ſub Apologia nomine Anaſtaſio Pape miſſam, confutat: tertio, & ultimo Ruffini litteris, ad ſe ueluti excuſatoriis miſſis, reſpondet.

AD PAMMACH. ET MARCELLINVM

Apologia Hieronymi aduerſum Ruffinum.

Tueſtris, & multorum litteris didici, obijci mihi in *Pſal. 67*
 E ſchola tyrannica, lingua canum meorum ex inimicis ab ipſo, cur *ὡς ἀρχόντων* libros in Latinum uertirim. O impudentiam ſingularem: accuſant medicum quod

D d d 3 uene-

uenena prodiderit, ut scilicet *φάρμακον δάνατον* suum
 nō innocentiae merito, sed criminis communione tuean-
 tur: quasi culpam numerus peccantium minuat, & in per-
 sonis, non in rebus sit accusatio. Scribuntur cōtra me libri,
 ingeruntur omnibus audiendi, & tamen non eduntur; ut
 simplicium corda percutiant, & mihi facultatem pro me
 auferant respondendi. Nouū malitiae genus, accusare, quod
 prodi timeas; scribere, quod occultes. Si sunt uera, quae scri-
 pfit, cur publicum timuit? si falsa, cur scripsit? Olim pueri
 legimus: Intemperantis esse arbitror, scribere quidquam,
 quod occultari uelis. Rogo, quis est iste dolor? quid aestu-
 ant? quid insaniunt? quod praconem repuli figuratum?
 quod nolui me subdolo ore laudari? quod sub amici nomi-
 ne, inimici insidias deprehendi? Frater & collega in praes-
 tiuncula uocor, & satis aperte exponuntur crimina mea,
 quid scripserim, quibus in caelum Origenem laudibus leua-
 uerim. Bono animo fecisse se dicit. Et quo modo nunc ea-
 dem inimicus obiicit, quae tunc amicus laudauerat? Volue-
 rat me in interpretatione quasi prauium sequi, & auctorita-
 tem operi suo ex nostris opusculis mutuari. Suffecerat se-
 mel dixisse, quod scripseram: quid necesse fuit eadem rursus
 iterare, & frequenter ingerere, &, quasi nemo sibi laudanti
 crederet, ipsa dicta replicare? Non est tam sollicita de au-
 dientium fide, simplex & pura laudatio. Quid metuit, ne
 illi sine testimoniis dictorum meorum in meis laudibus non
 credatur? Videtis nos intelligere prudentiam eius, & praedi-
 cationis diaspyrticae ltophis in scholis saepe lusisse? Simplici-
 tatem obtendere non potest, in quo artifex deprehenditur
 malitia. Semel, aut, ut multum, bis errasse, sit casus: cur
 prudenter errat, & crebro, & sic per totum textit errorem, ut
 mihi non liceat negare quod laudat? Prudentis fuerat, &
 amici, post reconciliatam similitudinem etiam leues suspicio-
 nes fugere; ne, quod fortuito fecisset, consulto facere puta-
 retur. unde & Tullius in commentariis causarum pro T. Ga-
 binio, Ego, inquit, cum omnes amicitias tuendas semper
 putaui summa religione, & fide, tum eas maxime, quae es-
 sent

sent ex inimiciis reuocatæ in gratiam : propterea quod integris amicitiiis officium prætermisum, imprudentiæ, uel, ut grauius interpretemur, negligentæ excusatione defenditur : post reditum in gratiam si quid est commissum, id non neglectum, sed uiolatum putatur, nec imprudentiæ, sed perfidiæ assignari solet. Flaccus quoque in epistola, quam scribit ad Florum, Male, ait, facta gratia nequidquam coit, & rescinditur. Quid mihi nunc prodest, quod simpliciter errasse se iurat? Ecce obiiciuntur mihi laudes eius, & crimini datur simplicissimi amici non simplex nec pura laudatio. Si auctoritatem suo operi præstruebat, uolens quos sequeretur ostendere : habuit in promptu Hilarium confesorem, qui quadraginta ferme millia uersuum Origenis in Job & psalmos transtulit : habuit Ambrosium, cuius pene omnes libri huius sermonibus pleni sunt : & Martyrem Victorinum, qui simplicitatem suam in eo probat, dum nulli molitur insidias. de his omnibus tacet, & quasi columnis Ecclesiæ prætermisiss, me solum publicat, & nihili hominem per angulos consecratur. Nisi forte eadem simplicitate, qua amicum nescius accusauit, illos ignorasse se iuret. et quis ei credet, uiro eruditissimo, & qui tantam habeat scientiam scriptorum ueterum, maxime Græcorum, ut, dum peregrina sectatur, pene sua amiserit ; quod recentissimæ memoriæ uiros, & Latinos, nesciat? ex quo apparet, nō tam me ab eo laudatum, quam illos non accusatos : ut, siue laus illa est, ut stultis persuadere conatur ; siue accusatio, ut ego ex uulneris mei dolore sentio ; nec in laude haberem æqualium gloriam, nec in uituperatione solatium. Teneo epistolas uestras, quibus accusatum me scribitis esse ; & hortamini, ut respondeam criminanti ; ne, si tacuerim, uidear crimen agnoscere. Ad quas respondi, fateor : & quamuis læsus sic amicitie iura seruaui, ut me sine accusantis accusatio ne defenderem ; & , quod unus Romæ amicus obiecerat, a multis in toto orbe inimicis dicerem iactitatum ; ut non uiderer homini, sed criminibus respondere. Aliud est, si pro iure amicitie accusatus tacere debui, & lutatam ab eo fa-

Ddd 4 ciem

ciem, atque, ut ita dicam, hæretico fœtore conspersam, ne simplici quidem aqua diluere; ne ille mihi fecisse putaretur iniuriam. Hæc uox nec hominis est, nec ad hominem, aperte amicum petere, crimina eius sub persona laudatoris exponere; & illi ne hoc quidem liberum derelinqui, ut se catholicum probet, & laudationem hæretici, quæ illi obiicitur, non de assensu hæreseos, sed de ingenii extitisse admiratione respondeat. Placuerat ei, siue, ut ipse uult uideri, compulsus erat in Latinā linguam uertere, quod nolebat. quid necesse fuit, me latentem, & tanti maris atque terrarum diuisum spatiis, inferere quæstioni? opponere inuidiæ plurimorum? ut plus mihi laudando noceret, quam sibi prodesset exemplo? Nunc quoque, quia renui laudatorem, & uerso stylo docui me non esse, quod meus necessarius prædicauit, dicitur furere, & tres contra me libros uenustate Attica texuisse eadem accusans, quæ ante laudauerat, & obiciens mihi in trāslatione Origenis nefaria dogmata, de quo in præfatiuncula laudationis suæ dixerat: Sequar regulam præcessorum, & eius præcipue uiri, cuius superius fecimus mentionem: qui cum ultra septuaginta libellos Origenis, quos Homiliticos appellauit, aliquantos etiam de tomis in Apostolum scriptis transtulisset in Latinum: in quibus, cū aliquanta offendicula inueniantur in Græco, ita eliminuit omnia interpretando, atque purgauit, ut nihil in illis, quod a fide nostra discrepet, Latinus lector inueniat. hunc ergo etiam nos, licet non eloquentiæ uiribus, disciplinæ tamen regulis, in quantum possumus, sequimur. Certe hæc illius uerba sunt, negare non potest. Ipsa styli elegantia, & sermo compositus, quodq. his maius est, simplicitas Christiana, auctoris sui characterem probant. Aliud est, si ista Eusebius deprauauit, & accusator Origenis meiq. studiosus in uno eodemq. opere & illum, & me uel errasse, uel bene sensisse testatus est. Non potest me nunc inimicus hæreticum dicere, quem a fide sua dudum non discrepare præfatus est. Simulq. & hoc ab eo quero, quid sibi uelit sermo moderatus & dubius? Nihil, inquit, in illis, quod a fide nostra

stra discrepet, Latinus lector inueniet. Fidem suam quam uocat? eam ne, qua Romana pollet Ecclesia? an illam, quæ in Origenis uoluminibus cōtinetur? si Romanam responderit; ergo catholici sumus, qui nihil de Origenis errore transtulimus. sin autem Origenis blasphemia, fides illius est: dum mihi inconstantie crimen impingit, se hæreticū probat. siue bene credit laudator meus, cōfessione sua me assumit in socium; siue male, ostendit me ideo ante laudatum, quia participem sui putabat erroris. Sed aduersus illos libros, qui per angulos garriunt, & furtina accusatione me mordent, cum editi fuerint, & de tenebris ad lucem processerint, atque ad nos uel studio fratrum, uel temeritate æmuloꝝ potuerint peruenire, respondere conabor. neque enim magnopere formidandi sunt, quos metuit auctor suus prodere, & tantum consœderatis legendos esse decreuit. Tunc aut agnoscam crimina, aut diluam; aut in accusatoꝝ, quæ sunt obiecta, retorquebo; & ostendam, quod hucusque silentium modestiæ fuerit, non malæ conscientiæ. Interim apud tacitum lectoris iudicium purgatum me esse uolui, & grauissimum inter amicos crimen refellere; ne prior læsisse uidear, qui & uulneratus nequaquam contra persecutorem tela direxi, sed meo tantum uulneri admoui manum. quem obsecro, ut absque præiudicio personarum culpam in eum referat, qui læcessiuit. Nec læsisse contentus, quasi aduersus elinguem, semperq. taciturnum, tres elucubrauit libros. et ἀπὸ τῶν Marcionis de meis opusculis fabricatus est. Gestit animus & illus repente doctrinam, & meam insperatam ueritatem cognoscere. Fortasse breui tempore didicit, quod nos docere debeat, &, quod illum scire nullus putabat, subitum eloquentiæ flumen ostendet. Sic pater ille Deus faciat, sic magnus Iesus, Incipiat cōferre manū. Quāuis librauerit accusationis suæ hastas, & totis aduersum nos uiribus intorserit: credimus in Deo saluatore, quod secuto circumdabit nos ueritas eius, & cū Psalmista cantare poterimus: Sagittæ paruuloꝝ factæ sunt plagæ eorum. Et, si constiterint aduersum me castra, non timebit cor meum.

Psal. 90. 63. 26

Si

Si steterit aduersum me proelium, in hoc ego sperabo. Sed hæc alias: nunc ad id reuertamur, quod cœperamus. Obiiciunt mihi sectatores eius, cerealiaq. arma expediunt festi rerum, quare *πρὸς ἀπὸν* libros Origenis, noxios, & ecclesiasticæ fidei repugnantes, in Latinum sermonem uerterim. Ad quos breuis & succincta responsio est. Tuæ me, frater Pammachi, & tuorum litteræ compulerunt, dicentes, illos ab alio fraudulenter esse translatos, & interpolata non nulla, & uel addita, uel mutata. Ac, ne parum epistolis habere fidem, misistis exemplaria eiusdem translationis, cum præfatiuncula laudatrice mea. Quæ cum legissem, conuulsiemq. cum Græco, illico animaduerti, quæ Origenes de Patre, & Filio, & Spiritu sancto impie dixerat, & quæ Romanæ aures ferre non poterant, in meliorem partem ab interprete commutata: cetera autem dogmata, de angelorum ruina, de animarum lapsu, de resurrectionis præstigiis, de mundo uel mundis Epicuri, de restitutione omnium inæqualē statum, & multo his deteriora, quæ longum esset retexere, uel ita uertisse, ut in Græco inuenerat, uel de commentariolis Didymi, qui Origenis apertissimus propugnator est, exaggerata & firmiora posuisse: ut, qui in trinitate catholicum legerat, in aliis hæreticum non caueret. Alius forsitan, qui non esset amicus eius, diceret: Aut totum muta, quod malum est; aut totū prode, quod optimum putas. Si propter simplices noxia quæque detruncas, & ea, quæ ab hæreticis addita simulas, in peregrinum non uis transferre sermonem; cæde quidquid est noxium. sin autem ueritatis fidem in translatione conseruas; cur alia mutas, & alia dimittis intacta? Quamquam aperta confessio est, in eodem prologo emendasse te praua, & optima reliquisse. ex quo non interpretis libertate, sed scriptoris auctoritate teneberis, si quid in iis, quæ uertisti, hæreticum comprobetur & manifesti criminis argueris, iccirco te ueneni calicem circumlinere melle uoluisse, ut simulata dulcedo uirus pessimum tegetet. Hæc, & multa his duriora inimicus diceret; & te non ut interpretem mali operis, sed ut

adsti-

adstipulatorem in ius Ecclesiæ traheret. Ego autem, me-
met tantum defendisse contentus, in libris *ἁπλῶς* sim-
pliciter, quod in Græco habebatur, expressi; non ut crede-
ret lector iis, quæ interpretabar, sed ne crederet illis, quæ
tu ante transtuleras. Duplex in opere meo utilitas fuit,
dum & hæreticus auctor proditur, & non uerus interpret
arguitur. Ac, ne quis me putaret iis consentire, quæ uerte-
ram; interpretationis necessitatem præfatione muniui, &
docui, quibus lector non deberet credere. Prior translatio
laudem auctoris continet; secunda uituperationem. illa le-
ctorem prouocat ad credendum, ista ad non credendum
mouet. ibi & ego inuitus laudator assumor; hic intantum
non laudo, quem transfero, ut cogar accusare laudantem.
Eadem res non eadem mente perfecta est: immo unum iter
diuersos exitus habuit. Abstulit quæ erant, dicens ab hære-
ticis deprauata: & addidit quæ non erant, asserens ab eo-
dem in locis aliis disputata: quod nisi ipsa loca monstraue-
rit, unde transtulisse se dicit, probare non poterit. Mihi stu-
dio fuit nihil mutare de uero. ad hoc enim interpretabar,
ut mala interpretata conuincerem. Putatis me interpre-
tem? Proditor fui, prodidi hæreticum, ut Ecclesiam ab hæ-
resi uindicarem. Cur Origenem in quibusdam ante laudaue-
rim, prælatus huic operi ostendit liber. nunc sola inter-
pretationis meæ causa redditur: quæ cum pietatis habeat
uoluntatem, non debeo impietatis argui, prodens impiū,
quod quasi pium ecclesiis tradebatur. Sepuaginta libros
eius, ut meus necessarius criminatur, in Latinum uerte-
ram, & multa de Tomis. Numquam de opere meo fuit quæ-
stio, numquam Roma commota est. Quid necesse erat La-
tinis auribus tradere, quod detestatur & Græcia? quod or-
bis accusat? Ego per tot annos tam multa conuertens num-
quam scandalo fui: tu ad primum & solum opus, ignotus
prius, temeritate factus es nobilis. Docet ipsa præfatio, &
Paniphili Martyris librum pro defensione Origenis a te es-
se translatus. Et hoc agis totis uiribus, ut, cuius fidem
martyr probat, Ecclesia non refutet. Sex libros, ut ante
iam

iam dixi, Eusebius, Cæsariensis episcopus, Arianae quondam signifer factionis, pro Origene scripsit, latissimum & elaboratum opus: & multis testimoniis approbavit, Origenem iuxta se catholicum, idest, iuxta nos Arianum esse. Horum tu primum librum uertis sub nomine martyris. Et miramur, si me, homunculum parui pretii, Origenis laudatorem uellis, cum martyri calumniam feceris? Paucisq. testimoniis de Filio Dei & Spiritu sancto commutatis, quæ sciebas displicitura Romanis, cetera usque ad finem integra dimisisti; hoc idem faciens in apologia quasi Pamphili, quod & in Origenis *πρὸς ἀρχαίαν* translatione fecisti. Si ille Pamphili liber est de sex libris; quis erit primus Eusebii? In ipso uolumine, quod tu Pamphili simulas, sequentium librorum facta mentio est. In secundo quoque & reliquis dicit Eusebius, quid in primo libro ante iam dixerat, & quod eadem repetere non debeat. Si totum opus Pamphili est, cur reliquos libros non trāsfers? si alterius, cur nomen immutas? Taces: ipsæ res loquuntur: uidelicet ut crederent martyri, qui Arianorum principem detestaturi erant. Quid tibi animi fuisse dicam, amice simplicissime? te ne potuisse hæretici hominis libro martyris nomen imponere? Et ignoras te sub auctoritate testis Christi, Origenis facere defensores? Pro eruditione, qua polles, & inclytus *σωτήρα* *της* in occidente laudaris, ita ut *κορυφαίον* te omnes tuæ partis nominent, non reor te ignorasse Eusebii *σωτήρα*, & Pamphilum Martyrem nihil omnino operis condidisse. ipse enim Eusebius, amator & præco & contubernalis Pampphili, tres libros scripsit elegantissimos, uitam Pamphili continentes: in quibus cum cetera miris laudibus prædicaret, humilitatemq. eius ferret in cælum, etiam hoc in tertio libro addidit. Quis studiosorum amicus non fuit Pamphili? si quos uidebat ad uictum necessariis indigere, præbebat large quæ poterat. Scripturas quoque sanctas non ad legendum tantum, sed & ad habendum tribuebat promptissime, nec solum uiris, sed & feminis, quas uidisset lectioni deditas. unde & multos codices præparabat, ut, cum neces-

neces-

necessitas poposcisset, uolentibus largiretur. Et ipse quidem proprii operis nihil omnino scripsit, exceptis epistolis, quas ad amicos forte mittebat, intantum se humilitate deiecerat: ueterum autem tractatus scriptorum legebat studiosissime, & in eorum meditatione iugiter uersabatur. Defensor Origenis, & laudator Pamphili, dicit Pamphilum nihil omnino scripsisse, nec proprii quidquam condidisse sermonis. et hoc dicit, iam Pamphilo martyrio coronato: ne habeas suffugium, post editos ab Eusebio libros hoc Pamphilum scripsisse. Quid facies? Eo libro, quem sub nomine martyris edidisti, uulneratae sunt conscientiae plurimorum. Non ualet apud eos super Origenis damnatione episcoporum auctoritas, quem putant a martyre praedicatum. Quid facient epistolae Theophili episcopi? quid Papae Anastasii, in toto orbe haereticum persequentes, cum liber tuus, sub nomine Pamphili editus, pugnet contra epistolas eorum, & episcopali nomini testimonium martyris opponatur? Quod fecisti in libris *πρὸς ἀρχαίαν*, hoc facito & in isto uolumine *ἰδὲ ἐπιγράφα*. Audi consilium amici: nō te pœniteat artis tuae: uel dicito tuum non esse, uel ab Eusebio presbytero deprauatum. Vnde probari tibi poterit, quod a te translatus est? Non manus tua tenetur: non tanta es eloquentiae, ut nullus te possit imitari. Aut certe, si res ad probationem uenerit, & impudentiam frontis oppresserint testimonia plurimorum; palinodiam Stesicori morecantato. Melius est pœnitere facti tui, quam & martyrem in calumnia, & deceptos in errore persistere. Nec erubescas de commutatione sententiae: non es tantae auctoritatis, & famae, ut errasse te pudeat. Imitare me, quem plurimum amas, sine quo nec uiuere, nec mori potes: & mecum clama, quae ego laudatus a te in defensione mei locutus sum. Eusebius, Caesariensis episcopus, cuius supra memini, in sexto libro *τῆς ἀπολογίας* Origenis hoc idem obiicit Methodio episcopo, & martyri, quod tu in meis laudibus criminaris; & dicit: Quo modo ausus est Methodius nunc contra Origenem scribere, qui haec & haec de Origenis

genis locutus est dogmatibus? Non est huius loci, pro martyre loqui: neque enim omnia in locis omnibus differenda sunt: nunc tetigisse sufficiat, hoc ab Ariano homine obiici clarissimo & eloquentissimo martyri, quod tu in me & amicus laudas, & offensus accusas. Habes occasionem & de presenti loco, si uelis, mihi calumniam struere; cur nunc & Eusebio detraham, quem in alio loco ante laudavi. Alterum quidem nomen Eusebii, sed eadem, quæ super Origenis uocabulo, est calumnia. Laudavi Eusebium in ecclesiastica historia, in digestionem temporum, in descriptione Sanctæ Trinitatis: & hæc ipsa opuscula in Latinum uertens, meæ linguæ hominibus dedi: nunc ex eo Arianus sum, quia Eusebius, qui hos libros condidit, Arianus est? Si ausus fueris me hæreticum dicere; memento præfatiunculæ *πρὸς ἀρχιεπίσκοπον*, in qua fidei tuæ me esse testaris: simulque obsecro, ut amicū quondam tuum expostulantem patienter audias. Contra alios digladiaris: aut facis calumniam, aut pateris. quos accusas, & a quibus accusaris, ordinis tui sunt: recte, an perperam, uos uideritis. mihi etiam uera accusatio contra fratrem displicet: nec reprehendo alios; sed dico, quid ipse non facerem. Tantis spatiis terrarum separatus quid peccavi in te? quid commerui? an quia Origenistam me non esse respondi? numquid defensio mea accusatio tua est? et tu si non es Origenistes, uel non fuisti; credo iuranti: si fuisti, suscipio penitentem. quid doles, si id sum, quod esse te dicis? An quia *πρὸς ἀρχιεπίσκοπον* Origenis libros post te transferre ausus sum, & interpretatio mea suggillatio putatur operis tui? Quid poterā facere? missa mihi est laudatio tua, id est, accusatio mea. tam fortiter me prolixèque laudaueras, ut, si tuis laudibus acquieuissem, omnes hæreticum me putarent. Vide, quid Romanæ ad me epistolæ clausula teneat: Purga suspensiones hominum, & conuince criminantem; ne, si dissimulaueris, consentire uidearis. Tali constrictus articulo, interpretaturus eosdem libros, ausculta, quid scripserim. Hoc mihi præstiterunt amici mei, (non dixi, amicus meus; ne te uiderer arguere) ut, si tacuero, reus, si respondero

dero, inimicus iudicer. dura utraque condicio: sed e duobus eligam, quod leuius est. Simultas redintegrari potest: blasphemia ueniam non meretur. Animaduertis, inuito mihi & repugnanti hoc onus impositum; & futuram ex huiusmodi opere similtatem, necessitatis excusatione curatam. Si interpretatus esses libros *αὐτῶν* absque meo nomine: recte quereretur, in reprehensionem tuam a me postea esse translatos. nunc autem iniuste doles, in eo opere a me tibi esse responsum, in quo a te laudando accusatus sum. quam enim tu laudem uocas, omnes accusationem intelligunt. Constet apud te, quod accusaueris: non indignaberis, quod responderim. Esto: tu bono animo scripseris; & homo innocens, & amicus fidissimus, de cuius numquam egressum est ore mendacium, me nescius uulneraris: quid ad me, qui percussus sum? num iccirco curari non debeo, quia tu me bono animo uulnerasti? Confossus iaceo: stridet uulnus in pectore: candida prius sanguine membra turpantur: & tu mihi dicis; Noli manum adhibere uulneri, ne ego te uidear uulnerasse? Quamquam & ipsa translatio magis Origenem, quam te, arguit. tu enim emendasti, quæ addita ab hæreticis arbitratus es: ego prodidi, quod ab illo scriptum Græcia uniuersa conclamat: quis rectius arbitratus sit, nec meum, nec tuum iudicium est: utriusque scripta censoriam lectoris uirgulam sentiant. Tota illa epistola, qua pro me satisfacio, contra hæreticos & accusatores meos dirigitur: quid ad te, qui & orthodoxum & laudatorem meum te esse dicis, si asperior sum in hæreticos, & illorum in publicum strophas profero? latere inuentione mea; ne, si dolueris, hæreticus esse uidearis. Quando sine nomine contra uitia scribitur; qui irascitur, accusator sui est. Prudentis hominis fuerat, etiam si dolebat, dissimulare conscientiam, & cordis nubilum frontis serenitate discutere. alioqui, si, quidquid contra Origenem & sectatores eius dicitur, in te dictum putas: ergo & epistolæ papæ Theophili, & Epiphani, & aliorum episcoporum, quas nuper ipsis iubentibus transtuli, te petunt, te lacerant. Imperatorum

torum quoque scripta, quæ de Alexandria, & Aegypto Origenitas pelli iubent, me suggerente dictata sunt. Ut Romanæ urbis pontifex miro eos odio detestetur, meum consilium fuit, ut totus orbis post translationem tuam in Origenis odia exarscit, quem antea simpliciter lectitabar, meus operatus est stylus. si tantum possum; miror, cur me non metuas. Ego ille moderatus in epistola publica, qui diligenter caui, ne quid in te dictum putares, scripsi ad te statim breuem epistolam, expostulans super laudibus tuis: quam, quia Romæ non eras, amici mei tibi mittere noluerunt, eo quod te dicerent cum sodalibus tuis indigna nomine Christiano de mea conuersatione iactitare: cuius exemplum huic uolumini subdidi; ut scias, quantum dolorem quanta moderatione necessitudinis temperaui. Audio præterea, te quædam de epistola mea philosophice carpere, & hominem rugosæ frontis, adductiq. supercilii, Plautino in me sale ludere, eo quod Barrabam Iudæum dixerim præceptorem meum. Nec mirum, si pro Barhanina, ubi est aliqua uocabulorum similitudo, scripseris Barrabam: cum tantam habeas licentiam nominum immutandorum, ut de Eusebio Pamphilum, de hæretico martyrem feceris. caueendus homo, & mihi maxime declinandus; ne me repente, dum nescio, de Hieronymo Sardanapalum nomines. Audi ergo sapientiæ columen, & norma Catonianæ severitatis. Ego non illum magistrum dixi, sed meum in scripturas sanctas studium uolui comprobare: ut ostenderem me sic legisse Origenem, quo modo & illum audieram. neque enim Hebræas litteras a te discere debui. An iniuria tibi facta est, quod pro te Apollinarium, Didymumq. sectatus sum? Numquid in illa epistola Gregorium, uirum eloquentissimum, non potui nominare, qui sui apud Latinos impar est, quo ego magistro gloriator, & exulto? Sed eos tantum posui, qui in reprehensione erant: ut similiter me Origenem non ob fidei ueritatem, sed ob eruditionis meritum legisse testarer. Ipse Origenes, & Clemens, & Eusebius, atque alii complures, quando de scripturis aliqua disputant, &

uolunt

uolūt approbare quod dicūt, sic solent scribere: Referebat mihi Hebræus: &, Audiui ab Hebræo: &, Hebræorū ista sententia est. Certe etiam Origenes patriarchen Huillum, qui temporibus eius fuit, nominat; & tricesimum tomum in Esaïam, in cuius fine edisserit, Væ tibi ciuitas Ariel, *Esa. 29* quam expugnauit Dauid, illius expositione concludit; ut, cum aliter prius sensisse se dicat, doctum ab illo, id quod est uerius, confitetur. Octogesimum quoque nonum psalmum, qui scribitur, Oratio Moyfi, hominis Dei, & reliquos undecim, qui non habent titulos, secundum Huilli expositionem, eiusdem Moyfi putat: nec dedignatur, Hebræam scripturam interpretans, per singula loca, quid Hebræis uideatur, inferere. Lectis nuper papæ Theophili epistolis, in quibus Origenis exponit errores, dicitur obturasse aures suas, & auctorem tanti mali clara coram omnibus uoce damnaſſe; & dixisse, usque ad illud tempus se ignorasse, quod tam nefaria scripserit. Nō recuso; nec dico, quod alius diceret forsitan, non potuisse eum ignorare, quod interpretatus est: cuius apologiam scriptā ab hæretico sub nomine martyris edidit: cuius defensionem etiam proprio uolumine professus est: aduersum quod in sequentibus, si dictandi spatium fuerit, disputabo. hoc loquor, cui contradicere non potest. Si illi licet non intellexisse, quod transtulit: quare mihi non liceat ignorasse libros *αρχων*, quos ante non legi; & eas tantum homilias legisse, quas transtuli; in quibus nihil esse mali, ipsius testimonium est? Sin autem contra sententiam suam nunc me in eis arguit, in quibus ante laudauerat; undique strictus tenebitur. aut enim iccirco me hæreticū hominem laudauit, quia eiusdem mecum dogmatis erat: aut nunc frustra inimicus accusat, quena prius ut orthodoxum prædicauit. Sed forsitan tunc errores meos quasi amicus tacuit; & nunc iratus profert, quod prius celauerat. Quamquam non mereatur fidem inconstantia, & professæ inimicitæ suspicionem habeant mendacii: tamen audacter conferam gradum, uolens scire quid hæreticum scripserim: ut aut cum illo agam pœnitentiam, & Ori

E e e genis

genis mala ignorasse me iurem, ac nunc primum a papa Theophilo didicisse impietates eius; aut certe doceam, me quidem bene sensitisse, sed illum more suo non intelligere. neque enim fieri potest, ut in eisdem ad Ephesios libris, quos, ut audio, criminatur, & bene & male dixerim; & de eodem fonte dulce amarumq. processerit; ut qui toto opere damnauerim eos, qui credunt animas ex angelis conditas, subito mei oblitus id defenderem, quod ante damnatum. Stultitiam mihi obicere non potest, quem disertissimum, & eloquentissimum in suis opusculis predicauit. alioqui stulta uerboſitas, fabulæ potius, & garruli hominis, quam eloquentis, putanda est. Quid in illis libris proprie accuset, ignoro. fama enim ad me criminum eius, non 1. Cor. 9 scripta uenerunt: & stultum est, iuxta Apostolum, pugnis aerem uerberare. tamen in incertum respondebo, donec ad certa perueniam. ἀντίπαλον meum docebo senex, quod puer didici, multa esse genera dictionum, &, pro qualitate materiæ, non solum sententias, sed & scripturarum uerba uariari. Chrysippus & Antipater inter spineta uersantur. Demosthenes & Aeschines contra se inuicem fulminant. Lysias & Isocrates dulciter fluunt. mira in singulis diuersitas: sed omnes in suo perfecti sunt. Lege ad Herennium Tullii libros, lege rhetoricos eius: aut, quia illa sibi dicit inchoata & rudia excidisse de manibus, reuolue tria uolumina de Oratore, in quibus introducit eloquentissimos illius temporis oratores, Crassum & Antonium disputantes; & quartum Oratorem, quem iam senex scribit ad Brutum: tunc intelliges, aliter componi historiam, aliter orationes, aliter dialogos, aliter epistolas, aliter commentarios. Ego in commentariis ad Ephesios sic Origenem, & Didymum, & Apollinarium secutus sum, qui certe contraria inter se habent dogmata, ut fidei mex non amitterem ueritatem. commentarii quid operis habent? alterius dicta edisserunt: quæ obscure scripta sunt, plano sermone manifestant: multorum sententias replicant, & dicunt: Hunc locum quidam sic edisserunt: alii sic interpretantur: illi

illi sensum suum & intelligentiam his testimoniis , & hac nituntur ratione firmare : ut prudens lector, cum diuersas explanationes legerit, & multorum uel probanda, uel improbanda didicerit, iudicet quid uerius sit, &, quasi bonus trapezita, adulterinæ monetæ pecuniam reprobet. Num diuersæ interpretationis & contrariorum inter se sensuum te nebitur reus, qui in uno opere, quod edisserit, expositiones posuerit plurimorum ? Puto quod puer legeris Aspri in Virgilium & Sallustium commentarios, Volcatii in orationes Ciceronis, Victorini in dialogos eius, & in Terentii comœdias præceptoris mei Donati, æque in Virgilium, & aliorum in alios, Plautum uidelicet, Lucretium, Flaccum, Persium, atque Lucanum. argue interpretes eorum, quare nō unam explanationem secuti sint, & in eadem re quid uel sibi, uel aliis uideatur, enumerent. Prætermitto Græcos, quorum tu iactas scientiam, &, dum peregrina sectaris, pene tui sermonis oblitus es : ne, ueteri prouerbio, sus Mineruam docere uidear, & in siluam ligna portare. Illud miror, quod Aristarchus nostri temporis puerilia ista nescieris. Quamquam tu occupatus in sensibus, & ad struendam mihi calumniam cernuus, grammaticorum & oratorum præcepta contempseris, parui pendens *ὑπέρβαρα* post anfractus reddere, asperitatem euitare consonantium, hiulcam fugere dictionem. Ridiculum est, debilitati & fracti totius corporis uulnera pauca monstrare. Non eligo, quod reprehendam : eligat ipse, quod uitio careat. Ne illud quidem Socraticum nosse debuerat : scio quod nescio. Nauem agere ignarus nauis timet. Abrotanum ægro Non audet, nisi qui didicit, dare. Quod medicorum est, Promittunt medici : tractant fabrilis fabri. Scribimus indocti, doctiq. poemata passim. Nisi forte se litteras non didicisse iurabit : quod nos illi & absque iuramento perfacile credimus. uel ad Apostolum confugiet profitentem : Etsi imperitus sermone, non tamen scientia. Ille Hebræis litteris eruditus, & ad pedes doctus Gamalielis, quem non erubescit, iam apostolicæ dignitatis, magistrum dicere, Græcam facundiam contemnebat, 2. Cor. 11
Act. 22

Ecc 2 uel

uel certe, quod erat humilitatis, dissimulabat: ut prædicationis eius non in persuasione uerborum, sed in signorum uirtute consisteret: spernens alienas opes, qui in suis diues erat: quamquam ad imperitum, & per singulas instar tui sententias corruentem, numquam pro tribunali sedens Festus diceret: infans Paule, infans: multæ te litteræ ad insaniam conuertunt. Tu, qui in Latinis mussitas, & testudineo gradu moueris potius, quam incedis, uel Græce debes scribere, ut apud homines Græci sermonis ignaros aliena scire uidearis; uel, si Latina tentaueris, ante audire grammaticum, ferulæ manum subtrahere, & inter paruulos *ἀδελφὸν ἐπαινεῖν*, artem loquendi discere. Quamuis Cræsos quis spiret, & Darios: litteræ marsupium non sequuntur: sudoris comites sunt, & laboris, sociæ ieiuniorum, non saturitatis, continentie, non luxuriæ. Demosthenes plus olei, quam uini, expendisse dicitur, & omnes opifices nocturnis semper uigiis præuenisse. Quod ille in una littera fecit exprimenda, ut a cane rho disceret: tu in me criminaris, quare homo ab homine Hebræas litteras didicerim. Inde est, quod quidam inerudite sapientes remanent, dum nolunt discere quod ignorant: nec Horatium audiunt commonentem: Cur nescire pudens prauæ, quam discere malo? Loquitur & sapientia, quam sub nomine Salomonis legimus: In maleuolam animam numquam intrabit sapientia, nec habitabit in corpore subdito peccatis. Spiritus enim sanctus eruditionis fugiet dolum, & recedet a cogitationibus stultis. Aliud est, si, uulgi lectione contenti, doctorum aures despiciunt, & contemnunt illud elogium, quo procax imperitia denotatur: Non tu in triuiis indocte solebas Stridenti miserum stipula disperdere carmen? quasi non cirrhatum turba, Milesiorum in scholis figmenta decantet; & testamentum suis, Bessorum cachinno membra concutiat, atque inter scurrarum epulas nugæ illiusmodi frequententur. Quotidie in plateis fictus hariolus stultorum nares uerberat, & obtorto scorpione, dentes mordentium quatit: & miramur, si imperitorum libri lectorem inueniant? Indignantur,

tur , quare Origenistas scripserim inter se orgiis mendaciorum fœderari . Nominavi librum , in quò hoc scriptum legerim , idest , sextum Stromateon Origenis : in quo Platonis sententiæ nostrum dogma componens , ita loquitur Plato in tertio de republica libro : Veritas quoque sectanda magnopere est . Si enim , ut paulo ante rectissime dicebamus , Deo indecens , & inutile mendacium , est hominibus quandoque utile , ut utantur eo quasi condimento atque medicamine : nulli dubium est , quin huiusmodi licentia medicis danda sit , & ab imprudentibus remouenda . Vera , inquit , asseris . ergo principes urbium , si quibus & aliis hoc conceditur , oportet aliquando mentiri uel contra hostes , uel pro patria , & ciuibus . ab aliis uero , qui uti mendacio nesciunt , auferendum est omne mendacium . Origenes . Et nos igitur illius præcepti memores : Loquimini ueritatem unusquisque cum proximo suo : non debemus dicere , quis est proximus meus ? sed considerare , quo modo philosophus caute dixerit : Deo indecens & inutile esse mendacium , hominibus interdum utile : & quod ne pro dispensatione quidem putandus sit Deus aliquando mentiri . Sin autem commodum audiētis exegerit : uerbis loquitur ambiguus , & per ænigmata , quæ uult , profert : ut & ueritatis apud enim dignitas conseruetur ; & , quod noxium esse poterat , si nudum proferretur in uulgus , quodam tectum uelamine proferatur . Homo autem , cui incumbit necessitas mentiendi , diligenter attendat , ut sic utatur interdum mendacio , quo modo condimento , atque medicamine ; ut seruet mensuram eius , ne excedat terminos , quibus usa est Iudith contra Holofernem , & uicit eum prudenti simulatione uerborum . Imitetur Hester , quæ Artaxerxis sententiam diu tacita gentis ueritate correxit : et in primis patriarcham Iacob , quem legimus benedictiones patris artificii impetrasse mendacio . Ex quo perspicuum est , quod , nisi ita mentiti fuerimus , ut magnum nobis ex hoc aliquod quærat bonum , iudicandi simus quasi inimici eius , qui ait : Ego sum ueritas . Hæc Origenes scripsit , negare non possumus ; scripsit in iis

Eph. 4

Iud. 11

Hester 2

Gen. 27

E e e 3 libris,

libris, quos ad perfectos & ad discipulos loquebatur; docetq. magistris mentiendum, discipulos autem non debere mentiri. Qui ergo bene mentitur, & absque ulla uerecundia, quidquid in buccam uenerit, confingit in fratres; magistrum se optimum probat. Illud quoque carpere dicitur, quod secundum psalmum interpretans, pro eo quod legimus in Latino, apprehendite disciplinam, & in Hebraico uolumine scriptum est *נשקבו בן* nascu bar, dixerim in commentariolis meis, adorete filium. Et rursus onine psalterium in Romanum uertens sonum, quasi immemor expositionis antiquæ posuerim, adorete pure: quod utique sibi esse contrarium omnibus patet. Et reuera ignoscendum est ei, si ignoret linguæ Hebraicæ ueritatem, qui interdum & in Latinis hæsitat. *נשקבו* nascu, ut uerbum de uerbo interpreter, *κατασκιάσατε*, idest, deosculamini dicitur: quod ego nolens transferre putide, sensum magis secutus sum, ut dicerem, adorete. quia enim, qui adorant, solent deosculari manum, & capita submittere, quod se beatus Iob elementis & idolis fecisse negat, dicens: si uidi solem cum fulgeret, & lunam incedentem clare; & lætatum est in abscondito cor meum, & osculatus sum manum meam ore meo: quæ iniquitas maxima est, & negatio contra Deum altissimum: & Hebræi, iuxta linguæ suæ proprietatem, deoscultationem pro ueneratione ponunt: id transuli, quod ipsi intelligunt, quorum uerbum est. *נשקבו* bar autem apud illos diuersa significat. dicitur enim & filius, ut est illud: Bariona, *Matth. 10* filius columbæ, & Barptolemaeus, filius Ptolemæi, & Bar-
Marc. 10 thimæus, & Bariheu, & Barrabas. Triticū quoque, & spica
Act. 13 rum fasciculus, & electus, ac purus. Quid igitur peccauī, si
Joan. 18 uerbum ambiguum diuersa interpretatione cōueri? & qui in commentariolis, ubi libertas est differendi, dixeram; adorete filium in ipso corpore; ne uiolentus uiderer interpreter, & Iudaicæ calumniæ locum darem, dixerim: adorete pure, siue electe: quod Aquila quoque, & Symmachus transulerunt. Quid ergo ecclesiasticæ fidei nocet, si doceatur lector, quot modis apud Hebræos unus uersiculus explane-

planetur? Origeni tuo licet tractare μετεμύχων, innumerabiles mundos introducere, & rationabiles creaturas aliis atque aliis uestire corporibus; Christumq. dicere sæpe passum, & sæpius passurum; ut, quod semel profuit, semper prosit assumptum: tibi quoque ipse tantam assumis auctoritatem, ut de hæretico martyrem, de Origenis libris hæreticorum adulteria mentiaris: mihi non licebit disputare de uerbis, & in commentariorum opere Latinos docere quod ab Hebræis didici: nisi enim & prolixum esset, & redoleret gloriolam: iam nunc tibi ostenderem, quid utilitatis habeat magistrorum limina terere, & artem ab artificibus discere: & uideres, quanta silua sit apud Hebræos ambiguum nominum, atque uerborum. quæ res diuersæ interpretationi materiam præbuit; dum unusquisque interdubia, quod sibi conuenientius uideretur, hoc transfert. Quid ad peregrina te mitto? Reuolue Aristotelem, & Alexandrum, Aristotelis uolumina differentem: & quanta ambiguum sit copia, eorum lectione cognosces: ut tandem desinas amicum tuum in eo reprehendere, quod ne per somnium quidem aliquando didicisti. Sed, quia Paulinianus, frater meus, de commentariis ad Ephesios quædam ab eo reprehensa narrauit, & pauca ex his memoriæ tradidit, mihiq. ipsa demonstrauit loca: non debeo subterfugere; quæsoq. lectorem, ut, si paululo in proponendis & diluendis criminibus longior fuero, necessitati det ueniam. non enim alterum accuso, sed me nitor defendere, & obiectam hæreseos calumniam refutare. In epistolam Pauli ad Ephesios tria Origenes scripsit uolumina: Didymus quoque & Apollinarius propria opuscula condidere: quos ego uel transferens, uel imitans, quid in prologo eiusdem operis scripserim, subiiciam. Illud quoque in præfatione commoneo, ut sciatis Origenem tria uolumina in hanc epistolam conscripsisse, quem & nos ex parte secuti sumus; Apollinarium etiam, & Didymum quosdam commentariolos edidisse. ex quibus licet pauca decerpimus: & nonnulla, quæ nobis uidebantur, adiecimus, siue subtraximus: ut studiosus sta-

Ecc + tim

zim in principio lector agnoscat, hoc opus uel alienum esse, uel nostrum. Quidquid ergo in explanatione huius epistolæ uitii potuerit demonstrari: si ego illud in Græcis uoluminibus, unde in Latinum uertisse me dixi, ostendere non potuero; crimen agnoscam; & meum erit, quod alienum nō fuerit. tamen, ne rursus uidear cauillari, &, hac excusationis strophæ, gradum non audere conferre: ponam ipsa testimonia, quæ uocantur in crimen. In primo statim uolumine testimonium Pauli, in quo loquitur, Sicut elegit in ipso nos ante constitutionem mundi; ut essemus sancti & immaculati coram ipso: sic interpretati sumus, ut electionem non iuxta Origenem eorum diceremus, qui prius fuerant, sed ad Dei præscientiam referremus. Denique diximus: Quod autem electos nos, ut essemus sancti & immaculati coram ipso, hoc est Deo, ante fabricam mundi, testatus est; ad præscientiam Dei pertinet; cui omnia futura iam facta sunt; &, ante quam fiant, uniuersa sunt nota. sicut

Eph. 1 & Paulus ipse prædestinatur in utero matris suæ: & Hieronimus in uulua sanctificatur, eligitur, roboratur, & in typo Christi propheta gentibus mittitur. Certe in expositione ista nullum crimen est: &, Origene dicente contraria, nos ecclesiasticum sensum secuti sumus. Et, quia commentatoris est officium, multorum sententias ponere; & hoc me facturū in præfatione promiseram: etiam Origenis absque inuidia nominis eius explanationem posui, dicens: Alius uero, qui Deum iustum conatur ostendere, quod non ex præiudicio scientiæ suæ, sed ex merito electorum unumquē que eligat, dicit, ante uisibiles creaturas, cælum, terram, maria, & omnia, quæ in eis sunt, fuisse alias inuisibiles creaturas, in quibus & animas, quæ ob quasdam causas, soli Deo notas, deiectæ sunt deorsum in uallem lacrymarum, in locum afflictionis & peregrinationis nostræ, in quo sanctus constitutus orabat, ut ad sedem pristinā reuerteretur,

Psal. 119 dicens: Hei mihi, quia incolatus meus prolōgatus est, habi-

Rom. 7 tau cum habitantibus Cedar, multū peregrinata est anima mea.

Philip. 1 Et Apostolus; Miser ego homo, quis me liberabit de cor-

corpore mortis huius? Et, Melius est reuerti, & esse cū Christo. Et alibi: Ante quā humiliarer, ego peccaui: & cetera *Psal. 118*
 his similia, quæ longū est scribere. Animaduerte, quid dixerim: Alius uero, qui Deū iustū conatur ostendere. conatur ostēdere inquā, nō ostendit. Sin autem in eo scandalū patris, quare latissimā Origenis disputationem breui sermone comprehenderim, & lectori sensum eius aperuerim; atque ex eo tibi occultus illius uideor esse sectator, quia nihil ab eo dictum prætermiserim: uide, ne hoc iccirco fecerim, ut uestram calumniam declinarem: ne me diceretis, quæ ab eo fortiter sunt dicta, tacuisse, & illum in Græco robustius disputare. posui ergo omnia, licet breuius, quæ in Græco reperi: ut nihil haberent discipuli eius noui, quod Latinorum auribus ingererent. facilius enim nota, quam repentina, cōtemnimus. Exposita autem interpretatione eius, quid in fine capituli dixerimus, ausculta. Non enim ait Apostolus, *Psal. 124*
 Elegit nos ante constitutionem mundi, cum essemus sancti & immaculati: sed, Elegit nos, ut essemus sancti, & immaculati: hoc est, qui sancti, & immaculati ante non fuimus, ut postea essemus. quod & de peccatoribus ad meliora conuersis dici potest: & stabit illa sententia: Non iustificabitur in conspectu tuo omnis uiuens: id est, in tota uita sua, in omni, quo in mundo isto uersatus est, tempore. Quod quidem ita intellectum, & aduersum eum facit, qui, ante quā mundus fieret, animas dicit esse electas propter sanctitatem, & nullum uitium peccatorum. Non enim, ut antequam diximus, eliguntur Paulus, & qui ei similes sunt, quia erant sancti & immaculati, sed eliguntur, & prædestinantur: ut in consequenti uita per opera, atque uirtutes sancti, & immaculati fiant. Et audet quisquam, post huiusmodi sententiā, nos Origenis hæreseos accusare? Decem & octo ferme anni sunt, ex quo istos dictaui libros, eo tempore, quo Origenis nomen florebat in mundo, quo *αὐτὸν ἀπὸ τοῦ* illius opus latinæ aures ignorabant: & tamē professus sum fidem meā, &, quid mihi displiceret, ostendi. ex quo, etiam si in ceteris aliquid hæreticum monstrare potuisset inimicus, non tã dogma-

dogmatum peruersorum; quæ & hic, & in aliis libris sæpe damnaui, quam improvidi tenerer erroris. Secundum locum, quem mihi ab eo reprehensum frater ostendit, quia ualde friuolus est, & apertam sui præfert calumniam, ponā breuiter. In eo testimonio, ubi Paulus loquitur: Sedere eū faciens ad dexteram suam in cælestibus, super omnem principatum, & potestatem, & uirtutem, & dominationem, & omne nomen, quod nominatur non solum in hoc sæculo, sed etiam in futuro, post multiplicem expositionem, cum ad ministrorum Dei officia peruenissem, & de principatibus, ac potestatibus, & uirtutibus, ac dominationibus dicerem, etiam hoc addidi: Necessè est, ut subiectos habeant, & timentes se, & seruientes sibi, & eos, qui a sua fortitudine roborentur. Quæ distributiones officiorum non solum in præsentiarum, sed etiam in futuro sæculo erunt: ut per singulos profectus, & honores, ascensiones, & descensiones uel crescat aliquis, uel decrescat, & sub alia atque alia potestate, uirtute, principatu, & dominatione fiat. Et post exemplum terreni regis, totamq. palatii descriptionem, per quā diuersa ministeriorum Dei officia demonstrabam, addidi: Et putamus Deum, dominum dominorum, regemq. regnātium, simplici tantum ministerio esse contentum? Quo modo archangelus non dicitur, nisi qui prior est angelorum: sic principatus, & potestates, & dominationes non appellantur, nisi subiectos aliquos habeant, & inferioris gradus. Sin autem putat iccirco me Origenē sequi, quia profectus, & honores, ascensiones, & descensiones, incrementa, & imminutiones, in expositione mea posui: sciat multum interesse, de angelis & seraphim & cherubim dicere demones & homines fieri, quod affirmat Origenes; & ipsos inter se angelos diuersa officiorum genera esse sortitos, quod Ecclesiæ non repugnat: quo modo & inter homines ordo dignitatum ex laboris uarietate diuersus est, cum episcopus, & presbyter, & omnis ecclesiasticus gradus habeat ordinem suum; & tamen omnes homines sunt; sic & inter angelos merita esse diuersa, & tamen in angelica omnes

omnes persistere dignitate, nec de angelis homines fieri, nec rursus homines in angelos reformari. Tertius est reprehensionis locus, quod, dicente Apostolo: Ut ostende- *Eph. 2*
ret in sæculis superuenientibus abundantes diuitias gratiæ suæ in bonitate super nos in Christo Iesu: nos triplicem expositionem posuimus; in prima, quid nobis uideretur; in secunda, quid Origenes opponeret; in tertia, quid Apollinarius simpliciter explanaret. Quorum si nomina non posui, ignosce uerecundiæ meæ. non debui eos carpere, quos imitabar ex parte, & quorum in Latinam linguam sententias transferebam. sed dixi, Qui diligens lector est, statim requiret, & dicet: & rursus in fine: Alius uero hoc, quod ait, ut ostenderet in sæculis superuenientibus abundantes diuitias gratiæ suæ, ad illam intelligentiam transfert. Ecce, inquires, sub diligentis lectoris persona Origenis sententias explicasti. Fateor errorem: non debui diligentem dicere, sed blasphemum: quod si fecissem, & aliquo scissem uaticinio te istiusmodi nœnias sectaturum; etiã calumniæ uerba uitassem. Grande crimen, si Origenem diligentem dixi esse lectorem: cuius septuaginta libros interpretatus sum: quem in cælum laudibus tuli: pro quo compulsi sum ante biennium breui libello tuis cōtra me præconiis respondere. Ecclesiarum magistrum a me dictum esse Origenem, in tuis laudibus obiicis: & putas, quod pertimescere debeam, si, diligentem lectorem me illum dixisse, inimicus accuses. Solemus & negotiatores parcissimos, & frugi seruos, & molestos pædagogos, & argutissimos fures, diligentes uocare. et in euangelio uillicus iniquitatis prudenter quædam *Luc. 16*
fecisse dicitur: & prudentiores sunt filii huius sæculi filiis lucis in generatione sua: & serpens sapientior erat omnibus bestiis, quas fecit Dominus super terram. Quartus reprehensionis locus exordium secundi libri possidet, in quo hoc *Gen. 3*
Pauli testimonium exposuimus: Huius rei gratia ego Paulus uinctus Iesu Christi pro uobis gentibus. & quia per se locus ipse manifestus est, eam tantum partem ponam explanationis, quæ patet calumniæ. Vinctum Christi Iesu *Eph. 3*
Paulum

Paulum esse pro gentibus, potest & de martyrio intelligi; quod, Romæ in uincula coniectus, hanc epistolam miserit, eo tempore, quod ad Philemonem, & ad Colossenses, & Philipenses, in alio loco scriptas esse monstrauimus. Vel certe, quia in plurimis locis lectum est, uinculum animæ corpus hoc dici, quo quasi clausa teneatur in carcere; dicimus, propterea Paulum corporis nexibus coerceri, nec reueri, & esse cum Christo, ut perfecta in gentes per eum prædicatio impleatur. licet quidam alium sensum in hoc loco introducant, quod Paulus prædestinatus & sanctificatus ex utero matris suæ ad prædicationem gentium, ante quam nasceretur, postea uincula carnis acceperit. Et in hoc loco triplicem, ut supra, expositionem posui; in prima, quid mihi uideretur; in secunda, quid Origenes assereret; in tertia, quid Apollinarius contra illius uadens dogmata sentirent. Lege Græcos commentarios; & nisi ita reperiatis, crimen fatebor. Quod est in isto loco peccatum meum? Illud nimirum, pro quo supra respondi, quare non eos, a quibus dicta sunt, nominarim. Superfluum erat, per singula Apostoli testimonia, eorum nomina ponere, quorum me opuscula translaturum, in præfatione signaueram. Et tamen, uinctam dici animam corpore, donec ad Christum redeat, & in resurrectionis gloria, corruptiui & mortale corpus incorruptione & immortalitate commutet, non absurdæ intelligentiæ est. Vnde &

Rom. 7 Apostolus, Miser ego, inquit, homo, quis me liberabit de corpore mortis huius? Corpus mortis appellans, quod uitiis, & morbis, & perturbationibus, ac morti subiaceat, donec cum Christo resurgat in gloria, & fragile prius lutum excoquatur feruore Spiritus sancti in testam solidissimam, demutans gloriam, non naturam. Quintus locus ualidissimus est, in quo exponentes illud Apostoli testimonium:

Eph. 4 Ex quo totum corpus compactum, & conglutinatum per omnem iuncturam subministrationis, secundum operationem in mensuram uniuscuiusque membri augmentum corporis facit in ædificationem sui in caritate, latissimam Origenis

genis expositionem, & eisdem sensus per diuersa uerba uoluentem, breui sermone constrinximus, nihil exemplis & assertionibus illius auferentes. Cumq. peruenissemus ad finem, hæc subiecimus. Igitur & in restitutione omnium, quando corpus totius Ecclesiæ nunc dispersum, atque laceratum, uerus medicus Christus Iesus sanaturus aduenerit, unusquisque secundum mensuram fidei & agnitionis filii Dei, quem ideo agnoscere dicitur, quia prius nouerat, & postea nosse desit, suum recipiet locum, & incipiet id esse, quod fuerat; ita tamen, ut non, iuxta hæresim aliam, omnes in una ætate sint, idest, omnes in angelos reformatur; sed unumquodque membrum iuxta mensuram & officium suum perfectum sit: uerbi gratia, ut angelus refuga id esse incipiat, quod creatus est: ut homo, qui de paradiso fuerat eiectus, ad culturam iterum paradisi restituatur: & reliqua. Miror te, hominem prudentissimum, non intellexisse artem expositionis meæ. quando enim dico: Ita tamen, ut non, iuxta aliam hæresim, omnes in una ætate sint positi, idest, omnes in angelos reformatur: ostendo, & ea, de quibus disputo, esse hæretica, & ab alia hæresi discrepare. Quæ sunt ergo duæ hæreses? una, quæ dicit omnes rationabiles creaturas in angelos reformari; altera, quæ asserit unumquodque in restitutione mundi id fore, quod conditum est. uerbi gratia: quia ex angelis dæmones sunt, rursus dæmones angelos fieri: & animas hominum, ita ut sunt conditæ, non in angelos, sed in id, quod a Deo sunt conditæ, reformari; ut & iusti, & peccatores æquales fiant. Denique, ut scias me non meam explicasse sententiam, sed inter se hæreses comparasse, quarum utramque in Græco legeram, disputationem meam hoc fine complui. Iccirco, ut supra diximus, hæc apud nos obscuriora sunt, quia μεταφορικῶς dicuntur in Græco: & omnis metaphora, si de alia in aliam linguam transferatur ad uerbū, quibusdam quasi sentibus, orationis sensus & germina suffocantur. Nisi hæc eadem in Græco reperiatis; quidquid dictum est, meum putato. Sextum, quod & extremum mihi obiiicere

Eph. 5 obiicere dicitur; si tamen nihil in medio frater oblitus est; cur illum locum Apostoli interpretans, ubi ait: Qui uxorem suam diligit, se ipsum diligit: Nemo enim umquam suam carnem odit, sed nutrit & fouet eam, sicut & Christus Ecclesiam: post simplicem expositionem, Origenis posuerim quaestionem, ex cuius persona tacito nomine dixerim: Opponi nobis potest, quod non sit uera sententia dicentis Apostoli: Nemo umquam carnem suam odit: cū, morbo regio laborantes, phthisi, & cancro, & destillationibus, mortem uitæ præferant, & sua oderint corpora: & statim, quid ipse sentirem, adiunxi: Magis itaque ad tropicam intelligentiam sermo referatur. Quando dico, Tropicam; doceo, uerum non esse, quod dicitur, sed allegoriæ nubilo figuratum. Ponamus tamen ipsa uerba, quæ in Origenis libro tertio continentur: dicamus, quod illam carnem, quæ uisura sit salutare Dei, anima diligat, & nutriet, & foueat eam, disciplinis erudiens, & cælesti saginans pane, & Christi sanguine irrigans; ut refecta, & nitida, possit libero cursu uirum sequi, & nullo debilitatis pondere prægrauari. Pulchre etiam in similitudinem Christi nutrientis & fouentis Ecclesiam, & dicentis ad Hierusalem: Quo

Matth. 23 ties uolui congregare filios tuos, ut gallina congregat pullos suos sub alas suas, & noluisti? animæ quoque fouent corpora sua, ut corruptiuium hoc induat incorruptionem, & alarum leuitate suspensum in aerem facilius subleuetur. Foueamus igitur & uiri uxores nostras, & animæ nostræ corpora: ut & uxores in uiros, & corpora redigantur in animas, & nequaquam sit sexuum ulla diuersitas: sed, quomodo apud angelos non est uir & mulier, ita & nos, qui similes angelis futuri sumus, iam nunc incipiamus esse, quod nobis in cælestibus repromissum est. Supra simplicem expositionem, quæ nobis in testimonio isto esse uidebatur, expressimus, dicentes: Quantum ad simplicem intelligentiam pertinet, sancta inter uirum & uxorem caritate præcepta, nunc iubemur, ut nutriamus & foueamus coniuges; ut scilicet eis uictum, & uestitum, & ea, quæ sunt necessaria,

ria, præbeamus. Hæc nostra sententia est. Igitur omne, quod sequitur deinceps, & opponi nobis potest, ostendimus non ex nostra, sed ex contradicentium intelligi debere persona. Quæ cum sit breuis & absoluta responsio, & iuxta id, quod supra diximus, etiam allegoriæ umbris, de eo, quod est, ad id, quod non erat, deprauata: tamen accedam propius; & sciscitabor, quid tibi in hac disputatione displiceat; nempe, quia dixerim, animas ut uiros fouere quasi uxores corpora sua; ut corruptium hoc induat incorruptionem, & alarum leuitate suspensum in aerem facilius subleuetur. Quando dico, Corruptium hoc induat incorruptionem; non muto naturam corporum, sed augeo gloriam. Necnon, quod sequitur; Alarum leuitatem suspensum in aerem facilius subleuetur: qui alas assumit, idest immortalitatem, ut leuius ad cælum uolet, non perdit esse quod fuerat. Sed dices: mouent me, quæ sequuntur: Foueamus igitur & uiri uxores, & animæ nostræ corpora; ut & uxores in uiros, & corpora redigantur in animas; & nequaquã sit sexuum ulla diuersitas; sed, quo modo apud angelos non est uir, neque mulier, ita & nos, qui similes angelis futuri sumus, iam nunc incipiamus esse in terris, quod nobis in cælestibus repromissum est. Recte mouerent, nisi post priora dixissem, Iam nunc incipiamus esse, quod nobis in cælestibus repromissum est. Quando dico, hic esse incipiamus in terris, naturam non tollo sexuum, sed libidinem & coitum uiri & uxoris aufero, dicente Apostolo: Tēpus breue est: *1. Cor. 7* reliquū est, ut & qui habent uxores, sic sint, quasi non habeant. Et Dominus interrogatus in euangelio, cuius de septē fratribus in resurrectione esse deberet uxor, ait: Erratis, nescientes scripturas, neque uirtutem Dei: in resurrectione enim neque nubent, neque nubentur, sed erunt sicut angeli Dei in cælo. Et reuera ubi inter uirum & mulierem castitas est; nec uir incipit esse, nec femina; sed, adhuc in corpore positi, mutantur in angelos; in quibus non est uir, neque mulier. Quod & in alio loco ab eodem Apostolo dicitur: Quicumque in Christo baptizati estis, Christū induistis *Gal. 3*

stis : non est Iudæus, neque Græcus ; non est seruus , neque liber ; non est masculus , neque femina . omnes enim unum uos estis in Christo Iesu . Sed , quoniam de confragolis & asperis locis enauigauit oratio , & hæreseos crimen impat- tum tota frontis libertate repulimus ; ad alias eius accusa- tionis partes , quibus nos mordere nititur , transeamus . E quibus prima est , me hominem maledicum , omnium de- tractorem , in præcessores meos genuinum semper infringe- re . Det unum, cuius in opusculis meis nomen taxauerim , uel quem , iuxta artem illius, figurata laude perstrinxerim . sin autem contra inuidos loquor ; & L . Lauinium, uel Asi- nium Pollionem, de genere Corneliorum, styli mei mucro conuulnerat ; si histricosæ & liuidæ mentis hominem a me submoueo , & ad unum stipitem cuncta iacula dirigo : quid uulnera sua partitur in multos ? quid ex impatientia respon- dendi ostendit se esse , qui petitur ? Obiicit mihi mixtum periurium sacrilegio , quod in libro , quo ad instituendam Christi uirginem loquor, ante tribunal iudicis dormiens pol- licitus sim , numquam me litteris secularibus daturum ope- ram , & nihilominus damnatæ eruditionis interdum memi- nerim . Nimirum ille est sallustianus Calpurnius , qui nobis per magnum oratorem non magnam mouerat quæstionē : cui libello breui satisfacimus . nunc , quod instat , pro sacri- legio atque periurio somnii respondendum est . Dixi , me sæculares litteras deinceps non lecturum : de futuro spon- sio est , non præteritæ memoriæ abolitio . Et quo modo , in- quies , tenes , quod tanto tempore non relegis ? Rursum, si aliquid de ueteribus libris respondero , & dixerō : Adeo in teneris consuescere multum est : dum renuo, crimen incur- ro ; & , pro me testimonium proferens , hoc ipso arguor , quo defendor . Scilicet nunc longo sermone texendum est , quod probant conscientix singulorum . Quis nostrum non meminit infantix suæ ? Ego certe , ut tibi homini seuerissi- mo risum moueam , & imiteris aliquando Crassum , quem semel in uita dicit risisse Lucilius ; memini me puerum cursi- tasse per cellulas seruulorum, diem feriatum duxisse lusibus, & ad

& ad Orbiliū seuientem de auix sinu tractum esse capti-
uium . Et, quo magis stupeas, nunc, cano & recaluo capite,
sepe mihi uideor in somnis comatulus; &, sumpta toga,
ante rhetorem controuerfioā declamare . cunq. experre-
ctus fuero, gratulor me dicendi periculo liberatum . Crede
mihi, multa ad purum recordatur infantia . Si litteras didi-
cisses; oleret testa ingenioli tui, quo semel fuisset imbuta .
Lanarum conchyliā nullæ aquæ diluunt . Etiam asini & bru-
ta animalia, quamuis in longo itinere nouerunt secundo di-
uerticula . Miraris, si ego litteras Latinas non sum oblitus,
cum tu Græcas sine magistro didiceris? Septem modos cō-
clusionum dialectica me elementa docuerunt, quid signifi-
cet ἀλογία, quod nos pronunciatum possumus dicere;
quo modo absque uerbo & nomine nulla sententia fit: fori-
tarum gradus, pseudomeni argutias, sophismatum frau-
des . Iurare possum, me, postquam egressus de schola sum,
hæc numquam omnino legisse . Bibendum igitur mihi erat
de Lethæo gurgite, iuxta fabulas poetarū: ne arguar scire,
quod didici . En tu, qui in me paruā criminariis scientiā, & ui-
deris tibi litteratulus, atque Rabbi; respōde cur scribere ali-
qua ausus sis, & uirum disertissimū Gregoriū pari eloquiū
splendore transferre . unde tibi tanta uerborum copia, sen-
tentiarum lumen, translationum uarietas, homini, qui ora-
toriam artem uix primis labris in adolescentia degustasti?
Aut ego fallor, aut tu Ciceronem occulte lectitas: et ideo
tam disertus es, mihiq. lectionis eius crimen intendis, ut so-
lus inter ecclesiasticos tractatores eloquentiæ flumine glo-
rieris . licet magis philosophos sequi uidearis, spinas Clean-
this, & contorta Chrysippi non ex arte, quā nescis, sed de
ingenii magnitudine . Et quoniam Stoici logicam sibi uindi-
cant; & tu huius scientiæ deliramenta contemnis: in hac
parte Epicureus es: nec quæris, quo modo, sed quid lo-
quaris . Quid enim ad te pertinet, si alius non intelligat,
quid uelis dicere; quia non ad omnes, sed ad tuos loque-
ris? Denique & ego, scripta tua relegens, quamquam in-
terdum non intelligam quid loquaris, & Heraclitum me le-

Fff gere

gere putem; tamen non doleo, nec me pœnitet tarditatis: id enim in legendo patior, quod tu pateris in scribendo. Hæc dicerem, si quippiã uigilans promississem: nunc autem, nouum impudentiæ genus, obiicit mihi somnium meum. Vtinam celebritas loci, & sanctorum de toto orbe conuentus, sineret me diuinas scripturas legere. intantum spatium non habeo externa meditandi. Sed tamen, qui somnium criminatur, audiat prophetarum uoces, somniis non esse credendum: quia nec adulterium somnii ducit me ad tartarum; nec corona martyrii in cælum leuat. Quoties uidi me esse mortuum, & in sepulcro positum? quoties uolare super terras, & montes ac maria natatu aeris transfretare? cogat ergo me non uiuere, uel pennas habere per latera; quia uagis imaginibus mens sæpe delusa est. Quanti in somnis diuites, apertis oculis repente mendici sunt? sitientes flumina bibunt: & experrecti, siccis faucibus æstuant. Tu a me somnii exigis sponsonem: ego te uerius strictiusq. conueniam. Fecisti omnia, quæ in baptismo promissisti? Quidquid monachi uocabulum flagitat, nostrum uterque compleuit? Caue quæso, ne per trabem tuam, festucam meam uideas. Inuitus loquor, & retractantem linguam dolor in uerba compellit. Non tibi sufficiunt, quæ de uigilante confingis; nisi & somnia crimineris. Tantam habes curiositatem meorum actuum, ut, quid dormiens fecerim, dixerim ue, discutias. Prætermitto, quæ contra me loquens, propositum tuum deturpasti; quæ in depompationem omnium Christianorum & uerbis, & opere feceris. Hoc unum denūcio, & repetens iterum iterumq. monebo. cor
Luc. 6 nutam bestiam petis: & nisi cauerem illud Apostoli: Male-
Gal. 5 dici regnum Dei non possidebunt: & Mordentes inuicem, consumpti estis ab inuicem: iam nunc sentires, de paruula subdolaq. concordia magnam tibi in mundo ortam esse discordiam. Quid tibi prodest, apud notos pariter & ignotos in nos maledicta congerere? an, quia Origenistæ non sumus, & in cælo nos peccasse nescimus, in terris arguimur peccatores? & ideo in concordiam rediimus, ut mihi lo-
 qui

qui contra hæreticos non liceret, ne, si illos descripsero, tu te appetitum putes? Quamdiu nõ renuebam laudationem tuam; sequebaris ut magistrum, fratrem & collegam uocabas, & catholicum in omnibus fatebaris: postquam non agnoui laudes tuas, & me indignum tanti uiri præconio iudicaui; illico uertis stylum, & omnia laudata prius uituperas, de eodem ore & dulce proferens & amarum. Sentis *Iac. 3* ne, quid taceam? quod æstuanti pectori uerba non commodem? & cum psalmista loquar: Pone Domine custodiam ori meo, & ostium circumstantiæ labiis meis? Non declines cor meum in uerba malitiæ. Et alibi: Cum confisteret aduersum me peccator, obmutui, & humiliatus sum, & filii a bonis. Et rursus: Factum sum quasi homo non audiens, nec habens in ore suo redargutiones. Sed pro me ultor tibi Dominus respondebit; qui dicit per prophetam: Mihi uindicta, & ego retribuam, dicit Dominus. Et in alio loco: Sedens aduersus fratrem tuum loquebaris, & aduersus filium matris tuæ ponebas scandalum. Hæc fecisti, & tacui: existimasti inique, quod ero tui similis: arguam te, & statuam contra faciem tuam: ut in te uideas condemnata, quæ falso in aliis criminaris. Audio præterea obiici mihi a Chrysogono, sectatore eius, cur in baptismo dixerim, uniuersa peccata dimitti, & mortuo bimarito, nouum uirum in Christo resurgere, atque istiusmodi sacerdotes in ecclesiis esse nonnullos. Cui breui sermone respondebo: habent libellum, quem in crimen uocant: ille respondeat: hunc sua disputatione subuertat, & scripta scriptis arguat. Quid austeritate frontis, & contractis rugatisq. naribus cõcaua uerba trutinatur, & sanctitatem apud uulgus ignobile simulato rigore mentitur? Audiat nos iterum proclamantes: ueterem Adam in lauacro totum mori, & nouum cū Christo in baptismo suscitari: perire Choicum, & nasci supercælestem. Hæc dicimus, non quod ipsi propitio Christo hac quæstione teneamur: sed interrogati a fratribus, quid nobis uideretur, respondimus; nulli præiudicantes sequi, quod uelit; nec alterius decretum nostra sententia

Fff 2 subuer-

subuertentes. neque enim ambimus sacerdotium, qui latemus in cellulis: nec, humilitate damnata, episcopatum auro redimere festinamus: nec electum Pontificem a Deo, rebellicupimus mente iugulare: nec fauendo hæreticis, hæreticos nos docemus: pecunias nec habemus, nec habere
1. Tim. 6 uolumus. habentes uictum, & uestitum, his contenti sumus: illud de ascensore montis Dominici iugiter decantantes: Qui pecuniam suam non dedit ad usuram, & munera super innocentem non accepit: Qui facit hæc, non mouebitur in æternum. ergo qui nō facit, iam corruit in æternū.
Psal. 23. 14

APOLOGIAE HIERONYMI

aduersus Rufinum.

LIBER SECVNDVS.

HVCVSQVE de criminibus, immo pro criminibus meis, quæ in me quondam subdolos laudator ingessit, & discipuli eius constantius arguunt, non ut debui, sed ut potui, moderato dolore respondi. propositum quippe mihi est, non tam alios accusare, quam me defendere. Veniam ad apologiam eius, qua sancto Anastasio, Romanæ urbis episcopo, satisfacere nititur, & in defensionem sui mihi rursus calumniam struit; tantumq. me diligit, ut raptus turbine, & in profunda demersus, meum potissimum inuadat pedem; ut mecum aut liberetur, aut pereat. Dicit se primum respondere rumoribus, quibus illius Romæ carpatur fides, hominis probatissimi tam in fide, quam in caritate Dei; et, nisi post triginta annos parentibus redditus, nollet eos deserere, quos tam tarde uiderat, ne inhumanus putaretur, aut durus, & tam longi itineris labore fragilior, ad iterandos labores esset infirmus, ipsum uenire uoluisse; quod quia non fecerit, contra latratores suos misisse baculum litterarum, quem ille teneret in dextera, & seuiantes contra se abigeret canes. Si probatus est cunctis, & maxime ipsi, cui scribit, episcopo in fide & caritate

caritate Dei : quo modo Romæ mordetur , & carpitur , & appetitæ æstimationis eius fama crebescit ? Deinde cuius est humilitatis , probatum se dicere in fide & caritate Dei , cum apostoli petant : Domine adauge nobis fidem : & au- Luc. 17
diant : Si habueritis fidem , ut granum sinapis : et ad ipsum dicatur Petrum : Modicæ fidei , quare dubitasti ? Quid lo- Matth. 14
quar de caritate , quæ & fide , & spe maior est , & quam Pau- 1. Cor. 13
lus optat potius , quam præsumit : sine qua & martyrio san-
guis effusus , corpusq. flammis traditum , coronam non ha-
bet præmiorum ? Harum utramque iste sic sibi uindicat , ut
tamen contra se habeat latratores : qui nisi inuicti Pontificis
baculo repellantur , latrare non cessant . Illud uero ridiculū ,
quod post triginta annos ad parētes se reuersum esse iactat ,
homo qui nec patrem habet , nec matrem : & , quos uiuen-
tes iuuenis dereliquit , mortuos senex desiderat . nisi forte
parentes , militari uulgariq. sermone , cognatos & affines
nominat : quos quia non uult deserere , ne inhumanus pu-
tetur , aut durus , iccirco , patria derelicta , Aquileiæ habi-
tat . Periclitatur Romæ illa probatissima fides eius : & hic
supinus & lassulus post triginta annos per molliissimum Fla-
minie iter effedo uenire non potest : sicq. præterit longi
itineris lassitudinem , quasi triginta annis semper cucurre-
rit ; aut , biennio Aquileiæ sedens , præteriti itineris labo-
re confectus sit . Carpamus reliqua , & ipsa epistolæ eius uer-
ba ponamus . Quamuis igitur fides nostra , persecutionis hæ-
reticorum tempore , cum in sancta Alexandrina ecclesia de-
geremus in carceribus , & exiliis , quæ pro fide infereban-
tur , probata sit . Miror , quod non adiecerit , Vincit Iesu
Christi : & , Liberatus sum de ore leonis : & , Alexandriæ 2. Tim. 4
ad bestias pugnaui : & , Cursum consummaui : fidem serua 1. Cor. 15
ui : superest mihi corona iustitiæ . Quæ , malum , exilia ,
quos iste carceres nominat ? pudet me apertissimi menda-
cii : quasi carceres & exilia absque iudicum sententiis irrogē-
tur . uolo tamen ipsos scire carceres , & quarum prouincia-
rum se dicat exilia sustinuisse . et utique habet copiam de
multis carceribus & infinitis exiliis unum aliquod nominā-

Fff 3 di.

di. prodat nobis confessionis suæ acta, quæ hucusque nesci-
uimus: ut inter alios Alexandriæ martyres huius quoque
gesta recitemus, & contra latratores suos possit dicere: De
Gal. 6 cetero nemo mihi molestus sit: ego enim stigmata domini
nostri Iesu Christi in corpore meo porto. Tamen & si quis
nunc est, qui uel tentare fidem nostram cupit, uel audire,
uel discere; sciat, quod de trinitate ita credimus: & reli-
qua. Supra, contra canes tuos baculum episcopo porrigis,
quo pro te munitus incedat: nunc quasi ambigens dicis: Si
quis est, qui tentare fidem nostram cupit: denuo dubitas,
cum multorum latratus ad te usque peruenerint. Non discu-
tio parumper elocutiones tuas, quas & tu contemnis, &
despicias: tantum sensibus respondebo. Aliud a te quæritur,
& pro alio satis facis. Contra Arii dogmata iam Alexandriæ
in carceribus & exiliis dimicaueras, non uoce, sed sangui-
ne: nunc super Origenis hæresi tibi calumnia commoue-
tur. Nolo cures, quæ sana sunt, uulnera medicare. Trini-
tatem dicis unius esse deitatis. Hoc toto credente iam mun-
do, puto quod & dæmones confiteantur filium Dei natum
de Maria uirgine, & carnem naturæ humanæ atque animā
suscepisse. Si arctius quid rogauero, contentiosum uoca-
bis. Si dicis, filium Dei humanæ naturæ carnem atque ani-
mam suscepisse: oro te, ut absque stomacho respondeas:
anima ista, quam suscepit Iesus, erat ne antequam nascere-
tur ex Maria? An in origine uirginali, quæ de Spiritu san-
cto nascebatur, cum corpore simul creata est, uel, iam in ute-
ro corpore figurato, statim facta & missa est de cælo? E tri-
bus unum quid sentias, scire desidero. Si fuit ante quam na-
sceretur ex Maria: necdum ergo erat anima Iesu, & agebat
aliquid; ac propter merita uirtutum postea facta est anima
eius. Si cœpit ex traduce: humanarum igitur animarum,
quas æternas fatemur, & brutorum animantium, quæ cū
corpore dissoluuntur, una condicio est. Sin autem, figura-
to corpore, statim creatur, & mittitur: fatere simpliciter,
& nos scrupulo libera. Nihil horum loqueris; sed occupa-
tus in aliis, simplicitate nostra abuteris, & præstigiis pom-
paq.

paq. uerborum hæere nos non finis quæstioni. Quid, in-
 quies, nonne quæstio erat de resurrectione carnis & pœnis
 diaboli? Fateor. Ergo breuiter pureq. responde. Non quæ-
 ro quod scribis eandem carnem resurgere, in qua uiuimus,
 nullo membro amputato, nec aliqua parte corporis dese-
 cta: hæc enim tua uerba sunt: sed quæro, quod Origenes
 negat, utrum in eodem sexu, quo mortua sunt, corpora
 suscitentur; & Maria Maria, Ioannes resurgat Ioannes;
 an, commixto sexu, atque turbato, nec uir, nec femina sit;
 sed utrumque, uel neutrum: & an ipsa corpora incorrupta
 & immortalia: & ut argute præmones, iuxta Apostolum,
 spiritualia permaneant in æternum: & non solum corpora, *1. Cor. 15*
 sed caro, & sanguis infusus uenis & ossibus irrigatus, quæ
 Thomas tetigit: an certe paulatim resoluantur in nihilum, *Ioan. 20*
 & ad quattuor, unde compacta sunt, elementa retrahantur?
 Hæc aut dicere debueras, aut negare, & non ea loqui, quæ
 subdole Origenes fatetur, ut quasi fatuis & pueris illudens,
 nullo membro amputato, nec aliqua corporis parte dese-
 cta. Scilicet hoc timuimus, ne sine naso & auribus surgere-
 mus, & amputatis sectisq. genitalibus, eunuchorum in cæ-
 lesti Hierusalem ciuitas conderetur. Porro de diabolo sic
 sententiam temperat. Dicimus quoque & iudicium futu-
 rum, in quo iudicio unusquisque recipiet propria corporis,
 prout gessit, siue bona, siue mala. quod si homines rece-
 pturi sunt pro operibus suis; quanto magis & diabolus, qui
 omnibus extitit causa peccati? De quo illud sentimus, quod
 scriptum est in euangelio: quia & ipse diabolus, & omnes *Matth. 25*
 angeli eius, cum iis, qui opera eius faciunt, idest, qui cri-
 minantur fratres, cum ipso pariter æterni ignis hereditate
 potentur. Si quis ergo negat diabolum æternis ignibus
 mancipari: partem cum ipso æterni ignis accipiat; ut sen-
 tiant quod negauit. Repetamus singula. Dicimus, inquit,
 futurum iudicium: in quo iudicio, & cetera. Super uerborū
 uitiis tacere decreueram: sed, quia discipuli eius mirantur
 eloquentiam præceptoris, pauca pestringam. Dixerat iudi-
 cium futurum: sed homo cautus timuit solū dicere, in quo,

Fff 4 & po-

& posuit, in quo iudicio : ne , si non secundo repetisset iudicium , nos, obliti superiorum , pro iudicio asinum putaremus . Illud quoque , quod postea infert ; Qui criminantur fratres , cum ipso pariter æterni ignis hereditate potentur ; eiusdem est uenustatis . quis enim umquam audiuit , potiri ignibus , & frui suppliciis ? sed homo Græcus uidetur mihi se ipsum interpretari uoluisse , & pro eo , quod apud eos dicitur κληρονομίῃσιν , & apud nos uno uerbo dici potest hereditabunt , compositius & ornatiùs dixisse , Hæreditate potentur . Illiusmodi nugis , & acyrologiis omnis eius scattet oratio . sed reuertamur ad sensum . Grandi diabolus lancea percutitur , qui omnibus extitit causa peccati , si pro operibus suis quasi homo redditurus est rationem , & cum angelis suis æterni ignis hereditate potietur . hoc enim decrat , ut , hominibus tormento subditis , ille potiretur ignibus æternis , quos tanto tempore desiderauerat . Et uideris mihi calumniam in hoc loco facere diabolo , & criminatorem omnium falsis criminibus accusare . Dicis enim , Qui omnibus extitit causa peccati : & dum in illum refers crimina , homines culpa liberas , tollisq. arbitrii libertatem , saluatore dicente , quod de corde nostro exeunt cogitationes malæ , homicidia , adulteria , fornicationes , furta , falsa testimonia , blasphemix . Et rursum de Iuda in Euāgelio legimus : Post buccellā intrauit in eum satanas : quia ante buccellam sponte peccauerat ; & nec humilitate nec clementia saluatoris flexus est ad pœnitentiam . Vnde Apostolus , Quos tradidi , inquit , satanæ , ut discant non blasphemare . Et in alio loco : Tradidi huiusmodi satanæ in interitum carnis , ut spiritus saluus fiat . Tradidit eos satanæ , quasi tortori ad puniendum : qui ante quam traderentur , uolūtate propria blasphemauerant . Et Dauid , Ab occultis , inquit , meis munda me Domine : & ab alienis parce seruo tuo : breuiter & suæ uoluntatis errorem , & uitiorum incentiua significans . In Ecclesi. 10 sialte quoque legimus : Si spiritus potestatem habentis ascēderit super cor tuum , locum tuum ne dimiseris . Ex quo liquido apparet , si dederimus ascendenti locum , nos peccasse ,

se, qui dederimus, & ascendentem muros hostem non præcipitem deturbauerimus. Quod autem imprecariis fratribus, hoc est, criminatoribus tuis, æternos ignes cum diabolo: non tam fratres mihi uideris premere, quam diabolum subleuare; cum iisdem, quibus homines Christiani, ignibus puniendus sit. Ignis autem æternos, quos intelligere solet Origenes, puto quod te non fugiat, conscientiam uidelicet peccatorum, & pœnitudinem interna cordis urentem. de qua & Esaias loquitur: Vermis eorum non morietur, & *Esa. 66* ignis eorum non exstinguetur. Et ad Babylonem scriptum *Esa. 47* est: Habes carbonem ignis, sedebis super eos: hi erunt tibi in adiutorio. Et in psalmo pœnitens audit: Quid detur tibi *Psal. 119* bi, aut quid apponatur tibi ad linguam dolosam? Sagittæ potentis acutæ cum carbonibus desolatoriis: ut linguam dolosam sagittæ præceptorum Dei, de quibus in alio loco propheta dicit: Versatus sum in miseria, dum configitur mihi *Psal. 31* spina: uulnerent atque confodiant, & peccatorum in ea solitudinem faciant. Illud quoque testimonium, in quo Dominus loquitur: Ignem ueni mittere super terram, & quâ *Luc. 12* uolo ut ardeat, sic interpretatur: Omnes cupio agere pœnitentiam, & excoquere Spiritu sancto uitia, atque peccata. Ipse enim sum, de quo scribitur: Deus ignis consumens est. *Deut. 4* Non ergo grande est, hoc de diabolo dicere, quod & hominibus præparatum est. Magis debueras, ut suspicionem salutis diabolicæ declinares, dicere, perditio factus es, & non *Hier. 27* eris in æternum: & ex persona Domini loquentis ad Iob *Iob 40. 4* de diabolo: Ecce spes eius frustrabitur eum, & uidentibus cunctis præcipitabitur: Non quasi crudelis suscitabo eum. quis enim resistere potest uultui meo? Quis ante dedit mihi, ut reddam ei? Omnia, quæ sub cælo sunt, mea sunt. Non parcam ei, & uerbis potentibus, & ad deprecandum compositis. Verum hæc possunt quasi simplicis hominis excusari, & cum eruditos non subterfugiant, apud indoctos præferre innocentie similitudinem. Quod sequitur de animarum statu, excusari omnino non potest: dicit enim: Audio & de anima quæstiones esse commotas: de qua re

utrum

utrum recipi debeat querimonia, an abiici, uos probate. Si autem & de me, quid sentiam, quæritur: fateor me de hac quæstione apud quamplurimos tractatorum diuersa legisse. Legi quosdam dicentes, quod pariter cum corpore per humani corporis traducem etiam animæ diffundantur: & hæc quibus poterant assertionibus confirmabant: quod puto inter Latinos Tertullianum sensisse, uel Lactantium, fortassis & nonnullos alios. Alii asserunt, quod, formati in utero corporibus, Deus quotidie faciat animas, & infundat. Alii factas iam olim, idest, tunc cum omnia creauit Deus ex nihilo, nunc eas iudicio suo nasci dispenset in corpore. Hoc sentit & Origenes, & nonnulli alii Græcorum. Ego uero cum hæc singula legerim, (Deo teste dico) quia uique ad præsens certi & definiti aliquid de hac quæstione non tenco, sed Deo relinquo scire quid sit in uero, & si cui ipse reuelare dignabitur: ego tamen hæc singula & legisse me non nego, & adhuc ignorare confiteor, præter hoc, quod manifeste tradit Ecclesia, Deum esse & animarum & corporum conditorem. Ante quam de sensibus disputem, Theophrasti uerba mirabor. Audio, inquit, de anima quæstiones commotas esse: de qua re utrum recipi debeat querimonia, aut abiici, uos probate. Si quæstiones de animæ statu in urbe commotæ sunt: quæ est ista querimonia, uel querela; quæ utrum recipi debeat, episcoporum iudicio derelinquitur? nisi forte quæstionem, & querimoniam id ipsum significare putat; quia in Capri commentariis huiusmodi figurâ reperit. Deinde ponit: Legi quosdam dicentes, quod pariter cum corpore per humani seminis traducem etiam animæ diffundantur: & hæc quibus poterant assertionibus confirmabant. Rogo, quæ est ista licentia figurarum? quæ modorum & temporum perturbatio? Legi dicentes, Quibus poterant assertionibus confirmabant. Et in cōsequentibus: Alii asserunt, quod, formati in utero corporibus, Deus quotidie faciat nouas animas, & infundat. Alii, factas iam olim, idest, tunc, cum omnia Deus creauit ex nihilo, nunc eas iudicio suo nasci dispenset in corpore. Et hic ordo pulcher-

cherrimus. Alii, inquit, asserunt hoc uel illud: alii factas iam olim, idest, tunc, cum omnia Deus creauit ex nihilo, nunc eas iudicio suo nasci dispenseret in corpore. Tam putide & confuse loquitur, ut plus ego in reprehendendo laborem, quam ille in scribendo. Ad extremum posuit: Ego uero cum hæc singula legerim: &, adhuc pendente sententia, quasi nouum aliquid protulisset, adiecit: Ego tamen hæc singula & legisse me non nego, & adhuc ignorare confiteor. O infelices animas, quæ tantis uitiorum lanceis uulnerantur. non eas puto, iuxta Origenis errorem, tantum laborasse, cum de cælo in terras ruerent, & crassiss corporibus uestirentur, ut nunc uerbis & sententiis hinc inde collisas: ut prætermittam κακέμφοτον, quo de humani seminis tra-
 duce diffundi animæ dicuntur. Scio, inter Christianos uerborum uitia non solere reprehendi: sed ex paucis ostendere uolui, cuius temeritatis sit docere quod nescias, scribere quod ignores; ut similem prudentiam & in sensibus requiramus. Mittit epistolam, idest, robustissimum baculum, quo Romanæ urbis armetur episcopus: & in ipsa quæstione, pro qua canes latrant, dicit se nescire quod quæritur. Si ignorat, pro quo sibi calumnia commouetur: quid necesse est apologiam mittere, quæ non habet defensionem sui, sed ignorantiam confessionem? Hoc est suspiciones hominum non sopire, sed ferere. Tres super animarum statu ponit sententias; & in fine concludens, Singula, inquit, me legisse non nego, & adhuc ignorare confiteor. Arcefilaum, aut Carneadem putes, qui omnia incerta pronunciant: licet & illos superet cautione. illi enim, omnium philosophorum inuidiam non ferentes, quod ueritatē e uita tollerent, uerisimilia repperunt, ut ignorantiam rerum probabili assertione temperarent: iste se dicit incertum, & e tribus omnino nescire quid uerum sit. Si hoc erat responsurus; quæ eum ratio impulit, ut tantum pontificem inscitiam suam testem faceret? Nimirum hæc illa est lassitudo, quod, triginta annorum itinere confectus, Romam uenire non potuit. Quanta & alia nescimus, & tamen imperitiæ nostræ testes
 non

Esa. 53

non quærimus? De Patre, Filio, & spiritu sancto, de natiuitate Domini saluatoris, super qua Esaïas clamat: Generationem eius quis enarrabit? audacter loquitur, & mysterium, omnibus retro sæculis ignoratum, scientiæ suæ uindicat: & hoc solum ignorat, quod ignoratum cunctis scandalum facit. Scit, quo modo Deum uirgo generarit; & nescit, quo modo ipse sit natus. Animarum & corporum conditorem fateretur Dominum, siue animæ ante corpora fuerint, siue cum corporum nascentur exordiis, siue iam formati in utero figuratisq. corporibus immittantur. In omnibus nouimus auctorem Dominum. Nec de hoc nunc quæstio est, utrum Deus, an alius eas fecerit: sed e tribus, quas posuit, quæ sit illarum sententia uera, nescire se dicit. Vide, ne statim tibi obiiciatur, iccirco te trium ignorantiam confiteri, ne unum damnare cogaris; & Tertulliano, & Lactantio ideo parcere, ne Origenem cum illis iugules. Quantum memoria suggerit, nisi tamen fallor, nescio me legisse, Lactantium *συμπερομένην* animam dicere. ceterum, qui legisse te scribis, dic in quo libro legeris; ne ut me dormientem, sic illum mortuum calumniatus esse uidearis. Sed & in hoc cunctabundus incedis, & cautus: dicis enim: Puto inter Latinos Tertullianum sensisse, uel Lactantium, fortassis & alios nonnullos. Non solum de animarum statu dubitas, sed de auctorum sententiis putas: & tamen aliquid interest. De animabus autem aperte nescis, & inscitiam confiteris: de auctoribus sic nosse te dicis, ut putes potius, quam præsumas. In solo Origene non ambigis: dicis quippe, Hoc sentit Origenes. Interrogabo te, bene sentit, an male? Nescio, inquis. Quid me igitur, missis tabellariis, & creberrimis nunciis, docere conaris, ut sciam quod nescias? Et ne forte non credam imperitiæ tuæ, & arbitrer te callide reticere quod nosti: iuras Deo teste, quod usque ad præsens certi & definiti aliquid de hac quæstione nō teneas; & Deo relinquo scire quid sit in uero, & si cui ipse reuelare dignabitur. Per tanta sæcula tibi nullus uidetur dignus fuisse, cui de hac quæstione Dominus reuelarit? nō patriarcha,

non

non propheta, non apostolus, non martyr? ne tibi quidem, quando in carceribus & exiliis moraberis, huiusmodi sacramenta patuerunt? Dominus in euangelio, Pater, inquit, reue-
Ioan. 17
 laui nomen tuum hominibus. Qui patrem reuelauit, de animarum statu tacuit. Et miraris, si contra te fratrum scanda concitentur, cum id nescire te iures, quod Christi Ecclesie se nosse fateantur? Expolita fide sua, immo inscitie confessione, transit ad aliud; & excusare se nititur, cur libros *τῶν ἀρχῶν* in Latinum uerterit; & hæc scribit ad uerbum. Sane, quia audio etiam inde esse disputatum, quod quædam Origenis rogatus a fratribus de Græco in Latinum transfuli; puto quod omnes intelligant, hæc pro solo liuore culpari. si enim aliquid est, quod displiceat in auctore; quare id ad interpretem detorquetur? sicut in Græcis habetur, rogatus sum ut Latinis ostenderem: Græcis sensibus uerba dedi Latina tantummodo. siue ergo in illis sensibus laus inest aliqua, non est mea: siue culpa, similiter non est mea. Audio, inquit, etiam inde esse disputatum. Quam prudenter accusationem suam, disputationem uocat. Quod quædam Origenis rogatus a fratribus de Græco in Latinum transfuli. Quæ sunt illa quædam? nomen non habent? taces? libelli accusatorum loquuntur. Puto, ait, quod omnes intelligant hæc pro solo liuore culpari. Pro quo liuore? nunc inuidente eloquentie tue? aut fecisti, quod nullus hominum unquam facere potuit? Ecce & ego Origenis multa transfuli: &, præter te, nemo nec inuidet, nec calumniatur. Si enim, inquit, aliquid est, quod displiceat in auctore; quare id ad interpretem detorquetur? sicut in Græcis habetur, rogatus sum ut Latinis ostenderem: Græcis sensibus uerba dedi Latina tantummodo. siue ergo in illis sensibus laus inest aliqua, non est mea: siue culpa, similiter non est mea. Et miraris, si de te homines male sentiant, cum de apertis blasphemis dicas, Si est aliquid, quod displiceat in auctore. omnibus, quæ in illis libris dicta sunt, displicent: & tu solus dubitas; & quereris, cur ad interpretem detorqueatur, quod in translationis tue præfatione laudasti.

laudasti. Rogatus eras, ut, quo modo habebatur in Græco, in Latinum uerteres. utinam fecisses, quod rogatum te esse simulas: nulli nunc inuidiæ subiaceres. si tu translationis seruasses fidem; mihi necessitas non fuisset interpretationē falsam uera interpretatione subuerrere. Nouit conscientia tua, quæ addideris, quæ subtraxeris, quæ in utramque partem, ut tibi uisum fuerit, immutaris: & post hæc audes dicere, quod & bona & mala non tibi, sed auctori debeant imputari. Et oppressus inuidia adhuc uerba moderaris, & quasi super aristas pendenti incedens gradu loqueris: siue in illis sensibus laus est, siue culpa. Defendere non audes, & tamen damnare nō uis. Elige e duobus, quod uis: optio tibi datur. si bona est interpretatio tua, lauda: si mala, condemna. Verum excusat se, & subnectit aliam stropham: dicit enim: Quinimmo etiam aliud adieci, sicut in præfatiuncula mea designaui; ut, in quantum possem, aliquanta deciderem, illa tamen, quæ mihi ad suspicionem ueniebant, quod non ab ipso Origene ita dicta, sed ab aliis uiderentur esse inserta, propter hoc quod de eisdem rebus in aliis auctoris eiusdem locis catholice dictum legeram. Mira eloquētia, & Attico flore uariata, Quinimmo etiam, & Quæ mihi ad suspicionem ueniebāt. Ausum illum esse hæc Romam uerborum portenta transmittere? compeditam putes linguam eius, & inextricabilibus nodis ligatam, uix in humanum sonum erumpere. Sed ad causam redeam. Quis tibi dedit hanc licentiam, ut multa de interpretatione decideres? Rogatus eras, ut Græca in Latinum uerteres, nō ut emendares; ut alterius dicta proferres, nō ut tua conderes. non fecisse te quod rogatus es, recidendo plurima confiteris. atque utinam præcidisses mala, & non, in assertionem malorum, tua multa posuisses. e quibus unum proferam, ut ex hoc cognoscantur & cetera. In primo libro *πεὶ ἀρχὴν*, ubi Origenes lingua sacrilega blasphemauit, quod Filius Patrem non uideat, tu etiam causas reddis, quasi ex persona eius, qui scripsit: & Didymi interpretaris *σχέλιον*, in quo ille casso labore conatur alienum errorem

defen-

defendere, quod Origenes quidem bene dixerit: sed nos, simplices homines, & cicures Enniani, nec illius sapientiam, nec tuam, qui interpretatus es, intelligere possumus. Præfatio tua, quam nominas, & in qua me miris ornas laudibus, te reum pessimæ translationis facit. dicis enim quod de Græco multa decideris; licet taceas, quod addideris. Quæ decidisti, mala erant, an bona? utique mala. quæ reseruasti, bona, an mala? utique bona. neque enim mala transferre poteras. ergo mala amputasti, & reliquisti bona? nulli dubium est. probantur autem, quæ translata sunt, pene omnia mala. quicquid igitur in translatione monstrauero, tibi imputabitur, qui illud pro bono transtulisti. Aliud est, si iniquus censor, eiusdem criminis reus, alios de senatu pellis, alios in curia retines. Sed dicis: Omnia mutare non poteram, sed ea tantum, quæ addita ab hæreticis arbitrabar, mihi amputanda credidi. Pulchre. Si amputasti, quæ addita ab hæreticis existimabas: ergo, quæ reliquisti, eius sunt, quem interpretabaris. si eius sunt, quem interpretatus es: responde, utrum bona, an mala sint? mala transferre non poteras. semel enim, quæ ab hæreticis addita fuerant, amputasti. nisi forte hæreticorum mala amputare debueris, & Origenis errores in Latinum integros uertere. Dic ergo, quare Origenis mala in Latinum uerteris: ut auctorem mali proderes, an ut laudares? si prodis, in præfatione cur laudas? si laudas, hæreticus approbaris. Restat, ut quasi bona protuleris. Si hæc omnia probantur mala: igitur unius & auctor, & interpret rei criminis erunt; & implebitur illa sententia: Videbas furem, & currebas *Psal. 49* cum eo: & cum adulteris portionem tuam ponebas. Non est necesse rem planam argumentatione dubiam facere. Quod sequitur, respondeat, unde illi sit orta suspicio, hæc ab hæreticis addita. Quia, inquit, de eisdem rebus in aliis locis eiusdem auctoris catholice dictum legeram. Videamus, quod primum est, ut ordine uenerit ad secundum. Probo ego, inter multa Origenis mala, hæc maxime hæretica: Dei filium creaturam, Spiritum sanctum ministrum, mundos

Philip. 2

mundos innumerabiles, æternis sibi sæculis succedentes; angelos uersos in animas hominum; animam saluatoris fuisse ante quam nasceretur ex Maria; & hanc esse, quæ cum in forma Dei esset, non est rapinam arbitrata æqualem se esse Deo; sed se exinaniuit, formam serui accipiens: resurrectionem nostrorum corporum sic futuram, ut eadem membra non habeant: quia, cessantibus membrorum officiis, superfluo membra reddantur: ipsaq. corpora tenuia & spiritalia paulatim euanescere, & in auram tenuem atque in nihilum dissipari: in restitutione omnium, quando indulgentia principalis uenerit, cherubim, & seraphim, thronos, principatus, dominationes, uirtutes, potestates, archangelos, angelos, diabolum, dæmones, animas omnium hominum, tam Christianorum, quam Iudæorum, & gentilium, unius condicionis & mensuræ fore: cumq. ad formam & libram æquitatis peruenerint, & rationabiles creaturas, omni corporum fæce deposita, nouus de mundi exilio populi reuertentis monstrauerit exercitus; tunc rursus ex alio principio fieri mundum alium, & alia corpora, quibus labentes de cælo animæ uestiantur: ut uerendum nobis sit, ne, qui nunc uiri sumus, postea nascamur in feminas; & quæ hodie uirgo, tunc prostibulum sit. Hæc in Origenis libris ego hæretica doceo: tu ostende, in quo eius opere his contraria legeris. Nolo dicas, quæ de eisdem rebus in aliis locis eiusdem auctoris catholice dicta legeram; ne me mittas ad sex millia librorum eius, quos legisse beatum papam Epiphanium criminari: sed ipsa loca nomina: nec hoc mihi sufficiet, nisi eadem dicta ad uerbum protuleris. Non est fatuus Origenes, & ego noui: contraria sibi loqui non potest. Igitur ex hac supputatione illa summa nascitur, non hæreticorum esse, quæ amputasti, sed Origenis: cuius ideo mala interpretatus es, quia putasti bona: & tibi tam bona, quam mala illius imputanda, cuius scripta in prologo comprobasti. Sequitur in eadem Apologia: Origenis ego neque defensor sum, nec assertor, nec primus interpres. alii ante me hoc idem opus fecerunt: feci & ego

ego postremus, rogatus a fratribus. Si iubetur, ne fiat; iussio obseruari solet in posterū. si culpātur, qui ante iussionem fecerunt: culpa a primis incipiat. Tandem euomuit, quod uolebat, & omnis animi tumor in nostræ accusationis erupit inuidiā. Vbi interpretatur libros *πεὶ ἀρχῶν*, me sequi se dicit: ubi accusatur cur hoc fecerit, meum ponit exemplum: & securus, & periclitans, sine me uiuere non potest. audiat igitur, quod nescire se simulat. Nemo tibi obiicit, quare Origenem interpretatus es: alioqui Hilarius & Ambrosius hoc crimine tenebuntur: sed quia interpretatus hæretica, præfationis tuæ laude firmasti. Ego ipse, quem in crimen uocas, sic septuaginta homilias eius transtuli, & non nulla de tomis; ut & mala in bonorū interpretatione subtraherem; & aperte in libris *πεὶ ἀρχῶν*, ad coarguendam translationem tuam, quid lector uitaret, ostenderem. Vis Origenem in Latinū uertere? habes multas homilias eius, & tomos, in quibus moralis tractatur locus, & scripturarū panduntur obscura. hæc interpretare; hæc rogantibus tribue. quid primus labor tuus incipit ab infamia? cur translaturus hæretica, in defensionem eorum præmittis quasi martyris librum; & id Romanis auribus ingeris, quod trāslatū totus orbis expauit? aut certe, si ideo interpretaris, ut eum hæreticū arguas; nihil de Græco mutes: & hoc ipsum præfatione testare; quod prudentissime papa Anastasius in epistola, quam contra te scribit ad episcopum Ioannem, suo sermone complexus est, me liberans, qui id feci, & te arguens, qui facere noluiſti. Ac ne forsitan hoc quoque neges; subieci exemplum eius; ut, si non uis audire fratrem monentem, audias episcopum condemnantem. Dicis te nō esse defensorem, neque assertorem Origenis. Iam nunc tibi proferam librū tuum, de quo in famosa illa præfatiuncula præclari operis tui his uerbis loqueris. Cuius diuersitatis causam plenius tibi in apologetico, quē Pamphilus in libris suis scripsit, edidimus, breuissimo libello superaditto: in quo euidentibus, ut arbitror, probamentis deprauatos esse in quamplurimis ab hæreticis & maleuolis libris eius ostendi-

G g g mus,

mus, & præcipue istos, quos nunc exigis ut interpreter, id est *αὐτὸν ἀρχόν*. Non tibi suffecerat Eusebii, uel certe, ut tu uis, Pamphili pro Origene defensio, nisi, quod ab illis minus dictum putabas, tu quasi sapientior, & doctior adderes? Longum est, si uelim totum librum tuum huic operi inferere, &, propositis capitulis, ad singula respondere, quid in his uitiorum sermo habeat, quid mendaciorum assertio, quid inconsequens textus ipse uerborum. unde, laciniosæ disputationis fastidia fugiens, & in arctum uerba compingens, tantum uersibus respondebo. Statim de portu egrediens, nauem impexit. referens enim de apologia Pamphili Martyris, quam nos Eusebii, Arianorum principis, probauimus; de qua dixerat, Prout potuimus, uel res poposcit, Latino sermone digessimus; intulit: Illud est, quod desideriorum uir Macari te admonitum uolo, ut scias hanc quidem fidei regulam, quam de libris eius supra exposuimus, esse talem, quæ & amplectenda, & tenenda sit. In omnibus enim his catholicum inesse sensum, euidenter probatur. Quamuis de Eusebii libro multa subtraxerit, & in bonam partem de Filio & Spiritu sancto uisus sit commutare: tamen multa in illo scandala reperiuntur, & apertissimæ blasphemix, quæ iste sua negare non poterit, catholica esse pronuncians. Dicit Eusebius, immo, ut tu uis, Pamphilus, in isto uolumine; Filii & Patris ministrum Spiritum sanctum, non de eadem Patris Filiiq. substantia; animas hominum lapsas esse de celo; & in hoc, quod sumus, de angelis commutati, in restitutione omnium æquales & angelos, & dæmones, & homines fore: & multa alia tam impia, & nefaria, quæ etiam replicare sit criminis. Quid faciet assertor Originis, & interpret Pamphili? si in iis, quæ emendauit, tanta blasphemia est: in illis, quæ ab hæreticis falsata confingit, quanta sacrilegia continentur? Cuius opinionis causam hanc suspicatur, quod uir neque stultus neque infans dicere sibi repugnantia non potuerit. Et, ne forsitan putarem diuersis eum uaria scripsisse temporibus, & pro ætatibus edidisse contraria, addidit: Quid facimus, quod inter-

terdum

terdum in eisdem locis, atque, ut ita dixerim, in consequē-
 ti pene capite sententia contrarii sensus inuenitur inserta?
 Numquid in eodem opere eiusdem libri, & interdum, ut di-
 ximus, statim in consequenti capitulo oblitus sui esse po-
 tuit? uerbi gratia: ut, qui superius dixerat, nusquam inue-
 niri in omni scriptura, ubi Spiritus sanctus factus uel crea-
 tus esse diceretur, cōtinuo subiiceret, inter ceteras creaturas
 factū esse Spiritū sanctum? aut iterū, qui Patrem & Filiū uni-
 us substantiæ, quod Græce *ὁμοούσιον* dicitur, designauit, in
 consequentibus statim capitulis alterius esse substantiæ, &
 creatum poterat dicere eum, quem paulo ante de ipsa natu-
 ra Dei Patris pronunciauerat natum? Hæc ipsius uerba
 sunt, negare non potest. Nolo dicas, uerbi causa, ut qui su-
 perius dixerat: sed ipsum librum nomina, ubi prius bene
 dixerit, & postea male; ubi Spiritum sanctum & Filium de
 Dei Patris scribens esse substantia, statim in consequenti-
 bus asseruerit creaturas. Nescis ne me Origenis habere om-
 nia? legisse quamplurima? Ad populum phaleras, ego te
 intus & in cute noui. Vir doctissimus Eusebius (doctissi-
 mum dixi, non catholicum; ne more solito mihi & in hoc
 calumniam struas) per sex uolumina nihil aliud agit, nisi ut
 Origenem suæ ostendat fidei, idest, Arianæ perfidiæ: & mul-
 ta ponit exempla, & hoc constanter probat. Tibi ergo in
 quo somnio Alexandrini carceris reuelatum est, ut, quæ ille
 uera profitetur, falsata confingas? Sed forsitan hic, ut, Aria-
 nus, ab hæreticis addita, in occasionem sui traxit erroris; ne
 solus male sensisse contra Ecclesiā putaretur. Quid respon-
 debis pro Didymo, qui certe in trinitate catholicus est? cu-
 ius etiam nos de Spiritu sancto librum in Latinam linguam
 uertimus. certe hic in iis, quæ ab hæreticis in Origenis ope-
 ribus addita sunt, consentire non potuit; & in ipsis *αὐτοῦ ἀπο-
 κριταῖς*, quos tu interpretatus es, libris breues dictauit cōmenta-
 rios, quibus non negaret ab Origene scripta, quæ scripta
 sunt; sed nos, simplices homines, non posse intelligere quæ
 dicuntur; &, quo sensu in bonam partem accipi debeant,
 persuadere conatur. Hoc dumtaxat de Filio & Spiritu san-

G g 2 cto:

cto. Ceterum in aliis dogmatibus & Eusebius & Didymus aperissime in Origenis scita concedunt; &, quod omnes ecclesie reprobant, catholice & pie dictum esse defendunt. Videamus tamen, quibus argumentis probare nitatur, Origenis ab hæreticis scripta uitiata. Clemens, inquit, apostolorum discipulus, qui Romanæ ecclesie post apostolos episcopus, & martyr fuit, libros edidit, qui appellantur ἀναγνωρισμοὶ, idest, recognitio: in quibus cum ex persona Petri apostoli doctrina, quasi uere apostolica, in quamplurimis exponatur; in aliquibus ita Eunomii dogma inferitur, ut nihil aliud quam ipse Eunomius disputare credatur, filium Dei creatum de nullis extantibus assēuerans. Et post alia, quæ prolixum est scribere, Quid quæso, ait, de iis sentiendum est, quod apostolicus uir hæretica scripserit? an id potius credendum, quod peruersi homines ad assertionem dogmatum suorum sub uirorum sanctorum nomine, tamquam facilius credenda, interseruerint ea, quæ illi nec sensisse, nec scripsisse credendi sunt? Clementem quoque, Alexandrinæ ecclesie presbyterum, uirum catholicum, scribit in libris suis interdum Dei filium dicere creaturam; & Dionysium, Alexandrinæ urbis episcopum, uirum eruditissimum, contra Sabellium quatuor uoluminibus disputantem, in Arianum dogma delabi. Et sub his exemplis illud agit, ut non ecclesiasticos & catholicos uiros male sensisse, sed ab hæreticis eorum scripta corrupta esse testetur; & concludat ad extremum, dicens: De Origene quoque, in quo similiter, ut in his, quos supra diximus, quædam diuersitas inuenitur, istud non sufficiat sentire, quod de præiudicatis iam catholicis sentitur uel intelligitur uiris; ne similis causæ similis sufficiat excusatio: si conceditur, ut, quidquid in libris omnium reperitur, ab aliis corruptum sit: nihil eorum erit, quorum fertur nominibus; sed iis deputabitur, a quibus dicitur esse uitiatum, quamquam & illorum non erit, quorum incerta sunt nomina: atque ita fiet, ut, dum omnium omnia sunt, nihil aliuius sit. Hac defensionis perturbatio nec Marcion, nec Mani-

Manichæus, nec Arius, nec Eunomius accusari poterunt: quia, quidquid nos ab his impie dictum obiecerimus, discipuli respondebunt, non a magistris suis ita editum, sed ab inimicis esse uiolatum. Hoc genere & iste ipse tuus liber tuus non erit, sed forsitan meus: et meus liber, quo tibi accusatus respondeo, si in illo aliquid reprehenderis, non erit meus, sed tuus, a quo reprehenditur. Et dum omnia ad hæreticos refers, quid ecclesiasticis tribues, quibus proprium nihil relinquis? Et quo modo, inquires, in libris eorum uitiosa nonnulla sunt? Si me causas uitiorum nescire respondero; non statim illos hæreticos iudicabo. fieri enim potest, ut uel simpliciter errauerint, uel alio sensu scripserint, uel a librariis imperitis eorum paulatim scripta corrupta sint. Vel certe, ante quam in Alexandria quasi demonium meridianum Arius nasceretur, innocenter quædam & minus caute locuti sunt, & quæ non possint peruersorum hominum calumniam declinare. Obiiciuntur Origeni crimina: & tu non illum defendis, sed alios accusas: nec crimen renuis, sed criminorum turbam requiris. Si tibi diceretur, quos habet Origenes in hæresi socios: recte ista proferres: nunc a te quæritur, hæc, quæ in Origenis libris scripta reperiuntur, bona sint, an mala. Taces, & pro his alia loqueris: Clemens hoc ait: Dionysius in isto errore deprehenditur: Anastasius episcopus sic Dionysii defendit errorem: apostolorum scripta similiter deprauata sunt. quo modo & nunc ab aliis tibi hæreseos crimen impingitur: & tu pro te taces, & pro me confiteris. Ego neminem accuso, pro me tantum respondisse contentus. Non sum, quod arguis: si tu es, quod accusaris; ipse uideris. nec absolutio mea me, nec reatus te aut innocentem, aut obnoxium crimini probabunt. Præmissa falsatione ab hæreticis apostolorum, & utriusque Clementis, atque Dionysii, uenit ad Origenem, & his uerbis loquitur. Ipsius hoc conquerentis & deplorantis scripitis ac uocibus probauimus. quid enim ipse cum adhuc in carne uiuens, sentiens uidensq. peius sit de librorum suorum uel sermonum corruptionibus

Psal. 90

Ggg 3 bus

bus uel adulterinis editionibus, ex ipsius epistola, quam scribit ad quosdam caros suos Alexandriam, euidenter docetur. statimq. exemplum subiungit epistolæ. et qui falsitatem scriptorum Origenis hæreticis imputat, ipse incipit a falsitate, non ita interpretans, ut habetur in Græco; nec id Latinis insinuans, quod ipse in suis litteris profitetur. Cūq. illa epistola tota Demetrium, Alexandrinæ urbis pontificem, laceret, & in totius orbis episcopos & clericos inuehatur; & frustra ab ecclesiis excommunicatum esse se dicat, nec uelle in maledictis referre uicem, ne scilicet maledicus uideatur esse homo, qui intantum cautus sit ad maledicendum, ut ne diabolo quidem audeat maledicere; unde & Cædido, Valentiniani dogmatis sectatori, calumniandi se occasionem dederit, quod diabolus saluandæ dixerit esse naturæ: hic, dissimulato argumento epistolæ, fingit pro Origene, quod ille non loquitur. unde epistolæ ipsius partem paululum ex superioribus transtuli, & iis iunxi, quæ ab ipso commatice doloseq. translata sunt: ut, quo consilio superiora tacuerit, lector agnoscat. contra sacerdotes ergo ecclesiæ generaliter disputans, a quibus indignus communionis eius fuerat iudicatus, hæc intulit. Quid necesse est de prophetarum sermonibus dicere, quibus sæpissime pastoribus, & maioribus natu, & sacerdotibus, ac principibus populi comminantur, & arguunt eos? Quæ absque nobis de sanctis scripturis elicere potestis, & liquido peruidere quod forsitan hoc tempus sit, de quo dicitur: Nolite credere amicis, nec speretis in principibus. Et nunc impletur uaticinium: Duces populi mei me nescierunt: filii stulti sunt, & non sunt sapientes. Sapientes sunt, ut faciant mala, bene autem facere nesciunt: quorum magis misereri, quam eos odisse debemus, & orare pro illis, quam eis maledicere. ad benedicendum enim, & non ad maledicendum creati sumus. Vnde & Michael, cum aduersus diabolum disputaret de Moyse corpore, ne tanto quidem malo ausus est iudicium inferre blasphemix, sed dixit: Increpet tibi Dominus. Cui quid simile etiam in Zacharia legimus: Incre-

Increpet tibi Dominus diabolus: & increpet Dominus in
 te, qui elegit Hierusalem. Itaque & nos cupimus increpa-
 ri a Domino eos, qui nolunt cum humilitate a proximis in-
 crepari. Dicente autem Michaeli: Increpet tibi Dominus
 diabolus: & Zacharia similiter: utrum increpet, an non in-
 crepet Deus diabolum, ipse uiderit: et si increpat, quo mo-
 do increpet, ipse agnoscat. Et post multa, quæ prolixum
 est scribere, addit: Nos hoc sentimus, quod eiicientur de
 regno cælorum non solum qui grandia peccauerunt, uerbi
 gratia, fornicatores, & adulteri, & masculorum concubi-
 tores, & fures, sed & qui minora deliquerunt: ex eo, quod
 scriptum est: Neque ebriosi, neque maledici regnum Dei
 possidebunt: & tam in bonitate, quàm in seueritate Dei esse
 mensuram. Vnde cuncta nitimur agere consilio: in uini
 quoque potu, & in moderatione sermonis, ut nulli audea-
 mus maledicere. Ergo cum propter Dei timorem cauea-
 mus in quempiam maledicta conferre, recordantes illius di-
 cti, Non fuit ausus iudicium inferre blasphemiam, quod dici-
 tur de Michaeli contra diabolum: & in alio loco: Domina-
 tiones quidem reprobant, glorias autem blasphemant: qui-
 dam eorum, qui libenter contentiones reperiunt, adscribunt
 nobis & nostræ doctrinæ blasphemiam; super qua, ipsi uide-
 rint, quo modo illud audiant: Neque ebriosi, neque ma-
 ledici regnum Dei possidebunt: licet patrem malitiæ, & per-
 ditionis eorum, qui de regno Dei eiicientur, dicant posse
 saluari: quod ne mente quidem quis captus dicere potest.
 Cetera quidem ex eadem epistola transtulit pro hoc, quod
 in fine uerborum Origenis interpretati sumus. Ergo, cum
 propter timorem Dei caueamus in quempiam maledicta
 conferre, & reliqua: iste fraudulenter, amputatis superio-
 ribus, ex quibus inferiora dependent, sic cœpit transferre epi-
 stolam, quasi hoc sensus esset exordium; & ait: Quidam eo-
 rum, qui libenter habent criminari proximos suos, adscri-
 bunt nobis & doctrinæ nostræ crimen blasphemiam, quod a
 nobis nusquam audierunt: de quo ipsi uiderint, nolentes
 obseruare mandatum illud, quod dicit: Quia maledici re-

1. Cor. 6

Inda 1

1. Cor. 6

G g g 4 gnum

gnum Dei non possidebunt, dicentes asserere me patrem
 malitiæ & perditionis eorum, qui de regno Dei eiiciuntur,
 idest, diabolum esse saluandum: quod ne aliquis quidem
 mente motus, & manifeste insaniens dicere potest. Confer-
 te Origenes uerba, quæ supra ad uerbum transtuli, his, quæ
 ab isto non uersa sunt, sed eversa: & quantum inter se, non
 solum uerborum, sed & sensuum habeant dissonantiam, per-
 spicietis. Obsecro, ne molesta sit uobis prolixior interpre-
 tatio. iccirco enim omnia uertimus, ut, quo consilio su-
 periora tacuerit, probaremus. Habetur dialogus apud Græ-
 cos Origenis, & Candidi, Valentinianæ hæreseos defen-
 soris: in quo duos andabatas digladiantes inter se spectasse
 me fateor. Dicit Candidus, filium de patris esse substantia,
 errans in eo quod *προβολῶ* asserit. E regione Origenes,
 iuxta Arium & Eunomium, repugnat, eum uel prolatum
 esse, uel natum, ne Deus pater diuidatur in partes: sed di-
 cit sublimem & excellentissimam creaturam uoluntate ex-
 titisse patris, sicut & ceteras creaturas. Rursus ad secundam
 ueniunt quæstionem. Asserit Candidus, diabolum pessimæ
 esse naturæ, & quæ saluari numquam possit. Contra hoc
 recte Origenes respondit, nō eum perituræ esse substantiæ,
 sed uoluntate propria corruisse, & posse saluari. Hoc Can-
 didus uertit in calumniam, quasi Origenes dixerit, diaboli
 naturam esse saluandam: quod ille falso obiecerat, hic refu-
 tat. Et intelligimus in hoc tantum dialogo ab Origene ar-
 gui hæreticam falsitatem, & non in ceteris libris, de qui-
 bus numquam quæstio fuit. alioqui, si omnia, quæ hæreti-
 ca sunt, non erunt Origenis, sed hæreticorum; omnes au-
 tem propemodum illius tomi his erroribus pleni sunt: ni-
 hil Origenis erit, sed eorum, quorum ignoramus uocabula.
 Non ei sufficit Græcos & antiquos calumniari; de quibus,
 pro uetustate temporum, & longinquitate regionum, ha-
 bet licentiam quidquid uoluerit mentiendi: uenit ad Lati-
 nos, & primum ponit Hilarium confessorem, quod post
 Ariminensem synodum liber illius falsatus ab hæreticis sit;
 & ob hanc causam cum in concilio episcoporum ei quæstio
 moue-

moueretur, proferri librum de domo sua iusserit; qui, nesciente se, in scriniis suis hæreticus tenebatur; cumq. prolatus fuisset, & ab omnibus hæreticus iudicatus, auctor libri excommunicatus, de concilii conuentione discesserit. Et tantæ auctoritatis se putat, ut, cum hoc familiaribus suis narrat somnium, nemo ei contra confessorem ista simulantem audeat contradicere. Responde, quæso: Synodus, a qua excommunicatus est, in qua urbe fuit? dic episcoporum uocabula: profer sententias subscriptionum, uel diuersitatem, uel consonantiam. doce, qui eo anno consules fuerint, quis Imperator hanc Synodum iusserit congregari: Gallix ne tantum episcopi fuerint, an & Italiae, & Hispaniæ: certe quam ob causam Synodus congregata sit. nihil horum nominas: sed uirum eloquentissimum, & contra Arianos Latini sermonis tubam, ut Origenem defendas, excommunicatum a Synodo criminaris. sed confessoris calumnias utcumque toleranda est. Transit ad inclytum martyrem Cyprianum, & dicit Tertulliani librum, cui titulus est de trinitate, sub nomine eius Constantinopoli a Macedonianæ partis hæreticis lectitari. In quo crimine mentitur duo. nam nec Tertulliani liber est, nec Cypriani dicitur, sed Nouatiani, cuius & inscribitur titulo; & auctoris eloquium, styli proprietates demonstrat. Et superfluum puto apertas ineptias confutare; cum mihi mea ingeratur fabella a Synodo uidelicet; & sub nomine cuiusdā amici Damasi, Romanæ urbis episcopi, ego petar, cui ille ecclesiasticas epistolas dictandas tradidit; & Apollinariorum uersutiae describantur, quod Athanasii librum, ubi Dominicus homo scriptus est, ad legendum acceptum, ita corruerit, ut in litura id, quod raserint, rursus scriberet, ut scilicet non ab illis falsatum, sed a me additum putaretur. Quæso te, amice carissime, ut in ecclesiasticis tractatibus, ubi de ueritate dogmaturum queritur, & de salute animarum nostrarum maiorum flagitatur auctoritas, huiusmodi deliramenta dimittas, & prandiorum cenarumq. fabulas pro argumento non acneas ueritatis. Fieri enim potest, ut, etiam si a me uerū

audisti,

audisti, alius, qui huius rei ignarus est, dicat a te esse compositum, & quasi mimum Philistionis, uel Lentuli ac Marilli stropham eleganti sermone confictam. Quo non perueniat semel effrenata temeritas? Post excommunicationem Hilarii, post Cypriani *ἑνδεκὰ πύραρον* hæreseos librū, post Athanasii me dormitante lituram simul & inscriptionem, erupit aliquando contra papam Epiphanium; & dolorem pectoris sui, quod eum in epistola, quam ad Ioannem episcopum scripserat, hæreticum arguit, in apologia pro Origene digerit, & his se sermonibus consolatur. Quin potius aperienda est hoc in loco ueritas latens. non enim possibile est, tam iniquo iudicio uti quemquam hominum, ut de causa æquali non æqualiter sentiat: sed quod auctores obrectatorum eius hi sunt, qui uel in ecclesia disputare latius solent, uel etiam libros scribere, qui totum de Origene uel loquuntur, uel scribunt. Ne ergo plures ipsorum furta cognoscant, quæ utique, si ingrati in magistrum non essent, nequaquam criminosa uiderentur, simpliciores quosque ab eius lectione deterrent. Denique quidam ex ipsis, qui se uelut euangelizandi necessitatem per omnes gentes & per omnes linguas habere putat de Origene male loquendi, sex millia librorum eius se legisse, quamplurima fratrum multitudo audiente, confessus est. qui si utique, ut ipse dicere solet, pro cognoscendis eius malis legebat; sufficere poterant decem libri ad cognoscendum, aut uiginti certe, aut, ut plurimum, triginta. sex millia autem librorum legere, non iam est errores ac mala uelle cognoscere, sed totam pene uitam disciplinis eius ac studiis dedere. Quo modo ergo iste merito audiendus est, cum eos culpat, qui instructionis suæ causa per pauca eius, salua fidei regula atque integra pietate, legerunt? Qui sunt isti, qui in ecclesia disputare latius solent? qui libros scribere? qui totum de Origene loquuntur, & scribunt? qui, dum sua nolunt furta cognosci, & ingrati sunt in magistrum, iccirco simplices ab illius lectione deterrent? nominatim debes dicere, & ipsos homines denotare. Ergo beati episcopi, Anastasius, & Theophilus, & Venerius,

nerius, & Chromatius, & omnis tam Orientis quam Occidentis catholicorum synodus, qui pari sententia, quia pari & spiritu, illum hæreticum denunciant populis, fures librorum illius iudicandi sunt, & quando in ecclesiis prædicant, non scripturarum myſteria, sed Origenis furta commemorant? Non tibi sufficit passim contra omnes detractio, nisi specialiter contra beatum, & insignem ecclesiæ sacerdotem styli tui lanceam dirigas? Quis est ille, qui uelut necessitatē euangelizandi per omnes gentes, & per omnes linguas habere se putat de Origene male loquendi? qui sex millia librorum eius se legisse, quamplurima fratrum multitudine audiente, confessus est? in qua multitudine & caterua fratrum tu quoque medius eras, quando ille in sua epistola queritur, pro Origenis hæresi nefaria a te dogmata esse prolata. Crimini ei dandum est, quare Græcam, Syram, & Hebræam, & Aegyptiacam linguam, ex parte & Latinam nouerit? ergo & Apostolus, & apostolici uiri, qui linguis loquebantur, in crimine sunt: & me trilinguem bilinguis ipse ridebis? De sex millibus autem librorum, quos ab eo lectos esse confingis, quis credet aut te uerum dicere, aut illum potuisse mentiri? si enim Origenes sex millia scripsisset librorum; potuerat fieri ut uir eruditus, & ab infantia sacris literis institutus, pro curiositate & scientia legisset aliena. quod uero ille non scripsit, quo modo iste legere potuit? Numera indices librorum eius, qui in tertio uolumine Eusebii, in quo scribit uitam Pamphili, continentur: & non dico sex millia, sed tertiam partem non reperiēs. Habemus epistolam supradicti pontificis, in qua huic calumniæ tuæ, dum adhuc esses in Oriēte, respondet; & apertissimum medicum libera ueritatis fronte confutat. Post hæc & tanta audes in apologia tua dicere, te non esse defensorem Origenis, neque assertorem illius, pro cuius defensione Pamphilus & Eusebius tibi parum dixisse sunt uisi. aduersum quæ uolumina, si Dominus uitæ huius dederit spatium, alias respondere conabor: nunc tantum tuis assertionibus obuiasse sufficiat, & hoc breuiter prudentem in-

stru-

struxisse lectorem, me istum librum, qui sub nomine Pamphili ferebatur, uidisse primum scriptum in codice tuo; & quia non erat mihi curæ, quid pro hæretico diceretur, sic semper habuisse, quasi diuersum esset opus Pamphili & Eusebii: postea uero, quæstione mota, scriptis eorum respondere uoluissè; & ob hanc causam legisse, quid pro Origene unusquisque sentiret; perspicueq. deprehendisse, quod primus liber sex uoluminum Eusebii ipse esset, qui unus sub nomine Pamphili a te editus est, tam Græce, quam Latine, immutatis dumtaxat sensibus de Filio & Spiritu sancto, qui apertam blasphemiam præferebant. Vnde etiam ante annos ferme decem, cum Dexter, amicus meus, qui præfecturam administrauit prætorii, me rogasset, ut auctorum nostræ religionis ei indicem texerem; inter ceteros tractatos posui & hunc librum a Pamphilo editum, ita putans esse, ut a te & tuis discipulis fuerat diuulgatum. Sed cum ipse dicat Eusebius, Pamphilum nihil scripsisse, exceptis breuibus epistolis ad amicos; & primus liber sex uoluminum illius, eadem & eisdem uerbis contineat, quæ sub nomine Pamphili a te ficta sunt: perspicuum est, te iccirco librum hunc disseminare uoluissè, ut sub persona martyris hæresim introduceres. cumq. de ipso libro, quem Pamphili simulas, multa peruerteris; & aliter in Græco, aliter in Latino sit: fraudem tuam errori meo imputare non debes. credidi enim eius esse liberum, quem titulus præferebat, sicut *πρὸς ἀρχόν*, & multa alia Origenis opera, plurimorumq. Græcæ tractatorum, quæ aut ante non legi, aut nunc compellor legere, quæstione hæreseos suscitata; ut sciam, quæ uitare debeat, quæ probare. Vnde & in adolescentia homilias tantum eius, quas loquebatur ad populum, & in quibus non tanta scandala tenebantur, simpliciter rogantibus transtuli, nullis præiudicans, ex iis, quæ probantur, illa suscipere, quæ manifeste hæretica sunt. Certe, ut compendium longi sermonis faciam, sicut ego ostendo me ab his accepisse librum, qui de tuo codice transcripserunt; sic tu doce, a quo exemplar acceperis; ut, qui auctorem libri dare

alium

alium non potuerit, ipse falsitatis reus teneatur. Bonus ho Matth. 12
 mo de bono cordis thesauro profert illa, quæ bona sunt;
 atque ex pomorum dulcedine generosi seminis arbor agno-
 scitur. Scribit frater Eusebius, se apud Afros episcopos, qui
 propter ecclesiasticas causas ad comitatum uenerant, episto-
 lam quasi meo scriptam nomine reperisse, in qua agerem
 pœnitentiam, & me ab Hebræis in adolescentia inductum
 esse testarer, ut Hebræa uolumina in Latinum uerterem, in
 quibus nulla sit ueritas. Quod audiens obstupui. et quia in Matth. 18
 ore duorum uel trium stat omne uerbum; uniq. testi nec
 Catoni creditum est; id ipsum multorum me ex urbe fra-
 trum scripta docuerunt, sciscitantium an ita se haberet, &
 a quo ipsa epistola disseminata esset in uulgus, lacrymabi-
 liter indicantium. Qui hoc ausus est facere, quid aliud non
 audeat? Bene quod malitia non habet tantas uires; quan-
 tos conatus. perierat innocentia, si semper nequitia iun-
 cta esset potentia; & totum, quidquid cupit, calumnia præ-
 ualeret. Stylum meum, qualiscumque est, & formam elo-
 quii uir disertissimus exprimere non potuit; sed inter ipsas
 præstigias, & alterius personam, qua se fraudulenter indue-
 rat, quis esset ostendit. Ergo ille, qui epistolam sub nomi-
 ne meo pœnitentiæ finxerat, quod male Hebræa uolumi-
 na transtulissim, obicere dicitur, me in Septuaginta conde-
 mnationem scripturas sanctas interpretatum: ut, siue falsa
 sunt, siue uera, quæ transtuli, in crimine maneam; dum
 aut in nouo opere fateor me errasse, aut recens editio uete-
 ris condemnatio sit. Miror, quo modo in eadem epistola
 homicidam, & adulterum, & sacrilegum, & parricidam
 me esse non dixerit, & quidquid potest tacita mentis cogi-
 tatio intra se turpitudinis uoluere. Gratias ei debeo agere,
 quod, cum tanta silua sit criminum, unum mihi erroris uel
 falsitatis crimien obiecerit. Ego ne contra Septuaginta inter-
 pretes aliquid sum locutus, quos ante annos plurimos, di-
 ligentissime emendatos, meæ linguæ studiosis dedi, quos
 quotidie in conuentu fratrum edissero, quorum psalmos in
 g meditatione decanto? tam stultus eram, ut, quod in
 pueritia

pueritia didici, senex obliuisci uellem? uniuersi tractatus mei horum testimoniis texti sunt. commentarii in duodecim prophetas & meam & Septuaginta editionem edisserunt. O labores hominum semper incerti: o mortaliū studia contrarios interdum fines habentia. unde me putabam bene mereri de Latinis meis, & nostrorū ad discendum animos concitare, quod etiam Græci uersum de Latino post tantos interpretes non fastidiunt: inde in culpam uocor, & nauseanti stomacho cibos ingero. Ecquid in homine tutum sit, si innocentia criminosa est? Dormiente patre familias, inimicus homo zizania superseminauit. Exterminauit uineam aper de silua, & singularis ferus depastus est eam. Ego taceo, & litteræ non meæ loquuntur contra me. Ignoro crimen, & crimen in toto orbe confiteor. Heu mihi mater mea, ut quid me genuisti, uirum, qui iudicer, & discernar omni terræ? Omnes præfatiunculæ ueteris testamenti, quarum ex parte exempla subieci, huic rei testes sunt. Et superfluum est, quod in illis dictum est, aliter, quam ibi dictum est, scribere. Incipiam igitur a Genesi: cuius prologus talis est: Desiderii mei desideratas accepi epistolas, qui, quodam præfatio futurorum, cum Daniele sortitus est nomen, obsecrantis ut translatum in linguam Latinam de Hebræo sermone Pentateuchum nostrorum auribus traderem. Periculosum opus certe, & obrectatorum latratibus patens, qui me asserunt in Septuaginta interpretum suggillationem noua pro ueteribus cudere, ita ingenium quasi uinum probantes: cum ego sæpissime testatus sim, me pro uirili portione in tabernaculo Dei offerre, quæ possim, nec opes alterius aliorum paupertate fœdari. quod ut aude rem, Origenis me studium prouocauit, qui editioni anti quæ translationem Theodotionis miscuit, asterisco, & obelisco, id est, stella, & uerū, opus omne distinguens; dū aut industria facit, quæ minus ante fuerant; aut superflua quæque iugulat, & confodit, maximeque quæ euangelistarum & apostolorum auctoritas promulgauit. In quibus multa de ueteri testamento legimus, quæ in nostris codicibus non habentur,

bentur, ut est illud: Ex Aegypto uocaui filium meum. Et: *Matth. 2*
 Quoniam Nazareus uocabitur. Et: Videbunt, in quem *Ioan. 19*
 compunxerunt. Et: Flumina de uentre eius fluent aquæ *Ioan. 7*
 uiuæ. Et: Quæ nec oculus uidit, nec auris audiuit, nec in *1. Cor. 2*
 cor hominis ascenderunt, quæ præparauit Deus diligentibus
 se, & multa alia, quæ proprium *σώταγμα* desiderât.
 Interrogemus ergo eos, ubi hæc scripta sint; & cum dicere
 non potuerint, de libris Hebræis proferamus. Primum
 testimonium est in Osee, secundum in Esaia, tertium in Za *Osee 11*
 charia, quartum in Prouerbiis, quintum æque in Esaia. *Esa. 11*
 quod multi ignorantes, apocryphorum deliramenta sectan *Zach. 12*
 tur, & Hiberas nœnias libris authenticis præferunt. Cau- *Pro. 18*
 sas erroris non est meum exponere. Iudæi prudenti factum *Esa. 64*
 dicunt esse consilio; ne Ptolemæus, unius Dei cultor, apud
 Hebræos etiam duplicem diuinitatem deprehēderet: quod
 maxime iccirco faciebant, quia in Platonis dogma cadere
 uidebatur. Denique, ubicumque sacratum aliquid scriptura
 testatur de Patre & Filio & Spiritu sancto, aut aliter in-
 terpretati sunt, aut omnino tacuerunt; ut & regi satisfacere-
 rent, & arcanum fidei non diuulgarent. Et nescio quis pri-
 mus auctor septuaginta cellulas Alexandriæ mendacio suo
 extruxerit, quibus diuisi eadem scriptitarint; cum Ariste-
 as, eiusdem Ptolemæi *ὑπαρχὸς*, & multo post tempore
 Iosephus, nihil tale retulerint, sed in una basilica congre-
 gatos contulisse scribant, non prophetasse. aliud enim
 uatem, aliud interpretem esse. ibi spiritus uentura prædi-
 cit: hic eruditio, & uerborum copia ea, quæ intelligit, trās-
 fert. Nisi forte putandus est Tullius æconomicum Xenophō-
 tis, & Platonis Protagoram, & Demosthenis pro Ctesiphonte
 orationem afflatus rhetorico spiritu transulisse: ut
 aliter de eiusdem libris per Septuaginta interpretes, aliter
 per apostolos Spiritus sanctus testimonia texuerit: ut, quod
 illi tacuerint, hi scriptum esse mentiti sint. Quid igitur? da-
 mnamus ueteres? minime: sed, post priorum studia, in do-
 mo Domini, quod possumus, laboramus. Illi interpretati
 sunt ante aduentum Christi; &, quod nesciebant, dubiis
 protu-

protulere sententiis . nos, post passionē & resurrectionē eius, nō tam prophetiā, quam historiā scribimus . aliter enim audita, aliter uisa narrantur . Quod melius intelligimus , melius & proferimus . Audi igitur æmule , obrectator auscultata . Non damno, nō reprehendo Septuaginta, sed confidenter cunctis illis apostolos præfero . per istorum os mihi

Eph. 4 Christus sonat, quos ante prophetas inter spiritualia charismata positos lego : in quibus ultimum pene gradum interpretes tenent : Quid liuore torqueris ? quid imperitorum animos contra me concitas ? Sicubi tibi in translatione errare uideor ; interroga Hebræos ; diuersarum urbium magistros consule : quod illi habent de Christo , tui codices non habent . Aliud est , si contra se postea ab apostolis usurpata testimonia probauerunt ; & emendatiora sunt exemplaria Latina, quam Græca, Græca, quam Hebræa . In libris quoque Samuelis & Malachim, quos nos Regnorum quattuor nominamus , post catalogum diuinæ scripturæ hæc intuli . Quæ cum ita se habeant ; obsecro te lector , ne laborem meum reprehensionem existimes antiquorum . In tabernaculo Dei offert unusquisque quod potest . Alii aurum, & argentum , & lapides pretiosos , alii byssum , & purpuram , & coccum offerunt, & hiacynthum . nobiscum bene agitur, si obtulerimus pelles, & caprarum pilos . Et tamen Apostolus contemptibilia nostri magis necessaria iudicat . Vide

1. Cor. 12 & tota illa tabernaculi pulchritudo , & per singulas species Ecclesiæ præsentis futuræq. distinctio, pellibus tegitur, & ciliciis, ardoremq. solis & iniuriam imbrium ea, quæ uiliora sunt, prohibent . Vide, quanto contra Septuaginta interpretes tumeam supercilio, ut illos aurum, & pretiosos lapides, & purpuram, me pelles, & pilos caprarum in tabernaculo Dei obtulisse profitear . Ponam & aliud testimoniū ; ne nūc me rerum necessitate compulsus dicas mutasse sententiam . In libro temporum, idest, Paralipomenon, qui Hebraice dicitur דברי הימים Dibre haïamim, ad sâctum Chomatium præfatiuncula usus sum . Si Septuaginta interpretū pura, & ut ab eis in Græcum uersa est, editio permaneret ;

superflue

superflue me, mi Chromati, episcoporum sanctissime, atque doctissime, impelleres, ut tibi Hebræa uolumina Latino sermone transferrem. quod enim semel aures hominū occupauerat, & nascentis Ecclesiæ roborauerat fidem, iustum erat etiam nostro silentio comprobari. nunc uero, cū pro uarietate regionum diuersa ferantur exemplaria; & germana illa antiquaq. translatio corrupta sit, atque uiolata; nostri arbitrii putas, aut ex pluribus iudicare quid uerum sit, aut nouum opus in ueteri opere cudere, illudentibusq. Iudæis cornicum, ut dicitur, oculos configere. Alexandria, & Aegyptus in Septuaginta suis Hefychiū laudat auctore. Constantinopolis usque ad Antiochiam Luciani martyris exemplaria probat. Mediæ inter has provinciæ Palæstinos codices legunt; quos ab Origenē elaboratos Eusebius & Pamphilus uulgauerunt; totusq. orbis hac inter se trifaria uarietate compugnat. Et certe Origenes non solum exempla composuit quattuor editionum, e regione singula uerba describens; ut unus dissentiens, statim, ceteris inter se consentientibus, arguatur; sed, quod maioris audaciæ est, in editione Septuaginta, Theodotionis editionem miscuit, asteriscis uidelicet designans quæ minus firerant, & uirgulis quæ ex superfluo uidebantur apposita. Si igitur aliis licuit non tenere, quod semel susceperant; & post septuaginta cellulas, quæ uulgo sine auctore iactantur, singulas cellas aperire; hocq. in ecclesiis legitur, quod Septuaginta nesciunt: cur me non suscipiant Latini mei, qui, inuiolata editione ueteri, ita nouam condidi, ut laborem meum Hebræis, &, quod his maius est, apostolis auctoribus probem? Scripsi nuper librum de optimo genere interpretandi, ostendens, illa de euangelio: Ex Aegypto uocaui filium meum: & Quoniam Nazareus uocabitur: et: Videbunt in quem compunxerunt: & illud Apostoli: Quæ oculus non uidit, nec auris audiuit, nec in cor hominis ascenderunt, quæ præparauit Dominus diligentibus se: ceteraq. his similia, in Hebræorum libris inueniri. Certe Apostolus & euangelistæ, Septuaginta interpretes nouerant. & un-

H h h de

de eis hoc dicere, quod in Septuaginta non habetur? Et
 Iohan. 7 Christus, dominus noster, utrusque testamenti conditor,
 in euangelio secundum Ioānem, Qui credit, inquit, in me,
 sicut dicit scriptura, flumina de uentre eius fluent aquæ ui-
 uæ. Vtique scriptum est, quod saluator scriptum esse testa-
 tur. ubi scriptum est? Septuaginta non habent, apocrypha
 nescit Ecclesia. ad Hebræos igitur reuertendum, unde &
 Dominus loquitur, & discipuli exempla præsumunt. Hæc
 pace ueterum loquor, & obtrectatoribus meis. tantum re-
 spondeo, qui canino dente me rodunt, in publico detrahē-
 tes, legentes in angulis, iudem & accusatores. & defensores;
 cum in aliis probent, quod in me reprobant: quasi uirtus,
 & uitium non in rebus sit, sed cum auctore mutetur. Cete-
 rum memini, editionem Septuaginta translatorum olim
 de Græco emendatam tribuisse me nostris: nec inimicum
 debere existimari eorum, quos in conuentu fratrum sem-
 per edissero. Et quod nunc *ספר דברי חיים* dibre hiamim, idest,
 uerba dierum interpretatus sum; iccirco feci, ut inextrica-
 biles moras, & siluam nominum, quæ scriptorum confusa
 sunt uitio, sensuumq. labyrinthos apertius, & per uersuum
 cola digererem, mihi met ipsi & meis iuxta Hismeniam ca-
 nens, si aures surdæ sunt ceterorum. In Esdræ quoque uo-
 lumine similia præfatus sum; & post multa hæc addidi.
 Quod illaturus sum, æquissimum est. Edidi aliquid, quod
 non habetur in Græco, uel aliter habetur, quam a me uer-
 sum est. Quid interpretem lantant? interrogent Hebræos,
 & ipsi auctores, translationi meæ uel arrogent, uel de-
 rogent fidem. Porro aliud est, si clausis, quod dicitur, ocu-
 lis mihi uolunt maledicere: & non imitantur Græcorum
 studium & beneuolentiam: qui post Septuaginta transla-
 tores, iam Christi euangelio coruscante, Iudæos. & Hebion-
 tas, legis ueteris interpretes, Aquilam uidelicet, Symma-
 chum, & Theodotionem, curiose legunt, & per Origenis
 laborem *ἐν ἑξαπλόῃς* ecclesiis dedicarunt: quanto magis La-
 tini mei grati esse deberent, quod exultantem Græciam cer-
 nerent aliquid a se mutuari. Primum enim magnorum sum-
 ptuum

pruū est, & infinitæ difficultatis, exemplaria habere omnia. denique & qui habuerint, & Hebræi sermonis ignari sunt, magis errabunt, ignorantes quis e multis uerius dixerit. quod etiam sapientissimo cuidam nuper apud Græcos accidit: ut, interdum scripturæ sensum relinquens, uniuscuiuslibet interpretis sequeretur errorem. Nos autem, qui Hebrææ linguæ saltē paruam habemus scientiam; & Latinus nobis utcumque sermo non deest; & de aliis magis possumus iudicare; & ea, quæ ipsi intelligimus, in nostra lingua exprimere, Transibo ad librum Iob, quem, post Septuaginta interpretum editionem, quam Origenes obelis asteriscisq. distinxit, ante annos plurimos Latino sermoni datū; cū rursū iuxta ipsū Hebraicū uerterē; sic locutus sum. Cogor per singulos scripturæ diuinæ libros, aduersariorū respondere maledictis, qui interpretationē meā, reprehensionē Septuaginta interpretū criminantur: quasi non & apud Græcos Aquila, Symmachus, & Theodotion uel uerbum e uerbo, uel sensum e sensu, uel ex utroque commixtū & mendix temperatum genus translationis expresse- rint, & omnia ueteris instrumēti uolumina Origenes obelis asteriscisq. distinxerit; quos uel additos, uel de Theodotione sumptos translationi antiquæ inseruit, probans defuisse quod additum est. Discant igitur obtrectatores mei recipere in toto, quod in partibus susceperunt, aut interpretationem meam cum asteriscis suis radere. neque enim fieri potest, ut, quos plura intermisisse perspexerint, non eosdē etiam in quibusdam errasse fateantur, præcipue in Iob: cui si ea, quæ sub asteriscis addita sunt, subtraxeris; pars maxima detruncabitur. Et hoc dūtaxat apud Græcos. Ceterum apud Latinos, ante eam translationem, quam sub asteriscis & obelis nuper edidimus, septingenti ferme aut octingenti uersus defunt; ut decurtatus, & laceratus, corrosusq. liber, fœditatem sui publice legentibus præbeat. Et post multa, quæ studio breuitatis prætereo, hæc in fine subiunxi. Audiant quapropter canes mei, iccirco me in hoc uolumine laborasse, non ut interpretationem antiquam reprehenderem; sed

H h h 2 ut

ut ea, quæ in illa aut obscura sunt, aut omissa, aut certe uitio scriptorum deprauata, manifestiora nostra interpretatio fierent: qui & Hebræum sermonem ex parte didicimus, & in Latino pene ab ipsis incunabulis inter grammaticos, & rhetores, & philosophos detriti sumus. Quod si apud Græcos, post Septuaginta editionem, iam Christi euangelio coruscante, Iudæus Aquila, & Symmachus, ac Theodotion Iudaizantes hæretici sunt recepti; qui multa mysteria saluatoris subdola interpretatione celarunt, & tamen in Exaplis habentur apud ecclesias, & explanantur ab ecclesiasticis uiris: quanto magis ego Christianus, de parentibus Christianis natus, & uexillum crucis in mea fronte portans, cuius studium fuit omissa repetere, deprauata corrigere, & sacramenta Ecclesiæ puro & fideli aperire sermone, uel a fastidiosis, uel a malignis lectoribus nō debeo reprobari? Psalmi quoque, quod certe emendatissimum iuxta Septuaginta interpretes nostro labore dudum Roma suscepit, rursus iuxta Hebraicum uertens, præfatione muniui: & sic in parte prologi sum locutus. Quia igitur nuper cum Hebræo disputans, quædam pro Domino saluatore de psalmis testimonia protulisti; uolensq. ille te illudere, per sermones pene singulos asserēbat, non ita haberi in Hebræo, ut tu de Septuaginta interpretibus opponebas; studiosissime postulasti, ut, post Aquilam, Symmachum, & Theodotionem, nouam editionem Latino sermone transferrem, aiebas enim te magis interpretum uarietate turbari, & pro amore, quo laboris, uel translatione, uel iudicio meo esse contentum. Vnde impulsus a te, cui, & quæ non possum, negare non debeo, rursus me obtrektorū latratibus tradidi, maluiq. te uires potius meas, quam uoluntatem in amicitia querere. Certe confidenter dicam, & multos huius operis testes citabo; me nihil dumtaxat sciētem de Hebraica ueritate mutasse. Sicubi ergo editio mea a ueteribus discrepat; interroga quemlibet Hebræorum: & liquido peruidebis, me ab æmulis frustra lacerari; qui malunt contemnere uideri præclara, quā discere, peruerissimi homines.

nam

nam cum nouas semper expetant uoluptates, & gulæ eorū
 uicina maria non sufficiant; cur in solo studio scripturarum
 ueteri sapore cōtenti sunt? nec hoc dico, quod præcessores
 meos mordeam, aut quidquam de his arbitrer detrahen-
 dum, quorum translationem, diligentissime emendatam,
 olim meæ linguæ hominibus dedi; sed quod aliud sit in ec-
 clesiis Christi credentium psalmos legere, aliud Iudæis sin-
 gula uerba calumniantibus respondere. Salomonis etiam
 libros, quos olim iuxta Septuaginta additis obelis & alte-
 riscis in Latinum uerteram, ex Hebraico transferēs, & de-
 dicans sanctis episcopis Chomatio & Heliodoro, hæc in
 præfatiunculæ meæ fine subieci: Si cui Septuaginta inter-
 pretum magis editio placet, habet eam a nobis olim emen-
 datā. neque enim sic noua cudimus, ut uetera destruamus.
 Veniam & ad Esaiam; & partem prologi eius super Septua-
 ginta interpretatione subiungam. Quem cum magis euan-
 gelistam, quam prophetam dicerem, eo quod uniuersa
 Christi Ecclesiæ mysteria sic ad liquidum persecutus esset,
 ut non de futuro uaticinari, sed de præteritis historiam texe-
 re crederetur; etiam hoc addidi: Vnde coniicio noluisse
 tunc temporis Septuaginta interpretes, fidei suæ sacramen-
 ta perspicue ethnicis prodere; ne sanctum canibus, & mar-
 garitas porcis darent. Quæ, cum hanc editionem legeritis,
 ab illis animaduertetis abscondita. Nec ignoro, quanti la-
 boris sit, prophetas intelligere; nec facile quempiam posse
 iudicare de interpretatione, nisi intellexerit ante, quæ lege-
 rit: nos quoque patere moribus plurimorum, qui, stimu-
 lante inuidia, quod consequi non ualent, despiciunt. Sciens
 ergo & prudens in flammam mitto manum: & nihilo mi-
 nus a fastidiosis lectoribus hoc precor, ut, quo modo Græ-
 ci, post Septuaginta translatore, Aquilam, & Symma-
 chum, & Theodotionem legunt, uel ob studium doctrinæ
 suæ, uel ut Septuaginta magis ex collatione eorum intelli-
 gant; sic & isti saltem unum post priores habere dignentur
 interpretem. Legant prius, & postea despiciant; ne uidean-
 tur non ex iudicio, sed ex odii præsumptione ignorata da-

Matth. 7

H h h 3 mnare

mnare. De Daniele autem breuiter respondebo; me nō negasse eum prophetam, quem statim in fronte prologi prophetam esse confessus sum; sed quid Hebræi diceret, & quibus argumentis suam niterentur probare sententiam, uoluisse monstrare; & docuisse lectorem, ecclesias Christi hūc prophetam iuxta Theodotionem legere, & nō iuxta Septuaginta translatōres. Quorum si in isto libro editionem dixi multum a ueritate distare, & recto ecclesiarum Christi iudicio reprobata: non est meæ culpæ, qui dixi, sed eorum, qui legunt. In promptu sunt quattuor editiones, Aquilæ, Symmachi, Septuaginta, & Theodotionis. ecclesiæ iuxta Theodotionem legunt Danielem: ego quid peccaui, si ecclesiarum iudicium secutus sum? Quod autem refero, quid aduersum Susannæ historiam, & hymnum trium puerorū, & Belis draconis fabulas, quæ in uolumine Hebraico non habentur, Hebræi soleant dicere: qui me criminatur stultum, se sycophantam probat. non enim, quid ipse sentire, sed quid illi contra nos dicere soleant, explicauī. quorum opinioni si non respondi in prologo breuitati studens, ne nō præfationem, sed librum uiderer scribere; puto quod statim subiecerim: dixi enim: De quo non est huius temporis disserere. alioquin & ex eo, quod asserui Porphyrium contra hunc prophetam multa dixisse, uocauīq. huius rei testes Methodium, Eusebium, & Apollinarium, qui multis uersuum millibus illius uæsanix responderunt; me accusare poterit, quare non in præfatiuncula contra libros Porphyrii scripserim. Qui istiusmodi nānias consecratur, & scripturæ Hebraicæ ueritatem non uult recipere, audiat libere proclamantem. Nemo enim cogitur legere, quod non uult. Ego petentibus scripsi, non fastidiosis; gratis, non in uidis; studiosis, non oscitantibus. Et tamen miror, quo modo Theodotionem hæreticum & Iudaizantem legit, & qualiscumque peccatoris Christiani trāslationem fastidit. Quæso te, amice dulcissime, qui tam curiosus es, ut etiam somnia mea noueris; omniaque, quæ per tot annos absque metu futuræ scripsi calunianæ, in accusationem uocas;
ut

ut respondeas, quo modo eorum præfationes librorum nescias, quos accusas : quæ, quodam uaticinio, futuræ calumniæ responderent, implentes prouerbiū : Prius antidotū, quam uenenum . Quid nocet ecclesiis nostra translatio ? Magnis, ut scio, sumptibus redemisti Aquilæ, & Symmachii, & Theodotionis, quintæq. & sextæ editionis Iudaicos translatōres . Origenes tuus, & (ne forte queraris figurata te laude percussus) Origenes noster (nostrum uoco ob eruditionem ingenii, non ob dogmatū ueritatem) in omnibus libris suis, post Septuaginta interpretes, Iudæorum translationes explanat, & edisserit . Eusebius quoque, & Didymus idem faciunt . prætermitto Apollinarium, qui bono quidem studio, sed non secundum scientiam de omnium translationibus in unum uestimentum pannos assuere conatus est, & consequentiam scripturæ non ex regula ueritatis, sed ex suo iudicio texere . Apostolici uiri scripturis utuntur Hebraicis : ipsos apostolos & euangelistas hoc fecisse perspicuū est . Dominus, atque saluator, ubicūque ueteris scriptu meminit, de Hebraicis uoluminibus ponit exēpla : ut est illud : Qui credit in me, sicut scriptura dicit, flumina de uentre eius fluent aquæ uiuæ . Et in ipsa cruce, אלי אלי למה אזאתני Ioan. 7
Matth. 27
Psal. 22
Eli Eli lamma azautani : quod interpretatur : Deus meus, Deus meus, quare me dereliquisti : non, ut a Septuaginta positum est, Deus Deus meus, respice in me, quare me dereliquisti : & multa his similia . Nec hoc dicimus, quod septuaginta interpretes suggillemus, sed quod apostolorum & Christi maior sit auctoritas ; & ubicūque Septuaginta ab Hebræo non discordant, ibi apostolos de interpretatione eorum exempla sumpsisse ; ubi uero discrepant, id posuisse in Græco, quod apud Hebræos didicerāt . Sicut ergo ego ostendo, multa in nouo testamento posita de ueteribus libris, quæ in septuaginta non habentur ; & hæc scripta in Hebraico doceo : sic accusator ostendat aliquid scriptum esse in nouo testamento de septuaginta interpretibus, quod in Hebraico non habeatur : & finita contentio est . Ex quibus omnibus approbatur ; & Septuaginta

H h h 4 inter-

interpretum editionem, quæ legentium uetustate firmata est, utilem esse ecclesiis, dum ante gentes audiunt Christum uenturum esse, quam ueniat; & ceteros interpretes non reprobandos, quia non sua, sed diuina uolumina transfulerunt; & familiarem meum id a Christiano & amico debere suscipere, quod magno sumptu sibi a Iudeis describere festinauit. Excessi epistolæ modum; & qui contra nefariam hæresim iam stylum fixeram, pro me respondere compulsus sum, expectans tria amici uolumina, & ad congeriem criminum eius tota mente suspensus: nisi quod leuius est, professum inimicum cauere, quam hostem latentem sub amici nomine sustinere.

APOLOGIAE HIERONYMI

aduersus Ruffinum. **Lib. III.**

PETIS litteris prudentiæ tuæ, quibus in me inueheris, & laudatum quondam tuum, quem uerum collegam loquebaris & fratrem, nunc libris ad respondendum prouocas, terresq. criminibus; intellexi illud Salomonis in te esse completum: In ore stulti baculus contumeliæ. Et non recipit fatuus uerba prudentiæ: nisi ea **Pro. 14. 18** dixeris, quæ uersantur in corde eius. Et **Esa. 32** Elaias, Fatuus, inquit, fatua loquetur, & cor eius uana intelliget; ut compleat iniquitates, & loquatur contra Deum mendacium. Quid enim necesse fuit accusationis uolumina mittere, & maledicta proferre in medium; si tu in ultima parte epistolæ, denunciata morte, me deterres, ne audeam respondere criminibus, immo laudibus tuis? Eadem quippe & **Iac. 3** prædicas, & accusas, & de uno fonte dulce amarumq. procedit. Vnde, obsecro te, ut uerecundiam, & pudorem, quem a me exigis, prior ipse exhibeas; & qui mendacii alterum criminaris, desinas ipse mentiri. Ego nulli scandalum facio, nec accusator interim tui sum. non etenim considero, quid tu merearis, sed quid me deceat: & saluatoris eloquium pertimesco, dicentis: Qui scandalizauerit **Matth. 18** unum

unum de pueris istis, qui in me credunt; expedit ei, ut suspendatur mola asinaria in collo eius, & demergatur in profundum maris. Et, Væ mundo ab scandalis: necesse est enim, ut ueniant scandala: sed uæ homini illi, per quem scandalum uenit. Poteram & ego in te falsa congerere; & dicere me uel audisse, uel uidisse, quæ nullus norat: ut apud ignorantes impudentia ueritas, & furor constantia putaretur. Sed absit ut imitator tui sim; & quod in te reprehendo, ipse faciam. Ille loquatur spurcitas, qui potest spurca committere. Malus homo de malo cordis thesauro profert *Matth. 12* ea, quæ mala sunt. Ex abundantia cordis os loquitur. Habeto interim lucrum, quod amicus quondam tuus, nunc accusatus, turpia tibi non uult obicere. Et hoc dico, non quod accusationis tuæ gladios pertimescam; sed quod magis accusari uelim, quam accusare, & pati iniuriam, quam facere; sciens præceptum ab Apostolo: Non uosmet ipsos *Rom. 12* ulciscentes carissimi, sed date locum iræ: scriptum est enim: Mihi uindicta, & retribuam, dicit Dominus. Sed, si esurierit inimicus tuus, ciba illum: si sitierit, potum da illi. hoc enim faciens, carbones ignis congeres super caput eius. Qui enim se ipsum uindicat, ultionem Domini non meretur. Attamen, ante quam respondeam epistolæ, expoſtulare tecum libet. Venuſtissime monachorum, bone presbyter, imitator Christi, fratrem tuum potes occidere; quem si tantum oderis, homicida es? Hoc a saluatore didicisti, *1. Ioan. 2* ut uerberanti maxillam præberes & alteram? Sic ipse respō *Matth. 5* dit percussori suo: Si male locutus sum, testimonium per- *Ioan. 18* hibe de malo: si bene, quid me cædis? Mortem minaris, quam & serpentes inferre possunt. Mors omnium est, homicidium pessimorum. quid enim? nisi tu me occideris, ego immortalis ero? quin potius habeo gratiam, quod facis de necessitate uirtutem. Nonne & apostoli, saluis inter se amicitis, dissenserunt; cum Paulus & Barnabas propter *Act. 15* Ioannem cognomento Marcum stomachati sunt; & separauit eos nauigatio; quos Christi euangelium copulabat? Nonne idem Paulus in faciem Cephæ restitit, quod non re- *Gal. 2.1*

Ro

Et o pede incederet in euangelio? Et tamen præcessorem suum & columnam Ecclesiæ uocat: & exponit cum eo prædicationem, ne in uacuum curreret, aut cucurrisset. Nonne in religione etiam liberi a parentibus, & coniuges a maritis, salua pietate, dissentiunt? Vos, si ita habetis, ut habemus, cur nos odistis? si aliter creditis, quid uultis occidere? An, qui a nobis dissenserit, occidendus est? Testem inuoco Iesum conscientie meæ, qui & has litteras & tuam epistolam iudicaturus est, me ad commonitionem sancti papæ Chromatii uoluisse reticere; & finem facere simultatum, & uincere in bono malum: sed quia minaris interitum, nisi tacuero; respondere compellor; ne uidear tacendo crimen agnoscere; & lenitatem meam, malæ conscientie signum interpreteris. Hoc est uerum dilemma tuum, non ex dilectica arte, quam nescis, sed ex carnicum officina & meditatione prolatum. Si tacuero, criminosus ero: si respondero, maledicus. Tu me ergo & prohibes, & cogis ad respondendum. In quo utrumque moderabor; ut & obiecta diluam, & ab iniuria temperem. quis enim eum non timeat, qui est paratus occidere? sequarq. uestigia propositionis tuæ, seruās cetera illis eruditissimis libris, quos, ante quam legerem, confutauī. Dicis te accusationem meā ad eos tantum misisse, qui meis uerbis læsi fuerant, & non ad plures: quia non ad ostentationem, sed ad ædificationem Christianis loquendum est. Et unde, oro te, librorū tuorum ad me fama peruenit? quis eos Romæ, quis in Italia, quis in Dalmatia disseminauit? si in scriniis tuis & amicorū tuorum latebant; ad me quo modo mea crimina peruenērunt? Et audes dicere, te non ad ostentationem, sed ad ædificationem quasi Christianum loqui, qui de sene senex tanta confingis, quanta non diceret de latrone homicida, de scorto metetrix, scurra de mimo? qui parturis mihi montes criminum, & gladios, quos defigas in iugulum meum, tanto ante tempore exacuis? Iccirco ne cereales, & anabasis tui per diuersas prouincias cucurrerunt. ut laudes meas legerent? ut panegyricum tuum per angulos, & plateas, ac mulier-

lhercularum textrinas recitarent ? Hæc est tua illa sancta ue-
 recundia, hæc ædificatio Christiana : sic modestus es, sic pu-
 dens, ut cateruatim de Occidente uenientes mihi tua male
 dicta narrauerint, ita memoriter, & consentanee, ut ego
 cogerer non scriptis tuis, quæ necdum legeram, sed scripto-
 rum respondere opinionibus, & uolantia toto orbe iacula
 falsitatis, clypeo ueritatis excipere. Sequitur in epistola
 tua : Noli multo auro redimere notariū meum ; sicut amici
 tui de meis *ἢ ἀρχαῖς* schedulis, nondum emendatis, non-
 dum ad purum digestis, fecerunt ; ut facilius falsare pos-
 sent, quod aut nullus haberet, aut admodum pauci. gratis
 a me missum suscipe codicem, quem censu magno cuperes
 comparatum. Non te pudet procemii ? Ego auro redime-
 rem notarium tuum ? ecquis talis, ac tantus est, ut audeat
 cum Cræso, & Dario pugnare diuitiis ? ut subitum Dema-
 ratum, & Crassum non pertimescat ? Usque adeo ne obdu- *Esf. 28*
 rasti frontem, ut mendacium ponas spem tuam, & existi-
 mes te protegi posse mendacio ; & quidquid finxeris, tibi
 credendum putes ? Quis Bethlehem de cubiculo fratris Eu-
 sepii furatus est epistolam laudatricem tuam ? Cuius artifi-
 cio, & a cuius ministris in sanctæ Fabiolæ hospitio & uiri
 Christiani & prudentis Oceani, inuentus est codex, quem
 illi numquam uiderant ? An iccirco te existimas innocentē,
 si, quidquid tuum est, in alios conferas ? Quicumque te of-
 fenderit, quamuis simplex, quamuis innoxius sit, illico cri-
 minosus fiet ? Habes enim, per quod Danaes est uicta pu- *4. Reg. 9*
 dicitia, quod Giezi magistri prætulit sanctitati, propter quod
 Iudas tradidit Dominum suum. Videamus tamen, quid
 meus necessarius de schedulis tuis, necdum emendatis, &
 nondum ad purum digestis, falsauerit ; & ob id facilius ei fal-
 sare fuerint, quod aut nullus eas haberet, aut admodum
 pauci. Et ante scripsi, & nunc eadem, Deo audiente, pro-
 testor, me non approbasse accusationem eius, nec cuius-
 quam Christiani in Christianum. quid enim necesse est, in
 multorum scandala ruinamq. proferri, quæ secreto aut cor-
 ripere ualeas, aut emédare ? Sed quia unusquisque uiuit sto-
 macho

macho suo ; & amicus non statim Dominus est alterius uoluntatis : sicut accusationem etiam ueram reprehendo , sic falsitatem schedularum in sancto uiro non suscipio . quid enim homo Latinus de interpretatione Græca potuit immutare ? aut quid subtraheret , uel adderet in libris *αὐτῶν* , ubi sic contexta sunt omnia , & alterum pendet ex altero , ut , quidquid tollere uolueris , uel addere , quasi pannus in uestimento statim appareat ? Quod ergo me mones , ipse facito : paululum saltem humani , si non Christiani pudoris assume : ne , despecta , & calcata conscientia tua , uerbis te purgatum putes , qui rebus urgeris . Si Eusebius auro redemit inemendatas schedulas , quas falsaret : tu profer tuas , quæ falsatæ non sint : & si probaueris nihil in eis hæreticum , tunc ille crimine tenebitur falsitatis . quamuis mutet , quamuis corrigas ; catholicas non probabis . si enim error est in uerbis , aut in paucis sensibus : possunt detruncari mala , & bona pro his reponi . ubi autem tota disputatio æqualis est ; ut uniuersæ rationabiles creaturæ , quæ propria uoluntate corruerant , in unum postea reuertantur statum ; ut rursum ex eodem principio aliæ sint ruinæ : quid habes emendare , nisi cuncta mutaueris ? Quod si facere uolueris ; iam non libros alienos interpretaberis , sed condes tuos . Hoc autem cuiusmodi argumentum sit , nō intelligo . Quia , inquis , inemendatæ , & nondum ad purum digestæ erant schedulæ ; iccirco facilius ab Eusebio falsatæ sunt . Aut ego tardior sum ; aut mihi satis fatuum & obtusum uidetur . Si nondum emendatæ , nec ad purum digestæ erant schedulæ : error earum non Eusebio imputabitur , sed moræ & tarditæ tuæ , qui emendare cessasti : et in eo solo erit ille culpabilis , quia scripta tua cito disseminauit in uulgus , quæ tu paulatim emendare decreueras . Sin autē , ut tu uis , eas falsauit Eusebius : quid causaris atque prætendis inemendatas , & necdum ad purum digestas in publicum prorupisse ? et emendatæ enim , & non emendatæ similem recipiunt falsitatem . Nullus , inquis , eos habebat libros , aut admodum pauci . In uno sermone quanta diuersitas ? Si nullus eos habebat , quo-

quo modo apud paucos erant ? si pauci habebant , cur nul-
lum habuisse mentiris ? Cum autem dicas apud paucos fuisse,
& te ipso cōfiteute subuersum sit , quod nullus habuerit :
ubi est illud , quod quereris auro redemptū notarium tuū ?
Dic nomen notarii , quantum auri datum sit , ubi , per quē,
aut cui datum . Vtique proditorem tuum abiecisti a te , &
tanti facinoris reum a tuo consortio separasti . Vide ne ma-
gis illud uerum sit , a paucis illis amicis tuis & Eusebio & ce-
teris data exemplaria , quæ ita inter se congruunt , atque con-
sentiant , ut ne puncto quidem alterum ab altero differat .
Deinde cuius prudentiæ est , dare exemplar aliis , quod non-
dum emendaueras ? Scriptæ ad purum non erant schedulæ ;
& emendandos errores tuos iam alii possidebāt . Sentis ne
non hærere inter se mendacium ? Et quid tibi in articulo tē-
poris profuit , ut episcoporum sententias subterfugeris , pæ-
tere discussum , & tuis te uerbis redargui ? Ex quo apparet ,
iuxta inclyti oratoris elogium , te uoluntatem habere men-
tiendi , artem fingendi non habere . Sequar ordinem episto-
læ , & ipsa , ut locutus es , uerba subnectam . Eloquētiā , ut
dicis , tuam & in præfatione mea laudasse me fateor , & etiā
nunc laudarem , nisi tu eam , contra Tullii tui sententiam ,
multa iactantia faceres odiosā . Vbi iactaui eloquentiam
meam , qui etiam a te laudatam non libenter accepi ? An
hoc dicis , quia non uis subdola prædicatione palpari ? Aper-
te accusaberis : ut qui laudantem respuis , sentias criminan-
tem . Imperitiā autem tuam , non tam stultus eram , ut re-
prehenderem : quam nemo potest fortius accusare , quam
tu ipse , dum scribis . sed uolui ostendere condiscipulis tuis ,
qui tecum non didicerunt litteras , quid per triginta annos in
oriēte profeceris : qui συγγραφεὺς ἀγράμματος procacita-
tem disertudinem , & maledicere omnibus , bonæ conscien-
tiæ signum arbitraris . Nec tibi , ut dicis , ferulas adhibeo , ne
que athenogeronta meum scutica & plagis litteras docere
contendo : sed quia fulmen eloquentiæ tuæ atque doctrinæ
omnes tractatores ferre non possumus , & ingenii acumine
præstringis oculos nostros , intantum , ut omnes tuos inui-
dos

dos putes : certatim opprimere te cupimus : ne , si semel in scribendo obtinueris principatū , & in eloquentiæ arce steteris , cunctis nobis , qui aliquid scire uolumus , mutire non liceat . Ego philosophus , rhetor , grammaticus , dialecticus , Hebræus , Græcus , Latinus , trilinguis . Hoc modo & tu bilinguis eris ; qui tantam habes Græci Latiniq. sermonis scientiam , ut & Græci te Latinum , & Latini te Græcum putent : & papa Epiphanius πεντάλωττος , quia quinque linguis contra te , & amasium tuum loquitur . Simulq. admiror , qua temeritate contra tantarum artium uirum audeas dicere : Tu , qui tot disciplinarum oculis uigilas , quo modo uenia donandus es , si erraueris , & non perpetuo pudoris silentio contegendus ? Quod cum legissem , & me putarem alicubi in sermone lapsū , (qui enim in uerbo non peccat , iste perfectus est) & suspicarer eum aliquid in eorum prolaturum esse uitiorum : subito intulit : Antebiduum mihi , quam proficisceretur harum baiulus , in manus uenerunt , quæ in me declamasti . Vbi est ergo , quod minaris , & dicis , Quo modo donandus es uenia , si erraueris , & non perpetuo pudoris silentio contegendus ? Nisi forte præ angustia temporis non potuisti ea in ordinem digerere : aut aliquē de eruditis conducturus eras , qui in opusculis meis gemmarum eloquentiæ tuæ ornamenta perquireret . Supra scripsisti : Gratis a me missum codicem suscipe , quem censu magno cuperes comparatum : & nūc humilitatis præstigiis loqueris : Imitari te uolui ; sed reseslinante eo , qui ad te remeabat , malui paucis ad te , quam ad alios pro tuis maledictis latius , scribere . Et interim audacter fruitor imperitia tua . semel enim confessus es , dicens , superflua tibi reprehensio fuit in paucis , quæ professæ nobis habetur in omnibus . Nec reprehendam , quod comparatum codicem pro empto posueris : cum comparatio æqualium sit , emptio pretii annumeratio : & Reseslinante eo , qui ad te remeabat , sordidissimæ elocutionis περιστολογία . tantum sensibus respondebo , & te nequaquam solocistam , ac barbarum , sed mendacem , subdolum , impudentem esse conuincam . Si ad

ad me tantum epistolam scribis, ut me commoneas & emendatum uelis, ne ceteris scandalum facias, & aliis furentibus iugulentur alii: cur libros contra me scribis ad alios, & legendos per satellites tuos toto orbe dispergis? Vbi est syllogismus tuus, quo me irretire conaris, & loqueris: Quem in hoc magister optime emendare cupiebas, si illi, ad quos scribis, nihil deliquerant? Si me, quem arguis; non ad me scripseras. Et ego tuis tibi respondebo sermonibus. Quem emendare cupiebas magister indocte? eos ne, qui non peccauerant? an me, ad quem non scripseras? Brutos putas esse lectores, & omnes non intelligere prudentiam tuam, immo malitiam, qua & serpens prudentior fuit cunctis bestiis in paradiso: ut a me secretam admonitionem flagites, quem publica accusatione persequeris: & non te pudeat, accusationem tuam apologiā uocare? Quererisq. cur opponam clypeum pugioni tuo: & tibi quasi religiosulus & sanctulus personam humilitatis imponis, & dicis: Si erraueram, quare scribis aliis, & nō me ipsum redarguis? Hoc ipsum in te retorquebo. Quidquid enim me non fecisse caufaris, quare non ipse fecisti? Velut si quis pugnis aliquem calcibusq. collidens, si resistere uoluerit, dicat ei: Nōne tibi praeceptum est: Qui te percusserit in maxillam, praebe illi & alteram? Quid enim, bone uir, tibi praeceptum est ut me uerberes? Oculum mihi effodias: & si paululum me commouero, euangelii mihi praecepta cantabis? Vis scire totas argutiarum tuarum strophas, & uulpecularum insidias, quae habitant in parietinis: de quibus Ezechiel loquitur: Quasi uulpes in deserto prophetae tui Israel? Ausculta quid feceris. Ita me in tua praefatione laudasti, ut obicerentur mihi laudes tuae: & nisi me alienum a tanto laudatore dixissem, haereticus iudicaretur. Postquam repuli crimina, id est, laudes tuas; & absque inuidia tui nominis, respondi criminibus non criminatori; atque, ut me catholicum a te infamatus probarem, inuectus sum in haereticos; irascaris, furis, & luculentissimos libros contra me cedis: quos cum legendos & cantandos omnibus tradidisses, certatim ad me

Gen. 3

Matth. 5

Exech. 13

de

de Italia & urbe Roma atque Dalmatia scripta uenerunt, quibus me laudator pristinus ornasset præconiis. Fateor, illico ad obiecta respondi; & me non esse hæreticum, totis uiribus probare conatus sum. misique hos ipsos Apologiæ meæ libros ad eos, quos tu uulneraueras: ut uenena tua, nostra sequeretur antidotus. Ob hanc culpam mittis mihi & priores libros, & recentem epistolam, plenam iniuriarum & criminum. Quid me uis facere bone amice? Taceam? Videbor crimen agnoscere. Loquar? Terres me gladiis tuis; & accusationem non iam ecclesiasticam, sed tribunalium comminaris. Quid feci? quid commerui? in quo te læsi? Quia me negaui hæreticum? quia me tuis laudibus duxi indignum? quia hæreticorum fraudulentias & periuria aperto sermone descripsi? Quid ad te? qui & catholicum & ueracem te esse iactas; qui libentius me accusas, quam te defendis. Num mea defensio, accusatio tua est? aut aliter orthodoxus esse non poteris, nisi me hæreticum comprobaueris? Quid tibi prodest societas mea? aut quæ est ista prudentia? Accusatus ab aliis, accusas alium. Ab alio appeteris: & illi tergum obuertens, quiescentem contra te prouocas. Testor mediatorem Iesum, inuitum me & repugnātem ad hæc uerba descendere: & nisi tu prouocares, semper tacitum fuisse. Denique noli accusare, & ego cessabo defendere. Quæ enim est audientium ædificatio, duos senes inter se propter hæreticos digladiari; præsertim cum ambo catholicos se uideri uelint? Omittamus hæreticorum patrocinium: & nulla erit inter nos cōtentio. Eodem seruire, quo Origenem ante laudauimus, nunc damnatum toto orbe, damnemus. Iungamus dexteras, animos copulemus: & duos Orientis atque Occidentis *προπρόσφρυς*, alacri sequamur incessu. Errauimus iuuenes, emendemur senes. Si frater es; me gaude correctum: si amicus sum; de conuersione tua debeo gratulari. Quamdiu inter nos iurgium fuerit; uidebimur rectam fidem necessitate ducere, non uoluntate. Inimicitia nostræ inuicem nobis tollunt testimonium ueræ pænitentia. Si unum credimus, si idem & uolumus

&

mulas; quæris a me primum de cælestibus, quo modo angeli, quo modo archangeli sint; quæ eis, uel qualis habitatio; quæue inter ipsos differentia; aut, si nulla omnino, quæ solis sit ratio; unde augmenta lunæ; unde defectus, quis uel qualis sit siderum cursus. Miror, quo modo oblitus sis illos uersiculos ponere: Vnde tremor terris, quæ uel maria alta tumescant; Obicibus ruptis, rursusq. in se ipsa residant; Defectus solis uarios, lunæq. labores: Vnde hominum genus, & pecudum: unde imber, & ignes: Arcturum, pluuiasq. hyadas, geminosq. triones: Quid tantum Oceano properent se tingere soles Hiberni, uel quæ tardis mora noctibus obstet. Deinde cælestia deferens, & ad terrena descendens, in minoribus philosopharis: interrogas enim me: Dic nobis, quæ fontium ratio? quæ uentorum? quid grando? quid pluuiæ? quid mare salsum? quid flumina dulcia? quid nubes, aut imbres, fulgura, aut tonitrua, aut fulmina? Vt, postquam me hæc nescire respondero, tuto tibi liceat de animabus ignorare; & unius rei scientiam tantarum rerum ignoracione compenses. Tu, qui per singulas paginas fumos meos uentilas, non intelligis uidere nos caligines tuas, & turbines? Nam, ut tibi sciolus esse uidearis, & apud Calpurnianos discipulos doctrinæ gloriam teneas; totam mihi physicam opponis: ut frustra Socrates ad ethicam transiens dixerit: quæ supra nos, nihil ad nos. Ergo, nisi tibi rationem reddidero, quare formica, paruum animal, & punctum, ut ita dicam, corporis, sex pedes habeat; cum elephāntus, tanta moles, quattuor pedibus incedat; cur serpentes & colubri uentre labantur, & pectore; cur uermiculus, quem uulgus millepedam uocat, tanto pedum agmine scateat; de animarum statu scire non potero. Quæris a me, quid ipse de animabus sentiam: ut, cum professus fuero, statim inuadas: et, si dixerō illud ecclesiasticū; Quotidie Deus operatur animas, & in corpora eas mittit nascentium; illico magistri tendiculas proferas: Et ubi est iustitia Dei, ut de adulterio incestuq. nascentibus animas largiatur? ergo cooperator est malorum hominum; & adul-

K k k teris

teris seminantibus corpora, ipse fabricatur animas? Quasi initium sementis in tritico sit, quod furto dicitur esse sublatum, & non in eo, qui frumenta furatus est; iccircoq. terra non debeat gremio suo semina confouere, quia sator immunda ea proiecerit manu. Hinc est & illa tua arcana interrogatio: quare moriantur infantes; cum propter peccata corpora acceperint. Extat liber Didymi ad te: quo sciscitanti tibi respondit: non eos multa peccasse, & ideo corporum carceres tantum eis tetigisse sufficere. Magister meus & tuus eo tempore, quo tu ab eo ista quærebas, tres explanationum in Osee prophetam libros ad me, me rogante, dictauit. ex quo apparet, quid me, quid te docuerit. Vrges ut respondeam de natura rerum. Si esset locus; possem tibi uel Lucretii opiniones iuxta Epicurum, uel Aristotelis iuxta Peripateticos, uel Platonis atque Zenonis secundum Academicos & Stoicos dicere: et, ut ad Ecclesiam transeam, ubi norma est ueritatis; multa & Genesis, & prophetarum libri, ac Ecclesiastes nobis de huiusmodi questionibus suggerunt. aut, si hæc ignoramus, quo modo de animarum statu; debueras in Apologia tua omnium rerum ignorantiam confiteri, & a calumniatoribus quærere, cur a te unum impudenter expeterent, cum ipsi tanta nescirent? O tritem locupletissimam, quæ Orientalibus & Aegyptiis mercibus, Romanæ urbis ditare uenerat paupertatem. Tu maximus ille es, Vnus qui nobis scribendo restituis rem. Ergo, nisi de Oriente uenisses eruditissimus uir; hæret adhuc inter mathematicos; & homines Christiani, quid contra factum differerent, ignorarent. Merito a me quæris de astrologia, & cæli ac siderum cursu, qui tantarum mercium plenam nauem detulisti. Fateor paupertatem: non sum ita, ut tu, in Oriente ditatus. Te multo tempore Pharos docuit, quod Roma nesciuit; instruxit Aegyptus, quod Italia hucusque non habuit. Scribis, apud ecclesiasticos tractatores tres de animabus esse sententias, unam, quam sequitur Origenes; alteram, quam Tertullianus, & Lactantius; licet de Lactantio apertissime mentiaris; tertiam,

am, quam nos, simplices & fatui homines, qui non intelligimus, quod, si ita sit, iniustus a nobis arguatur Deus. Et post hæc iuras te nescire quid sit uerum. Dic, oro te: putas ne extra hæc tria esse aliquid, in quo ueritas sit, et in tribus istis mendacium? an de tribus unum esse, quod uerum sit? Si est aliquid: cur disputantium libertatem angusto fine concludis, & cum mendacia protuleris, de ueritate taces? sin autem e tribus unum uerū est, & reliqua duo falsa sunt: cur simili ignorantia ignoras falsa cum ueris? An iccirco uerum dissimulas, ut tibi tutum sit, cū uolueris, falsa defendere? Hi sunt fumi, hæ caligines, quibus ex oculis hominū conaris lumē auferre. Aristippus nostri temporis, qui plenam cunctarum mercium nauem Romano inuehis portui, & sella publice posita, Hermagoram nobis & Gorgiam exhibes Leontinū; dum nauigare festinas, unius quæstiunculæ mercimonium in Oriente oblitus es. Et iterum clamitas; & Aquileiæ, atque Alexandriæ te didicisse iactas; quod sit Deus & animarum & corporum creator. De hoc scilicet quæstio uentilatur, utrum Deus, an diabolus animas fecerit; & non utrum animæ ante corpora fuerint, quod uult Origenes, & egerint aliquid, propter quod sint crassis corporibus alligatæ; an in morem glirium torpentes consopitæq. dormierint. Hæc taces. quæ omnes flagitant; & ad illa respondes, quæ nullus inquit. Fumos quoque meos frequenter irrides, eo quod similem me scire quod nesciam; & enumeratione doctorum, rude illudam uulgus. Tu uidelicet flammeus, immo fulmineus: qui in loquendo fulminas, & flammæ ore conceptas tenere non potes, atque, ut ille Barthochabas, auctor seditionis Iudaicæ, stipulam in ore succensam anhelitu uentilabat, ut flammæ euomere putaretur, ita & tu nobis, alter Salmoneus, omnia, per quæ incedis, illustras, & nos fumosos arguis, de quibus forte dicatur: Qui tangis montes, & fumi- *Psal. 103*
gant: nec intelligis, quid fumus in propheta significet locu- *Esa. 40*
starum; & quod pulchritudo oculorum tuorum, amaritudinem fumi nostri ferre non potest. De crimine autem periu-

K k 2 rii,

rii, quia me remittis ad codicem tuum; & ex magna parte in aliis libris tibi Calpurnioq. respondi; nunc breuiter dixisse sufficiat, te exigere a dormiente, quod numquam uigilans præstitisti. Magni criminis reus sum, si, puellis & uirginitatibus Christi, dixi, sæculares libros non legendos, & me in somnis commonitum promississe ne legerem. Tua nauis, Romanæ urbi reuelatione promissa, aliud pollicetur, & aliud efficit. Mathematicorum uenerat soluere quæstiones, & soluit fidem Christianorum. quæ per Ionium, & Aegæum, Adriaticum, atque Tyrrhenum mare plenis cucurrerat uelis, in Romano portu naufragium fecit. Nonne te pudet, istiusmodi deliramenta conquirere, & mihi similia obiciendi imponere necessitatem? Efto, alius de te somnium uiderat gloriosum: uerecundix tuæ fuerat, & prudentix, dissimulare, quod audieras, & non, quasi magno testimonio, alterius somnio gloriari. Vide, quid inter tuum & meum intersit somnium. Ego me humiliter reprehensum refero: tu iactanter laudatum te esse. congeminas. Nec dicere potes: nihil mea refert, quid alius uiderit: cum in luculentissimis libris tuis hac te ad interpretandum dicas ratione commotum, ne uir illustris de te somnium perderet. Hic est omnis conatus tuus: si me periurum docueris, tu hæreticus non eris. Venio ad grauissimum crimen, in quo, post reconciliatas amicitias, me infidelitatis accusas. Fateor, inter cuncta maledicta, quæ uel obicis, uel minaris, nihil a me ita repellendum est, quam fraus, dolus, infidelitas. Peccare enim, hominis est: insidias tendere, diaboli. Ergo ideo in anastasi immo lato agno dexteris iunximus, ut tuas Romanæ schedulas furaremur? ut immissi canes inemendatas chartulas, te dormiente, corroderent? et hoc credibile est, ante nos accusatores parasse, quam tu crimen admitteres? Scilicet noueramus, quid in animo uolueres, quid alius de te somniaturus esset? ut impleretur in te Græcum prouerbum, Ut sus doceret Mineruam. Si Eusebium ego ad latrandum miseram; quis Aterbii contra te & ceterorum rabiem concitauit? nonne ille, qui & me hæreticum ex tuis
ami-

amicitiis indicabat? cui cum satisfecissem, damnatione dogmatum Origenis; tu, clausus domi, numquam eum uidere ausus es: ne aut damnares, quod nolebas; aut, aperte resistens, hæreseos inuidiam sustineres. An iccirco testis contra te esse non poterit, quia accusator tui est? Ante quam sanctus Epiphanius uenisset Hierosolymam, & ore quidem & osculo tibi pacem daret, mala autem & dolos in suo corde seruaret; ante quam nos ei in suggillationem tui epistolae distarem, ut hæreticum scriberet, quem osculis orthodoxum comprobauit; Aterbius contra te latrabat Hierosolymis; & nisi cito abisset, sensisset baculum non litterarum, sed dexteræ tuæ, quo tu canes abigere consueuisti. Cur, inquit, falsas meas schedulas suscepisti? Quare, post interpretationem meam, ausus es in libris *ὡς ἀρχὴν* stylum figere? aut, si erraueram ut homo, debuisti me priuatis litteris conuenire, & sic mihi blandiri, quo modo & ego tibi nunc in epistolis meis blandior. Hæc tota mea culpa est, quare, subdolis laudibus accusatus, purgare me uolui; & hoc sine inuidia nominis tui, ut, quod tu solus accusaueras, ad multos referrem, non tibi hæresim obiiiciens, sed a me repellens. Nunquid sciri quod irascereris, si contra hæreticos scriberem? Dixeras te de Origenis libris hæretica sustulisse: fautorem te hæreticorum iam non esse credebam; & ideo non in te, sed in hæreticos inuectus sum: in quo si uehementior fui, ignosce mihi: putavi, quod & tibi placerem. Furto & insidiis ministrorum meorum dicis schedulas tuas in publicum prolatas fuisse, quæ latebant in cubiculo tuo, uel apud eum solum erant, qui rem sibi geri iniunxerat. Et quo modo supra confiteris, quod aut nullus eas habuerit, aut admodum pauci? Si in cubiculo tuo latebant; qua ratione apud eum erant, qui sibi rem geri iniunxerat? sin autem unus, cui scriptæ fuerant, occulandas susceperat; ergo non latebant tantum in cubiculo tuo; nec habuerunt eas pauci, quos habuisse testatus es. Furto sublatas arguis: & rursum emptas grandi pecunia; & infinitis mercibus criminaris. In una re, & in parua epistola, quanta uarietas, & dissonantia mentiendi. Tibi

K k k 3 licet

licet accusare, mihi defendere non licebit? Quando criminari, amicum non cogitas: quando respondeo, tunc tibi ius amicitiae in mentem uenit. Dic, oro te, celandas schedulas scripseras, an prodendas? si ut celares, cur scripsisti? si ut proderes, cur celabas? sed in eo reprehendendus sum, quare accusatores tuos, amicos meos, non coercuerim. Vis tibi proferam litteras eorum, in quibus me hypocriseos arguunt, quod te sciens haereticum tacuerim? quod, dum pacem incautus praebere, intestina Ecclesiae bella suscepi? Tu discipulos uocas, qui me tuum condiscipulum suspicantur: & quia parcius fui in refellendis laudibus tuis, putant me tuum esse symmysten. Hoc mihi praestitit prologus tuus, ut plus me amicus laederes, quam inimicus. Semel sibi persuasiant, recte, an peperam, ipsi uiderint, te esse haereticum. Si defendere uolueris; hoc solum proficiam, ut me tecum pariter accusent. Denique mihi obiciunt laudationem tuam, & te non putant insidiosae scripsisse, sed uere; &, quod tu in me semper ante laudabas, uehementer insimulant. Quid me uis facere? ut discipulos accusatores pro te habeam? ut contorta in amicum iacula meo suscipiam pectore? De libris autem *mei ἀρχαῖν*, debes mihi & gratias agere. tu enim, ut dicis, noxia quaeque det truncans, meliora posuisti: ego ita, ut habebantur in Graeco, expressi. ex quo & tua apparet fides, & eius, quem interpretatus es, haeresis. Scribebatur mihi de urbe a uiris in Christo praecipuis: responde criminali; ne, si tacueris, consensisse uidearis. consona omnes uoce poscebant, ut Origenis uersutias proderem, & uenena haereticorum Romanis auribus cauenda monstrarem. quid hoc ad iniuriam tuam pertinet? num solus interpretatus es istos libros, & alios huius operis non habes participes? Numquid & tu de Septuaginta interpretibus es; ut, post editionem tuam, aliis transferre non liceat? Ecce & ego multos, ut dicis, libellos de Graeco in Latinum transtuli: habes potestatem & tu rursus eos uertendi, ut uolueris. & bona enim & mala suo imputantur auctori. quod & in te fieret, nisi dixisses te amputasse haeretica, & optima transtulisse. hic est enim

nodus

modus tuus, qui solui non potest. At, si errasti ut homo; priorem damna sententiam. Sed quid facies de Apologetico tuo, quem pro Origenis scripsisti operibus? quid de uolumine Eusebii; in quo cum multa mutaueris; & sub nomine martyris, hæretici hominis scripta transtuleris; tamen plura posuisti, quæ ecclesiasticæ fidei non conueniunt? Tu etiam Latinos libros in Græcum uertis; nobis dare nostris externa prohibebis? Si in alio opere respondissem, in quo me non læseras; uideri poteram in iniuriam tuam transferre quod uerteras; ut te uel imperitum, uel subdolum demonstrarem: nunc uero, nouum querimoniarum genus, doles tibi in eo esse responsum, in quo a te accusatus sum. Dicebatur ad interpretationem tuam Roma subuersa: postulabant omnes a me huius rei remedium: non quo ego alicuius momenti essem: sed qui petebant, me esse aliquid arbitrabantur. Tu amicus eras, qui illa transtuleras? quid me uis facere? obedire Deo magis oportet, an hominibus? Domini cur stodire substantiam, an furtum celare conserui? Aliter te non placabo, nisi & ego tecum accusanda commiseri. Si nullam fecisses mei nominis mentionem; si me non ornasses egregiis laudibus; poteram aliquod habere sustugium, & diuersa obtendere, ne rursus interpretata transferrem. Tu me, amice, tu compulisti, ut aliquot dies in hoc opere perderem, ut proferrem in medium quod Charybdis debuit deuorare: & tamen læsus amicitiarum in te iura seruauit; & quantum in me fuit, sic me defendi, ut te non accusarem. Tu nimium suspiciosus, & querulus, qui dicta in hæreticos ad tuam refers contumeliam. Quod si aliter amicus tuus esse non possum, nisi & hæreticorum amicus fuero: leuius tuas inimicitias, quam illorum amicitias, sustinebo. Nouum quoque me putas finxisse mendacium, ut epistolam ad te meo nomine componerem, quasi olim scriptam, quo bonus esse uidear, & modestus, quam tu numquam omnino susceperis. Hæc res per facile probari potest: multi Romæ eius exemplaria habent, ante hoc circiter triennium, qui tibi eam mittere noluerunt, sciētes quæ de meo nomine iactitares, & quam indigna pro-

K k k 4

posito

posito Christiano, ac nefanda confingeres. Ego scripsi negligens quasi ad amicum: illi non reddiderunt ei, quem inimicum nouerant; parcentes & meo errori, & tuæ conscientie. Et simul argumentaris, quod, si talem tibi epistolam scripsissem, non debueram contra te in alio libello multa mala scribere. Hic est totus error tuus; & hæc iusta querimonia; quod, quæ nos in hæreticos dicimus, tu in te dicta confingis; & nisi illis pepercerimus, te putas esse uiolatum. An ideo panem tibi non danimus, quia hæreticorum cerebro lapidem illidimus? Et ut nostram epistolam non probes, papæ quoque Anastasii simili dicis fraude subnixam, de qua tibi ante respondi: quam si suspicaris ipsius non esse: habes ubi apud eum nos arguas falsitatis. sin autem eius est, ut huius quoque anni contra te epistolæ probant; frustra & falso falsam arguere niteris; cum ex illius uera epistola nostram ueram esse doceamus. In excusando mendacio tuo quam elegans esse uoluisti: & ne sex millia Origenis libros proferas, Pythagoræ a me exigis monumenta. Vbi est illa fiducia, qua inflatis buccis creberrime personabas, te, quæ in aliis libris Origenis legeras, emendasse in libris *αὐτοῦ ἀρχαῖν*, & non aliena, sed sua reddidisse suis? de tanta librorum filua unum fruticem ac surculum proferre nō potes. Hi sunt ueri fumi, hæc nebula: quas, dum in me criminaris, in te extinctas dissipatasque per me cognoscis: nec fractam ceruicem deiicis, sed maiori imprudentia, quam imperitia, dicis me negare, quæ in promptu sunt; ut, cum montes aureos pollicitus fueris, ne scortum quidem nummum de thesauris tuis proferas. Iusta contra me odia recognosco, & uera in nos debaccharis insania: nisi enim ego, quod non est, audacter exigere; tu uidebaris habere, quod non habes. Pythagoræ a me libros flagitas. Quis enim tibi dixit, illius extare uolumina? nonne in epistola mea, quam criminaris, hæc uerba sunt? Sed fac me errasse in adulescentia, & philosophorum, idest, gentilium studiis eruditum, in principio fidei ignorasse dogmata Christiana; & hoc putasse in apostolis, quod in Pythagora, & Platone, & Empedocle legeram. De dogmatibus

eorum,

eorum; non de libris, locutus sum, quæ potui in Cicerone, Bruto, ac Seneca discere. Lege pro Vatinio oratiunculâ, & alias, ubi sodalitiū mentio fit. reuolue dialogos Tullii. respice omnem oram Italiæ, quæ quondam magna Græcia dicebatur: & Pythagoricorum dogmatum incisa publicis litteris æra cognosces. cuius enim sunt illa, χρυσὰ παραγέματα? nonne Pythagoræ? in quibus omnia eius breuiter dogmata continentur, & in quæ latissimo opère philosophus commentatus est Iamblichus, imitatus ex parte Moderatum, uirum eloquentissimum, & Archippum, ac Lysidem, Pythagoræ auditores. quorum Archippus ac Lysides in Græcia, idest, Thebis scholas habuere: qui memoriter tenentes præcepta doctoris, ingenio pro libris utebantur: a quibus illud est: *σοφικόν πάντα πασι καὶ ἐκκοπτόν, ἀσθενείαν μὲν τῷ σώματος, ἀπαίδειαν δὲ τῆς ψυχῆς; ἀκολασίαν δὲ τῆς γαστρὸς, σάσιν δὲ τῆς πόλεως, τὴν δὲ διαφθάναν τῷ τῆς οἰκίας, καὶ κοινῇ τῷ πάντων τὸ ἀκρατές.* quod in Latinū ita possumus uertere. Fugāda sunt omnibus modis, & abscindēda, lāguor a corpore, imperitia ab animo, luxuria a uētre, a ciuitate seditio, a domo discordia, & in cōmune a cunctis rebus intemperantia. Pythagorica & illa præcepta sunt: Amicorū omnia esse communia: & Amicū se ipsum esse alterum: Duorumq. tēporū quātaxime habendam curam, mane, & uesperī, idest, eorū, quæ acturi sumus, & eorum, quæ gesserimus: Post Deum ueritatem colēdam, quæ sola homines Deo proximos faciat. Illaq. ænigmata, quæ diligentissime Aristoteles in suis libris persequitur: Stateram ne transilias, idest, ne prætergrediare iustitiam: Ignem gladio ne fodias: iratum uidelicet & timidum animum uerbis maledicis ne laceffas: Coronam minime carpendam, idest, leges urbium conseruandas: Cor nō comedendum, idest, mærorē de animo proiciendum: Cū profectus fueris, inquit, ne redeas: idest, post mortem uitā uitam ne desideres: Per uiam publicam ne ambules, idest, ne multorum sequaris errorem. Hirundinem in domum non suscipiendam, idest, garrulos & uerbosos homines sub eodē

tecto

tecto non habendos : Oneratis superponendum onus, depo-
 nentibus non communicandum : idest, ad uirtutem incedē-
 tibus augenda praecepta, tradentes se otio relinquendos. Et
 quia Pythagorica dogmata legisse me dixeram; audi, quid
 apud Græcos Pythagoras primus inuenerit : immortales
 esse animas, & de aliis corporibus transire in alia. quod qui-
 dem & Virgilius in sexto Aeneidos uolumine sequens, lo-
 quitur : Has omnes, ubi mille rotam uoluere per annos,
 Lethæum ad fluuium Deus euocat agmine magno; scilicet
 immemores supera ut conuexa reuifant, Rursus & incipiāt
 in corpora uelle reuerti. Se primum fuisse Euphorbum, se-
 cundo Callidem, tertio Hermotimum, quarto Pyrrhum, ad
 extremum Pythagoram : & post certos temporum circu-
 los, ea, quæ fuerant, rursus fieri; nihilq. in mundo uideri
 nouum : philosophiam meditationem esse mortis, quotidie
 de corporis carcere nitentem animæ educere libertatem :
 μαθήσεις ἀναμνήσεις εἶναι : & multa alia, quæ Plato in li-
 bris suis, & maxime in Phædone, Timæoq. persequitur.
 nam, post Academiam, & innumerabiles discipulos, sen-
 tiens multum suæ deesse doctrinæ, uenit ad Magnam Græ-
 ciam; ibiq. ab Archyta Tarentino, & Timæo Locrensi, Py-
 thagoræ doctrina eruditus, elegantiam & leporem Socratis
 cum huius miscuit disciplinis : quæ omnia, nomine commu-
 tato, Origenes in libros suos περὶ ἀρχῶν transtulisse conuin-
 citur. In quo igitur erraui, si adolescens dixi, me ea putasse
 in apostolis, quæ in Pythagora, & Platone, & Empedocle le-
 geram? non, ut tu calumniaris, & fingis, in Pythagoræ, &
 Platonis, & Empedoclis libris, sed quæ in illis fuisse legerā,
 & aliorum me scripta eos habuisse docuerant. & hoc genus
 elocutionis frequentissimum est : ut, si dicam, quæ in Socra-
 te legi dogmata, putaui uerā : non quod Socrates libros ul-
 los scripserit; sed quæ legi apud Platonem, & alios Socrati-
 cos illum habuisse. Et rursus : imitari uolui gesta, quæ in
 Alexandro & Scipione legeram : non quod ipsi sua gesta de-
 scripserint; sed quod apud alios legerim, quæ illos gessisse mi-
 rabar. Igitur, etiam si docere non possem, ipsius Pythago-

ræ extare monumenta ; nec a filio eius , ac filia , aliisq. disci-
 pulis probata conuincerem ; me non teneres mendacii , quia
 non libros , sed dogmata legisse me dixi ; & te frustra errare ,
 me tuum protegere mendacium uoluisse : ut , nisi ego unum
 librum Pythagoræ protulero , tu sex millia Origenis libros
 perdideris . Veniam ad epilogos , idest , maledicta tua : in
 quibus me ad pænitentiam cohortaris ; & , nisi conuersus fue-
 ro , idest , nisi te accusante siluero , mihi minaris interitum :
 & hoc scandalum redundaturum in caput meum denuncias ,
 qui te , hominem lenissimum , & Mosaicæ mansuetudinis ,
 responsione mea ad scriptionis insaniam prouocauerim . Sci-
 re enim te iactas crimina , quæ tibi soli amicissimo sim con-
 fessus , & hæc in mediū prolaturum : meisq. me coloribus
 esse pingendum : & debere meminisse , quod iacuerim ad pe-
 des tuos , ne gladio oris tui amputares caput meum . Et post
 multa , in quibus furibundus exultas , reuocas te , & dicis
 optare pacem cum denunciatione dumtaxat , ut deinceps ta-
 ceam : idest , ut non scribam contra hæreticos , nec audeam
 respondere accusationi tuæ . si hoc fecero ; frater ero , & col-
 lega , & uir eloquentissimus , & amicus , ac sodalis , & , quod
 his maius est , omnia , quæ de Origene transtuli , catholica
 iudicabis . sin autem mutiero , & me commouero ; illico im-
 purus ero , & hæreticus , & tua indignus necessitudine . Hæc
 sunt præconia mea : sic me hortaris ad pacem : & ne gemitū
 quidem ac lacrymas dolori liberas esse concedis . Possem &
 ego tuis te coloribus pingere , & insanire contra insanientē ,
 & dicere quidquid uel scio , uel nescio ; & eadem licentia , im-
 mo furore , & amentia , uel falsa , uel uera congerere : ut &
 me loqui , & te puderet audire : & obicere tibi , quæ aut ac-
 cusantem damnarent , aut accusatum : ut ex frontis duritia si-
 dem lectori facerem : ut , quod impudenter scriberem , uere
 scribere iudicaret . Sed procul sit a moribus Christianis , ut
 dum aliorum petunt sanguinem , suum offerant , & sine gla-
 dio uoluntate homicidæ sint : Tuæ hoc bonitati , tuæq. man-
 suetudini , & simplicitati conuenit ; qui de uno pectoris ster-
 quilinio & odorem rosarum , & foetorem profers cadauerū ;
 &

Num. 12.

Esa. 5 & contra sententiam prophetalem, amarum dicis esse, quod quasi dulce laudaueras. Nec necesse est, ut in ecclesiasticis tractatibus rem tribunaliū uentilemus. Nihilq. super hoc amplius audies, nisi illud e tritio: Cum dixeris quod uis, audies quod non uis. Aut, si tibi uile uidetur uulgare prouerbium, & homo sapientissimus, magis philosophorū ac poetarum sententiis delectaris; lege illud Homericum: *ἐπὶ τοῖον κ' εἰπὴν τὰ δ' ἔπος, τοῖον κ' ἐπακέσεις*. Hoc solum requiro ab eximia sanctitate & censura tua; cuius tanta est puritas, ut ad sudaria & semicinctia tua dæmones fugiant; cuius exemplum in scribendo sequaris? quis umquam catholicorum, in disputatione sectarum, turpitudinem ei, aduersum quem disputat, obiecit? sic te docuerunt magistri tui? talibus institutus es disciplinis; ut, cui respondere non potueris, caput auferas, & linguam, quæ tacere non potest, feces? Nec magnopere glorieris, si facias quod scorpiones possunt facere, & cantharides. Fecerunt hoc & Fulvia in Ciceronē,

Luc. 3 & Herodias in Ioannem, quia ueritatem non poterant audire; & linguam ueriloquam discriminati ac confoderunt. Canes latrant pro dominis suis, & tu non uis me latrare pro Christo? Scripserunt multi contra Marcionem; Valentinū; Ariū, & Eunomium. a quo eis obiecta est turpitudine? nonne toti in cōuincenda hæresi incubuerunt? Ista machinæ hæreticorum, idest, magistrorum tuorum sunt; ut, conuicti de perfidia, ad maledicta se conferant. sic Eustachius, Antiochenus episcopus, filios dum nescit, inuenit. sic Athanasius, Alexandrinæ urbis pontifex, tertiam Arsenii amputauit manum. duas enim, qui mortuus prius fingebatur, uiuens postea habere monstratus est. Talia & condiscipuli tui, & magistri, nunc de eiusdem ecclesiæ sacerdote confingunt; & auro, idest, tuis tuorumq. uiribus oppugnant fidei ueritatem. Quid loquat de hæreticis, qui licet foris sint, tamen se nominant Christianos? Aduersum impiūssimos Celsū, atque Porphyriū quāti scripsere nostrorum? quis, omīssa causā, in superflua criminum obiectione uersatus est? quæ nō chæt ecclesiasticæ, sed libelli debent iudicium continere. Aut, quid

quid refert, si causa cadas, & crimine superes? Non necesse
est, ut cum periculo tui capitis accuses. uno percussore con-
ducto, satis potes facere desiderio tuo. Et scandalum timere
te simulas, qui dudum fratrem, nunc accusatum, semper ini-
micum, es paratus occidere. Et tamen miror, quo modo
homo prudens, furore praeuentus, uelis mihi beneficium tri-
buere; ut educas de carcere animam meam, & non pa-
tiaris tecum in tenebris huius saeculi commorari. Vis ergo
me tacere? ne accuses. depone gladium, & ego scutum abi-
ciam. In uno tibi consentire non potero, ut parcam haereti-
cis, ut me catholicum non probem. si ista est causa discor-
dia; mori possum, tacere non possum. Debueram quidem
de omni scriptura tuae infanix respondere, & diuinis uocibus
in modum Dauid citharizantis lenire furorem pectoris tui:
sed contentus ero unius libri paucis testimoniis, & opponā
sapientiam stultitiae; ut, si humana contemnis, saltem di-
uina non negligas. Audi igitur, quid de te, & de omnibus
inuidis, ac maledicis, & contumeliosis loquatur sapiens Salo-
mon: Inspicientes, dum iniuriis cupidi sunt, impii facti ode-
runt sensum. Ne fabriceris in amicū tuum mala. Et ne ini-
miceris aduersum hominē sine causa. Impii exaltant contu-
meliā. Circumcide a te os prauum, & iniqua labia longe re-
pelle abs te, oculos contumeliosi, linguam iniqui, manus ef-
fundentes sanguinem iusti, cor fabricans cogitationes malas,
& pedes festinates ad malefaciendum. Qui nititur menda-
cio, pascit uentos, & sequitur aues uolantes: derelinquit
enim uias uinē suae, & axes culturae suae fecit errare: perā-
bulat aridum ac desertum, & colligit manibus suis sterilita-
tem. Os procacis appropriat contritioni: & qui profert
maledicta, stultissimus est. Anima benedicta, omnis sim-
plex uir. Animosus inhonestus est. Per delicta labiorum
incidit in laqueum peccator. Itinera stultorum recta in con-
spectu suo. Stultus eadem die ostendit iram suam. Abomi-
natio est Domino, labia mendacia. Qui custodit os suum,
seruat animam suam. Et qui temerarius est labiis, terrebit
se ipsum. Malus cum contumelia agit mala, & insipiens ex-
pandit

1. Reg. 6

Pro. 3

Pro. 4

Pro. 6

Pro. 10

Pro. 9

Pro. 11

Pro. 12

Pro. 13

- Pro. 14** pandit malitiam suam . Quæres apud malos sapientiam , & non inuenies . Suis itineribus saturabitur temerarius . Sapiens timendo declinat malum . Stultus confidens miscetur ei . Longanimus uir , multus in prudentia est : pusillanimus ualde imprudens est . Qui caluminiatur pauperem , laceffit
- Pro. 15** factorem eius . Lingua sapientum bona nouit , & os stultorum pronunciat malum .
- Pro. 16** Vir animosus parat rixas ; & immundus est apud Deum omnis , qui exaltat cor suum . Manus inferens iniuste , non erit impunitus . Qui diligit uitam , parcit ori suo . Ante contritionem præcedit contumelia , et ante ruinam mala cogitatio . Qui obfirmat oculos suos , cogitat peruersa , & prouocat labiis suis omnia mala .
- Pro. 18** Labia stulti ducunt eum in mala , & os audax mortem inuocat .
- Pro. 19** Malignus uir multa detrimenta patietur . Melior est pauper iustus , quam mendax diues . Gloria est uiro , qui auertit se a maledictis : qui autem stultus est , talibus se obligat .
- Pro. 20** Noli amare detrahare , ne eradiceris , Suauis est homini panis mendacii : postea implebitur os eius calculo . Qui operatur thesauros lingua mendacii , uana sectatur , & ueniet in laqueum
- Pro. 21** os mortis . In aure stulti noli quidquam dicere , ne forte irideant sapientes sermones tuos .
- Pro. 22** Claua , & gladius , & sagitta perniciofa sunt : sic & uir , qui contra amicum suum falsum dicit testimonium . Sicut aues auolant , & passerēs : ita maledictum uanum non superueniet illi .
- Pro. 23** Noli respondere imprudenti ad imprudentiam eius , ne similis ei fias : sed responde stulto ad stultitiam eius , ne sibi sapiens esse uideatur .
- Pro. 24** Qui insidiatur amicis suis , cum uisus fuerit , dicit : ludens feci . Craticula carbonibus , & ligna ignis , & uir male dicens ad tumultum rixæ . Si te rogaueris inimicus tuus , parcens uoce magna , ne consentias ei : septem enim nequitie sunt in anima eius .
- Pro. 25** Grauis est lapis , & uix portabilis arena : sed ira stulti grauior utroque .
- Pro. 26** Crudelis est indignatio , & acuta ira , & zelus impatiens est . Impius calunniatur pauperes : & qui confidit in cordis audacia , stultissimus est .
- Pro. 27** Totam iram suam profert insipiens , sapiens dispensat in partes .
- Pro. 28** Filius malus gladios dentes habet , & turtros molas ;

las ; ut consumat infirmos de terra, & pauperes ex hominibus. His ergo doctus exemplis, nolui mordere mordentem, nec uicem talionis implodere ; maluiq. insaniam excātare furibundi, & unius libri antidotum uenenato pectori infundere. Sed uereor, ne, nihil proficiens, illud Dauidicum cantare compellar, & his me sermonibus cōsolari : Aliena-
 ti sunt peccatores a uulua, errauerunt ab utero : Locui sunt falsa, furor illis secundum similitudinem serpentis sicut aspidis surdæ, & obturant aures suas, quæ non audiat uocem incantantium & uenefici incantantis sapienter. Deus conteret dentes eorum in ore ipsorum : molas leonum confringet Dominus. Ad nihilum deuenient, tamquam aqua decurrens. Intendit arcum suum, donec infirmetur. Sicut cera, quæ fluit, auferentur : supercecidit ignis, & non uiderunt solem. Et iterum : Lætabitur iustus cum uiderit uindictam impiorum, manus suas lauabit in sanguine peccatoris. Et dicet homo : Si utique est fructus iusto, utique est Deus iudicans eos in terra. In extrema epistola scribis manu tua : Opto te pacem diligere. Ad quod breuiter respondebo. Si pacem desideras, arma depone. blandienti possum acquiescere, non timeo comminantem. sit inter nos una fides ; & illico pax sequetur.

Psal. 57

ARGVMENTVM.

PELAGIVS Brito monachus, Celestino Iulianoq. fauoribus, tantum (quod Leo Pontifex, & alii post Augustinum asserunt) tribuebat libero arbitrio, ut diceret illud gratia Dei nequaquam egere, quippe cum illa in lege, ac doctrina contineretur, ipsumq. met liberum arbitrium diuinum esset munus : proptereaq. ad singulos quosque actus gratiam necessariam esse negabat, & sine ea difficilius quidem, sed tamen perueniri ad salutem posse aiebat : ipsam autem gratiam secundum merita nostra dari : uictoriamq. etiā nostram, nō esse ex Dei adiutorio. sed ex libero arbitrio contendebat. penitentibus quoque ueniam non dari secundum gratiam, & misericordiam Dei, sed secundum meritum, & laborem eorum, qui per penitentiam digni

gni fuerunt misericordia, affirmabat: orationes, quae fierent in ecclesia tam pro fidelibus, quam etiam infidelibus, ueluti super uacaneas clamabat, asserens homines, suo quemque labore, et industria id, quod, peteretur, prestare posse. Addebat, hominem sine peccato esse posse, si uelit, diuersum tamen ab huiusmodi ἀναμάρτητον esse asseuerabat. Preterea, cum ad perfectionem quandam uentum fuerit, ne ullis quidem humanis perturbationibus hominem concuti, contendebat, eaq. ex causa ἀπαθείαν summopere predicabat: et filius Dei uocari non posse, nisi eos, qui absque omni prorsus essent peccato, asseuerabat. Aiebat praeerea Adam mortalem fuisse creatum, et, siue peccasset, siue non, omnino moriturum: eius quoque peccatum neminem nisi ipsum Adam lesisse: ideo infantes natos pro abolendo originali crimine baptizandos non esse: quippe cum illos in eo statu esse assereret, quo ipse Adam fuerat ante peccatum, et, si ante baptismum morerentur, habere etiam uitam eternam: baptizandos autem eos esse, non ut a peccato, quo carerent, exuerentur, sed ut sacramento adoptionis filiorum Dei honorarentur. Hec et alia quaedam euomens Pelagius, cum a multis admoneretur, damnationem timens, recantauit primo; mox rursus ad eadem, peioraq. relapsus, ab Antiochena synodo, item Innocentio primo, Zosimoq. summis Pontificibus damnatus est, procurantibus id Afris, et praecipue Augustino. Aiunt autem eum tres libros de fide Trinitatis scripsisse: excerptiones ex libris diuinis in modum indicis per capita digessisse, et pro defensione sui dogmatis ingens edidisse uolumen. Huius dogma, rogatus Otesiphontis, incipiens nunc refellere D. Hieronymus, Ruffinum interea, quod Xysti Pythagorici sub nomine Sixti martyris Ro. Pontificis, Pelagianum errorem redolentem librum, a se translatum ediderit, sicut olim Eusebii Pamphili, ueluti Pamphili Martyris, defensionem Origenis continentem alterum, acriter coarguit. Hac autem epistola cum uelitatus in Pelagium, est: pollicetur enim, cum nactus fuerit otium, iusto se illi, quod sequentibus tribus statim praestitit libris, respondurum esse uolumine.

HIERON.

& nolumus; ex quo firmas nasci amicitias, etiam Catilina testatur; si hæreticos pariter odimus, & ueterem æque damnamus errorem: quid contra nos tendimus, cum eadem oppugnemus, eadem defendamus? Ignosce mihi, quod Origenis eruditionem & studium scripturarum, ante quam eius hæresim plenius nosses, in iuuenili ætate laudauit: & ego tibi dabo ueniam, quod Apologiam librorum eius cano scripseris capite. Ante biduum quam ad nos epistolam scriberes, libellos meos in manus tuas uenisse testaris, & iccirco non habuisse spatium ex otio respondendi: alioqui, si meditatus in nos paratusque dixisses, fulmina iacere, non crimina, uidereris. Ecquis tibi credet, homini ueracissimo, ut negotiator orientalium mercium, qui & hinc deportata uendere necesse habebat, & ibi emere, quæ huc rursus adueheret, biduum tantum Aquileiæ fuerit, ut raptim & ex tempore contra nos dictare epistolam cogereris? libri enim tui, quos limaſti per triennium, disertiores sunt. Nisi forte non fuit impræsentiarum qui tuas emendaret nœnias: et iccirco omne iter dictionis tuæ, absque Palladis arte, salebris & uoraginibus uitiorum inciditur. Tam apertum temporis mendacium est, ut non dicam respondere, sed legere biduo mea scripta non potueris. Ex quo apparet, te illam epistolam aut pluribus diebus scripsisse, ut styli ipsius elegātia probat; aut, si tumultuaria dictio est, nimium te esse negligentem, qui, cum extemporalis talis sis, meditatus deterior fueris. Illud autem, quod tergiuerſaris; & dicis te ea tranſtulisse de Græco, quæ ego prius Latino sermone tranſtulerim; non satis intelligo quid uelis dicere: nisi forte adhuc commentarios ad Ephesios criminaris; & quasi nihil tibi super hoc responſum sit, obduras frontis impudentiam; nec auribus obturatis uoces recipis incantantis. Nos *Psal. 57* in commentariis & illis, & aliis & nostram & aliorum sententiam explicauimus, aperte confitentes quæ sunt hæretica, quæ catholica. hic est enim commentariorum mos, & explanantium regula, ut opiniones in expositione uarias persequantur, & quid uel sibi uel aliis uideatur, edisserant. et

Iii hoc

hoc non solum sanctarum interpretes scripturarum, sed sæcularium quoque litterarum explanatores faciunt, tam Latinæ linguæ, quam Græcæ. Tu in libris *πρὸς ἀρχαίαν* id ipsum obtendere non potes. arguet enim te præfatiuncula tua: in qua polliceris, detruncatis malis, & quæ ab hæreticis addita fuerant, optima remansisse: ut, quidquid ibi uel bonum uel malum dixeris, iam non ei imputetur, quem transfers, sed tibi, qui interpretatus es. nisi forte hæreticorum errores emendare debueras, & Origenis mala proferre in medium. sed de hoc, quia nos remittis ad codicem, ante tibi respondimus, quam tua scripta legeremus. De Pamphili libro, non ridiculosa, ut tu scribis, sed ridicula mihi forte res accidit, ut, postquam Eusebii asseruerim illum esse, nō Pamphili, ad extremum dixerim, etiam me annos plurimos hoc putasse, quod Pamphili fuerit, & a te exemplar huius uoluminis mutuatum. Vide quantum timeam cachin nos tuos, ut etiam nunc eadem ingeram. De tuo codice quasi Pamphili exemplar accepimus. Credidi Christiano: credidi monacho: non putavi tantum sceleris a te posse cōfingi. postea uero per interpretationem tuam, quæstione contra Origenem toto orbe commota, in quærendis exemplaribus diligentior fui; & in Cæsariensi bibliotheca Eusebii sex uolumina reperi *ἀπολογία ὀριγένης*. quæ cum legissem, primum eum librum deprehendi, quem tu solus sub nomine martyris edidisti, de Filio & Spiritu sancto, in bonam partem plerisque blasphemis commutatis; & hoc uel Didymum, uel te, uel alium fecisse nescio quem, quod tu apertissime in libris *πρὸς ἀρχαίαν* fecisse conuinceris; maxime cum idem Eusebius, ut iam duobus libris docui, scribat, Pamphilum nihil proprii operis edidisse. Dic ergo & tu, a quo exemplar acceperis: nec mihi ad subterfugendum crimen mortuos aliquos nomines; ut, cum auctorem ostendere non potueris, illum proferas, qui non possit respondere. Sin autem riuius ille in tuis scriniis fontem habet: quid sequatur, etiam me tacente non dubitas. Verum fac ab alio quolibet amatore Origenis libri huius titulum

lum, & auctoris uocabulum commutatum: cur hoc in Latinam linguam uertis? uidelicet ut testimonio martyris omnes Origenis scriptis crederent, præmissa munitione tibi auctoris, & testis. Nec tibi sufficit doctissimi uiri Apologia, nisi scribas & proprium uolumen pro defensione eius: quibus per multos disseminatis, tuto iam libros *πρὸς ἀρχαίαν* uertis e Græco: & hos ipsos præfatione commendas, dicens, nonnulla in his ab hæreticis deprauata, quæ tu de aliorum librorum Origenis lectione correxeris. Me quoque laudas: ne tibi amicorum meorum quispiam contradicat, Origenis *κήρυκα* prædicas: eloquentiam meam fers in cælum: ut fidem in cænum deprimas, fratrem & collegam uocas, & imitatore me operis confiteris. Cumq. a me translatas Origenis septuaginta Homilias, & nonnullos tomos in Apostolum iactes; in quibus sic cuncta limaue- rim, ut nihil in illis, quod a fide catholica discrepet, Latinus lector inueniat: nunc eosdem libros hæreticos crimina- ris; & uerso stylo, quem prædicaueras, quia consortem putabas, accusas, quoniam perfidiæ tuæ cernis inimicum. Quis e duobus calumniator est martyris? ego, qui illum di- co hæreticum non fuisse, nec scripsisse librum, qui ab omni- bus reprehenditur; an tu, qui uolumen hominis Ariani, ti- tulo commutato, sub nomine Martyris edidisti? Non tibi sufficit scandalum Græciæ, nisi illud & Latinorum auribus ingeras, & inclytum martyrem, tua, quantum in te est, translatione deformes. Tu quidem alia mente fecisti, non ut martyrem argueres, non ut me accusares, sed ut Ori- genis per nos scripta defenderes: attramen scito, Romanam *Rom. 8* fidem, apostolica uoce laudatam, istiusmodi præstigias nō *Gal. 1* recipere, etiam si angelus aliter annunciet, quam semel prædicatum est, Pauli auctoritate munitam non posse mu- tari. Ergo frater, siue a te falsatus est liber, ut multi putant, siue ab altero, ut forsitan tu persuadere conaberis, & teme- re credidisti, hæretici hominis *συντάγμα* esse martyris; muta titulum, & Romanam simplicitatem tanto periculo libera. non tibi expedit, ut per te clarissimus martyr hære-

ticus iudicetur; ut, qui effudit pro Christo sanguinem, contrarius fidei Christi approbetur. Dic potius: inueni librū, putaui illum martyris. ne timeas penitentiā. iam te nō urgebo, non quæram a quo acceperis: uel mortuorum aliquem nominato: uel in platea ab ignoto homine te emisisse dicito. non enim damnationem tuam quærimus, sed cōuersionem. melius est, ut tu erraueris, quam ut martyr hæreticus fuerit. Interim de præsentī compede utcumque erue pedem. In futuro iudicio tu uideris, quid ad martyris contra te respondeas querimonias. Proponis etiam tibi, quod nemo obiicit: & diluis, quod nullus accusat. Ais enim, quod in meis litteris legeris: Dic quis tibi permisit, ut interpretans quædam auferres, quædam mutares, quædam adderes? Statimq. tibi ipsi respondes, & contra me loqueris: En tibi dico: Quælo quis permiserit, ut in commentariis tuis quædam de Origene, quædam de Apollinario, quædam ex te ipso scriberes, & non de Origene totum aut ex te, aut ex alio? Interim in te, dum aliud agis, crimen fortissimum prodidisti: & oblitus es ueteris prouerbii, mendaces memores esse debere. Dicis enim me in commentariis meis quædam de Origene, quædam de Apollinario, quædam ex me ipso posuisse. Si ergo Apollinarii sunt, & Origenis, quæ sub aliorum nomine posui: quo modo in libris tuis mihi crimen inpingis; quod, quando scribo; alius hoc dicit; quidam sic supicatur; alius ille, & quidā, ego sim? Inter Apollinarium, & Didymum explanationis, styli, & dogmatum magna diuersitas est. Cum in uno capitulo diuersas pono sententias, num contrarios sensus sequi credendus sum? Sed hæc alias. Nunc quæro a te; quis tibi obiecerit, quare de Origene uel abstuleris quædam, uel addideris, uel mutaueris; & te quasi in eculeo appensum interrogauerit, bona sunt, an mala, quæ transtulisti? Frustra simulas innocentiam; ut interrogatione stulta uerā per cunctationem extenues. Ego non accusaui, quare Originem pro uoluntate transtuleris: hoc enim & ipse feci, & ante me Victorinus, Hilarius, Ambrosiusq. fecerunt: sed quare

quare translationem hæreticam præfationis tuæ testimonio roborasti? Cogis me eadem rursus iterare, & per meas lineas incedere. dicis enim in eodem prologo, te ea, quæ ab hæreticis addita fuerant, amputasse, & pro his reposuisse bona. Si hæreticorum mala abstulisti; ergo, quæ dimisisti, uel addidisti, aut Origenis erunt, aut tua, quæ utique quasi bona posuisti. Sed multa in his mala negare non poteris. Quid, inquires, ad me? Origeni imputa. ego enim eam tantum, quæ ab hæreticis addita fuerant, commutavi. Expone causas, quare hæreticorum mala tuleris, & Origenis integra dereliqueris. nonne perspicuum est, quod mala Origenis ex parte sub hæreticorum nuncupatione damnaueris, & ex parte susceperis; quia non mala sed bona, & tuæ esse fidei iudicabas? Hæc sunt, de quibus quæsiui, utrum bona essent, an mala, quæ in præfatione laudasti; quæ, amputatis pessimis, quasi optima remansisse confessus es: & te in ueræ argumētationis appendi eculeo; ut, si bona dixeris, hæreticus comproberis; si mala, statim audias: cur ergo, quæ mala sunt, in præfatione laudasti? Et non illud adiunxi, quod tu callide simulas: cur, quæ mala erant, ad Latinorum notitiam transfuisti? Mala enim ostendere, interdum non docentis est, sed uetantis: ut caueat lector, non ut sequatur errores; ut nota contemnat, quæ nonnumquā ignota miraculo sunt. Et audes post hæc dicere, quod ego auctor talium scriptorum sim; tu autem ut interpret, in quibus emendare aliquid potueris, plus egeris, quam interpret; in quibus non potueris, solum interpret fueris. Recte ista diceres, si libri tui *πρὸς ἀρχόν*, præfatiunculam non haberent. quod & Hilarius in transferendis eius homiliis fecit, ut & bona & mala non interpreti, sed suo imputarentur auctori. Si non dixisses, amputasse te pessima, & optima reliquisse; utcumque de luto euaderes. hoc est, quod destruit strophas ingenioli tui, & te hinc inde constrictum euadere non sinit. Nec intantum abutare simplicitate lectoris, & sic omnes, qui tuam scripturam lecturi sunt, brutos putes, ut, cum uulnera putrescere sinas, sano corpori te im-

Iii 3 ponere

ponere emplastra nō rideant. De carnis resurrectione quid sentias, iam in Apologia tua didicimus, nullo membro amputato, nec aliqua parte corporis defecta. Hæc est enim tuæ simplicitatis pura & aperta confessio, quā ab omnibus Italiæ episcopis asseris esse susceptā. Crederem dicēti, nisi, me dubitare de te, iste liber non Pamphili faceret. Et tamē miror, quo modo probauerit Italia quod Roma contēpsit; episcopi susceperint, quod Sedes Apostolica condemnauit. Scribis quoque me litteris indicasse, quod papa Theophilus expositionem fidei nuper ediderit, quæ ad uos necdum peruenit: & polliceris, quod, quidquid ille scripserit, tu sequeris. Ego me hoc scripsisse non noui, nec iltiusmodi umquam litteras direxisse. sed tu iccirco ad incerta cōsentis & his, quæ qualia futura sint nescis; ut certa declines, & ad eorum non tenearis assensum. Duas, synodicam & paschalem, eius epistolas contra Origenem, illiusq. discipulos, & alias aduersum Apollinarium, & eundem Origenem, per hoc ferme biennium interpretatus sum, &, in ædificationem Ecclesiæ, legendas nostræ linguæ hominibus dedi. aliud operum eius nescio me transtulisse. Et tamen tu, qui papæ Theophili dicis te in omnibus sententiam sequi, caue ne hoc magistri & condiscipuli tui audiant, & offendas quāplurimos; qui me latronem, te martyrem uocant: ne irascatur is tibi, qui, contra papam Epiphanium ad te epistolas dirigens, hortabatur ut permaneres in fidei ueritate, & nō mutares ullo terrore sententiam. quæ epistola holographa tenetur ab iis, ad quos perlata est. Et post hæc more tuo loqueris, ut de quo supra dixeras; Ego tibi etiam furenti satisfaciam; nunc dicis, Quid tibi uidetur? habes ne ultra aliquid, quo neruos tuæ loquacitatis intendas? Et indignaris, si putide te loqui arguam, cum comædiarum turpitudines & scortorum amatorumq. ludicra ecclesiasticus scriptor assumas. Porro, quod interrogas, quando papæ Theophili sententiam sequi cœperim, eiq. fidei communionem sociatus sim; & ipse tibi respondes; tunc credo, quando Paulum, quem ille damnauerat, summo nisu & omnibus studiis defendebas,

fendebas; quando eum per imperiale scriptum recipere sacerdotium, quod episcopali iudicio amiserat, instigabas: Non prius pro me respondebo, quam de aliorum iniuriis loquar. Cuius est humanitatis, cuiusue clementiæ, insultare aliorum miseriis, & uulnera cunctis aliena monstrare? sicine te docuit ille Samarites, seminecem ad stabulum re-
 portare? oleum plagis infundere? mercedem stabulario pol-
 lici? sic reuectam ouem, repertam drachmam, prodigum filium legis esse susceptum? Esto, ego te læseram, & quibusdam, ut dicis, stimulis ad maledictorum insaniam prouocaram: quid meruit homo latens, ut nudares cicatricem eius, & obductam cutem insperato dolore rescinderes? nonne, etiam si ille dignus esset contumeliis, tu facere nō deberes? Aut ego fallor, aut illud est uerum, quod plurimi iactitant, te Origenistarum hostes in illo persequi, & sub occasione unius in utrumque sœuire. Si papæ Theophili sententiis delectaris, & nefas putas pontificum decreta conuelli: quid de ceteris dicis, quos ipse damnauit? quid de papa Anastasio, de quo nulli, ut ais, uerum uidetur, ut tantæ urbis sacerdos uel innocenti tibi iniuriam facere potuerit, uel absenti? Nec hoc dico, quod de episcoporum sententiis iudicem, aut eorū cupiam statuta rescindi; sed quod unusquisque suo periculo faciat, quod sibi uidetur; & ipse nouerit, quo modo de suo iudicio iudicandum sit. Nobis in monasterio hospitalitas cordi est, omnesq. ad nos uenientes læta humanitas fronte suscipimus. ueremur enim, ne Maria cum Io-
 seph locum non inueniat in diuersorio; ne nobis Iesus dicat
 exclusus; Hospes eram, & non suscepistis me. Solos hæreticos non recipimus, quos uos solos recipitis. propositum quippe nobis est pedes lauare uenientium, non merita discutere. Recordare frater confessionis eius, & pectoris, quod flagella secuerunt: memento carceris, tenebrarum, exili, metallorum: & non indignaberis hospitio transeuntem esse susceptum. An ideo tibi rebelles uidemur, quia ca-
 licæ aquæ frigidæ in nomine Christi sitientibus porrigimus?
 Vis scire unde illum & nos plus amare, & tu odisse plus de-
 beas?

Luc. 10. 13

Luc. 2

Matth. 25

Marc. 9

beas? Hæreticorum factio, nuper fugata de Aegypto, & Alexandria, se Hierosolymam contulit; & huic uoluit copulari, ut, quorū unus esset dolor, una fieret & accusatio. quos ille repulit, sprenit, abiecit, dicens se non esse inimicū fidei, nec contra Ecclesiam bella suscipere; quod prius tentauit, doloris fuisse, non perfidiæ; nec alterius appetisse innocentiam, sed suam probare uoluisse. Impium putas, post sententias sacerdotum, imperiale rescriptum: quod quale sit, nouerit ille, qui meruit. Quid tibi uideatur de iis, qui damnati palatia obsident, & factō cuneo, fidem Christi in uno homine persequuntur? Meæ autem communionis, & papæ Theophili, nullum alium testem uocabo, nisi ipsum, quem a me læsum simulas: cuius epistolas ad me semper datas, etiam eo tempore non ignoras, quo mihi eas reddi prohibebas: & quotidie missis tabellariis, inimicum eius amicum nostrum & familiarissimum iactitabas: & ea, quæ nūc inapudenter scribis, mentiebaris: ut illius contra nos odia concitares; & iniuriæ dolor fidei fieret oppressio. Sed uir prudens, & apostolicæ sapientiæ, tempore ac rebus probauit & nostrum in se animum, & ueltras contra nos insidias. Si discipuli mei, ut scribis, tibi Romæ insidias concitarunt, & inemendatas schedulas, te dormiente, furati sunt: quis papam Theophilum aduersus perduelles in Aegypto suscitauit? quis regū scita? quis orbis in hac parte consensum? Et gloriaris te ab adolescentia Theophili fuisse auditorem, & discipulum: cum & ille, ante quam episcopus fieret, pro humilitate sibi insita numquam docuerit; & tu, postquam hic episcopus factus est, Alexandriæ non fueris. Et audes dicere in suggillationem mei, Magistros meos nec accuso, nec muto. Quod si uerum est, suspectam mihi facis conuersationem tuam. nec enim damno, ut criminaris, institutores meos, sed metuo illud Esaïæ: Væ qui dicunt malum bonū, & bonum malum; qui ponunt tenebras lucem, & lucem tenebras; qui dicunt amarum dulce, & dulce amarum. Tu autem, dum inter multum magistrorum & uenena priter bibis, a magistro Apostolo recessisti; qui docet, etiam angelum,

Esa. 5

gelum; & se, si in fide errauerint, non sequendos. In Vigilantii nomine quid somnies, nescio. Vbi enim eum scripsi hæretica apud Alexandriam communione maculatum? Da librum, profer epistolam: nusquam omnino reperies. & eadem licentia, immo impudentia mentiendi, quæ putas omnes tuis sermonibus credituros, addis: Quando testimonium de scripturis in eum tam iniuriose posuisti, ut ego id repetere meo ore non audeam? Non audes repetere, qui tacendo amplius criminaris? Et quia non habes quod obicias, simulas uerecundiam: ut lector te putet mihi parcere, qui mentiens nec tuæ animæ pepercisti. Quod est illud testimonium de scripturis, quod de tuo illo pudentissimo ore non exeat? aut quid in sanctis libris potest turpe memorari? Si erubescis loqui, scribe saltem; ut nos procacitatis proprius sermo conuincat. Ut cetera fileam, ex hoc uno capitulo comprobabo, ferream te frontem possidere fallaciæ. Vide, quantum timeam criminationem tuam. Si protuleris, quod minaris; mea erunt uniuersa, quæ tua sunt. Ego in Vigilantio tibi respondi. eadem enim accusabat, quæ tu postea & amicus laudas, & inimicus accusas. Scio, a quo illius contra me rabies concitata sit: noui cuniculos tuos. Simpliciter, quam omnes prædicant, non ignoro. Per illius stultitiam tua in me malitia debacchata est: quam ego si epistola mea repuli; ne solus habere uidearis baculum litterarum; non debes turpitudinem simulare uerborum, quam nusquam omnino legisti, sed intelligere, & confiteri, per illius uerborum tuis calumniis fuisse responsum. In epistola sancti papæ Anastasii lubricus extitisti, & turbatus: in quo figas gradum, non reperis. modo enim dicis a me esse compositam; nunc ab eo ad te debuisse transmitti, cui missa est. Rursum iniustitiam scribētis arguis: etiam si scripta sit ab illo, siue non scripta, ad te nihil pertinere testaris; qui præcessoris eius habeas testimonium, & rogantem Romam, ut eam illustrares præsentia tua, opiduli tui amore contempseris. Si a me fictam epistolam suspicaris; cur eam in Romanæ ecclesiæ chartatio non requiris? ut, cum deprehende-

ris

ris ab episcopo non datam, manifestissime criminis reum te neas; & nequaquam araneorum mihi opponas calliculos, sed fortissimo me & solidissimo cōstringas reti. Si autē Romani episcopi est; stulte facis ab eo exēplar epistolæ petere, cui missa nō est, & non ab illo, qui miserit; de oriente expectare testimonium, cuius auctorem & testem habeas in uicino. Vade potius Romam, & præsens apud eum expostula, cur tibi & absenti, & innocenti fecerit contumeliam: primum, ut non reciperet expositionem fidei tuæ, quā omnis, ut scribis, Italia comprobauit; & baculo tuarum uti noluerit litterarum contra canes tuos: deinde, ut epistolas contra te ad Orientem mitteret, & cauterium tibi hæreseos, dū nescis, inureret; diceretq. libros Origenis *ὡς ἀρχαῖα* a te esse trāslatos, & simplici Romanæ Ecclesiæ plebi traditos, ut fidei ueritatem, quam ab Apostolo didicerant, per te perderent; & quo tibi maiorem faceret inuidiam, ausus sit criminari hos ipsos, præfationis tuæ testimonio roboratos. Non est leue, quod tibi impingit tantæ urbis Pontifex, uel ab alio obiectū temere suscepit. Vociferare, & clamita per compita, per plateas, non est, non est meus liber; & si meus est, schedulas inemendatas Eusebius furto abstulit. aliter ego edidi, immo nec edidi: nulli eas dedi, aut certe paucis; & tam sceleratus inimicus, tam negligentes amici fuerunt, ut omnium codices ab eo pariter falsarentur. Hæc, frater carissime, facere debueras, & non, illi tergum obuerrens, in me transmarinas maledictorum tuorum sagittas dirigere. Quid enim uulneribus tuis prodest, si ego fuero uulneratus? an solatium percussi est, amicum secum uidere morientem? Syritii, iam in Domino dormientis, profers epistolam, & uiuentis Anastasii dicta contemnis. quid enim tibi, ut ais, officere potest, quod, te ignorante, aut scripsit, aut forte non scripsit? & si scripsit, sufficit tibi totius orbis testimonium: quod nulli uerum uidetur, ut tantæ urbis sacerdos uel innocenti iniuriam facere potuerit, uel absenti. Innocentem te uocas, ad cuius interpretationem Roma cōtremuit; absentem, quia accusatus respondere non audes.

&

et tantum Romanæ urbis iudicium fugis, ut magis obfidio-
nem barbaricam, quam pacatæ urbis uelis sententiam su-
stinere. Esto, præteriti anni ego epistolam finxerim: recen-
tia ad Orientem scripta quis misit? In quibus papa Anasta-
sius tantis te ornat floribus, ut, cum ea legeris, magis te uel
le defendere incipias, quam nos accusare. Simulq. confide-
ra illam inimitabilem prudentiam tuam, & sales Atticos, &
sancti eloquii uenustatem. Ab aliis appeteris, aliorum crimi-
natione confoderis: & contra me furibundus iactaris, & lo-
queris: Numquid & ego non possum enarrare, tu quo mo-
do de urbe discefferis? quid de te in præsentis iudicatum sit?
quid postea scriptum? quid iuraueris? ubi nauim conscen-
deris? quam sancte periurium uitaueris? Poteram pandere;
sed plura seruari statui, quam referre. Hæc sunt tuorum or-
namenta uerborum. Et post ista si quid in te asperum dixe-
ro, statim mihi proscriptionem & gladios comminaris. Et
interim homo eloquentissimus arte ludis rhetorica, & simu-
las te præterire quæ dicis; ut, qui obiecta probare non pote-
ras, quasi prætermissa facias criminosa. Hæc est tota tua
simplicitas: sic amico parcis, & reseruas te ad tribunalia iu-
dicum; ut acruum criminum mihi, dum parcis, obieceris.
Vis nosse professionis meæ de urbe ordinem? narrabo bre-
uiter. Mense Augusto, flantibus etesiis, cum sancto Vincen-
tio presbytero, & adolescente fratre, & aliis monachis, qui
nunc Hierosolymæ commorantur, nauim in Romano por-
tu securus ascendi, maxima me sanctorum frequentia prose-
quente. ueni Rhegium: in Scyllæo litore paululum steti:
ubi ueteres didici fabulas, & præcipitem fallacis Vlyssis cur-
sum, & Sirenarum cantica, & insatiabilem charybdis uora-
ginem. cumq. mihi accolæ illius loci multa narrarent, da-
rentq. consilium, ut non ad Protei columnas, sed ad Ionæ
portum nauigarem; illum enim fugientium & turbatorum,
hunc securi hominis esse cursum: malui per Malæas, & Cy-
cladas Cyprum pergere: ubi susceptus a uenerabili episco-
po Epiphanio, cuius tu testimonio gloriaris, ueni Antio-
chiam, ubi fruius sum communionis pontificis cōfessorisq.
Pauli-

Paulini : & deductus ab eo media hieme , & frigore grauissi-
mo , intraui Hierosolimam . Vidi multa miracula ; & , quæ
prius ad me fama pertulerat , oculorum iudicio comproba-
ui . Inde contendi Aegyptum , lustraui monasteria Nitriæ ,
& inter sanctorum choros aspides latere perspexi . Protinus
concito gradu Bethlehem meam reuersus sum , ubi adorauī
præsepe & incunabula saluatoris . Vidi quoque famosissimū
lacum : nec me inertī tradidi otio , sed multa didici , quæ an-
te nesciebā . Quid autem de me Romæ iudicātū sit , & quid
postea scriptum , nolo taceas , præsertim cum habeas testi-
monia scripturarum , & ego non uerbis tuis , quæ simulare
potes , & impunito iactare mendacio , sed scriptis ecclesiasti-
cis arguendus sim . Vide , quantum te timeam . si uel paruā
schedulam contra me Romani episcopi , aut alterius eccle-
siæ protuleris ; omnia , quæ in te scripta sunt , mea crimina
confitebor . Numquid & ego non possem professionem tuā
discutere ? cuius ætatis fueris ? unde , quo tempore nauiga-
ris ? ubi uixeris ? quibus interfueris ? sed absit , ut , quod in
te reprehendo , faciam ; & in ecclesiastica disputatione , ani-
lium iurgiorum deliramenta compingam . Hoc solum pru-
dentia tuæ dixisse sufficiat , ut caueas in alterum dicere , quid
quid in te statim retorqueri potest . In sancti Epiphaniī no-
mine mira tua tergiuersatio : ut , post osculum , post oratio-
nem , neges eum contra te potuisse scribere : quo modo si
contendas non potuisse eum mori , qui paulo ante uixerat ;
aut certior sit tui reprehensio , quam post pacem excommu-
nicatio . Ex nobis , inquit , exierunt , sed non fuerunt ex no-
bis . si enim fuissent ex nobis , mansissent utique nobiscum .
Hæreticum , post unam & alteram commonitionem , uitā-
dum Apostolus præcipit : qui utique , antequam uitetur at-
que damnetur , ecclesiastici gregis portio fuit . Simulq. ri-
sum tenere non possum , quod , a quodam prudente com-
monitus , in laudes Epiphaniī pertonas : Hic est ille delirus
senex : hic est anthropomorphites : hic qui sex millia Orige-
nis libros te præsentē cantauit ; qui omnium gentium lin-
guis prædicationem sibi contra Origenem iniunctam putat ;
qui

1 Ioan. 2

Tit. 3

qui ideo eum legi prohibet, ne alii eius furta cognoscant. Lege scripta tua, & epistolam eius, immo epistolas: e quibus unum proferam tuæ fidei testimonium, ut non immerito nunc a te laudatus esse uideatur. Te autem, frater, liberet Deus, & sanctum populum Christi, qui tibi creditus est, & omnes fratres, qui tecum sunt, & maxime Ruffinum presbyterum ab hæresi Origenis, & aliis hæresibus, & perditione earum. Si enim propter unum uerbum, aut duo, quæ contraria fidei sunt, multæ hæreses abiectæ sunt ab Ecclesia: quanto magis hic inter hæreticos habebitur, qui tantas peruersitates, & tam mala dogmata contra fidem adinuenit, Dei Ecclesiæ hostis extitit? Hæc est uiri sancti de te testificatio: sic ab eo ornatus, sic laudatus incedis. Ista est epistola, quam de cubiculo fratris Eusebii nummis aureis produxisti; ut calumnieris interpretem, & me apertissimi teneres criminis reum, quare pro honorabili carissimum transtulissem. Sed quid ad te? qui prudenti consilio cuncta moderaris; & sic medius incedis, ut, si inueneris qui tibi credant, nec Anastasius contra te; nec Epiphanius scripserint; nisi ipsæ epistolæ reclamauerint, & fregerint tuæ frontis audaciam, statim iudicium utriusque contemnas; & non ad te pertineat, siue scripserint, siue non scripserint; quia de innocente, & absente scribere non potuerunt. Nec in sanctum uirum hæc mala conferenda sunt; ut ostendatur ore quidem & osculo pacem dedisse, mala autem & dolum in suo corde seruasse. Sic enim argumentaris, & hæc sunt uerba defensionis tuæ. Ipsi esse aduersum te epistolam, & orbis agnoscit, & authenticam in manus tuas uenisse conuincimus: & miror, quo pudore, immo qua impudentia neges quod uerum esse non ambigis. Ergo pollutus erit Epiphanius, qui tibi pacem dedit, & in suo corde dolum seruauit. Cur non illud uerius sit, quod te primum monuerit? quod uoluerit emendare, & ad rectum iter reducere, ut Iudæ osculum non refutaret, ut proditorem frangeret patientia; & postquam se intellexit callo sudare labore, nec pardum mutare uarietates, nec Aethiopem pellem suam, quod mente

con-

conceperat, litteris indicasse? Tale quid & contra papam Anastasium disputas; ut, quia Siritii episcopi habes epistolam, iste contra te scribere non potuerit. Vereor, ne tibi factam iniuriam suspiceris. Nescio, quo modo homo acutus & prudens ad has ineptias deuoluaris; ut, dum stultos lectores putas, te stultum esse demonstras. Post egregiam argumentationem ponis in clausula: Absit hoc a uiris sanctis. de uestra schola solent ista procedere. uos nobis pacem proficiscentibus dedistis, & a tergo iacula uenenis armata iecistis. & in hac eadem prudentia, immo declamatione disertus esse uoluisti. Pacem dedimus, non hæresim suscepimus, iunximus dexteras: abeuntes profecuti sumus, ut uos essetis catholici, non ut nos essemus hæretici. Volo tamen scire, quæ sunt ista iacula uenenata, quæ post tergum uestrum nos iecisse conquereris. Vincentius, Paulinianus, Eusebius, Ruffinus presbyteri; quorum Vincentius multo tempore ante uos Romam uenit; Paulinianus & Eusebius post annum uestræ nauigationis profecti sunt; Ruffinus in causa Claudii post biennium missus; omnes uel pro re familiari, uel pro periculo capitis alieni. Nunquid nosse potuimus, quod, ingrediēte te Romam, uir nobilis somniaret nauim plenam mercium inflatis intrare uelis? quod omnes aduersum fatuum quæstiones non fatua solueret interpretatio? quod librum Eusebii pro Pamphili uerteres? quod tuū quasi operculum uenenatæ patellæ imponeres? quod famosissimum opus *αὐτοῦ ἀρχαῖον* eloquii tui maiestate transferres? Nouum calumniæ genus: ante accusatores misimus, quam tu accusanda committeres. Non fuit, non fuit, inquam, nostri consilii, sed Dei prouidentia; ut missi ad aliud, contra nascentem hæresim dimicarent, & in morem Ioseph famem futuram fidei ardore subleuarent. Quo non erumpat semel effrenata audacia? Alienum crimen sibi obiecit, ut nos finxisse uideamur. quod absque nomine dictum est, in se dictum refert: & purgans externa peccata, tantum de sua securus est innocentia. iurat enim se epistolam non scripsisse ad Afros sub nomine meo, in qua confitear inductum me a Iudæis

Iudæis

Iudæis mendacia transtulisse: & mittit libros eadem omnia continentes, quæ nescisse se iurat. Et miror, quo modo prudentia eius cum alterius nequitia conuenerit; ut, quod alius in Africa mentitus est, hic concorditer uerum diceret; styliq. eius elegantiam nescio quis imperitus posset imitari. Tibi soli licet hæreticorum uenena transferre, & de calice Hier. 52 Babylonis cunctis gentibus propinare. Tu Latinas scripturas de Græco emendabis, & aliud ecclesiis trades legendum, quam quod semel ab apostolis susceperunt: mihi non licebit, post Septuaginta editionem, quam diligentissime emenda tam ante annos plurimos meæ linguæ hominibus dedi, ad confutandos Iudæos etiam ipsa exemplaria uertere, quæ ipsi si uerissima confitentur; ut, si quando aduersum eos Christianis disputatio est, non habeant subterfugendi diuerticula, sed suomet potissimum mucrone feriantur? Plenius super hoc & in multis aliis locis, & in fine secundi libri, ubi accusationi tuæ respondi, scripsisse me memini: & popularitatem tuam, qua mihi inuidiam apud simplices & imperitos niteris concitare, perspicua ratione cōpescui: illucq. lectorē transmittendū puto. Hoc intactū præteriri non patiar; ne doleas falsatorem schedularū tuarum cōfessoris apud me gloriā possidere; cum tu, eiusdem criminis reus, post Alexandrinum exilium & tenebrosos carceres a cunctis Origenis sectatoribus martyr & apostolus nomineris. Super excusatione imperitiæ tuæ, iam tibi respondi: sed quia eadem repetis, & quasi superioris tuæ defensionis oblitus, rursus admones, ut sciamus te, per triginta annos Græcis uoluminibus deuoratis, Latina nescire: paulisper attende, me non pauca in te uerba reprehendere, (alioquin omnis tibi scriptura delenda est) sed uoluisse ostēdere discipulis tuis, quos magno studio nihil scire docuisti, ut intelligerent cuius uerecundiæ sit, docere quod nescias, scribere quod ignores; & eandem magistri sapientiam etiam in sensibus quærerent. Quodq. addis, peccata putere, non uerba, mendacium, calumniam, detractionem, falsum testimonium, & uniuersa Sap. 3 fa conuicia, & os, quod mentitur, occidit animam; monesq. ne

ne ille foetor nares meas penetret: crederem dicenti, nisi facta contraria deprehenderem: quasi si fullo & coriarius mo-
neant pigmentarium, ut, naribus obturatis, tabernas suas
praetereat. Faciam ergo, quod praecipis: claudam nares
meas; ne ueritatis & benedictionum tuarum suauissimo odo-
re crucientur. In laude & detractatione mea, quia uariis ex-
stitisti, miro acumine argumentatus es: sic tibi licere de me
& bene & male dicere, quo modo & mihi licuerit Origenem
& Didymum reprehendere, quos ante laudauerim. Audi
ergo, uir sapientissime, & Romanae dialecticae caput, non
esse uitii hominem unum laudare in aliis, & in aliis accusare, sed
eandem rem probare, & improbare. Ponam exemplum, ut, quod
non intelligis, prudens mecum lector intelligat. In Tertul-
liano laudamus ingenium, sed damnamus haeresim. in Ori-
gene miramur scientiam scripturarum, & tamen dogmatum
non recipimus falsitatem. in Didymo uero & memoriam
praedicamus, & super Trinitate fidei puritatem: sed in cete-
ris, quae Origeni male credidit, nos ab eo retrahimus. ma-
gistrorum enim non uitia imitanda sunt, sed uirtutes. Gram-
maticum quidam Afrum habuit Romae, uirum eruditissi-
mum: & in eo se aemulum praceptoris putabat, si litidorum
linguae eius, & uitia tantum oris exprimeret. In praefatiun-
cula *ἀδελφὸν* fratrem me nominas, & collegam dicis elo-
quentissimum, fidei meae praedicas ueritatem. his tribus de-
trahere non poteris; cetera carpe ut libet; ne uidearis tuo
de me testimonio repugnare. Cum fratrem & collegam di-
cis; amicitia tua dignum fateris. cum eloquentem praedi-
cas; imperitiae ultra non arguis. cum catholicum in omni-
bus profiteris; haereseos non poteris mihi crimen impinge-
re. extra haec tria si quid in me reprehenderis, non tibi ui-
deberis esse contrarius. Ex qua supputatione illa summa na-
scitur; & te errare, ea in me reprehendentem, quae prius
laudaueras; & me non esse in uitio, si in eisdem hominibus
& laudanda praedicem, & uituperanda reprehendam. Tran-
sis ad animarum statum, & prolixius fumos meos increpas:
atque, ut tibi liceat ignorare, quod consulto te scire dissi-
mulas;

HIERON. ADVERSVS PELAGIVM

ad Cresiphontem.

NON audacter, ut falso putas, sed amanter, studio-
 seq. fecisti, ut nouam mihi ex uetere mitteres qua-
 sitionem; quæ ante litteras tuas plerosque in Oriëte
 decepit; ut per simulatâ humilitatem, superbiam discerent;
 & dicerent cum diabolo: In cælum ascendam, super sidera *Esa. 14*
 cæli ponam thronum meum, & ero similis altissimo. Quæ
 enim potest alia maior esse temeritas, quam Dei sibi non
 dicam similitudinem, sed æqualitatem uindicare, & breui
 sententia omnium hæreticorum uenena complecti, quæ de
 philosophorum, & maxime Pythagoræ, & Zenonis, prin-
 cipis Stoicorum, fonte manarunt? Illi enim, quæ Græci
 appellant *πάθη*, nos perturbationes possumus dicere, ægri-
 tudinem uidelicet, & gaudium, spem, & metum, quorum
 duo præsentia, duo futura sunt, asserunt extirpari posse de
 mentibus, & nullam fibram radicemq. uitiorum in homine
 omnino residere, meditatione, & assidua exercitatione uir-
 tutum. Aduersum quos & Peripatetici, qui de Aristotelis
 fonte descendunt, fortissime disputant; & Academici noui,
 quos Tullius sequitur; & eorum non dico res, quæ nullæ
 sunt, sed umbras et uota subuertit. hoc est enim, hominē ex
 homine tollere, & in corpore constitutum esse sine corpore;
 & optare potius quam docere: dicēte Apostolo: Miser ego *Rom. 7*
 homo, quis me liberabit de corpore mortis huius? Et quia
 epistolaris breuitas non potest omnia comprehendere, stri-
 ctum tibi uitanda describam. Vnde & illud Virgilianum est:
 Hinc metuunt, cupiuntque, dolent, gaudentque, nec au-
 ras Respiciunt, clausæ tenēbris & carcere cæco. Quis enim
 potest aut non gestire gaudio, aut mærore contrahi, aut spe
 extolli, aut timore terreri? Quamobrem & grauissimus
 poeta Flaccus scripsit in satyra: Nam uitiiis nemo sine nasci-
 tur: optimus ille est, Qui minimis urgetur. Pulchre quidam
 nostrorum ait: Philosophi patriarchæ hæreticorum, Ecclē-
 siæ puritatem peruersa maculauere doctrina: ut nesciant il-

LII lud

Eccli. 10 lud dictum de humana fragilitate : Quid gloriatur terra , &
Rom. 7 cinis ? præsertim cum Apostolus dicat : Video aliam legem
 in membris meis , repugnantem legi mentis meæ , & ducen-
 tem me in captiuitatem . Et iterum : Nō enim , quod uolo ,
 hoc ago ; sed , quod nolo , id operor . Si , quod non uult ,
 operatur ; quo modo stare potest hoc ; quod dicitur ; posse
 hominē sine peccato esse , si uelit ? qua ratione potest esse ,
 quod uelit , cum Apostolus asserat se , quod cupiat , imple-
 re non posse ? Cumq. ab eis quærimus , qui sint illi , quos
 absque peccato putent : noua strophæ eludere cupiunt ueri-
 tatem ; se non eos dicere , qui sint , uel fuerint , sed qui esse
 possint . Egregii doctores : dicunt esse posse , quod numquā
Psals. 1 fuisse demonstrant , dicente scriptura : Omne quod futurum
 est , iam factum est in priori tempore . Neque nunc mihi ne-
 cesse est ire per singulos sanctorum , & quasi in corpore pul-
 cherrimo næuos quosdam & maculas demonstrare : quod
 plerique nostrorum simpliciter faciunt : cum paucis senten-
 tiolis scripturarum possint hæreticorum , & per eos philo-
 sophorum argumenta conuinci . Quid enim dicit uas ele-
Rom. 11 ctionis ? Concluserat Deus omnia sub peccato , ut omnium
Rom. 3 misereatur . Et in alio loco : Omnes enim peccauerunt , &
Eccli. 7 indigent gloria Dei . Ecclesiastes quoque , per quem se ceci-
2. Par. 6 nit ipsa sapientia , libere protestatur , & dicit : Non est ho-
 mo iustus super terram , qui faciat bonum & non peccet . Et
Pro. 20 iterum : Si peccauerit populus tuus , non est enim homo
Iob. 14 qui non peccet . Et quis gloriabitur castum se habere cor ?
 & non est mundus a sorde , nec si unius diei fuerit super ter-
Psal. 50 ram uita eius . Vnde & David dicit : Ecce enim in iniqui-
 tatibus conceptus sum , & in delictis concepit me mater
Psal. 142 mea . Et in alio psalmo : Non iustificabitur in conspectu
 tuo omnis uiuens . Quod testimonium sub nomine pietatis
 noua argumentatione deludunt . Aiunt enim ad compa-
 rationem Dei nullum esse perfectum , quasi scriptura hoc
 dixerit : neque enim ait : Non iustificabitur omnis uiuens :
 sed , Nō iustificabitur in conspectu tuo omnis uiuens . Quan-
 do enim dicit , In conspectu tuo , hoc intelligi uult , quod ,
 etiam

etiam qui hominibus sancti uidentur, Dei scientiæ atque
 notitiæ nequaquam sancti sint. Homo enim uidet in facie, **1. Reg. 16**
 Deus autem in corde. Si autem, inspiciente Deo, & omnia
 contemplante, quem cordis arcana non fallunt, nullus est
 iustus: perspicue ostenditur, hæreticos nō hominem in ex-
 celsa sustollere, sed Dei potentiæ derogare, multa q. alia,
 quæ fide scripturis sanctis uoluerō congregare, non dicam
 epistolæ, sed uoluminis quoque excedam modum. Nihil
 noui asserunt, qui in huiusmodi applaudente sibi perfidia
 simplices quidem & indoctos decipiunt, sed ecclesiasticos
 uiros, qui in lege Dei die ac nocte meditantur, decipere nō
 ualent. Pudeat ergo eos principum & sociorum suorum,
 qui aiunt; posse hominem sine peccato esse, si uelit: quod
 Græci dicunt ἀναμάρτητον. Et quia hoc ecclesiarum per
 Orientem aures ferre non possunt; simulant se sine peccato
 quidem dicere, sed ἀναμάρτητον dicere non audere: quasi
 aliud sit sine peccato, aliud ἀναμάρτητον; & non Græcum
 sermonem, qui apud illos compositus est, duobus uerbis
 sermo Latinus expresse. Si absque peccato dicis, & ἀνα-
 μάρτητον dicere te diffiteris: damna eos ergo, qui ἀνα-
 μάρτητον prædicant. sed non facis. nosti enim, quid in-
 trinsecus discipulos tuos doceas, aliud ore commemorans,
 & aliud celans cōscientia: nobisq. alienis & indoctis loque-
 ris per parabolas, tuis autem mysteria confiteris: & hoc
 iuxta scripturam te facere iactas: quia dictum est, Turbis **Matth. 13**
 Iesus in parabolis loquebatur: & ad discipulos in domo di-
 cit: Vobis datum est scire mysteria regni cælorum, illis au- **Luc. 8**
 tem non est datum. Sed, ut dicere cœperam, exponam bre-
 uiter principum & sociorum tuorum nomina; ut animad-
 uertas, qualium consortio gloriaris. Manichæus electos
 suos, quos inter animas Platonis in cælestibus collocat; di-
 cit omni carere peccato, nec, si uelint, posse peccare: ad
 tanta enim eos uirtutum culmina transcendisse, ut carnis
 operibus illudant. Priscillianus in Hispania pars Manichæi,
 de turpitudine cuius te discipuli diligunt plurimum, uerbū
 perfectionis & scientiæ sibi temere uindicantes, soli cum so-

lis clauduntur mulierculis, & illud eis inter coitum amplexusq. decantāt: Tum pater omnipotēs fecundis imbribus æther Coniugis in gremium lætæ descendit; & omnes Magnus alit, magno commixtus corpore, fetus. Qui quidem partem habent Gnosticæ hæreseos, de Basilidis impietate uenientem. Vnde & uos asseritis, eos, qui absque legis scientia sunt, peccata uitare non posse. Quid loquar de Prisciliano, qui & sæculi gladio, & totius orbis auctoritate damnatus est? Euagrius Ponticus Hyperborita, qui scribit ad uirgines, scribit ad monachos, scribit ad eam, cuius nomē nigredinis testatur perfidæ tenebras, edidit librum, & sententias *ὡς ἀπαθείας*, quam nos impassibilitatem, uel imperturbationem possumus dicere; quando numquam animus ullo perturbationis uitio commouetur, &, ut simpliciter dicam, uel saxum, uel Deus est. Huius libros per Orientem Græcos, &, interpretante discipulo eius Rufino, Latinos plerique in Occidente lectitāt: qui librum quoque scripsit, quasi de monachis: multosq. in eo enumerat, qui numquam fiterunt, & quos fuisse scribit, Origenistas, & ab episcopis damnatos esse non dubium est, Ammonium uidelicet, & Eusebium, & Euthymium, & ipsum Euagriū, Or quoque, & Isidorum, & multos alios, quos enumerare tædium est: & iuxta illud Lucretii: Ac ueluti pueris absinthia tetra medentes Cum dare conantur, prius oras pocula circum Contingunt dulci mellis flauoq. liquore: ita ille unum Ioannem in ipsius libri posuit principio, quem & catholicum, & sanctum fuisse non dubium est; ut per illius occasionem ceteros, quos posuerat, hæreticos Ecclesiæ introduceret. Illam autem temeritatem, immo insaniam eius, quis digno possit explicare sermone, quod librum Xysti Pythagorei, hominis absque Christo, atque ethnici, immutato nomine, Sixti martyris, & Romanæ ecclesiæ episcopi prænotauit: in quo, iuxta dogma Pythagoricorum, qui hominem exæquant Deo, & de eius dicunt esse substantia, multa de perfectione dicuntur; ut, qui uolumen philosophi nesciunt, sub martyris nomine bibant de aureo calice

Baby-

Babylonis. Denique in ipso uolumine nulla prophetarum, *Hier. 51*
 nulla patriarcharum, nulla apostolorum, nulla Christi fit
 mentio: ut episcopum, & martyrem sine Christi fide fuisse
 contendat. unde & uos plurima contra Ecclesiam usurpatis
 testimonia. Fecerat hoc & in sancti Pamphili Martyris no-
 mine, ut librum primum sex librorum defensionis Orige-
 nis, Eusebii Cæsariensis, quem fuisse Arianum, nemo est
 qui nesciat, nomine Pamphili Martyris prænotaret; quo
 scilicet egregia illa quattuor Origenis *τῶν ἀρχαίων* uolumina
 Latinis infunderet auribus. Vis adhuc & alium nosse tui er-
 roris principem? Doctrina tua Origenis ramusculus est. In
 eo enim psalmo, ubi scriptum est, (ut de ceteris taceam)
 Insuper & usque ad noctem erudierunt me renes mei: asse- *Psal. 15*
 rit uirum sanctum, de quorum uidelicet & tu numero es, cū
 ad uirtutum uenerit summitatem, ne in nocte quidem ea
 pati, quæ hominum sunt, nec cogitatione uitiorum aliqua
 titillari. Nec erubescas de societate talium, renuens eorum
 nomina, quorum blasphemias iungeris. Iouiniani secunda
 quæstio, tui ingenii disciplina est. quidquid illi responsum
 est, tibi responsum credito. nec fieri potest, ut diuersus sit eo-
 rum exitus, quorum est una sententia. Cum hæc ita se ha-
 beant, quid uolunt miseræ mulierculæ oneratæ peccatis, *2. Tim. 3*
 quæ circumferuntur omni uento doctrinæ, semper discentes,
 & numquam ad scientiam ueritatis peruenientes; & ceteri
 muliercularum focii, prurientes auribus, & ignorantes quid
 audiant, quid loquantur, qui uetustissimum cœnum quasi
 nouam suscipiunt temperaturam; qui, iuxta Ezechielem, li *Ezech. 13*
 niunt parietem absque temperamento, &, superueniente ue-
 ritatis pluuia, dissipantur? Simon magus hæresim condidit,
 Helenæ meretricis adiutus auxilio. Nicolaus Antiochenus,
 omnium immunditiarum repertor, choros duxit femineos.
 Marcion Romani præmisit mulierem, quæ decipiendos si-
 bi animos præpararet. Apelles Philomenem suarum comi-
 tem habuit doctrinarum. Montanus, immundi spiritus præ-
 dicator, multas ecclesias per Priscam & Maximillam, nobi-
 les & opulentas feminas, primum auro corripit, deinde hæ-

refi polluit. Dimittam uetera, ad uiciniora transcendam. Arius, ut orbem deciperet, sororem principis ante decepit. Donatus per Africam, ut infelices quousque fœtentibus pollueret aquis, Luciliæ opibus adiutus est. In Hispania Agape Elpidium, mulier uirum, cæcum cæca duxit in foueam, successoremq. sui Priscillianum habuit, Zoroastris magi studiosissimum, & ex mago episcopum; cui iuncta Gallia non gente, sed nomine, germanam huc illucq. currentem, alterius & uicinæ hæreseos reliquit heredem. Nunc quoque mysterium iniquitatis operatur. Duplex sexus utrumque supplantat, ut illud propheticum cogamur assumere: Clamauit per dix, congregauit quæ non peperit, faciens diuitias suas, non cum iudicio. In dimidio dierum derelinquet eas, & nouissimum eius erit insipiens. Illud uero, quod ad decipiendos homines quosque postea huic sententiæ coaptarunt, (non absque Dei gratia) cum prima legentes fronte decipiat, introspectum & diligentissime uentilatum, decipere non potest. ita enim Dei gratiam ponunt, ut non per singula opera eius nitamur & regamur auxilio; sed ad liberum referunt arbitrium, & ad præcepta legis, ponentes illud Esaie: Legem enim Deus in adiutorium posuit; ut in eo Deo referenda sint gratiæ, quod tales nos condiderit, qui nostro arbitrio possimus & eligere bona, & uitare mala. Et non intelligunt ista dicentes, quod per os eorum intolerabilem blasphemiam diabolus sibilet. Si enim in eo tantum, Dei est gratia, quod propriæ nos condidit uoluntatis, & libero arbitrio contenti sumus; nec ultra eius indigemus auxilio, ne, si indiguerimus, liberum frangatur arbitrium: ergo nequaquam ultra orare debemus, nec illius clementiam precibus flectere, ut accipiamus quotidie, quod semel acceptum in nostra est potestate. Istiusmodi homines tollunt orationem; & per liberum arbitrium, non homines propriæ uoluntatis, sed Dei potentiæ factos se esse iactant, qui nullius ope indigent. Tollantur & ieiunia, omnisq. continentia: quid enim mihi necesse est laborare, ut accipiam per industriam, quod semel me factum est potestatis? Hoc, quod dico, non meum est argumentum,

mentum : unus discipulorum eius , immo iam magister , & totius ductor exercitus , & contra Apostolum uas perditionis , per solæcismorum , & non , ut sui iactitant , syllogismorum spineta decurrens , sic philosophatur , & disputat : Si nihil ago absque Dei auxilio ; & per singula opera , eius est omne , quod gesserō ; ergo non ego , qui laboro , sed Dei in me coronabitur auxilium ; frustra q. dedit arbitrii potestatem , quam implere non possum , nisi ipse me semper adiuuerit : destruitur enim uoluntas , quæ alterius ope indiget : sed liberum dedit arbitriū Deus ; quod aliter liberū non erit , nisi fecero quod uoluerō . Ac per hoc ait : Aut utor semel potestate , quæ mihi data est , ut liberū seruetur arbitriū : aut , si alterius ope indigeo , libertas arbitrii in me destruetur . Qui hæc dicit , quā nō excedit blasphemiam ? quæ hæreticorū uenena nō superat ? Afferunt se per arbitrii libertatem nequaquā ultra necessarium habere Deum , & ignorant scriptum : Quid habes , quod non accepisti ? si autem accepisti , quid gloriaris , quasi non acceperis ? Magnas agit Deo gratias , qui per libertatem arbitrii rebellis in Deum est : quam nos libenter amplectimur , ita dumtaxat , ut agamus semper gratias largitori ; sciamusq. nos nihil esse , nisi , quod donauit , in nobis ipse seruauerit , dicente Apostolo : Non est uolentis , neque currentis , sed miserentis Dei . Velle & currere meum est : sed ipsum meum , sine Dei semper auxilio non erit meum . dicit enim idem Apostolus : Deus est , qui operatur in nobis & uel le , & perficere . Et saluator in euangelio : Pater meus usque modo operatur , & ego operor ; semper lagitor , semperq. donator est . Non mihi sufficit , quod semel donauit , nisi semper donauerit . Peto , ut accipiam : & , cum accepero , rursus peto . Auarus sum ad accipienda beneficia Dei : nec ille deficit in dando , nec ego satior in accipiendo . quanto plus bibero , tanto plus sitio . legi enim a psalmista cantari : Gustate , & uidete , quoniam suauis est Dominus . Omne , quod habemus bonum , gustus est Domini . Cum me putaue- ro ad calcem peruenisse uirtutum , tunc habebō principium . Principium enim sapientie timor Domini ; qui expellitur ,

Rom. 9

1. Cor. 4

Rom. 9

Philip. 2

Ioan. 5

Psalm. 33

Pro. 1

LII 4 atque

atque destruitur caritate. Hæc hominibus sola perfectio, si
Luc. 17 imperfectos esse se nouerint. Et uos, inquit, cum omnia fe-
 ceritis, dicite: Serui inutiles sumus: quod debuimus facere,
 fecimus. Si inutilis est, qui fecit omnia; quid de illo dicendū
1. Cor. 13 est, qui explere non potuit? Vnde & Apostolus, ex parte
Philip. 3 accepisse, & ex parte comprehendisse se dicit, & necdum
 esse perfectum, præteritorumq. obliuisci, & in futurum se ex-
 tendere. Qui semper præteritorum obliuiscitur, & futura de-
 fiderat, ostendit se præsentibus non esse contentum. Quod
 autem sursum deorsum iactitant, liberum a nobis arbitrium
 destrui; audiant econtrario eos arbitrii destruere libertatem,
 qui male eo abutuntur aduersum beneficiū largitoris. Quis
 destruit arbitrium? ille, qui semper Deo agit gratias, & quod
 cumque in suo riuiulo fluit, ad fontem refert? an qui dicit:
 Recede a me, quia mundus sum, non habeo te necessariū?
 dedisti enim mihi semel arbitrii libertatem, ut faciam quod
 uolero: quid rursus te ingeris, ut nihil possim facere, nisi
 tu in me tua dona compleueris? Fraudulenter prætendis, ut
 Dei gratiam ad condicionem hominis referas, & non in sin-
 gulis operibus auxilium Dei requiras; ne scilicet liberum ar-
 bitrium uidearis amittere; & cum Dei contempnas admini-
 culum, hominum quæras auxilia. Audite, quæso, audite sa-
 crilegum. Si, inquit, uolero curuare digitum, mouere ma-
 num, sedere, stare, ambulare, discurre, sputa iacere, duo-
 bus digitulis narium purgamenta decutere, releuare aluum,
 urinam digerere; semper mihi auxilium Dei necessariū erit?
1. Cor. 10 Audi ingrate, immo sacrilege, Apostolum prædicantem: si-
 ue manducatis, siue bibitis, siue aliud quid agitis, omnia in
Iac. 4 nomine Domini agite. Et illud Iacobi: Ecce nunc qui dici-
 tis, hodie aut cras proficiscemur in illam ciuitatem, & facie-
 mus illic annum, ut negotiemur, & lucremur; qui nescitis
 de crastino. quæ enim est uita uestra? aura est, siue uapor pau-
 lulum apparens, deinde dissipatur. pro eo quod debeatis
 dicere: si Dominus uoluerit, & uixerimus, faciemus aut
 hoc, aut illud. Nunc autem exultatis in superbiis uestris:
 omnis istiusmodi gloriatio pessima est. Iniuriam tibi fieri
 putas,

putas, & destrui arbitrii libertatem, si ad Deum semper au-
 ctore recurras? si ex illius pendeas uoluntate, & dicas: Ocu-
 li mei semper ad Dominum, quoniam ipse euellet de laqueo *Psal. 24*
 pedes meos? Vnde & audes lingua proferre temeraria, unū-
 quemque arbitrio suo regi? Si suo arbitrio regitur, ubi est
 auxilium Dei? si Christo rectore non indiget, quo modo
 scribit Hieremias: Non est in homine uia eius, & a Domi- *Hier. 10*
 no gressus hominis diriguntur? Facilia dicis Dei esse manda- *Psal. 36*
 ta, & tamen nullum proferre potes, qui uniuersa compleue-
 rit. Responde mihi: facilia sunt, an difficilia? si facilia, pro-
 fer qui ea impleuerit, & cur Dauid in psalmo canat: Qui fin *Psal. 93*
 gis laborem in praecepto. Et iterum: Propter uerba labio- *Psa. 16*
 rum tuorum ego custodiui uias duras. Et dominus in euan- *Matth. 7*
 gelio: Intrate per angustam portam. Et: Diligite inimicos *Luc. 6*
 uestros. Et: Orate pro iis, qui persequuntur uos. Sin autem
 difficilia; cur ausus es dicere, facilia esse Dei mandata,
 quæ nullus impleuerit? Non intelligis tuas inter se repugna-
 re sententias? aut enim facilia sunt, & infinita est multitudo
 hominum, qui ea impleuerint; aut difficilia, & temere di-
 xisti esse facile, quod difficile est. Soletis & hoc dicere; aut
 possibilia esse mandata, & recte a Deo data; aut impossibi-
 lia; & non in iis esse culpam, qui acceperunt mandata, sed in
 eo, qui dedit impossibilia. Numquid praecepit mihi Deus,
 ut essem quod Deus est; ut nihil inter me esset & Dominum
 creatorem; ut maior essem angelorum fastigio; ut haberem
 quod angeli non habent? De illo scriptum est quasi propriū:
 Qui peccatum non fecit, nec dolus inuentus est in ore eius. *1. Pet. 2*
 Si hoc & mihi cum Christo commune est, quid ille habuit
 proprium? alioqui per se tua sententia destruetur. Afferis
 posse hominem esse sine peccato, si uelit: & post grauissimū
 somnum ad decipiendas rudes animas frustra conaris adiun-
 gere, non absque Dei gratia. Si enim semel homo per se
 potest esse sine peccato; quid necessaria est Dei gratia? sin
 autem sine illius gratia nihil potest facere; quid necesse
 fuit dicere, posse quod non potest? Potest, inquit, esse si-
 ne peccato; potest esse perfectus, si uoluerit. quis enim
 Chri-

Christianorum non uult esse sine peccato ? aut quis perfectionem recusat, si sufficit ei uelle ; & statim sequitur posse, si uelle præcesserit ? nullusq. Christianorum est, qui nolit esse sine peccato : omnes ergo sine peccato erunt, quia utique omnes cupiunt esse sine peccato . Et in hoc ingratus teneberis, ut, quia nullum, aut rarum quemquam sine peccato proferre potes, omnes sine peccato esse posse fatearis . Possibilia, inquit, mandata dedit Deus . Ecquis hoc negat ? sed, quo modo hæc intelligenda sit sententia, uas electionis apertissime docet : ait enim : Quod erat impossibile legi, in quo infirmabatur per carnem : Deus filium suum mittens in similitudinem carnis peccati, de peccato damnauit peccatum in carne . Et iterum : Ex operibus legis non iustificabitur omnis caro . Quod ne de lege Moyse tantum dictum putes, & non de omnibus mandatis, quæ uno legis nomine continentur, idem Apostolus scribit, dicens : Consentio enim legi Dei, iuxta interiorem hominem : uideo autem aliam legem in membris meis, repugnantem legi mentis meæ, & captiuantem me in lege peccati, quæ est in membris meis . Miser ego homo, quis me liberabit de corpore mortis huius ? Gratia Dei per Iesum Christum, dominum nostrum . Cur autem hoc dixerit, alio sermone demonstrat . Scimus enim, quod lex spiritualis est : ego autem carnalis sum, uenundatus sub peccato . quod enim operor, non cognosco . non enim, quod uolo, illud operor ; sed, quod odi, illud facio . sin autem, quod nolo, hoc facio ; consentio legi, quoniam bona est . nunc autem nequaquam ego operor illud, sed, quod in me habitat, peccatum . scio enim, quod non habitat in me, hoc est, in carne mea, bonum . uelle enim adiacet mihi ; perficere autem bonum, non inuenio . non enim, quod uolo bonum, hoc facio ; sed, quod nolo malum, hoc ago . si autem, quod nolo, hoc facio ; nequaquam ego operor illud, sed, quod habitat in me peccatum . Reclamabis, & dices : Manichæorum dogma nos sequi, & eorum, qui de diuersis naturis Ecclesiæ bella concinnant, asserentium malam esse naturam, quæ immutari nullo modo possit .

Et

Et hoc non mihi, sed Apostolo imputa, qui nouit aliud esse Deum, aliud esse hominem; aliam carnis fragilitatem, aliam spiritus fortitudinem. Caro enim desiderat contra spiritum, *Gal. 5* & spiritus contra carnem: & hæc inuicem sibi aduersantur, ut non, quæ uolumus, illa faciamus. A me numquam audies, malam esse naturam. Sed, quo modo sit carnis fragilitas differenda, ipso, qui scripsit, docente, discamus. Interroga eum, quare dixerit: Non enim, quod uolo, hoc operor; sed, quod odi, malum illud facio. Quæ necessitas illius impediatur uoluntatem, quæ tanta uis, odio digna imperet facere; ut non, quod uult, sed quod odit & non uult, facere compellatur? Respondebit tibi: O homo, tu quis es, qui respondere Deo? numquid dicit figmentum figulo, quare me *Rom. 9* fecisti sic? an non habet potestatem figulus luti, de eadem massa aliud quidem uas facere in honorem, aliud autem in contumeliam? Obiice Deo fortiorem calumniam, quare adhuc, cum in utero essent Esau & Iacob, dixerit: Iacob dilexi, Esau autem odio habui. Accusa eum iniquitatis, cur Achan, filius Charmi, de Hierichuntina præda aliqua furtus *Ios. 7* eius sit, & tanta millia hominum illius uitio trucidata sint. Quamobrem filii Eli peccauerint, & omnis pene populus *1. Reg. 3. 4* extinctus, arcaque sit capta. Dauid peccauit ut enumeraret populum, & cur in toto Israele tanta hominum cæsa sint millia. Et ad extremum, quod solet nobis obiicere contumelialis uester Porphyrius, qua ratione clemens & misericors Deus ab Adam usque ad Moysen, & a Moyse usque ad aduentum Christi passus sit uniuersas gentes perire ignorantia legis, & mandatorum Dei. Neque enim Britannia, fertilis provincia tyrannorum, & Scoticæ gentes, omnesque usque ad Oceanum per circuitum barbaræ nationes, Moysen prophetasque cognouerant. Quid necesse fuit eum in ultimo uenire tempore, & non prius, quam innumerabilis periret hominum multitudo? Quam quæstionem beatus Apostolus, ad Romanos scribens, prudentissime uentilat, ignorans hæc, & Dei concedens scientiæ. Dignare igitur & tu ista nescire, quæ quæris. concede Deo potentiam sui: nequam

quam te indiget defensore. Ego miserabilis, qui tuas expe-
Eph. 2 cto contumelias, qui illud semper lego: Gratia salui facti e-
Psal. 31 stis. Et: Beati, quorum remissa sunt iniquitates, & quorum
 tecta sunt peccata. Ut de mea fragilitate loquar, noui me
 multa uelle, quæ facienda sunt, & tamen implere non pos-
 se. Spiritus enim fortitudo ducit ad uitam, sed carnis fragili-
Mar. 14 tas ducit ad mortem. Et audio Dominum commonentem:
Matth. 26 Vigilate, & orate, ne intretis in tentationem. Spiritus prom-
 ptus est, caro autem infirma. Frustra blasphemias, & igno-
 rantium auribus ingeris, nos liberum arbitrium cōdemnare.
 Damnetur ille, qui damnat. Ceterum non ex eo differimus
 a brutis animalibus, quod liberi arbitrii conditi sumus: sed
 ipsum liberum, ut diximus, arbitrium Dei nititur auxilio,
 illiusq. per singula ope indiget: quod uos non uultis: sed id
 uultis, ut, qui semel habet liberum arbitrium, Deo adiuto-
 re non egeat. Liberum arbitrium dat liberam uoluntatem;
 & non statim ex libero arbitrio homo facit, sed Domini auxi-
 lio, qui nullius ope indiget. Tu ipse, qui perfectam & Deo
 æqualem in hominibus iustitiam iactitas, & peccatorem te
 esse cōfiteris, responde mihi; uelis, an nolis carere peccato?
 si uis; quare iuxta sententiam tuam non imples, quod desi-
 deras? sin autem non uis; contemptorem te præceptorum
 Dei esse demonstras. si contemptor es, utique & peccator.
 si peccator, audi tibi scripturam loquentem: Peccatori di-
Psal. 49 xit Deus: Quare tu enarras iustitias meas, & assumis testa-
 mentum meum per os tuum? Tu uero odisti disciplinam,
 & proiecasti uerba mea retrorsum. Verba Dei, dum non uis
 facere, post tergum tuum proiicis: et nouus Apostolus, or-
 bi terrarum facienda & non facienda decernis. Sed non est
 ita, ut loqueris: aliud in tua mente uersatur. Quando enim
 te dicis peccatorem, & posse hominem sine peccato esse; si
 uelit; illud uis intelligi, te quidem sanctum esse, & omni
 carere peccato; sed per humilitatem, peccati nomen assu-
 mere: ut alios potius laudes, & tibi detrahas. Illud quoque
 argumentum uestrum ferre quis possit? Dicitis his uerbis:
 Aliud est esse, aliud esse posse. esse, non est in nostra posi-

tum

tum potestate; esse autem posse, generaliter dici: quod licet alius non fuerit, tamen possit esse qui esse uoluerit. Rogo, quæ est ista argumentatio, posse esse, quod numquam fuerit? posse fieri, quod nullum fecisse testaris? id cuilibet tribuere, qui an futurus sit ignores; & dare nescio cui, quod in patriarchis, & prophetis, & apostolis fuisse nequeas approbare? Audi ecclesiasticam simplicitatem, siue rusticitatem, aut imperitiam, ut uobis uideatur. Loquere, quod credis: publice prædica, quod secreto discipulis loqueris. Qui dicis te habere arbitrii libertatem, quare non libere, quod sentis, loqueris? aliud audiunt cubiculorum tuorum secreta, aliud rostrorum populi. etenim uulgus indoctum non potest arcanorum tuorum onera sustentare, nec capere solidum cibum, quod infantie lacte contentum est. Necdum scripsi, & comminaris mihi rescriptorum tuorum fulmina: ut scilicet hoc timore perterritus, non audeam ora referare: & non animaduerti iccirco nos scribere, ut uos respondere cogamini; & aperte aliquando dicere, quod pro tempore, personis, & locis uel loquimini, uel tacetis. Nolo uobis liberum esse, ne gare quod semel scripseritis. Ecclesie uictoria est, uos aperte dicere quod sentitis. aut enim idem responsuri estis, quod & nos loquimur; & nequaquam eritis aduersarii, sed amici: aut, si contraria nostro dogmati dixeritis, in eo uincemus, quod: omnes cognoscent ecclesie, quid sentiat. Sententias uestras prodidisse, superasse est. Patet prima fronte blasphemia. Non necesse habet conuinci, quod sua statim professione blasphemum est. Minamini nobis responsionem, quam uitare nullus potest, nisi qui omnino non scribit. Unde nostis quid dicturi simus, ut responsionem paretis? Forsitan uestra dicemus, & frustra ingenii uestri acuetis stylum. Eunomiani, Ariani, Macedoniani, nominibus separati, impietate concordēs, nullum nobis laborem faciunt: loquuntur enim, quod sentiunt. Sola hæc hæresis est, quæ publice erubescit loqui, quod secreto docere non metuit. Magistrorum silentia profert rabies discipulorum. Quod audierunt in cubiculis, in tectis prædicant: *Matth. 10*

ut,

ut, si placuerit auditoribus quod dixerint, referatur ad gloriam magistrorum; si displicuerit, culpa sit discipuli, non magistri. Ideo creuit uestra hæresis, & decepistis plurimos, maximeq. eos, qui adhærent mulieribus, & sciunt se peccare non posse: quia semper docetis, semper negatis, & au

Osee 9 dire meremini illud propheticum: Gloriam in partibus, & parturitionibus da illis Domine. Quid dabis illis? Vuluam sterilem, & ubera arentia. Feruet animus, nec possum uerba cohibere. Epistolaris angustia non paritur longi operis magnitudinem. Nullius in hoc opusculo nomen proprie tangitur: aduersus magistrum peruersi dogmatis locuti sumus. qui si iratus fuerit, atque rescripserit, suo quasi mus prodetur indicio, ampliora in uero certamine uulnera suscepturus. Multi anni sunt, quod ab adolescentia usque ad hanc ætatem diuersa scripsi opuscula; semperq. habui studio audientibus loqui, quod publice in ecclesia didiceram; nec philosophorum argumenta sectari, sed apostolorum simplicitati

1. Cor. 1 acquiescere, sciens illud scriptum: Perdam sapientiam sapientium, & prudentiam prudentium reprobabo. Et: Fatuum Dei sapientius est hominibus. Cum hæc se ita habeant, prouoco aduersarios, ut omnes retro chartulas ex integro discutiant; & si quid in meo ingeniolo uitii repere rint, proferant in medium: aut enim bona erunt, & contradicam eorum calumniæ; aut reprehensibilia, & confitebor errorem, malens emendare, quam perseuerare in prauitate sententiæ. Et tu ergo, doctor egregie, aut defende quod locutus es; & sententiarum tuarum acumina aditruere eloquio subsequenti; ne, quando tibi placuerit, neges quod locutus es: aut, si certe errasti, quasi homo, libere confitere;

Ioan. 19 & discordantium inter se redde concordiam. In mentem tibi ueniat, tunicam saluatoris nec a militibus fuisse conscissam. Fratrum inter se cernis iurgia, & rides, atque lætaris,

Ion. 1 quod alii tuo nomine, alii Christi appellentur. Imitare Ionam, & dicito: Si propter me est ista tempestas, tollite me,

Matth. 12 & mittite in mare. Ille humilitate deiectus est in profundum, ut in typum Domini gloriosus resurgeret: tu per su-

per

Perbiam ad astra sustolleris, ut de te loquatur Iesus; Vide- *Luc. 10*
 bam satanam sicut fulgur cadentem de cælo. Quod autem
 in scripturis sanctis multi iusti appellantur, ut Zacharias, & *Luc. 1*
 Helisabet, Iob, Iosaphat, & Iosias, & multi, quorum no- *Iob 1*
 minibus sacra scriptura contexta est: quamquã in promiss-
 so opere plenius, si gratiã Dominus dederit, dicturus sum;
 tamen in præsentī epistola hoc breuiter strinxisse sufficiat,
 quod iusti appellantur, non quod omni uicio careant, sed
 quod maiori parte uirtutum commendentur. Denique &
 Zacharias silentio condemnatur: & Iob suo sermone re-
 prehenditur: & Iosaphat, & Iosias, qui iusti absque dubio *3. Reg. 22*
 dicti sunt, fecisse narrantur, quæ Domino displiceret. Quo- *4. Reg. 23*
 rum alter impio auxilium tulit, & correptus est a propheta: *2. Par. 35*
 alter contra præceptum Domini ex ore Hieremiæ, occurrit
 Nechao, regi Aegypto, & interfectus est: & tamen uter-
 que iustus appellatur. De ceteris non est huius temporis scri-
 bere: neque enim a me librum, sed epistolam flagitasti: qui
 dictandus est ex otio, & omnes oblationes eorum Chri-
 sti auxilio destruendæ: quod nobis sanctarum scripturarum
 testimoniis asserendum est, in quibus quotidie credentibus
 loquitur Deus. Illudq. per te sanctæ & illustris domus con-
 ciliabulum precor, atque commoneo, ne per unum, aut,
 ut multum, tres homunculōs suscipiant tantarum fæces hæ-
 reseon, aut, ut parum dicam, infamiam: ut, ubi primum
 uirtus & sanctitas laudabatur, ibi præsumptionis diaboli-
 cæ, & sordidissimæ societatis turpitudine uersetur; sciantq.
 qui huiuscemodi hominibus opes suggerunt, hæreticorum
 multitudinem congregare, & Christi hostes facere, & enu-
 trire aduersarios eius, frustra. aliud lingua prætere, &
 cum manu sentire aliud comprobentur.

IN DIALOGOS ADVERSVS

Pelagianos

PROOEMIUM.

SCRIPTA iam ad Ctesiphontem epistola, in qua
 S ad interrogata respondi, crebra fratrum expostulatio fuit, cur promissum opus ultra differrem; in quo pollicitus sum, me ad cunctas eorum, qui ἀπάδειν prædicant, quæstiunculas responsurum. nulli enim est dubium, quin Stoicorum, & Peripateticorum, hoc est, ueteris Academiae, ista contentio sit: quod alii eorū asserant, τὰ θνητά, quas nos perturbationes possumus dicere, ægritudinem, gaudium, spem, timorem, eradicari, & extirpari posse de mentibus hominum; alii frangi eas, regi, atque moderari, & quasi infrenes equos quibusdam lupatis coerceri. Quorū sententias & Tullius in Tusculanis disputationibus explicat; & Origenes ecclesiasticæ ueritati in Stromatibus suis miscere conatur: ut præteream Manichæum, Priscillianum, Euegrum Hyperbortam, Iouinianum, & totius pene Syriæ hæreticos, quos sermone gentili Abin & Paanin, id est, peruersos & Massilianos, Græce εὐχίτας uocant: quorum omnium ista sententia est, posse ad perfectionem, & non dicam ad similitudinem, sed æqualitatem Dei, humanam uirtutem & scientiam peruenire; ita ut asserant se ne cogitatione quidem, & ignorantia, cum ad consummationis culmē ascenderint, posse peccare. Et quamquam superiori epistola, quam ad Ctesiphontem scripsi contra errores eorū, pro angustia temporis pauca perstrinxerim: hic liber, quē nunc cudere nitimur, Socraticorū consuetudinem seruabit; ut, ex utraque parte quid dici possit, exponat; & magis perspicua ueritas fiat, cum posuerit unusquisque, quod senserit. Illud autem Origenis proprium est, impossibile esse, humanam a principio usque ad mortem nō peccare naturam: et rursus esse possibile, cum se aliquis ad meliora conuerterit, ad tantam fortitudinem peruenire, ut ultra peccare non

non possit. Aduersum eos autem, qui me dicunt hoc opus
 inflammatum inuidiæ facibus scribere, breuiter respōdebo,
 numquam me hæreticis pepercisse; & omni egisse studio,
 ut hostes Ecclesiæ, mei quoque hostes fierent. Heluidius
 scripsit contra sanctæ Mariæ uirginitatem perpetuam. Num
 quid, ut ei responderem, ductus inuidia sum, quem om-
 nino in carne non uidi? Iouinianus, cuius, o Pelagi, a te
 nunc hæresis suscitatur, Romanam fidem, me absente,
 turbauit, tam elinguis & sermonis putidi, ut magis miseri-
 cordia dignus fuerit, quam inuidia. Illi quoque respondi,
 ut potui. Rufinus non uni urbi, sed orbi blasphemias Ori-
 genis, & αὐτὸν ἀρχαῖον libros, quantū in se fuit, intulit; ita ut
 Eusebii quoque primū librū defensionis Origenis sub nomi-
 ne Pāphili Martyris ederet; &, quasi ille parum dixisset, no-
 uum pro eo uolumen euomeret. num inuidemus ei, quia re-
 spondimus, & tanta in eo eloquentiæ fuere fulmina, ut me
 a scribendi atque dictandi studio deterrent? Palladius, ser-
 uilis nequitix, eandem hæresim instaurare conatus est, &
 nouam translationis Hebraicæ mihi calumniam struere.
 Num & illius ingenio nobilitatiq. inuidimus? Nunc quo-
 que mysterium iniquitatis operatur: & garrit unusquisque
 quod sentit: ego solus sum, qui cunctorum gloria morde-
 ar; & tam miser, ut iis quoque inuideam, qui non meren-
 tur inuidiam: unde, ut omnibus probarem me non odisse
 homines, sed errores, nec aliquorum infamiam quærere,
 magisq. dolere uicem eorum, qui falsi nominis scientia sup-
 plantantur, Attici & Critobuli nomina posui, per quos,
 & nostra pars & aduersariorum quid sentiret, exprimerem.
 Quin potius omnes, qui catholicam sectamur fidem, opta-
 mus & cupimus damnari hæresim, homines emendari; aut
 certe, si in errore uoluerint permanere, non nostram cul-
 pam esse, qui scripsimus, sed eorum, qui mendacium præ-
 tulerant ueritati. Breuiterq. calumniatoribus respōdemus,
 qui sua in nos maledicta conferunt, Manichæorum esse, ho-
 minum damnare naturam, & liberum auferre arbitrium,
 & adiutorium Dei tollere: rursusq. apertissimæ insanix,

M m m hoc

hoc hominem dicere esse, quod Deus est: et sic ingredien-
dum uia regia, ut nec ad sinistram nec ad dextram decline-
mus, appetitumq. propriæ uoluntatis, Dei semper creda-
mus auxilio gubernari. Si quis autem falso se infamari cla-
mitat, & gloriatur nostra sentire; tunc ueræ fidei probabit
assensum, cum aperte & absque dolo aduersa damnauerit:
Hier. 13 ne audiat illud propheticum: Et in omnibus his non est cō-
uersa ad me præuaricatrix soror eius Iuda ex toto corde suo,
sed in mendacio. Minorisq. peccati est, sequi malū, quod
bonum putaueris, quam non audere defendere, quod bo-
num pro certo noueris. Qui minas, iniuriam, pauperta-
temq. ferre non possumus, quo modo flammæ Babylonis
uincemus? Quod bellum seruauit, pax ficta non auferat.
nolo timore perfidiam discere, cum uerā fidem meæ Chri-
stus reliquerit uoluntati.

DIALOGORVM HIERONYMI

aduersus Pelagium

LIBER PRIMVS.

ATTICVS.

IC mihi Critobule: uerum ne est, quod a te scri-
Dptum audio, posse hominem sine peccato esse, &
facilia Dei esse præcepta? **CRITOBVLVS**. Verum,
Attice; sed non eodem sensu ab æmulis accipitur, quo a me
dictū est. **ATTICVS**. Quid enim ambiguitatis in dicto est,
ut diuersæ intelligentiæ tribuatur occasio? nec quæro, ut de
utroque pariter respondeas. duo enim a te proposita sunt,
unum, posse hominem sine peccato esse, si uelit; alterum,
facilia Dei esse præcepta. licet ergo simul dicta sint, tamen
per partes singulas differantur: ut, quorum una uidetur fi-
des, nulla sit in sententiarum diuersitate contentio. **CRIT.**
Ego, Attice, dixi hominem absque peccato posse esse, si
uelit, non, ut quidam maledici calumniantur, absque Dei
gratia; quod etiam cogitare sacrilegium est; sed simpliciter
posse,

posse, si uelit; ut subaudiatur, cum Dei gratia. **ATTI.** Ergo & malorum in te operum auctor est Deus? **CRITO.** Nequaquam ita ut autumas: sed si quid in me boni habeo, illo suggerente & adiuuante completur. **ATTI.** Non de natura quaero, sed de actu. quis enim dubitat Deum omnium creatorem? hoc mihi respondeas uelim: quod agis bonum, tuum est, an Dei? **CRITO.** Meum est, & Dei, ut ego operer, & ille adiuet. **ATTI.** Et quo modo hæc omnium opinio est, quod Dei auferas gratiam, &, quidquid homines agimus, propriæ tantum asseras uoluntatis? **CRITO.** Miror, Attice, cur erroris alieni a me causam rationemque flagites; & id quaeras, quod scriptum non est; cum perspicuum sit, quod scripserim. Dixi hominem sine peccato esse posse, si uelit: numquid addidi, absque Dei gratia? **ATTI.** Sed ex eo, quod non addidisti, uideris negare. **CRITO.** Immo ex eo, quod non negaui, dixisse existimandus sum. neque enim, quidquid non dicimus, negare arbitrandi sumus. **ATTI.** Confi-teris ergo, posse hominem sine peccato esse, si uelit, cum Dei gratia? **CRITO.** Non solum fateor, sed & libere proclamo. **ATTI.** Errat ergo, qui Dei gratiam tollit? **CRITO.** Errat. Quin potius arbitrandus est impius: cum Dei nutu omnia gubernentur; & hoc, quod sumus, & habemus appetitum propriæ uoluntatis, Dei conditoris sit beneficium. ut enim liberum possideamus arbitrium, & uel ad bonam uel ad malam partem declinemus propria uoluntate; eius est gratiæ, qui nos ad imaginem & ad similitudinem sui tales condidit. **ATTI.** Nulli, o Critobule, dubium est; ex eius cuncta pendere iudicio, qui creator est omnium; &, quidquid habemus, illius beneficio deputandum. sed quaero, hoc ipsum, quod Dei asseris gratiæ, utrum ad conditionis referas beneficium; an in singulis rebus putes esse, quas gerimus, ut scilicet illius in omnibus utamur auxilio; an semel ab eo liberi arbitrii conditi, nostra uoluntate, uel uiribus agamus, quod uolumus? noui enim, plerisque uestrum ita ad Dei cuncta referre gratiam, ut non in partibus, sed in genere, hoc est, nequaquam in singulis rebus, sed in

M m m 2 con

Psal. 126

condicione arbitrii intelligant potestatem. **CRITO.** Non est ita ut autumas; sed a me utrumque dicitur, ut & Dei gratia sit, quod tales conditi sumus, & per singula opera illius adminiculo fulciamur. **ATTI.** Constat ergo inter nos, in bonis operibus, post propriam uoluntatem, Dei nos niti auxilio, in malis diaboli. **CRITO.** Constat, & super hoc nulla contentio est. **ATTI.** Male ergo sentiunt, qui per singulas res, quas agimus, Dei auferunt adiutorium: & illud, quod Psalmista canit: Nisi Dominus ædificauerit domum, in uanum laborant qui ædificant eam: Nisi Dominus custodierit ciuitatem, frustra uigilat qui custodit eam: & cetera huiusmodi, peruersis interpretationibus, immo risu dignis, ad alios sensus detorquere nituntur. **CRITO.** Quid mihi necesse est contra alios dicere, cum meum responsum habeas? **ATTI.** Tuum responsum cuiusmodi? eos bene sentire, an male? **CRITO.** Ecquæ me cogit necessitas, ut contra alios promam sententiam? **ATTI.** Disputationis ordo, & ratio ueritatis. An ignoras, omne, quod dicitur, aut esse, aut non esse, & aut inter bona, aut mala debere numerari? hoc ergo, de quo interrogo, aut bene dici, aut male, ingratum tibi fatendum est. **CRITO.** Si in singulis rebus, quas gerimus, Dei utendum est adiutorio: ergo & calamum temperare ad scribendum, & temperatum pumice terere, manumq. aptare litteris, tacere, loqui, sedere, stare, ambulare, currere, comedere, ieiunare, flere, ridere, & cetera huiusmodi, nisi Deus iuuerit, non poterimus? **ATTI.** Iuxta meum sensum, non posse perspicuum est. **CRITO.** In quo igitur liberum habemus arbitrium, & Dei in nos gratia custoditur, si ne hoc quidem absque Deo possumus facere? **ATTI.** Nō sic donata est liberi arbitrii gratia, ut Dei per singula tolleretur adminiculū. **CRITO.** Non tollitur Dei adiutoriū, cum creaturæ ex semel dati liberi arbitrii gratia conseruentur. si enim absque Deo, & nisi per singula ille me iuuerit, nihil possum agere: nec pro bonis me iuste operibus coronabit, nec affliget pro malis; sed in utroque suum uel recipiet, uel damnabit auxilium. **ATTI.** Dic ergo simpliciter, quod Dei

Dei auferas gratiam . quidquid enim tollis in partibus, necesse est ut & in genere neges . CRITO . Non nego gratiam ; cum ita me a Deo asseram conditum , ut per Dei gratiam meæ datum sit uoluntati , uel facere quid , uel non facere . ATTI . Dormitat ergo Deus in operibus nostris , semel data liberi arbitrii potestate : nec orandus est , ut in singulis operibus nos iuuat ; cum uoluntatis nostræ sit , & proprii arbitrii , uel facere , si uolumus , uel non facere , si nolumus . CRITO . Quo modo in ceteris creaturis condicionis ordo seruetur : sic , concessa semel liberi arbitrii potestate , nostræ uoluntati omnia derelicta sunt . ATTI . Ergo , ut dixi , non debeo a Deo per singula auxilium deprecari , quod semel meo datum est iudicio ? CRITO . Si in omnibus ille cooperatur , non est meum , sed eius , qui adiuuat , immo qui in me cooperatur , præsertim cum absque eo facere nihil possem . ATTI . Oro te , non legisti : Non enim uolentis , neque Rom. 9 currentis , sed misereantis est Dei ? Ex quibus intelligimus , nostrum quidem esse uelle , & currere ; sed , ut uoluntas nostra compleatur , & cursus , ad Dei misericordiam pertinere ; atque ita fieri , ut & in uoluntate nostra , & in cursu liberum seruetur arbitrium , & in consummatione uoluntatis , & cursus , Dei cuncta potentie relinquatur . Scilicet nunc mihi scripturarum testimonia replicanda sunt , quo modo per singula Dei a sanctis flagitetur auxilium ; & in singulis operibus suis illo adiutore & protectore uti desiderent . lege totum psalterium , omnes sanctorum uoces : nihil erit , nisi ad Deum in cunctis operibus deprecatio . Ex quo perspicue ostenditur ; te aut Dei negare gratiam , quam tollis in partibus ; aut , si in partibus dederis , quod nequaquam te uelle manifestum est , in nostram sententiam transire ; qui sic liberum homini seruamus arbitrium , ut Dei per singula adiutorium non negemus . CRITO . Captiosa ista est conclusio , & de dialecticorum arte descendens . mihi autem nullus auferre poterit liberi arbitrii potestatem ; ne , si in operibus meis Deus adiutor extiterit , non mihi debeat merces , sed ei , qui in me operatus est . ATTI . Fruere liberi arbitrii potesta

M m m 3 te :

te: ut contra Deum armes linguam tuam; & in eo te liberū probes, si tibi liceat blasphemare. uerum, super hoc quid sentias, nulli dubium est, & præstigia confessionis tuæ apertissima luce claruerunt. Nunc reuertamur ad id, unde disserere cœpimus. Dic mihi, si tibi uidetur; hoc, quod cū Dei adiutorio paulo ante dicebas, posse hominem non peccare, si uelit, in perpetuum dicas, an ad tempus, & breue. CRITO. Superflua interrogatio est. si enim, ad tempus, & breue, dixerō; nihilominus referetur ad perpetuum. quidquid enim ad breue dederis, hoc concedes & in perpetuum. ATTIL. Quid dicas, non satis intelligo. CRITO. Ita ne durus es, ut manifesta non sentias? ATTIL. Non me pudet nescire, quod nescio. et de quo futura est disputatio, debet inter utrumque conuenire, quem sensum habeat. CRITO. Ego hoc assero; qui potest uno die se abstinere a peccato, posse & altero; qui duobus, posse & tribus; qui tribus, posse & triginta, atque hoc ordine posse & trecentis & tribus millibus, & quamdiucumque se uoluerit abstinere. ATTIL. Dic ergo simpliciter, posse hominem in perpetuum esse sine peccato, si uelit. Possumus ne omne, quod uolumus? CRITO. Nequaquam. neque enim possum, quidquid uoluerō: sed hoc solum dico, hominem sine peccato posse esse, si uelit. ATTIL. Quæso, ut mihi respondeas: hominē me putas, an belluam? CRITO. Si de te ambigo, utrum homo, an bellua sis; ipse me belluam confitebor. ATTIL. Si ergo, ut dicis, homo sum; quo modo, cum uelim & satis cupiam non peccare, delinquo? CRITO. Quia uoluntas imperfecta est. si enim uere uelles, uere utique non peccares. ATTIL. Ergo tu, qui me arguis non uere cupere, sine peccato es, quia uere cupis? CRITO. Quasi ego de me dicam, quem peccatorem esse confiteor, & non de paucis, & raris, si qui uoluerint non peccare. ATTIL. Interim ex meo tuoq. iudicio & ego, qui interrogo, & tu, qui respondes, peccatores sumus. CRITO. Sed possumus non esse, si uelimus. ATTIL. Dixi me uelle non peccare: te quoque hoc sentire, non dubium est. Quo modo ergo, quod uterque uolumus, uterque nō possumus?

sumus? CRITO. Quia plene non uolumus. ARTI. Da ergo, qui maiorum nostrorum plene uoluerint, & potuerint. CRITO. Hoc quidem nō facile est ostendere. neque enim, quando dico hominem posse esse sine peccato, si uelit; alios quos fuisse contēdo, sed simpliciter posse esse, si uelit. aliud namque est, esse posse; quod Græce dicitur δύναμις: aliud est, esse; quod ipsi appellant ἐνέργειαν. possum esse medicus, sed interim non sum. possum esse faber, sed necdum didici, quidquid igitur possum; licet necdum sim, tamē ero, si uoluerō. ARTI. Aliud sunt artes, aliud id, quod super artes est. Medicina, & fabrica, & artes ceteræ inueniuntur in plurimis: sine peccato autem esse perpetuo, diuinæ solius est potestatis. Itaque aut da exemplum, qui absque peccato fuerint in perpetuum: aut, si dare non potes, confitere imbecillitatem tuam: & noli ponere in cælum os tuum, ut per esse, & esse posse, stultorum illudas auribus. quis enim tibi concedet, posse hominem facere, quod nullus umquam hominum potuerit? An tu dialecticis ne imbutus quidem es? Si enim potest homo; non posse, tollitur. si autem non potest; posse, subuertitur. Aut concede mihi aliquem potuisse, quod fieri posse contendis: aut, si nullus hoc potuit, inuitus teneberis, nullum posse, quod possibile iactitas. In te: Diodorum, & Chrysippum, ualentissimos dialecticos, *ἢ ἀδυνάτου* ista contentio est. Diodorus id solum posse fieri dicit, quod aut sit uerum, aut uerum futurum sit; & quidquid futurum sit, id fieri necesse esse; quidquid autem non sit futurum, id fieri non posse. Chrysippus uero, & quæ non sunt futura, posse fieri dicit; ut frangi hoc margaritum, etiam si id numquam futurum sit. Qui ergo aiunt hominē posse esse absque peccato, si uelit, non poterunt hoc uerum probare, nisi futurum docuerint. Cum autem futura incerta sint omnia, & maxime ea, quæ numquam facta sunt; perspicuum est, eos id futurum dicere, quod non sit futurum: Ecclesiaste hanc confirmante sententiam: Omne, quod futurum est, iam factum est in priori sæculo. CRITO. Oro te, ut hoc mihi respondeas:abilia Deus mandata dedit, an

M n m 4 impos-

impossibilia? **ATTI.** Cerno, quo tua tendat assertio: sed de hoc in posterioribus differendū est: ne, dū miscemus quæstionibus quæstiones, obscurā audientibus intelligentiā relinquamus. Reservato igitur hoc, quod fatemur; possibilia Deum dedisse mandata; ne ipse auctor iniustitiæ sit, si id exigit fieri, quod fieri non potest: nunc illud imple, quod proposueras, posse hominem sine peccato esse, si velit. aut enim dabis eos, qui potuerunt: aut, si nullus potuit, liquido confiteberis hominem in perpetuum vitare peccata non posse.

CRITO. Quoniam urges me, ut dem quod dare non debeo; **Matth. 19** illud quæso considera, quod Dominus dixerit, facilius camelum per foramen acus intrare posse, quam diuitem in regnū celorum. & tamen dixit fieri posse, quod numquam factū est. neque enim camelus umquam per foramen acus ingressus est. **ATTI.** Miror hominem prudentem proposuisse testimonium, quod contra se faciat. in hoc enim, non quod fieri possit, dictum est, sed impossibile impossibili comparatum. quo modo enim camelus non potest intrare per foramen acus; ita & diues non ingreditur in regna celorum. aut, si potueris ostendere, quod diues ingreditur regna celorum; sequitur, ut & camelus intret per foramen acus.

Gen. 13 Nec mihi Abraham & ceteros, quos in ueteri testamento diuites legimus, exemplo proponas, qui diuites ingressi sint regna celorum: cum, ipsis diuitiis ad bona utentes opera, diuites esse deserint; immo, cum non sibi, sed aliis diuites fuerint; dispensatores magis Dei, quam diuites appellandi sint. sed nobis euangelica perfectio requirenda est: in qua præcipitur: Si uis perfectus esse, uade, & uende omnia, quæ habes, & da pauperibus, & ueni sequere me. **CRITO.** Dum nescis, proprio captus es laqueo. **ATTI.** Quoniam modo?

Matth. 19 **CRITO.** Ex sententia Domini asseris posse hominem esse perfectum, quando enim dicit: Si uis perfectus esse, uende omnia, quæ habes, & da pauperibus, & ueni sequere me: ostendit hominem, si uoluerit, & fecerit quæ præcepta sunt, posse esse perfectū. **ATTI.** Validissimo quidem pugno me percussisti, ita ut caligo mihi ante oculos obuersari coeperit: sed

sed tamē hoc ipsum, quod dicit: Si uis perfectus esse: ei dicitur qui non potuit, immo noluit, & iccirco non potuit. Tu autem ostende mihi, qui & uoluerit, & potuerit, quod nunc pollicitus es: CRITO. Quæ enim me cogit necessitas ostendere, qui perfecti fuerint; cum perspicuum sit, posse esse perfectos; ex eo, quod uni a saluatore sit dictum, & per unum omnibus, Si uis esse perfectus? ATTI. Tergiuersaris: in eodem luto hæsitās. aut enim, quod potest fieri, aliquando factum est: aut, si nūquam factum est, fieri non posse concede. CRITO. Quid ultra differo? scripturarum auctori tate uincendus es. Vt cetera prætermittam; nōne his duobus testimoniis tibi imponetur silentium, in quibus Iob, & Zacharias, Helisabetq. laudantur? Nisi enim fallor, in Iob ita scriptum est: Homo quidam erat in regione Hus nomi- Iob 1.
ne Iob: & erat homo ille uerax & sine crimine, uerus Dei cultor, abstinens se ab omni re mala. Et iterum: Quis est, Iob 42.
qui arguit iustum meum sine peccato, & loquitur uerbis suis per ignorantiam? In euangelio quoque secundum Lucam: Luc. 8.
Fuit in diebus Herodis regis Iudæ sacerdos quidam, nomine Zacharias, de uice Abia: & uxor illi de filiabus Aaron, & nomen illius Helisabet. Erant autem ambo iusti ante Deū, incedentes in omnibus mandatis & iustificationibus Domini, sine querela: Si uerus Dei cultor est, & immaculatus, ac sine crimine; & qui ambulabant in cunctis iustificationibus Domini, iusti sunt in conspectu eius: puto, quod peccato careant, & nulla re indigeant, quæ ad iustitiam pertinet. ATTI. Proposuisti testimonia, quæ non de alterius scripturæ loco, sed de propriis libris absoluta sunt. Nam & Iob, postquam percussus est plaga multa, aduersus Dei sententiā, prouocans eum ad iudicium, dixisse conuincitur: Atque uti Iob 16.
nam sic iudicaretur uir cum Deo, quo modo iudicatur filius hominis cum collega suo. Et iterum: Quis mihi tribuat an Iob 31.
ditem, ut desiderium meum omnipotens audiat, & librū scribat ipse, qui iudicat? Et rursum: Si enim fuero iustus, Iob 9.
os meum impia loquetur; & si absque crimine, prauus inueniar; & si purificatus niue, & lotus manibus, satis me for-
de

de tinxisti: execratum est me uestimētum meum. Et de Zacharia scriptum est, quod, angelo natiuitatem filii pollicente, dixerit: Vnde hoc sciam? ego enim sum senex, & uxor mea processit in diebus suis. ob quæ statim silentio condemnatur: Eris tacens, & loqui non poteris usque ad diem, quo fient hæc: quia non credidisti uerbis meis, quæ implebuntur in tempore suo. Ex quo perspicuum est, iustos quidem & immaculatos dici, sed, si negligentia subrepsit, posse concidere; & semper hominem in meditullio positum; ut & de uirtutum culmine ad uitia delabatur; & de uitis ascendat ad sublimia; & numquam eum esse securum, sed semper metuere in tranquillitate naufragium: ac per hoc

Luc. 1 hominem sine peccato esse non posse, dicente Salomone: Non est homo iustus super terram, qui faciat bonum, & nō

3. Reg. 8 peccet. Et eodem in Regum libro: Neque enim est homo,

Psal. 18 qui non peccet. Ac beato Dauid: Delicta quis intelligit? ab occultis meis munda me Domine, & ab alienis parce seruo tuo. Et iterum: Ne intres in iudicium cum seruo tuo: quia non iustificabitur in conspectu tuo omnis uiuens. Et multa alia, quibus scripturæ sanctæ plenæ sunt. **C R I T O.** Quid ergo respondebis ad illud exemplum, quod ponit euangelista

Psal. 142 Ioannes: Scimus, quod omnis, qui natus est ex Deo, non peccat; sed generatio Dei conseruat eum, & malignus non tangit eum? Scimus, quoniam ex Deo sumus, & mundus totus in maligno positus est. **A T T I.** Par pari referam, & par uam euangelistæ epistolam, secundum sensum tuum, docebo sibi esse contrariam. Si enim omnis, qui natus est ex Deo, peccatum non facit; quoniam semen eius manet in eo; & non potest peccare, quia ex Deo natus est: qua consequentia idem in eodem loco loquitur: Si dixerimus, quoniam peccatum non habemus, ipsi nos seducimus, & ueritas in nobis non est? Ignoras rationem, hæsitās, atque turbaris. audi eundem euangelistam: Si confiteamur peccata nostra, fidelis & iustus est, ut dimittat nobis peccata nostra, & mundet nos ab omni iniquitate. Tunc ergo iusti sumus, quando nos peccatores fateamur: & iustitia nostra non ex pro-

proprio merito, sed ex Dei consistit misericordia, dicente *Pro. 18*
 sancta scriptura : Iustus accusator sui est in principio sermo
 nis . Et in alio loco : Dic tu peccata tua, ut iustificeris . Con *Esa. 43*
 cludit enim Deus omnia sub peccato, ut omnibus miserea- *Rom. 11*
 tur . Et hæc hominis summa est iustitia, quidquid potuerit
 habere uirtutis, non suum putare esse, sed Domini, qui lar-
 gitus est . Qui ergo natus est ex Deo non peccat, quamdiu
 semen Dei manet in eo ; & nō potest peccare, quia ex Deo *1. Ioan. 3*
 natus est . Sed quia in agro Dominico, dormiente patre fa-
 milias, inimicus homo zizania superseminat ; & frumento *Matth. 13*
 bono, dum nescimus, lolium auenasq. steriles sator noctur-
 nus interferit : ideo parabola ista euangelici patris familias
 formidanda est ; qui purgat aream, & frumento horreis
 condito, paleas uentorum flatibus dispergendas & urendas
 ignibus derelinquit . unde & in Hieremia scriptū legimus : *Hier. 23*
 Quid paleis ad frumentum, dicit Dominus ? Paleæ autem
 a frumento in consummatione sæculi separantur . Ex quo
 approbatur, dum sumus in corpore isto mortali, mixtas esse
 se cum tritico . Quod si opposueris, quare dixerit : Et non *1. Ioan. 3*
 potest peccare, quia ex Deo natus est : audies, & ubi erit
 præmium uoluntatis ? si enim ideo non peccat, quia pecca-
 re non potest ; liberum tolletur arbitrium ; & nequaquam
 nostrum fiet, sed naturæ bonum ; quæ peccata non capiet .
 CRITO . Dudum faciliora proposui, ut te ad maiora exer-
 cerem : quid ad illud dicere potes, quod, quamuis sis inge-
 niosus, nulla ualebis arte subuertere ? Primum ponam de
 ueteri testamento, deinde de nouo : Veteris testamenti prin-
 ceps Moyses est, noui Dominus atque saluator . Moyses lo- *Deut. 18*
 quitur ad populum : Perfecti estote in cōspectu domini Dei
 uestri . Et saluator ad apostolos : Estote perfecti, sicut pater *Matth. 5*
 uester cælestis perfectus est . Aut enim possibile est audienti
 bus facere ; quod Moyses, & Dominus præceperunt : aut, si
 impossibile est, non est culpa eorum, qui obedire non pos-
 sunt, sed eius, qui impossibilia præcepit . A T T I . Hic locus
 apud inperitos, & scripturarum sanctarum meditationem
 nsumq. & scientiam nō habentes, uidetur opinioni tuæ pri-

ma fronte blandiri, ceterum discussus facile soluitur. Et cū
 testimonia scripturarum aliis comparaueris testimoniis; ne
 sibi Spiritus sanctus pro qualitate locorum & temporum ui
 deatur esse contrarius, secundum illud; quod scriptum est:
Psal. 41 Abyssus abyssum inuocat in uoce cataractarum tuarum:
 tunc ueritas apparebit, hoc est, Christum possibilia præcepit
Matth. 5 se dicentem: Estote perfecti, sicut pater uester cælestis perfe
 ctus est, & tamen apostolos non fuisse perfectos. **CRITO.**
 Non dico, quid apostoli fecerint, sed quid Christus præce
 perit. neque enim culpa imperantis est, sed eorum, qui au
 dierunt imperium; quod utique potuisse fieri ex iustitia eius,
 qui imperabat, agnoscitur. **ATTI.** Pulchre. Nolo ergo mihi
 dicas, posse hominem sine peccato esse, si uelit, sed posse
 hominem id esse, quod apostoli non fuerunt. **CRITO.** Tam
 stultum me putas, ut audeam hoc loqui? **ATTI.** Licet non
 loquaris; tamen, ex propositione tua, ipsa consequentia &
 rerum ordine inuitus hoc loqueris: si enim potest esse ho
 mo sine peccato, quod apostolos nō fuisse perspicuum est:
 posset esse super apostolos homo: ut taceā de patriarchis,
 & prophetis, quorum in lege non fuit perfecta iustitia, se
 cundum illud Apostoli: Omnes enim peccauerunt, & in
 digent gloria Dei: iustificati gratis per gratiam ipsius, per re
 demptionem quæ est in Christo Iesu, quem proposuit Deus
 propitiatorem. **CRITO.** Hæc argumentatio tortuosa est,
 ecclesiasticam simplicitatem inter philosophorum spineta
 concludens. Quid Aristoteli, & Paulo? quid Platoni, &
 Petro? ut ille enim princeps philosophorum, ita hic apo
Matth. 16 stolorum fuit; super quem Ecclesia Domini stabili mole sua
 data est; quæ nec impetu fluminis, nec ulla tempestate con
 cutitur. **ATTI.** Rhetoricaris; & dum mihi obiciis philoso
 phiam, ad oratorum castra transcendis: uerum audi, quid
 idem dicat orator tuus. Desine communibus locis: domi
 nobis ista nascuntur. **CRITO.** Nulla hic eloquentia est, nul
 lus oratorum tumor; quorum definitio est, dicere ad persuas
 dedum accommodate: sed puram puro sermone quærimus
 ueritatem; aut Dominum non impossibilia præcepisse, ut
 sint

sint in culpa qui possibilia non fecerint; aut, si non possunt fieri, non eos, qui impossibilia non faciunt, sed eum, qui impossibilia præcepit, quod nefas dictu sit, conuinci iniustitiæ. **ATTI.** Video te, contra mores tuos, uehementer esse commotum; & propterea argumentari desinam. sed parumper te interrogabo, quid de illo Apostoli loco sentias, quem scribit ad Philippenses: Non quia iam accepi, aut iam perfectus sum. Persequor autem, si comprehendam: in quo & apprehensus sum a Christo. Fratres, ego me necdum arbitror comprehendisse. Vnum autem, posteriorum obliuiscens, ad ea, quæ priora sunt, me extendens, iuxta propositum sequor ad brauium supernæ uocationis Dei in Christo Iesu. Quotquot ergo perfecti sumus, hoc sapiamus: & si quid aliter sapitis, hoc quoque Deus uobis reuelabit: & cetera, quæ te scire non dubito, & nos breuitatis studio præterimus. Dicit se necdum comprehendisse, & nequaquam esse perfectum, sed instar sagittarii ad propositum & ad signum iacula dirigere, quod significantius Græci σκοπόν nominant; ne sagitta ad partem declinans alteram, imperitum ostendat sagittarium. Et asserit, præteritorum se semper obliuisci, & ad priora semper extendi: per quæ docet præterita negligenda; & futura cupienda: ut, quod hodie perfectum putauit, dum ad meliora & priora extenditur, cras imperfectum fuisse conuincat: atque ita per singulos gradus, dum numquam in statione, sed semper in cursu est, imperfectum doceat, quod homines putabamus esse perfectum; solamq. perfectionem, & ueram iustitiam, Dei tantum uirtutibus coaptandam. Secundum propositum, inquit, persequor ad brauium supernæ uocationis Dei in Christo Iesu. O apostole Paule, ignosce mihi, quasi homunculo mea uitia confitenti, si audacter interrogem. Dicis te necdum accepisse, & necdum comprehendisse, & necdum esse perfectum, & præteritorum semper obliuisci, & ad priora te extendi, si quo modo possis occurrere in resurrectione mortuorum, & consequi brauium supernæ uocationis. et quo modo statim infer: Quotquot ergo perfecti sumus, hoc sapiamus, siue sapiamus:

Philip. 3

diuer-

diuersa enim sunt exemplaria : & qui sapimus , siue sapiamus , nos esse perfectos ? comprehendisse quod non comprehendimus , accepisse quod non accepimus , esse perfectos qui nondum perfecti sumus ? Quid ergo sapimus , immo quid sapere debemus , qui perfecti non sumus ? imperfectos nos esse confiteri , & necdum comprehendisse , necdum accepisse . Hæc est hominis uera sapientia , imperfectum esse se nosse : atque , ut ita loquar , cunctorum in carne iustorum imperfecta perfectio est . Vnde & in Prouerbiis legimus :

Pro. 1 Ad intelligendā iustitiam uerā . Nisi enim esset & falsa iustitia , numquam Dei uera iustitia diceretur . Et in eodem

Philip. 3 Apostoli loco sequitur : Et si quid aliter sentitis , & hoc uobis Deus reuelabit . Rem nouā audio . qui paulo ante dixerat , non quia iam accepi , aut iam perfectus sum , & uas electionis , qui pro confidentia habitantis in se Christi audebat loqui : An experimentum queritis eius , qui in me loquitur

2. Cor. 13 Christus ? & tamen simpliciter fatebatur se non esse perfectum : nunc , quod sibi proprie denegabat , mittit in turbam , iungitq. se cum ceteris , & ait : Quotquot ergo perfecti sumus , hoc sapiamus . Sed qua ratione hoc dixerit , exponit in sequentibus , Hoc , inquit , sapiamus , qui uolumus secundum humanæ fragilitatis modulum esse perfecti , necdum nos accepisse , necdum comprehendisse , necdum

Philip. 3 esse perfectos . Et quia necdum perfecti sumus , & forsitan aliter sapimus , quam poscit uera & perfecta perfectio : si quid aliter sapimus , & aliter intelligimus , quā Dei habet scientia : & hoc nobis Deus reuelabit , ut precemur cum Dauid atque

Psal. 118 dicamus : Reuela oculos meos , & considerabo mirabilia de lege tua . Ex quo perspicuum est , duas in scripturis sanctis esse perfectiones , duasq. iustitias , & duos timores : primā perfectionem & incomparabilem ueritatem perfectamq. iustitiam , Dei uirtutibus coaptandam : secundam autem , quæ competit nostræ fragilitati , iuxta illud , quod in psal-

Psal. 142 mis dicitur ; Non iustificabitur in conspectu tuo omnis uiuens ; ad eam iustitiam , quæ non comparatione , sed Dei

Iob 1 scientia dicitur esse perfecta . Iob quoque , & Zacarias , & Heli-

Helizabet iusti dicti sunt, secundum eam iustitiam, quæ pos- *Luc.1*
 sit in iniustitiam aliquando mutari, & non secundum illam,
 quæ numquam mutari potest, de qua dicitur: Ego Deus, *Malac.3*
 & non mutor. Et hoc est, quod Apostolus alio loco scribit: *2.Cor.3*
 Etenim non est glorificatum, quod glorificatum est, pro-
 pter excellentem gloriam, quod uidelicet legis iustitia, ad
 comparationem euangelicæ gratiæ, non uideatur esse iusti-
 tia. Si enim, ait, quod destruitur, gloriosum est; multo
 magis, quod permanet, erit in gloria. Et iterum: Ex parte *1.Cor.13*
 scimus, & ex parte prophetamus. Cum autem uenerit, quod
 perfectum est: destruentur illa, quæ ex parte sunt. Et uide-
 mus nunc per speculum, & in ænigmate, tunc autem facie
 ad faciem. Nunc cognosco ex parte, tunc cognoscam sicut
 & cognitus sum. Et in psalmis: Mirabilis facta est scientia *Psal.148*
 tua ex me, confortata est, & non potero ad eam. Et iterum:
 Existimabam cognoscere hoc; labor est in conspectu meo, *Psal. 72*
 donec introeam in sanctuarium Dei, & intelligam in nouis-
 simis eorum. Et in eodem loco: Ut iumentum factus sum
 apud te, & ego semper tecum. Et Hieremias: Stultus fa- *Hier.10*
 ctus est omnis homo a scientia. Et idem Paulus apostolus, *1.Cor.1*
 Fatuum, inquit, Dei sapientius est hominibus. Et multa
 alia, quæ studio breuitatis omitto. *CKITIO*. Argute quidẽ,
 mi Attice, memoriterq. dixisti: sed labor tuus, & multiplex
 testimoniorum replicatio meæ parti proficit. neque enim
 ego hominem Deo comparo, sed aliis hominibus: quo-
 rum collatione, qui studium dederit, potest esse perfe-
 ctus. ac per hoc, quando dicitur, homo potest esse si-
 ne peccato, si uoluerit; iuxta mensuram hominis, non iux-
 ta Dei dicitur maiestatem; cuius comparatione nulla crea-
 tura potest esse perfecta. *ATTI*. O Critobule, hæc memo-
 rans mecum facis. et ego enim hoc sentio, nullam creatu-
 ram, secundum ueram consummatamq. iustitiam, posse es-
 se perfectam. ceterum alium differre ab alio, & diuersas es-
 se in hominibus iustitias, nulli dubium est; & uel maiorem
 esse alium, uel minorem, & tamen secundum statum &
 & mensuram suam posse iustos nominari, qui aliorum cõ-
 para-

- paratione iusti non sunt. Verbi gratia, Paulus apostolus, uas electionis, qui plus omnibus apostolis laborauit, utique
2. Tim. 4 iustus erat, scribens ad Timotheum: Certamen bonum certavi, cursum consummaui, fidem seruaui; de cetero reposita est mihi corona iustitiæ; quam reddet mihi Dominus in illa die iustus iudex, non solum autem mihi, sed & omnibus, qui diligunt aduentum eius. Iustus erat & Timotheus, discipulus eius, & imitator; quem docet, quid agere debeat, & quem modum tenere uirtutum. Putamus ne unam & eandem in utroque fuisse iustitiam, & non plus habere
Ioan. 14 meritorum eum, qui plus omnibus laborauit? Multæ mansiones sunt apud patrem, quia & merita diuersa. Stella a stella differt in claritate; & in uno Ecclesiæ corpore membra diuersa sunt. Habet sol fulgorem suum: luna quoque noctis tenebras temperat: & quinque sidera alia, quæ uocantur errantia, diuersis & cursibus & luminibus cælum peragrunt. innumerabiles sunt aliæ stellæ, quas micare in firmamento cernimus. in singulis diuersa sunt lumina, & tamen in suo unaquæque perfecta est, ita dumtaxat, ut, comparatione maioris, perfectione careat. In corpore quoque, cuius membra diuersa sunt, aliud oculus, aliud manus, aliud pes agunt: unde & Apostolus dicit: Non potest oculus dicere manui, non es mihi necessaria: aut iterum caput pedibus,
1. Cor. 12 non desidero operam uestram. Numquid omnes apostoli? numquid omnes prophetae? numquid omnes magistri? nūquid omnes cunctas habent uirtutes? numquid omnes donationes habent sanitatum? numquid omnes linguis loquuntur? numquid omnes interpretantur? Aemulamini dona maiora. Omnia autem hæc operatur unus atque idem spiritus, diuidens propria unicuique prout uult. In quo diligenter attende, quod nō dixerit, secundum quod unumquodque membrum cupit, sed secundum quod ipse uult spiritus.
Rom. 9 Neque enim dicere potest uas figulo suo, quare ita, uel ita me fecisti? an non habet figulus potestatem de eodem luto aliud uas facere in honorem, aliud in contumeliam? Vnde consequenter adiecit: Aemulamini dona maiora: ut in fide & in

& industria plus ceteris charismatibus habere mereamur, melioresq. simus iis, qui, comparatione nostri, in secundo uel tertio gradu positi sunt. In magna domo uasa diuersa sunt, alia aurea, alia argentea, ænea, ferrea, ligneaque: et tamen secundum modulum suum, cum æneum uas perfectum sit, comparatione argentei uasis imperfectum dicitur: rursumq. argenteum aurei collatione deterius est. atque hoc modo, dum sibi inuicem comparantur, imperfecta & petfecta sunt omnia. In agro terræ bonæ, ex una semente tricenarius & sexagenarius & centenarius fructus exoritur: ipsis numeris indicatur impar esse, quod nascitur: & tamen in suo genere perfecta sunt singula. Helizabet & Zacharias, quo testimonio quasi impenetrabili uteris clypeo, nos docere possunt, quanto inferiores sunt beatæ Mariæ, matris Domini, sanctitate, quæ concientia in se habitantis Dei libere proclamat: Ecce enim ex hoc beatam me dicent omnes generationes: quia fecit mihi magna qui potens est, & sanctum nomen eius. et misericordia eius a progenie in progenies timentibus eum. Fecit potentiam in brachio suo. In quo animaduerte, quod beatam se esse dicat, non proprio merito, atque uirtute, sed Dei in se habitantis clementia. Ipse quoque Ioannes, quo maior non fuit inter natos mulierum, parentibus suis melior est: non enim solum hominibus, sed & angelis testimonio Domini comparatur: et tamen, qui cunctis hominibus erat maior in terra, minimo in regno cælorum minor fuisse perhibetur. Quid mirum, in collatione sanctorum, alios esse meliores, & alios inferiores; cum econtrario in collatione peccatorum hoc intelligi possit? Ad Hierusalem dicitur, quæ multis peccatorum erat confossa uulneribus; Iustificata est Sodoma ex te: non quod Sodoma per se iusta sit, quæ in æternos collapsa cineres, audit per Ezechielem: Sodoma restituetur in antiquum: sed quod comparatione scelerationis Hierusalem hæc iusta uideatur. illa enim Dei filiū trucidauit: hæc, propter abundantiam panis, & per luxuriæ magnitudinem, excessit modum libidinis. Publicanus in euangelio, qui percutiebat pe-

2. Tim. 2.

Matth. 13

Luc. 1

Matth. 13

Ezech. 16

Luc. 18

N n n ctus

- ctus quasi thesaurum cogitationū pessimarum; & conscientia delictorum, oculos non audebat attollere; superbientis pharisei collatione fit iustior. Et Thamar sub specie meretricis fallit Iudam: & ipsius sententia, qui deceptus est, meretur audire: Iustificata est Thamar magis, quam ego. Ex quibus omnibus approbatur, non solum ad comparationē diuinæ maiestatis homines nequaquam esse perfectos, sed ne angelorum quidem & ceterorum hominum, qui uirtutum culmina conscenderunt: cum & tu, qui meliores alterius collatione, quem imperfectum esse monstraueris, rursum ab alio te præeunte uincaris; ac per hoc non habeas ueram perfectionem: quæ si perfecta sit, nulla re indiget. CRITO. Et quo modo, Attice, ad perfectionem diuinus sermo prouocat? ATTIC. Hac ratione qua dixi, ut secundum uires nostras unusquisque nostrorum, quantum ualuerit, extendatur; si quo modo possit peruenire, & comprehendere brauium supernæ uocationis. Denique omnipotens Deus, cui docet Apostolus iuxta dispensationem carnis assumptæ subiiciendum filium, ut sit Deus omnia in omnibus; perspicue demonstrat, nequaquam sibi cuncta esse subiecta. Vnde & propheta subiectionem suā in finem præsumit, dicens: Nonne Deo soli subiecta erit anima mea? ab ipso enim est salutare meum. Et quia in corpore Ecclesia caput Christus est: quibusdam adhuc repugnātibz membris, uideatur corpus quoque capiti non esse subiectum. Namque si patitur unum membrum, compatiuntur omnia: & totum corpus, dolore unius membri cruciatur. Quod dico, ita manifestius fiet. Quamdiu habemus thesaurum istum in uasis fictilibz: & fragili carne circūdāmur, immo mortali, & corruptibili, beatos esse nos credimus, si in singulis uirtutibus, partibusq. uirtutum Deo subiecti sumus: cum autem mortale hoc indutum fuerit immortalitate, & corruptum hoc incorruptione uestitum, & absorpta mors fuerit in Christi uictoria; tunc Deus erit omnia in omnibus: ut non sit tantum in Salomone sapientia, in Dauid animi mansuetudo, in Elia & Phinees zelus, in Abraham fides, in Pe-

in Petro, cui dictum est: Simon Ioannis amas me? perfecta dilectio, in electionis uase studium prædicandi, & in ceteris uel bina uel trina; sed totus in cunctis sit; & omni uirtutū choro sanctorum numerus gloriatur; & sit Deus omnia in omnibus. CRITO. Nullus ergo sanctorū, quamdiu in isto corpusculo est, cunctas potest habere uirtutes? ATTI. Nullus; quia nunc ex parte prophetamus; & ex parte cognosci. 1. Cor. 13
 mus. nec enim possunt omnia esse in omnibus hominibus: quia non est immortalis filius hominis. CRITO. Et quo modo legimus: Qui unam habuerit, omnes uidetur habere uirtutes? ATTI. Participatione, non proprietate: necesse est enim, ut singuli excellant in quibusdam. & tamen hoc, quod legisse te dicis, ubi scriptum sit, nescio. CRITO. Ignoras hanc philosophorum esse sententiam? ATTI. Sed non apostolorum. neque enim mihi curæ est, quid Aristoteles, sed quid Paulus doceat. CRITO. Obsecro te, nonne Iacobus apostolus scribit, qui in uno offenderit, eum esse omni Iac. 2
 um reum? ATTI. Ipse locus se interpretatur. non enim dixit, unde coeperat disputatio: qui diuitem pauperi in honore prætulit, reus est adulterii, uel homicidii: in hoc enim delirant Stoici, paria cõtendentes esse peccata: sed ita: qui dixit, non moechaberis, dixit, & non occides: quod & si nō occidis, moecharis autem, factus es transgressor legis. Leuia cum leuibus, & grauia cum grauius comparantur. nec ferula dignum uitium, gladio uindicandum est: nec gladio dignum scelus, ferula coercendum. CRITO. Esto, ut nullus sanctorum omnes uirtutes habeat: hoc certe dabis, in eo, quod potest facere, si fecerit, esse perfectum. ATTI. Non tenes, quid supra dixerim? CRITO. Quidnam illud est? ATTI. Perfectum esse in eo, quod fecit; & imperfectum in eo, quod facere non potuit. CRITO. Sed sicut perfectus est in eo, quod fecit, quia facere uoluit; ita & in eo, per quod imperfectus est, quia non fecit, perfectum esse potuisse, si facere uoluisset. ATTI. Quis enim non uult facere, quod perfectum est? aut quis non cunctis cupiat florere uirtutibus? Si totum requiris ab omnibus; tollis rerum diuer-

N n n 2 firatem

sitatem, & gratiarum distantiam, & creatoris artificis uarie
 Psal. 103 tatem, cuius sacro propheta sonat carmine: Omnia in sa-
 pientia fecisti. Indignetur lucifer, quare fulgorem lunæ nō
 habeat. Luna super suis defectibus & labore causetur, cur
 annum solis circulum singulis mensibus expleat. Sol que-
 ratur, quid offenderit, ut lunæ cursu tardior sit. Clame-
 mus & nos homunculi, quid causæ extiterit, ut homines,
 & non angeli facti simus: quamquam magister uester *ὁ ἀπὸ
 τοῦ οὐρανοῦ*, de cuius hęc fonte procedūt, omnes rationales crea-
 turas æquo asserat iure conditas; ut, instar quadrigarum,
 & curruum, de carceribus exeuntes, in medio spatio uel
 corruant, uel præteruolent, & ad optata perueniant. Ele-
 phanti tantæ molis, & gryphes in sua grauitate causentur,
 cur quaternis pedibus incedant, cum muscæ, culicesque,
 & cetera huiuscemodi animantia sub pennulis senos pedes
 habeant; & aliqui uermiculi sint, qui tantis pedibus scate-
 ant, ut innumerabiles simul motus nulla acies cōprehēdat.
 Dicat hęc Marcion, & omnes hæretici, qui creatoris operi-
 bus illudunt. Vestrū decretū hucusque perueniet, ut, dum
 singula calumniantur, manum iniiciant Deo, cur solus Deus
 sit, cur inuiderit creaturis, ut non omnes eadem polleant
 maiestate. Quod licet non dicatis; (neque enim tam insani
 estis, ut aperte pugnetis Deo.) tamen aliis uerbis loqui-
 mini, rem Dei homini copulantes, ut sit absque peccato,
 3. Cor. 12 quod & Deus est. Vnde Apostolus super diuersis in-tonans
 gratis loquitur: Diuisiones donationum sunt, idem autem
 spiritus: & diuisiones ministeriorum sunt, sed idem Domi-
 nus. & diuisiones operationum sunt, unus autem Deus, qui
 operatur omnia in omnibus. CRITO. Nimiū es in una ac-
 que eadem quæstione, ut persuadere coneris, hominem uni-
 uersa simul habere non posse, quasi aut inuiderit, aut non
 potuerit Deus præstare imagini & similitudini suæ, ut in o-
 mnibus respondeat suo creatori. AT. Ego ne nimiū, an-
 tu? qui soluta proponis, & non intelligis aliud esse similitu-
 dinem, aliud æqualitatem; illud picturam, hoc esse uerita-
 tem. Verus equus camporum spatia transuolat, pictus pa-
 rieti

rieti hæret in curru. Ariani Dei filio non concedunt, quod
 tu omni homini tribuis. Alii non audent perfectum in Chri-
 sto hominem confiteri: ne suscipere in eo hominis peccata
 cogantur: quasi potentior sit creatio creatore, & id ipsum
 tantum filius hominis, quod Dei filius. Aut igitur propo-
 ne alia, quibus respondeam: aut desine superbire, & da glo-
 riam Deo. CRITO. Immemor es sponsionis tuæ: & dum
 argumenta argumentis connectis, ac per scripturarum latif-
 simos campos infrenis equi libertate baccharis, superfortis-
 sima quæstione, cui pollicitus es te in consequentibus re-
 sponsum, omnino tacuisti, obliuionem simulans, ut ne-
 cessitatem responsionis euaderes. Sed ego stultus ad horam
 tribui, quod petebas; existimans oblaturum sponte quod
 acceperas, & non admonitum reddere quod debeas. AT.
 Nisi fallor, de possibilibus mandatis dilata est responsio: po-
 ne igitur ut uolueris. CRITO. Autabilia Deus mandata
 dedit, aut impossibilia. siabilia: in nostra potestate est
 ea facere, si uelimus. si impossibilia: nec in hoc rei sumus,
 si non facimus, quod implere non possumus. ac per hoc,
 siueabilia dedit Deus mandata, siue impossibilia, potest
 homo sine peccato esse, si uelit. AT. Quæso ut patienter
 audias: non enim de aduersario uictoriam, sed contra men-
 daciū quærimus ueritatem. Deus posibles dedit humano
 ingenio omnes artes, quippe quas plurimi didicerunt: ut
 taceam de iis, quas Græci *βανύστους* uocant, nos, ad ope-
 ra manuum pertinentes, possumus dicere: uerbi gratia, grā-
 maticam, rhetoricam, philosophiæ tria genera, physicam,
 ethicā, logicam, geometriam quoque, & astronomiā, astro-
 logiam, arithmeticam, musicam; quæ & ipsæ partes philo-
 sophiæ sunt; medicinā etiam, quæ in tria diuiditur, *δύμνα*,
μέθοδον, *ἐμπειρίαν*, iuris quoque & legum scientiā. Quis
 nostrum, quamuis sit ingeniosus, poterit omnia comprehen-
 dere; cum eloquentissimus orator, de rhetorica & iuris sciē-
 tia disputans, dixerit: Pauci unum possunt, utrumque ne-
 mo. Vides ergo, quod Deus possibile iusserit; & tamen id,
 quod possibile est, per naturam nullum posse complere. De

N n 3 dit

dit itaque præcepta diuersa, uirtutesq. uarias, quas omnes simul habere non possumus. Atque ita fit, ut, quod in alio aut primum, aut totum est, in alio ex parte uersetur; & tamen non sit in crimine, qui non habet omnia; nec condemnatur ex eo, quod non habet; sed iustificetur ex eo, quod possidet. Definit Apostolus, qualis episcopus esse debeat,

1. Tim. 3 scribens ad Timotheum: Oportet episcopum esse irreprehensibilem, unius uxoris uirum, sobrium, pudicum, ornatum, hospitalem, docilem, non uiolentum, non percussorem, sed mansuetum, non litigiosum, sine auaritia, domum suam bene regentem, filios habentem subditos cum omni pudicitia, non neophytum, ne inflatus in iudicium incidat diaboli. Oportet autem eum etiam testimonium de foris habere bonum, ne in opprobrium incidat, & laqueum diaboli. Tito quoque scribens discipulo, quales episcopos debeat ordinare, breui sermone demonstrat. Ideo reliqui te Cretæ, ut, quæ reliqua sunt, corrigas; & constituas per ciuitates presbyteros, sicut ego præcepi tibi: si quis est sine crimine, unius uxoris uir, filios habens fideles, nec in accusatione luxuriæ, aut non subiectos. Oportet autem episcopum esse sine crimine, siue sine accusatione: hoc enim magis αἰνέου κλητον sonat, sicut dispensatorem Dei, non proteruum, non iracundum, non uiolentum, non percussorem, non turpis lucri appetitorem, sed hospitalem, benignum, pudicum, iustum, sanctum, continentem, obtinentem doctrinæ fidelem sermonem; ut possit exhortari in doctrina sana, & contradicentes coarguere. Vt diuersarum personarum uaria præcepta nunc sileam, circa mandata episcopi me tenebo. Vult certe Deus tales esse episcopos, siue presbyteros, quales uas electionis docet. Primum, quod dixit, irreprehensibilis, aut nullus, aut rarus. quis est enim, qui non, quasi in pulchro corpore, aut næuum, aut uerrucam habeat? si enim ipse Apostolus dicit de Petro, quod non recto pede incesse in euangelii ueritate; & intantum reprehensibilis fuerit, ut & Barnabas adductus sit in eandem simulationem: quis indignabitur id sibi denegari, quod princeps apo-

apostolorum non habuit? Deinde unius uxoris uirum, sobrium, pudicum, ornatum, hospitalem ut reperias; illud certe, quod sequitur, διδασκτικόν, qui possit docere, non; ut interpretatur Latina simplicitas, docilem, cum ceteris uirtutibus difficulter inuenies. Vinolentum quoque, & percussorem, & turpis lucri cupidum, repudiat Apostolus: & pro his, cupit mansuetum, absque iurgio, sine auaritia; & ut domum suam optime regat; quodq. difficillimum est, ut filios habeat subiectos, cum omni pudicitia, uel filios carnis, uel filios fidei. Cum omni, inquit, pudicitia. Non enim sufficit episcopum propriam habere pudicitiam, nisi ea filiorum, & comitum, ac ministrorum pudore decoretur, dicente Dauid: Ambulans in uia immaculata, hic mihi ministrabat. *Psalm. 109*
 Consideremus quoque ἐπιτασίῃ pudicitiae, filios habentem subditos in omni pudicitia; ut non solum opere, sed sermone quoque & nutibus se abtineant ab impudiciis; ne forte illud incidat Heli; qui certe increpauit filios suos dicens: Nolite filii mei, nolite: non bonam famam audio ego de uobis. Corripuit, & punitus est: quia non corripere debuit, sed abiicere. Quid faciet, qui gaudet ad uitia, qui emendare non audet? qui conscientiam suam non metuit; & quod cunctus populus clamat, nescire se simulat? Quodq. sequitur, μὴ νεόφυτον; ut etiam a nullo accusetur; ut bonam opinionem ab iis, qui foris sunt, habeat; ut etiam maledictis aduersariorum careat; & quibus doctrina displicet, placeat conuersatio; puto quod non facile sit reperire; maximeq. illud, ut potens sit aduersariis resistere, & peruersas opprimere & superare doctrinas. Vult ut non neophytus episcopus ordinetur: quod uidemus nostris temporibus pro summa eligi iustitia. Si baptismus statim iustum faceret, & omni plenum iustitia; nequaquam utique Apostolus neophytum refutaret: sed baptismus uetera peccata conscindit, nouas uirtutes non tribuit, dimittit e carcere, & dimisso, si laborauerit, praemia pollicetur. Aut nullus, inquam, aut rarus est, qui omnia habeat, quae habere debet episcopus. Et tamen, si unum, uel duo de catalogo uirtutum episcopo cui-

Nun 4 quam

quam defuerint, non tamen iusti carebit uocabulo; nec ex eo damnabitur, quod nō habet; sed ex eo coronabitur, quod possidet. Omnia enim habere, & nullo indigere, uirtutis eius est, qui peccatum non fecit, nec dolus inuentus est in ore eius; qui cum malediceretur, non maledixit; qui confidenter uirtutum conscientia loquebatur: Ecce uenit princeps mundi huius, & in me inuenit nihil. Qui cum esset in forma Dei, nequaquam rapinam arbitratus est æqualem se esse Deo, sed semetipsum exinaniuit, formam serui accipiens, & factus est obediens usque ad mortem, mortem autem crucis. Propterea donauit ei Deus nomē, quod est supra omne nomen, ut in nomine Iesu flectant genu cælestia, terrestria, & inferna. Si ergo in una episcopi persona pauca præcepta aut nequaquā, aut difficulter inuenies: quid facies de omni homine, qui cuncta debet implere mandata? Ex corporalibus consideremus spiritualia. Alius uelox est pedibus, sed non fortis manu. ille tardus incessu, sed stabilis in prælio est. hic pulchram habet faciem, sed rauca uocis est: alius tætrā, sed dulci modulatione cantat: illum ingeniosum, sed obliuiosum, hunc memorem, sed tardi uidemus ingenii. In ipsis controuersis, in quibus quondam pueri lusimus, nō omnes similiter uel in procemiis, uel in narrationibus, uel in excessibus, uel in argumentis; aut exemplorum copia, & epilogorum dulcedine se agunt; sed eloquentiæ suæ alia atque alia in parte dissimiles sunt. De uiris magis ecclesiasticis loquar. Multi super euangelia bene differunt, sed in explanatione Apostoli impares sui sunt. Alii, cum in instrumento nouo optime senserint, in psalmis & ueteri testamento muti sunt. Hoc totum dico, quod nō omnia possumus omnes: rarusque aut nullus est diuitum, qui in omni substantia sua paria uniuersa possideat. Possibilia præcepit Deus: & ego fateor: sed hæc possibilia cuncta singuli habere non possumus, non imbecillitate naturæ, ne calumniam facias Deo, sed animi lassitudine, qui cunctas simul & semper non potest habere uirtutes. Quod & si in eo arguis creatorem, quare te talem condiderit, qui deficias, atque lassescas: dicam iterum, maior

ior erit reprehensio, si eum uolueris accusare, quare te Deum non fecerit. Sed dices: si non possum, ergo peccatum non habeo. Habes peccatum, quare non feceris, quod alius potuit facere. Rursumq. ille, cuius tu comparatione deteriores, uel tu in alia uirtute, uel alterius erit collatione peccator, atque ita fit, ut, quemcumque primum putaueris, minor sit eo, qui se in alia parte maior est. CRITO. Si non potest homo esse sine peccato; quo modo Iudas scribit Apostolus: Ei autem, qui potens est uos conseruare sine peccato, & constituere ante conspectum gloriæ suæ immaculatos? Quo testimonio comprobatur, posse hominem esse sine peccato, & maculam non habere. ATTI. Non intelligis, quæ proposueris. Neque enim homo potest esse sine peccato; quod tua habet sententia; sed potest, si uoluerit Deus hominem seruare sine peccato, & immaculatum suâ misericordia custodire. Hoc & ego dico, quod Deo cuncta possibilia sunt: homini autem non, quidquid uoluerit, possibile est, & maxime id esse, quod nullâ legeris habere creaturam. CRITO. Non dico hominem esse sine peccato, quod tibi forsitan impossibile uideatur, sed posse esse, si uelit. aliud est enim esse, aliud posse. esse, quærit exemplum: posse, ostendit imperii ueritatem. ATTI. Nugaris; nec meministi illius prouerbii, actum ne agas; & in eodem cæno uolutaris, immo laterem lauas. pro quo nihil aliud audies, nisi hoc, quod omnibus patet; rem te uelle firmare, quæ nec est, nec fuit, & forsitan nec futura est. Atque, ut ipso uerbo utar, & stultitiam *ἀτυχάτου* argumentationis ostendam, esse posse te aio dicere, quod esse non possit. Hoc enim, quod proposuisti, posse hominem sine peccato esse, si uelit, aut uerum est, aut falsum est. Si uerum est, ostende quis fuerit: si falsum, quidquid falsum est, numquam fieri potest. Verum hæc quasi explosa taceantur, & in scriniolis uestris tantum mustitent, publicam faciem formidantia. transeamus ad alia, in quibus perpetua oratione utendum est, ita dumtaxat, ut habeas potestatem refellendi, & quærendi, si quid uolueris. CRITO. Audiam patienter: non enim dicam, libenter: & maxime

Iuda 1

gis

gis mirabor ingenium, cuius stupeo falsitatem: AT. Vtrum falsa sint, an uera, quæ dicturus sum, cū audieris, tūc probabis. CRITO. Loquere ut uis: mihi decretum est, si responde-

re non potuero, magis silere, quam mendacio acquiescere.

ATTI. Quid interest, utrum te tacentem, an loquentem superem; & iuxta Protei fabulam, uigilantem capiam, an

dormientem? CRITO. Cum dixeris, quæ uolueris; audies, quæ nequaquam uelis. ueritas enim laborare potest, uinci

non potest. ATTI. Libet sententias tuas parumper discutere; ut intelligant sectatores tui, quam diuinum in te mirentur ingenium. Dicis, sine peccato esse non posse, nisi qui

scientiam legis habuerit: per quod magnam partem Christianorum excludis a iustitia; & qui prædicator es impeccan-

tia, omnes prope peccatores esse pronuncias. Quotus enim quisque Christianorum habet legis scientiam; quam in multis doctoribus Ecclesiæ aut raro, aut difficulter inuenias?

Verum tu tantæ es liberalitatis, ut fauorem tibi apud Ama-

zonas tuas concilies, ut in alio loco scripseris, scientiam legis etiam feminas habere debere: cum Apostolus doceat esse tacendum mulieribus in ecclesia, & si quid ignorant, domi uiros suos debere consulere. Nec sufficit tibi dedisse agmini tuo scientiam scripturarum, nisi earum uoce & canticis delecteris. Iungis enim, & ponis in titulo, quod & feminæ Deo psallere debeant. Quis enim ignorat, psallendū esse feminis in cubiculis suis, & absque uiro- rum frequentia & congregatione turbarum? Verum tu donas quod non licet: ut, quod uerecunde facere debeant, & absque ullo arbitrio, magistri auctoritate proclament. Decimoquarto titulo. Addis præterea, seruum Dei nihil amarum de ore suo, sed semper, quod dulce est, & suaue, debere proferre: & quasi alius sit seruus Dei, alius doctor, & sacerdos Ecclesiæ, prioris oblitus sententiæ, ponis in alio titulo uigesimo secundo, sacerdotem, siue doctorem omnium actus speculari debere, & fiducialiter corripere peccantes: ne pro iisdem rationem reddat, & eorum sanguis de suis manibus requiratur. Nec semel dixisse contentus, id ipsum replicas; & inculcas

trigesi-

trigesimo primo titulo, sacerdotem, siue doctorem nemini
 adulari debere, sed audenter omnes corripere: ne & se, &
 eos, qui eum audiunt, perdat. Tantà ne est in uno opere
 dissonantia, ut, quid prius dixeris, nescias? Si enim seruus
 Dei nihil amarū de suo debet ore proferre, sed semper quod
 dulce & suauē est: aut sacerdos, & doctor serui Dei non
 erunt, qui fiducialiter debent corripere peccantes, & nulli
 adulari, sed audacter omnes increpare: aut, si sacerdos, &
 doctor, non solum serui Dei, sed inter seruos eius principa-
 lem tenent locum, frustra seruis Dei blanditias & dulcedines
 reseruasti: cū hoc proprie hæreticorum sit, & eorum, qui
 decipere cupiunt audientes: dicente Apostolo: Huiusmodi *Rom. 16*
 enim Christo domino nostro non seruiunt, sed suo uentri.
 Et per dulces sermones & benedictiones seducunt corda in-
 nocentium. Semper insidiosa, callida, blanda est adulatio.
 Pulchreq. adulator apud philosophos definitur blandus ini-
 micus. Veritas amara est, rugosæ frontis ac tristis, offen- *Gal. 4*
 ditq. correctos. unde & Apostolus loquitur: Inimicus uo-
 bis factus sum, ueritatem dicens uobis. Et, comicus: Obse- *Exod. 12*
 quium amicos, ueritas odium parit. Quapropter & pascha *1. Cor. 15*
 cum amaritudinibus comedimus: & uas electionis docet
 pascha celebrandum in ueritate, & sinceritate. Veritas in no-
 bis sit, & sinceritas; & amaritudo illico consequetur. Illud
 uero, quod in alio ponis loco, omnes uoluntate propria re-
 gi, quis Christianorum potest audire? Si enim non unus, nec
 pauci, nec multi, sed omnes reguntur propria uoluntate:
 ubi erit auxilium Dei? Et quo modo illud exponis? A Do- *Psal. 36*
 mino gressus hominis diriguntur. Et, Non est in homine uia *Hier. 10*
 eius. Et, Nemo potest quidquam accipere, nisi datum fue- *Ioan. 3*
 rit ei desuper. Et in alio loco: Quid enim habes, quod nō *1. Cor. 4*
 accepisti? & si accepisti, quid gloriaris, quasi non accepe- *Ioan. 6*
 ris? dicente Domino saluatore: Non descendi de celo, ut fa-
 ciā uoluntatem meam, sed uoluntatem eius, qui me misit, pa- *Matth. 26*
 tris. Et in alio loco: Pater, si fieri potest, transeat a me ca-
 lix iste: uerumtamen non quod ego uolo, sed sicut tu. Et in
 oratione Dominica: Fiat uoluntas tua, sicut in celo, & in *Matth. 6*
 terra

terra. Quæ sententiæ temeritate aufers Dei omne præsidium : qui quod in alio loco frustra conaris adiungere , non absque Dei gratia , quo modo sentire uelis , ex hoc loco intelligitur , dum gratiam eius non ad singula refers opera , sed ad conditionis , ac legis , & liberi arbitrii potestatem . Septuagesimo secundo titulo . Illud uero , quod in sequenti ponis capitulo , in die iudicii iniquis & peccatoribus non parcendum , sed æternis eos ignibus exurendos , ferre quis potest , & interdicere te misericordiam Dei , & ante diem iudicii de sententia iudicis iudicare ; ut , si uoluerit iniquis & peccatoribus parcere , te præscribente non possit ? dicis enim : Scriptum est in centesimotertio psalmo : Deficiant peccatores a terra , & iniqui , ita ut non sint . Et in Esaia : Comburentur iniqui & peccatores simul ; & , qui relinquunt Deum , consummabuntur . Et non intelligis comminationem Dei interdum sonare clementiam ? Non enim dicit , eos æternis ignibus exurendos , sed a terra deficere , & iniquos esse cessare . aliud enim est , ipsos a peccato & iniquitate desistere : & aliud , ipsos perire in perpetuum , & æternis ignibus concremari . Denique Esaia , de quo ponis testimonium , Comburentur , inquit , peccatores , & iniqui simul : non addidit , in æternum . Et qui relinquunt Deum , consummabuntur . Proprie hoc de hæreticis loquitur , qui , rectum fidei tramitem relinquentes , consummabuntur , si noluerint ad Dominum reuerti , quem dereliquerunt . Quæ sententia & tibi parata est , si neglexeris ad meliora conuerti . Deinde cuius est temeritatis , iniquos & peccatores impiis iungere , qui a nobis sic definiuntur ? Omnis impius iniquus est , & peccator . nec recipiatur , ut possimus dicere : omnis peccator , & iniquus , etiam impius est . impietas enim proprie ad eos pertinet , qui notitiam Dei non habent , uel cognitam transgressione mutarunt : peccatum autem , & iniquitas , pro qualitate uiciorum , post peccati , & iniquitatis vulnera recipit sanitatem . unde scriptum est : Multa flagella peccatoris : Et non interitus sempiternus : Et per omnia flagella atque cruciatus emendatur Israel . Quem enim diligit Dominus , corripit : flagellat autem

tem

rem omnem filium, quem recipit . Aliud est, cedere magistri
 & parentis affectu : aliud, cōtra aduersarios crudeli animo de
 sēuire . quam ob causam & in primo psalmo canitur : Quo-
 niam non resurgunt impii in iudicio : iam enim in perditio-
 nem sunt præiudicati : neque peccatores in consilio iustorū .
 aliud enim est, gloriam perdere resurgendi ; aliud, perire per
 petuo . Veniet, inquit, hora, in qua omnes, qui in sepul- *Ioan. 5*
 cris sunt, audient uocem eius ; & egredientur, qui bona fe-
 cerunt, in resurrectionem uitæ ; qui autem mala egerunt, in
 resurrectionem iudicii . Vnde & Apostolus eodem sensu,
 quia eodem & spiritu, loquitur ad Romanos : Quicumque *Rom. 2*
 enim sine lege peccauerunt, sine lege peribunt : & quicum-
 que in lege peccauerunt, per legem iudicabuntur . Sine lege
 impius est, qui in æternum peribit . In lege peccator credens
 in Deum, qui per legem iudicabitur, & non peribit . Si pec-
 catores & iniqui æternis ignibus exuruntur ; non times sen-
 tentiam tuam, qui iniquum & peccatorem te esse dicis ? Et
 argumentaris hominem non esse sine peccato, sed esse posse .
 Ergo solus ille saluetur, qui numquam fuit, nec est, sed futu-
 rus est, aut forsitan nec futurus : & pereant omnes, quos
 retro fuisse legimus . Tu ipse, qui Catoniana nobis inflaris
 superbia, & Milonis humeris intumescis, qua temeritate pec-
 cator magistri nomen assumis ? aut, si iustus es, & humilita-
 te simulas peccatorem, mirabimur, atque gaudebimus ha-
 bere te solum, & possidere cum sociis, quod nec patriar-
 charum, nec prophetarum, nec apostolorum quispiam ha-
 buit . Si autem Origenes omnes rationabiles creaturas dicit
 non esse perdendas, & diabolo tribuit pænitentiam : quid
 ad nos, qui & diabolum & satellites eius, omnesq. im-
 pios & prauaricatores dicimus perire perpetuo, & Chri-
 stianos, si in peccato præuenti fuerint, saluandos esse
 post pœnas ? X X. tit. Iungis præterea duo capitula inter
 se discrepantia ; quæ si uera sint, os aperire non pote-
 ris ; sapientiam & intellectum scripturarum, nisi qui didice-
 rit, scire non posse . X X. tit. Et iterum : Scientiam legis nō
 usurpare debere indoctum . aut enim magistrum, a quo di-
 dice-

diceris, proferre cogeris, ut tibi scientiam legis liceat usurpare; aut, si magister talis est, qui ab alio non didicerit, & docuerit te quod ipse ignorabat; restat ut non recte facias, qui indoctus usurpas scientiam scripturarum; & magister prius, quam discipulus, esse cœpisti. Nisi forte, humilitate solita, magistrum tuum iactas Dominum, qui docet omnem scientiam; & cum Moysē in nube & caligine facie ad faciem audias uerba Dei; & inde nobis cornuta fronte procedas. Nec hoc sufficit, sed repente mutaris in Stoicū, & de Zenonis nobis tonas supercilio. LXXIII. ti. Christianum illius debere esse patientiæ, ut, si quis sua auferre uoluerit, gratanter amittat. Nonne nobis satis est, patienter perdere quod habemus, nisi uiolento atque raptori agamus gratias, & eū cunctis benedictionibus prosequamur?

Exod. 33 Docet euangelium, ei, qui nobiscum uelit iudicio contendere, & per lites ac iurgia auferre tunicam, etiam pallium esse concedendum: non præcipit, ut agamus gratias, & læti nostra perdamus. Hoc dico, non quod aliquid sceleris in hac sententia sit, sed quod ubique mediocria ὑποβολικῶς transeas, & magna secteris. Vnde adiungis, gloriam uestitium & ornamentorum Deo esse contrariam. Quæ sunt, rogo, inimicitiae contra Deum, si tunicam habuero mundio-rem; si episcopus, presbyter, & diaconus, & reliquus ordo ecclesiasticus in administratione sacrificiorum cum candida ueste processerint? Cauete clerici, cauete monachi, uirgines, & uirgines: periclitamini, nisi sordidas uos atque panosas uulgi aspexerit. Taceo de hominibus sæculi, quibus aperte bellum indicitur, & inimicitiae contra Deum, si pretiosis atque nitentibus utantur exuiis. CLXIII. ti. Audiamus & cetera. Inimicos ut proximos diligendos. statimq. oppressus grauissimo lethargo, ponis, & dicis.

CLXI. ti. Inimico numquam esse credendum: quod sibi esse contrarium, etiam me silente, perspicuum est. Sed dicēs, utrumque uocibus scripturæ contineri, non animaduertens, quo sensu in suis locis dicta sint. Præceptū est mihi

Luc. 6 ut diligam inimicos, & orem pro persecutoribus. Numquid

quid iustum est; ut ita diligam, quasi proximos & consanguineos; & amicos; ut inter æmulum, & necessarium nulla distantia sit? Si inimicos diligo, quasi proximos; amicis quid amplius exhibebo? aut, si hoc dixeris, illud tacere debueras, ne contraria sibi in eodem loco dicere uidereris, inimico numquam esse credendum. Sed quo modo diligatur *Exod. 23* inimicus, & lex docet: Iumentum aduersarii, si ceciderit, *Rom. 12* subleuandum. Et Apostolus: Si esurierit inimicus tuus, ciba illum; si sitierit, da illi potum: hoc enim faciens, carbonem ignis congregabis super caput eius, non in maledictum & condemnationem, ut plerique existimant, sed in correctionem, & pœnitudinem: ut, superatus beneficiis, excoctus feruore caritatis, inimicus esse desistat. C X X I I I .

Addis præterea, regnum cælorum etiam in testamento ueteri repromitti: ponisq; testimonia de apocryphis: cū per spicuum sit, regnum cælorum primum in euangelio prædicari per Ioannem Baptistam, & Dominum saluatorem, & apostolos. Lege euangelia. Ioannes Baptista clamat in deserto: Pœnitentiam agite, appropinquauit enim regnum cælorum. Et de saluatore scriptum est: Ex eo tempore cœpit prædicare, & dicere; Pœnitentiam agite, appropinquauit enim regnum cælorum. Et iterum: Circuibat Iesus ciuitates, & uicos, docens in synagoga eorum, & prædicans regnum Dei. Et apostolis præcipit: Ite, & prædicate dicentes, quoniam appropinquauit regnum cælorum: Tu autem nos Manichæos uocas, cur legi euangelium præferentes, in illa umbram, in hoc ueritatem esse dicamus: & non intelligis stultitiam tuam impudentiæ copulatam. Aliud est, damnare legem: quod Manichæus facit: aliud, legi præferre euangelium; quæ apostolica doctrina est. in illa enim serui, in hoc præsens Dominus loquitur: ibi promittitur, hic impletur: ibi initia, hic perfectio est: in illa operum fundamenta iaciuntur, hic fidei & gratiæ culmen imponitur. Hoc posuimus, ut egregii præceptoris doctrina mōstraretur. Censurimus titulus est, posse hominē sine peccato esse, & Dei mandata facile custodire, si uelit. de quo abunde dictum est.

Cumq;

*Exod. 23**Rom. 12**Matth. 3**Matth. 4**Matth. 9**Matth. 10*

- Cumq. se imitatore, immo expletore operis beati martyris Cypriani, scribentis ad Quirinum, esse fateatur, non intelligit se in eodem opere dixisse contraria. Ille enim in quinquagesimo quarto titulo tertii libri ponit, neminem sine sorde & sine peccato posse esse: statimq. iungit testimonia, in quibus scriptum est apud Iob: Quis enim mundus a sordibus? ne si unius etiam diei sit uita eius in terra. Et in psalmo quinquagesimo: Ecce in iniquitatibus conceptus sum, & in peccatis concepit me mater mea. Et in epistola
- Iob 25** Ioannis: Si dixerimus, quia peccatum non habemus, nos ipsos decipimus, & ueritas in nobis non est. Tu e diuerso asseris, posse hominem sine peccato esse: & ut hoc uerum dixisse uidearis, statim adiungis; & Dei mandata facile custodire, si uelit. quæ aut rarus, aut nullus impleuit. si enim facilia sunt, debent a pluribus custodiri. sin autem, ut concedamus tibi, rarus quisquam ea implere potest: manifestum est, esse difficile, quod rarum est. Atque, ut hoc augeas, & magnitudinem tuæ uirtutis ostendas, quod scilicet de bono conscientie thesauro eruere credaris, ponis in titulo centesimo uigesimo tertio, ne leuiter quidem esse peccandum. Et, quid sit hoc leuiter, ne forte in opere te aliquis dixisse existimaret, adnectis centesimo tricesimo primo titulo, malum uero nec cogitandum: neque illud sententia recordaris:
- Psal. 18** Delicta quis intelligit? ab occultis meis munda me Domine, & ab alienis parce seruo tuo: cum Ecclesia etiam ea, quæ per ignorantiam delinquimus, & sola cogitatione peccamus, delicta esse fateatur, intantum, ut hostias pro errore iubeat offerri; & pontifex, qui pro cuncto populo deprecatur, ante pro se offerat uictimas: qui certe numquam pro aliis iuberetur offerre, nisi iustus ipse esset; nec rursus pro se offerret, si peccato careret ignorantia. Scilicet nunc mihi latissima scripturarum spatia peragrandam sunt, ut doceam, errorem & ignorantiam esse peccatum. **CRATO.** Obsecro
- Matth. 5** te, nonne legisti: Qui uiderit mulierem ad concupiscendum eam, iam mœchatus est eam in corde suo? Non ergo solus aspectus, & incentiua uitiorum, reputantur in peccatum, sed

sed ea, quibus attribuimus assensum . aut enim uitare pos-
sumus malam cogitationem ; & consequenter possumus ca-
rere peccato : aut, si uitare non possumus ; non reputatur
in peccatum , quod cauere non potest . **ATTI.** Callide quidē
argumentaris ; sed non intelligis , argumentationem tuam
contra sacras scripturas facere . uolunt enim eloquia scriptu-
rarum , etiam ignorantiam habere peccatum . unde & **Iob 1**
offert hostias pro filiis suis , ne forte per ignorantiam in co- **Deut. 19**
gitatione peccauerint . Et qui ligna cædit , si securi ac ferro
fugiente de ligno , homo fuerit occisus , pergere iubetur ad
urbem fugitiuorum , & tam diu ibi esse , quam diu sacerdos
maximus moriatur , idest , redimatur sanguine saluatoris ;
aut in domo baptismatis , aut in pænitiâ , quæ imitatur
baptismatis gratiam per ineffabilem clementiam saluatoris ,
qui non uult perire quemquam , nec delectatur morti- **Exech. 18**
bus peccatorum , sed ut conuertantur , & uiuant . **CRITO.**
Rogo , quæ est ista iustitia , ut in peccato tenear erroris , cu-
ius reatum non habet conscientia ? nescio me peccasse , &
eius rei , quam nescio , poenas luo ? ecquid plus faciam , si
sponte peccaui ? **ATTI.** A me sententiæ & dispositionis
Dei causas requiris ? Respondet stultæ interrogationi tuæ li-
ber Sapientiæ : Altiora te ne quæsieris , & fortiora te ne scru- **Eccli. 3**
tatus fueris . Et alibi : Noli esse sapiens multum , & noli ar- **Eccli. 7**
gumentari plus quam oporteat . Et in alio loco : In sapien- **Sap. 1**
tia & in simplicitate cordis quærite Deum . Ac ne forte huic
uolumini contradicas , audi Apostolum , euangelica clangē-
tem tuba : O altitudo diuitiarum sapientiæ & scientiæ Dei , **Rom. 11**
quam inscrutabilia sunt iudicia eius , & inuestigabiles uix
eius . Quis enim cognouit sensum Domini ? aut quis consi-
liarius eius fuit ? Istæ sunt quæstiones , de quibus & in alio
loco scribit : Stultas autem & ineruditas quæstiones de uita **2. Tim. 3**
sciens quoniam lites generant . Et Ecclesiastes , de quo cer- **Eccl. 7**
te libro nulla est ambiguitas , Dixi , inquit , sapiens efficiat ,
& ipsa lōge facta est a me . Profunda profunditas , quis eam
inueniet ? A me quæris , quare figulus aliud uas fecerit in ho-
norem , aliud in contumeliam : & non uis acquiescere Pau-

O o o lo

- Rom. 9** lo pro suo Domino respondenti? O homo, tu quis es; qui respondeas Deo? Audi ergo breuiter testimonia scripturarum; ut stulta, immo impia sciscitatio tua in perpetuum cōticescat. Loquitur Deus in Genesi: Non adiiciam ultra maledicere terræ propter opera hominum: quia apposita est mens hominis diligenter ad mala a pueritia. Abraham & Sara, audita repromissione filii Isaac, rident in corde suo, & tacita cogitatio non latet scientiam Dei. Arguuntur in risu: & ipsa cogitatio, quasi pars infidelitatis, reprehenditur. Attamen non ex eo, quod risere, diffidentiae condemnantur, sed ex eo, quod postea crediderunt, iustitiæ palmam acceperunt. Lot nescit in concubitu filiarum quid fecerit; & inebriatus ab eis non habet crimen conscientiae: & tamen error in uitio est. Argue sanctum uirum Iacob, quare Rachel formosam dilexerit, pro qua & seruiuit multo tempore, & in Liæ primo cōcubitu fuerit contristatus: & acquiesce tandem humanæ fragilitati, quæ etiam pulchra corpora diligit, & deformia detestatur. Luget Iacob mortem filii sui Iospeh, & multo tempore consolationem non recipit filiorum: respondetq. Lugens ac gemens uadam ad infernum: & probat se hominem, dum iustus ignorat quid actum sit de iusto filio Iospeh. In Exodo scriptum est: Si percusserit aliquis quempiam, & mortuus fuerit, morte moriatur. sin autem non uolens, sed Deus tradidit eum in manibus eius: dabo tibi locum, ad quem confugiat qui occiderit. In quo notandum est, quod Deus tradidit hominem in manus eius; & ille, qui occidit per ignorantiam, exilio condemnatur. In Leuitico lex ponitur: Anima si peccauerit in conspectu Domini non sponte ex omnibus præceptis Domini, quæ non oportet fieri; feceritq. unum ex eis, siue pontifex fuerit, siue omnis synagoga, & reliquus populus; & postea didicerit peccatum suum, quod peccauit per ignorantiam: offeret munus, hircum de capris masculum immaculatum; & ponet manus suas super caput eius; interficietq. illum in loco, ubi mactantur holocausta, coram Domino, quia pro peccato est. Statimq. in sequentibus: Si tetigerit aliquid im-
- mundum,

mundum, quod non liceat tangere, & fecerit per ignorantiam; & postea didicerit, siue promiserit aliquid, & fuerit oblitus; pronunciabit peccatum suum, in quo peccasse se perspicit; & offeret Domino pro iis, quæ peccauit, agnā, siue capram pro peccato suo, quod peccauit; & precabitur pro eo sacerdos super peccato, & dimittetur ei peccatum. Sin autem non præualuerit manus eius, ut offerat ouem pro peccatis suis, quibus peccauit: duos turtures, aut duos pullos columbarum offeret Domino, unum pro peccato, & unum in holocaustum; & portabit ea ad sacerdotem; & offeret sacerdos id, quod pro peccato est primū; & in ipso reconciliabitur pro peccato, quod peccauit; & dimittetur ei. Ceteraq. his similia, quæ studio breuitatis omitto, ne fastidium stomacho tuo faciam. In consequentibus quoque narrat Moyses, quod in consecratione Aaron & filiorum eius obtulerit uitulum pro peccato, & posuerit Aaron & filii eius manus super eum, super caput uidelicet uituli, qui erat pro peccato; & mactauerit eum; & tulerit de eius sanguine, & posuerit super cornua altaris in circuitu digito suo, atque altare mundauerit: similiter in ariete fecerit, & de sanguine eius tetigerit auriculam eius dexteram, & manum dexteram, & summitatem pedis dextri. Et post multa alia, quæ narrare longissimum est, enumeratis diebus septem ita legimus: Factum est quoque die octauo, & uocauit Moyses Aaron, & filios eius, & omnes seniores Israel, & dixit ad Aaron: Tolle uitulum de bobus pro peccato, & arietē in holocaustum, utrumque immaculatum; & offeres eos in conspectu Domini; & senioribus Israel loquere, dicens: Tollite hircum de capris unum pro peccato, & uitulum immaculatum anniculum in holocaustum. Dixitq. Moyses ad Aaron: Accede ad altare, & fac pro peccato tuo: & reliqua. Rursumq. eleuauit Aaron manus suas super populum, & benedixit eis. Descenditq. cum fecisset pro peccato & holocausto & salutarī. Mulier generat liberos lege naturali, & immunda est, si masculum pepererit, diebus quadraginta; si feminam, diebus octoginta. Accusa creatorem, cur

Leuit. 8

Leuit. 9

Leuit. 12

O o o 2 in mun-

- immundum quidquam nomet, quod ipse condidit. Et non solum ipsa immunda est, sed & omne, quod tetigerit. Cumq. dies, inquit, purgationis eius completi fuerint super filio aut filia, offeret agnum anniculum immaculatum, & pullum columbarum, & turturem pro peccato, ad ostium tabernaculi testimonii sacerdoti, qui offeret ea in conspectu Domini, & expiabit pro ea sacerdos. De leproso quoque dicitur, quod in die purgationis eius offeratur pro eo uictima pro peccato, duoq. turtures, & duo pulli collumbarum, unus pro peccato, alius in holocaustum. Et qui fluxum seminis patitur, eodem sacrificii ordine pro peccato & holocausto liberatur. Et ad extremum infertur: Timoratos facite filios Israel ab immunditiis suis, & non morientur pro peccato suo, si contaminauerint tabernaculum testamenti. Ipsi quoque Aaron praecipitur, ut non omni tempore ingredia-
Leuit. 13. 14 tur in Sancta sanctorum, ne forte moriatur. Cumque, ait, uoluerit intrare, offerat uitulum pro peccato, & arietem in holocaustum, duosq. hircos accipiat ab uniuerso populo; unum ex eis offerat pro peccato suo, & unum pro peccato populi, & arietem in holocaustum. Alter hircorum cuncta peccata suscipit populi, in typum Domini saluatoris, & effert in solitudinem: & sic placatur Deus omni multitudi-
Leuit. 22 nitudo. Ad extremum dicitur: Si comederit homo de sanctificatis per ignorantiam, imputatur ei iniquitas atque delictum, & uoti reus erit. unde & Apostolus monet, eucharistiam Domini cum cautione sumendam; ne in condemnationem nobis sumamus, atque iudicium. Si damnatur in lege ignorantia, quanto magis in euangelio conscientia? Tra-
1. Cor. 11 seamus ad Numeros, & ob contentiosorum impudentiam confutandam, summa quaeque carpanus. Nazareus, sancto crine uenerabilis, alterius subita morte maculatur, & omnes dies consecrationis eius praeteriti irriti sunt: posteaq. pro eo offeruntur duo turtures, & duo pulli columbarum, unus pro peccato, & alter in holocaustum. In die quoque consummationis eius offertur agnus in holocausto, & agna pro peccato. Et post multa scriptum est: Ut nunc magnificetur

ficitur fortitudo Domini, sicut locutus est, dicens: Dominus longanimis, & multæ misericordiæ, auferens iniquitatem & scelera, & mundans non faciet innocentem. Pro quo Septuaginta interpretati sunt, Et emundans non mundabit reum: quod scilicet etiam post indulgentiam reus sit propriæ conscientiæ. Cumque, ait, ignorauerit populus, & fecerit unum ex his quæ facere non debuit, post cærimoniarum longum ordinem inferitur, & dicitur: Offerre hircū caprarum pro peccato, & placabit sacerdos pro omni synagoga filiorum Israel, & propitiabitur ei Dominus, quia ignorantia est: & ipsi offerent oblationem suam in sacrificium Domino pro peccato suo in conspectu eius, quoniam nescierunt. Ibiq; additur: Si anima una peccauerit per ignorantiam, offeret capram anniculam pro peccato ignorantie coram Domino, & deprecabitur pro ea sacerdos, eo quod ignorauerit, pro peccato ignorantie coram Domino, & rogabit pro ea, & propitiabitur ei. In kalendis singulorum mensium offertur hircus caprarum pro peccato Domino. In pascha quoque per dies octo, a die decimoquarto mensis primi usque ad uigesimum primum diem sacrificium pro peccato est. In pentecoste hircus pro peccato offertur: & in kalendis mensis septimi, quando turbarum clangor concinit, eadem hirci pro peccato religio conseruatur. Die quoque decimo eiusdem mensis septimi, quando ieiunium est usque ad uesperum, offertur hircus caprarum pro peccato, præter eū hircum, qui ante holocaustum pro peccato ex lege mactatur. In diebus quoque Scenopægiæ, quando figebantur tabernacula, a die decimoquinto eiusdem mensis septimi usque ad diem uigesimum secundum, inter alias uictimas semper pro peccato hircus offerebatur, ut illud impleatur beati David: Tibi soli peccaui, & malum coram te feci, ut iustificeris in sermonibus tuis, & uincas cum iudicaris. Sex ciuitates eliguntur exilii eorum, qui non sponte, sed per ignorantiam, uel iactu lapidis, uel impulsione manus, uel ioco, uel lasciuia, absque inimiciis, infelicitate magis quam uoluntate peccauerunt, & tamen non absque crimine sunt, dum re-

O o o 3 legan-

legantur in perpetuum, & ante constitutum diem nec supplicatione, nec pretio eorum reuersio impetrari & redimi potest. In Deuteronomio, qui liber præteritorum enumeratio est, perspicue demonstratur, non in operibus nostris atque iustitia, sed Dei misericordia nos conseruari, dicente

Dent. 9 Domino per Moysen: Ne dicas in corde tuo, cum subuerterit eos dominus Deus tuus a facie tua, in iustitia mea introduxit me Dominus, ut possideam terram hanc: quia in impietate gentium istarum Dominus consumet eos a facie tua: non in iustitia tua & directione cordis tui intrabis, ut possideas terram eorum: sed in impietate eorum dominus Deus tuus consumet eos a facie tua, ut suscitetur uerbum, quod locutus est patribus tuis Abraham, Isaac, & Iacob. Et scies,

Dent. 18 quod non in iustitia tua dominus Deus tuus dabit tibi terram optimam, ut possideas eam: quia populus duræ cervicis es tu. In eo autem, quod dixit: Perfectus eris cum domino Deo tuo: quo sensu dixerit, ex consequentibus approbatur: Cum ingressus, inquit, fueris terram, quam Dominus Deus tuus dabit tibi, nō discas facere abominationes gentium illarum: nec inuenietur in te, qui traducat filium, uel filiam suam per ignem. Diuinationibus, & omnibus auguriis, & maleficis artibus, & incantationibus non seruias, ut interroges magos, & hariolos, & mortuos. Abominatio enim Domini est omnis, qui facit hæc. Et propter has abominationes dominus Deus tuus consumet eas a facie tua: perfectus eris cum domino Deo tuo. Denique infert: Quia gentes istæ, quas tu possidebis, hariolos, & diuinos audiunt. tibi autem nō sic dedit dominus Deus tuus. Statimq. subiungit: Prophetam unum ex te de fratribus tuis, sicut me suscitabit tibi dominus Deus tuus, ipsum audies. Ex quo ostenditur, perfectum hic dici, non qui cunctas uirtutes habeat, sed qui perfectum & unum sequatur Deum. Narratq. similiter de condicione exulum, qui per ignorantiam peccauerunt, quo confugere debeant; atque subiungit: Quando ædificaueris domum nouam, facies loriculam tectō tuo

Dent. 19 in circuitu, ne sanguinis reus sis, cum aliquis ceciderit ex ea.

Dent. 22 Et

Dent. 23

Et iterum : Si fuerit in te uir, qui non sit mundus a nocturno fluxu, egredietur extra castra, & non ingreditur medium castrorum : cumq. aduenerit uespera, lauabit se aqua, & post occubitum solis ingreditur medium eorum . De Iesu filio Naue duo tantum ponam testimonia . Peccauit Ha-
 chan, & totus populus offendit . Dixitq. Dominus ad Io-
 sue : Non poterunt stare filii Israel in conspectu inimicorum suorum, sed dorsa uertent aduersariis suis : quia factum est anathema in eis . Et non addam, ut sim uobiscum, nisi contritum fuerit anathema de medio uestrum . Cumq. sacrilegium quæreretur, & fors latentem inuenisset reum, interficiuntur cum Hachan filii eius, & filiae : boues, asini, pecora, tabernaculum, & quæcumque habere potuit, igne deleta sunt . Esto, ipse peccauerit : quid commiserit filii ? quid boues ? quid asini ? quid pecora ? Fac Deo calumniam, quare unus peccauerit, & pars populi trucidata sit : cur & ipse lapi-
 datur, & omnia, quæ habere potuerit, ultrix flamma consumpserit ? Dicamus & aliud : Non erat, inquit, ciuitas, quæ
 non tradidit Dominus filiis Israel : absque Eueo, qui habitabat in Gabaon, omnes pugnando ceperunt : quia a Domino factum erat, ut induraret cor eorum, & pugnarent contra Israel, ut interficerentur, & non fieret in eis misericordia, & perirent, sicut præcepit Dominus Moyse . Si Domini factum est uoluntate, ut pacem non reciperent, nec susceperent Israel ; dicamus iuxta Apostolum : Quid ergo quæritur ? uoluntati enim eius quis potest resistere ? De Samuel, & Malachim : Jonathan fauim mellis gustauit in scepro, & illuminatis oculis periclitatur, quod nesciens fecerit . hoc enim scriptura testatur, quod ignorauerit a patre esse præceptum, ne quisquam gustaret, donec uictoria Domini compleretur . Intantum autem iratus est Dominus, ut fors inueniret occultum, & ipse fateretur, dicens : Gustauit in summitate sceptri, quod est in manu mea parum mellis, & ecce ego morior . Et postea intercessione & precibus populi liberatus est, dicentis ad saul : Num Jonathan morietur, qui fecit salutem hanc magnam in Israel ? absit . uiuit Dominus :

Ios. 7

Ios. 12

Rom. 9

1. Reg. 14

O o o 4 li

si ceciderit de capillis capitis eius in terram, quia cum Domino fecit diem hanc: & liberauit Dominus Ionathan, & non est mortuus. Samuel irascitur Sauli, & non uult ire cum rege: postea precibus uincitur, ut ostendat humani animi in diuersum mutationem. pergit Bethlehem, singulos filiorum Iesse putat ipsos esse, quos Dominus requirebat. cum uidisset Eliab, ait: Ecce in conspectu Domini Christus eius. Et ait Dominus ad eum: Ne respicias ad uultum eius, & ad staturam corporis illius, quoniam abieci eum. Aliter enim uidet homo, aliter Deus. homo enim uidet in facie, Deus in corde. Atque in hunc modum per omnes errat, per omnes corrigitur, ut pateat humanæ mentis infirmitas. Isboset, Saul filius, interficitur dolo a Rechab & Baana, filiis Remmon Berothitæ. cumque nunciassent Dauid, & caput aduersarii demonstrarent, occisi sunt a Dauid dicente: Viri impii occiderunt uirum iustum in domo sua, & in lectulo suo. Certe Isboseth iustus non erat, & tamen in eo iustus appellatur, quod absque noxa interfectus est. Oza leuites, cum arca Domini transferretur Hierusalem, & lasciuientes boues plaustrum in partem alteram declinassent, misit manum ut sustentaret inclinatum arcam: statimque sequitur: Iratus est furor Domini in Ozam, & percussit eum Deus ibi pro ignorantia, & mortuus est iuxta arcam Dei. contristatusque Dauid, quod percussisset Dominus Ozam, timuit Dominum in illa die, & ait: Quo modo ingredietur ad me arca Domini? Dauid iustus & propheta & unctus in regem, quem elegit Dominus secundum cor suum, ut faceret cunctas uoluntates eius, ut uidet ignorantiam Domini furore punitam, terretur, atque tristatur; nec querit causam a Domino, quia percussisset ignorantem, sed similem sententiam pertremisit. Præcepit Dauid principi exercitus Ioab, ut numeret populum: statimque scriptura commemorat: Et percussit cor suum Dauid, & dixit ad Dominum: Peccaui uehementer, quia hoc feci. Cum iuberet ut fieret, utique, quid diceret, ignorabat, & tamen se ipse reprehendit: & pro hac culpa septuaginta millia hominum angeli gradio trucidantur.

Salo.

Salomon; completis templi carimoniis, utrasque palmas te ^{3.Reg.8}
 tendit ad Dominum, & ait: Cum peccauerit tibi populus, ^{3.Reg.14}
 non est enim homo qui non peccet. Achia propheta Siloni
 res nesciebat ad se uenire uxorem Hieroboam: dixitq. ei
 Dominus: Ecce uxor Hieroboam ingreditur, ut quærat
 uerba a te pro filio suo qui ægrotat: iuxta hoc & iuxta hoc lo
 queris ad eam. Heliseus sedebat in monte: uenit ad eum mu
 lier, cuius filius mortuus erat, & amplexata pedes eius uoci
 feratur. repellente autem eam Giezi, dixit ad eum uir Dei:
 Dimitte eam, quoniam anima eius in amaritudine est: &
 Dominus celauit a me, ut non annunciarer mihi. In libro
 dierum legimus: Fuerunt filii Sobal patris Cariathiarim, ^{1.Par.2}
 qui prophetabat ex dimidio. Et iterum: Filii autem salma
 patris Bethlehem & Netophathi corona domus Ioab, &
 qui prophetabant ex dimidio Zarai, & cetera. Similiter uti
 que sancti erant qui prophetabant, & tamen perfectam non
 meruerunt accipere prophetiam: nequaquam de futuro se
 cundum tropologiam, sed impræsentiarum iuxta historiam
 prophetantes. Habacuk propheta canticum suum hoc in- ^{Habac.3}
 scribit titulo: Oratio Habacuk prophetæ pro ignorantibus.
 Locutus enim fuerat audacter ad Dominum, & dixe
 rat: Usquequo Domine clamabo, & non audies? Vocifera ^{Habac.2}
 bor ad te uim patiens, & non saluabis? Quare ostendisti mi
 hi iniquitatem, & laborem, uidere prædam & iniustitiam?
 Contra me factum est iudicium, & contradictio potentior:
 propter hæc lacerata est lex, & non peruenit usque ad finem
 iudicium: quia impius præualeat aduersus iustum, propterea
 egreditur iudicium peruersum. Pro quo se ipse reprehendens,
 quod per ignorantiam sit locutus, scribit canticum pæniten
 tiæ. Si peccatum non erat ignorantia; superfluo scribit li
 brum pænitudinis, & inaniter uoluit id lugere, quod pecca
 tum non habet. In Ezechielis extrema parte, ubi per ædifi- ^{Ezech. 43.45}
 cium templi in monte siti, Ecclesiæ multa post sæcula futuræ
 sacramenta narrantur, primo & septimo die mensis primi
 offeruntur uictimæ pro peccatis omnium; in quo per erro
 rem, aut ignorantiam peccauerunt. Septem quoque diebus
 paschæ

- paschæ hircus semper pro peccato mactatur. Septimi mensis quintadecima die idem pro peccatis sacrificiorum ordo celebratur. Et post alia plurima, quæ non est istius temporis replicare, scriptum est: Erat autem ibi locus ad occidentem, dixitque ad me: Iste est locus, ubi coquere debent facer-
- Exech. 46** dotes hostiam pro peccato, & pro ignorantia. Hieremias loquitur ad Deum: Scio Domine, quod non est hominis uia eius: nec uiri est, ut ambulet, & dirigat gressus suos. ideoque prauum est cor hominis, & inscrutabile, & quis cognoscer-
- Pro. 14** illud? In Prouerbiis legimus: Est uia, quæ uidetur recta esse apud homines, & nouissima eius ueniunt in profundum inferni. Ecce & hic manifeste ignorantia condemnatur; cum aliud putat homo, & sub specie ueritatis ad inferna delabitur.
- Pro. 19** Multæ, inquit, cogitationes in corde hominis, sed non tamen illius uoluntas, quæ incerta, & fluctuans, atque mutabilis est, sed Dei consilium obtinet. Quis, inquit, gloriabitur castum se habere cor? Et quis confidet mundum se esse a peccato? Dulcis est enim homini panis mendacii, & postea implebitur os eius calculo. A Domino gressus hominis diriguntur: mortalis autem quo modo scire poterit uias suas?
- Pro. 21** Omnis uir uidetur sibi iustus, sed corrigit corda omnium.
- Pro. 30** Deus. Filius malus iustum se facit, & non lauat exitum suum.
- Eccls. 7** Filius malus excelsos habet oculos, & palpebris suis eleuatur. Est enim iustus, qui perit in iustitia sua. Vnde dicitur ad eum: Ne sis iustus multum, nec quasi per sapientiâ quæras superflua, ne forte obstupescas. Quæcumque enim laborauerit homo ut requirat, non inueniet. Si dixerit sapiens se intelligere, reperire non poterit. Cor enim filiorum hominum repletum est malitia.

DIALOGORVM HIERONYMI

aduersus Pelagianos

LIBER SECVNDVS.

CRITOBVLVS.

VLTA quidem de scripturis sanctis memoriter copie
M seq. dixisti, & quasi quibusdam discussis nubibus,
 clarum uisus es ueritatis lumen aperire: sed quid ad
 rem? his enim cunctis testimoniis uideris hominum accusa-
 re naturam, ac per hoc inuidiam referre in Deum, si tales
 homines condidit, ut obliuione & ignorantie peccato care-
 re non possint: ex quo perspicuum est, hominem posse, si
 uoluerit, non peccare: id enim fecit, quod uitare non po-
 tuit. ubi autem aufertur possibilitas, aufertur & uitium: ne-
 mo enim in eo condemnatur, quod facere non potuit. **AT.**
 Sape dixi, te non intelligere conatus meos, nec considerare
 quid argumenteris, sed quid Deus iusserit. Pro obliuione,
 errore, & ignorantia, quasi pro peccato, offeruntur sacrifi- *Leuit. 4*
 cia: siue hoc male, iuxta te, siue bene, iuxta me, Deus præ-
 cepit; meum est obseruare quod iussit, tuum Dei iussa re-
 prehendere. **CR.** Quoniam uim facis perspicue ueritati,
 & me trahis ad blasphemiam; concedam tibi hoc in ueteri
 lege præceptum, de qua scriptum est: Vetera transierunt, *2. Cor. 3*
 ecce facta sunt omnia noua. Numquid & de euangelio po-
 teris hoc approbare, ut puniatur quispiam pro eo, quod
 nesciat; & ante poenas luat, quam reus sit conscientie? **AT.**
 Dum ignoramus, Manichæus nobis consurgit repente, qui
 legem dicit abolitam, & solos noui testamenti legendos li-
 bros. **CR.** Quid enim a me audiisti, ut hoc autumes? Et
 lex enim patribus data pro tempore iusta & sancta est: & ue-
 niente euangelii perfectione, uiliora cessarunt. **AT.** Ergo ne-
 quaquam obseruandum est, quod lege præcipitur? **CR.**
 Quædam obseruanda, quædam prætermittenda sunt. **AT.**
 Quoniam te uideo esse doctissimum, dic mihi quæ de ueteri
 testamēto obseruare debeam, & quæ relinquere. **CR.** Mā-
 data

- data obseruare debemus, quæ ad uitam & mores pertinent
Psal. 18 corrigendos: de quibus dictum est: Mandatum Domini lucidum, illuminans oculos. Quæ autem ad cærimonias legis, & ritus sacrificiorum pertinent, relinquenda sunt. *A. T.* Ignosce mihi: cum legis & omnium scripturarû sciëntiam iactites, non animaduertis quid uelim dicere. *C. R. T.* Hoc intelligo, quod loqueris, & non quod taces. *A. T.* Tacere tibi uideor, qui tantis exemplis docere te uolui, peccare hominem per ignorantiam, & pro peccato, ut in lege hostias, ita & in euāgelio offerendam penitendum? *C. R. T.* Da testimonium noui instrumenti, ubi error, & ignorantia, & impossibilitas mādati teneatur in crimine. *A. T.* Non necesse est multa proferre: unum proferam, cui certe contradicere non poteris.
- Rom. 7* Vas electionis perspicue loquitur: Consentio enim legi Dei iuxta interiorem hominem. uideo autem aliam legem in membris meis; repugnantem legi mentis meæ, & captiuantem me in lege peccati, quæ est in membris meis. Miser ego homo, quis me liberabit de corpore mortis huius? gratia Dei per Iesum Christum dominum nostrum. *C. R. T.* Protulisti testimonium, quod pro me facit. Liberati ergo de corpore huius mortis per gratiam domini nostri Iesu Christi, nequaquam ultra peccare debemus. *A. T.* Liberati quidem sumus baptismo saluatoris: sed id mihi ediffere, quare dixerit: Video aliam legem in membris meis, repugnantem legi mentis meæ, & captiuantem me in lege peccati, quæ in membris meis est. Quæ est ista lex regnans in membris hominis, & repugnans legi mentis eius? responde simpliciter: taces?
- Rom. 7* audi eundem Apostolum apertissime prædicantem: Quod enim operor, non cognosco. non enim, quod uolo, operor; sed, quod odi, illud facio. sin autem, quod nolo, hoc facio, consentio legi, quoniam bona est. nunc autem nequaquam ego operor illud, sed, quod in me habitat, peccatum. scio enim, quod non habitat in me, hoc est, in carne mea, bonum. uelle enim adiacet mihi, operari autem bonum non inuenio. non enim, quod uolo, bonum hoc ago; sed, quod nolo, malum hoc facio. si autem, quod nolo, hoc

hoc ego facio ; nequaquam ego operor illud , sed , quod ha-
 bitat in me , peccatum . c r i . Miror te , hominem pruden-
 tem , sic intelligere Apostolum , ut eum ex persona sua , &
 non ex aliorum hæc dicere sentias . qui enim conscientia in
 se loquentis Christi libere proclamat : An experimentum 2 . Cor . 13
 quæritis eius , qui in me loquitur Christus ? Et in alio loco : 2 . Tim . 4
 Cursum consummaui , fidem seruauit , de cetero reposita est
 mihi corona iustitiæ : iste hoc de se dicere poterat , operari
 bonum non inuenio ; & non , quod uolo , bonum hoc fa-
 cio ; sed , quod nolo , malum hoc ago ? Quid illud erat bo-
 ni , quod uolebat facere , & nō poterat ? et quid illud erat ma-
 li , quod nolebat , & tamen uitare non poterat ? Ergo non ex
 sua persona hoc dicit , sed ex persona generis humani , quæ
 uitii subiaceret ob carnis fragilitatem . At . Parum mihi tol-
 lis , ut totum tribuas . ego enim unum hominem , licet apo-
 stolum , intelligo subiacere peccato : tu totum humanum ge-
 nus asseris . quod si uerum est in genere , tenemus & specie .
 nā & apostolus homo est , & , si homo est , uel de aliis uel de se
 quasi homo loquitur : Miser ego homo , quis me liberabit de Rom . 7
 corpore mortis huius ? Et : Quoniā non habitat in me , hoc Sap . 9
 est , in carne mea , bonum . Corruptibile enim corpus aggra-
 uat animam , & deprimat terrena habitatio sensum multa co-
 gitantem . c r i . Sic loqueris , quasi ego hoc ex persona ge-
 neris humani accipiam , & non ex persona peccatorum . At .
 Ecquis tibi hoc concedet , ut ex persona peccatoris hoc lo-
 quatur Apostolus ? Si enim ex persona peccatoris hoc acci-
 pis , debebat dicere : Miser ego peccator , & non , Miser ego
 homo . Homo quippe naturæ est , peccator uoluntatis .
 Nisi forte & illud , quod scriptum est ; Vanitas uanitatum , Eccl . 1
 & omnia uanitas ; ad peccatores refertur , & non ad omnes
 homines . Et iterū : Verumtamen & in imagine pertransit Psal . 38 . 143
 homo . Ac deinde : Homo uanitati assimilatus est : dies eius
 uelut umbra pertransiunt . Si hoc Pauli testimonio non
 moueris , audi aliud eiusdem , cui contradicere non po-
 tes : Nihil mihi conscius sum : & cetera . Mire : Nec me 1 . Cor . 4
 ipsum iudico , nihil mihi conscius sum , nec tamen in hoc iu-
 stificatus

- stificatus sum. Qui hoc dicebat, nullius utique peccati sibi conscius erat. Sed quia legerat: Delicta quis intelligit? Et: *Psal. 18* Sunt uix, quæ uidentur uiro iustæ, nouissima autem earum *Pro. 14* respiciunt in profundum inferni. Et iterum: Omnis uir uidetur sibi iustus, Deus autem corda hominum dirigit: iccirco temperabat sententiam: ne forte per ignorantiam deliquisset, maxime cum scriptura testetur: Est iustus, qui perit in iustitia sua. Et alibi: Iuste, quod iustum est, sectaberis; ne opinione ueritatis a iustitia declinemus, recordantes Saulis, & Hachan. *1. Reg. 15* c. 11. Ne contendere uidear, & in diuersum absque mensura funem trahere, saltem hoc mihi concede, iustos in scripturis plurimos appellari. *Ios. 7* *Ar.* Non solum plurimos, sed innumerabiles. *c. 11.* Si innumerabiles iusti sunt, & hoc negari non possit; quid male locutus sum, posse esse hominem sine peccato, si uelit? Hoc est aliis uerbis dicere, posse iustum sine peccato esse, in eo quod iustus est. *Ar.* Iustos esse concedo: sine omni autem peccato omnino, non assentior. etenim absque uitio, quod Græce dicitur *κακία*, hominem posse esse aio: *ἀναμαρτυρον*, idest, sine peccato esse, nego. id enim soli Deo competit: omnisq. creatura peccato subiacet, & indiget misericordia Dei, dicente scriptura: Misericordia Domini plena est terra. Et, ne quasi maculas quasdam in sanctis uiris uidear perscrutari; in quibus errore sint lapsi, pauca proferam, quæ non ad singulos, sed ad omnes in commune pertineant. In trigessimoprimo psalmo scriptum est: Dixi, pronuntiabo aduersum me iniustitiam meam Domino, & tu dimisisti impietatem cordis mei. Statimq. sequitur: Pro hac, hoc est, impietate, siue iniquitate, (utrumque enim intelligi potest) orabit ad te omnis sanctus in tempore opportuno. Si sanctus est, quo modo orat pro iniquitate? si iniquitatem habet, qua ratione sanctus appellatur? Iuxta *Pro. 24* illum uidelicet modum, qui & in alio loco scribitur: Septies cadit iustus, & resurget. Et iustus accusator sui est in principio sermonis, Et alias: Alienati sunt peccatores a uulua, *Psal. 57* errauerunt ab utero, locuti sunt falsa. Vel statim ut nati sunt

sunt, subiacuere peccato in similitudinem peruariationis *Rom. 5*
 Adæ, qui est forma futuri: uel certe statim, ut de utero uirgi
 nali natus est Christus: de quo scriptum est: Omnis qui ape
 rit uulua, sanctus Domino uocabitur. Omnes hæretici erra *Luc. 2*
 uerunt, non intelligentes mysterium natiuitatis eius: ma
 gisq. ad specialem natiuitatem saluatoris, quam ad omniū *Exod. 13*
 hominū, referri potest hoc, quod dicitur: Qui aperit uulua,
 sanctus uocabitur Domino. Solus enim Christus claufas
 portas uulue uirginalis aperuit, quæ tamen clausæ iugiter
 permanserunt. Hæc est porta Orientalis clausa, per quam *Ezech. 44*
 solus Pontifex ingreditur, & egreditur, & nihilominus sem
 per clausa est. Illud quoque, quod in uolumine Iob scriptum *Iob 4*
 est: Numquid mundus erit homo coram Deo, aut in operi
 bus suis irreprehensibilis uir? Si aduersus famulos suos nō cre
 dit, & contra angelos prauum quid reperit: quanto magis
 in his, qui habitant domos luteas, e quibus & nos de eodē
 luto sumus? Quod si asserueris, hoc dici ex persona Eliphaz
 Themanitæ; intellige nō ab eo dici, sed ab illo, qui sub per
 sona angeli in uisione & reuelatione loquitur ei sententias
 Dei. sed esto ut loquatur Eliphaz, quod perspicue angelus
 loquitur: numquid nō hoc ex persona Iob proprie dicitur: *Iob 7*
 Tetratio est uita hominis super terram? Et: Si ego peccaui, *Iob 9*
 quid possum facere? Et: Quare oblitus es, nec fecisti iniqui
 tatis meæ obliuionem, & emundationem peccati mei? Quo
 modo enim potest esse iustus homo super terram apud Deum
 ? Et iterum: Si fuero iustus, non audiet me, sed iudicio *Iob 9*
 eius indigebo. Et rursus: Quia sum impius, cur frustra la
 boro? Si lotus fuero niue, & mundis manibus, fatis me sor
 de tinxisti. Si peccaui, custodies me: ab iniquitate autē *Iob 10*
 me non facies innocentem. Et si impie egero, uæ mihi. Et
 si fuero iustus, non potero respirare: plenus enim ego sum
 ignominia. Et iterum: Quis enim erit mundus a sorde? Ne *Iob 25*
 unus quidem, etiam si unius diei fuerit uita eius super terrā,
 & numerabiles menses illius. Quod si dixeris, pronomen,
 quis, non pro impossibili, sed interdum pro difficili accipi:
 respondebo tibi: Et ubi est illud, quod temere protulisti?
 Facilia

Facilia Dei esse mandata, & ea facile posse compleri, dicente scriptura: Vir in dolore laborat sibi, & uim facit perditioni suæ, ut, oppressa & subiugata & moriente carne, uiuat in eo spiritus. Ridiculamq. illam expositionem Demosthenis uestri, non dixisse Iob; Quis erit mundus a peccato, sed quis erit mundus a sorde; prætereo: qua probare conatur, sordes pannorum significari in infantia, non uitia peccatorum. Aut certe, si non sic intelligit, dicite uos quid sentiat. tam enim inuolutus dictator est, & nimio uerborum squalore coopertus, ut suspicionem magis, quam intelligentiam, lectori præbeat. Ad extremum infert: Ego autem ad hoc

Iob 39 quid respondebo? Manum meam ponam super os meum, semel locutus sum, in secundo non addam. Ecce Iob noster immaculatus, & sine querela, & abstinens se ab omni malo, quali sine iustitiæ coronatur, ut misericordia Dei indigeat? Hoc est illud, quod in Prouerbiis legimus: Quis gloriabitur castum se habere cor? aut quis confidit se mundum esse a peccato? Fac quod & hic, quis, non pro impossibili, sed pro difficili dixerit: tolle ergo sententiam, & rade de libro tuo, Facilia Dei esse mandata. Quod si illud Ioannis apostoli apposueris, Mandata eius non sunt graua: & de euangelio, Iugum meum suauis est, & onus meum leue: facile reuinceris: leuia enim certum est dixisse euangelii mandata ad comparisonem superstitionis Iudaicæ, in qua uaria cærimoniarum genera quærebantur, quæ iuxta litteram & apostoli Petri sententiã nullus potuit explere. Vnde & in Actibus apostolorum scribitur: Nunc ergo quid tentatis imponere iugum super ceruicem discipulorum, quod neque patres nostri, neque nos portare potuimus: sed per gratiam domini Iesu saluari credimus, quemadmodum & illi. Iacobus apostolus scribit. Si iudicas legem, non es factor legis, sed iudex. Ille iudicat legem, qui dicit, aliquid non iuste præceptum, & ignorantiam non habere peccatum, & frustra offerri uictimas pro errore, quod peccati non habet conscientiam. Neque enim in lege ratio quæritur, sed auctoritas. Idem in eadem dicit epistola: Ira uiri iustitiam Dei non opera-

operatur, & quis nostrum carere potest ira, de qua scriptum est: Ira perdit etiam sapientes? Significanterq. non iram Dei, sed iram uiri posuit. Ira enim Dei iusta est: ira autem uiri de perturbata mente procedit. unde & in psalmo dicitur: Irascimini, & nolite peccare: qui uersiculus quem sensum habeat, Apostolus docet: Sol non occidat super iracundiam uestram. ut peccatum omnino sit, uel leuiter irasci: iustitia autem, iram celeri pœnitundine mitigare. unde & pro otioso uerbo reddituri sumus rationem in die iudicii. Et in eodem euangelio legimus: Qui irascitur fratri suo sine causa, reus erit iudicio. Licet in plerisque codicibus antiquis, sine causa, additum non sit, ut scilicet ne cum causa quidem debeamus irasci. Quis hominum poterit dicere, quod ira, quæ absque iustitia est, in sempiternum uitio careat? Et iterum: Ne glories in crastinum: nescis enim quid adueniens pariat dies. Vnde scriptum est: Ne beatum dixeris quempiam ante mortē. quamdiu enim uiuimus, in certamine sumus: & quamdiu in certamine, nulla est certa uictoria: quæ etiam Apostolo fortissime prælianti in futuro sæculo reservatur. Dominus atque saluator sub persona assumpti hominis loquitur: Inspientissimus enim omnium hominum sum, & non est hominis prudentia in me. Et in sexagesimo octauo psalmo: Deus tu scis inspientiam meam: sed fatuum Dei sapiētius est hominibus. In Ecclesiaste quoque scriptum est: In multitudine sapientiæ multitudo scientiæ: & qui addit sciētiam, addit dolorem, intelligens quod perfectione careat, & ex eo, quod nouit, quanta non nouerit. Et odio, inquit, habui uitam; quoniam malum est opus, quod operor super terram. Omnia enim uanitas, & præsumptio spiritus. Nemo scit, quid futurum sit: quia, sicut est, quis annuntiabit ei? Sunt iusti, ad quos peruenit quasi opus impiorum: et sunt impii, ad quos peruenit quasi opus iustorum. Hoc iccirco dicitur, quia certum iudicium solus Dei est; & quos putamus iustos, sæpe peccatores inueniuntur: & quos e contrario peccatores, apud Dei scientiam iusti sunt. Quantumcumque laborauerit homo,

P p p ut

Eccl. 9 ut inquirat, non reperiet. Et si dixerit sapiens nosse se, in-
 Eccl. 10 uenire non poterit. omnium enim unus occurfus est, cor-
 daq. filiorū hominum repleta sunt malitia, & incerto statu,
 quæ Græce *ἀεὶ πέπεισται* dicitur. Muscæ morituræ, siue, ut in
 Hebraico habetur, mortuæ, demoliuntur, atque corrup-
 punt suauitatem olei. Quis mortalium aliquo errore non
 capitur? quem hæreticorum & falsorum dogmatum uene-
 na non maculant? Tempus, inquit, est ut incipiat iudici-
 um a domo Dei. si autem primum a nobis, quis finis eo-
 rum, qui non credunt euangelio? et si iustus uix saluabitur,
 impius & peccator ubi parebunt? Certe iustus est, qui in
 die iudicii uix saluatur. saluaretur autem facile, si nihil in se
 haberet maculæ. ergo iustus est in eo, quod floret multis
 uirtutibus; & uix saluatur in eo, quod in quibusdam Dei
 indiget misericordia. Quattuor sunt perturbationes, qui-
 bus genus uexatur humanum, duæ præsentis, & duæ futu-
 ri; duæ bonorum, & duæ malorum. Aegritudo, quæ Græ-
 ce dicitur *λύπη*, & gaudium, quod illi *χαρὰν*, uel *ἡδονήν*
 uocant: quamquam *ἡδονή* uoluptas a plerisque dicatur: al-
 terum mali, alterum boni: excedimusq. mensuram, si gau-
 deamus super iis, quæ non debemus, diuitiis, potentia,
 honoribus, inimicorum infelicitate, uel mortibus: aut econ-
 trario præsentium malorum dolore cruciamur, aduersis,
 exiliis, paupertate, languore, & mortibus propinquorum:
 1. Theff. 4 quod Apostolus fieri prohibet: & rursus, si cupiamus ea,
 quæ arbitramur bona, hereditates, honores, prosperitates
 omnium rerum, & corporum sanitatem, & cetera, quorum
 præsentia gaudio fruimur; & metuamus illa, quæ putamus
 aduersa; quibus ad perfectum carere, iuxta Stoicos, Zeno-
 nem uidelicet, & Chrysippum, possibile iuxta Peripateri-
 cos autem & difficile, & impossibile est: cui sententiæ
 omnis scripturæ sanctæ consentit auctoritas. unde & Iose-
 phus, Machabæorum scriptor historię, frangi & regi posse
 dixit perturbationes animi, non eradicari: & quinque Tus-
 culanarum quæstionum Ciceronis libri his disputationibus
 Eph. 6 referti sunt. Pugnant enim, iuxta Apostolum, aduersum
 nos

nos fragilitas corporis, & spiritalia nequitiae in caelestibus. Manifesta sunt, dicente eodē, opera carnis, & opera spiri- *Gal. 5.*
 tus, & haec sibi inuicē aduersantur: ut non quae uolumus, illa
 faciamus. Si nō quod uolumus, facimus, sed, quod nolumus,
 illud operamur: quo modo dicitis, posse hominem sine pec-
 cato esse, si uelit? Ecce Apostolus, omnesq. credentes, *1. Pet. 4.*
 quod uolunt, implere non possunt. Caritas operit multi-
 tudinem peccatorum, non tam praeteritorum, quam praesen-
 tium; ne ultra, Dei in nobis manente caritate, peccemus.
 Quamobrem de muliere peccatrice dicitur: Dimittuntur *Luc. 7.*
 ei peccata multa, quoniam dilexit plurimum. Ex quo intel-
 ligimus, nō nostrae solū esse potestatis facere, quod uelimus,
 sed & Dei clementiae, si nostram adiuuet uoluntatem. Deus
 lux appellatur, & tenebrae in eo non sunt ullae. Quando *1. Ioan. 1.*
 dicit, nullas tenebras in Dei lumine reperiri; ostendit, om-
 nia aliorum lumina aliqua sorde maculari. Denique & apo-
 stoli appellantur lux mundi. Sed non est scriptum, quod in *Matth. 5.*
 apostolorum luce nullae sint tenebrae. Et de Ioanne scribi- *Ioan. 1.*
 tur: Hic uenit in testimonium, ut testimonium perhiberet
 de lumine, ut omnes crederent per illum. Non erat ille lux,
 sed ut testimoniū perhiberet de lumine. Erat lux uera, quae
 illuminat omnem hominem uenientem in hunc mundum.
 Vnde & de eo scriptum est: Qui solus habet immortalita- *1. Tim. 6.*
 tem, & lucem habitat inaccessibilem. Et certe legimus im-
 mortales angelos, immortales thronos, & dominationes,
 ceterasq. uirtutes: sed solus Deus est immortalis, quia nō
 est per gratiam, ut cetera, sed per naturam. Quam ob cau-
 sam idem Apostolus scribit, Deum solum esse sapientem: *1. Tim. 1.*
 cum & Salomon, & multi alii sancti sapientes uocentur, &
 dicatur iuxta Hebraicum ad principem Tyri: Sapientior Da-
 niele es tu? Quo modo ergo solus lux, solus immortalis, *Ezech. 28.*
 & solus sapiens appellatur, cum multi immortales & lu-
 ces, & sapientes sint? Sic perfectio hominis non ex natura,
 sed ex gratia ueniens, imperfectos eos, qui perfecti uiden-
 tur esse, demonstrat. Quod autem scriptum est: Et sanguis *1. Ioan. 1.*
 Iesu filii eius mundat nos ab omni peccato: tam in confes-

- fione baptismatis, quam in clementia pœnitudinis accipien-
dum est. Sed aliud est, mundari a Deo; aliud, per se esse
Iob 25 sine uitio. Si enim, iuxta Iob, Luna non splendet; & stellæ
non sunt munda in conspectu eius: quanto magis homo
Rom. 3 putredo, & filius hominis uermis? Omne enim os obstrui-
tur, & obnoxius est omnis mundus Deo: quia ex operibus
legis non iustificabitur omnis caro coram eo: nullaq. distan-
tia est personarum. Omnes enim peccauerunt, & indigent
gloria Dei, iustificati gratis per gratiam ipsius. Sin autem
scribit: Existimamus fide iustificari hominem sine operibus
legis; siquidem unus est Deus, qui iustificat circumcisionem
ex fide, & præputium per fidem: manifeste ostendit, non
in hominis merito, sed in Dei gratia esse iustitiam, qui sine
legis operibus credentium suscipit fidem. Vnde sequitur:
Rom. 6 Peccatum uestri non dominabitur. Cur? quia non estis sub
lege, sed sub gratia. non enim uolentis, neque currentis;
Rom. 9 sed misertentis est Dei. Vnde & gentes, quæ non sectabantur
iustitiã, comprehēderunt iustitiã, iustitiã autem ex fide. Isra-
el autē, sequens legem iustitiæ, in legē iustitiæ non peruenit:
quoniã non ex fide, sed ex operibus. offenderunt enim in la-
Rom. 10 pidem offensionis. Finis enim legis Christus ad iustitiã omni
credenti. Cūctæ prope epistolæ Apostoli hoc habēt princip-
um: Gratia uobis, & pax a Deo patre, & Christo Iesu domi-
no nostro: & simili sine claudūtur. Ad Corinthios quoque
1. Cor. 2 scribitur: Vt nō indigeatis ulla donatione, expectantes reue-
lationem domini nostri Iesu Christi, qui & confirmabit uos
usque in finem sine crimine in die domini nostri Iesu Christi.
Licet ergo nulla indigeamus donatione; tamen expectamus
reuelationē domini nostri Iesu Christi, qui tunc nos in omni-
bus confirmabit, & ostendet sine crimine, cum dies domini
nostri Iesu Christi & mundi finis aduenerit, ut non gloriatur
omnis caro in conspectu eius. Paulus plantauit, Apollo ri-
1. Cor. 3 gauit, sed Dominus incrementum dedit: ergo neque qui
plantat, neque qui rigat, est aliquid, sed, qui incremen-
tum dat, Deus. ipsius enim agricultura, ipsius ædificatio
sumus. Iuxta gratiam Dei, quasi sapiens architectus ponit
fun

fundamentum. Nolite, inquit, uosmet ipsos decipere. Si quis sapiens est in uobis in sæculo isto, fatuus fiat ut sit sapiens. Sapiencia enim mundi, stultitia est apud Deum. Dominus cognoscit cogitationes hominum, quia uanæ sunt. *Psa. 93*
 Et iterum: In nullo enim mihi conscius sum: sed nec in hoc iustificatus sum: quia, qui me iudicat, Dominus est. Dicitur & uobis, qui sine peccato uos esse dicitis, quid habetis quod non accepistis? si autem accepistis; quid gloriamini, quasi non acceperitis? Iam saturati estis: iam diuites facti estis. Et ut sciamus non ex nobis, sed ex Dei cuncta pendere iudicio: Veniam, inquit, citius ad uos, si Dominus uoluerit. Qui enim dicit; Veniam ad uos; ostendit se uelle, monstrat cupere, promittit aduentum. Sed ut cautius hæc loquatur, infert, Si Dominus uoluerit. Si quis enim putat se quid nosse, necdum nouit sicut nosse oportet. Vas electionis humilitate deiectus, immo conscientia fragilitatis suæ, loquitur: Ego sum minimus apostolorum, qui non sum dignus uocari apostolus: quoniam persecutus sum Ecclesiam Dei: gratia autem Dei sum id, quod sum: & gratia ipsius in me uacua non fuit, sed omnibus illis amplius laboraui, non ego autem, sed gratia Dei, quæ mecum est. Dicit se plus omnibus apostolis laborasse; statimq. laborem suum ad Dei refert auxilium: Non ego, inquit, sed gratia Dei, quæ mecum est: sicut & in alio loco loquitur: Fiduciam autem talem habemus per Iesum Christum ad Deum: non quia ex nobis ipsis sufficientes simus reputare aliquid, quasi ex nostro: sed sufficientia nostra ex Deo est, qui & nos dignos fecit ministros noui testamēti. Non enim iustificatur homo ex operibus legis, nisi per fidem Iesu Christi. unde infert: Et nos in Iesum Christum credidimus, ut iustificemur ex fide Christi, & non ex operibus legis: quia ex operibus legis non iustificabitur omnis caro. Si enim ex lege iustitia, ergo Christus sine causa mortuus est. In lege maledictio est: scriptum est enim: Maledictus omnis, qui non permanet in omnibus, quæ scripta sunt in libro legis, ut faciat ea: Christus nos redemit de maledictione legis, fa

*Psa. 93**1. Cor. 4**1. Cor. 8**1. Cor. 15**2. Cor. 3**Gal. 2**Gal. 3*

P P P 3 tus

- ctus pro nobis maledictio. Si enim data esset lex, quæ posset uiuificare; uere ex lege esset iustitia. Sed conclusit scriptura omnia sub peccato, ut repromissio per fidem Iesu Christi daretur credentibus. Lex ergo pædagogus noster
- Gal. 5** fuit in Christo, ut ex fide iustificemur. Vnde addit, & uno uersiculo omnia comprehendit, dicens: Euacuati estis a Christo: qui in lege iustificamini, a gratia excidistis. Hæc cuncta percurro, ut ostendam a nullo legem esse completam, & per legem mandata omnia, quæ continentur in lege. Deus est enim qui operatur in nobis & uelle, & perficere.
- Philip. 2**
Philip. 3 Laborat Apostolus, & iuxta iustitiam, quæ in lege est, sine querimonia cōuersatus, omnia pro Christo ducit quicquiliæ, ut inueniatur in Christo, non habens suam iustitiam, quæ ex lege, sed quæ ex fide Christi est a Deo. Vnde
- 2. Theff. 3** scribit ad Thessalonicenses: Fidelis autem est Dominus, qui seruabit uos, & custodiet a malo. Ergo non liberi arbitrii potestate, sed Dei clementia conseruamur. Ac, ne putet argumentationibus uanis, quæ mouent audientibus quæstiones, ueritatem posse fidei subuerti; idem Apostolus scribit ad Timotheum: O Timothee, depositum custodi, deuotans profanas uocum nouitates, & contradictiones falsi nominis scientiæ; quam quidam promittentes, circa fidem errauerunt. Bonitas enim, & misericordia saluatoris nostri, non ex operibus iustitiæ, quæ fecimus, sed secundum suam misericordiam saluos nos fecit, ut, iustificati illius gratia, heredes simus secundum spem uitæ æternæ.
- Tit. 3** Hæc breuiter quasi ex latissimo atque pulcherrimo apostolicæ doctrinæ prato carpsimus, ut duræ frontis impudentia conteratur. transeamus ad euangelia, & apostolicos igniculos clarissima Christi lampade compleamus: Omnis, ait, qui irascitur fratri suo sine causa, reus erit iudicio? qui autem dixerit raka, quod interpretatur uanus, & absque cerebro, reus erit concilio: haud dubium, quin sanctorum & angelici senatus. Qui autem dixerit, fatue, reus erit gehennæ ignis. Quis nostrum potest huic uitio non subiacere;
- Matth. 12** cum etiam pro otioso uerbo reddituri simus rationem in die iudicii?

iudicii? Si ira, & sermonis iniuria, atque interdum iocus, iudicio, concilioque, & gehennæ ignibus delegatur: quid merebitur turpium rerum appetitio, & auaritia, quæ radix est omnium malorum? Si, inquit, offers donum tuum ad altare; & ibi fueris recordatus, quia frater tuus habet aliquid aduersus te: dimitte ibi donum tuum ante altare, & uade primum, reconciliare fratri tuo, & tunc ueniens offeres munus tuum. Meæ est potestatis, ut non habeam aliquid contra fratrem meum: ut autem ille aduersus me habeat, aut non habeat, in illius uoluntate consistit. Quid ergo faciã, si ille reconciliari noluerit? obsecrem? flectam genua? sed audire contemnet. An obtorto collo nolentem in ius amicitie traham? ecquæ est maior inimicitia, quam amicitias necessitate sociare? neque enim dixit: roga eum, ut tibi concilietur: sed reconciliare primum fratri tuo: & sic offeres munus tuum ad altare. nõ quod impossibilia Deus præceperit: sed tantum patientiæ culmen ascendit, ut prope impossibilia pro difficultate nimia præcepisse uideatur, ad destruendam sententiam tuam, qua scribis facilia esse Dei mandata. Scandalizantem manum, oculum, & pedem iubemur abscindere. Estlo, per tropologiam dictum sit, pro amicissimis, & pro consanguineis, & fraterno nobis & coniugali amore sociatis: facile ne arbitramur, ob quasdam offensas tantam subito abscindere caritatem? Quodq. dicitur: Sit sermo uester, est est, non non; quod autem amplius est, a malo est: forsitan de uestra schola reperiatur, qui numquam mentitus sit, nec audierit illud propheticum & apostolicum: Ego dixi in excessu mentis meæ, omnis homo mendax: & nesciat scriptum in alio loco: Os, quod mentitur, occidit animam. Verberanti maxillam, alteram iubemur opponere. Tollenti tunicam, etiam pallium concedendum est. Angustianti se mille passibus duobus millibus colla præbenda sunt. Petenti te da; & uolentem a te accipere mutuum, ne auerferis. Si duos nummulos habuero, & alius poposcerit; aut dabo ipsi, & mihi mendicandum erit; aut, si non dederõ, transgressor legis inueniar. Illud autem, quod dicitur: Dilige

Matth. 5

Matth. 5

Psalm. 115

Sap. 1

Matth. 5

P p p 4

ligite inimicos uestros, benefacite iis, qui oderunt uos, & orate pro persequentibus & calumniantibus uos: forsitan in uestro cœtu inuenitur, apud nos rara auis est. Qui peccata simpliciter confitentur, merentur humilitate clementiam saluatoris. Quodq. sequitur: Cauete, ne iustitiam, hoc est eleemosynam uestram faciatis coram hominibus, ut uideamini ab eis: nescio quis possit implere. Ad largiendum frustum panis, & binos nummulos præco conducitur: & extendentes manum, huc illucq. circumspicimus: quæ si nullus uiderit, contractior fit. Esto, unus de mille inueniatur, qui ista non faciat. Responde, quælo, ubi sunt facilia mandata? Nolite, inquit, solliciti esse de crastino. crastinus enim dies sollicitus erit pro se. sufficit diei malitia sua. Vos de crastino non cogitatis, &, instar auium, presentibus contenti estis, quorum epistolæ biblinæ uolitant trans flumina Aethiopiæ: ut inter simias, & pauos, noua de 3. Reg. 9 Ophir Salomoni dona mittantur. Vis audire facilitatem Matth. 7 præceptorum Dei? ausculta quod dicitur: Quam arcta uia, & angusta est, quæ ducit ad uitam: & pauci sunt, qui inueniunt eam. Non dixit, qui gradiuntur per eam; hoc enim difficillimum est; sed qui inueniunt eam: pauci enim inueniunt, & multo pauciores ingrediuntur per eam. Filius, in Luc. 9 quit, hominis non habet ubi caput suum reclinet, qui dicit Esa. 23 in Esaia: Suscipite lassum, & hæc est requies mea. Si non habet ubi caput suum reclinet, & quo requiescat, dicens in Esa. 66 alio loco: Super quem requiescam, nisi super humilem, & quietum, & tremementem uerba mea: ubi est mandatorum Dei facilitas? Multi hoc, quod scriptum est: Non ueni uocare iustos, sed peccatores ad penitentiam: simpliciter accipiunt, iuxta illum sensum: Non indigent sani medico, sed li, qui male habent. Alii uero interpretantur coactius. Nō ueni uocare iustos; nullus enim ad perfectum iustus est, sed ex aliqua parte peccator; sed peccatores, quibus mundus Psal. 11 refertus est, dicente Dauid: Saluum me fac Domine, quoniam defecit sanctus & corrupti sunt, & abominabiles facti sunt in adinventionibus suis. Omnes declinauerunt, simul

simul inutiles facti sunt; non est, qui faciat bonum, non
 est usque ad unum. Nolite, inquit, possidere aurum, *Matth. 10*
 neque argentum, neque pecuniam in zonis uestris, non
 peram in uia, non panem, neque duas tunicas, neque cal-
 ciamenta, neque uirgam. Hæc, inquires, præcepta apo-
 stolica sunt. Et certe Petrus apostolus caligas habuisse nar-
 ratur, dicente ad eum angelo: Præcingere, & calciare cali- *Act. 12*
 git tuis. Duas autem tunicas, ut de ceteris taceam, puto
 quod & ego, & tu possideamus: si tamen amplius non ha-
 bemus. Hæc dico: & iterum iterumq. ac per singula inge-
 ram, ut erubescas ad sententiam tuam, facilia esse Dei mæ-
 data. Fratrem tradet frater in mortem, & pater filium: cō *Mar. 13*
 surgentq. filii contra parentes, & interficient eos: & eri- *Luc. 21*
 tis, inquit, odio cunctis hominibus propter nomen me-
 um. Et quia facilia iusserat, & sciebat facile ea posse com-
 ppleri; propterea, ut rei facilitatem ostenderet, copulauit di-
 cens: Qui perseverauerit usque in finem, hic saluus erit. *Matth. 10*
 Non ueni, inquit, pacem mittere super terram, sed gla- *Mar. 10*
 dium. Veni diuidere hominem contra patrem suum, & fi- *Matth. 10*
 liam contra matrem, & nurū contra socrum. Et, ne omnia
 percurrendo longiorem sententiam faceret, uno cuncta ser-
 mone comprehendit, dicens: Inimici hominis, domestici
 eius. Cumq. posuisset: Qui amat patrem, aut matrē supra
 me, non est me dignus: & qui amat filium, aut filiam su-
 pra me, non est me dignus: ob facilitatem præceptorum in-
 tulit: Et qui non tollit crucem suam, & sequitur me, non
 est me dignus. Crux Christi facilis est? nudum post Christū
 ire, ludus est, iocus est? Et ubi præmia, quæ, difficultate
 superata, quærentur? Non colliguntur zizania in præsen- *Matth. 13*
 ti sæculo, ne & frumentum pariter eradicetur. Palea domi-
 nica futuro iudicio reſeruatur; quando iusti fulgebunt quasi
 sol; & egredientur angeli, & separabunt malos de medio *Matth. 26*
 iustorum. Petrus mergitur, & meretur audire: Modicæ fi-
 dei, quare dubitasti? Si in illo modica fides; in quo magna
 sit, nescio. De corde, inquit, egrediuntur cogitationes pes- *Matth. 15*
 simæ, homicidia, adulteria, fornicationes, furta, falsa tes-
 timo-

- stimonia, blasphemix. Hæc sunt, quæ coinquinant homines. Procedat, qui in corde suo, hæc non esse, testetur: & plenam in corpore isto mortali iustitiam confitebor. *Matth. 16* Qui uult, inquit, saluare animam suam, perdet eam; & qui perdiderit animam suam propter me, saluam faciet eam. *Matth. 18* Iterum dico: Hæc sunt facilia mandata. Væ mundo a scandalis. necesse est enim, ut ueniât scandala. Et propterea in alio loco scriptum est: In multis offendimus, siue erramus omnes. Non pauca peccata, sed multa, nec quorundam, sed omnium posuit: Omnes enim, quæ sua sunt, quærun-
Philip. 2 runt, & non ea, quæ Dei sunt. Vnus bonus Deus dicitur: *Matth. 19* & magistri, quasi hominis, bonitas refutatur. In lege doctissimus omnia fecisse se dicit: quamobrem & amatur a Domino, & tamen plenam iustitiam non habet: quia noluit sub-
Marc. 10 stantiam suam pauperibus erogare. Vnde difficultas difficultati, immo impossibile impossibili tunc comparatur: quia nec camelus ingredi potest per foramen acus, *Matth. 23* nec diuites peruenire in regna cælorum. Quis nostrum non lauat exteriora calicis & paropsidis, & interiora habet nequaquam sordibus inquinata? Quis sepulcrorum extrinsecus dealbatorum potest similitudinem declinare: ne & nobis dicat Iesus: Deforis quidem uidemini hominibus iusti, intus autem pleni estis hypocrisis & iniquitate? Quamuis & aliis uitis carere possimus: hypocrisis eos maculam non habere, aut paucorum est, aut nullorū. *Matth. 26* Pater, inquit, si possibile est, transeat calix iste a me: uerumtamen non sicut ego uolo, sed sicut tu. Filius Dei, qui dixit, & facta sunt, mandauit, & creata sunt omnia, secundum hoc, quod filius hominis dicitur, sententiam temperat: Pater, si possibile est: uerumtamen non sicut ego uolo, sed sicut tu: & Critobulus meus, adducto supercilio, loquitur: Potest homo sine peccato esse, si uelit. Apostoli audiunt: Sic non potuistis una hora uigilare mecum? Non dixit, nolulistis, sed non potuistis. Apostoli una hora uigilare non possunt, somno, mæore, & carnis fragilitate superati: & tu potes longo tempore omnia simul peccata superare? Marcus euangelista scribit
Marc. 6 de

de Domino
 nem. nisi
 eos, & ad
 ut dicitur
 ut uirtute
 potestis om
 tur: Abi
 minem
 capere
 re: ut in
 Quis cas
 eis uirtute
 quid in car
 qui roci car
 mus, conti
 nemus
 ala. uirtu
 uid loqui
 loquitur
 no uirtute
 it: & no
 tis Deo
 tis sunt
 res hære
 apostoli
 & orab
 diam ap
 apud h
 homo
 sibile
 tempe
 time
 peti
 eis Ies
 eorum
 det un

de Domino : Et non poterat ibi ne unam quidem facere uirtutem, nisi paucis ægrotantibus manus imponens sanauit eos, & admirabatur propter incredulitatem eorum. Dominus dicitur non potuisse in Nazareth ne unam quidem facere uirtutem, & infidelitatis alienæ stupore retinetur : & uos potestis omne, quod uultis ? Denique in consequentibus scribitur : Abiit in fines Tyri, & Sidonis, & ingressus domum neminem uolebat scire : & latere non potuit. Vere utique cupiebat latere : & quod cupiebat, quare facere non poterat ? ut in aduentu suo omnium conscientiam declinaret ? Quæris causas, cur latere non potuerit ? cogita assumpti hominis ueritatem, & omni carebis scandalo. Si filius Dei aliquid in carne & propter carnem non potuisse narratur : nos, qui toti carnei sumus, & quotidie spiritus operibus repugnamus, contra Apostoli sententiam, quæ uolumus, cuncta faciemus ? Petrus apostolus tria uult facere in monte tabernacula, unum Domino, alterum Moyfi, tertium Eliæ, nesciens quid loquitur timore perterritus : & nos Pythagoricæ philosophiæ ructamus superbiam ? De die & hora consummationis ultimæ, & angelos cælorum, & filium ignorare respondit : & nos plenam scientiam pollicemur ? Carnis infirmitas Deo habitatore gaudebat, & tamen mensuram fragilitatis suæ excedere non potuit, ut non, τῷ δοκεῖν, iuxta ueteres hæreticos, sed uere Dei filius, hominis filius crederetur, apostolos parumper relinquens, cecidit in terram pronus, & orabat dicens : Pater, si possibile est. Cur, quæso, sententiam ambigenter exprimebat, qui in alio loco dixerat : Quæ apud homines impossibilia, apud Deum possibilia sunt ? Sed homo passurus, hominis loquitur uerbis. Ille dicit : si possibile est, una hora prætereat. Tu dicis, possibile est omni tempore peccata uitare. In quibusdam exemplaribus, & maxime in Græcis codicibus, iuxta Marcum in fine eius euangelii scribitur : Postea, cum accubuissent undecim, apparuit eis Iesus ; & exprobrauit incredulitatem, & duritiam cordis eorum, quia iis, qui uiderant eum resurgentem, non crediderunt : & illi satisfaciebant dicentes : Sæculum istud, iniquitatis,

Marc. 7

Rom. 7

Marc. 9

Marc. 13

Marc. 14

Marc. 16

Marc. 16

- tatis & incredulitatis substantia est : quæ non finit per immūdos spiritus ueram Dei apprehendi uirtutem : ideo iam
- 1. Ioan. 5** nunc reuela iustitiam tuam . Cui si contradicitis , illud certe renuere non audebitis : Mundus in maligno positus est : &
- Luc. 4** quod Dominum suum satanas tentare ausus sit , & uictus , atque confusus recesserit , usque ad tempus utique passionis . Ille tentatur , & successor Iouiniani , audet loqui : eos , qui plena fide baptisma consecuti sunt , non posse tentari : immo aliis uerbis , posse hominem baptizatum , si uoluerit , nequa
- Luc. 1** quā ultra peccare . Zacharias iustus audit ab angelo : Quia non credidisti uerbis meis , eris tacens , & non poteris loqui ,
- Marc. 9** usque in diem natiuitatis eius . Pater lunatici de apostolis loquitur : Rogauī discipulos tuos , ut euicerent eum , idest dæmonem , & non potuerunt . Et ipsi discipuli interrogant saluatorem : Quare non potuimus eiicere illum ? Et audiunt ,
- Matth. 17** Propter incredulitatem uestram . Cur , quæso ? Quia , omnia
- Luc. 9** posse , Domino seruabatur . Intrauit cogitatio in apostolos , quis eorum maior esset ; & emendantur doctrina saluatoris ; dum minimus maior agnoscitur , & humilitas sublimitate mutatur . Nō recipitur ab urbe Samaritanorum , quia facies eius erat euntis Hierusalem . Iacobus , & Ioannes , uere filii tonitruī , & zeli ardore feruentes , Phinees & Elie ignem de cælo deducere cupiunt , & corripuntur a Domino : qui utique non corripētur , si absque errore talia uoluissent . Ibant cum illo populi , hoc est cum Domino , qui conuersus dixit .
- Luc. 14** Si quis uenit ad me , & non odit patrem suum , & matrem suam , & uxorem , & filios , & fratres , & sorores , insuper & animam suam , non potest meus esse discipulus . Et , qui nō portat crucem suam , & sequitur me , non potest meus esse discipulus . Et in hoc loco temerarius proclamabo : Potest homo , si uelit , omnia peccata uitare : facilia enim sunt mandata eius : Qui merentur audire a Domino saluatore : Vos ellis , qui iustos uos esse dicitis coram hominibus : Deus autem nouit corda uestra : quia , quod apud homines excelsum est , abominabile est coram Deo . Impossibile est , inquit , ut
- Luc. 17** scandala non ueniant . Puto , quod peccatum scandalum sit , quod

quod per scandalum uenit . nisi fallor enim , *σκάλον & σκάνδαλον* apud Græcos ex offensione & ruina nomen accepit .
 Propterea in multis offendimus omnes . Fac ut non corrue- *Iacob. 3*
 rim : certe offendi , & non in uno , sed in pluribus . Arbitror ,
 quod , in aliquo offendisse , peccatum sit . Dixerunt Domino
 apostoli : Auge nobis fidem . Qui respondit eis : Si habueri- *Luc. 17*
 tis fidem , quasi granum sinapis . quod utique minimum est
 omnium seminum : & Critobulus meus fidei nobis monti-
 bus intumescit . Dicebat autem , inquit , & parabolam illis ,
 quod semper oportet orare , & numquam deficere . Frustra *Luc. 18*
 semper oramus , si in nostro arbitrio est facere , quod uolu-
 mus . Dixerunt apostoli : Equis potest saluus esse ? Audiūt
 a Domino : Quæ impossibilia sunt apud homines , possibi-
 lia apud Deum sunt . Ergo aliqua , quæ apud homines im-
 possibilia sunt , certe ea esse possibilia , ex eo ostenditur , quod
 apud Deum possibilia sunt . Sit ergo & apud Deum possibi-
 le , homini , si uelit , donare impeccantiam ; non ipsius meri-
 to , sed sua clementia : & apud homines nequaquam possibi-
 le , liberi arbitrii potestate , quod nutu donantis accipitur .
 Non suffecerat apostolis , dudum super dignitate quæsisse ,
 quis eorum maior esset : sed in ipso necessitatis & passionis
 articulo scribitur de eis : Facta est contentio inter illos , quis
 illorum maior esset . Optimum reuera tempus , instante cru- *Luc. 22*
 ce de dignitate contendere . Simon , inquit , Simon , ecce sa-
 tanas expetiuit uos , ut cribraret sicut triticum : Ego autem
 rogavi pro te , ut non deficiat fides tua . Et certe , iuxta uos , in
 apostoli erat positum potestate , si uoluisset , ut non defice-
 ret fides eius : qua utique deficiente , peccatum subingredi-
 tur : In quibusdam exemplaribus tam Græcis , quam Lati-
 nis inuenitur , scribente Luca : Apparuit illi angelus de cælo
 confortans eum : haud dubium , quin Dominum saluato-
 rem . Ec factus in agonia prolixius orabat ; factusq. est sudor
 eius sicut guttæ sanguinis decurrentis in terram . Saluator in
 passione ab angelo confortatur : & Critobulus meus non in-
 diget auxilio Dei , habens liberi arbitrii potestatem . & tam
 uehementer orabat , ut guttæ sanguinis prorumperent ex par-
 te .

- te, quem totum erat in passione fusurus. Quid, inquit, dormitis? surgite, & orate, ne intretis in tentationem. Debuit iuxta uos dicere: Quid dormitis? surgite, & resistite: liberum enim habetis arbitrium; &, semel uobis concessa a Domino potestate, nullius alterius indigetis auxilio. si enim
- Ioan. 5** hoc feceritis, non intrabitis in tentationem. Non possum, ait, ego facere a memet ipso aliquid; sed, sicut audio, ita iudico. Ariani obiciunt calumniam: sed respondet Ecclesia, ex persona hominis hæc dici, qui assumptus est. Tu ecōtrario loqueris: possum sine peccato esse, si uoluero. ille nihil potest ex se facere, ut hominis indicet ueritatem. Tu potes omnia peccata uitare, ut, adhuc in corpore constitutus, *ἀν-*
- Ioan. 7** *τὸ θεὸν* esse te doceas. Negat fratribus & propinquis ire se ad scenopegiam. Et postea scriptum est: Ut autem ascenderunt fratres eius, tunc & ipse ascendit ad sollemnitatem, non manifeste, sed quasi in abscondito. Iturum se negauit, & fecit quod prius negauerat. Latrat Porphyrius: inconstitix ac mutationis accusat, nesciens omnia scandala ad carnē esse referenda. Moyse, inquit, dedit uobis legem: & nemo ex uobis facit legem, utique possibilem: & tamen, quod erat possibile, nemo impleuerat; neque enim culpa imperantis est, sed fragilitas audientis, ut omnis mundus subditus fiat Deo.
- Ioan. 8** In euangelio secundum Ioannem, in multis & Græcis & Latinis codicibus inuenitur de adultera muliere, quæ accusata est apud Dominum. Accusabant autem, & uehementer urgebant scribæ, & pharisæi, iuxta legem eam lapidare cupientes. At Iesus inclinans se, digito scribebat in terra, eorum uidelicet qui accusabant, & omnium peccata mortalium, secundum quod scriptum est in propheta: Relinquentes autem te, in terra scribentur. Tandem caput eleuans dixit eis: Qui sine peccato est uestrum, primus mittat super eam lapidem. Hoc, quod dicitur, sine peccato, Græce scriptum est, *ἀναμάρτητος*. Qui ergo dicit, aliud esse sine peccato, & aliud *ἀναμάρτητος*; aut Græcum sermonem nouo uerbo exprimat; aut, si expressum est a Latinis, ut interpretationis ueritas habet, perspicuum est, *ἀναμάρτητος*

τῆς τοῦ nihil aliud esse, nisi, sine peccato. Et quia accusato-
 res omnes fugiunt, (dederat enim uerecundiae eorum cle-
 mentissimus iudex spatium recedendi) rursumq. in terra scri-
 bens, terramq. despiciens: paulatim discedere, & oculos il-
 lius declinare coeperunt: solusq. remansit cum muliere, cui
 locutus est Iesus: Vbi sunt, qui te accusabant? nemo te con-
 demnauit? Quæ ait: Nullus, Domine. Respondit ei Iesus:
 Nec ego te condemnabo. Vade, & amodo noli peccare.
 Præcepit Dominus, ne ulterius peccaret: sicuti & alia simi-
 liter in lege mandauit. Sed utrum ea fecerit, nec ne, scriptu-
 ra non dicit: Omnes, inquit, qui uenerunt ante me, fures Ioan. 10
 fuerunt, & latrones. Si omnes, nullus excipitur. Qui uene-
 runt, inquit, non qui missi sunt, de quibus propheta ait:
 Ipsi ueniebant a se, & ego non mittebam eos. Quo uerbo Hier. 23
 solius Christi potentia reseruatur, qui ad sua uenerat: & sui
 eum non receperunt. Dum essem, inquit in, mundo cum Ioan. 17
 eis; ego seruabam eos in nomine tuo: quos dedisti mihi, cu-
 stodiui, & nullus ex eis periit, nisi unus filius perditionis.
 Non dixit: dedi eis liberi arbitrii potestatem, ut ipsi se suo la-
 bore saluarent: sed, Ego custodiui eos, ego seruau. Deni-
 que infert: Non peto, ut eos auferas de mundo, sed ut custo-
 dias illos a malo. In Actibus apostolorum scriptum est; in-
 ter Paulum & Barnabam, propter Ioannem, qui cognomi-
 natus est Marcus, ortam dissensionem, ita ut separarentur,
 & Barnabas Marcum, & Paulus Sylam assumeret in euange-
 llii ministerium. Paulus seuerior, ille clementior, uterque in
 suo sensu abundat. et tamen dissensio habet aliquid huma-
 næ fragilitatis. In eodẽ uolumine legitur: Transierunt Phry-
 giam & Galatiam regionem, prohibiti a Spiritu sancto loqui Act. 16
 uerbum in Asia: quo maledicto, in ipsa prouincia puto us-
 que hodie hæreticos, qui contra Spiritum sanctum faciunt,
 plurimos reperiri. Cumq. uenissent, ait, in Mysiam, tenta-
 bant ire in Bithyniam, sed non dimisit eos spiritus Iesu. No Ioan. 15
 ra, quod spiritus Iesu, Spiritus sanctus sit, qui in alio loco,
 propter unitatem substantiæ, patris spiritus appellatur. Vo-
 lunt loqui in Asia, & prohibentur a Spiritu sancto. tentat ire
 in

- in Bithyniam, & non eos permittit spiritus Iesu. satis im-
 portune, si eis faciendi, uel non faciendi semel dederat libe-
 ri arbitrii potestatem. Sequitur: Tempora, inquit, ignoran-
 tia respiciens Deus, nunc praecepit hominibus, ubique prae-
 nitentiam agere. Significanter praeterita in lege tempora,
 Rom. 15 tempora ignorantiae demonstauit. Rursum ait: Veniam ad
 uos Deo uolente. Cur interposuit uoluntatem Dei, si habe-
 bat sui arbitrii potestatem? Iacobus apostolus, Si quis, ait,
 seruauerit totam legem, offenderit autem in uno; reus est
 Iacob. 2 omnium factus. Quis nostrorum in nullo aliquando pecca-
 uit? Si autem peccauit, quod negari non potest; & per unum
 peccatum, omnium est reus peccatorum; non suis uiribus,
 sed Dei misericordia saluatur. Si quis in uerbo non peccauit,
 Iacob. 3 hic perfectus est uir. Si aliquando in sermone peccasti, ubi
 est apud te praesumpta perfectio? maxime cum sequatur:
 Linguam autem hominum nullus potest domare, inconti-
 nens malum, plena ueneni mortiferi. Rogo te, ut mihi re-
 spondeas: si lingua incontinens est malum, & plena ueneni
 mortiferi; & nullus potest domare linguam mortalium; & tan-
 ti criminis reus es: ubi in perpetuum peccatorum fuga? unde
 bella, & unde rixae inter uos? nonne, ex uoluptatibus,
 quae militant in membris uestris? Aut membra non habetis
 humana: aut, si homo non potest esse sine membris, confi-
 temini, uoluptatem, atque luxuriam in uestris artibus mili-
 tare. Dauid, qui dixerat confidenter: Proba me Domine,
 Psal. 25 & tentame: ure renes meos, & cor meum: quia ante oculos
 meos misericordia tua est, & complacui in ueritate tua.
 Et iterum: Ego autem in innocentia mea ingressus sum, &
 pes meus stetit in directo: quamquam iudicii ueritatem Dei
 misericordia mitigaret, tamen, quia hoc ausus est dicere, re-
 linquitur parumper fragilitati suae, & ut uos dicitis, arbitrii
 libertati: & per adulterium lapsus in homicidium, postea lo-
 quitur: Misere mei Deus secundum magnam misericor-
 diam tuam: Et, secundum multitudinem miserationum tua-
 rum, dele iniquitatem meam. Nec hoc dico, quod uirum
 3. Reg. 14 sanctum acculem, de quo scriptum est: quo fecerit omnes
 uolun-

uoluntates Dei: sed quod multis aliis bonis hæc uitia compen-
 sarit, & saluatus sit misericordia Dei, cuius iudicium est
 in ponderibus, & ad quem Asaph loquitur: Cibabis nos pa-
 ne lacrymarum, & potum dabis nobis in lacrymis in mensu-
 ra. Neque enim iniustus est Dominus: ut tantū peccata con-
 demnet, & bonorū operum nō meminerit. Vnde & in alio
 loco idem Dauid canit: Ego dixi in abūdantia mea, non mo-
 uebor in æternum: Domine in uoluntate tua præstitisti de-
 cori meo uirtutem: Auertisti faciem tuam a me: & factus
 sum conturbatus. Dixi enim, pronuntiabo contra me iniusti-
 tiam meam Domino, & tu remisisti impietatem peccati mei.
 Iustoq. præcipitur: Reuela ad Dominum uiam tuam, & spe-
 ra in eum, & ipse faciet. Et educet quasi lumen iustitiam tuā,
 & iudicium tuum tamquam meridiem. Salus enim iustorū
 a Domino, quia non est sanatio in carne eorum a facie iræ
 eius. Et quotidie, iuxta Apostolum qui dixerat: Non enim
 habitat in carne mea bonum: ingemiscunt dicentes: Renes
 mei impleti sunt illusionibus, & non est fanitas in carne mea.
 Breues enim posuit dies nostros, & substantia nostra quasi ni-
 hilum in conspectu eius. Vniuersa uanitas omnis homo ui-
 uens, uel uiuens in corpore, uel uiuens in uirtutibus: & ta-
 men omnia uanitas. incerto enim statu fluctuat, & dum nō
 timet, in sereno patitur tempestatem. Cum enim esset in
 honore, non intellexit: comparatus est iumentis insipienti-
 bus, & similis factus est illis. Pro nihilo, inquit, saluos faciet
 eos: haud dubium quin iustos, qui non proprio merito, sed
 Dei saluantur clementia. Et delicta mea a te non sunt absco-
 dita. Hoc ex persona Christi dicitur. Si ille, qui peccatum
 non fecit, nec dolus inuenus est in ore eius, pro nobis do-
 luit, & peccata nostra portauit: quanto magis nos debemus
 nostra uitia confiteri? Renuit, inquit, consolari anima mea:
 considerans delicta, quæ feceram, recordatus sum Dei, & læ-
 tatus sum, cogitans me illius clementia conseruandū. Nocte
 cū corde meo meditabar, & scopebam spiritum meum. Et
 dixi, nunc cœpi, hæc est mutatio dexteræ excelsi. Iusti uox
 est, qui, post meditationem somnii, & cōscientiæ cruces, ad

Psal. 79

Psal. 29

Psal. 31

Psal. 36

Psal. 26.37

Rom. 7

Psal. 37

Psal. 37

Psal. 48

Psal. 55

Psal. 68

1. Pet. 2

Psal. 76

Qq9 extre-

- extremum ait : Nunc coepi uel pœnitentiam agere, uel sciētiæ limen intrare : & hæc ipsa de bonis ad meliora mutatio, non mearum uirium, sed dexteræ & potentia Dei est . In
- Psal. 88** æternum misericordia ædificabitur . Nullum enim tempus est , quo non ædificetur misericordia in singulis quibusque sanctorum , & iis , qui de peccatis transeunt ad uirtutes .
- Psal. 90** A sagitta uolante per diem , a negotio perambulante in tenebris , quis nostrum poterit liberari ? Ecce enim peccatores intenderunt arcum, ut sagittent in obscuro rectos corde .
- Psal. 10** nolunt prauos uulnerare, sed rectos corde . Sagitta per diem uolitat, per hæreticos in sanctarum intelligentia scripturarum . Negotium in tenebris & nocte perambulat , per philosophos, qui per obscuritatem sermonum inuoluere cupiunt ueritatem . Plantati in domo Domini , in atriis Dei nostri floreunt . Plantati in domo Domini , iusti sunt , in Ecclesia confirmati . Sed hi non in præsentiæ , sed in futuro in atriis Domini floreunt , ubi est certa & segura possessio .
- Psal. 102** Misericors & miserator Dominus , longanimis & multæ miserationis . Suauis Dominus omnibus , & misericordia eius super omnia opera illius . Tantas audis misericordias , & in tua audes uirtute confidere ? Confiteantur tibi , Domine , omnia opera tua . Si de cunctis operibus Dei & homines sunt, ergo omnes homines sua peccata cōfiteantur .
- 3. Reg. 7** Legimus in Samuele dictum de Salomone : Ipse ædificabit domum nomini meo , & firmabo regnum eius usque in sempiternum . Ego ero ei in patrem , & ipse erit mihi in filium . Et iterum : Si inique egerit , corripiam eum in uirga hominum , misericordiā autem meam non auferam ab eo . Cum egisset Dauid gratias Deo , ad extremum intulit : Et hæc est lex hominis : Domine Deus , semper respice ad clementiam meam , & infirmitatem carnis diuino auxilio sustentata .
- 3. Reg. 16** Quid mihi, inquit, & uobis filii Saruizæ ? Maledicat Semei . Dominus præcepit ei, ut maledicat Dauid : Et quis respondebit ei, quare hoc fecisti ? Voluntas enim Dei non discutienda , sed cum gratiarū actione patienda est . Et in alio loco : Dominus mandauit , ut dissiparet consilium Achitophel

phel bonum, ut adduceret super Absalon malum: cuius cer-
 te consilium erat, quasi consilium Dei. Et qua ratione po-
 testas liberi arbitrii, maiore potestate subuersa est? Hiero-
 boam, qui peccare fecit Israel, arguitur quare reliquerit præ-
 ceptum Domini, diciturq. ad eum: Dedi tibi regnum do-
 mus Dauid, & non fuisti sicut seruus mues Dauid, qui custo-
 diuit mandata mea, & ambulauit post me in toto corde
 suo, & fecit placitum in conspectu meo. Ergo & possibilia
 sunt Dei mandata, quæ Dauid fecisse cognoscimus, & ta-
 men lassescere sanctos ad perpetuitatem iustitiæ. In multis
 regibus legimus de stirpe Dauid, quod non suo merito, sed
 Dauid patris uirtutibus conseruati sint; qui fecerit placitum
 in conspectu Dei: Et uenitur ad Asa regem Iuda: de quo
 scriptum est: Fecit Asa rectum in conspectu Domini, sicut
 Dauid pater eius. Cumq. in multis laudibus eius immorata
 esset historia, ad extremum intulit: Sed excelsa non abstulit.
 attamen cor eius perfectum erat cum Deo, omnibus die-
 bus uitæ suæ. Ecce & iustus dicitur, quippe cuius cor per-
 fectum erat cum Deo: & tamen in hoc errauit, quod excel-
 sa non abstulit: quæ Ezechiam, & Iosiam legimus abstulif-
 se. Elias, in cuius spiritu & uirtute uenit Ioannes Baptista,
 ad cuius imprecationem uenit ignis de cælo, & Iordanis flu-
 entia diuisa sunt, timuit Iezabel, & fugit, lassusq. in solitu-
 dine sedit sub arbore; & pressus angustia, mortem rogauit,
 dicens: Sufficit mihi Domine, tolle animam meam: neque
 enim melior sum patribus meis. Hunc iustum negare quis
 potest? Et tamen, non dicam mulierem, sed hominem for-
 midare, de animi perturbatione descendit, quæ uitio care-
 re non potest, dicente Dauid: Dominus auxiliator meus,
 non timebo quid faciat mihi homo. De Iosaphat rege Iuda
 scriptum est: Et fuit Dominus cum Iosaphat, qui ambulauit
 in uis Dauid patris sui prioribus. Ex quo intelligitur, pri-
 mas eum Dauid habuisse iustitias, & nouissima non habuisse
 peccata. Nō sperauit, ait, in Baalim, sed in Deo patris sui,
 & ambulauit in præceptis illius, & non iuxta peccata Israel.
 Confirmauitq. Dominus regnum in manu eius, & dedit

2. Reg. 17

3. Reg. 14

3. Reg. 11. 15

3. Reg. 15

Luc. 1

3. Reg. 18

4. Reg. 1. 2

3. Reg. 19

Psal. 117

2. Par. 17

Qq 2 omnis

- omnis Iuda munera Iosaphat, factæq. sunt ei infinitæ pecu-
2. Par. 18 niæ, atque diuitiæ, & multa gloria. Cumq. sumpisset cor
 eius audaciam propter uias Domini, etiam excelsa & lucos
2. Par. 19 de Iuda abstulit. Hic Achab regi impiissimo affinitate con-
 iunctus est. Cumq. post prælium reuerteretur Hierusalem,
 occurrit ei Hieu, filius Anani, uidens, & ait ad eum: Impio
 præbes auxilium, & iis, qui oderunt Dominum, amicitia
 iungeris: et iccirco iram Domini quidem merebaris, sed
 bona opera inuenta sunt in te, eo quod abstuleris lucos de
 terra Iuda, & præparaueris cor tuum, ut requireres Domi-
 num. Ac ne putenius, præteritis iustitias hoc peccato &
2. Par. 22 increpatione prophetica fuisse deletas; postea de Ochozia
 stirpe eius scriptum est, quod inuenerit eum Hieu latentem
 in samaria, adductumq. occiderit: Et sepelierunt, inquit,
 eum, eo quod esset filius Iosaphat, qui quæsierat Dominum
2. Par. 29 in toto corde suo. De Ezechia scriptum est: Fecit rectum in
 oculis Domini, iuxta omnia, quæ fecerat Dauid, pater eius.
 Iste abstulit excelsa, & contriuit statuas, & incendit lucum,
 contriuitq. serpentem æneum, quem fecerat Moyses. Et
 iterum in domino Deo Israel confisus est: & post ipsum nō
 fuit similis ei in cunctis regibus Iuda, qui fuerunt ante eum.
 Adhæsit Domino, & non recessit ab eo, & custodiuit man-
 data eius, quæ præcepit Dominus Moysi: & erat Domi-
 nus cum eo, & in omnibus, in quibus incedebat, sapien-
2. Par. 32 ter agebat. Cumq. rex Assyriorum Sennacherib cepisset
 uniuerfas urbes Iudæ, misit ad eum Ezechias in Lachis di-
 cens: Peccaui, recede a me: quodcumque iusseris, dabo.
 Imposuitq. rex Assyriorum Ezechie trecenta talenta argen-
 ti, & triginta talenta auri: & dedit Ezechias omnem pecu-
 niam, quæ inuenta est in domo Domini, & in thesauris do-
 mus regis. In tempore illo concidit ualuas templi Domi-
 ni, & clypeos, quos deaurauerat; & omnia dedit regi Assy-
 riorum. Cumq. de eo tanta dicantur, non timuit, necessi-
 tate cogente, quæ Domino consecratur, regi offerre Assy-
Esa. 27 rio: diciturq. ad eum: Ego custodiam ciuitatem hanc pro-
4. Reg. 19 pter me, & propter Dauid seruum meum, non propter te,
 quia

quia superiora fecisti; quando cētum octogintaquinque milia exercitus Assyriorum, angelo cādente, prostrata sunt. Illud quoque diligentius attendendum, quod scriptura cōmemorat: Aegrotauit Ezechias usque ad mortem; uenitq. *4. Reg. 20* ad eum Esaias, filius Amos, dicens: Præcipe domui tuæ, *Esa. 38* quia morieris tu. Qui conuertit faciem suam ad parietem, & orauit ad Dominum, dicens: Obsecro, Domine, memento quō modo ambulauerim in conspectu tuo, in ueritate, & corde perfecto, & bonum in oculis tuis fecerim. Fleuitq. Ezechias fletu magno. Certe iustus erat Ezechias, & corde perfecto. Iturus erat ad Dominum, plorare non debuit. Quæris rationem fletuum? Si cogitaueris hominem, non miraberis causas doloris. Nullus enim intrepidus uadit ad iudicium Domini, habens conscientiam peccatorum. Cumq. fleuisset, factus est sermo Domini ad Esaiam prophetam, dicens: Reuertere, & dic Ezechia duci meo: Dux Dei appellatur, cui mors fuerat nūciata, quia humilitate prostratus est: Hæc, inquit, dicit dominus Deus David, patris tui: Audiui orationem tuā, & uidi lacrymas tuas. Additur ei tempus uitæ, & de Assyriorum manibus liberatur: & tamen signum postulat, ut credat uerum esse, quod Deus repromiserat: quod tamen paruæ fidelitatis indicium *4. Reg. 20* est. Misit quoque rex Babylonis nuncios & legatos, qui ei *Esa. 39* congratularentur ob restitutā corporis sanitatem: qui ostendit eis omnes thesauros aromatum, auri quoque & argenti, & uasorum supellectilem. Non fuit, inquit, res, quam non ostenderet eis Ezechias in domo sua, & in omni potestate sua. Ex quo intelligimus, etiam uasa templi Babylonis monstrata legatis. Vnde & ira Domini concitatur, & postea Esaiæ uaticinatione cognoscit: De filiis tuis eunuchi erunt, & omnia uasa templi transferentur in Babylonem. Ob quā causam etiam in libro Dierum scriptum est: Cecidit Ezechias elatione cordis sui. Certe Ezechiam iustum nemo, nisi impius, denegabit. Dicis: peccauit in quibusdā, & ideo iustus esse desiit. sed hoc scriptura non loquitur: non enim ex eo, quod parua peccauit, iustitiæ nomen ami-

Qq 3 sit;

fit; sed ex eo, quod multa bona fecit, iusti uocabulum possidet. Hoc totum dico; ut scripturarum sanctarum testimoniis comprobetur, non ex eo peccatores esse iustos, quod aliquando peccauerint, sed ex eo iustos permanere, quod multis uirtutibus florent. De Iosia scriptum est: Fecit rectum in conspectu Domini, & ambulauit in uia Dauid, patris sui. Non recessit neque ad dexteram, neque ad sinistram: & tamen, cum esset iustus, tempore necessitatis & angustiae mittit ad Oldam prophetissam, uxorem Sellum, filii Tecuæ, filii Aaras, custodis uestium. Et hæc, inquit, habitabat Hierusalem in secunda: haud dubium, quin urbis partem significet, quæ interiori muro uallabatur. Et illa respondit: Hæc dicit dominus Deus Israel, ite & dicite uiro, qui misit uos ad me. In quo occulta & regis, & sacerdotum, & omnium uirore reprehensio est, quod nullus uirore sanctus potuerit reperi, qui posset futura prædicere. Denique interficitur Iosias a Pharaone, rege Aegypti, eo quod noluerit audire uerba Domini ex ore Hieremias prophetæ: siue, ut in Paralipomenis scriptum est, Noluit Iosias reuertere, sed parauit contra eum bellum, nec acquieuit sermonibus Nechao ex ore Dei. Et infertur: Mortuusque est, & sepultus in Mausoleo patrum suorum: & uniuersus Israel Iuda & Hierusalem luxerunt eum, præcipueque Hieremias, cuius omnes cantatores atque cantatrices usque in præsentem diem lamentationes super Iosiam replicant, & quasi lex obtinuit in Israel: Ecce scriptum fertur in lamentationibus. Puto quod sermonibus Dei per quemlibet non acquieuisse peccatum sit. De ipso Hieremias loquitur: quamquã hoc plerique secundum anagogen intelligant de Domino saluatore: Spiritus faciei nostræ, Christus Dominus captus est pro peccatis nostris. Cui diximus, Sub umbra tua uiuemus in gentibus. Moyses, cui locutus est Dominus facie ad faciem, & salua facta est anima eius, ad aquas contradictionis offendit, nec meruit cum fratre Aaron terram repromissionis intrare. De quibus & psalmista canit: Absorpti sunt iuncti petrae iudices eorum, audient uerba mea, quoniam placue-

euerunt. Et est sensus. Iudices populi Iudæorum, Moyses
 & Aaron, deuorati sunt a peccato populi iuxta petram: de
 qua aquarum fluentia manarunt: & certe isti iusti fuerunt, &
 obedierunt sermonibus Dei: qui per se suauissimi sunt. De
 nique sequitur de cadaueribus in solitudine mortuorum:
 Quasi crassitudo terræ disrupti sunt super terram: Dispersa
 sunt ossa nostra secus infernū. In Osee loquitur Deus: De- *Osee 8*
 sponsabo te mihi in iustitia, & in iudicio. Statimq. subiun-
 git: Et misericordia, & miserationibus, & in fide: ut largito-
 ris præmio recognoscat, quod ipse sit Dominus. In eodem *Osee 12*
 scriptum est libro: Deus ego sum, & non homo, in me-
 dio tui sanctus, & nō ingrediar ciuitatem, uitiorum scilicet
 conciliabulum. Ipse solus hanc non ingreditur ciuitatem,
 quam ædificauit Cain in nomine filii sui Enoch, quæ omnia *Gen. 4*
 sacerdotum quotidie ora concelebrant, ὁ μόνος ἀναμάρτη-
 τος, quod in lingua nostra dicitur, qui solus est sine pecca-
 to. quæ laus, iuxta sententiam tuam, frustra Deo reputa-
 tur, si est communis cum ceteris. Nos enim iuxta Amos *Amos 5. 6*
 conuertimus iustitiam in absinthium, & fructus iudicii in
 amaritudinem. Loquuntur nautæ, atque uectores in libro
 Ionæ: Rogamus Domine, ne perdas nos propter homi- *Ion. 1*
 nem iustum, neque inducas super nos sanguinem innocen-
 tem. sicut enim placuit tibi, sic factum est Domino. Ne-
 sciunt causas, quid mereatur propheta, seruus fugitiuus; &
 tamen iustificat Deum, & sanguinem innocentem faten-
 tur, cuius opera non norunt. Et ad extremum: Sicut pla-
 cuit tibi Domine, sic factum est. Non quæruni iustitiam sen-
 tentiæ Dei, sed ueritate iusti iudicis confitentur. Micheas *Mich. 7*
 lacrymabili uoce testatur: Periit sanctus de terra, & rectus
 in hominibus non est: omnes in sanguine insidiatur: unus-
 quisque fratrem suum uenatur ad mortem. Malum manuū
 suarum dicunt bonum. Et iterum: Qui optimus inter eos
 est, quasi paliurus est: & qui rectus, quasi spina de sepe.
 Hæc hominum iustitia est, ut, iuxta uerba eiusdem prophæ-
 tæ, nec amico, nec coniugi, nec filiis sit credendum:
 quia inimici hominis domestici eius. Quam sententiā etiam *Matth. 10*

fermo Dominicus comprobauit. Vnde datur consilium per eundem prophetam: Indicabo tibi o homo quid sit bonū, & quid Dominus quærat a te: utique facere iudiciū, & diligere misericordiam, & sollicitum ambulare cum Deo tuo. Numquid dixit, habeto æqualitatem Dei; & non hoc, quod maximum est, sollicitum ambulare cum Deo tuo? Ut

numquam securus sis; ut omni obseruantia custodias cor tuum; ut consideres, quoniam in medio laqueorum ambules, & sub murorum pinnis ingrediaris; ut illud quotidie mediteris: Iuxta semitam scādalum posuerunt mihi. Super bis enim resistit Deus, humilibus autem dat gratiam. Qui

Iacob. 4 cautus, & timidus est; potest ad tēpus uitare peccata: qui securus est de iustitia sua, repugnat Deo; illiusq. auxilio destitutus, insidiis hostium patet. Computrescant, dicit Ha-

Habac. 3 bacuk, ossa mea, & subter me uermes scateant: tantum ut requiescam in die angustię, ut ascendam ad populum fortem meum. Hic tribulationes & angustias afflictionemq. animi deprecatur; ut in futuro, uiro- rum iam cum Christo regnantium numero societ- ur. Ex quo perspicuum est, hic pugnam atque certamen, & in futuro esse uictoriam. Iesus,

Zach. 3 filius Iosedech, quod interpretatur, iustus Domini, sacerdos magnus, indutus describitur uestibus sordidis: qui peccatum non fecit, & tamen nostra peccata portauit: ad cuius dextrā stabat satanas, ut aduersaretur ei. Diciturq. ad eum post pugnam atque uictoriam: Auferte uestem sordidam ab eo: & ecce abstuli a te iniquitatem tuam. Et heres Iouiniani loquitur: sine omni omnino peccato sum: sordida uestimenta non habeo: proprio regor arbitrio: maior apostolo sum. ille facit, quod non uult; &, quod uult, nō facit: ego facio, quod uolo; &, quod nolo, non facio: præparata sunt mihi regna cælorum; immo ipse ea mihi meis uirtutibus præparaui. in quo Adam tenetur obnoxius, & alii, qui reos se putant, in similitudinem præuaricationis Adæ: ego solus cum mea caterua non teneor. Alii clausi celulis, & feminas non uidentes, quia miseri sunt, & uerba mea non audiunt, torquentur desiderijs: ego, etiam si mulierum

lierum uallor agminibus, nullam habeo concupiscentiam.
 de me enim dictum est: Lapidēs sancti uoluuntur super ter- *Zach. 9*
 ram: & ideo non sentio, quia liberil arbitrii potestate Chri-
 sti trophæum circumfero. Audiamus per Eſaiam clamantē *Esa. 3*
 Deum: Populus meus, qui beatos uos dicunt, seducunt
 uos, & semitam pedum uestrorum supplantant. Quis ma-
 gis supplantat populum Dei, qui liberi arbitrii potestate
 subnixus despicit auxilium conditoris, & in sua uoluntate
 securus est? an qui ad singulas sententias præceptorum Do-
 mini iudicium pertimescit? Ad huiusmodi homines lo-
 quitur Deus: Væ uobis, qui sapientes estis apud uos, & in *Esa. 5*
 telligētes uestro iudicio. Eſaias, iuxta Hebraicum, plorat, *Esa. 6*
 & dicit: Væ mihi, quia tacui: quia immunda habens labia,
 & in medio populi immunda habentis labia habitans, uidi
 Dominum sabaoth oculis meis. Ille, uirtutū merito, Dei
 fruebatur aspectu; &, conscientia peccatorum, labia sua fa-
 tebatur immunda: non quod locutus esset aliquid, quod
 uoluntati Domini repugnaret: sed quod siluisset, uel timo-
 re, uel pudore perterritus, nec arguisset libertate propheti-
 ca populū delinquentē. Nos peccantes quādo corripimus
 qui adulamur diuitibus, & personas accipimus peccatorū,
 turpis lucri gratia? nisi forte tota eis loquimur confidentia,
 quorum opibus indigemus. Vt alia non agamus, ut absti-
 neamus nos ab omni specie peccatorum; certe, uerum ta-
 cuisse, peccatum est. Quamquam apud Septuaginta non
 fit scriptum, quia tacui, sed quia compunctus sum, consci-
 entia scilicet peccatorum: ut illud compleatur propheticū:
 Versatus sum in miseria, dum infigitur mihi spina. Ille pec- *Psal. 31*
 cati spina compungitur: tu uirtutum floribus uernas? Eru *Esa. 24*
 bescet, inquit, luna, & confundetur sol, quando uisitauerit
 Dominus super militiam cæli in excelsis: hoc est, quod in
 alio loco scriptum est: Astra quoque non sunt munda in cō *Iob 25*
 spectu eius, & aduersum angelos suos peruersum quid re- *Esa. 34*
 perit. Luna erubescit: sol confunditur: & cælū operitur ci-
 licio: & nos intrepidi, atque lætātes, quasi omni careamus
 uitio, occurremus iudicis maiestati, quando tabescent mon-
 tes,

tes, erecti uidelicet in superbiam, & omnis militia cælorum, uel astra, uel angelicæ dignitates; & complicabuntur sicut libri cæli; & omnis exercitus eorum instar foliorum defluet.

- Esa.* 34 Quoniam inebriatus est, inquit, in cælo gladius meus, & nunc super Idumæam descendet. Gladius Dei inebriatur in cælis, & tuum solium erit in sanctitate securum? In Idumæam descendet; quæ interpretatur, uel sanguinaria, uel terrena; ut prophetica auctoritate discamus, omnem terram indigere iudicio. Vnde sequitur: Victimam enim Domini Bosra, quæ interpretatur caro: & interfectio eius multa in terra Edom, id est,
- 1. Cor.* 15 in sanguine: iuxta quod ponit Apostolus: Caro & sanguis regnum Dei non possidebunt. Væ, qui contradicit ficto ri suo; uæ, qui dicit patri, ut quid me generasti? & matri, quare me peperisti? Hoc ad eos pertinet, qui dicunt: quare talis conditus sum, qui non possum in perpetuum carere peccato. Quare tale uas fictum, ut non quasi adamantium permanerem, sed ad omnem tactum fictile atque fragile. Omnes
- Esa.* 53 sicut oues errauimus, & omnium nostrum Dominus peccata portauit. Intuitus est enim, & diligenter inspexit, nullumque reperit, qui iudicaret iuste, qui suam in omnibus faceret uoluntatem. Et iccirco brachium eius salutem præbuit, & iustitia sua saluauit omnia: ut omnis mundus subiiciatur Deo, & illius clementia conseruetur. Fuimus enim immundi non
- Esa.* 64 pauci, sed omnes. Quasi pannus menstruatus, reputata sunt
- Ezech.* 16 omnia in lege opera nostra. Ad Hierusalem in Ezechiele loquitur Deus: Perfecta eras in decore meo: & est sensus, non in tuis operibus, non in tua conscientia, cordisque iactantia, sed in meo decore, quo te clementia mea libertate dona ueram. Denique in consequentibus loquitur ad eam, quando saluatur non suo merito, sed eius misericordia: Recordabor pacti mei tecum in diebus adolescentiæ tuæ, & suscitabo tibi pactum sempiternum, & recordaberis uiarum tuarum, & confunderis. Et iterum: Suscitabo pactum meum tecum; & scies, quia ego Dominus: ut recorderis, & confundaris, & non sit tibi ultra aperire os præ confusione tua: cum fuero placatus tibi in omnibus quæ fecisti, ait dominus Deus:

Ecce

Ecce aperte diuino sermone monstratur , quid in alio loco dixerit : Et mundans te non faciet innocentem , quod iusti quoque , & post peccatum in statum pristinum restituti , os aperire nō audeant , sed cum Apostolo dicant : Qui non sum dignus uocari apostolus , quia persecutus sum Ecclesiam dei . *Num. 1*
 Denique & in alio loco per eundem prophetam ad eos , qui illius misericordiam consecuti sunt , loquitur Deus : Et recedabimini uiarum uestrarum , & omnium scelerum uestrorū , quibus polluti eratis : & displicebit uobis in conspectu uestro , in cunctis malitiis , quas fecistis : & scietis , quia ego Dominus , cum benefecero uobis propter nomen meum , non secundum uias uestras malas , neque secundum scelera uestra pessima . Erubescamus , atque dicamus , quod loquuntur ii , qui iam præmia consecuti sunt : loquamur peccatores super terram , & in fragili mortaliq. corpore constituti , quod sanctos uidemus in cælis dicere , etiam incorruptione & immortalitate donatos . Et dicitis , inquit : Non est recta uia Domini , cum uestræ uiæ prauæ sint . Phariseorum est hoc supercilium , ut peccata propriæ uoluntatis referant ad conditoris iniuriam , & illius iustitiam calumnientur . Sacerdotes templi mystici , quod interpretatur Ecclesia , filii Sadoch , cum uestimenti ministerii non egrediuntur ad populum , ne humana conuersatione sanctificati maculentur . Et tu in medio uulgi unusq. de populo mundum esse te credis ? Hieremiam prophetam breuiter percurrentes sensu magis , quam sermone carpamus . Circuite , inquit , in exitibus Hierusalē , & quaerite in plateis eius , sicubi reperire poteritis uirum , qui iuxta iustitiā uiuat , & fidem : & ero propitius propter eum . Quāuis enim dicant : Viuit Dominus : fraudulenter iurāt , & hoc ipsum in mendacio . Refutat peccatorum sacrificia : uescendas detrahit offerentibus hostias , dicens se non mandasse patribus eorum , quando deduxit eos de terra Aegypti ; ut offerent huiuscemodi sacrificia . non enim uoluntate , sed idolorum comparatione mandauit , malens sibi offerri uictimas , quam dæmonibus . Omnes recesserūt ab eo : nullus est , qui loquatur bona , & agat pænitentiam de peccatis suis . Sequuntur *1. Cor. 15*
Exech. 20
Exech. 33
Exech. 44
Hier. 5
Hier. 7
Hier. 8

- quantur proprias uoluntates, quasi equus promptus ad pro-
Hier. 9 lium: intendunt linguam suam, quasi arcum: mentiuntur
omnia, & non est in eis ueritas. Amicorum quoque cau-
das insidias præcipit, & nulli credere proximorum: singu-
los enim insidiari amicis, & fratrem a fratre decipi, & hoc fa-
cere non naturæ malo, sed propria uoluntate: quia docue-
runt linguam suam mendacium, & proni feruntur ad iustitiã.
Hier. 13 Si Aethiops, ait, mutauerit pellem suam, & pardus uarieta-
tem suam: & uos poteritis facere bonum, cum didiceritis
mala. Ergo pellis Aethiopica, & pardorum uarietas, disci-
plinæ est, non naturæ, quæ docetur, & discitur: tamen aufer-
ri nõ potest uitium inoliti mali, nisi per eum, cui omnia pos-
sibilia sunt. Vnde loquitur ad eum, qui solus uerus medicus
Hier. 17 est: Sana me Domine, & sanabor: saluum me fac Domine,
& saluus ero: tu es gloria mea, & spes mea. Si enim ad con-
dicionem meam infelicitatemq. respiciam; nihil aliud, nisi
Hier. 20 hoc, possum loqui: Maledictus homo, qui annunciauit pa-
tri meo, dicens: Ecce natus est tibi puer: fiat homo ille simi-
lis urbibus, quas subuertit Deus. Quare enim in uulua non
statim perii? & fuisset mihi sepulcrum mater mea, & uulua
eius infernus sempiternus. quare egressus sum ex utero, ut
uiderem labores, & misérias, & consumerentur dies mei in
ærumnis? Tantum de sua condicione securus est; & sic confi-
dit in fortitudine, ut mortem præferat uitæ. nouerat enim
uulnus suum, & potentiam eius, quem celare nihil potest;
Hier. 23 qui loquitur per eundem prophetam: Deus appropinquas
ego, & non procul. Qui enim cælum replet, & terram, nul-
lus potest uitare eius notitiam, & cordis occulta celare. Qui
scrutatur renes, introspicit. Et ut sciamus Dei esse bonum
omne, quod gerimus: Ego, inquit, plantabo eos, ut nequa
Hier. 24 quam eradicentur: & ego dabo eis cogitationem, & sen-
sum, ut intelligant me. Si cogitatio & sensus dantur a Deo;
& intellectus Domini ex illius, qui noscendus est, radice pul-
lulat: ubi est liberi arbitrii tantum superba iactatio? Volu-
Hier. 26 mus scire condicionem nostram: audiamus historiam. Ioa-
chim rex Iuda, cunctiq. socii eius, & princeps eius, auditis:
fermo-

sermonibus: Vix, noluerunt occidere eum. quod cum ille didicisset, timore perterritus fugit in Aegyptum. Cur mortem timebat, qui explicauit sententiam Domini, & qui a se nunciari Domini nouerat uoluntatem? Dedignamur per singula auxilium Dei; & ad illius nutum cuncta gerere negligimus; cum legamus, sanctos uiros, etiam hominum indignis se praesidio? Periclitatur Hieremias, & manifeste dicitur, Hier. 26 quod auxilio ei fuerit manus Abikam, filii Saphan, ne traderetur in potestatem uulgi, & obrueretur lapidibus. Abolitis legis caerimoniis, & duro pondere ueterum praceptorum, repromittitur euangelii gratia: legemq. Dominus pollicetur, Hier. 31 ut omnes eum nouerint a minimo usque ad maximum, dicens: Dimittam peccata eorum; & iniquitatum illorum ultra memor non ero. Quam autem habuerint sancti uiri in lege ueteri iustitiam, sequenti sermone demonstrat: Filii Israel, Hier. 32 & filii Iuda iniquitatem fecere perpetuam in conspectu meo, ab adolescentia sua usque ad diem praesentem: & ciuitas Hierusalem ab initio condicionis suae usque ad diem euerisionis suae me ad iracundiam prouocauit. Attende quid dicat: finem iunge principio. omne medium tempus in uitio est. Hieremias sanctificatus in utero ante quam natus: uirgo, propheta ueteris testamenti pertimescit Sedechiam; Hier. 37 flebiter obsecrat, dicens: Nunc ergo, Domine, mi rex, audi deprecationem meam, & praeualeat apud te obsecratio mea: ne remittas me in domum Ionathan scribae, ne ibi peream. O propheta, cur times impium regem? cur eum metuis, quem nosti iam iamq. periturum? carcerem reformidas, cui paratur paradisus? Respondebis mihi: homo sum, in mortali carne & corruptibili constitutus: dolorem sentio, horresco cruciatus, quos etiam Dominus meus pro mea salute sensurus est. Miseretur humano generi Deus, & non uult perire quod fecit. Noli timere Iacob, dicit Dominus: Ego enim sum tecum, & interficiam omnes gentes, in quas disperxi te: te uero ipsum non faciam, sed castigabo te in iustitia: & ita miserebor tui, ut te innoxium non relinquam. Unde & nos dicimus esse iustos, esse sanctos uiros, & post peccata

- ta placentes Deo, non suo tantum merito, sed eius clementia, cui omnis creatura subiecta est, & indiget misericordia eius. Audiant hæretici, qui eleuantur per superbiam, & dicunt: Ipsi nobis fecimus cornua. Audiant illud, quod audiuit Moab: Audiuius superbiam Moab, superbus est ualde. Altitudinē illius, & elationem, & gloriationē & inflationē cordis ego cognoui, dicit Dominus: quoniā nequaquā iuxta inflationē eius & fortitudo illius est. Diciturq. ad huiusmodi homines: Inimici autem eorum (haud dubiū, quin gregis Domini) confirmant, dicentes: non peccauimus: cum peccauerint in pulchritudinem iustitiæ, & in expectationem patrum. Vis scire, quando omnia peccata finiantur? audi eūdem prophetam: In tempore illo dicit Dominus, quæretur iniquitas in Israel, & non erit, & peccatum in Iuda, & non inuenietur. Cur, quæso? Sequitur: quia propitius ero illis. Vbi autem propitiatio est, præcessit ante peccatum. Tolle igitur, posse; & concedam, omnia, donante Deo, subsistere. Bonum est præstolari cum silentio salutare Domini: bonum est ponere in puluere os suum, dare percutienti se maxillam, saturari opprobriis, spē habere in Domino. Si enim abiecit, & miserebitur iuxta multitudinem misericordiarum suarum. neque enim humiliavit corde suo, & abiecit filios hominum. frustra murmurat homo pro peccatis suis. Scrutemur uias nostras, & quæramus, & reuertamur ad Dominum. Leuemus corda cum manibus ad Dominum in cælū, dicamusq. ei: Inique egimus, & ad iracundiā prouocauimus:
- Hier. 48** dicitur: Ipsi nobis fecimus cornua. Audiant illud, quod audiuit Moab: Audiuius superbiam Moab, superbus est ualde. Altitudinē illius, & elationem, & gloriationē & inflationē cordis ego cognoui, dicit Dominus: quoniā nequaquā iuxta inflationē eius & fortitudo illius est. Diciturq. ad huiusmodi homines: Inimici autem eorum (haud dubiū, quin gregis Domini) confirmant, dicentes: non peccauimus: cum peccauerint in pulchritudinem iustitiæ, & in expectationem patrum. Vis scire, quando omnia peccata finiantur? audi eūdem prophetam: In tempore illo dicit Dominus, quæretur iniquitas in Israel, & non erit, & peccatum in Iuda, & non inuenietur. Cur, quæso? Sequitur: quia propitius ero illis. Vbi autem propitiatio est, præcessit ante peccatum. Tolle igitur, posse; & concedam, omnia, donante Deo, subsistere. Bonum est præstolari cum silentio salutare Domini: bonum est ponere in puluere os suum, dare percutienti se maxillam, saturari opprobriis, spē habere in Domino. Si enim abiecit, & miserebitur iuxta multitudinem misericordiarum suarum. neque enim humiliavit corde suo, & abiecit filios hominum. frustra murmurat homo pro peccatis suis. Scrutemur uias nostras, & quæramus, & reuertamur ad Dominum. Leuemus corda cum manibus ad Dominum in cælū, dicamusq. ei: Inique egimus, & ad iracundiā prouocauimus:
- Dan. 4** iccirco tu inexorabilis es. Daniel propheta loquitur ad Nabuchodonosor: quod dominetur excelsus regno hominum, & det illud cuicumque uoluerit, & extremum atque proiectum constituat super illud. Interroga eum, qua causa ultimum atque despectum constituat in regem, & faciat quod uoluerit: & discute, utrum ipsius uoluntas iusta sit, de quo scriptum est: Qui suscitāt de terra humilem, & de stercore eleuat pauperem, ut collocet eum cum principibus, cum principibus populi sui. An forsitan, iuxta te, absque iudicio, atque iustitia gloriam quærit, auramq. popularem, ut humiles erigat
- Hier. 50**
- Hier. 50**
- Thren. 3**
- Dan. 4**
- Psal. 112**

erigat in regnum , & potentes humilitate commutet? Audi prophetam dicentem : Omnes habitatores terræ , quasi nihil reputati sunt apud eum . fecit enim , quodcumque uoluit , in cælo , & in terra : & nemo est , qui resistat uoluntati eius , aut possit dicere , quare hoc fecisti? cuius sunt omnia opera in ueritate , & uix illius iustitia , & superbientes potest ipse humiliare . Antiochus Epiphanes , rex crudelissimus , *2. Math. 5* subuertit altare , ipsamq. iustitiam fecit conculcari , quia concessum erat ei a Domino ; causasq. reddit , propter peccata plurima . Ergo non fecit quod ipse tantum uoluit , sed quod propter peccata populi concessit Dominus . Denique sequitur , quod non ex propria fecerit fortitudine , sed ex eius imperio , qui præcepit ut fieret . Illud autem , quod in oratione sua loquitur ; Peccauimus , inique egimus , iniuste gessimus , *Dan. 9* & recessimus a mandatis & iustitiis tuis ; & cetera huiusmodi , soletis dicere , quod & Dauid , & Daniel , & omnes prophetæ , non pro se , qui sancti erant , sed ex persona populi sunt locuti . aduersum quam opinionem ipse respõdebit , & dicet : Cum adhuc orarem , & confiterer peccata mea , & peccata populi mei Israel . Vi des ergo , quod tam pro peccatis suis , quam pro peccatis populi Dominum sit deprecatus , & effuderit deprecationes suas in conspectu domini Dei sui . Vis iterum nosse , quando peccatum & iniquitas finiatur ? Quamquam diuersa sit auctorum interpretatio , audi eundem prophetam . Septuaginta hebdomadæ complætæ sunt super populum tuum , & super ciuitatem tuam sanctam , ut compleantur iniquitates , & finem accipiat peccatum , ut dispareat iniquitas , & reueletur iustitia sempiterna . Quamdiu ergo ille finis adueniat ; & corruptiūm hoc atque mortale , in corruptione , & immortalitate mutetur ; necesse est nos subiacere peccato , non naturæ , & condicionis , ut tu calumniaris , uitio , sed fragilitate , & commutatione uoluntatis humanæ , quæ per momenta uariatur : quia Deus solus est immutabilis . Quæris , ubi Abel , ubi Enoch , ubi Iesus filius Naue , ubi Helisæus , ceteriq. sanctorum peccauerint . Non est necesse , nodum in scirpto quærere : utinam possem & manifesta reti-

ita reticere peccata. si uis a me uerum audire, nescio. Nihil.
1. Cor. 4 inquit, mihi conscius sum, nec tamen in hoc iustificatus sum.
1. Reg. 16 Homo uidet in facie, Deus in corde. Apud eius conscientiam,
Psal. 142 atque conspectum nullus iustificatur. Vnde & Paulus loquitur
Rom. 3. 11 tur confidenter: Omnes peccauerunt, & indiget gloria Dei:
 & concludit Deus omnia sub peccato, ut omnium misereatur.
 & cetera, quæ sæpe replicauimus.

DIALOGORVM HIERONYMI

aduersus Pelagianos

LIBER TERTIVS.

CRITOVLVS.

Pro. 10 D ELECTATVS sum tuorum multiplicatione sermonum, de quibus scriptum est: In multiloquio non effugies peccatum: sed quid ad causam? certe hoc fateberis, eos, qui Christi baptismata consecuti sunt, non habere peccatum; & si absque peccato sunt, iustos esse; cumq. semel iusti fuerint, si egerint solícite, posse in sempiternum iustitiam custodire, ac per hoc omne uitare peccatū.
 AR. Non erubescis, explosam atque damnatam Iouiniani sententiam sequi? et ille enim his testimoniis tuisq. nititur argumentis; immo tu illius inuēta sectaris, in Oriēte docere desiderans, quæ olim Romæ, & dudum in Africa condemnata sunt. lege ergo, quid illi responsum sit, & tibi responsum ducito. in dogmatibus enim, & quæstionibus disserendis nō persona, sed causa querenda est. Et tamen hoc scito, baptismum præterita donare peccata, non futuram seruare iustitiā, quæ labore, & industria, ac diligētia, & semper super omnia Dei clementia custoditur: ut nostrum sit rogare, illius tribuere quod rogatur; nostrum incipere, illius perficere; nostrum offerre quod possumus, illius implere quod non possumus.
Psal. 126 Nisi enim Dominus ædificauerit domum, in uanum laborauerunt qui ædificant eam. Nisi Dominus custodierit ciuitatem, in uanum uigilat, qui custodit eam. Vnde & Apostolus

lus præcipit : Sic currite, ut comprehendatis . Et omnes qui 1 . Cor. 9
 dem currunt , sed unus accipit coronam . Et in psalmo scri- Psal. 5
 ptum est : Domine , ut scuto bonæ uoluntatis tuæ corona-
 sti nos . Nostra enim uictoria , & corona uictoriæ , illius pro-
 rectione , & clypeo paratur : & hic currimus , ut in futuro cõ-
 prehendamus : ibi accipiet coronam , qui in hoc sæculo ui-
 ctor extiterit . nobisq. post baptismum dicitur : Ecce sanus Ioan. 5
 factus es ; iam noli peccare , ne quid deterius tibi contingat .
 Et : Nescitis quia templum Dei estis , & spiritus Dei habitat 1 . Cor. 3
 in uobis ? Si quis templum Dei uiolauerit , disperdet eum
 Deus . Et in alio loco : Dominus uobiscum est , quamdiu uos 2 . Par. 15
 estis cum eo : si reliqueritis eum , & ille relinquet uos . In cu-
 ius putas delubro , atque sacrario Christi puritas permanet ,
 templiq. serenitas nullo nubilo contristatur ? Eundem sem-
 per uultum habere non possumus ; quod de Socrate falso
 philosophi gloriantur : quanto magis animam ? Multæ fa-
 cies hominum , sic & corda diuersa . Si fieri posset , ut sem-
 per aquæ baptismatis mersos tenerent : uolitantia nos desu-
 per peccata non tangerent , Spiritus sanctus tueretur . Sed im- Psal. 10
 pugnat inimicus , nec uictus recedit , sed semper in insidiis est ,
 ut sagittet in occulto rectos corde . In euangelio iuxta He-
 bræos , quod Chaldaico quidem Syroq. sermone , sed He-
 braicis litteris scriptum est , quo utuntur usque hodie Naza-
 reni , secundum apostolos , siue , ut plerique autumant , iuxta
 Matthæum , quod & in Cæsariensi habetur bibliotheca , nar-
 rat historia : Ecce mater Domini , & fratres eius dicebant ei :
 Ioannes Baptista baptizat in remissionem peccatorum ; ea-
 mus , & baptizemur ab eo . Dixit autem eis : Quid peccā-
 ui , ut uadam , & baptizer ab eo ? nisi forte hoc ipsum , quod
 dixi , ignorantia est . Et in eodem uolumine : Si peccauerit ,
 inquit , frater tuus in uerbo , & satis tibi fecerit ; septies in die
 suscipe eum . Dixit illi Simō discipulus eius : Septies in die ?
 Respondit Dominus , & dixit ei : Etiam ego dico tibi , usque
 septuagies septies . Etenim in prophetis quoque , postquam
 uncti sunt Spiritu sancto , inuentus est sermo peccati . Ignā-
 tius , uir apostolicus , & martyr , scribit audacter : Elegit Do-

R r r minus

minus apostolos, qui super omnes homines peccatores erant.
Pfal. 15 De quorum celeri conuersione Psalmista canit: Multiplica-
 tæ sunt infirmitates eorum, postea accelerauerunt. Quibus
 testimoniis si non uteris ad auctoritatem, utere saltem ad an-
 tiquitatem, quid omnes ecclesiastici uiri senserint. Fac ali-
 quem baptizatum, uel statim, uel in ipsis diebus morte sub-
 tractum: & concedam tibi, quod concedere non debeo, nec
 cogitasse aliquid, nec locutum, in quo errore & ignorantia la-
 beretur. Num ideo sine peccato erit, quia uidebitur non su-
 perasse, sed fugisse peccatum, ac non potius, quia Dei mise-
 ricordia de peccatorum carcere liberatus migravit ad Domi-
 num? Hoc & nos dicimus, posse Deum quidquid uoluerit;
 & hominem per se & propria uoluntate, quod tu asseris, sine
 peccato esse non posse. sin autem potest; frustra nunc iungis
 & gratiam, qua potens non indiget. quod si non potest abs-
 que Dei gratia; stulte tu dixisti, posse quod non potest. quid-
 quid enim ex alterius pendet arbitrio, non eius est, quem
 posse contendis, sed illius, sine quo eum non posse perspicuum
 est. *CRT.* Rogo, quæ est ista prauitas, immo absque ratione
 contentio? ne hoc quidem mihi das, ut egressus aquas ba-
 ptismatis sine peccato sit? *AT.* Aut ego sensum meum uerbis
 explicare non ualeo: aut, me explicante, tu ad intelligendum
 tardior es. *CRT.* Quonam modo? *AT.* Recordare, quid &
 tu dixeris, & ego quid loquar. Posuisti, posse hominem sine
 peccato esse, si uelit. Ego impossibile hoc in homine esse re-
 spondeo: non quia statim a baptismo homo peccato non
 careat: sed illud tempus, quando sine peccato est, nequa-
 quam possibilitati humanæ, sed Dei gratiæ deputatur. Tol-
 le igitur, posse; & ego, esse, concedam. quo modo enim po-
 test, qui per se non potest? aut quæ est illa impeccantia, quæ
 statim corporis huius morte finitur? aut certe, si ultra uitam
 protraxerit, delicti & ignorantie periculo subiacet? *CRT.* Dia-
 lectica me arte concludis, & non Christiana loqueris simpli-
 citate; nodos mihi quosdam inter esse, & esse posse, concin-
 nans. *AT.* Ego ne uerborum strophis ludo, cum hoc de tua
 processerit officina? tu enim dicis, non esse hominem sine
 pecca-

peccato ; sed esse posse : cum econtrario ego tibi tribuam ,
 quod negasti , esse hominem sine peccato per Dei gratiam , &
 tamen per se esse non posse . C R I . Frustra ergo dantur præ-
 cepta , si ea implere non possumus . A R . Deus possibilia man-
 dauit : hoc nulli dubium est : sed , quia homines possibilia nõ
 faciunt , iccirco omnis mundus subditus est Deo , & indiget
 misericordia eius : aut certe , si ostendere potueris , qui uniuersa
 compleuerit , tunc poteris demonstrare esse hominem ,
 qui non indiget misericordia Dei . omne enim , quod fieri po-
 test , tribus constat temporibus , aut præterito , aut præsentis ;
 aut futuro . Hoc , quod asseris , posse hominem sine peccato
 esse , si uelit , monstra factum esse de præterito , aut certe nunc
 fieri : de futuro postea uidebimus . quod si nullum potes o-
 stendere , qui sine omni omnino peccato , aut sit , aut fuerit :
 restat , ut de futuro tantum disputatio sit . interim in duobus
 temporibus , præterito , atque præsentis , uictus teneris . Si ali-
 quis fuerit postea maior patriarchis , prophetis , apostolis ,
 qui peccato careat ; tunc futuris de futuro , si potueris , per-
 suadeto . C R I . Loquere ut uis : argumentare ut libet : num-
 quam mihi liberum arbitrium extorquebis , quod semel con-
 cessit Deus ; nec ualebis auferre , quod mihi tribuit posse , si
 uolueris . A R . Exempli gratia , uno tantum utamur testimo-
 nio . Inueni David filium Iesse , uirum secundum cor meum , 1. Reg. 13
 qui faciat omnes uoluntates meas . David sanctum esse , non 3. Reg. 14
 dubium est ; & tamen , qui electus est , ut omnes Dei uolun-
 tates faceret , aliqua fecisse reprehenditur . Vtique possibile
 erat ei facere , qui ad hoc electus est , ut omnes Dei uolunta-
 tes faceret . Nec Deus in culpa est , qui prædixit , eum cunctas
 suorum præceptorum facere uoluntates , sed ille , qui prædi-
 cta non fecit . neque enim dixit inuenisse se uirum , qui cun-
 ctas in perpetuum suæ iussione faceret uoluntates . Hoc &
 nos dicimus , posse hominem non peccare , si uelit , pro tem-
 pore , pro loco , pro imbecillitate corporea , quamdiu inten-
 tus est animus , quamdiu chorda nullo uitio laxatur in citha-
 ra : quod si paululum se remiserit ; quo modo , qui aduerso
 flumine lembum trahit , si remiserit manus , statim retrola-
 bitur ;

R r r 2

bitur; & fluentibus aquis, quo non uult, ducitur: sic humana condicio, si paululum se remiserit, discit fragilitatem suā, & multa se non posse cognoscit. Putas ne apostolum Paulū
3. Tim. 4 eo tempore, quo scribebat; Lacernam, siue penulam, quam reliqui Troade apud Carpum, ueniens affer, ac libros, & maxime membranas; de cælestibus cogitasse mysteriis, & non de iis, quæ in usu cōmunis uitæ uel corporis necessaria sunt? Da mihi hominē, qui non esuriat, non sitiat, neque algeat; non doleat; non febricitet, non torminibus & urinæ difficultatibus torqueatur: & ego tibi concedam, posse hominem nihil aliud, nisi de uirtutibus, cogitare. Cæditur apostolus a ministro, & contra pontificem, qui cædere imperauerat, sententiam dirigit: Percutiet te Deus, paries dealbate. Vbi est
Act. 23 illa patientia saluatoris, qui, quasi agnus ductus ad uictimam,
Hier. 11 non aperuit os suum, sed clementer loquitur uerberanti: Si
Esa. 35 male locutus sum, argue de malo; si autem bene, quid me cæ
Ioan. 18 dis? Non apostolo detrahimus, sed gloriam Domini prædicamus; qui in carne passus, carnis iniuriam superat, & fragilitatem: ut taceam illud, quod ipse commemorat: Alexander ararius multa mihi mala ostendit: reddet illi Dominus in illa die iustus iudex. **C R I T O.** Cogis me, ut loquar, quod iam dudum gestio, & tamen erumpentia uerba non pronio.
A T. Quis enim te prohibet, quod sentis, dicere? aut enim, quod dicturus es, bonum est, & nos bono fraudare non debes: aut malum, & iccirco non nostri gratia, sed pudore siluisti. **C R I.** Dicam, dicam aliquando, quod sentio. Omnis disputatio tua illuc delabitur, ut naturam accuses, & culpam referas ad Deum, qui talem hominem condidit. **A T.** Hoc illud erat, quod uolebas, & nolebas dicere? dic, dic quæso; ut omnes tua fruantur prudentia. Reprehendis Deum, quare hominem fecerit hominem: reprehendant & angeli, cur angeli sint. omnis creatura causetur, quare id sit, quod condita est, & non id, quod condi potuit. Scilicet nūc mihi puerilibus declamatiunculis ludendum est: & a culice, atque formica usque ad Cherubim, & Seraphim ueniam: cur non singula in meliori statu condita sint. Cumq. ad excelsas uenero pote-

potestates, causabor & dicam; quare Deus solus tantum Deus sit, & non omnia Deos fecerit. aut enim impossibilitatis iuxta te, aut inuidiæ reus erit. Reprehende eum, cur & diabolus in hoc mundo esse concedat: & aufer coronam, cū certamen abstuleris. CRI. Non sum tam uecors, ut querar cur diabolus sit, cuius inuidia mors introiuit in orbem terrarum: sed hoc doleo, cur uiri ecclesiastici, & qui magistrorum *Sap. 2* sibi usurpant uocabulum; tollant liberum arbitrium: quo sublato, Manichæorum secta construitur. AT. Ego ne liberū tollo arbitrium, qui in tota disputatione mea nihil aliud egi, nisi ut omnipotentiam Dei cum libero arbitrio conseruare? CRI. Quo modo seruas liberum arbitrium, qui dicis hominem nihil posse facere, nisi Deus semper adiuerit? AT. Si in culpa est, qui libero arbitrio iungit Dei adiutorium: ergo ille laudetur, qui Dei tollit auxilium. CRI. Non tollo Dei auxilium, quippe per cuius gratiam possumus omne, quod possumus; sed utrumque suis finibus terminamus: ut & Dei sit gratiæ, quod dedit liberi arbitrii potestatem; & nostræ uoluntatis, facere quid, uel non facere; & quod facientibus præmium, & non facientibus pœna seruetur. AT. Videris mihi obliuiosus esse, &, quasi nihil supradictum sit, per eandem disputationis reuerti lineas. hoc enim longa disertione conclusum est, ut gratia sua Dominus, qua nobis concessit liberum arbitrium, in singulis operibus iuuat, atque sustentet. CRI. Quid ergo iuuat, atque coronat in nobis, & laudat quod ipse operatus est? AT. Voluntatem nostram, quæ obtulit omne, quod potuit, & laborem, qui contendit ut faceret; & humilitatem, quæ semper respexit ad auxilium Dei. CRI. Ergo, si non fecimus quod præcipit; aut uoluit nos adiuuare Deus, aut noluit. si uoluit, & adiuuit, & tamen non fecimus quod uoluimus: nō nos, sed ille superatus est. si noluit adiuuare: non est culpa eius, qui uoluit facere, sed illius, qui adiuuare potuit, & noluit facere. AT. Non intelligis, *διλημμα* tuum in grande blasphemiarum decidisse baratrum; ut ex utraque parte aut inualidus sit Deus, aut inuidus; & non tantum ei laudis sit, quod bonorum auctor est,

Rrr 3 &

& adiutor, quantū uituperationis, quod mala non coercuit. Detrahatur ergo illi, cur diabolus esse permiserit, cur passus sit, & hucusque patiatur quotidie aliquid in mundo mali fieri. Quærit hoc Marcion, & omnes hæreticorum canes, qui uetus laniant testamentum; & huiusmodi syllogismum texere consueuerunt. Aut sciuit Deus, hominem, in paradiso positum, præuaticaturum esse mandatum illius, aut nesciuit. si sciuit: non est in culpa is, qui præscientiam Dei uitare non potuit; sed ille, qui talem condidit, ut Dei non posset scientiam deuicare. si nesciuit: cui præscientiam tollis, aufers & diuinitatem. hoc enim genere in culpa erit, qui elegit

1. Reg. 9 Saul futurum postea regem impiissimum. & saluator aut

Ioan. 6 ignorantix, aut iniustitiæ tenebitur reus, cur in euangelio sit

Ioan. 12 locutus: Nonne uos duodecim ego elegi apostolos, & unus de uobis diabolus est? Interroga eum, cur Iudam elegerit proditorem; cur ei loculos commiserit, quem furem esse nō ignorabat. Vis audire rationem. Deus præsentia iudicat, non futura: nec condemnat ex præscientia, quem nouerit talem fore, qui sibi postea displiceat: sed tantæ bonitatis est, & ineffabilis clementiæ, ut eligat eum, quem interim bonū cernit, & scit malum futurum, dans ei potestatem conuersionis, & pænitiæ: iuxta illum sensum Apostoli: Ignoras, quia benignitas Dei ad pænitentiam te adducit? secundum duritiam autem tuam & cor impænitens, thesaurizas tibi iram in die iræ & reuelationis iusti iudicii Dei, qui reddet unicuique secundū opera eius. Neque enim ideo peccauit Adā, quia Deus hoc futurū nouerat; sed præsciuit Deus, quasi Deus, quod ille erat propria uoluntate facturus. Accusa ergo

Ioan. 3 Deū mendacii, quare dixerit per Ionā: Adhuc tres dies & Niue subuertetur. Sed respondebit tibi per Hieremiā: Ad summam loquar contra gentem & regnum, ut eradicem, & destruam, & disperdam illud. Si pænitentiam egerit gens illa a malo suo, quod locutus sum aduersus eam: agam & ego pænitentiam super malo, quod cogitavi ut facerem ei; et ad summam loquar de gente & regno, ut ædificem & plantem illud: si fecerit malum in conspectu meo, ut non audiat uocem

cem

cem meam: pœnitentiam agam super bono, quod locutus sum ut facerem ei. Indignabatur quondam & Ionas, cur Deo fuerit iubente mentitus: sed iniusti mœoris arguitur, malens cum pernicie innumerabilis populi uerum dicere, quam cum tantorum salute mentiri. Ponitur ei exemplum: Tu doles super hedera, siue cucurbita, in qua non laborasti: *Ion. 4* neque fecisti ut cresceret, quæ sub una nocte nata est, & una nocte perit: & ego non parcam. Niniue ciuitati magnæ, in qua sunt plus quam centum uiginti millia hominum, qui ne sciunt quid sit inter dexteram & sinistram suam. Si in paruulorum ætate & simplicium, quos certe peccatores fuisse non poteris approbare, tanta fuit hominum multitudo: quid dicemus de utriusque sexus ætate diuersa, quæ iuxta Philonem, & prudentissimum philosophorum, ab infantia usque ad decrepitam senectutem septenario ordine deuoluitur, dum sibi sic inuicem ætatum incrementa succedunt, ut, quando de alia transeamus ad aliam, sentire minime ualeamus? *CR.* Tota argumentatio tua huc tendit, uti, quod Græci dicunt *αὐτεξούσιον*, & nos liberum appellamus arbitrium, uocabulo tribuas, re auferas. Tu enim auctorem peccatorum facis Deum, dum asseris nihil hominem per se posse facere, sed adminiculo Dei, cui imputetur omne, quod facimus. Nos autem, siue bonum, siue malum homo fecerit, per liberi arbitrii potestatem ei dicimus imputari, qui fecit quod uoluit, & non ei, qui semel concessit liberum arbitrium. *AT.* Quauis tergiuerferis, laqueis ueritatis innecteris: hoc enim modo, etiam si ipse non adiuuat, tamen, iuxta te, auctor erit malorum, quia potuit prohibere, & non prohibuit. uetus enim sententia est, homicidam esse eum, qui cum possit hominem de morte liberare, non liberet. *CR.* Iam iam tollo manum, cedo, uicisti: si tamen uincere est, ueritatem uelle subuertere non rebus, sed sermonibus, idest, non ueritate, sed mendacio. Possum enim illud tibi Apostoli respondere: *2. Contr.* Et si imperitus sermone, non tamen scientia. Quando enim loqueris, coactus argumentationum strophis tibi uideor as sentire; cum autem tacueris, ex animo rursus elabitur: ut li-

Rrr 4 quido

quid apparet, disputationem tuam non ex fontibus ueritatis, & Christiana simplicitate, sed ex philosophorum minutiis & arte descendere. *Ar.* Vis ergo me rursus uti testimoniis scripturarū? Et quo modo iactant discipuli tui, nullū argumentationi tuæ posse & problematibus respondere? *Cr.* Non solum uolo, sed & cupio. Doce me de scripturis sanctis, ubi, sublata liberi arbitrii potestate, faciat homo, quod per se aut noluit, aut non potuit. *Ar.* Non ita, ut proponis, sed ut ueritas poscit, & ratio, scripturarum uocibus est utendū.

Gen. 28 Loquitur Iacob in oratione sua: Si fuerit dominus Deus mecum; & custodierit me in uia, per quam ego pergo; & dederit mihi panem ad manducandum, & uestimentum ad operiendum, & reduxerit me cum salute in domum patris mei: erit mihi Dominus in Deum: & lapis iste, quem posui in titulum, erit mihi domus Dei: & omnium, quæcumque dederis mihi, decimas offeram tibi. Numquid dixit, si liberum arbitrium conseruaueris, & cibum, & uestimentum meo labore quæsero, & reuertero in domum patris mei? Omnia dat Domini uoluntati, ut mereatur accipere quod precatur. Reuertenti de Mesopotamia Iacob, angelorum occurrit exer-

Gen. 32 citus, & uocantur castra Dei. Postea pugnat cum angelo sub figura hominis, & a Domino confortatur. De supplantatore Iacob, rectissime Dei nomen accepit. neque enim ad fratrem crudelissimum audebat reuerti, nisi Domini præsidio roboratus. Scriptum est in consequentibus: Ortus est ei sol, postquam transiit Phanuel, quod interpretatur facies Dei. Vnde loquitur & Moyses: Vidi Deum facie ad faciem, & salua facta est anima mea, non proprietate naturæ, sed dignatione miserationis. Oritur ergo nobis sol iustitiæ, quando

Gen. 39 uultu Dei confirmamur. Ioseph in Aegypto clauditur carcere, ibique infertur, quod custos carceris omnia potestati eius fideique commiserit. causaque redditur, quia Dominus erat cum eo: & quæcumque faciebat, prosperabantur a Domino in manibus eius. Vnde & eunuchis somnia suggeruntur;

Gen. 40. 41 & Pharaon uidet somnium inextricabile, ut per hanc occasionem liberaretur Ioseph, pater pasceretur & fratres, Aegyptus

ptus

prius tempore fanis saluaretur . Sequitur : Dixit autē Deus *Gen. 42. 43*
 ad Israel in uisione noctis : Ego sum Deus patrum tuorum :
 noli timere descendere in Aegyptum : in gentem enim ma- *Gen. 46*
 gnā faciam te ibi : & ego descendam tecum in Aegyptum ,
 & educam te inde : & ponet Ioseph manus suas super oculo-
 los tuos . Vbi hic est liberi arbitrii potestas ? an non totum ,
 quod ire audet ad filium , & genti se committere Dominum
 nescienti , Dei patrum eius auxilium est ? Liberatur populus
 de Aegypto in manu forti & brachio excelsō , non Moyse , & *Exod. 12*
 Aaron , sed eius , qui signorum miraculis populum liberauit :
 & ad extremū percussit primogenita Aegypti : ut , qui prius
 retinebant pertinaciter , ardentē exire compellerent . Salo- *Pro. 3*
 mon loquitur : Esto confidens in Dominum in toto corde
 tuo : in tua autem sapiētia ne exalteris : in omnibus uis tuis
 cognosce eum , ut rectas faciat uias tuas . Intellige quid loqui-
 tur : Nec in sapientia nostra , nec in ullis uirtutibus confi- *Psal. 36*
 dendum , sed in solo Domino , a quo gressus hominis diri-
 guntur . Denique præcipitur , ut ostēdamus eis uias nostras ,
 & notas esse faciamus , quæ non labore proprio , sed illius
 adiutorio , atque clementia rectæ fiunt . Vnde scriptum est :
 Rectam fac in conspectu meo uiam tuam , siue , ut alia exem-
 plaria habent , Rectam fac in conspectu tuo uiam meam : ut , *Psal. 5*
 quod tibi rectum est , etiam mihi rectum esse uideatur . Idem
 Salomon loquitur : Deuolue super Dominum opera tua , *Pro. 16*
 & firmabuntur cogitationes tuæ . Tunc enim nostra cogi-
 tatio confirmatur , quando omne , quod agimus , quasi su-
 per stabilem & solidissimā petram , Domini adiutorio de-
 uoluimus , eiq. cuncta reputamus . Apostolus Paulus , cum
 Dei beneficia celeri sermone narrasset , ad extremum intulit :
 Et ad hæc quis idoneus ? Vnde & in alio loco dicit : Fiduci-
 am autem talem habemus per Christum ad Deum : non *2. Cor. 2*
 quod sufficientes simus cogitare aliquid a nobis , quasi ex *2. Cor. 3*
 nobis : sed sufficientia nostra ex Deo est , qui & idoneos fe-
 cit nos noui testamenti ministros , non littera , sed spiritu .
 littera enim occidit , spiritus autem uiuificat . Adhuc aude-
 mus per liberum arbitrium superbire , & abuti beneficiis
 Dei

Dei in contumeliam largitoris? cum idem uas electionis
3. Cor. 4 apertissime scribat: Habemus autem thesaurum istum in
 uasis fictilibus, ut abundantia fortitudinis nostræ sit ex Deo,
 & non ex nobis. Vnde & in alio loco, retundens hæretico-
 rum impudentiam, loquitur: Qui gloriatur, in Domino glo-
2. Cor. 10 rietur. Neque enim, qui se ipsum commendat, ipse proba-
2. Cor. 12 tus est, sed quem Deus commendat. Et iterum: Nihil enim
 mihi defuit ab iis, qui supra modum sunt apostoli; licet ni-
 hil sim. Petrus loquitur ad Dominum, signorum magnitu-
 dine conturbatus: Recede a me, quia homo peccator sum.
Luc. 5 Et Dominus ad discipulos: Ego sum uitis, & uos rami: qui
Ioan. 15 manet in me, & ego in eo, iste affert fructum multum: quia
 sine me nihil potestis facere. Sicut rami & flagella uitium
 illico cōtabescunt, cum fuerint a matrice præcisa: ita omnis
 hominum fortitudo marcescit, & deperit, si a Dei auxilio
 deseratur. Nemo, inquit, potest uenire ad me, nisi pater,
Ioan. 6 qui misit me, traxerit eum. Quando dicit, Nemo potest ue-
 nire ad me, frangit superbientem arbitrii libertatem: quod
 etiam si uelit ad Christum pergere, nisi fiat illud, quod se-
 quitur, Nisi pater meus cælestis traxerit eum, nequidquam
 cupiat, & frustra nitatur. Simul & hoc animaduertendum,
 quod, qui trahitur, non sponte currit, sed aut retractans,
 & tardus, aut inuitus adducitur. Qui non potest suis uiribus
 & labore uenire ad Iesum, quo modo potest omnia simul
 peccata uitare? & uitare in perpetuum, & Dei sibi potentie
 nomen assumere? si enim ille ἀναμάρτητος, & ego ἀνα-
 μάρτητος; quæ inter me & Deum erit distantia? Vnum ad
 huc ponam testimonium; ne tibi & auditoribus fastidium
Ester 6 faciam. Assuero, quem septuaginta interpretes ἀπαγγέλλω
 uocant, somnus aufertur ab oculis; ut commentarios in se
 fidelium replicans ministrorum, inueniat Mardochæum,
 cuius indicio de insidiis liberatus est; ut & Hester commen-
 dabilior fieret, & cunctus populus Iudæorum imminentem
 uitaret necem. Certe rex potentissimus, qui ab India usque
 ad Septentrionem & Aethiopiam cunctum possidebat Ori-
 entem, post largissimas epulas & cibos toto orbe quæstos
 dor-

dormire cupiebat, & somno requiescere, ac liberum arbitrium implere dormiendi; nisi Dominus, prouisor bonorum omnium, impedisset naturæ ordinem, ut, contra naturam, tyranni crudelitas uinceretur. Longum est, si uolero cuncta sanctarum scripturarum exempla proferre. Totus sermo sanctorum ad Deum oratio est: tota oratio & deprecatio extorquet clementiam saluatoris: ut, qui nostris uiribus & studio saluari non possumus, illius misericordia conseruemur. Vbi autem misericordia & gratia est, liberum ex parte cessat arbitrium: quod in eo tantum est, ut uelimus, atque cupiamus, & placitis tribuamus assensum. Iam in Domini potestate est, ut id, quod cupimus, quod laboramus, ac nitimur, illius ope & auxilio implere ualeamus. CRITO. Ego simpliciter dixeram, non in singulis operibus nostris, sed in gratia condicionis & legis sentiri auxilium Dei, ne liberum frangeretur arbitrium. ceterum sunt plerique nostrorum, qui omnia, quæ agimus, dicant fieri præsidio Dei. ATTI. Qui hoc dicit, uester esse cessabit: aut ergo & tu ista dicito, ut noster esse incipias: aut, si non dicis, alienus eris cum iis, qui nostra non dicunt. CRITO. Tuus ero, si mea dixeris: immo tu meus, si aduersa non dixeris. Sana corpora confiteris, & animæ, quæ fortior est, denegas sanitatem. Ut enim morbus & uulnus in corpore, ita peccatum in anima. Qui ergo sanum aliquando hominē confiteris ex ea parte, qua caro est; quare non sanum dicas & ex ea, qua spiritus est? ATTI. Sequar propositionem tuam. numquam hodie effugies: ueniam quocumque uocaris. CRITO. Paratus sum ad audiendum. ATTI. Et ego ad loquendum surdis auribus. respondebo igitur ad propositum. Ex anima & corpore compacti, utriusque substantiæ naturam consequimur. Quo modo corpus sanum dicitur, si nullo languore uexetur: ita anima absque uitio, si nulla perturbatione qua tiatur. et tamen, quamuis corpus sanum sit, integrumque, & uegetum, & cunctorum sensuum integritate robustum, aut crebris, aut raris infirmitatibus condolescit, &, ut firmissimum sit, interdum pituitæ molestiam patitur: ita anima,

ma; cogitationum & perturbationum imperus sustinens, ut superet naufragia, non absque periculo nauigat; consideransq. fragilitatem suam; semper de morte sollicita est: secundum illud, quod scriptum est: Quis est homo, qui uiuet, & non uidebit mortem? Quæ cunctis intenta est mortalibus; non naturæ dissolutione, sed morte peccati: iuxta illud propheticum: Anima, quæ peccauerit, ipsa morietur. Alioquin hanc communem mortem, qua & bruta soluiuntur animalia, Enoch & Eliam nondum uidisse cognoscimus. Da mihi corpus, quod numquam languerit, aut quod post languorem perpetua sanitate securum sit: & dabo tibi animam, quæ numquam peccauerit, nec post uirtutes deinceps peccatura sit; præsertim cum uicina sint uitia uirtutibus; & si paululum declinaueris, aut errandum tibi sit, aut in præceps cadendum. Quantum enim inter se distant pertinacia & perseverantia, parsimonia & frugalitas, liberalitas & profusio, prudentia & calliditas, fortitudo & temeritas, cautela & timiditas? quorum alia ad bona, alia referuntur ad mala: quod quidem & in corporibus inuenitur. Si felli prouideris temperando, pituita succrescit. Si humores siccare festines; inardescit sanguis; bili uiciatus; & luteus color ora perfundit. Certè, ut cunctam medicorum adhibeamus diligentiam, & castigatis uiuamus cibis; & morborum fomitibus careamus, & cruditate, occultis quibusdam & soli Deo cognitis causis; uel frigore inhorrescimus, uel febre exardescimus, uel torminibus eiulamus, & ueri medici saluatoris imploramus auxilium, dicimusq. cum apostolis: Magister, saluos nos fac; perimus. **CR.** Esto, ut nullus potuerit omne uitare peccatum in puericia, adolescentia, & iuuentute; numquid negare potes, plurimos iustos & sanctos uiros post uitia omni se ad uirtutes animo contulisse, & per has caruisse peccato? **AT.** Hoc est, quod tibi in principio dixeram, in nostra esse positum potestate, uel peccare, uel non peccare; & uel ad bonum, uel ad malum extendere manum; ut liberum seruetur arbitrium; sed hoc pro modo, & tempore, & conditione fragilitatis humanæ; per-

perpetuitatem autem impeccantiæ soli referuari Deo, & ei, qui, uerbum caro factus, carnis detrimenta, & peccata nõ pertulit. Nec, quia ad breue possum, coges me ut possim iugiter. Possum ieiunare, uigilare, ambulare, legere, psallere, sedere, dormire; numquid in perpetuum? *CRI.* Et quare in scripturis sanctis ad perfectam iustitiam prouocamur, ut est illud: Beati mundo corde, quoniam ipsi Deum uidebunt. *Matth. 5* Et: Beati immaculati in uia, qui ambulant in lege *Psal. 118* Domini. Et Dei loquentis ad Abraham: Ego sum Deus *Gen. 17* tuus, placeto in conspectu meo, & esto sine macula, uel querela: & ponam testamentum meum inter me & te, & multiplicabo te nimis? Si enim non potest fieri, quod scriptura testatur; frustra præcepit, ut fieret. *AT.* Diuersis testimonii scripturarum eandem quæstionem teris in theatralibus præstigiis, quæ unum eundemq. hominem, personarum uarietate mutata, in Martem Veneremq. producant: ut, qui prius rigidus & truculentus incesserat, postea soluitur in molliem feminarum. Hoc enim, quod nunc quasi nouum obiicis; Beati mundo corde; &, Beati immaculati in uia; &, Esto sine macula; & cetera huiusmodi, Apostolo respondente conuictum est: & ex parte cognoscimus, *1. Cor. 13* & ex parte prophetamus: & nunc per speculum uidemus in ænigmate: cum autem uenerit, quod perfectum est, id, quod ex parte fuerat, destruetur. Et mundum igitur cor, quod postea sit uisurum Deum, & beatitudinem uitæ immaculatæ, & immaculatum cum Abraham uiuere, in umbra poscimus, & imagine. Quamuis aliquis patriarcha sit, quamuis propheta, quamuis apostolus, dicitur eis a Domino saluatore: Si uos, cum sitis mali, scitis bona dare filiis uestris: quanto magis pater uester, qui in cælis est, dabit bona petentibus se? Denique & Abrahā, cui dictum est; Esto *Gen. 17* sine querela, & sine macula; conscientia fragilitatis suæ cecidit pronus in terram. Cumq. locutus esset ei Deus: Sarai uxor tua non uocabitur ultra Sarai, sed Sara erit nomen eius: & benedicam ei, & dabo tibi ex ea filium, & benedicam ei, & erit in gentes, & reges gentium ex ipso erunt: statim

statim inferitur, Cecidit Abraham in faciem suam, risitque, & dixit in mente sua: Si centenario nascetur filius, & si Sara nonaginta annorum pariet? Dixitq. Abraham ad Deum: Ismael uiuat in conspectu tuo. Cui respōdit Deus: Etiam. Ecce Sara uxor tua pariet tibi filium, & uocabis nomen eius Isaac: & reliqua. Certe audierat a Deo: Ego sum Deus tuus, placeto in conspectu meo, & esto sine macula: quare non credidit, quod Deus repromisit, sed risit in corde, putans se celare Deum, & aperte ridere nō audens? Denique, causas incredulitatis exponens, dicit in corde suo: Quo modo potest fieri, ut centenarius de nonagenaria uxore pariat filium? Viuat, inquit, Ismael in conspectu tuo, quem semel dedisti. Difficilia non quæro: contentus sum beneficio, quod accepi. Quem occulta responsione arguens Deus, ait: Etiam. Et est sensus: Fiet, quod existimas non futurum. Sara uxor tua pariet tibi filium: &, ante quam ista concipiat, prius quam ille nascatur, puero nomen imponam. Ex errore enim tuo, quo risisti tacitus, filius tuus Isaac risus nomen accipiet. Sin autem ab iis qui sunt mundo corde, in hoc sæculo putas uideri Deum; quare Moyses, qui prius dixerat: Vidi Deum facie ad faciem, & salua facta est anima mea: postea deprecatur, ut eum uideat cognoscenter? quem quia dixerat se uidisse, audit a Domino: Exod. 33 Non potes uidere faciem meam: non enim uidebit homo. 1. Tim. 6 faciem meam, & uiuet. Vnde & Apostolus inuisibilem solum Deum, qui & lucem habitat inaccessibilem, & quem nullus hominum uiderit, neque possit uidere, appellat. Et Ioan. 1 Ioannes euangelista sacra uoce testatur, dicens: Deum nemo uidit umquam. Unigenitus filius, qui est in sinu patris, ipse narrauit. Qui uidet, & narrat, non quantus est ille, qui uisus est, nec quantum nouit ille, qui narrat, sed quantum potest mortalium sensus accipere. Quod autem putas beatum esse, qui sit immaculatus in uia, & ambulet in lege eius; ex sequenti sensu priorem intellige. Multis testimoniis supra didicisti, legem nullum potuisse complere. Si autem Philip. 3 tem Apostolus ad comparationem gratiæ Christi, quæ prius

us lucra arbitrabatur in lege, reputauit quasi stercora, ut
Christum crucifaceret: quanto magis nos scire debemus,
ideo Christi & euangelii gratiam successisse, quia in lege ne-
mo iustificari potuit? Si autem in lege nullus iustificatur; *Psal. 118*
quo modo ad perfectum immaculatus est in uia, qui adhuc
ambulat, & ad calcem uenire festinat? Certe, qui in cursu
est, & in uia graditur, minor est eo, qui peruenit ad finem.
Si ergo immaculatus est ille, atque perfectus, qui adhuc
ambulat in uia, & graditur in lege: quid plus habebit ille,
qui ad terminum uix, legisq. peruenit? Vnde & Apostolus *Eph. 5*
de Domino loquitur: quod in fine mundi, & in consumma-
tione uirtutum exhibeat sibi sanctam Ecclesiam, non haben-
tem maculam, neque rugam: quam uos putatis iam in ista
carne mortali, & corruptibili esse perfectam; & audire me-
remini cum Corinthiis: Iam perfecti estis, iam diuites facti *1. Cor. 4*
estis, sine nobis regnatis: atque utinam regnaretis, ut &
nos regnaremus uobiscum: cum uera & absque omni sorde
perfectio in celestibus referuetur, quando sponsus loque-
tur ad sponsam: Tota pulchra es amica mea, & macula non *Cant. 4*
est in te. Iuxta quod & illud intelligitur: Vt sitis irreprehen- *Philip. 2*
sibiles, & simplices, sicut filii Dei immaculati: quod non
dixerit Estis, sed Sitis, in futurum differens, non in præ-
senti esse contestans: ut hic labor sit, atque contentio, ibi
laboris uirtutisq. præmia. Denique Ioannes scribit: Dile-
ctissimi, filii Dei sumus; & nondum apparuit, quid erimus. *1. Ioan. 3*
Scimus, quia, cum apparuerit, similes ei erimus; quoniã
eum uidebimus sicuti est. Quamquam ergo filii Dei sumus;
tamen similitudo Dei, & uera contemplatio, tunc nobis re-
promittitur, quando apparuerit in claritate sua. De hoc su-
perbiæ tumore & illa orandi prorumpit audacia, qua scri-
bens ad uiduam, quo modo sancti debeant orare, pronun-
cias. Ille enim, inquis, merito ad Deum extollit manus,
ille preces bona conscientia fundit, qui potest dicere: Tu
enim nosti, Domine, quam sanctæ, quam innocentes,
quam puræ sint ab omni fraude, & iniuria, & rapina, quas
ad te expando, manus; quam iusta, quam immaculata la-
bia,

bia, & ab omni mendacio libera: quibus tibi, ut mihi miserere, preces fundo. Christiani est hæc, an pharisæi superbientis oratio? qui etiam in euāgelio loquebatur: Deus, **Luc. 18** gratias ago tibi, quia non sum sicut ceteris homines raptores, iniusti, adulteri, & sicut hic publicanus: ieiuno bis in sabbato: decimas do omnium, quæ possideo. Ille agit gratias Deo, quia ipsius misericordia non sit sicut ceteri homines, peccata detestans, non assumens iustitiam. Tu dicis: Domine, tu nosti, quam sanctæ, quam innocentes, quam puræ sint ab omni fraude, iniuria, & rapina, quas ad te expando, manus. Ille bis in sabbato se ieiunare dicit, ut affligat carnem uitii lasciuiem; & omnis substantiæ suæ dat decimas. Redemptio enim animæ uiri, propriæ diuitiæ. Tu cum diabolo gloriaris, dicente: Super sidera ascendam, **Esa. 14** ponam in cælo thronum meum, & ero similis altissimo. **Psal. 37** David loquitur: Lumbi mei impleri sunt illusionibus, & computruerunt cicatrices meæ a facie insipientiæ meæ. **Psal. 142** Et: Ne intres in iudicium cum seruo tuo. Et: Non iustificabitur in conspectu tuo omnis uiuens. Tu sanctum, & innocentem, & purum te esse iactas, &undas ad Deum expandis manus. nec sufficit tibi in cunctis operibus gloriari, nisi ab omni sermonis orisq. peccato mundum esse te dicas, inferens, quam iusta, quam immaculata labia, & ab omni mendacio libera. Ille canit: Omnis autem homo mendax: & hoc ipsum confirmat apostolica auctoritas, ut sit Deus uerax, omnis autem homo mendax: & tu ab omni mendacio immaculata, & iusta, & libera possides labia? **Esa. 6** Esaias plangit: Heu mihi misero, quoniam compunctus sum: quia, cum sum homo, & immunda labia habeam, in medio quoque populi immunda labia habentis ego habito: & postea Seraph ignitum carbonem forcipe comprehensum defert ad prophetæ labia purganda, non, ut tu loqueris, arrogantis, sed sua uitia consentis: iuxta illud **Psal. 119** quod in psalmo dicitur: Quid detur tibi, aut quid apponatur tibi ad linguam dolosam? Sagittæ potentis acutæ cum carbonibus desolatoriis. Et post tantum tumorem, orantibusq.

risq. iactantiam , & confidentiam sanctitatis , quasi stultus
 stultis persuadere conaris : ut in extremo dicas , quibus ti-
 bi , ut mihi miserearis , preces fundo . Si sanctus es , si in-
 nocens , si ab omni sorde purgatus ; si nec sermone , nec
 opere peccasti , dicente Iacobo : Qui in uerbo non peccat , *Iac. 3*
 iste perfectus est uir : & nemo potest refrenare linguā suam :
 quo modo misericordiam deprecaris , ut uidelicet plangas
 te , & fundas preces ; quia sanctus , & purus es , & innocēs ,
 immaculatisq. labiis , & ab omni liber mendacio , Dei si- *Matth. 27*
 milis potestati ? Sic Christus orauit in cruce : Deus Deus *Psal. 21*
 meus , ut quid dereliquisti me ? longe a salute mea , uerba *Luc. 23*
 delictorum meorum . Et rursus : Pater , in manus tuas cō- *Luc. 10*
 mendo spiritum meum . Et : Pater , ignosce eis : quod enim *Luc. 11*
 faciunt , nesciunt . qui pro nobis agens gratias dixerat : Cō *Matth. 6*
 fiteor tibi Domine pater celi & terræ . Sic docuit aposto-
 los suos , ut quotidie in corporis illius sacrificio credentes
 audeant loqui : Pater noster , qui es in cælis , sanctificetur no-
 men tuum . Illi nomen Dei , quod per se sanctum est , in se
 sanctificari cupiunt : tu dicis , nosti Domine , quam sanctæ ,
 & quam innocentes , & quam puræ manus meæ sint . Illi in-
 ferunt : Adueniat regnum tuum : spem regni futuro tempo-
 re præstolantes : ut , regnante Christo , nequaquam regnet
 peccatum in mortali eorum corpore : iunguntq. Fiat uo-
 luntas tua , sicut in cælo , & in terra : ut imitetur angelos
 humana fragilitas , & uoluntas Domini compleatur in ter-
 ra . Tu dicis : potest homo , si uoluerit , omni carere peccato .
 Panem quotidianum , siue super omnes substantias , uentu-
 rum apostoli deprecantur , ut digni sint assumptione corpo-
 ris Christi . Et uos per nimiam sanctitatem , securamq. iu-
 stitiam , audacter uobis cælestia dona uindicatis . Sequitur :
 Dimitte nobis debita nostra , sicut & nos dimittimus debi-
 toribus nostris . De baptismatis fonte surgentes , & regene-
 ratī in Dominum saluatorem , impleto illo , quod de se
 scriptum est : Beati , quorum remissæ sunt iniquitates , & *Psal. 31*
 quorum tecta sunt peccata : statim in prima communione
 corporis Christi dicunt : Et dimitte nobis debita nostra :

S s s quæ

quæ illis fuerant in Christi cōfessione dimissa : & tu arrogās
 & superbus de sanctarum puritate manuum , & mūdicia elo
 qui gloriaris . Quamuis sit hominis perfecta conuersio , &
 post uitia atque peccata uirtutum plena possessio : numquid
 possunt sic esse sine uitio , quo modo illi , qui statim de Chri
 sti fonte procedunt ? Et tamen iubentur dicere : Dimitte no
 bis debita nōstra , sicut & nos dimittimus debitoribus no
 stris : non humiliatis mendacio , ut tu interpretaris , sed pano
 re fragilitatis humanæ suam conscientiam formidantis . Illi
 dicunt : Ne nos inducas in tentationem : tu cum Iouiniano
 loqueris , eos , qui plena fide baptisma consecuti sunt , tenta
 ri ultra & peccare non posse . Ad extremum inferunt : Sed li
Cant. 8 bera nos a malo . Quid precantur a Domino , quod habent
 in liberi arbitrii potestate ? O homo nunc mundus factus es
 in lanacro , & de te dicitur : Quæ est ista , quæ ascendit de al
 bata , innitens super fratruelem suum ; ut lota quidem sit ,
 sed custodire non ualeat puritatem , nisi a domino Deo sustē
 tetur . Quo modo cupis Dei misericordia liberari , qui paulo
 ante liberatus es a peccatis , nisi hac ratione , quā diximus ;
Luc. 17 ut , cum omnia fecerimus , nos inutiles esse fateamur ? Ora
Luc. 18 tio ergo tua , pharisæi uincit superbiam , & publicani compa
 ratione damnatur : qui de longe stans , oculos ad Deum nō
 audebat attollere , sed percutiebat pectus suū , dicens : Deus ,
 propitius esto mihi peccatori . Vnde profertur Domini sen
 tentia : Dico uobis , descendit hic iustificatus in domum suā ,
 plus quam ille . Omnis enim , qui se exaltat , humiliabitur :
 & qui se humiliat , exaltabitur . Apostoli humiliantur , ut exal
 tentur : discipuli tui eleuantur , ut corruant . Eidem adulans
 uiduæ non erubescis dicere pietatem , quæ nusquam reperit
 ur in terra ; & ueritatem , quæ ubique peregrina sit , in illa
 potissimum cōmorari : nec recordaris illius sententiæ : Po
Isa. 3 pulus meus , qui beatum te dicunt , seducunt te , & semitas
 pedum tuorum supplantāt : laudasq. eam uocibus , & dicis :
 O te felicem nimium , o beatam , si iusticia , quæ esse iam nō
 nisi in celo creditur , apud te solam inueniatur in terris . Do
 cere est , hoc , an occidere ? leuare de terra , an præcipitare de
 celo ?

celo ? id mulierculæ tribuere, quod angeli non audeant usurpare ? Si autem pietas, ueritas, atque iustitia non inueniuntur in terris, nisi in una muliere : ubi erunt iusti tui, quos absque peccato in terris esse iactabas ? Quæ duo capitula orationis, & laudis, soles cum tuis iurare discipulis non esse tua, cum perspicue in eis styli tui splendor eluceat ; & tanta sit uenustas eloquii Tulliani, ut testudineo incedens gradu, quæ secreto docēs, mittisq. uenalia, publice non audeas profiteri . O te felicem, cuius præter discipulos nemo conscribit libros : ut, quidquid uideris displicere, non tuum, sed alienum esse contendas . Et quis ille tanti erit ingenii, ut leporem tui sermonis possit imitari ? c r r . Non possum ultra differre : omnis uincitur patientia uestrorum iniquitate uerborum . Oro te, quid infantuli peccauere ? nec conscientia eis delicti impunitari potest, nec ignorantia, qui iuxta Ionam prophetam ^{Ion. 4} manum dexteram nesciunt & sinistram . Peccare non possunt, & possunt perire : genua labant, uagitus uerba non explicant, balbutiens lingua ridetur, & æternæ miseræ cruciatus miseris præparantur . a r . Ah nimium disertus esse cœpisti, ut non dicam eloquens, postquam discipuli tui uersi sunt in magistros . Antonius, orator egregius, in cuius laudibus Tullius pertonat, disertos se ait uidisse multos, eloquentem adhuc neminem . Noli ergo mihi oratorum & non tuis floribus ludere, per quos solent imperitorum atque puerorum aures decipi : sed simpliciter dic mihi, quid sentias . c r r . Hoc dico, concedas mihi saltem eos esse sine peccato, qui peccare non possunt . a r . Concedam, si in Christo fuerint baptizati : nec me tenebis in assensum sententiæ tuæ, qua dixisti posse hominem sine peccato esse, si uelit . Isti enim nec possunt, nec uolunt ; sed sine ullo peccato per Dei gratiam sunt, quam in baptismo susceperunt . c r r . Cogis me, ut ad inuidiosum illud ueniam, & dicam tibi . Quid enim peccauerunt ? ut statim in me populorum lapides cōicias, & quem uiribus non potes, uoluntate interficias . a r . Ille hæreticum interficit, qui esse hæreticum patitur . Ceterum nostra correptio, uiuificatio est : ut hæresi moriens, uiuas

catholicæ fidei. **CR I.** Si nos scitis hæreticos, cur non accusatis? **AR.** Quia Apostolus me docet hæreticum post unam & secundam correptionem uitare, non accusare, sciens quia peruersus sit, & suo iudicio damnatus. Alioqui stultissimum est, super fide mea me ex alterius pendere iudicio. Quid enim, si te alius catholicum dixerit, statim ne assensum tribuam? Quicumque te defendêrit, & peruersa credentem bene sentire dixerit, non hoc agit, ut te infamia liberet, sed ut se infamet perfidiæ. Multitudo sociorum nequaquam te catholicum, sed hæreticum esse demonstrabit. Verum hæc ecclesiastico calcentur pede; ne quasi paruulis flentibus tristior quædam imago monstretur. Hoc nobis præstet Dei timor, ut omnes alios contemnamus timores. Proinde aut defende, quod credis; aut relinque, quod defendere non potes. Quicumque in defensionem tuam adduxeris, non patronum, sed socium nominabis. **CR I.** Dic, quæso, & me omni libera quæstione, quare infantuli baptizentur? **AR.** Vt eis peccata in baptismate dimittantur. **CR I.** Quid enim commeruere peccati? Quisquam ne soluitur non ligatus? **AR.** Me interrogas? Respondebit tibi euangelica tuba, doctor gentium, uas aureum in toto orbe resplendens; Regnauit mors ab Adam usque ad Moysen: etiam in eos, qui non peccauerunt, in similitudinem præuaricationis Adam, qui est forma futuri. Quod si obieceris, dici, esse aliquos, qui non peccauerunt: intellige eos illud non peccasse peccatum, quod peccauit Adam præuaricando in paradiso, præceptum Dei. Ceterum omnes homines aut antiqui propagatoris Adam, aut suo nomine tenentur obnoxii. Qui paruulus est, parentis in baptismo uinculo soluitur. qui eius ætatis est, quæ potest sapere; & alieno & suo, Christi sanguine, liberatur. Ac ne me putes hæretico sensu hoc intelligere; beatus martyr Cyprianus, cuius te in scripturarum testimoniis dirigendis æmulum gloriaris, in epistola, quam scribit ad episcopum Fidum de infantibus baptizandis, hæc memorat. Porro autem si etiã grauissimis delictoribus, & in Deum multo ante peccantibus,

tibus, cum postea crediderint, remissio peccatorum datur, & a baptismo atque gratia nemo prohibetur: quanto magis prohiberi non debet infans, qui recens natus nihil peccauit, nisi quod, secundum Adam carnaliter natus, contagium mortis antiquæ primæ natiuitate contraxit: qui ad remissionem peccatorum accipiendam hoc ipso facilius accedit, quod illi remittuntur non propria, sed aliena peccata. Et ideo, frater carissime, hæc fuit in concilio nostra sententia, a baptismo atque gratia Dei, qui omnibus misericors, & benignus, & pius est, neminem per nos debere prohiberi. quod cum circa uniuersos obseruandum sit, atque retinendum, tum magis circa infantes ipsos & recens natos obseruandum puta, qui hoc ipso de ope nostra ad diuinam misericordiam plus merentur, quod in primo statim natiuitatis suæ ortu plorantes, ac flentes, nihil aliud faciunt, quam deprecantur. Scripsit dudum uir sanctus, & eloquens, episcopus Augustinus ad Marcellinum, qui postea sub inuidia tyrannidis Heraclianæ ab hæreticis innocens cæsus est, duos libros de infantibus baptizandis contra hæresim uestram, per quam uultis asserere baptizari infantes, non in remissionem peccatorum, sed in regnum cælorum, iuxta illud quod scriptum est in euangelio: Nisi quis renatus Ioan. 3 fuerit ex aqua & Spiritu sancto, non potest intrare in regnum cælorum: Tertium quoque ad eundem Marcellinum contra eos, qui dicunt idem quod uos, posse hominem sine peccato esse, si uelit, absque Dei gratia: et quartum nuper ad Hilarium contra doctrinam tuam, multa peruersa fingentem. alios quoque specialiter tuo nomini cudere dicuntur, qui necdum in nostras uenere manus. Vnde superlegendum huic labori censeo: ne dicatur mihi illud Horatii: In siluam ne ligna feras. Aut enim eadem diceremus ex superfluo: aut, si noua uouerimus dicere, a clarissimo ingenio occupata sunt meliora. Hoc unum dicam, ut tandem finiatur oratio: aut nouum uos debere symbolum tradere, ut post Patrem & Filium & Spiritum sanctum baptizetis infantes in regnum cælorum: aut, si unum & in paruulis &

in magnis habetis baptisma, etiam infantes in remissione peccatorum baptizandos in similitudinem præuagationis Adam credatis. Quod si iniusta uobis uidetur alienorum remissio peccatorum, qua non indiget qui peccare non potuit: transite ad Amasium uestrum, qui præterita in cælis & antiqua delicta solui dicit in baptismo: ut, cuius in ceteris auctoritate ducimini, etiam in hac parte errorem sequamini.

ARGVMENTVM.

THEOPHILVS Alexandrinus Episcopus exemplo eius quod a se in Aegypto factum est, Epiphanium, Salaminæ Cypri præsulem, hortatur, ut congregata Synodo in Cypri insula, Origenem damnet, eiusq. rei litteras ad uicinas provincias, & Constantinopolim statim postea mittat.

THEOPHILVS EPIPHANIO.

EPISTOLA LXVII.

Hier. 1

DOMINVS, qui locutus est ad prophetam: Ecce

D constitui te hodie super gentes & regna, eradicare, & suffodere, & disperdere, & rursus, ædificare, ac plantare, singulis temporibus eandem Ecclesiæ suæ largitur gratiam: ut integrum corpus conseruetur, & in nullo hæreticorum dogmatum uenena praualeant. Quod qui-

Eph. 5

dem nunc uidemus expletum. nam Ecclesia Christi, quæ non habet maculam, neque rugam, aut aliquid istiusmodi, egredientes de cauernis suis, Origenis colubros euangelico ense truncauit; & secundum Nitriæ monachorum agmen, contagione pestifera liberauit. Pauca ergo ex iis, quæ gesta sunt, in generali epistola, quam ad omnes in commune direxi, prout patiebatur angustia temporis, comprehendere. Dignationis tuæ est, quæ in huiusmodi certaminibus sæpe ante nos pugnavit, & positos in prælio consolari, & congregare totius insulæ episcopos, ac synodicas litteras,

tama

nam ad nos, quā ad Constantinopolitanæ urbis episcopū
& si quos alios putaueris, mittere: ut consensu omnium &
ipse Origenes nominatim, & hæresis nefaria cōdemnetur.
didici enim, quod calumniatores ueræ fidei, Ammonius,
Eusebius, & Eutinius, nouo pro hæresi furore bacchantes,
Constantinopolim nauigarint; ut & novos, si quos uolue-
rint, decipiant; & ueteribus suæ impietatis sociis coniungā-
tur. Curæ igitur tuæ sit, ut cunctis episcopis per Isauriam,
atque Pamphylia, & ceterarum prouinciarū, quæ in ui-
cino sunt, rei ordinem pandas; & nostram, si dignum pu-
tas, epistolam subicias: ut omnes uno spiritu congrega-
ti, cum uirtute domini nostri Iesu Christi tradamus eos sa-
tanæ in interitum impietatis, quæ possidet eos. Et ut cele-
rius nostra Constantinopolim scripta perueniant, mitte in-
dustrium uirum, & aliquem de clericis, sicut & nos de ipsis
Nitrix monasteriis patres monachorum, cum aliis sanctis
& continentissimis uiris misimus, qui possint cunctos in
præsenti docere, quæ gesta sunt: & super omnia quæsu-
mus, ut impensas ad Dominum fundas preces; quo possi-
mus etiam in isto certamine uictoriam consequi. nō enim
parua lætitia & in Alexandria & per totā Aegyptum popu-
lorum corda peruasit: ex quo pauci homines eiectioni sunt, ut
purum corpus Ecclesiæ permaneret. Saluto fratres, qui
tecum sunt. te plebs, quæ nobiscū est, in Domino salutat.

ARGUMENTVM.

*THEOPHILO respondens, quod canonum obseruantiam mo-
auerit, gratias agit. illos, precipueq. Romanam fidem sibi cor-
di esse ait: & sicut, quod olim contra Origenistas tacuerit, non
reprehendit; ita, quod nimia eos corrigi nunc lenitate putet,
non laudat.*

HIERONYMVVS THEOPHLO.

EPISTOLA LXVIII.

MEMINIT beatitudo tua, quod eo tempore, quo ta-
cebas, numquam ab officiis meus sermo cessauerit; nec

§§§ 4 cons

considerauerim, quid tu pro dispensatione tunc faceres, sed quid me facere conueniret. & nunc, sumptis dignationis tuæ epistolis, fructū aliquem cepisse me uideo euangelicæ lectionis. Si enim duri iudicis sententiam crebra mulieris inflexit petitio: quanto magis paterna uiscera interpellatione sedula molliuntur? Quod de canonibus ecclesiasticis mones, gratias agimus. Quem enim diligit Dominus, corripit; & flagellat omnem filium, quem recipit. Sed tu scito nobis nihil esse antiquius, quam Christi iura seruare, nec patrum transferre terminos, semperq. meminisse, Romanam fidem apostolico ore laudatam: cuius se esse participem Alexandrina ecclesia gloriatur. Super nefaria hæresi, quod multam patientiam geris, & putas Ecclesiæ uisceribus incubantes tua posse corrigi lenitate, multis sanctis displicet: ne, dum paucorum penitentiam præstolaris, nutrias audaciam perditorum, & factio robustior fiat. Vale in Christo.

ARGUMENTVM.

Quod uicti, explosiq. ex Aegypto, & Nitriæ monasterijs Origeniste sint, Theophilus Hieronymum certiore reddidit.

THEOPHILVS HIERONYMO.

EPISTOLA LXIX.

ANCTVS episcopus Agatho, cum dilectissimo diacono Athanasio, in ecclesiastica directus est causa: quam cum didiceris, non ambigo quin nostrum studium probes, & in Ecclesiæ uictoria glorieris. namque Origenis hæresim in monasterijs Nitriæ quidam nequam & furiosi homines serere & fundere cupientes, prophetica falce succisi sunt: quia recordati sumus commonentis apostoli: Argue eos seuerè. Festina igitur & tu, partem huius præmii recepturus, deceptos quosque emendare sermonibus. Optamus, si fieri potest, in diebus nostris catholicam fidem, & Ecclesiæ regulas cum subiectis nobis populis custodire, & omnes nouas sopire doctrinas.

AR-

ARGVMENTVM.
RESPONDENS Theophilo, quod Origenistarum factio ex Aegypto eius opera expulsa sit, suiq; usque in Palestinam hereticos sint persecuti, maxime latatur.

HIERONYMVS THEOPHILO.

EPISTOLA LXX.

UPER tuæ beatitudinis percepi scripta, emendantia uetus silentium, & me ad solitum officium prouocantia. unde licet per sanctos fratres, Priscum, & Eubulum, tuus ad nos sermo cessauerit: tamen, quia uidimus, illos, zelo fidei concitados, raptim Palestinæ lustrasse regiones, & dispersos regulos usque ad suas latebras persecutos; breuiter scribimus, quod totus mundus exultet, & in tuis uictoriis gloriatur; erectumq; Alexandriae uexillum crucis, & aduersus hæresim trophæa fulgentia, gaudens populorum turba prospicit. Macte uirtute, macte zelo fidei: ostendisti, quod hucusque taciturnitas dispensatio fuit, non consensus. Libere enim reuerentiæ tuæ loquor. Dolebamus te nimium esse patientem; & ignorantes magistri gubernacula, gestiebamus in interitum perditorum: sed, ut uideo, exaltasti manum diu, & suspendisti plagam, ut ferires fortius. Super susceptione cuiusdam non debes contra urbis huius dolere pontificem: quia nihil tuis litteris præcepisti: & temerarium fuit de eo, quod nesciebat, ferre sententiam: tamen reor illum nec audere, nec uelle te in aliquo lædere.

ARGVMENTVM.

QVOD Theophili Alexandrini opera, Synodica auctoritate, Origenistarum factio ex Aegypto expulsa, eoque exemplo ex Syria, & Italia expulsa; summusq; ea de re Pontifex certior factus sit; laudat. Synodica, si qua sunt, postulat; & ut ad ceteros occidentales episcopos eadem scribat, hortatur.

VPLICEM mihi gratiam beatitudinis tuæ litteræ
 D præstiterūt; quod & sanctos & uenerabiles Agathone
 episcopum; & diaconū Athanasium habuerint
 portitores; & aduersum sceleratissimam hæresim, zelum
 fidei demonstrarint. Vox beatitudinis tuæ in toto orbe per
 tonuit; & cunctis Christi ecclesiis lætantibus, diaboli ue-
 nena siluere. Nequaquam amplius antiquus serpens sibi-
 lat; sed contortus & euisceratus, in cauernarum tenebris
 delitescens, solem clarum ferre non sustinet. qui quidem su-
 per hac re, & antequam scriberes, ad Occidentem epistolas
 miseram, ex parte hæreticorum strophas meæ linguæ ho-
 minibus indicans. Ex dispensatione Dei factum puto, ut
 eo in tempore tu quoque ad Anastasium Papam scriberes,
 & nostram dum ignoras sententiam roborares. Verum a te
 nunc admoniti, magis studium accommodabimus, ut hic
 & procul simplices ab errore reuocemus. Nec timeamus
 subire odia quorundam. nō enim debemus hominibus pla-
 cere, sed Deo: quamquam ardentius ab illis defendatur
 hæresis, quam a nobis oppugnetur. Simulq. obsecro, ut,
 si qua synodica habes, ad me dirigas; quo possim, tanti
 Pontificis auctoritate firmatus, liberius & confidentius pro
 Christo ora referare. Vincentius presbyter ante biduum,
 quam hanc epistolam darem, de urbe uenit, & suppliciter
 te salutat, crebroq. sermone concelebrat Romam, & to-
 ram Italiam, tuis post Christum epistolis liberatam. Ad-
 nitere ergo Papa amantissime, atque beatissime, & per
 omnem occasionem ad Occidentales episcopos scribe, ut
 mala germina acuta, ut ipse significas, succidere falce non
 cessent.

ARGV-

ARGUMENTVM.

MONET, ut, explosis Origenistis, eos etiam, quæ clam
Origenem sequuntur, ejciat.

THEOPHILVS HIERONYMO.

EPISTOLA LXXII.

INDICI, quod & sanctitas tua nouerit Theodorum
D monachum; eiusq. studium comprobauit, quia,
cum a nobis Romæ nauigaturus exiret, noluit an-
te proficisci, nisi te, & sanctos fratres, qui tecum sunt in
monasterio, quasi sua uiscera amplexaretur, & inuiferet.
Quem cum susceperis, pro Ecclesiæ tranquillitate lætare.
uidit enim cuncta Nitriæ monasteria, & referre potest con-
tinentiam & mansuetudinem monachorum; quo modo,
extinctis & fugatis Origenis sectatoribus, pax Ecclesiæ red-
dita sit, & disciplina Domini conseruetur. Atque utinam
apud uos quoque deponerent hypocrisim, qui occulte di-
cuntur subruere ueritatem. de quibus non bene sentientes,
in iis regionibus fratres, hæc me scribere prouocarunt.
Quamobrem cauete, & effugite huiusmodi homines, iux-
ta quod scriptum est: Si quis non affert ad uos ecclesiasti- 2. Ioan. 2
cam fidem, huic nec Aue dixeritis. Quamquam ex super-
fluo faciam, hæc tibi scribere, qui errantes potes ab errore
reuocare: tamen nihil nocet & prudentes & eruditos uiros
pro solitudine fidei commoneri. Omnes fratres, qui te-
cum sunt, nomine meo salutari uolo.

ARGUMENTVM.

NUNCIAT Hieronymo, opera Theophili Alexandrini Ori-
genistarum hæresim damnatam: exemplar epistolæ, quæ de hæ-
re a Theophilo acceperat, mittit: et, si quid latine Hieronymus
contra eam hæresim scripsit, ut edat, hortatur.

EPISTOLA LXXIII.

GENERALIS epistola, quæ ad omnes catholicos
G scripta est, ad te proprie pertinet; qui zelum fi-
 dei aduersus cunctas hæreses habens, Origenis pro-
 prie, & Apollinarii discipulis aduersaris: quorum uenena-
 tas radices, & in altum defixam impietatem, omnipotens
 Deus protraxit in medium; ut in Alexandria prodita, in
 toto orbe arescerent. Scito enim, fili carissime, Amalech
Exod. 17 usque ad stirpem esse deletum, & in monte Raphidim ere-
 ctum trophæum crucis. Etenim quo modo, porrectis in al-
 tum Moyfi manibus, uincebat Israel: sic Dominus confor-
 tauit famulum suum Theophilum: ut super altare ecclesiæ
 Alexandrinæ contra Origenem uexillum poneret; & im-
 pleretur in eo, quod dicitur: Scribe signum hoc: quia de-
 lebo funditus Origenis hæresim a facie terræ cum ipso
 Amalech. Et ne uidear eadem rursus iterare, & prolixio-
 rem epistolam texere; ipsam ad uos scriptam direxi: ut sci-
 re possitis, quæ nobis scripserit; & quantum boni ultimæ
 ætati meæ concesserit Dominus; ut, quod semper clama-
 bam, tanti Pontificis testimonio probaretur. Iam autem
 puto & te aliquid operis edidisse, & iuxta priorem episto-
 lam, qua te super hac re fueram cohortatus, elimasse librū,
 quem tuæ linguæ homines legant. audio enim & ad Oc-
 cidentem quorundam hominum naufragia peruenisse:
 qui non contenti perditione sua, uolunt plures mortis ha-
 bere participes: quasi multitudo peccantium scelus mi-
 nuat; non, numerositate lignorum, maior gehennæ flam-
 ma succrescat. Sanctos fratres, qui tecum sunt in monaste-
 rio Domino seruientes, & tecum, & per te plurimum salu-
 tamus.

AE

ARGVMENTVM.

MARCELLAM salutans excusat se ideo paucis scripsisse, quod in conferenda Aquilæ editione tum Hebræorum uoluminibus occupatus esset: & quia in scribendo nimium fuerat brevis, duas præterea aliis directas epistolas, sibi quoque legendas, litteris adiungit.

HIERONYMVS MARCELLAE.

EPISTOLA LXXIIII.

TAM paruum epistolam scriberem, causæ duplicis fuit; quod & tabellarius festinabat; & ego, alio opere detentus, hoc quasi *παρέργον* me occupare nolui. Quæris, quidnam illud sit, tam grande, tam necessarium, quo epistolice confabulationis munus exclusum sit. Iampridem cum uoluminibus Hebræorum editionem Aquilæ conféro; ne quid forsitan, propter odium Christi, synagoga mutauerit: & ut amicæ menti fatear, quæ ad nostram fidem pertineant roborandam, plura reperio. Nunc, a Prophetis, Salomone, Psalterio, Regnorumq. libris examussim recensitis, Exodum teneo, quem illi Ellesemoth *עלמסות* uocant, ad Leuiticum transiturus. Vides igitur, quod nullum officium huic operi præponendum est. attamen, ne Currentius noster forte frustra cucurrerit, duas epistolas, quas ad sororem tuam Paulam, eiusq. pignus Eustochium miseram, huic sermunculo annexui: ut, dum illas legeris, & in his aliquid doctrinæ pariter ac leporis inueneris, putes tibi quoque scripta esse, quæ illis scripta sunt. Albinam, communem matrem, ualere cupio. de corpore loquor, ut spiritu ualeat, non ignorans. eamq. per te salutari obsecro, & duplici pietatis officio focillari; quod in una atque eadem, Christiana simul diligatur, & mater.

ARGV-

VIGILANTIVM, olim in Aegypto cōmorantem, ipsiq. Hieronymo amicum, quod Ruffino adiunctus Hieronymum uti Origenistam calumniaretur, & libros ea de re propidiam se editurum minitaretur, coarguit; & cur Origenem uel legerit, uel transtulerit, rationem reddit.

HIER. ADVERSVS VIGILANTIVM.

EPISTOLA LXXV.

I VSTVM quidem fuerat, nequaquam tibi litteris satisfacere; qui tuis auribus non credidisti: neque enim schedulæ potes acquiescere, qui uiuo sermōni non accomodasti fidem: sed, quia Christus perfectæ nobis humilitatis exemplar in se tribuit; dans osculum proditori, & latronis pēnitentiā in patibulo suscipiens: eadem **Luc. 22. 23** absenti significo, quæ præsenti quoque locutus sum, me ita Origenem legisse, uel legere; ut Apollinarium, uel ceteros tractatores; quorum in quibusdam libros non recipit Ecclesia: non quo omnia dicam esse damnanda, quæ in illorum uoluminibus continentur; sed quod quædam reprehendenda confitear. Verum, quia operis mei est & studii, multos legere; ut ex plurimis diuersos flores carpam; non tam probaturus omnia, quam quæ bona sunt electurus; assumo multos in manus meas: ut a multis multa cognoscam, secundum illud quod scriptum est: Omnia legentes, **1. Theff. 5** quæ bona sunt retinentes. Vnde satis miror, te uoluisse Origenis mihi obicere dogmata, cuius in plerisque errore usque ad hanc ætatem penitus ignoras. Ego nē hæreticus? & cur me, quæso, hæretici non amant? Tu orthodoxus? qui etiam contra sententiam tuam, & linguam alia prædicantem, aut inuitus subscripsisti, & præuarcicator es; aut uolens, & hæreticus. Dimisisti Aegyptum, & cunctas prouincias reliquisti: in quibus sectam tuā, libera plerique fronte defendunt: & elegisti me ad insectandum, qui omnia contra Ecclesiam dogmata reprehendo, & publica uoce condemno. Origenes hæreticus: quid ad me, qui illum in plerisque

risque hæreticum non nego? Errauit de resurrectione corporis, errauit de animarum statu, de diaboli pœnitentia; & quod his maius est, filium Dei & Spiritum sanctum in commentariis Esaïæ, Seraphim esse testatus est. Si errasse non dicerem eum, & hæc quotidie nō anathematizare, essem erroris illius socius. neque enim ita debemus bona eius recipere, ut mala quoque suscipere cogamur. At idem & scripturas in multis bene interpretatus est; & prophetarum obscura disseruit; & tam noui, quam ueteris testamenti reuelauit maxima sacramenta. Si igitur, quæ bona sunt, transtuli; & mala uel amputaui, uel correxi, uel tacui: arguendus sum, cur per me Latini bona eius habeant, & mala ignorent? Si hoc crimen est: arguatur & confessor Hilarius, qui Psalmorum interpretationem, & Homilias in Iob ex libris eius, idest, ex Græco in Latinum transtulit. Sit in culpa eiusdem cōfessionis Vercellenis Eusebius: qui omnium Psalmorum commentarios hæretici hominis uertit in nostrum eloquium; licet, hæretica prætermittens, optima quæque transtulerit. Taceo de Victorino Pictauiensi, & ceteris, qui Origenem in explanatione dumtaxat scripturarum secuti sunt, & expresserunt: ne non tam me defendere, quam socios criminis uidear quærere. Ad te ipsum ueniam: cur tractatus eius in Iob descriptos habes? in quibus contra diabolum, & de stellis, cæloq. disputans, quædam locutus est, quæ Ecclesia non recipit? Tibi soli licet, τῶ σοφωτάτῳ κρανίῳ, de cunctis, & Græcis & Latinis tractatoribus ferre sententiã, & quasi censoria uirgula, alios euicere de bibliothecis, alios recipere, & cum tibi placuerit, me uel catholicum, uel hæreticum pronunciare: nobis non licet peruersa respuere & damnare, quæ sæpe damnauimus. Lege ad Ephesios libros: lege cetera opuscula mea, & maxime in Ecclesiasten commentarios: & liquido peruidebis, me ab adolescentia numquam alicuius auctoritate deterritum acquiescisse hæreticæ prauitati. Nō parum est, scire, quod nescias: prudentis hominis est, nosse mensuram suam, nec, zelo diaboli concitatum, imperitiæ suæ cunctum

cunctum orbē testem facere. Scilicet gloriari cupis, & in patria tua iactitas, me non potuisse respondere eloquentiæ tuæ, & acumen in te Chrysippi formidasse. Christiana uerecundia teneor, & cellulae meae latebras nolo mordaci sermonereferare. alioqui proferrem *πάσαν τὴν ἀριστείαν σου καὶ τροπαιοφορίαν*. Sed hæc aliis aut loquenda, aut ridenda dimitto. Ego, quasi Christianus cum Christiano loquens, obsecro te frater, ne plus uelis sapere, quam sapias: ne uel innocentiam, uel simplicitatem tuam, uel certe ea, quæ taceo, & te non intelligente, ceteri intelligunt, stylo proferas, & ineptiarum tuarum cunctis cachinnum præbeas. Aliud a parua ætate didicisti; aliis assuetus es disciplinis. Non est eiusdem hominis, & aureos nummos, & scripturas probare; & degustare uina, & prophetas, uel apostolos intelligere. Me laceras: sanctum fratrem Oceanum in culpani hæreseos uocas: presbyterorum tibi Vincentii, & Pauliniani, & fratris Eusebii iudicium displicet. Solus es Cato, Romani generis disertissimus, qui testimonio tuo, & prudentiæ uelis credi. Recordare, quæso, illius diei; quando, me de resurrectione & ueritate corporis prædicante, ex latere subsultabas, & plaudebas manu, & applaudebas pede, & orthodoxum conclamabas. postquam nauigare cœpisti; & ad intimum cerebrum tuum sentinae putredo peruenit; tunc nos hæreticos recordatus es. Quid tibi faciam? Credidi sancti presbyteri Paulini epistolis; & illius super nomine tuo non putavi errare iudicium. Et, licet statim, accepta epistola, *ἀσυνάρτητον* sermonem tuum intelligerem: tamen rusticitatem & simplicitatem magis in te arbitrabar, quam ueritatem. Nec reprehendo sanctum uirum. maluit enim apud me dissimulare, quod nouerat, quā portitorem clientulum suis litteris accusare. Sed memet ipsum arguo, qui alterius potius acquieui, quam meo iudicio; & oculis aliud cernentibus, aliud schedulae credidi, quam uidebam. Quamobrem desine me lacescere, & uoluminibus tuis obruere. Parce saltē nummis tuis, quibus notarios librariorumque conducens, eisdem & scriptoribus

ribus uteris, & fautoribus: qui te ideo forsitan laudant, ut
lucrum in scribendo faciant. Si libet exercere ingenium;
trade te grammaticis, atque rhetoribus; disce dialecticā;
sectis intruere philosophorum: ut, cum omnia didiceris,
saltem tunc tacere incipias. Quamquam stulte faciam, ma-
gistro cunctorum magistros quærere, & ei modum impo-
nere, qui loqui nescit, & tacere non potest. Verum est illud
apud Græcos prouerbium, ὄνος πρὸς λύραν. Ego reor, &
nomen tibi κατ' ἀντίφρασιν impositum. nam tota mente
dormitas, & profundissimo non tam somno stertis, quam
lethargó. Inter ceteras quippe blasphemias, quas ore sa-
crilego protulisti, ausus es dicere: montem, de quo absci-
sus est in Daniele lapis sine manibus, esse diabolum, & lapí Dan. 2
dem Christum: qui quia assumpsit corpus ex Adam, qui
diabolo ante per uitia cohæserat, natum esse de uirgine:
ut a monte, hoc est, a diabolo hominem separaret. O præ-
cidendam linguam, ac per partes, & frustra lacerandam.
Quisquam ne Christianus Deum patrem omnipotentem
in personam diaboli interpretatur, & tanto piaculo totius
orbis aures maculat? Si interpretationē tuam quisquā non
dicam catholicorum, sed hæreticorum, siue gentilium um-
quam recepit: piū sit quod locutus es. sin autem tantū
nefas numquam audiuit Christi Ecclesia; & per tuum pri-
mum os ipse se montem interpretatus est, qui dixerat: Ero Esa. 14
similis altissimo: age pænitentiam, & in sacco uersare, &
cinere; & tantum scelus iugibus absterge lacrymis: si tan-
dem tibi dimittatur hæc impietas, & iuxta errorem Orige-
nis tunc ueniam consequaris, quando consecuturus est &
diabolus, qui numquam plus, quam per os tuum, depre-
henditur blasphemasse. Meam iniuriam patienter tuli: im-
pietatem contra Deum ferre non potui. unde & uisus sum
mordacius in extrema epistola scribere, quam promiserā.
quamquam post priorem pænitentiam, qua a me ueniam
deprecatus es, iterum cōmisisse, unde agas pænitentiam,
stolidissimum sit. Tribuat tibi Christus, ut audias, & ta-
ceas; ut intelligas, & sic loquaris,

TRANQVILLINVM docet, quod sicut Origenes legendus est ut interpres, ita ut dogmatistes est respuendus.

HIERONYMVVS TRANQVILLINO.

EPISTOLA LXXVI.

AIORA spiritus uincula esse, quam corporum, si
 M olim ambigebamus, nunc probauimus; dum & mihi sanctitas tua hæret animo, & ego tibi Christi amore coniungor. Vere enim & simpliciter candidissimo pectori tuo loquor: ipsa schedula, & muti apices litterarum inspirant in nos tuæ mentis affectum. Quod dicis Origenis multos errore deceptos, & sanctum filium meum Oceanum illorum insanix repugnare & doleo simul, & gaudeo: dum aut supplantati sunt simplices; aut ab erudito uiro errantibus subuenitur. Et quia mea paruitatis quæris sententiam, utrum, secundum fratrem Faustinum, penitus respuendus sit, an, secundum quosdam, legendus ex parte: ego Origenem propter eruditionem sic interdum legendum arbitror, quo modo Tertullianum, Nouatum, Arnobium, Apollinarium, & nonnullos ecclesiasticos scriptores Græcos pariter & Latinos; ut bona eorum eligamus, uitemusque contraria, iuxta apostolum dicentem: Omnia probate, 3. Thess. § quod bonum est tenete. Ceterum qui uel in amorem eius nimium, uel in odium stomachi sui prauitate ducuntur, uidentur mihi illi maledicto prophetico subiaceret: Væ his, Esai. § qui dicunt bonum malum, & malum bonum; qui faciunt amarum dulce, & dulce amarum. nec enim propter doctrinam eius praua suscipienda sunt dogmata: nec propter dogmatum prauitatem, si quos commentarios in scripturas sanctas utiles edidit, penitus respuendi sunt. Quod si contentiosum inter se amatores eius & obtrectatores fune duxerint; ut nihil medium appetant; nec seruent modum, sed totum aut probent, aut improbent: libentius piam rustic-

Hieron. Marco presbytero Celedensi : 1057
flicitatem , quam doctam blasphemiam , eligam . Sanctus
frater Tatianus diaconus te impendio resalutat .

ARGVMENTVM.

AB Arianis agitatus , cum esset in eremo iam iuuenis , Ma-
gio fidei sue de trinitate professionem , cum Romana , & Ale-
xandrina ecclesiis congruentem , exponit ; dolens interea , quod
eorundem factione amici discesserint , ipseque ad relinquenda ea
loca quotidie expetatur .

HIERON. MARCO PRESBYTERO
Celedensi.

EPISTOLA LXXVII.

CREVERAM quidem utendum mihi psalmistæ
D uoce dicentis : Cum confisteret aduersum me pec- *Psal. 38*
cator , obmutui , & humiliatus sum , & filii a bo- *Psal. 37*
nis . Et iterum : Ego uero tamquam surdus non audie-
bam , & tamquam mutus non aperiens os suum , & fa-
ctus sum ut homo non audiens . sed quia caritas omnia su-
perat , & propositum uincit affectu : non tam iniuriam fa-
cientibus reddo uicem , quam tibi respondeo postulanti .
Apud Christianos enim , non qui patitur , ut ait quidam ,
sed qui facit contumeliam , miser est . Et primo quidem , an
requam de fide mea , quam optime nosti , tecum loquar ,
aduersum barbariem istius loci uersu cogor clamare uulga-
to : Quod genus hoc hominum ? quæue hunc tam barba-
ra morem Permittit patria ? hospitio prohibemur arenæ :
Bella cient , primaque uetant consistere terra . &c. Quæ iccir-
co de gentili poeta sumpsimus ; ut , qui Christi pacem nō
seruat , pacem saltem discat ab ethnico . Hæreticus uocor ,
homouision prædicans trinitatem . Sabellianæ impietatis
arguor , tres subsistentes , ueras , integras , perfectasque perso-
nas indefessa uoce pronuncians . si ab Arianis , merito : si
ab orthodoxis ; qui huiusmodi arguunt fidem , orthodoxi
esse desierunt , aut , si eis placet , hæreticum me cum Occide-

T t t 2 te,

te, hæreticū cum Aegypto, hoc est cum Damaso Petroque
condemnent. Quid unum hominem, exceptis sociis, cri-
minantur? Si riuus tenuiter fluit, non est aluei culpa, sed
fontis. Pudet dicere: de cauernis cellularum damnamus
orbem: in sacco & cinere uolutati, de episcopis sententiam
ferimus. Quid facit sub tunica pænitentis regius animus?
Catenæ, sordes, & comæ, non sunt diadematis signa, sed
fletus. Permittant me, quæso, nihil loqui. Cur eum lace-
rant, qui non meretur inuidiam? Hæreticus sum, quid ad
te? quiesce, iam dictum est. Plane times, ne eloquentissi-
mus homo in Syro sermone, uel Græco ecclesias circum-
eam, populos seducam, schisma conficiam. Nihil alicui
præripui, nihil otiosus accipio. Manu quotidie & proprio
sudore quærimus cibum, scientes ab Apóstolo scriptum
3. *Theff. 3* esse: Qui autem non operatur, nec manducet. Hæc, ue-
nerabilis & sancte pater, cum quali gemitu, cum quali do-
lore conscripserim, testis est Iesus. Tacui, numquid semper
tacebo, dicit Dominus? Non mihi conceditur unus angu-
lus eremi: quotidie exposcor fidem, quasi sine fide rena-
tus sim. confiteor, ut uolunt: non placet. subscribo, non
credunt. Vnum tantum placet, ut hinc recedam. Iam iam
cedo: abruperunt partem a me animæ meæ, carissimos
fratres: ecce discedere cupiunt, immo discedunt, melius
esse dicentes, inter feras habitare, quam cum talibus Chri-
stianis: & ego ipse, nisi me & corporis imbecillitas, & hie-
mis retineret asperitas, iam modo fugerem. Verumtamen
dum uernum tempus adueniat, obsecro ut paucis mihi
mensibus eremi concedatur hospitium: aut, si hoc tardum
Psal. 23 uidetur, abscedo. Domine est terra, & plenitudo eius.
Gal. 6 Ascendant soli cælum: propter illos tantum Christus mor-
tuus sit: habeant, possideant, glorientur. mihi autem ab-
sit gloriari, nisi in cruce domini nostri Iesu Christi; per quē
mihi mundus crucifixus est, & ego mundo. De fide autem,
quam dignatus es scribere, sancto Cyrillo dedi conscriptam:
fidem. qui si non credit, alienus a Christo est. ceterum
ego fidei meæ testes habeo aures tuas, & beati fratris Ze-
nobii,

nobis, quem tecum omnes, qui hic sumus, plurimum salutamus.

ARGUMENTVM.

THEOPHILI Alexandrini opera Origenem damnatum rursus nunciat, hortans ut, quod per eum actum est in oriente, curent ut apostolica Roma confirmet auctoritas. Verum quia Origeniste Theophili contra errores Origenis epistolam ab hæreticis immutatam aiebant, rursus alteram eiusdem Theophili epistolam graecam, una cum eius uersione, mittit.

HIER. PAMMACH. ET MARCELLAE.

EPISTOLA LXXVIII.

VR SVM orientalibus uos locupletor meritis; &

R Alexandrinas opes primo Romam uere transmittito.

Deus ab austro ueniet; & sanctus de monte Pharaon, umbra condensa: unde & sponsa lætatur in Cantico canticorum, dicens: In umbra eius concupiui, & sedi, & fructus eius dulcis in faucibus meis. Vere nunc completur Esaiæ uaticinium prædicantis: In die illa erit altare Domini in medio tetrae Aegypti. Vbi abundauit peccatum, superabundauit & gratia. Qui paruulum Christum fouerant, adultum fidei calore defendunt: ut, qui per illos effugerat Herodis manus, effugiat hæreticum blasphemantem. Quem Demetrius Alexandri urbe pepulit, toto orbe fugat Theophilus; ad quem Lucas scripsit Actus apostolorum, qui ex amore Dei nomen inuenit. Vbi nunc est coluber tortuosus? ubi uenenatissima uipera? Prima hominis facies, utero commissa luporum. Vbi hæresis, quæ sibilabat in mundo, & me & Papam Theophilum sui iactabat erroris; latratuque impudentissimorum canum ad inducendos simplices, nostrum mentiebatur assensum? Oppressa est eius auctoritate, & eloquentia, & in morem daemoniorum spirituum de terra loquitur. nescit enim eum, qui desursum ueniens ea loquitur, quæ sursum sunt. atque utinam serpentina

Abac. 3

Cant. 2

Esa. 19

Rom. 5

Act. 1

Ioan. 3

T t t 2 tina

tina generatio aut simpliciter nostra fateatur, aut constanter defendat sua: ut scire ualeamus, qui nobis amandi sint, qui cauendi. Nunc autem, nouum pœnitentiæ genus, oderunt nos, quasi hostes: quorum fidem publice negare non audent. Rogo, quis est iste dolor, qui nec tempore, nec ratione curatur? Inter micantes gladios, iacentia corpora, riuos sanguinis profluentes, iunguntur sæpe hostiles dextræ; & belli rabiem pax repentina commutat. soli sunt huius hæreseos sectatores; qui cum ecclesiasticis non ualent fœderari: quia, quod sermone coguntur dicere, mente condemnant. & si quando aperta blasphemia publicis auribus fuerit reuelata; & uiderint contra se audientium turbam circumfremere: tunc, simulata simplicitate, dicunt audisse se primum, quæ magistrum dicere ante nescierint. cumq. eorum scripta teneantur, uoce negant, quod litteris confitentur. Quid necesse est obsidere Propontidem, mutare loca, diuersas lustrare regiones, & clarissimum Pontificem Christi, eiusq. discipulos rabido ore discerpere? Si uera loquimini, pristinum erroris ardorem ardore fidei commutate. quid maledictorum pannos hinc inde consuitis; & eorum carpitis uitam, quorum fidei resistere non ualeris? num iccirco non estis uos hæretici, si nos quidam assertionem uestra crediderint peccatores? & os impietate fœdum non habebitis, si cicatricem potueritis in nostra aure monstrare? Quid iuuat uestram perfidiam, uel prodest pellis Aethiopica, & pardi uarietas, si in nostro corpore nœuus apparuerit? En papa Theophilus tota Origenem arguit libertate hæreticum esse: nec illi dicta defendunt, sed fingunt ab hæreticis immutata; multorumq. dicunt libros similiter deprauatos; ut illum non sua fide, sed aliorum tueantur erroribus. Verum hæc aduersum hæreticos dicta sint, qui, iniusto cōtra nos odio seuientes, mentis fatentur arcenum, & uenena pectoris irremediabili dolore testantur. Vos, Christiani senatus lumina, accipite & Græcam & Latinam, etiam hoc anno epistolam: ne rursus hæretici mentiantur a nobis pleraque uel addita, uel mutata: in qua laborasse

borasse me fateor, ut uerborum elegantiam pari interpretationis uenustate seruarem; & intra definitas lineas currens, nec in quoquam excedens loco, eloquentiæ eius flucta non perderem; easdemq. res eodem sermone transferrem. quod utrum consecutus sim, nec ne, uestro iudicio relinquo. Quam sciatis in quattuor partes esse diuisam. In primo credentes hortatur ad Dominicum pascha celebrandum. In secundo & tertio loco Apollinarium & Origenem iugulat. In quarto, idest extremo, hæreticos ad penitentiam cohortatur. si quid autem hic minus aduersus Origenem dictum est: & in præteriti anni epistola continetur; & hæc, quam modo uertimus, breuitati studens dicere plura non debuit. Porro contra Apollinarium succincta fides & pura professio, non caret subtilitate dialectica: quæ aduersarium suum, extorto de manibus eius pugione, confodit. Orate igitur Dominum; ut, quod in Græco placeat, in Latino non displiceat; & quod totus oriens miratur, & prædicat, læto sinu Roma suscipiat. Prædicationē quoque cathedræ Marci euangelistæ cathedra Petri apostoli sua prædicatione confirmet. quamquam celebri sermone uulgatum sit: beatum quoque Papam Anastasium eodem seruire, quia eodem spiritu est, latitantes in foueis suis hæreticos persecutum: eiusq. litteræ doceant, damnatum in Occidente, quod in Oriente damnatum est. cui multos imprecamur annos; ut hæreseos rediuiua plantaria, per illius studium longo tempore arefacta, moriantur.

ARGVMENTVM.

AVGVSTINO, & Alipio gratulatur, quod Celestina, sua Pelagianæ heresis eorum opera extincta sit: excusatq. se quod nondum responderit aduersus libros Anniani Diaconi, qui & ipse Celestij discipulus contra epistolā D. Hieronymi scripserat.

Ttt 4 HIE-

SANCTVS Innocentius presbyter, qui huius sermo
 nis est portitor, anno præterito, quasi nequaquã
 in Africam reuersurus, mea ad dignationem ue-
 stram scripta non sumpsit: tamen Deo gratias agimus,
 quod ita euenit, ut nostrum silentium, uestris epistolis uin-
 ceretis. mihi enim omnis occasio gratissima est, per quam
 scribo uestre reuerentiæ: testem inuocans Deum, quod, si
 possit fieri, assumptis alis columbæ uestris amplexibus im-
 plicarer, semper quidem pro merito uirtutum uestrarum,
 sed nunc maxime, quia, cooperatoribus & auctoribus uo-
 bis, hæresis Celestiana iugulata est: quæ ita infecit corda
 multorum, ut, cum superatos damnatosq. esse se sentiant,
 tamen uenena mentium non omittant; &, quod solum
 possunt, nos oderint, per quos putant se libertatem do-
 cendæ hæreseos perdidisse. Quod autem quæritis, utrum
 rescripserim contra libros Anniani, pseudodiaconi Cele-
 densis, qui copiosissime pascitur, ut alienæ blasphemix
 uerba frinola subministret: sciatis me ipsos libros in sche-
 dulis missos a sancto fratre nostro Eusebio presbytero su-
 scēpisse, non ante multum temporis; & exinde uel ingruē-
 tibus morbis, uel dormitione sanctæ & uenerabilis filiæ ue-
 stræ Eustochii, ita doluisse, ut propemodum contemnen-
 dos putarem. in eodem enim luto hæsitat, &, exceptis uer-
 bis tinnulis, atque emendicatis, nihil aliud loquitur. ta-
 men multum egimus; ut, dum epistolæ meæ respondere
 conatur, apertius se proderet, & blasphemias suas omni-
 bus patefaceret. quidquid enim in illa miserabili synodo
 Diospolitana dixisse se denegat, in hoc opere confitetur.
 Nec grande est ineptissimis naniis respondere. Si autem
 Dominus uitam tribuerit, & notariorum habuerimus co-
 piam, paucis lucubrationculis respondebimus; non ut con-
 uincamus hæresim mortuam; sed ut imperitiam atque bla-
 sphemiam eius, nostris sermonibus confutemus. Meliusq.
 hoc

Hieronymus Alipio & Aug. 1063.

hoc faceret sanctitas uestra : ne compellamur contra hæreticum nostra laudare . Sancti filii communes , Albinus , Apinianus , & Melania plurimum uos saluant . Has litteras de sancta Bethlehem sancto presbytero Innocentio dedi perferendas . Neptis uestra Paula miserabiliter deprecatur , ut memores eius sitis , & multum uos salutat . Incolumes uos , & memores mei , domini nostri Iesu Christi tueatur clementia , domini uere sancti atque omnium affectione uenerabiles patres .

ARGUMENTVM.

GRATVLATVR Augustini industrie , quod Pelagianorum hæresim extinxerit : qua in re suum quoque studium testatur .

HIERONYMVS AVGVSTINO.

EPISTOLA LXXX.

OMNI quidem tempore beatitudinē tuam eo , quo decet , honore ueneratus sum , & habitantem in te dilexi Dominum saluatorem : & nūc , si fieri potest , cumulo aliquid addimus , & plene cōplemus , ut absque tui nominis mentione ne unam quidē horam præterire patiamur , qui contra flantes uentos ardore fidei perstitisti . Maluisti , quantum in te fuit , solus liberari de Sodomis , quā *Gen. 19* cum pereuntibus commorari . Scit , quid dicā , prudentia sua . Maeste uirtute , in urbe celebraris : catholici te conditorem antiquæ rursum fidei uenerantur , atque suspiciunt ; & , quod signum maioris gloriæ est , omnes hæretici detestantur , & me pari persequuntur odio : ut , quos gladiis nequeunt , uoto interficiant . Incolumē , & mei memorem te Christi domini clementia tueatur domine uenerande & beatissime papa .

ARGV-

ARGVMENTVM.

POST salutationes ultra citraq. factas, nunciat extinctas
hereses clam ab Episcopo Hierosolymitano adhuc defendi.

HIERONYMVS AVGVSTINO.

EPISTOLA LXXXI.

M VLTU utroque claudicant pede, & ne fractis qui-
dem ceruicibus inclinantur, habentes affectum er-
roris pristini, cum prædicandi eandem non habeant
libertatem. Sancti fratres, qui cum nostra sunt paruitate,
præcipue sanctæ ac venerabiles filiæ tuæ suppliciter te salu-
tant. Fratres tuos dominum meum Alipium, & dominum
meum Euodium, ut meo nomine salutes, precor coronam
tuam. Capta Hierusalem tenetur a Nabuchodonosor,
Hier. 42 nec Hieremiæ uult audire consilia: quin potius Aegyptum
desiderat, ut moriatur in Taphnes, & ibi seruitute pereat
sempiterna.

ARGVMENTVM.

ROGATVS ut scriberet quidnam sentiret de animarum ori-
gine, iubet ut uel ex suis libris aduersus Ruffinum, aut potius
Augustino in eadem Africa præuincia commorante, discat. Co-
mentarios in Exechielem, ex incursione, ac deuastatione bar-
barorum, nondum potuisse, ut pollicitus erat, absolui; operis
tamen initium a Fabiola peti posse dicit. Oceani doctrinam si-
mul, ac probitatem postremo laudat.

HIERON. MARCELLINO ET
Anapsychiæ.

EPISTOLA LXXXII.

T ANDEM ex Africa uestre litteras unanimatis ac-
cepi; & non me pœnitent impudentiæ, qua, tacen-
tibus uobis, epistolas meas frequenter ingessi, ut
rescriptum mererer, & uos esse sospites, non aliis nunciis
tibus,

tibus, sed uestro potissimum sermone, cognoscerem. Super animæ statu memini uestre quæstiunculæ, immo maxime ecclesiasticæ quæstionis utrum lapsa de celo sit, ut Pythagoras philosophus, omnesq. Platonici, & Origenes putant: an a propria Dei substantia, ut Stoici, Manichæus, & Hispaniæ Priscilliani hæreses suspicantur: an in thesauro habeantur Dei, olim conditæ, ut quidam ecclesiastici stulta persuasione confidunt: an quotidie a Deo fiant, & mittantur in corpora, secundum illud quod in euāgelio scriptum est: Pater meus usque modo operatur, & ego operor: an certe ex traduce, ut Tertullianus, Apollinarius, & maxima pars occidentalium autumant: ut, quo modo corpus ex corpore, sic anima nascatur ex anima, & simili cum brutis animantibus condicione subsistat. Super quo quid mihi uideatur, in opusculis contra Ruffinum scripsisse me noui, aduersus eum libellum, quem sanctæ memoriæ Anastasio, episcopo Romanæ ecclesiæ, edidit: in quo lubrica, & subdola, immo stulta confessione, dum auditum simplicitati illudere nititur, suæ fidei, immo perfidiæ illudit, quos libros reor sanctum parentem uestrum habere Oceanum. olim enim editi sunt, multis Ruffini libris aduersus calumnias respondentes. Certe habes ibi uirum sanctum & eruditum Augustinum episcopum: qui uiua, ut aiunt, uoce docere te poterit, & suam, immo per se nostram explicare sententiam, Ezechielis uolumen olim aggredi uolui, & sponsonem creberrimam studiosis lectoribus reddere: sed in ipso dictandi exordio ita animus meus occidentalium prouinciarum, & maxime urbis Romanæ uastatione confusus est, ut, iuxta uulgare prouerbum, proprium quoque ignorarem uocabulum: diuq. tacui, sciens tempus esse lacrymarum. Hoc autem anno cum tres explicassem libros, subitus impetus barbarorum, de quibus tuus dicit Virgilius: Lateq. uagantes Barchæi: & sancta scriptura de Ismael, Contra faciem omnium fratrum suorum habitabit: sic Aegypti limitem Palæstinæ, Phœnices, Syria Gen. 16
percurrit, & instar torrentis cuncta secum trahens; ut
uix

uix manus eorum misericordia Christi potuerimus euadere. Quod si, iuxta inclytum oratorem, silent inter arma leges: quanto magis studia scripturarum; quæ & librorum multitudine, & silentio, ac librariorum sedulitate, quodque proprium est, securitate, & otio distantium indigent? Duos itaque libros mihi sanctæ filix mea Fabiolæ: quorum exempla si uolueris, ab ipsa poteris mutuari: pro angustia: quippe temporis alios describere non potui: quos cum legeris, & uestibula uideris; facilis coniectura erit, qualis ipsa sit futura domus. Sed credo in Dei misericordia, qui nos adiuuit in difficillimo principio supradicti operis, quod ipse adiuuet, & in penultimis prophetæ partibus, in quibus

Exech. 39. 40 Gog & Magog bella narrantur, & in extremis, in quibus sacratissimi & inexplicabilis templi ædificatio, uarietas, mensuraque describitur. Sanctus frater noster Oceanus, cui uos cupitis commendari, tantus & talis est, & sic eruditus in lege Domini, ut absque nostro rogatu instituire uos possit, & nostram super cunctis quæstionibus scripturarum pro modulo communis ingenii explicare sententiam. Incolumes uos, & prolixa ætate florentes, Christus Deus noster tueatur omnipotens, domini uere sancti.

A R G V M E N T V M.

CUM Carterius Hispanus unam ante baptismum, alteram, ea mortua, post baptismum habuisset uxorem, Episcopus factus est. arguebatur quod bigamus, & contra Apostoli sententiam pontificatum acceperat. Hieronymus, quia ille uir erat alioquin probus, & eruditus, eum primo Rome defendit; uerum quia non plene rationes tetigerat, longiori nunc epistola tuetur, eam acriter refellens opinionem, quæ uxorem ante baptismum baptizato imputat homini. Baptismum propterea prædicat: et ut doceat, alia magis quam hæc, id est morum probitatem, doctrinamque in Episcopo requirenda esse, qualisnam debeatur esse Episcopus, late ex Apostolo exponit. Ecclesia hodie, Dinis Augustino, Innocentioque contrarium asserentibus, (ut cõstat ex Gratiani pæfod. eia) alteram sententiã magis sequitur.

HIERON: OCEANO. NUM REPETENS
matrimonium a baptismo possit fieri sacerdos.

EPISTOLA LXXXIII.

VMQVAM, fili Oceane, fore putabam, ut indulgentia principis, calumniam sustineret reorum; & de carceribus exeuntes, post sordes ac uestigia catenarum dolerent alios relaxatos. In euangelio audit inuidus salutis alienæ: Amice, si ego bonus sum, quare oculus tuus nequam est? Conclussit Deus omnia sub peccato: ut omnibus misereatur: ut, ubi abundauit peccatum, superabundet & gratia. Cæsa sunt Aegypti primogenita, & ne iumentum quidem Israeliticum in Aegypto derelictum est: Et consurgit mihi Caina hæresis: atque olim emortua uipera contritum caput leuat, quæ non ex parte, ut ante consueuerat, sed totum Christi subruit sacramentum. Dicunt enim esse aliqua peccata, quæ Christus non possit purgare sanguine suo, & tam profundas scelerum pristinorum inherere corporibus atque animis cicatrices, ut medicina illius attenuari non queant. Quid aliud agit, nisi ut Christus frustra mortuus sit? frustra autem mortuus est, si aliquos uiuificare non potest. Mentitur Ioannes Baptista, & digito Christum & uoce demonstrans: Ecce agnus Dei: ecce qui tollit peccata mundi: Si sunt adhuc in sæculo, quorum Christus peccata non tulerit. Aut enim ostendendi sunt non esse de mundo, quos Christi ignoret indulgentia: aut, si de mundo sunt, eligendum e duobus alterum. Liberati a peccatis, Christi potentiam probant: non liberati, quasi adhuc rei, imbecillitatem demonstrant. Sed absit hoc de omnipotente credere, quod in aliquo impotens sit. Omnia, quæ pater facit, & filius facit similiter. Infirmetas filii redundat ad patrem. Cuncta ouiculæ membra portata sunt: totæ Apostoli epistolæ, Christi gratiam sonant. Et ne parum uidetur simplex gratiæ nuncupatio: Gratia, inquit, uobis, & pax multiplicetur. Multiplicatio promittitur, & a nobis paucitas affirmatur? quorsum ista? Nosti problema tuum.

Carte-

Matth. 20

Rom. 11

Exod. 12

Ioan. 1

1. Pet. 1

Carterius, Hispaniæ episcopus, homo & ætate uetus,
 & sacerdotio, unam, antequam baptizaretur, alteram post
 lauacrum, priore mortua, duxit uxorem: & arbitraris eū
 1.Tim.3 contra Apostoli fecisse sententiam, qui in catalogo uirtu-
 tum, episcopum unius uxoris uirum præceperit ordina-
 dum. Miror autem te unum protraxisse in medium, cum
 omnis mundus his ordinationibus plenus sit: non dico de
 presbyteris, non de inferiori gradu: ad episcopos uenio:
 quos si sigillatim uoluerō nominare, tantus numerus con-
 gregabitur, ut Ariminensis synodi multitudo superetur.
 Sed indecens est, sic unum tueri, ut plures accusare uidea-
 ris; & quem ratione non possis, societate peccantium
 defendas. Sustinui Romæ a uiro eloquentissimo cornu-
 tum, ut dicitur, syllogismum; ut, quocumque me uerte-
 rem, strictius tenerer. Vxorem, inquit, ducere peccatum
 est, an non? Ego simplex, & qui insidias uitare nescirem,
 dixi non esse peccatum. Rursum aliud proposuit, in baptis-
 mate bona opera dimittuntur, an mala? Et in hoc eadem
 simplicitate respondi, peccata dimitti. Cum me securum
 putarem, cœperunt mihi hinc inde cornua increscere, &
 absconditæ prius acies dilatari. Si, inquit, uxorem ducere,
 non est peccatum; baptismus autem peccata dimittit:
 quidquid non dimittitur, reseruatur. Illico mihi, quasi a
 fortissimo pugile percussus essem, ante oculos caligo ob-
 uersari cœpit: statimq. recordatus Chrysippeï sophisma-
 tis: Si mentiris; idq. uere dicis; mentiris: & in memet re-
 uersus conuerti in aduersarium propositionis stropham.
 Quæso, inquam, te, ut respondeas: Baptismum hominē
 facit nouum, an non? Vix dedit quod nouum faceret. Gra-
 datim intuli: ex toto nouum facit, an ex parte? Respon-
 dit, ex toto. Deinceps interrogauī: nihil ergo ueteris homi-
 nis in baptismo reseruatur? Mouit caput: cœpi protinus
 texere. Si baptismus nouum hominem facit, & ex toto
 nouum creat, nihilq. in eo ueteris hominis reseruatur: nō
 potest nouo imputari, quod in ueteri quondam fuit. Pri-
 mum spinosulus noster obmutuit: postea uero Pisoniano
 uitio,

uitio, cum loqui nesciret, tacere non potuit. sudare tamen frons, pallere genæ, tremere labia, hæere lingua, saliuâ ficcari, & plus timore, quam ætate contrahi: erupit aliquando. Nonne legisti ab Apostolo, unius uxoris uirum assumi in sacerdotium, & rem non tempora definiri? Quia me syllogismis prouocauerat; & uidebam tendere hominem ad interrogatiunculas tortuosas; sua contra illum tela iaciebam. Baptizatos, inquam, Apostolus eligit in episcopatum, an catechuminos? Respondere nolebat. Ego tamen id ipsum ingerere, & secundo ac tertio sciscitari. Nioben putares: quæ nimio fletu in lapidem uersa est. Veriti me ad auditores: nihil interest, o boni iudices, aduersarium uigilantem, an dormientem ligem, nisi quod facilis est quiescenti, quam reluctanti uincula innectere. Si apostolus non catechuminos in clerum eligit, sed fideles; fidelis autem est, qui episcopus ordinatur: uitia catechumini non imputabuntur fidei. Torquebam istiusmodi spicula, & uibrantes hastas in lethargicum dirigebam. Oscitabat tandem, & quasi per mentis crapulam ructans & nauseans euomebat: apostolus, dixit, Paulus hæc docuit. Proferuntur ergo Apostoli epistolæ, una ad Timotheum, altera ad Titum. In prima scriptum erat: Si quis episcopatum de- 1. Tim. 3
siderat, bonum opus desiderat. oportet ergo episcopum irreprehensibilem esse, unius uxoris uirum, sobrium, prudentem, ornatum, hospitalem, doctorem, non uinolentum, non percussorem, sed modestum, non litigiosum, non auarum, domum suam bene regentem, filios habentem subditos cum omni castitate. Si quis autem domui suæ præesse nescit; quo modo ecclesiæ Dei diligentiam adhibebit? non neophytum, ne in superbiam elatus, in iudicium incidat diaboli. oportet autem eum & testimonium habere bonum, ab iis, qui foris sunt, ut non in opprobrium incidat, & in laqueum diaboli. Ad Titum statim in prin- Tit. 1
cipio hæc mandata ponuntur. Huius rei gratia reliqui te Cretæ, ut ea, quæ deerant, corrigas, & cõstituas per ciuitates presbyteros, sicut ego tibi disposui. Si quis est sine crimi-
ne,

ne, unius uxoris uir, filios habēs fideles non in accusatione luxuriæ, aut non subditos. Oportet ergo episcopum esse sine crimine, tamquam Dei dispensatorē, non proteruum, non iracundum, non uinolentum, non percussorem, non turpis lucri cupidum, sed hospitalem, beneuolū, prudentē, iustum, sanctum, continentem, obtinentē eum, qui secundum doctrinam est, fidelem sermonem, ut possit exhortari in doctrina sana, & contradicentes reuincere. In utraque epistola, siue episcopi, siue presbyteri (quamquam apud ueteres iidem episcopi & presbyteri fuerint: quia illud nomen dignitatis est, hoc ætatis) iubentur monogami in clerum eligi. Certe de baptizatis Apostoli sermonem esse, nemo dubitat. Si ergo omnia, quæ in ordinatione quæruntur episcopi, non præiudicant ordinando, licet ea ante baptismum non habuerit: quæritur enim quid sit, & non quid fuerit: quare solū nomen uxoris impediatur, quod solū peccatū non fuit? Dicis: quia peccatū non fuit, iccirco non est dimissum in baptismo. Rem nouā audio: quia peccatū reputabitur. Omnia scorta, & publicæ colluuiōis sordes, impietas in Deū, parricidiū, & incestus in parentes, atque in extraordinarias uoluptates utriusque sexus mutata natura, Christi fonte purgantur: uxoris inhærebunt maculæ, & lupanaria thalamis præferentur? Ego non tibi imputo meretriciū exercitus, exoletorū greges, effusionem sanguinis, & instar suis in omni cœno libidinū uolutabra: & tu mihi olim mortuam de sepulcro uxorulam protrahis; quam ideo accepi, ne facerem quod fecisti? Audiant ethnici messes Ecclesiæ, de quibus quotidie horrea nostra complentur: audiant cathecumini, qui sunt fidei candidati, ne uxores ducant ante baptismum, ne honesta iungant matrimonia, sed Scotorum, & asotorum ritu, ac, de Republica Platonis, promiscuas uxores, communes liberos habeant. immo caueant qualecunque uocabulum coniugis, ne, postquam in Christo crediderint, noceat eis, quod aliquando non concubinas, nec meretrices, sed uxores habuerint. Recolat unusquisque conscientiam suam, & totius uulnera plan-

gar

gat ætatis: cumq. uerum iudicem priorum se exhibuerit de
 listorum, audiat increpantem Iesum: Hypocrita, eice *Matth. 7*
 primum trabem de oculo tuo, & tunc uidebis eicere festu-
 cam de oculo fratris tui. Vere scribarum & phariseorum *Matth. 23*
 similes, culicem liquantes, & camelum glutientes, deci-
 mamus mentam & anethum, & Dei iudicium prætermitti-
 mus. Quid simile uxor, & scortum? Imputatur infelicitas
 coniugis mortuæ, & libido meretricia coronatur? Ille, si
 prior uxor uiueret, aliam non haberet: tu, ut passim cani-
 nas nuptias iungeres, quid potes excusare? Forsitan timuif-
 se te dicas, ne, si matrimonium copulasses, non posses
 aliquando clericus ordinari. Ille in uxore optauit liberos:
 tu in meretrice sobolem perdidisti. Illum, naturæ & benedi-
 ctioni Domini seruientem: Crescite & multiplicamini, & *Gen. 2*
 replete terram: cubiculorum secreta texerunt: te suban-
 tem ad coitum publica facies execrata est. Ille, quod lice-
 bat, uerecundo pudore celauit: tu, quod non licebat, im-
 pudenter omnium oculis ingessimus. Illi scriptum est: Ho- *Hebr. 13*
 norabiles nuptiæ, & cubile immaculatum: tibi legitur:
 Fornicatores autem & adulteros iudicabit Deus: & qui
 corrumpit templum Dei, corrumpet illum Deus. Omnia, *1. Cor. 3*
 inquit, nobis in baptismo condonata sunt crimina: nec,
 post indulgentiam, iudicis est metuenda seueritas, dicente
 Apostolo: Et hæc quidem fuistis, sed abluti estis, sed san- *1. Cor. 6*
 ctificati estis, sed iustificati estis in nomine domini Iesu Chri-
 sti, & in spiritu Dei nostri. Omnia peccata donata sunt:
 bene, & fideliter. Sed quæro, quo modo tuæ sordes lotæ
 sint, & mæx munditiæ sordidata. Non dico, ais, tuas sor-
 didatas, sed in eodem statu mansisse, quo fuerant. si enim
 sordes fuissent, lotæ utique fuissent ut mæx. Rogo, quæ
 est ista tergiuersatio, & acumē omni pistillo retusus? Quia
 non est peccatum, peccatum est: quia non est sordidum,
 sordidum est. Non dimisit Dominus, quia nō habuit quod
 dimitteret: & quia non dimisit, iccirco manet, quod di-
 missum non fuit. Quantam uim habeat baptisma, & aqua
 in Christo sanctificata gratiam, paululum post docebo: in-

V u u terim,

terim, iuxta uulgare prouerbium, Malo nodo malus cuneus requirendus est. Hoc, quod dicit, Vnius uxoris uirum, potest & aliter differi. Ex Iudæis erat Apostolus. Prima Christi Ecclesia de Israel reliquiis congregabatur. Sciebat lege concessum; & exemplo patriarcharum ac Moyfi familiari populo nouerat in multis uxoribus liberos spargere: ipsis quoque sacerdotibus huius licentiæ patebat arbitrium. Præcipit ergo, ne eandem licentiam Ecclesiæ sibi uindicerent sacerdotes; ne bina pariter & trina coniugia fortiantur, sed ut singulas uno tempore uxores habeant. Ne contentiosum clames esse, quod diximus; accipe & aliam explanationem: ne tibi soli liceat non uoluntatem legi, sed legem iungere uoluntati. Quidam coacte interpretantur, uxores pro ecclesiis, uiros pro episcopis debere accipi. Et hoc in Nicena quoque synodo a patribus esse decretum, ne de alia ad aliam ecclesiam episcopus transferatur: ne, uirginalis pauperulæ societate contempta, ditioris adulteræ quærat amplexus: ut, quo modo culpa & filiorum uitium in λογισμοῖς, idest, in cogitationibus, accipitur; domusq. dispensatio ad animam refertur; & corpus; ita & uxores pontificum dici ecclesias. De quibus in Esaia scriptum est: Mulieres properantes de spectaculo uenire: non
Esa. 32 est enim populus habens intelligentiam. Et rursus: Mulieres diuites, surgite & audite uocem meam. Et in Pro-
Pro. 31 uerbiis: Mulierem fortem quis inueniet? Honorabilior est pretiosis lapidibus, quæ talis est. Confidit in ea cor uiri
Pro. 14 sui. Et in eodem uolumine: Sapientes mulieres ædificauerunt domum, insipiens autem destruxit manibus. Nec hoc, inquiunt, episcopis uideatur indignum: cum de Deo
Hier. 3 quoque scriptum sit: Sicut despicit uxor uirum suum, sic despexit me domus Israel. Et in Apostolo: Despōdi enim
2. Cor. 11 uos uni uiro, uirginem castam exhibere Christo. Mulierem autem, idest, γυναῖκα, iuxta Græci sermonis ambiguitatem, in his omnibus testimoniis uxorem potius intellige. Violenta est, inquires, & satis dura etiam hæc interpretatio. Redde igitur scripturæ simplicitatem suam, ne
 tuis

eius contra te legibus dimicemus. Quæram & aliud: Si quis & ante baptismum habuerit concubinam; & illa mortua, baptizatus uxorem duxerit; utrum clericus fieri debeat, an non? Respondebis, posse fieri; quia concubinam habuerit, non uxorem. Coniugales ergo tabulæ, & iura dotalia, non coitus, ab Apostolo condemnantur. Multos uidemus, ob nimiam paupertatem, uxorum sarcinam declinare, & ancillas suas habere pro uxoribus, susceptosque ex his liberos colere ut proprios: qui si forte ditati ab imperatore stolam illius meruerint, confestim Apostolo colla submittent, & inuiti inter uxores eas recipere cogentur. Sin autem principale rescriptum eadem tenuitas impetrare non quinerit; cum Romanis legibus scita Ecclesiæ mutabuntur. Vide, ne hoc, quod dicitur, Vnius uxoris uirum, unius mulieris possit intelligi; ut ad coitum magis referatur, quàm ad dotalia tabulas. Hæc uniuersa proferimus; non quo ueræ & simplici intelligentiæ resistamus; sed ut doceamus; te scripturas sanctas sic intelligere; ut scriptæ sunt; nec euacuare baptismum saluatoris, & totum patibuli sacramentum irritum facere. Reddamus quod paulo ante promissimus; & de schola rhetorum, aquarum laudes, & baptismi prædicemus. Rudis mundus, necdum sole rutilante, nec pallente luna, nec astris micantibus, incompositam & inuisibilem materiam, abyssorum magnitudine, & deformibus tenebris opprimebat. Solus spiritus Dei in aurigæ modum super aquas ferebatur; & nascentem mundum in figura baptismi parturiebat. Inter cælum & terram medium extruitur firmamentum: & iuxta Hebraici sermonis *ετυμολογίαν*, cælum, idest, *שמים* samaim, ex aquis sortitur uocabulum: & aquæ, quæ super cælos sunt, in laudes Dei separantur. Vnde & in Ezechiele propheta, Crystal- lum super Cherubim uidetur extensum, idest, compactæ & densiores aquæ. Primum de aquis, quod uiuit, egreditur; & pennatos fideles de terra ad cælum leuat. Fabricatur homo de limo, & inter manus Dei aquarum sacramenta uersantur. Plantatur paradysus in Eden, & unus fons in

Gen. 8

Psal. 148

Ezech. 1

Gen. 1. 2

V u u 2 quattuor

quattuor principia diuiditur : qui postea egrediens de templo, & contra solis ortū uadens, amaras aquas mortuasque uiuificat. Peccat mundus, & sine aquarum diluuiū non purgatur. Statimq. columba Spiritus sancti, expulso alite r-
Exech. 47 gatur. Gen. 6. 7 terrimo; ita ad Noe, quasi ad Christum, in Iordane deu-
Gen. 8 lat; & ramo refectionis ac luminis, pacem orbi annunciat.
Exod. 14 Pharao cum exercitu suo, nolens populum Dei exire de
Psal. 73 Aegypto, in typo baptismatis suffocatur. Et in psalmis de
interfectione illius scribitur: Tu confirmasti in uirtute tua
mare: contribulasti capita draconum in aquis: tu confregi
sti capita draconis. Vnde & reguli, & scorpiones arentia
quæque sectantur. Et postquam ad aquas uenerint, *us po-*
Exod. 15 *phoss*, & lymphaticos faciunt. Mara mutatur sacramen-
to crucis: & septuaginta palmarum apostolorum, dulcoratis
Gen. 21. 26 legis gurgitibus irrigantur. Abraham & Isaac puteos fo-
Gen. 21 diunt, repugnant Allophyli. Et Bersabee ciuitas iuramen-
3. Reg. 1 ti, regnumq. Salomonis nomen sumit a fontibus. Rebec-
Gen. 24. 29 ca inuenitur ad puteum. Rachel propter aquas supplantatoris osculo salutatur. Moyses filias sacerdotis Madian a-
Exod. 2 perto puteo ab iniuria uindicat. Præcursor Domini in
aquis fontium iuxta Salim, quod interpretatur pax, siue
perfectio, Christo populum parat. Ipse saluator, post ba-
Ioan. 3 ptisma, & sanctificatas suo lauacro Iordanis aquas, regnū
celorum incipit prædicare: primum signum ex aquis fa-
Matth. 3. 5 cit. Samaritana uocatur ad puteum, sitiens inuitatur ad po-
Ioan. 2. 4. 7 tum. Nicodemo dicit occulte: Nisi quis renatus fuerit ex
Ioan. 3 aqua & Spiritu sancto, non intrare eum in regnum celo-
Ioan. 19 rum. Quia ab aquis cœperat, finiuit in aquis. Latus Chri-
sti percutitur lancea, & baptismi atque martyrii pariter sa-
Matth. 28 cramenta funduntur. Post resurrectionem mittit apostolos
Act. 2 ad gentes, & præcipit eis, ut baptizent eos in mysterio
trinitatis. Pœnitet facti populum Iudæorum, & statim a
Esa. 66 Petro ad baptisma mittitur. Ante quam parturiat, parit
Sion, & nascitur gens simul. Paulus, persecutor Ecclesiæ,
Act. 9. 8 & lupus rapax Benjamin, Ananiæ ouī submittit caput; nec
ante recuperat aspectum, quā curet baptismo cæcitatem;
Eunu-

Eunuchus Candacis reginæ Aethiopum, lectione prophete Act. 8
 tica, Christi baptismati præparatur. Mutat contra natu- Hier. 13
 ram Aethiops pellem suam, & pardus uarietates suas. Qui Act. 19
 Ioannis acceperant baptismum, quia Spiritum sanctum ne- Psal. 82
 sciebant, iterum baptizantur, ne quis putaret gentibus ac
 Iudæis; aquas sine Spiritu sancto ad salutem posse suffice-
 re. Vox Domini super aquas, Dominus super aquas mul- Cant. 6
 tas, Dominus diluuium inhabitare facit. Dentes eius sicut
 grex detonsarum, quæ ascenderunt de lauacro, omnes ge-
 mellos habentes foetus, & infœcunda non est in eis. Si non
 est infœcunda, nec sterilis, omnes habent ubera lacte roran-
 tia, quæ cum Apostolo possint dicere: Filioli mei, quos Gal. 4
 iterum parturio, donec Christus formetur in uobis: & lac 1. Cor. 3
 uobis potum dedi, non escam. Micheas de baptismi gra- Mich. 7
 tia uaticinatur: ipse auertet & miserebitur nostri: demer-
 get iniquitates nostras, & proiciet in profundum maris
 omnia peccata nostra. Quo modo ergo in lauacro omnia Psal. 32
 peccata merguntur, si una uxor supernatat? Beati, quorū
 remissæ sunt iniquitates, & quorum tecta sunt peccata.
 Beatus uir, cui non imputabit Dominus peccatum. Arbi-
 tror, quod possumus & nos huic aliquid cantico iungere:
 Beatus uir, cui non imputabit Dominus uxorem. Audia-
 mus & Ezechielem filium hominis, quo modo de eius uir- Ezech. 36
 tute pronunciet, qui hominis futurus est filius. Assumam
 uos de gentibus, & aspergam super uos aquam mundam,
 & mundabimini ab omnibus immunditiis uestris: & dabo
 uobis cor nouum, spiritum nouum. Ab omnibus, inquit,
 mundabo uos sordibus. In omnibus, nihil prætermittitur.
 Si sordes emundantur, quanto magis munditiæ non coin- Gal. 5
 quinantur? Dabo uobis cor nouum, & spiritum nouum. Esa. 42
 In Christo enim Iesu neque circumcisio aliquid ualèt, ne- Rom. 7
 que præputium, sed noua creatura. Vnde cantamus canti-
 cum nouum: & uetere homine deposito, non ambula-
 mus in uetustate litteræ, sed in nouitate spiritus. Hic est
 calculus nouus, cui nouum nomen inscribitur: quod nemo Apoc. 2
 scit legere, nisi qui illud acceperit. Quotquot enim bapti- Rom. 6

V u u 3 zati

zati sumus in Christo Iesu, in mortem illius baptizati sumus. consepulti enim ei sumus per baptismum in morte: ut, quo modo surrexit Christus a mortuis per gloriam patris, ita & nos in nouitate uitae ambulemus. Toties nouitatem legimus, & tamen maculosum nomen uxoris non potest ulla nouitate deleri? Consepulti sumus Christo in baptismo, & resurreximus per fidem operationis Dei, qui

Col. 2 suscitauit eum a mortuis. Cumq. essemus mortui in delictis, & præputio carnis nostrae, conuiuificauit nos cum illo, donans omnia delicta, delens quod aduersum nos erat chi rographum decreti, quod erat contrarium nobis: & ipsum tulit de medio, affigens illud cruci. Omnia nostra cū Christo mortua sunt: uniuerſa chi rographi ueteris peccata deleta sunt: solū nomen uiuit uxoris? Dies me deficiet, si cūcta, quæ ad potentiam baptismi pertinent, de scripturis sanctis uoluerō digerere, & natiuitatis secundæ, immo in Christo primæ ponere sacramenta. Ante quam dictandi finem faciam, (iam enim intelligo mensuram me excedere epistolæ) uolo superiora capitula, in quibus futuri episcopi uita describitur, cursim exponere: ut Apostolum non in unius uxoris elogio, sed in omnibus, quæ præcipit, doctorem gentium suscipiamus. Simul obsecro, ne quis me in sugillationem istius temporis sacerdotum scripſisse, quæ scripsi, existimet, sed in Ecclesiæ utilitatem. Vt enim oratores, & philosophi, describentes, qualem uelint esse perfectum oratorem, & philosophum, non faciunt iniuriam Demostheni, & Platoni, sed res ipsas absque personis definiunt: sic in descriptione episcopi, & in eorum expositione, quæ scripta sunt, quasi speculum sacerdotii proponitur. Iam in potestate & conscientia singulorum est, quales se ibi aspiciant: ut uel dolere ad deformitatem, uel gaudere ad pulchritudinem possint. Si quis episcopatum desiderat, bonū opus desiderat. Opus, non dignitatem; laborem, non delicias; opus, per quod humilitate decrescat, non intumescat fastigio. Oportet ergo episcopum irreprehensibilem

Tit. 1 esse. Id ipsum quoque ad Titum: Si quis est sine crimine.

Omnes

Omnes uirtutes in uno sermone comprehendit , & pene-
rem contra naturam exigit . Si enim omne peccatum , etiā
in otioso uerbo reprehensione dignum est : quis est ille , qui
absque peccato , idest sine reprehensione , uersetur in hoc
mundo ? Sed futurus pastor Ecclesiæ , talis eligitur , ad cu-
ius comparisonem recte grex ceteri nominentur . Definiūt
rhetores oratorem , qui sit uir bonus , dicendi peritus . An-
te uita , sic lingua irreprehensibilis quæritur , ut doctus mē-
to suscipiatur . Perdit enim auctoritatem docendi , cuius
sermo opere destruitur . Vnius uxoris uirum : de hoc supra
diximus . Nunc hoc tantum admonemus , ut , si unius uxo-
ris uir , etiam ante baptismum quæritur , cetera quoque ,
quæ præcepta sunt , ante baptismum requiramus . neque
enim competit , uniuersa post baptismum , & unum hoc mā-
datum intelligere ante baptismum . Sobrium , siue uigilan-
tem : *νῆφελος* quippe utrumque significat . Prudentem ,
ornatum , hospitalem , doctorem . sacerdotes , qui mini-
strant in templo Dei , prohibentur uinum & siceram bibe- *Leuit. 10*
re ; ne in crapula & ebrietate aggrauentur corda eorum ; *Luc. 21*
& ut sensus officium exhibens , Deo uigeat semper , &
tenuis sit . Quod autem infert , Prudentem , excludit eos ,
qui sub nomine simplicitatis excusant stultitiam sacerdo-
tum . Nisi enim cerebrum sanum fuerit , omnia membra
in uitio erunt . Ornatum quoque , *ἐπίτασις* est prioris
uerbi , idest , irreprehensibilis . Qui uitia non habet , irre-
prehensibilis appellatur : qui uirtutibus pollet , ornatus est .
Possumus & aliud intelligere ex hoc uerbo , iuxta illud
Tullii : Caput est artis , decere quod facias . Sunt enim qui
dam ignorantes mensuram suam , & tantæ stoliditatis , ac
uecordiæ , ut & in motu , & in incessu , & in habitu , & in
sermone communi risum spectantibus præbeant ; & qua-
si intelligentes quid sit ornatus , comunt se uestibus , &
munditiis corporis ; & lautioris mensæ epulas parant : cū
omnis istiusmodi ornatus , & cultus , sordibus fœdior sit .
Quod autem doctrina a sacerdotibus expetatur , & ueteris
præcepta sunt legis , & ad Titum plenius scribitur . Inno-

Vuu 4 cens

cēs enim & absque sermone conuersatio, quantū exemplo prodest, tantum silentio nocet. nam & latratu canum, baculoq. pastoris, luporum rabies deterrenda est. Non uinolentum, non percussorem. Virtutibus uitia opposuit. Didicimus, quales esse debeamus: discamus, quales non esse debeant sacerdotes. Vinolentia scurrarum est, & comestiatorum: uenterq. mero æstuans, cito despumat in libidines. In uino luxuria, in luxuria uoluptas, in uoluptate impudicitia est. Qui luxuriatur, uiuens mortuus est: er-
Gen. 9 go, qui inebriatur, & mortuus, & sepultus est. Noe ad unius horæ ebrietatem nudat femora sua, quæ per sexcen-
Gen. 19 tos annos sobrietate contexerat. Lot per temulentiam, nesciens libidini miscet incestum: & quem Sodoma non
Esa. 50 uicerat, uina uicerunt. Percussorem autem episcopum ille condemnat, qui dorsum suum posuit ad flagella, & male-
1. Pet. 2 dictus non remaledixit. Sed modestum. Duobus malis unum opposuit bonum; ut temulentia, & ira, modestia refrenentur. Non litigiosum, non auarum. nihil enim impudentius arrogantia rusticorum, qui garrulitatem auctoritatem putant; & parati semper ad lites, in subiectum sibi
1. Reg. 12 gregem tumidis sermonibus tonant. Auaritiam in sacerdote uitandam, & Samuel docet, nihil coram populo eripuisse
Acl. 11 se se cuiquam probans; & apostolorum paupertas, qui refrigeria sumptuum a fratribus accipiebant, & præter uic-
1. Tim. 6 tium, atque uestitum, nihil se aliud nec habere, nec uelle
1. Tim. 3 gloriabantur. quam ad Timotheum auaritiam, ad Titum
Tit. 1 turpis lucri cupiditatem apertissime notat. Domum suam bene regentem: non ut opes augeat; non ut regias paret epulas; non ut cælatas patinas struat; non ut Phasides aues lentis uaporibus coquat, qui ad ossa perueniant, & superficiem carnis non dissoluant artifice temperamento; sed ut, quod populo præcepturus est, prius a domesticis exigat. Filios habentem subditos, cum omni castitate; ne scilicet
1. Reg. 2 imitentur filios Eli, qui in uestibulo templi cum mulieribus dormiebāt; & religionem prædani putantes, quidquid optimum in hostiis erat, in suas delicias conuerterbāt.
Non

Non neophytū ; ne , in superbiā elatus , in iudiciū incidat diaboli . Mirari satis non queo , quæ hominum tanta sit cæcitas , de uxoribus ante baptismū disputare , & rē in baptis-
matē mortuā , immo cum Christo uiuificatā , in calumniā trahere , cū tam apertum euidentq. præceptū nemo custo-
diat . Heri catechumenus , hodie pontifex : heri in amphitheatro , hodie in ecclesia : uespere in circo , mane in altario :
dudū fautor histriionum , nunc uirginū consecrator . Num ignorabat Apostolus tergiuersationes nostras , & argumēto-
rum ineptias nesciebat ? Qui dixit , Vnius uxoris uirum , ipse mandauit irreprehensibilem , sobrium , prudentem ,
ornatum , hospitalem , doctorem , modestum , non uino lentum , non percussorem , non litigiosum , non auarum ,
non neophytum . Ad hæc omnia claudimus oculos , solas uidemus uxores . Quod autem ait : Ne , in superbiam elatus , incidat in iudiciū diaboli : quis non exemplo uerum
probet ? Ignorat momentaneus sacerdos humilitatem , & mansuetudinem rusticorum : ignorat blanditias Christianas : nescit se ipsum contemnere : de dignitate transfertur
ad dignitatem : non ieiunauit , non fleuit , non mores suos sæpe reprehendit , & assidua meditatione correxit : non sub-
stantiam pauperibus erogauit . De cathedra quodam modo ducitur ad cathedram , idest , de superbia ad superbiam .
Iudiciū autem , & ruina diaboli , nulli dubium , quin arrogancia sit . Incidunt in eam , qui in puncto horæ , necdū discipuli iam magistri sunt . Oportet autem eum & testimo-
nium habere bonum ab iis , qui foris sunt . Quale principiū , talis & clausula . Qui irreprehensibilis est , non solum a domesticis , sed ab alienis consono ore laudatur . Alieni
& extra Ecclesiam sunt Iudæi , hæretici , atque gentiles . Talis ergo sit pontifex Christi , ut , qui religioni detrahunt ,
uitæ eius detrahere non audeant . At nunc plerosque cernimus uel fauorem populi in aurigarū morem pretio redime-
re , uel tanto omnium hominum odio uiuere , ut non extorqueant pecunia , quod mimi impetrant gestibus . Hæc , si-
li Oceane , sollicito timore perquire : hæc magistri ecclesiæ
custo-

custodire debebunt, hos in sacerdotibus eligendis canones
obseruare, non, iuxta propria odia, & priuatas similitudines,
carpentemq. semper auctorem suum inuidiam, legem Chri-
sti interpretari. Vide, quantum sit testimonium huius,
quem arguunt, mariti, cui præter uinculum coniugale, &
hoc ante baptismum, nihil aliud ab æmulis obiici potest.
Qui præcipit non mœchandum, ipse dicit, Et non occides.
Si non mœchamur, sed occidimus, transgressores legis su-
mus. Quia qui totam legem seruauerit, & offenderit in
uno, fit omnium reus. Itaque, cum opposuerint nobis
uxorem ante baptismum; nos ab eis omnia, quæ post ba-
ptismum præcepta sunt, requiramus. Prætereunt, quod
non licet; & obiiciunt, quod concessum est.

ARGVMENTVM.

*RUFFINVS, quem Calpurnius uocat, magnum quen-
dam oratorem Romanum subornarat, ut quæreret a Hierony-
mo, cur in opusculis suis secularium litterarum exempla pone-
ret, & candorem Ecclesiæ ethnicorum sordibus pollueret. Huic
rationem ea de re reddit, & quorum exemplo id faciat, late
ostendit.*

HIER. MAGNO ORATORI ROMANO.

EPISTOLA LXXXIIII.

EBESIVM nostrum tuis monitis profecisse, non
S. tam epistola tua, quam ipsius pænitudine didici-
mus: & mirum in modum, plus correptus placuit;
quam errans læserat. Certauerunt inter se indulgentia pa-
rentis, & filii pietas; dum alter præteritorum non memi-
nit, alter in futurum quoque officia pollicetur. unde & mu-
tuo nobis tibiq. gaudendum est: quia nos filium recepi-
mus; tu discipulum comprobasti. Quod autem quæris in
calce epistolæ tuæ, cur in opusculis nostris, secularium lit-
terarum interdum ponamus exempla; & candorem Eccle-
siæ, ethnicorum sordibus polluamus: responsum breuiter
habeto.

habeto. Numquam hoc quæres, nisi te totum Tullius possideret, si scripturas sanctas legeres, si interpretes earum, omisso Volcatio, euolueres. Quis enim nesciat, & in Moyse, & in prophetarum uoluminibus quædam assumpta de gentilium libris, & Salomonem philosophis Tyri & nonnulla proposuisse, & aliqua respondisse? unde in exordio Prouerbiorum commonet, ut intelligamus sermones prudentiæ, uersutiasque uerborum, parabolas, & obscurum sermonem, dicta sapientum, & ænigmata, quæ proprie dialecticorum & philosophorum sunt. Sed & Paulus apostolus Epimenidis poetæ abusus uersiculo est, scribens ad Titum: *Κρήτες ἀειψεύσαι, κακάθηρία, γαστέρες ἀργαί.* Tit. 1 idest, Cretenses semper mendaces, malæ bestiæ, uentres pigri. cuius heroici hemistichium postea Callimachus usurpauit. Nec mirum, si apud Latinos metrum non seruet ad uerbum expressa translatio; cum Homerus, eadem lingua uersus in prosam, uix cohæreat. In alia quoque epistola Menandri ponit senarium: *φθείρουσιν ἡθὴν χρηστὰ ὁμιλία.* 1. Cor. 15 κακά. idest: Corruptunt mores bonos colloquia mala. Act. 17 Et apud Athenienses in Martis curia disputans, Aratum testem uocat. ipsius enim & genus sumus, quod Græce dicitur: *τὸ γὰρ καὶ ἡμεῖς ἐσμὲν.* Et est clausula uersus heroici. Ac, ne parum hoc esset, ductor Christiani exercitus, & orator inuictus, pro Christo causam agens, etiam inscriptionem fortuitam arte torquet in argumentum fidei. didicerat enim a uero David, extorquere de manibus hostium 1. Reg. 17 gladium, & Goliz superbissimi caput proprio mucrone truncare. Legerat in Deuteronomio Domini uoce præceptum, mulieris captiue radendum caput, supercilia, omnes pilos & ungues corporis amputandos, & sic eam habendam in coniugio. Quid ergo mirum, si & ego sapientiam sæcularem propter eloquii uenustatem, & membrorum pulchritudinem, de ancilla atque captiua Israelitidem facere cupio? & si, quidquid in ea mortuum est idololatriæ, uoluptatis, erroris, libidinum, uel præcido, uel rado; & mixtos purissimo corpori uernaculos ex ea genero Domino Sabaoth?

Sabaoth? Labor meus in familiam Christi, proficit; stuprum in alienam, auget numerum conseruorum. Osee accepit uxorem fornicariam Gomer, filiam Debelaïm: & nascitur ei de meretrice filius Iezrael, qui uocatur semen Dei.

Esa. 7 Esaias nouacula acuta barbam, & crura radit peccantium.

Ezech. 5 Et Ezechiel in typo fornicantis Hierusalem tondet cæsariē suam: ut quidquid in ea absque sensu & uita est, auferatur.

Cyprianus, uir eloquentia pollens, & martyrio; Firmiano narrante mordetur, cur aduersus Demetrianum scribēs testimoniis usus sit prophetarum, & apostolorum, quæ ille ficta & commenticia esse dicebat, & non potius philosophorum & poetarum; quorum auctoritati ut ethnicus contraire non poterat. Scripserunt contra nos Celsus, atque Porphyrius. priori Origenes, alteri Methodius, Eusebius, & Apollinarius fortissime responderunt. quorum Origenes octo scripsit libros: Methodius usque ad decem millia procedit uersuum: Eusebius & Apollinarius uiginti quinque & triginta uolumina condiderunt. Lege eos, & inuenies nos, comparatione eorum, imperitissimos, & post tanti temporis otium, uix quasi per somnium, quod pueri didicimus, recordari. Iulianus Augustus septem libros, in expeditione Parthica, aduersum Christum euomuit; & iuxta fabulas poetarum, suo se ense lacerauit. Si contra hunc scribere tentauero; puto interdices mihi, ne rabidum canem, philosophorum & Stoicorum doctrinis, idest, Hericulis claua reperiui: quamquam Nazarenus nostrū, & ut ipse solebat dicere, Galilæum, statim in proelio senserit; & mercedem linguæ putidissimæ conto in illis perfusus acceperit. Iosephus, antiquitatem approbans Iudaici populi, duos libros scripsit contra Appionem Alexandrinum grammaticum; & tanta sæcularium profert testimonia, ut mihi miraculum subeat, quo modo uir Hebræus, & ab infantia sacris litteris eruditus, cunctam Græcorum bibliothecam euoluerit. Quid loquar de Philone, quem uel alterum, uel secundum Iudæum Platonem critici pronunciant? Curram per singulos. Quadratus, apostolorum discipu-

discipulus, & Atheniensis pontifex ecclesiæ, nonne Adriano principi, Eleusinæ sacra inuidenti, librum pro nostra religione tradidit? & tantæ admirationi omnibus fuit, ut persecutionem grauissimam, illius excellens sedaret ingenium. Aristides philosophus, uir eloquentissimus, eidem principi apologeticum pro Christianis obtulit, contextum philosophorum sententiis: quem imitatus postea Iustinus, & ipse philosophus, Antonino Pio, & filiis eius, senatuiq. librum contra gentiles tradidit. defendens ignominiam crucis, & resurrectionem Christi tota prædicans libertate. Quid loquar de Melitone, Sardēsi episcopo? quid de Apollinario, Hierapolitanæ ecclesiæ sacerdote, Dionysioq. Corinthiorum episcopo, & Taciano, & Bardesane, & Hirenæo, Photini martyris successore: qui, Origenis hæreseon singularum uenena, ex quibus philosophorum fontibus emanarint, multis uoluminibus explicarunt? Pantænus, Stoicæ sectæ philosophus, ob præcipuæ eruditionis gloriā, a Demetrio, Alexandriæ episcopo, missus est in Indiam; ut Christum apud Brachmanas, & illius gentis philosophos, prædicaret. Clemens, Alexandrinæ ecclesiæ presbyter, meo iudicio omnium eruditissimus, octo scripsit Stromatum libros, & totidem ὑποτυπώσεων, & alium contra gentes, pædagogū quoque tria uolumina. quid in illis indoctum, immo quid non e media philosophia est? Hunc imitatus Origenes, decem scripsit Stromateas, Christianorum & philosophorum inter se sententias comparans, & omnia nostræ religionis dogmata de Platone, & Aristotele, Numenio, Cornutoq. confirmans. Scripsit & Milciades contra gentes uolumen egregium. Hippolytus quoque, & Apollonius Romanæ urbis senator, propria opuscula cōdiderunt. Extant & Iulii Africani libri, qui temporum scripsit historias? & Theodori, qui postea Gregorius appellatus est, uiri apostolicorum signorum atque uirtutum; & Dionysii Alexandrini episcopi: Anatolii quoque, Laodiceæ ecclesiæ sacerdotis, necnon presbyterorum Pamphili, Pierii, Luciani, Malchionis, Eusebii Cæsariensis episcopi,

&

& Eustathii Antiocheni, & Athanasii Alexandrini: Eusebii quoque Emiseni, & Triphillii Cyprii, & Asterii Scithopolitæ, & Serapionis confessoris: Titi quoque Bostrensis episcopi: Cappadocumq. Basilii, Gregorii, & Amphilo-
chii: qui omnes intantum philosophorum doctrinis atque sententiis suos referciunt libros, ut nescias quid in illis primum admirari debeas, eruditionem sæculi, an scientiam scripturarum. Veniam ad Latinos. Quid Tertulliano eruditius, quid acutius? Apologeticus eius & contra gentes libri cunctam sæculi continent disciplinam. Minutius Felix, causidicus Romani fori, in libro, cui titulus Octavius est, & in altero contra mathematicos, si tamen inscriptio non mētitur auctorem, quid gentiliū scripturarum dimisit intactum? Septem libros aduersus gentes Arnobius edidit, totidemq. discipulus eius Lactantius, qui de ira quoque & opificio Dei duo uolumina condidit: quos si legere uolueris, dialogorum Ciceronis in eis ἐπιτομήν reperies. Victo-
rino martyri in libris suis licet deſit eruditio, tamen non deest eruditionis uoluntas. Cyprianus, quod idola dī non sint, qua breuitate, qua hīstōriarum omnium scientia, quorum uerborum sensuum splendore perstrinxit? Hilarius meorum confessor temporum & episcopus, duodecim Quintiliani libros & stylo imitatus est, & numero: breuiq. libello, quem scripsit contra Dioscorum medicum, quid in litteris possit, ostendit. Iuuenus presbyter, sub Constantino hīstōriam Domini saluatoris uersibus explicauit: nec pertimuit Euangelii maiestatem sub metri leges mittere. De ceteris uel mortuis, uel uiuentibus taceo: quorum in scriptis suis & uires manifesta sunt, & uoluntas. Nec statim praua opinione fallaris, contra gentes hoc esse licitum, in aliis disputationibus dissimulandum: quia omnes pene omnium libri, exceptis iis, qui cum Epicuro litteras non didicerunt, eruditionis doctrinæq. plenissimi sunt. Quamquam ego illud magis reor, quod dictanti uenit in mentem, non te ignorare quod semper a doctis uiris usurpatum est; sed per te mihi proponi ab alio quæstionem, qui

qui forte, propter amorem historiarum Sallustii, Calpurnius cognomento Lanarius sit. cui, quæso, ut suadeas, ne uescentium dentibus edentulus inuideat; & oculos caprearum talpa contemnat. Diues, ut cernis, ad disputandum materia; sed iam epistolaris angustia finienda est.

ARGVMENTVM.

INVEHITVR in quendam, qui diaconos presbyteris anteferebat; & ut hoc magis coarguat, presbyteros cum Episcopis eosdem facit. uerum est autem, quod in Episcopo presbyter continetur, sed non contra.

HIERONYMVS EVAGRIO.

EPISTOLA LXXXV.

EGIMVS in Esaia: Fatuus fatua loquetur. An *Esa. 32*
 L dio quendam in tantam erupisse uecordiam, ut
 diaconos presbyteris, idest, episcopis anteferebat. *Act. 6*
 Nam cum Apostolus perspicue doceat, eisdem esse presbyteros, quos & episcopos: quis patiatur mensarum & uiduarum minister, ut supra eos se tumidus efferat, ad quorum preces Christi corpus sanguisq. conficitur? Quæris auctoritatem? audi testimonium. Paulus & Timotheus, *Philip. 1*
 serui Christi Iesu, omnibus sanctis in Christo Iesu, qui sunt Philippis, cum episcopis, & diaconis. Vis & aliud exé *Act. 20*
 plum? In Actibus apostolorum, ad unius ecclesiæ sacerdotes ita Paulus loquitur: Attendite uobis, & cuncto gregi, in quo uos Spiritus sanctus posuit episcopos, ut regeritis Ecclesiam Domini, quam acquisiuit sanguine suo. Ac, ne quis contentiosè in una ecclesia plures episcopos fuisse contendat; audi & aliud testimonium, in quo manifestissime conprobatur, eundem esse episcopum, atque presbyterum. *Tit. 1*
 Propter hoc reliqui te Cretæ, ut, quæ deerant, corrigeres, & cõstitueres, presbyteros per ciuitates, sicut & ego tibi mandauì. Si quis est sine crimine, unius uxoris uir, filios habens fideles, non in accusatione luxuriæ, aut non subdi-

subditos. Oportet enim episcopum sine crimine esse, quasi
 1. Tim. 4 Dei dispensatorem. Et ad Timotheum. Noli negligere
 gratiam, quæ in te est, quæ tibi data est prophetiæ, per
 impositionem manuum presbyterii. Sed & Petrus in pri-

ma epistola, Presbyteros, inquit, in uobis precor com-
 1. Petr. 5 presbyter, & testis passionum Christi, & futuræ gloriæ,
 quæ reuelandâ est, particeps, regere gregem Christi, &
 inspicere non ex necessitate, sed uoluntarie iuxta Deum.
 quod quidem Græce significantius dicitur ἐπισκοποῦντες
 idest, superintendentes: unde & nomen episcopi tractū est.
 Parua tibi uidentur tātorum uirorum testimonia? Clangat

Marc. 3 tuba euangelica, filius tonitruui, quem Iesus amauit plu-

1. Ioan. 21 rimum: qui de pectore saluatoris doctrinarū fluentia pota-

2. Ioan. 1 uit: Presbyter electæ dominæ & filiis eius, quos ego diligo

3. Ioan. 1 in ueritate. Et in alia epistola: Presbyter Caio carissimo,

quem ego diligo in ueritate. Quod autem postea unus ele-
 ctus est, qui ceteris præponeretur, in schismatis remedium
 factum est, ne unusquisque ad se trahens Christi Ecclesiam
 rumperet. Nam & Alexandriæ a Marco euangelista usque
 ad Heraclam & Dionysium episcopos, presbyteri semper
 unum ex se electum, in excelsiori gradu collocatum, episco-
 pum nominabant: quo modo si exercitus in imperatorem fa-
 ciat; aut diaconi eligant de se, quem indultrium nouerint,
 & archidiaconum uocent. Quid enim facit, excepta or-
 dinatione, episcopus, quod presbyter non faciat? Nec
 altera Romanæ urbis Ecclesia, altera totius orbis existiman-
 da est. Et Gallix, & Britannix, & Africa, & Persis, &
 Oriens, & India, & omnes barbaræ nationes unum Chri-
 stum adorant, unam obseruant regulam ueritatis. Si au-
 ctoritas queritur, orbis maior est urbe. Vbicumque fuerit
 episcopus, siue Romæ, siue Eugubii, siue Constantinopoli,
 siue Rhegii, siue Alexandriæ, siue Tanis; eiusdem meriti,
 eiusdem est & sacerdotii. Potentia diuitiarum, & pauper-
 tatis humilitas, uel sublimiorem, uel inferiorem episco-
 pum non facit. Ceterum omnes apostolorum successores
 sunt. Sed dicis, quo modo Romæ ad testimonium diaconi
 presby-

presbyter ordinatur? quid mihi profers uniū urbis consue-
tudinem? quid paucitatem, de qua ortum est supercilium
in leges Ecclesiæ, uindicas? Omne, quod rarum est, plus
appetitur. Pulegium apud Indos pipere pretiosius est. Dia-
conos paucitas honorabiles, presbyteros turba contem-
ptibiles facit. Ceterum etiam in ecclesia Romæ presbyteri
sedent, & stant diaconi: licet paulatim increbescentibus
uitiis, inter presbyteros absente episcopo sedere diaco-
num uiderim, & in domesticis conuiuiis benedictiones
presbyteris dare. Discant, qui hoc faciunt, non se recte fa-
cere, & audiant apostolos: Non est dignum, ut, relinquen-
tes uerbum Dei, ministremus mensis. Sciant quare diaconi
constituti sint. Legant Acta apostolorum: recordentur con-
dicionis suæ. Presbyter & episcopus aliud ætatis, aliud di-
gnitatis est nomen. Vnde, & ad Titum, & ad Timotheum de or-
dinatione episcopi & diaconi dicitur: de presbyteris omni-
no reticetur: quia in episcopo & presbyter continetur. Qui
prouehitur, de minori ad maius prouehitur. Aut igitur ex
presbytero ordinetur diaconus, ut presbyter minor diaco-
no comprobetur, in quem crescit ex paruo: aut, si ex diacono
ordinatur presbyter, nouerit se lucris minorem, sacerdotio
esse maiorem. Et, ut sciamus traditiones apostolicas sum-
ptas de ueteri testamento; quod Aaron, & filii eius, at-
que leuitæ in templo fuerunt, hoc sibi episcopi, & presby-
teri, & diaconi uindicerent in ecclesia.

Act. 6

Tit. 1

1. Tim. 3

Leuit. 8

Num. 3. 4

1. Par. 9. 2

ARGUMENTVM.

VT in uertendis Græcorum Patrum libris, & non in trans-
ferendis ex Hebræo Biblijs, laboret, Hieronymum hortatur:
quæritq. ab eo, quo modo mendacium in scripturis, quod nus-
quam licet, admittere uideatur, cum Paulum coarguentem
Petrum, dispensatorie finxisse alicubi scripserit; & postquam
per Profuturum, quem ad eum mittit, se alia, quæ litteris
committi nequeunt, percunctaturum, auditurumq. asserit, li-
bros quosdam suos ut legat. ac fraterna seneritate emendet,
postremo rogat.

Xxx

VMQVAM æque quisquam tam facile cuilibet facie
 N innotuit, quam mihi tuorum in Domino studio-
 rum quæta lætitia, & uere exercitatio liberalis.
 Quamquam ergo percipiam omnino te nosse; tamen exi-
 guum quoddam tui munus habeo, præsentiam uidelicet
 corporis: quam ipsam etiam postea quam te beatissimus
 nunc episcopus, tunc uero iam episcopatu dignus, frater
 Alipius uidit, remeansq. a me uisus est, negare non pos-
 sum, magna ex parte mihi esse relatu eius impressam: & an-
 te reditum cum te ille ibi uidebat, & ego uidebam, sed ocu-
 lis eius. non enim animo me atque illum, sed corpore du-
 os, qui nouerit, dixerit, concordia dumtaxat & familiarita-
 te fidissima, non meritis, quibus ille antecellit. Quia er-
 go me primitus communionem spiritus, quo in unum ne-
 scimur, deinde illius ex ore iam diligis; nequaquam impu-
 denter, quasi aliquis ignotus, commendo germanitati tuæ
 fratrem profuturum, quem nostris conatibus, deinde adiu-
 torio tuo uere profuturum speramus: nisi forte, quod ta-
 lis est, ut ipse tibi per eum fiam commendatior, quam il-
 le per me. Hactenus fortasse scribere debueram, si esse uel-
 lem epistolarum sollemnium more contentus: sed scatet
 animus in loquelas communicandas tecum de studiis no-
 stris, quæ habemus in christo Iesu domino nostro: qui no-
 bis multas utilitates & uatica quædam demonstrauit itine-
 ris, & iam per tuam caritatem non mediocriter ministrare di-
 gnatur. Petimus ergo, & nobiscum petit omnis Africana-
 rum ecclesiarum studiosa societas, ut in interpretandis eorum
 libris, qui Græce scripturas nostras quam optime tractaue-
 runt, curam atque operam impendere non graueris. Potes
 enim efficere, ut nos quoque habeamus illos tales uiros,
 & unum potissimum, quem tu libentius in tuis litteris so-
 nas. De uertendis autem in linguam Latinam sanctis litteris
 canonicis laborare te nollem, nisi eo modo, quo Iob inter-
 preta-

pretatus es: ut, signis adhibitis, quid inter hanc tuam & Septuaginta, quorum est grauissima auctoritas, interpretationem distet, appareat. Satis autem nequeo mirari, si aliquid adhuc in Hebraicis litteris & exemplaribus inuenitur, quod tot interpretes, illius linguæ peritissimos, fugerit. Omitto enim Septuaginta; de quorum uel consilii, uel maiore spiritus concordia, quasi unus homo esset, non audeo in aliquam partem certam ferre sententiam, nisi quod eis præminentem auctoritatem in hoc munere sine controversia tribuendam existimo. Illi me plus mouent, qui cum posteriores interpretarentur, & uerborum locutionumq. Hebræarum uiam atque regulas mordicus, ut fertur, tenerent, non solum inter se non consenserunt, sed etiam reliquerunt multa, quæ tanto post eruenda & prodenda remanerent. si enim obscura sunt; te quoque in illis falli potuisse creditur. si autem manifesta; illos in eis falli potuisse non creditur. Huius igitur rei pro tua caritate expositis causis, certum me facias obsecrauerim. Legi etiam quædam scripta, quæ tua dicerentur, in epistolas apostoli Pauli: quarum unam ad Galatas cum enodare uelles; uenit in ma *Gal. 3* nus locus ille, quo apostolus Petrus a perniciofa simulatione reuocatur. Ibi patrocinium mendacii susceptum esse uel abs te, tali uiro, uel a quopiam, si alius illa scripsit, fateor non mediocriter doleo, donec refellantur: si forte refelli possunt ea, quæ me mouent. Mihi enim uidetur exitiosissime credi, aliquod in sanctis libris haberi mendacium; idest eos homines, per quos nobis illa scriptura ministrata est, atque conscripta, aliquid in suis libris fuisse mentitos. Alia quippe quæstio est, sit ne aliquando mentiri uiri boni: & alia quæstio est, utrum scriptorem sanctarum scripturarum mentiri oportuerit: immo uero non alia, sed nulla est quæstio. admissio enim semel in tantum auctoritatis fastigiū officioso aliquo mendacio, nulla illorū librorum particula remanebit, quæ non, ut cuique uidebitur, uel ad mores difficilis, uel ad fidem in credibilis, eadē perniciosissima regula ad mentientis auctoris consilium officiumq. re

X x x 2 feratur.

feratur. Si enim mentiebatur apostolus Paulus, cum apostolum Petrum obiurgans diceret: Si tu, cum sis Iudæus, gentiliter & non Iudaice uiuis, quemadmodum cogis gentes Iudaizare? Et recte illi uidebatur Petrus fecisse; quem non recte fecisse, & dixit, & scripsit: ut quasi animos tumultuantium deliniret. Quid respondebimus, cum exurrexerint peruersi homines, prohibentes nuptias, quos
 1. Tim. 4 futuros ipse prænuñciauit, & dixerint, totum illud, quod
 1. Cor. 7 idem Apostolus de matrimoniorum iure firmando locutus est, propter homines, qui dilectioni coniugum tumultuari poterant, fuisse mentitum; scilicet non quod hoc senserit, sed ut illorum placaretur aduersitas? Non enim opus est multa commemorare. Possunt enim uideri etiam de laudibus Dei esse officiosa mendacia, ut apud homines pigriores dilectio eius ardeat: atque ita nusquam certum erit in sanctis litteris castæ ueritatis auctoritas. Nonne attendimus, eundem Apostolum cum ingenti cura ueritatis commendandæ dicere? Si autem Christus non resurrexit, inanis est prædicatio nostra, inanis est & fides uestra. Inuenimur autem & falsi testes Dei: quia testimonium diximus aduersus Deum, quod suscitauit Christum, quem non suscitauit. Si quis huic diceret; quid in hoc mendacio perhorrescis, cum id dixeris, quod etiam si falsum sit, ad laudem Dei maxime pertinet? Nonne huius detestatus insaniam, quibus posset uerbis & significationibus in lucem penetralia sui cordis aperiret? clamans, non minore, aut fortasse etiam maiore scelere in Deo laudari falsitatem, quam ueritatem uituperari? Agendum est igitur, ut ad cognitionem diuinarum scripturarum talis homo accedat, qui de sanctis libris tam sancte & ueraciter æstimet, ut nolit aliquarum parte delectari per officiosa mendacia: potiusque id, quod non intelligit, transeat, quàm cor suum præferat ueritati. Profecto enim, cùm hoc dicit, credi sibi expetit, & id agit, ut diuinarum scripturarum auctoritatibus non credamus. Et ego quidem qualibuscumque uiribus, quas Dominus suggerit, omnia illa testimonia, quæ adhibita sunt, altribuenda

de utilitati mendacii, aliter oportere intelligi ostenderé: ut ubique eorum firma ueritas doceretur. quam enim testimonia mendacia esse non debent, tam non debent fauere mendacio. Sed hoc intelligentiæ tuæ relinquo. admota enim lectioni diligentiori consideratione, multo id fortasse facilius uidebis, quam ego. Ad hanc autem considerationem coget te pietas, qua cognoscis fluctuare auctoritatem scripturarum diuinarum; ut in eis, quod uult, quisque credat; quod non uult, non credat; si semel fuerit persuasum, aliqua ratione illos uiros, per quos nobis hæc ministrata sunt, in scripturis suis officiose potuisse mentiri. nisi forte regulas quasdam daturus es, quibus nouerimus, ubi oportet mentiri, & ubi non oporteat. quod si fieri potest; nullo modo mendacibus dubiisque rationibus id explices, quæso. Nec me onerosum, aut impudentem iudices, per humanitatem ueracissimam Domini nostri. nam, ut non dicam nulla, certe non magna culpa, meus error ueritati fauet: si recte in te ueritas potest fauere mendacio. Multa alia cum sincerissimo corde tuo loqui cuperem, & de Christiano studio conferre: sed huic desiderio meo nulla epistola fatis est. uberius id ipsum possum per fratrem Profuturum: quem miscendum, & alendum dulcibus atque utilibus sermocinationibus tuis misisse me gaudeo. Et tamen, quantum uellem, nec ipse, quod eius pace dixerim, forsitan capit: quamquam in nihilo me illi prætulerim. ego enim me fateor tui capacior: sed ipsum uideo fieri plenior, quod me sine dubitatione antecellit: & posteaquã redierit, quod, Domino adiuuante, prosperato fiat cursu, cum eius pectoris abs te cumulati particeps fuero, non est impleturus, quod in me adhuc uacuum erit, atque audum sensuum tuorum. ita fiet, ut & ego etiam tunc egentior sim, ille copiosior. Sane idem frater aliqua scripta nostra fert secum: quibus legendis si dignationem adhibueris, etiam sinceram fraternamque seueritatem adhibeas quæso. non enim aliter intelligo, quod scriptum est. Emendabit me iustus in misericordia, & arguet me: oleum autem peccatoris non im-

Psal. 140

X x x 3 pin-

pinguet caput meum : nisi quia magis amat obiurgator sanans , quam adulator unguens caput . Ego autem difficillime bonus iudex lego quod scripserim , sed aut timidior recto , aut cupidior . Video etiam interdum uitia mea : sed ea malo audire a melioribus : ne , cum me recte fortasse reprehendero , rursus mihi blandiar ; & meticulosam mihi uidear in me potius , quam iustam tulisse sententiam .

ARGUMENTVM.

ASIT gratias , quod ei rescribere dignatus sit ; queritque cur librum de scriptoribus ecclesiasticis epitaphium , quod ex fama audierat , appellarit ; & quo modo mendacium in scripturis sacris recipiat , cum dixerit Paulum in coarguendo Petro simulasse , rursus , eam sententiam taxando , percunctatur . Postremo quæ sit Origenis , ceterorumque hæreticorum errata , cum id in catalogo non fecerit , ut alio , dū uacat , explicet libro , orat .

AVGVSTINVS HIERONYMO.

EPISTOLA LXXXVII.

ABEO gratiā , quod , pro subscripta salutatione , mihi plenam epistolam reddidisti , sed breuiorē multo , quam ex te uellem suscipere , tali uiro : a quo , tempora quantalibet occupet , nullus sermo prolixus est . Quamquā itaque nos negotiorum alienorū , eorūque sæcularium , curis circumstemur ingentibus : tamen epistolæ tuæ breuitati facile non ignoscerem , nisi cogitarem , quam paucioribus uerbis meis redderetur . Quare aggredere , quæso , istam nobiscum litterariam colloctionem ; ne multū ad nos disiungendos liceat absentiae corporali : quamquam simus in Domino spiritus unitate coniuncti , etiam si ab istylo quiescamus , atque taceamus . Et libri quidem , quos de horreo Dominico elaborasti , pene totū nobis te exhibēt . si enim propterea te non nouimus , quia faciem corporis tui non uidimus : hoc modo nec ipse te nosti : nam tu quoque non uides eam . si autem tibi non ob aliud notus es , nisi

nisi quia nosti animum tuum : & nos eum non mediocriter
nouimus in litteris tuis : in quibus benedicimus Domi-
num, quod tibi, & nobis, omnibusq. fratribus, qui tua le-
gunt, te talem dedit. Liber quidam tuus inter cetera, non
diu est, quod uenit in manus nostras : quæ sit eius inscri-
ptio, nescimus adhuc. non enim hoc codex ipse, ut asso-
let, in liminari pagina prætendebat. epitaphium tamen
appellari dicebat frater, apud quem inuentus est. quod
ei nomen tibi placuisse ut inderetur crederemus, si eorum
tantum hominum uel uitas, uel scripta ibi legissemus, qui
iam defuncti essent. cum uero multorum & eo tempore,
quo scribebatur, & nunc usque uiuentium, ibi comme-
morentur opuscula : miramur, cur hunc ei titulum uel in-
posueris, uel imposuisse credaris. tamen utiliter a te con-
scriptum eundem librum satis approbamus. In expositio-
ne quoque epistolæ Pauli apostoli ad Galatas inuenimus *Gal. 2*
aliquid, quod nos multum moueat. Si enim ad scriptu-
ras sanctas admissa fuerint officiosa mendacia : quid in eis
remanebit auctoritatis ? quæ tandem de scripturis illis sen-
tentia proferetur, cuius pondere contentiosæ falsitatis sub-
ruatur improbitas ? statim enim ut protuleris : si aliter sa-
pit, qui contra nititur ; dicet illud, quod prolatum erit, ho-
nesto aliquo officio scriptorem fuisse mentitum. Vbi enim
hoc non poterit : si poterit in ea narratione, qua exorsus
Apostolus, ait : Quæ autem scribo uobis, ecce coram Deo *Gal. 1*
quia non mentior : credi affirmariq. mentitus, eo loco ubi
dixit de Petro & Barnaba : Cum uiderem, quia non recte
ingrediebantur ad ueritatem euangelii ? Si enim recte ingre-
diebantur illi ; iste mentitus est. si autem ibi mentitus est ;
ubi uerum dixit ? An ibi uerum dixisse uidebitur, ubi hoc
dixerit, quod lector sapit ? Cum uero contra sensum lecto-
ris aliquid occurrerit ; officioso mēdacio deputabitur ? Nō
enim deesse poterunt causæ, cur existimetur, non solum
potuisse, uerum etiam debuisse mentiri ; si huic regulæ con-
ceditur locus. Non opus est hanc causam multis uerbis
agere, præsertim apud te ; cui sapienter providenti di-

XXX 4 cum

ctum est satis. Nequaquam uero mihi arrogauerim; ut ingenium tuum, diuino dono aureum, meis obolis ditare contendam: nec est quisquam te magis idoneus, qui opus illud emendet. Neque enim a me docendus es, quo modo **1. Cor. 9** intelligatur, quod idem dicit: Factus sum Iudæis tamquā Iudæus; ut Iudæos lucrifacerem: & cetera: quæ ibi dicuntur compassione misericordiæ, non simulatione fallaciæ. Fit enim tamquam ægrotus, qui ministrat ægroto, non cum se febres habere mentitur, sed cum animo condolentis cogitat, quemadmodum sibi seruire uellet, si ipse ægrota- ret. nam utique Iudæus erat; Christianus autem factus, non Iudæorum sacramenta reliquerat, quæ conuenienter ille populus & legitimo tempore, quo oportebat, acceperat. sed ideo susceperat ea celebranda, cum iam Christi esset apostolus: ut doceret non esse perniciosā iis, qui ea uellent, sicut a parentibus per legem acceperant, custodire, etiam cum in Christo credidissent: non tamen in eis iam constituerant spem salutis, quoniam per dominum Iesum salus ipsa, quæ ipsis sacramentis significabatur, aduen- **Act. 15** erat. Ideoq. gentibus, quod insuetos a fide renocarent, onera grauiā & non necessaria nullo modo imponēda esse censebat. Quapropter non ideo Petrum emendauit, quod paternas traditiones obseruaret: quod si facere uellet, nec mendaciter, nec incongrue faceret: quamuis enim iam su- perflua, tamen solita non nocerent: sed quoniam gentes co- gebat Iudaizare: quod nullo modo posset, nisi ea sic age- ret, tamquam adhuc etiam post Domini aduentum neces- saria saluti forent: quod uehementē per apostolatū Pau- li ueritas dissuasit. Nec apostolus Petrus hoc ignorabat, sed id faciebat, timens eos, qui ex circumcisione erant. ita- que & ipse uere correctus est: & Paulus uera narrauit: ne sancta scriptura, quæ ad fidem posteris edita est, admissa auctoritate mendacii; tota dubia nutet, ac fluctuet. Non enim potest aut oportet litteris explicari, quanta & quam inexplicabilia mala consequantur, si hoc concesserimus. posset autem opportune minusq. periculose demonstrari, si co-

si coram inter nos colloqueremur. Hoc ergo Iudæorum Paulus dimiserat, quod malum habebant: & in primis illud, quod ignorantes Dei iustitiam, & suam iustitiam uolentes constituere, iustitiæ Dei non sunt subiecti. Deinde quod post passionem & resurrectionem Christi, dato ac manifestato sacramento gratiæ, secundum ordinem Melchisedek, adhuc putabant uetera sacramenta, non ex consuetudine sollemnitatis, sed ex necessitate salutis, esse celebranda: quæ tamen si numquam fuissent necessaria, infructuose, atque inaniter pro eis Machabæi martyres fierent. 2. Mach. 6.7 Postremo illud, quod prædicatores gratiæ Christianos Iudæi, tamquam hostes legis, persequebantur. Hos itaque, atque huiusmodi errores, & uitia, dicit se damnare, & ut stercorea arbitratum: ut Christum lucrifaceret, non obseruationes legis, si more patrio celebrarentur, sicut & ab ipso celebratæ sunt, sine ulla salutis necessitate; non sicut Iudæi celebrandas putabant; aut fallaci simulatione, quod in Petro reprehenderat. Nam si propterea illa sacramenta celebravit, quia simulauit se Iudæum, ut illos lucrifaceret: cur non etiam sacrificauit cum gentibus: quia & iis, qui sine lege erant, tamquam sine lege factus est, ut eos quoque lucrifaceret: nisi quia & illud fecit, ut natura Iudæus; & hoc totum dixit, non ut fallaciter se fingeret esse quod non erat, sed ut misericorditer eis ita subueniendum esse sentiret, ac si ipse in eodem errore laboraret, non scilicet mentientis astu, sed compatiens affectu? Sicut eo ipso loco generaliter intulit: Factus sum infirmis infirmus, ut infirmos lucrifacerem: ut sequens conclusio, Omnibus omnia factus sum, ut omnes lucrifacerem, ad hæc referenda intelligatur, ut cuiusque infirmitatem tamquam in se ipso miseratus appareat. Non enim & cum diceret: Quis infirmatur, & ego non infirmior? infirmitatem alterius simulasse potius, quam doluisse, uolebat intelligi. Quare arripe, obsecro te, ingenuam, & uere Christianam cum caritate seueritatem, ad illud opus corrigendum, atque emendandum; & *παλινωδῶν*, ut dicitur, cane. Incomparabiliter

Rom. 10

2. Mach. 6.7

Philip. 3

1. Cor. 9

2. Cor. 12

liter enim pulchrior est ueritas Christianorū, quam Helena
 Græcorum. pro ista enim fortius nostri martyres aduersus
 hanc Sodomam, quam pro illa illi heroes aduersus Troiā,
 dimicauerunt. Neque ego hoc ideo dico, ut oculos cor-
 dis recipias: quos absit ut amiseris: sed ut aduertas: quos
 cum habeas sanos, & uigiles, nescio; quā dissimulatione
 auertisti; ut non intenderes quæ consequantur aduersa; si
 semel creditum fuerit posse honeste atque pie scriptores di-
 uinorum librorū in aliqua suis operis parte mentiri. Scri-
 pseram iam hinc aliquando ad te epistolam, quæ non perla-
 ta est: quia nec is perrexit, cui perferendam tradideram.
 ex qua illud mihi suggestum est, cum ista dictarem, quod in
 hac quoque prætermittere non debui: ut, si alia est senten-
 tia tua, eademq. est melior, timori meo libenter ignoscas.
 Si enim aliter sentis, uerumq. tu sentis: nam nisi uerum
 sit, melius esse non potest: ut non dicam nulla, certe non
 magna culpa, meus error ueritati fauet: si recte in quoquā
 ueritas potest fauere mendacio. De Origene autem quod
 rescribere dignatus es: iam sciebā non tantū in ecclesiasti-
 cis litteris, sed in omnibus recta, & uerā, quæ inuenerimus,
 approbare, atque laudare, falsa uero & praua improbare,
 atque reprehendere. Sed illud de prudentia doctrinaq. tua
 desiderabam, & adhuc desidero, ut nota nobis facias ea ipsa
 eius errata, quibus a fide ueritatis ille uir tantus recessisse
 conuincitur. In libro etiam, quo cunctos, quorum memi-
 nisse potuisti, scriptores ecclesiasticos, & eorum scripta cō-
 memorasti, commodius, ut arbitror, fieret, si, nominatis
 eis, quos hæresiarchas esse nosti, (quando ne ipsos quidem
 prætermittere uolueris,) subiungeres etiam, in quibus ca-
 uendi essent: quamquam nonnullos etiam prætermiseris:
 quod, scire cuperem, quo consilio factum sit. Aut, si illud
 uolumen forte onerare noluisti, ut, commemoratis hære-
 ticis, non adderes, in quibus eos catholica damnarit aucto-
 ritas: quæso, ne graue sit litterario labori tuo, quo non
 mediocriter per Domini nostri gratiā in Latina lingua san-
 ctorum studia & accendisti, & adiuuisti, id quod tibi per hu-
 mili-

militatem meam fraterna caritas indicit, ut, si occupatio-
nes tuæ sinunt, omnium hæreticorum peruersa dogmata,
qui rectitudinem fidei Christianæ usque ad hoc tempus uel
imprudētia, uel imperitia, uel peruicacia deprauare cona-
ti sunt, uno libello breuiter digesta edas, in notitiam eo-
rum, quibus aut non uacat propter alia negotia, aut non
ualent propter alienam linguam tam multa legere, atque
cognoscere. Diu te rogaŕem, nisi hoc soleret esse indicium
minus de caritate præsumētis. Hunc interea fratrem no-
strum in Christo Paulum multum commendo benignitati
tuæ: cuius in nostris regionibus existimationi bonum co-
ram Deo testimonium perhibemus.

ARGVMENTVM.

*CVM Hieronymus ad duas eius litteras non rescripsisset,
responsam petit: nouum testamentum, quod e greco transtule-
rit, laudat, idem fieri in ueteri, ut ex hebreo transferat fonte,
minime probans: narratq. tumultum quendam in ecclesia ali-
cubi excitatum, ob unam a Hieronymo commutatam uoculam.*

AVGVSTINVS HIERONYMO.

EPISTOLA LXXXVIII.

X QVO cœpi ad te scribere, ac tua scripta desi-
derare, numquam mihi melior occurrit occasio,
quam ut per Dei seruum, ac ministrum fidelissi-
mum, mihiq. carissimum, mea tibi afferretur epistola,
qualis est filius noster Cyprianus diaconus: per hunc certe
ita spero litteras tuas, ut certius in hoc rerum genere quid-
quam sperare non possim. nam nec studium in petendis
rescriptis memorato filio nostro deerit, nec gratia in pro-
merendis, nec diligentia in custodiendis, nec alacritas in
perferendis, nec fides in reddendis: tantum, si aliquod mo-
do mereat, adiuuet Dominus, & adsit cordi tuo, & desi-
derio meo: ut fraternam uoluntatem nulla maior uolun-

tas impediatur. Quia ergo duas iam epistolas misi: nullam autem tuam postea recepi: easdem ipsas rursus mittere uolui, credens eas ad te non peruenisse. quod si & peruenerunt, aut fortasse tuæ potius ad me minime peruenire potuerunt: ea ipsa scripta, quæ iam misisti, iterum mitte, si forte reseruata sunt: sin minus, rursus dicta quod legam: dum tamen his respondere non graueris: quod iam diu est, ut expecto primas etiam, quas ad te adhuc presbyter litteras præparaueram mittendas per quendam fratrem nostrum Profuturum; qui postea nobis collega factus, iam ex hac uita migravit: nec eas tunc ipse perferre potuit: quia continuo, dum proficisci disponit, episcopatus sarcina detentus, ac deinde in breui defunctus est, etiã nunc mittere uolui: ut scias, in tua colloquia quam olim inardescã; & quam uim patiar, quod a me tam longe absunt sensus corporis tui, per quos adire possit ad animum tuum animus meus, mi frater dulcissime, & in Domini membris honorande. In hac autem epistola hoc addo, quod postea didicimus, ex Hebræo Iob a te interpretatum, cum iam quandam haberemus interpretationem tuam eiusdem prophetæ ex Græco eloquio uersam in Latinum: ubi tamen asteriscis notasti, quæ in Hebræo sunt, & in Græco desunt; obeliscis autem, quæ in Græco inueniuntur, & in Hebræo non sunt, tam mirabili diligentia, ut quibusdam in locis ad singula uerba singulas stellas uideamus, significantes eadem uerba esse in Hebræo, in Græco autem non esse. Porro in hac posteriore interpretatione, quæ uersa est ex Hebræo, non eadem uerborum fides occurrit. Nec parum turbat cogitantem, uel cur in illa prima tanta diligentia figantur asterisci, ut minimas etiam particulas orationis indicent deesse codicibus Græcis, quæ sunt in Hebræis: uel cur in hac altera, quæ ex Hebræis est, negligentius hoc curatum sit; ut non eadem particule locis suis inuenirentur. Aliquid inde exempli gratia uolui ponere: sed mihi ad horam codex defuit, qui ex Hebræo est. Verumtamen, quia præuolas ingenio, non solum quid dixerim, uerum etiam

etiam quid dicere uoluerim, satis, ut opinor, intelligis; ut, causa reddita, quod mouet edisseras. Ego sane te mallem Græcas potius canonicas nobis interpretari scripturas, quæ Septuaginta interpretum auctoritate perhibentur. Perdurū enim erit, si tua interpretatio per multas ecclesias frequētius cœperit lectitari, quod a Græcis ecclesiis Latinæ ecclesiæ dissonabunt, maxime quia facile cōtradictor cōuincetur, Græco prolato libro, idest linguæ notissimæ. Quisquis autem in eo, quod ex Hebræo translatus est, aliquo insolito permotus fuerit, & falsi crimē intenderit; aut uix, aut numquam ad Hebræa testimonia peruenitur, quibus defendatur obiectum. quod si etiam peruentum fuerit, tot Latinas & Græcas auctoritates damnari quis ferat? Huc accedit, quia etiam consulti Hebræi possunt aliud respondere: ut tu solus necessarius uidearis, qui etiam ipsos possis conuincere: sed tamen, qui iudicet, mirum si potueris inuenire. nam quidam frater noster episcopus, cum lectitari instituisset in ecclesia, cui præest, interpretationem tuam, mouit quiddam longe aliter abs te positum apud Ionam prophetam, quam erat omnium sensibus memoriarq. inueteratum, & tot ætatum successionebus decantatum: factusq. est tantus tumultus in plebe, maxime Græcis arguentibus, & inclamantibus calumniam falsitatis, ut cogeretur episcopus (ea quippe ciuitas erat) Iudæorum testimonium flagitare. utrum autem illi imperitia, an malitia, hoc esse in Hebræis codicibus responderunt, quod & Græci & Latini habebant. quid plura? coactus est homo uelut mendositatem corrigere, uolens, post magnum periculum, non remanere sine plebe. Vnde etiam nobis uidetur, aliquando te quoque in nonnullis falli potuisse. Et uide, hoc quale sit, in eis litteris, quæ non possunt collatis nistatarum linguarum testimoniis emendari. Proinde non paruas Deo gratias agimus de opere tuo, quod euangelium ex Græco interpretatus es: quia pene in omnibus nulla offensus est, cum scripturam Græcam contulerimus. Vnde, si quisquam ueteri falsitati contentiosus fauerit, pro-

latis

latis collatisq. codicibus, uel docetur facillime, uel refellitur. Et si quædam rarissima merito mouent; quis tam durus est, qui labori tam utili non facile ignoscat, cui uicem laudis referre non sufficit? Quid tibi autem uideatur, cur in multis aliter se habeat Hebræorum codicum auctoritas, aliter Græcorum, quæ dicitur Septuaginta, uellem dignareris aperire. neque enim paruum pondus habet illa, quæ sic meruit diffamari, & qua ufos apostolos, non solum res ipsa indicat, sed etiam te attestatum esse memini. ac per hoc plurimum profueris, si eam scripturam Græcam, quam Septuaginta interpretati sunt, Latinæ ueritati reddideris: quæ in diuersis codicibus ita uaria est, ut tolerari uix possit; & ita suspecta, ne in Græco aliud inueniatur, ut inde aliquid proferri, aut probari dubitetur. Breuem putabam futuram hanc epistolam: sed nescio quo modo ita mihi dulce factum est in ea progredi, ac si tecum loquerer. Sed obsecro te per Dominum, ne te pigeat ad omnia respondere, & præstare mihi, quantum potueris, præsentiam tuam.

ARGUMENTVM.

RESPONDENS tandem Hieronymus ad superiores Augustini epistolas, postquam, quenam sit catologi inscriptio, docuit, suam de Petri simulatione sententiam, prout locum illi ad Galatas exposuerat, mordicus tuetur, asserens non solum Petrum, sed ipsum etiam Paulum, ob salutem: illum Iudeorum, hunc gentium equaliter finxisse; Augustiniq. expositionem aliam, uelut Iudeorum legem ad tempus seruandam scripserit, reprehendit. Translationis Bibliorum, cum signis, aut sine, quæ sit, rationem reddit. et quod post lxx. interpretes sua ex Hebræo uersio superflua non sit; eodem Augustinum reuincens syllogismo, docet. Postremo cur apud Ionam hederam procucurbita uerterit, ex plantæ similitudine monstrat.

HIERONYMVS AVGVSTINO.

EPISTOLA LXXXIX.

RES simul epistolas, immo libellos per diaconum
T Cyprianū tuæ dignationis accepi, diuersas, ut tu
 nominas, quæstiones, ut ego sentio, reprehensio-
 nes opusculorum meorum continentes. ad quas si respon-
 dere uoluerō, libri magnitudine opus erit. tamē conabor,
 quantum facere possum, modum non egredi longioris epi-
 stolæ, & festinanti fratri moram non facere: qui ante tridu-
 um, quam profecturus erat, a me epistolas flagitauit: ut
 penē in procinctu hæc, qualiacumque sunt, effutire com-
 pellar, & tumultuario respondere sermone, non maturita-
 te scribentis, sed distantis temeritate: quæ plerumque non
 in doctrinam, sed in casum uertitur: ut fortissimos quoq.
 milites subita bella conturbant: & ante coguntur fugere,
 quam possint arma corripere. Ceterum nostra armatura
 Christus est, & apostoli Pauli institutio, qui scribit ad Ephe *Eph. 6*
 sios: Assumite arma Dei, ut possitis resistere in die malo.
 Et rursum: State succincti lumbos uestros in ueritate, &
 induti lorica iustitiæ, & calciati pedes in præparationem
 euangelii pacis: super omnia accipientes scutum fidei, in
 quo possitis uniuersa tela maligni ignita extinguere: & ga-
 leam salutis accipite, & gladium spiritus, quod est uer-
 bum Dei. His quondam telis rex Dauid armatus procede- *1. Reg. 17*
 bat ad prælium: & quinque lapides de torrente accipiens
 leuigatos, nihil asperitatis & sordium inter huius sæculi tur-
 bines, in sensibus suis esse monstrabat: bibens de torrente
 in uia: & iccirco exaltauit caput: & superbissimum Goliā *Psal. 109*
 suo potissimum mucrone truncauit, percutiens in fronte
 blasphemum, & in ea parte corporis uulnerans, in qua &
 præsumptor sacerdotii Ozias lepra percutitur, & sanctus *2. Par. 26*
 gloriatur in Domino dicens: Signatum est super nos lumen *Psa. 4. 107*
 uultus tui Domine. Dicamus igitur & nos: Paratum cor *Psal. 56. 8a*
 meum Deus, paratum cor meum, cantabo & psallam in
 gloria mea. Exurge psalterium & cithara, exurgam dilucu-
 lo;

Psal. 67 lo: ut in nobis possit impleri: *Aperi os tuum, & ego adimplebo illud.* Et Dominus dabit uerbum euangelizantibus uirtute multa. Te quoque hoc ipsum orare non dubito, ut inter nos contententes ueritas superet. non enim tuam quæris gloriam, sed Christi. Cumq. tu uiceris, & ego uincam, si meum errorem intellexero: & econtrario, me uincente, tu superas: quia non filii parentibus, sed parentes filiiis thesaurizant. Et in Paralipomenon libro legimus, quod filii Israel ad pugnandum processerint mente pacifica: inter ipsos quoque gladios, & effusiones sanguinis, & cadauera prostratorum, non suam sed pacis uictoriam cogitantes. Respondeamus igitur ad omnia; ac multiplices quæstiones, si Christus iusserit, breui sermone soluamus. Prætermitto salutationis officia, quibus meum demulces caput: taceo de blanditiis, quibus reprehensionem meam niteris consolari: ad ipsas causas ueniam. Dicis accepisse te librum meum a quodam fratre, qui titulum non haberet, in quo scriptores ecclesiasticos tam Græcos quam Latinos enumerauerim: cumq. ab eo quæreret, (ut tuis uerbis utar,) cur liminaris pagina non esset inscripta, uel quo censeretur nomine: respondisse, appellari Epitaphium: & argumentaris, quod recte sic uocaretur, si eorum tantum uel uitas, uel scripta ibi legisses, qui iam defuncti essent: cum uero multorum & eo tempore, quo scribebatur, & nunc usque uiuentium ibi commemorentur opuscula, mirari te, cur ei hunc titulum imposuerim. Puto intelligere prudentiam tuam, quod ex opere ipso titulum potueris intelligere. legisti enim & Græcos & Latinos, qui uitas uirorum illustrium descripserunt, quod numquam Epitaphium titulum indiderint, sed de illustribus uiris, uerbi gratia, ducibus, philosophis, oratoribus, historicis, poetis, epicis, physicis, tragicis, comicis. Epitaphium autem proprie inscribitur mortuorum: quod quidem in dormitione, sanctæ memoriæ, Nepotiani presbyteri olim fecisse me noui. Etgo hic liber uel de illustribus uiris, uel proprie de scriptoribus ecclesiasticis appellandus est; licet a plerisque emendatoribus

datoribus imperitis, De auctoribus dicatur inscriptus. Secundo loco quæris, cur dixerim in commentariis epistolæ ad Galatas, Paulum id in Petro non potuisse reprehendere, quod ipse fecerat; nec in alio arguere simulationem, cuius ipse tenebatur reus: & asseris, reprehensionem apostolicam non fuisse dispensatoriam, sed ueram; & me non debere docere mendacium, sed uniuersa, quæ scripta sunt, ita sonare, ut scripta sunt. Ad quæ primum respondeo, debuisse prudentiam tuam præfatiunculæ commentariorum meorum meminisse, dicentis ex persona mea: Quid igitur ego stultus, aut temerarius, qui id pollicear, quod ille non potuit? Minime: quin potius in eo mihi uideor cautior, atque timidior, quod imbecillitatem uirium mearum sentiens, Origenis commentarios secutus sum. Scripsit enim ille uir in epistolam Pauli ad Galatas quinque propria uolumina; & decimum Stromateon suorum librum, comatico super explanatione eius sermone compleuit. tractatus quoque uarios, & excerpta, quæ uel sola possent sufficere, composuit. Prætermitto Didymum uidentem meum, & Laodicenum de ecclesia nuper egressum, & Alexandrū ueterem hæreticum: Eusebium quoque Emisenum, & Theodorum Heracleotem: qui & ipsi nonnullos super hac re commentarios reliquerunt. e quibus si uel pauca decernerem; fieret aliquid, quod non penitus contemneretur. Itaque, ut simpliciter fatear, legi hæc omnia; & in mente mea plurima coaceruans, accito notario, uel mea, uel aliena dictaui, nec ordinis, nec uerborum interdum, nec sensum memor. Iam Domini misericordiæ est, ne per imperitiam nostram ab aliis bene dicta dispereant; & non placeant inter extraneos, quæ placent inter suos. Si quid igitur reprehensione dignum putaueras in explanatione nostra, eruditionis tuæ fuerat quærere, utrum ea, quæ scripsimus, haberentur in Græcis: ut, si illi non dixissent, tunc meam proprie sententiam condemnares: præsertim cum libere in præfatione confessus sum, Origenis commentarios me esse secutum, & uel mea, uel aliena dictasse; & in fine eiusdem

Y y capituli,

capituli, quod reprehendis, scripserim: si cui iste nō placet sensus, quo nec Petrus peccasse, nec Paulus procaciter ostēditur arguisse maiorem: debet exponere, qua consequentia Paulus in altero reprehendat, quod ipse commisit. Ex quo ostendi, me nō ex definito id defendere, quod in Græcis legeram, sed ea expressisse, quæ legeram: ut lectoris arbitrio derelinquerem, utrum probanda essent, an improbanda. Tu igitur, ne, quod ego petieram, faceres; nouum argumentum reperisti: ut assereres, gentiles, qui in Christum credidissent, legis onere liberos; eos autem, qui ex Iudæis crederent, legi esse subiectos: ut per utrorumque personam & Paulus recte reprehenderet eos, qui legem seruarent, quasi doctor gentium; & Petrus iure reprehenderetur, qui princeps circumcisionis id imperauerit gentibus, quod soli, qui ex Iudæis erant, debuerunt obseruare. Hoc si placet, immo quia placet; ut, quicumque credunt ex Iudæis, debitores sint legis faciendæ: tu, ut episcopus, in toto orbe notissimus, debes hanc promulgare sententiam, & in assensum tuū omnes coepiscopos trahere. ego in paruo tuguriolo cum monachis, idest cum compeccatoribus meis, de magnis statuere non audeo, nisi hoc ingenue confiteri, me maiorum scripta legere, & in commentariis, secundum omnium consuetudinem, uarias ponere explanationes, ut e multis sequatur unusquisque, quod uelit. quod quidem te puto & in seculari litteratura, & in diuinis libris legisse, & probasse. Hanc autem explanationem, quam primus Origenes in decimo Stromateon libro, ubi epistolam Pauli ad Galatas interpretatur, & ceteri deinceps interpretes sunt secuti, illa uel maxime causa subintroducunt; ut Porphyrio respondeant blasphemanti, qui Pauli arguit procacitatem, quod principem apostolorum Petrum ausus est reprehendere, & arguere in faciem, ac ratione constringere, quod male fecerit, idest in eo errore fuerit, in quo fuit ipse, qui alium arguit delinquentem. Quid dicam de Ioanne? qui dudum in pontificali gradu Constantinopolitanā rexit ecclesiam; & proprie super hoc capitulo latissimum

num
nam
re me
multos
unum
tione
aduer
uitorū
confer
bus ap
occide
& ierpe
nullū h
ter om
Petrus
dum.
Quæ
que Ca
um dū
accep
tunc u
finitu
qui uel
tus hū
aqua
Spiri
in noi
li, &
runt
lyma
chor
bene
posi
Si en
qui
erant

mum exarauit librum; in quo Origenis & ueterum senten-
 tiam est secutus. Si igitur me reprehendis errantem; pate-
 re me, quæso, errare cum talibus: & cum me erroris mei
 multos socios habere perspexeris, tu ueritatis tuæ saltem
 unum adstipulatorem proferre debebis. Hæc de explana-
 tione unius capituli epistolæ ad Galatas. Sed, ne uidear
 aduersus rationem tuam niti testium numero, & occasione
 uirorū illustrium subterfugere ueritatem, nec manū audere
 conferere; breuiter de scripturis exempla proponā. In Acti Act. 10
 bus apostolorū uox facta est ad Petrū, dicens: Surge Petre,
 occide, & manduca, idest, omnia animalia quadrupedum,
 & serpentium terræ, & uolatiliū cæli. Quo dicto, ostenditur
 nullū hominem secundū naturam esse pollutum, sed æquali-
 ter omnes ad Christi gratiā prouocari. Ad quod respondit
 Petrus: Absit, quia numquā manducaui cōmune, & immū-
 dum. Et uox ad eum de cælo secundo facta est, dicens:
 Quæ Deus mundauit, tu ne commune dixeris. Iuit ita-
 que Cæsaream; & ingressus ad Cornelium, aperiens os su-
 um dixit: In ueritate comperi, quia non est personarum
 acceptor Deus: sed in omni gente, qui timet eum, & ope-
 ratur iustitiam, acceptus est illi. Denique cecidit Spiritus
 sanctus super eos, & obstupuerunt ex circūcisione fideles,
 qui uenerant cum Petro, quod & in nationes gratia Spiri-
 tus sancti fuisset effusa. Tunc respondit Petrus: Numquid
 aquām quis prohibere potest, ut non baptizentur ii, qui
 Spiritum sanctum acceperunt, sicut & nos? Et iussit eos
 in nomine Iesu Christi baptizari. Audierunt autem aposto-
 li, & fratres, qui erant in Iudæa, quia & gentes recepe-
 runt uerbum Dei. Cum autem ascendisset Petrus Hieroso-
 lymam, disceptabant aduersus illum, qui erant ex circum-
 cisione, dicentes, quare introisti ad uiros præputium ha-
 bentes, & manducaisti cum illis? Quibus omni ratione ex-
 posita, nouissime orationem suam hoc sermone conclusit.
 Si ergo eandem gratiam dedit illis Deus, sicut & nobis,
 qui credidimus in dominum Iesum Christum: ego quis
 eram, qui possem prohibere Deum? His auditis, tacue-
 runt,

Y y 2 runt,

runt, & glorificauerunt Deum, dicentes: Ergo & gentibus penitentiam Deus ad uitam dedit. Rursum, cum multo post tempore Paulus & Barnaba uenissent Antiochiam; &, congregata ecclesia, retulissent quanta fecisset Deus cum illis; & quia aperuisset Deus gentibus ostium fidei; quidam, descendentes de Iudæa, docebant fratres, atque dicebant: Nisi circumcidamini secundum morem Moysi, non potestis salui fieri. Commota igitur seditione non minima aduersus Paulum, & Barnabam, statuerunt ascendere & ipsi, qui accusabantur, & ii, qui accusabant, ad apostolos, & presbyteros Hierosolymam super hac questione. cumq. Hierosolymam perrexissent, exurrexerunt quidam de hæresi phariseorum, qui crediderant in Christum, dicentes: Oportet circumcidi eos, & præcipere illis, ut seruent legem Moysi. Et cū magna super hoc uerbo oriretur quæstio; Petrus solita libertate, Viri, inquit, fratres, uos scitis, quoniam ab antiquis diebus in nobis elegit Deus per os meum audire gentes uerbum euangelii, & credere: & qui nouit corda Deus, testimonium perhibuit, dans illi Spiritum sanctum, sicut & nobis; & nihil discreuit inter nos & illos, fide purificans corda illorum: nunc autem, quid tentatis Deum imponere iugum super ceruicem discipulorum, quod neque patres nostri, neque nos portare potuimus? sed per gratiam domini nostri Iesu Christi credimus saluari, quemadmodum & illi. Tacuit autem omnis multitudo, & in sententiam eius Iacobus apostolus, & omnes simul presbyteri transferunt. Hæc non debent molesta esse lectori, sed & mihi, & illi utilia, ut probemus, ante apostolum Paulum non ignorasse Petrum principem huius decreti, legem post euangelium non esse seruandam. Denique tantæ auctoritatis Petrus fuit, ut Paulus in epistola sua scripserit: Deinde post annos tres

Gal. 1 ueni Hierosolymam uidere Petrum, & mansi apud eum diebus quindecim. Rursumq. in consequentibus. Post annos

Gal. 2 nos quattuordecim ascendi iterum Hierosolymam cum Barnaba, assumpto & Tito. ascendi autem secundum reuelatio-

uelationem, & exposui cum eis euangelium, quod prædico in gentibus: ostendens se non habuisse securitatem prædicandi euangelii, nisi Petri, & ceterorum apostolorum, qui cum eo erant, fuisset sententia roboratum. Statimq. sequitur: Separatim autem iis, qui uidebantur aliquid esse, ne forte in uacuum currem, aut cucurrissem. Quare separatim, & non publice? Ne forte fidelibus, qui, ex numero Iudæorum, legem putabant esse seruandam, & sic credendum in Domino saluatore, fidei scandalum nasceretur. Ergo & eo tempore cum Petrus uenisset Antiochiam, (licet hoc apostolorum Acta non scribant, sed affirmanti Paulo credendum sit) in faciem illi Paulus restitisse se scribit; quia reprehensibilis erat. Prius enim, quam uenirent quidam a Iacobo, cum gentibus edebat: cum autem uenissent, subtrahebat se, & segregabat, timens eos, qui ex circumcisione erant. & consenserunt simulationi eius ceteri Iudæi, ita ut Barnabas adduceretur ab iis in illam simulationem. Sed cum uidissem, inquit, quod non recte ingrediebantur ad ueritatem euangelii, dixi Petro coram omnibus: Si tu, cum sis Iudæus, gentiliter, & non Iudaice uiuis; quo modo cogis gentes Iudaizare? & cetera. Nulli ergo dubium est, quod Petrus apostolus sententiæ huius, cuius nunc præuicator arguitur, primus auctor extiterit. causa autem præuicationis, timor est Iudæorum. dicit enim scriptura, quod primum edebat cum gentibus: cum autem uenissent quidam a Iacobo, subtrahebat se, & segregabat, timens eos, qui ex circumcisione erant. Timebat autem Iudæos, quorum erat apostolus: ne, per occasionem gentilium, a fide Christi recederent; & imitator pastoris boni, perderet gregem sibi creditum. Sicut ergo ostendimus, Petrum bene quidem sensisse de abolitione legis Moisaicæ, sed ad simulationem obseruandæ eius timore compulsum: uideamus, an ipse Paulus, qui alium arguit, tale quid fecerit. Legimus in eodem libro: Perambulabat autem Paulus Syriam, & Ciliciam, confirmans ecclesias; Act. 16 peruenitq. in Derben, & Lustram: & ecce discipulus qui-

Y y 3 dam

dam erat ibi, nomine Timotheus, filius mulieris uiduæ fidelis, patre autem gentili. huic autem testimonium reddebant, qui Listris erant, & Iconio fratres. hunc uoluit Paulus secum proficisci; & assumens circumcidit eum propter Iudæos, qui erant in illis locis. sciebant enim omnes, quod pater eius gentilis esset. O beate apostole Paule, qui in Petro reprehenderas simulationem, quare subtraxisset se a gentibus propter metum Iudæorum, qui ab Iacobo uenerant, cur Timotheum, filium hominis gentilis, utique & ipsum gentilem, (neque enim Iudæus erat, qui non fuerat circumcissus) contra sententiam tuam circumcidi coegisti? Respondebis mihi: Propter Iudæos, qui erant in illis locis. Qui igitur tibi ignoscis in circumcisione discipuli uenientis ex gentibus, ignosce & Petro, præcessori tuo, quod aliqua fecerit metu fidelium Iudæorum. Rursum scriptum est: Paulus uero, cum adhuc sustinuisset dies multos, fratribus uale dicens, nauigauit Syriam, & cum eo Priscilla, & Aquila, & totondit sibi in Cenchreis caput: uotum enim habuerat. Esto, ibi timore Iudæorum compulsus sit facere quod nolebat: quare comam nutriuit ex uoto, & postea eam in Cenchreis totondit ex lege, quod Nazaræi, qui se Deo uouerint, iuxta præceptum Moysei facere consueuerunt? Verum hæc ad comparisonem eius rei, quæ se

Act. 18 quitur, parua sunt. Refert Lucas, sacre scriptor historię: Cum uenissemus Hierosolimam, libenter susceperunt nos fratres: & sequenti die Iacobus & omnes seniores, qui cū eo erant, euangelio illius comprobato, dixerunt ei: Vides frater, quot millia sunt in Iudæa, qui crediderunt in Christo: & hi omnes æmulatores sunt legis. audierunt autem de te, quod discessionem doceas a Moyse, eorum, qui per gentes sunt, Iudæorum, dicens, non debere eos circumcideri filios suos, neque secundum consuetudinem ingredi. Quid ergo est? utique oportet conuenire multitudinem. audierunt enim te superuenisse. hoc ergo fac, quod tibi dicimus. Sunt nobis uiri quattuor uotum habentes super se. his assumptis, sanctifica te cum ipsis, & impende in eos,

ut ra-

ut radant capita : & scient omnes , quia , quæ de te audierunt , falsa sunt : sed ambulas & ipse custodiens legem . Tūc Paulus , assumptus uiris , postero die purificatus , intrauit cum illis in templum , annuncians expletionem dierum purificationis , donec offerretur pro unoquoque eorum oblatio . O Paule , & in hoc te rursus interrogo ; cur caput raseris ; cur nudipedalia exercueris de cærimoniis Iudæorum ; cur obtuleris sacrificia , & secundum legem pro te hostiæ fuerint immolatæ ? Vtique respondebis , ne scandalizarentur , qui ex Iudæis crediderunt . Simulasti ergo Iudæum , ut Iudæos lucrifaceres : & hâc ipsam simulationem Iacobus , & ceteri te docuere presbyteri : sed tamen euadere non potuisti : Orta enim seditione , cum occidendus esses , raptus Act. 23 es a tribuno , & ab eo missus Cæsaream , sub custodia militum diligenti , ne te Iudæi , quasi simulatorem ac destructorem legis , occiderent . atque inde Romam perueniens , in hospitio , quod tibi conduxeras , Christum & Iudæis & gentibus prædicasti : & sententia tua , Neronis gladio confirmata est . Didicimus , quod propter metum Iudæorum & Petrus & Paulus æqualiter finxerint se legis præcepta seruare . qua igitur fronte , qua audacia Paulus in altero reprehendit , quod ipse commisit ? Ego , immo alii ante me exposuerunt causam , quam putauerant , non officiosum mendacium defendentes , sicut tu scribis , sed ostendentes honestam dispensationem ; ut & apostolorum prudentiam demonstrarent , & blasphemantis Porphyrii impudentiam coercerent , qui Paulum & Petrum puerili dicit inter se pugnassee certamine ; immo exarsisse Paulum in inuidiam uirtutum Petri , & ea scripsisse iactanter , quæ uel nō fecerit , uel , si fecerit , procaciter fecerit , id in alio reprehendens , quod ipse commiserit . Interpretati sunt illi , ut potuerunt : tu quo modo istum locum edisseras , utique meliora dicturus , qui ueterum sententiam reprobasti ? Scribis ad me in epistola tua : Neque enim a me docendus es , quo modo intelligatur . quod idē dicit : Factus sum Iudæis 1. Cor. 9 tamquam Iudæus : & cetera , quæ ibi dicuntur compassio-

ne misericordiae, non simulatione fallaciae. Fit enim tamquam aeger, qui ministrat aegroto, non cum se febres habere mentitur, sed cum animo condolentis cogitat, quemadmodum sibi seruire uellet, si ipse aegrotaret. Nam utique Iudaeus erat; Christianus autem factus, non Iudaeorum sacramenta reliquerat; quae conuenienter ille populus, & legitimo tempore, quo oportebat, acceperat. Ideoque suscepit ea celebranda, cum iam Christi esset apostolus; ut doceret non esse perniciose iis, qui ea uellent, sicut a parentibus per legem acceperant, custodire, etiam cum in Christo credidissent; non tamen in eis iam constituerent spem salutis; quoniam per dominum Iesum salus ipsa, quae illis sacramentis significabatur, aduenerat. Totius sermonis tui, quem disputatione longissima protraxisti, hic sensus est; ut Petrus non errauerit in eo, quod his, qui ex Iudaeis crediderant, putauerit legem esse seruandam; sed in eo a recta linea deuiarit, quod gentes coegerit Iudaizare; coegerit autem non docentis imperio, sed conuersationis exemplo; & Paulus non contraria sit locutus iis, quae ipse gesserat; sed quare Petrus eos, qui ex gentibus erant, Iudaizare compelleret. Haec ergo summa est quaestionis, immo sententiae tuae; ut, post euangelium Christi, bene faciant Iudaei credentes, si legis mandata custodiant; hoc est, si sacrificia offerant, quae obtulit Paulus; si filios circumcidant; si sabbatum seruent, ut Paulus in Timotheo, & omnes obseruare Iudaei. Si hoc uerum est: in Cherinthi & Hebionis haesim dilabimur, qui credentes in Christo, propter hoc solum a patribus anathematizati sunt, quod legis caerimonias Christi euangelio miscuerunt; & sic noua confessi sunt, ut uetera non amitterent. Quid dicam de Hebionitis, qui Christianos esse se simulant? Usque hodie per totas orientis synagogas inter Iudaeos haeresis est, quae dicitur Mineorum, & a phariseis nunc usque damnatur, quos uulgo Nazareos nuncupant, qui credunt in Christum, filium Dei, natum de uirgine Maria; & eum dicunt esse, qui sub Pontio Pilato passus est, & resurrexit; in quem

quem & nos credimus : sed dum uolunt & Iudæi esse , & Christiani , nec Iudæi sunt , nec Christiani . Oro ergo te , ut , qui nostro uulnuscule medendum putas , quod acu foratū est , immo punctum , ut dicitur , huius sententiæ medearis uulneri , quod lancea , & , ut ita dicam , phalaricæ mole percussū est . neque enim eiusdem est criminis , in explanatione scripturarum diuersas maiorum sententias ponere , & hæresim sceleratissimam rursū in Ecclesiam introducere . Sin autem hæc nobis incumbit necessitas , ut Iudæos cum legitimis suis suscipiamus ; & licebit eis obseruare in ecclesiis Christi , quod exercuerunt in synagogis sathanæ : dicam quod sentio : non illi Christiani fient , sed nos Iudæos facient . Quis enim hoc Christianorum patienter audiat , quod in tua epistola continetur ? Iudæus erat Paulus ; Christianus autem factus , non Iudæorum sacramenta reliquerat , quæ conuenienter ille populus & legitimo tempore , quo oportebat , acceperat , ideoq. suscepit celebranda ea , cum iam Christi esset apostolus : ut doceret nō esse pernicioſa iis , qui ea uellent , sicut a parentibus per legem acceperant , custodire . Rursū obsecro te , ut pace tua meum dolorem audias . Iudæorū Paulus cærimonias obseruabat , cum iam Christi esset apostolus : & dicis eas non esse pernicioſas iis , qui eas uellent , sicut a parentibus acceperant , custodire ? Ego econtrario loquar , & , reclamante mundo , libera uoce pronuncio ; cærimonias Iudæorum & pernicioſas esse , & mortiferas Christianis ; & , quicumque eas obseruauerit , siue ex Iudæis , siue ex gentibus , eum in barathrum diaboli deuolutum . Finis enim legis Christus ad iusticiam omni credenti , Iudæo scilicet , & gentili . Neque enim omni credenti erit finis ad iusticiam , si Iudæus excipitur . In euangelio legimus : Lex & prophetæ usque ad Ioannem Baptistam . Et in alio loco : Propterea ergo magis quærebant eum Iudæi interficere ; quia nō solum soluebat sabbatum ; sed & patrem suum dicebat Deum , æqualem se faciens Deo . Et iterum : De plenitudine eius nos omnes accepimus , gratiam pro gratia : quia
lex

lex per Moysen data est, gratia autem & ueritas per Iesum Christum facta est. Pro legis gratia, quæ præterit, gratiâ euangelii accepimus permanentem; & pro umbris & imaginibus ueteris instrumenti, ueritas per Iesum Christum

Hier. 31 facta est. Hieremias quoque ex persona Dei uaticinatur:

Ecce dies ueniunt, dicit Dominus; & consummabo domui Israel, & domui Iuda testamentum nouum, non secundum testamentum, quod disposui patribus eorum, in die, qua apprehendi manum eorum, ut educerem eos de terra Aegypti. Obserua, quid dicat, quod non populo gentiliū, ei, qui ante non receperat testamento, sed populo Iudæorum, cui legem dederat per Moysen, testamentum nouum euangelii repromittat: ut nequaquam uiuant in uetustate litteræ, sed in nouitate spiritus. Paulus autem, super cuius nunc nomine quæstio uentilatur, crebras huiusmodi ponit sententias: e quibus, breuitatis studio, pauca subnectam. Ecce ego Paulus dico uobis, quoniam, si cir-

Gal. 5 cuncidamini, Christus uobis nihil proderit. Et iterum: Euacuati estis a Christo, qui in lege iustificamini, a gratia excidistis. Et infra: Si spiritu ducimini, iam non estis sub lege. Ex quo apparet, qui sub lege est, non dispensatiue, ut nostri uoluere maiores, sed uere, ut tu intelligis, eum Spiritum sanctum non habere. Qualia autem sint præce-

Ezech. 20 pta legalia, Domino docente discamus. Ego, inquit, dedi eis præcepta non bona, & iustificationes, in quibus non uiuant in eis. Hæc dicimus, non quo legem iuxta Manichæum & Marcionem destruamus, quam & sanctam &

Gal. 4 spiritualem iuxta Apostolum nouimus; sed quia, postquâ uenit fides & temporum plenitudo, misit Deus filium suū, natum ex muliere, factum sub lege, ut eos, qui sub lege erant, redimeret, ut adoptionem filiorum reciperemus, & nequaquam sub pædagogo, sed sub adulto & domino herede uiuamus. Sequitur in epistola tua: Quapropter non ideo Petrum emendauit, quod paternas traditiones obseruaret: quod si facere uellet, nec mendaciter, nec incongrue faceret. Iterum dico: quâdoquidem episcopus es, ec-

cle-

elefharum Christi magister : ut probes uerum esse quod as-
 seris ; suscipe aliquem Iudæorum , qui factus Christianus ,
 natum sibi filium circumcidat ; qui obseruet sabbatum ;
 qui abstineat a cibis , quos Deus creauit ad utendum cum *1. Tim. 4*
 gratiarum actione ; qui quartadecima die mensis primi agnū
 mactet ad uesperam , & cum hoc feceris , immo non fece-
 ris ; (scio enim te Christianum , & rem sacrilegam non fa-
 cturum) uelis nolis , tuam sententiam reprobabis ; & tunc
 scies opere , difficilius esse confirmare sua , quam aliena re-
 prehendere . Ac , ne forsitan tibi non crederemus ; immo
 nō intelligeremus quid diceres , (frequenter enim in longū
 sermo potractus caret intelligentia ; & , dum non sentitur ,
 minus reprehenditur) inculcas , & replicas : Hoc Iudæo-
 rum Paulus dimiserat , quod malum habebant . Quod est
 malum Iudæorum , quod Paulus dimiserat ? Vtique illud , *Rom. 10*
 quod sequitur : quod ignorantes Dei iustitiam , & suam uo-
 lentes constituere , iustitiæ Dei non sunt subiecti : deinde ,
 quod post passionem & resurrectionem Christi , dato ac
 manifestato sacramento gratiæ , secundum ordinem Mel-
 chisedek , adhuc putabant , uetera sacramenta non ex con-
 suetudine sollemnitatis , sed ex necessitate salutis esse cele-
 branda : quæ tamen si numquam fuissent necessaria , infru-
 ctuose atque inaniter pro eis Machabæi martyres fierent :
 postremo illud , quod prædicatores gratiæ Christianos Iu-
 dæi , tamquam hostes legis , persequerentur . Hos , atque
 huiusmodi errores , & uitia dicit se damnare ; & ut sterco-
 ra arbitratur , ut Christum lucrifaceret . Didicimus per te ,
 quæ apostolus Paulus mala reliquerit Iudæorum : rursum
 te docente discamus , quæ bona eorum tenuerit . Obserua-
 tiones , inquit , legis : quas more patrio celebrabant , sicut
 ab ipso Paulo celebratæ sunt , sine ulla salutis necessitate .
 Id quid uelis dicere , Sine ulla salutis necessitate , non satis
 intelligo . Si enim salutem non afferunt , cur obseruantur ?
 si autem obseruanda sunt , utique salutem afferunt , maxi-
 me quæ obseruata martyres faciunt . non enim obserua-
 rentur , nisi afferrent salutem . neque enim indifferentia
 sunt

sunt inter bonum, & malum, sicut philosophi disputant. Bonum est continentia: malum est luxuria. Inter utrūque indifferens, ambulare, egerere alui stercora, capitis naribus purgamenta proicere, sputis rheumata iacere. Hoc nec bonum, nec malum est: siue enim feceris, siue non feceris, nec iustitiam habebis, nec iniustitiam. Obseruare autem legis carimonias, non potest esse indifferens: sed aut bonum est, aut malum. Tu dicis bonum: ego assero malum, & malum non solum iis, qui ex gentibus, sed & iis, qui ex Iudaico populo crediderunt. In hoc, ni fallor, loco, dum aliud uitas, in aliud deuolueris. Dum enim metuis Porphyrium blasphemantem, in Hebionis incurris laqueos, iis, qui credunt ex Iudæis, obseruandam legem esse decernens. Et quia periculosum intelligis esse, quod dicis; rursum illud superfluis uerbis temperare conaris, sine ulla salutis necessitate, non sicut Iudæi celebranda putant, aut fallaci simulatione, quod Paulus in Petro reprehenderat. Petrus igitur simulauit legis custodiam. Iste autem reprehensor Petri, audacter obseruauit legitima. Sequitur enim in epistola tua. Nam si propterea illa sacramenta celebrauit, quia se simulauit Iudæum, ut illos lucrificaret: cur nō etiam sacrificauit cum gentibus, quia & iis, qui sine lege erant, tamquam sine lege factus est, ut eos quoque lucrificaret? nisi quia & illud fecit, ut natura Iudæus, & hoc totum dicis, non ut Paulus se fingeret esse quod non erat, sed ut misericorditer ita subueniendum esse sentiret, ac si ipse in eo errore laboraret, non scilicet mentiētis astu, sed compatientis affectu. Bene defendis Paulum, quod non simulauerit errorem Iudæorum, sed uere fuerit in errore; neque imitari Petrum uoluerit mentientem, ut, quod erat, metu Iudæorum dissimularet; sed tota libertate Iudæum esse se diceret. Noua clemētia apostoli: dum Iudæos Christianos uult facere, ipse Iudæus factus est. non enim poterat luxuriosos ad frugalitatem reducere, nisi se luxuriosum probasset, & misericorditer, ut ipse dicis, subuenire miseris, nisi se miserum ipse sentiret. Vere enim miselli, & mi-

misericorditer deplorandi, qui contentione sua, & amore legis abolitæ, apostolum Christi fecere Iudæum. Nec multum interest inter meam & tuam sententiam: qua ego dico, & Petrum & Paulum, timore fidelium Iudæorum, legis exercuisse, immo simulasse mandata. Tu autem asseris hoc eos fecisse clementer, non mentientis astu, sed compa-
tientis affectu, dummodo illud constet, uel metu, uel misericordia eos simulasse se esse, quod non erant. Illud autem argumentum, quo aduersum nos uteris, quod & gentilibus debuerit gentilis fieri, si Iudæis Iudæus factus est, magis pro nobis facit. sicut enim non fuit uere Iudæus, sic nec uere gentilis erat. & sicut non fuit uere gentilis, sic nec uere Iudæus erat. In eo autem imitator gentium est, quia præputium recipit in fide Christi; & indifferenter permittit uesti cibis, quos damnant Iudæi, non cultum, ut tu putas, idolorum. In Christo enim Iesu, nec circumcisio est. *Gal. 5*
aliquid, nec præputium, sed observatio mandatorum Dei. Quæso igitur te, & iterum atque iterum obsecro, ut ignoscas disputatiunculæ meæ; & quod modum meum egressus sum, tibi imputes, qui coegisti ut rescriberem, & mihi cum Stefichoro oculos abstulisti. Neque me putes magistrum esse mendacii, qui sequor Christum dicentem: Ego *Ioan. 14*
sum uia, ueritas, & uita: nec potest fieri, ut ueritatis cultor, mendacio colla submittam. Neque mihi imperitorum plebeculam concites, qui te uenerantur ut episcopum; & in ecclesia declamantem sacerdotii honore suspiciunt; me autem, ætatis ultimæ, & pene decrepitum, ac monasterii & ruris secreta sectantem, parui pendunt. & quæras tibi, quos doceas, siue reprehendas. ad nos enim, tantis maris atque terrarum spatiis a te diuisos, uix uocis tuæ sonus peruenit: & si forsitan litteras scripseris, ante eas Italia ac Roma suscipiet, quam ad me, cui mittendæ sunt, deferantur. Quod autem in aliis quæris epistolis, cur prior mea in libris canonicis interpretatio asteriscos habeat, & uirgulas prænotatas; & postea aliam translationem absque iis signis ediderim: pace tua dixerim, uideris mihi non intelligere, quod quæ-
sisti.

fisti. Illa enim interpretatio Septuaginta interpretum est: & ubicumque uirgulæ, idest obeli sunt, significatur quod Septuaginta plus dixerint, quam habetur in Hebræo: ubi autem asterisci, idest stellulæ prælucentes, ex Theodotionis editione ab Origene additum est: & ibi Græca translulimus; hic de ipso Hebraico, quod intelligebamus, expressimus, sensum potius ueritatem, quam uerborum ordinem, interdum conseruantes. Et miror, quo modo Septuaginta interpretum libros legas non puros, ut ab eis editi sunt, sed ab Origene emendatos, siue correctos per obelos & asteriscos; & Christiani hominis interpretatiunculam non sequaris; præsertim cum ea, quæ addita sunt, ex hominis Iudæi, atque blasphemæ, post passionem Christi, editione translulerit. Vis amator esse uerus Septuaginta interpretum? Non legas ea, quæ sub asteriscis sunt, immo rade de uoluminibus: ut ueterum te fautorem probes. quod si feceris, omnes ecclesiarum bibliothecas damnare cogeris. uix enim unus aut alter inuenitur liber, qui ista non habeat. Porro quod dicis non debuisse me interpretari post ueteres; & nouo uteris syllogismo: aut obscura fuerunt, quæ interpretati sunt Septuaginta, aut manifesta: si obscura, te quoque in illis falli potuisse credendum est; si manifesta, illos in eis non falli potuisse perspicuum est: tuo tibi sermone respondeo. Omnes ueteres tractatores, qui nos in Domino præcesserunt, & qui scripturas sanctas interpretati sunt, aut obscura interpretati sunt, aut manifesta: si obscura, tu quo modo ausus es post eos differere, quod illi explanare non potuerunt? si manifesta, superfluum est te uoluisse differere, quod illos latere non potuit, maxime in explanatione psalmorum, quos apud Græcos interpretati sunt multis uoluminibus, primus Origenes, secundus Eusebius Cæsariensis, tertius Theodorus Heracleotes, quartus Asterius Scythopolitanus, quintus Apollinarius Laodicens, sextus Didymus Alexandrinus. feruntur & diuersorum in paucos psalmos opuscula: sed nunc de integro psalmorum corpore dicimus. apud Latinos autem Hilarius

rius

zium Pictaviensis, & Eusebius Vercellensis episcopus Origenem & Eusebium transtulerunt: quorum priorem & noster Ambrosius in quibusdam secutus est. Respondeat mihi prudentia tua, quare tu post tantos & tales interpretes in explanatione psalmorum diuersa senseris. si enim obscuri sunt psalmi, te quoque in eis falli potuisse credendum est: si manifesti, illos in eis falli potuisse non creditur: ac per hoc utroque modo superflua erit interpretatio tua: & hac lege post priores nullus loqui audebit; & quodcumque alius occupauerit, alius de eo licentiam scribendi non habebit. Quin potius humanitatis tuæ est, in quo ueniam tibi tribuis, indulgere & ceteris. Ego enim non tam uetera abolerere conatus sum, quæ linguæ meæ hominibus emendata de Græco in Latinum transtuli, quā ea testimonia, quæ a Iudæis prætermissa sunt, uel corrupta, proferre in mediū: ut scirent nostri, quid Hebraica ueritas contineret. Si cui legere non placet, nemo compellit inuitum. Bibat uinum uetus cum suauitate, & nostra musta contemnat, quæ in explanatione priorum edita sunt; ut, sicubi illa non intelliguntur, ex nostris manifestiora fiant. Quod autem genus interpretationis in scripturis sanctis sequendum sit, liber, quem scripsi de optimo genere interpretandi, & omnes præfatiunculæ diuinorum uoluminum, quas editioni nostræ præposuimus, explicant: ad illasq. prudentem lectorem mittendum puto. Et si me, uti dicis, in noui testamenti emendatione suscipis, exponisq. causam cur suscipias; quia plurimi, linguæ Græcæ habentes scientiam, de meo possint opere iudicare: eandem integritatem debueras etiā in ueteri credere testamento, quod non nostra confinximus, sed, ut apud Hebræos inuenimus, diuina transtulimus. Sicubi dubitas, Hebræos interroga. Sed dicis: quid si Hebræi aut respondere noluerint, aut mentiri uoluerint? Tota frequentia Iudæorum in mea interpretatione reticebit? nullusq. inueniri poterit, qui Hebrææ linguæ habeat notitiam? aut omnes imitabuntur illos Iudæos, quos dicis, in Africæ repertos opidulo, in meam conspirasse calumniā? huiusce-

huiusmodi enim in epistola tua texis fabulam. Quidam frater noster coepiscopus, cum lectitari institisset in ecclesia, cui praeest, interpretationem tuam, mouit quidam, longe aliter a te positum apud Ionam prophetam, quam erat omnium sensibus memorizq. inueteratum, & tot ætatum successionibus decantatum: factusq. est tantus tumultus in plebe, maxime Græcis arguentibus, & in-
 clamantibus calumniam falsitatis, ut cogeretur episcopus (ea quippe ciuitas erat) Iudæorum testimonium flagitare. utrum autem illi imperitia, an malitia, hoc esse in Hebræis codicibus Græcis responderunt, quod & Græci & Latini habebant, atque dicebant. Quid plura? Coactus est homo uelut mendacium corrigere, uolens post magnum periculum non remanere sine plebe. Vnde etiam nobis uidetur, aliquando in nonnullis te quoque falli potuisse. Dicis me in Ionam prophetam male quiddam interpretatum, & seditione populi conclamante, propter unius uerbi dissonantiam episcopum pene sacerdotium perdidisse: & quid sit illud, quod male interpretatus sim, subtrahis, auferens mihi occasionem defensionis meæ: ne, quidquid dixeris, me respondente soluiatur: nisi forte, ut ante annos plurimos, cucurbita uenit in medium, asserente illis temporibus Cornelio Asinio Pollione, me hederam pro cucurbita transfuisse, super qua re in commentario Ionæ prophetae plenius respondimus, hoc tantum nunc dixisse contenti, quod in eo loco, ubi Septuaginta interpretes cucurbitam, & Aquila cum reliquis hederam transfulerunt, id est, κισσόν, in Hebræo uolumine פפפפ Cicaion scriptum est: quam uulgo Syri elceroa uocant. est autem genus uirgulti, lata habens folia, in modum pampini: cumq. plantatum fuerit, cito consurgit in arbusculam absque ullis calamorum & hastilium adminiculis, quibus & cucurbitæ, & hederæ indigent, suo trunco se sustinens. Hoc ergo uerbum de uerbo edisserens, si cicaion transferre uoluissim, nullus intelligeret: si cucurbitam, id dicerem, quod in Hebraico non habetur. hederam posui, ut ceteris interpretibus consentirem.

Ion. 4

rem. Sin autem Iudæi uestri, ut ipse asseris, malitia, uel imperitia hoc dixerunt esse in uoluminibus Hebræorum, quod in Græcis & Latinis codicibus continetur: manifestū est eos aut Hebræas litteras ignorare, aut ad irridendos cucurbitarios uoluisse mentiri. Peto in fine epistolæ, ut quiescentem senem; olimq. ueteranum, militare non cogas, & rursus de uita periclitari. Tu, qui iuuenis es, & in pōtifficali culmine constitutus, doceto populos, & nouis Africæ frugibus Romana tecta locupletato. mihi sufficit, cū audītore & lectore pauperculo in angulo monasterii susurrare.

ARGVMENTVM.

SVAS ab Hieronymo acceptas litteras, scire se dicit, sed cur non rescripserit ignorare, excusans se contra eum librum minime scripssisse, nisi si, quod contra sententiam eius alicubi forte scripsit, contra eum se scripssisse interpretetur.

AVGVSTINVS HIERONYMO.

EPISTOLA XC.

V D I V I peruenisse in manus tuas litteras meas:

A sed, quod adhuc rescripta non merui, nequaquam imputauerim dilectioni tuæ: aliquid proculdubio impeditenti fuit. unde agnosco, Dominum a me potius deprecandum, ut tuæ uoluntati det facultatem nitendi, quod rescriperis: nam rescribendi iam dedit, quia, cum uolueris, facillime poteris. Etiam hoc, quod ad me sane perlatum est, utrum quidem crederem, dubitauī: sed hinc quoque tibi aliquid utrum scriberem, dubitare non debui. hoc autem breue est. suggestum esse caritati tuæ a nescio quibus fratribus, mihi dictum est, quod librum aduersus te scriperim, Romamq. miserim. Hoc falsū esse noueris: Dominum meum Iesum testor, hoc me non fecisse: sed, si forte aliqua in aliquibus scriptis meis reperiuntur, in quibus aliter aliquid, quam tu, sensisse reperior; non contra te dictum, sed quid mihi uidebatur, a me scriptum esse, puto te debere cognoscere, aut, si cognosci non potest,

Z z z cre-

credere debere . ita sane hoc dixerim , ut ego non tantum paratus sim , si quid te in meis scriptis mouerit , fraterne accipere , quid contra sentias , aut de correctione mea , aut de ipsa tua beneuolentia gauisurus ; uerum etiam hoc a te postulem , & flagitem . O si licuisset , etsi non cohabitante , saltem uicino te in Domino perfrui , ad crebrum & dulce colloquium . sed quia id non est datum ; peto , ut hoc ipsum , quod in Domino , quam possumus , simul simus , conseruari studeas , & augeri , ac perfici , & rescripta quamuis rara non spernere . Saluta obsequio meo sanctum fratrem Iulianum , & omnes fratres , qui tecum ac de te in Domino gloriantur . Memor nostri exaudiaris a Domino in omni sancto desiderio tuo , domine carissime , & desideratissime , & honorande in Christo frater .

ARGVMENTVM.

EPISTOLAM ab Augustino contra se scriptam , in qua ad *παλινοδία* hortetur , se accepisse ait : non respondisse autem , tum quia suam non credidit , tum quia Paula dormitione impeditus fuit : pollicens se responsurum , si suam esse aperte scribat . ceterum unumquemque in suo sensu abundare , & Entelli exemplo , si ad pugnam prouocetur , uictoriam sibi promittit . Deinde exhortans illum ad mutuum amorem nunciat se aduersus Rufinum , quem Calpurnium rursum nominat , breuiter esse parte respondisse .

HIERONYMVS AVGVSTINO.

EPISTOLA XCI.

I N ipso profectionis articulo sancti filii nostri Asterii , hypodiaconi , necessarii mei , beatitudinis tue litteræ ad me peruenerunt ; quibus satisfacis , te contra paruitatem meam librum Romam non misisse . hoc nec ego factum audieram : sed epistolæ cuiusdam , quasi ad me scriptæ , per fratrem nostrum Sisinnium diaconum huc exemplaria peruenerunt : in qua hortaris me , ut *παλινο-*
δία

Νίαι super quodam Apostoli capitulo canam; & imiter Stefichorum, inter uituperationem & laudes Helenæ fluctuantem; ut, qui detrahendo oculos perdiderat, laudando receperit. Ego simpliciter fateor dignationi tuæ, licet stylus, & ἐπιχειρήματα tua mihi uiderentur: tamen non temerè exemplaribus litterarum credendum putauī; ne forte, me respondente læsus, iuste expostulares, quod probare ante debuissē tuum esse sermonem, & sic rescribere. Accessit ad moram, sanctæ & uenerabilis Paulæ longa infirmitas. dum enim languenti multo tempore affidemus, pene epistolæ tuæ, uel eius, qui sub tuo nomine scripserat, obliui sumus, memores illius uersiculi: Musica in *Eccl. 22* luctu, importuna narratio. Itaque, si tua est epistola, aperte scribe, uel mitte exemplaria ueriora: ut absque ullo rancore stomachi in scripturarum disputatione uersēmur, & uel nostrum emendemus errorem, uel alium frustra reprehendisse doceamus. Absit autem a me, quidquam de libris tuæ beatitudinis attingere audeam. sufficit enim mihi probare mea, & aliena non carpere. Ceterum optime nouit prudentia tua, unumquemque in suo sensu abundare, & puerilis esse iactantiæ, quod olim adolescentuli facere consueuerant, accusando illustres uiros; suo nomini famam quærere. Nec tam stultus sum, ut diuersitate explanationum tuarum me lædi putem: quia nec tu læderis, si nos contraria senserimus. Sed illa est uera inter amicos reprehensio, si, nostram peram non uidentes, aliorum, iuxta Persium, manticam consideremus. Superest, ut diligas diligentem te; & in scripturarum campo iuuenis senem non prouoces. Nos nostra habuimus tempora, & cucurrimus quantum potuimus: nunc, te currente, & longa spacia transmeante, nobis debetur otium: simulq. (ut cum honore tuo & uenia dixerim) ne solus mihi de poetis aliquid proposuisse uidearis, memento Daretis & Entelli, & uulgaris prouerbii; quod bos lassus fortius figat pedem. Tristes hæc dictauimus: utinā mereremur cōplexus tuos, & collatione mutua uel doceremus aliqua, uel disceremus.

Z z z 2 Misit

Misit mihi, temeritate solita, sua maledicta Calpurnius, cognomento Lanarius, quæ ad Africam quoque studio eius didici peruenisse. ad quæ breuiter ex parte respondi; & libelli eius uobis misi exemplaria, larius opus, cum opportunum fuerit, primo missurus tempore: in quo illud caui, ne in quoquam exultationem læderem Christianā, sed tantum ut delirantis imperitiq. mendacium, ac uecordiam confutarem. Memento mei, sancte & uenerabilis papa, uide, quantum te diligam, ut ne prouocatus quidem uoluerim respondere; nec credam tuum esse, quod in altero forte reprehenderem. Frater communis suppliciter te salutat.

ARGVMENTVM.

SE Augustini epistola toties interpellatus non respondisse propterea causatur, quod eam illius esse non arbitrabatur, præsertim cum quedam absurda contineret, quæ si a se reprehenderentur, Christiana communionis cum Episcopo uinculum rumpetur præter quod non simplici ab eo animo scriptam epistolam suspicabatur. Responsum autem, si certum opus ad se mittat, pollicetur: præmonens interea ne agre postea ferat, si quæ pro defensione sui aduersus ea, quæ ille scripserit, dicturus sit: cetera autem eius opera se, præter pauca, nondum uidisse, proptereaue illorum censuram minime polliceri.

HIERONYMVS AVGVSTINO.

EPISTOLA XCII.

REBRAS ad me epistolas dirigis; & sæpe compellas, ut respondeam cuicdam epistolæ tuæ, cuius ad me, ut ante iam scripsi, per fratrem Syinnium diaconum exemplaria peruenerunt absque subscriptione tua; & quam primum per fratrem Profuturum, secundo per quendam alium te misisse significas: & interim Profuturum retractum de itinere, & episcopum constitutum, uel
loci

loci morte subtractum : illum , cuius nomen retices , maris
timuisse discrimina , & nauigationis mutasse consilium .
Quæ cum ita sint ; satis mirari nequeo , quo modo ipsa epi
stola & Romæ & in Italia haberi a plerisque dicatur , & ad
me solum non peruenierit , cui soli missa est : præsertim cū
idem frater Sylinnius inter ceteros tractatus tuos dixerit eā
se non in Africa , non apud te , sed in insula Adriæ ante
hoc ferme quinquennium reperisse . De amicitia omnis tol
lenda suspicio est : & sic cum amico , quasi cum altero se , lo
quendum . Nonnulli familiares mei , & uasa Christi , quo
rum Hierosolymis & in sanctis locis per magna copia est ,
suggerebant , non simplici animo a te factum , sed laudem ,
atque rumusculos , & gloriolam populi requirente ; ut de
nobis crederes ; ut multi cognoscerent te prouocare , me ti
mere ; te scribere ut doctum , me tacere ut imperitum , &
tandem reperisse , qui garrulitati meæ silentium modūq.
imponeret . Ego autem (ut simpliciter fatear) dignationi
tuæ primum iccirco respondere nolui ; quia tuam liquido
epistolam non credebam , nec (ut uulgi de quibusdam pro
uerbium est) licum melle gladium . Deinde illud cauebā ,
ne episcopo communionis meæ uiderer procaciter respon
dere , & aliqua in reprehendentis epistola reprehendere ;
præsertim cum quædam in illa hæretica iudicaret . Ad ex
tremum , ne tu iure expostulares , & diceres : Quid enim ?
epistolam meam uideras , & notæ tibi manus in subscriptio
ne signa deprehenderas , ut tam facile amicum læderes , &
alterius malitiam in meam uerteres contumeliam ? Igitur ,
ut ante iam scripsi , aut mitte eandem epistolam , tua sub
scriptā manu : aut senem latitantem in cellula laceffere de
fine . Sin autem tuam uis uel exercere , uel ostentare doctri
nam ; quære iuuenes & disertos , & nobiles , quorum Ro
mæ dicuntur esse quamplurimi , qui possint & audeant te
cum congregari , & in disputatione sanctarum scripturarū ,
iugum cum episcopo ducere . Ego quondam miles , nunc
ueteranus , & tuas & aliorum debeo laudare uictorias , nō
ipse rursus effæcto corpore dimicare ; ne , si me frequenter

Z z z ; ad

rescribendum impuleris, illius recorder historiæ, quod Hannibalem, iuueniliter exultantem, Q. Maximus patientia sua fregerit. Omnia fert ætas, animum quoque: sæpe ego longos Cantâdo puerum memini me condere soles. Nunc oblita mihi tot carmina: uox quoque Mœrim Iam fugit ipsa. Et, ut magis de scripturis sanctis loquar, Berzelai ille Galaadites, regis David beneficia, omnesque delicias iuueni delegans filio, ostendit senectutem hæc nec appetere debere, nec oblata suscipere. Quod autem iuras te aduersum me librum nec scripsisse, neque Romam misisse, quæ non scripseris; sed si forte aliqua in tuis scriptis reperiantur, quæ a meo sensu discrepent, non me a te læsum, sed a te scriptum, quod tibi rectum uidebatur: quæso, ut me patienter audias. Non scripsisti librum, & quo modo mihi reprehensionis a te meæ per alios scripta delata sunt? cur habet Italia, quod tu non scripsisti? qua ratione poscis, ut rescribam ad ea, quæ scripsisse te denegas? Non tam habes sum, ut, si diuersa senseris, me a te læsum putem. Sed, si mea comminus dicta reprehendas, & rationem scriptorum expetas; & quæ scripserim, emendare compellas, & ad *παλινοδίαν* prouoces, & oculos mihi reddas: in hoc læditur amicitia; in hoc necessitudinis iura uiolantur. Ne uideamur certare pueriliter, & fautoribus innicem, uel de tractoribus nostris tribuere materiam contendendi, hæc scribo, quia te pure & Christiane diligere cupio, nec quidquam in mea mente retinere, quod distet a labiis. non enim conuenit, ut ab adolescentia usque ad hanc ætatem in monasteriolo cum sanctis fratribus labore defudans, aliquid contra episcopum communionis meæ scribere audeam, & eum episcopum, quem ante cœpi amare, quam nosse; qui me prior ad amicitias prouocauit; quem post me orientem in scripturarum diuinarum eruditione lætatus sum. Igitur aut tuum negato librum, si forte non tuus est; & desine flagitare rescriptum ad ea, quæ non scripsisti: aut, si tuus est, ingenue confitere: ut, si in defensione mei aliqua scripsero, in te culpa sit, qui prouocasti, non in me, qui

qui respondere compulsus sum. Addis præterea, te paratum esse, ut, si quid me in tuis scriptis mouerit, & corrigere uolueris, fraterne accipias, & non solum de mea in te beneuolentia gauisurum, sed, ut hoc ipsum faciam, deprecaris. Rursum dico quod sentio: prouocas senem, tacentem stimulas, uideris iactare doctrinam. Non est autem ætatis meæ, putari maleuolum erga eum, cui magis fauorem debeo. Et si in euangelis ac prophetis peruersi homines inueniunt, quod nitantur reprehendere: miraris, si in tuis libris, & maxime in scripturarum expositione, quæ uel obscurissimæ sunt, quædam a recta linea discrepare uideantur? Et hoc dico, non quod in operibus tuis quædã reprehendenda iam censeam: neque enim lectioni eorum unquam operam dedi: nec horum exemplariorum apud nos copia est, præter Soliloquiorum tuorum libros, & quosdam commentarios in psalmos: quos si uellem discutere, non dicam a me, qui nihil sum, sed a ueterum Græcorum docere interpretationibus discrepare. Vale mihi amice carissime, ætate fili, dignitate parens: & hoc a me rogatus obserua, ut, quidquid mihi scripseris, ad me primum facias peruenire.

ARGVMENTVM.

HIERONYMVM, quem suis litteris nonnihil offensum senserat, hac epistola placare Augustinus conatur: deploransq. atrocem similitatem, inter eum, & Ruffinum, alioquin amicissimos, exortam, eos præterea ad concordiam adhortatur.

AVGVSTINVS HIERONYMO.

EPISTOLA XCIII.

QVAMVIS existimem, antequam istas sumeres, uenisse in manus tuas litteras meas, quas per Dei seruum, filiũ nostrum Cyprianum diaconum misisti; quibus certissime agnosceres meam esse epistolam, cuius exemplaria illuc peruenisse commemorasti; unde iam

Zzz 4 me

me arbitror rescriptis tuis, uelut Entellinis grandibus atque acribus cestibus, tamquam audacem Daretem cœpisse pulsari, atque uersari: nunc tamen eis ipsis respondeo litteris tuis, quas mihi per sanctum filium nostrum Asterium iam mittere dignatus es: in quibus multa in me comperti tuæ beneuolentissimæ caritatis, & rursus quædam nō nullius animæ tuæ offensionis indicia. Itaque, ubi mulcebar legens, ibi continuo feriebar; hoc sane uel maxime admirans, quod, cum te dicas exemplaribus litterarum mearum ideo non temere putauisse credendum, ne forte te respondente læsus iuste expostularem, quod probare ante debuisses, meum esse sermonem, & sic rescribere; postea iubeas, si mea est epistola, aperte me scribere, aut mittere exemplaria ueriora; ut absque ullo rancore stomachi in scripturarū disputatione uerseremur. Quo enim pacto possumus in hac disputatione sine rancore uersari, si me lædere paras? aut, si non paras, quo modo ego, te non lædente, abs te læsus iuste expostularem, quod probare ante debuisses meum esse sermonem, & sic rescribere, hoc est, & sic lædere? nisi enim rescribendo læsisses, ego iuste expostulare non possem. Proinde cum ita rescribis, ut lædas; quis locus nobis relinquitur in disputatione scripturarum sine ullo rancore uersandi? Ego quidem, absit, ut lædar, si mihi certa ratione uolueris & potueris demonstrare illud ex epistola Apostoli, uel quid aliud scripturarum sanctarum te uerius intellexisse, quam me: immo uero absit, ut non cum gratiarum actione lucris meis deputem, si fuero te docente instructus, aut emendante correctus. Verum tamen tu, mihi frater carissime, nisi te putares læsum scriptis meis, non me putares lædi posse rescriptis tuis. nullo enim modo id de te opinatus fuero, quod te non arbitreris læsum, si sic tamen rescribis ut lædas: aut, si te, non sic rescribentem, ego propter nimiam stultitiam meam lædi posse putatus sum, hoc ipso læsisti plane, quod de me ita sensit. Sed nullo modo tu me, quem numquam talem expertus es, temere talem crederes, qui litterarum mearū exemplar-

plaribus, etiam cum stylum meum nosces, temere credere noluit. Si enim non immerito iudicasti me iuste expostulatum fuisse, si temere crederes esse litteras meas, quæ non essent meæ: quanto iustius expostularem, me ipsum temere putatum talem, qualem me expertus non esset, qui putauisset? Nequaquam ergo ita prolabereris, ut non te rescribente quo læderer, me tamen existimares nimis insipientem, etiam tali tuo rescripto lædi potuisse. Restat igitur, ut lædere me rescribendo disponeres, si certo documento meas esse illas litteras nosces. Atque ita, quia non credo quod iniuste me lædendum putares, superest, ut agnoscam peccatum meum, quod prior te illis litteris læserim, quas meas esse negare non possum. Cur itaque conor contra fluminis tractum, ac non potius peniam peto? Obsecro ergo te per mansuetudinem Christi, ut, si te læsi, dimittas mihi, nec, me uicissim lædendo, malum pro malo reddas. lædes autem, si mihi tacueris errorem meum, quem forte inueneris in scriptis, uel in dictis meis. Nam si ea in me reprehenderis, quæ reprehendenda non sunt; te potius lædis, quam me: quod absit a moribus & sancto proposito tuo, ut hoc facias uoluntate lædendi, culpans in me aliquid dente maledico, quod mente ueridica scis non esse culpandum. ac per hoc aut beneuolo corde arguas, etiam si caret delicto quod arguendum putas: aut paterino affectu mulceas, quem abiicere nequeas. Potest enim fieri, ut tibi uideatur aliud, quam ueritas habet; dum tamen aliud abs te non fiat, quam caritas habet. nam & ego amicissimam reprehensionem tuam gratissime accipiam; etiam si reprehendi non inruit, quod recte defendi potest: aut agnoscam simul & benevolentiam tuam, & culpam meam; &, quantum Dominus donat, in alio gratus, in alio emendatus inueniar. Quid ergo? fortasse dura, sed certa salubria uerba tua, tamquam celsus Entelli, pertimescam. Cædebat ille, non curabatur; & ideo uincebatur, non sanabatur. ego autem, si medicinalem correptionem tuam tranquillius accepero, non dolebo. si uero infirmitas uel humana,
uel

uel mea, etiam cum ueraciter arguitur, non potest non aliquantulum contristari: melius tumor capitis dolet, cum curatur, quam dum ei parcitur, & non sanatur. hoc est enim, quod acute uidit, qui dixit, utiliores esse plerumque inimicos obiurgantes, quam amicos obiurgare metuentes. illi enim dum rixantur, dicunt aliquando uera, quæ corrigamus: isti autem minorem, quam oportet, exhibent iustitiæ libertatem, dum amicitie timent exasperare dulcedinem. Quapropter etsi forte bos, ut tibi uideris, lassus senectute corporis, non uigore animi, tamen in area Dominica fructuoso labore desudas. Ecce sum, si quid perperam dixi: fortius fige pedem. non mihi esse debet molestum pondus ætatis tuæ, dummodo conteratur palea culpæ meæ. Proinde illud, quod in extremo epistolæ tuæ posuisti, cum magni desiderii suspirio uel lego, uel recolo. Utinam, inquis, mereremur cōplexus tuos; & collatione mutua uel doceremus aliqua, uel disceremus. Ego autem dico: utinam saltem propinquis terrarum locis habitaremus; ut, si non possent misceri nostra colloquia, litteræ saltem possent esse crebriores. nunc uero tanto locorum intervallo absimus a sensibus nostris, ut de illis uerbis Apostoli ad Galatas, iuuenem me ad tuam sanctitatem scripisse meminerim; & ecce iam senex necdum rescripta me ruerim; faciliusq. ad te exemplaria epistolæ meæ peruenierint, nescio qua occasione præueniente, quam ipsa epistola me curante. homo enim, qui eam tunc acceperat, nec ad te pertulit, nec ad me retulit. Tantæ autem mihi in litteris tuis, quæ in manus nostras peruenire potuerunt, apparent res; ut nihil studiorum meorum mallem, si possem, quam inherere lateri tuo. quod ego quia non possum, aliquem nostrorum in Domino filiorum erudiendum nobis ad te mittere cogito, si etiam de hac re tua rescripta meruero. nam neque in me tantum scientiæ diuinarum scripturarum est, aut esse iam poterit, quantum inesse tibi uideo; & si quid in hac re habeo facultatis, utcumque impendo populo Dei. Vacare autem studiis diligentius, quæ

quæ populi audiunt instruendi, propter ecclesiastites occupationes omnino non possum. Nescio quæ scripta maledica super tuo nomine ad Africam peruenisse audiui. accepimus tamen, quod dignatus es mittere, illis respondens maledictis. quo perlecto, fateor, multum dolui, inter tam caras familiaresq. personas, cunctis pene ecclesiis notissimo amicitiae uinculo copulatas, tantum malum exiisse discordiae. Et tu quidē quātum tibi modereris, quātumq. teneas aculeos indignationis tuæ, ne reddas maledictum pro maledicto, satis in tuis litteris eminet. Verumtamen si, eas ipsas cum legissem, contabui dolore, & obriui timore: quid de me illa facerent, quæ in te ille scripsit, si in manus meas forte uenissent? Væ mundo ab scandalis: *Matth. 18.24*

Ecce fit, ecce prorsus impletur quod ueritas ait: Quoniam abundauit iniquitas, refrigescet caritas multorum. Quæ sibi enim iam fida pectora toto ore fundantur? in cuius sensus tota se proiciat secunda dilectio? quis denique amicus non formidetur, quasi futurus inimicus, si potuit inter Hieronymum, & Ruffinum hoc, quod plangimus, exoriri? O misera & miseranda condicio. o infida in uoluntatibus amicorum scientia præsentium, ubi nulla est præscientia futurorum. Sed quid hoc alteri de altero gemendum putem, quando ne ipse quidem sibi homo est notus in posterum? nouit enim utcumque uix forte, nunc qualis sit; qualis autem postea sit futurus, ignorat. Hæc porro non tantum scientia, qualis quisque sit, uerum etiam præscientia, qualis futurus sit, si est in sanctis & beatis angelis; quomodo fuerit beatus diabolus aliquando, cum adhuc bonus angelus esset, sciens futuram iniquitatem suam, & sempiternum supplicium, omnino non uideo. De qua re, si tamen eam nosse opus est, uellem audire, quid sentias. Vide, quid faciant terræ, ac maria, quæ nos corporaliter dirimunt. Si hæc epistola mea, quam legis, ego essem; iam mihi diceres, quod quæsiui: nunc uero quando rescribes? quando mittes? quando perueniet? quando accipiam? & tamen utinam quandoque fiat, quod tam cito fieri nō posse,

se, quam uolumus, quanta possumus, tolerantia sustineamus. Vnde recurro ad illa uerba epistolæ tuæ dulcissima, sanctiq. desiderii tui plenissima, & ea facio uicissim mea: Vrinam mereremur complexus tuos; & collatione mutua uel doceremus aliqua, uel disceremus: si tamen esse ullo modo posset, quod ego te docerem. In his autem uerbis, non iam tuis tantum, sed etiam meis, ubi delector, & reficior, & ipso quamuis pendente & non attingente utriusque nostrum desiderio, non parua ex parte consolor; ibi rursus acerrimis dolorum stimulis fodior, dum cogito inter uos, quibus Deus hoc ipsum, quod uterque uestrum optauit, largum prolixumq. concesserat, ut coniunctissimi & familiarissimi mella scripturarum sanctarum pariter lamberetis, sic tantæ amaritudinis irrepsisse perniciem, quando non, ubi non, cui non homini formidandum: cum eo tempore, quo, abiectis iam sarcinis sæcularibus, iam expediti Dominum sequebamini, & in ea terra uiuebatis simul, in qua Dominus humanis pedibus ambulans,

Yoh. 14 Pacem, inquit, meam do uobis: pacem meam relinquo uobis: uiris ætate maturis, & in eloquio Domini abundantibus uobis accidere potuit? Vere tentatio est uita humana

Iob 7 na super terram. Heu mihi, qui uos simul alicubi inuenire non possum. forte, ut moueor, ut doleo, ut timeo, prociderem ad pedes uestros, flerem quantum ualerem, rogarem quantum amarem. nunc unumquemque uestrum pro se ipso, nunc utrumque pro alterutro, & pro aliis, ac maxime infirmis, pro quibus Christus mortuus est, qui uos tamquam in theatro uitæ huius cum magno sui periculo spectant, ne de uobis ea conscribendo spargatis, quæ quandoque concordēs delere non poteritis, qui nunc concordare nolitis; aut quæ concordēs legere timeatis, ne iterum litigetis. Verum dico caritati tuæ, nihil me magis, quam hoc exemplum, tremuisse, cum quædam ad me in epistola tua legerem, tuæ indignationis indicia, non tam illa de Entello & boue lasso, ubi mihi potius hilariter locari, quam iracunde minari uisus es, quam illud, quod serio

rio

rio te scripſiſſe ſatis apparet : unde ſupra locutus ſum plus
 fortasſe, quam debui, ſed non plus, quam timui, ubi aſti :
 Ne forte læſus iuſte expoſtulares . Rogo te, ſi fieri poteſt,
 ut, inter nos quæramus, & diſſeramus aliquid, quo, ſine
 amaritudine diſcordiæ, corda noſtra paſcantur, fiat. ſi au-
 tem non poſſumus dicere, quid mihi emendandum uidea-
 tur in ſcriptis tuis, nec tu in meis, niſi cum ſuſpicionem inui-
 diæ, aut læſione amicitæ : quieſcamus ab his, & noſtræ ui-
 tæ ſalutiq. parcamus . Minus certe aſſequatur illa, quæ in- 1. Cor. 8
 fiat, dum non offendatur illa, quæ ædificat. Ego me lon Iac. 3
 ge eſſe ſentio ab illa perfectione, de qua ſcriptum eſt : Si
 quis in uerbo non offendit, hic perfectus eſt uir . Sed pla-
 ne in Dei miſericordia puto me poſſe facile abs te petere ue-
 niam, ſi quid offendi : quod mihi aperire debes : ut, cum
 te audiero, lucreris fratrem tuum . Neque enim, quia hoc Matth. 18
 propter longinquitatem terrarum non poteſt facere inter
 me & te; propterea debes ſinere errare me. Proſuſq. (quod
 ad ipſas res, quas noſſe uolumus, attinet) ſi quid ueri me
 tenere uel ſcio, uel puto, uel credo, in quo tu aliter ſenti-
 as; quantum dat Dominus, ſine tua iniuria conabor aſſere
 re. Quod autem pertinet ad offenſionem tuam, cum te in-
 dignatum ſenſero, nihil aliud, quam ueniam, deprecabor.
 nec omnino arbitror te ſuccenſere potuiſſe, niſi aut hoc
 dicerem, quod non debui : aut non ſic dicerem, ut debui :
 quia nec miror nos minus ſcire inuicem, quam ſcimus a cõ-
 iunctiſſimis & familiariſſimis noſtris : in quorum ego cari-
 tatem, fateor, facile me totum proiicio, præſertim fatiga-
 tum ſcandalis ſæculi; & in ea ſine ulla ſolicitudine requie-
 ſco . Deum quippe illic eſſe ſentio, in quem me ſecurus pro-
 iicio, & in quo ſecurus requieſco . Nec in hac mea ſecuri-
 tate craſtinum illud humanæ fragilitatis incertum, de quo
 ſuperius genui, omnino formido . Cum enim hominem
 Chriſtiana caritate flagrantem, atque mihi fidelem amicũ
 factum eſſe ſentio; quidquid ei conſiliorum meorum cogi-
 tationumq. committo, non homini committo, ſed illi,
 in quo manet, ut talis ſit . Deus enim caritas eſt : & qui ma 1. Ioan. 4
 nec

net in caritate, in Deo manet, & Deus in eo: quam si de-
 seruerit, tantum faciat necesse est dolorem, quantum ma-
 nens fecerat gaudium. Verumtamen ex amico intimo fa-
 ctus inimicus, quærat sibi potius, quod fingat astutus; nō
 inueniat, quod prodatur iratus. Hoc autem unusquisque fa-
 cile assequitur, non occultando quod fecerit, sed non fa-
 ciendo quod occultare uelit. Quod si misericordia Dei bo-
 nis piisq. concedit, ut inter inimicos quoslibet futuros li-
 beri securiq. uersentur: aliena peccata sibi commissa non
 prodant; quæ prodi timent, ipsi nulla committant. Cum
 enim falsum quid a maledico fingitur; aut omnino non cre-
 ditur; aut certe, integra salute, sola fama uexatur. quod
 autem malum perpetratur, hostis est intimus, etiam si nul-
 lius intimi loquacitate aut lite uulgetur. Quapropter quis
 prudentium non uideat, etiam tu quam tolerabiliter feras
 amicissimi quondam & familiarissimi incredibiles nunc ini-
 micitias, consolante te conscientia; & quemadmodum uel
 quod iactat, uel quod a quibusdam forsitan creditur, in si-
 nistris armis deputes, quibus non minus quam dextris cō-
 tra diabolum dimicatur? Verumtamen illum maluerim ali-
 quo modo mitiorem, quam te isto modo armatiorem.
 hoc magnum & triste miraculum est, ex amicitiiis talibus
 ad has inimicitias peruenisse. lætum erit, & multo maius,
 ex inimicitiiis talibus ad pristinam concordiam reuertisse.

ARGVMENTVM.

LIBROS duos de origine animarum, sibi ab Augustino
 dicatos, per Orosium se accepisse testatur, excusans se, quod nō
 responderit: firmam amicitiam pollicetur., & post admixtas sa-
 lutationes, de quibusdam suis rebus certiorum illum reddit.

HIERONYMVS AVGVSTINO.

EPISTOLA XCIIII.

IRVM honorabilem, fratrem meum, filium di-
 gnationis tuæ, Orosium presbyterum, & sui me-
 rito & te iubente suscepi. sed incidit tempus dif-
 ficillimum, quando mihi tacere melius fuit, quā loqui; ita
 ut

ut nostra studia cessarent, & iuxta Appium, canina exerce-
retur facundia, itaque duobus libellis tuis, quos meo no-
mini dedicasti, eruditissimis & omni eloquentiæ splendo-
re fulgentibus, respondere non potui: non quod quidquā
in illis reprehendendum putem: sed quia, iuxta Aposto-^{Rom. 14}
lum, unusquisque in suo sensu abundet, alius quidem sic,
alius autem sic. Certe, quidquid dici potuit, & sublimi in-
genio de scripturarum sanctarum hauriri fontibus, a te posi-
tum atque disertū est: Sed, quæso reuerentiā tuam, parū-
per patiāris me tuum laudare ingeniū. nos enim inter nos
eruditionis causa differimus. ceterū æmuli, & maxime hæ-
retici, si diuersas inter nos sententias uiderint, de animi ca-
lumniabuntur rancore descendere. mihi autem decretum
est, te amare, te suspicere, colere, mirari, tuaq. dicta qua-
si mea defendere. Certe & in dialogo, quem nuper edidi,
tuæ beatitudinis, ut dignum fuerat, recordatus sum: ma-
gisq. demus operam, ut perniciosissima hæresis de ecclesiis
auferatur, quæ semper simulat pœnitentiam, ut docendi in
ecclesiis habeat facultatem: ne, si aperta se luce prodide-
rit, foras expulsa moriatur. Sanctæ ac uenerabiles filiæ tuæ,
Paula, & Eustochium, & genere suo, & exhortatione tua
dignæ gradiuntur, specialiterq. salutant beatitudinem tuā:
omnis quoque fraternitas, quæ nobiscum Domino salua-
tori seruire conatur. Sanctum presbyterum Firmum, an-
no præterito ob rem earum Rauennam, & inde Africam,
Siciliamq. direximus: quem putamus iam in Africæ parti-
bus commorari. Sanctos, tuo adhærentes lateri, ut meo
obsequio salutes, precor. Litteras quoque meas ad sanctū
presbyterum Firmum direxi: quæ si ad te uenerint, ei di-
rigere non graueris. Incolumem te, & mei memorem,
Christus dominus custodiat, domine uere sancte & bea-
tissime Papa. Grandem Latini sermonis in ista prouincia
notariorum patimur penuriam: & iccirco præceptis tuis
parere non possumus, maxime in editione Septuaginta,
quæ asteriscis ueribusq. distincta est. pleraque enim prio-
ris laboris ob fraudem cuiusdam amisimus,

ARGVMENTVM.

ROGAT ut suam epistolam Hieronymo reddendam cures, atq. illum suis quoque litteris placet; & si quid ex litterarum exemplo, se aliquid illum offendisse cognouerit, sibi renunciet.

AVGVSTINVS PRAESIDIO.

EPISTOLA XCV.

ICVT praesens rogavi sinceritatem tuam, nunc
 S quoque commoneo, ut litteras meas sancto fratri
 & compresbytero nostro Hieronymo mittere nō
 graueris. Vt autem nouerit caritas tua, quemadmodum
 etiam tu illi pro mea causa scribere debeas, misi exempla-
 ria litterarum & mearum ad ipsum, & ad me ipsius. quib-
 us lectis, pro tua sancta prudentia facile uidebis & mo-
 dum meum, quem seruandum putaui, & motum eius,
 quem non frustra timui. aut, si ego, quod non debui, aut
 quo modo non debui, aliquid scripsi; non ad illum de me,
 sed ad me ipsum potius fraterna dilectione mitte sermo-
 nem; quo correctus petam ut ignoscat, si meam culpam
 ipse cognouero.

ARGVMENTVM.

BENIGNE primum salutans, quod acriter responderit,
 excusat: caritatisq. non questionum deinceps scripta efflagi-
 tans, ac salutationes admiscens, rursus de cucurbita meminit,
 et, ut sine mutuo dolore in scripturarū ludant campo, hortatur.

HIERONYMVVS AVGVSTINO.

EPISTOLA XCVI.

VM a sancto fratre nostro Firmo sollicitē quærerē,
 C quid ageres, sospitem te lætus audiui. rursus cum
 tuas litteras non dico sperarem, sed exigereim,
 nesciente te ex Africa profectum se esse dixit. itaque reddo
 tibi per eum salutationis officia, qui te unico amore com-
 ple-

plectitur : simulq. obsecro , ut ignoscas pudori meo , quod diu ut rescriberem præcipienti negare non potui : nec ego tibi , sed causa causæ respondit . et si culpa est respondiſſe ; quæſo , ut patienter audias : multo maior est prouocasse . Sed facessant istiusmodi querimonix : sit inter nos pura germanitas : & deinceps non quæſtionum , sed caritatis ad nos scripta mittamus . sancti fratres , qui nobiscum Domino seruiunt , affatim te salutant . Sanctos , qui tecum Christi lege trahunt iugum , præcipue sanctum & suspiciendum papam Alipium ut meo obsequio salutes , precor . Incolumentum te , & memorem mei , Christus Deus noster tueatur omnipotens , domine uere sancte & beatissime papa . Si legisti librum explanationum in Ionam , puto quod ridiculam cucurbitæ non recipias quæſtionem . sin autem amicus , qui me primus gladio petiit , stylo repulsus est : sit humanitatis tuæ , atque iustitiæ , accusantem reprehendere , non respondentem . in scripturarum , si placet , campo sine nostro inuicem dolore ludamus .

ARGVMENTVM.

EPISTOLAE , qua Hieronymus ad illum scripserat de interpretatione loci ad Galatas , & Pauli simulatione , late , accurateq. respondet : & postquam mendacium omne e scripturis explosit , Petrum , dum Iudaizare fecit gentiles , errasse , non Paulum , qui id in Iudeis seruauit ad tempus , multis ostendit , suamq. hanc interpretationem , quamuis nouam , ueritatem , germanioremq. tamen esse dilucide probat .

AVGVSTINVS HIERONYMO.

EPISTOLA XCVII.

I AMPRIDEM caritati tuæ prolixam epistolam misi , respondens illi tuæ , quam per sanctum filium tuum Asterium , nunc iam non solum fratrem , uerum etiam collegam meum , misisse te recolis : quæ utrum in manus tuas peruenire meruerit , adhuc nescio , nisi

Aaaa quod

quod per fratrem sincerissimum Firmum scribis; si ille, qui te primum gladio petiit, stylo repulsus est; ut sit humanitatis meae, atque iustitiae, accusantem reprehendere, non respondentem. Hoc solo tenuissimo indicio utcumque cōiicio, legisse te illam epistolam meam. In ea quippe deploravi, tantam inter uos exitisse discordiam, de quorum tanta amicitia, quaquaversum eam fama diffuderat, caritas fraterna gaudebat: quod non feci reprehendēdo in aliquo germanitate tuam; cuius in ea re aliquā culpam me cognovisse; non ausus sum dicere; sed dolendo humanam miserriam, cuius in amicitis mutua caritate retinendis, quantalibet illa sit, incerta permanſio est. Verum illud malueram tuis nosse rescriptis, utrum mihi ueniam, quam poposceram, dederis. quod apertius mihi intimari cupio: quantum hilarior quidam uultus litterarum tuarum, etiam hoc me impetrasse, significare uideatur: si tamen post lectam illam missae sunt: quod in eis minime apparet. Petis, uel potius fiducia caritatis iubes, ut in scripturarum campo sine nostro inuicem dolore ludamus. Equidem, quantum ad me attinet, serio nos ista, quam ludo, agere malletm. Quod si hoc uerbum tibi propter facilitatem ponere placuit: ego fateor, maius aliquid expeto a benignitate uirū tuarum, prudentiaq. tam docta, & otiosa, annosa, studiosa, ingeniosa, diligente, haec tibi non tantum donante, uerum etiam dictante Spiritu sancto, ut in magnis & laboriosis quaestionibus, non tamquam ludentem in campo scripturarum, sed in montibus anhelantem adiuues. Si autem propter hilaritatem, quam esse inter carissimos differenter decet, putasti dicendum esse, ludamus: siue illud apertum & planū sit, unde colloquimur; siue arduū atque difficile; hoc ipsum, edoce obsecro te, quonā modo assequi ualeamus: ut, cum forte aliquid nos mouet, quod nobis, etsi non cautius attendentibus, certe tardius intelligentibus, non probatum est, &, quid nobis uideatur, contra conamur asserere; si hoc aliquantum securiore libertate dicamus, non incidamus in suspicionem puerilis iactantiae; quasi

quasi nostro nomini famam, uiros illustres accusando, quæramus. Si autem aliquid asperum, refellendi necessitate, depromptum fuerit: quo tolerabile fiat, leniore circumfundamus eloquio; ne litū melle gladium stringere uideamur. Nisi forte ille modus est, quo utrumque hoc uitium, uel uitii suspicionem caueamus, si cum doctiore amico sic disputemus, ut, quidquid dixerit, necesse sit approbare; nec, querendi saltem causa, liceat aliquantulum reluctari. Tum uero sine ullo timore offensionis tamquam in campo luditur: sed mirum, si nobis non illuditur. Ego enim fateor caritati tuæ, solis eis scripturarum libris, qui iam canonici appellantur, didici hunc timorem honoremque deferre, ut nullum eorum auctorem scribendo aliquid errasse firmissime credā. at si aliquid in eis offendero, quod uideatur contrarium ueritati: nihil aliud, quam uel mendosum esse codicem, uel interpretem non assecutum esse quod dictum est, uel me minime intellexisse, non ambigā. Alios autem ita lego, ut, quantalibet sanctitate doctrinaque præpolleant, non ideo uerum putem, quia ipsi ita senserunt, sed quia mihi uel per illos auctores canonicos, uel probabili ratione, quod a uero non abhorreat, persuadere potuerunt. Nec te, mi frater, sentire aliquid aliter existimo: prorsus, inquam, non te arbitror sic legi tuos libros uelle, tamquam prophetarum, & apostolorum: de quorum scriptis, quod omni errore careant, dubitare nefarium est. absit hoc a pia humilitate tua, & ueraci de temet ipsa cogitatione: qua nisi esses præditus, non utique dicerēs: Utinā mereremur cōplexus tuos, & collatione mutua uel doceremus aliqua, uel disceremus. Quod si te ipsum consideratione uitæ, ac morum tuorum, non simulatē, non fallaciter dixisse credo: quanto magis æquum est me credere, apostolum Paulum non aliud sensisse, quam scripserit; ubi ait de Petro & Barnaba: Cum uiderem quia non recte ingrediebantur ad ueritatem euangelii, dixi Petro coram omnibus: Si tu, cum sis Iudæus, gentilter & non Iudaice uiuis, quo modo gentes cogis Iudaizare? De quo enim

Aaaa 2 certus

Matth. 26

2. Reg. 11. 12

certus sum, quod me scribendo uel loquendo non fallat: si
 fallebat apostolus filios suos, quos iterum parturiebat, do-
 nec in eis Christus, idest ueritas, formaretur. Quibus cū
 prēmisset, dicens: Quæ autem scribo uobis, ecce coram
 Deo quia non mentior: non tamen ueraciter scribebat, sed
 nescio qua dispensatoria simulatione fallebat, uidisse se Pe-
 trum & Barnabam non recte ad euangelii ueritatem ingre-
 dientes, ac Petro in faciem restitisse; nō ob aliud nisi quod
 gentes cogeret Iudaizare. At enim satius est credere, apo-
 stolum Paulum aliquid uere non scripsisse, quam aposto-
 lum Petrum non recte aliquid egisse. Hoc si ita est; dica-
 mus, (quod absit) satius esse credere, mentiri euange-
 lium, quam negatum esse a Petro Christum; & mentiri Re-
 gnorum librum, quam tātum prophetam, a domino Deo
 tam excellenter electum, in concupiscenda atque abducen-
 da uxore aliena commisisse adulterium, & in marito eius ne-
 cando tam horrendum homicidium. In quo uero sanctam
 scripturam, in summo, & cælesti auctoritatis culmine col-
 locatam, de ueritate eius certus ac securus legam: & in ea
 homines uel approbatos, uel emendatos, uel damnatos ue-
 raciter discam, potius quam facta humana: ne, dum in qui-
 busdam laudabilis excellentiæ personis aliquando credere
 timeo reprehendenda, ipsa diuina eloquia mihi sint ubi-
 que suspecta. Manichæi plurima diuinarum scripturarum,
 quibus eorum nefarius error clarissima sententiarum per-
 spicuitate conuincitur, quia in alium sensum detorquere
 non possunt, falsa esse contendunt, ita tamen, ut eandem
 falsitatem non scribentibus apostolis tribuant, sed nescio
 quibus codicum corruptoribus. quod tamen quia nec plu-
 ribus siue antiquioribus exemplaribus, nec præcedentis
 linguæ auctoritate, unde Latini libri interpretati sunt, pro-
 bare aliquando potuerunt: notissima omnibus ueritate su-
 perati, confusiq. discedunt. Ita ne non intelligit pruden-
 tia sancta tua, quanta malitiæ illorum patefcat occasio, si,
 non ab aliis apostolicas litteras esse fallatas, sed ipsos apo-
 stolos falsa scripsisse, dicamus? Non, inquis, credibile est,
 hoc

hoc in Petro Paulum, quod ipse Paulus fecerat, arguisse.
 Non nunc inquiero, quid fecerit: sed, quid scripserit, quaero. Hoc ad quaestionem, quam suscepi, maxime pertinet; ut ueritas diuinarum scripturarum ad nostram fidem aedificandam memorie commendata, non a quibuslibet, sed ab ipsis apostolis, ac per hoc in canonicum auctoritatis culmen recepta, ex omni parte uerax atque indubitanda persistat. Nam si hoc fecit Petrus, quod facere debuit: mentitus est Paulus, quod eum uiderit non recte ingredientem ad ueritatem euangelii. Quisquis enim hoc facit, quod facere debet; recte utique facit; & ideo falsum de eo dicit, qui dicit eum non recte fecisse, quod eum nouit facere debuisse. Si autem uerum scripsit Paulus: uerum est, quod Petrus non recte tunc ingrediebatur ad ueritatem euangelii. Id uero faciebat, quod facere non debebat: & si tale aliquid Paulus ipse iam fecerat, correctum potius etiam ipsum credam, coapostoli sui correctionem non potuisse negligere, quam mendaciter aliquid in sua epistola posuisse. Et si hoc non in epistola qualibet, quanto magis in illa, in qua praelocutus ait: Quae autem scribo uobis, ecce coram Deo quia non mentior? Ego quidem illud Petrum sic egisse credo, ut gentes cogeret Iudaizare. Hoc enim lego scripsisse Paulum, quem mentitum esse non credo: & ideo non recte agebat hoc Petrus. erat enim contra Euangelii ueritatem, ut putarent qui credebant in Christum, sine illis ueteribus sacramentis saluos se esse non posse. Hoc enim contendebant Antiochiae, qui ex circumcisione crediderant. Contra quos Paulus perseveranter acriterque configit. Ipsum uero Paulum non ad hoc id egisse, quod uel Timotheum circumcidit, uel Cenchreis uotum per A. 16. 18. 21 soluit, uel Hierosolymis a Iacobo admonitus, cum eis, qui uouerant, legitima illa celebranda suscepit; ut putari uideretur, per ea sacramenta etiam Christianam salutem dari: sed ne illa, quae prioribus, ut congruebant, temporibus, in umbris rerum futurarum Deus fieri iusserat, tamquam idololatriam gentilium damnare crederetur. Hoc est A a a a ; enim,

Act. 21 enim, quod illi Iacobus ait auditū de illo esse, quod disci-
 sionem doceat a Moyse: quod utique nefas est, ut creden-
 tes in Christum discendantur a propheta Christi, tamquam
 eius doctrinam detestantes atque damnantes: de quo ipse
Ioan. 5 Christus dicit: Si crederetis Moyse, crederetis & mihi: de
 me enim ille scripsit. Attende, obsecro, ipsa uerba Iaco-
Act. 21 bi. Vides, inquit frater, quot millia sunt in Iudæa, qui cre-
 diderunt in Christum: & hi omnes æmulatores sunt legis,
 audierunt autem de te, quia discissionem doces a Moyse,
 eorum, qui per gentes sunt, Iudæorum, dicens: non de-
 bere circumcidere eos filios suos, neque secundum consue-
 tudinem ingredi. Quid ergo est? Vtique oportet conueni-
 re multitudinem: audierunt enim te superuenisse. hoc er-
 go fac, quod tibi dicimus. Sunt nobis uiri quattuor, uo-
 tum habentes super se. his assumptis, sanctifica te cum
 ipsis, & impende in eos ut radant capita: & sciant omnes,
 quia, quæ de te audierunt, falsa sunt: sed ambulas & ipse
 custodiens legem: de gentibus autem, qui crediderunt,
 nos mandauimus, iudicantes nihil eiusmodi seruare illos,
 nisi ut se obseruent ab idolis immolato, & a sanguine, & a
 fornicatione. Non, ut opinor, obscurum est, & Iacobum
 hoc ideo monuisse, ut scirent falsa esse, quæ de illo audie-
 rant, ii, qui cum in Christum ex Iudæis credidissent, tamen
 æmulatores erant legis, ne per doctrinam Christi, uelut sa-
 crilega, nec Deo mandante conscripta, damnari putaren-
 tur, quæ per Moysen patribus fuerāt ministrata. hoc enim
 de Paulo iactauerant, non illi, qui intelligebant quo ani-
 mo a Iudæis fidelibus obseruari tunc ista deberent, propter
 commendandam scilicet auctoritatem diuinam, & sacra-
 mentorum illorum prophetica sanctitatem: nō propter
 adipiscendam salutem, quæ iam in Christo reuelabatur,
 & per baptismi sacramentum ministrabatur. sed illi hoc de
 Paulo sparserant, qui sic ea uolebant obseruari, tamquam
 sine his in Euangelio salus credentibus esse non posset.
 ipsum enim senserāt uehementissimum gratiæ prædicator-
 em & intentioni eorum maxime aduersum, docentem nō
 per

guebat: nō ob aliud, nisi quia sic illa omnia simulatorie ge-
rebatur, tamquā uerum esset, quod illi dicebant, qui sine
circumcisione præputii, atque aliis obseruationibus, quæ
Acl. 16 umbræ erant futurorum, putabant credentes saluos esse
non posse. Ergo & Timotheum propterea circumcidit, ne
Iudæis, & maxime cognationi eius maternæ sic uideren-
tur, qui ex gentibus in Christum crediderant, detestari cir-
cumcisionem, sicut idololatria detestanda est: cum illam
Deus fieri præceperit, hanc Satanas persuasit. Et Titū
propterea non circumcidit, ne occasionem daret eis, qui sic
ne ulla circumcisione dicebant credentes saluos esse non
posse, & ad deceptionem gentium hoc etiam Paulum sen-
tire iactarent. quod ipse satis significat, ubi ait: Sed ne-
Gal. 2 que Titus, qui mecum erat, cum esset gentilis, compul-
sus est circumcidi: propter subintroductos autem falsos fra-
tres, qui subintroierant perscrutari libertatem nostram,
quam habemus in Christo Iesu, ut nos in seruitutem redi-
gerent: quibus nec ad horam cessimus subiectioni, ut ueri-
tas euangelii permaneret apud uos. Hinc apparet, quid
eos captare intellexerit, ut non faceret quod in Timotheo
fecerat; & quod ea libertate facere poterat, qua ostende-
rat, illa sacramenta nec tamquam necessaria debere appe-
ti, nec tamquam sacrilega debere damnari. Sed cauendum
est uidelicet in hac disputatione, ne, sicut philosophi, quæ-
dam facta hominum media dicamus inter recte factum &
peccatum, quæ neque in recte factis, neque in peccatis nu-
merentur; & urgeamur eo, quod obseruare legis cærimo-
nias non potest esse indifferens, sed aut bonum, aut ma-
lum: ut, si bonum dixerimus, eas nos quoque obseruare
cogamur: si autem malum, non uere, sed simulate ab apo-
stolis obseruatas esse credamus. Ego uero apostolis, non
tam exemplum philosophorum timeo, quando & illi in
sua disputatione ueri aliquid dicunt, quam forensium ad-
uocatorum, quando in alienarum causarum actione men-
tiuntur. Quorum similitudo, si in ipsa expositione episto-
lae ad Galatas ad cōfirmandam simulationem Petri & Pau-
li

si putata est decenter induci: quid ego apud te timeam nomen philosophorum; qui non propterea uani sunt, quia omnia falsa dicunt, sed quia & falsis plerisque confidunt, & ubi uera inueniuntur dicere, a Christi gratia, qui est ipsa ueritas, alieni sunt? Cur autem non dicam, praecepta illa ueterum sacramentorum nec bona esse, quia non eis homines iustificantur; umbræ enim sunt prænunciantes gratiam, qua iustificamur, nec tamen mala, quia diuinitus praecepta sunt, temporibus personisq. congruentia: cum me adiuuet etiam prophetica sententia, qua dicit Deus se illi populo dedisse praecepta non bona. Forte enim propterea non dixit mala, sed tantum non bona, id est non talia, ut illis homines boni fiant, aut sine illis boni non fiant. Vellem me doceret benigna sinceritas tua, utrum simulate quisquam sanctus orientalis, cum Romam uenerit, ieiunet sabbato, excepto illo die paschalis uigiliæ. Quod si malum esse dixerimus; non solum Romanam ecclesiam, sed etiam multas ei uicinas, & aliquanto remotiores damnabimus, ubi mos idem tenetur, & manet. Si autem, non ieiunare sabbato, malum putauerimus: tot ecclesias orientis, & multo maiorem orbis Christiani partem qua temeritate criminabimur? Placet ne tibi, ut medium quiddam esse dicamus, quod tamen acceptabile sit ei, qui hoc non simulate, sed congruenti societate atque obseruantia fecerit? & tamen nihil inde, legimus in canonicis libris, praeceptum esse Christianis. quanto magis illud malum dicere non audeo, quod Deum præcepisse ipsa Christiana fide negare non possum: quia didici non eo me iustificari, sed gratia Dei per Iesum Christum dominum nostrum? Dico ergo, circumcisionem præputii, & cetera huiusmodi, priori populo per testamentum, quod uetus dicitur, diuinitus data ad significationem futurorum, quæ per Christum oportebat impleri: quibus aduenientibus, remansisse illa Christianis legenda tantum ad intelligentiam præmissæ prophetiæ, non autem necessario facienda; quasi adhuc expectandum esset, ut ueniret fidei reuelatio, quæ his significabatur esse uentura: sed

ra: sed quamuis gentibus imponenda non essent, non tamen sic debuisse auferri a consuetudine Iudæorum, tamquam detestanda atque damnanda: sensim proinde atque paulatim, feruente sane prædicatione gratiæ Christi, qua sola nossent credentes se iustificari, saluosq. fieri, non illis umbris rerum antea futurarum, tunc iam uenientium, atque præsentium, ut in illorū Iudæorum uocatione, quos præsentia carnis Domini & apostolica tempora sic inuenierant, omnis illa actio consumeretur umbrarum, hoc eos fecisse ad commendationem; ut non tamquam detestanda & similis idololatriæ uitaretur, ultra uero non haberet progressum; ne putaretur necessaria, tamquam uel ab illa salus esset, uel sine illa esse non posset. quod putauerunt hæretici: qui dum uoluerunt & Iudæi esse, & Christiani, nec Iudæi, nec Christiani esse potuerunt. Quorum sententiam mihi cauendam, quamuis in ea numquam fuerim, tamen beneuolentissime admonere dignatus es: in cuius sententiæ non consensionem, sed simulationem Petrus timore inciderat, ut de illo Paulus uerissime scriberet, quod cum eum uidisset non recte ingredientem ad ueritatē Euangelii, eiq. uerissime diceret, quod gentes Iudaizare cogebat: quod Paulus utique non cogebat, ob hoc illa uetera ueraciter, ubi opus esset, obseruans, ut damnanda non esse monstraret: prædicans tamen instanter non eis, sed reuelata gratia fidei, fideles saluos fieri, ne ad ea quemquam uelut necessaria suscipienda compelleret. Sic autem credo apostolum Paulum ueraciter cuncta illa gessisse, nec tamen nunc quemquam factum ex Iudæo Christianum, uel cogo, uel sino talia ueraciter celebrare: sicut nec tu, cui uidetur Paulus ea simulasse, cogis istum, uel sinis talia simulare. An uis, ut etiam ego dicam, hanc esse summam quæstionis, immo sententiæ tuæ; ut, post euangelium Christi, benefaciant credentes Iudæi, si sacrificia offerant, quæ obtulit Paulus, si filios circumcidant; si sabbatum obseruent; ut Paulus in Timotheo, & omnes obseruare Iudæi; dummodo hæc simulate ac fallaciter agant? Hoc si ita est;

est; non iam in hæresim Hebionis, uel eorum; quos uulgo Nazaræos nuncupant, uel quamlibet aliam ueterem, sed nescio in quam nouam delabimur, quæ sit eo perniciosior, quo non errore, sed proposito est ac uoluntate fallaci. Quod si respondeas, ut te ab hac purges sententia, tunc apostolos ista laudabiliter simulasse, ne scandalizarentur infirmi, qui ex Iudæis multi crediderant, & ea respuenda non dum intelligebant; nunc uero confirmata per tot gentes doctrina gratiæ Christianæ, confirmata etiam per omnes Christi ecclesias lectione legis, & prophetarum, quo modo hæc intelligenda, non obseruanda recitentur, quisquis ea simulando agere uoluerit, uideatur insanire: cur mihi non liceat dicere, apostolum Paulum, & alios rectæ fidei Christianos, tunc illa uetera sacramenta paululum obseruando ueraciter commendare debuisse, ne putarentur illæ prophetiæ significationis obseruationes, a piissimis patribus custoditæ, tamquam sacrilegia diabolica a posteris detestandæ? Tam enim cum uenisset fides, quæ prius illis obseruationibus prænuntiata, post mortem & resurrectionem Domini reuelata est, amiserant tamquam uitam officii sui. uerumtamen, sicut defuncta corpora, necessariorum officiis deducenda erant quodam modo ad sepulturam, nec simulate, sed religiose, non autem deferenda continuo, uel inimicorum obtrectationibus tamquam canum morsibus proicienda. Proinde nunc quisquis Christianorum, quamuis sit ex Iudæis, similiter ea celebrare uoluerit, tamquam sopitos cineres eruens non erit pius deductor, uel baiulus corporis, sed impius sepulturæ uiolator. Fateor sane, in eo, quod epistola continet mea, quod ideo sacramenta Iudæorum Paulus celebranda susceperat, cum iam Christi esset apud ostes, ut doceret non esse perniciosum iis, qui ea uellent, sicut a parentibus per legem acceperant, custodire, minus me posuisse, illo dumtaxat tempore, quo primum fidei gratia reuelata est. tunc enim hoc non erat perniciosum, progressu uero temporis erat perniciosum, nisi illæ obseruationes ab omnibus Christianis defererentur: ne, si tunc fierent,

fierent, nō discerneretur, quod Deus populo suo per Moysen præcepit, ab eo, quod in templis demoniorum spiritus immundus instituit. Proinde potius culpanda est negligentia mea, quia hoc non addidi, quam obiurgatio tua. Verumtamen longe ante, quam litteras tuas acceperissem, scribens contra Faustum Manichæum quo modo eundem locum, quamuis breuiter explicauerim, & hoc illi non prætermiserim: & legere poterit, si non dedignetur, benignitas tua, & a carissimis nostris, per quos nunc hæc scripta misi, quo modo uolueris tibi fides fiat, illud me ante dictasse: mihiq. de animo meo crede, quod coram Deo loquens, iure caritatis exposco, numquam mihi uisum fuisse, etiam nunc Christianos ex Iudæis factos sacramenta illa uetera quolibet affectu celebrare, & quouis animo debere ab eis ullo modo coli: cum illud de Paulo semper ita senserim, ex quo illius mihi litteræ innotuerunt: sicut nec tibi uideatur hoc tempore cuiquam esse simulanda ista, cum hoc fecisse apostolos credas. Proinde sicut tu econtrario loqueris: & licet reclamante, sicut scribis, mundo, libera uoce pronuncias, caerimonias Iudæorum & perniciosas esse, & mortiferas Christianis; & quicumque eas obseruauerit, siue ex Iudæis, siue ex gentibus, eum in barathrum diaboli deuolutum: ita ego hanc uocem tuam omnino cōfirmo, & addo: quicumque eas obseruauerit, siue ex Iudæis, siue ex gentibus, non solum ueraciter, uerum etiam simulate, eum in barathrum diaboli deuolutum. Quid quæris amplius? Sed sicut tu simulationem apostolorum ab huius temporis ratione secernis: ita ego Pauli apostoli ueracem tunc in iis omnibus conuersationem ab huius temporis quamuis minime simulata caerimoniarum Iudaicarum obseruatione secerno: quoniam tunc fuit approbanda, nunc detestanda. Ita quamuis legerimus: Lex & prophetæ usque ad Ioannem Baptistam: & quia propterea quærebant Iudæi Christum interficere, quia non solum soluebat sabbatum, sed & patrem suum dicebat Deum, æqualem se faciens Deo: & quia gratiam pro gratia accepimus: & quoniam
lex

matth. 11
Ioan. 5. 1

lex per Moysen data est, gratia autem & ueritas per Iesum
Christum facta est: & per Hieremiam promissum est, datu *Hier. 31*
rum Deum testamentum nouum domui Iuda, non secun-
dum testamentum, quod disposuit patribus eorum: non
tamen arbitror ipsum Dominum fallaciter a parentibus cir-
cumcisum. Aut, si hoc propter ætatem minime prohibe-
bat: nec illud arbitror eum dixisse fallaciter leproso, quem
certe non illa per Moysen præcepta obseruatio, sed ipse
mundauerat: Vade & offer pro te sacrificium, quod præce-
pit Moyses in testimonium illis. Nec fallaciter ascendit ad *Matth. 8*
diem festum usque adeo non causa ostentationis eorum ho-
minibus, ut non euidenter ascenderit, sed latenter. At enim *Ioan. 7*
dixit idem Apostolus: Ecce ego Paulus dico uobis: quia, *Gal. 2*
si circumdamini, Christus uobis nihil proderit. Decepit
ergo Timotheum, & fecit ei nihil prodesse Christum? An *Act. 16*
quia hoc fallaciter factum est, ideo non obsuit? At ipse hoc
non posuit, nec ait, Si circumcidamini ueraciter, sicut nec
fallaciter: sed sine ulla exceptione dixit, Si circumcidami-
ni, Christus uobis nihil proderit. Sicut ergo tu uis hic lo-
cum dare sententiæ tuæ, ut uelis subintelligi, nisi fallaci-
ter: ita non impudenter flagito, ut etiam nos illic intelli-
gere sinas eis dictum, Si circumcidamini, qui propterea
uolebant circumcidi, quod aliter se putabant in Christo sal-
uos esse non posse. Hoc ergo animo, hac uoluntate, ista inten-
tione quisquis tunc circūcidebatur, Christus ei nihil omni-
no proderat: sicut alibi aperte dicit: Nam si per legem iusti *Gal. 2. 8*
tia, ergo Christus gratis mortuus est. Hoc ergo declarat,
quod & ipse commemorasti: Euacuati estis a Christo, qui in
lege iustificamini: a gratia excidistis. Illos itaque arguit,
qui se iustificari in lege credebant, non qui legitima illa in eius
honore, a quo mandata sunt, obseruabant intelligentes, &
qua prænunciandæ ueritatis ratione mandata sint, & quo-
usque debeant perdurare. Vnde est illud, quod ait: Si spi-
ritu ducimini, non adhuc estis sub lege. Vnde, uelut col- *Gal. 3*
ligis, apparet, qui sub lege est, non dispensatiue, ut no-
stros putas uoluisse maiores, sed uere, ut ego intelligo, eum
Spiri-

Spiritum sanctum non habere. Magna mihi uidetur questio, quid sit esse sub lege sic, quemadmodum Apostolus culpatur. Neque enim propter circumcisionem hoc eum arbitror dicere: aut illa sacrificia, quæ tunc facta a patribus, nunc a Christianis non sunt, & cetera huiusmodi, sed hoc

Exod. 20 ipsum etiam, quod lex iubet: Non concupisces: quod fate-
mur certe Christianos debere obseruare, atque euangelica

Rom. 7 maxime illustratione prædicari. Legem dicit esse sanctam, & mandatum sanctum, & iustum, & bonum. Deinde subiungit: Quod ergo bonum est, mihi factum est mors? Absit. Sed peccatum ut appareat peccatum, per bonum mihi operatum est mortem, ut fiat supra modum peccans peccatum per mandatum. Quod autem hic dicit, peccatum per mandatū fieri supra modum, hoc alibi ait: Lex subintravit, ut abundaret delictum. Vbi autem abundauit delictum, superabundauit & gratia. Et alibi, cum superius de dispensatione gratiæ loqueretur, quod ipsa iustificet;

Gal. 3 uelut interrogans ait: Quid ergo lex? Atque huic interrogationi continue respondit: Præuaricationis gratia posita est, donec ueniret semen, cui promissum est. Hos ergo damnabiliter dicit esse sub lege, quos reos facit lex non implentes legem, dum non intelligendo gratiæ beneficium ad faciendā Dei præcepta, quasi de suis uiribus superba elatione præsumunt. Plenitudo enim legis caritas. Caritas uero Dei diffusa est in cordibus nostris, non per nos ipsos;

Rom. 5 sed per spiritum sanctum, qui datus est nobis. Sed huic rei quantum satis est explicandæ, prolixior fortasse, & sui proprii uoluminis sermo debetur. Si ergo illud, quod lex

Exod. 20 ait: Non concupisces: si humana infirmitas gratia Dei adiuta non fuerit, sub se reum tenet; & præuaricatorem potius damnat, quam liberat peccatorem: quanto magis illa, quæ significationis causā præcepta sunt, circumcisio, & cetera, quæ, reuelatione gratiæ latius innotescente, necesse fuerat aboleri, iustificare neminem poterant? Non tamen ideo fuerant tamquam diabolica gentium sacrilegia fugienda, etiam cum ipsa gratia iam coeperat reuelari; quæ umbris

bris talibus fuerat prænunciata; sed permittēda paululum
eis; maxime qui ex illo populo, cui data sunt, uenerant.
postea uero tamquam cum honore sepulta sunt, a Christia-
nis omnibus irreparabiliter deferenda. Hoc autem, quod
dicas, non dispensatiue, ut nostri uoluere maiores; quid
sibi uult? oro te. aut enim hoc est, quod ego appello offi-
ciosum mendacium; ut hæc dispensatio sit officium uelut
honeste mentiendi: aut, quid aliud sit omnino, nō uideo.
nisi forte, addito nomine dispensationis; fiat ut mendaci-
um non sit mendacium. quod si absurdum est: cur ergo nō
aperte dicas, officiosum mendacium defendendum? nisi
forte nomen te mouet; quia non tam usitatum est in eccle-
siasticis libris uocabulum officii, quod Ambrosius noster
non timuit, qui suos quosdam libros, utilium præceptio-
num plenos, de officiis uoluit appellare. An, si officiose
mentiatur, quisque culpandus est, si dispensatiue, appro-
bandus? Rogo te, mentiatur, ubi legerit qui hoc putat:
quia & in hoc magna quæstio est, sit ne aliquando mentiri
uiri boni, immo uiri Christiani, qualibus dictum est: sit
in ore uestro, est est, non non: ut non sub iudicio decida-
tis. Et qui cum fide audiunt: Perdes omnes, qui loquun-
tur mendacium. Sed, ut dixi, & alia magna quæstio est:
eligat quod uoluerit, qui hoc existimat ubi mentiatur: dū
tamen a scribentibus auctoribus sanctarum scripturarum,
& maxime canonicarum, inconcussæ credatur, & defendat-
ur omnino abesse mendacium: ne dispensatores Christi,
de quibus dictum est: Hic iam quæritur inter dispensato-
res, ut fidelis quis inueniatur: tamquam magnum aliquid
sibi fideliter didicisse uideantur, pro ueritatis dispensatione
mentiri; cum ipsa fides in Latino sermone ab eo dicatur ap-
pellata, quia sit quod dicitur. Vbi autem sit, quod dicitur,
mentiendi utique non est locus. Fidelis igitur dispensator
apostolus Paulus proculdubio nobis exhibet in scribendo
fidem: quia ueritatis dispensator erat, non falsitatis. Ac
per hoc uerū scripsit, uidisse se Petrum nō recte ingredien-
tem ad ueritatem euangelii; eiq. in faciem restitisse, quod
gentes

*Matth. 5**Psal. 5**1. Cor. 4**Gal. 2*

gentes cogeret Iudaizare. Ipse uero Petrus, quod a Paulo fiebat utiliter libertate caritatis, sancta ac benigna pietate humilitatis accepit: atque ita rarius & sanctius exemplum posteris præbuit, quo non dedignarentur, sicubi forte recti tramitem reliquissent, etiam a posterioribus corrigi, quā Paulus, quo confidenter auderent etiam minores maioribus, pro defendenda euangelica ueritate, salua fraterna caritate resistere. Nam cum satius multo sit, a tenendo itinere in nullo, quam in aliquo, declinare; multo est tamen mirabilius, & laudabilius, libenter accipere corrigentem, quam audacter corrigere deuiantem. Est laus itaque iustæ libertatis in Paulo, & sanctæ humilitatis in Petro: quæ, quantum mihi pro modulo meo uidetur, magis fuerat aduersus calumniantem Porphyrium defendenda, quā ut ei daretur obtrectandi maior occasio; qua multo mordacius crimineretur Christianos fallaciter uel suas litteras scribere, uel Dei sui sacramenta tractare. Flagitas a me, ut aliquem saltem unum ostendam, cuius in hac re sententiā sim secutus; cum tu tam plures nominatim commemoraueris, qui te in eo, quod adstruis, præcesserunt; petens ut in eo, si te reprehendo errantem, patiar te errare cum talibus. quorum ego, fateor, neminem legi: sed, cum sint ferme sex, uel septem, horum quattuor auctoritatem tu quoque infringis. Nam Laodicenum, cuius nomen taces, de Ecclesia dicis nuper egressum. Alexandrum autem ueterem hæreticum, Origenem uero ac Didymum reprehensos abs te, lego etiam in recentioribus opusculis tuis, & non mediocriter, nec de mediocribus questionibus, quamuis Origenem mirabiliter ante laudaueris. Cum iis ergo errare puto quia nec te ipse patieris, quamuis hoc perinde dicatur, ac si in hac sententia non errauerint. nam quis est, qui se uelit cum quolibet errare? Tres igitur restant, Eusebius Emisenus, Theodorus Heracleotes, & quem paulo post commemoras, Ioannes, qui dudum in pontificali gradu Constantinopolitanam rexit ecclesiam. Porro, si quaras, uel recolas, quid hic senserit noster Ambrosius, quid noster

noster itidem Cyprianus : inuenies fortasse ; nec nobis de-
 fuisse , quos in eo , quod asserimus , sequeremur : quam-
 quam , sicut paulo ante dixi , tantummodo scripturis cano-
 nicis hanc ingenuam debeam seruitutem ; qua eas solas ita
 sequar , ut conscriptores earum nihil in eis omnino errasse ,
 nihil fallaciter posuisse non dubitem . Proinde , cum quæ-
 ro tertium , ut tres etiam ego tribus opponam ; possem qui-
 dem , ut arbitror , facile reperire , si multa legissem . ue-
 rumtamen ipse mihi pro his omnibus , immo supra hos
 omnes apostolus Paulus occurrit : ad ipsum confugio : ad
 ipsum ab omnibus , qui aliud sentiunt , litterarum tractato-
 ribus prouoco : ipsum interrogans interpello , & requiro in
 eo , quod scripsit ad Galatas ; uidisse se Petrum non recte in *Gal. 2*
 gredientem ad ueritatem euangelii ; eiq. in faciem propte-
 rea restitisse , quod illa simulatione gentes Iudaizare coge-
 bat : utrum uerum scripserit , an forte nescio qua dispensa-
 tiua fallitate mentitus sit . Et audio eum paulo superius , in
 eiusdem narrationis exordio religiosa noce mihi claman-
 tem : Quæ autem scribo uobis , ecce coram Deo quia nõ
 mentior . Dent ueniam quilibet aliud opinantes : ego ma- *Gal. 1*
 gis credo tanto apostolo in suis , & pro suis litteris iuranti ,
 quam cuique doctissimo de alienis litteris disputanti . Nec
 dici timeo : sic Paulum defendere , quod non simularit er-
 rorem Iudæorum , sed uere fuerit in errore . Quoniam ne-
 que simulabat errorem , qui libertate apostolica , sicut illi
 tempori congruebat , uetera illa sacramenta , ubi opus
 erat agendo , commendabat ea , non solum Satanæ uersu-
 tia decipiendis hominibus , sed Dei prouidentia , præiun-
 ciandis rebus futuris prophetice constituta : nec uere fue-
 rat in errore Iudæorum : qui non solum nouerat , sed etiã
 instanter & acriter prædicabat eos errare , qui putabant ge-
 tibus imponenda , uel iustificationi quorumcumque fide-
 lium necessaria . Quod autem dixi eum factum Iudæis tam *1. Cor. 9*
 quam Iudæum , & tamquam gentilem gentilibus , non
 mentientis astu , sed compatiens affectu : quemadmodũ
 dixerim , parum mihi uisus es attendisse ; immo ego for-
 tasse

B b b b

tasse non satis hoc explanare potuerim. Neque enim hoc ideo dixi, quod misericorditer illa simulauerit; sed quia sic ea non simulauit, quæ faciebat similia Iudæis, quemadmodum nec illa, quæ faciebat similia gentibus, quæ tu quoque commemorasti: atque in eo me, quod non ingratis fateor, adiuuisti. Cum enim abs te quæsissem in epistola mea, quo modo putetur ideo factus Iudæis tamquam Iudæus, quia fallaciter suscepit sacramenta Iudæorum, cum & gentibus tamquam gentilis factus sit, nec tamen suscepit fallaciter sacrificia gentium: tu respondisti, in eo factum gentibus tamquam gentilem, quod præputium receperit, quod indifferenter permiserit uesti cibis, quos damnant Iudæi. Vbi ego quæro: utrum & hoc simulate fecerit? Quod si absurdissimum, atque falsissimum est: sic ergo & illa, in quibus Iudæorum consuetudini congruebat libertate prudenti, non necessitate seruili, aut, quod est indignius, dispensatione fallaci potius, quam fidei. fidelibus enim, & iis, qui cognouerunt ueritatem, sicut ipse testatur, nisi forte & hic fallit, omnis creatura Dei bona est, & nihil abiiciendum, quod cum gratiarum actione percipitur. Ergo & ipsi Paulo, non solum uero, uerum etiam dispensatori maxime fidei, non solum cognitori, uerum etiam doctori ueritatis, omnis utique in cibis creatura Dei, non simulate, sed uere bona erat. Cur igitur nihil simulate suscipiendo sacrorum, caerimoniarumque gentium, sed de cibis & præputio uera sentiendo, atque docendo, tamen tamquam gentilis factus est gentibus, & non potuit fieri tamquam Iudæus Iudæis, nisi fallaciter suscipiendo sacramenta Iudæorum? Cur oleastro inserto obseruauit dispensationis ueracem fidem; &, naturalibus ramis non extra, sed in arbore constitutis, nescio quod dispensatoris uelamen simulationis obtendit? Cur factus tamquam gentilis gentibus, quod sentit docet, quod agit sentit: factus autem tamquam Iudæus Iudæis, aliud claudit in pectore, aliud promittit in uerbis, in factis, in scriptis? Sed absit hoc sapere: Vtrisque enim debebat caritatem de corde puro, & conscientia bona,

1. Tim. 4

Rom. 11

1. Tim. 1

1. Cor. 9

na,

na, & fide non ficta . ac per hoc omnibus omnia factus est, ut omnes lucrificeret, non mentientis astu, sed compatientis affectu, idest, non omnia mala hominum fallaciter agendo, sed aliorum omnium malis omnibus, tamquam si sua essent, misericordis medicinæ diligentiam procurando . Cum itaque illa testamenti ueteris sacramenta, etiam sibi agenda minime recusabat; non misericorditer fallebat, sed omnino non fallens, atque hoc modo, a domino Deo illa usque ad certi temporis dispensationem iussa esse commendans, a sacrilegis sacris gentium distinguebat . Tunc autem, non mentientis astu, sed compatientis affectu, Iudæis tamquam Iudæus fiebat, quando eos ab illo errore, quo uel in Christum credere nolebant, uel per uetera sacrificia sua, cærimoniarumq. obseruationes se a peccatis posse mundari, fieriq. saluos existimabant, sic liberare cupiebat, tamquam ipse illo errore teneretur, diligens utique proximum tamquam se ipsum, & hæc aliis faciens, quæ sibi ab aliis fieri uellet, si hoc illi opus esset . Quod cum Dominus monuisset, adiunxit : Hæc est enim lex, & prophetæ . Hunc compatientis affectum in eadem epistola ad Galatas præcipit, dicens : Si præoccupatus fuerit homo in aliquo delicto; uos, qui spirituales estis, instruite huiusmodi in spiritu lenitatis, intendens te ipsum, ne & tu tenteris . Vide non dixit : fieri tamquam ille, ut illum lucrificas . non utique, ut ipsum delictum fallaciter ageret; aut se id habere simularet; sed ut in alterius delicto, quid etiam sibi accidere posset, attenderet; atque ita alteri, tamquam sibi ab altero uellet, misericorditer subueniret : hoc est non mentientis astu, sed compatientis affectu . Sic Iudæo, sic gentili, sic cuilibet homini Paulus in errore, uel peccato aliquo constituto, non simulando, quod non erat, sed compatiendo, quia esse potuisset, tamquam qui se hominem cogitaret, omnibus omnia factus est, ut omnes lucrificaret . Te ipsum, si placet, obsecro : te paulisper intue : te ipsum, inquam, erga me ipsum & recale : uel, si habes conscripta, relege uerba tua in illa epistola, quam mihi per fra-

Matth. 7
Gal. 6

B b b b 2 trem

erem nostrum, iam collegam meum, Cyprianum breuiorē misisti, quam ueraci, quam germano, quam pleno caritatis affectu, cum quædam me in te commisisse exposuisses grauitèr, subiunxisti: In hoc læditur amicitia: in hoc necessitudinis iura uiolantur: ne uideamur certare pueriliter, & fautoribus inuicem, uel detractoribus nostris tribuere materiā contendendi. Hæc abs te uerba non solum ex animo dicta sentio, uerū etiam benigno animo ad consulendum mihi. Deinde addis, quod, etiam si non adderes, appareret, & dicis: Hæc scribo, quia te pure & Christiane diligere cupio, nec quidquam in mea mente retinere, quod distet a labiis. O uir sancte, mihiq; ut Deus uidet animam meā, ueraci corde dilecte, hoc ipsum, quod posuisti in litteris tuis; quod te mihi exhibuisse nō dubito; hoc ipsum omnino apostolum Paulum credo exhibuisse in litteris suis, non unicuique homini, sed Iudæis, & Græcis, & omnibus gentibus filiis suis, quos in euangelio genuerat, & quos parientes parturiebat, & deinde posterorum tot millibus fidelium Christianorum, propter quos illa memoriæ commendabatur epistola, ut nihil in sua mente retineret, quod distaret a labiis. Certe factus es etiam tu, tamquam ego, non mentientis astu, sed compatientis affectu; cum cogitares tam me non relinquendum in ea culpa, in quam me prolapsus existimasti, quam nec te uelles, si eo modo prolapsus esses. Vnde agens gratias beneuolæ menti erga me tuæ, simul posco; ut etiam mihi non succenseas, quod, cū in opusculis tuis aliqua me mouerent, motum meum intimaui tibi; hoc erga me ab omnibus obseruari uolēs, quod erga te ipse seruauit; ut quidquid improbandum putant in scriptis meis, nec claudant subdolo pectore, nec ita reprehendant apud alios, ut taceant apud me; hinc potius existimans lædi amicitiam, & necessitudinis iura uiolari. Nescio enim, utrum amicitie Christianæ putandæ sint, in quibus magis ualet uulgare prouerbiū; Obsequium amicos, ueritas odium parit; quam ecclesiasticum; Fideliora Pro. 27 sunt uulnera amici, quam uoluntaria oscula inimici. Proinde

inde carissimos nostros, qui nostris laboribus sincerissime fauent, hoc potius quanta possumus instantia doceamus: quo sciant fieri posse, ut inter carissimos aliquid alterutro sermone contradicatur; nec tamen ipsa caritas minuatur; nec ueritas odium pariat, quæ debetur amicitiae: siue illud uerum sit, quod contradicatur; siue corde ueraci, qualecūque sit, dicitur, non retinendo in mente, quod a labiis distet. Credant igitur fratres nostri, familiares tui, quibus testimonium perhibes, quod sint uasa Christi, me inuito factum; nec mediocrē de hac re dolorem inesse cordi meo, quod litteræ meæ prius in multorum manus uenerint, quā ad te, ad quem scriptæ sunt, peruenire potuerunt. quo autem modo id acciderit, & longum est enarrare, & nisi fallor, superfluum: cum sufficiat, si quid mihi in hoc credatur, non eo factum animo, quo putatur, nec omnino meæ fuisse uoluntatis, aut dispositionis, aut consensionis, aut saltem cognitionis ut fieret. hoc si nō credūt; (quod Deo teste loquor;) quid amplius faciam, nō habeo. Ego tamen, absit, ut eos credam hæc tuæ sanctitati maleuola mente suggerere ad excitandas inter nos inimicitias; quas misericordia domini Dei nostri auertat a nobis; sed, sine ullo nocendi animo, facile de homine humana uitia suspicari. hoc enim me de illis æquum est credere, si uasa sunt Christi, non in contumeliam, sed in honorem facta, & disposita in domo magna a Deo, ad omne opus bonum. Quod si post hanc attestationem meam, si in notitiam eorum uenerit, facere uoluerint; quam non recte faciant, & tu uides. Quod sane scripseram, nullum me librum aduersus te Romam misisse, ideo scripseram, quia & libri nomen ab ipsa epistola discernebam. unde omnino nescio quid aliud te audisse existimaueram: & Romam nec ipsam epistolam, sed tibi miseram: & aduersus te non esse arbitrabar, quod sinceritate amicitiae, siue ad admonendum, siue ad te uel me abs te corrigendum, fecisse me noueram. Exceptis autem familiaribus tuis, te ipsum obsecro per gratiam, qua redempti sumus; ut, quaecumque tua bona,

B b b b ; quæ

quæ Domini pietate tibi concessa sunt, in litteris meis posui, non me existimes infidioso blandiloquio posuisse: si quid autem in te peccaui, dimittas mihi. Nec illud, quod de te, nescio cuius poetæ factum, ineptius fortasse quam litteratus a me commemoratum est, amplius, quam dixi, ad te trahas: cum continuo subiecerim, non hoc ideo me dixisse, ut oculos cordis reciperes; quos, absit, umquam ut amiseris; sed ut aduerteres, quos sanos ac uigiles haberes. Propter solam ergo *παλινοδία*, si scripserimus aliquid, quod scripto posteriore destruere debeamus, imitandam, non propter Stefichori cæcitatem, quam cordi tuo nec tribui, nec timui, attingendum illud existimaui: atque identidem rogo, ut me fidenter corrigas, ubi mihi hoc opus esse prospexeris. Quamquam enim, secundum honorum uocabula, quæ iam Ecclesiæ usus obtinuit, episcopatus presbyterio maior sit: tamen in multis rebus Augustinus Hieronymo minor est: licet etiam a minore quolibet non sit refugienda, uel dedignanda correctio. De interpretatione tua iam mihi persuasisti, qua utilitate scripturas uolueris trāsferre de Hebræis: ut scilicet ea, quæ a Iudæis prætermissa, uel corrupta sunt, proferres in medium. Sed insinuare digneris, peto, a quibus Iudæis, utrum ab eis ipsis, qui ante aduentum Domini interpretati sunt; & si ita est, quibus, uel quonam eorum; an ab istis posterius, qui propterea putari possunt aliqua de codicibus Græcis uel subtraxisse, uel in eis corrupisse, ne illis testimoniis de Christiana fide conuincerentur. illi autem anteriores cur hoc facere uoluerint, non inuenio. Deinde nobis mittas, obsecro, interpretationem tuam de Septuaginta: quam te edidisse nesciebam. Librum quoque tuum, cuius mentionem fecisti, de optimo genere interpretandi, cupio legere; & adhuc nosse, quo modo cœquāda sit in interprete peritia linguarum, coniecturis eorum, qui scripturas edifferendo pertractant: quos necesse est, etiam si recte atque unius fidei fuerint, uarias parere in multorum locorum obscuritate sententias: quamuis nequaquā ipsa uarietas ab eiusdem
fidei

fidei unitate discordet; sicut etiam unus tractator, secundum eandem fidem, aliter eundem locum potest exponere; quia hoc eius obscuritas patitur. Ideo autem desidero interpretationem tuam de Septuaginta, ut & tanta Latinorum interpretum, qui qualescumque hoc ausi sunt, quantum possumus imperitia careamus; & ii, qui me inuidere putant utilibus laboribus tuis, tandem aliquando, si fieri potest, intelligant; propterea me nolle tuam ex Hebræo interpretationem in ecclesiis legi, ne contra Septuaginta auctoritatem tamquam nouum aliquid proferentes, magno scandalo perturbemus plebes Christi, quarum aures & corda illam interpretationem audire consueuerunt, quæ etiam ab apostolis approbata est. Vnde illud apud Ionam Ion. 4 uirgultum, si in Hebræo nec hedera est, nec cucurbita, sed nescio quid aliud, quod trunco suo nixum, nullis sustentandum adminiculis erigatur, mallem iam in omnibus Latinis cucurbitam legi. non enim frustra hoc puto Septuaginta posuisse: nisi quia & huic simile sciebant. Satis me, immo fortasse plus, quam satis, tribus epistolis tuis respondisse arbitror; quarum duas per Cyprianum accepi, unam per Firmum. Rescribe, quod uisum fuerit, ad nos uel alios instruendos. Dabo autem operam diligentior, quantum me adiuuat Dominus, ut litteræ, quas ad te scribo, prius ad te perueniant, quam ad quemquam, a quo latius dispergantur. fateor enim nec mihi hoc fieri uelle de tuis ad me; quod de meis ad te factum iussissime exposulas. Tamen placeat nobis inuicem non tantum caritas, uerum etiam libertas amicitie; nec apud me taceas, uel ego apud te, quod in nostris litteris uicissim nos mouet, eo scilicet animo, qui oculis Dei in fraterna dilectione non displicet. quod si inter nos fieri posse sine ipsius dilectionis perniciofa offensione non putas; non fiat. illa enim caritas, quam tecum habere uellem, profecto maior est, sed melior hæc minor, quam nulla est.

Bbbb 4 ARGV-

ARGUMENTVM.

NUNCIAT se per Asterium anno præterito scripsisse :
nunc per Præsidium diaconum rursum scribens , cum illi com-
mendat : & , postquam conquestus est se ab hæreticis vexari , sa-
lutationes postremo admiscet .

HIERONYMVS AVGVSTINO.

EPISTOLA XC VIII.

ANNO præterito per fratrem nostrum Asterium hy-
A podiaconum dignationi tuæ epistolam miseram ,
promptum reddens salutationis officium : quam
tibi arbitror redditam . nunc quoque per sanctum fratrem
meum Præsidium diaconum obsecro . primum ut memine-
ris mei : deinde , ut baiulum litterarum habeas commenda-
tum ; & mihi scias germanissimum ; & , in quibuscumque
necessitas postulauerit , foueas , atque sustentas : non quo
aliqua re , Christo tribuente indigeat : sed quo bonorum
amicitias auidissime expetat , & se in iis coniungendis ma-
ximum putet beneficium consecutum . Cur autem ad Oc-
cidentem nauigauerit , ipso poteris narrante cognoscere .
Nos in monasterio constituti , uariis hinc inde fluctibus
quatinus , & peregrinationis molestias sustinemus : sed cre-
Ioan. 16 dimus in eo , qui dixit : Confidite , ego uici mundum : quod ,
ipso tribuente , & præfule , contra hostem diabolum victo-
riam consequemur . Sanctum & uenerabilem fratrem no-
strum , papam Alipium ut meo obsequio salutes , obsecro .
Sancti fratres , qui nobiscum in monasterio Domino serui-
re festinant , oppido te saluant . Incolumem te , & memo-
rem mei , Christus dominus noster tueatur omnipotens ,
domine uere sancte & suspiciende papa .

ARGV-

ARGVMENTVM.

INGENS sibi odium apud Romanos Hieronymus contraxit, quod Paulam, & Eustochium una cum Melania, primarias in urbe feminas, ad sanctiorem uitam, monasticumq. institutum traxisset: neque caruit suspitione, quod eas turpiter amaret: propterea nunc cum stomacho Urbem relinquens, dum nauim pro discessu conscendit, huiusmodi obrectatorum obloquiis excitata bile respondet, hominumq. malevolentiam deplorat.

HIERONYMVS ASELLAE.

EPISTOLA XCIX.

I TIBI putem gratias a me referri posse, non sapiam. Potēs est Deus super persona mea sanctæ animæ tuæ restituere, quod meretur. ego enim indignus, nec æstimare umquam potui, nec optare, ut mihi tantum in Christo largireris affectum. Et licet me scelertatum quidam putent, & omnibus flagitiis obrutum; & pro peccatis meis, etiam hæc parua sint: tamen tu benefacis, quod ex tua mente etiam malos bonos putas. Periculosum quippe est, de seruo alterius iudicare: & non facilis uenia, praua dixisse de rectis. Veniet ueniet illa dies, in qua & mecum dolebis ardere non paucos. Ego probrosus, ego uersipellis, & lubricus, ego mendax, & Satanæ arte decipiens. Quid enim est tutius, hæc uel credidisse, uel finxisse de infontibus; an etiã de noxiis credere noluisse? Osculabantur mihi manus quidam, & ore uipereo detrahebāt: & dolebant labiis, corde gaudebāt. uidebat Dominus, & subfannabat illos; & miserum me seruum suum, futuro cum eis iudicio reseruabat. Alius incessum meum calumniabatur, & risum; & ille uultui detrahebat; hic in simplicitate aliud suspicabatur. Pene certe triennium cum eis uixi. Multa me uirginum crebro turba circumdedit. Diuinos libros; ut potui, nonnullis sæpe differui. lectio assiduitatem; assiduitas familiaritatem, familiaritas edu-

fiduciam fecerat. Dicant, quid umquam in me aliter senserint, quam Christianum decebat? Pecuniam cuiusquam accepi? munera uel parua, uel magna non spreui? in manu mea æs alicuius insonuit? obliquus sermo, oculis petulans fuit? Nihil mihi aliud obiicitur, nisi sexus meus: & hoc numquam obiicitur, nisi cum Hierosolymam Paula & Melania proficiscuntur. Esto: crediderunt mentienti: cur non credunt neganti? Idem est homo ipse, qui fuerat: fatetur insontem, qui dudum noxium loquebatur. & certe ueritatem magis exprimunt tormenta, quam risus. nisi quod facilius creditur, quod aut fictum libenter auditur, aut non fictum, ut fingatur, impellitur. Ante quam domum sanctæ Paulæ nossẽ; totius in me urbis studia consonabant. omnium pene indicio dignus summo sacerdotio decernebar. Beatæ memoriæ Damasus meus sermo erat. dicebar sanctus: dicebar humilis, & disertus. Numquid domum alicuius lasciuioris ingressus sum? numquid me uestes sericæ, nitentes gemmæ, picta facies, auri rapuit ambitio? Nulla fuit alia Romæ matronarum, quæ meam posset edomare mentem, nisi lugens, atque ieiunans, squalens sordibus, fletibus pene cæcata, quam continuis noctibus misericordiam Domini deprecantem sol sæpe deprehendit? cuius canticum psalmi, sermo euangelium, delicia continentia, uita ieiunium? nulla me potuit alia delectare, nisi illa, quam manducantem numquã uidi? sed postquam eam pro suæ merito castitatis uenerari, colere, suscipere cœpi; omnes me illico deseruere uirtutes. O inuidia primum mordax tui: o Satanæ calliditas, semper sancta persequens. Nullæ aliæ Romanæ urbi fabulam præbuerunt, nisi Paula, & Melania; quæ, contemptis facultatibus, pignoribusq. desertis, crucem Domini, quasi quoddam pietatis leuauere uexillum. Si balneas peterent, unguenta eligerent, diuitias, & uidiuitatem haberent materiem luxuriæ & libertatis; dominæ uocarentur, & sanctæ: nunc in sacco & cinere formosæ uolunt uideri, & in gehennam ignis cum ieiuniis & pœdore descendere.

uide-

videlicet non licet eis applaudente populo perire cum tur-
 bis. Si gentiles hanc uitam carperent, si Iudæi; haberent
 solatium non placendi eis, quibus displicet Christus. nūc
 uero, pro nefas, homines Christiani, prætermissa domo- *Luc. 6*
 rum suarum cura, & proprii oculi trabe neglecta, in alie-
 no oculo festucam quærunt. lacerant sanctum propositū:
 & remedium pœnæ suæ arbitrantur, si nemo sit sanctus; si
 omnibus detrahatur; si turba sit pereuntium; si multitu-
 do peccantium. Tibi placet lauare quotidie: alius has mū-
 ditates sordes putat. Tu attagenem rufas; & de comeso aci-
 pensare gloriaris: ego faba uentrem impleo. Te delectant
 cachinnantium greges: me Paula, Melaniaq. plangentes.
 Tu aliena desideras: illæ contemnunt sua. Te delibuta mel-
 le uina delectant: illæ potant aquam frigidam suauio-
 rem. Tu te perdere existimas, quidquid in præsentī non habue-
 ris, comederis, deuoraueris: illæ futura desiderant, & cre-
 dunt uera esse, quæ scripta sunt. Esto, inepte, & inani-
 ter, quibus resurrectio corporum persuasit: quid ad te?
 nobis econtrario tua uita displicet. Bono tuo crassus sis:
 me macies delectat, & pallor. Tu tales miseros arbitraris:
 nos te miserabiliorem putamus. Par pari refertur, & inui-
 cem nobis uidemur insanire. Hæc, mi domina Asella,
 cum iam nauem conscenderem, raptim flens dolensq. con-
 scripsi: & gratias ago Deo meo, quod dignus sim, quem
 mundus oderit. Ora autem, ut de Babylōne Hierosoly-
 mam regrediar; ne mihi dominetur Nabuchodonosor, sed *Agg. 1.2*
 Iesus filius Iosedech: ueniat Esdras, qui interpretatur adiu-
 tor, & reducat me in patriam meam. Stultus ego, qui uo-
 lebam cantare canticum Domini in terra aliena; &, deser-
 to monte Sina, Aegypti auxilium flagitabam: non recor- *Hier. 42*
 dabar euangelii; quia qui de Hierusalem egreditur, statim *Luc. 10*
 incidit in latrones, spoliatur, uulneratur, occiditur. sed
 licet sacerdos despiciat, atque leuitas, occiditur. sed *Ioan. 8*
 sericors est: cui cum diceretur: Samaritanus es, & demo-
 nium habes: demonium renuens, Samaritem se non ne-
 gavit. Quia quem nos custodem, Hebræi Samaritem uo-
 cant.

Marc. 3. cant. Maleficum quidam me garrunt : titulum fidei seruus
2. Cor. 6. agnosco . Magum uocant & Iudæi Dominum meum . Se-
1. Cor. 10 ductor & Apostolus dictus est . Tentatio me non apprehen-
 dat , nisi humana . Quotam partem angustiarum perpeffus
 sum , qui cruci milito ? Infamiam falsi criminis imputarunt .
 sed scio , per bonam & malam famam perueniri ad regna
 cælorum . Saluta Paulam ; & Eustochium , uelit nolit mun-
 dus , in Christo meas . Saluta matrem Albinam , soro-
 remq. Marcellam , Marcellinam quoque , & sanctam Feli-
 citatem : & dic eis : Ante tribunal Christi simul stabimus :
 ibi apparebit , qua mente quis uixerit . Memento mei ,
 exemplum pudicitie & uirginitatis insigne ; fluctusq. ma-
 ris tuis precibus mitiga .

ARGUMENTVM.

BONASVM , obrectatorem quendam , ac nasutum rabu-
lam , irridet , eo quod , quæ Hieronymus aduersus uitia scripse-
rat , tamquam contra se scripta , interpretaretur .

HIERONYMVS BONASO.

EPISTOLA C.

EDICI , quos uocant chirurgicos , crudeles pu-
 tantur , & miseri sunt . An non est miseria , alienis
 non dolere uulneribus , & mortuas carnes incle-
 menti secare ferro ? non horrere curantem , quod horret
 ipse , qui patitur , & inimicum putari ? Ita se natura habet ;
Esa. 10 ut amara sit ueritas , blanda uitia existimentur . Esaïas , in
 exemplum captiuitatis futuræ , nudus non erubescit incede-
Hier. 13 re . Hieremias de media Hierusalem ad Euphratem , flu-
 uium Mesopotamiæ , mittitur ; ut inter inimicas gentes ,
 ubi est Assyrius , & castra sunt Chaldaeorum , ponat *se-*
Ezech. 4.24 *qua* corrupendum . Ezechiel stercore primum huma-
 no , deinde bubulo , panem de omni semente conpersum
Amos 7 edere iubetur ; & uxoris interitum siccis oculis uidet . Amos
 de Samaria pellitur . cur , quæso ? nempe ideo , quia chi-
 rurgici

rurgici spirituales, secantes uitia peccatorum, ad pœnitentiam cohortabantur. Paulus apostolus, Inimicus, inquit, uobis factus sum uerum dicens. Et quia saluatoris Gal. 4
Ioan. 6
dura uidebantur eloquia, plurimi discipulorum retrorsum abierunt. Vnde non mirum est, si & nos ipsi, uitiiis detrahentes, offendimus plurimos. Disposui nasum secare scœtentem: timeat, qui strumosis est. Volo corniculæ detrahere garrienti: rancidulam se intelligat cornix. Numquid unus in urbe Romana est, qui habeat truncas inhonesto uulnere nares? Numquid solus Bonasus Segestanus caua uerba, & in modum uesticarum tumentia, buccis trutinatur inflatis? Dico, quosdam scelere, periurio, falsitate ad dignitatem nescio quam peruenisse. quid ad te, qui te intelligis innocentem? Rideo aduocatum, qui patrono egeat: quadrante dignam eloquentiam nare subfanno. quid ad te, qui desertus es? Volo in nummarios inuehi sacerdotes: tu, qui diues non es, quid irascers? Clausum cupio suis ignibus ardere Vulcanum: numquid hospes eius es, aut uicinus; quod a delubris idoli niteris incendia submouere? Placet mihi, de laruis, de bubone, de noctua, de Niliacis ridere portentis. quidquid dictum fuerit, in te dictum putas. in quodcumque uitium, styli mei mucro contorquetur; te clamitas designari. conferta manu in ius uocas; & satyricum scriptorem in prosa arguis. An ideo tibi bellus uideris, quia fausto uocaris nomine? quasi non & lucus ideo dicatur, quod minime luceat; & parcæ, quod nequaquam parcant, & Eumenides furix, quod non sint benignæ; & uulgo Aethiopes uocentur argentei. Quod si in descriptione lædorum semper irascers: iam tibi cum Persio cantabo: Optent te generum rex, & regina: puellæ Te rapiant: quidquid calcaueris, hoc rosa fiat. Dabo tamen consilium, quibus absconditis possis pulchrior apparere. Nasus non uideatur in facie: sermo non sonet ad loquendū: atque ita & formosus, & disertus uideri poteris.

ARGUMENTVM.

CVM, quod Epiphani epistolam ad Ioannem Episcopum Hierosolymitanum, non recte transtulisset Hieronymus, cauilaretur Ruffinus, post querelas, quod, se inscio, & scriniis suffuratus epistolam, nondum plene emendatam, aliquis sit, tam ueterum omnium eruditorum, quam sacrarum scripturarum testimonio docet, quodnam sit optimum genus interpretandi; illud scilicet esse ostendens, quo ipse in uertenda epistola usus est, hoc est, quo sensus & sensu, non uerbum & uerbo transfertur.

HIERONYMVS AD PAMMACHIVM

de optimo genere interpretandi.

EPISTOLA CI.

AVLVS apostolus, præsente rege Agrippa, de
 P criminibus responsurus, quod posset intelligere qui
 auditurus erat, securus de causæ uictoria, statim
 in principio sibi gratulatur, dicens: De omnibus, quibus
 Act. 26 accusor a Iudæis, o rex Agrippa, existimo me beatum,
 cum apud te sim hodie defendendus, qui præcipue nostri
 cunctas, quæ in Iudæis sunt, consuetudines, & quæstio-
 nes. Ecl. 25 nes. Legerat enim illud Iesu: Beatus, qui in aures loqui-
 tur audientis: & nouerat tantum oratoris uerba proficere,
 quantum iudicis prouidentia cognouisset. Vnde & ego bea-
 tum me in hoc dumtaxat negotio iudico, quod apud eru-
 ditas aures imperitæ linguæ responsurus sum: quæ obicit
 mihi uel ignorantiam, uel mendacium, si aut nesciui alie-
 nas litteras uere interpretari, aut nolui; quorum alterum
 error, alterum crimen est. Ac ne forsitan accusator meus
 facilitate, qua cuncta loquitur, & impunitate, qua sibi li-
 cere omnia putat, me quoque apud uos argueret, ut pa-
 pam Epiphanium criminatus est: hanc epistolam misi, quæ
 te, & per te alios, qui nos amare dignantur, rei ordinem
 doceat. Ante hoc ferme biennium miserat Ioanni episco-
 po supradictus papa Epiphanius litteras, arguens eum in
 qui-

quibusdam dogmatibus, & postea clementer ad penitentiam prouocans. harum exemplaria certatim Palæstinæ rapiebantur, uel ob auctoris meritum, uel ob elegantiam scriptiois. Erat in monasterio nostro uir apud suos haud ignobilis, Eusebius Cremonensis: qui, cum hæc epistola per multorum ora uolaret, & mirarentur eam pro doctrina & puritate sermonis docti pariter & indocti, cœpit a me obnixè petere, ut sibi eam in Latinum uerterem, & propter intelligendi facilitatem, apertius explicarem: Græci enim eloqui penitus ignarus erat. Feci, quod uoluit: accitoq. notario, raptim celeriterq. dictaui, ex latere in pagina breuiter annotans, quem intrinsecus sensum singula capitula continerent: siquidem, & hoc ut sibi soli facerem, oppido flagitarat. postulauiq. ab eo mutuo, ut domi haberet exemplar, nec facile in uulgus proderet. Res ita anno & sex mensibus transiit; donec supradicta interpretatio de scriniis eius nouo præstigio Hierosolymam commigrauit. nam quidam pseudomonachus, uel accepta pecunia, ut perspicue intelligi datur, uel gratuita malitia, ut incassum corruptor nititur persuadere, compilatis chartis eius, & sumptibus, Iudas factus est proditor; deditq. aduersariis latrandi contra me occasionem, ut inter imperitos concionentur, me falsarium; me uerbum nō expressisse de uerbo; pro honorabili dixisse carissimum; & maligna interpretatione, quod nefas dictu sit, *μὲν ὅτιν ἀπάντων*, idest reuerendum auribus omnium, noluisse transferre. Hæc, & istiusmodi nugæ, crimina mea sunt. Ac primum, ante quam de translatione respondeam, uolo interrogare eos, qui malitiam prudentiam uocant, unde apud uos exemplar epistolæ? quis dedit? qua fronte profertis, quod scelere redemistis? quid apud homines tutum erit, si ne parietibus quidem & scriniis nostra possumus secreta celare? Si ante tribunalia iudicum hoc uobis crimen impingerem; reos legibus subiugarem, quæ etiam pro utilitatibus fisci noxiis delatoribus pœnas statuunt; & cum suscipiant proditionem, damnant proditorem. Lu-

crum

crum uidelicet placet, uoluntas displicet. Dudum Esychi-
um, uirum consularem, contra quem patriarcha Gama-
liel grauissimas exercuit inimicitias, Theodosius princeps
capite damnauit, quod, sollicitato notario, chartas illius
inuasisset. Legimus in ueteribus historiis, Iudi magistrum,
qui Faliscorum liberos prodiderat, uinctum pueris tradi-
tum, & ad eos, quos prodebat, remissum, nec sceleratam
populum Romanum suscepisse uictoriam. Pyrrhum, Epi-
rotarum regem, cum in caltris ex uulnere curaretur, medi-
ci sui prodicione interfici nefas duxit Fabricius, quin po-
tius uinctum remisit ad dominum, ut scelus nec in aduersa-
rio comprobaret. Quod leges publicæ, quod hostes tueri-
tur, quod inter bella & gladios sanctum est, hoc nobis in-
ter monachos & sacerdotes Christi intutum fuit. Et audet
quidam ex eis, adducto supercilio, & concrepantibus digi-
tis, eructare, & dicere: Quid enim, si redemit, si sollicita-
uit? fecit, quod sibi profuit. Mira sceleris defensio: quasi
non & latrones, & fures, & piratæ faciant, quod sibi pro-
dest. certe Annas, & Caiphas, seducentes infelicem Iu-
dam, fecerunt quod sibi utile existimabant. Volo in char-
tulis meis quaslibet ineptias scribere, commentari de scri-
pturis, remordere lædentes, digerere stomachum, in lo-
cis me exercere communibus, & quasi limatas ad expugnā-
dum sagittas reponere. quamdiu non profero cogitata;
maledicta, non crimina sunt, immo ne maledicta quidem,
quæ aures publicæ nesciant. Tu corrumpas seruulos, soli-
cites clientes, & ut in fabulis legimus, auro ad Danaem
penetres, dissimulatoque quod feceris, me falsarium uoces:
cum multo peius crimen accusando in te confitearis, quam
in me arguis. Alius te hæreticum, alius insinulat dogma-
tum peruerforem. taces ipse: respondere non audes: in-
terpretem laceras: de syllabis calumniaris, & totam defen-
sionem tui putas, si tacenti detrahas. Finge, in transfe-
rendo uel errasse, uel intermisisse me quippiam. hic to-
tius negotii tui cardo uersatur, hæc tua est defensio. num
itcirco tu non es hæreticus, si ego malus interpretes sim?

Non

Non hoc dico, quod te hæreticum nouerim: sciat ille qui accusauit; nouerit ille, qui scripsit: sed quod stultissima sit, accusatum ab alio alium criminari, &, confosso undique corpore, e dormientis uulnere solatium quærere. Hætenus sic locutus sum, quasi aliquid de epistola commutauerim, & simplex translatio possit errorem habere, non crimen. nunc uero, cum ipsa epistola doceat nihil mutatum esse de sensu, nec res additas, nec aliquod dogma confictum; faciunt nã intelligendo, ut nihil intelligant; &, dum alienam imperitiam uolunt coarguere, suã produnt. Ego enim non solum fateor, sed libera uoce profiteor, me in interpretatione Græcorum, absque scripturis sanctis, ubi & uerborum ordo & mysterium est, non uerbum e uerbo, sed sensum exprimere de sensu. habeoq. huius rei magistrum Tullium, qui Protagoram Platonis, & Oeconomicon Xenophontis, & Aeschynis ac Demosthenis duas contra se orationes pulcherrimas trãstulit. quanta in illis prætermiserit, quanta addiderit, quanta mutauerit; ut proprietates alterius linguæ suis proprietatibus explicaret, non est huius temporis dicere. sufficit mihi ipsius trãslatoris auctoritas, qui ita in prologo earundem orationum locutus est. Putaui mihi suscipiendum laborem utilem studiosis, mihi quidẽ ipsi non necessarium. Conuertere enim ex Atticis duorum eloquentissimorum nobilissimas orationes, inter seq. contrarias, Aeschynis & Demosthenis; nec conuertere, ut interpretes, sed ut orator, sententiis iisdem, & earum formis, tam figuris quam uerbis ad nostram consuetudinem aptis. in quibus non uerbum pro uerbo necesse habui reddere; sed genus omne uerborum, uimq. seruauit. non enim me annumerare ea lectori putauit oportere, sed tamquam appendere. Rursum in calce sermonis. Quorum ego, ait, orationes si, ut spero, ita expressero, uirtutibus utens illorum omnibus, idest sententiis, & earum figuris, & rerum ordine, uerba persequens eatenus, ut ea non abhorreant a more nostro. quæ si e Græcis omnia conuersa non erunt, tamen, ut generis eiusdem sint, elaborauimus. Sed & Horatius,

Cccc

ratiſſimus, uir acutus, & doctus, hoc idem in arte poetica eru-
 dito interpreti præcipit: Nec uerbum uerbo curabis redde-
 re fidus interpres. Terentius Menandrum, Plautus & Cæ-
 cilius ueteres comicos interpretati ſunt. nunquid hærent
 in uerbis; ac non decorem magis & elegantiam in transla-
 tione conſeruant? Quam uos ueritatem interpretationis,
 hanc eruditi κακοζήλιαν nuncupant. Vnde & ego, doctus
 a talibus ante annos circiter uiginti, & ſimili tunc quoque
 errore deceptus, certe hoc mihi a uobis obiiciendum ne-
 ſciens, cum Eusebii Cæsariensis χρονικὸν in Latinum uer-
 terem, tali inter cetera uſus ſum præſatione. Difficile eſt,
 alienas lineas inſequentem, non alicubi excidere; & arduū,
 ut, quæ in alia lingua bene dicta ſunt, eundem decorem in
 translatione cōſeruent. Significatum eſt aliquid unius uer-
 bi proprietate: non habeo meum, quo id efferam; & dū
 quæro implere ſententiam, longo ambitu uix breuis uix
 ſpatia conſumo. Accedunt hyperbatorum anſtractus, diſſi-
 militudines caſuum, uarietates figurarum, ipſum poſtre-
 mo ſuum, & ut ita dicam, uernaculum linguæ genus. Si
 ad uerbum interpretor, abſurde reſonant: ſi ob neceſſita-
 tem aliquid in ordine, uel in ſermone mutauero, ab inter-
 pretis uidebor officio reſeſſiſſe. Et poſt multa, quæ nunc
 proſequi otioſum eſt, etiam hoc addidi. Quod ſi cui non
 uidetur, linguæ gratiam in interpretatione mutari; Home-
 rum ad uerbum exprimat in Latinum. plus aliquid dicā,
 eundem ſua in lingua proſæ uerbis interpretetur: uidebis
 ordinem ridiculum, & poetam eloquentiſſimum uix loquē-
 tem. Verum ne meorum ſcriptorum parua ſit auctoritas,
 quamquam hoc tantum probare uoluerim, me ſemper ab
 adoleſcentia non uerba, ſed ſententias tranſtulſiſſe: qualis
 ſuper hoc genere præſatiuncula ſit, in libro, quo beati An-
 tonii uita deſcribitur, ipſius lectione cognoſce. ex alia in
 aliam linguam expreſſa ad uerbum translatio ſenſum ope-
 rit, & ueluti lato gramine, ſata ſtrangulat. dum enim ca-
 ſibus & figuris ſeruit oratio, quod breui poterat indicare ſer-
 mone, longo ambitu circumacta uix explicat. Hoc igitur
 ego

ego uitans, ita beatū Antoniū te petente transposui, ut nihil desit ex sensu, cum aliquid desit ex uerbis. Alii syllabas aucupentur, & litteras: tu quære sententias. Dies me deficiet, si omnium, qui ad sensum interpretati sunt, testimonia replicauero. Sufficit in præsenti nominasse Hilarium confessorem; qui homilias in Iob, & in psalmos tractatus plurimos in Latinum, uertit e Græco; nec affedit litteræ dormitanti, & putida rusticorum interpretatione se tortis; sed quasi captiuos sensus suam linguam uictoris iure transposuit. Nec hoc mirum in ceteris sæculi uidelicet, aut Ecclesiæ uiris; cum Septuaginta interpretes, & Euangelistæ, atque Apostoli idem in sacris uoluminibus fecerint. Legimus in Marco dicentem Dominum, Talitha cumi: statimq. subiectum est, quod interpretatur, puella (tibi dico) surge. Arguatur euangelista mendacii, quare addiderit, tibi dico, cum in Hebræo tantum sit: puella surge. Sed, ut ἐμπατικώτερον faceret, & sensum uocantis atque imperantis exprimeret, addidit, tibi dico. Rursum in Matthæo, redditis ab proditore Iuda triginta argenteis, & empto ex eis agro figuli, scribitur: Tunc impletum est, quod scriptum est per Hieremiam prophetam, dicentem: Et acceperunt triginta argenteos pretium appetiati, quod appetiauerunt a filiis Israel; & dederunt eos in agrum figuli, sicut constituit mihi Dominus. Hoc in Hieremia penitus non inuenitur, sed in Zacharia, aliis multo uerbis, ac toto ordine discrepante. uulgata quippe editio ita se habet: Et dicam ad eos: si bonum est coram uobis, date mercedem mihi, aut renuite. & appenderunt mercedem meam triginta argenteos: dixitq. Dominus ad me: Pone illos in conflatorium; & considera, si probatum sit, sicut probatus sum ab eis. Et tuli triginta argenteos, & misi eos in domo Domini in conflatorium. Quantum distet ab euangelistæ testimonio Septuaginta translatio, perspicuum est. sed & in Hebræo, cum sensus idem sit, uerba præpostera sunt, & pene diuersa. Et dixi, inquit, ad eos: Si bonum est in oculis uestris, afferte mercedem meam; & si non, quiescite.

Cccc 2 Et

Et appenderunt mercedem meam triginta argenteos. Et dixit Dominus ad me: Proiice illud ad statuarium, decorum pretium, quo appretiatum sum ab eis. Et tuli triginta argenteos, & proieci eos in domo Domini ad statuarium. Accusent apostolum falsitatis, quod nec cum Hebraico, nec cum Septuaginta congruat translatoribus; &, quod his maius est, erret in nomine: pro Zacharia quippe Hieremiam posuit. Sed absit hoc de pedisequo Christi dicere: cui curæ fuit non uerba & syllabas aucupari, sed sententias dogmatum ponere. Veniamus ad aliud eiusdem Zachariæ

Ioan. 19 testimonium, quod Ioannes euangelista assumit iuxta Hebraicam ueritatem. Videbunt in quem compunxerunt.

Zach. 12 pro quo in Septuaginta legimus, καὶ ὁπλίσθησαν πρὸς με, ἀνδ' ὧν ἐνῶρχήσαντο. quod interpretati sunt Latini: Et aspicient ad me, pro iis, quæ illuserunt, siue insultauerunt. Discrepat Euangelistæ, Septuaginta interpretum, nostraq. translatio: & tamen sermonum uarietas, spiritus

Matth. 26 unitate concordat. In Matthæo quoque legimus Dominum

Zach. 13 prædicentem apostolis fugam, & hoc ipsum Zachariæ testimonio confirmantem. Scriptum est, ait: Percutiam pastorem, & dispergentur oves. At in Septuaginta, & in Hebræo multo aliter est. non enim ex persona Dei dicitur, ut Euangelista uult, sed ex prophetæ Deum patrem rogantis. Percute pastorem, & dispergentur oves. In hoc, ut arbitror, loco, iuxta quorundam prudentiam, euangelista piaculi reus est, quod ausus sit prophetæ uerba ad Dei referre personam. Scribit supradictus euangelista, ad angeli monitum, tulisse Ioseph paruulum, & matrem eius, & intrasse in Aegyptum, ibiq. mansisse usque ad obitum Hero-

Matth. 2 dis: ut impleretur quod dictum est a Domino per prophetam:

Osee 11 tam: Ex Aegypto uocaui filium meum. Hoc nostri codices non habent: sed in Osee propheta iuxta Hebraicam scribitur ueritatem: Quia puer Israel est, & dilexi eum; & ex Aegypto uocaui filium meum. Pro quo & in eodem loco Septuaginta transtulerunt: Quia paruulus est Israel, & dilexi eum; & ex Aegypto uocaui filios eius. Num omnino repu-

repudiandi sunt, quia istum locum, qui ad Christi maxime
 pertinet sacramentum, aliter transtulerunt? an danda po-
 tius uenia ut hominibus, iuxta Iacobi sententiam, dicen-
 tis: Multa peccamus omnes: & si quis in uerbo non of- Iac. 3
 fendit, iste perfectus est uir, potens refrenare omne cor-
 pus? Illud uero, quod in eodem euangelista scribitur: Et Matth. 2
 ueniens habitauit in ciuitate, quæ dicitur Nazaret: ut im-
 pleretur quod dictum est per prophetas, Quia Nazareus
 uocabitur: Respondeant λογισαῖς αἱ, & fastidiosi æsti-
 matores omnium tractatorum, ubi legerint, discantq. in
 Esaia positum. Nam in eo loco, ubi nos legimus, atque Esa. 11
 transtulimus: Exiet uirga de radice Iesse, & flos de radice
 eius ascendet: in Hebræo, iuxta linguam illius *יִשְׁמַח*, ita
 scriptum est: Exiet uirga de radice Iesse, & Nazareus de
 radice eius crescet. Cur hoc omiserunt Septuaginta, si non
 licet transferre uerbum pro uerbo? Sacrilegium est, uel ce-
 lasse, uel ignorasse mysterium. Transeamus ad cetera. ne-
 que enim epistolæ breuitas patitur diutius singulis immo-
 rari. Idem Matthæus loquitur: Hoc autem totum factum Matth. 2
 est, ut compleretur quod dictum est a Domino per pro-
 phetam dicentem: Ecce uirgo in utero habebit, & pariet
 filium, & uocabunt nomen eius Emanuel. Quod Septua-
 ginta transtulerunt: Ecce uirgo in utero accipiet, & pariet
 filium, & uocabitis nomen eius Emanuel. Si uerba calu- Esa. 7
 mniatur: utique non est idem: habebit, & accipiet; ne-
 que uocabunt, & uocabitis. Porro in Hebræo legimus ita
 scriptum: Ecce uirgo concipiet, & pariet filium, & uoca-
 bit nomen eius Emanuel. Non Achaz, qui arguebatur in
 fidelitatis, non Iudæi, qui erant Dominum negaturi, sed
 uocabit, inquit, ipsa, quæ concipiet, ipsa uirgo, quæ pa-
 riet. In eodem euangelista legimus, Herodem ad aduentum Matth. 2
 Magorum fuisse turbatum; scribiq. & sacerdotibus con-
 gregatis, sciscitatum ab eis, ubi Christus nasceretur; illosq.
 respondisse, in Bethlehem Iudæ. sic enim scriptum est in
 propheta: Et tu Bethlehem, terra Iuda, nequaquam Mich. 5
 minima es in ducibus Iuda: ex te enim egredietur dux, qui

Cccc 3 regar

regat populum meum Israel. Hoc exemplum in uulgata editione sic fertur: Et tu Bethlehem domus Ephrata, modicus es, ut sis in millibus Iuda: de te mihi egredietur, ut sit princeps in Israel. Quanta sit inter Matthæum & Septuaginta uerborum ordinisq. discordia, magis hoc admiraberis, si Hebraicum uideas, in quo ita scriptum est: Et tu Bethlehem Ephrata, paruulus es in millibus Iuda: ex te mihi egredietur, qui sit dominator in Israel. Considera gradatim, quæ ab euangelista sint posita. Et tu Bethlehem, terra Iuda. Pro terra Iuda, in Hebraico habetur Ephrata; in Septuaginta, domus Ephrata. Et pro, Nequaquam minima es in ducibus Iuda, in Septuaginta legitur, Modicus es, ut sis in millibus Iuda: in Hebræo, Paruulus es in millibus Iuda. Sensusq. contrarius est, Septuaginta sibi in hoc dumtaxat loco & Hebraico cōcordante. Euangelista enim dixit, quod non sit paruulus in ducibus Iuda, cum e regione sit positum, paruulus quidem es, & modicus; sed tamē de te mihi paruulo & modico egredietur dux in Israel, secundum illud Apostoli: Elegit infirma mundi Deus, ut confundat fortia. Porro, quod sequitur, Qui regat, uel qui pascat populum meum Israel: aliter in propheta esse perspicuum est. Hæc replico, nō ut euangelistas arguam falsitatis, (hoc quippe impiorum est, Celsi, Porphyrii, Iuliani) sed ut reprehensores meos arguam imperitiæ; & impetrem ab eis ueniam, ut concedant mihi in simplici epistola, quod in scripturis sanctis, uelint nolint, apostolis concessuri sunt. Marcus, discipulus Petri, ita suum orditur euangelium: Principium euangelii Iesu Christi: sicut *Marc. 1* scriptum est in Esaia propheta: Ecce ego mitto angelum meum ante faciem tuam, qui præparabit uiam tuam ante te. Vox clamantis in deserto, parate uiam Domini, rectas facite semitas eius. Hoc exemplum ex duobus prophetis *Mal. 3* compositum est, de Malachia uidelicet, & Esaia. Nam prius *Esa. 40* mum, quod dicitur: Ecce ego mitto angelum meum ante faciem tuam, qui præparabit uiam tuam ante te: in Malachia fine scriptum est. Sequēs autem quod infertur: Vox clamant-

clamantis in deserto &c. in Esaia legimus. Et quo modo
 Marcus itatim in principio uoluminis sui posuit, sicut scri- *Marc. 2*
 ptum est in Esaia propheta: Ecce ego mitto angelū meū;
 quod non scribitur in Esaia, ut diximus, sed in Malachia
 nouissimo duodecim prophetarum? Soluat hanc quæstionem
 culant imperita præsumptio: & ego erroris ueniam depre-
 cabor. Idem Marcus inducit ad pharisæos saluatorem lo-
 quentem: Numquam legistis, quid fecerit Dauid, quando
 necessitatem habuit, & esuriuit ipse & socii eius; quo mo-
 do ingressus domum Dei sub Abiathar pontifice, & panes
 propositionis comedit, quibus non licebat uesci, nisi solis
 sacerdotibus? Legamus Samuelem, siue, ut in communi *1. Reg. 21*
 titulo habetur, Regnorum libros: ibiq. reperiemus, non
 Abiathar scriptum esse, sed Abimelech pontificem, qui po- *1. Reg. 22*
 stea a Doec cum ceteris sacerdotibus, Saul iubente, percus-
 sus est. Pergamus ad apostolum Paulum. scribit ad Corin-
 thios: si enim cognouissent, numquam Dominum gloriæ *1. Cor. 2*
 crucifixissent, sed sicut scriptum est: Quod oculus non ui-
 dit, nec auris audiuit, nec in cor hominis ascendit, quæ
 præparauit Deus diligentibus se. Solent in hoc loco apo-
 cryphorum quidam deliramenta sectari, & dicere, quod
 de Apocalypsi Helix, testimonium sumptum sit: cum in *Esa. 64*
 Esaia iuxta Hebraicum ita legatur: A sæculo non audie-
 runt, nec auribus perceperunt. Oculus non uidit Deus
 absque te, quæ præparasti expectantibus te. Hoc septua-
 ginta multo aliter transtulerunt: A sæculo non audiui-
 mus, neque oculi nostri uiderunt Deum absque te: & opera tua
 uera, & facies expectantibus te misericordiam. Intelligi-
 mus, unde sumptum sit testimonium; & tamen Apostolus
 non uerbum expressit e uerbo, sed παραφρασίως eundem
 sensum aliis sermonibus indicauit. In epistola ad Roma- *Roma 9*
 nos idem apostolus Paulus, exemplum de Esaia sumens, *Esa. 8*
 Ecce, inquit, ponam in Sion lapidem offensionis, & pe-
 tram scandalis: discordat a translatione ueteri, & tamen
 cum Hebraica ueritate concordat. in Septuaginta enim
 contrarius sensus est, Non ut lapidi offensionis occurretis,

Cccc 4 neque

1. Pet. 2 neque ut petrae ruina: cum apostolus quoque Petrus Hebraeis Pauloq. consentiens ita posuerit: Incredulis autem lapis offensionis, & petra scandali. Ex quibus uniuersis perspicuum est, apostolos, & euangelistas, in interpretatione ueterum scripturarum, sensum quæsisse, non uerba, nec magnopere de ordine sermonibusq. curasse, dum intellectui res pateret. Lucas, uir apostolicus, & euangelista, scribit, Stephanum, primum Christi martyrem, in Iudaica con-
Act. 7 cione narrantem: in Septuaginta quinque animabus descē-

dit Iacob in Aegyptum: & defunctus est ipse: & patres nostri translati sunt in Sychem, & positi sunt in sepulcro, quod emit Abraham pretio argenti a filiis Emor patris Sychem.

Gen. 23 Hic locus in Genesi multo aliter inuenitur, quod scilicet Abraham emerit ab Ephron Etheo filio Seor, iuxta Hebrō quadringentis drachmis argenti speluncam duplicem, & agrum circa eam, sepelieritq. in ea Saram uxorem suam.

Gen. 33 Atque in eodem legimus libro, postea reuertentem de Mesopotamia Iacob cum uxoribus & filiis suis posuisse tabernaculum ante Salem urbem Sychimorum, quæ est in terra Chanaam, & habitasse ibi, & emisse partem agri, in quo habebat tentoria, ab Emor patre Sychem centum agnis,

Gen. 25 & statuisset ibi altare, & inuocasse ibi Deum Israel. Abraham non emit specum ab Emor patre Sychem, sed ab Ephron filio Seor, nec sepultus est in Sychem, sed in Hebrō, quæ corrupte dicitur Arboch. Duodecim autem patriarcharum, non sunt sepulti in Arboch, sed in Sychem, qui ager non est emptus ab Abraham, sed a Iacob. Differo solutionem & istius quæstiunculæ: ut obtrectatores mei quærant, & intelligant, non uerba in scripturis consideranda, sed sensus. Vicesimi primi psalmi iuxta Hebræos id ipsū exordium

Matth. 27 est, quod Dominus locutus est in cruce יהוה דבך יהוה דבך Eli Eli lamma zabathani: quod interpretatur Deus meus, Deus meus, quare me dereliquisti? Reddant rationem, cur Septuaginta translatores interposuerint, Respice in me. ita enim uerterunt: Deus Deus meus, respice in me, quare me dereliquisti? respōdebunt utique, nihil damni in sen-

su

su esse, si duo uerba sint audiāt. audiant & a me non pericli-
 rari ecclesiarum statum, si celeritate dictandi, aliqua uer-
 ba dimiserim. Longum est nunc euoluere, quanta Septua-
 ginta de suo addiderint, quanta dimiserint, quæ in exem-
 plaribus Ecclesiæ, obelis asteriscisq. distincta sunt. Illud
 enim, quod legimus in Esaia: Beatus, qui habet semen in Es4.31
 Sion, & domesticos in Hierusalem: solent Hebræi deride-
 re, cum audierint. Necnon & in Amos post descriptionem Amos 6
 luxuriæ: Stantia putauerunt hæc, & non fugientia. Reue-
 ra sensus rhetoricus, & declamatio Tulliana. Sed quid fa-
 ciemus ad authenticos libros, in quibus hæc non fuerunt
 adscripta, & cetera his similia; quæ si proferre nitamur, in-
 finitis libris opus est? Porro, quanta dimiserint, uel alte-
 ris testes, ut dixi, sunt, uel nostra interpretatio, si a dili-
 genti lectore translationi ueteri conferatur; & tamen uires
 Septuaginta editio obtinuit in ecclesiis, uel quia prima est,
 & ante Christi facta aduentum; uel quia ab Apostolis, in
 quibus tamen ab Hebraico non discrepat, usurpata. A qui-
 la autem, proselytus & contentiosus interpres, qui non
 solum uerba, sed etymologias quoque uerborum transfer-
 re conatus est, iure proiicitur a nobis. Quis enim pro fru-
 mento & uino & oleo possit uel legere, uel intellegere,
 χεῖμα, ὀπωρισμὸν, σιλβάτητα, quod nos possumus dice-
 re infusionem, pomationemque, & splendentiam. Atqui
 non solum Hebræi habent ἀρθρα, sed & ille κακόζηλος,
 qui syllabas interpretatur, & litteras, ut dicat, σείει τὸν
 οὐρανὸν, καὶ σείει τὴν γῆν: quod Latina lingua omnino nō
 recipit. cuius rei exemplum nos ex nostro sermone cape-
 re possumus. quanta enim apud Græcos bene dicuntur,
 quæ si ad uerbum transferamus, in Latino non resonant:
 & e regione, quæ apud nos placent, si uertantur iuxta or-
 dinem, apud illos displicebunt. sed, ut infinita præteream,
 & ostendam tibi, uir omnium nobilium Christianissime,
 & Christianorum nobilissime, cuiusmodi falsitatis me in
 epistolæ translatione reprehendant, ipsius epistolæ ponā
 cum Græco sermone principium, ut ex uno crimine intel-
 ligam-

ligantur, & cetera. εἶδει γὰρ ἡμᾶς, ἀγαπητὲ, μὴ τῇ οἰήσει
 τῆς κλήρων φέρεσθαι. quod me ita uertisse memini: Opor-
 tebat nos, dilectissime, clericatus honore non abuti in su-
 perbiā. Ecce, inquit, in uno uersiculo quanta men-
 dacia. primum ἀγαπητὸς dilectus est, non dilectissimus.
 deinde οἰήσις exultatio dicitur, non superbia. non enim
 dixit οἰδήματι, sed οἰήσει. quorum alterum tumorem, al-
 terum arbitrium sonat. Totumq. quod sequitur, Clerica-
 tus honore non abuti in superbiā, tuum est. Quid agis,
 o columen litterarum, & nostrorum temporum Aristar-
 che, qui de uniuersis scriptoribus sententiam feras? Ergo
 frustra tanto tempore studuimus: & sæpe manum ferulæ
 subduximus. Egrescentes de portu, statim impigimus.
 Igitur, quia & errasse humanum est; & confiteri errorem,
 prudentis: tu, quicumque reprehensor es, tu me, obse-
 cro, emenda præceptor, & uerbum de uerbo exprime.
 Debueras, inquit, dicere: Oportebat enim nos, dilecte,
 non æstimatione clericorum ferri. Hæc est Plautina eloqué-
 tia, hic lepos Atticus, & musarum, ut dicunt, eloquio
 comparandus. Completur in me tritum uulgi sermone
 prouerbiū: Oleum perdit, & impensas, qui bouem mit-
 tit ad ceroma. Hæc non est illius culpa, cuius sub perfo-
 na alius agit tragœdiam, sed Ruffini, & Melaniæ, magi-
 strorum eius, qui illum magna mercede nihil scire docue-
 runt. Nec reprehendo in quolibet Chrîtiano sermonis im-
 peritiā. atque utinam Socraticū illud haberemus: Scio,
 quod nescio. Et alterius sapientis: Te ipsum intellige. Ve-
 nerationi mihi semper fuit non uerbosa rusticitas, sed san-
 cta simplicitas. Qui sermone imitari se dicit apostolos,
 prius imitetur uirtutes in uita illorum. In loquendo sim-
 plicitatem excusabit sanctimonie magnitudo; & syllogis-
 mos Aristotelis, contortaq. Chrysippi acumina resurgens
 mortuus confutabit. Ceterum æculum, si quis e nobis,
 manens inter Cræsi opes, & Sardanapali delicias, de sola
 rusticitate se iactet: quasi omnes latrones, & diuersorum
 criminum rei disertī sint; & cruentos gladios, philosopho-
 rum

rum uoluminibus, ac non arborum truncis oculant. Excessi mensuram epistolæ, sed non excessi doloris modum. nam qui falsarius uocor, & inter mulierum radios & textrina dilanior, contentus sum crimen abnuere, non referre. unde arbitrio tuo cuncta permitto; ut legas ipsam epistolam, tam Græcam, quam Latinam: & illico intelliges accusatorum meorum nœnias, & probrosas querelas. Porro mihi sufficit amicum instruxisse carissimum, & in cellula latitantem diem tantum expectare iudicii. optoque, si fieri potest, & si aduersarii siuerint, commentarios potius scripturarum, quam Demosthenis & Tullii Philippi-
cas, tibi rescribere.

ARGUMENTVM.

RESPONDET iis, qui D. Hieronymo obtreclabant, quod quadam ex nouo testamento iam recepta mutasset, & uirginum cum uiris consuetudinem uituperasset.

HIERONYMVS MARCELLAE.

EPISTOLA CII.

POST priorem epistolam, in qua de Hebræis uerbis pauca perltrinxeram, ad me repente perlatum est, quosdam homunculos mihi studiose detrahere; cur, aduersum auctoritatem ueterum, & totius mundi opinionem, aliqua in euangeliiis emendare tentauerim. Quos ego cū possem meo iure contemnere; (Asino quippe lyra superflue canit) tamen, ne nos superbix, ut facere solent, arguant, ita responsum habeant; non adeo me hebetis fuisse cordis, & tā crassæ rusticitatis, (quam illi solam pro sanctitate habent, piscatorum se discipulos asserentes: quasi iccirco sancti sint, si nihil scierint) ut aliquid de Dominicis uerbis aut corrigendum putauerimus, aut non diuinitus inspiratum; sed Latinorum codicum uitiositatem;


tatem, quæ ex diuersitate librorum omnium comprobatur, ad Græcam originem, unde & ipsi translata non denegant, uoluisse reuocare. Quibus si displicet fontis unda purissimi: cœnosa riuulos bibant; & diligentiam, quam auium siluas, & concharum gurgites norunt, in scripturis legendis abiciant: sintque in hac re tantum simplices, ut Christi uerba existiment rusticana, in quibus per tanta iam sæcula tantorum ingenia sudauerunt, ut rationem uerbi unusquisque magis opinati sint, quam expresserint. **A⁷. 26** Apostolum arguant imperitiæ, qui ob multas litteras insanire dicatur. Scio te, cum ista legeris, rugare frontem, & libertatē meam rursum seminarium timere rixarum, ac meum, si fieri potest, os digito uelle comprimere: ne audeam dicere, quæ alii facere non erubescunt. Rogo, quid a nobis libere dictum est? numquid in lancibus idola cælata descripsi? numquid inter epulas Christianas uirginalibus oculis baccharum satyrorumque complexus innexui? aut umquā aliquem amarior sermo pulsauit? numquid ex mendicis diuites fieri doluimus? numquid reprehendi hereditarias sepulturas? Vnum miser locutus, quod uirgines sæpius deberent cum mulieribus esse, quam cum masculis, totius oculos urbis offendi, cunctorum digitis notor. **Psal. 68** Multiplicati sunt super capillos capitis mei, qui oderunt me gratis, & factus sum eis in parabolam: & tu putas me aliquid deinceps locuturum? Verum, ne Flaccus de nobis rideat: Amphora cœpit Institui corrente rota, cur urceus exit? Reuertimur ad nostros bipedes asellos; & illorum in aure bucina magis, quam cithara, concrepamus. Illi legant, spe **Rom. 12** gaudentes, tempori seruientes: nos legamus, spe gaudentes, Domino seruiennes. Illi aduersus presbyterum accusationem omnino putent recipiendam: nos legamus, aduersum presbyterum accusationem ne receperis, nisi sub duobus, aut tribus testibus: peccantes autem coram omnibus argue. Illis placeat humanus sermo, & omni acceptione dignus: nos cum Græcis, idest, cum Apostolo, qui Græ


ce locutus est, erremus, Fidelis sermo, & omni acceptio- 1. Tim. 1
ne dignus. Ad extremum illi gaudeant gallicis canteriis:
nos solutus uinculis, & in saluatoris ministerium præpara-
tus Zachariæ asellus ille delectet; qui postquam Domino Zach. 9
terga præbuit, cœpit Esaïæ consonare uaticinio: Beatus, Esa. 32
qui seminat secus omnem aquam, ubi bos & asinus calcât.

FINIS.



005631577





L12